




1623/c

BURMANNUS, Petrus, the elder







SYLLOGES
EPISTOLARUM

A

VIRIS ILLUSTRIBUS
SCRIPTARUM

TOMUS III.

QUO

NICOLAI HEINSII, J. FR. GRONOVII, ISAACI VOSSII,
JANI VLITII, ARNOLDI SLICHTENHORSTII, VIN-
CENTII FABRICII, EZECHIELIS SPANHEMII,
ET HADRIANI WALLII

EPISTOLAE

MAXIMAM PARTEM MUTUAE EXHIBENTUR.

SYLLOGES
EPISTOLARUM

VIRI ILLUSTRIBUS
SCHEFFERUS

TO M. J. W.

000

DESCRIPTIO ANATOMICA ET HISTORIA
DE ANATOMIA ET HISTORIA
DE ANATOMIA ET HISTORIA
DE ANATOMIA ET HISTORIA

EPISTOLAE

DE ANATOMIA ET HISTORIA



JOHANNIS FREDERICI GRONOVII
ET
NICOLAI HEINSII
EPISTOLAE.
MUTUAE.

EPISTOLA I.

J. FREDERICUS GRONOVIVS

Nicolao Heinsio S. P. D.

Leidam.



Desideratissimas literas tuas, o magnum maximo Parenti decus, heri tandem ab Elzeviriis accepi. His mandes licet, si quid recte curatum velis. Non traho responsum, nulla elegantia aut eruditione, haereditariis tibi, solo affectu commendabile. De Hesychio maximas ago gratias & similem, immo omnem operam, tibi respondeo: Elzeviriis satis faciam. Palmaria Illustrissimi viri emendatio probabilitate sua me percussit, simul domum redii, melleos sermones vestros ruminans, & complicatas mentis notiones evolvi. Recordabar *cestrosphendonae* mentionem apud Livum extare, quaeque de ea & *cestro* (idem enim est,) annotavit Turnebus. Cui pulcherrime convenit illud *turbo*, pro rotatione, quae usum habuit in missione istius teli. Sic *turbinem catastae* dixit Statius noster, pro circuitione fervorum in catasta, qua utebantur, dum specularentur emptores corpora. De quo ritu ex Menandro & Luciano opportune notavit Casaubonus ad Suetonium. Verba Statii sunt in Epicedio in Glauciam:

*Non te barbaricae versabat turbo catastae,
Nec mixtus Phariis venalis mercibus infans,
Compositosque sales meditataque verba locutus,
Quaefisti lascivus herum tardeque parasti.*

Ita sine dubio scribendum conjectaveramus, & reperimus firmatum a MS^o Senensi. Romanus codex & traduces ejus Parisienses ed. *turba* habent. At caeteri

1 Vid. Diatrib. Statianae Cap. XVII
Tom. III.

terit a Politiano *verna*. Quod ne sensum quidem habet. Et puto voluisse Politianum *versabant*, *verna* *catastae*. Ut *verna* sit ipse Glaucia. Sed nihil opus tricari. *Cestus* semper putavi scribendum esse, nec dubito illud *caestus* ab imperitis magistris esse, qui superioribus seculis in latinam linguam jure suo impotenter atque impudenter usi sunt. Etiam alibi in ² Statianis nostris cum reverentia reprehenderamus lapsum summi viri, qui primaevam & *Castigo* notionem esse putat loro vel cesto cadere. Verum est, *καπὸ* & *κασσοῦ*, quo utebantur Dores pro *κασσῶ*, *Castigo* deduci, sed ut natura prior loro usus ad cingendum, quam ad puniendum, ita & significatio & *Castigo* prior pro vincere, stringere, quam verberare. Retinuit proprietatem illam divinus Stadius noster, cum ait: *nodis* & *castigata jubarum Libertas*. Eidem tori *castigati* nihil aliud, quam Tacito, ni fallor, in Germania sua, *stricti artus*. Unde egregium Martialis locum explicavimus, in quo frustra fuerunt interpretes. Sed non vacat nunc Diatriben nostram describere. Tu videbis aliquando publice, aut apud nos privatim, si honore visitationis nos dignaberis. Hesychii locus omnino etiam suspectus mihi; sed dolui te hoc asserere, qui docere nos potueras, quae facile erat haurire ex tripode, quam domi habes. Illum locum: ³ *Et quas percoquit Ebofia cannas*: eodem modo, quo Scaliger, emendat Gevartius: sed si tu vera videre vis, inspicie Plinianas excercitationes τοῦ πένυ Salmasii, qui felicissime in illum locum incidit. Gruteri notas ad Sylvas habeo omnes, & cum lubet, copiam tibi inspiciendi faciam, ut ipse iudices. Nam nos nihil dignum illo viro ibi deprehendimus. Thomsoni non vidi, neque scio illum quicquam egisse in Papinio, nisi quod iudicium suum de unico loco cum Cl. Scriverio communicavit, isque cum Gevartio: ubi nos tamen in alia omnia imus. Verba sunt in Kalendis Decembribus; *dum refero diem beatum Laeti Caesaris ebriamque partem*. Inspice Gevartium & vide, an invenias ibi, quod placeat. Alia ejus si habes, est tuae comitatis, nos eorum non habere ignaros, & simplicitatis nostrae est agnoscere & laudare beneficium tuum. Excerpta Codicis Florentini, cujus Wouwerius in epist. ad Scaligerum meminit, curiosissima habemus ab A. V. Lindenbrogio transmissa. Habes epistolam indignam elegantia tua Charisique, sed dignam festinatione & jejunitate nostra; a qua nihil placitum tibi sperabis. Οψιμαθεῖς enim sumus, & fortunae iniquitate, turba potius sunt, quae profecimus, si quid profecimus, quam legitimi otii ad horum studiorum dignitatem amplitudinemque diligentes labores. Parentem tuum, incomparabilem virum, submisit officioque saluto, & ne nostri obliviscatur aut promissi, te *πειλὴν* constituo. De Fabricio grata fuere, quae tu amanter. Si quod ad eum literarum daturus, ne time nobis committere, qui utrique haec & majora officia lubentes debemus. Scriverium, Boxhornium, Bodecherum, illa urbis & Academiae vestrae primaria lumina, salvere jubeo. Tibi me totum devoteo, & oro obsecroque, ut identidem de tuo amore suavissimis literis tuis me commonefacias, exstetque languorem nostrum doctrina & nitore tuo. Vale; charissimum pectus

2 Diatrib. Cap. xxv. 3 Vid. Diatrib. Cap. xiv.

& bene age. Ampliff. Grafwinkeliuſ ſeceſſum ruſtreſtrem petiit. Grotium ſimul videro, mandatum peragam. Iterum vale, decus noſtrum. Hagae Prid. Eid. Octobr. Anno MDCCXXXVI. Ad Cl. Golium nuper literas miſi, quas crediderat mihi Caecil. Puteanuſ. Eae an curatae ſint, inquire, niſi moleſtum eſt, & praeſtantiffimum virum a me ſaluta. Ambitioſis titulis abſtine, quaefo, cum reſcripſeris. An non ſufficit amicum appellare? Nomen cum ſcripſeris, omnia ſcripſeris: Certe vos Gal- lique ridere ſoletis Germanos, qui pinguedine linguae noſtrae & ambitione Latinam conſpurcant.

EPISTOLA II.

J. F. R. GRONOVIIUS

*Nic. Heinsio.**Leidam.*

STRAATENIUM, cujus doctrinam rariffimaſque dotes Fama, quae iſtius- modi nihil in occulto eſſe patitur, jam pridem mihi commendaverat, quod amicitiiſ noſtriſ adnexuiſti, immenſas tibi gratias ſcribo, mi Heinſi. Et ſi ſciuiſſem ibi agere, occupaviſſem eum, tibiſque ultro id muneris injunxiſſem, ut tantum ingenium mihi conciliares. Sunt enim majora, ob quae juvenum iſtum admiror, quam quae tu in eo laudas, ſtadium Criticum. Si enim Criticum eſſe (videor intelligere illud veſtrum tam ſubtile) eſt emendationes malle, quam lepores captare, pro eruditione morbum & infaniam contrahere, male ſentis de amicis tuiſ, quos Criticos judicas, aut certe ego nolim hac mercede Criticus eſſe. Nec tibi, puto, amicis opus eſt, qui Anticyra indigent. De corre- ctiuncularum captatoribus judico tecum; atque in conſenſu noſtro laetor. Ego a prima aetate in lectione veterum id potiffimum habui, ut mei mores emen- darentur, non ut apices & puncta librorum. Si interim frequenter legendo eo profeciſmus, ut genium capere Scriptoriſ, ipſumque ſua mente & ſtilo do- nare poſſem, in lucro deputavi. Barbari ſunt, qui non puram aquam atque ingenuam, quam turbidam ſordibuſque permixtam bibere malunt. Sed nihil infeliciuſ magiſtriſ, qui in literiſ & ſyllabiſ conſenuerunt, pulicum ſaltuſ me- tiuntur, & ut punctum vel lineam viſu comprehendant, quod negant fieri poſſe. Mathematici, operam perdunt. Philoſophia eſt, illa antiqua & maſcula, quae Philoſophum virum bonum putabat, (quales ex hodierniſ moribuſ ubi ſient?) hiſtoria, civilis prudentia: quare veteres, & intelligere eos, & re- cte de illiſ judicare amamus: hae mihi literae ſunt, in quibuſ quam parum haecenus profeciſmus, nemo modeſtiuſ, quam ipſi agnoſcimuſ: neque enim erudituſ ſum, neque ut habear, laboro, qui non didici primariam artem no- ſtrorum hominum, verba dare ſeculo & fama illudere. Sed illic omiſeram poe- ne juris Caefarei ſtadium, cui & olim initiati ſumuſ, & quod nunc toti repe-
timuſ,

timus, postquam destertuimus esse, quos vocas, Critici, & lepores (ita dicis quidem: sed, pace tua, erras: cuniculi erant vel gallinagines) captare, quam emendationes maluimus. Haec patria tua, postquam in eam tot nostrae naufragiis ejecti sumus, mutare me rationem studiorum coegit, dum inani ambitione doctos, quos colebam, devincire satago. Nunc aetas & dies me movent, uti, quam haecenus munivi viam, pleno gradu carpam. Haec poene graviora epistola: sed duxit me eo filium tuum, quod sequor & relego: tum cupio a te, adolescente mei amantissimo, quemque ex merito diligo, & quem cito praecipuis luminibus hujus aetatis per vestigia paterna aemulum certis notis auguror, cum forte fastidies, quem nunc, ut scribis, dicere amicum vereris (quod tamen abominor) propius nosci. Ob catalogum bibliothecae valde te amo. Ne metue, ut aliquando ad vos excurramus, bruma imminente. Nec enim, sive aestus, sive rigor nos impedit, quo minus simus officiosi: & cum per ocium indicem illum perlustraverimus (quod nunc nondum licuit) ita forte accendetur cupido nostra, ut carere vestra nequeamus. Risi sane, ut frontem ferirem, in illis, quae narras de nobilissima gente, quam sic sua facinorae decent. Illud apud Statium: *Et flexae Balearicus actor habenae*, miror te mirari. Virgilius, Silius, Lucanus ita loquuntur. Et ratio in manifesto est. Ne dicam, *habenam* simpliciter pro loro apud Latinos legi. *Guntherus* poeta est primus, quos scimus Germanorum ex Helicone perenni fronde coronam retulisse. Editus est una cum Othone Frisingensi & Radewico a P. Pithoco Basileae an MDLIX. Etiam inter Germanicarum rerum scriptores a I. Reubero Hanov. 1619. cum notis J. Spigeli. C. Rittershusius cum notis Tubingae ante quadraginta fere annos eundem publicavit. Constitueram ego quoque aliquando in honorem nostrae gentis, tum, quod etsi vitia sui aevi non effugit, apparet tamen in eo & vis ingenii & imitatio optimorum Poëtarum: ne dicam de historia, in quam cum Othone Frisingensi & Radewico ille unicus est: ne dicam, quod artes aulae Papalis prodit pulcherrime, Caesarisque majestatem & jus asserit, ut non intersit boni publici istum scriptorem perire. Est autem corruptissimus adhuc, & plurima jam notaveramus, anno praecipue, cum Amsterodami ejus mihi copia esset. Sed bonum factum, quod consilium illud abjeci: quae enim de hoc scriptore nostrae opera judiciorum ludibria fuissent apud eos, quibus Silius Statiusque, quostquam nos illis non male fecimus, evolverunt. Isthoc precio omnibus omnino manus abstineamus, ne cum illos recensuerimus, ut recenseantur jure habeantur indigni. Decem autem libros scripsit Guntherus, sub nomine *Ligurini*, quia res Frederici I. Imp. in Liguria gestas canit. Bodecheri poemata avide exspecto. Ampliss. Grafwinkeliuss a vobis reversus, & suis Gratiis plenus, & vestris inebriatus, ingratiis me in Heliconem traxit, & non satis habens male tornatos versiculos expressisse, absente me & inscio ad Bodecherum misit. Ego hic me non jacto, nec poeta *εὐχόμεναι εἶναι*. Perinde ergo est mihi, sive placuerint optimo amico nostra propter affectum, sive dedignetur purpurae suae centonem hunc adjungere. Metus est, ne contagione ipsius chartae nostras ad piper tusque sequantur, aut doctissimorum va-

tum

5

Hagae a. d. xiv. Kal. Decembr. Anno c1010cxxxvi.

EPISTOLA III.

J. F. R. G R O N O V I U S

Nic. Heinsio.

Leidam.

Nobilissime & elegantissime Heinſi, non conſtitueram prius ad te aliquid literarum dare, quam adungere poſſem ad incomparabilem parentem tuum, quibus & habitum animi mei poſt incredibilem veſtram erga me comitatem & prothymiam conſteſtarer; & de promiſſa ad Statium meum diſſertatiuncula modeſte eum monerem. Id quod non licebit, niſi cum deferbuerint paullum ſedaverintque negociola, quae me undique circumſtrepunt, quamquam adhuc uſque dum reverſus fui, totos dies nihil agendo, aut neſciendo potius quid egerim, conſumpſerim. Sed rupit deſtinationem meam faſciculus Fabricii- noſtri, qui nudius tertius mihi redditus eſt, ille ipſe, quem epiſtola, quam apud vos reſignabam, minata fuerat. Deſcripſeram ipſi verba epiſtolae tuae, ubi de ipſo loquebaris, ut hoc velut condimento temperarem horribilem nuncium, quem ſui pertinacis ſilentii hic precium tulerat. En redhoſtimentum; has incluſas una cum poëmatio. Acceſſere dein tuae quoque humaniſſimae, una cum excerptis Claudiani MS. hem ſtrenuitatem! At ego ignavus adhuc ne cogitare quidem potui de ſolvendis promiſſis. Ita diſtineor. Et jam ad alterum illum operam tuam (ut jocatur Comicus) velocem, non corbitam promittis. Quid dicam, mi Heinſi, meus ocellus, meum corculum: amo te, amplector te, ſi recludere poſſes ſecreta pectoris mei, aut ſi tantisper, ſpecularis materia ei obducta eſſet, ut intimas fibras introſpicere poſſes, videres immani incendio amoris erga te nos ardere: in quo equidem conflagrare & abſumi cupio. Sed quid attinet verbis uti, quae tanta reperire non poſſum, quantopere me uris. Spectemur itaque agendo. Epiſtolam Dn. Pontani avide deſidero. Mone itaque praeſtantiſſ. Boxhornium, & ſalvere jube. Comelinum rogo ut adeas, & ſermonem injicias de Poëmatibus, Satiraque in Poëtas Fabricii, & quid reſponderit, ad me perſcribas. Velim quoque ut in Suida quaeras, ſi faciat mentionem. Meleagri iſtius, cujus epigrammata Graeca exſtant, ut ſciri poſſit, qua aetate vixerit. Nam cum totam Anthologiam percurrerim non inveni epigramma,

inde argumentum instituere possem ejus rei, Aut quare potius ex Parente tuo, qui certior nobis autor sexcentis Suidis: Invenio in scidis MS. duo epigrammata, in quibus eodem in argumento eorumdem profusi sensuum verbis cum Statio meo utitur, quae fortasse inferam chartis meis: De Claudiano cunctationi ignosce, quam tot causae causantur. Propediem tamen faxo promissa appareant. Gevartii ad Rutgerium epistolam, quam describere constitueram, inter sarcinulas meas inveni, quod nesciebam, an scires: volebam autem ut scires bene custodiri, & ad te remissum iri, simul descripsero. Divinum Parentem tuum, verendam amitam; dulcissimam sororem officiosiss. saluto. Nobilissimos item Ploosium & Stratenium; tum Scriverium, Bodecherum, cujus poemata videre gestio. Omnium erga me, dum istic fui, humanitas manet alta mente reposta. Vale & me ama, amor meus & ad

Λιέν ἀρισεύειν ἢ ὑπέρροχον ἔμμεναι ἄλλων

Te pater Aeneas & avunculus excitet Hector.

Scripsi ὡς τάχῃ, Hagae a. d. x. Kal. Febr. Anno ciccicxxxvii.

Manilio Sufii Scaliger jam usus est. Vide in Comm. pag. 106. MS. liber non fuit alius, quam Gemblacensis. Sed generosus animus, qui tantumdocebat nos, quae nemo poterat alius, multa minuta praetermisit. Discrucior mihi proprium librum deesse: duplicatur enim labor, si in aliam chartam & Manilii verba, & MS. lectionem, & Scaligeri notam conicere debeam. Tibi tamen gratias ago, quod, ut petieram, licet frustra, apud illum librorum scrutarium (ignosce κατὰχρήσει) inquirere voluisti.

EPISTOLA IV.

J. F R. G R O N O V I U S

Nic. Heinsio.

Leidam.

A Mantissime frater: Quae ad Martialem observasti, fane quam grata fuerunt. Profecto non est cujusvis emendare veteres autores; minime vero omnium, qui haec studia contemnunt, aut pro levibus, & quae aliud agendo tractantur, habent: τέχνης γάρ ἐστιν, ὥσπερ ἡ ἀλλότι, ἢ οὐκ ἐνδέχεται ὅταν τύχη ἐκ παρέρων μελετᾶσθαι, ἀλλὰ μᾶλλον μηδὲν ἐκείνῳ πάρεργον ἄλλο γίνεσθαι, ut in alia re eleganter dixit Thucydides. Quare vides ex sensus infirmitate, aut imperitia, aut denique securitate & nimia opinione sui, quae plerumque elegantia ingenia corrumpit, hujuscemodi judicia proficisci. Quae ferimus lubentes, & censemus maximum praemium nostrorum laborum esse, quod aliter censemus. Tu vero perge, corculum nostrum, cum haereditario tibi genii vigore diligentiam conjungere. exinde enim praeclarum illud & insigne, quod in magnis viris admiramur, existit. Lib. i i i. ep. pen. *ludere* procul dubio rectum est, ut vidisti. Agnoscis tamen in illo *laedere* indicem vetustae scripturae, quae *loedere* erat,

erat, ut *moerus* pro *murus*. Lib. ix. 71. *Res est magna cacare Mathon*, memini etiam me in optimo Pirkheimeri codice inveniisse. Et putabam tunc scripsisse Martialem: *vacare*. Hoc est, quietum esse, nec ejusmodi recitationis aut alius operis avocatione fugere sensum morbi. Alludit enim ad Tranquillitatem mentis, quam perpetuo in ore habent e porticu Philosophi, qui dolorem esse malum summum negant: aut quietem, quam jactant magistri illius ex hortulo discipuli. Quare totam illam Philosophiam *quietis magisterium* appellat Tertullianus, quod imprudenter in *pnicis magisterium*, quamvis docte, mutavit illustris Scaliger, uti legisti in Rutgersii variis. lib. v. cap. i. Lib. v. Ep. 20. *Flammaris togae* non dubito recte conjecisse Scriverium, ut *palmaris*, *pegmaris*. Nec semel observavi in vet. lib. τὰ L & R confusa. Sic promiscue *Latialis* & *Latialis* invenies. Lib. v. Ep. 62. *Procuratorem vultu qui praeferat aequo*, vehementer movet salivam. *Aequo* est prorsus simili, respondentis. Non tam a procuratore requiritur, ut aequus sit, quam ut diligens & acriter nitatur pro eo, cujus res agit. Lib. vi. Ep. 41. *Qui recitat lauro fauces & tempora vinetus*. erat etiam in cod. Pirkheimeri. Sed non capio τὸ *Lauro*. *Lana* siquidem manifestum est focale intelligi. Quaerendum. Lib. vi. Ep. 85. *Praemia quinta* haut dubie Martialis est. Quas ad Fabricium habes, ad me mitte: sed per amicum, ut circumcidamus sumptus. Notarem tibi, ubi Christenius habitaret, sed non est onerandus vir humanissimus hoc munere, qui nec Fabricium familiarem habuit, nec scit, quo destinare eas Hamburgi debeat. Ego vero rationes cum ipso habeo & eorum numulorum, quos expendit pro iis, quae ad me mittuntur, & pro iis, quae ego ad ipsum. Gaudeo, & ejus nomine maximas tibi gratias ago, quod Elzevirium permovistis, ut non negaret Fabricio operas suas: & curabo, quantum in me est, ne Fabricius sibi desit. Levium monebo de libris MSS. ubi videro. Sed jocone an serio dicam? non duco in hoc censu Thebaidem Statii, quam ego semper habui, & qua adhuc utor; is liber pro opera, quam nos publico impendimus, & pro liberalitate atque amicitia Bodecheri nostri meus debebat esse. Sed tibi, charissime, nihil invidebo. Itaque ubi contulero, si voles, tibi tradam. Est autem liber non valde magni pretii: recens quippe & chartaceus, nec ex optimo descriptus. Apud Claudianum nihil mutandum, non bene judicas. Sed ea, quae defendendi ejus loci causâ dicere poteramus, require in Bernartii notis ad lib. i. Thebaid ibi: *si me de matre cadentem Fovisti gremio*. Et adde L. Quod certatum est. 3. Cod. de posthumis haered. instituen. ubi haec verba: *sancimus, si vivus perfecte natus est, licet illico, postquam in terram cecidit, vel in manibus obstetricis decessit* &c. Ritus vulgatissimus est, & observatus millies. Incomparabilem patrem tuum, Scriverium, Bodecherum, Boxhornium, Stratenium, Plosium item, & totam domum vestram officiose saluto. Salve dimidium animae meae, locum Dionysii Longini τερψιφρον, quem mutilum Scaliger allegat ad Propertium, integrum a te mihi describi petieram. Fac quaeso, quando est otium. Vale. Hagae Prid. Non Februar. Anno c1910cxxxvii.

EPISTOLA V.

J. FR. GRONOVII

*Jano Bodechero Banningio.**Leidam.*

ECce tibi, Cl. & amicissime Bodechere, epistolam ad Fabricium meam, illasque, quas Heinsius ad me heri misit. Boxhornii librum penes me retinui, donec per amicum mittere possim. Duplo erit majus vecturae pretium, si tabellario is liber commendetur, quam quo Hamburgi emitur. Quare sic mittere esset magis cogere Fabricium, ut librum emat, quam gratificari ei librum. Interim in meis commendavi ipsi affectum Cl. Boxhornii, & indicavi penes me illud munus adservari, donec commode & sine immodico ejus sumptu hinc mitti possit. Plura alias. Vale. Hagae vi. Id. Febr. Anno MDCCXXXVII.

Nic. Heinsio.

Propediem tuis respondebo diligenter. Nunc scito locum Dionysii *ἐπὶ τῷ* citari a Scaligero p. 284. edit. Comelin. Ad Elegiam, quae incipit: *Disce quid Exquilias*, ad verbum: *Nanus & ipse suos breviter curvatus*. Mutilum citat Scaliger, integrum vellem cum praeced. & seq. periodo describi. Inspice etiam sodes Electa Gevartii postremis illis capitibus, in quibus Cruceum exagitat, an agat de loco in Epiced. Glaucia: *Et nunc heu! vittis & frontis honore soluto*. Ubi Cruceus scribit: *frondis*. Puto notare hoc Gevartium, nec tamen satis reminiscor. Si facit, sensum verborum ejus quaeso perscribere. Vale carissimum caput, & propediem meas accuratas expecta. Saluto omnes nostros.

EPISTOLA VI.

J. FR. GRONOVII

*Nic. Heinsio.**Leidam.*

Nobilissime juvenum, Tuas & Stratenii literas Amsterodamo redux domi-
meae reperi, utrasque gratissimas. De autore de Somniis & prodigiis, somnio visa mihi similia quae scribis: adeo miror, & quid judicem adhuc mecum disputo. Tu accuratius me docebis, ubi evolveris, & invenies hominem doceri facilem. De meis quid dixerit aut finxerit Zuerius, nescio. Certe unas perbreves Lamairio dederam tibi perferendas, atque is curatas mihi retulit: easque te hactenus desiderasse video. Sed jactura est levis, & quae ibi
per-

perstrinxeram, tam parvi momenti sunt, ut ipse, quae fuerint, curare desierim, itaque nec memoria revocem. Probasse me censuram tuam in poematio Fabricii recordor. Et *τὸ Θυρσίδα* ipse quoque notaveram: alterum non animadverteram. Judicium Herculis tui Magusani, & Parisiensis magistri eodem loco haberi debere addideram, nempe inter eos, qui non debent inter seria nominari. *Luxus* tamen in Statio recte defendit alter contra Lipsium. De loco Dionysii immensas tibi gratias scribo. Et opportune tuas accepi, cum eopse momento chartae, in quibus allegaveram eum, typographo repraesentandae essent. Nec minus, quod de Statii loco in *Electis* inquisivisti, tibi debeo. Quod incidis spem meam de dissertatione epistolica tui parentis, id dolori, an pudori mihi fuerit, nescio. Ego, mi Heinſi, nunquam ita frontem perfricarem, ut peterem tantam nostri rationem haberi. Hoc tu & ille optime nostis, siquidem tanti sum visus vobis, ut mores meos inspicere volueritis. Sed cum ille ultro id obtulisset, non tam in meum, quam amplius. Graswinkeli honorem, cupide accepi, atque postea per te, per amicos alios, qui propiore apud eum gradu, quam nos, merito sunt, monere atque instare non desii, ut eo magis me devinciri quoque ostenderem. Sed numquam adeo fui insipiens, ut non a gravissimis ejus curis hujus promissi fidei male metuerem; aut Suffenus, ut me dignum arbitrarer, adversum quem tantum affectus incomparabilis viri testimonium publice exstaret. Nos, si quisquam mortalium, semper pede nostro nos mensi, satis habemus fructuum ex amicitia magnorum virorum, si discere ab ipsis possimus: id consecuti gaudemus in sinu, nec magnas cogitationes concipimus. Honorem & plausum accipiant illi, qui vestigia ipsorum de proximo adoraturi, locumque eorum apud jam nascentem posteritatem tuituri sperantur. Quare & ultro peto, ne maximus pater tuis ullas leves curas gravissimis istis occupationibus, quarum fructus non unus vaniloquus, & parum Latinus poeta, non ineptus, ineruditusque Gronovius; sed totum Christianum nomen maximos expectat, praevertat, aut interponat: neve doctissimas meditationes suas cum affaniis nostris, quae velut solstitialis herba decident, nec ad postumi aevi curam pertinebunt, perire velit. Ego is sum, qui semper: qui de nemine sentiat humilior, quam se ipso: qui majora non affectet, quam meretur, aut consequi dignus sit: qui a simulatione, ambitioneque alienissimus: qui in sola virtute decus quaerat: qui tui patris divina scripta, velut oraculorum volumen, cum horrore & religione semper legit; ipsum quod videre, quod amicitia complecti potuit, ob hoc unum in hoc exosissimum alias ob calamitates & flagitia publica seculum incidisse testatus est: qui denique te magnis passibus ad arduam illam gloriam exilientem suspicere & amare toto pectore coepit. Talem si redamare vel extrema linea potestis, abunde gloriae erit: aliis, qui majoribus dotibus affectum vestrum pignerant, grandius praemium non invideo, nec vos distinguere amicos prohibeo. Pulcherimum tuum epigramma sic mihi mentem pertentavit, ut memoriae commendaverim. Omnia praeclara, arguta, erudita. Unum illud, *post Cypridis actum*, emendari a te velim, Etsi enim Latinum non negem: tamen triviale est, & in

ore omnibus etiam barbaris, insita panniciâ potius; quam tam culta purpura digna. Vides quam ingenuus sim; quam blandiri nolim. Et tamen, si tu aliter censebis; me quoque ita censuisse negabo. Quae ad Martialem notas, alias excutere ocium erit. Laudo interim diligentiam tuam. Operae in opusculo nostro gnaviter pergunt. Sed dum Amsterodami fui, tria folia, quae interea excusa sunt, tot sunt conspurcata mendis, ut totius editionis me immane quantum poeniteat. Sed nolo luctari contra fortunam meam. Donati verba sunt in prologo Adelporum, *In dividendis actibus fabulae identidem meminerimus: primo paginarum dinumerationem, neque Graecos, neque Latinos servasse, quum ejus distributio est.* Sic ea citantur ab autore quodam. Velim, eam periodum cum sequenti mihi describas, si sic satis intelligi posse videtur. Ignosce autem, quod tantopere abutor comitate tua, ut semper novam aliam operam tibi imponam. Quoties hoc audeo, toties novo tibi chirographo me obsignasse illud jus puta, quod semel in me meaque tibi dedi omnia. Vale, dulcissimum pectus, & me solito amore complectere. Nobilissimo Stratenio prope diem respondebo. Salveant omnes nostri. Hagae a. d. vii. Kal. Mart. Anno MDCCXXXVII.

EPISTOLA VII.

J. F. R. GRONOVII

Nic. Heinsio.

Leidam.

CHARISSIMUM pectus, quamvis ultimus in scribendo fuerim, & sic merito tuas expectem, tamen cum haec occasio incideret, & pagellae quaedam superfluae in manibus mihi essent nugarum mearum, quae eduntur, non potui omittere, quin tibi eas velut praecocem quendam fructum offerrem, atque ante omnes alios vel orexim earum concirem, vel fastidium moverem. Quod posterius nimio magis metuo, quam spero prius, qui applausum ingenii mei non pejus, quam Eumolpus ille, cui pro carminis recitatione jactus lapidum rependebantur, novi. Quod in prioribus dixeram, tria folia absente nobis foedum in morem, vel sine more potius, mendis conspurcata esse, ejus exemplum hinc vides. Interim ut, qua poteram, tanto malo mederer, duas pagellas refecandas curavi, quae caeteras turpitudine antistabant, sic ut nec vola nec vestigium sani sensus appareret. Unum monere in summa festinatione debeo, nolle me, ut judicium Criticum in Ovidii locum, qui p. 81. citatur, exerceas. Nescio, quid mihi in mente fuerit, quum eum adjeci. Etsi enim is sensus, qui in vulgata est, ab homine pertinaci possit defendi, ut subintelligatur ad primum verbum verbum substantivum; tamen *to Gerebant* multo rotundior sensum reddit. Caetera quocumque loco habueris, ciccum haud interduim, dummodo me ames, & hanc festinationem affectus nostri boni consulas. Sive enim

enim placebunt tibi, volui imprimis placere ei, quem sine pari amor sine
damnabuntur, facile patior mea redargui ab eo, qui me & multimodis erran-
tem vel ideo ab affectu suo non excludet, ut tueatur iudicium, quod de me
habuit, antequam in conscientiam imperitiae meae ruditatique veniret. Vale,
mi Heinſi. Maximum parentem tuum, vestrosque, & omnes, quos noſcis, sine fūco
& fallaciis amare, a me ſaluta. Raptiſſime, adſtante nobiliſſimo adoleſcente
illo, qui has feret, atque ad vos jam proficiſcitur. Hagae v. Kal. Mart. Anno
cristo cxxxvii.

Nolim te has pagellas ostendere Cl. Scrivērio. Satis mature ille viderit;
cum totus liber editus fuerit. Cum perlegeris, quod comodo tuo fiat,
remitte. Poteris epistolam tradere in aedes Mairii, neque enim tanti sunt
hae chartae, ut propemodum duplicetur laturae pretium, si per tabellarium mit-
tantur. Vides me discere Batavam parſimoniam.

EPISTOLA VII.

J. F. R. GRONOVIVS

*Nic. Heinſio.**Leidam.*

Quas nuper, praesente Pavio, subito expedieram, si quisque commendave-
ram, pridem redditas tibi existimo. Eo ipso die tua ultima mihi tra-
debatur. Sed quia jam non modo vespere erat, & serum diei, sed plane ad
concupiam, ipseque prima luce posteri se abiturum fuerat minatus, non po-
tui repetere illas, & una fidelia duos parietes incrustare. Me a vobis deside-
ratum esse laetor, tantum, quantum modo desideratum esse doleo. Vellem autem,
o voluptas mea, non hilaritati tantum vestrae tum sodalem me fuisse, sed li-
cere mihi omnes meas fortunas miscere tecum, & aetatem una agere. Non
mente possum concipere magnitudinem & mensuram fructuum, quos alter in
alterum conferemus. Ostenderemus ignavis illis, quid esset serio tractare stu-
dia, quid ambitioni & lucro vota sua donare. Sed hoc, quia difficilia nobis fa-
ta negant, jungamur tamen, qua possumus, mi Heinſi: & invicem nostrarum vi-
giliarum rationes reddamus. Nec sic desperandum habebimus de amplis fru-
ctibus. Cum nuper Amstelodami essem, accepi a Vossio utendos MSC. Clau-
diani libros de raptu Proserpinae, & Statii Achilleida. Non credis, quan-
tum ibi bonarum rerum repererim. Et posset sane plurimis locis Scriptor ille
emendatior reddi: posset non contemnenda diatriba ad eum parari ex illis subſi-
diis, quae jam habemus, si otium nobis esset, aut alia studia impetum no-
strum ad literas juvandas non inhiherent. Alias igitur de hisce cogitabitur.
Heri etiam ex schedis, quas tu transmisisti, egregium locum constitui, qui mi-
serè affectus est. Eum proxime tuae censurae subiciam. Satis acceptum ha-
beo, si unicam talem observatiunculam exeudere possent miscritici, aut

hostes potius literarum; Critici in coelum abirent, & illic quoque τὰ πάντα fierent. Nunc isti οἱ οἱ πέπνυνται, οἱ δὲ σκιαὶ αἰσῶσι. Autorem de somniis videre aveo, & simul accepero, totum vel in tuam gratiam devorabo. De conjecturistui maximi Parentis, ὅς μόνος ἤδη τὰτ' ἐόντα, πρὶτ' ἰόντα, vide ut promissa appareant. Possum interim differre votum meum de altera epistola ad illum temporis articulum, qui ei commodissimus. Hercules noster, non τριέσπερος ille, sed quem genuit, quoties voluit natura joculari, in binis, quas postremas ad me dedit, immania monstra in Poëta meo confecit, aut fecit potius. Satis ipsi, puto, nugamur, (& credis hoc nobis, qui specimen vidisti) nec opus habemus, ut aliorum confessis nugis miseram chartam commaculemus. Itaque, qua fieri potuit modestia, quid mihi de illis videretur, in responsione significavi. Non spero me offensurum hominem, quod nolim, vel saltim ob illud amicitiae nomen, quod toties inter nos iteratur. Itaque nec haec quisquam per te, o corculum meum, sciat. De Donati loco magnas ago gratias. Nunc caetera ad Martialem avide exspecto. Jampridem locum designavi, ubi, quid tuo amori operae debeam, publice tester. Si tu tamen hactenus te demittis, ut sustineas, fecus ac volebat Ennianus ille Hector, ab homine illaudato laudari. Utcunque sit, noli desinere meritis tuis nos tibi obligare, vel ea sola causa, quod te amo, illa aestimo, nec tuum affectum auro ullo contra carum habeam. Sed o lepidum caput; profecto divinus fuisti, cum petiisti, ut simul aliquid a Fabricio literarum acciperem, tecum communicarem. Ecce enim, quas nudius tertius accepi. Ubi vides illum consentire mecum largiter de praestantia ingenii tui. Illud, quod supponis, *post bella Diones*, magis placet, quam, *vulnus amoris*. Itaque hoc tantisper probabo, dum aliud visum tibi fuerit. Vale, decus meum, & amore tuo dignari me perge. Literas Fabricii cum aliis, quas promisisti, remittere poteris. Iterum vale & salve cum omnibus charitatibus tuis. Haegae Postrid. Kal. Mart. Anno ciciocxxxvii.

EPISTOLA IX.

J. FR. GRONOVIIUS

*Nic. Heinsio.**Leidam.*

Tuas, ὦ φίλτατον κάρτα, simul legi, statim responsum parabam. Sed verbis & sensibus defectus diu luctabar cum infantia mea, quam adaugebant ipsum tempus, cum nimirum sumpta modo coena calor stomachi, in coquendis cibis occupatus, mentis ignem impediret, & deinde nimis beati nuncii epistolae tuae, qui ruina incidentis inopinati gaudii totum animum meum oppresserunt. Si unquam putasti cadere in angustias mentis meae veram aestimationem tuorum erga me meritorum, nunc licet amplissimum mihi beneficium imputes. Ego postquam chartulas istas miseram, vehementi eram in metu,

metu, & millies culpavi praecipitem confidentiam meam, quae sic nuditatem jejunitatemque meam oculis tuis objiceret. Sed consolabatur me amor tuus, & sperabam, quoniam id non petiissem, non fore, ut parenti tuo eas monstrares. Tu vero commendatione & gratia tua tantum illis gratiae apud τὸν πάνυ ἥρωα addidisti, ut non placere modo sibi verbis testaretur, sed & splendidam hederam crucio illi (ut cum Lucilio loquar) vino adornaret. Et tu secutus exemplum imperasti etiam dominis tuis, ut laudes nostras, quae nullae sunt, canerent. In quo, si unquam, vere certe Poëta fuisti. Sed sine joco, immensas tibi pro his tantis meritis tuis gratias tibi scribo: nec tam vicem redditam tibi puto, quod nostris chartis nomen tuum intexi gaudes, quam novo me vinculo obligari, sive tu de meo, sive ego de tuo affectu & ingenio publice testimonium perhibeam. Etiam utcunque intempestivus studii, ut jam dixi, tamen hoc, quod vides, ad parentem tuum velut ex pumice expressi, quod hac sola fiducia mitto, quia, quibus nos non valemus, iis te momentum apud illum fore scio. Autorem de somniis & excerpta ad Martialem primo quoque die percurram. Nunc enim somnum capere malo, & somnia videre, quam legere. Et certe jam intempesta nox est. Quare non possum neque me, neque te diutius morari. De loco Claudiani proxime. Illud *Cypridis aestum* valde placet, cogitaveram: *Quid mirum, gratae si sana est Cypridis usu*: Sed tuum praeferatur. Quae caetera scribis, talia sunt ut deliberem. Sed iterum admonent me cadentes pupillae. Vale, mi Heinshi. & cura, ut propediem Hippocrenen vestram bibam. Hagae a. d. v. Non. Mart. civilem: nam naturalis jam ante quinque horas & dimidiam mortuus est. Anno ciciocxxxvii.

EPISTOLA X.

J. F. R. GRONOVIIUS.

*Nic. Heinsh.**Leidam.*

MI Heinshi, Ecce hinc ad Scriverium literas. Petii ambitiose, ut aut librum ad me mittat, aut ipse excerptat, aut tibi excerptum tradat. Vides, quam frontem perfricuerit mihi humanitas tua, quae fecit, ut omnia me apud te posse existimem. Quod tibi in me quoque jus esse volo. Sed si me intelligis, non tam te onerare, quam sub nomine tuo & umbra, si minus forte Scriverius mihi factum velit, ab ipso ignorante magnum beneficium accipere cupio. Hoc est, ut tu quidem id te muneris suscepisse simules, clam autem librum ipsum ad me ocius mittas. Ego tunc posthabitis omnibus illum percurram, & quae opus erit, enotabo. Biduum unum ea res, non ultra, me detinebit. Interim tu subducere te ejus oculis potes, usque dum usus fuero & remisero, ne te interrogando cruciet. Haec secreta sunt, non nisi intimorum. In quo censu te duco, & magnorum regum superare me divitias

uno hoc existimo. Vale, decus meum, & ne diu animum meum suspensum tene. Si fiducia nobis est laborum nostrorum, si spes memoriae apud posteritatem, non frustra nostri curam gesseris. Iterum Vale, & saluta tuos, hoc est, meos. Hagae VIII. Id. Mart. Anno MDCLXXXVII.

EPISTOLA XI.

J. F. R. GRONOVIIUS

Nic. Heinsio.

Leidam.

MI Heinsi, habes hîc iterum promissas illas ad Scriverium, quas re-
cta ad ipsum misissem, nisi tu hoc sumptu, hac molestia ultro te
affici voluisses. Serius uno die, quam constitueramus: quam brevem mo-
ram facile ignosceres mihi, si scires, quam imprudenti poene duo illi inter-
medii dies exiissent. Nunc post varias anhelationes & discursus quietior istas
raptim exaravi. Quibus quod deest elegantiae & suavitatis, hoc tu delensifico
ore tuo supplebis. Cupio omnino ab omnibus, qui ad Statium notare aliquid
volent, aut poterunt, vel potuerunt, quae communicare mecum voluerint, ac-
cipere. Qualia enim cunque multorum erunt, servient mihi ad cogitandum. Sed
praestantiss. Scriverius, non dubito, quin multa egregia jam olim observarit
ad majora illa opera Poëtae mei, Thebaida dico & Achilleida. Constitutum
autem mihi est, proferre & ostendere scriptorem illum, in quo semel non infe-
liciter rudimenta meorum ad litteras juvandas conatum posuisse videor. At
etsi minime id mihi nunc ocium: tamen suffurabor, quantum potero, subsiciva-
rum horarum aliis studiis, ut eandem operam expendam toti Statio. Nec pro-
fecto paucorum dierum ea res, & nosti, nihil unquam nos properaturos, nec
cruda, sed quantum quidem nostri ingenii (quod quam exiguum sit, agnosco
fane) calore fieri potest, percocta daturus. Eximium Zuerium salvere jubeo.
Locus in Pietate Abascantii $\pi\pi\omega\lambda\theta$ est, sed & mendum, puto, & medici-
nam invenimus. Scribendum est:

Pandere, quis centum valeat frenare manipulis

Intermissus equos; quis praecepisse cohorti;

Quem deceat clari praestantior ordo tribuni,

Quisnam frenigerae signum dare dignior alae.

Quatuor illustria militiae Romanae munera ponit: praefectum equitum legio-
narium, praefectum cohortis, tribunum, & praefectum alariorum. Primus
ille frenare dicitur centum equos intermissus (vel intermixtus) manipulis, id est, cen-
turiis. Nam manipulos & centurias pro iisdem ponit Vegetius Lib. II. c. XIV.
Ac etsi vetustiores distinguere videantur, tamen hoc constat, & manipulos &
centurias peditum esse, ut turmas & alas equitum. Ille praefectus intermissus ma-
niplis frenat, id est, ducit, centum equos. Nam cohors equitum legiona-
riorum

I Vid. Diatrib. Cap. XLVII.

riorum C & XXX non excedebat. Veget. lib. II. c. VI. Staius autem numerum rotundum posuit. Hoc non tantum placebat τῷ πάνυ Salmasio, sed etiam in parte eidem in mentem venerat. Nam ea ipsa vespera, qua vos discedebatis, cum domum reverterem, obvium eum ad hospitium suum deduxi, & de hoc loco sermonem injeci. Et certum quidem erat utrique de equite legionario, seu qui legionibus immixtus erat, intelligendum esse locum, quod cum optimo amico nostro, te praesente, dicerem, fidem mihi abdicabat; de verbis autem comperendinabamus. Postero die, cum iterum ad eum visissem, antequam conjecturam margini codicis mei adscriptam ei ostenderem, dixit mihi, omnino *Maniplis* scribendum esse. Nam τὸ *eques* retineri posse putabat. Cujus posterioris emendatiunculae periculum ego in me recipio. Exquire, quaeso, iudicium amici nostri, & una cum tuo mihi perscribere. Ob hunc unum saltem locum non frustra me in Statio fuisse puto. Sed minus ociose garrio. Vale charissimum caput, & saluta omnes vestros. Hagae. Prid. Id. Mart. Anno MDCCXXXVII.

EPISTOLA XII.

J. F. R. GRONOVIIUS

Nic. Heinsio.

Leidam.

MI Heinsi, γλυκύπικρον, illud, quod in Amore esse ajunt οἱ ἑρωτικῶν μῦσαι, abunde exhibuerunt mihi, sic tamen gratissimae, literae tuae. Vehementer me angit error ille in recensenda maximi Patris tui conjectura. Ego Deum testor & meam conscientiam, me eam numquam accepisse aliter, & sic jam tum, cum apud vos essem, margini codicis mei adscripsisse. Vitium aurium mearum esse reor. Sed puto me satisfacturum vobis, si consilium meum vobis aperiam de hoc errore emendando: deleri enim non potest, cum illa pagina die sabbati perfecta sit. In omisissis ponam post verba illa: *ideo corrigebat*: conjecturam veram, cum explicatione, quam in literis videro: hisque ficta personâ adjiciam; *Erat ὁ δ᾽ ἄνα, qui scriberet*: ut istius intelligatur illud, *Quod t. c. praeceps furat A. morum*. Utcunque enim non forte fit Statii hoc, *praeceps morum*, tamen dictionem ejus valde resipit, & eruditum est. Sed oeconomia Poëmatii aliud quid exigit. Sic puto commode subterfugere nos posse, ne errasse videamur, & conferre in operas, quasi illi partem praetermisissent. Quae praeterea scripsi de domestico Phoebio tuo, haud muto. Excuso potius, quod cum ille sit supra laudes & ingenium meum, nec ἐν παρόδῳ magna nomina sint salutanda, adeo intemperans affectus fuerit meus, ut praeconium ejus mea infantia deterere ausus sim. Illud immensum quantum me exhilaravit, quod serio nunc in Ovidium incumbere te scribis.

Vid. Diatrib. cap. 29. & Omisiss. pag. 409.

scribis. Euge, euge, mi Heinſi, incumbere ὀλβ' & παρ in hanc curam, nec deſiſte, priuſquam μέγατι & ἰσομένοιſι πυθείδῃ in lucem protuleris. Incita- rem te multis, niſi ipſum te tibi optimum ἐπείκην delegandum haberem. Et vides ſane quam pauci ſint tuae & meae aetatis, quibus literae vere aliquid de- biturae ſunt. Ubi ſunt illi Heinſii, Grotii, Douſae, Meurſii, Sriverii, Put- ſchii, qui primaeui tempore fere eodem, heroibus tunc viventibus, ſubnaſcebantur? At nunc eo res rediit, ut omnes intelligere ſe, quae omnium mini- me, putent, cum revincuntur non intelligere, contemnant. Et fere ubi- que de compacto res agitur, ut in Velabro oleariis. Erigamus ergo capita ſupra plumbeas illas animas, & veram ſtudiis dignitatem aſſeramus. Quae non in mutatione literae aut ſyllabae, ut calumniatur, ſed in cognitione lingua- rum, antiquorum rituum, hiftoriarum, praeceptorum Sapientiae conſiſtit. Haec cum conjuncta ſunt, & lectio diligensque labor ingenio & iudicio non deſtituitur, exiſtit inde praeclarum illud egregium, poſſe de unoquoque Scri- ptorum veterum, non quod audieris ab alio, ſed quod ſenſeris, iudicium fer- re, genium uniuiſcuiusque penetrare, mentem & oeconomiam abditam ſaepe & in reſeſſu conditam eruere, phraſin agnoſcere, locos corruptos reſtituere, Quae verae Critices munera ſunt, & erant olim apex literarum. At vide, quo degeneraverimus imperitia & ignavia. Quod niſi diligentiffimi & doctiſ- ſimi faciebant, arrogat ſibi quiſque, & autorem, quem nunquam, niſi nunc, inſpexit, ſub cenſuram ſuam revocat, emendando corrumpit. Illos, qui hoc faciunt, mirum non eſt contemnere literas, cum quas numquam, niſi primis labris guſtarunt, ſe autem plene penetrariſſe arbitrantur, ubi apud vere doctos venerint, neſcire ſe ſentiunt, & hīc nunquam ſe niſi infelicitate ſe jactare ex- periuntur. Sed vides, quo me effundam, velut legitimo more tecum gar- rio. Magno Salmaſio cur te ego commendem, nulla cauſſa eſt, niſi juſſum tuum. cum tua gratia & ipſius humanitas facillime ſine ullo medio utrumque conci- liare poſſint. Faciam tamen, quia juiſiſti, ſimul atque illum videro. Lo- cum Ovidii optime intelligis, & mēmini quidem ſimile quid legiſſe: ſed lo- cus nunc non incidit. Ubi memoria redierit, erunt ut ſemper κοινὰ τὰ τῶν φίλων. Vale, chariſſimum caput, & me ama. Hagae Poſtrid. Id. Mart. Anno CIOICXXXVII.

EPISTOLA XIII.

J. FR. GRONOVII

*Nic. Heinſio.**Leidam.*

MI Heinſi, Caſauboni Epistolam recte accepi, ut & proxime conjecturas humaniſſimi viri, quas ad me miſiſti. Utrique magnas ago gratias. De ipſis quid mihi videatur, alias otioſior ſcribam. Illud perveniſtum & jucundum mihi

mihi accidit, quod ille meas emendationes, quas penes eum protuli, mihi pro suis redonat. Ut ecce in Hercule Surrentino correxeram: ¹ *Seu tibi dulce manu Lybycas nodare palaestras*. Ubi vulgo, *nudare*, & similiter locum in lib. II. Achilleidos. Utrumque jam ante mentem excusum est, & videbis pag. 138. & 139. Scis autem p. 182. partem fuisse, quam nuper transmiseram. Et testis mihi esse quoque potest Salmasius, ad quem in Galliam anno eandem transcripsi. Memini Amsterodami in aedibus fratris homini optimo, cum primum de Statio emendando nescio quid mihi in mentem venisse narrarem, jactasse hanc correctiunculam, ut gustum ei darem, & spem de conatu nostro facerem. Nunc ille mihi eam remittit, sed ut decebat mutatis ansis, nam pro *manu*, legit etiam *manum*. Hoc est frequentissimum dicendi genus apud Statium corrumpere. Sic Via Dom. *Hi siccant bibulas manu lacunas*. In Thebaid. *levare manu mensas*. Alibi, *manu componere succos*, & denique; *viresque modosque Imperii tractare manu*. Sic etiam *nodare manu palaestras*. Quod videbis me monuisse p. 222. ad Comam Earini, ubi hoc modo elegantem locum correxi, Sed transeant haec. Bene fecisti, quod verba Chronici MS. ad me scripsisti. Scito duos Statios fuisse: alterum sub Nerone Statium Urfulum Tholosatem (itaque pro *Toletanus* scribe in Chron. tuo: *Tholosanus*,) & P. Papinium Statium sub Domitiano. Ille Rhetor, hic Poëta noster. Hos duos multi confuderunt, atque hinc cognomen SURCULI, quod in MS. Cod. Statio tribuitur. Idque monuerat ad Eusebium Scaliger. Ex cujus nota, plusculis additis, exstruxit Diatriben suam de nomine Statii Gevartius. Quod tamen nos elegantissimo viro objicere nolumus. Dixeram, me simile quid legisse illi in Ep. Sapphus: *e nostro crescit moerore*. Ecce hoc est apud Statium lib. VIII. Theb. extremo de Tydeo: *laeva quereceptum Spectat atrox hostile caput, gliscitque tepentis Lumina torva videns*. Gliscere enim, ut scis, crescere est. Vide locum integrum, & placebit tibi. *Usque metu micuere sinus*, mutandum non puto. Metalepsis est. Sinus ponuntur pro pectoribus, pectora pro corde. Notasti autem paventibus & exterritis cor micare. Horatius: *Evae recenti cor trepidat metu*. Sic apud Comicum; *cor meum coepit facere artem ludicram*, id est, micare, salire. Hoc si placet tibi, fac sciam, quaeso. Maximi enim facio iudicium tuum, praesertim in illo Scriptore, in quo non nego diligentia te nos superasse: & nusquam tamen Herculeia supinitate in legendis veteribus usum. Vale, decus nostrum, & festinationi, quam totum hoc epistolum praefert, ignosce. Sed ecco oblitus poene fueram, quod primo loco volebam positum, quae priore epistola ad Ovidium promittis, te communicaturum mecum, fac, quaeso, quam primum. Non vivit, cui laetius videatur ista maturi ingenii tui messis. Iterum Vale, & saluta vestros. a. d. VII. Kal. April. Anno CIOIOCCXXXVII.

Risi cum legerem, quae de Commelino addis. Memento, quaeso, Scaligeri Poet. In altero Catalogo auctionis Dordracenae invenio Scaligerum ad Fe-

C

stum

² Diatrib. Cap. xxv.

Tom. III.

stum. Eum, si copia tibi, emendum cures velim meo nomine. Hoc nuper fueram oblitus. Nam de utroque rogaverat me amicus, qui Catalogos illos in mea manu viderat. In pervigilio Veneris quid fit? edet Scriverius Epistolam suam? addeetne etiam, ut dixisti, animadversiones suas.

EPISTOLA XIV.

J. FR. GRONOVIIUS

*Nic. Heinſio.**Leidam.*

MI Charissime Heinſi, vix dimiseram priores meas, cum poenitere me coepit festinationis meae, quae procul dubio valde impolitas & ludibrium tibi debituras effuderat. Nunc vero ad instar Horatiani illius, egomet mi ignosco. Et quidem justissima causa. Quid enim supererat mihi praesidii adversus tam atrocem accusationem, qua coelum misces & maria, ut homini amantissimo, immo mancipio tuo, crimen quaereres & gravem invidiam conflares? Ego vero vellem, tam essem otiosus, ut ad singula disertae criminationis tuae capita, si non facundiae tuae elegantia, multis tamen verbis respondere mihi liceret. Sed profecto nec in posterum ita de me judicabis, quasi quicquam ex amussinato ingenio tuo proficisci possit, quod ingratum sit mihi, & silentio vindicandum, nec talem querelam, seu potius horrendum carmen occines mihi, cum diem diffidero, siquidem molem & ruinam occupationum cogitabis, quae in caput hoc desidunt. Libellum meum corrigendi scis omnem molestiam totamque uni mihi incumbere. Accesserunt nuper Casauboni epistolae, alterum munus. Nam cum amem id opus, & quam curatissime velim edi, aliis hominibus fidere non possum. Ecce enim, narrabat mihi Salmasius, cum hic esset, venisse ad se hominem, qui corrigendis illis pagellis praefuerat, quae ibi editae sunt, & conquestum esse, in foliis quae misissem, multa fuisse soloeca & non Latina. Vides qualem nasuti ejusmodi & grammaticaliter (ignoscat mihi genius tuus) modo docti mortales licentiam sumant? quam postea sumpturi essent in corrumpendis, quae non caperent? Ac hoc jam ille fecit, qui ex Codice parentis tui illas ad Scal. & ad τὸν πᾶν Parentem tuum descripsit. si autographis destitueremur, turpissimum opus futurum esset. Inter haec non possumus tamen omittere studia nostra, quae nunc ordinaria fecimus. Acciunt enim mihi quotidie Hamburgenſes mei. *Frangere puer calamos: & Quid tibi cum Phoebō, quid cum Permesside nuda.* Et, *nummos habet arca Minervae.* Sequuntur salutationes, quae post discursus varios ita saepe lassum vespera domum remittunt, ut me laborum humanorum pigeat, & saepe his turbis exemptus esse malim. Itaque vix pagellis, quas domi adhuc habeo e Diatribe mea, ultimam imponere manum, & indices conficere sustineo. Inter haec omnia, mi Heinſi, tum demum verum pretium me temporis habere mei puto, cum

vel

vel de te cogito, aut tuas lego, aut ad te scribo. Cave igitur putes, unquam ita me distringi posse, ut tuae mihi fastidio sint. Contrarium experiris, & si tibi non credis, at crede mihi attestanti per amicitiae nostrae, per communium Divarum genium, nihil te aut tuis gratius mihi esse. Ovidium ecce hîc mitto: unde cum excerpseris, quae libuerit, ad me remittes. Si quid interdum explicavi, aut conatus sum illustrare, hoc animo excusandi leges. Sunt enim ipsi quinque anni, cum ista contulimus. Itaque prodetur ubique jejunitas mea. Si quid putas me in literis profecisse, interea temporis factum est. Diatribae folia xv. perfecta sunt; restant octo fere, quae post mensem, spero, absoluta erunt. Nesciebam initio tantum me nugari potuisse. Sed cum primum inciperetur praelo libellus dari, omni ingenii contentione in eam curam incubui, egregiamque accessionem addidi. Habeo & nunc quae jam destinata erant suis locis, sed marceo, & cum manu languet animus. Etiam sic satis dedimus ineptiarum, certe Gevartium mole superavimus. Divinationes summi Parentis tui (quem officiosissime saluto) e Scriverii charta descriptas habes. Urge, si me amas, epistolam, quam mihi promisit. Nec enim dubito multa ibi fore, quae discere velim, antequam liber meus prodeat: Scriverio, quaeso, amicissimam dicas salutem, eique meo nomine serias gratias agas. Nec deerimus nos, quaecunque exinde sumemus, ea fateri candide, cujus studio debeamus. Si quid ad Thebaida & Achilleida notavit, vide omnibus modis, ut ex unguibus ejus extorqueas. Vale, mi Heinsi, & me ama. Nobilissimum Statenium saluto peramanter, cujus omnia, quae nuperrime perscripsit, vehementer mihi placuerunt. Et propediem respondebo. Salveant omnes amici. Hagae Propriid. Kal. Apriles Anno MDCCXXXVII.

Vide imprudentiam meam. Poene fueram oblitus, quod primum erat. Accepi a V. Fabricio nostro responsum. Ibi haec leguntur: *Nic. Heinsius merum mel, merum nectar effundit. Diiboni! quanta ejus ingenii felicitas? Malim unum istum in Ollum Scazontem, quam ducentos*¹ *N. Quamquam studium & conatum hominis amicissimi improbare non est meae verecundiae. Velim Nicolaum meum per te scire, jucundissimam mihi fuisse, quam scripsit, epistolam, Cui ego coram respondebo. Saltem interea sperare me omnia de editione Poëmatum meorum ex voto confore. Exemplar ipse afferam. Stat enim sententia ad vos in itinere excurrere. Id velim quoque Elzevirios sciri. Constitui omnino non edere versiculos meos, si ab Elzeviriis excudi nequeunt.* Haec tu tibi scito. Certè non ostende N. quem putas a Vincentio nostro designari. Ovidium, cum usus fueris, quaeso mox remittas. P. significat codicem Pirckhaimerii, qui & Tristia habebat & de Ponto. Nam ad libros Amorum, de arte, de remed. ad Epistolas Heroidum sceleratâ manus in charta singulari scripta jam olim mihi subduxit. MS. designat in lib. de Ponto meum codicem, chartaceum & non magni precii. Bodecheri epistolam curavi ea ipsa vespere, qua accepi. Hoc ipsi significa, & ad omnia officia me ei paratissimum. Dominum de Zuylichem quinquies adivi. Quinquies aut domo absentem aut non vacantem inveni. Nec ipsius haec culpa est, sed mea in-

¹ Bodecheri.

felicitas. Itaque jamdudum piget me molestissimi ambitus. Video summos illos viros ita districtos esse, ut literularum mearum curam habere ipsis impossibile sit. Et nescio quomodo non placent, qui admittunt salutatores, non quia amant, sed quia eos illorum miseret. Interim excusationem habeo, si posthac conquiescam, nec officio meo, nec commendationi maximorum virorum defui. Sed haec te solum scire fatis est.

EPISTOLA XV.

J. F. R. GRONOVIIUS

Nic. Heinsio.

Lugdun.

CHARissime Heinsi, pervenimus in Epistolis Casauboni ad illas binas, quibus admiratur ingenium & eruditionem *Munsteri Hypobolimaei*. Dubito, an velit maximus Parens tuus in ordine caeterarum cum inscriptione EIDEM poni, an vero adhuc uti dissimulatione. Quoniam enim omnibus notum est, etiam pueris, qui nondum aere lavantur, alium divini istius & incomparabilis scripti autorem esse non potuisse, non ultra video, cur induenda simulatio sit. Interim voluntas ejus mihi *καὶνὼν* erit. Rogo itaque ut roges, quid fieri velit. Fieri enim commodè potest, ut sub finem & ad D. H. jungantur hac inscriptione; N. N. SATIRAE AUTORI. Sed necesse est, ut aut hodie, aut cras mane responsum habeamus, nec enim restabunt paginae, in quibus operae occupentur tantisper, si praetereundae non sunt. Meas in Ovidii partem accepisse te puto. Promiseram Dn. Boxhornio aliquid nugarum mearum ad Taciti Agricolam. Et faciam large propediem, cum paululum respiravero ab iis, quae me nunc intendunt. Interim cum ista pagella Diatribae nudius tertius absolveretur, qua locum, in quo misere omnes fere interpretes haerent, non infeliciter pertractasse per occasionem visi sumus, servavi hanc portiunculam, ut inspiciendam mitterem. Dabis ergo ei cum humanissima salutatione. Sive placuerit, sive displicuerit, utatur arbitrio suo. Ego in tot nugis meis sive hinc quoque mihi similis fuerim, sive *σοφρονέστερόν τι ἐμάντοῦ* sapuerim, ciccum haud interduim. Amet me, ut ego illum. Tu ante omnes, mi Heinsi, ita valeas. Salveant amici. Raptissime. Hagae III. Non. April. Anno 1637.

EPISTOLA XVI.

J. F. R. GRONOVIIUS

*Nic. Heinsio.**Leidam.*

SAlve, dulce decus meum. Nobilissimum, quem narras, juvenem nullus vidi. Tuas autem gratissimas mihi nescio quis e togatorum profapia attulit. Nollem apud τ δῆνα enunciasse te, quae familiarius garriveram. Non ea id factum fini, ut ille rescisceret; sed ut penes te constaret fides mea, quam semper testatissimam tibi cupio. Forte enim perlustraveras oculo fugitivo schedam illam, & poteras mirari, si in Diatribe vidisses postea (si tamen horas tuas tam male collocare putes, ut vili scripto impendas) non eo loco nomen illud apparere. Nihil tamen a te peccatum, nec id magnopere curo. Tribuat sibi quisque, quod velit, per me non invideo. Qui jure, is conscientia solus fruatur, cujus apud bonos abunde magnum pretium est. De φλυαρίαις & τῷ κληθέντι μάθητεύοντι & vere tu, opinor, senis. Ut ille ubique suus est! ut ubique jactat τ λεοντήν τοῦ πρὸς Κύμην Θηρίου. Itaque & τὰ νῦν σαλθέντα judicium tuum confirmarunt, πάντα γὰρ πέριξ καὶ οὐδέν. Nosti caetera. Sed & istius pauca sunt, quae ad partes vocare possim, ut non in alia omnia me ire subjiciam. Itaque majorem partem filebo. Privatim quidem interdum ego, quando hoc seculum jubet vim facere naturae nostrae, palpum obtrudere illis, qui volunt, possum, & βύσσινα ἐπι loqui: publice librum, cum Satirico, si malus est nequeo laudare & poscere, aut ἀλογα τ ἀκριτομύθων conjectanea sub εὐστοχίας nomine celebrare. Ibi enim non ambitionis aut sermonis temporarii, sed boni publici una cura atque posteritatis unica ratio ducitur. Cujus quantam reverentiam habuerint omnes, qui aetatem ferre scripta sua vellent, tu optime nosti, eruditissime juvenum, quare desino tinnire nimium. Quae ad Ovidium notas, elegantia sane visa sunt: & hortor, ut gravius hanc palaestram deluctere. Iis, quae meis identidem literis aspersi, utaris ut tuis, si tamen quicquam ibi ingenio tuo dignum. Tenuia enim fuere pleraque omnia, & quae ut recte, nec me intercedente, judicas, quae, inquam, etiam puer videre posset. Illud serio te rogo, ne quicquam proferendum existimes, quod improbes. Cui enim usui umbram te fingere, contra quam humeros ejectes. In illis, quae publici juris facta sunt, alia ratio est, nec hinc impedio, quo minus eadem libertate in nos grasseris, qua ipsi alios castigavimus, quandoquidem aliter haec sacra non constant. Et ab amico reprehendi monerique malim, quam ab iniquis indigne traduci. Fabricium scito, si Deus volet, propediem nobis adfore, sed ut transeat, non ut maneat. Ipse unas adhuc meas exspectane se posse scribebat, si festinarem respondere, quod feci. Arnobium Elmenhorstii & Gevar-
tii Electa his diebus desiderabam. Eos si ex τρισημέρις Parentis tui aut

cissimi abutor viri, cui tam longo tempore non respondeo. Item de aliis, quae in prioribus requisiveram, quorum nunc non meminisse finit animus, in ista sola cogitatione defixus. Liber meus proxime umbilicum pervenit. Restat solus index, quem non perficere potuerunt operae, quia numeris deficiuntur, quos sequente hebdomade accepturi sunt. Nunc igitur praefatio & carmina in praelo sunt. Tu salve, mi Heinse, & me ama. VIII. Kal. Majas Anno MDCCXXXVII. Raptissime.

EPISTOLA XVIII.

J. F. R. GRONOVIIUS

*Nic. Heinse.**Leidam.*

MI Heinse, ante hebdomodas, puto, tres aut quatuor a te petieram, ut in auctionibus, quae instabant, emereres, vel emi curares meo nomine, Jul. Scaligerum de re Poëtica, & Josephi in Festum castigationes. Ejus quid factum sit, haveo scire. Urget enim amicus ille, cui hoc negotii receperam. Libellum meum nunc plane fidem faciunt mihi operae intra tertiam hebdomadem fore absolutum. Duo enim modo folia ad indicem restant, quem nescio an prius excudendum dabo, quam praefationem & ἐνθυμίας vestras, cum perficere non possim, nisi omnia illa folia domi habeam. Salutabis itaque humanissimum Bodecherum meo nomine, & monebis eum, si suam quoque hederam ibi legi volet, ut opus maturet. Quod ideo addo, ut contester gratum fore mihi officium amicissimi viri, quod non semel obtulit, non quod ambitiose prenssem istiusmodi laudes, quas non mereri me fateor simpliciter, aut doctissimos homines importuna mea flagitatione ad eam necessitatem adigere velim, ut nomina sua parietarias herbas faciant. MS. Cyprianum post pauculos dies ad Dn. Boxhornium, quem salutabis meo nomine, destinabo. Dixeram Vossio filio in bibliotheca Leidensi esse Vellejum Fr. Nansii manu adnotatum. Eum ille inspicere magnopere cupit, si per vestram humanitatem liceat. Et, puto, causam reperimus eo facilius, quae Ovidio tuo servire possent, ex bibliotheca eorum nanciscendi, quam non spernes, credo. Si itaque ad me librum illum commoda occasione per amicum mittes, curabo ut, quod faciet lubentissime, vicem reddat. Epistolae τῆ πατρὸς Patris tui de locis Statii controversis ecquam spem nobis gravissimae ejus curae relinquunt? Libris de Ponto & Tristibus ubi usus fueris, velim haut gravatim ad me remittas. Vides in inclusa [scida] libellorum indices, quos me sibi hinc emere jussit Lindenbrogius noster. De tribus habeo, quid respondeam. Primum hinc invenire non possum: Gratum, ajo, facies, si in bibliopoliis vestris explorabis, numquid ille ibi, & quo pretio venalis sit. Vale, charissimum caput & me ama. Hagae a. d. IV. Kal. Majas Anno MDCCXXXVII.

Fabri-

Fabricius noster viae se jam commisit, & credo, propediem hîc aderit. Morabitur ejus iter, quod Embdam, Groningam, & alias vicinas illis urbes visere constituit. Scedulam Lindenbrogii, cum rescribes, remitte

EPISTOLA XIX.

NIC. HEINSIUS

J. Fr. Gronovio.

Hagâ.

Charissime Rerum, ad tuas jamdudum respondiſſem, niſi hætenus me ſuſpenſum tenuiſſet *Commelinus*, cui ſcedulam illam Lindenbrogii traderam. Is nunc demum mihi dixit librum iſtum nuſquam apparere. Deinde conveni *Elzevirium*: ut videas, quam tua mihi curæ ſint; Exemplar hîc nullum habet, ſed Francofurto expectat. Itaque hac in re utilis tibi eſſe non potui. Neſcio an ad riſum magis, quam iracundiam me compulerit ſcelus illud forenſe. Dignus eſt, qui Sileno ſtupidiffimo Deorum a clunibus ſit. Non tamen inultus feret, ſi & tu & Cl. *Lindenbrogius*, cui etiam officia mea deferes, ita volunt. *Zuerius* & ego furore unius aut alterius Jambi vindicabimus *Morſium* ab iſtiusmodi beſtiis. Nec *Scriviſius* deerit. Si nomen nebulonis non latuerit, fortasſe immortalitatem ab iis ſperare poterit, quos maxime contemnit. Miſeret me tamen miſerrimi *Morſii* & patriæ tuæ, quæ poſt tot illuſtres animas, tam inſulſos porcos producit. Sed valeant hæc. *Fabricius* hîc fuit, abiit, nobis inſalutatis. Quam aegre hoc feram, tecum cogita. Caeterum *Ploſius* totam rem narrabit tibi. Poëmata ſua hîc reliquit. *Bodecherus* heri Haga reverſus eſt. Illum hodie conveni. Si diem aut alterum expectare potes, carmen promittit, ſi minus, excuſari percupit. Quidquid erit, brevi fac, ſciam. Velim etiam ſcire, an *Cyprianum* totum contuleris. Hoc mandavit mihi *Zuerius*; Si partem tantum, fac item ſciam. Nam nos eadem in re ſudaremus. Tu feſtinationi meæ ignoſces. Jam enim me expectat *Bodecherus*, cui me totum addixi. Vale, mi frater & omnibus me commenda. Raptiſſime. Lugd. Bat. May. ciorccxxxvii.

EPISTOLA XX.

J. FR. GRONOVIIUS

Nic. Heinfio.

Leidam.

Chariffime Heinfii, jam pridem respondiſſem tuis, ſiquidem argumentum aliquod, quo capi te ſperasſem, obveniſſet. Nam iram ſane tuam in Ibin probare

probare non possum. Ignosce pro affectu mutuo quaedam liberius dicenti. Vides quam Camarinam moverit amicus noster optimus, dum sordidissimo atque vilissimo vindicandi genere verba pauca nequiuscula, non dicam ab eo profecta, qui adeo fibulam linguae imponere non novit, ut saepius stultitiam suam prodat, castigarit. Prorsus fecit inconsulte: nec meum hoc iudicium est, sed omnium honestorum & gravium virorum, qui quidem cunque eam rem cognovisse mihi auditi sunt. Primum est sapientis, hominum male feriatum sermonibus causam non dare. Hoc si habere non possis, nihil dignius, quam bene agendo & rumusculos istos subrostranos strenue contemnendo refutare. Sed haec melius procul dubio audies ex τῷ πατρί Parente tuo: cui quantopere displicuerit amici nostri temeritas, non nescire te arbitror. Cura igitur, ne corrumpas ipse famam, quam de te fecimus, qui amamus, & Pater tuus credit, te, cum conflictui proxime non adesses, ideo accessisse, ut pacis mediisque belli athletas illos, alterum verberando, vapulando alterum strenuum, instar Agonothetae,

Ὅς χεῖρεςσιν ἔχει εἰρήνης ὄπλον ἀμεμφές,

dissolveres ac pacares. Hoc sane omnibus, qui crediderunt, magis decorum visum est, quam ipsa pugna. Hanc paginam, si displicet tibi, comburere potes. Quamquam quid mea? non enim hoc a me, opinor, petent amici mei, ut iras eorum semper secundem. Non amici hoc est, sed stimuli, sed Furiarum. Silium recte accepi, & mox, ubi usus fuero, remitto. De illo, quod praeterea mandas, memorero: tu modo telam, quam incepisti, graviter detexe, & file. Miseras aliquando epistolas aliquas *Casauboni* ad *Hoeschelium*. Eas, quia forte tum occupatior eram, ubi inter schedas meas reposerim, exputare nequeo. Nec tum eadem ex causa inspicere ocium erat, haberemusne illas in numero nostro, nec ne. Nunc imprudentibus nobis supervenit hora, qua edendae essent, si quidem aliae sunt ab illis, quas habemus. Earum ergo principia & diem ponam hinc tibi, uti videre & agnoscere possis, sintne inter nostras: & si non sint, ocus vel ipsa autographa huc mittere: nisi enim hodie allatae fuerint, in ordine non poterunt collocari, & operae sufflaminari se non patientur. Ocyus, quaeso, hoc perfice, mi *Heinsi*, & si quidem aliae sunt, quas miseras, cura, ut hodie eas habeamus. Si hodie nullas a te accepero, putabo in his illas contineri, & nihil mihi novi expectandum. Epistolam ad *Scaligerum*, praefixam poematis ejus e *Martiali* versis, nactus sum nuper apud *Stratenium*, cam ergo etiam curabo suo tempore addi. Diatribe adhuc propter indices haeret. Vale suavissime rerum, & me ama. VIII. Kal. Jun. Anno *MDCCCXXXVII*.

Quid censes de Ovidii loco lib. vi. *Fastor.* vers. 435.

Autor in incerto est, res est Romana. tuetur

Vesta, quod assiduo lumine cuncta videt.

Vide in notis emendationem *Scaligeri*, quam si intelliges, eris mihi magnus *Appollo*. Quid apertius, quam scribendum: *tuetur Vesta, quod assiduo lumine juncta videt*. In iisdem enim penetralibus ignis Vestalis & Palladium. τὸ quod non conjunctio,

Tom. III.

D

sed

sed pronomen est. Citamus alicubi locum illum, sed non emendamus, quod tamen facile fuisset, si mens non laeva fuisset. Si tu tamen aliter sentis, fac sciam.

EPISTOLA XXI.

J. F. R. GRONOVIIUS

*Nic. Heinsio.**Leidam.*

CHARISSIME HEINSI. Absit ut indigne tulerim liberam defensionem tuam. Meum excusare erat, qui prior libertatem in te ausus. Quicquid tamen scripsi, non tam causae ipsi, quam naturae meae lenitati, sive tu lentitudinem, aut ἀεργυσίαν interpretari mavis, dedi. Tum vero a te me amari puto, quum plurima tibi in me licere pateris. Quod vere experiar, simul atque foetus meus, vel potius abortus, oculos tuos subierit. Cave enim, ne simpliciter & aperte ad me perscribas, quaecunque displicuerint tibi, aut non firmo talo stare videbuntur. Non est gratius mihi quicquam, quam liberrima de meis audire judicia, & ea ingenuitate tractari, qua ipse alios excepi. Nihil enim dedi gratiae, ut non libere ubique sententiam dicerem, & magnos etiam viros notarem. Si illis & mihi licet, cur non nobis reprehendere, quod ipsi nostrae aetatis aut profectus cum essent, aliis fecerunt? Constant interim ipsis sua merita, & noster erga ea cultus. Nec enim, quia magni viri sunt, desinunt esse homines, ut errare nesciant: nec, qui magnos viros in levi errore deprehendit, propterea major est. Veritas & antiquitatis cura omnibus sit major & vincat ubique. Interim in calumnias & sycophantias istorum hominum, qui coram omnia laudant, post tergum frigidam suffundunt, & bonos vim inferre naturae suae, idemque ipsi facere cogant, noli; quaeso, ita Heinsius, ita meus sis, noli unquam consentire. Multi enim multa reprehendunt: quorum censuras susque deque faciemus, nisi ubi peccasse nos in bonos autores ostenderint, aut istius reprehensiones speciem habuerint. Haec aut defensionem, aut victus manus dabo. Scio enim & nobis plurima quotidie excidere, quae tutius latere poterant. Hac hebdomade, aut initio sequentis, certam fidem faciunt operae absolutum libellum fore. Potuisset citius: sed decedentibus quatuordecim fere diebus, negociolorum tanta vis mihi incubuit, ut illam curam posthaberem: & illi mea incuria ad suam abusi sunt ignaviam, & aut aliud egerunt, aut feriatos habuerunt dies. MS. codicem tibi mitto: qui tamen quanti pretii sit, ipse nosti. Ego tamen bellae curiositati tuae deesse vel sic nolui. De epistolis Casauboni ignosce memoriae meae. Inveni nunc schedam tuam: ecce tres ad Elmenhorstium, quas ego ad Hoeschelium scriptas credideram. In conjectatiuncula ad Nasonem vos dubitare, vellem ante scissem. Jam enim excusa est, & adjiciebam tribus vel quatuor verbis ad
omissa

omissa eoſe momento, quo iſtas priores meas ad te exarabam. Videbo quid dicturus ſis, quum ea, quae in ipſo libello jam antea ad deſenſionem ejus attuli, legeris. Nec enim tam ingenioſam (certe nihil in ea eſt ingenii) quam veram puto. Sentit tamen unusquiſque quod vult, quodque animum ejus probabilitate ejus percuffit, ut ajebat Tullius. Maximo Parenti tuo, totique domui veſtrae plurimam adſcribo ſalutem. Nec non Cel. Scriverio, Boxhornio, Bodechero. Vale, corculum meum, & me, ut feciſti haecenus, bona fide ama, Hagae a. d. iiii. Jun. ciciocxxvii.

Stratenius ſalutat te plurimum. Ipſe ajebat ſe aliquid ad te literarum laturum. Si ad me miſerit, una cum hiſ accipies. Nondum enim miſerat, cum has ſcripſiſſem. Ampliſſ. Graſwinckelius, qui commodum claudenti epiſtolam interveniebat, vos ſalutat. De origine τῆς *Veſta* veriſſima magnus ille tuus Pater, noſter doctor. De loco ipſo, ut dixi, videbis poſtea. Iterum Vale, mi Heinſi. In Cypriano quid ſit? pergitisne? & hic quoque amicus noſter diligentiam tuam deſtituit? utinam tamdiu retineres illum, dum mihi aliquando ad vos excurrere elicebit, ut optio tibi eſſem.

EPISTOLA XXII.

J. F. R. GRONOVIIUS

*Nic. Heinſio.**Leidam.*

CHARIſſime Heinſi. Incluſas cum primo quoque tempore Ultrajecti oportet eſſe, fiducia amoris noſtri auſus ſum hoc tibi negotii injungere, ut ſine mora ad nautas deferri eas juberet. Id rogo, ne accipias in malam partem. Si te velis ulciſci, cauſſam non dico, quin decuplo graviore onere me mactes, & habeas tibi ut aſinum clitellarium, vel potius ut mulum Marianum. Magna agitur res mea, quare diem lunae, ante quem nullae hinc naves Ultrajectum proficiſcuntur, exſpectare non potui. Diatribe (Deo ſit gratia) cum praeteritae hebdomadis ſine absoluta eſt. Sed exemplaria adhuc nulla ab homine meo extorquere potui, praeter quatuor, quae non compacta, cum occaſio forte ita ferret, ut ſine ſumptu poſſem, ad amicos nonnullos miſi. Poſt pauculos tamen dies habebitis. Ille ſcelus nunc incipit ſimilis eſſe ordini ſuo, hoc eſt, dum lucrum quaerat, omnem pudorem & honeſtatem exuere. xxv. exemplaria auſus eſt offerre mihi. Reſpondebam: Da potius nullum. Sic indicabo amicis meis, ut ſi velint, ipſi exemplaria emant, nunc ſi aliis dederò, & vix dimidiaſ parti eorum, quibus dare me oportet, ſatiſfecero, omnes, quibus non dederò, inconciliabo. Videbo tamen quid futurum ſit. Si perſeverabit ſimilis ſibi eſſe, habeo paratam vindictae occaſionem in epiſtolis Caſauboni: quarum quidem ne paginam poſthac excudendam dabo, niſi facta ſyngrapha conſtiterit mihi, quid labori meo futurum ſit praemium. Interim etiam cum

damno nostro officio non deerimus. Vale, suavissime rerum, & me ama. Salutandos omnes saluto, in primis qui domi vestrae. Raptissime a. d. xv. Kal. Jul. Anno cīōīōcxxxvii.

EPISTOLA XXIII.

J. F. R. GRONOVIIUS

Nic. Heinſio.

Leidam.

MI Heinſi, Quod tam prompte literas, quas mandaveram tibi, curasti, gratias ago. Licet hoc in tuum expenſi codicem referas. Semper bonus ratiocinator officiorum tecum ero: & utcunque tarde aut nunquam ſolvere poterō, quae comitati tuae debere coepi, libenter tamen debebo, & nexus iſtius nomen non defugiam. Rumor ille de libro meo certe vos feſellit. Teſtem advoco conſcientiam, nemini exemplum dediſſe, praeter tria, quae *Chriſtinius*, cum nudius quartus hīc eſſet, accepit, non compacta: quorum unum haberet ipſe, Voſſio traderet alterum, tertium Pontano mitteret. *Sixtinus* enim, nesciebam, an nunc Amſterodami eſſet, quia ipſe alio commigraturum ſe dixerat. Nec illud feciſſem, niſi tam commodam occaſionem cis pluſculos dies me habiturum ſine ſumptu tranſmittendi deſperaviſſem. Compactum vero nec dum ipſe habeo, nec ampliſſ. *Graſwinckelio* adhuc obtuli. Interim ne querare ulterius, en tibi exemplar, ut ex typographia exiit. In quo agnoſces amorem noſtrum, errores notabis, meque monebis candide, quae jejune ac frigide dicta ſunt, ignoſces. Ad τὸ πᾶν Parentem & amicos caeteros proxima ſeptimana exemplaria curabo. Cum nuper apud Senatorem *Schottum*, virum doctrina & virtutibus prorſus incomparabilem, ac eo majorem, quo ſe magis tegit, eſſem, rogabam, ut Senatori *Honerdo* me commendaret: tum enim nondum allocutus ſum; ſuſcepit pro facilitate ſua atque amore, quo immerentem complectitur. Diſcedenti excidit epigramma, quod antequam cum ipſo libro ei tradam, tuae limae committo:

*Praeſidium legum, caſti pars magna Senatus,
Quo ſurgunt Batavae fulcra ſecunda rei,
Cui ſua non humilis pleetra aſſignavit Apollo,
Datque cothurnatis verba ligare modis,
Quo magni Proceres & fortis libera Belgī
Majeſtas gaudet Regibus ore loqui:
Accipe, quos viridi Cyrrhae bacchatus in umbra
Plurimus & Pindi nocte dieque jugis,
Ad tua, Parthenope, panxi ſacraria, thyrſos,
Quae tuus haud ſtruxit civis inerte lyra.
Grande loci meritum, non his Amphionis arces,*

Nec

*Nec viatrix certet sylva secuta Chelyn.
 Atque o nostra tuae placeat, Roche maxime, menti
 Religio, o dignus Orgia tanta feram!
 Et mea, quae trepido saliant nunc pectora motu,
 Laetior in voti gaudia pulsus agat!
 Cum dextra has capies, heu vilia pignora! chartas,
 Et facilis dices: tu quoque noster eris.
 Dum metuis, sperare licet. placuisse putabo,
 Si legis, & falsa credulitate fruar.*

Recense, qua opusest, emenda. Vale, corculum meum. Hagae. a. d. xiv. Kal.
 Jul. Anno cīcīcxxxvii.

EPISTOLA XXIV.

J. F. R. GRONOVIIUS

*Nic. Heinsio.**Leidam.*

Charissime Heinsi, in expectatissimis literis unum ingratum fuit de te ipso, caeque ut nuper in aureis sermonibus & πάλιν *Granswinckelii* nostri. Ex eo enim cognovi primum, quid foret causae, cur tamdiu tuis carerem: cognovi, & sentire mihi visus sum partem doloris tui, visus ipse querquero quati, diris ardoribus incendi, ventre moto inquietari. Sed bene, quod sanavit me epistola tua, nec invaletudinis meminit aliter, quam ut nunciaret mutatam. Ita abunde compensasti moram ipsam: tanti fuit non accipere epistolam me, quamdiu aegrotares. Nunc vero ex animo Deum precor, ut pristinum hoc bonum, quod recuperasti, & brevi intercapedine didicisti, quantum sit, proprium esse velit tibi, & in Nestoreos annos continuari, ut ab illis felicissimis studiis tuis innumera in commune publicum profutura promanent, & perficias, quod ego sum auguratus. Pro quo, ut gratias agas mihi, nihil est sane: qui jamdudum non haec modo, tum summis virtutibus hujus aetatis tuae, tum meritis erga me (ut propria tua recenseam, nec memorem, qui totius domus vestrae in me sit nexus) debebam. Caeterum hoc meum grati animi testimonium acceptum esse tibi, tamque benigne id te interpretari, id vero ego imitus laetor, & haut muto factum. Veniet, spero, dies, cum omen nostrum in rem praesentem conversum fuerit: nec erit tum quisquam, qui magis hoc ad se pertinere credet, quam ille ipse, qui dedit, & majore buccina sonabit laudes tuas, si tamen & ipse supra hanc imbecillitatem, quae nunc publicata est, aspirabit. Ipsum opusculum nostrum νεοτευχές, ἔτι γλυφάνοιο ποτίσδον placere potuisse tibi, non miror, qui nos ames, ut de nobis judicare non possis, quia affectus judicium tuum supplantet. Ego vero hunc ipsum affectum judicium interpretor, & sic fraudo diffidentem animum metu, quem pro foetu meo

habebam, haecenus, ut non inutili negotio in nostris manibus fuisset Statius. Nam ut aliquid supra caeteros egregium praestiterim, nunquam me sic amabo, ut mihi id persuadeatis. Nosco ingenio mei vires, scio quam exigua doctrina, quam haec ipsa inter spinas quasi & tribulos diversarum occupationum aegerrime collecta mihi. Sed hoc statim in ipso exordio observabam, editores non nullos priores, qui istis rebus infinitis parasangis me superabant, industria caruisse. Ante duas hebdomades fere misi exemplum ad *Gervartium*, non ligatum, sed impactum, & accisum tamen, ut minor esset moles fasciculi. Si tam magno erit animo, ut stricturas liturasque nostras in lectiones suas concoquat, habebo certum amicum, quem posthac summa observantia colam. Sed hoc vix spero. Non respondebit, credo, mihi, sed post aliquot dies epistolam edet, ubi videbitis rejectiunculam interpretis Statiani. Hoc si faciet, & ego vivam, ostendam illi me *Cruceum* non esse: & augebitur forte uno atque altero folio liber meus. Oportebit enim defensionem exemplaribus, quae adhuc in taberna sunt, adjici. Sed haec somnia sunt. Ego saltem conficius sum mihi, me nunquam injuria illum vellicasse, nec unquam ineptum, indoctum, inscitum, male de Statio meritum appellasse. Conjecturas ejus reprehendi: sed & aliorum, sed & amicorum, quos alias observo, veneror: quod in ipso limine sine fraude me facturum praedixi. Interim meos quoque errores libens agnoscam & emendari patiar. Quare te quoque, charissimum caput, oro, ut in quibus nos dormitasse offenderis, ne finas nos medio die impingere: sed face ingenii tui dispellas tenebras nostras, & liberrime lapsus nostros castiges. Et videbaris sane innuere te hoc amici munus praestitutum, si exemplar ad manum haberes. Habebis nunc certe, quod ad τὸ ὑπερμεγαν Parentem tuum misi. De *Sauberto* gaudeo illum observantiam suam erga nomen vestrum tandem protulisse. Ego scio, quos olim sermones cum ipso de ea re, & magno illo opere, quod nunc exercet Elzeviriorum operas, jam tunc sperato, habuerim. Vir profecto est vere doctus, & pacis Ecclesiasticae amantissimus: cujus si consilia audirentur, plus pietatis, minus controversiarum in Ecclesia haberemus. Sed & laetor, quod meminit mei: quamquam verba illa pudori nostro gravia sunt. Vellem citius hujus mihi rei notitia fuisset. Scripsi enim ante paucos dies Altorfium, sive Noribergam, ad *Mich. Viridungum* pro impetrandis Casauboni ad Rittershusium epistolis, de sententia maxime illustris & maximi viri Domini de Tienhooven, qui ut opus illud promoveret, me de curandis illis literis securum esse jussit. Itaque illas ei nuper tradidi. potuissem commode adjicere ad Saubertum unas. *Fabricium* non miror cum Sabinis somniare, quod libenter vellet. Non aliter loquitur in iis, quas ad me misit: jubet etiam me mutare nonnulla in dedicationibus: quod satis fiet tempore, cum liber praelo subjicietur. Sed mihi senior Elzeverius, cum hic esset, sine circuitione loquebatur, esse sibi adhuc permulta exemplaria prioris editionis, quae priusquam divendita sint, non posse se auspicari aliam. Scribebas te una cum tuis mittere ad me Fabricij literas: id oblitus credo, cum obsignasti tuas: neque enim illas vidi. Codices quod remittis, ago magnas

gnas tibi gratias. De illis Excerptis doleo me tibi non satisfacere. Crede mihi, meus amor, ab eo tempore, quo primum illa perscrutatus sum obiter, & incidi in locum illum, quem in ommissis propositum vidisti, non fuit ocium mihi vel semel de illis cogitandi. Nisi vir ille, quem merito vereri & revereri me scis, aperte mihi interminatus esset sub amissione benevolentiae suae, ne cuiquam mortalium chartas illas (sunt enim ex quodam adversariorum libro abscissae) ostenderem, ipsas jam dudum tibi tradidissem. Dabo operam, ut commodissime fieri poterit, ut neutri vestrum injuriam faciam. Sed & Vossianos expectabam dudum: videntur lentiores facti abnegatione Velleji: sed palpabo, & ferio annitar, ne hîc quoque spes nostra destituatur. Folia de Somniis & Boethium hîc habes. Martialem addidissem, sed restant paucula in ultimis libris enotanda, quod ne hîc aut nudius tertius facerem, impeditus sum. Propediem tamen eum recipies, & exonerabimus nos aliis quoque libris, quos nimis diu ex vestra bibliotheca & publica detineo. Cura ut valeas, mi Heinsi, *πᾶν ἀπ' ἀληθείας πεπλασμένον ἐκ Διὸς ἔργον*. Hagae a. d. vi. Jul. satis verbose, cum ita constituerem, sepositis omnibus hanc horam ociose tecum garrire. Anno *MDCCXXXVII*. Saluto Dn. Parentem tuum, Amitam, sororem, nobilissimum Ploosium.

EPISTOLA XXV.

J. F R. G R O N O V I U S

*Nic. Heinsio.**Leidam.*

CHARISSIMUM pectus. Pudet toties allegare penes te nugales occupationes meas, cum praecipua occupatio ea esse debeat, & sit, respondere humanitati tuae, atque officio studioque erga te plenissime satisfacere omnibus. Sed ita fieri adsolet, abripimur a praesentibus etiam inviti, & absentium, quorum etiam non minor, immo vero major cura est, diem ingratis cogimur diffindere. Tibi vero, si quam bilem in nasum concit mora mea, placabit eam, spero, adjunctus *τρεπτόθητος* liber, in quo tandem impetrabiles humanissimos illos homines habui. Eo uteris pro lubitu tuo, & quum fatis fueris usus, ad me remittes. *Ὁ πᾶν* Parentis tui *χρυσὴ ἀνταξία* recte accepi, & responsum ad eas adjungerem, nisi gravissimas ejus curas interpellare vererer. Meam igitur praestabis vicem, & officiosissime salutato narrabis laetitiam meam, quae intimas mihi fibras pertentavit, simul eas legi. Eram tum forte in procinctu, ut adirem heroa *Grafwinckelium*, cum eo pransurus. Cui ut illas perrexî. cum ter perlegisset, quid senserit, quid dixerit, vos soli aestimare aequi estis, qui novistis, quam magna illa anima divinum virum, Parentem tuum, intelligat, admiretur, observet, quam te amet, amplectatur, & per eadem vestigia ad apicem gloriae grassantem videre gestiat. Epistolae Casauboni lentissime magno

gno dolore meo procedunt. Nec adigere quibuscumque admonitionibus hominem nostrum possum, ut maturet. Semper adest aliquid causae, aut si multum boni, honestae promissiones, sed quae rarissime ad diem respondent. Mihi exemplum libri mei ad ampliss. *Cunaeum*, & eadem via affectum ipsius parare mihi per literas studui. Velim captata occasione iudicium ejus explores, & mitissime admoneas, si permittent rationes occupationum summi viri, ut breviter ad meas respondeat. Saluta, quaeso, nomine meo Scriverium, Boxhornium, Bodecherum, Plofium, honestiss. amitam tuam & sororem suavissimam. *Baudii* Amores quando apparebunt? quando Agricola Taciti? Nos in augendis Casauboni epistolis quomodo laboremus, videbis ex adjectis, quas Dn. Parenti tuo, cum vacabit, ostendes, & ad me remittes postea. Nolim pluribus, ne interpretentur iniqui vanam aliquam ambitionem, quasi ideo eas ostentem, quod optimi illi viri nimis me aestiment. Facerent hoc enim haud dubie isti, quos dicis, aemuli: quos, quamvis paucos, nescio quomodo comparaverim: qui nec quicquam aemulatione dignum in me agnoscam, & si tale quid suspicarentur alii, ita id abscondam ac demittam, ut facile omnibus, quos odor aliquis eruditionis afflavit, qui me nunquam, loco cedam. Fabricii Poëmaticis omnem bonam fortunam precor, sed exiguam adhuc, immo nullam spem Elzevirii mihi dederunt. Nisi tua gratia aliquid effectum fuerit, jacebunt, credo, ad Kalendas Graecas, aut meae Diatribae fatum experientur, quae a nullo non Leidenf, Amsterodamensi, Hagienf magnis auctoribus rejecta est: donec tandem bonus Mairius os sibi sublini pateretur. Si itaque, quod vix spero, aliquid aequi ab eis impetraveris, fac sciam. Interim, quod fiat commodo tuo, partem operis inspicere velim, propter nonnulla, quae ipse Fabricius me perlegere jussit. Erant his diebus mihi in manibus docti quidam Scriptores, quos in aliquot locis veterum ad Comitiorum rationem pertinentibus mire deprehendebam allucinatos. Ii etsi Gruchium allegabant, ut sententiam ejus explicare magis viderentur, quam aliquid afferre novi, ipsum tamen Gruchium videre aveo. Si in vestra bibliotheca est, mitte, quaeso, sed per amicum, non aurigas, non nautas. Nec enim festinamus. Cl. Boxhornio librum suum etiam remitto. Errat auctor p. 38. in loco Senecae lib. II. de Ira. Nihil verius Lipsiana ad illum locum nota, & possem eam sexcentis exemplis probare. Vide illum, si operae est. Vale decus meum. Hagae VIII. Kal. Sextiles Anno MDCCXXXVII.

Noli, quaeso, imitari ignaviam meam, sed quoties vacat, & lubido est, scribe. Semper enim tuae mihi gratissimae veniunt. Ob censuram in epigrammatum valde te amo, & recte monenti statim obtemperavimus. Scripsimus enim: *Quo surgunt Batavae*. Ante septemdium valere nobis dicebat heros Ianus Grotius opiparo convivio apud patrum. Ibi salutis Heroum Leidenfium multae amyftides in orbem iverunt. Hoc scire te volui.

EPISTOLA. XXVI.

J. F. R. GRONOVIIUS

*Nic. Heinsio.**Leidam.*

Charissimum pectus, etsi nihil mihi antiquius, quam tua jussa capeffere & cexsequi, tamen a reditu sic implicitus fui, sic distractus, ut otium ad Vossium scribendi mihi defuerit. Neque enim respondere possum, quin judicem de illis, quae ille in Diatribe notare voluit. Hodie tamen, aut certe cras, id faciam, & statim ut accepero Ovidios, ad te mittam. Vide infelicitatem meam. Heri obvius factus mihi *Cl. Grotius* salutem dicit a fratre suo Legato, & gratias agit ejus nomine pro munusculo libelli mei. Caeterum illum mirari, quod literas suas satis, ut ipse scribit, prolixas, in quibus de plurimis Statii locis sententiam suam rogatus a me exposuerat, non acceperim. Vide, inquam, damnum meum. Dum haec scribo, redditur mihi epistolum ipsius incomparabilis viri ad me, in quo de opusculo nostro judicat, & gratias agit. Vix me contineo, quin ad te mittam, ut hujus gaudii mei sis particeps. Sed sufficit vane cogitasse, ne etiam opere ipso vanus sim. Non ita pridem etiam reddita mihi, quam vides, *Fabricii* epistola. Ea causa tum statim aliquid ad *Scriverium* exaravi. Cum eo tu de re tota loquere, & epistolam postea remittes. Vale, Corculum meum, & me ama. Scripsi raptissime. a. d. iv. Kal. Augusti. Hagae. Anno *MDCCXXXVII*.

Τὸν πάνυ Parentem tuum officiosissime saluto, item omnes domesticos vestros, quibus etiam nunc gratias ago maximas pro nupera comitate. Heri vesperi coenabam genialiter cum ampliff. *Grafwinckelio*, solus cum solo. Omnia lepide, jucunde, multa memoria amicorum, plurima vestri. Iterum vale, effundo enim haec adstante nobiliff. *Pavio*, qui hanc feret.

EPISTOLA. XXVII.

J. F. R. GRONOVIIUS

*Nic. Heinsio.**Leidam.*

Charissimum pectus, noli putare, tantam in me cadere negligentiam, ut obliviscerer promissi mei, absque amicissimo vander Mairio fuisset, quem omnino conventum volebam, antequam ad te scriberem. Itaque quater captatis temporibus ad aedes ejus accessi: sed hominem domi deprehendere non potui, nisi quinta vice, die Saturni praeterito, cum tamen paucissimis, quod distringeretur aliis negociis, verbis cum eo locutus intellexi, nihil cum vete-

Tom. III.

E

rum

rum Cod. Ovidii habere, praeter quod penes me fuisset, tuque antehac habuisti. Interim non possum non laudare indefessum studium tuum in conferendis MSS. & V. C. quos ad institutum tuum profuturos putas. Nec profecto in hoc genere sine istiusmodi adminiculis quicquam feliciter tentatur. Ita omnes maximi viri eam viam sunt ingressi, eum laborem, idque taedium devoraverunt: & habes exemplum domesticum, quod in omnibus illustribus factis meritisque penes te allegandum. Vide in Horatium notas, vide in Senecam, in Maximum Tyrium, in alios: ubique vides MSS. & Cod. usum. Quique sola ingenii aut quantaecunque doctrinae ope hoc tentant, quid agunt aliud, quam siquidem vere docti sunt, ut plurimis in locis ingeniosas nugas ostendant, sin minus, omnium febrientium & mente emotorum ludibria somniaque superent? Ipse magnus *Scaliger*, quot in locis in priore Manilii editione pedem impeditissimum habuit, per quae in posteriore, optimo illo Gemblacensi codice adjutus, quasi per planum pervagatus est. Et nos, quid veteres Statii codices nobis profuerint, allegare possumus: & tu, cum tua cum istorum hominum *ἀνταγέτων* commentis comparabis, tunc vero demum luculentum fructum industriae tuae consequeris. Quare sic perge: nec dubito, quin expectationem nostram, qui tantum ingenium, tantam eruditionem cum istis praesidiis conjunxeris, infinitis parasangis sis superaturus. Officium, quod mihi salutando τὸ πᾶν *Cunaeum* praestitisti, scito non tantum digne me aestimare; sed ejus fructum jam apparuisse. Eopse die, quo tuae mihi reddita, vir summus epistolam *χρυσοῦ ἀνταξίου* ad me misit; pro qua praesens, si Deus voluerit, gratias agam. Constitui enim omnino hac hebdomadē ad vos excurrere, & comitate vestra, qua toties me in ruborem dedistis, uti. Luctus vero tuus vehementer me conturbavit, & fecisset ambiguum consilii, nisi tu tamen me venire juberēs. Cogitabam enim, ubi optima feminarum rebus humanis valere dixisset, Leidaene an Dordrecht, unde genus esse credebam: si Leidae, an non multiplicia hinc vobis negocia? si Dordrecht, an non vos eo excursuri? Si alterutrum, exspecto adhuc a te unas, quibus me tantisper domi manere jubeas, dum vos haec explicueritis. Sin eae non missae fuerint, die Jovis aut certe Veneris me cum bono Deo exspectate. Ovidii Codicem mitto, quem petieras. Vale, anima mea, & vestros saluta. Hagae v. Id. Sextil. CIOICXXXVII.

EPISTOLA XXVIII.

J. F. R. GRONOVIIUS

Nic. Heinsio.

Leidam.
Charissimum pectus, quod hactenus filui, facile cogitas, credo, nullam *Caliam* fuisse causam, quam quod literas *Gerardi Vossii* & Ovidios expectarem.
 Unum

Unum librum, quem vides, ante quatrimum accepi, sed sine literis, quas eum tamen jam ante septimanam dedisse *Franciscidion* nuper mihi confirmavit. Igitur nescio, cur non Fastos una miserit. Illum statim, ut redditus, ad te misissem, nisi acutissimis dentium doloribus, quos uvas recenter nimium avide lurchando contraxeram, vexatus, omnem rerum mearum curam plusculos jam dies insuper habere fuisset coactus: Tu igitur hoc libro sine mora utere, & una cum altero edito dein ad me remitte. Non dubito, quin ubi illi ad dominos fuerint reversi; caeteros etiam facile simus extorsuri. Nec opus est, ut aut apud *Isaacum*, aut eos, unde hic sermo ad eum emanare posset, hos libros penes te esse fatearis. Ad *Scrivarium* ante mensem scripsi: de suspicionibus, de quibus commodum injeceras, me purgavi: rogavi, ut *Fabricianorum* poematum edendorum curam fumeret. Ille nihil respondit, nec de libro meo iudicium suum scripsit. Tu, si quid hujuscemodi ex sermonibus ejus cognovisti, cave de quoquam me habeas celatum: quod te per amicitiae nostrae sincerissimae genium oro. Si ab hoc viro auspicia editionis libri illius expectanda sunt, miseret me optimi *Fabricii*, qui sub tam lentis maxillis erit. Velim etiam scire, an *Palladium* MS. ab eo impetrare potueris. Relegi non nulla observata per otium, & multa notavi mihi egregia, quae statim in ipsa collatione aestimare non potuimus. Quae etsi per se satis sint commendata, & vel uno libro veteri teste nitantur: tamen velim scire, an & altero codice possint confirmari. Epistolam *Fabricii*, quam dudum est, quod ad te misi, quin acceperis non dubito. Puto te tum cum Dom. Parente domo fuisse profectum, quum ista vobis reddita est. Eum pridem rediisse *Leidam* ex ampliff. *Granswinkelio* cognovi. Itaque illam, ubi commodum fuerit, remittes. In Epistolis *Casauboni* nunc graviter pergitur. Accepi etiam ante paucos dies egregium augmentum a *Rittershusii* filio. Scire cupio an redierit *Boxhornius*. Vale, amicissime mortalium, & me ama. Raptim a. d. xvii. Kal. Octobr. Anno MDCCXXXVII.

EPISTOLA XXIX.

J. F. R. GRONOVII

*Nic. Heinsio.**Leidam.*

Nobilissime & Charissime juvenum, indigne mecum agitur, quod de divino Scazonte Parentis tui ex aliorum potius sermonibus hîc, quam tuo missu, mihi fuit cognoscendum. Erubui sane & exarsi, ubi ea fama ad aures accidit meas: quippe qui primus videre & scire debuissem, ultimus credo omnium, qui hîc sunt, accepero. Haecine est fides! haec memoria nostri? qui toties pollicitus es, quidquid vel a te hujusmodi ederetur, nunquam me ejus exsortem fore. Dispeream, nisi haec res me angit vehementer. Quid si
E 2 nunc

nunc poscam ipsam elegiam, quam ante tot dies manu stipulata promifisti te ad me scripturum, simul atque Ovidium Vossii accepisses! Haud dubie minus adhuc reperiam memorem. Et quasi conjurassetis, silet etiam *Boxhornius* heros, quem non ita pridem literis scriptis ad eum rogavi, ut unum triduum concederet mihi usuram MSS. Cypriani, quo nunquam ita ex certa causa egere me sensi. Is tamen nec librum mittit, qui in pulpitis ejus jacet, & ut vetus parma vacat, nec respondet. Tu redimes noxam, quam contraxisti, si non modo illius admirandi Scazontis exemplar mittes, sed extorquebis etiam illi lento MS. Cyprianum: quem non desidero, sed διψῶ, & tamen paucarum horarum usu extincta erit haec sitis, illeque ad vos revertetur. Heros *Pilius* te officiosissime salutat, & jamdudum album suum exspectat. Itaque rogare me jussit, ut quod commodo fieret tuo, petitum melos festinares. Idemque ego rogo, & te vestrosque omnes plurimum salvere jubeo. Vale, Φίλτατον κάρω. Hagae Postrid. Kal. Octo. Anno CIΩICXXXVII.

Si me amas, fac ut tria ad minimum exemplaria habeam Scazontis. Jam in eo sum, ut scribam ad amicos quosdam doctissimos & optimos in Germania viros. Iis nihil gratius praestare possum, quam hoc κειμήλιον mittere.

EPISTOLA XXX.

J. FR. GRONOVIIUS.

*Nic. Heinsio.**Leidam.*

CHARISSIMUM pectus, cum cognati quidam & populares mei aliquot dies hic haerent, inde in castra profecti post octiduum reverterentur, rursumque subsisterent, fieri non potuit, quin multum temporis officia ipsis praestando comburerem. Ita interjecti dies, & qui post advenerunt, cumulum quendam negotiorum, turbato studiorum ordine, in caput meum jecerunt, ut tardior esse cogerer in literis ad te scribendis. Quod facilis, ut saepe solitus, condonabis mihi, qui ubicunque essem, aut quicquid agerem, ad te tamen animo anhelarem, & debiti mihi ipse eram exactor morosissimus. Habe nunc pagellas duas, quas in nugatorio scripto nostro feci recudi, & tot quidem, exempla, si recte pono calculum, ut duo ipse retinere domi vestrae, caetera *Cunaeo*, *Scriverio*, *Boxhornio*, *Bodechero*, singulis cum salutatione officiosissima offeras, atque hoc factum sic apud eos excuses, uti ego apud te facio. Primum igitur, cujus viri amicitiam lucrari possum, quid opus ejus cum prima notitia nostri nominis odium quaerere? Nec tamen ipsum modo vereor, sed & multos magnos & eruditissimos in Gallia viros, quibus illam scriptionem (vide & mirare suavitatem summi viri) commendasse se significat *Grotius* ὁ πάνυ, quos ea libertate indelectatos suspicabar. Denique videbam me quoque non in re quidem, quod sciam, circa rem tamen errasse. Excerpseram enim ista ex
adver-

adversariis sine ulteriore obrussa, cum in ea ipsa prius negligenter coniecissem. Non sum is profecto, qui magnorum nominum insectatione famam parare unquam constituerit. Sed vitium hoc aetatis est: efferimur interdum impetu juvenili, qui tamen, ubi paulum se collegerit animus, frigescit, & repeto omni studio quaesitum morem, modestia potius & comitate, quam audacia & spiritu placere. Erat autem caussa, quod vir quidem doctissimus, ceu herbam parietariam, ubique traducit bonum *Wouwerium*, qui tamen nunquam eum laesit, & aliquibus certe in rem literariam meritis, si qua fuit sinistra de eo fama, apud aequos arbitros illam consopivit. Audi etiam rem lepidam. Heri accepi tandem a *Gevartio* literas longe humanissimas. Is munus sibi gratissimum fuisse Diatriben testatur, reprehensiones nostras magno animo fert, ingenium & eruditionem (ita loquitur: voluit dicere, diligentiam & conatum) aestimat, ad similem telam in Thebaida & Achilleida contexendam amice hortatur. Equidem non possum satis admirari hanc virtutem eximii viri, & quamprimum rescribam ei verbis plus quam byssinis, quaeque vel coelo possint deducere lunam. Tu vero has nemini ostende, ne aut invidiam laceffere, aut νεανιὸν καυχᾶσθαι videar, dum apud te, charissimum mihi caput, apud quem omnia mihi, ut tibi in me, licere cupio, simplicissime loquor. *Fabricio* nostro ut placeat molestissimorum mortalium, a quo genere pudendum est praestantium ingeniorum famam pendere, scelus, credo, ex his videbis. Ego quanto dolore conficiar, quod alia omnia acciderunt, quam ipse speraverat, non fane quam ego, dicere non possum. Tu si quid respondere ei voles, una cum iis, quas ad me scriptas dudum ad te misi, remitte. Vale, mi Hein-
si, ἡ μὲμνησο αἰὲν ἀριτεύειν. Incomparabilem Parentem tuum, Amitam, Sororem, Plosum, si apud vos est, observante atque officiosissime saluto. Ha-
gae. a. d. III. Non. Octobr. Anno CIOIOCCXXXVII.

EPISTOLA XXXI.

J. F R. G R O N O V I U S

Nic. Heinsio.

Leidam.

Nobilissime & charissime juvenum. Dum quotidie ad te scripturio & identidem interpellor, aliquot mihi dies non sine dividia effluxerunt. Simul vero nunc paululum temporis suffurari potui, non sustinui diutius videri omissior. Loci Aufonii, de quibus Freherum inspicere petieram te, & recepi i, hi sunt. vers. 32. & *bivio refluit munimine pontus*. Quid *bivium munimen*? Si nihil, consule, quaeso, domesticum oraculum: neque enim hîc spero quicquam a meis viribus. Major fiducia me habet in illo corruptissimo loco versu 35. *Non superante vado rapidos reparare meatus*. Sed conjecturam meam, immo veritatem, habebis, ubi quid *Freherus* ibi dixerit, perscripseris. Mi-

nore molimine opus est vers. 242. ubi *defensos* haud dubie pro *defensus piscis* scribendum. Item vers. 256. ubi *Dexter inobliquum* lego, pro *dextera*. vers. 297. *mediis concurrat fluctibus Echo*. Hiat sententia, nisi legas, ut puto scripsisse Aufonium: *mediis quae occurrit fl.* vers. 409. *Quique caput rerum*. Nihil hinc vidit Vinetus, qui longis logis nescio de quibus regibus nescio quid nugatur: cum sit expeditissimus sensus & caetera in facili, si de se ipso loquentem Aufonium intelligas. De his, ergo patieris hoc oneris imponi tibi, o φίλτατον κάρα, ut amplissimi illius quondam & magni viri commentarium consulas, & ipsius adnotata mecum communices. Cypriano facile nunc carerem: sed non mittam, nisi per amicum, ne sine causa te gravem sumptu. *Pilius* noster te humanissime salutat. Ille, quo avidius exspectat nectar Pierium tuum, eo majore in dies versatur in metu, ne se (est enim homo optimus, & te tum ex merito tuo praecipue, tum etiam ex sensu meo, facit maximi, de se sentit humiliter, cum doctrinam tuam, ingenium, & spem respicit) minus eo dignum putes, eaque de causa moreris. Ego vero non unum juravi juramentum pro simplicitate & candore animi tui, & me stiti fidejussorem tui promissi, ut aestum ejus pacarem. Nunc, puto, Dordrecht est. Nam intra triduum non vidi eum, quod ipse ad me non invisit, nec mihi multum fuit oculi. Quod ergo commodo fiat tuo, etiam etiamque volentem te rogabo, ut et meam fidem liberes, & tantum tui miratorem spe certissima fraudari non patiaris, Vale, πατρός τριμεγίστη magna gloria, & me ama; Patrem vero cum amita & sorore a me humanissime officiosissimeque saluta. Raptim Hagae a. d. iii. Id. Novemb. Martialibus Anno ciciocxxxvii.

EPISTOLA XXXII.

J. FR. GRONOVIIUS

*Nic. Heinsio.**Leidam.*

Non possum verbis eloqui, quantum apposueris tuae apud me gratiae, ὅ φίλτατον ἦτορ, quod de locis Aufonii adeo accurate sententiam & πάνυ *Freberi* inquirere, simul & mecum communicare voluisti. Atque eo quidem magis debeo tibi, quo plus molestiae in libro inveniando exhaustum est tibi. Solum illud doleo, quod tantum temporis mea hominis infelicis causa Themidi Palladique tuis periit. Hoc damnum puto maximum & vix excusabile, absque tua esset humanitate, quae tanti aestimat tot beneficia imputari mihi posse. Quod quidem lubentissimo me semper feceris, qui agnoscendo meritum tuum bonum ero nomen, & ingenua confessione debiti faciam, ut te non poeniteat operum talium. Video doctum illum virum nihil minus curae habuisse, quam ut tot corrupta in egregio Poëmatio illo loca emendaret. Nempe Scaligeri no-

men

men obstitit illi, qui, quae reliquit ille, de his desperavit. Sed audebone porro id tibi munus imponere? Si patieris, velim inspicias, quid dixerit ad versum 115. de Dinocharis opere:

Spirat enim testa testudine Corus Achates

Afflictamque rapit ferrato crine puellam.

Neve tantum inquirendi, sed & iudicandi tibi dem materiam, cense quae mihi conjectura in mentem venerit. Historia est apud Plinium lib. xxx. c. xiv. ex qua discimus *magnetem* fuisse, unde suspendit Arfinoen Dinochares. Nam *Achatem* subdititium esse vel inde patet, quod nemo unquam senserit, *Achatis* eam vim fuisse, ut ferrum traheret. Tò *Corus* est ab ineptis hominibus, qui verbum *Spirare* non nisi vento convenire putarunt. Scribe: *testudine vera magnetis*. Illas vero literas gn ambiguum facere syllabam nosti. Ut in *Prognis*, *Cygnum* priorem corripuerunt Naso & Horatius. Nihil frequentius Graecis, & aliquid diximus in diatriba. Graecis non *μάγνης* modo dicebatur sed & *μαγνήτης*, & *μαγνήτης*, hoc fraudi bonis hominibus fuit. Est vero *magnetis* ambiguum vocabulum, & tum significat lapidem Herculeum, qui ferrum trahit, tum alium, simillimum argento, λίθον λευκόν, de quibus abunde Salmasius ad Solinum. Hinc factum, ut *veram magnetida* dixerit, quasi excludens ab hoc nomine alteram notiolem, quae ambiguum id vocabulum fecit. Ita apud *Martialem*, *vera Gentiana*, *veri Sardonyches*, & similia. Dein leg. *Affictam*, ut habent MS. Cod. quod est *affixam*. Ita *Lucrétius*: *Ficta vestigia*: pro *fixa*. Et *Diomedes Grammaticus* citat fragmen. *Scauri*; *Sagitta confictus*, de quo *Cujacius* in *Observationum* libris. Hoc examina, quaeso, nam mihi nescio quo modo hoc commentum placet. vs. 408. *Praefaecturarum titulo meruerit secundo*. Hic una litera mutanda est. Quod cum non viderent boni *Vinctus* & *Alciatus*, mirifice hic se torserunt. Quid *Marquardus*? vs. 411. *Par fuerit primis*. Aveo scire quid ille hic. Liqueat enim mihi scribendum: *Praefuerit primis*, & intelligendum de *Ausonio*, qui praecceptor *Augusti* fuit. vs. 412. pro *suum* scribendum, *Tuum*. Sed consulatum cuius intelligit *Freherus*, *Ausoniine* an alterius cuiusdam? hoc enim praecipuum est. Si prius, vidit aliquid: nam in posteriori ineptit vehementer *Vinctus*. Scribo haec *Delphis* redux, ubi identidem nunc contemplor exemplum humanae fragilitatis in optimo *Levio* nostro, qui vivus vidensque moritur, nisi Deo (quod precor) visum aliter, nam homines quidem desperant. Eo excurrebam quoque, cum *Cl. Boxhornius* hic esset. Eum ergo salutabis meo nomine peramanter, & magnas ages ei gratias pro lectissimis epigrammatis. Non intelligo, quod scribis de *Fabio cunctatore*, quem ais horrenda moliri. Rogo te per amicitiam nostram, uti hoc aenigma solvas mihi. Nam mihi quidem sphynx domi non est. Ignosce, quaeso, meae tarditati, qui ἐκὼν ἀέκοντι θυμῷ hucusque responsum differre molestissimis curis sum coactus: ignosce etiam harum festinationi, quas lassus languensque effudi. Saluta vero meo nomine officiosissime maximum Parentem tuum, totam domum, *Scriverium*, *Bodecherum*. Vale, mi *Heinsi*, & graviter disce stare ac nosse civilia jura. Hagae a. d. III. Non. Decemb. Anno MDCCXXXVII.

De

De *Isaaco Vossio* gaudeo tuum conspirare cum meo iudicium, opto, ut superstes sit ille Juvenis, qui profecto virum ostendet, & nomen, quod vestris adjungat posteritas. Irascor furenter tardigradis illis, qui faciunt, quo minus legam divinos versus tuos. Ne ignores felicitatem meam, emi heri in auctione Mairiana Xenophontem ex ed. Leunclavii V. Florenis. Arriani periplum ponti Euxini & Erythraei cum notis Stuckii 15 stuveris.

EPISTOLA XXXIII.

J. FR. GRONOVIIUS

*Nic. Heinsio.**Leidam.*

Nobilissime & Charissime juvenum. Quibus occupationibus districtus fuerim, cum tuae mihi redderentur, vel hinc scias, quod totas viginti quatuor horas, hoc est, diem & noctem penes me fuerit desideratissimus tuus fasciculus, antequam solvere eum quiverim. Accessit cumulo negotiorum *Suffridus Sixtinus*, cui morosissimo exactori officiorum adesse me oportuit, & duos vel tres dies, quos minime habebam vacuos, nihil fere agendo comburere. Hunc tamen fructum habui, quod cum recitarem ei divinum poema, quo Parens tuus Diatribam meam ornavit, an oneravit potius nihil tale meritam (neque enim viderat) exclamantem audiui: Ille vir solus Poëta est. Ego vero proxime post illum te pono, postquam τριπόθεν illud γέμα tuum legere coepi. Nec enim refrixit admiratio mea, quam semel excitaveras, postquam sub conspectu & iudicio positum illud diligentius expendi, sed immensum quantum crevit. Habeo tandem carmen, quale multos jam annos videre expetebam, sobrium, castum, generosum, excitatum, in quo ne Momus quicquam reprehendat, nam quae tu dicis, illa vero decent aetatem tuam, quae tum plurimum promittit, quando foecunda sensuum est. Ego vero quamvis, uti nosti, versiculos rarissime tento, & in hac parte plane sum infans, non potui tamen me continere, quin jussu tuo nescio quod futile epigramma in illum, quem dicis insulsum nudumque tuarum virtutum aestimatorem, effunderem. Accipe igitur Cluvieno dignum foetum, & te, hoc est, γονιμά-
τατον ποιητήν, dum legis, obliviscere:

*Te quoque, dum celeris tentas vestigia famae
Nominibus magni non peritura Patris,
Degeneri livor jamdudum dente laceffit,
Livor praeclaris umbra comesque viris.
Felix, cui tenerae properavit flore juventae
Ingenium laudes, & decora alta senum.
Credimus & similem patriis virtutibus isto
Te genus, Heinsiade, posse negare minus.*

*At tibi, mens atra squalet cui tabe veneni,
Quoque cares, vati non finit esse decus,
Comprecor, ut maneat sententia, nec sit in illo
Pectore, cui quondam, quod facis, eveniet.*

Heros *Pilius* coelum tenere se arbitratur tanto tuo dono. Album tradidit, credo, famulo vestro. Illud magnopere te rogo, ut apud τὸ πᾶν Parentem me excuses, quod dum hîc fuit, salutare eum non potuerim. Crede mihi, nihil me nunc magis cruciat. Duos habeo amicos, quibus nihil non debere volo, alterum vivum poene (ignoscat mihi genius tuus) cadaver, alterum jam funus. Scito enim bonum *Levium* heri rebus humanis πολλά χαίρειν dixisse: jamque sum in procinctu, ut eam Delphos, & tristissimam haud dubie matrem mulceam. Horum vero ista culpa est, hi me in pluribus jam pridem saepe remorantur. Sed spero praesentem me subservituum orationi tuae; & quod tu nondum excusaveris, coram expiaturum. Exiguum adhuc pensum restat mihi in Graecis epigrammatis, quod ubi absolvero, non regnum merear, ut iterum humanitatem hospitii vestri non degustem. Cupio autem, quos ex bibliotheca habeo, libros comiter adferre. Et eo nunc sum occupatior, quod aliquot dierum in dulcissimo consortio vestro ocium lucrifacere laboro. Cl. *Grotius* te salutat, & magnas agit gratias, acturus majores, ubi illustre munus perlegerit & aestimaverit. Quid *Bavius* & *Mevius* judicaturi sint, ciccum haud interduim. Explorabo tamen, quia jubes. Alter abest urbe: alterum nondum post illud tempus, quo videri id voluit, vidi. Die *Mercurii*, si Deo placuerit, aut *Jovis* sequenti hebdomade me exspecta. *H. Grotius* notas suas ad *Statii Thebaida* & *Achilleida* misit, quas tamen nondum vidi, neque enim communicare eas vult optimus *Gulielmius*, priusquam cum aliquo otio eas una expendere poterimus. Hunc fructum praecerpere ille gestit. Vale, deliciae nostrae, & saluta totam domum vestram. Hagae III. Eid. Decemb. Anno MDIOCCXXVII.

Clariss. *Boxhornium* salvere jubeo, & fortiter facere in expugnanda *Breda*, Tantum enim, quantum ille volet, credet *Posteritas*.

EPISTOLA XXXIV.

J. F. R. GRONOVII

Nic. Heinsio.

Loidam.

Nobilissime & Charissime juvenum. Quanta me adegerit necessitas, ut ἐκὼν ἀέκοντι θυμῷ abrumperem dulcissimum consortium vestrum, & referrem me ad gurgustiolum meum, ex eo licet argumentere, quod tot dies abierunt, & nihil post discessum ad te scripsi. Nihil autem scripsi, quod ita essem districtus, ut ne adhuc quidem libros illos, quos tua & *Boxhornii* gratia

Tom. III.

F

tia

tiâ mecum huc attuli, inspicere potuerim. Quod vero meum utendi illis desiderium sit, ne tu quidem ignoras. Secus nihil mihi fuisset antiquius, quam repetere grates pro, non dico inaeestimabili benevolentia, sed vero meritis atque officiis in immeritum me vestris. Equidem quicquid in Heinſianis aedibus est, singulari quadam εὐμοιείᾳ ad gloriam, elegantiam, gratias, comitatem, μεγαλοθυμίαν natum & compositum est, ne Caniculam quidem excipio & admirabilem illum

Audaces morsu solitum consumere mures.

Et fane hoc sacrarium patere iis, haec ἐλκυστικά corripere eos, qui aliquo raro mentis decore Diis viciniore esse merentur, ut multum est, ita non fane mirum. Ego vero, qui sum? aut quid in me est, quod vos advertat? aut unde mihi haec somnia? Quare cum beneficia intueor vestra, & vos, qui tribuistis, quantivis spatii campus orationi meae panditur: cum vero ad eum convertor, qui accepit, concluditur mihi animus & miratur & obstupeſcit, verborum vero omnem copiam eripit, infans tum maxime sum, cum facundissimum me fore credideram. Tu vero, mi Heinſi, anima mea atque unicae deliciae, subi vices meas, & primum quidem adi te ipsum, gaude ac laetare, quod hominem, caetera vilis pretii, sed profecto non malum nec inficiaturum tam liberalia debita, amore tuo singulari ac emendatis moribus ὅλον ἢ πάντα peculio tuo adjunxeris: dein adversus τὸ ἀντίθεον Parentem tuum, reverendam amitam, dulcissimam & castissimam sororem, ἐκφράσιν τινα ἢ τύπεν animi exhibeto gratissimi: cum omnia dixeris, quae suada potes tua (quid autem apud tales non potes?) talem esse Gronovii dicito, nihil enim in hoc censu haberi potest, quod in me esse, & debere & fateri nolim. Salutationes, quas commendastis mihi ergὰς τὰ πάντα αἰέτως, D. Tienhovium, Hugenum, Graſſwinckelium, deposui acceptissimas. Graſſwinckelius in petitione sua (quod Parenti tuo & tibi in aurem dictum sit) optime sperat; unum veretur: qui si vincet, satis tamen hac vice fore sibi eredit, si nomen ejus inter Candidatos referatur. Ipse Kalendis Januariis, ut ex aliis accepi, in Ecclesia Gallica comparuit. Gerhardus Vossius G. F. petiit a me Fabricii poemata, qua re in spem inducor secuturae editionis. Accepi nuper literas a magno viro, quibus ad aliquot ζητηεῖδια mea, quae, dum ibi essem, ipsi proposueram, respondet. Inter caetera haec habentur: *De loco Ovidii in Fastis, ubi Glossa vet. lib. super MANU habet, CΑΡΑ, scias errasse manum librarii, & τὸ CΑΡΑ glossam esse, qua lector explicabat, quid esset, LACERNA, nempe CΑΡΑ, vel CΑΡΡΑ, Sic enim infimum aevum vocitavit, quae veteribus lacerna.* Vale, charissimum pectus, & me ama. Hagae Prid. Eid. Januar. Anno CIOIOCXCVIII.

Quid audio de Bodechero? an ibit in alium orbem? Salveant Cl. Scriverius & Bôxbôrmus.

Εἰς τὸν βοῦν
ἐν τῷ βοῦν
ἐν τῷ βοῦν
ἐν τῷ βοῦν
ἐν τῷ βοῦν
ἐν τῷ βοῦν

EPIS-

EPISTOLA XXXV.

NIC. HEINSIUS

J. Fr. Gronovio.

Hagam.

Amicissime mortalium. Μάντις κακῶν fui, postquam enim a nobis discessisti, non contemnendo morbo operam dedimus, & ne omnino ociaremur, aegrotare vix tandem vacavit. Fauces vehementi tumore constrictae aegrum respirare vix permittēbant, usum deinde cibi recusabant, ne jam dicam de Baccho, cui profecto bellum acerrimum indictum erat, & anginam rivalem experiebatur, miserrimeque exclusus invito Heinsio tuo plorare cogebatur. Vides quam degeneri morbo laboraverim? Sed medicorum opera, purgatoriis, cataplasmatibus, & venae sectione faucibus meis tandem prospectum est. Nunc cum natibus meis res est, Negat enim medicus bona sanitate me posse frui, nisi inferius guttur obstructione liberetur. Quid agam, amice! egone nates meas, partem tam nobilem, tam illustrem, tonsori aut pharmacopaeo alicui infimo mortalium purgandas committam? quod nunquam futurum existimassem, post manus ferulae subductas, Analyticis posterioribus adhuc metuendum fore! in quas paedagōrum turba numquam saeviit, nunc demum inspectum iri? quis hoc potest videre, quis potest pati! Profecto parum abest, quin cum Theseo praecepta iustitiae dicent. Si tu adesses, amice, nusquam effugeres, quin a natibus mihi esses consiliarius, magni enim momenti res est. Ego interim, ut fortem & prudentem decet virum, necessitati consulam. Negotium Fabricianum in causa est, cur tuis tam cito respondeam. Si poemata ejus ad Vossios nondum misisti, per dies aliquot tibi serva. Omnia enim experiri certum est, priusquam rem deploratam penitus deponam. Haecenus quantum in me fuit, id sedulo operam dedi, ut editio adornari posset. Conveni Elzevirios, Comelinum, Scriverium, & postremo etiam Boxhornium, omnes frustra; cujus rei te testem advoco. Nunc ad extremum etiam parentis mei autoritas interponenda est. *Fabricius* enim semper Elzeviriorum typis maxime delectatus est. Quare si adhuc apud te sunt, post diem aut alterum fac sciam. Gratiarum actioni tuae nunc non respondeo, sed in adventum tuum differam, malo enim candorem nostrum re ipsa experiaris, quam verbis. An album *Pilio* heroi reddideris scire velim. De *Bodechero* vera sunt. Ego vehementer gratulor vapulanti nostro, dum enim Heros abest, maxillae ejus feriabuntur, id illi pro certo nuncies velim. Hec ex *Boxbornio* nostro intellexi *Salmasium* τὸ πᾶν typographis Egigrammata sua Latina promississe, quod si verum est, excerptis nullis mihi opus est. Vale, meum delictum, mei amores, XVI. Jan. CIOIOXXXVIII.

J. FR. GRONOVIIUS

Nic. Heinſio.

Leidam.

CHARISSIMUM pectus. Quemadmodum nihil tristius fuit mihi, quam de invaletudine tua cognoscere, ita non laetio rem unquam nuntium tulerunt Eurybates & Talthybius κύρυκε ἢ ὀτρυνὼ θεράποντε, quam vester Andreas ad *Granswinckelium* τὸ πᾶν, coepisse te cum Hygeia bona fide in gratiam redire. Sed ut integrum & certum sit gaudium meum, ex te ipso id firmari literis aveo. Nescio an jam aptus sis redditus jocis audiendis, sed si non periit pyga tibi, aut apud inferos Theseiae aemula, praecepta bene sedendi dictat, tantisper, spero, te suffulciet, dum unas ad me exares. De munere, quo me cohonestaturum fuisse liberaliter pollicebaris, si adforem, gratiam fecissem lubens. Periculosum est enim, alienis intervenire secretis, & merito verebar, ne Isis irato sistro lumina mea feriret, si tam sacram cryptam profano visu turbare auderem. Oblitus sum in prioribus gratias agere tibi *Pilii* nomine, qui profecto tam luculentis versibus coelo se locatum credit, & infinita tibi debere fatetur. De *Fabricii* Poëmatis ignoro juxta tecum, quid sit futurum. Postquam enim illam misi Amsterodamum (misi autem, simul *Gerhardus* ea poposcerat) nihil literarum inde accepi. Neque appellare nunc eos sustineo ob luctum, qui certe gravissimus totam illam domum confudit. Quid mirum? cum ego alienus & externus vix lacrimas tenuerim audito tanto casu. Homunculi quid sumus? aut quam imparatos saepe fortuna nos invenit? Quem profecto haec talia non commovent ad recordationem humanae sortis sedulamque meditationem extremorum, is dignus est, ut ejus, quod ridet aut non curat, ipse sit exemplum. Sed & aliae debentur naeniae amplissimo & magno viro Dn. *Rocho Honerdio*, qui eodem die, quo iste nos turbo percussit, animam Deo reddiditque, nosque reliquit. Laetor, brevissimo licet tempore, tantum reipubl. decus familiariter me novisse: aut forte hoc doleo magis, quod totum inspicere nondum quivi. Erat enim humanissimus, & qui nugis nostris etiam pretium poneret, & libenter de literis fabularetur. Est adhuc penes ejus hominis exemplar paginarum *Casauboni*, quas, ut excusae sunt e typographia, accipere soleo, ipseque videre petierat. Nescio quam viam inire debeam, uti id recipiam: neque ita frequens in illa domo fui, ut praeter dominum me quis nosset. Duos libros, quos emi feci ex auctione Elzevirianâ, puto accepisti. Fallor, si in iis aliquid dignum expectatione tua invenies, invenisses multo minus in reliquis. Quare non ausus te sum hoc impendio multare. Spero te hîc adfore propediem cum amita & sorore. Si una attuleris tecum MSS. Plinii, poterimus multas bonas horas

in:

in musaeo meo efficere: idque adeo rogo te, ut facias. *Boxhornium* heroem saluto amanter. Ad eum scribam propediem, & specimen dabo ei elegantissimarum correctionum, quas ex variantibus hausi, adscriptis Libanii codici. Satis mihi constat eam Bonaventurae Vulcanii manum esse. Reperistine aliquas Casauboni ad Vulcanium? Vale, o anima mea & saluta vestros. Raptissime ad IV. Non. Febr. Anno CIOIOCXCVIII.

EPISTOLA XXXVII.

J. FR. GRONOVIIUS

*Nic. Heinsio.**Leidam.*

Nobilissime atque amicissime juvenum. Qui has fert, *Kernerus*, Germanus est, Graece & Latine bene doctus, probitatis admirandae, *Berneggeri* auditor, atque eidem eximio viro perfamiliaris olim. Cum igitur vestram famam nosset, magnis a me precibus contendit, ut se tibi traderem, atque ita etiam ad Dn. Parentem ipsi aditus pateret. Venit in has oras adjunctus Comiti cuidam, ut ei esset a studiis: sed ille improbus, quicumque sit, ita tractavit bonum Praeceptorem suum, ut hic stationem illam deferere mallet, aut si nondum deseruit, malit. It ergo Lugdunum vestrum, tum ut sibi suisque studiis vacare rectius possit: tum ut si qua honesta incidat conditio, qua operam dare civis cujusdam erudiendis liberis, & sic sumptus domesticos levare possit, postquam se tot praestantibus heroibus, quot vestra Academia habet praestites, aut certe quibusdam ex iis approbavit, horum suffragio in ejusmodi loco nanciscendo juvetur. Ego, etsi hujusmodi onera imponere tibi pudori habeam, tamen rogatus & flagitatus tum ab ipso, tum aliis communibus amicis, per quos ille mihi innotuit, praemia tuli urbanae frontis, & coactus sum, uti adversum te essem subimpudens. Heri hora diei fere tertia erat mihi negotium apud nobiliss. Dn. te *Tienhooven*. Cognoscebam ex ipso, sororem tuam pridie advenisse: caeterum quod eo die domi non prae-fusus esset, nec, puto, caenasset, nondum se vidisse illam. Miratus sum, te non adesse una, nec omissem heri salutare & causam quaerere, nisi operam dedissem praestantissimo *Grotio* nostro; cujus natali genio & fortunae libandum erat. Itaque cum ad prandium invitarer a Dn. *Tienhovio*, excusari me oportuit, quod ante jam manum promississem ad Grotianum Symposium. Hodie haud dubie ibo: sed profecto hesternum villum adhuc caput meum infestat. Quare ignosces si multa inepte garrio. Te aut literas tuas exspecto, sic ut nihil magis. Vale, meum decus. Hagae, postridie natalem Gulielmi Grotii, Anno CIOIOCXCVIII.

*Nic. Heinsio.**Leidam.*

MI Heinsi. En tibi Ovidium, quem petiisti. Libenter eum heri dedissem Andreae vestro, si suspicatus essem, fore ut in discedentes vestros adhuc inciderem. Noverasne illum, qui in habitu vestro me inrerpellans prohibebat, (quod aegre accidebat mihi, etsi homo sane fuerit gratus) vobis ad currus usque adambulare? Is erat *Cabeliavius*, ut postea se patefecit. Nam ego de facie nondum noveram virum. Cogitare facile potes, quibus de rebus sermo fuerit nobis, nempe de interpunctionibus & epistolis scribendis. Plinium, quem conferre inceperimus, exspecto. Spondeo tibi nullam praeterituram hebdomadem, in qua non aliquid, quod inde eruero, sis habiturus. Idem a te exspectabo. Plura nunc non possum, etsi velim. Salve & Vale, decus meum. Salveant vestri. Hagae. a. d. III. Kal. Mart. Anno MDCCXXXVIII.

EPISTOLA XXXIX.

J. FR. GRONOVIIUS

*Nic. Heinsio.**Leidam.*

Salve corculum meum. Pro Plinio ingentes gratias tibi. Ac etsi initio alterum codicem maluissem, tamen nunc nihil interesse iudico. Reddebatur mihi coenanti, inspexi statim (tanta erat fitis) aliquot loca, quae paullo ante accumbendum forte cogitationes meas suspenderant. Reperi easdem prorsus lectiones, quas notaveramus ex altero. Sic ut ultro etiam gratias debeam tibi, quod integriorem servare mihi volueris. Simul atque proxima vice aliquid ad te dederò, exspecta egregium aliquem locum correctum. Magno animo ad literas ferimur: utinam nostris auspiciis arbitriisque vitam disponere possimus. *Petitus* accepit vocationem Dn. Curatorum Franeckeranae, & promisit se mense Augusto adfore. *Pilius* noster salutatur te amanter; is emeruit gratiis suis & propitia Paphia, ut cum editurus Poëmata tua es, tuto pro Julia liceat tibi Doufiam reponere. Nunc rem magnam ad te adfero. Obtestationibus sanctissimis me aggressus est, ut cantarem sibi Hymenaeum. Ego, qui nec ingenio, nec otio ita comparatus sum, ut Heliconem pulsare audeam, diu repugnaui. Sed frustra, donec ita decidi cum eo: promisi me daturum operam, ut optimum Poëtam pessimo, hoc est, mihi te delegarem, & a tua uberrima vena Epithalamium ipsi impetrarem. Rogo ergo te, quamvis

vis & potes rogari maxime, ne hanc occasionem augendi venustissimos lusus tuos praetermittas, & una opera duos amicos munereris. Et quia Susannae nomen est sponsae, libente se futurum dixit, *foo daer yet van Sint Anna sal onderloopen*. Sed legem ponere non audemus tibi, satis habituri, si ingenium tuum quocunque modo (scimus enim non nisi optimum te servare semper) nobis indulgeas. Codicem Vossii en tibi. Utere pro commodo tuo, nec dies tibi definiam, dummodo ne reddas eum illis, antequam ad me fuerit reversus. Sunt enim nonnulla, quorum adhuc usus mihi. De Fabricii Poëmatis laetor, quod denuo eam curam seriam suscepseris, & oro ne desistas, priusquam effeceris aliquid. Scito, mi Heinsi, minimo minus tam charum depositum, cum Amsterodamum missum esset, nobis periisse. Provisum tamen postea cura magna & non parvo, ut ajunt, impendio Vossiorum est, ut reciperaretur liber integrum jam mensem inter ignotas & alienas manus versatus. Tu vero, age πάντα κάλῳς κίνει, ut tibi istud beneficium debeatur, quod quanto cum honore tuo conjungatur, utique nostri. Vale, charum caput, ac saluta salutandos. Hagae a. d. vi. Eid. Mart. Anno ciorocxxxviii.

EPISTOLA XL.

J. F. R. GRONOVIIUS

Nic. Heinsio.

Leidam.

Nobilissime & Charissime juvenum. Nudius quartus decimus Ovidium una cum literis meis Elzeviriorum actori commisi, quem fasciculum tibi ut quam primum traderet, rogavi. Ab eo tempore tuas unaque promissi fidem, in Plinio puta, avidissime sitimus. Tu vero, ὦ λίθωρε φιλονίκων εὐδεις, & parum curam nostri & verborum tuorum geris. Quid dicam? adeone immersum te civilium legum arti, ut obliviscare amiculorum & paulatim elegantiam dediscas. Ἀνέχῃς & grassare parcus: satis cito hi tibi mores venient, cum plus erit commercii tibi cum barbaris, qui loco Pandectarum; & similium antiqui & sani soni nominum, infortiata nobis & nescio quae monstra pepererunt. Aut si omnino nunc transfuga vis esse, ne nobis invide saltem, quod tardius sub haec signa nos patimur e Musarum castris traduci, hoc est, Plinii nobis fac copiam, aut qui juris praecepta meditaris, tribue nobis, quod ex stipulatione cum tua humanitate ut debitum poscimus. Equidem nihil gratius nunc a te possumus expectare. In Lib. ii. c. lxxviii. principio scis quantopere a vulgato diversus abeat codex ille, quem conferre coepimus. Velim scire quomodo in altero codice legantur verba ista: *Jam primum in dimidio mihi computari videtur, tanquam nulla portio ipsi decedat Oceano, qui toto circumdatus Oceano, & omnes caeteras fundens recipiensque aquas, & quicquid exit in nubes, & sidera ipsa tota & tantae magnitudinis pascens. Quo tandem amplitudinis spatium terra creditur*

habitari? Si tantum ocii est tibi, fac me quaeso hoc ut sciam. Vidi libros, qui nuper ex musco Cl. *Boxhornii* prodierunt. Miror, *Justini* certe, quod promiserat, nullum exemplar ad me mitti. Poteris per occasionem humane, & quasi non rogatus aurem ipsius vellere. Vale, charissimum pectus, & Parentem τὴν πάλιν, amitam, sororem a me humanissime saluta. Scripsi haec irrigatus nectare herois *Grafwinckelii*, apud quem hodie prandebam, non sine lacta memoria vestri. Hagae. Prid. Eid. Mart. Anno CIOIOCCXXXVIII.

EPISTOLA XLI.

J. F. R. GRONOVIIUS

*Nic. Heinsio.**Leidam.*

Charissimum pectus. In summa festinatione audebo hoc tibi imponere munus, ut inclusas statim ubi acceperis, ad *Schragium* deferre cures. Scripturus cras aut perendie est ad *Berneggerum*. Ad eum unas hinc inclusi, ut una cum suis transmitteret. Habitat, ni fallor, apud Jacobum Marci, aut si ibi non est, quia olim fuit, hospitium ejus ibi non ignorabitur. Ego si id scivissem, tibi molestus esse religioni habuissem. *Pilius* heros cum desiderio summo exspectat, quid ad priores meas sis responsurus. Spero autem facturum te, quod magnopere petimus & petimus. Vale, decus meum, ac saluta salutandos. In primis *Boxhornium* Cl. quem nuper in absentia mea accessisse ad conductum meum doleo, praesertim cum ante feram vesperam id mihi nostrae oblitae essem indicare. Iterum Vale. Scripsi Hagae a. d. prid. Eid. Mart. Anno CIOIOCCXXXVIII. nocte concubia, somno languidas vexante palpebras.

EPISTOLA XLII.

J. F. R. GRONOVIIUS

*Nic. Heinsio.**Leidam.*

Charissimum pectus. Appropinquat destinatus festo *Piliano* dies, & nihil dum a vobis apparet. Quod ille misere apud me quotidie bis aut ter tantum non lamentatur. Certe immensum cumulum de gaudiis ejus, secus ac decet tam humanos, derueritis, si hanc spem ipsius fefelleritis. Non legem ponit, nec modum venae tuae: sed quantum & quoties volueris: si duo disticha miseris, quibus subscriptum Nomen *Heinsianum*, non modo erit contentus, sed & gratias aget. Miror, quid hoc sit morbi: cum epigramma rogaveris, longissimam scripsisti elegiam, nunc cum epithalamium rogaris, ne quidem potes

potes epigramma. Si omnino stat vobis, illudere spei nostrae & tot verba, promissa, juramenta in vanum ceciderunt, patiar utcunque: sed confirmo tibi, futurum id me invitissimo, nihilque hactenus unquam a te factum, quo amicum amantissimum ita offenderis. Sed non cadit in tam elegantia pectora tanta barbaries. Quare supplico potius tibi, & supplicat Cl. *Boxhornio Pilius*, ut quod amicitiae jus ultro a vobis exposcitet, id nunc precibus nostris dare velitis. Cum quid confeceritis, potestis typographo dare Leidenſi, vel etiam, si lubet huc scriptum mittere: utrum volētis, libens satisfaciet operis Pilius. Mallet tamen hīc excudi, ut & autographa vestra servaret, & aliquot exemplaria excusa circum oras inaurari possent. Rogat etiam, ut *Bodecherum* senem adeas, requirasque, num missum ad illum sit epithalamium satis grande, & epicedium in *Vossium*, quae utraque vidit apud filium Amsterodami, & legit Advocatus *Nieveltius*: & si missa sint petere, uti prius ad sponsum huc destinetur. Vale decus meum, & propediem alias de Studiis nostris a me expecta. Hagae a. d. viii. Kal. Majas. Anno ciciocxxxviii.

Scripsi non domi meae, sed apud amicum, ubi negotium fuit, cum Pilius in platea obvius mihi fuisset.

EPISTOLA. XLIII.

J. F. R. GRONOVIIUS

*Nic. Heinsio.**Leidam.*

MI Heinsii. Hesternum mane totum post aliquot dierum vacationem destinaveram scribendis literis, quarum ut minimum decem erant expediendae. Media fere pars perfecta erat, cum *Boxhornius* heros gratissima interpellatione id consilium rupit. Post prandium quasi quatuor horas exemit nobiliss. *Boswelli* humanitas, quem super negotio amici accesseram. Vix lassus & defatigatus redieram domum, cum ecce adest *Franciscus* Ἰδιον, qui me usque ad coenam tenuit. Ita dies ille mihi miserrime periit, quem, dum tota Haga excita sedibus suis tantum non fureret, quietem ad meam disposueram. Hodie lator harum politissimus juvenis, a multisque annis mihi cognitus, aderat, rogans ut aliquas sive ad te, sive τὸ πᾶν Parentem tuum darem, quo ea occasione honor sibi contingeret salutandi utrumque & album suum vestris illustrandi nominibus. Ego, absque hoc fuisset, ad te scribere constitueram, & ideo libentius ei hoc officium sum gratificatus, supplici cum prece, ne observantissimo vestri eam gloriam denegetis. Pro emendatissimo poematio tuo gratias ne expecta ab illis, qui eo beneficio laetantur, ipsum aestimare neſciunt: sed a me, ὃ φιλτάτη κεφαλὴ, qui aut solus, aut cum paucis vere intelligo genium uberrimae tuae venae, & iudicium de ea posteritatis mente praesumere possum. Hic profectus est meus admirari in vobis, quae ipse prae-

Tom. III.

G

stare

stare non possum. Quod & facio lubentissime, & cupio, vel impero potius, si id jus mihi esse amor tuus finit, ut me credas ex intimo pectoris sensu loqui. Atque eo sum cupidior a te ipso accipere id beneficium, quod toties mihi pollicitus es. Vivent enim carmina tua, aut nulla vivent. *A Berneggero* redditus mihi tandem est *τρίποδης*. Statius MS. Thebais dicere volueram, in cuius margine comperet fere totus Lactantius, multis in locis corrigendus & augendus. Ex quo facile iudicās, quanta accessio futura sit Diatribis nostris, siquidem continuare eas licuerit. O si unus scriptor totus se mihi debere posset! siue tantum sit ocii, ut absolvam eum cito, siue eousque mihi vita producat, dum ejus voti damner. Sed quod placuerit *τῷ ἐπὶ πᾶσι*, fiat. Et erunt alii, qui obscuram diligentiam nostram facile vincant. Cras fortasse me videbis, ideo nunc abrumpo, exhaustus ac poene moriens, dum omnibus satisfacere nitor. Vale, decus nostrum, ac omnes vestros a me officiosissime atque amanter saluta. Hagae. postridie *τὰ ἑγκαίνια*. Anno *MDCCXXXVIII*.

EPISTOLA XLVI.

J. FR. GRONOVIIUS.

*Nic. Heinso.**Leidam.*

Charissimum pectus. Binas tuas recte accepi, quibuscum, si me lepore & elegantia paria facere existimas posse, nae tu falleris plus vice simplici. Si enim cum sic scribis, de verborum inopia & epistolam non responsuram affectui quereris, quid me oportet facere, quem & ingenta balbuties & doctrina, ut sic loquar, *ἀπαίδευτο* semper impedivit, & nunc maxime circumstant mille curae, animum exedentes, divexantes, dilacerantes, eoque graviores, quo obscuriores, minusque *ἀκοινώνητοι*! Equidem conscius sum mihi, unum semper attulisse me ad amicitiam nostram coagulum, amorem tui ingentem, ingenti admiratione mixtum: quem utcumque sermone explicare satis quivi nunquam, tamen sic haecenus intellectum a te existimo, ut ampliorem ejus testem, quam interpretationem tuam producere neminem velim. Quare ne nunc quoque in tam grata materia disertio rem me fore existimes, pergā antiquo me includere ludo, quodque in me deficit, & parcius ego dicturus sum de cultu, quo te mihi merito antepono, & tot raras dotes deamo, id a iudicio tuo haud frustra, ut spero, expectabo, qui mentis meae penetralia toties introspexisti. Accusatio tua grata est mihi: etsi mirer, unde ad vos rumor iste de meo ad urbem accessu dimanarit. Accipe aequa mente, justissimae querelae tuae quod respondeo. Verum est, semel iterumque secreto fuisse me Leidae, nec visisse quemquam praeter amicum unum, qui & nescio qua de causa se volebat ignorari, & totum id temporis, quod in urbe egi, ab unius ore pendentem eximere me grata vi coegit. Erat enim recens

ejus

ejus a maternis laribus cognatorumque & urbe patria discessus, sic ut plurimarum rerum mearum auspicia ex ipsius sermone captanda mihi fuerint. Itaque etsi semper essemus una, tamen longe breviores fuerunt congressus nostri, quam ut uterque, ego quod rogarem, ille quod narraret, exhaustire potuerimus. Atque adeo dies vel horas potius, quas illi dedi, quem toto septennio non videram, brevi eram non visurus, agenti mecum de statu futurae omnis vitae meae, si recte augurari dedit *ὁ ὑπὲρ ἡμῶν*, variis etiam occupationibus, quae hinc me distinebant, furtim subdixi. Haec omnis culpa mea, cum nulla injuria aut leviori cura amicorum Leidenensium conjuncta, quam nisi facile condonaturum te mihi crederem, profecto malus essem amoris tui arbiter. *Peiraredium* ubique quaesitum hactenus reperire non potui, nam cum plurimis hinc notus sit, in neminem, quod mirum, incidi, qui hospitium ejus nosset. Ante aliquot dies me domo profectum quaesivit, jussi reversus, si rediret simili casu, rogarent diligenter, ubi locorum diverteret. *Rivetius*, qui quotidie ad se accedere solitum per aliquot dies non vidit, putabat Rotærodamum profectum, ubi cuidam Gallo nobili de *Maisonneuve* filium suum commendaret. Non dubito, simulatque denuo hinc comparuerit, copiam fore mihi alloquendi eum, & mandata tua, quae fideliter faciam, exequendi. Quas vero gratias agam tibi de egregiis tuis ad Ovidii & Persii loca observationibus? Sic sunt profecto, si quid video, palmariae omnes, & quibus stupor sit merus indubitare velle. Exspectas nunc, ut aliquid hujus dapis vicissim apponam tibi? Ego vero tuorum meorumque comparisonem minime sustinebo: nequaquam vero hoc tempore, quando dudum est, ut nihil oculis auribusque tuis dignum, si tamen unquam, eruimus. Quia tamen ad Persium me vocasti; levem annotatiunculam veterem communicabo tecum, ut vel hoc argumento videas, quam longe a tua felicitate simus remoti. Fallitur nempe maximus ille vir in explicatione fannae, quam ciconiam putabant, ubi Persio Hieronymum & mox sibi ipsi eundem doctissimum Patrem opponit. Quia enim dixerat Hieronymus, *ciconiarum deprehendes post te colla curvari*, putat existimasse eum, Ciconiam colli motu exprimi, non digiti motitatione, ut Persius vult, ipseque Hieronymus alibi. Atqui non dicit Hieronymus, *collo Ciconiam facere*: sed *curvare ciconiae collum*. ubi *Ciconiae collum* nihil aliud est, quam ipsa manus Ciconiam pincentem, aut ad pinendum collum inclinantem exprimens. Non enim absque inclinatione colli & clementi totius corporis motu rostrum potest pinferre. Finge autem tibi manum corpus ciconiae esse, finge in protenso digito ejusque articulis rostrum, caput, collum, quod minimo negotio fieri potest: integra erit ciconiae forma. Digitus crebro inflexus imitabitur eam pincentem rostro, & dum rostrum pinxit, una, ut dixi, necesse est incurvari collum: & sic quia hi motus sunt necessario connexi, ideo *rostro pinferre*, *ciconiae collum curvare*, *manu ciconiam significare*, *manum in ciconiam incurvare*, pro uno eodemque ponuntur. Sic sane mihi videtur: aveoque scire, quid tu sentias. De *Fabricio* vere nunciatum tibi, aut adesse eum jam Ultrajecti, aut adfuturum propediem, si omnia recte procedunt. De frigusculo ejus

erga te nihil sensi : aut si id exstitit, testor fidem, a me nullam ei occasio-
nem datam, qui omnibus literis ad illum meis hanc legitimam accessionem &
velut solenne carmen dedi, de tuo singulari affectu & studio in Poëmatis ejus
publicandis. Fasciculum *Richteri* Elzevirii mihi reddiderunt. Ille vir amplif-
simus dolet apud me (& merito) obitum viri sane eruditissimi *Mich. Virdun-*
gi, in quo Academia Altorfina magnum columnen, ego amicum summum ami-
si. Laudationem ejus a successore in Professorio munere factam misit ad me:
idem *Richterus*, & haec exemplaria, alterum τῷ πάλῳ Parenti tuo, a quo re-
sponsum expectat, alterum Cl. *Latio* offerri jussit, id muneris haud gravatim-
tū meo nomine in te recipies. Te valere vestrosque omnes a me salutare of-
ficiosissime, tum Cl. *Boxhornium* convalescere jubeo & ex animo precor. Vale
iterum, decus nostrum, & perge Persiana tua, seu quaecunque vis de literis
mecum communicare. Hagae. Prid. Fer. Pentec. Anno MDCCXXXVIII.

Die Lunae, spero, veniet huc *Schragius*. Ei portandum ad me des,
nisi grave est, Harpocratonem Maussaci. erat enim nuper, ubi eo indi-
gerem.

† Vide *Georgii Richteri* Epistolas selectiores ad Gronovium pag. 231. quibus respondet sequen-
tibus Gronovius.

EPISTOLA XLV.

J. FR. GRONOVIIUS.

Nic. Heinio.

Leidam.

TAndem remitto tibi schedas *Peiraredo* concreditas, qui in castra profectu-
rus (& jam abiit) serio hoc mihi commendavit, ut promissis de carmini-
bus vos monerem. *Fabricius* Ultrajecti est, unde heri ad me scripsit, rogavit-
que se viderem. Ego vero propter causas fonticas alligatus nunc huic loco-
sum. Spero tamen proxima hebdomade ocium videndi carissimi capitis fore
mihi. De Persii loco, Satir. vi. 6. *Egregios laudare senes*, quo magis cogito,
eo crassiores mihi tenebrae. Nec ad manum habeo Cornutum, qui nisi ὑπο-
βολιμαῖος esset, solus docere nos hoc secretum posset. Quid dicemus? an
scripsisse istum de studiis majorum? aut explicuisse vitae officia & partes? Sane
certum quid nescio. In altero loco verissime castigas Casauboni notam. Verbum
locat, vers. 47. quod interpretaris disponit, vel postibus affigit, paullo aliter
capiendum videtur mihi: nimirum ut apud Romanos scriptores Censores lo-
casse dicuntur publica opera, aut ut Jurisconsulti eo verbo utuntur. Nisi fallor,
habet egregie apud Cujacium in observationibus & paratitlis in Pandectas ad
titulum locati. Hinc inter τὸ locare & ponere clare distinguit Suetonius in
Claudio c. ix. *quod Neronis & Drusi statuas segnius locandas ponendasque curasset.*
Locat, est, fieri curat conducentibus, qui certo pretio ista apud artifices ela-
boran-

boranda suscepissent. *Locat arma*, quae affigantur postibus, *locat chlamydes* & *gausapa* & *esseda* & *Rhenos*, qui ducantur in triumpho. Quod reddam tibi, nunc in promptu non habeo, & deest otium. Immo ultro imponam tibi hoc muneri, ut aut doceas me, aut roges ex Parente tuo τῷ πᾶνυ, quid sit apud Harocratem ad Nicoclem, ἱερωσύνη παντὸς ἀνδρὸς. Statim post principium: ταύτης δὲ τῆς ἀνωμαλίας ἢ τῆς ταραχῆς αἰτιὸν εἶναι, ὅτι τῇ βασιλείᾳ, ὥσπερ ἱερωσύνην, παντὸς ἀνδρὸς εἶναι νομίζουσιν. Saepe me iste locus torfit, & cum nuper in oculos recidisset, constitui tandem, appellato hoc oraculo, ea difficultate me absolvere. De Harpocratatione magnas ago grätias, & propediem illum reddam. *Boxhornium* convaluisse ex animo laetor, Vale, deliciae nostrae & Musarum. Hagae. a. d. III. Non. Jun. Anno CIOICXXXVIII.

EPISTOLA XLVI.

J. F. R. GRONOVIIUS

*Nic. Heinsio:**Leidam:*

Heri accesseram ad salutandum Illustrem Dn. *Thienhovium*, cujus inexpectatum adventum forte cognoveram. Quaesivit illico multa de vobis, & rogato an ad vos scribendum esset mihi, jussit adderem, se permansurum hic ad diem sabbati, si quid esset, de quo Parens tuus δ πᾶνυ conventum se vellet, interea eum se expectaturum. Respondi hoc satis scribendi causae mihi esse, teque oro, ut indicare id confestim Parenti ne pigrescis. Accepi tandem desideratissimum *Berneggeri* Tacitum, notasque *Freinsheimii* raptim devoravi. Plurima visa sunt bona, & mea expectatione non inferiora. Habeo tamen, de quibus jam olim sensi aliter, nec nunc omnino ab eo persuadeor. Imprimis illud, quod ad lib. II. c. 8. n. 2. observat, *Amisiam* loci, non amnis, nomen esse. Id concoquere non possum, sed differre cogor judicium, dum intellexero, quae sit *Cluverii* sententia, quem ille ceu fundum suum allegat. Si grave non est, eum inspicere, (nec enim mihi ad manum est) & quo argumento hoc probet, quidve tota de re judicet, perscribere. Hoc mihi gratissimum futurum est, & si quid me velis jussum, tuis exoptare labor, mihi iussa capeffere fas est. Quid inter nebulonem typographum, qui epistolas *Casauboni* publicat, & me gestum sit, puto cognovisti. Etsi scelestus est, faxo tamen, ne improbitas ipsi profuerit, certe, mihi nimium damnosa t. Dignum tamen pretium pro tanta opera, totque horis, quas melius collocare potuisssem, expectare me obstinatio pervicaciaque ejus non finit. Vale, φίλτατον καρά, & me redama. Hagae. Raptim. a. d. IV. Eid. Jun. Anno CIOICXXXVIII.

Mandavit quoque Dn. de *Tienhoven*, uti rogarem, inquireret an Mytho-
logici

logici Latini apud Comelinum excusi venales ibi essent. Hunc quoque laborem non gravatim suscipies.

EPISTOLA XLVII.

J. FR. GRONOVII

Nic. Heinso.

Leidam.

Quod post nuperum congressum nostrum, quo liberalitas & benevolentia vestra singularis me compotivit, nihil ad te literarum dedi, in causa erat, quod nullum dignum argumentum contentioni tuae in studiis interpellandae reperirem, nisi forte hoc quoque ad curam tuam pertinebat, ut scires, me totum nunc tricus atque apinis quaestionum juridicarum implicitum esse. Appropinquat enim dies, quem constituerunt nobis illi, quibus jus est operae nostrae poscere rationem, & illum apicem doctrinae aut diligentiae nostrae putant. Atque ego, qui semper acerbus mei temporis aestimator atque exactor fui, nunquam me vidi magis a tempore deficere, quam nunc ipsum, etsi aliquandiu salutationes & τὰ ἐγκύκλια negotia hujus loci sequestrarim. Quae etiam causa est, ut decies praesumptam ad vos perfectionem decies differrem, dum identidem invenio aliquid, quod addiscere velim, antequam cursum coeptum interrumpam. Secus adfuisse dudum, & retulisse MS. Cod. quos ex bibliotheca vel publica, vel vestra, vel Boxhorniana habeo, quibus nec uti licet amplius, & tantum cruces mihi sunt oculorum. Mera enim miseria est obvium habere, quod ames, si potiri vetitum sit. In epistolis *Casau-boni* nunc ultimum, quod proxime appendicem (in quam conjicientur, quae serius obvenerunt mihi, quam ut loco suo poni possent) exstabit, folium componitur. Ideo nunc iterum molestias creare tibi & opem tuam implorare cogar. Habetis, credo, Pollucem cum versione latina in Germania editum. Ei praefixa est ad autorem versionis epistola, quam magnopere rogarem, uti descripta crastini die ad me mitteres, die enim Lunae necessarium erit illam excudi. Aut si hoc nimium est, ut sane fateor, me non raro amicitia nostra abuti muneribus tibi injungendis, peto, ut ipsum Pollucem destines huc, unde describam ipse. Amabo te, curae habe hanc curam. *Fabricium* apud vos fuisse puto, aut certe scripsisse. Si scis, quid Poëmatibus ejus fiat, comunica: ego enim nondum ad eum aliquid dare potui, nec accepi quidquam. Vale, decus meum & me ama. Totam domum vestram una cum Cl. *Boxhornio* saluto officiosissime. Hagae. a. d. vi. Eid. Jul. Anno MDCCXXXVIII.

EPISTOLA XLVIII.

J. F. R. GRONOVIIUS

*Nic. Heinſio.**Leidam.*

Sicut de affectu tuo dubitarem, aut mei verum interpretem te esse ignorem, grave onus incumberet mihi tot dierum silentii excusandi, cujus sane me taedet pigetque. Nunc ultro rogandum te habeo, ut doleas vicem fodalitatis tui, cui tantum temporis infrugiferum, sterile, injucundum, inter tricas & spinas sine ulla meliorum literarum cura periit. Nisi forte in acceptum referas locum Diodori Siculi, in quem nuper plane aliud agens incidi, & correxisse visus sum, quamvis non erat res magni negotii. Nimirum lib. xiii. p. 188. in editione Rhodomanni. Οὐτὸ μὲν οὖν ἐκπλεύσας, ἢ διὰ τινος χειμῶνος οὐ δυνηθεὶς τ * Μαλέαν κάμψαι, ἀπέπλευσεν εἰς Αθήνας. Haec verba stigmatate insigniverunt, sed uterque in notis praeterivit, Stephanus & Rhodomanus. Atqui notum est, Graecis cursum illum non vocari Μαλέαν, sed ὑπὲρ Μαλέας, ut apud Plutarchum: ἀνέχθη μὲν οὖν ἀπὸ Μεθώνης ὑπὲρ Μαλέας, ὡς τῷ Ἀλφειῷ ποταμῷ δρόμῳ χρῆσθοντι &c. De tota re accurate P. Victorius ad lib. iv. Epistol. Cic. famil. p. 40. si eandem editionem habes, quam ego muneris tui possideo. Quem si legeris non dubitabis reliquisse Diodorum: οὐ δυνηθεὶς τ ὑπὲρ Μαλέας κάμψαι scilicet, πόρον, vel δρόμον. Tu vero quid nunc agis? quid musinaris: quid agit Ovidius? Miratus sum tam longo tempore neminem ex vobis Hagam venisse, & Boxbornium suspicor in Selandia esse. Eo enim per ferias excursurum nescio, ex quo inaudiveram. De Epistola Casaubi magnas ago gratias, & similem aut quamcumque operam meam datâ occasione me poscere te volo. Opus nostrum nunc iterum feriat, scelere typographi, qui aliquid nugarum Belgicarum commisit ei, qui isti vacare solebat. Ego monere eum non possum, quia ne ut accedam quidem dignum habeo. Fabricius hîc fuit unum diem, sed paucis horis me vidit. Eo ipso enim die sacram Caenam participaveram, ideoque sine gravi causâ coetui exesse volebam. Vale, & omnes vestros, in primis τ ὑπὲρ μέγαν Parentem, a me saluta officiosissime. Ante hebdomadem praeterito die Veneris & Saturni junctim heros Grafwinckelius & ego non semel vestro honori litavimus. Iterum vale. Hagae. a. d. Prid. Kal. Sextil. Anno ciciocxxxviii.

EPI.

EPISTOLA XLIX.

J. FR. GRONOVIIUS

*Nic. Heinſio.**Leidam.*

Heri inter licentia vina, cum *Pilius* diceret, ſe cras *Leidam* iturum, atque *Hunās* ad te expoſceret, perſuaſi ei, ut augeret bibliothecam ſuam *Apolonio Rhodio* pro novem flor. ita enim aut certe octo ajebat mortalis ille, qui venalem habet: quare oro te, vola, curre, cura, ne quis eum auferat, antequam tu cum *Pilio* advenias. Cras plura, cum ipſe venerit, nunc ignoſce mihi, o amor meus, & hanc rem cura. Habeat ille primum: de caetero videbimus: uſus certe meus erit. Nec tamen ipſi cras indicabis, hoc me mandaſſe. Iterum Vale, feſtino enim nimis. Hora Septima matutina, die Jovis.

EPISTOLA L.

J. FR. GRONOVIIUS

*Nic. Heinſio.**Leidam.*

Venit ecce ad vos negotii ſui cauſſa *Pilius* heros, quod ſi vel ei eſſet nullum, ſatis tamen foret magnum te videre & complecti. Atque ideo meis comitatus eſſe voluit. Meminiſti forſan, graviter illum & apud te & apud me conqueſtum eſſe de injuria facta ſibi a quibuſdam amicis, qui elegantiffimum elegidion, quo nuptias ejus cohoneſtaras, dum per diverſorum manus tranſit, & cum plaſu a ſingulis inſpicitur, ſic penes ſe ipſos depoſuerunt, ut tamen, quod praecipuum in contractu Depoſiti eſſe dictant οἱ τὸ Νομικῆς διδάσκαλοι, repetendi rem eandem domino nullam unquam videantur poteſtatem facturi. Cum igitur ad ſolum te reſgreſſus pateret, ſupereſſetque unica ſpes, non illibenter te unum beneficium bis homini gratiſſimo tributurum, in ea acquievit ſemper amicus noſter, nec ſemel tentavit eandem, ubi neſcio qua μοίρα factum eſt, ut in hunc uſque diem fructum iſtum tuae humanitatis ferre non potuerit. Nunc uterque te invadimus, ὁ φιλαέτης κεφαλῇ, & ille quidem praefens rem ſuam geret; ego vero per ceram & linum literaſque interpretes precor, oro, obſecro, ne cum ab amabili vultu tuo triſtem, hoc eſt, vacuis manibus, aut clarius etiam, ſine iſtius carminis tui exemplo diſcedere patiare. Quin ſi mihi amicitiae juſ eſt, quod eſſe ſolebat tecum, jubeo, impero, volo, ut has preces meas pondus aliquod habuiſſe ipſi teſtere. Et ipſe quoque geſtio

gestio illam Musam tuam serio gustare, nam narro tibi, me legere eam, cum acciperem, non potuisse, quod festinarem. exhilarare oculos amici nostri, & statim, ut resignarem epistolam, inclusas delicias ad eum mitterem. Dabis igitur impatientissimo utriusque nostrum desiderio, dabis amoris tuo; dabis genio, quem etiam inde denuo admirabimur, ut qui comitatus meo pedestri sermone, ruris atque inficetiarum pleno, Leidam ivit, redeat circumsonans Musis Hein-
fianis. Ab Elzevirio heri accepisse te puto Martialem, & MS. Codicem. Arrianum exspecto. Movi salivam toties vocato vocandoque ad partes ami-
co nostro de Apollonio Rhodio apud *Coerantier*, is ergo suam bibliothecam hoc *κειμηλίω* vult augeri, ut ad me etiam usus redeat. Nec hoc igitur gra-
vatim recipies puto, ut adsis ementi, ne ut quondam, pro virgine Diana
supponat Cervam. Vale, jucundissimum pectus, & me ama. Hagae. III. Eid.
Sextil. Anno *CIΩIOCCXXXVIII*.

EPISTOLA. LI.

J. F. R. GRONOVIIUS

*Nic. Heinsio.**Leidam.*

DE Arriano ago tibi gratias immensas: etsi maluisssem te pudori meo con-
sultuisse, rogoque uti in posterum consulas. Nec enim par amplius sum
referendis vel verbo, quas millies re debeo, gratiis. Plautum en tibi. Ju-
venalem meum MS. scis penes *Boxhornium* esse. Ovidium addidisssem, si ul-
lum aliud exemplar, quo uti possem, foret in mea potestate. Nullum autem
integrum alias habeo. Nam Leidense, quod vidisti, non meum erat, sed
Heilersichii, qui nunc a mensa nostra eque vicinia discessit. Cum remittes al-
terum illud *Gebhardi*, statim hoc recipies. Etsi enim magis aliorum nunc stu-
diosus sim, tamen scis hujusmodi homines, si vel maxime occupentur diver-
sis, bonis tamen autoribus carere non posse. Et plerumque quo maxime care-
mus, eo maxime in praesentia indigemus. De carmine, quod toties pro Pi-
lio rogavi, si nondum expugnavi pudorem tuum, ut in re tam levi nobis gratifi-
ceris, nihil superest. Ille tristis ad me est reversus, quod nullam ejus mentio-
nem lecta epistola fecisses. Nec ego verbum post hac ea de re, nisi ille me
quotidie interpellaret, obtunderet, fatigaret. Aut mitte ergo, aut semel
nega, & dic, facturum non sum. Vellem plura, sed festinantissime haec scri-
bo adstante *Vlitio*, affine *Thysii*, qui libros redditurum te sibi humane rece-
pit. Vale igitur, charissimum pectus, & me ama. Hagae iv. Kal. Septem.
Anno *CIΩIOCCXXXVIII*.

Scrivero τῷ πάνυ officiosissimam salutem adscribo, & pro munere nupero gra-
tias ingentes. MS. Cod. Graecum, quem ex bibliotheca habeo, eadem occa-
sione misi.

Tom. III.

H

EPI-

J. FR. GRONOVIIUS

Nic. Heinſio.

Leidam.

Q Uod pluſculos dies filui, ratio te fugit, ὦ φίλτατον καέε, ſi aliam com-
miniſceris cauſſam, quam occupationes meas, quarum equidem a longo
tempore oram nullam reperire queo. Super quaſdam ἀφύκτους, quas velut ſo-
litas clitellas mulus perpetuarius non amplius gravor nec ſentio, in Episto-
lis Caſauboni jam exſpectantibus umbilicum tandem gnavi eſſe caeperunt operac.
Conficienda erat praefatio, totus liber relegendus, ut errata illuſtiora enota-
rem: & interea quotidie pagellae aliquot ter relegendae, quae praeſlo darentur.
Atque adeo narro tibi, quod forte mireris in homine, cui alias verba non
deſſe noſti, perierunt dies aliquot, antequam reperirem, in quo ſatisfaceret
ſibi animus ad praemuniendum tantum opus. Ita diſtractae erant cogitationes,
ut unum in argumentum vix illas figere ac dirigere poſſem. Scis praeterea
totam rationem ſtudiorum meorum me immutaſſe, ſic ut hoc tempore valde
incommodum fuerit antiquo iterum me includere ludo, & urgentem occaſio-
nem edendi aliquid ex miſcellaneis meis amplecti. Feci tamen inſano incenſus
amore: & coepi deſcribere, denuoque ſub incudem revocare tantum, quantum
laborantibus, credo, operis ſufficiet. Neque enim omnia nunc poſſum dare,
neque ſi poſſem, facerem: cujus conſilium eſt duos tantum ſelectos promere
libellos, concluſos intra numerum x aut xi. foliorum. De quo dudum ad te
ſcripſiſſem, abſque vagis illis & variis fuiſſet negociis, quibus ἐνθὲν καὶ ἐκθὲν di-
ſtrahor ac diſcerpor. Nam quod tu cogitas de carmine, nihil eſt: adeoque te
eſſe quietum jubeo, ut ad illam excuſationem an accuſationem tuam ne re-
ſpondere quidem velim. Tantum gratias ago tibi, quod exoratus precibus meis
id optimo *Pilio* noſtro indulgiſti. Eram nuper Leidae, ſed duas non amplius
horas, ut cum typographo, qui nebulo tamen neſcio quibus inganeis latebat,
loquerer. Itaque cum *Commelino* negotium tranſegi. Ad vos vero ne accede-
rem, excludebar ſpatiis temporis iniquis, cui neceſſe erat, mature huc rever-
ſum eſſe ea ipſa vesp̄ra. Conſtitueram die craſtini intereſſe auctiōni apud *Com-
melinum*, ſed ecce ſufflamen, quod nunc ipſum mihi injicitur. Itaque meam
rem ſi agere ibi velis, magnopere rogem te, ut *Herodianum* ac *Zozimum*,
inter lib. in Quarto, num. 3. item *Anonymi Graeca Poëmata*, inter τὰς in
octavo. n. 138. ſi ullo tolerabili pretio vendentur, pro me praestines. Etiam,
uti accedas interdum *Typographum*, & ἐργοδιώκτης ipſi meam vicem eſſe ſu-
ſtineas. Quamquam, ubi primum inceptum fuerit opusculum excudi, non
prae-

Intelligit libros ſuos tres *Observationum*, quos *Typis* *Iſaaci Commelini* primum edidit
1639. qua occasione tres libri exierint, vide mox *Epist. LXVI.*

praeteribit hebdomas, quin semel excurram ad vos, & tum meum illud negocium curem, tum vel praecipue te & vestros videam. Epistolae *Casauboni* cum fine, spero, hujus hebdomadis exhibunt. Haec respondi ὡς τέχνη, ut acceperis tuas, ut suspicionibus tuis in ipso statim principio nuntium remittas. Testor enim fidem, & si hoc amplius est, Deum immortalem, nihil ejusmodi esse, quod aut mihi erga te frigusculum suffuderit, aut tibi suspensiones movere debeat. *Boxhornium* nostrum convalescere & gaudeo, & ex animo precor. Salve & vale, ἐμῶ κεχαρισμένε θυμῶ. Nihil potes vel dicere vel negare mihi, quod affectum meum mutet. ὑπέρμεγαν Parentem, amitam, sororem reverentissime saluto. Hagae. a. d. xi. Kal. Octobr. Anno cīcīocxxxviii.

EPISTOLA LIII.

J. FR. GRONOVIVS

*Nic. Heinsio.**Leidam.*

Accepi tuas una cum pulcherrimo poëmatio. Speraveram hodie me venturum isthuc, sed cum totum hoc mane vagis discursibus perdidissem, quae totam hanc hebdomadem feriatam egerunt operae, me appellarunt, ut hunc saltem diem ipsis in opere exigere per me liceret. Excuditur autem nunc ultima pars praefationis, quae cum Epistolis duum Regum ad *Casaubonum*, secundum folium facit. Eaque pura esse ac sine sphalmatis existimationis meae interesse puto. Quid me nunc vis dicere de carmine tuo? Aut quid dicam aliud, quam te semper similem tibi? nec quicquam in eo genere a te posse proficisci, quod non admirer? Et tu me etiam severum judicium poscis, expectasque, ut ad consummatissimam veluti tabulam accedam Momus. Nisi mihi de amore tuo constaret, putarem materiam ridendi quaerere, utpote gnarum meae simplicitatis. Utcunque sit, ex animi sententia contestor tibi, omnia mihi exacta, egregia, dignissima materia visa, praeter illud unum, fortissime rerum. Nam laudari felicitatem infantis, dici expectatum eum a toto orbe, adscribi auspiciis ejus fortunam publicam (hoc postremum prorsus divinum est, & vellem omnes id ita caperent, ut ego mihi videor) haec inquam omnia belle fiunt: sed fortitudo laus est manus & consilii, quae dari non potest infanti, nisi Alcidi fabuloso. Deinde nosti id hemistichion esse admodum vulgare, & saepe ab aliis opportunius usurpatum. Interim, amicissimum caput, nolo praejudicare judicio tuo, & licet tibi aequae facili spongia hanc notam delere, quam ego eam fixi. A *Fabricio* nuper habui literas, quibus scribit operas strenue in libro suo pergere, gloriatur etiam de tuo in natalem ipsius poëmate; rogavit me quoque, ut vellem legi in adoptivo suo libro. Ego qua fronte inter vos censerī potero? Dum haec scribo in aedibus *Grafwinckelii* ἔ πάνν (ubi prandebo hodie) adest ecce vester Andreas, quem

mihi domum reverso quaesivisse me & petiisse literas indicaverat. Nihil pote-
 opportunius. Itaque ne diutius te ipsum detineam, Vale, decus nostrum, & me-
 ama. Tuos omnes humanissime saluto. Hagae a. d. vii. Kal. Octobr. Anno
 MDCCXXXVIII.

EPISTOLA LIV.

J. FR. GRONOVIIUS

Nic. Heinsio.

Leidam.

UT paucis te alloquerer, ὃ φίλτατον καίεα, fecit nobiliss. Dn. de Tienho-
 ven, qui te rogat plurimum, ut libros infra designatos ex auctione Mee-
 riana sibi emas. Cognovi te dixisse ei, quod iterum nos invaserit edendi ca-
 coethes. Facile id patior: dum serves apud quoscunque secretum illud de pa-
 rocho meo, seu qui sumptum facit. Pagellam, in quam conjeceras excerpta
 de Ponderibus, oblitus fueras in musco meo, eam hic inclusi. Tienhovius li-
 bros omnes valde cupit, nec pretio vult parci. Vale, Hagae. a. d. iii. Non.
 Octob. Anno MDCCXXXVIII. Vult autem emi illos, & scribi in nomen
 meum.

EPISTOLA LV.

NIC. HEINSIUS

J. Fr. Gronovio.

Hagam.

AMICissime Virorum. Gratum mihi fuit Dh. Thienhovii mandatum, fu-
 turum gratius, si maturius ad me pervenisset. Liber enim unus & alter jam
 divenditus erat, cum ad auctiorem me contulisset, contuleram autem me, vix
 inspectis tuis. Id an tua culpa, an vero nautarum factum sit ignoro. Accessit alte-
 rum peccatum tuum, quod permolestum mihi fuit quam maxime: Catalo-
 gum enim mandati istius etiam ad Commelinum curasti. Jam eo devenerat, ut
 publice unum uterque ambiret librum, & nisi tandem nescio quis monuisset
 me, Commelinum a tuis stare partibus, res ad internecionem propemodum
 ventura erat. Nunc velim D. Thienhovium de istis consulas libris. Nempe
 Pasquillorum Tomis, & Sermonibus Lutheri convivalibus, qui a multis am-
 biuntur, nec dubium est, quin precium longe excessuri sint. Quare scire
 libenter velim, quanti istos faciat. Valerius Probus, quem annotasti, in cor-
 pore Grammatico extat, quod habere D. Thienhovium vix est ut dubitem. Apol-
 lodorum, quem in Catalogo meo non annotasti, carissime vobis emit Comme-
 linus.

linus. Quod mirari satis non possum, cum Latinus tantum sit, quod etiam Graece apud Commelinos excusus haberi adhuc possit. In diem crastinum a te responsum expectabo. Tum enim ad literatores pergunt, nunc cum Jurisconsultis nobis res est: Si interea aut Nob. D. *Grafwinckelio*, aut tibi vel cuicumque amico prodesse possum, fac sciam. Vale, meum decus, & omnibus salve. Raptiss. VI. Octob. Lugd. Bat. CIOIOCCXXXVIII.

Quod doles me D. *Thienhovium* de Observationibus tuis fecisse certiore, admodum miror. Cum res omnibus notissima sit, etiam studiosis hîc quibusdam. Quare ignorantia juris a me peccatum est, quam non excusare scio delictum apud Judices. Sed cum homine amico mihi res est. De caeteris securus esto, & Vale.

EPISTOLA LVI.

J. F. R. GRONOVIIUS

*Nic. Heinsio.**Leidam.*

DE studio tuo exsequendi mandatum illustri viri neuter dubitamus. Interim si quae fortuna intervenit, ut acciderent nonnulla secus, ac optaveramus, nec tibi nec mihi imputandum est. Ego ut jussum ejus accepi, e vestigio ad te scripsi. Quod vero alter indiculus missus est ad Vandermerium, factum non sine secreto jussu (nam apud te fatebor, ut me excuses tibi) ejus, cui tu nunc officium praestas. Nescio an intelligas causam, prodam tibi illam, sed sic ut occultam habeas. Cum enim scirem inter illos libros esse nonnullos, quos pretio quovis sibi se praestinaturum dixerat auctor, voluimus hoc modo humanitatem ejus aggredi, ut notis desideriis viri potentis ac amici cederet. Mero errore evenit, ut Commelino ille provinciam daret emendi, quam tibi demandatam esse, rogatu dicti saepius Dn. de Tienhoven, ego expressis verbis ipsi per eundem vectorem, qui tibi meas reddidit, perscripseram. Nam ut de fraude suspicer quippiam, non patitur ejus integritas. Ut haec eo certius credas, ecce alias tibi meas ad eundem ejusdem jussu, quas trades ei, & significabis edictum tibi, uti in libris illis emendis nemini, nisi ipsi soli cedas. Si itaque ille solita comitate jure suo cedit, cupit Dn. de Tienhoven, ut quicquid urgeant alii, tu contra audentior intes. Allocutus sum eum: vix data fuisset copia, nisi afferre me rem, quae moram non pateretur, per famulum significassem. Aderant enim ei viri graves ac amici, jusseratque, quicumque se conventum cuperet, negari esse domi. Ita factum ut de Pasquillorum tomis & Convivalibu Lutheri monerem, de Valerio Probo obliviscerer. Si certo scis, corpus Grammaticorum in bibliotheca ejus exstare, potes hac supersedere cura. Sin, facies quod in caeteris. Quod enim cupit, cupit vehementer. Ego de quibusdam libris Vandermerium mo-

nui, quos tibi ipse ostendet. Ampliff. *Grafwinckelius* aderat mihi, cum tuas acciperem, posteaque redeunti in platea obviam factus, petiit, ut maximum Parentem tuum, teque suo nomine salveré juberem. Credo ocium non fuisse, ut catalogum percurreret. Vale, decus meum. Hagae Non. Octob. Anno MDCCXXXVIII.

Verba sunt Suetonii Nerone, an Augusto (nec inspicere vacat, qui scribo haec stans pede in uno) vita Augusto xciv. *maculam e corpore eximi*. *Torrentius* notat in duob. MS. legi *exigi*. Inspice, quaeso, vestrum, & significa, quomodo ibi legatur. Num *Casaubonus* filet de his. Si *Wilhelmum Christianum* videris, appella quaeso hominem, castiga, & multa probra eiingere: qui nondum secundum folium nugarum ad me misit.

EPISTOLA LVII.

J. FR. GRONOVII

Nic. Heinsio.

Leidam.

Scripseram ad te epistolam, plenam fermento. Nec enim pati poteram, quod justissimam defensionem meam repeteres ceu carmen solenne, Inprudentiam tuam, acutum ingenium, & iis esse factum, ut Dn. de Tienhoven habeat libros male conciliatos, tuque ei non potueris inservire. Mox eam combussi, ne indictam mihi a me ipso legem ferendi amicos exuerem. Vide tamen, ne dum tu nimis te excuses, invidiam mihi concilies apud magnatem virum. Nemo te accusat, nemo tibi crimen aut maledictum facit. Quid opus rejicere in alium, quod tibi non imputatur. Vix me contineo, quin repetam priora. Dominus de *Tienhoven* te salutatur, pro praestita opera gratias agit, jubet ne de ullo postea libro emendo sollicitus sis, nec enim se illos, quos notasti, desiderare, praeter literas Granvelli, & hac conditione, si vili vendentur. Miratus sum *σκληροκαρδία* amici nostri. I nunc, & dic iterum imprudentem me fuisse, quod non citius ad te scripsi. Tuas accepi heri hora nona vespertina. Dn. de *Tienhovium* ante quintam alloqui non potui: haec scribo hora sexta. Vale, & me ama, quamvis judicio tuo imprudentem.

Epistolarum *Casauboni* nondum ullum exemplar a *Mairio* accepi. Uti nec Dn. *Rivet*. Ubi accepero, memorem promissi videbis. Autographa etiam propediem remittam. Forte cras vobiscum ero.

EPI.

EPISTOLA LVIII.

J. FR. GRONOVIIUS

Nic. Heinsio.

Leidam.

Cum postremum ad te scriberem, sperabam me postridie Leidam aditurum. Id propositum mox intervenientia negotia, quae differri non poterant, everterunt. Post dein aliquot diebus exspectabam fratrem in cohorte Praetoria, quem hodie recepi, ut ex molestissima expeditione integrum satis (Deo sit gratia) ac valentem, contra atque verebar. Nam cum maxima parte suae cohortis eum quoque accessione aliqua tentatum intellexeram. Interim credidi scripturum te, qui libri & quanti essent empti, tum ipsos quoque ad me missurum. Quod quia haecenus factum non est, rogo, uti ne differas ulterius. Cupio enim cognoscere, quid fuerit causae, cur binas illas *μεμψιμοίρες*, alteras etiam post luculentam satisfactionem meam, ab amicissimo capite acceperim: quantum fuerit illud, quod ne tuam apud magnatem virum gratiam libaret, mea peccata invenire atque annumerare mihi te coegerit. Tu vero *εις ἀμφοτέρονον* dormi. Citius ego mihi sumptum imperabo, quam uti patiar propter rem adeo nihili sive te, sive me frigore tali aliquo feriri. De Epistolis Casauboni, non erat cur optimum *Pilium* rubore perfunderes. Neque ille, neque nobiliss. Dn. de Tienhoven, neque quisquam mortalium a me etiamnum illas habet, hoc ex animi sententia juro tibi. Neque adeo vir ille magnus, quem solum efficere putabatis, ut aliquis dono meo Epistolas Casauboni Leidae legeret. Ego vero affirmo tibi, ipsum ne quidem a me eas accepturum (*Riveti* ea cura erit) ut nec amicos alios, praeter quibus promisi, aut qui ipsi cum Epistolas quasdam mecum communicarent, id a me stipulati sunt. Sic quoque unum alterumve meo pretio emendum erit mihi, ut donem. Die Lunae videbis quod tibi destinavi, si per nautas ordinarios id vis mitti. Iterum rogo, ut de libris emptis quamprimum mihi respondeas, ipsosque mittas. Ego enim Illustrem illum virum ab aliquot diebus non visum adire non audeo, antequam certa ei hac de re referam. Vale, mi Heinsi, & communes amicos a me saluta, imprimis Cl. *Scriverium*, quem dividiae fuit mihi bis me frustra domi meae quaesivisse. Postrid. Eid. Octob. Anno *MDCLXXXVIII*.

Ad *Vossium* scripsi, & injuriam illam cum eo expostulavi. Recepi responsum; raram avem, quippe qui ad triginta, puto, meas vix rescripsit. Ille sic statim exorditur: *Non recordor tale quid ex ore sive tuo, sive meo profectum, quale scribis. Sed scio ex aliis, partim Leidae adhuc degentibus, partim in oras jam profectis exteras, audisse me, juvenem illum, qui tecum sermones istos habuit, & bonae indolis videri & praeclarae expectationis: solum metui, ne corrumpatur a nonemine, quo utitur familiariter. Ut te quoque sic judicare dixerim, non fit verisimile,*

le, nec verum arbitror ***. Tanto magis opinio haeret, adolescentem, unde istud habes, haec protulisse, ut expiscaretur ea, quae nesciret: vel alterum illum tam ei familiarem imposuisse illi, quo abalienaret a te. &c. Sciat haec autor tuus. Cupio enim inimicum habere, qui meos inimicos mihi inconciliare cupit. Quod enim tandem pretium meum, si omnia patior & musso? Tu vale, nec ullum mendacium te ab amore mei avertat, quem simplicissimo animo te ac tuos scis & amare & colere. Cujus novum propediem argumentum videbis.

EPISTOLA LIX.

J. F. R. GRONOVII

Nic. Heinsio.

Leidam.

EN tibi Epistolas *Casauboni*, ut a compactore nunc ipsum eas accepi. Nolo, quicquam mihi post hac duarum rerum creduas, ni primus es, qui a me exemplar accepit, aut accepturus est. Nam nobiliss. Dn. *de Tienhoven* suum post prandium demum aut concionem pomeridianam offeram. Accipies vero, ut non tam ex promisso, quam virtutibus tuis & amori debitum. Munus egregium, si ipsum spectes, parvum, si donantem: cujus improbum laborem modo & pietatem erga manes maximi & sanctissimi viri commendabit. De exemplari, quod Parenti tuo debetur, videbit, puto, Rivetus, & tunc una autographa vestra recipietis. Sunt illa quidem adhuc apud me, qui aliquot dies occupatio reverendum virum non vidi. Quod folia nugarum mearum misisti gratum fuit. Oroque porro, ut instes lento homini. De literis Veneris marito traditis, fallit te ratio mire. Non ego tuis id factum dixeram, nolui certe, si id forte festinanti excidit: sed meis ipsius profecto, quae, quamdiu non misi eas, manui & potestati meae suppositae sunt. Scripseram ad te statim, ut acceperam tuas, sed iracundius. Postea paullo cum resedissent animi isti, non chartam sed iram meam combussi. Tuae vero sunt penes me, & asservantur, & cum ad nos veneris, monstrabuntur. Itaque in observatiuncula illa de meo judicio tuarum (ut ais) nugarum caetera felix Criticus, infelicissimus, quod credo ipsum males, fuisti. Non sustineo morari te diutius, qui delassatus lucubratione matutina (cum enim insomnia vexarer, a media quarta ad octavam mediam, quando haec scribo, studui) animum colligo ad piam devotionem. Vale, mi Heinsi, & me ama. Hagae a. d. xvii. Kal. Nov. Anno ciciocxxxviii.

EPIS-

EPISTOLA LX.

J. F. R. GRONOVIIUS

*Nic. Heinsio.**Leidam.*

EN responsum ad brevem Parentis tui. Dn. *de Tienhoven* non est in urbe. Si-
mul redierit, accipiet, quae misisti. Nec tu dubita, quin maximam ab eo
gratiam inieris. Ita & res poscit ipsa, & nos verbis augebimus operam tuam.
Amicum nostrum alibi quoque deprehendi suspicacem, & qui ambigue dicta
sinisterius saepe interpretetur. Acceperam sane ante quatuordecim dies exem-
plar tradendum Maecenati nostro, sed jam confutum, ut singula folia nec ego
nec compactor inspexerit. Compactum ergo & deauratum dum evolvo, sepa-
roque paginas conglutinas ad oram, deprehendi scelus typographi, qui ut
sumptu isto me feriret, exemplar dedit mihi pessime affectum, sic ut offerre
id Dn. *de Tienhoven* non auderem. Ipsum tu apud me videbis. Vix denique
aliud postea ab eo extorsi, quod integram hebdomadem detrinuit bibliopegus,
cum caussaretur frigidum & humidum aërem. Miratus sum acutas nugas ma-
gistri illius. Quid enim subtilius? Quid porro ineptius? Omnino autem hor-
tandus est, ut librum suum edat. Sic, si bene te novi, habebis insperatam
materiam uberius illustrandi Nasonem tuum. Nuntiabatur hîc diebus his ur-
bem, ubi ille agit, ab Electore Palatino obsideri, teneri armis Caesarianis. Ita-
que antequam diem datae epistolae viderem, subibat exemplum Eumolpi, cui
vacabat versus facere in praesenti naufragio. Hominem tamen non novi: nec
novit *Heilersfichius*, cujus patria altero lapide ab illa urbe distat. Caetera, quae
mandasti, recte a me curabuntur. Vale, amicum caput, & me ama. Hagae.
a. d. x. Kal. Nov. Anno *MDCCXXXVIII*.

A *Fabricio* diu est quod nullas accepi. Nudius tertius *Franciscus* Amste-
rodamo redux nuntiabat poemata ejus esse perfecta. Quaeso te, abstineas a
titulo V. N. si vis epistolas tuas a me cuiquam ostendi, nam ego id non
confiteor.

EPISTOLA LXI.

J. F. R. GRONOVIIUS

*Nic. Heinsio.**Leidam.*

Cum postremas ad te darem, mi Heinsi, inclusisse me putabam illis *Mulleri*
epistolam, quam paucis post diebus inter schedas in mensa mea deprehen-
di. Nec adeo cum nuper Parens tuus *ὁ πᾶν* hîc esset, ejus rei in mentem mihi
Tom. III. I venit.

venit. Quod, rogo, ignoscas multitudini occupationum, quae me enecant prorsus, & ejusmodi peccata prorsus *γερωνικά*, minimeque hujus aetatis crebo mihi excidere faciunt. Narro tibi; acceperam a *Peiraredo* Justinum *Vossio* reddendum, is liber admodum quaerenti videbatur mihi ex oculis evanuisse. Cum per quendam Amsterodamum euntem excusassem me, promississemque, simul eum reperirem, promptissime remissurum, retulit ille, dudum me *Christenio*, qui hîc fuerat, tradidisse illum, & hunc *Vossio*. Pudore sane confusus sum. Sed scito, ita me distractum esse, ut saepe quid agam nesciam, meaeque ipsius bibliotheculae sim hospes. Meministi adagium vetus, *a lasso rixam quaeri*. Itaque mirum quantum auxerit bilem mihi hos aliquot diès typographus, ingratissima sua & testudinea tarditate. Plane interest studiorum meorum, hoc a munere cito me absolvi. Itaque minatus sum ipsi, qualis ille in posterum trico fuerit in paginis transmittendis, talem majoremque & verior me futurum in solvendo argento. Et faciam, ita me Musae ament. Epistolam illam hîc habes. De re ipsa non dubito, quin dicis modo causa judicium meum me poposceris. *Vandermerius* pro catalogo bibliothecae magnas tibi gratias agit. Itemque nobiliss. Dn. *de Tienhoven* maximo parenti tuo pro *Simplicio*. Claudiani locus est in iv. Conf. Honorii vers. 510.

Quae sub te vel causa gravis, vel judicis error?

Nec legitur dubiis quis litibus.

MS. *causa brevis &c. Negligitur*. Utrumque verissime. Sed posterius fallor, an occupavit, sive *Schottus* in *Observat. Humanis*, sive *Rubenius* in *Electis*. Inspice, quaeso: Nam si non illi id habent, est locus in nugis nostris, ubi id inferam. Vale, meum decus. Hagae Kal. Novemb. Anno *MDCCXXXVIII*.

EPISTOLA LXII.

J. FR. GRONOVII

Nic. Heinsio.

Leidam.

Quod cessavi hactenus, ne, per ego te fidem amicitiae nostrae oro, obsecro, ne id imputes ulli incuriae aut negligentiae meae. Primum quidem moratus est me optimus *Vincentius* noster, qui modestis suis salibus ac erudita comitate ita me tenuit, ut, quamdiu hîc esset, assidui accubui invicem omnium aliarum rerum cogitationem omitteremus. Vix illo digresso mihi ad amicum nostrum, tum ut ostenderem ei, quae constitueram praefari (finem enim prospiciebam, gestiebamque ab illo me immunem reddere munere) tum ut de promisso tibi *Galthero* aurem ei vellerem. Respondit se curaturum, ut cum haberet, simul in manus incidisset, morari enim in aedibus, an latrina, socris sui. Hinc sermonibus habitis, cum ille ex foliis editis conspectum sibi fecisset operis, rogavit, ut aliquot capitibus librum producerem. Dixi facile

cile id quidem mihi, sed nullam fore inter priorem & secundum librum symmetriam. Institit ambire ultro, ut totum librum adderem. Nolui dimittere tam bellam occasionem, cui nescio an similem sim unquam habiturus: pollicitus sum. Ea res prorsus mihi inopinanti accidit. Equidem (quod praefiscini dixerim) materiae est satis, sed rudis, indigestae, parum percoctae. Scis autem, anime mi, quam sim obtrectator mei, quam mihi diffidam, & ad omne subitum expediendum sim ineptus. Itaque ab eo momento, quantum per aliorum studiorum ordinem & interpellationes licuit, perdius, pernox totus in hoc fui, ut seligerem, limarem, disponerem, quae tertii voluminis paginas facerent. Heri per Dei gratiam colophonem imposui. Ipse velit, scripsisse nos, quae ad aliquem rudiorum usum & literarum commodum faciant. Id an assequutus sim, boni ac docti judicabunt, tuque inprimis, elegantissime Heinsii. Certe data opera cavi mihi, ne lubricis conjecturis & ingeniosis ineptiis chartas oblinerem. Dissensi interdum, sine tamen cavillis aut cuiusquam injuria, a magnis viris: ab ¹ illo ipso, quem non ignoras lectitasse singula folia, antequam operis darentur. Habeo ejus censuras, quae interdum mihi profuerunt, interdum gavisus magis sum scire, quam sequi. Quod nec ipse aegre tulit. In unis haec habentur: *Jam dixi tibi, in his conjectaneis aliud alii, & nostra nobis impense, aliena minus placere.* Item: *De omnibus si non possum tecum sentire, neque id miraberis, qui hanc mihi libertatem dedisti. Pauca tamen ea admodum sunt. Quid juvabit ea in medium proferre, tibi que ostendere, cum tua meliora sint? Ne officio desim, quoniam hoc a me exegisti, tibi obsequar.* Ego rescripsi, posse me pati, ut interdum sentiam aliter, quando ipse concedat: dummodo ne manifesta delirem, aut contra lucem claudam oculos. Atque haec non apud te superbus jacto: scis & scit Deus, quam longe a tam fatuo fastu ab sim, quamque quotidie id mediter, ne unquam animum meum tradam ambitioni: sed in sinum carissimi pectoris effundo gaudium ex bona spe praeceptum. Nec volo sane, ut haec mea εὐχεται² judicium tuum circumscribat: tu vero uteris illo, & ut ostendas multa placuisse tibi, quando omnia legeris, quaedam reprehendes. Atque ut id eo facias citius, nunc te rogo, ne praetereas unquam officinam *Fabii* nostri, rem comedentis potius, quam restituentis cunctando, quin urgeas, impellas, stimulo increpes pigrum pecus. Praefixi ipsi finem hujus anni. Itaque mensem adhuc integrum habet ad folia quatuor aut quinque perficienda. De Meurissii auctione dederam mandata ad te *Fabricio*. Nihil ibi, quod tu magnopere desideres. *Vandermaerius* & ego Latinos omnes soli excussimus. Ille complures non magnae rei, ego quinque libros emi, Theophrastum vestratem & vestrum, Vorstii Antibellarminum, Sulpitium Severum Drusii, Magiri Physicam, Lydii narrationem Conciliorum: hi mihi constant 4 fl. 5 stuff. ² Popularis meus etiam te invitavit ad lectionem Variarum suarum. O miseriam! Putabamus *Fabricius* & ego, illum illius obliquis sermonibus edo-

I 2

ctum

¹ *Salmasium*, puto, intelligit.

² Intelligit, puto, *Joachimum Hagmejerum* Hamburgensem, qui hoc anno Rostochii edidit Variarum lectionum librum unum. vid. & inf. Ep. 63. & 68. & alibi.

Etum potius obscuraturum chartas illas, quam monstraturum. Sed simiae omnes sumus, amamus etiam deformes foetus. Interim, ut vere ais, ferendus est tamen & animandus, si possit fieri sapientior. Nam & horum exiguus, immo nullus, apud nos nunc numerus. Frustra suspicaris, Leidae me fuisse, nec vos salutasse. Juro tibi, non fuisse me ibi, ex quo te postremum vidi. Minatus sum saepe, & minor etiam hac hebdomade: nondum tamen Haga pedem extuli. Nobliss. Dn. de Tienhoven allocutus sum bis de catalogo bibl. Canteri. Respondit se mihi eum daturum: nondum tamen tradidit. Haec heri vesperi cogitabam ad te scribere, cum posteriores tuae me oppresserunt, mihi longe gratissimae. Codex Puteani etiam caret epistola Cydippes & Sapphus. Ne Acontii quidem habet integram. Nam ad versum illum:

Promisit pater hanc, haec adjuravit amanti.

Ille homines, haec est testificata Deam.

notatum erat: *haec tenus codex Put.* Amicus Regis Sueciae, cum hîc esset, quaerebat ex me, si ullum MS. Cod. Institutionum alicubi latitantem possem monstrare sibi. Ablegavi illum ad te. Bonum factum: Institutiones accurate interpunctas propediem habebimus. Ne hoc mireris, narrabat homo, (in cujus nativitate non est Genetae Manae supplicatum: bonus enim natus est) neminem Theologorum ad hoc usque scivisse, quomodo Decem Praecepta essent interpungenda, se adeo primum id observasse, & in ingenti opere suo docuisse. A Schragio tandem accepi literas. Is est in familia legati vestratis Dn. Joachimi. Accipe ἀποσπασμάτων ex ejus epistola: Oxoniam nondum adire licuit: ideoque nobiliss. Nic. Heinsio, exscribendis epistolis Ovidianis, gratificari praeter votum non potui, quod ut commodissime apud eum excuses, rogo. Nudius tertius Bohemus quidem spem mihi fecerat, eum primo vento post Natalitia huc iturum, idque patris ipsius literis, quas ad ampliss. Dn. Legatum dederat, contineri affirmabat. Non dubito, quin gratissimus venerando seni futurus sit. Si quid certius hac de re cognoveris, moneas, ubi visum fuerit, velim. Quae me jubes nuntiare illustri Dn. de Tienhoven, hodie expedientur. Accepi ante paucos dies a Nicolao Rittershusio sex Epistolas magni Scaligeri, nec dum editas, sed dignas profecto, quae in opere illo legerentur. ¹ Partem unius hîc subjeci. Si gestis videre omnes, communicabo libens, hac tamen conditione, ut & tu promissum expleas de Epistolis Wouwerii contra Elmenhorstium mecum communicandis. Ne verere, ut per me aliquando edantur. Zelotes sum pro honore popularium meorum. Vale, Charissimum pectus, & ex hac longa epistola agnosce, me libenter vacare tibi, quotiescunque otium non deficiet. Saluto vestros, vestramque salutationem hodie apud suavissimam sororem tuam, si domi erit, deponam. Hagae a. d. prid. Kal. Decemb. Anno c1o1o cxxxviii. Valetudinem Cl. Cunaei invitissimus conovi.

Gevartius emendat alicubi apud Manilium in Electis: *pestemque videnti: pro testemque.* Est alius locus, ubi eadem restituenda vox lib. ii. *hostisque duo-*

rum

¹ Tota edita est a me post Gudianas in appendice. Epist. 26. p. 356. est vero Scipioni Gen-
tili scripta.

rum Praedatorque leo. Ita Scaliger. Sed vet. ed. *positusque.* Gemblacensis: *positique.* Non dubito veram scripturam esse: *pestisque duorum.* Vide quaeso an ille hoc praeceperit. Si praecepit, fac, quaeso. cras aut perendie sciam. Nam festinato opus non est.

EPISTOLA LXIII.

J. F. R. GRONOVIIUS.

*Nic. Heinsio.**Leidam.*

Non pupugerunt, sed exanimarunt me literae tuae, mi Heinsi, nulla sua, sed fatorum culpa. O calamitatem insignem! Ergo ¹ magnus ille vir fuit! illud praeclarum Academiae, unicum sectae suae ac, ut vocant, facultatis lumen extinctum est. Equidem prae dolore vix sum apud me. Non enim tantum publicum luctum lugeo, sed & meum privatum, qui ante paucos dies, ut ex Selandia rediisse eum cognoveram, scripsi ad illum, de valetudine gratulatus sum, consiliorum meorum viam munivi. o spes fallaces! o cogitationes meae inanes! Deum precor, ut Academiae ac studiorum in haec senecta illorum misereatur. Nunc scire cupiam, quis eum sit laudaturus. Nam si parens tuus id munus suscepit, nulla me vincula continebunt, quin tam illustri lesso commodem lacrimas. Sed tamen quicumque erit (nam gravissimae ejus occupationes vereor ut id ferant) fac sciam quando: est enim alia de causa propediem ad vos mihi excurrendum, ita anticipabo diem illum, & laudationi interero. De epistola Cydippes affirmare nunc certe non possum: de Sapphûs possum, unde egregiam emendationem hausi, quam lib. ii. cap. xxi. proposui. Sane esset operae pretium illius excerpta codicis te habere. Superat omnes Palatinos, nec dubito, quin multa tum me fugerint, qui mirer quod jejunitas mea tum tantum adhuc observare potuerit. De lib. iv. commovisti me: sed quomodo in hoc ocio, animo etiam tanto luctu percusso, possit? Habeo disputationem non malam ad Cic. locum de Legibus, quem tentavit *Petitius* p. 116. ad L. Att. nam & locum illum (licet apud te) recte emendavimus, & deprehendimus, quaecunque vir praestantissimus ad legem istam xii. tabb. disputat, nihil esse aliud, quam cumulum errorum. Habeo alia plurima pro mediocritate nostra: sed manum ultimam quomodo imponam. Sed terrent me ejusmodi exempla, ut gestiam festinare. Quantum detraxit summus ille vir famae suae, quod tot praestantia ingenii monumenta, quae promiserat & edolare poterat, in extremum diem distulit. Utinam quidem fatis fuisset aliter libitum. Quibus frustra reluctemur. *Schragium* diligenter monebo. De loco Manilii gratias ago. *Meranus* Delphis est, cui promisi, me

I 3

die

¹ Petrum Cunaenum intelligit, qui obiit xi. Decemb. & vi. ejusdem mensis ipsi iusta persolvit. *Adolfus Vorstius.*

die Solis adfuturum, tum tui, ne time, ero memor. ² Popularem meum amo sane: sed εὐήθειαν illam vellem esse cautiorem. Monuit illum oblique *Fabricius*, non esse ista talia, quibus hîc se posset commendare: sed ille bonus non intellexit; μάταιον εἰς ἀνδρα γενεῶν. Melius tamen, sic esse: quam ut osor literarum sit. Vale, caritas mea. Hagae III. Non. Decemb. Anno CIOIOCCXXXVIII.

Nobiliss. Dn. de *Tienhoven* gratissimum fuit, quae scripseras, cognoscere. Soror tua domo profecta erat, ipsi tamen salutationem tuam commendavi. Hodie aut cras iterum illum accedam. Habet enim tuum Longinum πεισισφους, quo nunc ipse indigeo.

² Vid. Ep. praeced.

EPISTOLA LXIV.

J. FR. GRONOVIIUS

Nic. Heinsio.

Leidam.

Languet nunc totus, optime Heinsi, itaque quae multa garrere habeo tecum, in alium cogor prae nescio qua ignavia differre diem. Quas tamen hoc temporis ex Anglia accepi, mittere ad te festinavi. Tu fac, cito rescribas quid velis factum, & epistolam remittas. Epicedia heri inter coenam accepi, & gratias ago. Laetor pietate vestra erga summi viri Manes. Unum miror, quomodo ille ¹ amicus meus meruerit medius interponi duobus optimis meis sodalibus, optimis Poëtarum. Piget me ruris & inficetiarum. Nec tamen utique video quid velit. Quid enim, malum, *praeoccidit*? quid *denunciare diem morbi*? Et fortassis ille hîs triumphat. De *Vincentio* nostro iudicas rectissime, nisi qua modestia imperet tibi. Gaudebo, si hoc protelum fuerit tibi, ad proferendum tuos quoque elegantissimos verus. Et ipse stimulo te, instigo, hortor. Si mihi credis, eadem te laus manet, in tanta praesertim sanorum hominum raritate. Non enim simulant nunc furere plures Poëtae, sed furunt. Autographa Casauboni omnia recepit a me bona fide *Rivet*. Quem appellabo equidem, quamprimum fuero allocutus. Epistolam ad fortissimi viri Thalassiarcae hospitium ipse detuli. Nondum advenerat: hac tamen vespera expectabatur. A *Seldeno* epistolam accepi, me indignam, dignissimam incomparabili summi viri humanitate. In ea agnovi sordes Elzeviriorum, qui ausi sunt a me poscere, & acceperunt 15. stuf. vecturae nomine, cum certo sciam inter fasciculos alios ea missa. Erat enim εωλ, nec adscriptum erat, ubi quaeri ego deberem: ut tabellario, si per eum allata fuisset, non potuerit in mentem venire, me apud illos inveniri posse. Hoc praemium habeo suscepti laboris & curae maximae

¹ *H. Alers*, cuius Epicedion in Cunacum legitur post orationem Vorstii, medium inter *Vinc. Fabricii*, & *Nic. Heinsii* carmina: sed immensum quantum distat ab illorum elegantia, & quae hîc carpit Gronovius, ibi leguntur.

ximae in Seneca recensendo... Sed hoc ordinis vitium est, non hominum. Vidisti scelera, quae commisit in optimi nostri *Frabricii* libro *Jansenius*. Jupiter, ut talium typographorum omne genus pereat. Tu vero vale, mi Heinſi, & me ama. Hagae a. d. III. Kal. Jan. Anno MDCCXXXIX. quem tibi, & toti domui vestrae auspiciatissimum ex intimis animi sensibus precor.

Memini vidisse in *Swartii* Anal. quaedam Heliodori loca explicata. Vide an sit inter ea, ubi mentio fit *Euſtathii*. Nam hoc optimus *Commelinus* & in versione, & in notis non se intellixisse fatetur.

I. Agit de hac voce Swart. lib. II. cap. 3.

EPISTOLA LXV.

NIC. HEINSIUS

J. Fr. Gronovio.

Hagam.

Obstupui heros amicissime, cum a *Schragio* nostro literas vidi. Putaveram illum memoriam nostri omnem jam deposuisse. At vero cogor jam ego totam ejus rei suspicionem differre, tam inexpectato praesertim munere beatus. Rescripsi illi, ut vides, & quidem verbosè. De vetustissimi, quorum spem facit, codicis excerptis conditionem, ut par erat, accepi. Plura ab eo expectare ausus non fui. Tu, quae humanitas tua est, adhortare quaeso illum, sic in caeteris pergat. Non dubito enim, quin alios etiam Codices extrusus sit. Nobilissimus *Junius*. Nec in Epistolis tantum laboramus, ut scis. In Metamorphosi tamen nolim quicquam laboris sumat. Ejus enim multos habuimus Codices, & labor immensus est. Adde, quod diligentius istam jam excusserunt interpretes. De Metaphrasi nullam mentionem facies, ne videamur hominem obruere. Et ego jam ea de re aliquid scripsi, Caetera tibi mando, ita tamen ne profecta esse a me sentiat. Meministi haut dubie questum me non semel de amisso Ovidii Codice, quem *Leuwio Bodecherus* commodarat. Misit eum nuper ad me *Boeulius*, ea lege ut seniori *Bodechero* restituatur. Scis *Bodecherum* omnibus nugis suis me donasse, etiam hoc. Jure itaque videor istum mihi reservaturus. Fastorum ille codex est in charta descriptus, manus recentissimae, partim etiam mutilus, ut parum referat, cujus possessoris sit. Emendationem tamen, ut videtur mihi, palmariam hausi, libro I. Fastorum. Vale.

NIC.

J. FR. GRONOVII
NIC. HEINSIUS.

J. Adamo Scragio.

NUllum jucundius mihi tempus transit, Scragi doctissime, quam quod tui datur memoriae, datur autem quotidie. Videbaris enim mihi nescio quomodo supra patriae tuae calamitatem eluctatus, & erecta illa indoles tua nihil non spirabat, ut genuinum viri magni praeceptoris tui discipulum in te agnoscerem. Pluribus nunc non laudo te, quia coram. Testari certe possunt amici quidam mei, inter quos Gronovius noster, quam effuse amem ego te, atque adeo depeream. Caeterum post discessum in Angliam tuum, nihil prius tuarum expectatione mihi fuit. Ea spes cum fefellerit haecenus, saltem de officio meo volui tibi constaret, ut jam ignorare non possis, quo apud me loco amicitia tua sit. ἔξεχε, ἔξεχε, φίλε ἥλιε. In eo cum totus essem, opportune exhibuit mihi tuas Gronovius noster, quibus praeter amicissimam salutem pars ἀναφοράσεως ἡ Πλανύδης muneri inclusa, ut jam ingratissimus sim, de affectu tuo si dubitem. Ego folia ista inter κειμήλια mea reponenda statim curavi, quanquam enim pauca essent; non poterant non esse gratissima, quia perfecta a te. Totum opus quod promittis, noli quaeso humanitatis tuae ac laboris esse prodigus. Si paucarum ea res horarum esset, sperare aliquid auderem, nunc cum inexhausti sit laboris, absit ut tale quid a te expectem. Scio ego, quam non tuus sis. Nec amicorum propriis praeferri debent commoda. Quia tamen inhumanum esse me voluisti, quin potius illa vetustissimi codicis, quorum facis fidem, excerpta mihi siste. Utinam adesse ego vobis, aut ab hac molestia sic posses liberari, aut in partem saltem laboris venire. Pervagaremur omnes una Bibliothecas, nec dubium, quin parvo tempore magnus excerptorum thesaurus conquiri nobis possit. Constat mihi de legibus istius regni, scio nullos ex locis publicis huc libros transferri posse, frustra itaque sim, si hoc oneris in me conferre studeam. Inspexi ego quidem tres Epistolarum codices, sed aut in charta descriptos omnes, aut recentissimae manus, & tamen hausi inde quaedam, quorum ne nunc quidem me pudeat. Quicquid laboris mihi consumpseris, homini candidissimo consumptum scias, & qui hoc saltem admissurus non est, ut ingratitude notam subeat. Testabor publice, si forte nugae meae quandoque lucem visurae sunt, quid quantumque tibi debeam. Quicquid excerptorum miseris, tuum erit, tibi vindicabis. Non sum ego is, qui amicorum parvi faciam labores, scio quam magno mei mihi constent, ut seria fere studia neglexerim haecenus, dum in auctore nostro quaedam observo, quae priores fugerunt interpretes, & tamen quam levia ea sunt, quam nullius momenti! Absit itaque occupationes tuas meis posthabeas commodis. Si quid interdum temporis supersit tibi, quod destinari possit amicis, cui melius id quam mihi, qui vicissim tua de causa nihil non velim? Inter autoris nostri editiones, nullae Elzeviriana & Bersman-

Bersmannianis emendatiores. Mycillus etiam & Plantinus satis terse textum edidere: omnes illae penes me sunt; reliquae utcumque mendosissimae. Bersmanni Codicem, si ad manus tibi est, omnibus praefero, diligentissime enim is varietates margini adjecit. Quicquid erit, constet mihi velim, qua fueris usus editione, variant enim omnes mirifice inter se. Sed & MStorum aetatem, & possessores ne ignorem mea interest. Possem enim ego in eisdem quandoque incidere, si Angliam perlustraturus sum. Hoc & addam: diligens imprimis cura adhiberi debet eorum, quae vulgo singulis interferuntur versibus; nam inter Glossas multae lectiones latere illic solent, non tamen in omnibus. Conferebant enim Codices olim suos ad invicem Monachi, & me mini multa non contemnenda inde mihi notata. Totum hoc iudicii tui esto. Atque utinam alicunde Elegiae istius, quam Pedoni vulgo Albinovano tribuunt, in Drusi mortem exemplar erui mihi posset. Corruptissima enim ea est, atque aliquam meretur curam. Haec ex Nobilissimo Junio scire poteris. Cujus viri profusa humanitas me oppressit. Cognoveram ego jampridem ex parente meo stupendam ejus eruditionem, quippe qui cum uno Seldeno verae scientiae restitutor audiat ac vindex. Nec de summa viri magni humanitate dubitare poteram, quam infinitis documentis jam praeceperat. Putaveram tamen nunquam futurum hoc, ut in tanti partem honoris admitterer. Cui enim melius de tenuitate mea constet, quam mihi? Totum itaque hoc benevolentiae tuae acceptum fero. Interest igitur nunc mea, inter viri summi infimos ponar clientes. Hoc si per te impetravero, Deus sum. Habes hinc epistolam & verbosam & impudentem. Tu, si delicti istius veniam promerueris, vicissim me uteris. Vale, juvenum doctissime, & me, quod facis, ama.

EPISTOLA LXVI.

J. F. R. GRONOVIIUS

Nic. Heinsio.

Leidam.

BInas tuas accepi lubens. Quas ad Scragium dederas curavi, & tua ipsi vota sollicitè in meis commendavi. De loco Heliodori ago gratias. Verissime sine dubio Swartius, & est haec inter paucas gemmulas libri Scaligeri epistolas en tibi. Utinam fieret, quod speras, dareturque auctior earum editio! Certus sum plurimas adhuc latere, & posse unde unde erui. Narravit aliquando Lindenbrogius, delatam ab se consolatoriam bene longam ad H. Rantovium, se praesente scriptam & accurate. Fortassis exemplum habet. Quamquam si habuisset, credibile est, cum ad se fratrem datas edendas misit, hanc quoque communicaturum fuisse. Negat sane Vandermaerius Gualtherum vobis periisse: sed salvum reperiri adhuc potuisse quoque negat. Bonam igitur

Tom. III.

K

fortunam

fortunam jubet exspectari, quae fortassis in manum ei librum reducet. Canteri Catalogus non fuit librorum ipsius, sed filii cujusdam. Monui quidem non semel, sed in proximum semper diem sum rejectus. Nondum tamen conquiescam. Quae ad Ovidium notas, omnia mihi egregia visa sunt. Non est una tua *διόρθωσις*, cui indubitem. Paria nequeo reddere. Accipe tamen locum ex Catalectis Maronianis, quae non ita pridem diligentius evolvi. p. 40. in Aetna scribendum puto:

*Ut cum densa¹ premunt inter se corpora, turba
Elisa in vacuum fugiunt, & proxima secum
2 Momine tota trahunt, tutaque in sede resistunt.
Quod si forte mihi quaedam discordia tecum est,
Principiisque aliis credas consurgere ventos:
Non dubium rupes aliquas³ penitasque cavernas
Proruere ingenti sonitu, casuque propinquas
Diffugere impellique animas, hinc⁴ carcere ventos
Aut humore etiam nebulas effundere largo.*

Cremant in vulgato stare nequit, utcumque explicet divinus vir. Locus Senecae plane alienus est. Ille dat rationem chasmatum sive hiatuum terrae: Cornelius Severus rationem motus ventorum ex terra. Illi subsidunt: hi expelluntur. Nihil adhuc de igne. Dicit eam credi posse causam impulsus ventorum sub terra, quae corporum supra terram. Ut cum densa corpora inter se premunt mutuo, quaedam ex his e turba elisa evadunt in vacuum; quia vero & premunt & premuntur, suo momine trahunt proxima, quae perurgent, donec in vacuo, & tuto, ubi non premuntur, restiterunt. Sequitur alia ratio. *Principiis quod ab his*, sine dubio erratum est librarii. Si, inquit, dissentias, aliaque principia motuum quaeras, scio alia posse dari. Non dubium est enim sub terra cava & fistulosa fieri aliquas ruinas rupium aut cavernarum intimarum, & ruina impelli conclusas fistulis animas. Ut pag. 42.

*Sive peregrinis igitur propriisve potentes
Concurrent animae causis.*

Et passim in hoc poematio. Male vir summus *ruinas*. Hinc igitur diffugientes illas impulsasque animas, aut carcere effundere ventos, aut humidam nebulam exhalare. Igitur quod sequitur, *Ut campis agrisque solent*, non est mutandum, in *solet*. Respicit enim id verbum *impulsas animas*, uti ex sequentibus apparet. Tu quid de his sentis, docte Trebati? Vale, anime mi, meque ama. Hagae post diem III. Eid. Jan. Anno MDCCXXXIX, quem tibi quoque prosperrimum ex animo precor.

1. Cremant. 2. Nomina. 3. Penitus. 4. Cernere.

EPISTOLA LXVII.

J. F. R. GRONOVIIUS

*Nic. Heinsio.**Leidam.*

Quas postremum ad te dedi, recte redditas opinor. Nunc accipe aliud folium versonis Planudicae, quod nondum acceptis tuis ad me misit *Scragius*. Libellum observationum ab operis exiisse forte inaudivisti. Dedi Commelino in mandatis, ut duo exemplaria in charta regia impressa vobis curaret compingi. Misi etiam ad ipsum epistolam, quam Parenti tuo τῷ πανι una cum libro traderet. Si morabitur, tuum erit aurem ei vellere. Nunc restat, ut te orem, muneri nostro gratiam apud maximum Parentem concilies: quod quanto est indignius, ut ipsius oculis offeratur, tanto major me offerendi, uti non ignoras, necessitas constringit. Dein ipse accipias tibi dicatum, non ut te ornet, sed ut lectione tua poliat. *Fabricius*, qui nunc nobiscum agit, atque agat diu! te salutatur. Ille, *Pilius*, ego heri in curia Hollandica (non enim aula, ὡς σολοικίζει Κορνήλιος ὁ ἔ Διονύσος Φερώνυμος, τῆτ' ἐστὶ κερασφόρος) centum ostrea condemnavimus altera tantum parte audita. Grati saporis actio miseris intendebatur. Nihil liquidius. Ipsa conscientiae metu pallida ac obmutescencia pro confessis judicabantur. Et quia aquam dicebantur non timere, in ventriculi culleum missos, ut poenae mora donaretur noxiis, vino Rhe-nano mersimus. Vale, deliciae nostrae, & tu quoque fac simile. Hagae a. d. xi. Kal. Febr. Anno cidiocxxxix.

Nollem *Scrivarium* aut *Boxhornium* videre vestra exemplaria, aut de iis resciscere, ne vobis invidiae, mihi odio sint.

EPISTOLA LXVIII.

J. F. R. GRONOVIIUS

*Nic. Heinsio.**Leidam.*

ITa literis utilem me praestet, qui praestat saluum magnus Deus, ut quod de iudicio tuo admittere potui, seu quod in iudicio tuo iudicii, non amoris, fuit, me mirifice delectavit. Scio quam industria pariter & sapiens sit lectio tua, non enim persalutas libros, aut ex indicibus noscis: sed perlegis vere, & subtiliter limas, & ut ille ait, quasi spiculis rimaris. Talibus si lucubrationes nostrae vel partem sui approbent, rem teneo, & spernere facile possum eos, qui aut ex ignorantia laudant, atque ad quaevis alba sunt linea, aut ex imperitia & stupore, quae non capiunt, detrectant. Nam quae tu porro

amanter & ὑπερβολικῶς, distinguo sane, nec agnosco, non tamen propter fontem, unde emanant, rejicio. Puellas mediocriter pulcras & communium formarum, modo ne spinthurnicia sint & nugae, non illibenter audire scimus, cum ab amatoribus bellissimae rerum dicuntur, non quod credant (neque enim id credunt prudentiores) sed quod sciant pulchellum Veneris puerum, qualis ipse est, tales τῶν ἐρωμένων species in amantium animis formare. Quod vero in Nasone tuo multa etiam a nobis tentata loca nitidiora a te reddi possint, non dubito, qui & animum ipsius traxisti, & plures veteres codices consului-
sti. Nos diligenter quidem illum, sed ut caeteros, legimus, MS. autem vidimus perpauca. Cum igitur idem finis utrique sit nostrum, studia juvare & veteres puriores facilioresque reddere, in quibus ego tetigi scopum, ea probari tibi & scio & gaudeo, in quibus defeci, tuque eris accuratior, iis merito & libenter lactari me oportet, ac applaudere. Apud *Scragium* scito me fuisse memorem eorum, quae mandas tum de Ovidio, tum de Saresberien-
si. Quod vero suspicaris me verba tua apud *Fabricium* sinistre fuisse interpretatum, nescio quid rei sit. Cum vero Leidam issem, & toties praeteritum ¹ popula-
rem meum salutandum primo constituissem, ereptum mihi tempus est, quod vobis videndis lubens, si superfuisset, impenderem. Idque sine dolo & fraude factum, tu ipse non ignoras, atque ideo vehementiae amoris tui, cui ego acrem accusationem tuam condono, ipse excusabis. ² *Cornelium* intellexeram il-
lum, qui vetus Bavarorum nomen, quod *Bojorum* erat, habet. Locus in Pan-
dectis nihil habet difficultatis, modo legatur: *praeter conventionem*. Nescio an
amicus ille tuus illuserit potius nobis quaerendo, quam serio quaesierit. Ta-
men si liceret per otium, paucis sententiam (quae nemini obscura esse potest,
qui praecedentia legerit, & scit, quid inter actionem & exceptionem, con-
ventionem nudam & contractum intersit) explicarem. *Plofius* noster ἡ μαχαρί-
της si recte accepi a D. de Witten, erat Drost van Sulenstein & Leerssom, vel
Lessom. Epicedion tuum videre gestio. Vale, Charissimum pectus & me
ama. Hagae. Prid. Kal. Febr. Anno MDCCXXXIX. Instat puer, qui literas ad
nautam feret, adeo ut relegere non licuerit.

¹ Credo *Hagmejerum* intelligi. vid. Epist. 62.

² *Cornelium Boyum* intelligit, quem nomine *Cornelii Cossi*, cum *Francisco Santra*, id est, *Plante*, Saturnalibus lusibus Heinsius saepissime defricat. vid. Ep. 70. edidit is *Petri Strateni* Ve-
nerem Zelandam. 1641. in qua multa etiam Carmina *Boyi*.

EPISTOLA. LXIX.

J. FR. GRONOVIIUS.

Nic. Heinso.

Leidam.

GRatias tibi ago ingentes, mi-Heinso, pro insignibus exsequiis tuis, quas
non sine interiore animi motu legi. Equidem beatis manibus optimi
quon-

quondam amici gratulor: ille cum tuis Musis perennabit, & quando per aetatem non potuit rerum gestarum, animi certe & spei suae illustre exemplum tua opera ad juvenes sui ordinis superstites & posteros transmittet. Hoc multo est amplius, quam si splendido funere, Batava nobilitate deducente, a suis illatus tumultu majorum & compositus fuisset. quod multis accidit, qui per famam tam sunt obscuri, quam per sanguinem nobiles, ac nil nisi Cecropidae. Gaudeo publicatum fuisse epitaphium meum, quod vidisti puto, antequam tui libelli copiam habuimus. Secus non profecto inconditum istud carmen protulissem, sed muto dolore cladem nostram gemuissem. Nunc quando gratius illud esse scio illustri Parenti, non inofficiosum me eruditus tuus lessus, sed rubore tantum suffusum reddidit. Quamquam cur pudeat me, qui scio alia a te, alia a nobis expectari? Ego lugentibus poetatus sum, tu etiam tibi: ego dolui, tu etiam laudasti, In l. 7. D. de Pact. utique legendum, *praeter conventionem ea subest*. Res tota pendet ex differentia nudi pacti & contractus. Simplex conventio, sive pactum nudum, actionem non parit: si transeat in contractum sive nominatum, de quo §. 1. sive innominatum, de quo §. 2. parit actionem. Ut supra dicitur: *si in alium contractum* (hoc est, nominatum,) *res non transeat, subsit tamen causa*; ita hic: *sed cum nulla subest* (puta rei, ei quod agitur) *causa praeter conventionem*, id est, cum res, quae agitur, conventio nuda est, pactum nudum est, carens illa accessione, sive causa, per quam contractus fit innominatus. Si aliter vultis, fac sciam, nam mihi, hoc si attendas, nihil difficultatis videtur esse. Epistolam *Scragii* cum duobus foliis *μεταφράσεως* Planudicae ad te mitto. Vide ut crastina vespera eam recipiam. Constitui enim die Lunae respondere. Excerptum ex literis Legati nolim te cum quoquam communicare, non quia res sit ardua, sed quia ipse quid sit, non intelligo. Vale, meum decus, & me ama. Divinum Parentem tuum, domesticosque vestros officiosissime saluto. Hagae Prid. Id. Febr. Anno MDCCXXXIX.

Vides nostras *Scragio* redditas nondum fuisse, cum istas scripsit. Aut serius ergo a nobiliss. Legato traditae sunt latoribus, aut tardius ab ejus procuratoribus curatae, de quo ipsum monebo, nam ego nihil moratus sum. *Fabricius* vos salutat plurimum, & propediem ad te scribet. Exemplaria, quae miseras, postridie, quibus inscripseras, in curia tradidi, & gratissimum singulis fuit.

EPISTOLA LXX.

J. F. R. GRONOVIIUS

*Nic. Heinsio.**Leidam.*

Non tam diu fuisses immunis garrulitatis meae, nobilissime juvenum, nisi me hos aliquot dies continuas occupationes diripuissent. Seneca in pri-

mis assiduū accubium habet, quem utinam recensere possem totum. Multa observamus, quae accuratius sint dicenda, quam in brevem illum notarum modulum, quem libri moles & typographi requirunt, possint arctari. Et tamen tumultuaria ac translatitia haec opera est, plurimaeque praeterire necesse habemus, in quibus exercendi ingenii locus, quia subito negant vel le expediri. Utcunque sit, spondeo editionem, quod ad textum attinet, castigatissimam omnium futuram, etiamsi festinemus. Quantum enim vides, haud longe abest decretoria hora, cum tam calidis olim votis optatae, postea adamatae magis, Bataviae multam dicemus salutem. Ita violentè instant, urgent, compellunt, quibus in nos arbitrium est. Sed de hoc sat cito, ubi quid habuero exploratius. Nunc accipe epistolas optimi *Scragii*. Vides omnino ab hero ejus te expectari. Et profecto non dimitti mirer, quando ea res & ad civilium rerum tractationem parare te posset, & rempublicam capeffenti commendationi foret, quod in illa domo vixisses. Nam quod studiis quoque tuis illa peregrinatio profutura sit, nosti ipse. Sed consilium maximi Parentis tui sine dubio melius. De *Saresberienfi*, quae mandaveras, agnosces etiam curae me habuisse. ¹ *Bavarus* iterum *Bavium* aut *Maevium* egit in eodem argumento, in quo tu nuper optimum Poëtam. Falsus est *D. Heinsium* esse heroum heroem, etsi Poëtam bonum non esse secreto sentiat. Sed quid videtur tibi de illo (vidisse enim te puto missu *Dn. Tienhovii*) parentantis spernens convitia *Leidae*? Hoc ego non miror, qui decem minimum epigrammata in Cl. ² laudatorem C. non ita pridem summo cum fastidio singultientem aut vomentem audire coactus sum. Vale, decus meum, & me ama. Hagae Non. Mart. Anno CIOIOXXXIX. *Fabricius* ὁ πᾶνν cum elegantissimo contubernali suo vos plurimum salutant.

¹ Intelligit *Cornelium Boyum*, Poëtam non optimum, de quo Ep. LXVIII.

² credo intelligi *Adolphum Vorstum*, qui Cunacum laudatione funebri celebravit.

EPISTOLA LXXI.

J. FR. GRONOVIIUS

Nic. Heinsio.

Leidam.

Nobilissime & eruditissime juvenum. Equidem te puto ὅλον esse τῆς ἀνίας, nec mihi verba sufficiunt, quibus deplem obitum insperatum magni nostri Maecenatis. Hic primus nuntius me perturbavit, & de statu dejecit heri primo mane. Simul hanc civitatem intravi, atque ex eo torpeo totus. Nec tamen laxare me frenum dolori acerbissimo hoc patitur tempus, quod me prospicere mihi & iter adornare, non curare ulla alia, finit. Angustissimis terminis includor, atque intra hebdomadem unam me pransum paratum, meas aptas sarcinulas & expeditas oportet esse. Agnoscis causam, quare cum constituiissem in reditu videre vos, atque isthac transire, huc potius properare coactus

coactus sum perniox. Avunculus & affinis, qui Amsterodamum venerant supra negocia, quae ipse tractanda habui, eripuerunt mihi diem, quem libentius tibi dedissem. Nunc vero ita varie agor, ac distrahor rebus tam brevi spatio expediundis, ut, *τί πρῶτον τίδ' ἔπειτα*, profecto nesciam. Itaque tumultuarie quod primum occurrit, id arripio, ut paullatim cumulum deruam. Habeo hîc libros, quibus misera mea & undique defecta studia pro humanitate vestrâ insigni juvistis. Ea retineas partim, partim restituas dominis cum gratiarum actione prolixissima. Si quid praeterea vestrum mecum esse vos melius meministis, (ego misi omnia, quae sum recordatus) in tempore poscatis quaeso. Hodie enim aut cras convasare meam supellectilem constitui. Cum Amsterodamum ibo, vos videbo prius. Epistolam *Scragii* acceperam, antequam nuper hinc discederem; sed per festinationem mittere ad te sum oblitus. Vale, meum decus, me ama, & incomparabilem Parentem tuum totamque domum vestram a me saluta quam officiosissime. Hagae a. d. ix. Kal. April. Anno *MDCCXXXIX.*

EPISTOLA LXXII.

J. F R. G R O N O V I U S

*Nic. Heinsio.**Leidam.*

Nobilissime juvenum, nondum elapsus est ille dierum numerus, quem si hîc exigeremus, me aliquid ad te literarum daturum promisi. Ultimum reditus meus aut antevertet aut certe comitabitur. Jam enim festinari iter nostrum incipit. Cras, puto, videbo vos, sed aut illa vespera, aut sequente matutino Hagam perrecturus. Quare magnopere te rogo, jam nunc instes apud incomparabilem Dn. Parentem, ut, ubi paullum sit otii, quas pollicitus mihi *συστατικῶς* ad illustrem Dn. Legatum & *Patritium Junium*, paret. Unica haec causa est, cur Leidam transimus, quod vix effeci tamen. Quasi enim curriculo in Selandiam mittimur, ibi expectaturi ventos ferentes. Vellem plura, sed vetant negotia & discursationes, quae jam nunc incipiunt, & hoc die prorsus mihi genua solvent. Vale, *φίλτατον καὶ εἰς*. Amstelredami a. d. xviii. Kal. Maj. Anno *MDCCXXXIX.*

EPISTOLA LXXIII.

J. F R. G R O N O V I U S

*Nic. Heinsio.**Leidam.*

Charissimum pectus. Habeo ad te materiam epistolae ingentis, otium vix quantumvis brevissimae. Et distulissim officium in proximam occasionem, nisi nunc.

nunc ipsum mitterem ad τὸν πᾶνν *Boswellum ἀνέκδοτα* Saresberiensis, ipsius *Patritii Junii* manu descripta & emendata. Mirabor, si ea patienter legere poteris, qui aures non nisi nitidissimis ac elegantissimis poematis imbuiisti. Et nescio an honeste satis sola edi possint. Debent tamen utique propter *Junium*, qui succenseret merito, si tantus labor nostri causa susceptus, indigne ipsi periret. Tu igitur ex re praesenti consilium capies. Ovidium inspexi: recentissimae, minutae admodum, & plane monachalis manus est, sed integer, continensque omnia, ni fallor, opera, etiam illa de Nuce & Medicamine faciei. Est etiam ipsius Junii, sic ut mitti possit. Velim constituas, quid sit tibi faciendum. Ego verbum injeci de mittendo, instare non audebam, quia ingentem Tacticorum numerum & Achillem Tatium, aliaque eadem hora petieram, & impetraram. Sed si aut ad ipsum aut ad me scribes luculentius, quae ipsi ostendere de petitione tua possim, non dubito quin sis impetraturus. Praefertim si quid addas de certa spe edendi Saresberiensis poematum. Galli librum adversum Diatriben meam accepi Roterodami Leida missum, & forte jam vidisti, sic ut iudicium meum de eo scribere non sit opus. Tu expecta paullulum, & videbis quam feliciter ei sua fatuitas, malignitas, imperitia cesserit. Hae enim omnes sunt vespertilionis virtutes, atque inde aestimabis libri meritum. *Casaubonum*, *Seldenum*, *Fr. Junium* vidi. Habeo de Seldeno quaedam lectu tibi non injucunda. Falsa enim sunt prorsus, quae ibi jactantur. Verbo, vir est ad humanitatem & politiem velut ungue factus, in quo nihil minus, quam paedagogica morositas. Ut mirer, quo astroliti sint, qui aliter deprehenderunt. Literae maximi Parentis tui Legato, *Patritio*, illi fuerunt gratissimae: quarum fructum ut sensi plurimum, ita fateor debere me pro iis immortales gratias. Exercitationes sacrae ab omnibus expectantur impatientissime. Saluto Vestros & amicos omnes officiosissime, in primis & Dn. *Latium*, cujus literas ad filium recte curavi. Vale, flos juvenum, & me ama. Londini. a. d. xviii. Kal. Jul. Julian. Anno cxcxcxxxix.

Tuas mittere potes ad Nobiliss. Boswellum. De itinere meo particulatim ad Schertlingium & patrem scripsi.

E P I S T O L A LXXIV.

J. F R. G R O N O V I U S

*Nic. Heinsio.**Leidam.*

L Iterae tuae, quo uberiores, eo gratiores mihi, redditae sunt Oxoniae xv. Kal. Sextil. Jul. commodum reduci a Thermis, sive Bathonia, loco totius Angliae, quam quidem vidi, delicatissimo. Scripsi illico ad *Patritium Junium*, quia epistola non erubescit, satis ambitiose, & sic ut negari mihi nollem: sed quia post paucos dies Cantabrigiam iturus, indeque visis aliquot regis arcibus
Lond-

Londinium reversurus eram, responsum coram me postulaturum ipsi constitui. Quid verbis opus? habes rem peractam: cum redierit *Boswellus* legatus, Ovidium MS. accipies. Ultroque id factum atque *αὐτομάτως*, quod tu machinis efficere me malebas: mihi namque credidit codicem suum, atque meam accepit fidem: quo, si ipse ad eum scripsisses, quod ego te hortatus fueram, qui non quaerebam in mustaceo laureolam, nec ambiebam quasi per fidei commissum meaque opera pervenire ad te beneficium, quod directe ab autore consequi poteras & merebare, non fuisset opus. De tempore tu statues ex commodo tuo & decoro: sed gratum erit ipsi, si circa festum Paschatos sequentis anni liber domino restituatur. Perreptavi plurimas hujus regni satis instructas & editis & MSS. Codd. bibliothecas: Oxoniae praecipua est Bodleiana publica: praeter hanc singulorum Collegiorum & Aularum (ista vocant, quibus adjuncta sacella & beneficia Ecclesiastica, suntque numero XVIII. has, quae istis carent, suntque VII.) non poenitendae: similiter Cantabrigiae pro eorundem numero ad XVII. sed omnes fere tam strictis legibus adversus peregrinos munitae, ut nisi post longum tempus, & multas indignitates, fidemque commendatitiis acquisitam, aditus in eas pateat. *Patritius* ὁ τὰ πάντα καλὸς καὶ γαθὸς mihi fuit τὰ πάντα, absque quo fuisset, oleum & operam perdidissem. Multa in istis sunt τῶν Ovidii, quibus tamen mihi per angustias temporis uti non licuit: discere potes ex Ecloga MSS. Oxonio-Cantabrigiensium a *Th. Jamesio* edita, si tamen librum poteris nancisci. Nam mihi praeter exemplar, quod in bib. Bodlejana habetur, nullum videre contigit. *Frondatore* respondi saevis cum jocis, ut merebatur. Recte tu mones calumniis abstinendum, sed intempestive sane, pace tua, charissimum pectus. Non enim sumus nos ii, qui calumniando quamcunque causam nostram agere velimus, & profecto moroni similes essemus, si putaremus malis artibus defensionem nostram indigere. Quis unquam fuit mortaliū, qui adeo fatue inscitiam suam, stuporem, barbariem, impudentiam, malignitatem prodidit? Indicis vice tantum ut fungeremur opus fuit, & tunicis quibusdam, quibus nuditatem identidem involverat, nebulonem evolveremus. Singulis captivibus tot capita opposuimus, locum nullum reliquimus intactum. Saepe misereri vespertilionis volui, sed cum malitiam & maledicendi intemperantiam, qua adversus me grassatus, cogito, nullus relinquitur misericordiae locus. Tu ipse cum nostrum Elenchum videris, vehementiores fuisse nos non indignaberis. Ubi Lutetiam venero, fortasse edetur. A *Fabricio* habui unas Parisiis paullo ante discessum ex ea urbe datas: ait nullis praeconiis aequare se posse humanitatem illorum heroum aut honores sibi habitos, Elysios sibi videri campos, & me ad gaudia mea (ita loquitur) se evocare. *Thersiten* meum non vidit (secus atque promiserat) quod nollent *Grotius* & *Puteani* homini sordido, & ne ipsis quidem de facie noto (ita ait, & adeo nec videri a quoquam nec admitti) eam gloriam contingere. *Hagmeierus* ubi terrarum sit ignoro, a vobis discessisse ex tuis primum argumentatus sum. Paterni operis expectatio hic apud doctos (praecipue literas, qui paucissimi & vix tot quot Thebarum portae) est desiderium ingens. *Seldenum* nunquam vidi, quin id primum rogita-

taret. Is vir praeter caeteras laudes humanitatis est incredibilis, morum prorsus ad veneres & gratias factorum, Heinsiani nominis studiosissimus. Adornat ingentem commentarium de Jure Civili Hebraeorum, cui multa interveniunt jus Naturae & Gentium illustrantia. *Riquartum*, ut jusseras, allocutus sum. Negat ab *Holstenio* quicquam se habere vobis tradendum, & plurima de illo viro minime honesta loquitur. *Leonem* vero *Allatium* dedisse sibi Sallustium *αὐτὸς δὲ τὸν* *ἱστοριον* inscriptum parenti tuo, quem habituros vos, simul atque redierit in patriam. Neque enim penes se eum esse, sed inter librorum sarcinas, quas nescio utrum Massilia an Rothomago in Hollandiam misit. Prima autem navi, qua tuto transvehi posse speret, ad vos advolaturum. Academiae luctum in Reverendo & Cl. *Walaeo* doleo. Exercitationes sacras expectabo Parisiis, atque inde ad patrem tuum *ἡ τριμύσιον* scribam. Propediem enim conscendemus, & jam fecissemus, nisi Regis adventum hîc expectassemus. Elzevirii me jubent pergere in Seneca. Hîc nec otium mihi, nec libri ad eam rem suppeditarunt. Et potuissem vetustissimum codicem primae editionis Epistolarum, quam MSS. deprehendi parem, hîc emere, si certus fuissim istos sumptulum mihi reddituros. Nam bibliopola, quia me noverat, carissime librum indicabat. Si quid Parisiis possim, videbo. Interim salvere eos jubeo. Vestros quoque omnes Cl. W. *Scrivarium*, *Boxhornium*, aliosque, quos nostri curam gerere videbis. Vale, decus nostrum & me ama. Londini Non. Aug. Jul. Anno *MDCCXXXIX*. Salutat te *Jardinius*, quicum heri pransus sum in aedibus Legati.

EPISTOLA LXXV.

J. FR. GRONOVIIUS

Nic. Heinsio.

Leidam.

HAe tradentur tibi, Charissimum pectus, una cum desiderato Ovidio *Patritii Junii*, qui utinam expectationi tuae aliquatenus respondeat. Ut ut erit, petitioni tuae satisfactum est, & si nunc fefellerit, amplius spem tuam deludere vetabitur. Fidem meam, quando ita voluisti, interposui lubens, nec vir optimus ante instantis anni ferias Paschales eam impleri postulat. Interea spero usui satis futurum tibi. *Pirkheimeri* codicem saepiuscule a *Fr. Junio* poposci, sed negavit inveniri. Nec verbis ejus indubito propter summam comitatem, qua omnibus, quae vellem, *Arondellianae* bibliothecae uti me facillime permisit. Crede neminem vivere, qui majori studio nobilia incepta tua cupiat promota, me ipso, si quid ad illa conferre possem. Et identidem obvenerunt in bibliothecis Academicorum collegiorum, quae tibi in promptu esse optabam. Sed conditionem meam vides, vix ipse mihi sufficio. Te oporteret ibi morari, & longo tempore emollire homines, qui thesauros istos pretiorum ignari possident. Nos

Nos perendie hinc solvemus, & ad portum Risenſem verſus Galliam contendemus. Sed deflectemus de via paucarum horarum iter Cantuariam, propter humaniſſimum *Cafaubonum*, qui me amice exſpectat. Elzevirii, ſi ſuſtinere poſſunt, editionis ſuae haud dubio augebunt praefantiam. Sin, notas certe e Gallia ad Epiftolas & Naturales Quaefiones accipient. De M. Seneca tum videro. Parentis tui opus magnum prodiſſe nuper ex ampliff. *Bofwello* intellexi. Tu nunc vide amiculi & promiſſi te memorem praeftes. Certe ubi in Gallia me compoſuero, nulla mihi lectio ante illum ad guſtum erit. Et commode ab Elzevirio filio, qui Lutetiae eſt, id incomparabile munus acciperem. Nam quod tu me jubes procari ipſum, qui doni hujus occaſionem donavit tibi, nec promiſit ille, nec ego ita frontem perfricare audeo. Scribam vero, poſtquam Elenchus meus editus fuerit. Scis enim nebulonem meum nec illum praeteriſſe in veneno ſuo jaculando. Quod & cum iſtius ſumma infamia & hujus merito a me repetitis laudibus, faxo, ſatis fuerit. *Boxhornius* (quem ſalvere plurimum jubeo) quid agat, quando habituri ſimus Bredam, quando Agricola Taciti, ſcire cupio. De J. Saresberienſi nuper, ni fallor, oblitus eram aurem tibi vellere. Certe *Patritius* exſpectat rem per te effectum iri: Vale, mei amores & bene age. Londinii ante d. vi. Kal. Septembr. Anno ciorcxxxix.

Quo tuas in Galliam deſtinare debeas, nondum adhuc ſcio. Fortaſſe docebit te Granſwinckelius ὁ πάνυ.

EPISTOLA LXXVI.

J. F. R. GRONOVIIUS

*Nic. Heinfio.**Leidam.*

Iteras tuas gratiſſimas non diu, poſtquam in hanc urbem adveni, reddidit mihi Elzevirius: quibus reſponდიſſem dudum, abſque negotiis fuiſſet illis, quae ſolennia ſunt in novum locum commigrantibus, puta diſcuffare & quærere fixam habitationem, reddere *συſατικὰς*, viſere doctos viros, & instrumenta commodae *διαίτης* in his hibernis parare. Primum quidem gratias tibi ago immenſas, quod Parentis tui opus incomparabile dono veſtro meum eſſe voluiſti. Accipiam & ſervabo Palladium illud *διοπετὲς* inter caetera monumenta affectus tui, quae penes me ſunt, ſine pari exſtans atque eminens, legam etiam cum veneratione atque diſcendi cupidine, quam praefare ſoleo omnibus ejus divinis ſcriptis. Quamquam autem nulla ſpe ſuperba praefumam tempus, quo pariare tecum queam, tot obſtrictus beneficiis, paro tamen cum maxime munuſculum tibi, *χάλλικα χρυſείων*, quod ſpero non ingratum tibi futurum. Inter immenſas bibliothecarum divitias, quibus hîc obruior, unum atque alterum Ovidianum opuſculum conferre coepi non ſine operae pretio. Fieri poteſt, ut potiora tu anticipaveris: ſed ut qui bona omnia a Diis impetraverant, ea-

dem petebant alio signo firmari, ita ingratum nec erit puto tibi, eorum, quae ipse notasti, confirmationem accipere aliunde. Exemplum dabo ex epistola Sapphūs: *At vos erronem tellure remittite nostrum.* Ita tot apicibus membrana ut putem leg. *Aut vos erronem tellure rem.* Nam ita cohaerent sequentia. Nunc tibi Phaon Sicelides puellae nova praeda veniunt: Quid igitur cum Lesbo mihi? Ego quoque ero Sicelis, Aut certe vos Sicelides remittite eum tellure vestra: nec decipiant vos fraudulentae ejus blanditiae &c. Pro *montes Sicanos* MS. *immites*, quod tu considerabis. Idem codex clare habet, *Arabo.* Inferius: *modestius issēs. Si mihi dixisses:* MS. *Et modo dixisses.* Statim: *non oscula summa tulisti*, pro *nostra*. Iterum inferius, *extendit aquatica lotos.* MS. *expandit.* Rursus: *Constitit & dixit: Quoniam non ignibus. Quae nunc non ign.* Sequitur varia lectio, de qua quid dicam nescio, tu videbis: *Nec mora: jussus amor tetigit laetissima Pyrrhae Pectora, Deucalion &c. Nunc vellem facunda forem* MS. *forent*, sc. pectora. Item: *Haec quid ego? an precibus tibi pectus agreste movetur.* Ita MS. Non habeo aliam editionem praeter minutam Amsterod. ut scire non possim, si qui ex editoribus haec occuparint. Tu vide, quo loco habenda censeas, & an gratum futurum sit, si omnia ex illo codice habeas. Continentur eo amatoria, & in alio volumine ab eadem manu (recentior est & elegantissima scriptura Italica, tamen in membranis) Fastorum libri, in quibus etiam non pauca, ut videbatur raptim oculos eo conjicienti, observavi bonae notae. O si hîc esses, & nobis partiri curas liceret! *Puteani* omnia volunt, quae vis. Sunt viri honestissimi, & juvenum omnium praeclarorum conatuum cupidissimi. Et sic maxima pars eruditorum hîc: nusquam adhuc fui, ubi plus comitatis, minus invidiae & simultatum deprehenderim. Centum annos sic mihi agere dulce foret, ut nunc vivo. Codicem *Patrit. Junii* spero, Ampliss. *Boswellus* jam ad te curavit, quoniam ipsum vix in Hollandiam rediturum non ita pridem hîc intellexi. *Elichmanni & Hortensii* obitus lacrimas mihi conciverunt. Jactura haec profecto maxima, cum vix successores habent eorum, quae feliciter heu moliebantur, infeliciter deseruerunt. Elenchus Antidiatribes sub praelo est, in eo videbis cum honore nominis vestri defensam divinam emendationem Parentis tui, ¹ *Nubigenas clypeos.* Quae caetera, in epistola tua, non parum me commoverunt. Vale, decus nostrum, & me ama, Parenti, *Scrivario, Vorstio, Boxhornio*, aliisque communibus amicis etiam commenda. Lutetiae Paris. Iplis Martinalibus Anno *MDCCXXXIX.*

Hugenium, Graſwinckelium τὰς πάνυ, ubi Hagam veneris, si grave non est, a me observantissime salutabis. Constituieram Silvarum quoque textum edere; gravatur typographus: & nunc aliis implicitus libenter illum laborem subterfugio. Solus ergo Elenchus edetur eadem forma, qua Diatribe. Ut pereat tibi omnis misericordia erga ² nebulonem meum, scito patrem ejus fuisse ex sedecim, qui ut cruentam suam seditionem illustriorem facerent parricidio, magno *Briffonio* & quatuor insuper Senatoribus manu carnificis gulam fregerunt

¹ In Statii Protreptico Crispinis. Vid. Diatrib. cap. 2.

² Emer, Cruceum.

rent. Hoc verissimum & hîc publice omnibus notum est. Itaque furiis agitur, ne desinat esse κακὴ κόρακος κακὸν ὦν.

EPISTOLA. LXXVII.

J. F. R. GRONOVII

Nic. Heinsio.

Leidam.

LIterae tuae redditae mihi sunt occupatissimo. Inserviendum est editioni Elenchi. In Senecam poscit aliquid Elzevirius. Urgent incepta plurima, vix perficienda ante abitum, qui maturius indictus mihi, quam speraveram, literae multae scribendae. Nolui tamen te meas expectare diu, vel quia de diffidiis Academiae scribis, quîs me quoque λογοποιοὶ quidam frustra cupiunt immisceri. Jurare possum liquido, me ultra ter non audivisse Parentem tuum de S. loqui, & id minime pro inimicitîis, quae vulgo ferebantur: ad mensam, quod meminerim, nunquam. Quid referrem igitur ad illum, nisi desperare & nequissime mentiri vellem? Utinam apud communes amicos tam tectus fuisset! Sed ille irarum prodigus neminem undecunque ortos dolores suos celabat. Ad quae ego filui & sermonem quaestiunculis meis plerumque ad alia diverti. Interim saepe apologias scripsi, ne in partes concessisse me opinaretur, quod ego maxima cura semper cavi, & ideo a multis hîc laudor. Nam id, quod vos nunc facitis, saepe antehac fecit ille mihi, quem huic culpae affinem non esse tu haud ignoras. Objecit aliquando mihi per iratas literas, relatum sibi esse, me omnia venena ex scriptis ejus colligere, ea propinare vobis, ut in invidiam ejus per vos proferantur: teque publice in circulo dixisse quodam, me primum ostendisse locum tibi, ubi *Fr. Junius* sub nomine *terrenae bestiae* traduceretur. Verba ipsius ipsa haec sunt. De istis ipse me purgavi: illa quidem esse falsissima & fictitia; hoc si factum sit, non animo calumniandi factum, sed cum obiter in locum eum incidissemus, & ego quis designaretur rogatus essem, quamquam vix ejus temporis meminerim. Tibi ea de re verbum nunquam, quia non dubitabam aliter acceptum esse, quam excidisset tibi, si unquam excidit tibi: & nolui semel locum dare reductis saepe sermonibus ac fabulis, quando semel admissae essent. Qualis apud vos de illo, talem apud illum de vobis fuisse me credas volo, κλεπτίστατον, & occlusissimum. Non vides praetendi exteros, ut inquirere desinatis? Nec illi, qui prope sunt, appareant? Tunc vestrum splendorem invidis ex popularibus tuis carere putas? Falleris profecto. Qui sunt illi exteri, qui istarum rerum notitiam habuerunt? praesertim si ab stirpe exquiratur auctoritas, & detegi debeant nomina autorum istius mali. Ego non feci, sed inveni, cum in Hollandiam veni, ignarissimus ad id usque temporis talium. Quam facile est futoribus & fartoribus mendaciorum fingere

L 3

&

1 Salmasio.

& rem & autorem, cum hîc mentiantur, ibi forte in verum incidant? Etenim qui sciant, quae ab inimicis culpari in S. soleant, ea tribuere possunt vobis, sed si ea emanasse per me addant, scelestissime mentientur. Atque adeo eam rem praecido, & pariter curis meis & negotiis exesse jubeo. ἵστωσι πάφοι male feriat, & ἴσως τινὲς τῶν μεσίων comminiscantur quicquid velint, ut dum ipsis res non succedit, in alios culpam devolvant: ego post haec τὰ ἴδια πράξω, & ad ista objecta ne respondebo quidem. Videant, dum persuadent vobis autores requirendos, ne ipsi e latibulis extrahantur, aut conciliando acrius inconciliant. Amnestiam oportet intercedere, ut pax fiat, non inquisitionem. Quid enim? Non alter vicissim a vobis autores poscet? Isti ubi utrimque editi sunt (nam haud dubie multi sunt, qui oleum camino infuderunt) an pro uno inimico decem habere uterque malent? nec tantum habere eos, qui inventi fuerint, sed & propter sermonem vanissimi cujusque innocentes amicos vestros in easdem copulas estis conjecturi? An potius, sopire ac lenire sine ulla scrutinio ulcera illa, ac praeteritorum oblivisci potius, quam accurate & subtiliter eadem revolvere ac replicare? Sed hoc ad me non attinet. Ego sanctitatem amicitiae, qua dignatus me Parens tuus est, nulla unquam re violasse conscius sum mihi: beneficiorum tot vestrorum oblivisci non possum, nisi ingratiſſimus sim bipedum: ipsum semper pro viro maximo & rarissimo aestimavi, & aestimo etiamnum: nec nisi rejectus plane & contemptus a vobis animum mutabo. Tum quoque absit, ut doctrinam ejus virtutesque abjūrem: in me saevo more praeter morem vestrum esse uſos querar. Atque te adeo hortor & oro, in candore illo ac simplicitate erga me, quam literae ostendunt, tua persistas. Videbis nunquam commissurum, ut a mea parte claudicet benevolentia. Nam quod Claudianum tradere tibi dissimulavi, puto tradendo alios libros, quos aliquo jure vindicare poteram mihi, meruisse potius, ut contentus iis esses, quam hunc negatum tibi quererere. Adde, quod sub ipsum tempus discessus petens illum, utrum redditurus esses, haud satis exploratum habebam: & nosti illud, *frons occipitio prior est*. Cum tu interim ipsos codices in promptu haberes, si paullum molestum, at fructuosius certe futurum erat, (quod fecisses tamen, etiamsi excerpta habuisses, si curam dignam adhibere esset animus) ipsos conferre edituro: mihi, qui utrisque caruissem, longum restaret οἰμώζειν. Sed haec tollamus. Gaudeo te recensionem istius magni Poëtae meditari. Quicquid ipse conferre potero, conferam libenter, & forte plura conferrem, nisi mearum nunc rerum tantopere satagerem. Proximis quid id erit scies. Sunt hîc summi viri, quibus narraui de carminibus *Rutgersii* in *Grotium* ut & du-

1 Reperio haec inter *Rutgersii* carmina, quae Nic. Heinsii addita leguntur pag. 339. D. Heinsii vero epigramma, in *Grotii* ex carcere liberationem per uxorem, legitur inter Poëmata extemporalia pag. 410. Edit Anno 1649. & Graecum in arcam libris onustam, qua servatus est *Grotius*, pag. 592. quae forte respexit Gronovius. Ceterum D. Heinsium aliquid temporibus dedisse, & cum antea *Grotii* laudes & conjunctionem amicitiae (quippe olim amicissimi. Vid. Epistol. cxlvi. inter Gudianas) inseruisset Hymno in Pandoram, quae post praefationem Hesiodi

duplici Parentis tui in liberationem ejus. Si vis apud me ullam gratiam inire, & me vis apud illos, fac ea descripta, Graeca & Latina, ad me quamprimum mittas. Spondeo, non frustra feceris. De valetudine tua εὐφήμει. Precor Deum immortalem, ut te delictum Patris & fulcrum paternae domus ipsi, quantumvis longaevo atque felici, una cum ornatissima omnibus virtutibus, quae in sexum illum cadunt, sorore superstitem relinquere liceat. Incomparabile illud sacrae eruditionis ταμείον accepi lubens, & gratias ago infinitas: agamque porro, quoties hac charta interprete mysteria divina intelligere dicam. Ipsi a me amicissimam & submississimam salutem. Nec minus τοῖς πᾶσι Hugenio & Grafwinckelio. Vale, decus meum. Lutetiae a. d. xiv. Kal. Decembr. Anno CIOIOXXXIX.

Hesiodi legitur, post Synodum Dordracenam tres ultimos versus mutasse, sublato nomine Grotii, constat ex editionibus posterioribus, & amplissime narravit Clericus in Ephemeridibus Trevoltianis, a se interpolatis Tom. 1. pag. 269.

EPISTOLA LXXVIII.

J. F. R. GRONOVII.

Nic. Heinsio.

Leidam.

DE Claudiani epigrammatis, quae promissit *Binetus*, spes nobis decollavit. Bibliotheca ejus distracta dudum, & bona ad tertios, puto, obscuros jam haeredes pervenerunt. Ipsum quoque ajunt non tam doctum fuisse, ut de Poëtis Latinis judicio ipsius sit standum: atque adeo facile decipi potuisse, ut ἀνθεραξας pro thesauro possidere se crediderit. Haec ex ore *Puteanorum* fratrum & *Caroli Labbaei*. Nam juniores, qui hîc sunt inter doctos, vix nomen meminerunt viri. Ut haec citius ad te perscriberem, aliam mihi praeterea causam dedit vir magnus, & nominis vestri studiosissimus, *Christophorus Justellus*, Reginae Bohemiae & Bullionaei ducis hîc agens in rebus. ait se vidisse in bibliotheca Palatina *Stephani Ephesini* collectionem Canonum: qui liber ad *Elmenhorstium* sit missus, atque inde aut ipse, aut apographum ejus ad *Rutgersium* & πᾶσι pervenisse, atque, ut credit, ab eo ad vos. Cum autem Photii Nomocanonem publicaverit, & quosdam alios ἀνεκδότους ejusdem materiae nunc sub manu habeat, valde istum autorem institutum suum juvare posse, qui antiquissimus sit omnium, & primum ordinem in volumine, quod parat, fortiri mereatur. Tentare itaque voluit, si me paratio illum a vestra liberalitate queat nancisci. Promittitque se honorificentissimam Parentis tui mentionem facturum & professurum, cujus benignitas id munus publico imputet. Offertque se, siquidem in vestra potestate sit, & mittere huc velitis, se sumtum itineris lubenter praestiturum, & ubi describi curaverit autographum remissurum vobis: aut si ibi reperiatur, qui accurate describat, nulli se impensae parsurum. Ego pro

nota

nota mihi humanitate Parentis tui incomparabilis & studio ad rem literariam juvandam, pene promissi, si copiam ejus habeatis, futurum ne ipse careat. Velim ad hoc respondeas mihi quam primum & diligenter, ut literas tuas ea parte ostendere ipsi possim. Faciet enim id quoque ad tuam laudem, quam ille, me ex egregia indole tua & praeclaris profectibus decantantem multa rogans, cupide & gratulabundus audivit. Ego ita premor inceptis meis, quia non totam hiemem manendum erit, ut conversationi praestantium hominum, quae hîc plane uberior, quam in ulla regione mundi, paucissima tempora magno cum dolore meo indulgere possim. Ea etiam causa est, cur Elzevirii in Senecam, quid notarum desiderantibus, satisfacere nequeam. Nam subitas nugae effutire non possum: labore atque contentione mihi constant. De Epigrammatis Parentis tui & Rutgerfianis iterum aurem tibi vello. Vale, dulce decus meum, & amicos communes saluta. Lutetiae Parisiorum a. d. vi. Kal. Decemb. Anno MDCCXXXIX.

EPISTOLA LXXIX.

J. F. R. GRONOVIIUS

*Nic. Heinsio.**Leidam.*

FRustra desiderabas, Charissimum pectus, in postremis tuis (eae erant ante d. III. Kal. Decemb. anni praeteriti scriptae) ut crebriores postea a me acciperes. Ecce laneis pedibus post tot exactos menses adrepi responsum meum, meae magis voluntati, quam expectationi tuae, ipsa credo mora jam extinctae, satisfacturum. Interea duabus forte aliis meis tu respondisti, ut feceris, certe opto, quas quando tandem videbo ego? Narro tibi, brevis fuit felicitas mea, in ipso principio fruendae ejus Nemesis mihi finem fecit. Quid Nemesis tamen? imperitia istorum hominum, qui Galliam extra Galliam, hoc est Parisios, quaerunt, & magnis emunt sumtibus lapides, caementa, aliaque vidisse, quae ad vitam & profectus nihil prosunt, sermonibus haecenus, ut vidisse ea inter vanos jactare possis. Nec credas ullibi terrarum locum esse, qui cum una civitate illa queat comparari: si uspiam omnia illa, quae sapientem hominem seculum ibi sine ullo fastidio detinere possunt, reperies, non tanta erit copia singulorum. Quanto cum moerore meo ex istis Elysiis campis me ejectum putas? tot candidas, doctas, humanas animas reliquisse, quae, quod nutu illo aut suspirio gratum fore mihi testabar, id obsequiis suis, priusquam repraesentassent mihi, non cessabant, & desideria praeveniebant mea: tot, tam raros atque inaeestimabiles librorum thesauros, quibus frui adeo non invidebant mihi possessores, ut etiam cogerent, atque hoc unum dolerent, quod non sufficerem singulorum officio accipiendo: tantam spem augendorum studiorum meorum: tam liberales, & quovis etiam studiosissimo homine dignas voluptates, &

& post tetricas Musas temporis fallendi occasiones : alia infinita, quae edisserere non possem, etiamsi illa omitterem, quae & indoctos homines allicere possunt. Nunc in angulo hoc haereo, ubi quatuor hominibus, eruditis fane & amantissimis mei, eorumque non instructissimis bibliothecis immensarum illarum opum ac deliciarum jacturam consolor : nam ne meos quidem libellos, quos mecum abstuleram, & partim in Anglia comparaveram, recisae nostrae sarcinae capere potuerunt. Enecas me nuntio titubantis tuae valitudinis, quam ut restituat firmetque in longam aetatem ille δῶτορ ἐών ex animo precor. Tu quoque ne obsis tibi nimis vigiliis & sollicitudinibus, quantum potes, cave. Gaudeo serio in Nasone te pergere. Ne dubita, si salvi redierimus in Belgium, nos aliquid tenue ad excellentem tuam operam contributuros. Elenchum meum imperfectum Lutetiae relinquere coactus sum. Quid eo fiat, ipse cum ignarissimo scio : nec dum enim literas inde ullas accepi, etsi bis terve eo dederim. Hoc quoque est in molestiis meis, quod illae male curantur. Nam de amicorum constantia nihil vereor. *Boxhornio* nostro novo marito gratulor, & ut gaudiis suis sine querela diutissime fruatur opto. Nos hinc in Aprilem manebimus : ver & bonam partem aestatis, vel totam, circumeundo nobiliores provincias & loca exigemus : Hibernabimus forte Parisiis, quod nisi fiet, ego constitui, postquam reduxero cum Bono Deo comites, recurrere Lutetiam, & integrum ibi annum quietus morari. Id si placebit τῷ κρείττονι, puto vitae meae omni secururae, si qua restat, profuturum. Vellem alia tecum, sed instat hora tabellarii. Opto omnia secunda maximo & divino Parenti, optimis amitae ac sorori, tibi denique & omnibus vestris. Cura ut valeas, si me saluum vis. Juliomagi Andium a. d. prid. Non. Febr. Anno MDCCXL.

EPISTOLA. LXXX.

J. F. R. GRONOVIIUS

*Nic. Heinsio.**Leidam.*

Cognosce infelicitatem meam, charissimum pectus; duos integros menses & quod excurrit, hac in urbe posui, antequam ullae Parisiensium amicorum literae (via veredariis tridui est) ad me venirent. ¹ Heri tandem redditus mihi est fasciculus, quintam jam hebdomadem hinc delitescens, unde primum cognovi Elenchum Antidiatribes absolutum, & gratius in eodem pignus, tuae, quas prid. Eid. Decembr. dederas. Cum expectare eas Lutetiae festinatio profectionis me prohiberet, egeram cum Ampliss. quodam & doctissimo viro, ut

¹ Curatus ille fasciculus per *Sarravium*. Vide ejus *Epist.* xvi. & xx. & xxiii. unde discis, quid ille de litibus inter *Salmasium* & *Heinsium* ad *Gronovium* retulerit, fere incredibilia.

ut resignaret eas, carmina eximeret, & *Iustello* responsum significaret. Id ubi factum est, tantum non ostiatim totam illae urbem permeant, certe nemo fuit elegantiorum, qui non legere eas, poematum exemplum fumere desiderarit. Plausus & admirationem maximam concitasse narrant mihi amici, & cum omnes ingenium tuum ac eximios profectus aestiment, tamen scito & genus & aetatem praecipue favorem tibi & εὐφροσύνας collegisse: Quod si quando, ut spero, ipse in Galliam excurreris, praesens id senties magis, quam ego promittere tibi possum: nullum humanitatis genus excogitari poterit, quod in te colendo omissuri sint. Mihi quidem nullus locus genialior Parisiis: ibi eruditio, ibi politiae, ibi candor & comitas habitant. Interim gratias tibi quoque pro mea parte ago maximas, quod promissa mea apud tam praestantes animas frustrari nolueris. Polliceor tibi, si me sospitem Deus vobis reddiderit, & te salvum complecti siverit, quod equidem ardentibus cum suspiriis opto & precor, gratum tibi apud me futurum beneficium tuum. Excruciat me vehementer pertinax valitudo tua. Ille δῶτορ ἐάων restituere velit tibi integras vires tuas, quaeque egregia in te contulit dona, non modo in maximi parentis solatium, qui in ingravescenti hac aetate tanto fulcro magnopere indiget, sed & reipubl. literariae causa ad maturitatem producere & longissime diurnare. Tu quoque, quantum potes, te ipsum subleva, nec aut studiis nimis aut curis macera infirmum corpusculum: caetera dies faciet. Haud ignoro in animo esse tuo (& qui potest aliter tam obsequens filius?) nec negant literae tuae, quae causam morbi adaugeant: quae quidem accidisse ipsa mihi morte acerbius est. Sed quando inani moerore aut indignatione nihil proficitur, cor autem ipsum adeditur, fraudare ad tempus ista cogitatione te ipsum melius ac tibi parcere, ut quibus in futurum usus erit, ea aliquando rectius providere possis. Ego quidem non cessabo meas preces cum tuis conjungere, ut eveniant omnia tibi vota tua, nec, quod abominor, tantam spem litteris fata tantum ostenderint. Fui occupatissimus hoo dies aliquantos. Constitui enim cum bono Deo finem imponere sollicitationibus cognatorum ad honores in jure accipiendos. Ei rei dies constitutus ante diem prid. Kal. Martias. Et nunc nescio quas nugas pro more hinc sub praelo habeo. Amice, quod apud te dicam, premit nunc me quamvis tenuis fama mea, & συστάται, quas ad primarios aliquot praestantesque hujus urbis & Academiae viros a Puteanis aliisque huc attuli, pene odio sunt. Nam illi cum multis officiis contenderint hanc mihi habitationem gratam reddere, falsa opinione imbuti aliquid eximium & supra vires a nobis expectant: quos ne plane frustratos habeam, admodum sollicita mihi cautio est. Et in tota hac peregrinatione, antequam huc veni, nullum apicem Juris inspexi. Sed confido divinae gratiae contentionem meam & studium optime mihi cessurum. Est hic vir ampliss. ex praetore hujus urbis. *Claudius Menar-*

Hic Claudius Menardus fuit Johannis Menardi fratris filius, frater Caroli. Vide Praefationem Cl. Graevii in Orationes Ciceronis, ubi notas Joh. Menardi in sex Orationes Ciceronis commendat. Hic Claudius Presbyter fuit, & Historiam Andegavensem scripsit, sed quam non pro-

nardus, qui ante hac aliquid Augustini ἀνέκδοτον primus luce donavit, jam senex, sed ob singularem humanitatem mihi conjunctissimus. Is omnia pene Ovidii opera MS. in membranis, quamquam recenti manu, habet. Si otium mihi erit, conferam, aut certe quantum potero: si non possim, indicio tamen hoc ferviet tibi. Maximi facit omnia scripta parentis tui, & cum maxime, quamvis addictior religioni suae & paullo etiam superstitiosius, summa cum voluptate, ut testatus est mihi, Exercitationes sacras a me commodatas legit. Fine Aprilis nos hinc castra movebimus: aestas tota discursando conteretur: si tam mature has accipies, ut responsum reddi posse mihi credas, unas adhuc a te expectabo. Saluto communes amicos officiosissime. Vale, dulcissimum caput. Deus te totamque domum tuam ab omni malo, tum corporis, tum animi servet. Scribe quaeso dum licet mihi adhuc tuas accipere. Ego morior, dum tu periclitaris. Iterum vale, Juliomagi Andium VIII. Kal. Mart. Anno CXCIX. Reliqueram pene mensem Ex. Sac. Salmurii, rogatus magnopere ab *Amiraldo* & *Cappello*, qui humanissimis litteris gratias mihi egerunt, & remittere invitos tam cito dolebant. Sed reposcebam, quoniam hic amici instabant. Vix praeter Corpus juris alium librum attuli. Sed illas ferre mecum suadebant recte Parisienses, quod magnam gratiam commodando monstrando istum thesaurum initurus essem, quia tarde ejusmodi libri in has urbes mittuntur. Nec falsus sum.

prodiisse dolet le Long Biblioth. Hist. de Franc. lib. IV. p. 767. qui & alios ejus libros recenset, ut ex indice videri potest. obiit Anno 1650. alium esse puto *Menardum*, qui Turonensis fuit, & in Geslium scripsisse, & Anthologiam Graecam vertisse, & auxisse, numismatum etiam magnam copiam reliquisse narratur in Ephemerid. Trevoltianis, Anni 1701. pag. 101. Ed. Amst. cujus praenomen cum omittant (id enim nobilius & honoratius censent hodierni Galli, & unde auctor Morerianae appendicis sine praenomine retulit in Lexicon) puto esse *Petrum Menardum*, qui vitam Martini edidit, teste Longio Bibl. Franc. p. 198. n. 4196. ubi vitio operarum *Menander* vocatur.

EPISTOLA LXXXI.

J. F. R. GRONOVIVS

*Nic. Heinsio.**Leidam.*

Gratissimae fuerunt mihi, Amicorum carissime, quas xv. Kal. Apr. dedegras. Sed respondere iis nunc, ut cuperem, non possum. Sextus jam dies est, cum me vetus meum invasit malum, acutissima & rara dolorum intervalla admittens cephalalgia, ex eo tempore fere κλινήρης fui, certe cubiculo pedem non extuli, nihil quicquam juvantis cibi aut potus sumsi, nihil omnino seriae rei aut egi aut meditari potui. Mitto tibi συλλογὴν aliam erratorum miseri opusculi mei hic impressam, missurus Lutetiam, ut per exemplaria, quae supersunt, distribuatur. Nam Parisiensis typographus vane promittendo in hunc diem me luferat. Est autem sine iis liber inutilis, ita discerptus & male ha-

bitus est. Placebunt tibi vel ob Valerii, qui egregie Senecam illustrat, locum (at nescio an ullum aliud ejus notionis exemplum in ea voce exstet) nec non Ovidii, quem non dubito reliquisse: *Tempus habent mystae sidera visa cibi*. Et pudet, quod rem tantulam non statim viderim. Simul convaluero, hinc discedemus, ut nesciam an adhuc unas a te exspectare possim. Videbo tamen, ut ipse adhuc semel scribam. Ingrediemur latum iter per omnes nobilis hujus regni provincias, quod quinto, credo, mense expeditum erit. Tum Parisiis, si Deo libuerit, reddemur. Interim si ullo modo quid ex incerto genio meo extorquere potero, quod non dico mereatur laudem, sed modo excusari queat, faxo id ad te aut Rupella, aut Burdigala, aut Massilia, ubi naves Belgicae reperiuntur, ocius veniat. Non potest enim major mihi haberi honos, quam ut inter plausores gloriae tuae adsciscar. Accepi non ita pridem ex Anglia literas, unde nuntiatur, Exercitationes Sacras Cantabrigiae denuo impressas esse in forma minori, & vendi quatuor plus minus florenis. Etiam renovat nobiliss. *Boswellus* spem Belgii revisendi, & Nasonis Juniani ad te ferendi. *Menardi* exemplar inspexi. Saepe de facultatibus suis amplius, quam in his est, sperant homines. Credi di ipsi omnia opera Poetae eo volumine contineri: non invenio praeter Metamorphosin, & a manu admodum recenti. Contuli tamen nonnulla, quamvis non sperem hic inveniri, quod tu non ex alio codice notaveris, & impressum non habeo praeter minutum Amsterodamensem. Lib. I. p. 13. *Viderat a patrio redeuntem Jupiter illam Flumine*. MS. *redeuntem Jupiter Iō Flumine*. P. 14. *Venit & ad patrias, ubi ludere saepe solebat Innachides ripas*. MS. *Venit & ad ripas, ubi*. repetitione suavissima. P. 31. *Tu quoque, care pater, nunc immortalis: non jam mortalis*. P. 33. *sub illis Montibus, inquit, eunt: & eunt sub in illis*. MS. *utrobique erant*. Scribendum: *Montibus, inquit, erunt, & erant sub*. Loquitur enim Battus ex conjectura, & aliquantulum processerant, ex quo eos viderat abigi. Lib. III. p. 39. *Tegmina mox capitum pictonutantia collo*. Ineptissima lectio, quam miror tam diu potuisse tolerari. MS. *picto nutantia cono*. Nam in cono cristae aut insignia galearum. Non dubito, quin haec ex aliis melioribus codicibus tu jam notaveris. Adjicere tamen ista volui, ut & mandato tuo satisfacerem, & curae mihi fuisse tuam curam ostenderem. Caeterum quod olim notavi in Diatribe: *fulvis haerentia truncis*: ut meus habet cod. id persuasus nunc sum verissimum esse, & varias, *virgis, lignis, linguis*, inde ortas, quod de vimine *truncum* dici immodica *καταχρήσει* putarent. Atqui habes locum Martialis, *opobalsama truncis*, de qua restitutione non possunt nisi fatui dubitare. Et de eodem opobalsamo scribit Justinus, arbusculas esse admodum humiles, *& in vinearum morem excoli*. Rursum habes de ture in loco Dosiadae & Herculis Furentis: *Sabaei trunci*. At meministi Virgilium dicere: *solis est turea virga Sabaeis*. Rursum de vite Servius in II. Georg. *Validis stirpibus, solidioribus palmitibus, id est truncis*. Vides quam absurdum non sit de virgae aut viminis stipite truncum dicere. Sed longior sum ac initio putaram. Et tamen uno spiritu continuare hanc epistolam non potui. Vehementer me affligit nuntius de magno, optimo, & publici egregii studiosissimo *Berneggero*. O vanas cogi-

cogitationes meas! Ego videre illum in hac peregrinatione non desperaveram, & finxeram praesumeramque voluptatem mihi ex alloquio tam nivei pectoris. Quis nunc restat, qui in Germania fugientes literas detineat? Sed ne stimulemus dolorem nostrum. Vale, προσφιλέστατε, & valetudinem tuam cura. Salveant humanissime communes amici. Andegavi a. d. vii. Kal. Maj. Anno CIOIOCXL.

EPISTOLA LXXXII.

J. FR. GRONOVIIUS

*Nic. Heinsio.**Leidam.*

Iter nostrum ultra spem meam tempestate pluvia, quae vias mirifice hîc ubique vastat, dilatum est. Interim cogitans te, charissimum pectus, cum omnium minime ad poetandum aptus essem, imperavi mihi ut canerem sed genio meo, qualibus ego vel Cluvienus. Tu videbis quanti sint. ¹ Habes descriptum ac amandatum ad te ea ipsa hora, qua ultimum distichon adjeci. Tibi libera potestas sit, quid eo facere velis. Ego si quid commodius alicubi dici posse videbitur, per alias tempori te monebo. Nec te impedio, quo minus duriuscula emollias. In postremo Pentametro vides quid velim. Et sensus satis est augustus: sed nebulones & imperiti possent alium inde effingere, quasi dicerem, te patris vitula arasse: quod nobis omnibusque, qui vos familiariter norunt, scis in mentem venire non posse. Si itaque mutari vis, suppone quod lubet. Mihi nunc subito nihil elegantius nascitur. Simul autem atque has acceperis rescribe, ut de eo & Elencho meo judicia vestra cognoscam, puto enim & hujus exemplaria vobis reddita. Vale, meum decus, & me ama. Salveat officiosissime tota domus vestra, & amici communes. Cave a solita tua cura quicquam in scribendo remittas. Amplas volo, de omnibus, quae me libenter nosse scis, utcunque ad singula tua non respondeam. De *Rutgersianis* in Gallia requirendis vix ulla spes reliqua: promittunt tamen Parisienses, se vestigaturos. Iterum vale, & valetudinem cura. Andegavi pridie ferias Pentecostes Anno CIOIOCXL.

¹ Inserta huic Epistolae erat Elegia ad Nic. Heinsium, cum Poëmata sua ederet, sed quia ea in *Adoptivorum carminum* lib. 1. pag. 35. Nic. Heinsii legi potest, hîc omittere visum est.

J. FR. GRONOVII

*Nic. Heinsio.**Leidam.*

NOli quaerere, mi Heinsi, si iudicium tuum de elegidio nostro melli mihi fuerit. Habeo hac in urbe amicos, viros ingenio & doctrina excellentes, quibuscum & de literis sermones ferere, & monstrare meos noscitareque invicem ab illis proditos istiusmodi muscos foetus jucunde soleo. Tis cum totum approbassem, & gratias etiam agerent, quod meam in ipsorum patria moram publice, ita, ut aiebant, consecrare voluissem, haec adensus sum, si tua quoque tabella, UTI ROGAS pronuntiaret. Cum enim negotium hic tuum verteretur, isque tuus sit candor & in me potestas, ut me ineptientem ac te ad eosdem ludos vocantem derisu liberare audeas, certus fui, ut sententiam tuam honestioribus conciperet verbis amicitia, non tamen posse falsis: hoc est, ut ultra pretium aequum aestimares quod aliquam tamen Venerem haberet, non laudaturum te tamen quod nullam. Gratiae genio tuo & amoris atque *ἡμετέρας*, quibus quod satisfacere potui, is vero talis nuntius suspenso atque anxio mihi, Quale sopor fessis in gramine. Nunquam gaudebo magis, feliciter aliquid conatus, cum tibi placendum est, nec ulla res ita curae mihi atque cordi, utpote in qua non solum ingenii aut quorumque profectuum meorum, sed etiam grati animi versetur experimentum. Quid enim est, quod tibi non debeam atque tuis, si ars mea efficere possit? Thesin noli desiderare. Tridui labor est in materia iussa, non selecta a nobis: nec liber fere ullus in promptu, praeter Corpus legum: itaque diximus de illa meo ordine & modo, quae alii suis, credo, millies. Scis enim ut haec talia scribantur, Actus fuit satis celebris in praesentia multorum ex magistratu Advocatorum, aliorumque honoratorum civium, & omnium fere peregrinorum. Raro istam pompam in Gallia nostrates, immo ipsi Galli, admittunt. Itaque manavit rumor per urbem, me cathedram professoriam ambire. Nam ut scias, non est hic mos vocare doctos viros ad Professionem, sed qui in urbe sunt, & fiduciam sui habent, vacante loco lectionibus disputationibusque inter se certant: digniorem eligit, & in collegam adsciscit Facultas. Venerunt adeo quidam ultro, qui mihi gratularentur de hoc incepto, hortarentur ac opes suas deferrent, constantiam etiam in religione tentarent. Ego ipsis gratias egi, & Promethaeis vinculis in patria alligatum me teneri, nec qui haec de fide non dubitarem, minime omnium venisse in mentem mihi, eam alicujus emolumenti aut honoris respectu mutare. Auditorium tantum me habuisse non ullius petitionis gratia, ne quidem ex destinato, sed per artem:

tem¹ *Sengeberi* ICTi, qui vir longe doctissimus & mihi intîmus, quia nescio quid magnum sibi de me promiserat, ostentatione popularis sui (Germanus enim est, & quidem Brunswicensis) gloriam sibi & nationi quaerebat. En fabulam affe dignam. Gaudeo ex animo valetudinem tuam esse confirmatam. Iter tuum sane mihi salivam movit propter pinacothecam V. CL. *Jo. Smithi*. Sed autor sim tibi, ut subinde motu aliquo tali ac mutatione amoena loci erigas atque exhilares animum; cujus fastidia atque taedia haud dubie languorem corporis intendunt, opportuniussque id causis reddunt. *Fabritius* noster, convicio ita postulantibus cognatis, in patriam rediit, postrid. Id. *Julias Rothomagi* navem conscendit recta *Hamburgum* ituram. Adolescentis *Vossii* ne nunc quidem sine lacrimis meminisse possum. Nos proximo die lunae constituimus, si Deo placet, iter aggredi. Varia ex transverso intervenientia nos hucusque tardarunt a duobus jam mensibus & ultra quotidie iturientes. Novembri mense spero me Parisios revisurum, & ibi tuas aliquas reperturum, forte & *τρίποδα* tua poemata. Vale, meum decus unicum, & me ama. Divinum Parentem tuum, amitam, sororem, & communes amicos caeteros saluto officiosissime. *Juliomagi Andium* XI. Kal. Septembr. Anno CIOIOCL.

¹ Hic est, qui contra *Salmasium* de mutuo scripsit; *Menagii* Praeceptor, qui in Menagianis suis ejus saepe meminit, unde *Morerius* & *Bayllius* Lexicon suum instruxerunt, sed nihil praeterea de ejus vita nos docuerunt, nisi quod hic, ut saepe solet, in locum communem, de lite adulterii, uxori a marito intentata, excurrat.

EPISTOLA LXXXIV.

J. FR. GRONOVIIUS

Nic. Heinsio.

Lidam.

Diu est, charissimum pectus, cum & scribere ad vos desi, & rerum vestrarum juxta cum Indicis aut Aethiopicis peritus vivo. Et vobis me excuset, oportet, & mihi tam aerumnosae ignorantiae patientiam dicter defultoriae hujus vitae ratio. Scis usuvenire iter, praesertim tam longo circuitu, facientibus, ut cum animus ad familiares illas *ομιλίας* vacet, loci temporisve deficiunt opportunitas, cum haec adsint abunde, animus vacuus non sit. Et quamvis providere ante ac destinatione figere liceat certas urbes, in quibus interjungamus, lassasque continuo motu vires reficiamus: tamen ista consilia ferre e re nata & sumuntur & mutantur, praecipue nobis, qui lunam ipsam vincimus. Parisiis exigere hiemem integram constitueraimus: vix incuntem exegimus. Andegavi duos aut tres menses decreveramus ponere: octo elapsi sunt. Massilia iter flectere per Arausionem & Genevam usque propositum erat: in Italiam transfretavimus. Mitto alia infinita, in quibus providentia nostra decexit, mihi que incussit pudorem, ut postea filere apud amicos mallet, quam

quam toties vanissimae levitatis culpam subire. Sed tu fortasse eventus meos cognoscere mavis. Paucis antequam Juliomago discederem diebus, missus ad me est Lutetia libellus, in quo frondator meus falce abjecta tenebat flabellum muscarium asinus tantus. Itaque etsi malus est, tamen miseret me peponis, nec posthac cerebrum ei amplius turbabo. Non dubito ad vos quoque statim pervenisse id quicquid est Elenchi. Engolismae *Balsacium*, Tholosae *Mausiacum* (quo venerat aegrotae matris causa: nam Mompelii habitat.) & *Possum* Jesuitam (qui Archiepiscopi bibliothecam humanissime obtulit mihi) Biterris *Joh. Croyum* salutavi. Ex Foxiensi, quae Tholosae est, quos volui libros, sine praede aut vade sumere potui: sed parum ibi restat exquisiti. Incredibilem ubique hominum doctorum & honoratorum civium in Gallia invenit comitatem, nec ulla terrarum est, quae studio in peregrinos ei debeat comparari. Florentiae *Galilaeum Galilaei*, *P. Victorium P.* pronepotem, aliosque ibi forte non cognitos, praestantes tamen viros, Pisis *Paganinum Gaudentium*, Romae incomparabilem nostrum *Holstenium*, *L. Allatium*, *Gab. Naudaeum*, *Janum Nicium*, Eudemiae auctorem, Bononiae *Fortunium Licetum*, Patavii *G. Scioppium*, *J. Rhodium*, hinc *Philippum Thomasinum* vidi, quibus multis nominibus devinctus maneo. Nam extra ordinem istum nominare debeo magnum Cardinalem *Franciscum*, de quo jactantius quaedam scribere possem, vera tamen, si id moris esset mei. Scito, mi Heinzi, hinc longe abundantiores esse, quam uspiam vidi, literarum thesauros, sed homines difficillimos, quos nisi longo tempore & magno usu delinire non possis. Ex uno disce omnes: Florentiae duobus libellis supplicibus magno Duci oblatis, postquam tres integras hebdomades ad primi Secretarii januam (non enim admissionem ad illos fraterculos gigantum petere licet, sed expectandum est, donec ipsi e thalamis statis horis procedant) quotidie mane ac vespere excubando, omne genus indignitatum pertulissem, non impetrare potui, ut in bibl. Medicaea ad D. Laurentii aedem scribere mihi aut notare liceret. Pro magno beneficio datum est, ut legere in ea possem, cum Clerico clavigero vacaret. At olim publice patuit cuivis. Nisi ego artificio quodam & Philippi Macedonis ἐλεπόλει (nosti dictum ejus de asino onusto) mihi subvenissem, tantis opibus Tantalus interfuissem. Romae Farnesianae celeberrimae quondam aditus muro obleptus est, ne cuiquam ejus usus concedatur. Aliae durissimas semper, & adversas praecipue festinantibus habent leges. Non tamen omnino vacuis manibus redimus: adeo improbitas laboris mei omnes difficultates vicit. Si mihi biennium his in oris meo arbitrio esse liceret, affirmo tibi, multorum magnorum in literis virorum copiis nullus inviderem. Sed pipulo flagitamur ab Amstelodamensibus, ab nostris Hamburgensibus. Misit ad me Romam *Ludovicus de Gere* unas ad se Theologi vestratis ἔπινυ *Constantini*, quibus hic, quia ἀτομόν τι mei nominis ad nescio quam cathedram commendatum esset, quaecebat ex illo, ὡς, πότεν; ubique nunc, & quando rediturus esset iste *Gronovius*. Cognovi postea

idem

I Emer. Cruceus qui sub titulo *Muscarii* edidit libellum contra Gronovii Diatriben Statimam.

idem ex *Christenii* literis, quae tamen ad anteriorum quorundam non redditorum mihi, ut cum Fulgentio loquar, continentiam digitum modo intendebant. Difficile foret mihi de tam bona fortuna nondum cognita discernere, nisi praefixum esset in illis tempus, quo me in Batavia esse oporteret. Quoniam vero tum maxime reginam urbium relinquere non possem, adhaec comiter meos non deferere certum sit, & hanc peregrinationem quanto possum bellissimo *κύκλω* absolvere, praetereaque reduci patria optimaque mater sit invisenda, quibus jam dimidium Vlyssaei erroris tempus careo: malui gratias agere humanissimis viris fautoribus meis, quam expectationem eorum longa mora frustrari. Id quod *Christenio* respondi, & per occasionem a te Cl. ¹ *Imperatorii* cum salutatione officiosa referri velim. Hic ad festum Ascensionis forte manebimus, ut solennem illam maris desponsationem spectemus. Postea Galliam repetentes urgebimus iter, ut eo citius ad vos revertamur. *Casauboni* epistolae decimo fere, postquam veneram Romam, die pittacio publice ad statuum Pasquini affixo, inter prohibitos libros sunt relatae. Multa habeo garrienda tecum, sed explicare multitudinem ad eligendum non possum. Praecipuum est, quod te optem valere, *καὶ αἰὲν ἀριστεῖν*. Commune: amicos in primis domesticos tibi, & maximum Patrem salvere plurimum jubeo. Iterum Vale. Postrid. Eid. Apriles Anno *MDCCXLI*. Venetiis.

¹ *Constantino l'Empereur*, hoc tempore Linguae Hebraeae, & deinde etiam Theologiae Professori. *Imperatorem* cum etiam vocat *Sarrav.* Ep. xvi. & purum putum mancipium *Heinsii*, quia ei prae *Salmasio* favebat. Intelligit hic Gronovius Daventriensem Professionem, sibi Romae agenti oblatam, quam recusavit tunc; sed cum post octo menses reverso in Hollandiam iterum obtulissent, manus dedit *Gronovius*: ut scribit ad *Richterum* in Epistol. p. 244. & causas, cur acceperit, addit.

EPISTOLA LXXXV.

J. F. R. GRONOVII

Nic. Heinsio.

Cui ego citius reditum in has terras nuntiem quam tibi, carissimum caput? qui absentis mei tantam gessisti curam? cui ego, quoad licuit, omnem itineris mei fortunam secundum singulos pene ejus articulos notam reddere studui. Scito igitur in hac me urbe esse, & restare nihil ad explicandum totum ordinem nostrae peregrinationis hujus, quam ut Amsterodamum depositum reddam. Id quod cras *σὺν Θεῷ εἰπεῖν* fiet. Lutetiae mihi *Isaacus Vossius* de tua in Angliam peregrinatione & studiis laetissima nuntiavit. Ea causa fuit, ut licet binis tuis ibi inventis, sed *ἑώλοις* & annotinis nihil responderem: praeter quod ita me illic districtum sensi, ut omnia promissa, quae tot praestantibus viris, quibuscum per iter amicitiam iniveram, de literis inde scribendis feceram, occupationum copia retentus fallerem; differremque in igna-

Tom. III.

N

vissimum

vissimum illud tempus, quod bimestre partim Rothomagi, partim in portu Gratiæ, ut vocant, expectandis classiariis summo cum taedio exegi. Interea Cadomum paucis diebus excurri, fallendæ moræ causa. Ibi ex Selando quodam te salvum sospitemque ad patrios lares rediisse didici: atque hæc fiducia meae scriptionis. Ego Amsterodami, credo, ex literis Hamburgensium meorum cognoscam, quæ mihi in posterum vita instituenda sit. Simul atque autem reglutinare me ab iis potero, quibus jam triennium mediocri cum voluptate, summa interdum cum molestia, compactus & ferruminatus hæsi, ad vos excurram, & dulcissimum os tuum suaviabor. Interim salve, & meo nomine maximo parenti, totique domui vestrae, & amicis communibus officiosissimam salutem dicito. Harlemi a. d. vii. Kal. Febr. Anno MDCCXLII.

EPISTOLA LXXXVI.

J. F. R. GRONOVIIUS

*Nic. Heinio.**Leidam.*

Nobilissime & præstantissime juvenum. Gravem apud te noxam commerui tam inficeto silentio, non diffiteor: sed nisi ingens mihi fuisset fiducia, & tui adfectus & meae integritatis, nunquam in hoc peccatum incidissem. Malo igitur illas allegare mihi ad te deprecatrices, quam speciosum occupationum prætextum obtendere. Fuerunt sane & hæc a principio: & qui non fuerint, ut de aliis externis taceam, post seculum, non enim triennium, ad libellos reverso? sed & sæpe implicitum tenuit ingenua pigritia, quæ aegre primum & ex lassitudine admissa, postquam se placere sensit, altius supercilium fustulit, nec nisi delibato etiam multo laboris tempore recedere voluit. Hoc argumento sit tibi, quantopere me locus hic capiat, ubi ita solitarius sum, ut sæpe ne muscae adsint quidem: ita immotus, & non dico compositus, sed depositus, ut si adesent illæ, comedere me potuissent citius, quam Octavium ex dolore artuum unguentis delibutum, hunc enim ipse ille intestinus monitor aliquando movisset & excitasset. Addiscebam igitur aliquantisper, quantum habeat *ἐλευσικὴ ἡ ἀπραξία*, quæ sit Minerviae Coronidis sapientia, cum sola in sicca secum: quamque vitam faciat beatiorem quietis dogma, si cantus lusciniis & ranis convitia non invideamus ipsi silentes, nisi quando ridere liberet. Habes totum mysterium silentii mei per lectiones prolatas: neque enim in Eleusiniis *λαμπαδοῦχος* cucurri, nec cum Amyclis me ivi perditum, minime autem omnium *ὑπὲρ Μαλέας* navigavi, ut præteritorum obliviscerer. viii. tamen Kal. Apriles nisi verba in promptu fuissent, nequiter hæc disciplina nobis expetiisset. Tum primum publice auditus sum conventu celeberrimo multorum illustrium, & reverendorum, & cujusvis generis hominum. Erant enim Comitium Ordinum provinciae hujus, & rogaverant me Cures noster, ut ad illos

illos dies paratus esse vellem: Quid quaeris? fortunam narro, non meritum. Euge, & belle & feliciter, omnes a maximo ad minimum. Dices, eundem esse omnium hodie finem, qui ut semel accepti, quomodocunque dicant, probantur? Assentior tibi, & proinde minus glorior, nec permoveri adhuc potui, ut volentibus & in aëre evanescentibus sonis vitam typicam, sive mavis χαλκότυπον darem, mutosque illos publicandae chartae illigari paterer. At vero si aliquandiu avide me sopore & desidia ingurgitavi, cogitans illud, *brevis est hic fructus homullis, jam fuerit*: nunc dicere possum, *Jam fuit, & longum post non revocare licebit*, utique postquam interfectae sunt & animam exhalant feriae nostrae, non minus quam occisa fus. Auriculas igitur demitto, ut clitellis asinus impar, & commeo quotidie ex hortulis meis (nam & habito in hortis) ad Peripatum, sub ala fasciculum portans librorum, ut rusticus agnum, & ibi frequentibus, aut infrequentibus, sed satis adhuc frequentibus, declamo. Sed fortassis ego hilari injuriis meis, commodis tristi fortunam utramque narro, quandoquidem in fatis erat, non citius me scribere, quam otia illa & somniculosi dies nobis periissent. Nunc, enimvero, Dave, nihil loci est segnitiae neque socordiae. In duplici professione quinque recitationes publicae, privatae plures (miraris, & nihil mentior) singulis hebdomadibus faciundae: quia pauci sumus, nemini cessare licet: statim enim oculis digitisque denotaremur omnium. Jam ego id quoque habeo vitii, ut nihil possim agere perfunctorie aut obiter, nec aut meae facultati ad expedienda subita, aut facilitati ἢ εὐηθείᾳ auditorum confidam. Itaque saepe in iis fatigor, in quibus minime erat opus, & ea, quae justius curarem, omittere cogor. Quo in genere censeas licet hoc literarium officium: nam si ego cuiquam amicorum sive in Belgio, sive alibi, dum hinc desedi, diligentior fui, excusari nolo tibi: sed profecto quod ingenti meo cum moerore fateor, satisfeci nemini, qui hinc ita deripior, ut vacare alii cogitationi nequeam. Hanc ipsam, quam cum maxime ad te destino, bis in alia charta coeptam interpellatus destitui, & nisi intervenissent hae intercalares feriae Pentecostes, dubito utrum imperare potuerim mihi, ut ἐγκυκλίῳ illis ad caput & circa latus salientibus tantisper ludum darem. Unum rogo, ne sinisterius interpretere, quod videlicet in itinere Hagienſi ad vos non devorterim. Scito autem omnino constitutum id mihi fuisse, cum eo pergerem, ut in reditu aliquot dies collocarem vobis. At ego, qui Hagam feriatum ire me putabam, insperatum ibi opus inveni: cui perdius pernox eo usque inhaesi, donec vix tantum restaret spatii, ut iter festinus absolvere possem ad eum diem, quo huc me rediisse oportebat. Dederam enim fidem nonnullis, me interfuturum secundae Coenae celebrationi; eam solverè eo impensius laborabam, quod hinc rumor manaverat, ab agyrta, cui successi, sparsus, sentire me cum Lutheranis. De Hagienſi

N 2

autem

1 Martino Schoockio: illi enim successit. Vid. Revii Histor. Daventriae lib. vi. pag. 712. ubi & vitam Gronovii ex ipsius schedis exhibet ad tempus illud usque, quo Professionem Historiarum & Eloquentiae est auspicatus. Hunc Schoockium eleganter describit Is. Vossius in Epistola ad salmasium

autem opere, nescio an inaudieris, & credo fere: inveni apud illust. V. *Cornelium Hagum* fragmentum *Alexiados Commenae* meae luculentum, translatum in vulgarem Graecam, qualis erat paullo ante captam ab Turcis Constantino-
polim. Primum quidem ingens verborum diversitas in paribus sententiis valde me turbabat: mox tota phrasis & plurimae voces, ut *άλογα* pro jumentis, *άρματα* *θέντες* pro armatis, *όπλισμένοις*, *κατοννοτόπιον* pro castris: seu pellibus *σκηνώσεος*, *έκατοννέυσαν* pro *έσκήνησαν*, item *σράται*, *καβαλλαεικόν*, *καβαλλικεύειν*, *κουρσεύειν* *άντι* τοῦ *λησεύειν*, ut Itali *andar in corso*, Galli *courir le pais*, similiaque id quod res erat, suspicari me fecerunt. Mea enim plane *άττικίζει*. Descripsi igitur totum, & doleo integrum non esse. Ab eo autem tempore vix in manibus habui. Tu quid agas, quid alii vestri heroes, quid de literis aliunde audias scire haveo. De sororis partu jam Hagae me intellexisse puto, si bene memini. Id ego gaudium tum Avo, tum parenti utrique, tibi quoque ex animo gratulor, utque perpetuum sit, toto corde Deum precor. Rogo meo nomine quam officiosissime omnes salutes, ut & τὸ πᾶν *Boxhornium* cum uxore. Vale, charissimum caput, & me ama. Daventriae a. d. iiii. Jun. Anno Dionys. ciciocxlii.

masium cclx. inter Gudianas. quod est impudentissima bestia, qui Canina sua mordacitate invisus *Ultractinis* migravit in *Daventriensem* *Academiam* (*Gymnasium* potius) ut ibi apud alios canes eloquentiam illam & maledicentiam liberius excorceret, mirum, addit, non esse ibi sustes iis com-
pescendis. Plura possem de hoc cive meo, sed parum ad ejus laudem, adtexere: quare potius ad vitam a se ipso conscriptam remittimus, & proditam *Revio Histor. Davent. lib. vi.* p. 710. & quae de eo leguntur in vitis *Professorum Groningensium* pag. 133.

EPISTOLA LXXXVII.

J. F. R. GRONOVIIUS

Nic. Heinso.

Leidam.

V Ideo, mi Heinfi, mirifice dolere tibi, quod si quid est penes me excerptorum Ovidianorum, id non statim ad te miserim. Hinc tot aculei per totas literas: & possem forte τὸ δὴ τὸ λεγόμενον πρὸς Κρήτα κρητίζειν, sed non vacat, & habeatis, per me licet, *εὐτραπέλας* gloriam, qui cathedris adfidere, & choreas ducere, & sciti convivatores esse gloriamini. Simpliciter igitur & breviter tecum agam. Quae promisi tibi, ea constitueram ex schedis meis descripta ad te mittere, quod facile tantum otii hîc mihi futurum esse persuade-
rem. Id quia secus accidit, nec dum habes tu illa, nec tamen de habendis desperare debueras. Quamquam potuissim ego aequè amare mea ad Ovidium excerpta, ac tu tua ad Statium, quae scienti jam olim in scriniis tuis esse, tam diligenter (non enim dicam tam callide & vafre) habere te ulla dissimulasti. Sed non ego illa ambio: gaudeas solus: & quae inde nos docebis, libenter

benter nomini tuo inscribam. Quia autem ne meorum quidem propter occupationes studiorum privatorum curam gerere mihi liceret, te dilatum queri non debebas. Nam ipsas schedas meas alii, quam mihi ipsi committere, non audeo: quod sint plurima ibi, quorum nemo debet esse praeter auctorem iudex. Scin quid mihi fecerit candidus ille ¹ *Argentoratensis*. Fidem meam sigillavit publice ex illis ipsis variis lectionibus, quas *Scragio* describendas dederam: ibidemque meo beneficio habere illas se dicit, ut tanto major esset fides falsi me appellanti. Et me quidem, fateor, memoria deceperat: quod si verbulo addidisset, non offenderer reprehensione. Nunc satis est ipsi dicere, excerpta, quibus fident *Gronovius*, confirmare contrarium. De te quidem hoc non metuo: sed nec de illo metuebam. Cl. *Boxhornii* Commentarium in *Agricolam* editum fuisse, antequam ex chartulis illis, quibus rerum novarum rumores colliguntur, ubi nescio quomodo ille quoque herba parietaria factus, & contra ² *Dalogistum* pro eo commentario aliquid scripsisse narrabatur, & post ex tuis discerem plane ignoravi. De *Dialogisto* illo quoque nihil inaudiveram: etsi libellus est famosus, ut tu loqueris, miror cur & amicissimum mihi vos putaretis: neque enim ego amicos habeo libellorum famosorum auctores, sed honestos viros. Itaque minus curo, mihine parcat an non: & si illud dixit, quod narras, fane perfacile est ipsi respondere. Feriae apud nos non erant, cum tuas accipiebam: & post duas demum hebdomades incipient. Per eas caram ego patriam revisere constitui: itaque si quid vis *Vincentio* nostro, aut cuiquam alii illic locorum, manda parato exsequi. Si id tempus in museo exigere liceret, potuissim forte lucubratiunculam inceptam saepe, & millies interruptam ad umbilicum adducere: nunc longam advocationem petere oportet. Novi habemus nihil: quia enim a scribendo cessamus nec literas accipimus. Est hic vir probus, ludi magister, qui magno labore Indicem omnium vocum *Ovidii* parat: nondum vidi: ajunt tamen jam aliquot annos in ea opera desudare. Commentarium in *Ibin* hac ipsa denique hebdomade cum aliorum librorum fasciculo e *Gallia* acceptum hic habes. Ejus auctor magna dignitate apud suos fungitur, de opere tu judicabis. Vale, mi *Heinsi*, & me ama. Illustri Domino Parenti, Amplissimo affini, faecundaeque (quod ex animo vobis gratulor) forori, Cl. *Boxhornio*, salutem officiosissimam adscribo. *Daventriae* Kal. Septembr. stilo vestrate. Anno. *CICIDCXLII*.

¹ *Freinshemium* intelligi patet ex Epist. 101. & ex Praefatione *Freinshemii* ad *Joach. Vico-*
fortium, ante commentarium in *Curtium*, ubi varias lectiones ex *Gruterianis* codicibus enotatas
Cl. *Gronovium* & *Scragium* sibi submisisse fatetur: in praefatione ad varias lectiones, omissa
Gronovii mentione, omnia accepta refert *Scragio*, ut & passim in ipsis variis lectionibus.

² Quem *Dialogum* intelligat nescio. sed *Heinsius* suspicatus *Salmasium* auctorem fuisse, hinc
& seq. ex Epistolis liquet. Ad *Sarravium* hanc suspicionem detulit *Gronovius*, qui etiam tan-
gebatur. Sed amovet hanc opinionem *Sarravius* Epist. XLIX. unde & apparet in *Boxhornium*
fuisse scriptum.

EPISTOLA LXXXVIII.

J. FR. GRONOVIIUS

Nic. Heinsio.

Leidam.

Nobilissime & eruditissime juvenum. Serius accepi tuas, nempe post reditum. Itaque quas adjunxeras ad *Fabritium*, tradere non potui: misissem jam, nisi reversum ante decem dies ingens occupationem moles pene obruisset (dudum enim exierant feriae) sic ut ne cognatis, nisi nudius tertius scribere potuerim, & tamen occasionem perdidit. Jam enim discesserat tabellarius. Mittam proxime. De Claudiano, testor fidem & fateor ingenue culpam, eram oblitus. Sed quod amicus ille scripsit, se cum commisisse mihi, ut tibi traderem, tu audacter rescribe, facere cum, quod solet nimis saepe, quodque tu eum fecisse ais, cum mihi opplevit aures de collationibus tuis Statianis, hoc est, quod non audeo dicere. Merae suae negligentiae debet, quod apud me cum reliquit. Nam cum reposcere deberet eum, & litteras, quas ad me scriptas *Sarravius* ipsi commiserat, mihi tradere, non rediit, & nec litteras reddidit, nec de Claudiano verbulo me monuit. Id nunc imputat pro beneficio tibi. Sed non eum me invidisse tibi vel inde argumentabere, quod nunc mitto inexcussum. ¹ *Quas Parthaoniae* admiror & exosculor: nihil divinius. De caetero amo te, atque amabo aestimaboque quamdiu vixero. Dicerem id me debere beneficiis, quae ab Amplissimo Parente tuo accepta teneo, idque adeo fateor animo lubentissimo, immo jacto & glorior: sed peculiaris tibi est adfectus meus ob insitas dotes, quarum, Deum ex animo precor, ut largissimus fructus ad literas & posteritatem veniat. Iter satis faustum felixque fuit, *τῷ καίττονι χάρις*. *Lindenbrogius* parentem tuum humanissime salutat, atque ipsum teque omnesque vestros optimus *Fabricius*, qui valet & bene agit. Donavit mihi luculentissimum poemata & *Fabritianum*, scriptum in auspiciis anni praeteriti Legato Gallico, ² *Claudio Memmio*, Comiti d'Avaux, Henrici fratri, quod, si libido est videndi, ad te mittam. Atque utinam vel inscio ipso posset apud vos edi. Est enim dignissimum auctore. Ego quoque meos reperi salvos fospitesque, & si induci potuissem, ut Belgarum obliviscerem, crede mihi satis laetae paratae erant conditiones. Sed me jam Daventria duplici poene vindicat pignore. Audeon' apud te promere arcanas spes meas? audeon' petere, ut tu *Boxhornius*que vos paretis ad accinendum propediem mihi epithalamium? Certe audeo, & ut spero, impetrabo. Puella est xxii. annorum, non deformis, bene nata, optimae indolis, optimis moribus, dote, ut in his locis, satis laeta, patrima, matrima, homines honestissimi parentes, qui mihi

con-

¹ Apud Ovid. viii. Metam. 541.² Legitur haec sirena inter ejus Poëmata pag. 744. Edit. ultimae.

contra potentes rivales favere, quantum colligere valeo, potuerunt. Fratrem ejus cognovisti forte: nam ante triennium ibi juri studuit, & nunc in Galliis peregrinatur. Volo tamen rem habeatis secretam, usque dum perfecta fuerit. Omnia certe auguria bona sunt, & confido τῷ δοτῆρι εἰών, studiis meis vitaeque hoc inceptum utile futurum. Dialogistam nondum vidi, etsi petierim Amsterodamo: vide an tua opera fieri id possit, & habeo, ni fallor, adhuc rationis aliquid cum Elzeviriiis, qui hoc debitum reliquo meo facile adscribent. Literis nostris secretioribus parum fuit hactenus otii. Paratos tamen habeo tres novos observationum libros, in quibus nonnulla, credo, probabis: certe diligentius scripti sunt & uberius ac priores. Sed quis edet? nam hîc fieri id nequit, & nescio, si excurrerò Amsterodamum, an inventurus sum, qui sumptum facere velit. Canam ergo mihi meisque musis. Si ista res, quam dixi, ut spero, confecta fuerit, rogabo ut aliquando ad nos invisas & hospitio meo utare. Tum nihil in scriniis nostris absconditum erit tibi. Interim salve cum Parente maximo, amplissimo adfinē, amita & sorore castissimis, & me ut beneficiarium vestrum porro amate. Scripsi Daventriae III. Id. Decemb. Anno C. CIOIOCXLI. Salveat plurimum Cl. amicissimusque *Boxhornius*. *Scribe-rius* quid rerum agit? Eum quoque per occasionem saluta velim. πει γάρ τις tene quaeso in sinu, & exspecta meas proximas. Immo fatere licet, res enim convenit & certa est, quantum potest confirmari in rebus humanis. Nomen est sponsae *Adelheidæ Tennuliae*.

EPISTOLA LXXXIX.

J. F R. G R O N O V I U S

*Nic. Heinsio.**Leidam.*

MI Heinsii. Post reditum statim unas ad te dedi. Claudianum ab Isaaco collatum misi. Epithalamium teque & Cl. *Boxhornium* per te, si ocium esset, rogavi. Tu non respondes. Puellae nomen est *Adelheidæ Tennuyl*. Ipsam si nosse cupis, docebit te omnia de ipsa & parentibus uxor Couranterii, quae aliquot annos in aedibus ipsorum servivit, & inde, ni fallor, nupta est. Nostrae nuptiae celebrabuntur σὺν θεῷ εἰπεῖν xxv. Januarii stilo vestrate. Vides quam parum temporis restet. Atque utinam tu interesse posses, & alii ex Hollandia amici. Certe invito te, tu vide quid possis. Certe vota tua spero nobis praesto fore. Vale, & me ama, tuosque & alios amicos saluta. Daventriae III. Non. Jan. Anno C. CIOIOCXLI. quem felicissime vobis decurrere opto.

EPISTOLA XC.

NIC. HEINSIUS

*J. Fr. Gronovio.**Daventriam.*

Non expectaram, Vir Clarissime, ut post prolixissimas, quas nuper ad te dedi, meas, silentii me accusares: quae quod redditae tibi non sunt, non video quomodo mihi imputari possit, cum eâ illas ad te destinarem via, quam ipse mihi praescripseras: conveniendus itaque tabellarius Daventriensis. Facilis quidem earum jactura est, nisi quod Orationem Boxhornianam & Dialogistae libellum haberent adjunctum, quo certe nomine periisse eas nolim. Epithalamium quod hactenus non misi, tua potius, quam mea culpa est. In penultimis enim tuis ita de conjugio tuo mecum agebas, tanquam de re incerta, & quam silentio meo committebas, donec alias a te acciperem, quae totius rei certiore me facerent. Haec securum me reddiderunt de Epithalamio, donec aliae istae emergerent, quarum loco breviculae tuae tandem apparuerunt expostulatrices illae. Vides nunc immerito te mihi irasci? Epithalamium meum & Boxhornianum hîc habes. Ac de me quidem ut agam, merito culpam deprecari deberem, qui carmen tibi mittam tam ineptum, nisi pro excusatione esset summa festinatio. Dies vix tres amico dedisti, quo tempore tum aliis rebus, tum amicorum interpellationibus adeo districtus fui, ut vix horas tres meas habuerim. Tu, emendanda si quae erunt, ut certe erunt plurima, ipse corriges, quo nomine devinctissimum me tibi habebis. Pro invitatione multum tibi debeo. Sed tempestas anni non videtur ferre, ut ad vos excurram, quod nec ipse nescis, quo facilius excusationi locus erit. Vale, meum decus, scribebam raptim, ipsa ea, qua carmen meum absolvi, hora, die XIX. Januar. Anno CIOIOCXLIH.

Cl. Boxhornio ante dies pauculos puella scitissima nata est.

¹ *Heinsii* legitur inter ejus Juvenilia lib. II, pag. 282. *Boxhornii* Epigramma legitur inter ejus Poëmata p. 72.

EPISTOLA XCI.

J. FR. GRONOVIIUS

*Nic. Heinsio.**Leidam.*

Nobilissime & eruditissime juvenum. Ecce relapsus sum in veterem culpam, quam si non condonas huic tempori, quo (post quantos aestus) semel

mel cum votis omnibus decidi, & fluctuans vita mea aliquem statum accepit, hoc solo miser sum: Caetera, τῷ κρείττονι χάρις, satis ferenda, nec aliud oro, quam ut haec nobis perpetuet. Dum tamen huc conor, quid ego narrem tibi damna temporis, conventus, pervigilia, discursationes, comessationes, quibus tam patienter unquam indulturum me vel jurato non credidissem vati: sed ita est, τοῖος νόστος ἀνθρώποις, οἷον ἐπ' ἡμᾶς ἄγχι πατρὸς ἀνδρῶν τε θεῶν τε. Jam aliquot sunt menses, quod tribus in domiciliis diverfor: vescor & cubo aliquandiu apud focerum, libris in veteri conducto adsum, tertias aedes habitationi praeparo. Nec in tanta jactatione intermissio ordinariorum laborum, nisi ad pauculos dies, quia longe ultra concessam vacationem iter processerat. Haud miraberis igitur, si serius grates scribo tibi pro diserta & subtili epistola, utrique & pro Boxhorniano munere, cui tuum est adnexum, & pro officio, quo nuptias meas celebravistis, omnium gratissimo. Statim autem atque respiravi paullulum, aggredior, non quidem paria facere vobiscum de singulis (non valeo enim) sed tantummodo adfectum meum prodere. Quos narras praestantium virorum obitus, sane tristissimi sunt visi mihi, quippe perpetua vita dignissimorum. Aequius fero tamen, cum video illos debitum naturae persolvisse eo tempore, quo tam serio, nonnulli etiam tam docte facundique lugerentur. Quod sine dubio ipsis quoque extremam necessitatem levio-rem reddidit, gnaris relinquere se memoriam in exemplum ituram, non ipsorum modo merito, sed & cura superstitum. Etiam bene de seculo auguror, cum qui tam bene hanc cladem intelligunt, ipsorum in locum successuros mihi pollicear. In omnibus autem scriptis vestris genium & elegantiam admiror, in istiusmodi vero magis commendo pietatem. De tuo in primis luculento ¹ epicedio non iudicium poscere debebas, sed laudationem: adeo apparent ibi heroici spiritus, nitidissimus sermo, numeri sonori, sensus lugubres & convenientes materiae, eruditio rara, & ex secretissimis petita antiquorum thesauris. Ne livor quidem in eo, quod carpat, inveniat; nedum ego, qui tanto cum praepudicio ad legenda tua accedere soleo. Vide tamen περιεργίαν & temeritatem meam: unum illud, *Contudit afflatu*, fateri ausim displicuisse mihi. Habeo quo defendas: nam *adflatus* ille tempestati potest adsimulari, sternenti, evertenti, comminuenti: tamen aliud verbum malo. De *Walliano* adsentior omnino tibi. Atque ego ne nomen haecenus auctoris infelix audiveram: eo magis plausi primo ausu totam rapienti famam. Laetum fuit cognoscere typographorum Anglorum diligentiam: sed apud vos, an omnes inter-

¹ Est Epicedion in Curatorem Academiae *Mylum*, quod legitur post Orationem Boxhornii in ejus excessum, & ibi leguntur illa verba

Rursusne profano

Contudit afflatu Cyrrhaea cacumina Python?

Vid. inf. Epist. 95. ubi *Heinsius* se obrectatores nactus esse scribit. non reperi vero inter edita Heinsii Poëmata; longum satis est, & Hexametris versibus contextum. *Hadriani vander Walle* Delphensis etiam legitur *Venus lugens* ibidem.

terquiescunt? Epigrammata in ¹ *Gornaeam* dubitare non potes quin expectem. Epithalamium accepi ipso nuptiarum die hora illa pomeridiana, qua commodum post sacra celebrata ex templo cum nupta redibam. Illico tamen ad typographum misi, & inter coenandum nocte jam concubia (non enim hîc valde festinae operae) correxi. Legerunt igitur a tua manu Curatores nostri, aliique hospites eruditi, & omnes magnopere probarunt: nec postero die, si ve repotiis dicere mavis, prius limen intrarunt, quam quisque sibi exemplum poposcit. Tum quoque unus, Consul hujus urbis, qui proximus adfidebat sponsae, totum est ei & uxori suae interpretatus, adjungens pridie id se facere non ausum, ne scilicet illa inepte timeret. Tulit etiam Boxhornianum plausus. Ego utrique vestrum gratias ago infinitas, quod amores laetissimos & mihi reddideritis commendatiores, & memoriam eorum tradideritis posteritati. Gratulor ex animo auctam domum Cl. *Boxhornio*, & hunc nuntium pro laetissimo omine pignorer accipioque oblatum consensuro torum nuptialem. Dialogum percurri: nec dum remitto tamen, quia excerpam, quod de loco in Diatriba tentato. De auctore, nondum manus do tibi. Agnosco curam in stilo, quae non est in scriptis illius, quem designas: est enim hac parte negligens admodum: deinde tot futes & fatuas explicationes ab eo profectas in tam paucis paginis nullis persuasionibus adduci possum ut credam. Non est una, quae illum sapiat: & ego ut hominem esse scio, & errare posse, ita tam inepte & continenter errare nuspian animadverti. Quamvis sciam non cujusvis esse, etiam caetera κριτικώτατε, Tacitum si ve corrigere si ve interpretari. Vale, meum decus, & bene rem gere. Daventriae. a. d. ix. Kal. Mart. Anno cīcīōcxlīī. stilo nostrate.

Jam quot dies hae literae penes me scriptae jacent, & incassum expectant hominem, qui Leidam iturum se dixerat. Quia video morari, ego te amplius nolo. Interea Livio coepi operam dare: & ne tempus illud tibi sit fraudi, hoc pendam interusurium, ut nonnullas διορθώσεις faciā judicii tui. Lib. i. pag. 30. cd. Elz. *ea pietate omnium pectora inbuerat, ut fides ac jusjurandum, proximo legum ac poenarum metu, civitatem regerent.* Haec scriptio vett. libb. Alii ediderunt, *propulso ἀντὶ τοῦ proximo.* Nannius conjicit, *pro ipso.* Verum putamus: *pro summo legum ac poenarum metu.* Est enim τὸ pro interdum comparisonis. P. 36. *tertium causam belli hujusce, ut Romanus Albano imperet, dabo.* Nihil variant MSS. Quomodo autem tertius causa belli? Utique legendum: *causae.* Pag. 49. *Tanaquil, summo loco nata, & quae haud facile iis, in quibus nata erat, humiliora sineret. Ea quum innupisset, spernentibus Etruscis Lucumonem.* P. Nannius conjectat: *humiliora sentiret.* Nos, *quae haud facile iis, in quibus erat nata, humiliora sineret ea, quae innupisset. Spernentibus Etruscis &c.* Lib. ii. p. 157. *Volsi tum Aequique inter seditionem Romanam & bellum coortum vastaverant agros: ut si qua.* Audi Sigonium: Hic locus foede legebatur ante ita: *Volsi cum Aequique inter sed.* Subjicit deinde aliam lectionem inquinatissimam ex libro in-

¹ Maria Gornaea, filia adoptiva fuit Michaelis Montani (Montaigne) ad quam Lipsius Epistolae scripsit, & de qua nos ibi plura. vide Bayllii Lexicon Histor. Criticum in Gournay.

quinatissimo. Quod est autem tempus inter seditionem & bellum coortum, aut quae ista designatio! Vetus utique & vera lectio est: *Volscum Aequicumque inter seditionem Romanam est bellum coortum. Vastaverant agros, ut si qua secessio plebis fieret, ad se receptum haberet.* Offendit homines illud *Aequicumque*, cum semper alias *Aequos* dicat Livius. Ideo eandem vocem extirparunt Lib. x. p. 659. *M. Lino Dentre & Aemilio Coss. redintegratum est Aequorum bellum.* Vides elegantiam. Nos reponemus ex MSS. Italicis & Gallicis: *redintegratum est Aequicum bellum.* Mirum est, quod reliquerunt tamen vocem lib. iii. p. 169. *isque miles per bellum Aequicum vel acerrimus fuit.* Sic *Nervicum* a Nerviiis populis, *Albicum* ab Albii Ingauni aut Albii Intemelii, in Liguribus, incolis, Caesar. *Hedunicus* ab Heduis Aufonius. Lib. iii. p. 184. *ut exsules injuria pulsos in patriam reduceret, & servitutis grave jugum demeret.* Nos ex MSS. *& servitiis grave;* Ut inferius: *qui servitia nostra non commovit auctor.* Eod. p. 186. *jam tribunitiae potestatis sacrarumque legum oblitum.* Immo cum MSS. *Sacratarumque legum.* Quid sint sacratae leges, non docendus es. Sed est elegans locus apud Dionys. Halicarnass. lib. ii. multo propius principium, quam finem, ubi de Patronorum & clientium jure ab Romulo constituto: *Et eum, qui ejus criminis fuisset convictus, cuius ut Diti sacrum, interficere licebat. Mos enim erat Romanis, ut, quos vellent impune occidi, eorum corpora alicui Deo, praecipue vero inferis, devoverent.* Quae velim a te mihi Dionysii lingua & verbis reddi, nec enim in hac, puto, urbe Graece ille habetur. Eleganter ostendit, cur sacer toties in malam partem accipiatur. Risimus hinc nuper hominem adolescentem, qui Theologis theses dedicaverat, vocare eos *Viros sacerrimos.* Sed non est numerus talium. Tu vero, si ocium est, inspicere, si quas in publica aut vestra habetis bibliotheca veteres editiones, etiam novissimam Gruteri, si quid ex his sit anticipatum. Minuta multa habemus alia, quibus distingere te non addebet. Iterum vale, corculum meum, & Vestros omnes, communesque amicos meo nomine saluta. Scripsi lassus & somnolentus, appellante cubitus hora.

EPISTOLA XCII.

J. F R. G R O N O V I U S

Nic. Heinsio.

Leidam.

MI Heinsi, nudius tertius dedi ad te paullo antea scriptas unas, diu debitas. Sed tarditatem meam excusabis non ignarus, quantum interea laborem sudaverim, quippe quem tu ipse censueris Argonautam, non profecto ex illo genere Martialis; qui cessabant nihilque norant, sed ex illis, qui feliciter Symplegades sunt eluctati. Certe res gesta est, prout decebat: ipsae jam non repugnant suo vectori: & unde tantisper eram exclusissimus, licet expositum

per limen aperto ire redire gradu. Qua in re cum magna sit voluptas, atque eo purior, quia legibus fit, longe tamen exsuperat illam consensio animorum: & mutuuum obsequium, & amor tanquam non jussus. Itaque non sufficio agendis gratiis summo rerum arbitro, qui tam aequali & placito jugo me copulavit: nec ullae sunt jacturae, vel temporis vel libertatis, quibus tantas delicias non jure emeris. Puta me omnia dixisse, si dicam, quod facio, optare me tibi (& nihil est boni, quod tibi non optem, nec est cui optem studiosius) cum ejusmodi consilia iniveris, & tempus agetrem, similem fortunam. Ut revertar ad illas meas, oblitus sum mentionem facere Poëmatis *Fabritiani*. Non quidem constitueram illud una mittere, ne minus grandesceret fasciculus, & ne quos adjunxi praeter vestros, malorum versuum te subiret fastidium: promittere tamen occasione proxima volebam. Quam nunc suppeditavit lator harum juvenis politissimus *Goeddaeus*, frater amici mei singularis, qui ultro petiit a me, ut hanc ei viam munirem ad tuam amicitiam. Illud etiam rogare te volo: descripsi Lutetiae ex libro bibliothecae regiae nonnulla de *Cygro*, quae auctorem nullum praeferebant. Verba haec sunt: Κύκν' ὁ Σκαμανδροδίκης ἢ Ποσειδῶν' λαθραίως τεχθεὶς ἐρρίφη πλησίον τῆς θαλάσσης. Κύκνων δὲ πρὸς αὐτὸν καταπτάντων, ἰδόντες τινὲς ἀλιεῖς ἀνείλοντο τοῦτον ἢ Κύκνον ὠνόμασαν. Ὁς ἀνδρωθεὶς ἐγήμε Πρὸκλειαν τῇ Λαυμέδοντ' ἢ γεννᾷ Τέννην ἢ Ημιθέαν. Αποθανούσης δὲ Προκλείας ἐπέγημεν ὁ Κύκν' τῇ Φυλονόμην τῇ Τρεγάσῃ, ἣτις ἐρασθεῖσα τῇ Τέννην, ἢ μὴ τυχοῦσα, κατηγόρησε πρὸς τὸν πατέρα ὡς βιασθεῖσα ὑπ' αὐτοῦ, συμφωνοῦντ' αὐτῇ ἢ αὐλητοῦ τινὸς Μέλπῃ. Ὁ δὲ ὀργισθεὶς εἰς λάρνακα βαλὼν Τέννην ἢ Ημιθέαν ἀφῆκεν εἰς θάλασσαν. Τῆς δὲ λάρνακ' ὤρεσε νεχθείσης τῇ τότε καλουμένῃ Λευκοφρύϊ, νῦν δὲ ἀπὸ τοῦ Τέννη. Τενέδῳ καλουμένη, ἰδόντες οἱ τὴν νῆα τὸ συμβᾶν ἢ μαθόντες τὸ δρᾶμα, βασιλέα ἐαυτῶν τῇ Τέννην ἐποίησαν, ἢ τῇ νῆον ἀπ' ἐκείνης Τενέδον ἐκάλεσαν. Γνοὺς δὲ ὁ Κύκν' τὸ ἀληθὲς ἀνείλε μὲν Φυλονόμην, αὐτὸς δὲ ἐλθὼν συνώκησε τοῖς παισὶν ἐν Τενέδῳ. Αχιλλεὺς δὲ ἐπιστρατεύσας τῇ Τροίᾳ ἀνείλε τὸν Κύκνον ἢ τῇ Τέννην, τὸν λόγον υἱὸν τοῦ Κύκνου, ἔργῳ δὲ Ἀπίλλοντ' παῖδα. Εἰμαρμένη γὰρ ἦν ἀποθανεῖν Αχιλλέα, ὁπότε ἀνέλη τῇ παῖδα Ἀπόλλων' . Ὁ γὰρ Τέννης, ὡς ἔφην, υἱὸς ἦν Ἀπόλλων' . Παρὰ τοῦ Αχιλλέως οὖν πληγείς τὴν κεφαλὴν ὁ Κύκν' ἀνῆρέθη, φασὶ γὰρ ὅτι ἄτρωτ' ἦν τὸ λοιπὸν σῶμα πλὴν τῆς κεφαλῆς, τοῦτο δὲ μῦθος ἐστίν, πρὸς δὲ τὴν σφατιώτην ὁ Κύκν', ἢ κάλλιπα σκεπόμεν' ἐν πολέμοις, ὡς μηδέποτε τρωθῆναι, ὑποπέπτωκε τοῖς μύθοις ὅτι ἄτρωτός ἐστιν. Ἐπεὶ δὲ πληγείς ὑπ' Αχιλλέως πρὸς τὴν κεφαλὴν ἀνῆρέθη, ἔφασαν ἄτρωτον εἶναι, πλὴν μόνην τῇ κεφαλῇ. Haec diu ignoravi, cujus essent. Nunc vero suspicio venit mihi, excerpta ex Tzetze, scholiaste Lycophronis ad versum 232. Καὶ δὴ διπλᾶ σὺν πατρὶ ῥαίεται τέκνα, Στέρρῳ τυπέντα κλειδὰς εὐάρχῃς μύλῳ &c. Velim igitur inspicias, videasque num in omnibus cum edito textu consentiant. Cl. Boxhornio Senecam suum propediem remittam, nunc plurimam salutem dici velim. *Grafwinckelius* heros valetne & vivit? Dudum est, cum bis ad eum scripsi: responsum accepi nullus. Vale, charissimum pectus & me ama. Vestris omnibus officiosissimam salutem. Daventriae a. d. iv. Kal. Mart. Anno C. cidiocxliii. De ovo Hagienfi fabula est ne, ut credo?

EPI-

EPISTOLA XCIII.

J. F. R. GRONOVIIUS

Nic. Heinsio.

Leidam.

CONstitueram perdoctae tuae epistolae non quidem aequae doctum ac subtile, meditatam tamen, responsum dare, eamque ob rem in hunc illud diem distuli. Sed nihil remittunt occupationes, & diutius in mora esse tibi, ne fidem meam suspectam habeas, non sustineo. Correctiones tuae omnes ingentem mihi salivam, ut solent, moverunt: quod si quae est, cui indubitari possit, tamen omnes eruditae sunt, & tuo Ovidiique ingenio dignae. De Plinii loco videbimus alias. Nam Elzeviriorum impatientia jam de alio cogitare, quam de Livio non finit. Vellem nunquam id oneris suscepissem: video enim nec ipsam rem parem fore expectationi, nec ex ea quantum laboris, curae, meditationis ei impenderim, nisi paucissimos, aestimatuos. Sunt sane non pauca antiquitatis Romanae capita, quibus & occasione historiae, quam publice recito, & hujus muneris Liviani post doctiss. Sigonium (cujus merita non debent censerī ex emendatione textus Liviani, etsi hīc quoque saepe praeclarus augur fuerit) aliquid addere posse visus sum mihi. Sed nec notularum angustiae illa capiunt, & non omnia maturuerunt. Videbis tamen inter primitias correctionum, *οὐν θεῶν εἰπεῖν*, permultas tum Liviani tum Latini sermonis proprietates, a Grammaticis parum etiam observatas. Utinam verum esset, ¹ *Cui sua luminibus*. Hoc me angit & cruciat, quod tam elegantia, & ipso praeceptore, tuo Nasone inquam, digna verba parum vera sunt. Nosco autem mecum oblivionem meam, cujus pudet, duplici exemplo. Primum recordor in priori scheda fuisse jam aliqua notata ad Fastos, sed quo usque, id vero reminisci non potui: itaque totum, quale habeo, ne ipso quidem Ovidio inspecto per festinationem descripsi. Alterum est, quod oblitus eram, ² *τὸ Τέμπος ἰδὲμ Στὰτορ αἰδὲς ἔχει*: quod ex Cod. Sarrav. promiseram primum, etiam a Politiano notatum; secus addidissem in prioribus tantum argumentum, quo restitutio illa firmatur. Proxima hebdomade *Christenius* noster in Hollandiam iter parat: is Ovidium collatum aut in manum tradet tibi, aut si Amstelodami morabitur, quod in itu non puto facturum, mittet inde. Hotomannum, Scaligerum, & Schottum videbo lubentissime. Miror quomodo, qui de e nummaria aliquid scripserit, potuerit libri primi Observat. Human. caput xv. condere, quod (ignosce, publice nunquam ita loquar, & propterea transsilui nuper) stupidae ignorantiae plenum. Emi nuper in quadam auctione editum Basileae in Octavo tomum

O 3

secun-

¹ Respicit Elegiam, quae in Juveniliū lib. i. tertia est, qua hortatus *Heinsius* eum, ut edat observationes antiquarias, secundo vero disticho leguntur illa, ad quae hīc respicit *Gronovius*:

Cui sua, luminibus non inspicienda profanis,

Pestora nudavit tota, Latina Venus.

² Ovid. vi. Fast. 793. ubi vide *Heinsii* notas.

secundum operum *Joviani Pontani*, in quo de Aspiratione Dialogi, de Ser-
mone, de bello Neapolitano. Si ea aut ex cimeliis vestri Couranterii,
aut alias per occasionem tolerabili pretio integra reddere possis mihi, gratum
faceres, & libentissime pretium refundam. Observa occasiones. Vale, mel
meum, & me ama $\frac{30}{20}$ Mart. CIOIOCXLIH.

Deum precor, ut negotiatio optimi & summi *Spanhemii* felicissimum for-
tietur eventum: pax optima rerum: Amare & condonare & Socraticum &
Christianum.

EPISTOLA XCIV.

J. FR. GRONOVIIUS

*Nic. Heinsio.**Teidam.*

Nobilissime & Eruditissime juvenum, Quamquam spatiis temporis iniquis
excludor, non potui tamen bella hac occasione per optimum & elegantif-
simum *Richterum* nostrum te non salutare. Remitto Dialogum Criticum,
quem citius haberes, nisi sumtui tuo parcere voluisssem. Crede autem adfir-
manti mihi, non est ejus nugacissimus liber, cujus vos putabatis. Hoc ego
tam scio, quam scio me vivere. Et, si opus esset, jusjurandum darem. Bi-
nas meas recte accepisse te puto. De loco Scholiastis Lycophronis non est,
quod sollicitus sis mea causa. Jam enim librum ipsum accepi, & locum inveni.
Sed vicem ejus, velim transcribas mihi, quae de *coemotionalibus* senibus *Marci-
lius* ad Leges XII. tabb. p. 61. (ut retuli in adversaria mea olim) & *Gutherius*
in libro de jure Manium (nescio ubi, sed ibi legisse memini) notarunt. Pre-
tium operae habebis, quod tecum sententiam meam de illis communicabo.
Puto enim *Turnebum*, *Hotomannum*, *Manutium*, omnesque & Plauti & Cicero-
nis interpretes, hac in re hallucinatos. Cum nuper in Hollandia essem, arde-
bam ingenti desiderio vos videndi. Sed nec diu abesse ab uxore recens mari-
tus poteram, & ob solemnitatem, qua R. Magnifici nomen suscepi, in qua
duplex oratio mihi recitanda erat (quarum nec dum apicem chartae tradideram
unum) properandum habebam, & Hagae ultra destinatum per negotia quaedam
fueram detentus. Hoc ultimum si non fuisset, tamen unam noctem vobis de-
dissem. Itaque irasci nemini, nisi mihi & fato meo, possum, quod tanta vo-
luptate me fraudare cogebar. Accepi literas Elzeviriorum una cum fasciculo,
quem venisse Augusta Vindelicorum suspicor. Gratissima fuit in illis mihi tua sa-
tutatio. In Livio aliquid molior quotidie, sed non possum pergere pro studio meo
& Elzeviriorum per catenatas occupationes. Si paullum adhuc morari possunt,
habebunt, cur ipsos tarditatis non poeniteat. Vale, decus meum, & salve una
cum incomparabili Parente, omnibusque vestris, Boxhornio item & amicis con-
munibus. Raptissime. Daventriae a. d. VII. Eid: Majas. Anno C. CIOIOCXLIH.
Velim

Velim per occasionem salutes *Goeddaeum*, & ex eo cognoscas, an in auctione illa, cujus catalogum ad nos transmiserat, aliquid librorum pro me emerit, quid illud & quanti. Faciam enim, simul libros acceperit frater, ut pretium reddam.

EPISTOLA XCV.

NIC. HEINSIUS

J. Fr. Gronovio.

Daventriam.

Nunquam gravius a me peccatum fateor, Vir Clarissime, quam hoc tam pertinaci meo silentio. Dum ad te responsum differo quotidie, temporis aliquanto plus elapsum est, quam vellem. Serus nunc ad officium meum redeo: culpam, quod nec possum, neutiquam defensusurus; sed humanitatis tuae genium implorare certus. Quam cum & alias prolixissimam expertus sim, nihil causae mihi videtur esse, cur de venia desperem. Si narrare tibi nunc incipiam, quam ἀμεύτως & ineleganter aestatis hujus pars potissima mihi transacta sit, vicem meam serio indignaberis, & ego quidem ejus temporis sine summo pudore meo vix possum meminisse. Dum puellarum choreas subinde frequento, ita sensim illecebris iis irretitus sum, ut parum abfuerit, quin ad istos Sirenium scopulos perpetuo mihi haerendum foret. Confidentius haec apud te depono, quia & tu, credo, expertus es, quam his lenociniis nec opini saepe circumveniamur. Haec dum fiunt, ecce filiam majorem natu juveni cuidam, tibi non noto, desponsat Dominus *Latius*. Nova hinc nugandi mihi occasio nata. Nam & puellae, quod hinc moris est, ad sponsam fere indies deducendae erant, & insuper etiam celebrandae nuptiae. Sic mensis ferme totus periit. Et ineptiarum jam taedere me coeperat, jam effugium meditar, aliquo extra urbem abiturus, cum ecce febris, eaque continua, me invadit, quae quidem tam pertinaciter haecenus huic homini adhaesit, ut ab haecetica metuerent medici, praesertim cum per assiduam catharrorum ex cerebro defluxionem corpus undequaque totum mirifice infestaretur. Meliuscule tamen habere nunc incepti. Et vires utcumque se recolligunt. Per quas ubi licuerit, Ovidium meum denuo percursurus sum, ut extremam tandem ei manum imponam, quod hac hieme fieri non difficulter poterit. Interim non moleste feres, si saepiuscule in locis intricatis ad opem tuam confugero, scio enim quam subactus in autoris ejus lectione sis. In Livio tuo pergere typographos vehementer gaudeo. Notas a te addi velim, nam & sic editioni pretium accedet, & existimationi tuae optime consulatur. Sed tota hac de re quid decreveris, ex te quam primum scire pervelim. Editiones Livianae tres quatuorve penes me sunt. Inter quas Parisiensis, quae cum omnium com-

mentariis prodiit, sed quae mendis refertissima. Est & Manutiana Sigonii editio, & Parisiensis altera a Vascosano publicata, tum & Gryphiana in minori forma, quarum tamen nulla ad gustum tuum, si quid judico. Aldi patris textus nuper hic vaenalis erat, sed tam caro, ut quemvis etiam librorum studiosissimum detertere pretium posset, invenit tamen emptorem. Veterrimam in Leidenſi Bibliotheca Editionem ſervari memini, quam Mediolani Anno MCCCCLXXXVIII. publicatam teſtatur Catalogus. Nam ad ipſum librum propter valetudinem aditus mihi nunc non eſt. Utinam inſtitutum tuum juvare poſſem! nam & tibi, ſi quiſquam, volo optime: & autorem illum, quem admiror unice, anem aliquando a mendis, quibus ſcatet, videre purgatum. Quod aut tua opera conſequemur, aut nullius. *Rhenanum* & *Sigonium* optime de illo meritos non negarim. Videntur tamen plus ſubinde, quam par erat, indulgiſſe ſibi in veteri lectione ſollicitanda. Qualia nonnulla nuper a me notata, cum autorem eum perlegerem. Inter quae & illum locum memini fuiſſe lib. v. c. xxxvii. *Galli flagrant ira, cujus inpatiens eſt gens*. Sic ante *Rhenanum* legebatur, & recte meo iudicio: Pro quo reſcripſit, *impotens eſt gens*. Temere, mehercules, niſi omnium MSSorum fidem ſecutus ſit. Quod tuum eſt arbitrari. Noviſti illum Ovidii locum de Ajace: *Utque erat inpatiens iræ*. Plura alibi de hoc loquendi genere notavi. Sed haec haud dubie jam a te obſervata. *Salvagnii* Commentarium in Ibin Ovidianam, & *Fabricii* verſus en remitto, pro quibus multum tibi debeo. Quanquam *Salvagnius* expectationi meae, ut verum fatear, non reſponderit. Indignatus ſum ſerio, quod ex optimo illo Sanvictoriano Codice tam paucas diſcrepantes lectiones alleget: velimque ex te ſcire, quid cenſeas de loco ab illo tentato verſ. 146. ubi pro *offea forma* V. C. *offea larva*. Utramque lectionem queis muniam, non deſunt auctorum loca. Sed de his alias. *Fabricii* carmen tanta cum admiratione perlegi, quanta perlegi par erat ſcriptum prorfus divinum. Eaſque lectiones ſaepe mihi repetita. Et nunquam non magis placuit. Dedi quoque amicis legendum, de iis loquor, quos aliquem verae poeſis guſtum conſecutos ſciebam. Quid quaeris? omnes uno ore commendare. Sed ut diverſa hominum iudicia ſunt, ita quod in eo maxime mihi probabatur, id iis diſplicebat maxime. Scis amicis noſtrum id potiſſimum agere, ut ſedatum & ſibi ubique ſimile dicendi genus ſequatur, hoc illi languorem vocant. Quae opinio adeo dementavit praeclara alias ingenia quaedam noſtrae Bataviae, ut nihil aeſtiment, nihil commendent, niſi quod turgeat utris inſtar inflati, aut ranae illius Aefopicae. Narro tibi, Epicedium meum, quod Illuſtri Mylio ſcripſi, tui pene unius applauſum meruiſſe. Adeo languere nonnullis viſum eſt. Sed, ut illorum iudicia fortiter contemno, ita placuiſſe tibi, Clariffime Gronovi, laudi mihi maximae. Quanquam abſit, ut eorum quicquam in verſibus meis agnoſcam, quae tu in iis tantopere commendas. Exoſculor tamen ſummum affectum illum, qui te, hominem incorrupti alias iudicii, hic ſefellit. Denique ne inpune tibi ſit, perperam me laudatum eſſe, ecce damno te rursus lectioni aliorum verſuum, quos nuperrime conſcripſi, quibus & promiſſa in

Gornaeam

Gornaeam Epigrammata adieci. Miraberis forsan audaciam meam, quod lyrico cothurno nixus prodeam, nunquam ante hoc cultu conspectus. Id quam feliciter mihi successerit, tuum erit judicare. Mitto hîc insuper librum patris mei de Tragoediae constitutione, denuo nuper excusum, qui quod incompactus ad te venit, per summam festinationem fit, cum aliud exemplar non esset ad manus. Mitto etiam Cl. *Boxhornii* Notas in Tacitum, quas ad te curandas mihi dedit autor. De iis quid sentias scire pervelim, nam mihi eas legendi nondum fuit otium; mirifice hîc placet sibi amicus noster. Judicium tuum, si quid sequius de iis sentis, à literis tuis separatum ad me mitte; quas exhiberi sibi subinde petit, quod & nunc faciet, hac praesertim occasione. Novi hîc praeterea nihil, nisi quod ab Elzeviriis ex Italia nuper allatus *Octavii Ferrarii* de Re Vestiaria liber, cujus exemplar, quod ultimum illis restabat, mihi comparavi. Promittit autor brevi se daturum partem alteram, ut & Electa, ad exemplum, credo, *Lipsii*. Miratus sum hominis eruditionem, quanquam in multis mihi non satisfacit. Sed jam nimia prolixitate te obtundo. Tuas brevi exspectabo. Vale, meum decus, & uxori tuae plurimam meo nomine salutem. Lugd. Bat. Anno *MDCCXLIII*. IX. Septemb. Sed quid? nunquamne ad nos excures? *Isaacus* autem *Vossius* ubi locorum nunc agit? nam ex Italia jam discessisse illum auguror. Iterum Vale.

EPISTOLA XCVI.

J. F. R. GRONOVIIUS

*Nic. Heinsio.**Leidam.*

ET laetatus sum visis tuis, Nobilissime & eruditissime juvenum, & nihilo minus atrocem (quantum amor faevit) dicam proximo responso tibi intentebam: sed perlectae illae adeo me suis delinimentis mitigarunt, ut praesentis gaudii sensum omnem quamvis molestissimae expectationis memoriam amitterem. Gaudeo valetudinem tuam esse in melius, idque Nasoni tuo proficere & cupio, & ipse mihi polliceor: quod vero me in partem vocaturum te minaris, fortassis opus haud erit: quoties tamen facies, nec adfectus meus nec studia deerunt tibi, hoc est, vel tecum ut erudiar, operam dabo, vel abs te me eruditum liberis confitebor. Pro muneribus tuis & Cl. *Boxhornii* gratias ago maximas, quibus ut vos bibliothecam meam auxistis, ita in eo sum, ut lectionem eorum, repetita unius & quidem praecipui, profectus meos augeam, ac tanto plus beneficiis vestris me debere agnoscam. De Livio gratum est, quod bene auguraris: nos certe operam non vulgarem & posuimus in illo, & cum maxime ponimus. Notas adjicere sane constitutum est mihi perbreves & selectas, jamque partem in mundum redegeram, ut primo tomo absoluto subjungerentur. Sed poscunt illi textum integrum, antequam notas incipiant

Tom. III.

P

prac-

praelo dare: quae res etsi ex cognita hominum avaritia suspecta mihi est, tamen dissimulabo & mentem opperiar: sibi certe magis defuerint illi, quam mihi, ista hederæ editionem suam fraudando. Nec enim tam gloriam ex hoc labore peto, quam ut rei literariae profim. Animadversio tua proba est, nec de sensu aut usu τοῦ *impatiens* cum eum locum tractarem, dubitabam: tamen, quia in dubio relinquit *Rhenanus*, utrum ex ingenio, an ex scripto Codice, ut plurimum bono, *impotens*, supposuerit, & excerpta trium Pal. quae penes me habeo, nullam varietatem ostendunt, hoc reliqui. Sic soleo fere in iis, quae arbitrii sunt liberi, veterum Codd. auctoritatem sequi. Commode autem subiecisti Ovidii locum, & monebo in notulis. *Dionysii* & *Marcilii*, quae excerpisti, grata sunt: sed in primis risui fuit subtilitas magistri: nam non satis antehac consideraveram. Plaustrum est errorum. Illud commune habet cum viris magnis, *Turnebo*, *Hotomanno*, *Scaligero* ad Festum, fereque omnibus Ciceronis & Plauti commentatoribus, quod *coemtionales senes* eosdem putat cum illis senibus, quos ad coemtiones faciendas interimendorum sacrorum causa repertos ab J. C. is ait Cicero. Atqui nihil habent simile praeter vocabulorum notationem, quod, si bene memini, primi observavimus. *Gutherii* & liber & caput citata sunt Grutero, ad Plauti Bacchides a. iv. sc. ix. itaque nondum hoc munus inquirendi remitto tibi: ego autem erravi forte designando librum de jure Manium, cum de jure Pontificio deberem. De erroribus judiciorum verissime tu: sed semper argumentum pessimi fuit turba: atque hinc intelliges; quod scribit magnus genitor tuus p. 178. de C. T. *elocutionem, qua utuntur veteres, vix centesimum observare*. Quod cum maxime in praeclaros illos ampullarum admiratores conveniat, de se tamen dictum illorum agnoscet nemo. Mihi ad istiusmodi acroamata jamdudum aures occalluerunt, & ne contradico quidem, ne morosus videar, aut sapientia seculi non contentus esse: interim arcana illa sententia, quae nec circulis, nec theatris servit, quae dependet a nemine, & sentit cum paucissimis, immota manet, ac tum demum gaudet sinceritate sua, cum plurimum a populari morbo se videt separatam. *Ferrarii* de re vestiaria nimium quantum videre gestio, & rogare audeo, ut ad paucos dies id mihi tuo beneficio constringat. Collega meus, ni fallor, Cl. *Cristenius* nunc Leidæ est, & sine dubio ad vos inviset: is haud gravatim recipiet hanc sarcinam. Ego Patavii audiavi *Ferrarium* disertissime & nostrate more de cathedra concionantem, atque ex hoc gustu facile accedo judicio tuo. Jure ambigis, *osseæ forma*, an *larva* malis. Nec ego dispicio satis, quamquam in posterius fere inclinem ob auctoritatem scripti codicis, ex quo non plura protulisse *Salvagnium* merito indignaris. Sciat amicus noster δ πάλιν in Flor. Tacito legi plane, *populus credulitate*: quod Pichena, quasi scriberetur, *po. plus* male est interpretatus, ut non dubitem, quin vera sit illa lectio: *populus credulitate*; *prudentes diversa fama tulere*. Sed quare non auxit munus suum disputationibus de Regno Romano, quae tantum plausum concitarant, ut nos etiam hinc inaudiverimus? Et nos capimur cordatis Politicis, & si me notarum politicarum sarcinatores irritaverint, ostendam fortassis me aliquid illos docere posse.

posse. Ferte me ridentem, dum desplene me ulciscar, a quo jam quatrimum male habitus, & publicum vitare coactus sum. Vidistine subsceivas lectiones *Jacobi illius Lannii*, quas laudat alicubi Salvagnius, tamquam hominis purioris doctrinae lumine adflati, & in ipso Musarum sinu educati? *Fabricium* nostrum melior fortuna respexit: est enim in Consiliariorum collegium ab Episcopo Lubecensi, Holsatiae duce, adscriptus. Uxor mea utrum fert: cis tres menses spero me patrem fore. Vale, carissimum caput, & vestros omnes a me humanissime saluta. Instat enim tabellarius. Iterum vale. Daventriae III. Kal. Octobr. CIOIOCXLIH.

Si occasione commoda tutaque & sine sumtu mittere poteris Livium Mediolanensem ex bibliotheca, feceris gratissimum. Si videre libet, quid nos praestemus, gustum cape ex foliis secundi tomi, quae nunc ad Elzevirios mittimus.

EPISTOLA XCVII.

NIC. HEINSIUS.

J. Fr. Gronovio.

Daventriam.

A Cceptissimae fucere mihi tuae literae, Vir Clarissime. Etsi breviores illae, quam expectaram. Adeo ad multa, de quibus scripseram, nihil respondent. Ut appareat, ab aliud agente scriptas esse, quod tamen libenter tibi dono. Non enim tam alienus sum a Musis, ut inter tot occupationes tuas morose ea a te velim exigere, quae non nisi ab otioso speranda sunt. Livium, quem petebas, mitto. Recepit eum sine sumptu tuo ad te perventurum Elzevirius. Utinam institutum tuum juvet! est enim satis vetustus. Adieci ei & Ferrarium de re Vestitaria, quem Cl. *Christenio* tradidissem; sed jam discesserat, cum tuae mihi redderentur. Affirmabat ille quidem, injunctum sibi a te aliquid de libro quodam, qui penes me esset, sed cujus nomen in via sibi excidisset. Ut non nisi difficulter, quem librum velles, conjectare possem. Spero ejus lectionem non injucundam tibi fore, vel eo potissimum nomine, quod jam dudum nihil humanioris literaturae ex Italia allatum. Non displicuisse tibi nostram in Livio observatiunculam, est quod mihi gratuler. De Ovidiano in Ibin loco adhuc haereo. Pro Salvagnii lectione videtur stare Seneca Epist. xxiv. *Nemo tam puer est, ut Cerberum timeat & tenebras, & larvarum* (Lips. *Larvalem*) *habitum nudis ossibus cohaerentium*. Pro vulgata lectione stat Apuleius, qui *Larvalem formam* alicubi dixit, quam noster *formam osseam*. Sed locus non succurrit. *Larvas & prodigia* conjunxit Prudentius. Sed locus mendosus circumfertur lib. I. Adversus Symmachum vers. 499. *Ergo cave, egregium caput orbis, inania post hac Prodigia & larvas stolido*

lido tibi fingere cultu. Sic verissime optimus liber Bodleianus. Vulgo, *Prodigia esse deos.* Utinam clementissimus Deus sanitatem mihi pristinam largiatur, dum telam illam Ovidianam detexam, quae certe operosius a me inchoata est, quam ut prope jam affectam salva existimatione mea possem dimittere. Epistolas accurate nuper relegi, & multa non infeliciter expedire mihi visus sum, in quibus ante haesitabam. Et quanquam tanti non esse ea probe sciam, quae eruditis tuis auribus se probent, gustum tamen unius atque alterius correctiunculae tibi dabo. In Epistola Deianirae: *Semivir occubuit vir lerniferoque veneno Nessus, & infecit sanguis equinus aquas.* Neminem melioris iudicii fore confido, cui non suspectus sit prior versus. Nam quam coactum illud *vi*? Praeterea quis unquam *Lerniferum venenum* pro *Lernaeo* dixit? Sed & MSS. variant, quorum duo, quos inspexi, *Semivir occubuit Lernaei tabe veneni*, quam lectionem aliquando probavi. Nunc autem mihi constat eam ex libro ix. Metamorph. huc inculcatam ab imperito correctore, ubi in Fabula Nessi totum hoc hemistichium invenies. Sed hinc ideo ferri non potest, quia *ad tabe* statim infra sequitur, *virum tunicae tabe perire meae.* Ut quidem illic legendum. MSS. meliores, & inter illos optimus Gallicanus, constanter habent, *occubuit in lethiferoque veneno*, quanquam & in quibusdam *Lerniferoque*, pro ut certe in omnibus legitur. Jam vide quantillo negotio locum mendosissimum sanarim. Pro *in lethiferoque veneno*, scribo, *in lethifero Eveno.* Fluvii alicujus nomen hinc desiderari, sequentia illa satis evincunt, *& infecit sanguis equinus aquas.* In Eveno autem Nessus interfectus ab Hercule. Docent noster lib. ix. Metamorph. & Sophocles in Trachiniis, ubi Deianira totam rem diffuse memorat. Scriptum prius erat *lethiferoque Eveno*, quomodo supra hac eadem Epistola in plerisque MSS. *Cupressiferoque Erymantho*, pro *cupressifero Erymantho*. Hoc ansam versui porro corrumpendo dedit. Habes jam, nisi fallor, locum sanatum. Sed ne quid dissimulem; non placet mihi *Evenum lethiferum* dici: quod epitheton hinc valde invidiosum est, non enim tam Evenus Nessio lethifer, quam Hercules: aliud omnino foret, si in Eveno Nessus esset submersus. Ita enim recte *lethifer* fluvius iste dici posset, quanquam non ignorem, quomodo haec excusari possint. Auget suspicionem meam lectionum diversitas, nam praeterquam quod codices nonnulli cum vulgatis *lernifero* agnoscant, in membranis Petri Scriverii satis vetustis *lauriferoque veneno* legebatur, quare insistens vestigiis ejus lectionis, pro *occubuit in lauriferoque veneno*, putem rescribi posse, *occubuit cingaurifero Eveno*, *cingaurifero* pro *centaurifero*, quomodo in MSS. saepe scribitur. *Centaurifer* autem ideo, quia Nessus viatores per hunc fluvium tergo suo insidentes solebat vehere: habes historiam in iisdem Sophoclis Trachiniis. Novisti autem eadem ratione hunc fluvium *Centaurum Lycorman* a tuo Statio dici sub finem lib. iv. Thebaidos. Si quis propius lectioni codicis Scriveriani velit insistere, legat per me licet, *occubuit in laurifero Eveno. Laurifer Evenus*, quomodo *Pomifer Anio* nostro Amor. lib. iii. El. vi. (ubi vulgo *Spumifer* male.) & *populifer Sperchius* Metam. lib. i. sic & *olivifer Eurotas* Statio lib. iv. Theb. (quae lectio non video cur damnari debeat) &

& *pinifer Simois* eidem lib. xii. Quanquam, ut verum fatear, nusquam legerim Aetoliam, in qua Evenus, lauri feracem fuisse. Sed ludunt in his talibus poetæ. In Epistola Didus alter locus est, qui mire me exercuit, ipso statim initio, *Sed meriti famam corpusque animumque pudicum Cum male perdiderim, perdere verba leve est.* Mirum est, cur dicat se meriti famam perdidisse, cum postea queratur, nimis omnibus innotuisse beneficia sua. Quo enim illa? *Mille procis placui, qui me coiere querentes Nescio quem thalamis praeposuisse suis.* Potuit ergo Dido ipsum perdididisse meritum seu beneficium, quod in ingratum contulerat, famam meriti non potuit, quia palam jam illud erat factum? Cogitavi aliquando, num pro meriti famam legendum esset meritum famae. quomodo in Epistola Sapphus meritum formae. *Et formae meritis tu mihi Phoebus eris.* Sed & illum locum postea corruptum esse animadverti. In Gallicano codice scriptum est, *Sed merite famam.* Quem codicem cum sciam saepe peccare in abbreviandis vocibus, non difficulter veram lectionem expiscatus sum. Scribe ergo, *Sed merita & famam corpusque animumque pudicum Cum male perdiderim* optimo sensu. Quod autem spectat locum illum ex Sapphus epistola: *Et formae meritis*, cum in veteri libro *& formae & meritis* scriptum offendissem, facile vidi, *Et forma & meritis* legendum esse: sic & in Hypsipyles epistola locutus noster, *Nec facie meritisque placet, sed carmine movit.* Sed jam te obtundo tot ineptiis, nondum tamen dimitto. Statianam Diatriben tuam nuper relegi, quid quaeris? unico hoc libello plus me docuisti, quam immensis suis illis commentariis reliqui interpretes omnes. Annotavi inter legendum quaedam, in quibus nondum mihi satisfactum, doceri itaque velim. Pag. 282. adducis istum Ovidii locum, *quid Danaen Danaesque virum matremque Lyaei, Haemonaque & noctes quae coiere duas*, qui manifeste corruptus est. Scribis ergo ex Pirckhaimer MSS. *Quid Danaen Danaasque nurus*, cui ego emendationi assensum praebere non possum, nisi me doceas *Danai nurus* pro filiabus Danaï dici latine: illae enim non Danaï nurus, sed Aegypti, quo modo alibi Ovidius, *Exulis Aegypti, barbara turba, nurus.* Mihi simplicissima lectio videtur, quam in Gryphii ac Mycilli Editionibus & tribus MSS. inveni. *Quid Danaen Danaesque nurum. nurus Danaes*, Andromede, quae Perseo nubsit. Pergis porro & ex eodem codice legis, *Alcmenam & noctes.* quae lectio & in nostris MSS. extat, sed non ideo probanda: ex Glossa enim nata est, licet & Bersmannus probet. Puto Ovidium scripsisse, *Haemonaque, & noctes cui coiere duae.* Jam vides unde illud *Alcmenam* natum sit. *Haemon* autem Thebanus, qui ad Antigones occisae tumulum ex nimio amore se interfecit. Propertius lib. ii. El. viii. *Quid non Antigones tumulo Boeotius Haemon Corruit ipse suo saucius ense latus?* De toto loco quid nunc statuas scire velim. P. 14. adducis Claudiani locum, *Parent numinibus montes, ut legibus urbes*, qui mire corruptus est, quaenam enim illa comparatio inter numina & leges? si ut regibus urbes legeretur, aliquid dixisset. Deinde cur numinibus magis parent montes, quam totum hoc universum? Inspice quaeso; locum, & absurditatem statim deprehendes. Extat autem lib. iii. De laudi-

bus Stilichonis vers. 294. Omnem difficultatem tollit liber Oxoniensis, in quo divine legitur, *Pacet muneribus montes, qui legibus urbes.* *Pacare montes* eleganter dixit, quomodo Virgil. *aut Erymanthi Pacarit nemora.* & Statius lib. iv. Theh. *saltus tum forte remotos Pacabat cornu: Munera* autem vocatas feras illas, quae arenae destinabantur, quis nescit? sic Ovidius lib. i. Art. Am. in spectaculorum descriptione. *Saucius ingemuit telumque volatile sensit, Et pars spectati muneris ipse fuit.* Sic locus ille legendus; vulgo perperam, *spectati vulneris.* Plura erant, de quibus volebam te consulere, sed modum epistolae excessi, & jamdudum graviter in publica commoda peccare me scio; qui a rebus seriis te avocem. Cl. *Boxhornio*, quae volebas, indicavi. Theses suas misisset tibi, sed negat sibi exemplaria ad manum esse. Mea quoque, quae habui, amici abstulere. De Uxore tua jam ex Cl. *Christenio* intellexeram; qui libros Observationum tuarum novos tres Amstelrodami ab Elzevirio excudi mihi indicavit. Quod quidem opus devorare unice gestio. Quare an brevi ejus editio speranda sit, fac sciam. Prodiit nuper Octavius Minutii a *Rigaltio* editus, & Antoninus de vita sua Graeco Latinus *Emer. Casauboni.* *Fabricium* nostrum dignam se stationem nactum esse ex animo certe laetor. Et jam pridem de meliori aliquid fortunâ augurabar, postquam postremas meas responsione dignatus non est. Quanquam eam in mores ejus arrogantiam cadere, vix est ut mihi persuadeam. *Jacobi* illius *Lannii* ne nomen quidem audieram ante lectum *Salvagnii* librum. Quare, quis sit, docendus sum. Laudat idem amici cujusdam sui Commentarium in Epistolas Ovidii, quem ego librum haecenus videre non potui. *Gutherius* de Jure Pontificio nec in nostra, nec Boxhorniana Bibliotheca extat. Si apud alium amicum inveno, locum describam. Vale, meum decus. A. d. xv. Octobr. Anno MDCCXLIII. Lugd. Bat.

EPISTOLA XCVIII.
NIC. HEINSIUS

J. Fr. Gronovio.

Daventriam.

Livium Mediolanensem, quem Elzevirii ad te curandum non ita nuper dedidi, quin una cum adjunctis literis acceperis, vix est quod dubitem, Vir Clarissime. Ad eas quidem responsum tuum impatienter haecenus expecto. Nunc cur ad te scribam, in causa senior est Elzevirius, qui id beneficii a me flagitavit serio. Expostularam cum illo, idque tuo nomine, de dilata Notarum tuarum ad primum Livii tomum editione. Affirmavit ille id ea de causa a se factum, quod notas arbitraretur nondum paratas esse. Hoc videlicet se metuisse, ne operis cessandum esset, dum illae a te conficiuntur. Nunc, cum
ab-

absolutas esse sciat, nihil causae esse cur praelo non committantur. Immo se id unice velle, ut quam primum eas habeat, ita enim ad umbilicum perduciposse Tomum primum. Quare &, ut praefationem ad Lectorem adjiceres, obnixepetiit, in qua breviter, quid in hoc auctore praestitisses, expedires. Nam ipsam dedicationem sibi videntur fervare homines avari. Haec te ignorare nolui, Vir Clarissime, ut, quod e re tua arbitraberis esse, tute nunc decernas. Valetudo mea in melius, sed tarde admodum procedit. Interim cum Musis meis in gratiam redeo. Quarum nunquam meminisse possum, quin & tui vicissim meminerim. Ejus rei quaecunque documentum¹ Elegiam dudum promissam nunc tibi sisto. Cum recens essem a lectione scriptorum tuorum, & eorum veneratione plenus, hortatus te sum, ut Observationum tuarum quod reliquum haberes, publico committeres. Argumentum, fateor, quod operosius a me tractari debuerit. Sed cum omnium optime novissem ipse ego, quam nihil a me dici posset, quod te dignum esset; uno impetu hunc campum decurrere malui, quam longa meditatione fatigari in palæstra, quam meorum virium non esse conscientiam mihi ultro suggerebat. Hoc nunc eo dico, ne mireris tibi non satisfactum, cum nec mihi satisfecerim. Affectum tamen si respexeris, nihil ultra desideres. Quo proniorem in te si ab ullo mortalium expectes, frustra omnino sis. Sed nec tu hoc ignoras. Atque ideo despectui tibi sumus. Hagae nuper denuo te fuisse, narrant mihi, qui te allocuti sunt. At quantillum erat, amicum invalidum obiter & in via salutasse. Video haec talia mihi posthac ferenda esse. Vale. Lugd. Batav. Anno MDCCXLIII. XIII. Novembr.

¹ Haec legitur inter Juvenilia Heinsii lib. I. p. 228.

EPISTOLA XCIX.

J. FR. GRONOVIIUS.

Nic. Heinsio.

Leidam.

Nobilissime & Praestantissime juvenum, recte accepi utramque tuam, thesaurum quendam doctrinae & elegantiae: caeterum in tanta copia argumenti ad scribendum, conclusus & obstupefactus, nec unde incipiam, nec quid ordiar, nec ubi finiam, ullo modo rationem inire possum. Sive enim illa cogito, quae priore me docuisti, ἡ ἀμύθη μὲν ἔχει εἰσορῶντα, & quamvis omnia summa abs te exspectaveram, ipso tamen exemplo spem meam agnosco superari: sive multiplicem illam & cumulata humanitatem respicio, qua per utramque non me oneras, sed plane pessumdas, lacrimae profecto erumpunt mihi, ex laetitia, quippe tantis honoribus adfecto, & (verum fatebor) invidia quadam ac dedignatione meae conditionis, quod tot beneficiis nunquam respondere poterō. Accedit negotiorum & studiorum diversitas, quae me cum maxime vexant,

vexant, trahunt, rapiunt in tot partes, vix ut mei ipsius meminerim. Pauca tamen de singulis, ut praesens fert occasio, ne tam indulgere tempori meo, quam detrahere tuis meritis, a quo absum longissime, videar. Ad illa igitur, quae ad Ovidium Claudianumque notas, omnia alba sum linea: nihil est, ex animi sententia dico, quod non profundam eruditionem, igneum ingenium, subtilissimum iudicium sapiat. Papae! hoc est mascule tractare literas, & penetrare intimos sensus veterum. Placet: *centaurifero Eveno*: ut quod maxime: placet, *Sed merita & famam*: in illis ex Diatribe diu cogitavi, an contradicere tibi possem: (neque enim noluissem, si possem:) sed per fidem, non possum, & victus manum do verissimis tuis animadversionibus. Certus sum plura ejusmodi occurrisse tibi, quae justissimis obelis configeres (nam & mihi plurima displicent:) de quibus & abs quovis rectiora doceri opto, & a nemine, quam a te malo. Crede enim mihi, literarum studium mei ipsius studio semper fuisse mihi & fore antiquius, & magis laetari me errata mea corrigendo, siue id per me ipsum contingat mihi, siue amicorum admonitionibus, quam aliorum naevos annotando. Deum optimum maximum precor, ut & valetudinem tuam firmiorem reddat, & vitam plurimos in annos producat: nam neutri sine gravissima literarum jactura vel momentum potest deripi. Illud miror, quomodo, postquam acrioribus oculis nugas nostras inspexisti, nec de me aliorum praejudiciis, sed tibi ipsi credis, divina illa Elegia excidere tibi potuerit: quae me poene ad desperationem adigit: adeo cupio sic posse laudari, & adeo nihil istarum laudum me video mereri. Plane enim contrarium mihi accidit ejus, quod opinere: inflares alium & superbum faceres, me vero nunc magis poenitet mei, quam unquam: ita enim sentio, unicum illud poemation praestantius esse, quam quicquid ego aut cornicatus adhuc sum, aut in posterum cornicabor. Quare non meae, sed tuae gloriae interest illam edi, id quod curo cum maxime, quamvis alieniore loco. Nondum enim id agitur, ut observationes (heu quam indignae Palatino Apolline, nedum ut illum restituant) publicentur. Sub praelo est commentarius de Sestertiis, in quo nonnulla rei nummariae veterum, aliter atque factum est a summis viris, explicare tentavimus. Id unum erat caput illarum: sed cum per ferias proximas nescio quo genio impulsus aliquamdiu totus ei materiae vacarem, ita fuc crevit, ut libellus inde octo philyrarum (jam enim poene absolutus est) exierit. Spero me aliquid lucis difficillimis & inter summos viros jactatis controversiis attulisse: sed metuo admodum, ne illi, qui toties ea de re promisit, falcem in messem non meam, idque imperite, immisisse videar: itaque dedi operam, ut placatum haberem: utcumque tamen cedat, vel pereant nostra, modo ad meliora promenda, ut potest, ille incitetur. Impetravi a Curatoribus nostris, ut quoniam thesibus edendis nullum iis sumtum facio, quemadmodum Collegae, haec impensa illarum rationibus adscriberetur. Erunt igitur pauciora exemplaria, nec vendentur: nisi forte typographus aliqua suffunderetur sibi, quod tamen vetui. Tua elegia in fronte posita & pretium libro faciet & minuet. De notis ad Livium recte factum, quod monuisti Elzevirios;

rios: nondum sunt pertextae: intermisi enim, quia jubebant ad secundum to-
mum pergi: absolvam, simul ab hac cura ero liber: *Ferrarium* vidisse nollem:
sed nondum satis potui: certe parem ei inter Italos hodie novi neminem. Iter
meum, quia incidebat sub exordium lectionum, & operae hinc atque illinc in-
stabant, adhaec uxor ita se habebat habetque, ut toto illo feriato tempore ur-
be me exire prohibuerit, valde intempestivum fuit: tamen quia sic jubebat,
imperabat res familiaris, non potui me ipsum deferere: caeterum cum nemi-
ne (nisi forte in quos propter viam incidi) collocutus sum, praeterquam qui-
bus negotium meum commendavi: ne *Vossium* quidem Amsterodami adii, nec
nisi unam noctem Hagae quievi: caeteros & dies & noctes aut in negotio,
aut in itu & reditu egi. Florentiae in bibl. Dominicanorum servantur A-
mores, Fasti, de Ponto collati ab *Angelo Politiano*, unde excerpta penes me
sunt. Quamquam puto omnia eadem jam ex aliis te habere, tamen dabo Stu-
dioso cuidam, cujus opera in describendis, quae volo, utor, & polliceor, cis
paucos habebis dies. Mittam etiam, si vis, Ovidium, quo in Gallia usus
sum, in quo sunt Fasti cum quatuor Codd. & alia diversa opuscula cum singulis
collata: sed ea conditione, ut si quid indoctum per festinationem margini adlevi,
id quasi non visum praetereas, nec secretas ineptias nostras (satis earum ultro
publicavimus, in quam censuram stringere licet tibi) publiques. In Observa-
tionibus pauca delibavi, ne tibi quid praeripere viderer: sed & illa describi cu-
rabo, si ut jubeas tanti est. Vide quam velim aliquid gratum facere tibi,
quo agnoscas ultimum tuum beneficium mihi gratum esse: sed cum nihil par
aut aequale habeam, rogo, ut illo, quod possum, & longe majore, quam pos-
sum, animo contentus sis. Cum sumebam calamum; ut ad te scriberem, pau-
cas lineas exarare constitueram, sed ecce inopinante me hucusque epistola cre-
vit, reclamantibus jamdudum & avocantibus me invitum aliis, quae cupiunt
praeverti: & tempus est, ut me iis exoratum sistam. Vale igitur, decus &
deliciae nostrae, & vestros omnes officiosissime salvere jube, tum etiam Cl.
Boxhornium, cui propediem respondebo. Daventriae a. d. ix. Kal. Decemb.
vestrate stylo CIOIOCXLIH.

Si libet aliquas bonas horas perdere in nostro, postquam misero, de Sester-
tiis, jam nunc incipe legere *Scaligeri* a pag. 66. ad 84. ea enim praecipue excus-
simus: & incredibile est, quantum illae paginae paucae & veri & falsi contine-
ant. De *Vincentio* nostro noli quaeso suspicari. Tuas ad ipsum post reditum ex
patria hinc inveni, nisi inclusas illis, quas de matrimonii tum consilio primas
ad illum scripsi: eae vero perierant tabellariorum culpa: certe se non acce-
pisse postea conquestus est, atque haec causa, cur epithalamium mihi non ce-
cinerit. Et sane credo ipsius candori. Ride autem avaritiam istorum homi-
num, qui de fasciculo tibi receperant: quasi non satis sit tantum operae me
illis praestare gratis, etiam quantulocunque sumtu me maectant. Sed Aethiops
non mutat colorem. Iterum vale, mi Heinfi.

J. FR. GRONOVIIUS

Nic. Heinſio.

Leidam.

En tandem tibi, Chariffimum pectus, de Sestertiis undecim exemplaria, quae, quod commodo fiat tuo, ita distribues. Duo in charta majuscula domi vestrae manebunt, ut alterum Patri des cum literis, quas adjunxi, alterum tibi serves. Caetera singula singulis aut trades aut mittes meo nomine hisce: Ampliff. Adfini tuo, *Scriverio*, *Boxhornio*, *Spanhemio*, *Golio*, *Vorstio*, *Latio*, *Empercurio*, *Revio* Regenti. De ipso opusculo, quid tu censeas, simpliciter & sincere, ut mos tuus est, & inter nos decet, expectabo. In fronte non dubito, quin offensurus te sit hiatus, post maximos viros, cujus me quoque piget poenitetque. Sed hoc illico fuerunt sollicitandi, qui sumtum editioni prae buerunt. Quos tamen vix habebō placatos, quod non adjeci *I. V. D. & Hist.* atque *Eloq. in Schola Daventr. Professoris*. Sed hoc a me impetrare non potui, ut paterer. Quid cogitabis, ubi legeris epigramma illud, ut Philoxenus de Dionysii Siculi versibus dicebat, οἰκτρὸν. Hanc poenam patimur verecundae frontis homines, ut parum liberi simus, & nos pariter amicosque risui exponamus, dum iratos esse illos nolumus. Tolerabilius esset, si primum distichon esset paullo Latinius. Satis aequus sum versificatorum censor: neque enim aut frigida & inepta prorsus probo, aut tantum exactissimis delector, quod fere vitium est vobis perfectis Poëtis. Amicus interim noster, quamquam neminem aestimet praeter Bellerophontem nostrum, qui tam feliciter Simonidis quaestuariam excercet, tuam tamen Elegiam quoque non displicere sibi ostendit, quam ego praecipuam partem operis puto: adeo differimus judiciis. Te vero parerga illa amittere volo, & ad id, in quo opus habeo cura & eruditione tua, accingi. Res per se tantae molis forte non est, eo tamen conspecta & insignis, quod tantos viros frustra, ut arbitror, exercuit. Quibus si tu me quoque dignum, ut adjungar, facies, tuis oculis fueris usus, & eris, quod fuisti saepe summa cum voluptate mea, magister mihi. *Pascasius Grosippus* vel *Gaspar Scioppius* meminit *Andr. Schotti* tabularum de re nummaria Antwerpiae excusarum, & alius operis, nescio quo titulo, a *Fulvio Ursino* confecti & editi. *Matthaeus Hostus* in lib. de numeratione emendata, quem allegavi, citat libros suos quinque de re nummaria Francfordiae ad Oderam publicatos, laudatque eosdem alicubi *Ritterhusius*, velut doctissimi viri. Hos nunquam vidi, & scire cupio, an eorum quid penes vos. Quae promisi ad Ovidium, mittam cum haec perlegeris: quod volo minime distincto fa-

I. Haec omissa est in altera editione, eo majore cum dispendio, quod nec inter Poëmata Heinſii reperiam: prima vero editio de Sestertiis non est ad manum.

facias animo. Elzevirii proxima occasione novam recipient textus Liviani partem, quod illis in transitu, si vacabit, indicatum velim. Si a patre breve responsum impetrabis mihi, erit id admodum gratum, nec sine causis certis id desidero. Vale, decus meum & me ama. Daventriae a. d. iv. Eid. Decemb. CIOIDCXLIII.

Cum has festinarem, nullas alias scribere mihi propositum erat: nunc paululum otii nactus, quas vides ad *Spanhemium* & *Boxhornium* τοῦς πάνυ exaravi, quas una cum libello illis haud gravatim trades. Non puto me amicorum communium quemquam oblitum illic, si quis est tamen, mone. Majori chartae impressa misissem plura, nisi maxima pars hîc in urbe maneret, hinc perpauca ablegandi mihi sit facultas. Quare, qui apud te forte videbunt exemplar augustius, cura ne sinistre interpretentur, quod par non acceperint.

EPISTOLA. CI.

NIC. HEINSIUS

J. Fr. Gronovio.

Daventriam.

Quae tempestates rem domesticam nobis exagitarint, ab eo tempore, quo postremas meas ad te dedi, Vir Clarissime, vix est ut tibi persuadeam. Nunc inter gaudia ac incredibiles dolores, nunc spes metusque versati, in tranquilliora ne nunc quidem evasimus. Animo tamen utcunque jam magis composito sumus. Sive quod spes rebus nostris melius affulget, sive quod ipse malorum usus confidentiores nos facit. A puerperio sororis auspicabor, quae cum & filiolum denuo peperisset, & Lucinam experta esset satis, ut tum videbatur, benignam, mirum, domus nostra quo in gaudio fuerit. Sic dies tres quatuorve abierunt. Interim puerperam febricula tentare coepit. Cujus cum primo nulla haberetur ratio, sic tamen cruduit paulatim, ut in febrim acutissimam crumperet: coque tandem desperationis Medicos adegit, ut vitae spem omnem projicerent. Accesserat & frequens *λεποθυμία*. Unde rumor de morte ejus non per totam modo urbem sparsus fuit, sed & ad ipsos nos pervenit, tam funestum nuncium ipsa ejus famula nobis attulerat, ut jam dubitationi locus superesse nullus videretur. Accurrimus ergo propere. Invenimus, non quidem mortuam, morti tamen proximam: vicinos circumstantes, nihil spei reliquum. Praeter expectationem tamen omnium post horas aliquot quasi revixit. Sic & aliquoties postea, minus tamen vehementer, tentata est. Et jam defaeviisse videbatur morbus, spesque aliqua apparebat; cum ecce aphthae, praesentissimum puerperis malum, nec levior aphthis diarrhoea viribus defectam certatim invasere. Hîc rursus desperare Medici. Vicere tamen preces nostrae apud clementissimum Deum, ut utrumque cessaret malum, cum nihil minus expectaretur. Jam cum febre adhuc luctandum erat

Q 2

Medi-

Medicis, quae manus quoque tandem dedit. Haec nondum ita erant, cum Dordraci adferuntur Literae, quibus nunciatur amitam nostram magnam *Mariam Musiam ab Holy* e vivis excessisse, matronam integerrimam. Hic (quod omnium crudelissimum) a charissima sorore discedendum erat, dubia adhuc & infirmac valetudinis, ut exequiis interesssem. Quam tamen reversus longe confirmatiorem offendi. Nunc e media quasi morte renata sensim convalescit. Aegrotat tamen infans, idque satis periculose, quem eo magis sospitem velim, quod aviti nominis haeredem agit. Uxori tuae, Vir Clarissime, puerperium felicius precor, nisi vota nostra jam praevenierit. Tale enim quid augurari videor, id quod proxime ex tuis intelligemus. Nunc ut ad te & lectissimum munus tuum veniamus, scias velim ac certo tibi persuadeas, nihil eo acceptius mitti mihi potuisse. Sive quod autor inter amicos meos primus est, sive quod libellum istum inter autoris scripta primum judicamus. Eum etsi avidissime animoque satis attento perlegerim, nondum tamen mihi satisfeci, quare iteranda erit lectio, cum turbae domesticae tranquillior mentem indulserint. Deus bone! qua dexteritate dispulisti fatales illas tenebras, quas longe intricatissimae in intricata re numaria quaestioni offuderant boni interpretes, dum facem ei se praeferre jactitant? Nunquam futurum credidissem, ut doctorum quisquam hac in re se mihi probaret. Tu vero plus praestitisti pagellis aliquot, quam vel ab ingenti volumine sperare potuissem. A *Scaligero* quoties dissentis, modestiam tuam exosculor. Etsi enim vix existimem, virum illum admirandum tantum unquam lucis huic quaestioni allaturum fuisse, quantum tu attulisti; dubium tamen mihi non est, quin, qua erat ingenii sagacitate, errores suos magna ex parte ipse correcturus fuerit, si ad libellum opus suum revocasset, quod morte praeventus non potuit. Nunc scriptum imperfectum habemus, ut pleraque herois illius posthuma. Quo magis, Vir Clarissime, te adhortor, ut de Re Numaria bene mereri porro pergas. Nam ¹ ² ³ ⁴ ⁵ ⁶ ⁷ ⁸ ⁹ ¹⁰ ¹¹ ¹² ¹³ ¹⁴ ¹⁵ ¹⁶ ¹⁷ ¹⁸ ¹⁹ ²⁰ ²¹ ²² ²³ ²⁴ ²⁵ ²⁶ ²⁷ ²⁸ ²⁹ ³⁰ ³¹ ³² ³³ ³⁴ ³⁵ ³⁶ ³⁷ ³⁸ ³⁹ ⁴⁰ ⁴¹ ⁴² ⁴³ ⁴⁴ ⁴⁵ ⁴⁶ ⁴⁷ ⁴⁸ ⁴⁹ ⁵⁰ ⁵¹ ⁵² ⁵³ ⁵⁴ ⁵⁵ ⁵⁶ ⁵⁷ ⁵⁸ ⁵⁹ ⁶⁰ ⁶¹ ⁶² ⁶³ ⁶⁴ ⁶⁵ ⁶⁶ ⁶⁷ ⁶⁸ ⁶⁹ ⁷⁰ ⁷¹ ⁷² ⁷³ ⁷⁴ ⁷⁵ ⁷⁶ ⁷⁷ ⁷⁸ ⁷⁹ ⁸⁰ ⁸¹ ⁸² ⁸³ ⁸⁴ ⁸⁵ ⁸⁶ ⁸⁷ ⁸⁸ ⁸⁹ ⁹⁰ ⁹¹ ⁹² ⁹³ ⁹⁴ ⁹⁵ ⁹⁶ ⁹⁷ ⁹⁸ ⁹⁹ ¹⁰⁰ ¹⁰¹ ¹⁰² ¹⁰³ ¹⁰⁴ ¹⁰⁵ ¹⁰⁶ ¹⁰⁷ ¹⁰⁸ ¹⁰⁹ ¹¹⁰ ¹¹¹ ¹¹² ¹¹³ ¹¹⁴ ¹¹⁵ ¹¹⁶ ¹¹⁷ ¹¹⁸ ¹¹⁹ ¹²⁰ ¹²¹ ¹²² ¹²³ ¹²⁴ ¹²⁵ ¹²⁶ ¹²⁷ ¹²⁸ ¹²⁹ ¹³⁰ ¹³¹ ¹³² ¹³³ ¹³⁴ ¹³⁵ ¹³⁶ ¹³⁷ ¹³⁸ ¹³⁹ ¹⁴⁰ ¹⁴¹ ¹⁴² ¹⁴³ ¹⁴⁴ ¹⁴⁵ ¹⁴⁶ ¹⁴⁷ ¹⁴⁸ ¹⁴⁹ ¹⁵⁰ ¹⁵¹ ¹⁵² ¹⁵³ ¹⁵⁴ ¹⁵⁵ ¹⁵⁶ ¹⁵⁷ ¹⁵⁸ ¹⁵⁹ ¹⁶⁰ ¹⁶¹ ¹⁶² ¹⁶³ ¹⁶⁴ ¹⁶⁵ ¹⁶⁶ ¹⁶⁷ ¹⁶⁸ ¹⁶⁹ ¹⁷⁰ ¹⁷¹ ¹⁷² ¹⁷³ ¹⁷⁴ ¹⁷⁵ ¹⁷⁶ ¹⁷⁷ ¹⁷⁸ ¹⁷⁹ ¹⁸⁰ ¹⁸¹ ¹⁸² ¹⁸³ ¹⁸⁴ ¹⁸⁵ ¹⁸⁶ ¹⁸⁷ ¹⁸⁸ ¹⁸⁹ ¹⁹⁰ ¹⁹¹ ¹⁹² ¹⁹³ ¹⁹⁴ ¹⁹⁵ ¹⁹⁶ ¹⁹⁷ ¹⁹⁸ ¹⁹⁹ ²⁰⁰ ²⁰¹ ²⁰² ²⁰³ ²⁰⁴ ²⁰⁵ ²⁰⁶ ²⁰⁷ ²⁰⁸ ²⁰⁹ ²¹⁰ ²¹¹ ²¹² ²¹³ ²¹⁴ ²¹⁵ ²¹⁶ ²¹⁷ ²¹⁸ ²¹⁹ ²²⁰ ²²¹ ²²² ²²³ ²²⁴ ²²⁵ ²²⁶ ²²⁷ ²²⁸ ²²⁹ ²³⁰ ²³¹ ²³² ²³³ ²³⁴ ²³⁵ ²³⁶ ²³⁷ ²³⁸ ²³⁹ ²⁴⁰ ²⁴¹ ²⁴² ²⁴³ ²⁴⁴ ²⁴⁵ ²⁴⁶ ²⁴⁷ ²⁴⁸ ²⁴⁹ ²⁵⁰ ²⁵¹ ²⁵² ²⁵³ ²⁵⁴ ²⁵⁵ ²⁵⁶ ²⁵⁷ ²⁵⁸ ²⁵⁹ ²⁶⁰ ²⁶¹ ²⁶² ²⁶³ ²⁶⁴ ²⁶⁵ ²⁶⁶ ²⁶⁷ ²⁶⁸ ²⁶⁹ ²⁷⁰ ²⁷¹ ²⁷² ²⁷³ ²⁷⁴ ²⁷⁵ ²⁷⁶ ²⁷⁷ ²⁷⁸ ²⁷⁹ ²⁸⁰ ²⁸¹ ²⁸² ²⁸³ ²⁸⁴ ²⁸⁵ ²⁸⁶ ²⁸⁷ ²⁸⁸ ²⁸⁹ ²⁹⁰ ²⁹¹ ²⁹² ²⁹³ ²⁹⁴ ²⁹⁵ ²⁹⁶ ²⁹⁷ ²⁹⁸ ²⁹⁹ ³⁰⁰ ³⁰¹ ³⁰² ³⁰³ ³⁰⁴ ³⁰⁵ ³⁰⁶ ³⁰⁷ ³⁰⁸ ³⁰⁹ ³¹⁰ ³¹¹ ³¹² ³¹³ ³¹⁴ ³¹⁵ ³¹⁶ ³¹⁷ ³¹⁸ ³¹⁹ ³²⁰ ³²¹ ³²² ³²³ ³²⁴ ³²⁵ ³²⁶ ³²⁷ ³²⁸ ³²⁹ ³³⁰ ³³¹ ³³² ³³³ ³³⁴ ³³⁵ ³³⁶ ³³⁷ ³³⁸ ³³⁹ ³⁴⁰ ³⁴¹ ³⁴² ³⁴³ ³⁴⁴ ³⁴⁵ ³⁴⁶ ³⁴⁷ ³⁴⁸ ³⁴⁹ ³⁵⁰ ³⁵¹ ³⁵² ³⁵³ ³⁵⁴ ³⁵⁵ ³⁵⁶ ³⁵⁷ ³⁵⁸ ³⁵⁹ ³⁶⁰ ³⁶¹ ³⁶² ³⁶³ ³⁶⁴ ³⁶⁵ ³⁶⁶ ³⁶⁷ ³⁶⁸ ³⁶⁹ ³⁷⁰ ³⁷¹ ³⁷² ³⁷³ ³⁷⁴ ³⁷⁵ ³⁷⁶ ³⁷⁷ ³⁷⁸ ³⁷⁹ ³⁸⁰ ³⁸¹ ³⁸² ³⁸³ ³⁸⁴ ³⁸⁵ ³⁸⁶ ³⁸⁷ ³⁸⁸ ³⁸⁹ ³⁹⁰ ³⁹¹ ³⁹² ³⁹³ ³⁹⁴ ³⁹⁵ ³⁹⁶ ³⁹⁷ ³⁹⁸ ³⁹⁹ ⁴⁰⁰ ⁴⁰¹ ⁴⁰² ⁴⁰³ ⁴⁰⁴ ⁴⁰⁵ ⁴⁰⁶ ⁴⁰⁷ ⁴⁰⁸ ⁴⁰⁹ ⁴¹⁰ ⁴¹¹ ⁴¹² ⁴¹³ ⁴¹⁴ ⁴¹⁵ ⁴¹⁶ ⁴¹⁷ ⁴¹⁸ ⁴¹⁹ ⁴²⁰ ⁴²¹ ⁴²² ⁴²³ ⁴²⁴ ⁴²⁵ ⁴²⁶ ⁴²⁷ ⁴²⁸ ⁴²⁹ ⁴³⁰ ⁴³¹ ⁴³² ⁴³³ ⁴³⁴ ⁴³⁵ ⁴³⁶ ⁴³⁷ ⁴³⁸ ⁴³⁹ ⁴⁴⁰ ⁴⁴¹ ⁴⁴² ⁴⁴³ ⁴⁴⁴ ⁴⁴⁵ ⁴⁴⁶ ⁴⁴⁷ ⁴⁴⁸ ⁴⁴⁹ ⁴⁵⁰ ⁴⁵¹ ⁴⁵² ⁴⁵³ ⁴⁵⁴ ⁴⁵⁵ ⁴⁵⁶ ⁴⁵⁷ ⁴⁵⁸ ⁴⁵⁹ ⁴⁶⁰ ⁴⁶¹ ⁴⁶² ⁴⁶³ ⁴⁶⁴ ⁴⁶⁵ ⁴⁶⁶ ⁴⁶⁷ ⁴⁶⁸ ⁴⁶⁹ ⁴⁷⁰ ⁴⁷¹ ⁴⁷² ⁴⁷³ ⁴⁷⁴ ⁴⁷⁵ ⁴⁷⁶ ⁴⁷⁷ ⁴⁷⁸ ⁴⁷⁹ ⁴⁸⁰ ⁴⁸¹ ⁴⁸² ⁴⁸³ ⁴⁸⁴ ⁴⁸⁵ ⁴⁸⁶ ⁴⁸⁷ ⁴⁸⁸ ⁴⁸⁹ ⁴⁹⁰ ⁴⁹¹ ⁴⁹² ⁴⁹³ ⁴⁹⁴ ⁴⁹⁵ ⁴⁹⁶ ⁴⁹⁷ ⁴⁹⁸ ⁴⁹⁹ ⁵⁰⁰ ⁵⁰¹ ⁵⁰² ⁵⁰³ ⁵⁰⁴ ⁵⁰⁵ ⁵⁰⁶ ⁵⁰⁷ ⁵⁰⁸ ⁵⁰⁹ ⁵¹⁰ ⁵¹¹ ⁵¹² ⁵¹³ ⁵¹⁴ ⁵¹⁵ ⁵¹⁶ ⁵¹⁷ ⁵¹⁸ ⁵¹⁹ ⁵²⁰ ⁵²¹ ⁵²² ⁵²³ ⁵²⁴ ⁵²⁵ ⁵²⁶ ⁵²⁷ ⁵²⁸ ⁵²⁹ ⁵³⁰ ⁵³¹ ⁵³² ⁵³³ ⁵³⁴ ⁵³⁵ ⁵³⁶ ⁵³⁷ ⁵³⁸ ⁵³⁹ ⁵⁴⁰ ⁵⁴¹ ⁵⁴² ⁵⁴³ ⁵⁴⁴ ⁵⁴⁵ ⁵⁴⁶ ⁵⁴⁷ ⁵⁴⁸ ⁵⁴⁹ ⁵⁵⁰ ⁵⁵¹ ⁵⁵² ⁵⁵³ ⁵⁵⁴ ⁵⁵⁵ ⁵⁵⁶ ⁵⁵⁷ ⁵⁵⁸ ⁵⁵⁹ ⁵⁶⁰ ⁵⁶¹ ⁵⁶² ⁵⁶³ ⁵⁶⁴ ⁵⁶⁵ ⁵⁶⁶ ⁵⁶⁷ ⁵⁶⁸ ⁵⁶⁹ ⁵⁷⁰ ⁵⁷¹ ⁵⁷² ⁵⁷³ ⁵⁷⁴ ⁵⁷⁵ ⁵⁷⁶ ⁵⁷⁷ ⁵⁷⁸ ⁵⁷⁹ ⁵⁸⁰ ⁵⁸¹ ⁵⁸² ⁵⁸³ ⁵⁸⁴ ⁵⁸⁵ ⁵⁸⁶ ⁵⁸⁷ ⁵⁸⁸ ⁵⁸⁹ ⁵⁹⁰ ⁵⁹¹ ⁵⁹² ⁵⁹³ ⁵⁹⁴ ⁵⁹⁵ ⁵⁹⁶ ⁵⁹⁷ ⁵⁹⁸ ⁵⁹⁹ ⁶⁰⁰ ⁶⁰¹ ⁶⁰² ⁶⁰³ ⁶⁰⁴ ⁶⁰⁵ ⁶⁰⁶ ⁶⁰⁷ ⁶⁰⁸ ⁶⁰⁹ ⁶¹⁰ ⁶¹¹ ⁶¹² ⁶¹³ ⁶¹⁴ ⁶¹⁵ ⁶¹⁶ ⁶¹⁷ ⁶¹⁸ ⁶¹⁹ ⁶²⁰ ⁶²¹ ⁶²² ⁶²³ ⁶²⁴ ⁶²⁵ ⁶²⁶ ⁶²⁷ ⁶²⁸ ⁶²⁹ ⁶³⁰ ⁶³¹ ⁶³² ⁶³³ ⁶³⁴ ⁶³⁵ ⁶³⁶ ⁶³⁷ ⁶³⁸ ⁶³⁹ ⁶⁴⁰ ⁶⁴¹ ⁶⁴² ⁶⁴³ ⁶⁴⁴ ⁶⁴⁵ ⁶⁴⁶ ⁶⁴⁷ ⁶⁴⁸ ⁶⁴⁹ ⁶⁵⁰ ⁶⁵¹ ⁶⁵² ⁶⁵³ ⁶⁵⁴ ⁶⁵⁵ ⁶⁵⁶ ⁶⁵⁷ ⁶⁵⁸ ⁶⁵⁹ ⁶⁶⁰ ⁶⁶¹ ⁶⁶² ⁶⁶³ ⁶⁶⁴ ⁶⁶⁵ ⁶⁶⁶ ⁶⁶⁷ ⁶⁶⁸ ⁶⁶⁹ ⁶⁷⁰ ⁶⁷¹ ⁶⁷² ⁶⁷³ ⁶⁷⁴ ⁶⁷⁵ ⁶⁷⁶ ⁶⁷⁷ ⁶⁷⁸ ⁶⁷⁹ ⁶⁸⁰ ⁶⁸¹ ⁶⁸² ⁶⁸³ ⁶⁸⁴ ⁶⁸⁵ ⁶⁸⁶ ⁶⁸⁷ ⁶⁸⁸ ⁶⁸⁹ ⁶⁹⁰ ⁶⁹¹ ⁶⁹² ⁶⁹³ ⁶⁹⁴ ⁶⁹⁵ ⁶⁹⁶ ⁶⁹⁷ ⁶⁹⁸ ⁶⁹⁹ ⁷⁰⁰ ⁷⁰¹ ⁷⁰² ⁷⁰³ ⁷⁰⁴ ⁷⁰⁵ ⁷⁰⁶ ⁷⁰⁷ ⁷⁰⁸ ⁷⁰⁹ ⁷¹⁰ ⁷¹¹ ⁷¹² ⁷¹³ ⁷¹⁴ ⁷¹⁵ ⁷¹⁶ ⁷¹⁷ ⁷¹⁸ ⁷¹⁹ ⁷²⁰ ⁷²¹ ⁷²² ⁷²³ ⁷²⁴ ⁷²⁵ ⁷²⁶ ⁷²⁷ ⁷²⁸ ⁷²⁹ ⁷³⁰ ⁷³¹ ⁷³² ⁷³³ ⁷³⁴ ⁷³⁵ ⁷³⁶ ⁷³⁷ ⁷³⁸ ⁷³⁹ ⁷⁴⁰ ⁷⁴¹ ⁷⁴² ⁷⁴³ ⁷⁴⁴ ⁷⁴⁵ ⁷⁴⁶ ⁷⁴⁷ ⁷⁴⁸ ⁷⁴⁹ ⁷⁵⁰ ⁷⁵¹ ⁷⁵² ⁷⁵³ ⁷⁵⁴ ⁷⁵⁵ ⁷⁵⁶ ⁷⁵⁷ ⁷⁵⁸ ⁷⁵⁹ ⁷⁶⁰ ⁷⁶¹ ⁷⁶² ⁷⁶³ ⁷⁶⁴ ⁷⁶⁵ ⁷⁶⁶ ⁷⁶⁷ ⁷⁶⁸ ⁷⁶⁹ ⁷⁷⁰ ⁷⁷¹ ⁷⁷² ⁷⁷³ ⁷⁷⁴ ⁷⁷⁵ ⁷⁷⁶ ⁷⁷⁷ ⁷⁷⁸ ⁷⁷⁹ ⁷⁸⁰ ⁷⁸¹ ⁷⁸² ⁷⁸³ ⁷⁸⁴ ⁷⁸⁵ ⁷⁸⁶ ⁷⁸⁷ ⁷⁸⁸ ⁷⁸⁹ ⁷⁹⁰ ⁷⁹¹ ⁷⁹² ⁷⁹³ ⁷⁹⁴ ⁷⁹⁵ ⁷⁹⁶ ⁷⁹⁷ ⁷⁹⁸ ⁷⁹⁹ ⁸⁰⁰ ⁸⁰¹ ⁸⁰² ⁸⁰³ ⁸⁰⁴ ⁸⁰⁵ ⁸⁰⁶ ⁸⁰⁷ ⁸⁰⁸ ⁸⁰⁹ ⁸¹⁰ ⁸¹¹ ⁸¹² ⁸¹³ ⁸¹⁴ ⁸¹⁵ ⁸¹⁶ ⁸¹⁷ ⁸¹⁸ ⁸¹⁹ ⁸²⁰ ⁸²¹ ⁸²² ⁸²³ ⁸²⁴ ⁸²⁵ ⁸²⁶ ⁸²⁷ ⁸²⁸ ⁸²⁹ ⁸³⁰ ⁸³¹ ⁸³² ⁸³³ ⁸³⁴ ⁸³⁵ ⁸³⁶ ⁸³⁷ ⁸³⁸ ⁸³⁹ ⁸⁴⁰ ⁸⁴¹ ⁸⁴² ⁸⁴³ ⁸⁴⁴ ⁸⁴⁵ ⁸⁴⁶ ⁸⁴⁷ ⁸⁴⁸ ⁸⁴⁹ ⁸⁵⁰ ⁸⁵¹ ⁸⁵² ⁸⁵³ ⁸⁵⁴ ⁸⁵⁵ ⁸⁵⁶ ⁸⁵⁷ ⁸⁵⁸ ⁸⁵⁹ ⁸⁶⁰ ⁸⁶¹ ⁸⁶² ⁸⁶³ ⁸⁶⁴ ⁸⁶⁵ ⁸⁶⁶ ⁸⁶⁷ ⁸⁶⁸ ⁸⁶⁹ ⁸⁷⁰ ⁸⁷¹ ⁸⁷² ⁸⁷³ ⁸⁷⁴ ⁸⁷⁵ ⁸⁷⁶ ⁸⁷⁷ ⁸⁷⁸ ⁸⁷⁹ ⁸⁸⁰ ⁸⁸¹ ⁸⁸² ⁸⁸³ ⁸⁸⁴ ⁸⁸⁵ ⁸⁸⁶ ⁸⁸⁷ ⁸⁸⁸ ⁸⁸⁹ ⁸⁹⁰ ⁸⁹¹ ⁸⁹² ⁸⁹³ ⁸⁹⁴ ⁸⁹⁵ ⁸⁹⁶ ⁸⁹⁷ ⁸⁹⁸ ⁸⁹⁹ ⁹⁰⁰ ⁹⁰¹ ⁹⁰² ⁹⁰³ ⁹⁰⁴ ⁹⁰⁵ ⁹⁰⁶ ⁹⁰⁷ ⁹⁰⁸ ⁹⁰⁹ ⁹¹⁰ ⁹¹¹ ⁹¹² ⁹¹³ ⁹¹⁴ ⁹¹⁵ ⁹¹⁶ ⁹¹⁷ ⁹¹⁸ ⁹¹⁹ ⁹²⁰ ⁹²¹ ⁹²² ⁹²³ ⁹²⁴ ⁹²⁵ ⁹²⁶ ⁹²⁷ ⁹²⁸ ⁹²⁹ ⁹³⁰ ⁹³¹ ⁹³² ⁹³³ ⁹³⁴ ⁹³⁵ ⁹³⁶ ⁹³⁷ ⁹³⁸ ⁹³⁹ ⁹⁴⁰ ⁹⁴¹ ⁹⁴² ⁹⁴³ ⁹⁴⁴ ⁹⁴⁵ ⁹⁴⁶ ⁹⁴⁷ ⁹⁴⁸ ⁹⁴⁹ ⁹⁵⁰ ⁹⁵¹ ⁹⁵² ⁹⁵³ ⁹⁵⁴ ⁹⁵⁵ ⁹⁵⁶ ⁹⁵⁷ ⁹⁵⁸ ⁹⁵⁹ ⁹⁶⁰ ⁹⁶¹ ⁹⁶² ⁹⁶³ ⁹⁶⁴ ⁹⁶⁵ ⁹⁶⁶ ⁹⁶⁷ ⁹⁶⁸ ⁹⁶⁹ ⁹⁷⁰ ⁹⁷¹ ⁹⁷² ⁹⁷³ ⁹⁷⁴ ⁹⁷⁵ ⁹⁷⁶ ⁹⁷⁷ ⁹⁷⁸ ⁹⁷⁹ ⁹⁸⁰ ⁹⁸¹ ⁹⁸² ⁹⁸³ ⁹⁸⁴ ⁹⁸⁵ ⁹⁸⁶ ⁹⁸⁷ ⁹⁸⁸ ⁹⁸⁹ ⁹⁹⁰ ⁹⁹¹ ⁹⁹² ⁹⁹³ ⁹⁹⁴ ⁹⁹⁵ ⁹⁹⁶ ⁹⁹⁷ ⁹⁹⁸ ⁹⁹⁹ ¹⁰⁰⁰ ¹⁰⁰¹ ¹⁰⁰² ¹⁰⁰³ ¹⁰⁰⁴ ¹⁰⁰⁵ ¹⁰⁰⁶ ¹⁰⁰⁷ ¹⁰⁰⁸ ¹⁰⁰⁹ ¹⁰¹⁰ ¹⁰¹¹ ¹⁰¹² ¹⁰¹³ ¹⁰¹⁴ ¹⁰¹⁵ ¹⁰¹⁶ ¹⁰¹⁷ ¹⁰¹⁸ ¹⁰¹⁹ ¹⁰²⁰ ¹⁰²¹ ¹⁰²² ¹⁰²³ ¹⁰²⁴ ¹⁰²⁵ ¹⁰²⁶ ¹⁰²⁷ ¹⁰²⁸ ¹⁰²⁹ ¹⁰³⁰ ¹⁰³¹ ¹⁰³² ¹⁰³³ ¹⁰³⁴ ¹⁰³⁵ ¹⁰³⁶ ¹⁰³⁷ ¹⁰³⁸ ¹⁰³⁹ ¹⁰⁴⁰ ¹⁰⁴¹ ¹⁰⁴² ¹⁰⁴³ ¹⁰⁴⁴ ¹⁰⁴⁵ ¹⁰⁴⁶ ¹⁰⁴⁷ ¹⁰⁴⁸ ¹⁰⁴⁹ ¹⁰⁵⁰ ¹⁰⁵¹ ¹⁰⁵² ¹⁰⁵³ ¹⁰⁵⁴ ¹⁰⁵⁵ ¹⁰⁵⁶ ¹⁰⁵⁷ ¹⁰⁵⁸ ¹⁰⁵⁹ ¹⁰⁶⁰ ¹⁰⁶¹ ¹⁰⁶² ¹⁰⁶³ ¹⁰⁶⁴ ¹⁰⁶⁵ ¹⁰⁶⁶ ¹⁰⁶⁷ ¹⁰⁶⁸ ¹⁰⁶⁹ ¹⁰⁷⁰ ¹⁰⁷¹ ¹⁰⁷² ¹⁰⁷³ ¹⁰⁷⁴ ¹⁰⁷⁵ ¹⁰⁷⁶ ¹⁰⁷⁷ ¹⁰⁷⁸ ¹⁰⁷⁹ ¹⁰⁸⁰ ¹⁰⁸¹ ¹⁰⁸² ¹⁰⁸³ ¹⁰⁸⁴ ¹⁰⁸⁵ ¹⁰⁸⁶ ¹⁰⁸⁷ ¹⁰⁸⁸ ¹⁰⁸⁹ ¹⁰⁹⁰ ¹⁰⁹¹ ¹⁰⁹² ¹⁰⁹³ ¹⁰⁹⁴ ¹⁰⁹⁵ ¹⁰⁹⁶ ¹⁰⁹⁷ ¹⁰⁹⁸ ¹⁰⁹⁹ ¹¹⁰⁰ ¹¹⁰¹ ¹¹⁰² ¹¹⁰³ ¹¹⁰⁴ ¹¹⁰⁵ ¹¹⁰⁶ ¹¹⁰⁷ ¹¹⁰⁸ ¹¹⁰⁹ ¹¹¹⁰ ¹¹¹¹ ¹¹¹² ¹¹¹³ ¹¹¹⁴ ¹¹¹⁵ ¹¹¹⁶ ¹¹¹⁷ ¹¹¹⁸ ¹¹¹⁹ ¹¹²⁰ ¹¹²¹ ¹¹²² ¹¹²³ ¹¹²⁴ ¹¹²⁵ ¹¹²⁶ ¹¹²⁷ ¹¹²⁸ ¹¹²⁹ ¹¹³⁰ ¹¹³¹ ¹¹³² ¹¹³³ ¹¹³⁴ ¹¹³⁵ ¹¹³⁶ ¹¹³⁷ ¹¹³⁸ ¹¹³⁹ ¹¹⁴⁰ ¹¹⁴¹ ¹¹⁴² ¹¹⁴³ ¹¹⁴⁴ ¹¹⁴⁵ ¹¹⁴⁶ ¹¹⁴⁷ ¹¹⁴⁸ ¹¹⁴⁹ ¹¹⁵⁰ ¹¹⁵¹ ¹¹⁵² ¹¹⁵³ ¹¹⁵⁴ ¹¹⁵⁵ ¹¹⁵⁶ ¹¹⁵⁷ ¹¹⁵⁸ ¹¹⁵⁹ ¹¹⁶⁰ ¹¹⁶¹ ¹¹⁶² ¹¹⁶³ ¹¹⁶⁴ ¹¹⁶⁵ ¹¹⁶⁶ ¹¹⁶⁷ ¹¹⁶⁸ ¹¹⁶⁹ ¹¹⁷⁰ ¹¹⁷¹ ¹¹⁷² ¹¹⁷³ ¹¹⁷⁴ ¹¹⁷⁵ ¹¹⁷⁶ ¹¹⁷⁷ ¹¹⁷⁸ ¹¹⁷⁹ ¹¹⁸⁰ ¹¹⁸¹ ¹¹⁸² ¹¹⁸³ ¹¹⁸⁴ ¹¹⁸⁵ ¹¹⁸⁶ ¹¹⁸⁷ ¹¹⁸⁸ ¹¹⁸⁹ ¹¹⁹⁰ ¹¹⁹¹ ¹¹⁹² ¹¹⁹³ ¹¹⁹⁴ ¹¹⁹⁵ ¹¹⁹⁶ ¹¹⁹⁷ ¹¹⁹⁸ ¹¹⁹⁹ ¹²⁰⁰ ¹²⁰¹ ¹²⁰² ¹²⁰³ ¹²⁰⁴ ¹²⁰⁵ ¹²⁰⁶ ¹²⁰⁷ ¹²⁰⁸ ¹²⁰⁹ ¹²¹⁰ ¹²¹¹ ¹²¹² ¹²¹³ ¹²¹⁴ ¹²¹⁵ ¹²¹⁶ ¹²¹⁷ ¹²¹⁸ ¹²¹⁹ ¹²²⁰ ¹²²¹ ¹²²² ¹²²³ ¹²²⁴ ¹²²⁵ ¹²²⁶ ¹²²⁷ ¹²²⁸ ¹²²⁹ ¹²³⁰ ¹²³¹ ¹²³² ¹²³³ ¹²³⁴ ¹²³⁵ ¹²³⁶ ¹²³⁷ ¹²³⁸ ¹²³⁹ ¹²⁴⁰ ¹²⁴¹ ¹²⁴² ¹²⁴³ ¹²⁴⁴ ¹²⁴⁵ ¹²⁴⁶ ¹²⁴⁷ ¹²⁴⁸ ¹²⁴⁹ ¹²⁵⁰ ¹²⁵¹ ¹²⁵² ¹²⁵³ ¹²⁵⁴ ¹²⁵⁵ ¹²⁵⁶ ¹²⁵⁷ ¹²⁵⁸ ¹²⁵⁹ ¹²⁶⁰ ¹²⁶¹ ¹²⁶² ¹²⁶³ ¹²⁶⁴ ¹²⁶⁵ ¹²⁶⁶ ¹²⁶⁷ ¹²⁶⁸ ¹²⁶⁹ ¹²⁷⁰ ¹²⁷¹ ¹²⁷² ¹²⁷³ ¹²⁷⁴ ¹²⁷⁵ ¹²⁷⁶ ¹²⁷⁷ <

bellum ab ipso, nisi fallor, publicatum. *Matthaei Hosti* librum Francofurti editum, nec vidi, nec prodiisse ullibi scirem, nisi tu id nunc monuisses, quare diligenter inquiram, si fortassis apud aliquem ex amicis offendero. Tua non minus esse, quae possideo, omnia, quam mea sunt, nescire te nolo, Vir Clarissime. Recte ergo, ac pro ea, quae jamdudum inter nos est, necessitudine feceris, si amici hujus tui opera, cum in hac, tum alia quacunque re audacter usus fueris, quo quidem nomine vehementer mihi gratulabor. Gestio enim unice affectum hunc meum tibi probare. Id quod haecenus non licuit. Nam quod Elegia ista nupera satisfecisse tibi visa est, metuo ne plus amoris in me tuo, quam politissimo judicio dederis. Cujus si rationem habuisses, nihil profecto causae erat, cur hunc tam inficetum centonem purpurae tuae intexuisses. Rectius sane judicabat amicus ille noster, Aristarchus optimus, quem postremis tuis innuebas. Interim plurimum tibi debeo, qui existimationem jam in tuto collocatam doctorum denuo censurae exponere maluisti, quam jejunos aliquot versus amici capitis suppressere. Quod feliciter tamen tibi successit, quam successurum arbitrabar. Inveni enim, qui laudarent Elegiam, nonnullos viros satis eruditos; non quod revera laudem mereretur illa, sed quia dissentire a te nollent. Nihil enim facilius, quam versus illepidos pro bonis nunc orbi obtrudere. Tam pauci sunt, qui aliquem verae poësis gustum vel ostentare possint, etiam inter illos, quos poëtas esse, de se jam creditur ipsis. Ego horas illas, quas lectioni poëtarum veterum impendi sane plurimas, vel hoc nomine non male collocatas censeo, quod versificatorum nostrorum ineptias ridere jam possum & contemnere. Ovidium in manus sumere, de quo nuper scripseram, propter turbas domesticas haecenus vix licuit. Inceperam tamen observata & collationes meas colligere, ut sub uno quasi aspectu haberem omnia, quo labore defunctus, notas ipsas facile describere potuissem, dum in textu excudendo occuparentur operae. Et jam ad Artem Amatoriam perveneram, cujus liber primus Oxoniae olim a me cum longe optimo ac veterrimo codice collatus. Quae excerpta dum inter schedas meas quaero, sive negligentia mea alicubi seposita, sive, quod potius existimem, ab amicorum aliquo mihi sublecta, certe haecenus non inventa, ecce sororis supervernit morbus, qui omnem mihi de Ovidio meo cogitationem prorsus excussit. Idque eo magis, quod aegerrime jacturam excerptorum istorum ferrem, quae reliquorum omnium manuscriptorum, quibus usus sum, instar mihi erat. Collationes tamen tuas, promissas mihi nuper, ubi miseris, ad pensum meum denuo revertar. Utar autem iis ea fide, qua amicissimum tibi hominem par est. Nam quod exemplum ¹ Curtiani Editoris te terret, qui pro beneficio, quod a te acceperat sane luculentum, injuriam non minorem reddidit, vide, ne non similis illi sim. Si is essem ego, qui famam ex aliorum contemptu aut ignominia aucuparer, ejus auspiciu ab amicis capere nihil necesse erat. Habeo excerpta quaedam penes me, ² illius viri, qui se capitalem hostem nostrum profitetur, mirum, quam larga ibi materies illi insultandi,

Q 3

¹ Vid. ad Epist. LXXXVII. ² *Salmasii*.

di, quod nemo negaverit, jure a me fieri posse, cum idem ille jam egerit in Simplicio parentis mei. Non sum tamen adeo vindictae cupidus, ut beneficio, quamvis, & parvo, & quod ipso ignorante mihi obtigit, abusus fuisse apud quenquam dici velim. Videbis ergo saepius eum laudatum, reprehensum nunquam: nisi fortassis, ubi conjecturas suas publice proposuit. Idque tam modeste, ut ne erga amicum quidem clementior esse possim. Meditabar conjecturas in Ovidio aliquot meas hîc subjicere, sed video jamdudum Epistolae me modum excessisse, quare in publica commoda non diutius peccabo. Vale, Vir Celeberrime, & amore solito me complecti porro dignare. Lugd. Batavorum Anno *MDCCXLIV.* xv. Januarii.

Ovidium a Politiano collatum Florentiae extare jam me monuerat *Isaacus* noster. Habeo penes me *Caroli Viviani* in Metamorphosin emendationes Venetiis Anno *MCCCCXXXI.* editas, quas eo pluris facio, quod nemini interpretum visae sint, nec sane quisquam melius illo de hac Operum Ovidianorum parte meritus est, si unum *Naugerium* excipias. Facit is frequentissimam Codicis istius Politianaci mentionem, multasque viri summi emendationes in Metamorphosin profert, quo facilius jactura illius tomi, qui quantum ex tuis colligo, nunc in Bibliotheca Dominicanorum Florentiae non extat, quia abunde eo usus videtur Vivianus. Literas *Spanhemii* & *Boxhornii* promissas mittam proxime. Illum, frustra aliquoties quaesitum, domi non offendi, nec audebam diutius responsum ad te meum differre. *Boxhornium* nostrum, ut procrastinator est insignis, toties de eadem re monere jam taedebat. Iterum Vale.

E P I S T O L A C I I.

J. F R. G R O N O V I U S

*Nic. Heinsio.**Leidam.*

Nobilissime & Ornatissime juvenum. Ne vivam, nisi gratissimae fuerunt mihi postremae tuae, sed in exordio earum poene sum exanimatus, dum diu, quod abominor, exspecto, an potius vereor. Gratias Deo immortalî, qui tam acerbo luctu tot praestantes, & ut defaecatae semper ac serenae sint dignissimas animas, ferire noluit. Eundem precor, ut hoc metu omnibus in multos dies adversis defuncti sitis. Mihi ex a. d. vii. Id. Decembr. quod augurabaris, aucta domus est: velit Deus vitale esse, quod natum est, sexu matri, vultu patri, τὰ πάντα, ut ajunt, ἐμφρῆς. Etiam quod non mediocri gaudio fuit, quantum permiserunt labores, sana usque & firma fuit puerpera, ac nunc alendi educandique operam fortiter sustinet. Non poenituisse te praefigi commentario de Sestertiis magnopere laetor, ut qui judicium tuum, quamvis

vis de nostris id plerumque iusto benignius cadat, faciam maximi. Scio enim paucos esse, qui illis oculis, tam instructa mente, quam tibi datum est, & legant & cognoscant. Mihi quidem scribenti, quod forsan edatur quandoque, semper obversantur quidam secreto modestiam dictitantes, etiam ubi fiducia sum maxima: de quibus identidem cogito: Quid autem de his videbitur illi & illi? Me decipiam licet: talibus fucum facere non potero. Adfirmo sancte, te inter hos satis honestum tueri locum. Placet etiam, quod in disputando contra magnos viros, & illum praecipue, quem designas, non excidisse me censes destinatione mea: quae profecto non est, non dico, heroibus, sed vel mediocriter meritis detrahare. Ideo libenter bona eorum, quae ad institutum pertinerent, commemoravi: quod contra vulgo etiam magni homines bonis utuntur, sed in malis reprehendendis auctores nominant. Nisi feriae me defecissent, paululum etiam produxissim opusculum: restant enim quaedam non omnino inepta: sed quia morosissimus sum in iis, quae exponi patior, de illis satis otiose inter diversas curas expendendis desperabam: itaque prodicere iis diem satius duxi. Ob indicem auctorum de re nummaria valde amo te: *Scotto* ex illis & *Hotomanno* aliquantulum uti velim: nam posteriorem nuper, haud commode sane, in promptu non habui, & excerptis, quae *Cadomi* (quo, dum in portu *Gratiae* sive *Franciscopoli*, ut *Thuanus* appellat, ventis impediti moramur, excurrerem) subitaria opera feceram, contentum esse oportuit. Quid vis autem narrem tibi de *Octavio* tuo, cui interea familiaris factus sum nimis? Equidem hos plusculos dies ita implicitus togae fui, ut exitum diu reperirem nullum, & *Agamemnonis* fatum timerem; quamvis *Clytaemnestram* domi non habeam. Nunc tamen videor poene vestire cam posse, & quidem convenientius, atque adhuc ab doctoribus nostris est factum. De *sinu* aut *sinubus*, ut illi volunt, apud *Fabium*, de *umbone* apud *Tertullianum*, de *Gabino cinctu* aliisque longe aliter statuo: pauca denique totius libri primi sunt capita, in quibus non aliquod desiderem, multa, quae manifestorum errorum convincimus. Expectasne? Sed non audeo promittere, tum conscius tenuitatis meae, tum quod αἰδέομαι τῶας, atque ipsum in primis *Polydamantem*. Interim iuva me in *Plinii* loco lib. VIII. cap. XLVIII. *Lanae & per se coactae vestem faciunt, & si addatur acetum, etiam ferro resistunt: imo vero etiam ignibus, novissimo sui purgamento: quippe AHENIS POLIENTIUM extracta IN TOMENTI USUM veniunt, Galliarum, ut arbitror, invento.* De hoc doctus noster *Ferrarius* plenum ineptiis caput exstruxit. Ait autem ἀντὶ τοῦ polientium in MSS. esse coquentium. De quo filet, post quem ille certe hic filere potuisset ad *Solinum*. Nos scribimus: *Novissimo sui purgamento quoque hamis polientium extracta.* Aut certe: *e lanis polientium extracta.* Nam pro *ahenis* olim legebatur *alienis*. Sed si *coquentium* est in MSS. ut ait *Ferrarius*, non explicandum est, sed amplius corrigendum, in *cogentium*. De illis igitur verbis velim consulas MSS. Codd. bibliothecae vestrae. Accusat *Ferrarius Baysum*, quod χλαίαν vel χλανίδα scripserit esse vestem, qua milites utebantur per aestatem. Ego in meo plane contrarium invenio. sine cap. xv. est autem ille *Basileae* editus ciciocxli. si aliam edit. habetis,

tis, inspice quaeso. Ne gratuito feceris, en tibi nonnullas ad Ovidium tuum variantes. De arte amandi:

Tu licet & Thamyran superes atque Orphea cantu.

In diversis Codd. partim repperi ipse, partim repertum aliis scio, *superes & amebea*. Scribendum est, *Amoebea*. Plutarchus περὶ ἠθικῆς ἀρετῆς καίτοι καὶ Ζήνωνά φασιν εἰς θεάτρον ἀνιόντα κιθαρωδοῦντ' Ἀμοιβέως, & meminit etiam Athenaeus. At Aelianus vocat Ἀμοιβέαν lib. III. variae. Ἀμοιβέας Κιθαρωδός σὺ φρονέσας. Facile posset corrigi, sed opus non est. Sic enim & βορέως dicunt & βορέας. *Sthenelus*, *Sthenelas*, *Sthenelus*, Ἀχιλλεύς, Ἀχιλλεύς *Aeoles*, *Achillas* & talia. In VI. Fastorum: *Tempus idem Statoris erit, quod Romulus olim Ante Palatini condidit ora jugi*. Fefellit hoc omnes, quasi primam contra rationem (descendit enim a *Stiti*, quicquid contra nugentur) & morem suum in *Stator* Poëta produxerit. Nam & corripuit lib. III. Trist. Eleg. I. *Inde petens dextram, porta est, ait, ista Palati: Hic Stator: hoc primum condita Roma loco est*. Erat enim illic templum Jovis Statoris. Vide Livium. Ineptissime vulgo: *Sator*: quod tamen interpretatus Bersmannus: hîc Romulus habitavit. Sed & in prior loco vide, quam coacte ad τὸ quod intelligatur ex praecedenti disticho τὸ delubrum. Membranae Sarrauii in margine, ubi pleraeque meliores lectiones: *Tempus idem sator aedis habet, quam*. Quid certius hac lectione, modo rescribas, *Stator*? Mihi quidem nihil. Et habes eandem phrasin, quam in illo: *Tempus habent mystae sidera visa cibi*. In primo Fastorum: *Ipse Deus velox discurrere gaudet in altis Montibus, & subitas concipit ipse fugas*. Ita MSS. & verum est. *Concipit* ipse, nempe mente, φαντασιῶται, imaginatur, & subito, nec quid nec quare, exsilit discursatque. Ipse ludit ἀφνιδίως φόβους καὶ ταρχαῖς, quarum auctor est. Unde in hymno, qui Orpheo adscribitur: Ελθέ μάκαρ σκιρτητῶ, εὐδρομε, σύνθρονε ὤρχις, Lib. IV. Metamorp. non longe a fine: *largis satiantur odoribus ignes Sertaque dependent testis: & ubique lyraeque, Tibiaque & cantus animi felicia laeti Argumenta sonant*. Quis dubitet τὰ & ubique non esse Ovidii? Scribo: *testis: lotique lyraeque, Tibiaque & cantus*. Scriptura semipriscā *lutique* facile genuit & *ubique*, item, *tubeque*, ut scis in nostris memb. legi. Par corruptio in II. de Remedio amoris: ubi restituit ille, quem nosti. Scribit ad me *Philippus Pareus*, *Thomam Reinesium* Poliatrum Altenburgensem in Saxonia dedisse tres libros Variarum lectionum, & doctrinam tum viri, tum operis hujus mirifice praedicat. Vidistine? Vale anime mi, valetudinem cura, & Nasonem tuum, quod te nemo melius potest, urge. Communes amicos saluto officiosissime, in primis divinum Parentem, cujus humanissimae literae magno honori mihi fuerunt. Daventriae III. Non. Febr. Julian. MDCLXIV.

Putabam, me, cum has mitterem, adjuncturum excerpta Politiana: sed describere nondum omnia potui. Partem habe, quam ter quater seponere coactus sum intervenientibus negotiis: & aliquando ad manum habui textum, aliquando non. Itaque invenies plura forsitan, quae monuisse non erat opus. Caetera proxime: nec de Gallicis excerptis promissum revoco. Tantum ne pigeat morae parvulae. Iterum vale, carissimum pectus.

EPL

EPISTOLA CIII.

NIC. HEINSIUS

J. Fr. Gronovio.

Daventriam.

Dissertationem tuam de Sestertiis denuo relegi, Vir Clarissime. Affirmare autem sancte possum, iterata hac lectione non parum accessisse venerationi, qua jam ante scriptum illud prosequabar. Spatiosa, mehercules, hîc in laudes tuas area patebat, quam tamen praeclusisse mihi videris nimia comitate. Ita enim praeclaro operi tuo me intexuisti, tum publicatâ Elegiâ, tum honorificentissima mei mentione facta, ut me partem ejus non immerito censere debeam, nec laudare jam te possim, nisi me ipsum quoque videar laudare. Utinam rem numariam pergas illustrare! utinam & vestiariam! cujus spem videris in postremis tuis facere. Et quid tandem arduum tibi sit, qui obscurissimam de Sestertiis controversiam tam perspicuam nobis reddidisti? *Ferrarii* scriptum etsi non displicuit mihi, ita tamen nunquam placuit, ut te tuique similes ab eadem materia retractanda detertere posse videretur. Quare si preces, si obtestationes hominis amici quicquam apud te possunt, suadeo ac hortor, nec hortari quoad vivam desinam, ut in hoc penso detexendo pergas. Quin, quod unum possum, operam in suppeditandis aliorum scriptis meam tibi polliceor ac addico. *Schottum* ac *Hotomannum* commoda occasione mittam, sumptu enim te onerare nolo. *Hotomanni* exemplar ex bibliotheca prompsi publica, manu Scaligeri passim notatum, quod acceptius tibi fore non dubito, quam si nostrum Codicem mitterem. Tu modo vide, ne diutius Ovidii expectatione me maceres. Animus enim jampridem est, autorem totum percurrere; quod facturus tamen non sum, nisi promissa tua compareant. Pro excerptis interim Politianacis multum tibi debeo, quae in plurimis cum schedis nostris Gallicanis consentire video, sed de his alias. Quod autem emendationum aliquot in autorem nostrum tuarum munere beare me dignatus es, coelum tetigisse visus sum. Idque potissimum cum concurrisset nos viderem in restitutione loci ex lib. iv. *Metam. lotique lyraeque*. Deum enim iratum habeam, nisi jam ante annum, credo, cum penultima vice *Metamorphosin* percurrerem, ita legendum esse in exemplari meo notarim: *Et ubique lyraeque* MS. Ciofani, *cytharaeque lyraeque*. forte, *lutique lyraeque* pro *lotique*, quibus Siliî & Martialis loca aliquot addideram. Sed hujus emendationis solida laus penes te est, quia monendo me praevenisti. Locus ille lib. iiii. de Arte Amandi: *Superes Et Amoebea cantu* mire me exercuit. Ita enim in libris, quos inspexi, omnibus scribitur: unde facile divinabam vulgatam lectionem commentum esse hominis imperiti. *Amoebeas* tamen notus mihi erat, non *Amoebeus*, nunc locus Plutarchi a te adductus omnem difficultatem sustulit. Mirum quam saepe autor

Tom. III.

R

noster

noster in nominibus propriis corruptus sit, quae tamen loca ut plurimum boni interpretes silendo praeterierunt, sic lib. viii. Met. vers. 252.

Vota Jovi Minos taurorum sanguine centum

Solvit, & egressus ratibus Creteida terram

Contigit.

Vulgo legitur, cum ex melioribus libris totus locus ita constituendus sit:

Vota Jovi Minos taurorum corpora centum

Solvit, ut egressus ratibus Curetida terram

Contigit.

Cretam Curetin antiquis dictam, testes Plinius lib. iv. cap. xii. Apollodorus libro i. Bibliothecae, καὶ φύγων εἰς τὴν Κουρήτιδα χώραν. Hinc & Curetea flumina in Ciri Virgiliana, & Curetica testa apud Silium lib. xv. qui tamen Acarnaniam intelligit, ubi & Curetes habitabant, teste Strabone. Unde & Homerus Curetas pro Acarnanibus posuit. Eodem libro viii. vers. 528. Locus est corruptissimus,

Vulgusque proceresque gemunt, scissaeque capillos

Plangunt ora simul matres Calydonides, Oeneus

Pulvere canitiem genitor &c.

Tò Oeneus, in fine versus valde coactum est, quod quis non videt? Alio insuper libri scripti tendunt, in quorum plerisque, *matres Calydonides, heu heu, vel, eheu.* In Codice uno alioquin emendatissimo mutilus versus legebatur hoc pacto:

Plangunt se matres Calydonides heu heu.

Carolus Vivianus monet in quibusdam legi,

Plangunt hunc matres Calydonides Eveninaeque.

Contra versum. In tuo Codice pro diversa lectione annotatum erat, *Plangebant matres Calydonides Euueive*, si modo recte descripsi, de quo monendus sum. Scribo, *Plangebant* (vel, quod malo cum aliis, *Plangunt se*) *matres Calydonides Eveninae.* *Evenine*, ut *Neptunine*; nec vitiosus habendus duorum patronymicorum concursus, sic alibi *Phasias Aetinae*, quales loquendi modos poetis in deliciis esse constat. Eodem libro paulo post. v. 542.

Quas post Oeneae tandem Latonia clade

Exsatiata domus natis in corpore pennis

Allevat.

Cum viderem olim in plurimis MSS. legi, *Quas post Aoniae*, suboluit emendandum esse, *Quas Parthaoniae.* Parthaon enim pater Oenei, quam conjecturam postea a tribus MSS. confirmatam vidi. *Parthaoniae* quoque domus meminit Statius tuus Thebaid. libro primo. *Quamquam Calydonius Oeneus, Et Parthaoniae* (si dudum certus ad aures clamor iit) *tibi jura domus.* Transeo ad librum x. vers. 425. Fabula Myrrhae,

--- Turba Cinyreis in illa Regis adest coniux.

Miratus subinde sum, cur a marito Cinyra, *Cinyreis* illa diceretur, cum a patre, non viro nominanda fuerit. Hanc quoque difficultatem enodarunt libri scripti, in quorum nonnullis *turba Cenchreis in illa*, optime. Audi Hyginum Fab.

Fab. LVIII. *Smyrna, Cinyrae Affyriorum regis & Genchreidis filia, cujus mater Genchreis superbius locuta, quod filiae suae formam Veneri anteposuerat &c. Unico tibi molestus ero, quem sane mendii nunquam suspectum habuisssem, absque libris antiquis fuisset. Extat is libro Artis Amatoriae secundo. vers. 115.*

Nec semper violae, nec semper lilia florent:

Et riget amissa spina relicta rosa.

Priore versu codices plerique, *nec candida lilia florent, vel mollia lilia.* In uno Palatino, *nec hiantia lilia*, quod ad veram lectionem indagandam utcunque nos juvit. Codex VC. Patricii Junii non quidem vetustus, emendate tamen ac fideliter descriptus, ita totum versum constituebat,

Nec violae semper ne cinthia lilia florent

Nimirum ante τὸ *Cinthia* exciderunt duae literae *ja*, quarum vestigia in Palatino Codice vox *hiantia* servabat. Quare minima mutatione lego,

Nec violae semperve Hyacinthia lilia florent.

vel potius *Hyacinthina*. *Hyacinthina* autem *lilia* ipsi hyacinthi, qui colore tantum a liliis differunt, unde & *quasi lilia* a Servio dicuntur Ecloga III. v. 107. Noster lib. x. Met. v. 212. In hac Fabula

Flos oritur, formamque capit, quam lilia, si non

Purpureus color his, argenteus esset in illis.

Noster autem hyacinthus mirum quam differat ab illo veterum: quod cum viderent Botanici, incredibili audacia hyacinthum illum verum ac genuinum *hyacinthum poeticum* vocarunt, ne mireris jam *sestertia poetica* a Criticis efficta. *Hyacinthina* autem quam *hyacinthia* malo, quod & Theocritus hyacinthi folia, ὑακίνθια φύλλα, vocet Idyll. XI. Catullus Nuptiis Mallii, *Talis in vario solet Divitis domini hortulo Stare flos Hyacinthinis.* & Sidonius Apollinaris Propemptico ad Libellum. v. 62. *Sive inter violas, thymum, ligustrum, Serpyllum, cassiam, crocum atque caltham, Narcissos, Hyacinthinosque flores.* &c. Hoc est, ipsos hyacinthos. Habes hic, vir Clarissime, observationes aliquot incomptas ac inurbanas, planeque tuis dissimiles; quas tamen eo audacius proposui, ut tu te videres ac agnosceres, quid distent aera lupinis. *Thomae* istius *Reinesii* nomen nec antehac audivi, nec librum vidi, fortasse ejus exemplar a *Paraeo* non difficulter impetrabis: est enim vir, quantum audio, satis humanus. *Baysum* Editionis Stephanicae consului Anno MDXLIX. editum (vidi enim & aliam Stephani editionem, quae aliquot annis praecessit) in uno haec invenio, Ferrario forsan notata. *Jam vero laenam militarem fuisse Nonio placet, quam Graeci χλαῖναν vocitant. Plutarchus in Numa; καὶ ὃς ἀς ἐφόρουσιν οἱ βασιλεῖς λαίνας, ἰοβας Φησὶ χλαῖνας εἶναι. Hoc est, Etenim quas gestabant reges laenas, Juba Chlaenas ait esse. Pallis superinduebantur hyberno tempore, si Martiali credimus, Tempore brumali non multum laevia prosunt: Calfaciunt villi pallia vestra mei. Quod & proverbio fit manifestum: ἐν θέρει ἢ χλαῖναν κατατείβεις.* &c. Venio nunc ad Plinii locum, non quod sperem me facem ei adferre posse, conclamato prorsus ac deposito, sed ne tibi quicquam videar negare. Primo hoc dictum velim nugae maximas esse vocem *ahenis*. Nihil enim tomentis cum ahenis, quae

constabant ex lana non fucata. *Coquentium* agnoscit Gelenius, sed monet *Polientium* ex libris scriptis legendum. Cum Ferrarium legerem, vestigia pri-
scae lectionis *abenis*, vel *alienis* secutus conjiciebam legendum, *qua limis*. Dua-
bus prioribus literis in τω *qua* repetitis ex voce *quippe*. *Novissimo sui purga-*
mento, quippe qua limis polientium extractae, in tomenti usum veniunt. Limam
autem verisimile est instrumentum quoque lanificum fuisse, non absimile ab eo,
quod rasorium aut pectinem vocant alii. Nec abludit illud Ovidii lib. II. de Ponto
Eleg. IV. *Utque meus lima rasus liber esset amica*. Quamquam & limam fabrilem
respexisse potuit. Claudianus in Eutropium lib. II. vers. 378. *doctissimus artis*
Quondam lanificae, moderator pectinis unci. Non alius lanam purgatis sordibus aeque
Praebuerit calathis, similis nec pingua quisquam Vellera per tenues ferri producere
limas. Ita diserte codex Bodleianus, & forsan ita legendum. Vulgo, *rimas*.
Sed haec pro veris tibi non obtrudo. Et sane aliud quid postea commentus
sum. Nimirum antiquitus scriptum fuisse, *lallis* corrupte vel *larnis*, ut infra
in loco Isidori a me emendato. Inde factum ab imperito aliquo *lanis*, quod
cum alii paulo doctiores putarent ferri non posse, *aenis* scripsere. Nihil autem
tritius in libris vetustioribus, quam *r* & *l*. confundi. Sic pro *lallis*, *rallis* ha-
bebis. Glossae Stephani, *Ralla*, ξυσνη. Aliae ejusdem, ξυσνη, *Ralla*, *Rallum*,
Rallus, *Rasorium*. Hinc nullo negotio emendari possunt Isidori Glossae: *Larna*
Rasorium. Lege, *Ralla*, *rasorium*. Mire hic locus exercuit viros doctos, *Bar-*
thium praecipue Advers. lib. VIII. c. v. qui *Larva*, *rasorium* legit, frigidissime.
Reddenda & ea vox ipsi Plinio lib. XVIII. c. XIX. *Purget vomerem subinde sti-*
mulus cuspidatus ralla. Vulgo *rulla* legitur. Sed ne hîc quidem mihi satisfacere,
quare ad Bibliothecam publicam me contuli, inspecturus Codicem MStum, qui
illic adhuc superest, alterum enim melioris illum notae, nondum mihi reddi-
dit Isaacus noster. Hoc pretium nimii erga amicos officii fero. In eo ergo codi-
ce sic locum scriptum offendi: *imo etiam ignibus novissimo sui purgamento, quippe*
ejus (vel enis) pollentium extracta indumentis usu veniunt. Sed Gelenius recte
correxit, *in tomenti usum*, quod sequentia satis confirmant. De caeteris plane
haerco. Venit tamen mihi in mentem nimio abbreviandi studio a librariis hîc
peccatum, atque adeo literas tres quatuorve omissas. Deinde posteriorem syl-
labam in voce *quippe* repetendam, ut pro *quippe enis*, scribatur, *quippe pectenibus*
id est, *pectinibus*. Tuas tamen emendationes magis probo. Et jam satis est
nugarum. Prolixior aliquando fui, non quod operae aliquid facturum me con-
siderem, sed ut ad veram lectionem indagandam te incitarem. Vale, Vir
Clarissime, & tuis quamprimum me bea. Lugduni Bat. Anno MDCLXIV.
Kal. Martiis.

Paternum nomen ex animo tibi gratulor: voveoque feliciter tibi cessurum,
quam affini meo, cujus infantulus ante dies aliquot elatus est, magno cum fa-
miliae nostrae moerore. Jussu ac mandato Curatorum, agi tandem coeptum
de controversiis inter patrem meum ac *Salmasium* sopiendis, quae res Cl. *Span-*
hemio, viro sane integerrimo, penes quem & solida ejus laus erit, credita ac
commissa est, multum jam is profecit, nec dubito quin feliciori cum successu
rem

rem daturus sit effectam, quam alii tentarunt ante. Iterum vale, meum decus.

EPISTOLA CIV.

J. FR. GRONOVIIUS

*Nic. Heinsio.**Leidam.*

Ecce tandem Ovidium collatum tibi, ut promiseram, Nobilissime & eruditissime juvenum. Epistolae Heroïdum & Ibis cum libro membranaceo elegantissimae manus, sed non valde antiquo Cl. *Sarravii* collatae sunt: Metamorphosis cum Andino *Claudii Menardi*: Fasti cum illis, qui sunt adscripti. Utinam expectationem tuam res non fallat! Utcunque erit, noles tamen non vidisse vel ideo, ne putes magno thesauro te fraudatum fuisse. Ego nunc magis distringor publicis privatisque recitationibus, quia ad finem spectant. Post paullum otii erit, quamquam ne tum quidem, adeo urgent Elzevirii, & me angit expectatio operis, quae re longe major est. Cl. *Christenio*, qui has tradet tibi, ut spero, reddere Hotmannum potes. Velim etiam, si habetis in bibliotheca vestra editionem primam fragmenti Liviani lib. xxxi r. a *Queringo* factam, nam eam nunquam vidi. Tamen erunt non pauca emendationes, quam exstant in Jansoniana & Elzeviriana priore: In tertia & quarta Decade plus negotii est, quia illam cum MSS. non valde bonis contuli, hujus nullos reperi, & tota erit ingenii alea. Nihilominus eluctandum est. Et ideo commode accidit, quod magnae nostrae feriae instant. Illis ego nihil minus, quam feriabor, & tandem aliquando tempora mea ex arbitrio dispensabo. Vale, carissimum caput, & me ama. Daventriae a. d. v. Kal. April. CIOIOCXIV.

EPISTOLA CV.

NIC. HEINSIUS

*J. Fr. Gronovio.**Daventriam.*

Gemino nuper beneficio ita obaeratum me tibi reddidisti, Vir Clarissime, ut solvendo nunquam futurus sim. Vix Ovidiana Politiani excerpta acceperam, cum ecce Codicem tuum ad aedes nostras defert Cl. *Christenius*, quem etsi vix inspicere haecenus mihi licuerit, praeclari tamen aliquid inde mihi promitto. Utar ego illo, tum remittam proxime. Redhostimenti loco Schottum & Hotmannum de re numaria hîc habes. Alter, ut vides, manu *Sca-*

R 3

ilgeri.

ligeri passim notatus est, eoque nomine non ingratus tibi futurus, alter quoque placebit, fat scio, vel ob fragmenta veterum, quae primus vulgavit. Utere iis ad satietatem usque. Alia quoque ubi ad manum venerint hujus argumenti, non desinam tui meminisse. Ovidio meo manum ultimam brevi imponere animus erat, sed has cogitationes nunc interrumpet iter meum Brabanticum. Intra dies enim plus minus quatuordecim fontes Spadanos in agro Leodiensi aditurus sum, curandae valetudinis gratia, in reditu potissimas Brabantiae urbes perlustrabo, maxime Lovanium, forsitan & Gemblacum, si eo commode perveniri possit. Spero me reperturum alicubi codices Ovidii vetustiores, quam quibus usus sum. Quae spes si non vana fuerit, vel hoc nomine grande itineris hujus pretium me tulisse putavero. Tu quoque si quid illic curatum a me volueris, quamprimum indica. Habes eni amicum ad omnia promptum tibi ac paratum. Illud quoque nunc a te petam, ut in hac solitudine mea literis subinde tuis adesse mihi digneris, quae magni mihi thesauri instar erunt. Eas non aliò quam ad aedes nostras curabis. Unde recte ad me pervenient. Diutius, quam velim, domo abfuturum me puto; & si quid augurari licet, vix est ut ante hyemem revertar. Tam mihi placent, quae de locorum istorum deliciis audivi. Nisi fontes Spadanos summopere mihi commendassent Medici, ob nimiam humorum abundantiam, quibus corpus repletum est, in urbe vestra maximam aestatis partem transigere decreveram, a clementiori aëre aliquod valetudini meae auxilium haud dubie impetraturus. Ubi reversus fuero, Livium, uti spero, tuum absolutum ac confectum inveniam. Quae res reditum non parum mihi urgebit. Fragmentum auctoris ejus a *Querengo* editum nullus vidi. In paterna Bibliotheca Parisiensem Fragmenti ejus editionem vidi in Octava (uti vocant) forma editam, ad cujus margines nonnullae *Querengi* conjecturae legebantur. Editio tamen ipsa ab alio nescio quo procurata erat. De *Pontani* operibus meminero, etsi vix quartam totum iste partem continet eorum, quae vir ille summus scripsit. Quid quod illa editiones longe meliores extant. Qualis Aldina & Florentina Juntarum. Vale, meum decus, & me constanter ama. Raptim. Lugd. Batav. Anno MDCLXIV. die XXI. Aprilis stylo nostro.

Non omnino bene me habuit, quod, ad correctiones meas Ovidianas, quas in ultimis meis tibi proposueram, censuram tuam mihi invideris. Sed hoc occupationibus tuis dono.

EPISTOLA CVI.

J. F. R. GRONOVIIUS

*Nic. Heinsio.**Leidam.*

Tuas cum Hotmanno & Schotti tabulis recte ad me curavit *Christenius* noster: hoc insigne beneficium est, & parata erit tibi apud me, quandocumque

que velis, gratia. Iter tuum Brabanticum valde probo, tum quia firmiore valetudine, tum quia Musis comitatioŕem inde te reverſurum confido: atque uti ſic eveniat, ſemperque ſuccęſſibus utare, Deum immortalem precor. Quod autem me mandata poſcis; gratias habeo magnas: ſed tempus tibi, dum iter facis, dum valetudinem curas, dum ſalutationes, in gente cum omnibus aliis de humanitate certanti, & obis & excipis, dum denique ingenti tuae, ſed laudatiſſimae, cupiditati incepta tua praeclara in literis promovendi indulges, ſpatiis admodum iniquis, incluſum iri proſpicio. Itaque poene religioni eſt partem inde ullam, praeterquam quam literulis ſcribundis dabis (illud enim promiſſum accipio, imo ultro ſtipulor) ad me vindicare. Si quid tamen ſupereſſit, Livii exemplaria, in quae incideris, te contemplari velim: & puto Lovanii Buſlidianum codicem, ex quo multa egregia hauſit *Lipſius*, etiamnum exſtare. Ad tertiam decadem, quae eſt de bello Annibalico, ut quidquam ſumas horarum, opus non eſt: neque enim poſſunt reperiri meliores Puteanaeo, Petaviano, & Florentinis, quibus uſi ſumus. Sed primae & caeterae, in primis hae poſteriores multum adhuc curae deſiderant: itaque qui in illis juvare me poſſit, magnum operae pretium fecerit: neque enim, ſi vivam & permittet $\delta \kappa\rho\epsilon\iota\tau\omega\nu$, hac editione, cum ſummo ſcriptore tranſigam. Ampliſſ. *Geſartium* meo nomine officioſe ſalutabis, & ſilentium ejus ad binas meas amanter accuſabis. Praeterea gratiſſimum erit, ſi me in gratiam pones apud literatos viros, quibus ea loca ornantur plurimis, inprimis *Ericium Puteanum* & $\pi\acute{\alpha}\nu$, cui etiam ſi mundum habes, aut nanciſci poteſ de Seſtertiis exemplar, donare te velim, ita ut poſt reditum aliud a me repoſcas: neque enim offenſum iri ſpero optimum virum iis, in quibus modeſte ab eo diſſenſi. Scripſi ad eum ante plures annos hortatu filii, quem in itinere Haga Delphos forte fortuna comitabar: eaſque literas, ut juſſerat ille, Dordrechtum ad *Beverovicium* miſi: redditae fuerint nec ne, ignoro: ſed ſi tu monueris, non cunctabor repetere officium. Ejus Pecuniae Romanae rationem, & *Schotti* tabulas, nec non Epistoſicas *Rycquii* (habeo ejus de Capitolio) mihi, ſi nanciſci poteſ, praestiſnes velim. Item *Gasparis Sanctii* Minervam, cujus ſaepe meminit Paſcaſius Groſippus. Ipſiusque Paſcaſii Grammaticum opus Mediolini editum. Interim, ut promiſiſti, ſcribere ſaepius ne pigrere, & certus eſto, nihil me moraturum, quin ſtatim ſemper respondeam. Iterum precor, ſalvum te ducat ac reducat Deus, Nobiliſſime & erudiſſime juvenum, meique memoriam & amorem ſerves, qui te maximis inductus meritis tuis demorior. Vale, vale, $\phi\iota\lambda\tau\alpha\tau\omega\nu \eta\tau\omega\rho$. Daventriae III. Non. Majas cioio cXLIV.

EPISTOLA CVII.
NIC. HEINSIUS.

J. Fr. Gronovio.

Daventriam.

IPso hoc momento commodum tuae mihi redduntur, Vir Clarissime. Eorum, quae mandas, diligenter meminero. *Puteanum* & *Gevartium* tuo nomine salutabo. Ovidium tuum nunc hîc habes, pro cuius usura, plus, quam credas, tibi debeo. Eum *Goeddaeo* vestro tradere destinaram. Sed opportunè me nunc admonet Elzevirius, mittenda sibi nonnulla ad te esse. Iis non incommode addi posse hunc libellum putavi. Crastino mane, cum bono Deo, discessurus hinc sum. Iter meum hactenus diploma hostile moratum est, quod Bruxellis tandem accepi. Ut jam nihil sit, quod proposito nostro obstet. Vale, Vir Clarissime, & summae festinationi ignosce. Memoriam nostri constantem tibi commendo. Lugd. Bat. cicicicxliv. xvii. Maji.

EPISTOLA CVIII.
NIC. HEINSIUS

J. Fr. Gronovio.

Daventriam.

POst Leodiensem tractum perlustratum & excussum Brabantiam, domum nunc, ecce, reversus sum. Valetudo mea loco longe meliori est, quam ab annis aliquot fuit; nondum tamen optimo. Quare proxima fortassis aestate ad Spadanos fontes recurram, interim de successu mihi gratulor, qui longe expectationem meam superavit. Fructum alioquin ex hoc itinere non valde magnum percepi. Nam studia nostra quod spectat, vix credas, quanta veterum librorum ubique in bibliothecis penuria sit. Leodii & in agro Leodiensi latere multa non dubito, quantum ex uno alteroque specimine colligere potui. Destitutus tamen amicis, cum eo venissem, qui aditum ad monasteria mihi pararent, unam non nisi alteramque bibliothecam inspexi. Si aliquando eo revertar, melius ab amicis mihi prospiciam, & jam prospexi. Acquisgrani veterum librorum nihil prorsus erat, quod ipse summo cum stupore animadverti, in urbe praesertim tam antiqua, cum bibliothecas excuterem. In Brabantia menses plus minus tres haesi, Lovanii potissimum, idque propter aëris clementiam, & Antverpiae. Lovanii, praeter reliquias Musaei *Torrentiani* Jesuitis legatas, quibus ad satietatem usus sum, nihil etiam erat magno opere commendandum. Nam ad *Busldianam* bibliothecam propter Praesidis

fidis absentiam admisus sum, non nisi serius, & cum jam abiturirem. Claudiani exemplar inde habui, sed temporis angustis exclusus, totum conferre non potui, & erat etiam recentius. Statianae Thebaidos codicem vidi longe veterrimum. Alioquin ne ibi quidem quicquam alicujus rei. Nam plerique codices praefectorum negligentia amissi sunt. Ante annos aliquot duo ibi Claudiani exemplaria servabantur, ut me monuit *Gevartius*, nunc unicum tantum, ut jam dixi, idque recentius. Livius an adhuc supersit, non dixerim: eum certe non vidi. Viri ibi docti etiam paucissimi sunt, inter quos principatum ducunt *Puteanus*, quem & tuo nomine salutavi, *Tuldenus*, *Plempius*, *Valerius*, *Vernulaeus*, a quibus summa comitate exceptus sum. Inde Bruxellam me converti, unicus ibi, praeter *Nicolaum Burgundum* Regium consiliarium, *Albertus Rubenius*, celeberrimi illius pictoris filius, Secretiori Concilio a Secretis, in literis humanioribus ad miraculum usque subactus. Adornat ille commentarium de Lato clavo, & quaedam alia, rem vestiariam spectantia. Hinc Mechliniam discessi, ubi neminem etiam nostrorum studiorum inveni, praeter solum *Joh. Franciscum Slingelandum*, propinquum meum, qui Romae toto sexennio vixit, amicitia *Naudaei* & *Allatii* satis clarus, & monumentis eorum non semel insertus. Vir ad omnem humanitatem factus, & verum Belgii nostri delictum. Diebus ergo uno alteroque ibi consumptis, & nimia viri comitate abactus, Antverpiam me recepi. Bibliothecam ibi a MStis utcumque instructam soli Jesuitae habent, & *Balthasar Moretus*, Typagrophorum hujus aevi facile antesignanus. Is Codices Ovidii quosdam mihi suppeditavit. Libros tamen Metamorphoseos quatuor, Epistolarum & Tristium duos conferre non potui, quod ipsa hyems domum me revocaret. In Claudiano aliquanto felicius fui, ad cujus editionem multis precibus me excitavit *Gevartius* noster, summus auctoris illius aestimator. Excutiam brevi, quae ad illum notata habeo, & videbo si lucem mereantur. Sed de his proxime. Antverpiae viri docti itidem paucissimi sunt, atque inter illos, *Lud. Nonius*, *Hemelarius*, & *Gevartius*, qui salvere te jussit. Multa sunt, quae in sinum tuum effundere gestio, sed filum hoc abrumpere cogor, cum ad multorum literas mihi respondendum sit. Proxime plura. Vale, Princeps amicorum meorum, & quid moliaris, fac, quaeso, sciam. Lugd. Bat. Anno MDCCXLIV. VI. Non. Decemb.

Ex iis, quos emendos mihi injunxeras, libris, nullum praeter unicam *Sanctii* Minervam comparare potui, eam commodiori occasione mittam. Lovanii Caesarem cum antiquissimo libro contuli, vix tamen credas, quam pauca bonae notae inde deprompserim. Ipsum exemplar, si fortassis ad Livium tuum conferre quicquam possit, tibi offero, ut & quaevis alia. Nam & ad Statium tuum quaedam habeo a *Livineo* collata, ad Achilleidem potissimum. Ante discessum meum egisse me tecum memini de versu illo Ovidino, *Semivir occubuit vi lerniferoque veneno*, & conjecturam meam tibi tum probavi, quam tamen ipse nunc damno. *Eveno* pro *veneno* legendum recte vidi. *Centaurifero* non placet, praesertim ex vestigiis unius codicis, & quidem ubique interpolati.

lati. Libros plerosque habere *in lethiferoque veneno*, jam ante, nisi fallor, monui. Et miror oscitantiam meam, qui non viderim una litera minus legendum esse, *iletifero eveno*, ab iletis sive ilicibus. Sic *populifer Sperchius*, *pomifer Tiberis*, & infinita talia, quae passim apud Poëtas occurrunt. Iterum vale, & summae festinationi ignosce.

EPISTOLA CIX.

J. F. R. GRONOVII

Nic. Heinio.

Leidam.

NOblissime & eruditissime juvenum. Plurimis rebus gratae fuerunt mihi tam diu exspectatae literae tuae: sed omnium gratissimum ipsum principium de valetudine tua in melius provecta. Nihil perdidisti, o carum caput, aut operae aut temporis, quando tantum hoc itinere effecisti: superest integra aetas, & ad rem literariam gerendam tali ingenio, doctrinae, industriae multum patens. Illud unum periculum metuebamus, quo te defunctum esse haecenus, & tibi gratulor, & mihi gaudeo, & Deo grates ago. Non dubito, qui gloriosus non sis, & honestissima avaritia conquirendi, quos veros censemus thesauros, nemini cedas, quin multis praeclaris inventis, pluribusque, quam jactas, auctior ad lares patrios fueris reversus. Eam copiam tibi laudi & honori, publice magno emolumento futuram & spero, & ut sit opto. Quantum est autem, quod tot indicibus insignium virtutum tuarum non approbasti te solum, sed, quod scio quidem, non suspicor, admirationi fuisti, & expectationem dignam inceptis tuis concitasti? Quod superstiti patre (& diu sit!) vetustissimarum & candidissimarum ejus amicitiarum velut haereditatem crevisti? Quod magnae & communis patriae situm, genium, rempublicam multis partibus acuratus cognovisti? Taceo alia, & nonnulla *ἐν δόμῳ* tibi, nec mihi occurrentia, propter quae mollissimam hanc, & propinquam peregrinationem suavem & utilem fuisse tibi existimo: atque eam tam prudenter te fecisse, tam jucundum & salvum absolvisse iterum iterumque laetor. De Minerva Sanctiana *ἐναγέλια*, quae quidem, quando quando mittes, gratissima erit mihi, nec pretium quin recipias, quidquam erit morae. Grata est & salutatio. *τὸ δ᾽ εἶνα*, quem de Claudiano tantopere auctorem tibi fuisse memoras. Dic tamen, quaeso, clanculum: verumne est, quod nescio unde cognovi, in sermonibus de me alium illum, quam in literis ad me, esse, Depone fidis auribus: non te prodam, neque etiam si verbis in me velitetur, cum posthac laceffam: taedet enim litium. Verumne est etiam, adhuc in Manilium aliquid eum cogitare? Tu mallet de Nasone prius fidem liberares: sed quia in illo paratior esse videris, *γένοιτο, γένοιτο*, perge, quo te genius ducit: nihil enim tentare potes, quod non sit cum laude tua & fructu publico conjunctum. Habeo nonnulla non magnae rei ex cod. Patri-
casp. Gevartii.

cii Junii excerpta: si illum non vidisti, & desideras meo libro uti, posce. Caesaris de bello Gallico cum optimis membranis in Andibus contuli: quare nequaquam sperno, quae offers, ut & Statiana, & quod commodo tuo fiat, illis utar. Livius me mirum in modum exercet: ad librum xxx. usque perfectas & poene in mundum relatas habeo Notas: spero bonae critices non inemptum exemplum futurum. Nescio quid morentur Elzevirii, & an contextum habeant jam necne: etenim si poscerent Notas, jam incipere possent. Erit libellus circiter viginti quinque foliorum. *Eveno* probo utique, de altero cogita, an latine dicatur *iletum*, pro *Ilicetum*: si autem *ilicifero* voles, an non syllabae modulus obstat. Quamquam de his forte jam praecogitatum tibi. Vale, anime mi, & bene age. Illustrem in primis Parentem & communes amicos per occasionem meo nomine officiosissime salutabis. Daventriae post diem tertium Idus Decemb. ciciocxlv.

Plautus Cl. *Boxhornii* nostri ut procedit? Si tibi videtur, da ei cum salute plurima inclusam schedulam, quam non relegi. Vale.

EPISTOLA CX.

NIC. HEINSIUS

J. Fr. Gronovio.

Daventriam.

Raptim ac festinanter admodum nuper ad te scribebam. Quo nomine veniam peto. Quamquam quâ aliter possem? mole literarum oppressus, quae ad amicos maximam partem Brabantos, scribendae erant quamplurimae. Virum illum doctum Antverpiensem non bene de te loqui, quicumque tibi suggessit, functus profecto parum ingenue ac liberaliter officio suo est. Sed nimirum eo saeculo nunc vivitur, quo homines ignavi satis emolumentum atque fructus ex amicitia praestantium virorum se percepisse arbitrantur, si eos inter sese committant. Apud alios quomodo de te loquatur ac judicet, non scio: apud me certe locutus est, non nisi honorifice & bene. Virum doctissimum & plurimae lectionis non semel nominabat. Videbatur tamen nondum satis concoxisse Diatriben tuam Statianam, in qua minus amice, neque ex sententia sua nonnunquam exceptus esset. Ita Lovanii intellexi. Ipse non nisi obiter ejus rei apud me meminit. Hoc autem scire te velim, esse illum famae suae supra modum studiosum: gentis potius, in qua natus est, vitio, quam suo. Plerique enim illic τὸ φιλαυτίας morbo laborant. Ad quam cum ingenio suo proclives sint, convictu tamen Hispanorum ac quotidiano usu magis impelluntur. Quorum mores, licet exosis ac multum detestantibus, sensim obrepere. Scripsit non ita nuper commentarium satis crassum Gallice ² *Tristanus* qui-

S 2

¹ Casp. Gevartium.

² In Commentariis Historicis tom. 1. pag. 113. refutat *Gevartii* sententiam; quam ille *Capinia-*

quidam, si nomen recte memini. Is amici nostri sententiam super quaestione de Manilii actate obiter perstringit. Hoc ille factum tam inique tulit, ut Vindiciarum librum integrum confecerit: ipsum etiam Manilium, de cujus editione curam omnem jam ante annos hos viginti abjecerat, in manus denuo resumpserit, atque adeo, si quid ipsi credimus, quamprimum editurus sit. Ostendit mihi veterrimum illum Gemblacensem codicem, & excerpta quaedam Gallicana. Si placatum omnino habere volueris, autor tibi sim, ut illi offeras, quae in Italia olim ex codice Veneto tibi notasti. Ea illi acceptissima fore sat scio. Et promisi eo nomine me acturum tecum. Neque est, quod jacturam laboris tui magnopere metuas. Est enim cunctator summus. Sic ut editionem illam (quod inter nos dictum sit) ¹ nunquam prodituram existimem. Meditatur etiam integrum in Antoninum de Vita sua commentarium, quo absoluto, Maniliana demum pertextet. Fuit mihi subinde controversia cum illo de locis Claudiani nonnullis, quem autorem parum abest, quin totum memoriae mandarit. In quibusdam tamen inter nos convenit. Ut illo loco Libro II. de laudibus Stiliconis, vers. 450. *Eximia regione domus. Contingere terris Difficiles, stabant rutili, grex aureus, anni.* Domum demum reversus vidi totidem apicibus in codice meo jam ante biennium emendatum. Quod tamen non memineram, cum apud illum essem. Suggerebam tamen emendationem alteram in eodem Panegyrico vers. 408. ubi, cum ineptissime vulgo legatur, *jam Fama loquacibus alis Pervolat Oceanum, linguis &c.* Scribendum assereram, *Fama loquacibus ales Pervolat Oceanum linguis.* Id ille probabat. De uno tamen, inter caeteros, loco diu multumque disceptavimus. Is est libro in Rufinum primo, non longe ab initio vers. 151. qui ita se habet, *funestarumque potestas Herbarum: quicquid lethali germine pollens Caucasus & Scythicae vernant in gramine rupes.* Sic vulgo legitur. At priori versu in omnibus MStis *lethali gramine* scriptum est. Pro quo viri docti, cum viderent inopportunam esse repetitionem illam vocis *gramine*, *germine* reposuerunt. Hoc ille laudabat. Ego, cum *germinis* mentionem in rebus magicis non meminissem ab ullo poetarum fieri, alia medicina locum indigere contendebam, scribique posteriori versu non incommode posse, *Scythicae vernant in carmina rupes.* Hoc est, in usum

piniarum Lect. lib. III. cap. 8. prodiderat. Cujus sententiam & amplexus erat Vossius lib. II. de Art. Gram. 26. & III. de Anal. 20. nec alienus ab hac opinione videtur Il. Spanhemius dissert. XIII. de Praest. & Usu Num. cap. III. §. 3. sed refutavit hanc opinionem Albertus Rubenius, dissertatione de Vita Fl. Mallii Theodori, cura Cl. Graevii edita 1694. vid. & Daumii Epist. ad Bosium xv. qui ejus sententiam exquirat.

¹ Verus fuit Vates Heinsius. Boxhornius in Epistolis ad Gronov. pag. 213. scribit, *Gevartium* meditari uberrimos in Manilium commentarios: immo ipse *Gevartius* in Epistola ad *Meursium* Parisiis data A. 1628. quae prodit in Fasciculo III. Collectionis novae librorum rariorum Halis 1708. pag. 574. scribit. *Excuditur & Manilius cum notulis meis, quibus omnibus postquam erunt adfecta, te participabimus.* in qua epistola forte nota temporis est corrupta, & scribenda 1618. nam eo anno Parisiis erat, & *Electa*, quae etiam sub praelo esse dicit, prodierunt Anno seq. 1619. & Anno 1621. Duaci juris doctor creatus fuit. quare distulisse videtur, sed resumisse consilium post Tristani commentarios, quorum primum, credo, volumen prodit 1635.

usum carminum, in usum magicum. Scis quam frequentes noster & tuus Statius sint in hoc loquendi genere. Sic libro III. de Raptu Proserpinae, & *totae fremerent in pocula ripae*. Hoc est, vinó fremerent seu spumarent. Possem infinitos alios locos proferre, & tum nonnullos protuli. Negabat tamen ille pertinaciter hanc conjecturam meam Latinam esse, aut posse ferri: Quamvis autem rationes ejus meo judicio essent valde frigidae ac jejunae, ne tamen nimium mea viderer aestimare, alio sermonem converti. Certe priori versu in antiquissimo libro, quo Isingrinus typographus Basileensis usus est, *carmine* legitur, cum posteriori versu legi debuerit, quod operarum peccatum esse arbitror. Pro *carmine* autem *carmina* reponi quam proclive! Conjecturam hanc (neque veram eam praesto) an tam ridiculam judices, quam amicus noster volebat, fac', quaeso, sciam. Si damnas, confodiam illam ac jugulabo. Sed jam nimis multa, & praeter morem meum, de viro illo praestantissimo, quem inter praecipua saeculi nostri ingenia certe non immerito reponas. Quia tamen id flagitabas, mos gerendus tibi fuit, cui quod negare nihil potui, cum diis immortalibus commune mihi esse gaudeo. Habes hinc ingenue de illo quid sentiam, quod inter nos perituum spero. Ad Claudiani editionem multis me hortabatur, quem post reditum ex Brabantia meum haecenus vix inspexi, quod alia agenda habuerim. Excutiam brevi, quae ad illum notata habeo, & in ordinem redacta arbitrii tui faciam. In Anglia jam olim Juniano Codice usus sum, qui & Cambdeni fuerat, ac duobus Oxoniensibus. Lovanii exemplar a Patribus Societatis Jesu habui, duo itidem Antverpiae a Moreto. Sed nihil haec subsidia ad Aldinam editionem, quam penes me habeo, a *Lilio Gyrardo* cum libro veterrimo (sic ipse vocat) & Vaticano, itidem antiquissimo, a *Johanne Livineio* collatam. Eorum codicum bonitatem speciminibus aliquot proxime, ut spero, tibi probabo. Vidi aliquando excerpta quaedam *Andreae Schotti* apud te. Eorum usum nescio an ausim mihi polliceri. Sed monebo te in tempore. *Pulmannum* aliquo loco haecenus habui inter viros de republica literaria bene meritos, idque propter solam diligentiam, cujus summam apud me opinionem sibi comparaverat. Nunc vero ajo & affirmo, nihil illo homine sordidius aut negligentius cogitari posse. Altero eorum codicum, quos a Moreto habui, jam olim ille usus est, quem Plantinianum vocat. Sed mirum quam in optimo libro nihil viderit. Mirareris mecum, sat scio, hominis oscitantiam, si emendationes nunc vacaret proferre, quas ille praeteriit fatis multas. De Livio tuo cum Elzeviriis egi. Textus jam absolutus est, & quantum audio, publice distrahitur. Notas seorsim edituri sunt: eas, ut quam primum mittas, autor tibi sum. Metuo enim ne illarum editionem, si diutius cunctere, negligant. Suasisse me olim tibi memini, ne tomum ultimum a te emendatum illis mitteres, nisi notis ad priores tomos praelo jam commissis. Hoc consilium meum si secutus esses, nihil tibi jam metuendum foret. Sed nimirum in magnam nimis molem excrevissent volumina, si notae accessissent. Id, credo, te deterruit. Tu, si quid porro hac in re a me curatum volueris, audacter impera. Sanctium & Caesarem hinc vides. Alterum dono tibi

habe, alterum, ubi usus fueris, remitte. Statiana habebis, ubi descripsero. Quamquam nihil in iis esse putem te dignum. Ad Achilleidem & iv. priores Thebaidos libros excerpta sunt, quibus haec subscripta a *Livineio* vidi, unde quid thesauri in iis lateat judicare facile possis: *Haëtenus Langiani, & haec ipsa admodum jejuna, quae ex iis afferuntur.* Buslidiano codice valde illo antiquo quod non usus sim, nunc molestum mihi est, qui Thebaidem & Achilleidem simul continebat. Si aestate proxima Lovanium recurram, faxo voti compotes uterque simus. Dicebatur illo jam usus *Vlitius* noster, itaque actum a me agi credidi. Ille vero nunc affirmat, obiter tantum librum illum sibi inspectum. *Bernartius* jam olim quoque viderat, sed negligenter admodum, ut ex *Cl. Gevartio* intellexi. Langiana illa, si codex meus esset, una nunc misissem, qui intra dies paucos reddendus est cum aliis, quos Antverpia mecum advexi. Ipsa interim excerpta praesto tibi semper apud me erunt. De conjectura mea ad Ovidium quod tam candide me monuisti, ingenuitatem tuam exosculatus sum. Ut a *frutice fruticetum & frutetum*, ita & ab *ilice ilicetum & iletum* derivari credidi. Fateor tamen exemplum in promptu nullum mihi esse, & oscitantiae hujus meae ex animo me pudet. Ad Plautum quae notasti, *Boxhornio* dedi. Tardius in illo pergunt operae, quam vellem. Sex priores Comoediae demum absolutae sunt. *Salmasianus* de militia Romana commentarius praelo jam commissus est. Soror mea, si & hoc scire desideres, tertium nepotem ante quatrimum mihi peperit. Vale, meum decus, & affectum tuum constanter mihi serva. Amstelodami. Anno *MDCCXLV.* iv. Eid. Januar.

Inter ea, quae *Cl. Juvenis Isaacus Vossius* advexit secum praeclara antiquitatis monumenta, ad Martialem illustrandum plurima faciunt. Poterit autorem illum locis infinitis emendatiorem dare. Recte & pro officio tuo feceris, si adhorteris illum, ut de editione scriptoris optimi votis nostris respondeat. Multa mihi dixit de Critico quodam in Germania nuper edito, & valde tibi probato, *Boxhornius* noster. Quis ille sit, fac, quaeso, sciam. Iterum Vale.

EPISTOLA CXI.

J. F. R. GRONOVIIUS.

*Nic. Heinsio.**Leidam.*

Nobilissime & summe juvenis. Et gavisus sum felici congressu amplexuque nostro post tantum intervallum, & festinato discidio nostro gravissime dolui. Sed non fieri aliter patiebantur me utramque ad aurem monentes, reposcantes, flagitantes Daventrienses nostri. Itaque cogitatione ista fraudare animum fatius duxi, & solari me potius illo tamen jucundissimo praesentiae tuae fructu, quamvis brevissimum tempus durante, quod nempe longum pudori meo

meo ingens humanitas vestra faciebat. Quare repeto gratias, qui merito finis semper cum beneficientibus, & majores quidem mente & ago & debeo, quam verbis exprimere valeo. Reditus domum mihi fuit satis commodus, sed inveni cumulum negotiorum, eoque primum tabellarium sine meis discedere pati coactus sum. Nunc scire cupio, bonane an sua fide coeperint sub abitum meum Notis in Livium operas dare Elzeviri, & quid tibi videatur de successu operis. Ego labori non parco, ut sufficiam illis, etiam gnaviter pergentibus. In schedula inclusa vides notata quaedam, quae adjecta cuperem. Sed quod maxime placebat, quum vobiscum eram; *quod longius recessisset*: de eo nunc fecus sentio. Judica ipse & inspicere locum, qui est lib. 22. c. 43. pag. 135. prioris Elzevirianae: *Simul ut quo longius ab hoste recessisset, transfugia impeditiora levioribus ingeniis essent*. Notavi ego quoque in tribus Gall. MSS. esse: *simul quod longius*. Sed video me id olim sprevisse, & nunc quoque sine damno sententiae vulgatum mutari non posse videtur. Caeterum ne solus querare de tardo amico nostro in praestandis promissis, Polybium, quem Leidae emeram, ut scis, jam sextum diem domi meae habeo. *Sanctii* Minervam cum excerptis Caesareis vidi nondum. Ipse dudum se nautis dedisse ajebat, quibus, credo, cantandum est illud Martialis, *Cessatis pueri nihilque nostis Vaterno Ratinaque pigriores*, si tamen ita scripsit. Nimis gestio cognoscere de operis typographicis Elzevirianis. Vale, decus meum, & communes amicos saluta, in primis Ampliss. ad finem tuum, cui quaesitissimis coloribus me excuses, rogo, quod non coram ei gratulatus sim ore, quum animo millies facerem. Iterum vale, Daventriae a. d. iii. Idus Februar. *CICIDCXLV.*

EPISTOLA CXII.

NIC. HEINSIUS

Ad Fr. Gronovio.

Daventriam.

Vir Clarissime. Nimum nuper properabas, cum apud nos esses: nunc & ego propero. Causa, cur te compellem, haec est. Assiduae sunt in Notis ad Livium tuis operae Elzevirianae. Folia pene quatuor jam absolvere. Si sic pergunt, intra duos menses orbis eruditus habebit quod legat & miretur. Ex paginis illis manu tua scriptis, quas mihi reliqueras, vix restat, quod in dies septem aut octo proximos operis sufficiat. Quare te oro ac obtestor, ut absque cunctatione ulla reliqua mittas, quae in promptu habes. Promisi enim Elzeviriis, fidemque meam obstrinxi, in te moram nullam fore. Si fefellerero, vix est, ut imposterum quicquam mihi credituri sint. Neque tua minus interest, quam mea, editionem maturari. Nam si te necdum paratum intelligant, jam satis caussae invenerint, cur a proelo librum revocent, & labores tuos frustrentur. Haec ingenue, & ut amicum amico par est, tibi scribo. Sed &

& hoc peto, quod monere nuper oblitus sum, ut libri, praesertim si quos ex publica Bibliotheca habes, ad me redeant in finem Aprilis proximi, quando pedem hinc moturus sum. Volo autem res meas plane compositas esse, antequam discessero. Quanquam mea me non sic tangant, quam quidem ea, quae aut ipse ex Academia habeo, aut amicis credidi, quae ut publica esse scis, ita nec in mea potestate sunt. Vetus Editio Liviana, Hotomannus ac Schottus de Re Numaria, & Oct. Ferrarius nunc mihi succurrunt. Nam liber, in quo haec talia notare soleo, nunc ad manum non est. Tua quoque tibi, quamprimum fieri poterit, restituam. Vale, Vir & Amice summe, & haec boni consule. VIII. Kal. Martii. Anno CIOIOXLV.

EPISTOLA CXIII.

J. F. R. GRONOVIIUS

*Nic. Heinsio.**Leidam.*

Nobilissime & magne juvenis. Heri ad te dedi unas, quibus adjunxi decem phyliras Notarum Livianarum. Spero te jam accepisse eas, sed subveor, ne etiam tardius, quam desiderasti: non tamen cessasse multum operas puto, aut si aliquantulum cessarint, difficulter ad opus revocatum iri. Non ego in mora fui, sed hibernum & tabellarius. Nunc non tam argumentum mihi crevit ad te scribendi, quamquam id nunquam deesse amanti potest, quum officium praesto ei, qui has tradidit tibi, nobili & magnae spei juveni, *Laurentio Langermanno*. Is proximum annum domi meae transegit, & in studiis suis consilio meo usus est. Revocatus a parente, avunculo meo, conspectissimae dignitatis viro, adire prius aliquot Hollandiae urbes celebriores constituit, & illustres studiis viros, quorum nomina a me accepit, salutare. Itaque quum ignotum non sit ei, qua reverentia Parentem tuum, Principem in omni eruditionis genere virum, ego summis etiam beneficiis devinctus colam, qua pietate tecum sim conjunctus, quoque favore crescentem merito famam tuam prosequar, voluit meas apud te preces interponi, ut & ipse familiariter eum admittas, & conspectum Parentis tui breveque alloquium ei compares. Haec summo honori, ut revera erunt, sibi futura putat, & ego pro insigni testimonio vestrae erga me benivolentiae interpretabor. Vale, Decus meum, cum vestris, & me amate. Daventriae VII. Id. Mart. CIOIOXLV.

EPISTOLA CXIV.

J. F. R. GRONOVIIUS

*Nic. Heinsio.**Leidam.*

Nobilissime Eruditissime & amicissime juvenum. Ego vero non modo boni consulo, sed & gaudeo, beneficiumque me accipere fateor, quod opusculi nostri tam strenuum te praestas exactorem. Dabo operam, ut nec operarum diligentia, nec tua fides a me destituatur. Si statim, ut tuas accepi, habuisssem, cui traderem, quae nunc mitto, jam illac penes vos essent. Hic primus abit, ex quo tuae mihi sunt redditae, & quidem diem unum solito ferius, dum refugit sumtuosum terrestre iter, & exspectat, donec mare bona fide sit regelatum. Prorsus nunc, quum diei magnam partem τὰ ἐγκύκλια eripiant mihi, lucubrationes meas nulla alia in re occupo, interdum, ut Horatianus ille venator, tenerae conjugis immemor. Si non id operae pretium fecero, quod tu nimis amice exspectas, erit tamen, cur homines elegantes eam non sumsisse me nolint. Puto te accepisse, quas pridem ad te dedi. Sanctius una cum Caesare tandem mihi traditus est: videbo, detne occasionem mihi tui iterum in nugis nostris appellandi. Livium bibliothecae vellem jam haberes: neque enim indigeo amplius, qui tres veteres editiones, hujus Andreanae, sive Mediolanensis traduces, nactus sum, & ubi praecipue eo utebar in tertia parte Livii, id dudum contuli. Speculabor commodam occasionem, qua mittatur: si deerit, meo sumtu faxo ad vos redeat. Vale, anime mi, & me ama, vestrosque omnes & Cl. Boxhornium saluta. Daventriae Prid. Idus Martias stylo vestrate CIOIOCXLV.

EPISTOLA CXV.

J. F. R. GRONOVIIUS

*Nic. Heinsio.**Leidam.*

DUrum, sed levius fit patientia. Cujus tamen culpa mihi imputari nequit: nam qui a receptis tuis primus discessit hinc tabellarius, ei fasciculum dederam. Caeterum non ob aliam causam tam parvula interposita mora me offendit, quam quod optarem te in toto opusculo hanc mihi operam praestare posse, quam in primis praestitisti foliis, & praestitutum te, dum aderis, offers. Quod quidem pro magno beneficio aestimo. Parte ista absoluta non cessabunt: nam jam aliam aequae magnam redactam in purum habeo, quam

Tom. III.

T

pro-

proxima hebdomade mittam, & mitterem nunc, si relegissem. In foliis tomii tertii, quae ad me miserunt per te ultimum Elzevirii, nescio qua incuria collector omisit G g. id igitur quoque petes. Quae in scheda inclusa notata sunt, quatenus res integra est, suis locis inferes. Ubi cave, ne omittas subductis lineis monstrare alio caractere auctorum verba esse imprimenda: in quo quia semel iterumque nescio quomodo ego negligentior fui, admissus est error, cum alibi, tum insignis pag. 43. ad cap. 36: ubi verba Gellii sunt communi caractere scripta. Monebis etiam Elzevirios, ut particulas mutatae praefationis exemplaribus omnibus inferant, in primis illis, quae in Galliam vel misere, vel sunt missuri. Consobrinus meus tuam erga se humanitatem patrisque maximi in suis ad me magnifice praedicavit, & gratias vobis apud me egit. Id quod fuit gratissimum mihi, & eo nomine tibi quoque debeo. De Silio gratulor tibi. Quam multa sunt, in quibus haereo! eorum forte non pauca tu jam investigasti. Utinamque de his agendi otium esset nunc. Sed testor fidem, non est. Tu vale, meum decus, & me ama. In secundo, quod proxime mittam, folio, invenies iterum mentionem tui dignam amicitia nostra, ortam ex colloquio, quod habuimus, cum istic essem. Iterum vale, & salve cum vestris. Daventriae a. d. xvi. Kal. April. nostrate stilo CIOIOCXLV.

EPISTOLA CXVI.

NIC. HEINSIUS

J. Fr. Gronovio.

Daventriam.

Quod eventurum metuebam, Clarissime Gronovi, cum nuper ad te scriberem, id evenit. Cum videret is, qui curam typographiae Elzevirianae habet, non multum restare ex paginis illis notarum tuarum, quas hîc reliqueras, neque quicquam praeterea a te mitti, operis mandavit, ut alio labores suos dirigerent. Id multum me reluctante factum. Nihilominus, si in opere tuo assiduam, ut tum volebam, navassent operam, haud dubie ipsis cessandum fuisset. Serius enim altera notarum tuarum pars ad me perlata. Habent nunc sub manu comoediam Gallicam *Cornelii*, quam *Mendacis* titulo insignivit. Ea absoluta, quod intra diem alterumque fiet, ad curas tuas Livianas revertentur. Folia quinque jam excusa sunt, quae hîc mitto cum caeteris, quae in Livio ipso adhuc a te desiderabantur. Jacturam viginti, aut plurium etiam, dierum fecimus. Non desinam, quantum in me, hortari operas & impellere, ut ante discessum meum, si non totum librum, potissimam saltem ejus partem confectam habeamus. Folia, quotquot haecenus excusa, relegi omnia, idem porro & in caeteris factururus. Non sum is, qui magnam mihi in arte ea, quam correctoriam vocant typographi, peritiam vindicare possim; id tamen affirmare jure mihi videor, plus quam centum errores ex paucis illis pagellis

pagellis a me sublatos. Dies jam aliquot totus fui in excutiendo Silio Coloniensi. Non putassem *Modium* & *Carrionem* tam lautum spicilegium nobis reliquisse. Sed de his fortassis alias. Vale, meum & literati orbis magnum decus. Raptim. Lugd. Batav. cicidcxlvi. xiii. Kal. April. Dum expecto ab Elzeviriis folia operis tui tibi mittenda, ecce supervenit egregius juvenis Consobrinus tuus, qui alteras a te mihi tradidit. Exhibui illi ea, quae petebas. Iterum vale.

EPISTOLA CXVII.

J. F. R. GRONOVII

*Nic. Heinsio.**Leidam.*

Nobilissime & Doctissime juvenum. En tibi, ut constet mea fides, alia pars texti Notarum Livianarum. Simul aliquot folia iterum impressa fuerint, ut justum fasciculum faciant, rogo ut mittere ne graveris. Illud quoque curare te velim, si potest fieri, ne pereant autographa mea, sed colligantur, certe quae supersunt, postquam illis satis usae sint operae. Multa inter describendum adjeci, multa mutavi, secusque reddidi, quam exstant iis in adversariis, quae apud me servo: sic ut complura menda non possim, nisi illis revisis, corrigere. A *Fabricio* tandem literas accepi, quae me poene in coelo locaverunt. Certe non sine lacrimis eas legi: adeo exultabat animus ad conspectam tantam hominis optime, si quisquam mortalium, meriti fortunam. Estis Iô superi: nec ubique pretium virtuti periit. Ipsas ad te mitto, ut mecum gauderes, & admirabilem Dei providentiam venerareris: tum ut cognosceres haud quaquam illum tui oblitum esse. Eae fac, quaeso, ne sine tuis ad illum ad me revertantur: nam ego responsum eousque differam, & hanc usuram illius morae expectabo. Vide etiam satisne ex sententia sint tua, quae scripsi ad lib. 27. cap. 47. Vale, meum decus &, ut facis, me ama. Daventriae a. d. v. Kal. April. Julian. cicidcxlvi.

EPISTOLA CXVIII.

NIC. HEINSIUS

*J. Fr. Gronovio.**Daventriae.*

CLarissime ac Amicissime Gronovi. Tardius in opere tuo pergunt, quam vellem, pergunt tamen, Elzevirii. Impetrare ab operis haecenus non potui, ut septimanis singulis duo folia absolverent, quod illis pensi injunxeram. Nisi festinant, expectandum non est, ut totius operis curae vacare possim.

Optimam enim aestatis partem elapsuram video. Adde, quod aquae Spadae per totum annum, non nisi mensibus duobus, aut ad summum tribus commode bibuntur. Agam hodie cum Elzeviriiis denuo, & si fieri potest, ad editionem maturandam impellam. De erroribus nonnullis commissis in foliis notarum jam excusis quod scribis, nolim sane factum. Et, nisi fallor, inter excudendum notaveram Gellii locum aliis literis exprimendum esse. Sed operas, tam hinc, quam alibi, non satis morigeras expertus sum, quo nomine cum ipsis controversia mihi jam fuit. Sed & prima illa folia, quod non relegisses, subinde mendosius descripta offendi, sic ut tribus quatuorve locis, vocem unam alteramque de conjectura addiderim. Lineis etiam subducere nonnulla neglexeras, atque inter illa Gellianum locum. Mea quoque culpa errores quosdam commissos non nego. Solebant vespertino ut plurimum tempore folia relegenda ad me destinare operae. Scis autem quam non tuto lucernae talia committantur. Ipse quoque animum alio nonnunquam divideram, ab amicorum, ut sit, aut puellarum colloquiis adhuc recens. Hoc ne posterum fiat, matutinas horas operi tuo corrigendo impendam. Quicquid fiet, me absente, soli typographiae Elzevirianae correctori operis tui curam non commiserim, cujus negligentia parum abfuit, quin notas ad integrum Livii caput tuas nuper omisissent operae. Deprehensae enim a me, & hoc nomine castigatae in bonum correctorem culpam rejecerunt. Unice sane vellem ad finem usque operis laborem hunc meum tibi probari, tum quod famae tuae, si quis alius, studeo in primis; tum quod meis quoque profectibus fructus inde sperandus haud exiguus. Ex animo dico: summam eruditionem tuam, summumque judicium admirari satis non possum. Sed de te virtutibusque tuis apud alios commodior dicendi locus est. Cum nuper inciderem in illum Ovidii locum a te restitutum, 11. ex Pont. 14. 20. *junctis curva theatra locis*, valde mihi gratulatus sum, cui eodem modo jam olim restitutus esset. Quanquam in eo neque tuae neque meae laudis summa vertitur, praesertim cum libros scriptos duces sequamur. In explicatione loci plus difficultatis esse, quae enim illa *juncta loca*? Ut, quod sensi hactenus, ac etiamnum sentio, dicam: loca ea intelligi puto, quae duos simul capiebant, quaeque *lineas* alibi noster vocat. Nosti illa, *Est bene, quae cogat, si nolis, linea jungi*. Haec pluribus ad ipsum Ovidium adstruemus. Tu quid sentias scire velim. Claudianum e manibus in tempus aliquod deposui, Spadae fortassis illum absoluturus. Expecto enim Bruxellis collationes quasdam ex libris Vaticanis *Philippi Rubenii*. Exhibuit interim tum alias, tum hodie negotium in 14. Conf. Honorii locus, quem a te excuti velim. Vers. 500. *Munificus laudis, sed non & prodigus auri*. Latet ironia, eaque satis aperta, in hoc versu. Si enim ita scripserit Claudianus, haud dubie tangat Stiliconis avaritiam, quod non fecisse eum, tot Panegyrici satis evincunt, quos Stiliconis virtutibus decantandis consecravit. Recurrendum igitur ad veteres libros fuit, si quid forte juvarent. Primum quidem ad manus Isingrinianus, *Barthio* perperam ubique fugillatus, in quo scribitur, *Munificus largis*, idque expresse Raphaelengius. Sed ne sic quidem aliquid acumi-

nis.

nis hîc video. Suboluit tamen statim legendum, *Munificus largi*, una litera minus, ut ad τὸ *auri* referatur. Atque ita legi in melioris notae Oxoniensi mox didici, nec aliter etiam in ora codicis sui ex Ifingrinianae lectionis vestigiis emendasse magnum *Scaligerum*, cujus manus operas Raphelengianas haud dubie fugerit. Sententiam tuam brevi expecto. Ex schedis illis Coloniensibus multa adhuc in Silio emendari posse verum est. Cujus rei fidem unico tantum specimine nunc faciam, pluribus enim si agam, metuo ne largiter in occupationes tuas, quae latere me non possunt, peccem. Locus est apud illum lib. v. vers. 395. *Ceu pater Oceanus, cum saevior aethere Calpen Herculeam ferit, atque exesi in viscera montis Contortum pelagus latrantibus ingerit undis.* Ita haec ex parte legenda. Sed *saevio*rem aethere *Oceanum* cur vocat? certe *aequore* legendum olim videbatur. *Aequore Calpen ferit Oceanus.* Nunc ut in alia omnia eam faciunt veterum librorum lectiones. Oxoniensis quidem, *cum saeve cetre.* Coloniensis, *cum saeva cethye.* Quantilli negotii Modio aut Carrioni erat scribere, *Ceu pater Oceanus cum saeva Tethye Calpen Herculeam ferit?* Neuter tamen vidit. Tethys & Oceanus infinitis, ut nosti, locis apud poëtas junguntur. Sed jam te obtundo. Folia operis tui reliqua hîc habes. Vale, decus eruditi orbis & meum. Raptim. Lugd. Bat. ciōiōcxlv. iv. Non. April. Haec scripseram, cum tuae & Fabricianae simul mihi redduntur. Mirum, quo gaudio amici nostri fortuna me perfuderit, etsi jam ante tale aliquid, partim ex te, partim ex *Lundii* literis intellexissem, qui Amstelodami nunc agit. Res miraculo similis mihi visa hoc tam ingrato saeculo aliquod virtutibus pretium esse. Scribam illi, & dignitatem istam gratulabor proxime. Nunc enim festinare me vides. In foliis postremo transmissis, quod mei denuo meminisse dignatus es, quid ni honorificum mihi ducam? Satis tamen visum in opere tam erudito nomen meum, nec semel, legi: ad laudes meas, quae faciebant, cum venia tua expunxi. Tertius, nisi fallor, locus restabat emendandus apud Val. Flaccum, qui tamen nunc non succurrit. Certe Carrion passim notat etiam in veterissimo illo suo codice pro *Aea*, *Aeta* legi, & *Aeeta* Medea pro *Acaea*. Illustrissimum *Grotium* Legati munere defunctum, ac in Sueciam revocatum numquid audisti? *Raphelengius* noster ex vivis nuper abiit. Iterum vale.

EPISTOLA. CXIX.

J. F. R. GRONOVIIUS

*Nic. Heinsio.**Leidam.*

EGo vero, o princeps amicorum meorum, omnia ago, ut festinem, sed omnia agentem festinantemque identidem aliquid inhibet, & in causa est, ut morari vobis videar. Quid autem? Adeon inscitum aut ingratum me putas, ut beneficium tuum non aestimare possim? ut nesciam eam mihi te operam

T 3

sumere;

sumere, quam hodie neminem novi mortalium, a quo expectare possim? Hanc ipsam cogitationem num dubitas satis acri mihi incitamento esse, ut ad umbilicum pervenire me studeam, antequam te cura valetudinis mihi eripiat? Certe stultissimus atque inficetissimus hominum essem, si tali occasione lentus dormirem. Ego vero a longo tempore condidi plane me in museo, nec video quemquam, nec alloquor, nisi coactus functione muneris mei: quae tamen nimis saepe me interpellat. Scis autem nulla in re me posse leviter defungi, sed adhibere vel minutissimis eam curam, quam decet habere hominem sollicitum, ut famam scripti sui a tui iudicii praerogativa auspicetur. Quare ut ego castigationem tuam, quae tantum amorem non modo praefert, sed & complectitur, libenter fero, ita te rogo miserearis mei: & tarditatem non cessationi (profecto enim cesso nunquam) sed & sollicitudini & aliis occupationibus imputes. Nudius tertius scholasticum magistratum ejuravi: ejus rei causa verba facere in praesentia magistratus nostri necesse fuit: eo momento quae dicuntur, plusculis diebus ante constiterunt. Quod si haberem, qui vel in describendo me juvaret, minus vobis esset expectandum: nunc omnia incumbunt uni. Non audeo te rogare, ut tantam rem, in qua valetudo tua vertitur, diutius, quam par est, differas. Itaque ego quidem, quod potero, faciam: cacterum tu rationem inibis, quid res tuae ferant, nec mea causa corpusculo tuo injuriam facies. Malo ego quodcumque periculum subire, quam morae esse tuae saluti. Sic quoque beneficium tuum est ingens, & nunquam animo meo excidet. Ergo ipse prospice, quid ferre possis: ego quidem, ut quidque paratum erit, submittere pergam, & ideo etsi minorem solito particulam nunc in mundo haberem, differre te nolui: nec proximus post tuas nuntius discedet sine meis. Sed tu constitue semel, & indica quem longissimum tibi diem ad iter ordiendum putes restare: si intra eum absolvere poteris, scies; sin, vel citius tibi potius, quam mihi indulgere te velim. Claudiani & Siliii loca verissime abs te emendata censeo. De *linea* fateor me nihil adhuc satis explicati habere: nec licet nunc inquirere: abs te discam. Unum in tuis ingratum fuit mihi, quod justissimos meos erga te affectus modesto admodum encomio exprimere me prohibuisti. Tu quidem maxime animo magno esto: sed mihi injuria facta est, quam alia occasione, quum tuae potestatis res non erit, vindicabo. Ferrarium remitto, & gratias ago maximas. Cuperem te judicem esse eorum, quae adnotavi, dum illum lego: sed schedae meae adeo sunt negligenter conscriptae, interpolatae, inculcatae, ut antequam aliam manum adhibeam, ostendere eas non audeam. Spondeo ingens & pigerrimum otium mihi post Livium absolutum: neque enim ita brevi inducar, ut aliquid edam: lente tantum & fastidiose in futurum parabo. Haec ita, si placebit τῷ κρείττονι. Vale, nobilissime juvenum & animo meo carissime, quem infinitis pignoribus tibi devinctum habes. Daventriae Kalen. Maji Julianis CIOIOCXLV. raptissime & prolixius, quam cogitarem, cum calamum arriperem. Iterum vale, & amicos communes saluta.

EPISTOLA CXX.

NIC. HEINSIUS

*J. Fr. Gronovio.**Daventrin.*

IN postremis tuis sancte promittebas, quod & ante jam aliquoties promiseras, operis Elzevirianis nullam per te moram fore. Eam adeo rem tibi credidi, imo & Elzeviriis, ut mecum crederent, longa oratione persuasi. Cras absolutum erit, quicquid hactenus misisti notarum tuarum, quod nec dum absolutum sit, mihi, non operis imputandum. Per dies enim jam nonnullos variis cunctationibus rem, quantum potui, protraxi, dum reliqua a te expecto. Verum quidem est in postremis meis me conquestum esse de operarum tarditate. Sed paulo post ab Elzeviriis obtinui, ut unius loco duo postmodum in opere tuo exercerentur; sic ut tria singulis septimanis folia mihi exhibenda promitterent. Ejus rei te certiore per cognatum feci, a quo etiam petii, ut indicaret tibi, reliqua quamprimum mittenda. Id feceritne nec ne non scio, mihi certe officii mei ratio constat. Spadam jam profectus essem, absque opere tuo fuisset; quod ut absolutum viderem, in initium mensis proximi iter meum rejeci. Cras Dordracum abeo; idque nulla alia ratione, quam ne jurgiis Elzeviriorum me exponam, quos aegerrime hanc rem laturos satis praevideo. Vale, Vir Clarissime, & hanc liberam objurgationem boni consule. Tuam enim rem, non meam agi scis. IV. Eid. Majas Anno MDCCXLV.

EPISTOLA CXXI.

J. FR. GRONOVIVS

*Nic. Heinsio.**Leidam.*

EN tibi promissam nuper aliam particulam. Si habes Cornelii Nepotis Argentinensem editionem Boecleri, velim inspicias loco citato ad lib. 34. cap. 29. quod ibi monuimus: de glossmate, an quis observarit. Si aut ille aut alius praecepit, aut si in editione ejus legitur, ut voluit, delebis illa: Nam quod vulgo additur, *essent*, glossema est: & sufficit allegari textum emendatorem. Editio, qua ego utor, pessima est, neque aliam nancisci possum. Velim etiam consideres Ovidii locum ad lib. 35. cap. II. propositum. De conjectura ita respondi nuper amico consulenti. Si quid verius habes, five ex ingenio, five ex scriptis, rogo nostrum deleas. Ita omnino volo. In Cornelii Datame non longe a principio habetur in libello meo: *Is regis dicto audiens non erat.*

erat. Certum habeo legendum esse, *regi*, quod vide an quis anticipaverit: si non, in addendis ad similem locum Livii monebo. In Indice Boecleri etiam quaeres observaveritne, *pedestres* copias, ut Graecis *πεζοὺς* & *πεζῖναις*, pro terrestribus, opponi classiariis. Est enim ubi id apud Livium restituimus, & mox cognosces, & video aliquoties Cornelium Nepotem ita locutum. Scire cupio, an ille hoc ibidem annotaverit, & num aliis quibusdem auctorum locis utatur. Scripsi festinanter, & jamjam celebraturus affinis nuptias. Daventriae. Prid. Majas Julian. CIOIOCXLV.

E P I S T O L A. CXXII.

J. F R. G R O N O V I U S

*Nic. Heinsio.**Leidam.*

Ita fit, amicissime Heinsi, quo magis properes, eo citius obveniat, quod imoretur. Ut ego proximam hebdomadem causis plane nugatoriis, quas repetisse non attinet, invitissimus & poene interdum lacrimans, poene totam otiosus exegi. Quod scio te quoque non parum irasci. Sed non semper nostrae sumus potestatis: officia & ingratae oblectationes amicorum quamvis nolentes saepe nos macerant. En igitur particulam, quam ante octiduum jam tibi destinaveram, & mittere facile potuissim, ni fures illi temporum manum nobis injecissent. Itaque de operis & itinere tuo constitue, quod commodum videbitur: video enim quo magis propello, eo minus identidem me praestare, quamquam omnia agam, ne carmen laboret in fine. Habeo, quod expostulem tecum, quod cum scires apud Ovidium de Ponto, *momenta saluti*, jam emendasse Scaligerum, id me tribuere mihi passus sis. Ego vero ante paucos demum dies, cum veniret in manus meas patris tui editio, quam in urbe esse nesciebam, id didici. Nunc illud quoque cures, velim. Lib. 36. c. 14. locus Vegetii est adductus, ubi *τὸ millia*, quia virgulis circumscriptum est in Scriveriana, delendum tamquam non comparens in MSS. judicavi. Nihil vero ille de hoc in correctionibus militaribus. Inspice igitur, quaeso, Stewechium, & si ab eo id notatum, muta ultima verba hoc aut simili modo deleta parenthesi: *ubi τὸ millia posteriori loco in MSt. non esse notavit Stewechius*. Quod dixeram de copiis *pedestribus*, habes lib. 37, 53. Quod si Argentoratensis editor loca in indice omnia notavit, non est opus hic omnia adduci, ne ille me a se descripsisse putet. Sufficit unum alterumque citari, & addi: *Et alibi*. Ego quidem illa editione usus sum aliquando, sed non recordor an observaverit. Et de illo, *regis dicto audiens*, iterum aurem tibi vello. *Rubenii* ingenio mirifice delector: placet nimis, *miles stabuli*: nec profecto video, quid aut elegantius ad sensum studiumque principis, libertatis imaginem, quantum poterat, servantis, aut propius ad vestigia veteris scripturae in loco

loco Ammiani possit erui. Itaque multum tibi debeo, quod mecum ea communicare voluisti. *Fabricio* tuas propediem curabo. Vale, nobilissime & summe juvenum, meque ama. Daventriae prid. Kal. Jun. CIOIOCXLV.

Rogo te, adeas quamprimum, quod commodum tuo fiat, ἡ σεβασμιώτατον *Spanhemium*, eique meo nomine dicas officiosissimam salutem, & fuisse apud me *Cumingium* ex agro Zutphanienſi, detulisse mihi salutationem ejus multo gratissimam; addidisse de libris duobus ad me missis: quos haecenus ego nullus accepi, nec nisi per illum quidquam de iis cognovi. Iterum vale, & communes amicos saluta.

EPISTOLA CXXIII.

NIC. HEINSIUS.

J. Fr. Gronovio.

Daventriam.

Virorum & amicorum summe. Speraveram expostulationes meas aliquid apud te effecturas, sed frustra fui. Denuo cessant operae, quia tu cessas. Pollicebar mihi, quicquid notarum tuarum restaret, ante discessum meum absolutum fore, quam ego rem nunc prorsus conclamata vi-
deo. Nec tamen eo nunc te increpo, quasi rerum tuarum parum satagas, sed quod nimis operose satagas. Jacta semel alca est, ubi praelo opus tuum commissum fuit. Si quae emendanda aut addenda putas, ea in alteram editionem servari possunt, aut etiam huic editioni subjici. Notis enim absolutis non deerunt tibi rationes, cur in tempus aliquod illudas Elzeviriorum festinationi. Dum contextitur index, dum errata annotantur, dum alia fiunt, nam praefatio quoque conscribenda restat, vides quam multa cunctationi tuae possis praetexere. Scripseram proxime, exacto festo quinquagesimali statim Spadam me discessurum, sed est mihi Amstelodami negotiolum aliquod, cui conficiendo triduum quatrimumve requiritur. Utinam illic te inveniam: nam die quinto sextove mensis proximi eo discessurus sum. Ante abitum ex hac urbe meum mittam ad te, quod restat foliorum. Locum Ovidii non dubito recte a te emendatum esse. Cogitaveram aliquando: *Sive domi praesume dapes, seu desine citra Quam cupis, ac paulo quam potes esse minus*. Nam illius *Sive vestigia* videntur superesse in τῷ diu, quod pro domi agnoscunt libri plerique. *Quam cupis ac propius accedit ad Vulgatam lectionem Quam cupias*, tua conjecturâ, *quam cupis*, &c. Sed maxima pars codicum antiquorum, *Quam cupies*, quod tibi favet. Ita, inquam, cogitaveram olim, quod non viderem, cur domi praesumendae non essent dapes, cum nimiam aviditatem in carpendis cibis tantopere damnet: tibi tamen facile accedo. In Cornelii Nepotis Datame, *Is regis dicto audiens non erat*, quod legi vis, regi, jam a Lambino praeoccupatum est. Sic enim ille: *Sic saepe loquitur Probus: supra in Lysandro, princip.*

Tom. III.

V

qui

qui quod dicto audientes imperatoribus suis non erant. Sed videtur hic legendum, regi dicto audiens non erat, quomodo & in exemplo proxime posito Cornelius locutus est, & item M. Tullius caeterique boni scriptores loqui consueverunt. Pedestres copias classariis opponi notavit Boetlerus in Indice, ex capite primo vitae Cononis, Dionis cap. vi. Alcibiadis, cap. viii. Chabriae, cap. ii. Hannibalis, cap. xi. Alia autorum loca, quibus hoc probaret, non adjecit. Vale, Vir summe, & summae festinationi ignosce. Lugd. Bat. cicidclxv. vi. Kal. Junias.

EPISTOLA CXXIV.

J. FR. GRONOVII

Nic. Heinsio.

Leidam.

Nobilissime & eruditissime juvenum. Tu quidem amice, quod flagitas, poscis, accusas: & ego quum non possim momento satisfacere desiderio tuo, non cesso, ut quantum licet id assequar. Hac hebdomade, quae nobis feriata est ob Pentecosten, spero in Livium me notas absoluturum. Sequentur paucula in perditorum epitomas. Et ego cupissem te amplecti, antequam iter ingrediare, sed non potui exesse museo, vel ob hanc telam. Et nescio quomodo tuae postremae Amsterodami non fuerunt traditae ordinario tabellario, sed foeminae, quae inde huc totum iter navi confecit, eoque tardius venit. Itaque non ante nonas Junias vestrate computandi ratione (nam nos Julianum hic sequimur) hoc est ante triduum mihi tuae sunt redditae. Quod inspexisti Cornelium Nepotem, gratias ago. Si res integra est, sufficit de pedestri poni primum exemplum, una cum illo ex vita Agesilai, adjicique: & alibi. Valde autem velim apponi Ciceronis exemplum in Catone majori, Nec tamen omnes possunt esse Scipiones aut Maximi, ut urbium expugnationes, ut pedestres navalesque pugnas recordentur. Vale, qui summo beneficio me denuo emisti, olim tuum. Daventriae. vi. Id. Junias vestrates, qui nobis post diem quintum Pentecostes cicidclxv. Cupio scire an τὸ πάλιν Spanhemium videris.

EPISTOLA CXXV.

NIC. HEINSIUS

J. Fr. Gronovio.

Daventriam.

Clarissime Virorum. Festinatione plus quam tumultuaria iter Aquisgranense a me susceptum est, sic ut promissi mei rationem habere non potuerim.

tuerim. Scripturum enim me tibi & missurum, quod reliquum foliorum in Notis tuis absolvisset operae, promiseram. Hoc quia fieri non potuit, in via subinde me ipsum incusavi. Fidem tamen meam ne omnino damnare possis, ecce, famulo paterno injunxi, ut cum hisce meis folia illa ad te destinaret. Eo certe faciliorem a te veniam mihi polliceor, quod, quemadmodum in hac re peccasse me non diffiteor, ita in aliis rebus, quas penultimae ultimaeque tuae curatas volebant, fatis diligentem me praestiterim. Nam & addenda notis tuis curavi, quae addi per typographos adhuc poterant, & Cl. *Spanhemium* conveni, qui etiamnum asseverat, se studioso cuidam, nisi fallor, vestrati, nomen enim nunc mihi excidit, duos libros commisisse tibi deferendos. Eos non esse redditos fatis mirari non potest. Recte feceris, si ad illum scripseris, ut nomen tam boni latoris scire possis. In hanc urbem salvus atque sospes ante triduum perveni, sic ut meliorem itineris fatis molesti eventum sperare ne quidem potuerim. Menses duos valetudini percurandae dabo, de qua ut optima quaeque praesagiam superioris anni facit auspiciatus ille successus. Vale, princeps amicorum, & in hac solitudine literis tuis subinde me bea, quas aut Leidam ad aedes nostras destinare potes, aut per tabellarium Antverpiensem recta ad me. Raptim. Aquisgrani. Anno MDCCXLV. IV. Kal. Julias.

EPISTOLA CXXVI.

J. F. R. GRONOVIIUS

*Nic. Heinsio.**Aquis Grani.*

Nobilissime & Eruditissime juvenum. Quam aegre tuli festinatum abitum tuum non permisisse, ut promisso de postremis ad me scribendis satisfaceres, tam lactus libensque tuas heri tantum accepi. Non dubitabam autem & ante, ipsam festinationem & cumulum negotiorum in illud discessus momentum, ut adsolet, cocuntium, sine ulla fidei tuae labe hanc mihi molestiam creasse. Gratias ago, quod mandatorum ad τὸ πᾶν *Spanhemium* memor fueris, & tuo consilio utar. In primis gaudeo & felicibus oris destinati itineris & spe, quam habes valetudinis illis in locis confirmandae: illam ratam & propriam esse tibi velit Deus. Ad Livium ipsum absolvi: restant paucula in epitomas amissorum librorum, & dein addenda fatis copiosa. Nam index ut fiat, addaturque, nec moram nec sumtum sustinere amplius velle videntur Lucumones typographi: adeo querulas de excrecente mole libelli ad me dederunt. Et postquam tu abes, neminem habeo, qui illos in ordinem cogat. Meministi me conqueri ad tertium tomum de multis, in quibus a primis editionibus fuit discessum, cum nemo Commentatorum, unde aut qua fiducia id factum sit, mentionem faciat? Id nuper adeo didici: venit enim quasi virgula divina in manus meas editio Moguntina, quae posteriores libri xxxiii. & xl. partes

prima publice ex MS. exhibuit: ei sunt adjectae variae lectiones ex eodem scripto a libro xxxiv. usque ad quadragesimum, quas omnes fere cum pulvisculo Aldus, dehinc caeteri, in textum receperunt. Eam si prius nactus fuisset, & contextus fuisset emendatior, & Notae illa parte accuratiores. Cupio praefationi ad lectorem intexere historiam veterum editionum, quae aut juverunt, aut deformarunt auctorem nostrum, sed satis paratus nondum sum: alioquin vides quantum ea res usum haberet, non modo ad pleraque nostra confirmanda, sed etiam ad sublevandos, qui post me aliquid sunt in eo praestituri. Facta est quaedam editio *Io. Antonii Campani* paullo post primam *Jo. Andreae Romae* curatam, & Paullo 11. P. inscriptam, ex qua Mediolanensis expressa est. Praefationem *Campani* inter opera ejus in bibliotheca nostri Gymnasii invenio, sed sine die, anno, & loco: floruit sub Pontificibus Pio II, Paullo II, Sexto IV. inscripsit Cardinali Papiensi: meminerunt ejus *Gruterus* & *Gehhardus* in excerptis. Vide, quaeso, an alicubi eam reperire possis, & enota mihi, quando & ubi prodierit. Sunt & Basileenses, quae aliquid suum textui attulerunt, quarum praeter unam, & id momento, nullam vidi, sed ea quae prima quinque ultimos dedit, in Helvetia nata est: eam sicubi nancisci posses, etiam excedenti aliquantum pretio, ut mihi comparares, rogarem, si mittere aut ferre inter farcinulas eo, unde mitteretur, posses. Videbis quid commodum tuum patiatur, ejus enim semper potiorum te rationem habere volo. Cum sciero, quando in Galliam moturus sis, schedula transmittam enotata paucula loca, de quibus per occasionem MSS. codices in meam gratiam consulas, & jam nunc fecissem, si otium fuisset excerptendi. Interea expectabo unas de consilio peregrinationis tuae, non tantum si eam possim meo consilio juvare, id ut ne tibi desit, sed etiam, si ea mihi possit in quo prodesse, ut tibi occasionem me demerendi suggeram. Tanta est mihi fiducia de affectu tuo, ut hoc quoque non ingratum tibi fore existimem. Vale ὁ ἀντάδελφε, & me ama. Deus te salvum ducat ac reducat. Daventriae. III. Id. Sextil. CIOIOCXLV.

EPISTOLA CXXVII.

NIC. HEINSIUS

J. Fr. Gronovio.

Daventriam.

Clarissime Virorum. Hesterno die tuae mihi redditae, quae cum suo pretio acceptae & gratae imprimis fuerint, nescio tamen quomodo solito acceptiores reddidit ipsa haec solitudo, cum qua indies conflictor. Cave enim existimes in orbe toto Europaeo locum esse hac urbe magis illiteratum. Quae tamen & ingenio, & aëris temperie, & vicini rursus cultu atque elegantia ad Musarum patrocinium comparata videtur. Neque quicquam facile, quod ad oblecta-

oblectamenta vitae faciat; in ea desideres. Ut non immerito Carolus ille Magnus, quemadmodum tota vita, sic ipsa quoque morte quieti suae eam destinavit. Bajae subinde perlustrare mihi videor. Sordet tamen, inquam, locus, quia Musae absunt. Unicum solatium sunt amicorum literae, inter quos jam olim principem a me locum tibi deferri non nescis. Nihil ergo necesse est, ut verbis multis testatum tibi faciam, quo gaudio ad aspectum manus tam amicae exultarim. Vel hoc ipsum satis argumenti, ut opinor, erit, quod e vestigio nunc ad illas respondeo. Notas Livianas ad finem perductas esse vehementer laetor; neque quicquam mihi magis in votis est, quam limatissimum opus publico donatum intueri. Index ut accedat necessarium puto, quicquid obloquantur Elzevirii. Et jam scripsi ad patrem, ut, si fieri possit, iis hoc persuadeat. Ipse vix dubito, quin persuasurus sim, si in reditum meum trahatur editio: quem ad summum ultra diem mensis proximi vigesimum propter rationes multas differre non possum. Mox ad Gallicanum iter me accingam. De editionibus Livii nonnullis emendis doleo, quod operam hinc meam probare tibi non possim; vix enim putem tria aut quatuor exemplaria maximi auctoris in hac civitate, si tota excutiat, inveniri posse. In Galliam ubi venero, omnibus occasionibus invigilabo, ut voti compos evadas. Sed audi, quaeso, fortunam meam. Meministi, ut opinor, anno quoque proximo me conquestum esse de barbarie hujus civitatis. Cum enim primo in eam advenissem, nihil antiquius habui, quam monasteria omnia excutere, si quid fortasse lateret alicubi veterum bibliothecarum; sed nihil prorsus inveni, quod ad gustum meum faceret, quare ab irriti labore destiti. Nunc autem, cum audivissem latere hinc alicubi bibliothecam in privati hominis aedibus, libris rarioribus instructissimam, ipsum autem possessorem presbyterum esse, virum in Graecis literis valde subactum, & quod rei caput est, comem ac affabilem, ipsum hominem accessi. Post varia colloquia petii, ut copiam mihi faceret perlustrandae bibliothecae suae. Cum haud difficulter id impetrassem, denuo petii, si quid haberet codicum manu exaratorum. Affirmavit se habere nonnullos, sed magnam partem Graecos, & simul ostendit. Perlustratis iis, offendi Mathematicos potissimum ac Musicos esse, omnes tamen mutilos, quosdam etiam maxima sui parte truncatos, ut non libri, sed fragmenta librorum apparerent. Aristophanis tamen duae comoediae erant integrae. Exhibuit etiam schedas quasdam juridicas, atque inter illas fragmentum Legis Rhodiae illius vexatissimae, in veterrima membrana scriptum. Inter libros Latinos, magnam partem poetas, nihil erat alicujus rei, praeter codicem Ciceronis de Divinatione & Natura Deorum, literis Saxonice exaratum. Nunc in eo sum, ut hos libros, vel saltem partem eorum mei juris faciam. Cujus rei spem non parvam ipse possessor mihi jam fecit: modo eorum loco libros quosdam typis editos rarioribus illi reddam. Trajecti ad Mosam cum nuper essem, in transitu salutavi *Kuchlinum* nostrum, qui rectoratu scholae ibi fungitur. Is affirmavit mihi, se nuperrime invenisse in bibliopoli quodam optimum ac veterrimum epistolarum Symmachi exemplar, ipsumque codicem dono se missurum mihi promisit.

misit. Alteras tuas, dum hîc sum, expectabo. De itinere Gallico prolixè breviter tecum agam. Vale. Aquisgrani. Ipsi Kal. August.

EPISTOLA CXXVIII.

NIC. HEINSIUS

J. Fr. Gronovio.

Daventriam.

Clarissime Virorum. Unicas, dum Aquisgrani essem, a te accepi: ad quas Cilico tum, ni fallor, respondi. Postmodum opinione mea citius inde a parente revocatus sum. Triduo vix domi peracto, cum & classis in procinctu esset, & ventus urgeret, in Galliam transfretandum fuit. Relegi tamen, quantum per summam festinationem licuit, antequam abirem, folium operis tui unicum, quod sub praelo Elzeviriano tum erat, in eoque nonnulla correxi. Quod supererat Notarum jam absolutum credo, totumque adeo librum publici juris factum. Exemplaria haud dubie secum adferet Elzevirius junior, qui quotidie hîc expectatur. Dies jam quartus est, ex quo in hanc urbem veni. Cujus quidem temporis pars potissima nihil agendo periit. Dum sarcinas quaero per civitatem longe vastissimam, quas aurigae cuidam Diepenfi commiseram, dum de hospitio commodo honestoque mihi prospicio, dum amicos quosdam paternos meosque salutatum eo, nec domi invenio, transivisse dies aliquot summo cum dolore meo deprehendi. Hospite utor eodem, quo & tu aliquando usus es. Tempus nunc est, Vir Clarissime, ut cogites, quod quantumque ab opella mea polliceri tibi possis. Totum me tuum esse si nescis, ut quamprimum agnoscas ac intelligas, quantum quidem in me erit, curabo omni diligentia. Tuarum tantum partium est, homine amicissimo uti: cujus rei spem in postremis tuis videbaris facere. Exemplaria operis tui si amicis nonnullis per me hîc offerri cupis, ecce promptum ac paratum. De editionibus quibusdam Livianis tibi comparandis, quod proxime petebas, denuo monendus sum: literas enim illas, dum tumultuarie ac festinanter vasa colligo, cum aliis schedis adferre mecum oblitus sum; neque nunc succurrit, quas potissimum editiones emptas velles. Vale, meum ac literati orbis eximium decus, & plura brevi expecta, ubi ad me, lassus etiamnum ex difficili itinere, rediero. Lutetiae. Kal. ipsi Octobribus. Anno MDCCXLV.

Si quid unquam mea causa voluisti, Amicissime Virorum, ut Illustri Saravio quamprimum me commendes, unice rogo, cujus auctoritate ad Petavianam aliasque Bibliothecas admitti possim. Quod facile scio obtinebis apud virum tui (si quis alius) studiosissimum. Veni in hanc urbem sine commendationibus ullis, quia domo ventus praeter expectationem secundus opinione citius me avocavit. Notum autem hîc neminem habeo, praeter Puteanos fratres, quos creberrimis amicorum salutationibus ut plurimum distractos nosti. Hunc ergo

ergo laborem mihi concede, ut verbis paucis Illustri illi viro de meliori nota me insinues, qui vicissim in tui gratiam quidvis velim. Literae imposteriorum ad te quomodo recta via curari debeant, quaeso, indica. Iterum Vale.

EPISTOLA CXXIX.

J. E. R. GRONOVIIUS.

Nic. Heinsio.

Lutetiam.

Nobilissime & Ornatissime juvenum. Heri accepi tuas ingenti cum laetitia, nunc, qua prima occasione licet hinc mittere, respondeo. Uti dolui praeproperum tuum ex patria discessum, & aspectum tuum & literas, antequam solveres, mihi invidisse (nam postridie, quam abieras Leida, ego illuc veni) ita mollissimum & secundissimum iter maritimum tibi fuisse gavisus sum. Adventum autem in regiam urbem, nutriculam eruditionis & humanitatis tibi magnopere gratulor. Ad illustrem *Sarravium* ecce tibi. Quamquam nomen tuum, & illa divina virtus amplissimae sint tibi *συστατικά*, & has quoque congressum cum illo tuum anticipasse existimabam, tamen jussui tuo parere volui. Adjunxi unas ad ampliss. *Petavium*, si forte ducere te *Sarravius* ad illum non posset; nam solent interdum friguscula illis intercedere. Sed & si neutris indigebis, erunt tamen illis testimonio, me abs te amari, te a me fieri pro meritis tuis maximi. De veteribus editionibus, quod te rogaveram, gratiam facio. Nactus enim sum Amsterodami, quas prae caeteris desiderabam, duas Basileenses, priorem, quae prima exhibuit *Symonis Grynaei* additamentum, alteram *Caelii Curionis* maximam, ex qua puto multas liberas correctiones in vulgatas fluxisse. Sed quia aliam operam tuam amice offers, eni schedulam, in qua designavi loca, de quibus scriptos codices, *Petavianum* imprimis & *Regium*, scriptum quidem recenti manu, sed ex antiquo probae notae, secunda certe decade, quam contuli, descriptum, consulere te velim. Erit id mihi magni beneficii loco, & non sine laude tua, cum annotatis tuis utar. De exemplaribus offerendis, quod offers, peream, nisi doleo & pudet, quod spem tuam & aliorum destituere cogor. Tanta fuit illiberalitas eorum, qui ex opera nostra lucrantur, ut me quoque, nisi maximo meo cum sumtu, illiberalem faciat. Denique quae tuo Patri & *Salmasio* singula totius operis, textus puta & notarum, exemplaria tradi jussi, ita me Deus amet, argento meo ab illis redimere me oportuit. Itaque per occasionem apud *Sarravium*, *Puteanos*, *Heraldum*, *Vallesium*, viros mihi, quoad vivam, venerandos, me excusabis. Tu vero a juniore Elzevirio tibi exemplar meis rationibus adscribendum pete, quo utaris in locis illis conferendis, quodque & absque hoc foret, ante omnes meritis es. *Rupellae*, quando eo accedes, apud *Philippum Vincentium* Theologum, virum praestantissimum, aliquid scripti Livii reperies,

ries, ut & A. Gellium, si bene memini, cujus videndi haud gravatim tibi copiam faciet: an sit tanti, ut horas in iis consumere velis, tu judicabis. *Valesius* aditum facere tibi poterit in Memmianam bibliothecam, quam ego per angustias otii, quod ibi ponere mihi licuit, videre non potui. Puto te hanc hiemem ad minimum illic exacturum, & ne discedere properes, auctor tibi sum: nam prae Lutetia reliqua Gallia tibi sordebit. Quando Andegavum ibis, ad *Claudium Menardum* facile accipies commendatitias a Puteanis: neque indigebis tamen, nam ille te ex meis crebris sermonibus dudum novit & aestimat. Nescio unde rumor ad me pervenit, *Peiraredum* illic adornare novam editionem Statii. Cognosce, quaeso, an ita sit. Non invideo, neque si possim opus novum nuntiare ei, velim: precor immo, ut succedat feliciter. Fac tamen ut sciam. Vale charissimum pectus, & bene rem gere. Daventriae a. d. III. Non. Novemb. CIOICXLV.

Breviorem viam mittendi literas haud scio, quam ut tuas recte Amsterodamum ad Lud. Elzevirium mittas: sumtulum illum facile feram. Tuae integrum mensem in itinere fuere, nec scio a quo ad me missae. Plurimam salutem adscribo experientissimo hospiti tuo. Iterum vale.

EPISTOLA CXXX. NIC. HEINSIUS

J. Fr. Gronovio.

Daventriam.

CLarissime ac summe Vir. Post longam expectationem quod literis tandem tuis beatus sum, multum sane gaudeo. Quid quod commendatitias, plures etiam quam petieram, addidisti? qua quidem in re hominis amicissimi officio tam prolixè tamque diligenter functus es, ut nullum querimoniae meae locum reliqueres. Subirator enim, fateor, nonnihil eram; & iniquius pertinax illud silentium tuum ferebam, binis meis provocati, neque quicquam reponentis. Scis autem praecipitem me valde esse in exigendis amicorum officiis. Tum quoque videbaris mihi nescio quomodo in mores tuos ac amicitiam nostram peccare, adeo morosum atque delicatum continua illa diligentia me reddiderat. Nunc vero video ac laetor, totam hanc culpam non tibi imputandam, sed iis, qui meas ad te negligentius curarunt. Tuas ad Ampl. *Sarravium* ante dies sex septemve jam curavi. *Petavium* quaesivi heri, tum ut tuas offerrem, tum etiam ut libros redderem, quos ex Bibliotheca ejus utendos habebam, sed rus abiisse dicebatur. Tuas ergo famulo ejus commitendas duxi, cum non ante dies quindecim reversurus sit. Inde ad *Sarravium* me contuli, quem etiam sine commendatitiis ullis (frontem meam vide) salutare ausus fui sub adventum in hanc urbem meum. Postea humanissimi *Riverti* ac *Salmasii* (ut credi vult) literae propius me illi insinuarunt. Tertius tu ordine

ordine fuisti, sed sic quoque primus. Tanto enim studio tantoque affectu, quod obiter ab ipsis factum erat, praestitisti, ut pro commendatione, quam petieram, totum panegyricum viro summo miseris. Ingratissimus ergo sim; nisi pro hoc tam luculento officio plurimum me debere tibi profitear. A laudibus tamen prorsus invidiose in immerentem collatis abstinuisses vellem: me-tuo enim vehementer, quemadmodum pro maximo erga me amore tuo fecisti (cui tamen nimium indulgendum non fuit) ita accuratissimo judicio tuo (quam tibi gloriam hîc omnes deferebant) male consuluisse ne possis argui. Scis quam exacto illi ingeniorum ac eruditionis arbitro imponi non possit. Praelegit mihi maximam partem epistolae tuae. A candore quod me com-mendas (quid enim dissimulem?) gratum certe fuit, cujus ego virtutis studio-sum ac candidatum profiteor, ad caeteras laudes profecto erubui. Multus in-de nobis de te sermo fuit, ad quem summo utrimque studio ac ardore fereba-mur. Nihil illo viro doctius candidiusque. Ut de humanitate ejus jam non di-cam, cujus tantum non prodigus est. Nemo in hac urbe, cui plus debeam: nemo, cui libentius debeam: parcus enim ac jejunos beneficiorum suorum aestimator est, & qui de iis praestandis cogitare malit, quam de praestitis. Certe bene de me merendi finem haecenus non facit. Denunciaui jam illi horren-di carminis legem, ut & *Puteanis*, ne Livii tui exemplaria frustra expecta-rent, neque videntur expectasse, nam & ille & hi ab Elzevirio sibi jam compa-raverant. Apud caeteros quoque, quos volebas, prima occasione te excusa-bo. Mandavi jam Elzevirio, ut exemplar mihi quoque quamprimum pararet notarum, quod debere typographos contendo, propter laborem in corrigen-dis operarum sphalmatis a me exantlatum. Si tamen pater patruusque ejus tam impudentes sint, ut debitum hoc suum in dubium vocare ausint, rationibus meis ut adscriberent jussi. Petavianum Regiumque codicem quod petis ut consulam, per otium ante discessum ex hac urbe meum facturum sum. Nam nunc ut maxime velim, vix possim, quod *Petavius* absit. Neque periculum in mora esse reor, post absolutam jam a te Livii editionem. Sub adventum veris proximi pedem hinc movebo: aut reliquam perlustraturus Galliam, aut in Italiam statim abiturus: cujus orae desiderio immane quantum flagro: idque vel eo magis, quod hujus urbis bibliothecae ad editionem Ovidianam perte-xendam expectationi meae non respondeant. Certe praeter primum tomum partim cum Regio, partim Puteanaeo codice collatum, quorum excerpta jam ante me habuisse scis, & Fastos Petavianos, nihil haecenus magnae rei indagare potui. Memmiana fortassis bibliotheca subministrare aliquid posset; sed ejus usum me impetraturum non puto: haecenus certe ne videre quidem potui. Solus ad eam aditus *Valesio* patet, isque sic satis difficilis. Deducturum se aliquando me eo (petente id meo nomine *Sarravio*) promisit: de usu nihil polliceri ausus est. Narro tibi, non potuisse me tempore magis inoportuno magisque incommodo in hanc urbem venire, quam nunc veni. Bibliotheca-rum plerarumque ordo misere turbatus ac inversus est, curam quoque earum qui habent, magnam partem absunt. *Bullialdus* ac *Naudaeus* in Italia haerent.

Thuanaeam obiter tantum vidi, idque beneficio *Menagii*. Petii jam aliquoties a *Puteanis* libros nonnullos ex ea utendos; sed nescio quomodo lentiores sunt, fortasse propter senium. Quid quod creberrimis amicorum salutationibus fere semper obnoxii sunt, ex quo in bibliothecam Regiam commigrarunt, cujus etiam catalogum haecenus videre non potui, quod in eo describendo illi occupentur. In Petaviana per horas fere duas integras nuper cum Ampl. *Sarravio* me exercui, neque tamen Ovidianis ac Claudianaeis codicibus, quos catalogus indicabat, ullos, nisi duos tresve, invenimus, adeo turbatus est librorum ordo. In itinere Italico (cujus tamen certum consilium necdum cepi) ne plurimum molestiae devorandum mihi sit valde metuo, quod difficillime illic aditum ad bibliothecas obtineri intelligam: quae sola fortassis causa propositum meum interrumpet. *Bullialdus* Venetiis nuper per Legatum Regis Christianissimi ex Bessarionis bibliotheca *Didymum de Plantis* haecenus non editum utendum petierat: sed repulsam passus est. Interim doceas me velim, quibus potissimum artificiis homines morosissimi circumveniri ac expugnari possint. Tum & quas bibliothecas a libris antiquis maxime instructas arbitreris. *Peiraredum* moliri editionem Statianam nescio unde intellexeris, ego quidem haecenus hoc scire non potui. Et si quid judico, non magnopere rivalis ille tibi metuendus est. Cum enim contemptim ac abjecte passim loquatur de libris scriptis, vel inde colligas licet, quid ab hoc homine in re literaria polliceri tibi debeas. Plurimi certe auctoris illius codices, iique antiquissimi, in hac urbe sunt: quorum nonnullos in tuam gratiam fortassis aliquando cum vulgatis committam, si me monueris, quibus ipse usus sis. Nam actum ut agam consultum non puto. Advectum est ante annos paucos huc exemplar satis antiquum ex ruinis Corbeiensibus, quod in bibliotheca Sti. Germani cum aliis multis nunc servatur. Extat & ibidem exemplar longe optimum *Columellae* ante annos octingentos scriptum, ut volunt, qui viderunt: nam mihi aliquoties ejus libri tam venerandi aspectum petenti responsum est, Monachum nescio quem eo nunc uti, ac auctoris latinissimi editionem scilicet adornare. *Zinziberus* professor Andegavensis in hac urbe est, & edit de mutuo dissertationem adversus *Salmasium*, idem & *Fabrotus* minatur (qui librum suum praelo jam paratum mihi ostendit) sed typographum invenire non potest, adeo ad crambem illam toties repetitam homines delicati hinc nauseant. Lectionem codicis Leidensis in illo versu Claudiano, *trabibusque smaragdis*, jam in observationibus a te prolatam, confirmatam a Petaviano quodam inveni. De mea quoque conjectura ad Ovidianum versum, *letifero Eveno*, non dubito. Puteanaeus enim ille codex optimus, sed a sciolo passim interpolatus, in manu prima una syllaba plus, *in letifero eveneno*, manifeste praefert. Vale, meum decus, & literis imposterum tuis me saepe bea: quas ad aedes *Petri le Petit* Librarii in via Jaccbaea destinabis, sub insigni velleris aurei. Habes & hinc Sarravianas. Lutet. Paris. MDCCXLV. XXVI. Novemb.

EPISTOLA CXXXI.

J. F. R. GRONOVIIUS

*Nic. Heinsio.**Lutetiam.*

Nobilissime & Ornatissime Juvenum. Satis praesagiebat animus tum de-
 mum meas tibi praesto fore, quum iis non indigeres: potest tamen offi-
 cium meum gratum tibi fuisse, non quia utile erat, sed quia imperatum,
 quam licuit promte, exhibui tibi. Neque ea mensura, quam tua virtus co-
 gnita a me poscebat, aut animus meus libentissime tibi debebat, sed quam fe-
 stinatio & otium, quale tunc erat, implere me patiebantur. Amor tuus ta-
 men omnia prolixè interpretatur: gaudeo, dum scias me ea in re nunquam mihi
 satisfacere. Neque tu me ficto discrimine nescio cujus opinionis de me sum-
 morum virorum terrueris: si unquam possem, tam sano & sincero iudicio eam
 me comparavisse existimarem. De locis Livii omnia fiant ex commodo
 tuo, dummodo impetrare possim, ut aliquando fiant. Statio nullo Lutetiae
 sum usus: neque mea causa, nisi forte aliquid eximium & supra expectatio-
 nem obtigerit, fatigari te velim. Si tamen lubet & vacat, videre oportet,
 quos *Lindenbrogius* & *Behotius* adhibuerint. Ad Italicum iter an consilium
 meum te paratiorem reddere possit, ignoro; quae succurrunt, libenter scri-
 bam. Mediceam ante omnia ex visu & usu tibi commendo: ex narratione *I-*
saaci etiam Ambrosianam Mediolani. Neutrubi scribere licet: posterior, ni
 fallor, & gratis patet, sed ad scribendum furtim minor illic copia: in prio-
 rem, non nisi pretio aditus; quo tamen & poteris a custode impetrare ut e-
 notes. Modo reperias illum, quem ego expugnavi. Ei praenomen *Angelo*,
 Clericus est ad D. Laurentii, ubi ipsa est bibliotheca, claves ejus servans.
 Majorum gentium homines frustra adibis, ut ego stultus & operi & tempore
 sine fructu mihi decolante. Habebat cognatum adolescentem: eum mecum
 includebat, postquam multis sacramentis ei confirmassem, nihil a me violatum
 iri: si quis interim spectator interveniret, oportebat pugillares & pileum a-
 moveri, ne quis animadverteret me plus quam legere. Primum singulas horas
 Julio (quasi solidus est Belgicus aut sexstus.) redimebam, deinde quod festina-
 rem, binis. *Paganinum Gaudentium* Pisis alloquere: is forte & nonnihil consilii
 dabit: & Florentiae in primis *J. Baptistam Donium*, qui & bono isti Angelo
 te commendabit. Habitat *nella strada de' tintori*. Ad utrumque, si vis, lite-
 ras mittam. Romae quum omnia sint mutata, nescio, quo te allegem. Si
 quid tamen poterint, *Holstenius* & *Allatius* non nolent. Quod in aurem tibi,
 plus indulgebunt Latinos auctores, quam Graecos persequenti, & proderit
 nonnihil apud illos tibi invidia, quam sibi contraxit opere *οὐκ ἔστιν πρωτῆων ὁ δει-*
να. Credo te intelligere, quid velim. Farnesiana in palatio Ducis Parmen-

sis ibidem celebratissima, sed eadem, cum omnibus illic, occlusissima. Est & Florentiae alia bibliotheca apud Dominicanos ad aedem D. Marci, ubi Ovidius ille Politiani manu notatus: facilisque accessus per ejus collegii Monachos. Venetiis ex D. Marci, quae eadem Bessarionis, nihil spera. Attuli ego commendatitias a *Contareno*, legato tum Romae, ad Procuratorem *Nani*: id enim Cyclopi nomen: porrigebat eas mecum *Thomasinus*, magnae Ecclesiasticae dignitatis vir: homo vix dicto, posse bibliothecam videri, cum pateret, se avertit, absque ulla vice vel tralaticiae humanitatis. Est alia in coenobio D. Antonii non valde copiosa, tamen illic servatur Manilius ille Gemblacensis simillimus. Satis sunt humani. Ducet te eo *J. Angelicus Aprosius Vintimiglia* ad D. Stephani religiosus, ut vocant, vir & nostratum & literarum perstudiosus, qui te quoque jamdudum commendatissimum habet. Patavii quicquid erit (cognosces ex libro *Thomasini*, qui omnium illic & publicarum & privatarum catalogum edidit) facile impetrabis per *Rhodium* Danum, si illic erit, & *Veslingium* Germanum *Sobierumque* Amsterodamensem. *Ferrarium*, quia uxorem (immo concubinam, si memini recte) domi habet, non adiri aiebant: post lectionem in Academia salutandus est. Ajunt in monte Cassino Benedictinos habere admodum instructam. Est & Urbini, cujus catalogum vidi apud *Naudaeum*. Sed Florentia sola moram & sumtum tibi pensabit. Atque utinam illum optimum Senecam repetere possem, vereor enim ne per festinationem multa omiserim, & apex ibi nullus annotatione indignus. Utinam pariter in meam gratiam primae Decadis Livianae antiquissimum volumen, certe iis, quae designavi, locis inspicias: sed vix poteris mihi vacare: ita tibi ipsi negotium reperiens. Commendo etiam tibi Curtium unum & alterum illic vetustissimum, & Appulejum, licet a *Lindembrogio* prae floratum. Caeterum editorum librorum bibliotheculam tecum portes oportet: adeo ne vulgarissimi quidem illic venales. Haec nunc succurrebant. Vale, & feliciter omnia vota tua exsequere. Apud Helvetios Basileensis copiam tibi faciet *Buxtorfius*: scias etiam Bernae superesse Bongarsianam, luculentam, ut e multis audivi; in eadem natione est Sangallensis, quam *Goldschastus* celebrem fecit. Satin tibi Tantalo poma porrexisti? Incomparabilis *Sarravii* literae mihi mel merum fuerunt: ei propediem scribam, nunc per te salutationem deferri cupio. Ut per occasionem & caeteris communibus nostris. *Menagius* nihil dum edit? Scripsi viii. Id. Decemb. postridie quam tuas accepi.

CICIDCXLV.

EPISTOLA. CXXXII.

NIC. HEINSIUS

*J. Fr. Gronovio.**Daventriam.*

CLarissime Gronovi. Quod tam luculente desideriiis meis super itinere Italico fatisfecisti, plurimum te amo. Abeundum brevi mihi video, & opinionione quidem citius. Est in hac urbe mercator quidam nostras, cui *Reinsio*

no-

nomen; vir honestus. Is Venetiis annos aliquot vixit, ac etiamnum familiam illic habet. Haesit hîc aliquamdiu nomine mercatorum Amstelodamensium, quorum aliquot naves fiscus Gallicanus sibi addixit, idque perperam & sine ratione, ut ipsi volunt. Hoc negotio perfecto (& jam ad finem propemodum pervenit) denuo Venetias abit. Officia sua ante dies paucos humanissime mihi obtulit, si se comitari vellem, quam quidem occasionem valde oportunam nequaquam negligendam reor. Praesertim cum & alii nonnulli ex nostratibus illi se adjuncturi sint. Iter ipsum quomodo ac qua via facturi simus, necdum constat. Si per Helvetios; Mediolani menses duos trefve morabor, propter Ambrosianam, de cujus bonitate salivam mihi movit *Erycius Puteanns*, cum anno proximo Lovanii essem, qui suo potissimum consilio a Cardinali Borromaeo eam instructam volebat. Servantur & illic inter alia Aldinae bibliothecae reliquiae. Si Massilia Genuam iter facturi sumus, Venetiis aut Patavii aliquamdiu haerebo, donec notitiam aliquam linguae Italicae adeptus fuero. Nam Genuam a bibliothecis ullis antiquis commendari non puto. Romam ubi venero, ad Farnesianam aditus fortassis erit. Fratrem enim Ducis in collegium Cardinalium adscitum, literae, quae ex Italia proxime in hanc urbem venire, docent. Ad *Rhodium* & *Vintimigiam* literas commendatitias si mittes, valde me beaveris. Apud *Rhodium* tamen nomen meum dissimulari poterit. Quod Patavii latere, quam notus esse malim, propter ¹ carcinoma illud generis humani, culinae, inquam, Baronianae expraefectum. In Italia quam non tuto inimicitiae exercentur, optime nosti. Ille autem furcifer, quam non cedat ipsis Italis, fraude, dolo, veneficiis, & hoc nosti. Noverat hoc immortale gentis vestrae opprobrium familiariter olim Romae Vir Illustris *Hadrianus Man- makerus* ὁ μακαριστός, quod & pessime illi successit, vix ac ne vix quidem e manibus Inquisitionis elapso. Adeo ne beneficiorum quidem rationem habet, aut amicis ipsis parcit *Crispinus* ille, monstrum nulla virtute a vitiis redemptum. Literae tuae si post discessum meum huc venient, mittet eas ad me Elzevirii filius, qui apud Petitem librarium hîc vivit. Doleo non potuisse me ante abitum ex hac urbe meum, quod promiseram, de locis Livianis consulendis, fidem liberare. Nam *Petavius* etiamnum ruri haeret, neque ita brevi, ut opinor, reversurus est. Fieri tamen id poterit, ubi ex Italia rediero. Notas tuas mecum veham, & captabo occasiones quasvis affectum meum tibi probandi. De libris manuscriptis, si quae illic spes sit, pretio redimendis, & hoc me doceas velim. Scripsi jam proxime tempore valde inopportuno huc me venisse, quod Bibliothecarii plerique absint, ipsaeque bibliothecae negligenter habitae. Quae potissima causa est, cur discessum maturem. Ad Thuanacem ante dies demum paucos aditum impetravi, cum jam de itinere Italico consilium cepissem. Habes hîc ² Epicedium in *Pisanium* meum, quod ut scriberem rogavit me Marchiò *Montozorius* affinis ejus, miles & Poëta summus. Lutet. Paris. Pridie Kal. Januar. CIOIOXLVI.

¹ Credo esse *Scioppium*, contra quem Dan. Heinsius scripserat satyram.

² Legitur inter Heinsii *Juvenilia* lib. II. p. 253.

EPISTOLA CXXXIII.
NIC. HEINSIUS

J. F. Gronovio.

Daventriam.

Ut etiâ etiamnum ad te scribo, unde jam ante mensem alterumque me Labiisse oportuit. Mercator ille, cum quo in Italiam abiturus sum, vir insignis & forsân non ignotus tibi, *Reinstius* nomine, hætenus hîc detinetur, propter lites, quas cum Thalassiarcha Gallico de navibus quibusdam Hollandis, in mari Mediterraneo raptis, exercuit. Quae cum ad finem nunc perductae sint, ab Ordinibus, ut abire liceret, petiit. Non ultra dies quatuordecim in hac urbe moraturos nos puto. Interim rure huc advenit Ampl. *Petavius*, cum quo de Livio tuo agere decreveram. Sed ecce inopini aliquid negotii intervenit. Compellavit me ante abitum ex hac urbe suum Junior Elzevirius, idque nomine cujusdam ex Proceribus Gallicanis, ut versus meos ederem. Negavi tertiam vix eorum partem ad manus esse. Plerosque enim domi reliqui, dum nihil minus cogito, quam in Gallia eos edendos esse. At ille, quos adduxissem mecum, quosque in hac urbe scripsissem, nihilominus ut ederem rogavit. Mos gerendus fuit importuno flagitatori. Prospexit statim mihi de typographo. Et jam in decimo folio occupantur operae typographicae, ita ut pauca admodum restent excudenda. Exemplar, ut ad te veniat, quamprimum curabo. Scripsi, Vir Clarissime, ante menses duos ad te, & commendatitias ad amicos tuos in Italia petii. Idem bis ab *Isaaco Vossio* rogavi, cui & meas illas tibi mittendas commiseram. Nescio quid factum sit. Neuter certe respondet. Quod molestissime me ferre velim scias. Nam ut maxime credatis me abiisse (abiturum enim brevi me credebam ipse cum scriberem) certe ad parentem meum vestras mittere poteratis. Nisi diligentiam tuam in reliqua peregrinatione magis mihi probas, quam hætenus fecisti, metuo, ne frigescat amicitia nostra. Sane nec ego nunc scripsissem, nisi id a me petiisset Ampl. *Sarravius*, qui eas, quas hîc vides, mihi commisit. *Peyraredus* in hac urbe est. Neque quicquam tam certum, quam de Statio edendo cogitare illum. Quod jam factum foret, ut ipse ait, nisi suas conjecturas additurum se promississet ὁ μαχαίρης *Grotius*, & vana spe per longum tempus virum bonum lactasset. Multas ingeniosas conjecturas mihi ostendit. Quare maturandum tibi erit, si eum praevenire velis. Vale. Lutet. Paris. CIOIOCLVI. die tertio mensis Martii.

Mediolani agenda quaedam negotia sunt D. *Reinstio*. Quo recta, ut puto, ibimus, atque ibi dies aliquot cessabimus. Commoda haec occasio erit Ambrosianae bibliothecae excutiendae. Iterum vale, meum decus.

EPI-

EPISTOLA CXXXIV.

J. FR. GRONOVIIUS

*Nic. Heinsio.**Lutetiam.*

Prioribus tuis ideo non respondi, quod quocunque mitterem meas, sero venturas existimabam, dum in itinere esses. Miror autem te tantopere succensere mihi ob intermissum literarum officium, cum conscius sis tibi, quam parum mihi in te per hoc tempus praesidii fuerit ad loca Liviana, qui tam benigne initio promittebas. Mirum est *Petavium* nunquam fuisse domi, quando tu de nobis cogitasti, idque hibernis mensibus: sed abfuisset, an regiam videre non licebat apud *Puteanos*? Sed haec nolo urgere: scio enim, quomodo Lutetiae etiam otiosis tempus in potestate non sit: tantum id significo, si rixandum habeam tecum, justiore mihi caussa fore. Nunc amoto joco, quod commendatitias petis, nihil illis indiges, nisi vexare vis amicos. Meis certe omnibus notus es olim: neque enim vel unus est, apud quem virtutibus tuis narrandis non longas condiderim Iliades. Dabo tamen aliquid, quo eos in memoriam revoces nostri. Patavio nuper a *Veslingio*, *Ferrario*, *Rhodio* literas accepi jucundissimas, quod optimis praestantissimisque viris meo nomine nuntiabis. Nondum respondere possum, tum quia otio non abundo, exeuntibus cum maxime lectionibus publicis & privatis, dum quae potuerunt hactenus differri, simul sunt finienda: tum quia mandata quaedam *Rhodii* nondum exsequi potui. *Vintimigliae* librum ad me missum accepi per *Bartholinum* Danum, pergratum quoque; etsi mallem affectui suo in me pepercisset. Binas omnino ab illo accepi, cum plus decies ego ad ipsum, sed etiam ad Illustriss. *Loredanum*, scripserim: in prioribus additum erat: *Se mi vorrà favorir di risposta con darmi qualche novella di cotesti literati d'Hollando, in particolare de Signori Daniele Heinsio & Nicolo suo figliuolo &c.* Quas, ni fallor, ipse ostendi tibi. Ad *Paganinum Gaudentium* Pisas, ad Jo. *Baptistam* Donium, Florentiam etiam dedi non unas, sed responsum nunquam habui. Sunt omnes viri humanissimi, apud quos non alia commendatione opus est tibi, quam prolato nomine tuo. Sed hoc sum auctor tibi, si fieri potest, ut Lutetiae interventu alicujus Procerum commendatitias impetres a Legato Magni Ducis, sive ad ipsum Sereniss. Principem, sive ad aliquem in aula potentem, nulla ut tibi cura sit antiquior. Nam absque hoc aditus ad Mediceam, ut ante hac scripsi, per est difficilis. Propemptici, quem vidisti apud *Sarravium*, si tanti est, misi exemplaria Monasterium ad Illustriss. *Contarenum*, quae Venetias curarentur. Epicedium in *Pisanum* legi libentissime, sed multo magis idem legere gestio impressum. Euge bonum factum, *Peyraredo* non invideo: gaudeo magis oriri plures, qui Statii curam gerant. Et ille bene faciet, credo, & mihi

mihi supererit, quod agam. Itaque nihil propterea festinabo magis: nam & opto ut ille me antevertat. Misit ad me nuper amicus pervetustam editionem Livii: certe Aldinâ fuit prior, nec quicquam habet amplius quam Andreana: forma est in octavo, ut vocant: sed de aetate ejus nihil constituere possum: non annum, non locum, non auctorem habet adscriptum: unum est κειμήριον harum rerum, quod perbreve ei praefationem (quae tamen tota Quintiliani & Plinii testimonio constat) ad studiosos praefixit *Augustinus Becharius* sacerdos. Hunc ut noscerem, totam bibliothecam Gesneri percurri, nuspiam inveni: vide quaeso an explorare alicunde¹, forte facilius in Italiâ, possis; quid hominis fuerit, quando, ubi vixerit. Narravit multa mihi *Isaacus* de antiquissimo codice Tragoediarum Senecae in Ambrosiana, qui & doctissima singularum habeat argumenta. Si pateris mandari tibi, ut hoc diligentius cures, quam collationem; locorum Livii, tu ipse statue, quid ego desiderem. Nunquam tamen patietur amor meus, ut indigner, si mea tuis posthabeas. Miserunt ad me homines Illustriss. Nuncii, qui Monasterii est, schedulam ab *Holstenio*, in qua de Alexiade Annae Comnenae quaerebat. Remisi literas ad ipsum curandas, quarum haec fuit summa, habere quidem me eam ex illius exemplari descriptam: sed eam me reverentiam habere amicitiae nostrae & virtutum ac beneficiorum erga me ejus, ut quamdiu sperare possim ab illo prodituram, nihil sim conaturus: sin, ut promittebat, eundem codicem infinitis locis emendatorem communicare mecum velit, audacter me manum promittere. Hoc ei nuntiabis, si in eum incideris. Ego toto semestri nihil egi, aliis servivi. Poëmata tua exspecto, non paullo acrius, quam quae nuper duobus tomis¹ Amsterodami prodierunt. Vale, & feliciter & peracta jucunde peregrinatione ad nos redi. Daventriae raptissime, a. d. prid. Non. Martias CIOICXLVI.

Accepi etiam *Leonis Allatii* excerpta varia Graecorum Sophistarum, longe gratissimum mihi munus, postquam annum ipsum & ultra in itinere fuisset. Potes ergo & apud illum meo officio fungi. Iterum vale.

¹ Intelligit, puto, *Casparis Barlaei*, quae A. 1645. prodierunt.

EPISTOLA CXXXV.

NIC. HEINSIUS

J. Fr. Gronovio

Daventriam.

Clarissime Virorum. Tuas hesterno die ad aedes meas tulit Illustris *Sarravii* puer, quibus nunc confestim respondeo. Quod succenses, Livianos a me codices necdum collatos esse, nolim fieri. Nam *Petavius* non nisi post annum novum rure reversus est, tum videlicet, cum de itinere Italico, quam de libris scriptis conferendis, magis cogitarem. Id si sancte mihi affirmanti non credis, ex Illustri *Sarravio* quaeras licet, quem idem quoque affirmaturum certus sum. Ab illo tempore nullos ex *Petaviana* bibliotheca libros utendos.

dos habui, praeter Claudianum, Virgilii Catalecta, & Lucani exemplar, qui in manus meas praeter expectationem tum inciderunt. Nam Ovidianorum codicum, qui illic extant, tertiam vix partem vidi, adeo misere dispersus ac turbatus est bibliothecae ordo, quod mecum vidit & miratus est heros *Sarravius*. Eos quoque ipsos codices non alio animo utendos accepi, quam ut in locis quibusdam corruptis a me consulerentur, nihil minus existimans, quam otium mihi futurum integros conferendi. Interca, dum D. *Reinstitii* (id mercatori nomen) negotia quotidie in hac aula traherentur, convenit me nomine quorundam, ut agebat ipse, procerum junior Elzevirius, petiitque ut versus meos praelo mandarem, si omnes edendi animus ac otium mihi non essent, partem saltem posse publicari. Dies tantum septem aut octo opusculo absolvendo requiri. Noscere se typographum, qui operam suam obtulerit, quique duo quotidie folia mihi exhibiturus esset. Vix tandem persuasus cum essem, raptim versus aliquot, qui ad manum erant, collegi, & praelo credidi. At vero nequissimus typographus adeo promissa sua non praestitit, ut per mensem pene integrum in exiguo libello me exerceri passus sit. Caeterum a mensibus jam tribus itineri accinctum me fuisse testari amici hinc possunt, quibus jam aliquoties vale dixeram. De Petaviana bibliotheca quod affirmavi, vix ullum ejus usum mihi fuisse, etiam de Regia affirmare possum. Cum enim ex Thuanis aedibus in eam migrarint non ita nuper *Puteani*, omnia etiamnum turbata illic offendi. Catalogum ipsum ut excutere liceret haecenus impetrare non potui, quamvis *Puteanos* fratres aliis in rebus addictissimos mihi offenderim. Sed nec Ovidianos omnes codices, quibus uti voluissim, obtinui, cum illi interim suam mihi bibliothecam ad satietatem usque fruendam indulserint. Quid quod nec illi, nec Amplissimus Petavius satis aequo videtur animo tulisse, nullum se Notarum ad Livium tuarum exemplar a te accepisse. Ut ausus non fuerim apud illos pro te intercedere, nisi vulnus hoc coaluisset, & oblivione pressa esset haec qualiscunque ignominia. *Puteani* quidem, post allatas in hanc urbem Notas tuas, false subridentes ex Elzevirio quaerebant, me praesente, nunquid exemplaria aliquot amicis suis jussisset mitti auctor. Cum negaret ille, regesserunt illi, rem nihilominus indignam fore, si emenda sibi essent exemplaria ejus libri, qui magnam partem ex bibliothecae suae optimo illo codice adornatus esset. Ibi ego meas interpellandi partes esse credidi, ac Elzevrios accusare coepi, quorum avaritia factum esset, ne Auctor liberalis esse posset. Erubuit Elzevirius, & dono se missurum exemplar Puteanis promisit. Ex hac, ut puto, historia facile deprehendes, Puteanis non valde acceptum fuisse, sibi missum librum tuum a te haud fuisse. Quid quod codicem utrumque, tam Regium, quam Petavianum manu scriptum recentiori intelligam: ut in Italia longe vetustiores, ac magis tibi profuturos inveniri posse crederem. Quid? quod Notae tuae jam prodierunt, nec spem opinor esse secundae editionis, antequam in hanc urbem reversus sim, ut causae nihil videam, cur magnopere festinandum mihi fuerit. Poëmatum meorum editio satis feliciter mihi successit, adeo benigne a viris doctis ea hic excepta sunt.

Gaulminum prae caeteris praeconem nata esse miror, qui cum aliena raro commendare soleat, ut nosti, in libello tamen meo commendando prodigus plane est, quantum ex amicis intelligo. Epithalamium, quod tibi scripsi, etiam accedit, id bonos patres Loiolitas offendit plurimum, adeo spurcum ac obscaenum ipsis visum fuit.

Nimirum patres facere hoc, quam scribere, malunt;

Quod malunt vates scribere, quam facere.

Cum quidam ex ipsis, vir paedagogici ingenii, litem hoc nomine mihi movisset, respondi me neque Jesuitis neque Monachis scripsisse. Idem bonus pater praefationem ut haereticam traducebat, quod vitam maritalem in ea caelib vitae praetulisset. Reprehendebat & multa alia, quae risum, sat scio, tibi moverent, mihi certe moverunt. Exemplaria brevi in Hollandiam mittam, de iudicio tuo imprimis sollicitus: quod tamen ante discessum ex hac urbe meum fieri vix poterit. Intra triduum enim Lugdunum, atque inde porro in Italiam abituri sumus. Neque est, quod palpum ab aulicis Parisiensibus obtrudi sibi denuo patiatur D. *Reinstitus*, ac iter in dies aliquot differat, cum equi jam conducti sint. Mediolani negotia nonnulla illi sunt, ubi per dies sex aut octo, aut fortasse plures haerebimus. Senecae Tragoedias ut conferam, operam sedulo dabo, idque eo magis, quia ejus editionem curae nunc tibi esse intelligo. De vetustate tamen codicis illius valde dubito, adeo frequens ac usitatum *Isaaco* nostro est amicis imponere. Petiit nuper a me, ut libros Martialis octo posteriores cum codice Puteanorum in gratiam suam conferrem. Dedi id hominis amici precibus. Ille vero neque gratias mihi hoc nomine egit, neque ad tres meas, quas illi postea scripsi, vel verbo respondet haecenus, quae res fecit, ut morosior paulo essem, cum proxime ad te scriberem. Cave vero existimes, mi Gronovi, commoda mea potiora mihi esse tuis. Non enim tam stipes tamque fungus sum, ut nesciam, quid aera lupinis distent, quantumque inter curas tuas ac meas intersit. Ubi reversus aliquando domum & ad meos ero, faxo fatearis ipse non minus tui, quam mei rationem mihi fuisse. In Italia diu victurum me non puto. Ignotus etiam ut eam regionem, si fieri possit, perlustrem consultum videtur, idque *Puteani* fratres aliique hinc amici unice suadent. Nescio enim quo malo fato meo homines quidam maligni auctorem me fecerint versuum nescio quorum, in Pontificem Romanum scriptorum, qui sane virulentissimi sunt. Etsi autem nihil non egerim per amicos, qui innocentiam meam satis hac in re noverunt, ut opinionem eam ex animis procerum evellerem, metuo tamen ne molestiam ea res aliquam in Aula Romana exhibere mihi possit. *Gaulminum* versuum eorum esse auctorem satis hinc constat. Sunt & alii, qui versus insulsißimos sub nomine meo per hanc urbem circumferant. Adeo de corio meo nunc ludunt homines male feriati. Apud amicos Italos salutationes tuas deponam. *Peyraredum* in Statio assiduum esse verum est. Nihil tamen ab eo homine expectandum puto, cum vita non minus quam moribus desultorius sit. Dixit aliquando mihi, libenter se communicaturum tecum, quae ad auctorem illum observasset, si certus es-

set,,

set, de editione ejus brevi procuranda te cogitare. A tempore aliquo hominem non vidi, & fortassis in Aquitaniam jam abierit. Abiturum enim se circa festum Paschatis ante mensem affirmabat. Reversus ante dies nonnullos ex Italia Cl. *Naudaeus* est. Librorum fere secum trahit milia quindecim, codices etiam nonnullos manu exaratos, qui tamen nondum huc allati sunt. Intra septimanas ad summum quinque Venetiis erimus. Tuas ita ut inscribas rogo. A *Messieurs Messieurs Strycker & De Willem, Marchands Hollandois pour adresser a N. Heinsius, A Venise*. Ita, ubicunque locorum in Italia vixero, optime ad me curabuntur. Vale, meum decus, & frequenter ad me scribe. Lutet. Paris. MDCCXLVI. Pridie Kal. April.

EPISTOLA CXXXVI.

NIC. HEINSIUS

J. Fr. Gronovio.

Daventriam,

Clarissime Virorum, de gemino morbo meo, partim Lugduni, partim & Massiliae contracto, intellexisse te jam nonnihil opinor. Uterque ex lienis obstructione (cum quo malo jam annos aliquot me conflictantem vidisti) natus est. Uterque vitae sedentariae, quam Lutetiae proxime elapsa hyeme satis pertinacem egi, adscribendus. Posterior quidem ea violentia me adortus est, ut pro conclamato aliquamdiu habitus sim. Ita tres ferme menses in itinere Italico miserrime mihi perierunt. Poteram quidem penitus convaluisse, nisi cum imperito medico Massiliae mihi res fuisset. Ut mirum plane sit ex morbo illo periculosissimo me emeruisse. Heri & hodie dolores in liene nonnullos denuo sentire coepi. A febricula quoque tentatus sum. His accedit calor aestivus, qui vires ex morbis proximis valde etiamnum dejectas non patitur resurgere. Qua in re infelicitatem meam satis deplorare non possum: cum inter tot praeclaros libros vivendum mihi videam absque profectu ullo. In Marcianam bibliothecam heri me contuleram (nam ad Medicaeam nondum admissus sum, quam obiter tantum vidi) ut optimum Ovidianarum *Metamorphoseôn* exemplar, & quo vetustius hactenus non vidi, excuterem. Sed intra horas paucas adeo me fatigatum sensi, ut domum me conferre coactus sim. Dum Lutetiae haererem, conjecturam meam ad illum Ovidii locum, *in letifero Eveno*, a codice Puteanaeo comprobata nosti. Parem nunc felicitatem expertus sum, dum Marcianum illum codicem evolvo. Locus est lib. viii. *Metam.* Fabula *Meleagri*. *Plangunt ora simul matres Calydonides; Oeneus &c.* Scripsi aliquando (si forte meministi) ad te, non placere mihi novum illum in fine versus sensum. Praesertim cum libri plerique veteres *Calydonides Eheu*, vel *heu heu* habeant. In ora codicis tui legebatur pro diversa lectione notatum, *Calydonides Eveniaeque*, unde statim suboluit legendum, *Calydonides Eveninae*, quod Patronymicum & postea apud Homerum offendi. Sane in optimo

illo Marciano aperte legebatur, *Plangunt hunc matres Calydonides Eveninae*. Probe, nisi quod illud *Plangunt hunc* non placet. Insistens ergo vestigiis vulgatae lectionis *Plangunt ora*, lego totum versum, *Planguntur matres Calydonides Eveninae*. *Plangi* idem esse Ovidio, quod *Plangere* non nescis. Sic alibi, *Plangitur & trepido constringit vincula motu*. Et lib. v. sub finem: *Dumque volunt plangi*. Ita enim meliores libri, cum vulgo legatur, *Plangere dumque volunt*. In Medicea bibliotheca codices Ovidianos ab aliqua vetustate commendandos non offendi. Dies nunc agitur octavus, quod in hac urbe haereo. Si valetudo in pejus abit, remittente nonnihil hoc calore, Patavium me conferam, ut consulam illic Medicum aliquem ex peritioribus, postea fortassis huc reversurus. Cl. V. *Joh. Baptistam Donium* proxime salutavi, a quo humanissime habitus sum. Libellum tuum de Sestertio recte accepit, & gratias pro munusculo se acturum tibi promisit. Pisis horas tantum paucas moratus sum, ubi parem *Paganini Gaudentii* humanitatem expertus sum. Convivio satis lauto me excepit, in quo poculum sanitati tuae rite libavimus. De literis non unis a te ad illum scriptis nescio quomodo monere neglexi. Intra dies paucos huc venturus est. Tum aurem ipsi vellam, ut respondeat. Habet sub praelo animadversiones censorias in Historiam *Famiani Stradae*, quas absolutas secum huc feret. Quid rerum apud vos geratur, fac quamprimum ut sciam. Menses pene jam quatuor sunt, quod nullas ex patria accipio. Dubium non est, quin multae Venetiis apud Mercatorem haereant. Scripsi jam ad illum hoc nomine, & fasciculum brevi expecto. Vale. Florentiae. *ciōiōcxlvi*. die xxv. Julii.

EPISTOLA CXXXVII.

J. F. R. GRONOVIIUS

Nic. Heinſio.

Venetias.

Nobilissime & Clarissime Juvenum. Post longam & sollicitam expectationem tandem redditae mihi gratissimae tuae, quas mense Julio Florentia dederas. Medio omni tempore nihil de te: sed gratias Deo immortalis, qui & ab aliis itinerum tam difficilium casibus, & a duplici morbo te salvum praestitit. Velit idem, ut, si qua tibi pericula impendere possint, in longum hoc metu fuerimus defuncti. Tum vero etiam, o vita mea, quantum in te est, valetudinis tuae incolumitatisque omnium primam curam habe, & vide, ne dum nimis avide optima tua vota consecraris, omnia perdas. Scis quantum in tuo capite literae periclitentur, quae in hac solitudine sanorum ingeniorum non magnum modo, sed necessarium unicumque praesidium a te expectant. Poëmata tua necdum vidimus, nec quid eis factum, quidquam habemus explorati. Quas Lutetia dederas in procinctu, illis ante menses aliquot

EPISTOLA. CXXXVIII.

N I C. H E I N S I U S

J. Fr. Gronovio.

Daventriam.

Clarissime Vir. An pro jure amicitiae nostrae facias, qui tanto tempore nihil ad me literarum dederis, non scio, permolestum id quidem mihi est. Parisiis paulo ante discessum meum, etiam ex hac urbe ad te scripsi, tu vero diligenter taces. *Kinschotius* etiam fidei tuae suas ad me mittendas commiserat, quas non accepi. Ego interim & valetudine neglecta, quae sub adventum in hanc urbem meum valde nutabat, post recentem videlicet morbum; & spretis maximis illis caloribus, tum & rebus meis posthabitis; & in Sencæ Tragoediis conferendis & Curtio sedulam tibi operam navavi. Ad Livium quoque transiturem eram, sed taedebat illius negotia meis praeferre, qui oblitus mei videbatur. Credebam etiam in reditu ex Romana urbe meo commo-

de id fieri posse; cum tandem ante biduum *Vlitius* noster me monet, de secunda Livii editione te cogitare. Differre iter Romanum decreveram, ut gratificarer tibi, sed ecce commodum supervenit *Donius* noster, qui ab *Holsteinio* literas mihi ostendit, quibus & loca aliquot Livii cum Medicaeo conferenda transmisit. Holsteinianis precibus meas addidi, ne gravaretur in tuae spem gratiae hunc qualemcumque laborem suscipere, quod facturum se recepit. Romam ubi venero (cras autem hinc discessurus sum) non desinam virum optimum denuo hortari ac impellere, ut fidem liberet. Tu, si quid me voles, aut ad Parentem meum, aut *Vlitium* nostrum mitte. Potes & ad *Kinschotium* Monasterium. Ego quidem hyemem proximam Romae moraturus sum. Volebam plura, sed convasandae sunt sarcinae. Salutat te Cl. *Donius*, *Gaddiusque* ac *Bullialdus* noster, qui aliquo tempore hîc haesit, nunc vero de Constantinopolitano itinere cogitat. Vale. die v. Kal. Novemb. *cicidcxlvi*. Florentiae.

EPISTOLA CXXXIX.

J. F. R. GRONOVIIUS

*Nic. Heinsio.**Romam.*

EGO vero, carissimum caput, non diligenter filui, sed omnibus tuis statim responsum reddidi, & nunc tertium, ex quo in Italia & ad te scribo. Primas misi ad *Aprosum Intemelium* nostrum, & mandavi, si nondum adesses, eas ut mercatoribus illis, quos postremis tuis Lutetia mihi designaveras, traderet. Curatas recte ad illum scio: nam in eodem fasciculo erant ad *Rhodum*, *Veslingium*, *Ferrarium*, quorum partim jam responderunt. Alteras etiam Venetias per amicum Amsterodamo recta ad mercatores illos destinavi, iisque *Kinschotianae*, quarum meministi, inclusae erant. Nullum est igitur peccatum meum, si illis usque caruisti, & hac suspicione me liberes velim. Quas autem ego gratias rependam tibi pro opera, ut scribis, in Seneca & Curtio Mediceis mihi praestita? O det Deus isto me tuo beneficio ad plenum frui! non erit certe, qui majus ullum referat acceptum tibi. Praesertim, si & locorum Livii varias a nobilissimo *Donio* impetraveris. Nec enim rem praesentem quidem, sed nec non cogitatam perscripsit ad te *Vlitius* noster. Is nuper comparavit typographum ex Leidensibus mihi, induxitque ut ultro rogaret sibi ut aliquid edendum darem. Ea occasione extorsit mihi singularem librum observationum, in quem promissam quorundam ad Livium uberiores tractationem conjecimus cum aliis nonnullis, ut textum variaretur. Jam misi ad eum & exspecto, quam mox praela ferveant. Tarde tandem post acrem expectationem reddita mihi sunt divina Poëmata tua: quorum genium, sensus, verba, numeros, quorum absolutam cum doctrina & ingenio elegantiam, quid ego depraedicem? Scis, ut singulis capi sim solitus. Quid ergo in isto cumu-

cumulo? Scripserant ad me amici nonnulli, se irasci tibi, cum bona tam multa posses, tam pauca quod dedisses. Respondi postea me voluisse idem illis irasci, & aequae severum tibi venire judicem, cum subito sim gratia corruptus: quod agnoscerem dici mihi posse, in paucis me tamen satis multum esse. Vale, vale, carum pectus, & te ipsum serva. Salutem officiosissimam rescribo amicis, qui nostri memores fuere. Nobilissimis *Donio*, *Gaddio*que per literas, coram *CLL. Leoni Allatio*, *Petro Servio*, *Car. Morono*, & in primis magno *Holstenio* reddes, testaberisque mihi comitatem illorum semper recentem esse. Habes hinc ab optimo Fabricio nostro. Iterum vale, amor noster: Deus te custodiat, & saluum ad salvos tuos reducat. Daventriae: postrid. Eid. Decemb. *CICIDCXLVI.*

EPISTOLA CXL.
NIC. HEINSIUS

J. Fr. Gronovio.

Daventriam.

DOluisse me fateor, & quidem vehementer, Clarissime Gronovi, quod nullas toto illo, quo in Italia vixi, tempore a te acceperim, cum ipse aliquoties jam scripserim. Tandem ante dies paucos *Vintimigliae* nostri humanitate illae ad me missae sunt, quas ante menses totos quatuor, xv. videlicet Kal. Sept. ad me dedisti. Nam quod de aliis scribis, quibus tres ad *Rhodium*, *Ferrarium*, *Veslingium*que inferueris, eas non accepi. Multis jam documentis expertus sum, negligenter satis mecum agere mercatores illos Venetos, quare auctor tibi sim, ut ad Patrem tuas impofterum recta cures. Quid quod affinis meus Majo proximo Amstelodamum Leida commigraturus est, ut iussu magistratus Leidensis rerum maritimarum Senatui triennio proximo intersit. Longe tum commodior scribendi occasio ultro citroque futura est. Scribam interim ad optimum *Vintimigliam*, ut tentet, si fugitivae illae tuae alicunde Venetiis in lucem proferri possint. Senecam & Curtium in tuae spem gratiae me contulisse, dum Florentiae viverem, jam aliquoties indicavi. Livium quoque conferre animus erat, si per temporis angustias, & valetudinem minus tum confirmatam licuisset. Operam suam obtulerat *Donius* noster, aut certe amanuensis sui. Monui ipsum ea de re denuo in iis, quas hodie ad ipsum dedi. Si cunctatur (est autem minime praecipuus, nosti Italorum ingenia) a Cl. *Holstenio* hoc impetrari, ut opinor, poterit, qui proxima aestate Florentiae aliquo tempore se moraturum affirmat. Egi cum eodem de Alexiade tecum communicanda, & rem, ni fallor, confectam habeo. Restat tantum, ut meis precibus tuae accedant literae, eaeque comes ac officiosae, quibus hominem tui studiosum porro demulceas. Sed nae ineptissimus ego sum, qui tantum artificem coner instruere? Ego quidem nunc in eo sum, ut auctorem quendam

gotiis reipublicae, iisque quotidianis, tantum non immersum, adeo cultissimi illius ingenii sui etiamnum meminisse. Certus sum in hac urbe non esse, quem illi componas, si genus scribendi tersum, minimeque affectatum velis aestimare. Tum facilitas illa prorsus admiranda. Nihil distortum aut coarctum. Fluunt omnia. Accedit tanto lepori summus erga me affectus, quem ubique produnt literae, ut, si maxime ab omni elegantia alienus sim, trahi tamen prolixissimo illo amore possim, cujus documenta non nunc primum habere gloriatur: utinam & mererer. Quando ad politissimum amicissimumque hominem scribes, luculente testaris illi velim, quo apud me loco sint virtutes tam conspicuae, quas ut admirer maxime, ita nunquam hinc a me mihi satisfieri. In patriam ubi reversus ero, ut ex me ipso id intelligat, operam dabo. Literas illas, quas ad *Intimelum* dederas, periisse miror; cum suas eisdem fasciculo insertas *Veslingius* caeterique acceperint. Scripsi ad amicum illum nostrum, & quid literis illis factum esset sollicitè quaesivi. Suspectam jam pridem habeo mercatorum Venetorum Stryckeri & Gulielmii negligentiam, ad quorum aedes literae haud dubie delatae sunt. Quod si est, malae fidei notam a se amoliri non possunt. Cum enim plurimae amicorum meorum literae perierint ad ipsos directae, id tamen haecenus agunt, ut persuadeant mihi eas ad aedes suas non esse perlatas, & in via periisse. Loca illa, quae in Livio Mediceo conferri voluisti, ut conferantur aut a *Donio*, qui id promisit, aut ab *Holstenio*, operam dabo. *Holstenius* quidem aestate proxima Florentiae per tempus aliquod se moraturum affirmat. Cum ex urbe illa discederem, denuo in eam reversurum me certo opinabar. Nunc cum parens meus, post amissam sororem unicam, cum summa solitudine conflictetur, ac brevi magis etiamnum conflictaturus sit, ubi Amstelodamum affinis meus habitatum concesserit; de reditu in patriam maturando cogitandum mihi video. Florentiae dum viverem, optimam temporis rationem habui, nam praeter Ovidianos ac Claudianaeos codices satis multos diligenter collatos, Virgilio quoque, & Senecae, & Curtio, & Plinii epistolis manum admovi. Cum tamen mensibus tantum tribus in urbe illa vixerim, & quidem ex recenti morbo debilis; tum immane quantum faciente canicula. In hac autem urbe adeo nihil egi, ut me mei prorsus pudeat, siue id socordiae meae adscribendum, siue quod opinor verius, Romani aeris genio, nihil enim hac urbe otiosius inertiusque nosti. Totum fere in deambulationibus tempus mihi tritum est & exactum. Cl. *Holstenius* mirum qua me benevolentia complectatur, cui omnia fere hinc debeo: adeo nullum officii genus intermittit, quo me demereri sibi possit. Praeter alia, quae dono dedit, etiam *Johannis Lydi* de mensibus Romanis librum haecenus ineditum promisit, qui plurimi usus erit in Ovidianis Fastis illustrandis. Si quandoque ad illum scribes, velim ex te sciat, magnum me praeconem esse beneficiorum illorum, quae tam cumulatim in me contulit. Scribes autem, ut proximè monui, si Alexiadem obtinere velis: quam jam, nisi fallor, impetravi. Misurus enim eam est terrestri itinere in Galliam ad *Puteanos*, unde porro ad te perferatur. Mari enim ut hunc thesaurum committat, persuaderi non potest.

Sarcinis alioquin meis eum inferuisssem. Tu tantum hoc age, ut precibus meis tuae quoque accedant. Fasciculus nuper ex Gallia perlatus est ad me, in quo illustrissimi *Montauzerii*, *Puteani junioris*, *Menagii*, *Fabroti*, aliorumque epistolae. *Fabrotus* post Basilica absoluta Cedrenum edidit. Nunc autem iussu, ut scribit, Cancellarii, de Mutuo contra *Salmasium* apologiam edit. *Heraldi* quoque ingens ac horribilis liber, ni fallor, jam excuditur. *Salmasius* interim, postquam affinem meum defricasset, & ab illo probe defricatus esset, parenti meo bellum denuo denunciassse dicitur. S. Cyprianum a *Rigaltio* multis locis emendatum brevi quoque videbimus. *Sarravius* in colligendis Grotianis epistolis totus est, a quo tamen literas proxime non habui. Post absolutum observationum tuarum libellum, exemplar ad me Venetias ut mittatur mari rogo, quod affini meo poteris committere, ut & literas impostero tuas, si quidem Majo proximo Amstelodamum concedit, ut in ultimis meis monui. Cl. *Holstenius*, *Servius*, *Allatius* vicissim te salutant. Nam *Moronum* ab aliquo tempore non vidi. Vale, mi Gronovi, & medullitus te amantem ama. Romae. CIOICXLVII. die xvi. Febr.

Clarissime & Charissime virorum, has jam scripseram cum Cl. Holstenium conveni & rogavi, si quid ad te vellet. Scripturum se promisit. Accedam eum denuo, ut videam, si fidem liberarit. Iterum Vale, & ut sciam meas tibi redditas, quam primum responde.

E P I S T O L A. CXLII.

J. F R. G R O N O V I U S

Nic. Heinso.

Romam.

Nobilissime & Maxime juvenis. Male sit illis quibuscumque fraudatoribus, quorum culpa accidit, ut mei apud te officii ratio non constet. Nam ego diligenter, nec ulla mora interposita, tuis omnibus respondi. Etiam accepto volumine Poëmatum tuorum gratias egi tibi, etsi me verba deficerent. Scis nempe, mi Heinso, quid saepenumero visis singulis ad te scripserim, scis quid de omni genere stili tui judicem, quomodo eo tenear, ut nihil purius, doctius, elegantius putem, quodque propius ad sanam illam antiquitatem accedat. Unum reprehendebant amici tui, quod tam cito ἑξατοκέλλον spectavisses, cumque tam multa, tam bona posses, tam pauca dedisses, in te unum malignus, homo in quosvis alioqui benignissimus. Quibus poene accessissem, nisi succurrisset in procinctu tibi responsionem adversus me fore, scilicet in tam paucis me multum esse. Nisi illud tecum queri velim, hoc ipso me abs te invidiae magis objectum esse. Sed malo illam ferre, quam beneficio tuo carere, ne me hujus extenuandi causa & ingrato animo illius metum obtendere autumes. Itaque hoc nomine infinitum me tibi devinctum profiteor, & quam

quamvis imbecillus, quamvis abjectus iis me adscribo, qui vehuntur Maconii carminis alite. Quae autem tu *εὐαγγέλια* de Seneca & Curtio? O det Deus, hoc mihi munus saluum tecum perveniat. Facile gratiam tibi facio eorum, quae de Tito petieram, si hunc thesaurum per te nanciscar. Et sic quoque excusandum habeo, quod opera, quam tam belle tibi ipsi impendere potes, abusus fuerim. Haec mihi serva: & ultra abjice omnem de me curam, tibi ferve: tibi ipsi cum ludum & veniam dabis, corpus & valetudinem cura: habes jam, quo cum omnibus desideriis meis transigere possis. Fabricianis tantopere te delectatum esse gaudeo, nec deero, cum ad eum scribam, quin isti foculo aut arulae potius amoris, quam tibi pascit, oleum adfundam. Praestiti idem tibi apud ampliss. *Holstenium* in iis, quas ipsi trades: quamquam nec opus est, & omnia, quae honoris tui causa hujusmodi ago, tenuia ac diluta sint prae meritis tuis. Pergit Alexiadem polliceri, nec rogare te audeo ut urgeas, ne ipsius liberalitati diffidere videar. In hoc vertitur omne meum de illa consilium, cui deliberatum est nihil tentare, nisi auspicio ejus admittente. Tu tua prudentia utere. Sed vide in primis, ut quem narras Lydum impetrem, de quo nescio quomodo antea monere te oblitus fui. Nam & ipse eum vidi, una cum illis, quae jam vertere coeperat, & sermones mihi cum *τῶ πάντι* fuerunt de eo, cujus tu nunc spem habeas. Ego impellente *Vlitio* nostro paravi quidem Observationum librum & ad eum misi, sed quid eo futurum sit, etiam nescio. Si edetur, dum abes, noli quidquam citius exspectare: constitutum est mihi prima quacunque editione redimere & abolere notam malignitatis, cujus apud amicos me suspectum fecit in Livio *τὸ δεινὸν* illiberalitas. Nunc quod vacabat ab illis diurnis, in Senecis eram: ubi etsi solius ingenii remigio rem gerimus (quod genus tu merito non magni facis) sunt tamen quaedam, quae, spero, tibi probabimus. Serviunt enim nobis accuratae illae Gruteri annotationes pro MSS.: nam Tragoedias, etsi inceperam, differo in adventum tuum, quem etsi ex animo felicem & exoptatum tibi opto, tamen, ut nimis properes, non desidero: scio enim quae lucra, dum abes, facias, quibus tamen etiam ne adeo inhies, ut domus patriae obliviscare. Et obitu amicae ob solitudinem patris tui dolui, & processu affinis ex animo gaudeo. Quod scribes iterum turbari, testor ante semestrem, me serio dehortatum & petiisse, ne quem factum alienum praestare vellet. Non vidi: nam ad me non misit, praetexto nulla accepisse a typographis exemplaria. Tu ista contemne, nemo facit, quae non ab aliis vicissim patiatur. *Kinschotius* noster valet & lepidus est Monasterii: ut primum ad eum scribam, admonebo tui. Vale anime mi, & te ipsum cura. Deus te nobis cum omnibus tuis sospitem reddat. Daventriae a. d. vi. Kal. April. *ciōiōcxlvi*.

Viros Clariss. & multis nominibus mihi suspiciendos, *Leonem Allatium*, *Servium*, *Moronum* plurimum saluto.

J. FR. GRONOVII
EPISTOLA CXLIII.
NIC. HEINSIUS

J. Fr. Gronovio.

Daventriam.

Nescio an eas acceperis, quas una cum Holstenianis Roma non ita nuper ad te dedi. Venetias enim eas ad amicum miseram, quem paulo post e vivis excessisse intellexi. Ego vero nunc post Romanas illas antiquitates perlustratas funestissimi spectaculi pertaesus Neapolim admiror, in qua nihil requiras merito praeter eruditionem & elegantiorum literarum cultum, ad quas tamen civitatem hanc a natura factam credas. Si mei juris sim, aestivos menses hîc velim transigere. Sentio enim & experior aërem hunc Romano longe salubriorem. Huc accedit, quod numis antiquis conquirendis coepi incumbere: quarum copiam haec ora subministrare mihi possit. Bibliothecas paucas haecenus vidi. Commendatione Cl. *Holstenii* ad eam admissus sum, quam *Jani Parrhasii* legato Augustiniani possident. Inveni illic Ovidii *Metamorphosin* Longobardicis literis scriptam, sed & illud exemplar eodem fato usum est, quo Florentinum S. Marci, ut vetustae lectiones plerisque in locis a sciolo crassae sint. Suppeditavit quaedam tamen non poenitenda, & si non aliud, monuit certe docuitque, quae suspecta loca sint habenda. Paulo ante meum ex Romana urbe discessum *Fabricio* nostro Elegiam inscripsi, quam hîc mitto, ut, si tanti sit, ad amicum nostrum porro mittas. Misi & aliam ad *Kinschottium* hac paulo meliorem, quam *Pausilypum* inscripsi. Velim eam videas; ut autem videas, exemplar a gratiarum illo corculo pete. Revocabit tibi illa in memoriam delicias pulcherrimi tractus. Habes hîc a *Paganino Gaudentio*, qui se studiose tibi commendat. In patria quid tu, quid caeteri amici agatis cum ignarissimis ignoro, adeo rarae ad me literae scribuntur. Intellexi tamen hîc valetudine minus commoda te uti: quod permolestum mihi accidit. Annos interim diuturnos vel de meis tibi voveo. Vale, virorum ac amicorum summe, & frequenter scribe. Observationes tuas jam prodiisse spero, nisi *Vlittii* absentia moram huic negotio injecit: quem inter & uxorem nescio quid simultatum ortum audio, & vehementer displicet. Neapoli iv. die Maji. CIOIOCLVII.

EPISTOLA CXLIV.
NIC. HEINSIUS

J. Fr. Gronovio.

Daventriam.

Nolim profecto affectum meum ex literis a te aestimari, quas rariores, quam oportebat, ad te misi, dum domo absum. Habeo tamen causae meae patronum ipsum te, mi Gronovi: cujus exemplo impune haecenus hoc lice-

licere mihi gaudeo. In postremis quidem, quas per *Vlitium* nostrum curasti, meis omnibus te respondisse affirmas & quidem accurate. Quo tibi nomine multum sane debeo. Si tamen severus officiorum exactor essem, quae utrimque inter amicos praestanda sunt, provocatorias non minus, quam responsorias a te flagitarem. Nunc vero abunde mihi satisfactum reor, quod respondere meis dignatus sis. Quidvis enim ferre certum est, dum in affectu tuo is mihi constanter locus patet, quem nullo meo merito, sed benignitate ac indulgentia tua fretus jam olim occupavi. Responsorias quidem tuas omnes ad me pervenisse prorsus opinor, iis tamen exceptis, quas ad *Vintimiliam* miseras. Monui virum optimum, ac diligenter quaesivi, quid iis factum esset. Sed obiter respondit, illis omissis, de quibus potissimum a me consultus erat: cum affirmaret, eodem sibi die Venetiis in Illyricum aut Dalmatiam proficiscendum, ut quadragesimali festo per oras illas concionaretur. Ubi reversum intellexero, denuo interpellabo. Omnes enim tuas salvas mihi volo. Scripsi nuperrime, sed breves; & affinem rogavi ut ad te curaret, una cum Elegia *Fabricio* nostro inscripta, eas jam tibi redditas confido. Postea supervenerunt tuae, quas miserimus, & uxorius ille *Vlitius* noster, ut jam dixi, ad me curavit. Quas ad Cl. *Holstenium* dederas, eodem, quo accepi, die Romam misi. *Allatium*, *Servium*, *Moronum* aut per literas, aut coram in urbem reversus, tuo nomine salutabo. Futurum video, ut aestas proxima hîc mihi transigatur. Inveni enim Grammaticorum nonnullorum opuscula, haecenus ni fallor inedita, magno mihi usui futura, quae omnino velim describere. Inter quos *Volusianus Messus*, quem alii *Cornelium Frontonem* volunt. Is fragmenta Ciceronis ac Sallustii multa citat, quae in eorum operibus frustra quaerantur. In phrasibus minus usitatis annotandis potissimum occupatur, quas ex quatuor auctoribus selegit, Virgilio, Terentio, ac iis, quos jam nominavi. Ubi Macrobiani Saturnalia absolvero, (quorum veterrimus codex, sed non multum a vulgatis editionibus diversus ad manum nunc est) ad Volusianum describendum transibo. Propertium & Ovidii Amatoria jam excussi, ut & Metamorphosin, literis Longobardicis scriptam, nec Florentino codice multo recentiore; minus tamen bonum. Quod in iis omnibus locis, in quibus aqua mihi haeret, quaeque corrupta esse constat, vetus lectio penitus erasa sit, adeo quidem, ut ne vestigia quidem literarum supersint. Incipio profecto desperare, inventurum me codices auctoris illius, quales necessarii forent, bonam editionem procuraturo. Juvat tamen me conferendi labor ille, quod conjecturae inter legendum subinde novae nascantur, nec infelices; de quibus ante non cogitaveram. Specimen earum, quae nuper natae sunt, en tibi: eas ut perpendas accurate rogo, nam veras omnes praestare nolo. Lib. vii. Met. Fab. Medae. *Ter sumptis flumine crinem Irro-
ravît aquis, ternis & hiatibus ora Solvit.* Codices plerique, *ternisque & hiatibus*. Florentinus: *ternisque . . . iatibus*, erasis aliquot literis. Lege, *ternis-
que ululatibus*. Lib. xiv. p. 372. Ed. Elz. *magicis Hecaten ululatibus orat.* Paulo post: *currus quoque carmine nostro Pallent, & pallet nostris aurora Venenis.* Libri veteres nonnulli, inter quos Neapolit. & Barberin. *Pallent aut pallet.* Ver-

fus minus est rotundus, quam Ovidianum deceat. Lege minima mutatione, *currus quoque carmine nostro Pallet avi: pallet nostris Aurora venenis.* Avum Medae Solem fuisse quis nescit? conjunxit, Lunam, Solem, Auroram. Scriptum antiquitus fuit *Pallet aut*, una litera peccante. Deinde ut constaret verius, *Pallet* in *pallent* mutarunt. Transeo ad lib. xv. p. 396. oratione Pythagorae. *Fletque Milon senior cum spectat inanes Illos, qui fuerant solidarum morte ferarum Herculeis similes, fluidos pendere lacertos.* Incepte *solidas* *feras* vocat. Libri nonnulli, *solidorum more ferorum.* Puto veram lectionem me invenisse, etsi conjectura paulo audaciori. Pro *more mole* legendum, & ita, si recte memini, excerpta, quae domi habeo. Sed hoc leve. Pro *ferorum*, mutatis prioribus duabus literis, *tororum* scribo. *Similes Herculeis lacerti Milonis solidorum mole tororum* ab aliis quoque laudati. Nosti id Valerii Flacci lib. i. *Conspiciusque toris Tyrrynthius.* Et de Meleagro ibid. *Ostenditque humeros fortes spatiumque superbi Pectoris, Herculeis aequum Meleagre lacertis.* Romae in Vaticana Martialem in Vossii nostri gratiam contuleram. Proponam inde conjecturam, quam nescio an alii occupaverint. Tu me doce. Locus est lib. ix. Ep. XLVIII. *Sic quasi Pythagorae loqueris successor & haeres; Praependet mento nec tibi barba minor: Verrimus liber, Praependetque minor nec t. b. tamen:* qui tamen non optimae fidei. Alius, *Praependetque tamen n. t. b. minor.* Et in margine, *Dependet sane.* Lege, *Dependet Samiâ nec tibi barba minor.* Comam Pythagorae in proverbium abiisse apud Graecos non nescis. Sed jam satis est. Monitus eram a Cl. Holstenio veterrimum inter libros Parrhasii codicem T. Livii extare, quem in tuae spem gratiae conferre decreveram, ut idem V. C. testari potest. Atque adeo Macrobio praetulissem, sed inveni non nisi Decadis primae tomum, annos vix quadringentos referentem. In Seneca conjecturas aliquot tibi proponere possem, sed omnes observatas tibi credo, qualis est illa in Agamemnone Act. II. *Spartamne repetes sprete & a tanto viro? V. C. & Euro tantum.* Lege, *& Eurotan tuum.* Ubi hinc discessero, caeteras urbes in transcurso tantum lustrabo, & spero hyeme aut vere proximo domi me futurum. Omnino enim seni optimo parenti meo solitudinis, cum qua nunc conflictatur, taedia sublevata volo. Ex Poëmatiis meis tam pauca a me publicata, quod queruntur amici, amice quidem illi. At ego multa etiam ex iis, quae extant, magno a me retrahi ac premi posse cupiam. Adeo perquam pauca ad gustum meum ex iis sunt. Spero me allaturum mecum novum Elegiarum libellum, etsi non bonum, meliorem tamen illo, quem Parisiis publicavi: quod tute fateberis, sat scio. Nam Elegia illa ad *Fabricium* non admodum feliciter mihi successit. Alias duas postea in hac urbe scripsi (totos enim dies hîc poëtor) quas magis probabo. De Alexiade Holstenio nostro aurem vellicare non desinam. Observationes tuas quamprimum prodire velim. Scripsi jam ea de re ad *Vlitium*, oravi-que, ut quantum in se, editionem maturaret. Cl. *Donius*, a quo literas habui, de re rustica commentarium parat. Alium de Musica veterum sub praelo habet. *Gaddius* ingens volumen parat, in quo de omnibus auctoribus, qui hactenus prodierunt, judicaturus est, etiam de iis, quos nunquam legit. Pla-

tonem ait nimis affectate scripsisse. Risumne tenes? Talia infinita sunt. Conatus sum dissuadere, sed nihil profeci. Vale, literati orbis delictum. Neapoli CIOIOCXLVII. die xx. Maji.

O' δέῳ ad ingenium rediit, & ut audio, malignissime denuo Parentem in postremis scriptis excepit. *Vorstium* denique ac ipsum *Bartholinum*, juvenem candidissimum sane & Parisiis mihi notum, omnes denique probos. Qua malignitate amicos in Gallia suos in ruborem prorsus dedit. *Sarravius*, qui omnia in ipso excusare solebat, obmutuit. At ego gaudebam, quod Militiam ejus vacare intellexeram. Nunquam profecto minus ille otiosus est, quam cum otiosus: nunquam minus pace fruitor, quam cum militiam intermittit. Interim apud populares suos strenue vapulat; *Heraldo* potissimum. Nam *Fabrotus* (quem ego ob candorem morum & prolixam comitatem magni facio) modeste respondet, & quidem me auctore. Ab *Heraldo*, ut idem faceret, impetrare non potui, qui ut omnium bonorum obtrectatorem illum exagitat. Cum Parisiis essem, circumferebantur virulentae ejus literae, in quibus & te & alios professores, quos credebam illi valde amicos, viros certe doctissimos, petulanter exagitabat. Unde rumor per urbem sparsus erat, maximas inter te & ipsum simultates esse ortas. Negavi ea de re quicquam mihi constare: compertum tamen mihi esse, eo illum esse ingenio, ut nec amicis parceret. Potuit ipsarum literarum copia mihi fieri: nisi quod in iis, quibus nocere possim, negligens esse malo, quam accuratus. Nec sane haec eo nunc a me dicuntur, ut honorifice minus de illo sentias, quam haecenus facis (pro viro enim doctissimo si tibi habebitur, mecum senties) tantum ne de affectu & candore ejus nimium tibi pollicearis. Premere hanc admonitionem poteram, nisi & amicissimus mihi esses, & literae illae publice tum temporis per urbem circumlatae sint. Titulus ille & *Maxime Juvenis* in postremis tuis vehementer mihi displicuit. Rogo ut ingenue & sine titulis (iis praesertim, qui non debentur) impofterum mecum agas.

EPISTOLA CXLV.

NIC. HEINSIUS

J. Fr. Gronovio.

Daventriam.

SUmme & amicissime vir. Bis nuper ad te scripsi. Tertium nunc scribo: Sbrevis tamen & abrupte. Tuae ad Cl. *Holstenium* recte curatae sunt. Ac de Comnenâ rem confectam habemus. Ita enim ille in ultimis ad me, quas hodierno die accepi. Missum est exemplar ad *Puteanos* Lutetiam, ut inde ad te perveniat. Decreverunt regi typographi scriptum illud typis suis committere. Suadeo igitur ut festines, quantum in te, versionem: ac *Puteanis* fratribus gratias agas, qui preces suas meis conjunxerunt, ut amicum nostrum
ad

ad promissa praestanda faciliorem redderent. Habui ab iis hodie literas, ut & a *Sarravio*, & *Menagio*. Sed nihil aut parum novi. Nunc sum in describendo *Arusiani Messii* de elocutionibus libello, in quo fragmenta Ciceronis & Salustii multa. Adfunt & alii Grammatici non editi ad manum. Sed ingruunt calores: qui, ut opinor, diligentiam meam praeversuri sunt. Tu, me ama, & vale. Neap. Junii CIOIOCLVII.

Cl. *Holstenii* Nepos A. Gellium Parisiis edidit. Prodiit & *Fabroti* Apologia. *Heraldi* liber ingens praelo brevi committendus est, nec dum tamen commissus. Cedrenum & Curopalatam luculentiores non ita nuper prodituri sunt. *Intimelius* a multo tempore nullas ad me dedit. Genuam eum habitatum concessisse intelligo. Raptissime scribebam.

E P I S T O L A CXLVI.

J. F R. G R O N O V I U S.

Nic. Heinſio.

Neapolim.

Nobilissime & Maxime juvenis. Binas tuas ex juvenili Parthenope, sive mavis otiosa Neapoli, datas uno tempore accepi: Gaudeo te unicis Europae deliciis tam sane tamque caste perfrui. Itaque non vereor, ne tibi Neapolis, quod Hannibali Capua. De Elegia ad *Fabricium* bene cavisti, ne tuae manus exemplum fervarem, ipsum a me facto contentum esse juberem. Fecissem enim ne periret ille versus, *Literaque auctorem*. Et charta nescio unde madefacta aliquid vitii fecerat. De valetudine mea minus commoda falsus rumor fuit, quem tamen in hanc partem peccare malo. Si nihil aliud, ut tu me votis tuis bees, quae tamen tuo ipsius tam pretioso capiti damno esse nolim. Ad *Holstenium* V. CL. scripsi, quae res postulabat & tu intelligis, non mei tantum, sed vel maxime tui negotii causa. Si unquam de te cum cura, ut me semper decet, locutus sum, hinc ut loquerer mihi cura fuit. Itaque magnopere voluisssem, etiam te Romae fuisse, cum illas tradendas acceperam, si forte fructus inde aliquis apparuisset. Quod si illis opus non fuit, & tamen omnia tuae virtuti impetrabilia fuerunt, ita ut debebant, melius est, nec poenitet, quod amplissimus popularis meus ultro atque ante meam adhortationem recte se fecisse gavisus fuerit. Quae vero tu evangelia de *Volusiano Messio* & fragmentis quatuor summorum & castissimorum auctorum? O perge describere fideliter, & tibi primum illo thesauro fruire, deinde & publico fruendum tradere, vel si mavis, opere censorio loca. Erunt qui digitum tollant, & satis animose tuae laudis benigno pretio conducant, nosque inter illos primi. Sed & quae ad Ovidium, Martialem, Senecam notas, extra aleam mihi videntur. *Eurotan tuum*, videbis mihi observatum in primis meae collationis schedis, cum, quod spero, ad nos fueris reversus. De poematis tuis noli queri. Cave ne fastidias; & nimia lima

in

in vitium incidas. A *Kinschotio* prima occasione elegiam petam, & tuo ingenio pariter fruar. De Observationibus edendis spes, quam fecerat *Vlitius*, decolavit, haud ipsius, ut reor, culpa: quamquam illius tristissimi, & nunquam satis ei dolendi casus, nos quoque aliquod supplicium luere putare possis. Censorum illum parum cognitorum auctorum amare possum ob honorem, quem literatis habet, quo si solo censeretur vellent ipse ejusque similes, praeclare consulere: nunc alia conando etiam laudes suas detrectant. φιλολαϊδόραιο γλώττης βέλεμνα κοῦφα magno animo contemne. Et ab eo, propter quem iustissime doles, meritis jamdudum extincta & obruta sunt, & quam partem ad te pertinere putabis, satius est te quoque, quod potes, meritis extinguere, quam vicem reddere. Ego in Senecis pergo, atque etsi solius ingenii remigio rem geram, spicilegium tamen habeo non contemnendum. Vis pro praeclaris tuis observationibus nostras aliquot nihili tibi reponi? Epist. xxiv. refertur versus Lucilii, quem *Muretus* & *Lipsius* non intellexerunt, sola distinctione impediti. *Mors non ultima venit; quae rapit, ultima mors est.* Ita nempe faciendum, hoc sensu. Mors non est ultima eorum, quae patimur: per totam vitam morimur & mortibus carpimur; sed illa, quae nos rapit, ultima est mortium, non sola, ut vulgus putat. Et hunc locum tractasse ibi Lucilium dixit ante Seneca. Epist. LII. *Quosdam ait Epicurus ad veritatem sine ullius adjutorio contendere, ex iis se fecisse sibi ipsum viam.* Verbum *contendere* non est in MSS. bonae notae, ex uno *Pinciani* insertum, & uno *Pall.* atque eo corruptissimo firmatum: dein omnes alii sibi ipsos. Scribendum est. *Quosdam ait Epicurus ad veritatem sine ullius adjutorio, ex iis se, fecisse sibi ipsos viam.* Vides quam scita brevitate. Epist. LXXXVI *In qua (villa) didici ab Aegialo, diligentissimo patrefamiliae, quamvis vetus arbusum posse transferri. Hoc nobis senibus discere necessarium est, quorum nemo non olivetum alteri ponit. Quod vidi, hoc dico: illud arboretum trimum aut quadrimum fastidienti fructus autumnino deponere. Rogo te intelligis, quid sit deponere fructus, & potes hoc conciliare prioribus, quae volunt dicendum fuisse, ipsas arbores tantulae aetatis alio loco depositas fuisse utiliter. Et tamen est haec Lipsii correctio, ex Electis ipsius in omnes editiones recepta. Sed libri omnes arborum, non arboretum: & fatetur ipse hoc esse ab conjectura sua. Sed unam rem non curavit, maxime notandam, τὰ hoc dico in quinque *Pall.* nullum vestigium sui habere. Ita ergo recide, & dein pro illud scribe illum: habebis, ni fallor, quod Senecae fuit: *Quod (nempe olivetum) vidi illum arborum trimum aut quadrimum (i. e. trimarum aut quadrimarum) fastidienti fructus autumnino deponere. Lege sequentia, & in primis: Ad olivetum revertor, quod vidi duobus modis depositum. Ita enim hic quoque scribendum, non dispositum. Epist. xci. extrema: Numquid detrimenti faceret vir bonus, iniquis rumoribus adpersus? nec morti quidem hoc apud nos noceat: & haec malam molitionem habet. Lipsius molitionem vel amolitionem. Nos, malam opinionem. i. e. famam, existimationem. Ut scis vocabulum opinionis interdum capi, & ex utroque Seneca exempla in promptu habemus. In Patre, Suasoria vi. Scipio cum gladium ponere jussus foret, dicitur abdidi se.**

Loquitur de focero Pompeji, qui, ut scis, in Africano mari sibi manus attulit. Itaque Nic. Faber: *occidisse*. Sed verum est: *abdidiſſe in ſe*. Noſti, *capulo tenuis abdidiſſe enſem*. Ibidem: *Injuſta bella albo Pharſalica ac Mundeniſis Mutinenſiſque ruina vincitur*. Scribo, *Vnius tabellae albo*: & intelligo tabulam proſcriptionis. Controverſia xxxiv. *Non minus ſulte Aemilianus quidem Graecus rhetor, quod genus ſultorum amabiliſſimum eſt. Hexarida fatuus dixit: ἀποκτείνετε Παρράσιον &c.* Bonus Schottus in Declamatorum indiculo nobis *Hexaridam* poſuit. Sed ſcribendum: *amabiliſſimum eſt, ex arido fatuus*. Ut eadem Contro. ſuperius, *ex captivo cocus, ex coco leſticarius*. Sed & alios paſſim *aridos declamatores* traducit. Totum vero illud M. Senecae elegantiffimum opus, ut miſere affectum eſt? Certe prae hoc nulum Augiae ſtabulum eſt. Habui quidem ab *Iſaaco* noſtro MS. codicem chartaceum, ſed, ut recens, & aeque corruptus, parum profuit. Tamen iſtis & paucis iſtiusmodi mimum noſtrum implebimus. Scis, amicum noſtrum Leidae portenta moliri? ex Scythica, quam vocat, lingua Graecam & Romanam, (nam de Hebraea Theologos veretur) deducere? Et hoc adeo ſerio, ut diſſuadentes, etiam Patrem tuum, nullos audiat. Specimen jam dedit Belgica lingua ſcriptum, & dedicatum Auriacae Principi matri, in quo eam docet, foeminas, atque adeo ipſam, honeſte appellari, *Tere*. Jamque alterum ſub manu, ſi non ſub praelo eſt. Hardervici Ordines Geldriae Academiam inſtituunt. *Voffii* de re poetica propediem exhibit. *Swartii* commentarios in Curtium grandes, in quarto ajunt Ultrajecti prodire. Vereor ne *Raderiani* & *Freinſhemiani* fraterculum germanum futurum putes. Quibus placuit προπεμπτικός, hor- tati ſunt; ut ad Celfi patris τοῦ μακαρίτη ² Celfum filium in hoc aditu haereditatis tum juſtae, tum gratioſae idem molirer. Conatus ſum: ſi prodibit, ſcies: nam etiam delibero. Vale, vale, corculum meum, & re bene geſta ſalvus ad nos revertere. Daventriae a d. iv. Non. Sextil. Gregori cccxcxlvii. poſtridie quam tuas accepi.

Dum exſpecto tabellarium, qui has ferat, tertiæ tuae ſupervenerunt, jucunda de Comnena nuntiantes. Gratias tibi ago pro illo ſtudio, quod mihi apud Cl. *Holſtenium* praefitiſti, facturum idem *Puteanis* fratribus, & in primis ipſi, cum accepero. Neque in me quidquam poſtea morae erit. Suetonius cum notis variorum Leidae prodiit: ſi tu domi fuiſſes, doctiores nos feciſſet. Nunc Sulpitium Severum ſub praelo habent. *Pareus* de particulis Latinae linguae his nundinis ſe daturum per literas mihi promiſit: an praefitit, adhuc neſcio. Iterum vale. Nonis poſt acceptas tuas. Si Decadis primæ bonum codicem alicubi reperires, & conferendi otium eſſet, gratum faceres: nam eam totam cum nullo inſigni libro ſcripto contuli. Sed hoc, ut lubebit, & res tuae patientur.

1. *Boxhornium*. 2. *Guilielmum* 11. *Arauſionenſem*.

EPISTOLA CXLVII.
NIC. HEINSIUS

J. Fr. Gronovio

Daventriam.

Clarissime & amicissime virorum. Quibuscum nuper turbis Neapolitani conflictati sint, atque etiamnum conflictentur, non ignorare te passus est, ut opinor, rumor publicus. Plebi gliscit & accrescit indies effrenis petulantia, quae ne in externos praeter expectationem aliquando grassetur, post nobilitatem ejectam, vehementer metuo. Sontes juxta ac insontes crudeliter indies ad supplicia trahuntur, nec caussae dicendae locus est, adeo inauditi passim jugulantur, carnificis nomen quilibet ex plebe sibi vindicat, cultris oblongis armati hoc nomine circumambulant, lanios esse dicas, nec finem horum motuum prospicio: adeo delectantur gustato semel sanguine atroces istae belluae. Quae quidem omnia cum mecum expendissem, advocato etiam amicorum consilio, nihil praeter rem meam facturum videbar, si in pedes me conicerem, & Laestrigonum infandorum manibus elaberer: mari iter faciendum fuit, ne quid noxae ex aëre Romano attraherem, aut in latronum potestatem venirem, qui vias circumquaque nunc obsident, nec instituti poenitet, cum omnia hactenus ex voto successerint. Per hanc urbem transcunti tuae mihi occurrerunt, longe quidem gratissimae illae & peramanter scriptae, ad quas accuratius responsurus sum, ubi Venetias venero, eo enim intra biduum contendo. Bononiae fortassis dies aliquot morabor, si aditus patebit ad S. Salvatoris bibliothecam. Tuas ad *Gaudentium* nostrum misi, & responsum die crastino expecto. Maximi vir optimus te facit, ut & *Donius Gaddiusque*, qui amice te salutant. *Donius* quidem dialogos suos de veteri Musica, scriptum elegans & tersum, absolvit, exemplar ut ad te mitterem rogavit, quod occasione prima volo expectes. In Seneca, quae notas, digna te sunt. Placuit imprimis conjectura illa, *Unius tabellae albo*. Doleo auctorem illum ad manus mihi non esse, ut accuratius omnia excutere possim. Sed hoc Venetiis fiet. Vale, decus meum unicum, vale, Florentiae CIOIOCXLVII. die XXI. Aug.

Tempestatem illam in domo Vlitiana exortam, in causa esse doleo, quominus Observationes tuae lucem videant. Incidi hîc in juvenem praecclarum, qui pessime de amici nostri facinore sentiebat. Bis ad illum scripsi, cum solatia mea imploraret. Literas eas Hagam recta destinavit affinis meus, quod ignoraret eum Bredam commigrasse, metuo itaque vehementer ne perierint. Hoc ut ex te sciat rogo, ne fortassis in hac calamitate se desertum a me suspicari possit. Venetiis hanc jacturam ipsi refarciam. Neapoli antequam abirem ¹ Elegiam ad te scripsi, in qua mirificam diligentiam tuam & fidem in scribendis

A a 2

ad

¹ Legitur ea libro 1. Elegia 7. vid. mox Epist. 149.

ad me epistoliis commendo. Tu hoc age, ne perperam laudatus videri possis. Prodiit hîc *Nardii* Medici in *Lucretium* commentarius. Peream male, si quicquam in auctore illo intelligit. Initio praefationis, audax facinus vocat, quod carmine Philosophiam attingere ausus est. Sed satis jam ineptiarum.

EPISTOLA CXLVIII.

J. FR. GRONOVIIUS

*Nic. Heinsio.**Venetias.*

Nobilissime & amicissime juvenum. Ad communem & perpetuam voluptatem, quam mihi literae tuae praebent, in postremis accessit haec extraordinaria, quod maximo de te metu ob furores Neapolitanos liberatus sum. Igitur Soteria libens tuo nomine persolvam Deo immortalî, & eum veneror, ut posthac quoque aut nihil, dum abes, aut frustra pro te timeamus. Tu quoque, ut adhuc, prudens esto, neque ullo casu fortitudinis laudem sequere, & *tantum vivere pugna, Inque pios Patris posse redire sinus*. Amici nostri domesticam seditionem quantopere doluerim, verbis vix possum adsequi. Quantum ad sustinenda conjugii onera in concordia & lenitate animi situm sit, exemplo meo experior. Atque ut utrimque peccatum esse non iverim inficias, ita magnus fuit error generosi hominis, quod oblitus est se vivere in *Batavia*, ubi si friguscula ejusmodi publicentur, semper fama potiores sunt sequeioris sexus partes. Sed detestabilis prorsus fuit sequestrorum insania, quae vulnera parcente manu & mitibus remediis placare, dein omnibus integumentis obnubere ac luci subtrahere deberent, ea postquam furialibus facibus exulceratissima reddidissent, tantum non in theatro, cum sua & suorum aeternum poenitenda traductione, prostituerunt. De literis tuis eum monebo, quae si in manus istorum inciderunt, vix ad illum pervenerint, nisi nuper admodum mentes ad sanitatem sint revocatae. Unas ab eo, postquam *Bredae* vivit, habui, in quibus erat, instar discidii & familia eriscunda & liberis partiendis esse factum, propeque fuisse, ut iudices id confirmarent, nisi, qui rem maxime urssisset, praestantis amici nostri parens in ipso apparatu decessisset. Ego Principi *Auriaco* accessum ad imperium & patrimonium sum gratulatus. Dices, non hoc meum fuisse? Vero, sed meum erat, amici nonnihil in aula valentis auctoritati parere. Res tamen non omnino male cessit: certe & *Proceres* plerique plausu, & ipse princeps congiario sedecim millium aeris, sive mavis quadringentorum flor. studium nostrum prosequutus est. Exemplar in formam epistolarem complicatum misi ad affinem tuum, ut si possit, ad te mittat, quod si *Venetiis* accipies, potes illic alicui amicorum, & in primis *Loredano*, cui gratissima erit tua salutatio, relinquere: apud me aliud tibi servabitur. *Proceres Geldriae Hardervici* in vicinia nostra Academiam instituunt:

eo me arceffiverunt: sed tenuit conspiratio fenatus & civium, & soceri uxorisque. Annua tamen quatuor millibus aeris (100. flor.) mihi aucta: quod cum speraret etiam collega Philosophus eodem vocatus, comiter dimissus est. Ego in Senecis pergo. Quid tibi videtur de illo Controv. VII. *Hic, qui unde vivat non habet, quam care tyrannicidae vestro se mancipat?* Controversia est de eo, qui fratre tyranno occiso incidit in piratas, scripsit ad hos pater: si manus ei praecideritis, duplam pecuniam, quam pro redemptione poscitis, dabo. Legerim itaque, *tyrannicidam vestrum emancat*. Nisi mavis, *tyrannicidas vestros*. Nam & sic de uno potest intelligi. Verbo autem *emancare*, pro mancum seu mutilum facere, utitur & Controv. 33. extrema: *gaudeo me non omnes emancasse*. De Poëtica re *Vossii*, credo, prodiit, & indies exspecto. Ejusdem de Philologia exercet operas. ¹ *Ο' κεραιεργωνυμ* pergit ad Tanaim sedere: jam alter liber processit, nihil, ut audio, novarum rerum sterilior. ² *Swartius*, nunc Rector Bredanus, sed quem expectant quidam Hardervici mihi suffectum iri, grandes commentarios in Curtium edere dicitur. Nobiliss. & Ampliss. *Donii Gaddique* mihi vivit vigetque memoria: oroque ut officiosissime eos a me resalutes. Faxo, si ullo modo fieri potest, aliquid nostrorum ad eos perveniat. Vale, meum & aevi eximium decus, & cum fuerit commodum, salvus cum salvis tuis rebus ad nos redi. Daventriae VI. Non. Octob. CIOIOCXLVII. qua hora postremas tuas accepi, ut videas cordi mihi esse, ut Elegiam tuam merear: Nihil mihi erit longius, quam dum illam videam. Iterum iterumque vale.

¹ *Boxhornius*, quod nomen *cornua arietis* notare indicat.

² *Eustathius Swartius*, *Barthio* familiaris, apud quem diu habitavit, & a manu fuit, & cui etiam plurima sublegit. Vid. *Barth.* XVII. Ad. 9. ad Stat. v. Silv. I. 170. & ad Claudian. IV. Conf. Honor. 650. Rector Scholae Sylvaeducensis in Epistolis *Vossii* selectis 118. dicitur, Ultrajectinae etiam Scholae praefuit. Ambuisse munus agentis Principum Megalopolensium apud Ordines Belgii, patet ex Epistola *Rutgersii* inter Gudianas cXL. Omisit eum Valer. Andreas.

EPISTOLA CXLIX.

NIC. HEINSIUS.

J. Fr. Gronovio.

Daventriam.

A Micorum eruditorum princeps. Si prolixissimo erga te affectui meo satisfactum vellem, quotidie profecto literis meis compellendus esses. Quod quia non licet, amicissimis ac tui plenis cogitationibus mihi conor satisfacere. Venetias salvus adveni, quam urbem expectationi meae non respondere fateor, adfunt enim viri literati oppido quam pauci. Unde futurum video, ut Mediolanum post dies quadraginta forsan discessurus sim, ac inde porro in Gallias. Monendum itaque ea de re te duxi; ut si quid hîc curatum a me velles, tempestive id fieri posset. Taedet jam profecto me longae peregrinationis: & ve-

lim unice quamprimum vobis adesse. Videor jam videre mihi gratulationes illas amicorum, & laetos circumquaque vultus.

¹ *Me meus Aëniis Gronovius induet ulnis.*

Ab pereat! si quem non manus illa trahit;

Digna vel Ausoniae Suadâ cultrice vetustae.

(Quam procul ² heu Latio nunc Venus ista suo:)

De me, Dii, facile est, si rumpit stamina Clotho:

Hanc modo ³ detexat Parca benigna colum.

Sed desino ineptiarum, piget enim caetera describere. *Vintimilia* noster Genuam ex hac urbe discessit nuper habitatum. Queritur in postremis ad me suis vir bonus, nullam hætenus sui mentionem publice a te factam. Audi ipsum.

„ *Godo che il nostro gent^{mo} Gronovio stia di continuo affaticando. Ma stupisco,*
 „ *che nelle sue opere non si ricordi de gli amici. Io non istamparei un foglio, che*
 „ *non li nominassi, ed egli ha stampate piu opere, e s'e scordato di tutti. Ma io*
 „ *burlo. Non voglio da gli amici, se non quello, che piace loro.* „ Sed hæc in aurem tibi. Vides ambitionem monachorum! Prodiit hîc nuper horribilis liber, *Academicorum Incognitorum* vitis ac elogiis insignitus. Sunt autem amicorum in eo plerorumque, ac imprimis tua, & adeo inepte expressæ effigies, ut *Incognitos* recte appellari non negarim, etiam eos, qui maxime mihi noti essent. Tu quid rerum nunc agas scire imprimis velim. Vale, meum decus. Habes hic a *Donio*, viro eleganti, & qui nihil inepte molitur. Exemplar libri ejus ab affine meo accipies, ubi in Bataviam advenerit. Venetiis. *CIÖIOCLVII.* die xxv. Sept. Raptim. multa nocte.

¹ Pars est elegiæ VII. Lib. I. Nic Heins. ad J. F. Gronov. p. 18. vid. supr. Epist. 147.

² *A Latio*, legitur in edita.

³ *Continuet* editum. vid. Epist. CLXI.

EPISTOLA CL.

NIC. HEINSIUS

J. Fr. Gronovio.

Daventriam.

VIr Celeberrime, amicorum optime, maxime. Multo tempore nullas a te accepi, cum ipse jam aliquoties scripserim. Venetiis diligenter S. Antonii bibliothecam excussi, totus pulvere tincisque conspersus, si antiquissimus ille Manilius compareret. Sed tantum abest, eum a me inventum, ut nullum prorsus antiquioris illic notæ codicem offenderim, qui usui mihi posset esse, si græcos aliquot excipias. Aut raptum igitur oportet, aut in aliâ eum bibliothecâ tibi visum. Diligentius inquiram, ubi proxime Venetias sum reversurus. Illustrissimus *Lauredanus* affirmavit, se misisse tibi ante menses aliquot duo exemplaria libri illius, qui *Gloria Incognitorum* inscribitur: & mira-

tur

tur nullum se responsum hæcenus a te habuisse. Bonâ mihi fide fassus est, unice se velle, libros a te suos in Latinum sermonem transferri. Quasi vero aliud non sit quod agas. Metuo ne & idem a me petat, ausus propterea non sum familiaris illo uti. Alius ejusdem ordinis me convênit, rogavitque, ut amores suos, faeminam nescio quam nobilem, & sterilem, sibi dilectissimam, (quam adeo vivis coloribus depingebat, ut nihil præter solum nomen dissimularet) Elegiâ prolixâ celebrarem. Præscribebat præterea tanquam dictator, carminis leges, a quibus deflectendum nequaquam foret. Alui hominem stolidissimum vanâ spe, & promisi per otium ea de re me cogitaturum. Quid agas? ita nunc hîc vivitur. Dux quoque *Vindocinensis* famosi libelli, in Gallos scripti apud nos, Latine vertendi necessitatem mihi imposuit. Quæ res toto biduo jam me exercet. Feci tamen id libenter in optimi principis gratiam, quoque nihil fingi humanius potest. Habent hîc sub praelo *Fortunii Liceti* de Lucernis veterum ex secunda editione commentarium, cui multa accessura sunt. Rogavit me *Rhodius* noster, ut ad Cl. *Smithium* scriberem hoc nomine, eumque de editione monerem. Si quæ ex suis addi vellet, integrum id illi fore. Scripsi hodie, & epistolum ad affinem meum misi. Metuo tamen ne aut pereat, aut diutius certe in via hæreat, quam par est. Velit enim typographus quamprimum scire, quid sibi expectandum sit, alioquin intra duos menses librum vulgaturus. Rogo ut hîc opera tuâ nobis adsis, & ad amicissimum virum ea de re scribas: ut tanto celerius responsum habeamus. Quas proxime tibi scripsi, cum Donianis, ut & has, ad *Vossium* nostrum misi. Vale. Patavii. die xvi. Octob. ciciocxlvii. Raptim.

EPISTOLA CLI.

J. F. R. GRONOVIIUS

*Nic. Heinsio.**Venetias.*

Nobilissime & Summe juvenis. Binas postremas tuas recte per *Vossium* accepi, plenas suavissimi & sincerissimi amoris. Quo quidem supra quam verbis exponi potest afficior, & coelum tenere me arbitror. Primum, quid honestius cuiquam, quam abs te sic amari? Neque enim hæc amicitiae tantum fides est, sed etiam personae indicatura: atque ea est tui judicii auctoritas, ut non tam quid facias, demonstres, quam quid faciendum sit, præscribas. Præsertim cum plurimi ingentes viri in illis locis, quæ transisti proxime, & cum maxime transis, multo majoribus officiis, quam qualia possunt a me proficisci, hoc a te contendant & redemptum cupiant; ego autem longo illo nostro discidio, non nisi inanibus incultisque literis te mei admoneam. Deinde proprie jucundius nihil est, tum mea causâ, quem voti omnium maximi compotem reddis, tum etiam tua, in quo agnosco pristinam illam solidam vir-
tu-

tutem, animumque firmum, neque prae tot novis necessitudinibus veteres fastidientem. Quare & gaudeo te tandem domum respicere, & immani fastu effector, meam inter eas manus esse, quae te huc potentius retrahunt, quam illic aliae tenent, & complexu tuo, ut sic dicam, vivent. Unum mihi melitissimis in versibus tuis displicuit, quod tam paratum te ad decidendum cum Parcis de tuo capite ostendis, dum meo caveas. Ego vero, ne firint fata, ut turbato etiam mortalitatis ordine sequar illum, quem omnes, qui literas, ut decet, florentes cupiunt, sibi optant superstitem. Quis enim vivit hodie, cui Latinae Musae tantum, quantum tibi, debiturae sint, sive restitutis antiquis, sive purissimi & cultissimi stili tui genio expressis? Itaque non princeps ille magis apud Nasonem tuum templorum, quam tu Ausoniarum Camaenarum, & Positor & sanctus Repostor. Vive igitur, mi Heinssi, ac te primum amamus nos in posterioribus satis habebimus loci, quo superbiamus. Nobilissimi *Dionii* literae mihi gratissimae fuerunt, cui, cum librum accepero, aut etiam citius aliquid reponam. *Intemelii* affectum & desiderium amo, & cogitabo, quemadmodum illi satisfacere possim. Discrucior non comparuisse tibi Manilium MSt. quem tamen profecto non alibi vidi. Liber erat in maxima forma. Testes mihi Reverendiss. *Thomassinus* & *Fredericus Maripetrus* N. V. & ex Regularium Sanctorum Salvatoris coetu Canonicus. Ita enim se appellat in titulo, quem in albo amicorum mihi reliquit. Requires, ubi sit iste coetus, & an forte sit error meus: ego certe non aliter, quam in D. Antonii conventu audisse me memini. De libro Gallico vide quaeso, quid facias: illud certe cura, ut res secretissima sit, nec tibi apud illos, quos forte in reditu transiturus es, periculum creet. Illustrissimum *Lauredanum* mentionem mei apud te fecisse lactor, eique velim salutationem meo nomine & officia mea paratissima deferas. Quas vides, ad eum scripseram acceptis prioribus tuis, & ni grave est, ipsi reddes. ¹ Parisienses involarunt mihi Alexiadem: nam, ut habuerunt Holstenianum exemplar, invenerunt hominem, ut audio, Jesuitam *Possinum*, qui raptim operam transferendi promitteret & impleret. Jamque ajunt sub praelo esse. Scilicet homini peregrino hanc laureolam concedere non potuerunt. Cujus potissimum culpa sit ignoro. *Cramoysius* literis ad me datis in *Seguerium* Cancellarium confert. Ego poscenti Elzevirio nuper partem animadversionum ad Senecam transmisi: ad Naturales quaestiones, & Ludum, (ubi tu mihi occurristi per occasionem loci, quem aliquando in schedis Rutgerfianis apud te correctum vidi) hoc est, ad ultima prosa Lucii, his diebus absolvi. Restant sola Marci: quibus absolutis Tragoedias aggrediar. Sed in has non habebunt typographi ante tuum adventum. Qui nobis & tibi tuisque ut optatus contingat, Deum optimum maximum oro. Vale, vale, mihi & Musis carissimum caput. Ad Cl. *Smithium* hoc ipso die scribam. Iterum vale. Daventriae a. d. ix. Kal. Nov. Jul. quo die tuos posteriores accepi CIOIOCXLVII.

¹ De hac injuria multis agunt Gronovius & Heinssius in sequentibus Epistolis, quas si vidisset Cl. *Fabricius*, potuisset inde augere sua, quae habet lib. v. Biblioth. Graec. cap. 5. pag. 392.

Plurimum saluto Viros Clarissimos & Nobiliss. *Veslingium, Vezzanum, Ferrarium, Rhodium: Vezzani* Ocellum Lucanum, promissum mihi, adhuc expecto.

EPISTOLA CLII.

NIC. HEINSIUS

J. F. Gronovio.

Daventriam.

CUrae leves loquuntur, ingentes stupent. Heu funestum literatis in Italia viris hunc autumnum! Ut omittam, *Johannem Victorium Rossium*, qui se *Janum Nicium Erytraeum* appellabat, Romae e vivis sublatum, Florentiae *Evangelistam Toricellum*, *Galilaei* discipulum, & Magno Duci unice charum, *Pisis Vincentium Rinierium*, *Cavalierium* Bononiae, & hos quidem tres postremos Mathematicos praestantissimos, & scriptis satis claros. Ut, inquam, hos omittam, tibi fortasse vix notos; *Petrum Servium*, optimum amicissimumque mihi hominem, & in flore aetatis raptum, vix defleram; cum ecce vulnus novum, & caeteris longe atrocius, de *Donio* nostro funestum nuncium. Fuit nobis vir ille summus. Fuit, amicissime Gronovi, pridie Kal. hujus mensis vita defunctus. At ego calamitatis hujus ignarus ipso illo die, & eadem ferme, qua excessit, hora, literas ad illum exarabam, affectus erga ipsum tui indices. Nihil profecto restat miserae Italiae praeter sordes, tanto viro sublato, si unum alterumque ex eruditioribus excipiamus. Primas tamen *Donius* noster tenebat. De morbo ejus nihil intellexeram, nisi quod nobilissimus *Cavalcantius* literis suis mentionem de febricula, qua laboraret, inseruisset, quae literae diebus quinque aut sex ante mortem amici nostri exaratae, & fatali die mihi redditae sunt. Proximo septiduo a *Valerio Chimentellio* ecce literas alias, quibus magno in periculo eum esse moneret: postero die tertias, a *Carolo Datio*, quae me prorsus perdiderunt, funestas plane, & magnae calamitatis nuncias. *Datium* illum, amicissimum mihi juvenem, impense diligebat; cui & potissimam curam scriptorum suorum edendorum moriens mandavit. Curabo ut apud nos ea prodeant, si inter Italos typographi non inveniantur. *Gaddius* etiam graviter aegrotavit: melius tamen nunc habet. Ignosce, quae so, si breviter nunc tecum ago: totus enim in dolore etiamnum versor. Ex *Vossii* nostri literis intelligo *Alexiadem* non tibi, sed Jesuitae cuidam *Tholosati* celsisse, quod certe contra mentem *Cl. Holstenii* factum est, & mihi summam indignationem expressit. Non ausus tamen sum ea de re ipsum monere, quod dubitarem, cum ipse rei indignissimae non memineras in tuis. *Puteanum* tamen *Carthusianorum* Generalem scitatus sum, & responsum brevi expecto. Si vera nunciavit amicus noster, auctor tibi sim, ut in instituto pergas: & *Alexiadem* typis minoribus apud nos cures excudendam. Potes e-

nim observasse multa, quae Jesuitam fugerint. Principis Auriaci liberalitatem tibi gratulor, quanquam meritis tuis longe inferiorem illam sat sciam. Orationem ipsam libenter videbo, & si accepero, cum *Lauredano* communicabo. Quaerit ille omni studio, virum literatum, cui scripta sua in sermonem Latinum convertenda obtrudat. Haec ratio est, cur ipsum vix accedam. Perduntur ingenia nobilitatis in urbe illa continuis adulationibus, quas admittere non debebant, si saperent. Sed non videmus manticas. Vix credas, quanta cum patientia viros magni nominis inter suos interdum differentes audiam. Talis & Florentinus iste Elogiorum scriptor, caetera mihi admodum amicus, nisi quod adulari ipsi non possum. Emendatio tua in Seneca elegans est, & si quid video, vera. Elegias meas praelo hîc brevi commissurus sum. Accedet illis tibi inscripta. Plura de rebus meis proxime. Salutat te *Rhodius* noster. *Ferrarius* cum morbo multos menses conflictatur: inelius tamen nunc habet. Vale, meum decus. Patavii. MDCLVII. v. Eid. Decembr.

Jac. Gaddius, qui scripsit Elogia, Exemplaria, Historica, & varia, quae A. 1636. 1637. & 1638. prodierunt Florentiae.

EPISTOLA CLIII.

NIC. HEINSIUS

J. Fr. Gronovio.

Daventriam.

VIr & amice summe. Si quicquam me invito evenit, id certe de Alexia de testari possum, quam subreptam tibi indignissime fero. Scripsi atroces literas ad P. *Puteanum* Romam eo nomine, ita tamen ut rei nefandae suspicionem, quantum in me, ab ejus fratribus amolirer. Nihil aliud respondit, quam ignarum se esse facti hujus. Scripsi & ad Cl. *Holstenium*, qui quo animo tam insignem injuriam, sibi non minus quam tibi factam, sit laturus non scio. Haecenus quidem nil respondit, nosti quam lentus sit. Ego interim non video, quo pacto Alexias ex istarum harpyiarum manibus evelli possit. Si me audias, perges in instituto tuo, & editioni Alexiaden parabis, ac minori forma typis committes; ne inpune ferant istam petulantiam. Non dubito, quin multa loca restitueris, multa observaris, quae *Possinum* fugerint. *Holstenii* nepos Romae est: & quantum ex P. *Puteani* literis intelligo, a vita monachali non abhorret. Sed reluctatur haecenus huic desiderio avunculus. De *Donii* morte jam intellexisti, incomparabilem profecto jacturam res literaria fecisse mihi visa est, erat enim ille Itolorum omnium doctissimus. *Intimelius* ubi terrarum sit cum ignarissimis ignoro. A mensibus quidem quatuor aut quinque nihil scripsit. Puto cum per Italiam oberrare, & vitam desultoriam agere. Ita enim in ultimis minabatur. Venetias brevi cogito. Excutiam de-muo Sti Antonii bibliothecam, si Manilius appareat. *Maripetrus*, qui eo te dedu-

deduxerat, jam a biennio diem suum obiit, violenta morte sublatus. Cum enim melancholiae obnoxius esset, nescio quam ob causam, in mare se praecipitavit, atque ita submersus est. Ab Illustriss. *Lauredano* responsum hinc habes. Est profecto tui perquam studiosus, caetera ex ejus epistola abunde cognoscēs, si quid repones, ad me mitte. In Senecis expurgandis totum te esse vehementer gaudeo. Domum reversus Tragoedias cum cura denuo percurram, & videbo, si quid conjecturarum possum corradere. Etsi hac ope nihil indiges; qui tripodem domi habes. Elegiae meae lucem tandem vident; postquam menses fere duos cum typographi socordia conflictatus sum. Haec nunc causa est, cur raptim breviterque ad te scribam. Mittenda enim sunt ad varios amicos exemplaria, & epistolae exemplaribus, ut sit, addendae. Ad parentem quoque exemplar nunc per Tabellarium mitto. Vobis caeteris amicis expectandum erit, dum navis ex his oris ad vos veniat, quam brevi discessuram opinor. Faxo tum in meliori charta versus illos accipias editos. Inscripti sunt *Cassiano a Puteo*, quo ego viro, peream, si quicquam amabilius, omnique virtutum genere cumulatus, in tota hac peregrinatione mea offendi. Quo magis miror, cum, cum Romae esses, non salutatum a te. Incredibili enim affectu flagrat rei literariae pro virili promovendae. Vret aemulos nostros, sat scio, quod ausus sim homini in urbe Romana viventi versus meos inscribere. Sed illos non moror: cum ita de me meritis sit, ac indies etiamnum mereatur, ut sine piaculo praeterire hoc non potuerim. Illustris *Veslingius*, cum *Ferrario Rhodioque* te salutatur plurimum. Vale, mi Gronovi, meum decus. Patavii. Eid. Jan. MDCCXLVIII.

EPISTOLA CLIV.

NIC. HEINSIUS

J. Fr. Gronovio.

Daventriam.

DE Alexiade quod evenit, non potuit tibi magis invito evenire, quam mihi. Scripsi aliquoties ad *Holstenium* nostrum de hac re, nec respondi quicquam obtinere potui. Quidvis tamen suspicari malui, quam ejus culpa hacc turbas excitatas. Literas tandem ab eo habui, quibus excusat diuturnam ab urbe absentiam, eamque causam ait, cur scriptione sua me non beaverit. Ut videas qua fide, quaque diligentia me gesserim in hoc negotio, quidque de ipso Holstenio existimandum tibi sit, verba epistolae subjungam. *De Alexiade*, inquit, *factum nollem, quod tibi nuncianti non credidissem, nisi me paulo post submissum a regio typographo protrepticon confirmasset. Id fidem meam nostramque amicitiam testor, me non alio animo codicem meum Lutetiam misisse, quam ut Puteanorum fratrum opera porro ad Gronovium nostrum perferretur: idque tuo me fecisse consilio haud dubie recordaris. Nunc, manu veluti praedae injecta, & mihi beneficium periisse,*

Et amicissimo homini editionis spem laudemque interceptam video: mirorque plurimum, qua fronte in protreptico Cardinalis Barberini jussu codicem submissum scripserint, quem Gronovio destinatum, injecta, ut dixi, manu interverterunt: neque enim ex Barberina, sed ex Medicaea bibliotheca describendum curavi: eique rei hominem Graecum Roma Florentiam meo sumptu perduxeram: neque vero concoquere potui, quin acriter ea de re conquereretur apud regii typographi praefectos; quod ipsorum culpa fides mea vacillet apud eum, cui studia Et obsequia mea probare impense cupio. Haec ille. Caetera epistolae pars in Elegiarum mearum libello commendando occupatur. Lambecius Romae ipsi adest, & ad cucullum aspirare videtur, quantum ex optimi Patris Puteani literis deprehendo. Obstat tamen avunculus, & sapit. De Alexiade quid tibi nunc statuendum vide. Deum testor, in mea causa nihil amplius a me fieri potuisse. Ita totus te demereri velim. Tu vero, mi Gronovi, tam raro scribis, etiam provocatus, ut, quo magis tui recordor, eo magis oblitus mei videaris: ac parum absit, quin mendacii me ipsum convincam, qui publice nuper haec de te, aut ad te potius scripserim,

Saepe salutatis tua venit epistola nobis,

Redditaque in profugas crebra tabella manus.

Cur enim, cum Amstelodami nuper esses, scripturienti Vossio nostro nihil literarum tradidisti ad me curandum? Sed omitto querelas. Intra dies octo aut decem Mediolanum me convertam, Italiae tandem vale dicturus. Vale & tu, Vir Clarissime, meque, si molesta scriptio est, silendo saltem ama. Venetiis, Anno MDCCXLVIII. xv. Kal. Mart.

EPISTOLA CLV.

J. FR. GRONOVII

Nic. Heinio.

Patavium.

PRinceps juvenum. Gratissimas tuas gratiores fecit optata manus illustrissimi Lauretani. De Alexiade τέτλαθι δὲ, κερδίη, ἢ κύντερον ἄλλο ποτ' ἔτλης. Videbimus an tinniturus sit aliquid sufferti, quem jejuni laudis captatores nobis praeverterunt. Et si quidem, bene erit: nos tamen vivemus, nos tamen pro opibus nostra munemus moenia: sin, quoniam occupavit alter, ne primus forem; ne solus sit, studebo, quod supererit. Maripetri casum doleo. Tuas vero Elegias & editas gaudeo, & sic desidero, ut nihil magis. Jamque in antecessum deleo ex animo omnes formas quotidianorum scriptorum. tuae unius venustatis expectatione, nec mihi dulce erit quicquam, donec illas gustavero. Feliciter illi navi, quae tantas delicias vehet. Tu vero nihil verere ab iis, quos invidere possis existimare viro, cujus virtutem dignissimo munere honorasti. Gratia seculo, in quo nati sumus, quo experimur indies magis illa μορμολύχεια in derisum & ludibrium abire. Caeterum quando tu ad nos? Siles enim

enim. At cave refrigescat illud desiderium, quod prae te tulisti, venerandi senis parentis tui, tamdiu desolati, recreandi & amplexum ineundi tot veterum amicorum, qui metu pro tam caro capite propemodum emoriuntur? Veni, dum adhuc superest memoria morum patriae, ne prorsus peregrinus redeas. Nos conquiescimus, nisi quod exspectamus, quam mox Senecas ordiantur Elzevirii (nam hi quoque se hîc miscuerunt) & Hackius. Interim lento gradu in Tragoediis pergimus. Et subnascuntur indies quaedam praeterea tot praeclara, quae scis suppeditare Medicaeum. Velut, si vacas, illud in Oedipo p. 32. *Inter ruinas urbis & semper novis Deplenda lacrimis funera ac populi struem, Incolumis adsto, scilicet Phoebi reus.* Versus ultimus sic concipitur in Vossiano & Mog. apud Delrium: *Incolumis ergo tu Phoebi reus.* Neque aliter videtur fuisse in pluribus Gruteri. Scribo: *Incolumis unus. Ergo tu Phaebi reus Sperare poteris sceleribus tantis dari Regnum salubre?* Alloquitur se ipsum. Hippolyto p. 85. *Luētus & lacrimae & dolor, Et limine ipso mista lamentatio, Hospitia digna prorsus inferno hospite.* Redux Theseus loquitur. Ergo, *Auspicia,* pro ominibus. Ut Troad. *Nec abominandae mortis auspiciū patet.* Agamemnone vers. 56. *Phoebum moramur, redde jam mundo diem.* Umbra Thyestis loquitur. Quanto ergo melius: *reddo.* Hoc ait discedens. Abeo, & ei locum do. Thebaide, vel potius Phoenissis vers. 49. *quid segnis trabo? Quid vivo?* Immo: *quid segnis trabo quod vivo?* hoc est, illam partem qua vivo, qua nondum recepi mortem. Nam vers. 114. *in cineres dabo Hoc quidquid in me vivit.* Sic & vexato loco vers. 181. *Hac parte mortem perage, quae coepit mori,* legendum puto. Habebam forte heri in manu Aufonii Caesares. Quid est in Vespasiano:

*Olim qui dubiam privato in tempore formam
Par aliis princeps transfudit in melius.*

Quid hoc vel laudis vel probri, *Par aliis?* Annon fuit: (*Rarum aliis*) plerique enim licentia fumus deteriores. Tum in Marco: *qui scita Platonis Fecit ad imperium.* Annon *Vexit.* Scio *vehere* antiquis saepe esse ferre, portare. Sic nondum definimus nugarum. *Mericus Casaubonus* Londini recudi fecit patris in Persium commentarium cum sua praefatione, in qua impudentiam & petulantiam *Leonis Allatii* in suum patrem egregie perstringit. Vale, & me ama, de reditu cogita. Daventriae. a. d. XII. Kal. Mart. CIOIOCLVIII.

EPISTOLA CLVI.

J. F. R. GRONOVIIUS

*Nic. Heinsio.**Mediolanum.*

Sine causa irasceris & invidiam mihi facis. Affirmo sancte, nullas me tuas Saccepisse, quibus non diligenter responderim, measque aut ad affinem tuum,

Bb 3.

aut

aut ad *Isaacum* nostrum missitarim. Si tardius curantur, ne mihi vitio veritas. Nam Amsterodami quidem quoties sum, tam iniquis excludor spatiis temporis, ut ne ad matrem quidem vacet scribere. Vix credes, sed verum est: bis aut ter accidit mihi, ut hinc profectus mecum ferrem literas, quibus constitueram illic respondere: frustra fui, & fasciculum, in quo eas composueram, ne solum quidem huc retuli. Sed & cum proxime illic essem, tuas jam huc miserat optimus *Vossius*, priusquam eum, priore transitu non visum, Haga redux compellarem. Quibus tamen, ut domi fui, moram non feci, sed & addidi alias ad Illustr. *Lauretanum*: quas nunc tibi dudum redditas spero. De *Alexiade* scripsi proxime. Amo nihilominus curam tuam, & imperavi mihi, ut crederem, quae ad te scribit popularis meus. Gaudeo te tandem serio de reditu cogitare. Deum precor, ut bene ambules, beneque tuos & nos revisas. Me nuper tertiana obsederat cum duobus satellitibus morbis, quorum alter caput, alter stomachum perpetuo, etiam per illius intervalla, vexabat. Quasi tres hebdomades cubiculo & saepius lecto me clauferunt. Nunc Dei benignitate convalui, ita tamen, ut pauca supersint priscae vestigia fraudis. Interim discessu collegae Jurisconsulti Harderwicum, Geldrorum Academiam novam vocati magisterium collegii nostri, quod Rectoris Magnifici vocant, ut scis, mihi accipiendum est perendini die oratione, vereor ne febriculosa: ita breve interfuit tempus inter aegrotationem & actionem. Etiam propemptico illum dimisi. Scis quam malus poeta sim & poene illustribus viris B. & P. addendus. Si tamen placet hic gustus, servabitur tibi exemplar.

*Nunc tua, Christeni, te quo vocat inclita virtus,
Faustum perge (nihil fata moramur) iter.
Magnaue miratus Pindi ornamenta Sicambri,
Sunt etiam ad Salam, dic, loca Pierisin:
Parva calet, sed thure frequens & odoribus ara,
Haud quamvis magnis religione minor.
Et, bene vos etiam, cohibet quos Sala relictus,
Ad tua dic laetus pocula, nosco meos.
Cumque tibi claudet latus Isendornius: unus,
Unus abest. Cur non, hei mihi, triga sumus?
Certe ego, quem posthac mihi garrula praecinet auris,
Hardebones credam mittere saepe sonum.*

Vale, decus & deliciae nostrae. Daventriae, statim ut tuas accepi. ad. d. xiv. Kal. April. Jul. CIOIOCLVIII.

I Boyo & Plantae,

EPISTOLA CLVII.
NIC. HEINSIUS

J. Fr. Gronovio.

Daventriam.

A Micorum decus. Quas ego ultimas ad te dedi, iis particulam *Holstenianae* epistolae inferueram, qua negaret ille, sua culpa sirove consensu evenisse, quod Galli Jesuitae Alexiadem tibi involassent. Si redditae sunt, est quod vehementer gaudeam. Unice enim volo, perspectam habeas curam, quam rebus tuis promovendis tantum non assiduam impendo. Tuae quidem A. D. XII. Kal. Mart. exaratae recte ad me pervenerunt, tardius tamen quam oportuit, credo, quod abfuerit domo aliquamdiu *Vossius* noster. Emendationes in Tragoediis Senecae ac *Ausonium* quid mirum optimas esse? Tuae sunt. Habeo hinc penes me fragmentum scriptum Declamationum Senecae, quod inspectum a te velim, etsi antiquum non sit. In Ambrosiana bibliotheca magnus est Ovidianorum codicum numerus. Meliores feligam, cum vulgatis editionibus conferendos. Duos Fastrorum libros jam evolvi, quorum altero vix vidi meliorem, si duos tresve excipias: ut dolendum sit, integrum non esse. Possessorem olim habuit magnum illum *Vincentium Pinellum*, cujus libri omnes ex naufragio reliqui a Cardinali *Borromaeo* redempti sunt. Inter caeteros Ovidianos libros spero & alios bonae notae non defuturos. Ante discessum, quem mense proximo ex his oris auspicabor, catalogum librorum MStorum (& sunt supra xv. milia) exhiberi mihi ab humanissimo *Ferrario*, bibliothecae ejus praefecto, curabo, diligenterque investigabo, sintne Liviani codices nonnulli, a vetustate commendandi. De Tragoediis etiam illis Senecae meminero, etsi nihil sperandum puto. Vidi enim multa exemplaria nullius pretii, quibus argumenta illa accederent, quorum *Vossius* noster te monuit. Ad *Lauredanum* tuas recte curavi. Habes hinc responsum, nec citius a me mitti potuit, quod diu satis in itinere versatus sim, dum Mantuae, Veronae, Brixiae, aliisque civitatibus perlustrandis occupor. Elegiarum mearum exemplaria brevi ad vos perventura spero. Abiit enim Venetiis jam ante mensem navis, cui sarcinas meas credidi. Italiam nisi amem ac observem, ingratis simus profecto sim: quae eo cum applausu versus illos exceperit, ut non expectationem tantum meam, sed ipsa vota, superarit. At inter aures Batavas, vix unam alteramque futuram video, quibus nugas meas probaturus sim. Adeo Midarum plena illic sunt omnia. Genevae mensibus forsan duobus moraturus sum, ut deesse scribendi occasio tibi non possit. Vale, mi Gronovi, meum decus. Mediolani A. D. III. Kal. Majas. CIOIOXLVIII.

EPI-

EPISTOLA CLVIII.

J. FR. GRONOVIIUS

Nic. Heinsio.

Mediolanum aut Genevam.

Nobilissime & maxime juvenum. Quibus *Holstenium* ex ipsius literis purgas, & recte accepi, & dudum illis reponi. Tua autem mei mearumque rerum, quae a te desiderari potest, cura adeo mihi perspecta est, ut me citius ipsi mihi, quam tibi excidere posse certum habeam. Declamationum Marci Senecae veterem librum & ego vidisse vellem. Forſan etiam videbo tempori: nam qui dudum aliis super alias miſſis literis me urgebant, ut istam telam detexerem, nunc nescio cur contantur, & ne incepterunt quidem. A *Vossio* habui in charta scriptum, sed ita depravatum, ut magis plura loca suspecta facere quam illa, quae jam suspecta sunt, juvare posset. Juvit tamen nonnihil. De Tragoediis Senecae non est quod amplius te fatiges, si argumenta illa non sunt alia, quam quae Luctatio Grammatico tribuuntur in Francisci Raphelingii editione, aut si sunt sequioris aevi. Sed in Livii primam decadem, si quid excerptorum ex aliquo meliori codice mihi comparare posses, quod tamen commodo tuo fiat, non ingratum mihi accideret. Haud scio an has accepturus sis, antequam Italia decedas. Ubicumque tamen, cum Genevae duos menses facere constitueris, vide an non velis etiam Bernam Helvetiorum invisere, ubi Bongarsiana bibliotheca superest. Etiam Fanum Gallici insignes, ut audio, habet tum publicam, sive monasterii Sangallensis est, tum privatam *Schobingerorum*, nobilis ibidem familiae: ex qua *Tobias Schobingerus* ante biennium menses aliquot domi meae egit, seque totum Graecis & Latinis literis dedit. Genevae si videris *Gothofredum*, explora quaeso, quid ejus animum a me alienarit. Nam cum humaniter me exceperit, dum illic essem, postquam regressus in has oras ad ipsum & *Morum* (noſti declamatorem, qui ut audio nunc Middelburgum vocatus est ad professionem Theologicam & conciones Gallicas habendas, mire in id laborante *Salmasio*) literas dedi, ab neutro accepi responsum; sed per *Sarravium* significavit *Morus* antiquius esse, ut *Gothofredo* satisfacerem. Ego quid peccarim, cur homini satisfacere debeam, juxta tecum scio. *Barthius* vivit, & in *Vlitium* nostrum, quem *bliteum* appellat, blitea facit epigrammata. Mihi quoque visa Diatribe iratus est. Nescio quem habet Panegyristen, quem jactat *Reinesio*, *Vlitio*, & omnibus, qui ipsum heroa & deum negant, graves dicturum contumelias. Ego his diebus relegi commentariolum de Sestertiis: multa feci meliora: plurima quae addam habeo. Vidistine *Pigafettae* de eadem materia? *Pignorius* alicubi mentionem facit tanquam editi. Sed & *Matthaei Hosti* de re nummaria grandem & copiosum, ut colligo ex illis, qui allegant, librum frustra haecenus quae-

quaero. Si in eos incideris, vel mihi vel tibi emes: tua enim usû scio mea. Vale, o carum & sanctum caput, & salvus revertere. Daventriae. postrid. Eid. Junias Gregorianas CIOIOCXLVIII.

Lauredanus hætenus abstinuit se ab eo, quod minabaris. In postremis ostendit optare se, ut Historia Cypria hîc in Belgio edatur, qualem paratam habeat, correctior. Itaque antequam illi respondeam, tentabo typographos, etsi parum me effecturum sperem. Iterum vale, Tuas ad *Smithum* mihi statim, quando hîc aderat consul Noviomagensis, affinis affinis mei, & per hoc meus.

EPISTOLA CLIX.

NIC. HEINSIUS

*J. Fr. Gronovio.**Daventriam.*

Clarissime & Amicissime Virorum. Cum feliciter post triennem in peregrinis regionibus moram ad meos sim reversus, nihil alienum a necessitudine tam arcta facere me credidi, si confecti auspicato itineris nuncius ipse ad te venirem. Brevior nunc sum, quia variis distractus negotiis, quae ingerunt se hinc inde recens advenienti. Libri, quos Venetiis huc miseram, jam pridem advenerunt, quos tamen excutere necdum licuit, eos inter Seneca Tragoedus est, ad Florentinum exemplar a me collatus. Aliam Genua arcam mihi libris itidem repletam, cui quid factum sit scire hætenus non possum. Ubi ad manus meas pervenerit, depromam inde Controversiarum Senecæ fragmentum, & Tragoediarum exemplar, etsi recentissimum, quod meum *Vintimilia* esse voluit, ac proinde etiam tuum: ab eo literas hîc habes, quas tempestivius ad te mittere non potui, quod desultorio Gallias more pervagatus sim, nec fixam ullibi sedem posuerim. Conspectu tuo beari vehementer velim, nihil tamen hîc mihi polliceor, quia hyems imminet. Amstelodamum si tibi ob negotia excurrendum, illic & me sistam. Tempus tantum certum aliud quod praescribe; nunc Vale. Brevi plura. Amstelodami. CIOIOCXLVIII. Octob.

EPISTOLA CLX.

J. F R. G R O N O V I U S

*Nic. Heinsio.**Amstelodamum.*

Ergo reversus es salvus ad salvos tuos? O laetum nuncium! Est Deus & piorum preces exaudit: cui quidem, cum tu, o sacrum & pretiosum caput,

Tom. III.

Cc

put,

put, tam longinqua peregrinatione feliciter confecta, tot periculis defunctus, tot thesauris literariis potitus, nominis ac virtutum tuarum monumentis passim fixis ac relictis immortalibus, ad lares patrios redux es incolumis, laudes grateque toto pectore ago, & hoc deliciis nostris, Musis dico & Gratiis, bene evenire cupio. Unum mihi nunc ad summam felicitatem deest, quod ad exoptatissimum amplexum tuum occurrere etiamnum prohibeor. Jam quidem dudum res privata me in Hollandiam vocat, sed moratur materfamilias, quae jam quatuor & ultra hebdomades minatur quotidie se puerperam futuram, & cum maxime gravibus doloribus, non sine cruciatu animi mei, futura gaudia (quae praesumo spe & votis & eventu priorum, tribus enim ante foetibus minimo labore defuncta est) expiat. Non potest res diu pendere, atque ideo ante initam hiemem confido vel Amstelodami apud affinem, vel Lugduni apud parentem mihi copiam fore salutandi tui. De collatione Florentini exemplaris in tempore mones. Adorno enim jam notas meas rogatu Hackii vestratis, & aliquantulum processi: nec dubito in festinatione illa me multa praeteriisse, quae curiosos oculos tuos & diligentem manum fallere non potuerunt. Itaque nihil est mihi longius, quam dum codicem tuum nanciscar. Ubi venero, videbis specimen, quod incepi, & in antecessum relinquam Hackio. Alterum ut juvabit videre, ita tenue subsidium est post illud, quo nihil majus meliusve in eo genere. Sed controversiarum qualiscunque liber utilis erit, cum optimis destituamur. *Pareus* obiit. Scripsit mihi legatum, in quo sunt *Metamorphosis* & *Epistolae Heroidum* in membranis. Cum mercibus *Francofurtensibus* eas exspecto: & tu quoque exspectabis, si tanti judicas. Vale, vale, decus nostrum, & collationem Florentinam, quam primum fieri potest, ad me mitte. Saluto vestros quam officiosissime & reverentissime. Daventriae III. Eid. Octobr. Jul. CIOIOCLVIII. *Loredanus* bis scripsit se mittere ad me suorum Academicorum vitas, jussitque, si forte prius, quod perditum rebatur, exemplar reciperem, id amico darem: sed de neutro quicquam aliud inaudivi. Iterum vale.

EPISTOLA CLXI.

NIC. HEINSIUS

J. Fr. Gronovio.

Daventriam.

AMice comiterque mecum agis, Vir Clarissime, sic ut nihil supra, qui tam luculente testeris gaudium super felici ad meos reditu. Non finit me profecto hoc epistolium dubitare de tuo erga me affectu, nec temporis tam longi spatiis, nec interstitiis locorum remotissimorum concusso. Audeo igitur denuo meis vestigiis insistere, & aditum affectare ad amicitiam tuam, qua nihil pretiosius inter *κέρηλια* mea recensere possum. Praesentem te comple-

cti

eti vehementer aveo. Veni ergo, veni: ne diutius tam chari capitis aspectu fraudemur. Senecae Florentini excerpta te hîc expectant. Ea jam misissem, nisi deprehenderem multas conjecturas nugatorias codicis illius margini a me adscriptas, dum festino. Velim igitur curis secundis auctorem illum percurrere, antequam ad te veniat, & mutare, si quae praeter rem a me annotata sunt. Hoc ut facerem, propter domesticas occupationes a me impedire haecenus non potui. Italiam meam ad te venisse Sororius affirmat. Novam fortassis editionem dabo, emendatiorem longe ac auctiorem. Dum enim ipse Venetiis vivo, & amicis operas typographicas corrigendas permitto, multa irrepsisse video, quae non commissâ magno velim. Habeo & cur expostulem tecum, qui me non monueris de errore in Elegia ad *Fabricium* commissâ, ubi secunda in *Saluberrima* producenda fuit. Dubitabam ipse, dum hoc scriberem. Sed errorem negabat *Rhodius* noster. Cui ut accederem, tua auctoritate factum. Ita enim mecum argutabar, monituum te fuisse, si quae displicerent, qui Elegiam illam vidisses. Alibi quoque vox *Strepera* occurrit, quam Latinam vix puto. Sed hoc inter errores typographicos deprehendes oportune. Nescio etiam an Latinum satis sit in Elegia tibi inscripta, *detexere colum. Tela detexitur*. De colo non constat. Emendavi igitur, ¹ *Hanc precor absolvat Parca benigna colum*. Sed talia multa sunt, de quibus ut nunc agam non permittit *Vossius* noster itineri accinctus. Illi enim has committo. Ovidios *Parei* avide expecto: sed te magis. Scribe ergo, quando expectandus sis. Academicorum incognitorum vitae penes me sunt, quas *Lauredani* nomine tibi tradam. Adventum in has oras tuum vel eo magis necessarium puto, quod Eloquentiae professio in aliquem brevi sit conferenda. Ego te aliis praelatum velim. ² O' *deivz* tamen nescio quos tenebriones commendat, cujus gratiâ, quantum audio, excidisti. Sed de his coram. Vale, meum decus. Lugd. Bat. CXCIXLXVIII. Nonis Novembr.

¹ In ultima editione correxit, *Hanc modo continuet P. b. c.* meliori, ut puto, omine.

² *Salmasius*.

EPISTOLA CLXII.

J. F R. G R O N O V I U S

*Nic. Heinsio.**Leidam.*

Nobilissime & Clarissime Heinsi. Quantopere salvo ac reduce te gaudeam, non ex verbis meis, quae animum aequare nunquam poterunt, tam cognoris, quam ex perpetuo tenore amicitiae nostrae judicabis. De qua nihil jam in posterum vereor: ita enim & tuos mihi perdidicisse mores videor, & meos teneo facioque, ut ab invidentia & suspicionibus, sed & aemulatione, quae, utcumque bonâ, facillime in pravum detorquetur, praecipuis ne-

cessitudinum pestibus ambos esse nos alienos existimem. Officia autem summa quidem, sed ea tamen aequitate, alter ab altero expectamus, ut si quod datur majus & antiquius, id alterum in alterius gratiam migrare neuter velimus. Quae & ipsa res dum non cogitatur, dum solis nobis obnoxios nostros volumus, atque immoderata & poscimus & speramus, multas amicitias dilui atque interire deprehendi. Cesso adjungere alia, quae homo naturaliter ad amandum, concedendum atque indulgendum factus, minimeque longinqui odii aut plumbearum irarum, ea etiam fortuna ingruente, ut gratiis hominum indigerem, saepe apud me collegi, ut proposita animo vitarem, nec mea culpa aut studiosis mei carerem, aut quos paraveram, effunderem ac perderem. Possum igitur aliquid constantius aliis rebus humanis in amicitia nostra mihi promittere, nec te facere minus multis experimentis demonstrasti. Ego, quo nunc propius est ut videamus, eo magis ad te aspiro, totusque promineo, nec gratum est quidquam auribus, dum locare se tibi gestiunt totum diem, atque utinam annum, nobile illud tuum triennium narranti. Uxor postrid. Eid. Octobr. Jul. quarto foetu, altero virili me beavit, sed post gravissimos atque etiam insolitos labores infirma est & viribus fractis, neque officio adsidendi & hortandi deesse possum: omnia tamen ad salutem signa sunt, & proxima hebdomade spero mihi com meatum fore. De Florentini Senecae exemplari, ut constituisti, etsi vereri non debebas, ne, si quid conjecturarum tuarum non probarem, id nihilominus publicarem, atque ad illud disputarem. Afferam mecum pertextas meas notas usque ad Herculem Oetaeum, ut eas videas agnoscasque, nihil me cupere tibi subripere eorum, quae forte ipse praeterii. Vereor autem, ne, cum omnia feci, typographus antiquum obtineat, & quod jam non semel accidit mihi, in vanum laborasse jubeat. Nam quid de illo speres, qui cum ultro me ad hanc operam invitarit, paullo post scriptis literis roga-verit, a criticis abstinere, explicationibus potius obscurorum locorum immorarer, hoc est isto novo more centones farcirem, quod a me nec peti debebat, nec expectari. Sustineo tamen & tentabo, an sanius sentientem facere possim. Italiam illam tuam, ipsa Italia elegantior, bis accepi, ab amplissimo affine tuo, & a *Kinschotio* nostro, & utrique respondi. In qua si tot luminibus perstrictus, obstupefactus, occoecatus unum naevulum non deprehendi, non est quod mihi irascere. Jam dudum eo me redelegisti, ut ad legenda tua magis ex intelligentia voluptatem capturus & profectum accedam, quam iudicio accingar. Et quid emendatorem desideres, qui sic ipse tua emendare noris? Si *ὁ δ᾽ εἰναι* factus est a me alienior, & suos habet candidatos, scito nulla id mea culpa accidisse, ne me negligentior in colendis amicis, quam dudum putes. Quod autem tu optas, agnosco benignum animum tuum, & narro tibi simpliciter, si videro mei rationem haberi, possum induci, ut fatear fautoribus meis, gratum ipsis fore, & me ingentis beneficii numero habiturum. Ut ambiam contra competitores, hoc vero est, quod ab amico tuo non impetrabitur, ut eum magis ames. Nunquam feci, vel longe incertior rerum mearum, & cum in diem viverem propemodum, & quot nuntios accipe-

rem

rem domo, totidem plagas, totidem patrimonii ruinas. Ne tu id nunc me facturum putes, postquam statum nactus sum, quem Dei virtute & mea diligentia ac frugalitate satis tuebor: ad haec homo modestissimorum votorum, & jamdudum ita composito animo, ut cujuscumque a fortuna adsignati loci tolerantissimus essem. Is nunc scilicet, postquam deferbuit illa eminendi & aemulandi omnis libido, prensare, hoc est, ineptus esse, idque in oculis tuis sustineam? Non ita degeneres sumus, ὦ θαυμάσιε, & opes vanaque nomina contemnere didicimus. Quod si ille, quem designas, serio agit, quod eum dicis agere, tum vero me actum non agere melius erit: nunquam enim tam vehementer pro me ipso nitar, quam pro aliis ille solet. Sed haec differamus in congressum nostrum. MS! Ovidii in itinere sunt, & jam, ut audio, Colonia Agrippina decessere. Itaque cis paucos dies, spero, praesto erunt. Vale, Carissimum caput, & saluta vestros. Daventriae III. Non. Novembr. Jul. CIOIOCXLVIII. Cupio videre Senecam tibi ab *Intemelio* datum, ne solus mihi omnibus literis mentionem mei factam imputes: Volo quamcumque tantopere desideranti vicem reddere.

EPISTOLA CLXIII.

J. F. R. GRONOVIIUS

*Nic. Heinsio:**Leidam.*

Nobilissime & Clarissime Heinsi. Video te hoc habere cum Bruto commune, ut quod cupis, cupias vehementer: simul autem video cupere te, ut me quotidianum congerronem habere possis. Quod quidem ut ego quoque exopto, ita nunc flagrantius desidero, quia tu vis, quam quia illum locum hoc mihi honestiorem & fructuosiores judico. Itaque quae & Dordraci & domi in meam gratiam egisti, scito mihi esse gratissima, & quicumque fuerit eventus, ea me in memoria habiturum. Ne me accusares, quasi deessem tibi, in reditu praestiti, quod tibi promiseram: locutus sum Harlemi & Amsterodami cum duobus quondam discipulis meis, ut materterarum maritis rem commendarent: quod quidem uterque summo studio se facturos receperunt. Quem scribis accusasse te, ego vero non dubito, quin honorifice de me loquatur, praesertim absente, & maribus terrisque diviso: sed haud scio an me vicinum velit, ignoratione meorum morum, & metu aemulationis. Hunc igitur vide, ut illi eximas, & quantam jubeat, fidem des illi, eo me ingenio non esse, quo fortasse suspicatur, neque ullum inventum iri, qui magis in ejus sit futurus potestate. Quamcumque illi fidem dederis, ego praestabo, aut tuam, quam scis vitam contra mihi caram esse, amicitiam perdam. Sed etiam, si sperat adhuc se impetraturum, ut utramque provinciam conjungat, ne joco quidem vel ipse te meo nomine prensare velim. Ad *Pilium* jussu tuo scripsi,

Cc 3

&

& mitto aliquid scholasticarum nugarum, & quia certiore viam ignoro, tibi curandum committo. In Seneca sum sane, & satis saepe mihi occurreris. Faciam ut agnoscant omnes te a me coli, etiamsi non inepti simus. Declamationum codicem utinam brevi nanciscerere! certe ubi nactus fueris, noli quaeso me morari, si forte in isto Augiae stabulo nonnihil nos iuvaret. Vale, decus & praesidium meum, & me ama. Citius scripsissem, sed segniorem me facit tum frigus, tum dolor dextri humeri, quem, postquam huc redii, demum sensi graviolem; & ne nunc quidem omnem sentire desii. Iterum vale. Daventriae Prid. Idus Decemb. CIOIOCLVIII.

EPISTOLA CLXIV.

NIC. HEINSIUS

J. Fr. Gronovio.

Daventriam.

T Andem de rebus tuis datum nonnihil intelligere, Virorum Amicissime. Ad *Pylium* quae volebas mitti, mittam brevi. Haecenus enim nautarum opera non licet uti, ob fluvios gelu passim concretos hac hyberna tempestate. Scribam denuo ad *Blyenburgium*, ut hominem officii admoneat, tuique apud avunculum suum rationem ut habeat. Hagam proxime excurram, ut *Graswinckelium* caeterosque, quos illic habes, amicos impellam ad negotium hoc, quantum in ipsis, promovendum. Si quid praeterea a nobis fieri velis impetra. Parens meus sua commendatione nobis aderit: ea de re certus esto. Tu interim hoc age, ut *Bouckhorstio* de meliori nota commenderis. Multum ille hic potest. Nihil restat, nisi ut velit. Ut autem velit, pet cognatos instigandus est. Puto hasce reddendas tibi a *Vossio* nostro fore. Convenimus nuper simul *Boxhornium*. Tui mentionem ita illic fecit *Vossius*, ut qui addictissimum tibi se profiteretur. Promittit heros noster affectum erga te luculentum. Ego satisfactum tibi fore arbitror, ut nuper scripsi, si nihil contra te moliatur. *Spanhemium* pro *Hornio* stare affirmat. Sed cum illi proximum adesset, tibi non minus favere videbatur. Reliqua ex *Vossio* intelliges: cui & *Curtium* ad te ferendum tradidi, si fortassis notarum aliquid *Blanckianae* editioni adjectum velles. Sed festinandum: cum librum ille, Curatoribus Academiae nostrae inscribendum, ante Nonas Februarias proditurum affirmet. Rogo ut codicem hunc, & si quos praeterea utendos a me accepisti, occasione commoda remittas. Volo enim bibliothecam in ordinem accuratum redigere, cum vere proximo in Flandriam profecturus sim. De libris, quos ex Liguria expecto, nihil haecenus intelligo; nisi quod adfuturos brevi auguror. Quod si fit, Senecam utrumque tibi sistam, ut promisi. Nunc quod addam non habeo. *Sarravianae* litterae, quas hic turbas dederint vix credas. Earum auctoritate permotus *Salmasius*, mendacii reum apud multos me fecit. Ego vero cum quidvis

vis ferre malim, quam hanc ignominiam, litteras querelarum plenas ad *Sarravium* scripsi, ad quas responsum quotidie expecto. *Salmasio* autem *Holstenianae* ad *Lambecium* epistolae apographum misi, in quo mentiri jubeatur, rogavique, ut de hoc crimine primum se purgaret, deinde alios accusaret se longe honestiores. Excandescet, sat scio: sed ego ad hunc ignem jam frigeo. De *Sarravio* tamen aegerrime fero. Sed & tu fidem Gallicam expertus es. Vale. Lugd. Bat. ciɔiɔcxlviij. a. d. iv. Kal. Jan.

EPISTOLA CLXV.

NIC. HEINSIUS

J. Fr. Gronovio.

Daventriam.

DE rebus tuis nihil à mense alteroque jam intelligo. Per *Vossium*, ni fallor, scripsi proxime: Hagae fui postea, negotiumque tuum *Heylderfichio*, *Grafwinckelio*, caeteris amicis, commendavi. *Kinschotius* praecipue ac *Petrus*, *Hugonis* puer, *Grotius* tibi favent, & me absente rem urgebunt. *Rufius* putabat *Bouckhorstium* *Jannigio* studere, in *Salmasii* gratiam. Etiam atque etiam igitur vide, ut spes tuas apud illum in tuto loces. Dordraci quoque, quantum potui, causam tuam egi. *Blyenburgio* aurem denuo velli, ut omnia apud avunculum tentaret, cum Hagae mihi nuper occurreret. Spero facturum. *Baersdorpium* conveni semel hoc nomine. Sed alii tum aderant, ut cum illo libere agere non potuerim. Revertar eo brevi. Interim *Goesium* nostrum rogavi, ut cum eo ageret. Et jam egit. Parens meus pedibus laborat multo tempore. Inde fit, ut Hagam non possit excurrere. Operam tamen dabo, ut Curatores, qui post octiduum venturi sunt, hîc conveniat. Jam enim convalescit. Elzevirius me monuit operas typographicas ad N. litteram jam pervenisse in Senecae primo tomo. Necessè igitur esse, ut reliqua mittas, aut operis cessandum fore: cum duo jam se exercent in editione illa. Ejus nomine nunc ad te scribo. Tu hoc age, ne illis hîc desis. De sarcinis Genuensibus ne γρῶ quidem haëtenus. Miror insignem oscitantiam mercatoris. A *Vlittio* hîc habes, quae aliquamdiu penes me haëserunt, quod *Vossio* absente neminem Amstelodami haberem, ad quem mitti possent: cum *Goesius* noster toto fere mense jam nobis adsit. De carminibus in *Boyum* ac *Plantam* scriptis vide ne arcanum tibi creditum cuiquam retegas. Volo enim omnino ignorari me auctorem: nec quisquam rei conscius est praeter te, *Kinschotium*, *Valliumque*, qui & suas operas contulerunt. Puto libellum brevi edendum fore. Vale. Lugd. Bat. pridie Kal. Febr. A. ciɔiɔcxlxi. Raptim.

EPI-

EPISTOLA CLXVI.

J. FR. GRONOVII

Nic. Heinſio.

Leidam.

TU quidem omnibus vere amici juſtis cumulatiſſime perfunctus es: reliqua, quae caſus feret, feremus. Etſi, ſi dies recte puto, jam oportet factum eſſe, quod vel ſperari vel metui poteſt. Niſi forte iſtis quoque rebus indixerint juſtitium ferales illi ex Caſſiteride nuntii. Heu conſolationem abominandam! ſed tamen, quicquid de nobis conſtituat fortuna, non poteſt eſſe tam inopinatum, quam illa ſecuris. Secundum Senecae tomum petent Elzevirii ab Hackio, a quo & primum acceperunt. Illi utrumque olim dedi, cum ipſe & Lud. Elzevirius operis ejus conſilium cepiſſent. Tertius quoque jam paratus eſt. Sarcinas tuas & tua ipſius cauſſa in portum pervenire velim, & citius mea, ut Aproſiani Senecae meminiſſe poſſim. A *Vlitio* poſt annuam intercapedinem tandem vidiffe aliquid gavifus ſum, & en, quod ei remittes. De carminibus elegantiffimis tuis in *Pedem* & *Compedem* apud neminem verbum feci, praeterquam *Schelium* noſtrum, cujus conſcientiam, credo, non reſugis, quod nec faciunt facetiſſimi illi tui ſocienni. Fuit hinc nuper dies aliquot, quos geniales una egimus, non ſine honeſta ſuaviſſimaeque tui memoria. *Voffius*, ex quo hinc diſceſſit, etſi valde rogatus, ut, priuſquam Monasterio abiret, certioſiorem me faceret, ne verbum quidem ad nos. Et, quo magis doleo, tradideram illi exemplum praefationis, ad quam ſcribendam ſcis mihi legatos auctores fuiſſe. Rogaveram magnopere, ut quid viſum illis fuiſſet, clanculum & ſincere me edoceret. Rumor fert nescio quid in illa quoque aula turbari, utinam falſus! Vale, nobiliſſime & chariſſime Heinſi, & me ama. Magis gaudeo te velle, quod agitatum quocunque eventu fuit, quam qui poſſunt effectum reddere. Iterum vale, & veſtros ſaluta. Idibus Februar. Jul. CIOIOCXLIX.

1 *Plantam*, a planta pedis, & *Boyum*, a vinculis, quae *Bojae* dictae, & noſtratibus *Boejen*. Vide Cangii Lexicon, & Altaſer, ad Anaſtaſii Theodorum pag. 64. & nuper Eccard. ad Leges Salicas pag. 175. hi vero *Planta* & *Boyus* in *Saturnalibus*, quae Heinſius, Kiſſchotius & Wallius, collatis operis ediderunt, miſere vapulant. inſerta ſunt ex illis, Poëmatibus Heinſii, quae illum auctorem habebant.

EPISTOLA CLXVII.

NIC. HEINSIUS

J. Fr. Gronovio.

Daventriam.

Partim ab urbe absens, partim etiam distractus occupationibus domesticis litterarium per tempus aliquod officium in me desiderari passus sum, vir amicissime. Accedebat huc, de rebus tuis quod adderem vix fuisse. Curatores enim negotio infecto, quantum audio, discesserunt. Id quod profuturum tibi existimo. Tempore enim ac mora fervor ille adversariorum & primus impetus deferbeat necesse est. Metus erat, ne dum toti sumus in amicis tibi conciliandis, imparatos adhuc quodammodo, nec munitos satis praeceps Curatorum opprimeret consilium. Tibi vero ea in virtutibus tuis fiducia debet esse, ut dubitare non possis, quin qui multos rebis tuis promovendis, jam addictos expertus es, plures proxime sis experturus. Quicquid candidati cacteri a Curatorum benevolentia ac favore polliceri sibi possint, tu tuis meritis appone; cum nullus ex competitoribus sit, qui vel umbram lucis tuae ac famae queat sustinere. *Thysios*, *Blanckardos*, *Janigios* ne time. Inter illos tui ratio habita est, qui cum causâ excident, satis gloriae se consecutos existimabunt, quod tecum commissi fuerint. De professione interim in quenquam conferenda nihil decretum. Consuli Dordraceno parens meus litteris te commendavit, idem & ego praefens feci, & rogatu meo *Blyenburgius*, ut nuperrime ad me scripsit. *Pylius* quoque partibus suis non defuit, *Kinschotianis* instigatus epistolis. *Heylderfichius* quid egerit non scio: multa certe liberaliter promisit. Salutaturus eum proxime, & in negotium tuum inquisiturus, hoc responsum a famulo tuli, herum conveniri non posse, quod in luctu esset ob ereptum sibi filium. *Wimmenomius* multum hîc potest, sed metuo ne a *Salmasio* delinitus sit. *Grafwinckelium*, aliosque splendidissimis tamen promissis lactare non desinit, quam ille liberalitatem haereditariam habet. *Kinschotius* apud propinquos suos caeterosque amicos magna cura ac fide causam tuam egit. Et haec quidem de rebus tuis. Elzevirii in Seneca diligenter pergunt. Tomum itaque tertium ut brevi mittas necesse est. Horrendus ille magni regis casus mirum quam consternarit omnium hîc animos. Mitto tibi hîc versus¹ meos & *Boxhornianos*. Auctores ut dissimulentur rogo. Distichis praeterea aliquot mortem regiam celebravit amicus ille noster, quae tanti ipse facit, ut *Scrivério* praesente affirmarit nuper, cum *Catonianis* eas se non permutaturum. E caelo quartus cecidit Cato. Sed non vacat jam jocari. De sarcinis *Genuensibus* nihil haecenus. Mira mercatoris illius est supinitas. Nec averfor tamen hanc moram,

modo

¹ Leguntur lib. III. Sylvarum pag. 192. Boxhornianos non reperi.
Tom. III.

modo ad me perveniant. Ad *Vlitium* curabo cras aut perendie. *Boxii* negligentia fit, ut tergo poetarum Theologi ac Jurisconsulti consultum haecenus sit. Trahit enim libelli editionem, cum totus sit in Epicediis ac libellis, res Anglicanas spectantibus. Nobilissimo *Schelio*, quaeso, me commendes. *Kinschotius*, *Rufius*, *Grotius*, cacteri amici, quoties convenimus, saluti ejus litamus non uno poculo. De *Vossio* miror & indignor. Libris aliquot insignibus me emunxit discessurus. Interpretem Aristotelis Graccum a me habuit, quem unum inter omnes desiderabat; habuit Aëtii opera; Graccum codicem manuſc. de portibus maris, aliosque libellos, ea conditione, ut mihi nonnullos ex suis, quos ultro offerebat, refunderet. Sed nihil horum ille: ne scribit quidem. Caninii grammaticam sibi petebat: & abstulit, tradidisse tamen non puto. Curtium cum Florentino codice collatum si tradidit, bene habet, nolim enim illum perire. Notas in Claudianum meas brevi describam, & editioni parabo, de editione tamen ipsa consilium adhuc incertum, velim tuae censurae eas committi, antequam juris fiant publici. In locis tribus quatuorve, qui in mentem nunc veniunt, expedias me rogo. *Ancipites habeant arces* recte contra Barthium olim defendisti. Sed cur *ancipites* vocat? An quia ne arces quidem tyrannorum fortunam in tuto locant? Haereo. lib. 1. in Eutrop. vers. 331. *Nascitur ad fructum mulier*. Non videtur Latinum satis esse. Forſan foetum scripserit Claudianus, & τὸ *fructum* ex Glossa irrepperit. Conf. Olybrii. vers. 50. Cur *Sollicitis collibus*? an quia auri fossiores pallent? longe quaesitum hoc videtur. Conf. Manlii 324. quid sibi volunt *Spargentes flammæ*? an pro *Sparsae*? Durum est. Exemplaria si in promptu habes, suggerere. Consul. iv. Honor. 636. 637. pro duobus illis versibus primae editiones & scripti omnes habent,

Ister sanguineos egit te consule montes.

Quaero haecenus cujus liberalitati duos debeamus. Alterum e textu ejicias, si tibi sic videtur. τὸ *Alpinos montes* quam frigidum! Cur enim *Alpinas rupes* non dixit, cum posset? *Sanguinei montes*, ut *praeruptus aquae mons* apud Virgilium. Et intelligit *cumulos stragum*: sic lib. 11. in Eutrop. *cumulis immanibus aggerat undas*. Haec nunc. Plura brevi. Vale, meum decus. Lugd. Bat. iv. Eid. Mart. CXCIX. Raptim. Apud Lucanum lib. 11. 120.

Vix te sparsum per viscera Baebi

Innumeras inter carpentis membra coronae

Discessisse manus.

sic legit vir magnus, at scripti, quos vidi, omnes, *Discerpsisse*? sine sensu. Videtur scriptum primo, *Dispersisse*, idque pro *Disperiisse*. Claudian. lib. 11. in Rufin. vers. 517.

---- *Consumpto funere vix tum*

Deferitur, sparsumque perit per tela cadaver.

Juvenal.

Obtritum vulgi perit omne cadaver.

In

Intelligit, credo, *Bojum* & *Plantam*, in quos Saturnalia edebantur cum maxime.

In Claudiani tamen loco pro *vix tum*, Legebam, *vixdum*. Sed tres antiquissimi scripti *viator*, quod non est de nihilo. Victorem Rufinum facit; quod consumpto ejus corpore furor plebis necdum fatiatus esset. Lucani locus huic lectioni obstare videtur. Scribe quid sentias. Sed quid hoc, *Sparsum per viscera?* an *per vulnera?*

EPISTOLA CLXVIII.

J. F. R. GRONOVIIUS

Nic. Heinsio.

Leidam.

Sic Vespasianum triumphi die fatigatum tarditate & taedio pompae dixisse, Smerito se plecti, qui triumphum, quasi aut debitum majoribus suis, aut speratum unquam sibi tam inepte senex concupisset. Ego in nupera expectatione literarum tuarum, idem, quatenus res mea patitur, & passus & factus fuisssem, si unquam avide illi spei indulgissem. Nunc me facile & continui, & contineo: vestris autem officiis, coque quod vobis est spei reliquum, lactor: quae si in irritum ceciderint, feremus fortiter. Monasterio literas & exemplum praefationis recepi. Placuit legatis, & scribunt, jubere Regiam, ut opus perficiatur, videndique ejus desiderio teneri. Spero intra quatuordecim dies me tibi adfore, tertiumque tomum, qui pridem paratus jacet, una cum praefatione in manus tibi traditurum. Carmine Latino, quod misisti, magnopere sum delectatus, ejus omnia nitida & praeclara, nisi quod scio auctorem posthac vitaturum vocem *subditorum*, non enim haec ea significatione, ut nunc in ore vulgo est, veteribus accepta legitur. In altero quid mirer, non video, in quo nihil praeter sonum secutus est auctor. Homo fastidiosus & impatiens illud ablegaret ad ultimum vocabulum suum. Credo horribilem illum ex Insula nuntium etiam praecipitasse annos optimi & maximi senis, quem magno literarum luctu scis nuper occidisse. Heu quam pauci nunc restant ex uberrimo illo eruditorum proventu, quo sub *Lipso* & *Scaligero* floruit Belgium. Quam nulli subnascuntur? Itaque tu & ego mox velut in solitudine erimus. *Isaacus* sane narravit mihi penes te duo exemplaria Caninii esse, seque rogavisse, ut alterum mecum communicares: se abstulisse, ut traderet, id enimvero dissimulavit. Curtium tradidit, & si fieri potest, cum venero, mecum tibi reportabo. Plane nova editione opus est. Non quod in Modiana non fere omnia jam recepta sint, sed quia ille audacula quaedam de suo intermiscuit, etiam quae ex vett. libris ipse mutavit, postea in sequentibus spreta sunt. *Ancipites arces* puto, quae obtinentibus tantum dant timoris, quantum fiducia. *Ad foetum* sane placet magis, quam *ad fructum*: & hominem in fructu esse, licet paullo alio sensu, noluerunt JC. nostri. *Spargentes* pro *Sparfas* non memini legisse. An scripsit Claudianus, *parcentes*? nam & *impune vagus ignis*, & *fida incendia* mox. Vide. Bene, *sanguineos montes*. Nec repugno

I Vossii Patris,

τῷ disperuisse in Lucano. *Sparsum per viscera suspectum esse non debet, est enim divisum.* Senecae, Plinius, & ejus aetatis saepe sic usurpant de solidis & cohaerentibus, cum proprie ad liquida & non uno spiritu cohaerentia pertinent. Vale, Divine Heinsi, decus nostrum, & me ama. Daventriae Idib. Mart. Jul. cicidcxlxi. Haud scio an quid eorum, quae ad Claudianum molitus sum, probes: ob unum certe ne vapulem, ipse deprecor. Locus de Eutropii domino. Distinguendum enim est: *Candida pollutos comitatur curia fasces, Forsitan & dominus. Praebet miracula lictor &c.* Vet. domini, nempe comitantur. Hoc & ego dudum in libello Observ. correxeram, & vidi postea anticipasse *Valesium* ad Ammianum. Itaque, si cui vis, huic inscribas licet, de me taceas. Iterum vale. Sed & frustra gloriatus sum in illo, *Quae levat: Habet enim Delrius.*

EPISTOLA CLXIX.

J. FR. GRONOVII S.

Nic. Heinsio.

Leidam.

Nobilissime & Clarissime Heinsi. Nuper ita me morata est Haga, ut quod in suavissima consuetudine tua ponerem, nullum mihi vacuum tempus superesset. Sic & Amsterodamum & Geldricam Academiam, nemine salutato, soli *Schelio* meo affixus, transii. Quod & contra destinationem fuit meam, & plerosque amicorum non parum offendit. Sed illi quidem, cognita causa, facile placabuntur. Nunc scire aveo, quam persistant Elzevirii in consilio duobus utendi praelis, & tertium quantumque tomum operis nostri uno tempore subjiciendi; legerisne & exegeris praefationem ad Principem, apud quam impune non licebit mihi esse negligenti: num quae, sive in illa, sive in Notis, mutanda censeas. Pro simplicitate illa, qua inter nos agere solemus, nihil sensuum tuorum in his rebus me debes habere celatum. Schedas Ovidianas *Boecleri* vix tandem inveni, & hîc habes. Mirifice diripior in hoc lectionum exordio: tamen in exscribendo Curtio tuo quotidie lineam duco: ubi absolvero, una cum Caesare ad te redibit. Parvulas res satis multas quamvis in hac festinatione adverto, inter quas illud nuper lib. v. c. x. prope finem: *Nabarzanes cum Bactrianis militibus in vestibulo praetorii aderat, titulum solennis officii occulto scelere praeferens.* Scriptus, ut & Bongarsianus Danielisque, praeferentes. Nempe scribendum praeterea, *aderant.* Et usus est hoc genere loquendi, quo Livius lib. xxi. ex nostra restitutione: *Dux cum principibus capiuntur.* Et Naso tuus v. Fastor: *Consul cum consule ludos Postumio Laenas persolvere mihi.* Scriptos Senecas e Liguribus si nactus, noli quaeso me morari. Vale, meum decus, & existimationem meam in Annaeano opere tibi commendatam habe. Daventriae vii. Kal. Majas Jul. cicidcxlxi.

EPI-

N I C. H E I N S I U S

J. Fr. Gronovio.

Q Uam iusta Dei Opt. Max. judicia sunt! *Doriflaus*, ludi litterarii olim in hac urbe magister, qui fracta re deinde in Angliam concesserat, atque illic prospera fortuna usus, caussisque dicundis ac litibus exercitatus, mox inter iudices Regi morituro datos electus, & ut nonnulli volunt, carnificis munere defunctus (Regem enim manu ejus obtruncatum sunt qui ferant) Legatione tandem publica functurus ad Ordines reipublicae nostrae Hagam proximis diebus advenit. Non tulerunt Angli praesentiam tam invis capitis, quorum sex nudius tertius in hospitium publicum, in quo diverterat, irruerunt, caenantemque plurimis vulneribus confoderunt personati. Haec in transcurso. Elzevirii in Senecis tuis lente pergunt. Tomus secundus ubi absolutus erit, tertium simul ac quartum edituros se promittunt: nec deerunt illis adhortationes meae. Dedicatio operis elegans est omnino, & te digna, gratissimamque Reginae fore confido. *Boecleri* schedas ad *Metamorphosin* pertinere video, nec magnae rei esse. Ad epistolas spectare ipse persuaerat. Observatio tua ad Curtium valde mihi probatur. Utinam plura hujus generis codex tibi meus suggerat. Saturnalia tandem hîc vides. Si tanti tibi videbuntur, ad *Schelium* mitti possint. Aliud exemplar tibi apud me paratum erit: nam nunc non nisi unicum hoc ad manus est. Brevi plura: haec enim amico praesente exarabam, pede stans in uno. Vale. Lugd. Bat. ciciocxlix. Idib. Majis.

N I C. H E I N S I U S.

J. Fr. Gronovio.

Nescio quo modo evenit, ut cum nuper ad te scriberem, de morbo *Spanheimii* nostri nihil addiderim, qui lethalis demum illi fuit. Causa morbi non longe quaerenda. Nosti similtates viro pacis amantissimo non unas exercendas fuisse, nosti ultimas cum *Alastore*, quas multo minus, quam caeteras, concoxisse videtur. Gaudet ista bellua & laetatur in tacito sinu, bonis omnibus plorantibus, sed illum dirae suae aliquando manent. Ego quidem casum Academiae nostrae & calamitatem ex animo miseror. Nam ne quidem sperandum

D d 3

rear,

x. Ita *Salmasium* temper Heinsius, in epistolis & carminibus vocare solet.

reor, ut parem *Spanhemio* Theologum Curatores sint inventuri, est enim plerumque id genus hominum factiosi admodum seditiosique ingenii: nihil nostro illo pacatius, ut brutis, plane ac belluinis moribus fuisse oporteat, quibus cum illo non convenerit. Utinam de *Boucharto* invitando cogitetur. Sed hîc quoque turbabit *Alastor*, adeo ille nihil jam ferre potest, quod famam aut eruditionem prae se ferat. Viderint Curatores. A *Vossio* nostro litteras tandem habui Kalendis Majis Stockholmii scriptas, id jubente serenissima, ut ait ipse, Regina, quae versus meos, Parisiis ac Patavii editos, videre velit, ut quae poësin unice in deliciis habeat. Caeterum quia tam inexpectata magnae illius principis curiositas votorum meorum modestiam longe excedit, & quia amici nostri ingenium uterque novimus, dubitavi aliquamdiu, an quamvis prolixè serioque id adfirmanti assensum praebiturus essem. Manum tandem dedi, idque eo magis, quod ejus periculo, non meo, rem agi viderem. Audiamus ipsum, praefatus pauca de morte patris sui, ita tandem de rebus meis ille; *Redeo igitur ad veterem scribendi consuetudinem, idque non tantum sponte mea, sed & jubente serenissima Regina, quae ut miro omnium studiorum desiderio tenetur, ita imprimis poësi delectatur. Quantum ea in arte valeas jam ex aliis cognovit, vult tamen etiam ipsa tua videre poemata, existimatque sese in illis dignum tanto patre filium esse reperturam. Mittas ea ergo prima, quae sese offerat, occasione, & consequeris gratiam Serenissimae Regiae Majestatis. Non autem vult, ut carmen aliquod in laudem suam mittas, sed ea poemata, quae jam olim Parisiis & Patavii edideris. In quo quidem an parendum sit Majestati ejus, tuo relinquo arbitrio. Id tantum tibi adfirmo, si Principem hanc nosses, habiturum te ampliore carminibus materiam, quam tibi unquam contigerit, vel contingere possit, nam neque majus neque amabilius, neque divinius quidquam toto orbe reperiri posse existimo. Animus erat etiam ad Gronovium nostrum scribere, sed tempus non patitur, ut id nunc faciam, rogo itaque, ut & significes illum commendatissimum esse Serenissimae Reginae, eamque summopere expectare ejus Senecam. Sed & hoc quoque, mihi Heinsii, pene exciderat, desiderari quoque ab ea editionem Ovidii tui & Claudiani, magis tamen Ovidii, quem unice deperit. Haec & plura ille. Elzevirios conveni jam, seduloque adhortatus sum, ut diligenter in Seneca pergerent, nam lente haëtenus procedunt operae, ajunt charitam se Francofurto expectare, hanc morae causam esse. Claudianum meum, postquam hinc discessisti, non inspexi. Lib. 11. Eutrop. vers. 97. versus ille aliquamdiu me exercuit, Jamque iter in gremio pacis solenne parabant. Offendit enim me hoc, in pacis gremio, idque eo magis, quod libri duo antiquissimi paucis agnoscunt. Vide, quaeso, an expedire te possis. Saturnalia jam accepisti, puto: quae cum venia legenda sunt, ex tempore enim & aliud agentibus exciderunt mihi & *Kinschotio*: nam nihil causae erat, cur in adversariis tam ignavis dedolendis omnes ingenii vires experiremur. Et sane nostrum me magis miseret, quam illorum, qui vapulant, quod otio tam turpiter abusi sumus. Ecce jam tibi carmen, quod cum versibus meis editis ad serenissimam*

¹ Adscriptum erat huic Epistolae, sed quia legi potest inter Poemata Nic. Heinsii. lib. 1. *Silvarum* pag. 139. omisi hîc.

nam Reginam mihi, summa festinatione exaratum: cum non cunctandum videretur. Cave tuae censurae quicquam mihi dissimules. Haec raptim. Vale, meum decus, & nobilissimum *Schelium* a me saluta. *Vossio* negotium tuum commendavi. Lugd. Bat. iv. Kal. Junias. Anno cīdīd̄c̄xlīx. Salutat te *Apropius* noster. ¹ *Petrus Bapt. Burgus*, belli Suecici Scriptor, vir optimus, mihiq̄ue amicissimus, Genuae nuper e vivis sublatus est.

¹ Prodiere ejus *Commentarii de Bello Suecico* Leodici Anno cīdīd̄c̄xxxix. in 12^o edidit praeterea libros 11. de *Dominio seren. Republ. Genuensis in mari Ligustico* Romae cīdīd̄c̄xli. in quarto. Scriptor ubique studia partium prodit, & Papae & Austriacae domus obnoxius in Suecos & omnes, qui a Romano Pontifice discessionem fecerunt, debacchatur, & solum atrocem exercet. An Cl. *Struvius* in *Biblioth. Historica* Cap. xvii. §. 10. erraverit, qui *Joannem Baptistam Burgum Martem Sueco-Germanicum* edidisse libris 111. Colon. 1644. in 12^o scribit, nescio, cum editionem illam non viderim, sed Leodicensem, quae libris tribus *commentarios Petri Bapt. Burgi* descriptos exhibet. Video etiam *Christ. Gryphium* capit. 11. §. 6. de Scriptoribus Historicis seculi xvii. editionem alteram Anni 1643. memorare, quae imagines additas, sed invenustas habet. Tribuit ille huic *Burgo* rarum animi candorem, quia in fine libri 111. magnificum elogium *Gustavi* contexuit; sed in quo tamen culpat haeresin & alieni regni usurpationem, & implacabilem Caesaris & Catholicae religionis hostem vocat. Cap. viii. §. 8. hujus auctoris librum de *dignitate Reipub. Genuensis* memorat in Fol., quem etiam ignoro, & dubito an non idem sit, qui de dominio maris agit.

EPISTOLA CLXXII.

J. F. R. GRONOVIIUS

*Nic. Heinsio.**Leidam.*

Nobilissime & Clarissime Heinsi. Binas tuas accepi longe gratissimas. De ¹ quadruplatore, semper ita existimavi, neminem ex omnibus, qui vel consilium vel operam, vel nimium favorem in re tam dira tristiq̄ue commodarunt, evadere posse, si pedem extra feralem insulam ponat. Itaque non tam casum, quam hominis stultitiam ac temeritatem miratus sum. At vero mors ² illa immatura, & propemodum letalis Academiae vestrae, cum primum de illa cognoscerem (cognovi autem ex Ampliss. Viri affinis tui literis) ita me commovit, ut prae magnitudine mali & doloris diu non essem apud me. Non necesse est, ut exponam tibi causas, sed tu ipse scis, neque publice neque privatim, ipsius dico optimi viri τοῦ μακαρίτου domusque ejus, tempore magis alieno potuisse hanc cladem contingere. Sed a cothurno ad focum. Admirando Poëtarum pari acclamo sane: *Io Saturnalia*. Nihil festivius neque elegantius dici potuit aut scribi. Et quia hoc quoque imperas, ponam quaestionem tibi: tu videbis, in quam partem vergere velis. Nimirum an non habeat speciem νεωτερισμῶ, *comitia ad Apollinis*, dein *comitia frequentissimo Senatu*. Neque enim iste locus comitiorum, neque comitiis ratio Senatus habetur-

¹ *Doristario.*² *Spanhemii.*

betur, sed populi, hoc est, centuriarum, curiarum, tribuum, quibus intermixtus quicumque vellet e senatu, nontamen ut senator, sed ut pars centuriae, curiae, tribus. Satis dixi. Neque enim temere hoc in tuis debet fieri, neque si rite & non temere fiat, ut verbose fiat, opus est. De unica Regina, euge, nunc bene erit, immo jam bene est. Quid ni laetemur, o mi Heinſi, qui ambulamus per vias frequentissimas, omnibus incogniti? Patere me trahere me una ibidem: sed de te verum est, & tribus fortasse aut quatuor tui similibus: qui cum caeteris omnibus dissimiles sitis, dissimillima loquimini & cogitetis, mirum non est vos illis ignobiles ignorabilesque conversari, & tum demum habere, qui vos noscat, cum aut inter vos, aut soli vobiscum estis. Quae autem haec felicitas? atque, o dii, propria sit! Tandem nacti sumus Principem, cui non simus barbari? quae nos intelligat? cui fuci illi, qui passim pro nobis gerunt, ad nostra pabula sedent, nostra loca occupant jure suo, non possint imponere? Recte igitur fecisti, quod paruisti amico nostro, quem serio agere & ex officio argumentor, etiam ex verbis, quae mecum hîc de te habuit. Carmen tuum est mellitissimum. Quid autem tu me vis semper patruum aut Aristarchum esse? ipse tuis cerulis indigeo. Tamen, de *totque clientibus una est*, vide an Horatio probare possis, qui *clientam* maluit dicere. Et si Jcti tradiderint verbum hoc, *si quis* tam masculos quam foeminas completi. Quibus si acquiescis, & ego fane: non enim reprehendo, sed subjicio tibi, ut cogites. Claudiani locum legi, relegi, & fane mihi quoque suspectus est, sed nihil extrico. Utinam permovere posses Elzevirios, ut paullo alacrius procederent. Vereor enim ne expectatio mora intereat. Notas ad Marcum nitidissime jam descripsi. Nunc capto intervallum, quod mihi adolescentum nostrorum plerumque inepta desideria, quibus tamen obsequendum est, concedant ad praefationem ad Lectorem Notis praefigendam. Alteram illam ad Regnam placuisse tibi gaudeo. Sed quid videtur? adjiciamne diem & annum, an omittam? Haud scio quidem cur alterutrum magis minusve deceat, vel non deceat: tu tamen dic, quid tibi videatur. Curtium absolvi, & exspecto commodam occasionem remittendi. Mox ad Tragicum revertar. Gratum est, quod ab *Aproſio* salutas (rogoque ut meo nomine vicem ei reddas quam humanissime) sed quod nihil audio de sarcinis tuis Genuensibus MSS. id mihi permolestum est. Debeo illi dudum literas, & mittam, spero, proxime: nunc enim plures aliae instantius urgent, nec te differre audeo. *Schelium* nostrum jampridem hîc expectamus: ideo & Saturnalia cum manent: nec tamen omnino feriantur, sed ambulant per manus hominum bonorum, qui si non omnia capiunt, discunt hoc saltem, malis Poëtis non semper Saturnalia esse. Auctores tamen celatos habeo. Vale. Transierunt hac nuper *Mallingrodus* & *Rottendorſius*, legati Monasterio, viri & ipsi docti & literarum amantissimi: sed & tui miratores: certe vidisse, & quidem nuper admodum, poëmata tua narrabant: & fortasse quaerent occasionem tui videndi, Patrisque tui ante omnia. Vale, dulce decus meum, & ipsum matronamque domesticam vestram, a me reverentissime saluta. Daventriae a. d. iv. Kal. Jun. Jul. cicoxcxlix.

EPISTOLA CLXXIII.
NIC. HEINSIUS

J. Fr. Gronovio.

Daventriam.

Spanhemium vix extuleramus, cum raptus nobis *Walaeus*. Nunc in gemino sluctu versatur Academia. Videtur profecto, Vir Clarissime, nescio quod astrum eruditis inimicum nunc regnare. Adeo Europam universam perrepunt haec contagia. De *Gaudentio* ac *Petro Bapt. Burgo* jam intellexisti. *Scioppium* e vivis excessisse nunc nuncio. Ita ad me eques *Puteanus*, qui & alios addit tibi, ut existimo, non notos, viros tamen praestantes, quique magnam inter Italos de se spem excitarent. *Spanhemio* ac *Walaeo* successores, sine dubio indigni dabuntur. Nam id agi haecenus videtur, ut evertatur occultis machinis haec Academia. Nullus honor virtutibus, nullus meritis locus, qui si ullus esset, de te certe invitando jam transactum foret. Sed hi patriae meae mores sunt. Favori gratiaeque dantur omnia, meritis nihil. Si arrogare quicquam mihi possem, viderer & jure de fortunae meae malignitate questurus, cujus pertinaciam in ultima forsan barbaria expugnaturus sim, in patria nequicquam id pollicear mihi:

Nullas habet spes Troja, si tales habet.

Quibus tamen calamitatibus fortem animum habeo, quem opponam. Ea indole sum, ut dignitates divitiasque possim contemnere, si magno studio magisque contentione ac ambitu sint petendae.

Non talem Heinsiadae patri Rutgersia mater

Edidit, ignavamve adeo stat amare repulsam:

Nec tanti licitamur opes. Est spreto honorum,

Est supra fortunam animus.

Nec Dii firint, ut cujusquam benevolentiam hujus mercedis spe captem. Aliis hae curae somnos rumpant. Mihi χρήματα θεόσδοτα πολλὸν αἰμείνω. Habeo, quod satis sit, si modico contentus sum, & sum profecto. Nec adeo abjectae sunt fortunae meae, ut lauto matrimonio eas non possim erigere: sed inter tot dotatas neminem vidi haecenus, quae me traheret hoc lenocinio. Discant posteri mei ex me virtutem, fortunam ex aliis. Haec nimia forsan, & praeter rem, quae eo spectant tamen, ut exemplo tuo me ostendam sapere. Scio enim, tuum te esse malle, quam fortunae tuae. *Saturnalia* non displicere tibi, est quod gaudeam. Idque eo magis, quod extemporaneum scriptum sit, & ab aliud agentibus effusum. Nae profecto otio nostro abutimur, qui tam ignavos hostes invaserimus! Corio enim elephantino tam probe tecti ac muniti sunt inscitissimi tenebriones isti, ut vel acutissimos ictus impune sustinere possint ac retundere. Tam alto ignorantiae veteris sopitos nemo excitare possit, nisi qui simillimus illis sit. De *comitiis* recte mones. Utinam plura carpi non mereantur! Mihi certe multa displicent, quae haecenus non vacat emendare. Ne quid dissimulem, securum ac negligentem reddidit adversariorum supinitas. Hinc peccandi fiducia. Reginae versus meos

Tom. III.

E e

mi-

misi: parendum enim fuit. De successu ne quid promittam mihi, tenuitatis meae facit conscientia. Obsequium meum optima principi si probabitur, satis est: caeterorum nihil ambio. De *clientibus* sic habe. Communis generis eam vult Charisius vocem, ut & *hospitis* & *antislitis*. *Clientam* tamen dici ab Afranio Horatioque non negat, quomodo & *hospitam* dicimus & *antislitam*. Ego quia de *Superis*, hoc est Diis Deabusque loquor, ut sequens versus satis evincit, minus bene me expressissem, si faeminini generis vocem versui inferuissem. Nec dubito quin Horatius Afranium imitatus ἀρχαϊκῶς *clientas* dixerit. Versu xiv. pro *plectra disert* rogo corrigas, *plectra sonora*. E Claudiani loco sic me expedio: τὸ in *gremio* videtur corruptum, cum duplex ss degenerarit in *m*. quod non raro fieri in veterrimis libris nosti. Tollendum deinde *o*, ultima vocis littera. Sic pro *in gremio*, habebis *in gressu*. pro *pacis*, *paucis* esse in duobus codicibus omnium antiquissimis jam monui. Legendus igitur totus versus hoc modo,

Jamque iter ingressi paucis solenne parabant

Terrestri via iter ab Eutropio confectum innuit, cum via maritima soleret confici. Vide an manum dare conjecturae huic possis. Elzevirios hortari non desino. Intra triduum tomum tertium auspicaturi sunt. Notis ut eadem opera manus admoveantur, quantum in me curabo. Codices Genuenses necdum ad me perlati. Audio de novo Amstelodamum naves aliquot ex Italia advenisse: forte & illam, quae sarcinas istas vehat. Sed cum *Goefius* nobis adsit, in Zelandiam mecum abiturus, non potui in rem inquirere. Revertemur intra decem dies. Faxo tum intelligas, quid expectandum sit. Praefationem tuam denuo perlegi. Ita bene mihi sit, ut ejus lectione satis expleri non possum! Compta, venusta, elegans, erudita tota est; plurimum reconditae antiquitatis habet; quare & futurum est, ut a paucis capiatur ille lepor. Amicum quidem nostrum, qui se veteris eloquentiae restitutorem credi velit, nihil in ea videre aut intelligere existimo. Idem ille, nuper magno supercilio me accusabat, quod obscurus ut plurimum in versibus meis essem. *Laestrygonas* enim & *Antiphaten* sibi inauditos hactenus, quos epicedio in Regem Carolum meo inseruissem. Et hoc quidem praesente *Scrivario*. Dignus ipse, qui ad *Laestrygonas* ablegetur, atque illos eloquentiam doceat. *Mallincrothium Rottendorffiumque* Hagae nuper salutavi: mox cum iis in hac urbe pransus sum. Viri profecto doctissimi sunt, & quorum similes multos patriae nostrae velim adesse. *Rottendorffius* de libris aliquot Ovidii MStis spem fecit. Haec summa cum festinatione. Diem mensemque ut addas dedicationi nihil necesse. Vale, meum decus, & tuos omnes a me saluta. Lugd. Bat. a. d. xv. Kal. Jul. stil. Gregor. ciciocxlv.¹

¹ Adjunctum erat epigramma in obitum *Frederici Spanhemii*, quod legitur lib. iiii. Silvar. pag. 191. & ad ultimum distichon, ubi de *amicorum lacrimis* agit Heinsius, ita clauserat carmen: *Momus* (Livor in edito) & ipse dolet. Et haec adscripserat: *sibi hoc dictum interpretetur Alastor Claudius, quem moriente Spanhemio lacrimasse constat. Addeo atroces etiam illae animae scelerum suorum conscientia quandoque torquentur*: De his lacrimis alterum est epigramma editum eadem pagina.

EPISTOLA CLXXIV.

NIC. HEINSIUS

J. Fr. Gronovio.

Daventriam.

Falsus opinionis meae si fui unquam, nunc certe fui, idque duplici nomine, tum quod in Zelandia Flandriaque ac Brabantia haeserim diutius, quam existimaram, tum quod domum reversus nullas a te litteras invenerim. Fore enim arbitrabar, ut, si meae gratiae nihil epistolii dare velles, Senecae saltem tui a te extorquerent, quod frustra mihi vindicaturus essem. Tu vero, mi Gronovi, quem fraternum haecenus in modum diligo, quemque Castorem meum appellare soleo, id nomen convenire tibi non existimas, nisi Amyclis te natum mihi persuadeas. Male sit Harpocrati tuo, qui tam constantis silentii mystam sibi legit. Sed ut serio rem agamus, tomus Senecae tertius finem spectat. Notae tuae restant, quae tomum quartum sunt confecturae: ad eas praelo committendas mox se convertent Elzevirii. Rogarunt igitur me, ut exigerem quod reliquum penes te est notarum. Nam de Controversiarum fragmento, quod a Clarissimo *Ferrario* acceperam, spes decolavit. Tam indignis modis Genuensis mercator me lusit, qui cum libros Genuae comparatos huc miserit, illorum oblitus est, quos Mediolano advexeram. Quae tam insignis oscitantia bilem mihi vehementer commovit. Scripsi quidem ad illum, sed sperandum non est, ut fasciculus in tempore possit huc deferri, quem in Doganâ reliquisse videtur: quod si factum, metuo, ne sarcinae illae mihi perierint, & ego fraudatus sim optimorum ac rarissimorum librorum non parva copiâ. Perspexisti & tu, credo, mercatorum ingenia, qui dum suis rebus promovendis unice incumbunt, alienas susque deque habent, & ut plurimum negligunt. Sic ab altero Neapolitano nummos veteres & libros, qui sexcentis circiter florenis constiterunt, quosque toto biennio jam domi suae servat, nullis precibus extorquere possum. Senecam Tragicum, quem dono mihi *Apropius* dedit, in manus tibi tradam. Nam festinatione nulla hîc opus. De *Schioppi* morte falsus rumor fuit. Nunciarat id mihi tamquam rem certam Eques *Puteanus*. Sed cum deceptus is fuerit a *Forstnero* quodam Germano, qui Patavio recens Romam advenerat, & jam ad *Rhodium* de libris ἡ μακροῦς postumis emendis scripsisset, hominem & vivere & valere pro responso accepit, meque erroris hujus, quanquam sero, admonuit. *Alastor* totis Furiis in me insurgit ob epitaphium Spanhemio scriptum, maximumque malum in primo, quem editurus est, libro minatur. Responderi illi per amicos curavi, etiam atque etiam videret, ne praeveniretur. Mihi enim certum esse, homini insane maledico nihil imposterum indulgere. Sed, quod omnium facetissimum est, in *Heidanum*, qui cum *Latio* fere solus ei amicissimus fuit, apud quosvis

quotidie debacchatur. Orationem ejus funebrem, ut soloecam, barbaram, ineptam, ex Cunaei Orationibus sublectam passim traducit. Rationem hujus facti nullam scire possum, nisi quod *Spanhemium* ipsum, & *Rivetum*, in illa nimis laudavit *Heidanus*. Tum quod *Alastori* nostro, post invidiosas laudes, *motus heroicos* adscribat, quos *insaniam* interpretatur acutissimus *Alastor*. Vides quam periculosum sit hominem arrogantissimum laudare, qui eo superbiae ab adulatoribus suis redactus est, ut digne se laudari non posse arbitretur. *Stewartus* libellum ei nuper inscripsit, in cujus praefatione τὸ δεινόν, *heroem augustissimum*, & ipso *Augusto* augustiorem vocat: nihil ab eo nesciri contendit. Unum illum tantum scire, quantum omnes, quotquot hactenus vixerunt, eruditos. *Iustellus* ad plures abiit. Ita *Puteani* ad me. Tu vale, & rem bene age. *Vossium* nostrum in Suecia mansurum, eoque nomine bibliothecam suam ad se deferri curasse constans rumor est. Elzevirii Baudianas epistolas auctiores luci parant. Si quid ad rem habes, comunica, quaeso. Lugd. Bat. MDCCXLIX. Nonis Aug.

Bullialdus in locum *Paganini* a Magno Hetruriae Duce invitatus est: qui oblatam conditionem non videtur accepturus.

EPISTOLA CLXXV.

J. FR. GRONOVII

Nic. Heinio.

Leidam.

Jam minuerunt, puto, querelas tuas meae, quae in via atque adeo propiores tibi, quam mihi erant, cum tu illas desiderabas. Nam quod serius demissae, sane pigriorem me fecit iter tuum, quod facile cogitabam ultra promissum reditus diem prorogatum iri. Habes igitur, & habebis, quando voles, sine Amyclis Castorem. De Senecis ad umbilicum adductis, mihi nuntii beati. Utinam nunc persuadere hominibus posses, ut statim adderent frontem cum dedicatione! Hoc desidero, non tantum, quia praesente te fortasse maculis libera prodiret, sed etiam quia fidum hominem habeo, qui cis paucas tempestates, mensem forte, minatur iter in Sueciam, & posset istos tres tomos portare in antecessum. Amabo te, incumbere in hanc curam. Poteris apud eos hoc praetexto uti, quod magnopere desideremus uterque, tu atque ego, ut Praefatio mendis careat: de illo autem nihil posse certi sperari, nisi nunc praesente te perficiatur. Nam ut ipsam tibi porro commendem, non puto opus est: ita & meo honori & majestati illius, cui inscripta est, faves. In Marcum hinc habes. Alloquium ad lectorem quarto illi tomo praefigendum habebis proxime: jam enim profligatum est, sed nondum redegit in mundum. Quod scribis & λόγον & carmen ἐπιτάφιον motuum laudatorum esse novam causam, nihil levius exspectabam, ex quo utrumque cognovi. Is

Vof-

Vossius non tantum manebit in Suecia, bibliothecamque suam eo transtulit, sed & patriam Reginae viginti millibus florenis vendidit: haec sub ipsius administratione erit. Caeterum locus ei in palatio constitutus, stipendium quinque millium florenorum annuorum adsignatum, victus praeterea in aula. Sic mihi nuper hîc retulit *Tollius*, cujus frater etiamnum domi *Vossianae* Amsterodami agit. Epistolas *Baudii* nulla parte augere possum. Tres fuere penes *Guilielmum Grotium*, quas ab eo acceptas, cum Jo. Janſonius eandem editionem repeteret, *Boxhornio* tradidi, ut adjungerentur: sed nescio cujus negligentia tamen sunt omiſſae. Eas si non habes, a G. *Grotio* petes. *Juſtellum* decessisse doleo, quemadmodum laetor rumore de *Schioppio* falsos nos habuisse. *Heraldi* commentario grandi quid fit? Vale, mi *Heinsi*, & de praefatione memento curare. Daventriae. vii. Id. Sextil. cidiocxlx.

EPISTOLAE CLXXVI.

J. F. R. GRONOVII

Nic. Heinsio.

Leidam.

Proximas meas una cum notis in Marcum Senecam accepisti, credo. Nunc eni praefationem ad Lectorem, quam Notarum tomo praefigi velim, una cum carmine *Rottendorſii*, quod ab eo ad me miſſum putavi non incommodo hîc poni, instar alius ad Reginam praefationis. Audieram ab *Isaaco* nostro Graeca, quae apud M. Senecam reſtituta ſunt, *Scaligero* deberi: cum communiſſe ea cum *Vulcanio*, codice MS. ejus in primis adjutum; hunc cum ¹ *Schotto*, qui diſſimulata laude *Scaligeri* ſub ſuo nomine ediderit. Si vera eſt haec hiſtoriola, vos eam noſſe oportet. In fine hujus, quam vides, praefationis aliquid ea de re poſueram, ſed delevi poſtea, partim incertus, an verum ſit, partim ne dicerent in cauda praefationis venenum eſſe. Ad librum de vita Beata cap. xiiii. *Virtus ſalva eſt: an veritas, an virilitas?* totam eam obſervationem velim abs te, ſi res integra eſt, deleri. Epist. xcvi. locus eſt: *Habeamus in commune, quod nati ſumus*. Ibi non ſatis me expreſſi. Tò *Quod* volo eſſe pronomen, non conjunctionem. *Quod nati ſumus*, volo eſſe, quod cum nativitate accipimus: ut noſti illa: *homo natus, vir natus*. Hoc alibi explicabo latius: nunc ad illa verba in notis: efficiamus, ut ad commune bonum vel commodum creati ſimus: ad illa appinge quaeso: *tales vel tale animal, quale creati ſumus*. De Praefatione ad Reginam, quae te proxime oravi, credo tibi curae fuiſſe. Hanc quoque ſas perlegas & emendes, aut ſi quid diſpliceat tibi, me in tempore mon-

Ee 3

neas

¹ Ex Epistola *Schotti* ad *Lipſium* xcii. patet, *Schottum* Graecas lacunas ex *Covarruviano* codice ſuppleviſſe, & optaſſe, ut in *Lipſii* aut *Scaligeri* manus perveniant, quia poſt mortem *Jac. Dalechampii*, ad quem miſerat notas ſuas, apud heredes haerebant, & quas recepiſſe Epist. xcvi. & xcvi. *Lipſio* ſe juſſiſſe mitti, ſcribit.

neas. Vale, Decus meum, & meam famam tibi commendatam habe. Davenportiae postrid. Id. Sextiles CIOIOCLIX.

EPISTOLA LXXVII.

NIC. HEINSIUS.

J. Fr. Gronovio.

Daventriam.

Quod questus nuper apud te sum, amicissime clarissimeque virorum, aut nullum aut parvum ab hominibus nostris pretium virtutibus poni, ut te solarer id potius factum, quam quod meritis meis plus deberi arbitratus sim, quam haecenus defertur. Indignor aliorum rationem non haberi, de me gaudeo. Quid enim honorificum magis, quam negligi aut contemni ab istis mortalibus, qui litteris ac eruditioni bellum indixerunt? Ad magistratum hujus civitatis nemo post *Goesium Swanenburgiumque*, hoc est toto decennio, promotus, qui praeter vernaculam linguae alicujus peritus esset. Nuper etiam tres Scabini ex infima plebis faece lecti, quorum unus pistoris famulus olim fuerit, ac pistor etiamnum sit, caeteri non melioris illo notae. Quod facinus sibilis ac carminibus famosis jure meritoque exceptum. Vides, quam non frustra Fornacem inter Deas olim retulerint Romani. *At nos litterulas stulti docuere parentes.* Sed per me licet, male sibi consulant suisque civibus, dum Academiam nostram inscitia non inquinant ac pessum dant. *Veslingium* ut invitarent ad professionem Medicam auctor nonnullis fui, illi vero virum nullius pretii homini doctissimo elegantissimoque praelaeturi sunt, nisi me fallunt praepostera illorum consilia. *Bouchartum* ad ministerium ecclesiae Gallicanae nuper evocarunt, cum ad professionem Theologicam debuissent, quasi vero homo opulentus, optimoque loco natus, ac magnae inter suos existimationis, Ministerium ecclesiae patriae sit deserturus, ut eandem peregre dignitatem, qua domi fungitur, amplectatur. Jure ergo ludi se questus est, oblatam conditionem aspernatus. Non tu solus es, mi Gronovi, in quem injurii sint Vatinii nostri. *Boxhornianam* de Jure successionis dissertationem vendi nuper vetuerunt, ejusque scripti exemplaria a licitoribus direpta: cum *Salmasianus* tamen liber, contumeliis in hostes Regios atrocissimis plenus, apud Elzevirios impune nunc edatur, magistratu conscio. Sed missa haec faciamus. In Virgilii loco, *animos tollent fata*, sensus videtur constare, animos tollent, propter aquam interlabentem, & halitum subeuntem. Libelli mei in Sueciam pervenisse nondum videntur, quos *Appelbomio* commiseram, ille, ut sumptibus, credo, parceret, nobili cuidam perferendos dedit; cui quid factum sit sciri haecenus non potest. Queritur interim de hac mora *Vossius*, ob quam ne succenseat mihi serenissima Regina vereor. Purgavi itaque me litteris apud *Vossium*, factique culpam in *Appelbomium* converti. Dedicationis tuae partem

tem potissimam hîc habes; ut sine mendis ederetur operam omnem adhibui, si quid peccatum apographo a te misso licet adscribas: aqua enim in uno alteroque loco mihi haesit: sed fortassis frustra. Habes & primum notarum folium, secundum etiam emendavi. Negligenter sic satis operae se gerunt, & graviter nonnunquam impingunt, quod jam aliquoties tempestive a me praeventum. Quo magis doleo Amstelodamum me nunc evocari, trahunt me eo necessaria quaedam negotia; quod intellexerim Neapolitanum mercatorem, cui nummos veteres librosque in Hollandiam mittendos commiseram, ex ea urbe discessurus, re fracta foro cessisse. Quod superest, tentandum mihi, si quid forte tabularum ex isto naufragio colligi possit. Intra dies paucos revertar. Elzevirii interim in mandatis datum, etiam atque etiam viderent, ne quid errorum obreperet me absente Notis tuis. De Claudiano edendo inter illos & me convenit: quem intra viginti dies praelo commissuri sunt. Mitto hîc observationum initium: caetera missurus, ubi descripsero. Rogo accurate ac attente pagellas istas perlegas, perlectasque mihi remittas, de erroribus etiam libere moneas, nihilque, quod carpi possit, intactum relinquant. Caetera ipse emendabo adhuc perpolienda, quae ad ornatum verborum pertinent: tumultuaria enim opera pagellas illas effudi, nec perlegi ipse. Quae notata vides in margine, ut superflua delebuntur. In Statii loco, *fulgorque recisus*, nihil mutandum videtur, & muto sententiam. *Intercisam diem* sic Claudianus dixit. *Heraldi* ingens liber sub finem anni hujus prodibit, sic ipse nuper ad me. Quibus *Salmasio* respondet jam edita sunt: restant Rerum quotidianarum libri tres. Vossianam bibliothecam quadraginta florenorum millibus a Regina emptam idem *Salmasius* credi vult, tibi potius accedo, qui de viginti millibus scribas. De *Schotti* ingrato in *Scaligerum* animo nihil memini. Extat in bibliotheca publica & πάλιν exemplar ex editione *Mureti*, in quo lacunas Graecas supplevit, quod nescio quomodo exhibere tibi neglexi. Puto illum Graeca ista a *Vulcanio* habuisse, nam inter schedas ejus nonnulla ad rem hanc facientia vidi: *Vulcanium* ex *Schotti* libro descripsisse existimo. Certe codex ille venerandae vetustatis, cum altero, Antverpiae apud Jesuitas etiamnum servatur, ut ex *Rubio* intellexi: nec arduum fuisset eum impetrasse tibi, si sic voluisses. Parisiis etiam apud *Mantellum* quendam Medicum Naturales quaestiones vidi editionis Aldinae, a viro quodam docto ad libros veteres castigatas: quas mihi tum offerebat tecum communicandas. Haec nunc, summa cum festinatione, itineri accinctus: plura proxime. Vale meum decus. Lugd. Bat. pridie Kal. Septembr. CIOIOCLIX.

Titulum Senecae praefigent Elzevirii, quem ante praefixerunt, mutanda tantum inscriptio, quam pro libitu concinnabis, quantum tamen fieri poterit, brevissime. Ut hîc festines tua interest. Iterum vale.

EPISTOLA CLXXVIII.

J. FR. GRONOVIIUS

Nic. Heinſio.

Daventriam.

Tantum quod acceperam tuas hodie, cum mihi cathedra fuit conſcenden-
da. Idemque faciendum poſt meridiem, & duas praeterea horas privatim
docendum, niſi auctio librorum, &, cui has portandas dabo, mihi diem exe-
miſſent. Nomen illi *Joachimo Borgheſio*, pater Reſtor ſcholae Groningeniſis,
ſtudia ſatis elegantia, & ſingulari impetu ad literas noſtras fertur, mores, ut
audio ex iis, qui a puero hominem norunt, & ipſe paucorum dierum adſidua
conſuetudine percepi, probiſſimi ac ſimpliciſſimi. Quare cum in Academiam
veſtram migret, audeo tibi eum tradere digniſſimum, qui te familiarius co-
lat, & bonitate tua congreſſibusque tecum crebris & proficiat, & tibi devincia-
tur. Agnoſco autem fidem tuam & curam in illis, quae tibi commendavi, &
vidi lubens ſpecimina operis Annaeani. In praefatione ſtatim averſo latere
primae paginae grande vitium eſt admiſſum: *quam eandem caſtis immortalium*:
cum debuiffet: *quam deabus, eandem caſtis*. Duo leviora, *bonorum artium*, &
quales in ipſis riguerunt, pro *viguerunt*. Diſtinctiones alicubi quoque omiſſae non-
nihil obſcurant. Quae eſſi mallem vitata, tamen pro fato librorum, & opera-
rum tum ſtupore tum negligentia, ut ille Plautinus dicebat Ballio, *Minus*
malum eſſe illum, quem conduxerit, quam cenſuerat, coquum, qui nihil etiam dum prae-
ter cyathum & cantharum harpagaverit, ſic ego illas minus malas ducam, quae
caetera reliquerunt, ut intelligi poſſint. Tu videbis, quid illis ſit faciendum,
& an alicubi de illis poſſit lector moneri. Schedas tuas ad Claudianum cras
percurram, & prima occaſione remittam. De Saturnalibus magnas gratias.
Nunc dormiturio. Vale, mi Heinſi, & me ama. Daventriae, quo die tuas ac-
cepi, a. d. x. Kal. Septemb. *cicidcxlx*.

Diſcrucior nuntio, qui te Amſterodamum evocavit, nec mea potius, quam
tua cauſa. Utinam effugerint res tuae illud hominis fortunarum incendium.
Puto te accepiffe notas ad Marcum una cum praefatione generali, quarto to-
mo praefigenda.

EPISTOLA CLXXIX.

J. F. R. GRONOVIIUS

*Nic. Heinsio.**Leidam.*

ITa me Musae ament, ut juvit legisse specimen, quod misisti, tuarum in Claudianum annotationum, doctum, elegans, accuratum, ut nihil magis. Tu tamen non credes me legisse, nisi aliquid reprehendam. Quid si tam diligens fuisti, ut nihil reprehensione dignum excidere tibi paterere? Et certe nihil admodum occurrit, quod mihi ipsi non facile excusarem. Unum tamen alterumque subjiciam monentis, non castigantis, vice: tu videbis quam bene. Conf. Olyb. Vers. 6. *fastigia* valde probarem, si adjungeretur aliud verbum, quam *τὸ torqueat*. Nunc videtur dicere, *novo torqueat vestigia*, novo & inusitato more, superbius & insolentius incedat, rotetur progrediendo. 1. In Ruffinum vers. 297. *sed motibus impar*, nescio quomodo non potest placere. Lib. II. vers. 69. *dolor afficit unus*, optimum & Tullianum: haud quaquam tam bene, *officit*. Illa in scriptura, *refluvis Bosphorus*. De *fuco*, praeclaram & utilem multis locis observationem mihi praeipuisti: dudum enim miratus fueram, non potuisse doctos viros inter *succum* & *fucum*, praesertim tot locis, distinguere, & congesseram quaedam in eam rem, quae nunc tibi cedent, me libentissimo secundissimoque. Quod ut certius scias, mitto etiam hîc, quae dudum oblita nuper nescio quid quaerens inter schedas meas reperi, foliolum collationis Ovidianae, quod miserat *Boeclerus*, & Claudianum a me in Anglia cum MS. codice *Patricii Junii* collatum. Videbis an usui esse tibi possit. Ignosces, quod in proximis dubitaveram, an accepisses praefationem meam, quasi potuisses mihi respondere de *Schotto*, si illam non accepisses. Hoc per festinationem mihi exciderat. De codicibus illis Antwerpianis utinam citius novissem. Nunc serum est, nisi forte in futuram novam editionem aliquid parem. Cogor aberrare, quia instat, cui tradam has portandas, egregius juvenis ὁ δὲ ἀπὸ ἀδελφῆς, discipulus aliquamdiu meus, & civis primarii filius, *Nilandius*. Eum, cum te adibit, solita tua humanitate excipies. Non audeo tibi amplius meas Notas in Senecam commendare: ita impudenter tua opera utor: facies tamen quod poteris. Heri apud Reverendiss. *Mallincrotium* & nobiliss. *Rottendorffium* facta est tui mentio, digna eruditione ac moribus tuis. Etiam saluti tuae propinavimus, ac dimissus sum bene madidus. Videbis ipsos, credo, aut Hagae aut in urbe vestra. Vale, vale. Daventriae a. d. iv. Kal. Septem. Julian

J. Fr. Gronovio..

Daventriam.

Ultimis litteris specimen notarum mihi ad Claudianum, Vir Clarissime. Censuras tuas avide expecto. Nullus enim dubito, quin inveneris nonnulla in schedis istis, quibus assentiri non possis. Lib. II. in Rufin. 438. *vosque imitata retentus* non videtur mutandum in *receptus*. Muto igitur sententiam: quāquam non multum refert. *Retentus* a retinendo. Reliqua describere uno impetu decreveram, sed propositum hoc interruptit casus inopinitus, quem velim audias. Poëmatia mea Serenissima Regina & legit, & laudavit lecta, addiditque gratum sibi fore, si in Sueciam excurram. Promiscram me id facturum sub coronationis solemne festum: sed cum id dilatum sit in annum proximum, acceptum magis sibi fore significavit, si moram non traxero. Consultum igitur visum, ut invitationi tam comi manus praebeam, meque itineri accingam. Instat enim hyems, ante cujus exortum in patriam redire gestio. Osculo victricis dexteræ me expediam, ubi Rutgerfianum negotium Majestati ejus commendaro. Si quid praeterea in rem tuam possum, impera. Sub finem hebdomadis proximæ discessurus sum, si occasio commoda offerretur. Die Martis igitur sequenti Amstelodamum me conferam, ut amicos consulam de itinere quamprimum suscipiendo. Senecarum exemplar si interim parari potest, mecum id feram. Sin minus, ut brevi mittas auctor tibi sum. Id enim te facturum jam promisi. Atque utinam statò tempore Amstelodami te possis sistere! sed tu videris. *Vossius* noster valet, teque plurimum salvere jubet. Hodie me venturum scripsi, misique ¹ carmen, quod hîc vides, Serenissimæ Reginae; quod instar gratiarum actionis est. Vide, an delicatis magnæ principis auribus respondeat: quibus ut prober, mea interest. Secutum me quodammodo priorum successus facit; spemque dat, non minus gratas hæc Musas fore. Tu vero, mi Gronovi, quin patronam talem homini amicissimo gratularis: in qua votorum summam consecutus videor; occinoque mihi ipsi frequenter ista,

Jam dominas aures, jam regia tecta meremur,

Et Chelys Augusta judice nostra sonat.

Quid restat ergo, nisi ut *Boyos Plantasque* ad Zulychemiana & Catziana praetoria plorare jubeam, aut, si mavis, in spem esuritionis cantare, magnos, si Diis placet, admirandosque poëtas. Sed joculari jam non vacat. Habes hîc, quæ in notis tuis absoluta sunt: folium secundum & quarti partem non potui emendare, quod domo abfuerim. Haec multa nocte semisomnis: Lugd. Bat. A. MDCCXLIX. IX. Sept. stil. Gregor.

¹ Et hoc legi potest lib. I. Silvarum pag. 140.

EPISTOLA CLXXXI.

J. F. R. GRONOVIIUS

*Nic. Heinsio.**Amstelodamum.*

Quidni gratuler tibi Sereniss. Reginam tam propitiam? Ego vero non tibi modo, sed & mihi ipsi gratulor, qui semper tuam felicitatem meae, & majorem quidem, partem duxi. Immo etiam omnibus, qui serio literas colunt; quibus in extrema desperatione haec repente inexpectata lux est exorta. Quod enim hoc exemplum dicam? aut quam benignitatem numinis terras respicientis? Nihil profecto simile videre majores jam inde a temporibus M. Antonini. Nam utcumque forent principes, qui faverent studiis; qui tamen ea sic intelligeret, qui sic distingueret ingenia (unicum si Julianum excipias, quem propter odium Christiani nominis sciens praetereo) exstitit nemo. O nos igitur beatos, qui quod regia gratia potimur, nullius nil nisi aulici gratiae debemus: nec adulatione, pecuniave aut mille indignitatibus sumus consecuti, sed honestissimis artibus, quibus gestimus posteritati probari. Juvat, juvat vixisse in hunc diem, & hactenus injurias, contemptum, invidiam per tulisse, ut hoc praemium constantiae nostrae esset, nosci & aliquo loco poni ab incomparabili Regina, cui soli concessum est a fatis, justum dilectum agere ingeniorum. I ergo faustis avibus, & disce, quam nobis referas, quam tradas posteris historiam de magnitudine & gloria tantae Principis, quam tot secula suspirarunt, quot seculis docti Principibus barbari & ignorati vixere. De me, si tam splendida materia sermonum, quibus eam adorabis, aliquem locum memoriae nostri dabit, hoc ejus Majestati adfirmabis, me, si quemquam mortalium, fidelissima devotione illi dicatum, juratum, consecratum esse: uno hoc gaudere vitae fructu, quod in tempora, quae nomen ejus nobilitabit, inciderim: omnes mihi horas esse longas, dum hunc sensum (quod ejus Majestati clementissime placuit) publice patefaciam: interim precari, ut, quod commodum illi videatur, deminuat de spe, quam de Senecis nostris nimiam concepit: video majorem viribus meis esse, & periculum, ne decepta expectatio transeat in indignationem, quae me profecto ad necessitatem ultimam deduceret: sed omnem habere spem in ejus clementia positam; & quotidie pro Majestatis ejus regnorumque illius salute non tantum omnibus precibus venerari Deum, sed & vitam meam caputque devovere. Haec per ego te communes deos oro, ut quam amplissime exponas, & omni fide Majestati ejus confirmes. De Scazonte nolo praejudicare, ut omne judicium expectes ab illa, cui ante omnes placere debet: sustine paululum, mox tanti potens suffragii, nostra puncta fastidies. Vale, vale, Nobilissime & Clarissime Heinsi, & vive nostri memor. Daventriae a. d. iv. Eid. Septembr. Julian. CXCIX.

Vossium nostrum, *Freinsbhemium*, *Boeclerum*, & si dabitur, *Loccenium*, vv. CLL. a me peramanter salutabis. Ad *Vossium* ante octo dies scripsi, & cras iterum scribam, misso simul Euripide cum MS. collato ad matrem ejus. Ista scripsi, ut, si fors fuat, ipsi ostenderes Reginae. Idque ut facias, te oro & hortor. Utinam vero praesens tibi mandare potuissem, quae vellem! Sed prohibeor, & summam hinc habes. De tuis ad Claudianum sollicitus sum. Ea cum ego bis, ter, perlegissem accurate, & mirifice probassem, nec nisi de minutis quibusdam te monendum haberem monuissemque, dedi ad te cum literis referenda juveni cuidam hinc Lugdunum contendenti. *Nilandio* nomen est, ipse, ut & parentes, mihi amici; sed confirmabat mihi, se praeterito die Lunae, hoc est, ante octo dies sperare, Leidae fore. Nam jam quatuordecim dies sunt, quod ei fasciculum dedi. Erat in eodem Claudianus, quem ego in Anglia contuli cum MSS. membranis *Patricii Junii*, quem diu oblitum nuper admodum inter libellos quosdam, quibus raro utor, abjectum inveneram. Erat & pagina collationis Ovidianae cum codice *Boecleri*, quae etiam in manus venerat. Haec omnia vereor nunc, ut ante festinatum hunc tuum discessum accipias. Nihil tamen interibit. De exemplari, quod feras Reginae, vides propter brevitatem temporis id parari non posse. Debet enim decore religatum, & auro cultum esse. Sed si solum exemplar tecum ferre velis, & quasi non meo jussu tradere interea, dum, quod ego destinabo, paratur, non vetabo. Et id mea fide ab Elzeviriis sumas, vel a Ludovico Elzevirio, si habet, & hoc commodius est. De caetero spero tibi fortunas meas satis commendatas esse & fore. Itaque Deum immortalem enixe oro & orabo porro, ut salvus eas, optata perficias, salvus ad nos redeas. Vale & vive. Agitur hic conventus nobilitatis nostrae, ad eum venit heri *Schelius*, & me secum coenare voluit. Jucundissime meminimus tui, literas & carmen mihi plausu relegimus. Laetabatur honore tuo. Jocabatur bellum indicendum esse Serenissimae Reginae, quod omnia pulchra Belgis eriperet. Tibi quoque felix iter precabatur. Vale denuo.

EPISTOLA CLXXXII.
NIC. HEINSIUS

J. F. Gronovio.

Daventrampi

Exemplar Senecae tui Serenissimae Reginae offerendum ante abitum meum parari poterat, si Ludovicum Elzevirium tempestive ea de re monuisses. Id quia factum non est, auctor tibi sum, clarissime & amicissime virorum, non nisi notis absolutis de munere isto in Sueciam mittendo ut cogites. Exemplar interim mecum feram non adornatum, quod Reginae exhiberi possit: alterum penes Elzevirium reliqui, e quo praefationis naevi sublatis sunt. Quod me.

memineris velim: nam a cacteris exemplaribus frustra id expectes. Notae ubi absolutae erunt, fasciculum illum ad me mittas rogo, quem Heroïnac nostrae traditurus sim. Sed festinatione opus: mihi enim certum moram in illis oris non trahere. Monendi igitur a te Elzevirii hortandique, ut maturent editionem. Claudiano quid futurum sit nescio. Si triduo etiamnum hîc moraturus sum, textum emendabo. Notas in ipso itinere absolvam: mea enim interest hac hyeme Claudianum prodire. Notas perlegendas tibi mittam, antequam praelo committantur, ut in iis mutes deleasque pro libitu, non tantum ea, quae displicebunt, sed de quibus dubitabis. Nam absit, ut nugas ingeniosas lectori venditare velim. Alios etiam, ut vidisti, auctores in notis emendavi: qua in re nimium fortassis mihi indulsi. Studio tamen id factum, ne perirent labores isti, cum certum mihi sit, studio critico post Ovidium luci datum, non ultra vacare. Quae delenda censebas, delevi. Tò *fastigia* nondum prorsus improbare possum. *Torqueat fastigia*, pro torqueat consulatus. Consulatus autem pro consulatus tempore ponitur. Sic alibi, *anni bis senas torquent hyemes*. Hac ratione si tibi non satisfactum, nihil obluctor, & licet observationem illam deleas, ubi notarum copia tibi rursus fiet. *Veslingium* nostrum Patavii obiisse nudius tertius hîc intellexi. Male sit latoribus ultimae tuae, elegantissimae profecto tersissimaeque, per quos non licet illam Sereniss. Reginae exhiberi. Nam adeo lutulentam caenoque respersam Elzevirio tradiderunt, ut nihil sordidius inquinatiusque visum mihi meminerim. Vide ergo, aliamne scribendam existimes, quae tutius monstrari possit. Litteras certe tuas subinde expectabo. Vale, meum decus, nobilissimoque *Schelio* salutem plurimam meo nomine dicas rogo. Argute quidem ille, qui existimet bellum Suecis indicendum, ne pergant praeclara omnia Batavis eripere. Arbitror tamen majori jure Batavos facturos, si bellum sibi ipsis indicant, qui bona sua non capiant, ac eripi sibi patiantur. De me interim securos esse vos jubeo. Per Suecos enim non statutum certus sum, quo minus fideliter vobis adhaeream. Sapiunt illi, mi Gronovi, nec ad quamvis mercedem excitantur. Vale. Lugd. Bat. *ciōiōcxlīx*. pridie Kal. Octobr. summâ cum festinatione. Claudiano *Patricii Junii* in Angliâ usus sum. Vossiana quoque excerpta videram, quae usui proinde esse non possunt. *Andreae Schotti* excerpta utinam videre potuissem, quae penes *Sixtinum* fuerunt olim.

EPISTOLA CLXXXIII.

J. F R. G R O N O V I U S

*Nic. Heinsio.**Amstelodamum.*

NOs vero jam in medio mari te navigare putabamus, & ventos ferentes ferenosque dies tibi optabamus, ego, inquam, & *Schelius*, mirati respon-

F f 3

sum

sum nullum abs te venire. Ille quidem jam, soluto conventu nobilium, discessit. Et agnosco potuisse exemplar parari, quod Reginae traderes: sed sperare non poteram, tantum etiam morae te illic facturum: ita paratum discessum tuum significaveras. Differemus igitur, & spero facile interea finitum iri opus, dum te Sancta ille & Piissima Siren detinet, ut officio tuo, quod tam benevole offers, uti possim. Placuit etiam consilium de alio exemplo faciendi literarum, quas, si tibi videbitur, per occasionem Reginae legendas dari velim. Itaque accipe, &, cum opportunum erit, monstrato (ita voveo) utriusque nostrum gratiam auge. Claudiano tuo ut summo studio favco, ita, quod a me expectas, tam debitum promeritumque tibi operae, id optima fide praestabo. *Veslingii* obitu discrucior. Vale, mi Heinsi. Deus tibi prosperet iter, & felicissime te ducat ac reducat. Tu quoque in omnibus curam habe tui, & ne quid temere. Iterum vale, lux mea, & optatis omnibus frui. Daventriae a. d. vii. Kal. Octob. Jul. ciciocxlix.

EPISTOLA CLXXXIV.

NIC. HEINSIUS

J. Fr. Gronovio.

Daventriam.

VIr Clarissime. Tandem post longam moram ventus favere coepit: crastino igitur mane aequor arandum: quod ut feliciter succedat, Deum veneror. Nam valetudo plane nutat, & nescio quid adversi minatur. De *Veslingio* scripsi proxime. *Kinschotius* noster pessime habet, febricula correptus: ne tabes subsit isti morbo vehementer metuo, & ut dicam quod sentio, actum esse de elegantissimo amicissimoque juvene, prorsus credo. Quod si fit, parte mei carere incipiam, & mihi ipsi superesse. Affligit ea res me mirifice. Sed divinae benignitati haec permittamus necesse est. Claudianum a me castigatum hîc habes, paucis pagellis exceptis, quas proxima occasione mittam, una cum Graecis versibus hactenus ineditis, quos ad manum nunc non habeo, inter schedas meas dispersos. Notas inter navigandum absolvam, quae & censurae tuae sese sistent, antequam edantur in publicum. Ad Elzevirium cum scribes, monendus est, Claudianum penes te esse: notas mox secuturas: ne ille ad alios libellos edendos se convertat. Vale, meum decus, &, si me amas, frequenter scribe. Amst. MDCXLIX. Nonis Octobr. scribebam multa nocte.

Senecae exemplar mecum feram: nullo tegumento tamen comptum. In Claudiano ordo servandus est, qualem in indiculo hoc, qui praefigendus, expressi.

EPISTOLA CLXXXV.

NIC. HEINSIUS

J. Fr. Gronovio.

Daventriam.

Amstelodamo antequam discederem, Claudiani editionem Raphelengianam, manu mea emendatam, ad te misi. Eam tibi redditam existimo. Habes hîc Graeca, quae desiderabantur: ea, quia festinandum, non vacat describere. *Allatii* manum agnoscis. Epigrammata εἰς Μιμάδα Γηρόσασαν, ἢ εἰς δῆλον τυπηθέντα subijce, quaeso, duobus epigrammatis εἰς κρύσαλλον, quae in Raphelengiana editione leguntur. Carmina duo εἰς τὸ Σωτήριον (nam caetera Claudiani non sunt) sequi debent carmen illud, *Christe potens rerum*: duo enim alia, quae in vulgatis editionibus leguntur, in scriptis codicibus non extant, nec Claudiani esse persuadeor. Fragmentum τῆς γιγαντομαχίας Gigantomachiam Latinam sequi debet. *Allatii* manum diligenter serva, quae utilis esse possit ob glossas marginales. In Claudiano nihil mutavi, nisi quod aut ratione aut scriptorum meliorum auctoritate niteretur: si quae tamen perperam mutasse videbor, aut si quae dubia occurrent, vulgatam lectionem ut revoces, tutissimum existimo. Notas magna ex parte descripsi, caetera absolvam, ubi Holmiam venero. Tu interim Elzevirio mitte, quae penes te habes, aut, quod malim, *Goesio*. Is enim Leidam evocatur sub festum S. Martini, ut novo magistratui creando intersit. Editionem ipsam hac hyeme omnino absolvi velim, quicquid de reditu meo tandem fiat: quem tamen non protrahendum existimo. Illud monere neglexeram, Indici Graeca illa, quae hîc habes, suo loco inferenda esse: quod a me factum non est. Pagellam unam alteramque carminis in Herculem mittam proxime: nec est, quod editionem haec morentur, cum ex vulgatis exemplaribus suppleri possint. Praesta, quaeso, mihi hîc Gronovium illum, quem rebus meis addictissimum haecenus expertus sum. Holmiam cras contendemus, si ventus favere pergat. Vale, Virorum amicissime, & summae festinationi ignosce: modo enim huc adveni: etiam abitum parat tabellarius. In Claudiano edendo is ordo omnino servandus, quem in indice expressi, rogo ut in ipso textu id accurate notes, ne hîc impingant operae typographicae. Holmiam ubi venero, *Erpenium*, aut alium quemcunque, per litteras rogabo, ut curam editionis habeat. Vale iterum. Elsenorae CIOIOCXLIX. Octobr. stilo novo. Editionem ut apud Elzevrios, quantum in se, promoveat, *Goesio* mandavi.

EPI-

EPISTOLA CLXXXVI.

J. FR. GRONOVIIUS

*Nic. Heinsio.**Holmiam.*

Pervenisti salvus? & benigne exceptus es &? frueris spectaculo, quo nullum majus hodie laetiusque in terris? Quando mihi nuntios tam beatos? Spero equidem, & confido: ita, nisi fallor, post tuas Elfenorae datas commodior tibi tempestas fuit: quae si defuisset, vel terra reliquum potuisti iter conficere. Fac igitur, quamprimum casus tuos, vel proventus potius, ne quid ominer dubii, cognoscamus. Claudianum tuum fere totum perlegi: sed, ita me Musae, quocumque oculi inciderunt, tam eleganter & diligenter abs te habitum vidi, ut meam tam disparem limam applicare religioni ducerem. Epigrammata Graeca inserui suis locis, ne in his quidem ausus sum mutare quicquam, etsi quibusdam in rebus dubitarem, & ut videbatur, corrigere primum esset. Quia primum e MSS. edebantur, credebam religiose te servare illas, quas invenisses, literas: si quid mutandum censeret, Notis reservare. Simul cum his libellum ad fratrem adfinem tuum mittam. Elzevirios quoque, quod jusseras, praesens monui, penes me esse, & cupere te, ut statim praelo darent. Meae in Senecas notae sunt absolutae: jam vidi ultima: in indicibus nunc laborant, si non jam laboravere. Te autem jam desideravi: Ecce enim, nescio quis audaculus praefationi ad lectorem, inscio & invito me, integram sententiam, *παρενέσσει* inclusam, ineptissime inseruit. Et quamquam de eo monuerim in erratis, idem haud dubie curabit, ut hoc lector nesciat, admonitiunculamque meam delebit. Quas postremas ad te dedi, serius advenerunt, quam ut in Hollandia videres, sed jam tamen ab affine transmissas puto, aut si non sint, te tamen officio functum. Nihil enim aliud in illis commendaveram tibi, quam ut Serenissimae Reginae devotionem meam, cum commodo fieret, deferres ac testarere; *Vossium* & *Freinshemium* meo nomine quam humanissime salutare. Idem nunc quoque te oro. Vale, Nobilissime Heinsi, & me ama. Dii te maximae Principi probabilem praestent. Iterum vale. Daventriae a. d. iv. Non. Novembr. Jul. *ciōiōcxlīx*.

EPISTOLA CLXXXVII.

J. FR. GRONOVIIUS

*Nic. Heinsio.**Holmiam.*

Quia asportasti tecum imperfectum opus Annaeanum, & postremam partem, simulatque perfecta foret, mitti jussisti, en eam tibi. Quod mutari

in

in praefatione vobis visum est, mutatum est hoc modo: *nec disputo, utrius sit majus meritum: neutrius enim quod praecipuum est, solum est, sed ubi ille crepidinem* &c. ut statim perscripsi tibi. Certe per eundem, qui responsionem ad tuas Amsterodamum portabat, tabellarium ad Elzevirios literas dedi, quia mutandum hoc omnino esset, & jam in parte istius folii alia, passimque in distinctionibus peccatum esset, totum primum folium, meo sumptu, recuderent. Hoc me moratur, quo minus Serenissimae Reginae nondum etiam exemplar meo nomine mittam. *Jarrigius* Mopsus Nisam tenet, ut validus narrat rumor. Hilara Saturnalia. Vale, nobilissime Heinse, & me ama. Hoc malo, quam Nisam tenere. nec Galataeam relinquam. Iterum vale. Daventriae Nonis Decembr. *CIDIOCXLIX.*

EPISTOLA CLXXXVIII.

NIC. HEINSIUS

J. Fr. Gronovio.

Daventriam.

Claudianum meum tantae tibi curae esse, Vir Clarissime, & laetor, & pro affectu tam luculento quidvis debere me tibi profiteor. Notas necdum absolvi, cum densissimis premar haecenus negotiis, quae rebus meis ut vacem non permittunt; restant tamen pauca, quibus sequenti hebdomade finis imponendus, nisi Magna Princeps Upsaliam perendie profectura me secum trahat. Ad Epigrammata perventum vides, ut magnae rei non sit caetera pertexere. Quae hîc habes operâ tumultuariâ, & nocturnis, ut plurimum, horis exaravi. Ne perlegere quidem licuit, quae properanti & aliud agenti exciderunt; adeo meus non sum. Exigebat, fateor, haec res majorem curam, nisi quod urgent Elzevirii, qui, nisi solito more fallunt, ipsum Claudianum praelo jam commisere. Nolui itaque ullam in me moram esse, caetera, ut jam dixi, cum praefatione proxime, aut saltem intra dies quatuordecim missurus. Interim ut haec perlegas, & quicquid aut festinando, aut ex inscitia peccatum, mutes corrigeasque, vehementer atque anxie rogo, cum de existimatione mea agatur, quam commendat tibi abunde, sat scio, necessitudo nostra. Spero quidem tempestive me adfuturum vobis, ut editioni ipse intersim, sed hoc incertum, nec in mea potestate situm, quo magis danda tibi opera, ne mihi hîc desis. Editionis curam *Johannes Erpenius*, doctissimus juvenis, in se recepit, a cujus diligentia multum mihi promitto. De caelesti heroina nostra proxime nonnihil scripsi, cujus veneratione fatiari non possum, adeo fidem omnem superant tot ac tantae certantes in uno pectore virtutes. Poësi praefertim ita capitur, ut haecenus non viderim, qui caperetur magis. Itaque frequenter, velim nolim, cantandum mihi, sed sine rivali: adeo nullus est in hoc regno, praeter Reginam, qui pretii multum huic studio ponat. Advenit tamen Legatus nuper ex Gallia, quem mirificum in scribendis versibus artificem

ferunt. Et crediderim, quod regina sic arbitretur ipsa. Senecas tuos quando tandem videbimus? In dedicatione mutata a te existimo, de quibus monebaris proxime. Tragicum ut addas auctor tibi ac Elzevirii sum. Id enim gratum imprimis futurum incomparabili heroinae. *Vossius* noster amanter te salutat, scripturum se pollicitus occasione proxima, quae jam non semel elapsa. Nobis procraftinationes amicissimi hominis. *Freinshemius* valet & *Boeclerus*. Nobilissimus *Schelius* noster quid molitur? Salveat ille plurimum meo nomine. Et si tanti est, ferat hoc a te epigramma, quod strenae loco serenissimae Reginae intra dies paucos destinavi. Vale. A. CIOIOCLIX. a. d. IX. Kal. Jan. stilo Gregor.

1 Legitur lib. 1. Silvar. pag. 147.

EPISTOLA CLXXXIX.

J. FR. GRONOVIIUS

Nic. Heinso.

Holmiam.

Tertiis, enī, ad unas respondeo tuas, mi Heinse. Primis promiseram me emendaturum, quod Serenissima Regina praecipere dignata est. Alteris, quod tu jusseras, quarti tomi, simul perfectus fuit, exemplar ad te misi. Hic habes recusum illud primum folium meo sumtu integrum, & in primis sublatum illud, quod displicebat. Nihil in me fuit morae! Heri demum mihi redditum est. Et tamen aliquot dies abibunt, antequam exemplar, quod Suae Majestati ipse destino, contum nonnihil & deauratum (non pro ipsius magnitudine, ne quidem pro animo meo, sed pro loci hujus captu) dimittere a me possim. Nam mutato illo primo folio, aliud exemplar totius primi tomi (jam enim paratum erat, antequam acciperem tuas) parandum est. Interim has, quas inclusi literas, differre ultra commodum non est visum. Si nihil aliud; ut tu (quid minus animo quam frater meus?) eas mollibus fandi temporibus captatis traderes. Nec scio, quamdiu mansurus illic sis. Dubito interdum an aliud exemplum earundem literarum velim alia via mittere, si fortassis hae perierint. Sed spero fortunam nobis propitiam fore. Utinam sit & in tradendo! de quo constitues cum *Vossio* nostro. Vale, mi Heinse, & rem tuam nostramque bene gere. Daventriae a. d. IV. Kal. Jan. CIOIOCL. quae tibi felices exoriantur.

EPISTOLA CXCI.

NIC. HEINSIUS

J. Fr. Gronovio.

Daventriam.

IN penultimis tuis recte monēbas, Graeca illa codicis Vaticani parum emendata esse, qua de re ob summam festinationem non cogitaram: tui igitur arbitrii esto illa emendare, aut in textu ipso, aut, si hoc serum est, in erratis typographicis. Legitur alicubi *εις μιμῶδα*, ubi legendum videtur; *μασι-νῶδα*: tu videris. Lib. i. in Eutrop. v. 291. *Thebas ac funera Trojae*. Nihil mutandum. Dele igitur in notis, quicquid tentavi in illo loco, & mone, τὸ *labes*, quod inscriptis plerisque est, non esse admittendum. Sic *Thebas & Trojam* Lucretius quoque conjunxit. lib. v.

*Cur supera bellum Thebanum & funera Trojae,
Non alias alii quoque res cecinere poëtae?*

Vale. Raptim *ciōiōcl.* xii. Kal. Febr. Jul.

EPISTOLA CXCI.

NIC. HEINSIUS

J. Fr. Gronovio.

Daventriam.

Vir Clarissime. Quanquam febriculâ tentatus debilisque, ab incomparabili nostra heroinâ revertor hoc ipso temporis momento: quam non alio convenio nomine, nisi ut epistolam tuam; hodie demum mihi redditam, offerrem. Dedit eam mihi legendam, ut quam elegantissime scriptam affirmaret, gratissimamque sibi testata est. Restat, ut exemplar sibi a te destinatum aliquando accipiat. Id omnium commodissime tutissimeque *Appellornio* commendabis. De caeteris tum viderimus: Reditum in patriam meum, quando vobis sperandus is sit, nescio. De eo certe cogitare nunc non vacat. Neque quicquam hîc impetraturus sum, nisi ut amicis valedicam, & in has oras recurram. Vides me captum? Quid? quod luculentis humanissimisque litteris a patre nuper me petierit, tanquam munus alicujus pretii, & quod acceptissimum sibi fore profiteatur. Addit & multa in laudes meas, quae jugulabunt homines illos, quotquot iter Suecicum improbarunt. Senex noster quid ad haec responsurus sit, ignoro. Credo tamen manus daturum. Vale. Claudianum iterum tibi commendo. Ex arce Holmiana. *ciōiōcl.* v. Kal. Febr. Jul.

EPISTOLA CXCI.

NIC. HEINSIUS

J. Fr. Gronovio.

Daventriam.

IN patriam reversus, & itineris longi molestique difficultatibus expeditus, vix tandem ad te scribo, Clarissime Gronovi. Nudius tertius huc appuli, ejus rei ut inter primos certior te facerem & vetus necessitudo nostra requirebat, & divina Princeps, quae discedenti inter ultima mandata jussit, indicarem tibi, Senecas tuos sibi acceptissimos fuisse, pluribus id se testaturam, ubi exemplar destinatum sibi acceperit, nec commissuram, ut de illiberalitate sua possis conqueri. Advenisset exemplar illud me in illis oris haerente maluissem. Sed quia lentius processit negotium, *Vossius* noster ut hinc tibi adsit necesse est. Oblatam tibi a collegis Hamburgensibus ad se legationem Regina intellexit, & non admissam miratur. Ea in re ut uxori tuae non male, ita an tibi bene consulueris ignoro. Habes hinc duas a cognato tuo. Si quid in negotio vestro effectum cupitis tu ac collegae tui, auctor omnino vobis sim, ut manuscriptos, quos cathedralis ecclesia possidet, codices, quique & pauci, nec magno illic in pretio sunt, Reginae offeratus: certus enim sum, gratus illi nihil donari posse, cum in eo tota sit, ut bibliothecam suam tali supellectile instructam reddat, certa nullis sumptibus parcere. Suos jam dedit *Vossius*, ego meos daturus sum. Age, quaeso, ea de re cum cognato tuo, sed ita ut dissimules meo instinctu id fieri. Ex eventu negotii vestri apparebit, opinor, consilium non futile a me vobis datum. Filius ejus Tubingae studio Juridico nunc operam dat, juvenis, ut audio, summae expectationis summaeque spei in re litteraria: molesta mihi fuit ejus absentia, dum transirem per civitatem Hamburgensem, unice enim cupiebam illum mihi conciliatum, quo affectu erga litteratos omnes esse me nosti. Poteram etiam ejus opera certe aliquid de *Barthii* Claudiano intellexisse, nunc nemo illic inventus, qui desiderio satisfecerit. Audio illum Argentinam & Basileam nunc cogitare. Quapropter rogo te ac obtestor, mi Gronovi, ut ad illum scribas, si quid aut Ovidii, cujus editionem brevi paraturus sum, aut Claudiani in bibliothecis illis invenerit, quod notae alicujus sit, id communicare mecum ne gravetur. Argentinae quidem in bibliotheca publica praestantissimum exemplar Ovidianarum epistolarum, Constantinopoli alatum, servari *Boeclerus* monuit. Nam metamorphosis, ex qua excerpta vidisti, non est magnae rei. Bernae inter Bongarsianos codices auctoris utriusque codices extare ex catalogo didici. Sed & in id inquiras, cum illi scribes, velim, an venales adhuc libros ullos scriptos habeat *Barthius*, omnes eum vendidisse.

2 Lucas Langermannus.

didisse intellexeram, practer unicum Claudiani exemplar, praestantissimum illud, & quod magno apud eum sit in pretio. Si supersunt illi membranae adhuc aliquae, emptores facile invenerit me aut *Vossium*. Haec nunc. De caeteris confabulabimur, ubi ad nos veneris: adventum enim brevi tuum sperare me jubet collega tuus, harum lator. Illud tamen te rogo, ut praemoneas me, quando sis expectandus, ne domo ipse absim, cum veneris. Famulum quaero Latinarum litterarum peritum, talem si nosti, mone, sed velim, qui ingenii non sit admodum obtusi, quique spem de se concitet fore, ne perpetuam servitutem serviat ad majora natus. Vale, meum decus & summae festinationi ignosce. Libros, quos utendos a me accepisti, ut tecum feras rogo, mihi enim vasa colligenda, feras & Claudiana ἀνέκδοτα, manu *Allatii* descripta. Lugd. Bat. CIOIOCL. XII. Kal. Maj. stilo Gregor.

EPISTOLA CXCIH.

J. F. R. GRONOVIIUS.

*Nic. Heinsio.**Leidam.*

ET adventu tuo mirifice sum laetatus, & pro opera, quam mihi dedisti in portandis avunculorum literis, maximas tibi gratias ago. De exemplari Senecae quid fuerit factum, Dii norunt: sed tamen ante mensem a *Rottendorffio* literas habui, id missum in Sueciam cura Domini de *Greigerfon*, Commissarii Generalis exercituum Suecicorum, nec se dubitare, quin jam tum regiis manibus exceptum esset. Sed de his, ut & de legatione (de qua semper haecenus ita mecum est actum, ut aliquid restaret agendum, ne meam istam culpam putes) & caeteris, de quibus meministi, coram. Has enim effundo tantum ca de causa, ut me sub initium sequentis hebdomadis expectes, de quo voluisti praemoneri. Quae mandasti, mihi curae erunt. Vale, decus meum. Daventriae. v. Kal. Majas CIOIOCL.

EPISTOLA CXCIV.

J. F. R. GRONOVIIUS.

*Nic. Heinsio.**Leidam.*

EN tibi, Nobilissime Heinsi, famulum, qui, ut spero, omnibus rebus tibi se probabit. Nomen *Johanni Mauricio Vestlingio* est, quo ipso tibi gratior erit, cum tanti viri & amici, nuper defuncti, vocabulo te suo admonebit. Proposui ipsi, quae facienda & ferenda habiturus esset, ad omnia manus promisit,

misit, alacrem & paratum se affirmavit. Tradet Euripidem tibi, quem desiderasti. Amsterodamo discessi, quo die appuli, invitatus tempestate & vento. *Vossiam* tamen salutavi, & literas illic ab *Isaaco* ad me inveni. Scribit eadem, quae tu nuntiaras, Senecas tandem redditos & Sereniss. Reginae ab se oblatos & libenter visos: suum silentium excusat: valetudinem divinae Principis ire in melius. De adventu suo nihil, quem tamen & mater exspectat. Adfinem tuum quaesitum, cum ostiatim regionem mihi indicatam oberasssem aliquandiu, & a nemine responsum, quod vellem, acciperem, jamque omnium (quippe ut festo die omnes ad januas) vultibus notarer, pudore confusus quaerere desii, & me inde subduxi. Video in *Sixtini* librorum catalogo volumen, in quo Senecae nonnulla, de beneficiis, de clementia, epistolae, Quaestiones naturales; item aliud, in quo Senecae declamationes. Utinam vel tu, vel *Vossius* emeretis, ut mihi quantumvis brevis eorum usus contingeret! nam tertium epistolarum volumen, permittente *Sixtino*, aliquando vidi & contuli. Video ibidem quatuor vel quinque Arnobios, etiam Elmenhorstianum, quem te quaerere ajebas. Tentabo, an unum ex iis nancisci possim, vel Romanum, vel Heraldii. Vale, mi Heinssi, & me ama. Daventriae. iv. Non. Maj. Julian. cxcxc.

EPISTOLA CXCIV.

NIC. HEINSIUS

J. Fr. Gronovio.

Daventriam.

Euripidem tuum, Vir Clarissime, tradidit mihi, quem misisti, famulus. Ego & pro hoc & pro illo multum tibi debeo. Puer enim modestus est, quantum video, & de quo bene spero. Euripides magno mihi usui erit apud optimam principem, cujus tamen pertinax valetudo de futuris gaudiis cogitare me vix finit. Non aegrotat tantum illa, sed decumbit, idque ex tertiana febris. Quod genus morbi, quanquam letale raro sit, lecto tamen affixam haerere dominam non placet. Quod haud faceret, sat scio, nisi vires miris modis debilitatae essent. Nos huc praeter vota nihil conferre possumus. Spero clementissimum Deum tam sacri capitis fructum diu nobis indulturum. Elzevirio Victorium in poëticen Aristotelis & Mythologos veteres tradidi, quibus Senecae Tragoediae, manu exaratae, adjectae sunt, ut iis ante discessum meum utaris, si tanti esse videbuntur. Scis enim codices meos scriptos Reginae offerendos. Ait Elzevirius jam eos ad te missos, nec dubium est, quin recte curati sint. De Senecis *Sixtini* ut desideriiis tuis satisfiat curabitur. Puto enim in mandatis a *Vossio* habere *Junium*, ne ullo pretio deterreri se patiatur, quominus juris sui faciat quicquid est inter *Sixtinianos* libros exaratorum codicum. *Elmenhorstii* Arnobium, si aequo pretio haberi possit, meum esse

esse velim. Sin minus, feram. *Le Mairius* enim, postquam annos totos octodecim a *Salmasio* lusus est, id nunc agit, ut *Arnobium* luci det, non *Elmenhorstianis* tantum commentariis illustratum, sed *Heraldi* etiam, & *Stewechii*, & *Canteri* & caeterorum, qui aliquid operae in illum contulerunt, observationibus ornandum. Accedent *Octavius Minucius* & *Firmicus*. *Salmasius* ipse in *Zelandia* aegrotat. Vale, mi *Gronovi*, cum tuis, meque, ut facis, amare perge. Lugd. Bat. A. MDCCCL. a. d. xiv. Kal. Jan. Gregor.

Menagius opuscula *Balzacii* Latina edidit, ac *Reginae* nostrae inscripsit. Vides ad illam certatim omnes concurrere. Literas ad mercatorem *Amstelodamensem* recte a te curatas spero. Quo magis miror, nihil responsi me hactenus ab illo accepisse.

EPISTOLA CXCVI.

J. F. R. GRONOVIVS

Nic. Heinsio.

Leidam.

Senecam membranaceum tuum, Nobilissime *Heinsi*, conferre coepi, non quod magnum inde adjumentum sperarem, (scis enim post *Florentinum* omnes codices fondere) sed ut magis multiplex tuum in hoc opere erga me beneficium dicere & praedicare possem. Quam etiam paruerim literis tuis, festinare jubentibus, ex eo cognoscas licet, quod jam ad *Agamemnonis* quintum actum perveni. Si nihil aliud, subnata sunt quaedam hac iterata lectione, quibus nollem carere. Ut in *Troadibus*: vers. 192.

*non parvo luit**Iras Achillis Graecia: at magno luet**Desponsa nostris cineribus Polyxene;**Pyrrhi manu matetur & tumulum riget.*

Omnino enim, nisi tu nevis, scribendum puto: & magno luet, Ni sponsa nostris cineribus *Polyxene* *Pyrrhi* manu matetur. Minae enim universae sunt, in *Graecos* ipsos. Et statim ante:

*Ite, ite inertes, debitos manibus meis**Auferte honores.*

Hoc mecum sentis, ubique metri studiosissimum *Senecam* fuisse. Ergo non potest haec lectio tolerari. Liber optimus: *manibus debitos meis*. Eodem vitio, sed facilius, ut spero, corrigendo. Annon enim probabile est *Senecam* scripsisse: *manibus justos meis Auferte honores*. Ut *Medea* vers. 997. *justa jam funtis habent*. Nec difficilis conjectura de corruptione. Ex *uistos*, *uitos*, aliquis *debitos* fecit. Sed quo haec? quo omnia mihi, nisi offeram & probem *Sanctissimae Dominae* nostrae, cujus morbo durae literae tuae iterum me vulnerant. Nec tamen sperabo, nos adeo stirpem invisam superis esse, ut tanto praec-

praesidio, postquam vix exortum est, statim privemur. Ο' μὴ γένοιτο, οὐδ' ἔσσι. De MSS. *Sixtini* libenter audiui, quod nuntias. Sed & de *Heraldo* Maiirii. Literas tuas mercatoris domesticis ea hora, qua Amsterodamum veni, ipse manu mea tradidi. Quos libros emi velim mihi, mandabo *Junio* nostro, qui suam operam mihi obtulit. Ita cavebimus, ne forte *Vossius* & ego in licitando certemus, nam quos ille voluerit, iis ego ultro cedam. Sunt autem perpauci. quos designatos apud ipsum videre poteris. Vale, mi Heinſi, & saluta vestros, meque ama. Daventriae vi. Kal. Jun. Gregor. cıııııcl.

E P I S T O L A C X C V I I.

J. F R. G R O N O V I U S

*Nic. Heinſio.**Leidam.*

Codicem Tragoediarum Senecae remitto en tibi, postquam eum integrum contuli, quatenus scilicet integrum passa est puerilis stultitia hominum, nimiam voluptatem animi in pictis imagunculis habentium. Facile tuebitur locum in copiis nostris, si non inter triarios, at inter velites, aut hastatos. Octaviam in conferendo diligentius consideravi, & nonnulla de conjectura correxi. Quid quaeris? Senecae non est, sed tamen proxime post illud aevum scripta: nec tam inepte, ut quondam putavi: sed nihilo minus corruptam censeo, quam postremam Thebaidem, sive Phoenissas, aut Oetaeum Herculem. Huic tamen succurrit Mediceus: illas quis juvabit? Quam locupletem te Sixtiniana fecerit auctio, quid factum MS. & an factum, quod opinabare, scire aveo. Discrucior in primis, nondum quicquam me ex *Junio* intellexisse, quem offerentem officium suum libens procuratorem meum feceram. Narrarunt adventores nobis pleraque librorum addicta vili. Dicitur alius scripsisse magnam pecuniam factam. Illud laetatus sum nuper videre me in novis, Sereniss. Regina convaluisse. Sperabimus igitur citius adventurum *Vossium*. Tu quid de itinere tuo constitueris, scire cupio. Vale, nobilissime & clarissime Heinſi, & vestros saluta. Daventriae viii. Eid. Jun. Jul. cıııııcl.

Ante discessum tuum fac mihi designes vicum & domum affinis tui Amsterodami, ut sciam, quo mittere debeam, quas ad te destino. Ο' δὲναι quando ibit? aut quid constituisse dicitur?

E P I S T O L A C X C V I I I.

N I C. H E I N S I U S

*J. Fr. Gronovio.**Daventriam.*

V Ir Amicissime. Speraveram Sixtinianae bibliothecae auctioni te interfuturum, haec causa est, quod tuis nihil haecenus reponam. Senecam
quia

quia non misisti, mitte quaeso: navis enim intra dies octo aut novem Holmiam abitura, cui sarcinas meas credam. Ipse discessurus hodie, ut in portu Vliensi *Canterstenium* offendam, quem illic etiamnum ventis adversis detineri constans rumor est, ac cum illo porro in Sueciam contendam. *Vossius* quotidie hîc expectatur, qui jam ante mensem Holmiâ discessit. Ejus tamen adventum expectare non possum, quanquam maxime vellem, quod effluerit jampridem tempus, quod rebus meis componendis a Regina impetraveram. In Seneca quae curis ultimis emendasti, mirifice placuerunt. Utinam auctorem illum brevi dares publico! scis hoc illam flagitare, cui nec Dii quicquam haecenus negarunt. Prodiit vastus *Barthii* commentarius tandem in Claudianum, quem a librario heri accepi. Codices septemdecim jactat, ad quorum fidem poetam illum castigavit. Video tamen in multis illum haerere, e quibus feliciter satis me expedivi: poteram & ego triginta codices jactasse. Notas meas, etsi limam requirebant, non inspexi, postquam e Suecia reversus sum, ne ille quereretur, aliquid sibi sublectum, ejus rei testes mihi typographi. Tu vale, & si me amas, frequenter scribe. Famulus satis gnavum sedulumque se praebet haecenus. Amst. CIOICCL. XVIII. Junii.

EPISTOLA CXCIX.

NIC. HEINSIUS

J. Fr. Gronovio.

Daventriam.

DIes decem & octo circiter jam sunt, quod Holmiam adveni: ubi omnia sic satis salva, praecipue Regina, quae una instar omnium. De inauguratione nihil haecenus certi, adeo aliis negotiis conficiendis, quae praemitti oportet, comitia protrahuntur: quantum ego quidem auguror, intra menses duos nihil sperandum. *Vossius* noster jam in Galliis est, ni fallor, inde reversus te, ut arbitror, compellabit. Si biduo distulissem iter Suecicum, convenissemus Amstelodami: quando ad nos rediturus sit, non constat, promisit tamen solemni festo se interfuturum. O' δέῖνα bona tandem fide in Sueciam videtur cogitare, & puto viae jam se commisit, duo quidem ex famulis ejus, quos praemisit, ante dies aliquot huc advenerunt. Ex Sixtinianis libris paucos comparavi, plures pro me *Junius*, cum auctioni ipse, non nisi tribus diebus, interesse possem, quod in procinctu itineris stare: iis libris quid factum sit non scio. Rogaveram quidem *Junium*, ut eos ad *Goesii* aedes deferendos curaret, quo sarcinis meis infererentur, quod & ille futurum in se recipiebat. Haerent jam in hoc portu sarcinae, negat tamen *Goesius* Sixtinianos libros iis additos, quod *Junius*, quanquam per famulum identidem compellatus, promissum non praestitisset. Metuo ne manum iis injece-
rit *Vossius*; cujus tamen gratiae hoc dedi, ut libros omnes manu exaratos

Tom. III.

Hh

aut,

aut cum manu exaratis collatos, elabi mihi passus sim, quos omnes sibi vindicavit. Bibliotheca immenso pretio distraeta est; quod mirari satis non possum, cum potior librorum pars negligentissime a *Sixtino* habita computruisset. Ciceronem *Gulielmii* venditam puto septuaginta florenis, & *Vossio* additam: emit is & duo aut tria Senecae exemplaria, *Gruteri* manu passim notata. De Octavia recte judicas, scriptum est non magni pretii, sed quod Hercule Oetaeo tamen praestet; quam ego Tragoediam sine indignatione non lego, tam insulsa apparet. *Freinshemius* novam partem supplementi Liviani praelo paratam habet. Aiebat nuper *Rottendorffium* scripsisse nescio quid de inventa magni auctoris decade aliqua prope Coloniam, in monasterio hactenus mihi ignoto. Metuo itaque ne praeveniatur *Croyus*, nisi festinet suum nobis Livium dare. Aderat mihi hesterno die clarissimus *Boeclerus*, qui promittebat se aliquid fasciculi hodie tibi missurum. Nescio quid inter illum & professores caeteros Upsaliae turbatur: questus est, ut audio, de injuriis sibi illatis apud Serenissimam Reginam, & abitum aperte minatus est, quod negavit illa se permissuram, nihilque non egit, quo exacerbatum ejus animum placaret. Sed frustra, ut nonnulli volunt, puto illum vitae Academicae pertaesum ad aulam aspirare: hoc uno modo exorandum, ut in Suecia maneat. Haec in aurem tibi, nolim enim hominis non male de me meriti res turbatas meâ operâ propalari: cum non desint illi in patria hostes, quibus acceptus sit futurus iste nuncius. Occurrebat mihi etiam nuperrime in hac urbe *Loccenius*, vir omnino bonus, cujus filiam duxit *Schefferus*. librum hujus de re veterum navali Jansonius edendum in se recepit. Haec de rebus nostris; apud vos quid fiat fac sciam. *Conringium* adduxit illustrissimus *Salvius*, & puto hîc mansurum, quanquam neget ipse id hactenus. Vivit & hîc *Christianus Ravius*, qui Arabicas apud nos litteras professus est, nunquam nisi magna locutus. Summis Reginae occupationibus fit, ut studia in tempus valere jubeat. Claudianus meus parum abest, quin ad insaniam me redegerit, adeo nihil in illo promovenit Elzevirii. Vale. Holmiae. Eid. Jul. Julian. c1610ce.

E P I S T O L A C C.

J. F R. G R O N O V I U S.

*Nic. Heinsio.**Holmiam.*

L Iteras tuas admodum exspectatas heri accepi, & laetor, te salvum, quodque plus est, ad salvam Dominam pervenisse. *Vossius*, me per *Junium* tantum quod salutato, & rogato si quid vellem Lutetiam, transiit. Nam & tam brevem diem responso meo definierat, ut facile appareret, nec me, nec literas meas moraturum. Ex auctione vix tres accepi libellos, quibus hoc adest boni, quod eos teneo sine invidia: nam si quisquam oculos adjecisset, satis scio, caruiss-

sem.

fem. Illi, cui mandata te dedisse scribis discessu tuo, & bonus apparuit cognatus, & malus mandatarius. Corrogaverat binis ad me diligenter scriptis a me, aliis a *Tollio*, *Altingio*, mandata: destituit omnes. Jure cui studuit. Sed quid opus erat ultro deferre aliis officium, quod studio suo sciret contrarium fore? Nos altum in utramque aurem dormientes poene domesticum bellum subito excitavit: sed magnum casum fortuna reipubl. discussit. Miseram *Gevartio* exemplar Notarum, quod meo nomine traderet *Alberto Rubenio*, & isthoc exemplo ad pulchram aemulationem, & sua observata e compluribus MSS. publicanda instigaret. Dedit ad me ipse literas postea humanissimas, & pleraque illorum sex chartis, seu foliis vel quaternionibus, conscripta transmisit. Pauculis locis nostra corrigit, interdum vere, ubique ingeniose: sed longe plurima aut consentiunt cum nostris, aut talia, ut ipse nostra praeferat. Rides me quasi καυχώμενον. Non facio: & tamen dum audis laudari doctrinam, & maxime candorem ac praeclarum animum amici nostri, quem tu primus indicasti mihi (nam meministi, credo) non feres acgre, si clanculum ego quoque & in sinu gaudeam nonnullo laborum fructu. Libellum Observationum hoc tantum moratur, quod animosus typographus, dedignatus informes typos hujus oppidi, curavit fundi novos Batavicorum aemulos. Idem, quia intellexit per pauca exemplaria priorum Observationum distracta, egit mecum, ut eas redderem incudi suae: quo nihil mihi contigit magis optatum: itaque illas quoque σύν θεῷ mire videbis interpolatas. Senecae Tragoedias apud Hackium, qui me tamdiu lactavit, prodire tandem audio cum scoriis illis usitatis pannucearum annotationum per eundem, qui Sallustii margines conscribillavit. Vellem, aliquo laboris nos levaret: sed nosti hominem. Ampliff. *Freinshemio*, ubi commodum erit, meo nomine officiosam salutem dicas, eique gratias agas pro supplemento Liviano, quod ad me missum a *Vossio* nostro libenter sane vidi & legi. Gratissimum erit etiam, quicquid a Cl. *Boeclero* veniet. Vale, decus nostrum, & me ama, & crebro salutemus inter nos. Daventriae. Nonis Sextilib. Julian CIOIOCL.

EPISTOLA CCI.

NIC. HEINSIUS

J. Fr. Gronovio

Daventriam.

SI ad manus tuas pervenerunt, quas non ita nuper exararam, Gronovi amicissime, itineris mei successum ignorare nequaquam potes. Claudiano meo manum a typographis ultimam tandem impositam confido. *Goesium* itaque nostrum rogavi, exemplar ejus ut ad te mitteret: quod aut factum jam ab illo, aut faciendum brevi arbitrör, rogavi etiam, ut alterum *Schelio* tradendum ad te mitteret, si is Hagâ in Transfulaniam profectus esset, sin Hagae etiamnum

Hh 2

hae-

haereret, curae *Erpenio* fore, ut exemplar sibi destinatum accipiat. Senecae manu exaratas tragoedias nuper cum aliis libris accepi, pro quo gratias immensas ago. *Vossium* quotidie hîc expectamus: emit ille Parisiis, quod notum jam tibi existimo, Petavianam bibliothecam. Sixtinianos quoque codices plerosque naatum existimo. Bremenses Goldastianos etiam meliores jam miserunt. Ego meos, suos *Vossius*, Reginae donavimus, quibus libris in unum congestis futurum est, ut regia bibliotheca codicibus scriptis egregie instruat. De Claudiani & Ovidii exaratis exemplaribus excutiendis ut cognatum tuum moneres, quem Germaniae bibliothecas diligenter pervolvere intellexi, rogaram, curae id fuisse tibi confido. Claudiano enim manus brevi denuo admovebo, ut emendem, quae ab operis typographicis satis multa errata occurrunt praevideo, eadem cura & Barthii commentarios evolvam. Mox Ovidio manum admoturus. Cum ad reverendissimum *Mallinckrotium* scribes, aut *Rotendorfium*, rogo quaeras, quid factum sit lusibus illis in Macrinum, quos a *Kinschotio* mutuos acceperant, meus enim is liber est. *Salmasius* ante dies octo huc advenit. Regnam tamen non vidit haecenus, quod defluctio lectulo illum teneat affixum: melius tamen nunc habere sunt qui dicant. Inaugurale festum differtur indies: intra dies tamen viginti quinque celebrandum fore plerique existimant. Habeo prae manibus denuo carmen, cuius partem tibi olim recitavi, cum apud nos esses, cui finem jam impositum oportebat, nisi continuis amicorum interpellationibus turbisque aulicis fieret, ut de nugis hisce cogitare vix possem. Vale, meum decus, & si me amas, frequenter scribe. Holmiae cicioccl. Non. Sept. Gregor.

Cum frequentius a scriptione me avocarint ante dies septem haec exarantem amici, factum est, ut praeter expectationem tabellarius elaboreretur. *Vossius* noster interea reversus est, qui plurimam tibi salutem dici voluit. *Salmasius* paulo melius nunc habet: in lucem tamen nec prodiit. Iterum vale.

EPISTOLA CCII.

NIC. HEINSIUS

J. Fr. Gronovio.

Daventriam.

Vir Clarissime. Claudiani mei exemplar jam oblatum tibi nullus dubito. De eo quid apud vos sentiant ut indices, nescio an debeam exigere: tam pauci illic sunt, qui rerum talium gustum habent. O' *δὲνα* magnum mihi malum minatur, nec scio quo id nomine. Sed bene habet, quod ab illa parte nihil metuum, adeo ad morsus ejus jam occallui. Conflictatur modo cum podagra sua, modo cum colicis doloribus, unde fit, ut dominam non nisi bis compellarit haecenus. Carmen meum, cuius tibi partem exiguum recitabam, cum in paternis aedibus vere praeterito congregederemur, Reginae oblatum est, placuit-

cultque, ut ferunt, sic fatis. Voluit illa, ut typis Jansonianis in lucem prodiret, id itaque nunc mihi curae est, ut morem geram, spero intradies paucos proditurum, hoc est ante ipsa inauguralis festi sollemnia, quibus celebrandis omnia jam parata, cum Princeps Palatinus post longam expectationem ex Germania salvus advenerit. Exemplar carminis ut ad te veniat curabitur. De Seneca tragico piget toties monere. Hackium in teo edendo jam versari non refert. Ait enim Elzevirius, qui hîc nobis adest, non obstituram editionem illam, quominus notis tuis auctorem eundem illustratum praelo committant, ut plane non videam, cur tantopere tergiverferis. Me quidem si audias, non procrastinabis amplius, nec eripi tibi e manibus patieris occasionem optimam, qua aurem dominae vellas super dedicatione philosophi, id enim ni feceris, metus est, ne obliviscatur muneris accepti, tot praesertim negotiis nunc oppressa. *Heraldi* librum atrocissimum produsse non nescis cura filii, & fortasse jam videris, ego illum avide videre expeto. Quaeris quid *Scribonius* hîc *Largus*? aestuat ac rumpitur, patremque una ac filium se perditurum minatur. De *Junio* jure conqueri visus es. Pari profecto more mecum egit. Libros enim cum omnes, quos mihi emerat, non passus sit haectenus sibi extorqueri, pro omnibus tamen satisfaciendum fuit. Scripsi hodie ad illum epistolam paulo morosiores, instigante *Vossio*, qui negligentiam ejus nec tueretur nec excusat. Cum *Rubenio* tam bene tibi convenire laetor. Observationum tuarum novam brevi nobis editionem sperandam, id quoque. Ampl. *Freinshemius* in *Boccleri* locum Upsaliam evocatus est, & accepit conditionem. Cura bibliothecae cui deferenda sit, nisi amico nostro, post rem in Galliis exsententia Reginae confectam, emptisque Petavianis codicibus? Negat tamen hoc futurum ipse, longeque recusat. De conjectura tamen non frustra me fore existimo. *Boeclero* quid futurum sit nescio: nisi quod constat non passuram dominam, ut ex Suecia se recipiat. *Salmasius* aedes Freinshemianas in aula, ut ferunt, inolet. Sed audeon' aliquid tibi in aurem? Est negotioli non nihil dominae in Italia, cui expediendo operam meam non ita nuper obtuli: quam illa vultu satis laeto oblatam accepit, omnia tamen incerte. Si processerit iter, hac hyeme processurum vix dubito. Voluissem itaque curam a te habitam precum mearum, quibus petebam in codices per Germaniam Ovidianos ut inquirereres. Per Germaniam enim iter erit faciendum. Videbo, ut nanciscar juvenem aliquem, Graecae ac latinae litteraturae peritum, qui in bibliothecis excutiendis usui mihi possit esse. Sed haec uni tibi. Plura post inaugurale festum, cui nunc vacandum. Vale, meum decus cum tuis omnibus, & si me amas, frequentius scribe. Holmiae. Nonis Octobr. Julian. ccccccl.

J. F. R. GRONOVII

*Nic. Heinsio.**Holmiam.*

Claudianum tuum cum gratulatione & plausibus omnium acceptum esse, Cnoli dubitare: sed quid tu in illo praestiteris, quantus labor fuerit tuus, quantum virum egeris, qui assequantur, hîc quidem sunt peroppido pauci. Fui nuper in Hollandia, quo tanquam ex rure meo in Heliconem profisci antehac videbar: nunc vix inveni unum aut alterum, quicum tralaticium de studiis sermonem fererem. Itaque de illa re non debes turbam in suffragium mittere, sed contentus esse conscientia tua, & judiciis perpaucorum, quos non livor aut stupor impedit. Hi enim fatentur & sciunt, talem abs te datum, qualis ab nemine alio dari possit hodie quidem; summum poëtam & scriptorem doctissimum a summo poëta & scriptore doctissimo. Carmen tuum exspecto vehementer. Quod scribis de metu oblivionis & aure vellenda, exosculor animum tuum: sed nec etiam metu illo afficior, nec si quando eo afficiar, id remedium, sed potius strenuum silentium, applicabo. Aut erit illa meliore memoria erga eum, quem semel nosse professâ est, nec ad quam exornandam, Natura, Virtus, & Fortuna foedus aeternum junxere, tam communi parte destitutum reliquere; aut si tam ignave rem gessit iste, ut possit in oblivionem venire, veniat eo sane, & praeceps jaciatur in Lethen. De illo ipso autem, quod in appellandi velut lenti nominis suspensionem posset venire, etsi constitutum erat antea, nunc valde deliberandum censeo, & censebo, quamdiu poterit videri potius esse flagitatoris, quam officiosi. Cujus enim frontis, vel obtrudere invitis quicquam, vel exigere ingratis a quoquam, quod ille ultro deberi non putet? Non ea profecto frons homini, cui tu tam bene vis. Quod gestum est non potest poenitere illum, qui gessit: non enim ipsius consilio aut temeritate, sed magnis auctoribus factum est, nec quicquam utriusque persona factum est indignum. Si defuerint, quae fortuna saepius abjicere & perdere solet, quam donare, fortem hoc animum tolerare jubebit, & gratiasaget genio suo, qui non est tam indulgerenter habitus, ut sine illis pati non possit. Itaque, o niveum, o carum pectus, quod ad istam rem attinet, tû in utramvis aurem dormias licet, neque propterea tuae infrequentiores huc veniant. Non enim appetuntur, tanquam symbolum aut syngraphum laturae: sed si modo nuntiaverint, nec te quoque apud majores, neque istum tuum apud te frigore ferri, satis hilarem lectorem habebunt. Ad *Junium* frustra literas dedisti: agit enim Groningae, & videtur non tam cito Amsterodamum rediturus, satis id indignante vidua *Vossia*. Libellus meus procedit; & brevi videbis. Elzevirii Livium reddent praelo, atque in eo totus sum: non pauca etiam in Notis meis

re-

reformabo. De MSS. Ovidiis fane aliquoties cognatum meum monui: sed adeo tarde meae ad illum, & ipsius ad me, quaedam omnino non curantur, ut curae hujus meae rationem tibi reddere non possim. De *Loccenio* fuitne aliquid veri? indigne habitum & tractatum ab improbis, qui etiam capite scelus expiarint, aufugisse, ut diu nesciretur ubi esset terrarum. Sic nescio quis narravit *Christenio*; ille mihi: & ambo pro affectu erga praestantissimum & doctissimum virum aegerrime tulimus; sed ego nondum credere possum, quod abominor. Vale, nobilissime & divine Heinsi, & me ama. Daventriae III. Kal. Nov. CIIOCL. Salutabis meo nomine ampliff. *Vossium* nostrum, cujus matrem nuper Amstelodami salutavi.

EPISTOLA CCIV.

NIC. HEINSIUS.

J. Fr. Gronovio.

Daventriam.

INsolens plane mihi visum, quod tanto tempore litterarum nihil a te acceperim, vir clarissime. Claudianum quidem, quem tibi *Schelioque* offerri jussieram, oblatum confido. Misi & ad *Goesium* itinere maritimo Christinae meae Augustae exemplaria aliquot non ita nuper, quorum unum ut ad te curaret rogaram. Spero impetrasse me quod volebam. Miraberis audaciam meam, an imprudentiam potius, qui victricibus Anglorum armis insultem in isto carmine, & partes victas tueri non subterfugiam. Sed ita voluit Augusta, quae versus istos expungere paranti obluctata est, addiditque in toto pagnegyrice nihil illis sibi visum pulchrius. Injuriam itaque & sibi & mihi me facturum, si illos tollerem. Suo periculo posse legi. Parendum fuit, mi Gronovi, optimae principi: cujus ego favorem pluris facio, quam parricidarum omnium. De caeteris judicium tuum avide expectabo, sed ea conditione, ut nihil me illorum celes, quae carpenda censebis. Id enim felicius in tanta messe errorum praestabis, quam *ô deiva*, cujus censura risum in plerisque mihi expressit. Per illum enim non licuit sine soloecismi nota mihi *omnem heroida* ipso carminis initio, quanquam Statio tuo auctore, dicere. *Librare sceptrum* non licuit, & *dotare diem sereno*, & *trahere in spectacula mundum*. Quem ille Gallicissimum vocat, quae si dicas *tout le monde*. Ut Ovidium etiam Gallice locutum nunc discam, cum ausus dicere, *Ingens orbis in urbe fuit*, de advenis ad spectacula Augusti concurrentibus. Sed finis ineptiarum non esset. Vides quid sit ab odio & invidia transversum rapi. Adeo nihil intactum reliquit in libello isto Latinissimum & Ciceronianum caput. Debet, ut existimo, hanc insaniam morbo suo. Est enim ejus valetudo isto loco, ut parum absit, quin mihi quoque maerorem exprimat. Nunc colicis doloribus, nunc podagra sua ita obsidetur, ut e lectulo vix emergat. Quid porro futurum sit nescio. Vidi qui

qui non optime ominarentur. Corpus illi sanius ex animo precor, magistra-
men mentem faniolem. Augustam rarius accedo, quod negotiis infinitis op-
primatur. Unde fit, ut Senecarum meminisse non potuerim. Quanquam a-
mici potius nostri foret rem promovere, qui me absente exemplar obtulit, ut
non nescis. Sed non te latet, quam in suis etiam sit negligens. De itinere
meo Germanico Italicoque, quanquam nihil urgeat Domina, cogitationes
necdum abjeci: praesertim cum SConsulto heri legatio ad Imperatorem splen-
didissima sit decreta, cuius onus comiti *Magno Gabrieli de la Gardie* imposi-
tum, viro, ut ex fama nosti, elegantis ingenii, moribusque ad aulam factis,
quemque prae caeteris unum Augusta in pretio habet. Possem occasione illa
Germaniae partem praecipuam perlustrare; nisi quod mei juris esse malim.
De libris manu exaratis, qui illic terrarum etiamnum supersint, nuper aurem
vellebam. Ut mirer desideriiis meis haecenus te deesse. Mirus ille fuit profe-
cto nuncius, qui aures nostras inopinato ante dies octo perculit de morte Prin-
cipis Auriaci. Rebus novandis commodissimam occasionem affulisse arbitror:
quod proximus tabellarius indicarit; quem frustra toto biduo, & quidem im-
patienter, expectamus. Metus est, ne quid illi acciderit sinistri in transitu
freti Balthici. Inter alia spectacula nuper hîc exhibita, leonem in arena com-
missum vidimus cum urso ingentis molis, atque uro, sed pugnae se subducen-
tem. Equis etiam atque apris vulpibusque non pepercit modo, sed & ovibus.
Quod mirum omnibus visum, praesertim cum famelicus toto biduo jejunasset.
Habes hîc ¹ epigramma ejus argumenti. De MSS. Germanicis aurem rursus
vello. Ovidii optimos codices Erfurti esse in collegio portae Coeli *Zingerlin-*
gus me docuit. Supersintne etiamnum illic curaturum se ut brevi intelligam
amicus promisit. Vix puto fore, ut ante vernum tempus viae me commit-
tam. Quanquam de ipso itinere omnia adhuc incerta. Vale, meum decus.
Holmiae. CIOIOCL. XXII. Novembr.

Has jam exararam, cum a *Goesio* litteras accipio, quibus tuae III. Kal. No-
vembr. exaratae erant additae. De Seneca Tragico quod toties monui, non
mea feci sponte, sed jussu magnae Principis. Vide igitur quid tibi faciendum.
Ego quidem sententiam non muto. Negotium matris quod commendas, rem
gratam facis, sed quid velis non satis intelligo. Litterae enim illae, quas lu-
culentas ante de ea re ad me dedisse visus es, huc perlatae non sunt. Qua eas
viâ curaris, tute videris. Id moneo, *Ludovicii Elzevirii* opera ut hîc parce
utaris: nihil enim isto homine negligentius: quod magno meo malo non se-
mel sum expertus. *Schelius* ubi terrarum agit? nihil quidem de illo tu?

De *Loccenio* nihil prorsus mihi constat, quem nuperrime hîc vidi. Errorem
in nomine esse existimo, & *Boeclerum* voluisse, qui hoc narrarint. Is hîc ob-
ambulat in Germaniam, ut ferunt, abiturus. *Freinsheimius* in locum ejus *Ub-*
salam abiit, cui in cura bibliothecae successor *Vossius* datus. Iterum vale.

¹ Legitur inter Poëmata Heinsii lib. I. Sylvar. p. 147.

EPISTOLA CCV.

J. F. R. GRONOVIIUS

Nic. Heinsio.

Holmiam.

QUum *Schelius* noster in transitu & brevi complexu, se aliquid ad te gratiarum pro Claudiano tuo mihi mandaturum diceret, (quod quidem ut faceret, non desii instare) utrique vestrum me debere putavi, ut jungerem meas illis, etsi jam binas ad te posterior dedi. Valesne ergo & vivis? & cur tam diu desidero tuas? an aureus ille dies, non lutei principis barbarum Teridaten extorto diademate induentis, sed Sueciae felicitis ei, per quam beata est, aureae Principi coronam imponentis, ita te admiratione defixit, ut necdum manus officium faciat suum? Nobis certe & auditus animum percussit. Quis perenseat omnia? Sed in primis placuerunt illae imagines ducum (quantus stimulus recte in posterum quoque gerendi!) Babylonis, veluti Populo Minervae Christinae intextae. Literas a *Fabricio* nuper habui, Italiae tuae lectione, ut videtur, paullo antequam scriberet, delectato, & se, quae in Gallia edidisti, nondum vidisse conquesto. Libellus, quem hinc praelo commisi, intra mensem, ut spero, absolvetur. Potuisset citius: sed non nimis urgeo operas, quando Elzevirii rursus Livio me alligarunt. Et accidit res peropportuna: adolescentes frequentes oraverunt, ut privatis scholis Livium ipsis praelegerem. Sic enim adfuefecerunt meos, ut pro politicis & ejusmodi nugis collegiis aliquem veterum auctorum sibi recitari petant. Sane labor est haud exiguus, dum contendo, ut etiam rudiusculi simul historiam, simul verba Romana discant: sed ingenti cum fructu & meo & illorum procedere me video. Subnascuntur interdum in ipsa diatriba, quae in museo multa meditantem fugere: Ut lib. i. cap. LV. *Eo magis Fabio, praeterquam quod antiquior est, crediderim, quadringenta ea sola talenta fuisse, quam Pisoni, qui quadraginta milia P. A. seposita in eam rem scribit: quam summam pecuniae, neque ex unius tum urbis praeda sperandam &c.* Hoc postremum membrum est refutatio Pisonis, itaque non potuit ita concipi oratio, quae necessario vult subaudiri aliquod, & quidem ex praecedenti, *scribit, Rhenanus igitur: quia summam pecuniae. Sigonius, quia summa pecuniae, & caetera in recto casu.* Sed vide, an non *QUAM* sit extirpandum, utpote ab imperito homine adjectum. Nam ipsa illa quadraginta M. P. A. vocat summam talem &c. Lib. iv. cap. XIII. *Tela in domum Maelii conferri, eumque conciones domi habere.* Sermone Livii non habentur conciones domi, sed *coitiones* saepe. Hoc paullo post: *quod eas largitiones coetusque in privata domo passi essent fieri.* Et plura talia. Sed heu mihi! cui maxime haec probaturum me sperabam, magnus ille *Memmius* interea decessit. Quem illi substituiam, aut potius cui Livium meum, *Memmio* orbatum,

Tom. III.

Ii

com-

commendabo? nam quae ad illum scripsi, nunquam profecto abolebo: sed, si dignum reperero, ei sic comparatum cum praefationibus ad *Memmium* inscribam: sin minus, hae solae in limine comparebunt. Habui ab τῷ μακαρίῃ literas humanissimas, ante paucos menses, quibus ad illas, quas domi vestrae scribebam, & tu, si meministi, manibus tuis complicabas, responderat. Alii Parisienses nostri immemores sunt, & quod maxime miror, *Sarravius*. Si nulla foret alia causa, cur *Vossium* transeuntem Belgium alloqui cuperem, ea erat, ut scirem, quis mihi locus apud illum superesset gratiae. Vale, nobilissime *Heinsi*, & cum τῷ πάντῃ *Vossio* perge me amare. Prid. Kal. Decemb. CIOIOCL.

Hamburgensis res interdum nunciatur mihi in periculo esse, interdum expedita & sine periculo. Tu id melius, credo, scies, siquidem legati collegii etiamnum, ut puto, isthic sunt. Quod ego non veni, culpa est hominis, qui me delusit, cum alios jamdudum ad id iter destinasset. Si quid increpabit periculi, memor illorum eris, quae antea scripsi: sin, non est opus mentionem illam facere, ne videar aliquid petere in praejudicium illorum, qui etiamnum possident.

Dum hae jacent, expectantque Schelianas, iterum hîc adfuit ipse, & tandem inclusas Zwolla misit. Sed res major apparuit interea quoque non illic ex memoria Dominac decessisse. O quam te memorem, Virgo. Video jam domi sacratum vultum, video de coelo datam Avitam & Auctam. Quid nunc? An cum Livio orbo, interea dum confit de Seneca Tragico, gratias agam? dispice & considera.

EPISTOLA CCVI.

J. FR. GRONOVIIUS

*Nic. Heinsio.**Holmiam.*

Puto jam constare tibi, *Heinsi* nobilissime, non esse, quod queraris de raritate aut tarditate mearum literarum. Omnibus enim tuis statim respondi: postremas etiam misi, cum nihil abs te, cui responderem, haberem. *Christinam* *Augustam* avidissime exspecto. Quod tibi negotium matris meae commendaram, res ita se habet. Est mihi Hamburgi sacerdotium: *Canonicatum* vocant. Ejus nulli mihi sunt fructus praeter pensiones aedium, quas *Curias* dicunt. Alioquin reditus sunt ejusmodi, ut ad domum familiamque non modo ἀρκούντως, sed laute etiam & beate splendideque sustinendam sufficiant. Ego cur non amplius inde redigam, in causa est, quod nunquam illic, tanquam *Canonicus*, annum solidum egi. Annum residentiae vocant. Pensio aedium est praeterpropter 500. florenorum. Hos saltem annuos capere potui etiam absens, ab anno aetatis xxv. nunquam tamen in hunc diem cepi, sed adsignavi matri, post-

postquam quicquid erat ipsi relictum a patre Wismariae & in Archiepiscopatu Bremensi, per bella Germaniae & continuas calamitates, partim urgentibus importune creditoribus cognatis nostris, quo aes alienum inter exilia & fugas contractum dissolveret, alienatum, partim decoquentibus & pereuntibus alio alia clade, qui nobis debebant, subtractum interiit. Quicquid autem hoc est, quod illic mihi restat spei, jam in periculo est. Plerique enim ex regiis in Archiepiscopatu Bremensi ministris his Canonicatibus inhiant, & quamquam in pacificatione Monasteriensi excepti sint diserte, cautumque, ut maneant omnia quo in statu tunc erant, inveniunt tamen clausulas, quas cavillando maligneque interpretando volunt sibi eadem licere in nostros Canonicatus, quod usurpant in Bremenses. Jure puto vix posse: sed si fraus ac vis praeponderet, putem beneficio optimae Principis posse me servare. Per libellos supplices aut allegando merita sua impetrant alius hanc, alius illam curiam sacerdotalem: (cui rei jam etiam nova phrasis inventa est: appellant enim *einen hooff ausbitten*, sive *uytbidden*) dein possessores pellunt, aut saltem ubicumque possunt, omnibus manum injiciunt, tanquam sine vindice praedae. Spero, ut dixi, non eventurum hoc in nostris: sed id te speculari oportet, facileque poteris cognoscere, cum sint illic a collegio nostro legati: & quidem, si eveniat, certus sum, Dominam nostram scientem nunquam quemquam ita ditaturam, ut me, vel potius quod me magis angat, matrem meam plectat. Est & Bremae sacerdotium minus, seu Vicariatus ad altare D. Caeciliae, per paucorum ex haerediolis fructuum, quos etiam mater percipit: jamque mihi periisse putabam: sed nuper cognovi adhuc salvum esse. His omnibus si quid immineat periculi, verbulo uno apud optimam Principem, & non invitam, abs te impetrari posse puto, ut extra damnum sim. *Καὶ ταῦτα αὖν δὴ ταύτῃ*. Lepide nuntias de Leone in spectaculis, idque lepidissimo epigrammate celebrasti. Cur tamen *inexplendum* maluisti, quam *inexpletum*? Si Germanicum iter aggredieris, invenies Viennae in bibliotheca Caesarica, quod te delectet: ei praeerat, cum ego illac transirem, *Michael Mezlerus*, vir satis humanus. Nec poenitebit excurrere Monacium, aut Augustam Vindelicorum. Alibi num quid superfit, parum conpertum habeo. Liberalitatem Dominae me percipisse nosti ex illis, quas postremas ad te dedi, quibus inerant Schelianae. Literas, quibus gratias egi, misi ad *Appelbomium* curandas, si placuerint, haud dubie mentionem illarum faciet Augusta. Senecam Tragicum jam solum tractarem, nisi Livius intercederet: adeo quotidie multa offeruntur ad me in eo occupandum. Nuper adeo quod natum sit, vide. Lib. v. cap. xxvi. de obsidio Faliscorum: *Videbaturque aequae diuturnus futurus labor, ac Vejis fuisset, si fortuna imperatori Romano, simul & cognitae REBUS BELLICIS virtutis specimen, Et maturam victoriam dedisset*. Posterius & inseruit Rhenanus. Legimus: *si fortuna imperatoris Romani simul, & cognitae re non bellica virtutis specimen, maturam, vel ei maturam &c.* Non enim acie, non operibus, non infidiis, non oppugnando, quae proprie res bellicae, sed justitiae & fidei exemplo Faliscos subegit Camillus. Simul cum his literis primi tomi dimidium ad Elzevrios jam populo po-

scientes innumeris mendis, etiam operarum, sublatis mitto. Gellium etiam passim correctum L. Elzevirio precanti dedi: sed nihil accedet notarum, nec nomen meum praeponetur. Vale, decus meum, & me ama. Daventriae a. d. III. Kal. Januar. quae erunt Anni CICIDCLI . qui tibi felicissimus decurrat: sed & $\tau\tilde{\omega}\ \pi\acute{o}\nu\upsilon$ *Vossio* nostro, cui novum munus Deos fortunare volo.

EPISTOLA CCVII.

NIC. HEINSIUS.

*J. Fr. Gronovio.**Daventriam.*

Non multis nunc te morabor, Gronovi amicissime, cum futurum existimem, ut, si non conspectu tuo brevi fruar, commodiora saltem sint haec mihi tecum commercia. Post dies enim sex septemve in patriam iter paro, ut ante Germaniam Italiamque perlustrandas mensem alterumque amicis indulgeam. Christinam meam Augustam jam accepisti credo. Ego tuas omnes, exceptis iis, quibus matris negotium commendabas. Doleo itaque vehementer ante abitum non posse me gratificari tibi hac in re. Sed & hoc per commendatitias me absente fieri poterit, nisi periculum in mora. *Schelio* nostro pro humanissimo epistolio plurimum debeo. Livium tuum sub Elzeviriano rursus praelo exerceri laetor. Quae in illo observasti valde placent. Utinam peregrinatio isthaec mea aliquid hîc commodi adferre tibi possit. Famulum meum an ducturus sim mecum ambigo. Quanquam enim non est, quod magnopere de illo conquerar, tamen & linguarum imperitus est, & equitationi adeo non adsuevit, ut miserum prorsus spectaculum fuerit videre nuper, dum huc contendebam, hominem equuleorum ista tortura ita exercitum, ut in vitae discrimen febris contracta adduceretur. Quid? quod, ut intelligo, ab ista peregrinatione animo prorsus alieno est. Certe me ignaro per mercatorem *Vossio* nostro operam suam offerri nuper curavit, qui & oblatam recusavit, & rei totius certior me fecit. Litteris etiam Latinis tam leviter imbutus est, ut ne describendi quidem provincia tuto illi demandari possit. Vide igitur, an nancisci alium queas, qui & mihi sit utilior in hac via illo, & qui ipse ex hoc itinere fructum aliquem percipiat. Sed hac de re aut coram aut per litteras pluribus. Fac quaeso Amstelodami aliquid a te epistolii apud *Goesium* adveniens offendam. O' $\delta\acute{\epsilon}\nu\alpha$ pergit cum adversa valetudine conflictari. Vidi qui non bene de isto morbo sperent. Caetera sui similis est, & minarum in Claudianum meum plenus. In Christinam etiam meam censuras exercet, sed ineptas & ridiculas magna ex parte. Haec pede stans in uno. Vale, meum decus. Holmiae. Anno CICIDCLI . pridie Nonas Januarias Julianas.

EPISTOLA CCVIII.

J. FR. GRONOVIVS

*Nic. Heinsio.**Amstelodamum.*

SI vota mea valuerunt, aut salvus jam advenisti, aut propediem advenies Amsterodamum. De itinere Germanico Italicoque multum gratulor tibi, quod, praeter alia & valetudini tuae & studiis spero profuturum. Spero quoque, antequam accingas te viae, fore ut amplexu mutuo nos exilaremus. Quas videris accepisse ultimas, cum, quas prid. Non. Jan. dedisti, scriberes, non sunt ultimae, quas ego ante has ad te dedi. Sed istas, opinor, ante discessum tuum perlatas etiam habueris. De famulo, si abhorret ab itinere, nec fatis est usui tibi, praesto sane est multo doctior adolescens, qui velit hanc subire provinciam, sed haud scio an permissuri sint parentes. Tamen si jussieris, iturum se in Hollandiam dixit, & ipsum tecum collocuturum. Christinam Augustam tuam nondum vidi. Tu vero vide, qualia nos vel Cluvienus. Destino exemplar Serenissimae Reginae, sed nondum paratum est: destino *Vossio*, *Freinskemio*, *Boeclero*, *Loccenio*, *Scheffero*: cum fasciculum visne tibi commendari? nam, si grave est, matri *Vossiae*, aut *Appelbomio* delegare possum. Libere igitur mecum ages. Feriae nostrae non incipiunt, nisi ad ultimum jam Martio: interea difficulter abesse domo potero, ne, quae exorsus sum cum auditoribus meis, non possim absolvere. Sed etiam longus taediique plenus labor in Livio recensendo museo me alligat. Valde tamen desidero coram tecum. Significabis igitur quam primum, ut certum habebis, quo usque in Hollandia futurus sis. Debeo & exemplar Patri tuo & Leidensibus caeteris, sed compactum nullum in promptu erat, erit proxime: nam has properavi, ne sine meis inventis transires illuc. Vale, decus & praesidium meum, meque ama. Daventriae. vi. Fid. Februar. ciciocli.

Nobiliss. sororem tuam affinemque amplissimum saluto cum observantia summa. Ad *Vlitium* cures, quaeso, tradi naviculatori Bredano, sunt enim, ni fallor, certi. *Schelium* Hagae invenies.

EPISTOLA CCIX.

NIC. HEINSIVS.

*J. Fr. Gronovio.**Daventriam.*

TRanseunti per hanc civitatem & Leidam contententi, Vir Clarissime, geminas a te mihi tradidit *Goesius* noster. Multas verborum ambages non

est quod nunc a me expectes, cum ad patrem festinem. Adventus mei nuncium latere te nolui, hoc nunc scriptionis argumentum. In Suecia omnia satis salva. Si ad nos excurras, de Seneca aut Livio dedicandis Reginae pluribus agemus. Tum de famulo quod scribis. Observationum novarum libellum accepi. Cum cura eum excutiam, ut omnia tua soleo, ubi majus otium affulferit, quod affulgebit brevi. Suum *Vlitio* exemplar mittetur. Habes hîc a *Boeclero*, cujus res nunc meliori loco sunt, adeo quidem, ut de reditu in patriam cogitationes omnes videatur deposuisse. Ad nos si excursus paras, literis tuis ut me praemoneas necesse est, ne alio profectum domi non deprehendas. Vale, meum decus. Negotium matris tuae *Vossio* commendabitur: confido illum tibi hîc non defuturum. Amstelodami.

E P I S T O L A C C X .

J. F R. G R O N O V I U S

*Nic. Heinsio.**Leidam.*

SAlvum te advenisse in patriam, mi Heinsi, gaudeo, tantoque magis, quanto miserius metui, ne injuria temporis, & illae nobis quoque & molestae & periculosae & damnosae inundationes, iter tuum impeditius redderent. Nunc nihil habeo quod optem majus, quam ut te quamprimum videam, amplecter, exosculer, & aures meas dulcissimis sermonibus tuis permulceam. Id quod futurum spero Deo volente, proximo, postquam has videris, die vel solis vel lunae, seu quarto nonas Apriles vel tertio, vestrate computandi ratione. Conterreor tot navium prope Hardervicum nocturna illa navigatione aut pereuntium, aut vix evadentium fama. Semel autem quot hebdomadibus, die videlicet solis matutinis horis, naves inde Amsterodamum ambulant. Eam occasionem observabo. Interim salve, & me exspecta. Salutem quoque meo nomine dices omnibus vestris. Daventriae raptim ix. Kal. April. Gregor. CIOIOCLI.

E P I S T O L A C C X I .

J. F R. G R O N O V I U S

*Nic. Heinsio.**Leidam.*

DUm comitatem hospitii vestri animo grato ac memori retracto, atque inter haec Hardervici *Cornelio Tollio* praedico humanitatem tuam, qua oblatam per me amicitiam ejus exceperis, excidit mihi dicere, quaeri abs te puerum,

rum, quî cum ad alia ministeria per itêr, tum in primis ad Graecos & Latinos libros volvendos ac describendos uterere. Cum ille, se talem unum in omni ipsorum Academia non nosse dixisset, simulque aliquandiu solitudinem verorum studiorum deplorassemus, iniecit aliquid de fratre suo, qui quondam in aedibus *Vossianis*, nunc ni fallor, agit *Ultrajecti*, atque id tum quidem per alios sermones, quî se ingerebant, abruptum & leviter transmissum est. Postea datis ad me literis scripsit, se cum Patre de illa re egisse, quem paratum esse, filium ad hos usus tibi tradere, modo paullo liberalius & honestius habeatur, rogavitque ut suam commendationem mea aliqua juvarem. Quod quamquam necessarium non putarem, tamen & tua & illorum causa, quam libenter, tam secure facio, censeoque neminem magis idoneum, hoc est, tam bene educatum, tam Graece & Latine peritum, tam studiorum & capacem & amantem, tam fidum obnoxiumque tibi, tam laborum, itineris & equorum patientem, obvenire tibi posse. Nam & quem unum (licet cum isto non comparandum) hinc destinabam tibi, non dimittit hospes cōsul hujus urbis, spe facta, post biennium aut circiter cum discipulo suo in Galliam iturum. Vale, mi Heinse, & etiam atque etiam considera, an non optimum sit te facere, quo & tibi ipsi praeclare consulas, & totam familiam, nihil humile in literis promittentem, obliges. Saluto officiosissime divinum patrem tuum, Ampliss. affinem, & sanctissimam matronam sororem tuam, siquidem etiamnum vobiscum sunt, nec non optimam *Stenoviciam*. Iterum vale, Heinse nobilissime. *Daventræ Idib. April. Jul. CIOIOCLI.*

EPISTOLA CCXII.

NIC. HEINSIUS

J. Fr. Gronovio.

Daventræ.

TRadidit mihi tuas hesternò die *Cornelius Tollius*, virorum amicissime: cujus egregii juvenis & praeclari benevolentiam quod conciliaris mihi, plurimum te amo. Ex ejus partim ore, partim etiam ex tuis illis intellexi, actum inter vos de famulo, quem in comitatum peregrinationis Italicae adfciscere decrevi, litterarum humaniorum non omnino rudem, quo & mihi majori esse possit usui, & suis etiam studiis prodesse. Fratrem suum, quem tu prolixè commendas, obtulit mihi. Neque quicquam difficultatis occurrit (aperte tecum ago) quominus oblatam conditionem admittam: nisi quod expertus sum illorum plerosque, qui liberalium artium studio tenentur ac incumbunt, aliis litterarum imperitis arrogantiores esse, minusque ad obsequium promptos. Hunc quoque metus est, ne fortuna fratris inflatum nonnihil rediderit. Quanquam, si sapit, cogitationes istas procul habere debet. Majus incommodum praevideo ab iis, apud quos habitavit olim. Non enim igno-
ras,

ras, cum ex me intellexeris, quid de illo spargant. Quibus ego etsi fidem haecenus non praesto, illorum tamen odium ac invidiam quâ possim subterfugere vix video, *Isaacii* imprimis, quem jam nunc non valde aequum ac propitium experior, quod monui bene multa fideliter. Purgavit illum quidem ab hac nota existimationi ejus inusta frater: sed & *Isaacii* favor mihi necessarius, quamdiu negotii aliquid in Sueciâ peragendum superest. *Cornelio* igitur verbis humanissimis gratias egi, promisque me cogitaturum de ista re. Curabo interim tentari *Isaacii* matrem, quae in *Cornelium* ipsum potius, quam *Cornelii* fratrem, facti culpam derivare visa. Vale, meum decus. Haec summo mane festinans, dum Hagam cogito. Salutant te pater, soror ac affinis, cum caeteris domesticis. *Schelium* tuo salutabo nomine. Famulus urget abitum quotidie, quo magis in hoc negotio festinandum. Nec ego invitum detinere velim. a. d. iv. Kal. Majas Greg. cııııclı.

E P I S T O L A C C X I I I .

J. F R. G R O N O V I U S

*Nic. Heinsio.**Leidam.*

ET haec, quae scribis, vaticinatus eram *Tollio* nostro, cum praesens, tum per literas, & abs te sapienter cogitari agnosco. Volenti tamen ei atque imperanti quamvis vanum officium negare non poteram. Et alia via per literas submonuissem, quid in ea re difficultatis foret, nisi ultro id in mentem venturum tibi nihil dubitasset. Tu igitur prudentia tua utere, interim & apud matrem ejus dissimulabis, me huic commendationi fuisse interpositum. Scimus enim uterque, nihil tale ambos mediocriter laturos. Habui nuper literas a *Rottendorffio*. Scribit ex Decano se audiisse, Claudianum abs te cum fuso commentario vel editum, vel editum iri: qua de re si constitisset sibi, geminas membranas potuisse tibi suppeditare, velleque etiam nunc, si desideres: Ovidii etiam habere quaedam manu scripta. Videbis & imperabis, quod e re sit tua. Addit P. S. *I. Horrionem* ante aliquot annos sesquidecadem *Livii* edidisse: vereri autem se, ne & illa sit suppositicia. Amabo te, fandone unquam audivisti de pulchra illa sesquidecade? Si quid scis, participa: sin, exquire quantum potest. Habui & ab *Reinesio*: inibi, *Barthium* latere Lipsiae & mustare, ferre familiares ejus oculorum quodam malo teneri, seponere studia ista, & refrixisse paene totum: sibi natum adversarium, *Andream Rivinum*, Medicum & Professore Lipfensem, editorem *Κυρξιδων* ex versione Latina, si librum vidisti, & sermonum quorundam *Hildeberti* *Cenomannorum* episcopi: qui partim sui (nam perstrictus ab *Reinesio* in v. l. erat) partim *Barthii* ulciscendi causa, thesibus editis in *Reinesium* invehitur, multa ejus reprehendit, *Barthii* quaedam excusat: (folium enim literis unum alterumve in-

clusum misit) suam depulsionem sub praelo esse. Habere sub manu Inscriptiones ineditas, quas cum commentario adornet: sperare se ab *Isaaco Vossio* impetraturum, quas penes ipsum esse sciat: interprete ac parario eam in rem utili cognato meo *Luca Langermanno*. *Scaligeri* in Caesarem notae an prodierint, & sit aliquid titulo dignum, scire haveo. Omnino melius est te apud *Vossiam* ne verbum quidem facere. *Μὴ τὸ πῦρ τῇ μαχαίρᾳ σκαλεῖν*, ex praecepto Pythagorae. Tu tamen consules, quod optimum tibi videbitur. Ego in transitu eam videre non potui: itaque nec narrabis illi, me vobiscum fuisse. Vale, dulcissimum pectus, & me ama. Daventriae viii. Kal. Maj. Jul. cicioccli.

Quando habebo CHRISTINAM AUGUSTAM? &, si quod superest, Italiae tuae exemplar? Divinum parentem tuum & domesticos vestros hospites, si quidem adhuc adsunt, saluto officiosissime.

EPISTOLA CCXIV.

NIC. HEINSIUS

J. F. Gronovio.

Daventriam.

PRobari tibi consilium meum de *Tollii* petitione non admissa laetor. Quamquam ita a me discessit, ut nec de repulsâ queri possit, nec de facilitate mea multum sibi gratulari. Curae mihi rem fore promisi, idque verbis, quantum potui, humanissimis. De famulo me cogitasse semper non ignoras in hoc iter admittendo, qui ingenio ac eruditione, si non polleret maxime, spem tamen bonam de se daret. Ut non tam mihi, quam fortunis suis ista peregrinatione promovendis aliquid emolumenti adferret. Nec negarim talem mihi in *Tollii* fratre offerri, qualem votis destinaram. Unus ille de *Isacio* & *Isacii* matre scrupulus superest, quem caute praevidisti. Tentavi jam illum super ea re, tentabo & illam, cum Amstelodamum hodie vocer. Quanquam obnifuros nullus dubito. Curabo tamen, ut sententiam utriusque intelligas. De te securus esto; nomen tuum huic fabulae non immiscebitur. *Tollium* interim conciliare mihi perge, cui optime volo. Fateor quidem, *Isacium* nostrum deprehensum subinde a me, cum ad exactam amicitiae legem non omnino se composuisset. Sed cum is non tam ex malignitate, quam imprudentia a se peccatum credi vellet, mihi in id incumbendum, ne eundem cum illo errorem errem. Habui ab illo epistolam nuperrime, quâ Memmianam bibliothecam juris regii factam nunciat, eamque propediem in Sueciâ expectari. An Petaviana jam appulerit non addit. Jussus ille Miltonianum scriptum, simul ac allatum in aulam esset, *Salmasio* sistere, quod invitus, credo, fecerit. Qua fronte exceptum sit, vellem simul monuisset amicissimus *Wullenius*, qui ejus rei certiore me facit. De Rottorfanis Ovidii & Claudiani codicibus salivam movisti. Quid ni oblatos amplectar? Da igitur operam, ut ad

Tom. III.

Kk

me

me ocyus perferantur. Egit heri mecum Johannes Elzevirius, Abrahami filius, de Nasonis editione; quam in octava, ut vocant, forma notis variorum illustratam; pro more nunc recepto, velit adornari, quod non persuasit. Idem Hackiusque Horatium cum veteri Scholiaste variisque notis majori forma dabunt. Addam fortassis Venusinas *Rutgersii* lectiones. Aulus ille Gellius Ludovici Elzevirii sub tuo nomine prostat in catalogo nundinarum Francofurtensium. Caesar prodibit brevi. De *Scaligeri* notis nihil certi constat. Conscriptas eas in gratiam *Pauli Merulae* olim, cum is Cosmographiam suam luci pararet, *Backerus* monuit; qui eas possedit, donavitque postea juveni cuidam, humaniores in hac Academia litteras docto, quem *Paulum ter Haar* nominant, Amstelodamensem patria. Notae istae jam sub praelo sudant, colophonem operi impositurae. Sesquidecadem Livianam ab *Horrione* editam ignorabam, nisi tu monuisses. Nugas maximas puto. Doctissimum *Reinesium* valere gaudeo. Inscriptiones illas ineditas, quas memoras, in lucem proferret mallet, quam aut cum *Barthio* luctaretur, aut *Rivino*, *Barthii* patrono, quem in rerum natura esse nesciebam, tantum abest, ut libellos ab illo editos viderim ullos. Inscriptionibus istis quod accessionem a *Vossio* sperat se impetraturum *Langermanni* opera *Reinesius*, utinam frustra non sit. Tam enim familiares *Vossium* ac *Langermannum* non puto. Vos videritis. Quas habet amicus ille noster, ex schedis Holstenianis, quibus & ego usus, potissimum, nisi fallor, collectae sunt, inscriptiones. Excerpterat istas maximam partem ex tribus quatuorve tomis operis immensi *Holstenius*, quo *Pyrrhus Ligorius* omnem antiquitatem ex marmoribus antiquis illustrare aggressus erat. Tomi isti in Farnesiana Romae bibliotheca servantur. Autographum in Taurinensi extat, & quidem integrum, triginta circiter voluminum opus. Ex eo *Cassianus Puteus* vir nobilissimus, & ad promovendas litteras natus, describi nuper mihi dissertationem curavit de re veterum navali, cum *Scheffero*, Upsalienti professore, communicandam; qui ejus argumenti commentarium molitur. Curavit idem *Puteus* ex eo opere excerpti inscriptiones omnes haecenus ineditas, quae nunc penes Holstenium sunt, ut ejus curâ prodeant, certe corrigantur. Plurimas collegerat *Joh. Baptista Donius* noster, ut nosti. Eas apud illum, dum viveret, non semel vidi. Nunc apud haeredes servantur Florentiae. Plurimas etiam *Gruterus*, quae ad *Sixtipum* postea pervenerunt. *Sixtini* schedas magna ex parte vindicavit sibi per *Junium Vossium*. An inter illas compareant inscriptiones, brevi sciam. Meas cum scriniis in Suecia reliqui. Italiae meae exemplaria hic habes sex, tria Christinae. Plura ad manum non sunt. Unum, quaeso, *Malincrodio* mitte. Caetera tui juris sunt. Accepi ex Italia nuperrime per tabellarios, & jam in Sueciam misi, pulcherrimum & elegantissimum *Octavii Ferrarii* Panegyricum, Augustae nostrae inscriptum. Doleo sic festinandum fuisse. Dignus enim erat, qui typis denuo describeretur. Parat idem *Ferrarius* de re vestiaria novum commentarium. *Rhodii Scribonius* necdum prodiit. Is salvere te jubet. Habui & a *Rubenio*, qui locum Ovidii, in quo aqua mihi semper haesit, proponit. Lib. II. Art. *Effugere hinc non est*,
qua-

quare tibi possit amica Dicere; non omni tempore sensus adest. In quo me non expedio. Vide, an possis. Alii codices habent, *sensus abest*, vel, *obest*. Ego etiam cogitabo. *Bouchartum* brevi hîc expectari audio. Vale meum decus. Lugd. Bat. prid. Eid. Majas Gregor. CIOIOCLI.

Exararam jam has ad te litteras, cum alium ex Suecia fasciculum accipio. Ex ¹ Vossiana Epistola excerptum hîc habes. Quod communicandum tecum existimavi, non ut te cum tuis committerem, sed ut rebus tuis oportune ac tempestive consuleres. Deprehendes hinc fortasse; quid cognati tui moliantur. Ego certe partium mearum putavi, rei totius certiore te facere. Tu affectum boni consule; & si quid praeterea factum vis, impera. Agnoscis credo Augustae summam benignitatem. *Salmasius* post acceptum *Miltoni* scriptum fremit ac frendet, auctoremque ejus se cum toto Parlamento perditurum palam minatur. Sed illos primos impetus sufflaminiabit; credo, nonnihil respondendi molestia ac labor. Habui e Lutetia a *Puteanis*. Mittunt *Rigaltii* disertatiunculam super loco quodam Ciceronianae Orationis pro Balbo *de fundis populis*, libellum communicatum tecum volebam, qui paucarum est pagellarum, nisi quod die Lunae proximo in Sueciam mittendus est. Petavianam jam solvisse e portu Gallico adfirmant, de Memmiana nihil. Dubium igitur adhuc an empta sit. *Bouchartum* in procinctu esse nunciant. Adversam *Valesii* natu majoris valetudinem in causa esse, ne una proficisci possit. Ovidium a me flagitant. *Barthii* Claudianum negant haecenus in Galliam perlatum. *Miltoni* apologiam jam viderunt. *Salmasium* cum adversa conflictari putant valetudine, quod de eo nec ipsi, nec *Sarravius* quicquam litterarum a multo tempore acceperint. Valet tamen is, & bene habet. Haec illi. Quantum ad Inscriptiones; meministi credo illarum, quae Domburgi in Zelandia non ita nuper repertae de *Dea Nebalemiâ*, & mirificis ² amici nostri commentariis illustratae. Effossae sunt duae tresve aliae post illud tempus, quas ego *Goefiusque* noster, cum ante biennium Domburgi essemus, descripsimus, petam eas ab illo, si tanti videbuntur. Multae depromi etiam possunt, quae in Gruteriano opere non extant, ex *Gualtheri* Inscriptionibus Siculis, Aedium Barberinarum editione secunda, quae priori auctior nuper prodiit, ex Antiquitatibus Neapolitanis *Capacii*, aliisque libris, in Italia non ita pridem editis. Iterum vale, meum decus. Amstelodami. Eidibus Maijs.

¹ Data XII. April. hujus anni, quam integram postea edemus.

² *Boxhornii*.

*Nic. Heinsio.**Leidam.*

SCis, Heinſi nobiliſſime, nihil mihi fuiſſe gratius diſerta illa epiſtola, quam ſpoſtremam ad me dediſti. Tardius tamen reſpondeo, laboribus ἐγκυκλίαις, interpellationibus, diſcurſitationibus, ſcribundis etiam literis interdum, quas praefentes & ſine ſpe veniae inſtantes poſcebant, impeditus, ita ut vix tandem hoc otioſi per dies τῇ πεντηκοστῇ ſubſervientes & feriatos naſtus ſim. De comite nihil habeo quod addam. Videtur ſane nemo magis illo tibi uſui futurus, ſi poſſit eſſe: ſed plumbeas matronae iras delenſiſſe te vix ſpero, & ut ſpeciem praebuerit concedentis, an imperatura ſibi tantum ſit, filium ut ne ſtimulet, vehementer dubito. Fratrem ſatis agnoſcentem, quae illi praedixi, ſcito, quicquid ſtatues nihil mutaturum illius animi, quem tibi devovit. Pars epiſtolae Voſſianae ita me affecit, ut vix temperare gaudio poſſim: De re quidem ipſa omnia ſecunda in ſpe habebam; ſed tanta clementia divinae Principis ſollicitum me habet, ne quid committam, cur abuſus illa videar. Magis enim mihi curae eſt, quid illa de meis moribus iudicet, quam ut nanciſcar, quod, cum illa liberaliſſime dederit, a me poſtea avarae injuſteque deſideratum exſtimet. Ego vero nulla commoda opto, quae cum cuiuſquam mortaliū vel vera vel credita injuria ſint conjuncta. Itaque ante omnia id orem, ut ſi fieri poſſit, omnes poſſideamus uti poſſedimus: Sufficit mihi ſcire clementiſſimam Reginam, etiam meam illic non minimam rem agi, & quidquid, ſive pro tempore, ſive pro prudentia ſua divina ſtatuet, id mihi nocere non poſſe. Eoque nomine velim amicum noſtrum S. M. pro me ſubmiſſiſſimas grates agere, & ſi quid praeterea me petiturum pro magnitudine regalis animi ſui exſpectavit, id unum orare, hanc uti erga me indulgentiam ſervet diſferatque, donec petere poſſim, quod nec ipſi dare, nec mihi accipere ſit invidioſum. Chriſtinae Auguſtae tuae (nam non poteram ferre, tam praeclarum ſpecimen non intelligi) ego jam per aliquot dies juſtum interpretem hīc egi, & quosdam ita commovi, ut totum deſcripſerint. *Mallincrodius* ſuum exemplar habebit: tertium *Tollio* deſtinavi, ni tu illi quoque dediſti: nam quod apud illum una legimus, commodatum erat. De Italia tua jam liberalis fui & ero. Codices Rottendorſianos faxo ne quid moretur, ubi ad me venerint. De Naſone, laudo conſtantiam tuam. Ne, quaefo, tam viles nos ducamus, ut iſti plebi miſceamur. Horatio ſi addes Venuſinas lectiones avunculi, & utili in publicum & pio munere fungere, idque magnopere hortor. In Gellio me avaritia typographi prodidit. Tamen deſtinaveram dudum Reginae exemplar, quod ad te mitto cum epiſtola, cujus exemplum hīc addidi. *Voſſio* mit-
tam alia via, & fortaiſſe ſcribam etiam: interim ex te, quae ſupra ſcripſi,
prae-

praesciscat. In Caesarem exspectabimus quid sit: sed miror hominum confidentiam, qui in re, ubi fama eorum vertitur, vestro paucorum sane, qui soli potestis judicare, consilio non utuntur, si tamen, quid sit fama, sciunt. Quae de Inscriptionibus submones, illis quoque sum delectatus, & mea ad *Reinesium* responsio instructa est, itaque & illas de *Nebalennia* omnino describi & mihi mitti velim. Quae ex Italia & Gallia accepisse te scribis, sane quam dolui videre me non potuisse: sed est tanti illis caruisse, ut citius habeat, cui, quidquid habere possumus dulce, transcribere & debemus & parati sumus. *Ferrarium* & *Rhodium* salvos esse gaudeo, & cum rescribes, a me humanissime saluari velim. Jamdudum ad eos aliquid destinassem, nisi mittendi via me defecisset. Terruerunt & typographos ac bibliopolas piratae. Dedi tamen Elzevirio fasciculum satis grandem ad Illustriss. *Loredanum*, in quo Notarum ad Senecas & Observatorum addidi *Ferrario* tradenda singula exemplaria. Iis, si volet, & *Rhodium* utetur. Quando futurum sit, ut fasciculus iste in viam detur, haud scio. Ovidii locum, quia jam credo perfanavit *Rubenius*, acgre aggredior: quis enim tanto ingenio velit certare? & nescio quomodo ista facilius respondent incidentibus in ea aut ultro tentantibus, quam ex imperato. Quia tamen apud te mihi licet peccare, cogitabam: *Effugere* HAEC non est. nempe taedia. Nunquam tam beatus eris, ut non aliquando puellae taedio iis, quantumcumque amatus. Causam porro hujus rei a me non exspecta: sed si quam habes fidam, & arcana sua apud te non dissimulantem amicam, illa te docebit, ipsas quoque illas delicias Veneris tantopere cupientibus quandoque in fastidium venire, & sensum non omni tempore adesse: sive propter justa foeminarum, quae menstrua vocant, sive vitio generis humani, quos poenitet interdum, quorum cupiunt maxime, sive denique vitio proprio sexus, & habent intervalla, cum torpet hebes locus ille. Dum exspectas codices Rottendorfianos, interim ne nihil agas, inspice, quem hinc ego necopinato paravi, & tanto animosius, ut tibi utendum darem. Quid boni sit, ex te discam: nam mihi nondum conferendi otium fuit. Quem Elzevirio mandaram, ut tibi Gellium traderet, puto redditum esse. Vale, decus & praesidium meum, & me ama. Divinum quoque Parentem, et, si te Amsterodami hae deprehendent, Amplissimum Affinem & sororem nobilissimam a me quam observantissime saluta. Daventriae. xiv. Kal. Non. Jul. cxcxccli.

Putavi me facturum elegantius, si in literis ad Reginam nihil ipse de mea re adderem, sed id totum relinquerem beneficio *Vossii* nostri: volui tamen id te quoque scire, ut consilium meum tibi probarem. Dum has moratur tabelarius (tota enim hac hebdomade ante diem Veneris nemo hinc profectus est) interea mihi redditae sunt tuae posteriores cum Inscriptionibus. Etsi videam tibi vix otium fore conferendi codicem meum, nolui tamen exspectationem tuam latere, sed eum nihilominus misi. Tu vide, ut ante abitum mihi eum remittas. Ante omnia ut *Vossium*, quae supra scripsi, moneas, rogo, & ut pauculos dies pueri stultitiam feras, dum per pacem & bona verba illum demittas: aut dimittas statim, sed amice & clementer. Iterum vale.

EPISTOLA CCXVI.

NIC. HEINSIUS

J. Fr. Gronovio.

Daventriam.

Vir Clarissime. Dies jam sunt quindecim, & quod excurrit, cum luculentas ad te dedi, quibus tum alia nunciabam multa, tum praecipue quam bono loco res tuae essent apud Reginam. Iis cum nihil haecenus respondeas, quod tamen ut fieret tua maxime intererat, negligentius curatas suspicor. Mihi & per navim eodem tempore exemplaria Italiae meae & carminis panegyrici. Ab eo tempore Holmiâ litteras accepi, quibus significatur, Reginam velle, ut iter Italicum per Gallias, quanta fieri possit festinatione, promoveam. Scis obsequii gloriam mihi relictam. Intra dies igitur ad summum vicenos ita componi negotia privata posse confido, ut morae ac procrastinationi locus non relinquatur. De famulo, litteris humanioribus imbuto, minime jam sollicitus. Jubet enim Augusta, ut alumnum quendam suum, qui Parisiis a multo haeret tempore, mecum feram, Graecis codicibus describendis jam operatum. Meus abitus urgere pergit, & tantum non importunus est, quo nomine hesternâ vespere bilem mihi non leviter commovit. Mitissimis ab illo verbis petieram, ut expectaret, dum de alio mihi prospexissem. Eam moram quia moleste fert, ut quam primum se ex aedibus proriperet nostris dixi. Malo enim carere servo, quam fovere invitum. Apud *Boxhornium* nostrum locus illi esse poterat, sed tam stolidum animal non ausim amico obtrudere. Videbo quid consilii capturus. Si discedit, ut minatur, intempestive, non id a me praemii feret, quod sibi fortassis pollicetur. Illiteratum facile invenero. Habeo inscriptiones aliquot ineditas *Deae Nebalenniae* sacras, eas ecce, ut a *Goesio* descriptae sunt. Ut remittantur ad me postea rogo. Vale meum decus. Lugd. Bat. Prid. Kal. Jun. CIOIOCLI.

EPISTOLA CCXVII.

NIC. HEINSIUS

J. Fr. Gronovio.

Daventriam.

Epistolam tuam, clarissime atque amicissime virorum, non modo non recte ad me curatam, verum etiam de iis, quae te spectabant, certiores jam factum *Vossium*, ecce nuncio. Curae illi fore confido, ne quid a collegis tuis turbetur. Ad Augustam hesterno die scripsi, tuasque illi litteras misi: quae
quin

quin gratissimae sint futurae, non est quod dubites. Gellium oportuniori occasione mittam, quam brevi non defuturam auguror. In litteris tuis ad Dominam quod negotii tui mentionem nullam facis, laudo consilium. Commodior enim beneficio exigendo locus videtur futurus, ubi Livius prodierit, cui manum ut admoveere pergas, auctor sum. Ultimis Holmiâ scribebant, in pro-cinctu esse Augustam, ut Gothlandiam aliasque ex vicinioribus insulas perlustraret. Jubebar ego expectare pleniora mandata de itinere Italico; ea ubi accepiissem, integrum mihi fore, ut abitum ex his oris festinarem. Mandata illa die crastino apparitura existimo. Occupationes tamen domesticae non ferunt, ut ante initium mensis proximi discedam. Fieri etiam possit, ut consilium interea mutet Regina, nam negotium quod a me fieri cupit in Galliis, alio longe loco est, ac arbitratur ipsa, ut de eo conficiendo nihil prorsus sit sperandum. Hoc si tempestive rescierit, iter meum minus fervide perget urgere, sin minus, obsequium illi meum probare nitar, meque viae statuto tempore committam. Ovidium tuum *Goesio* discessurus tradam, utar eo interim, si possim. Codices Rottorphanos si acceperis, illos etiam ut Amstelodamum mittas rogo, ero illic post dies sex septemve, forsan & citius, si Trajecti amicum non invenero, qui mihi ista in urbe compellendus. Convenire te ante discessum meum velim: vide igitur an res tuae ferant, ut ad nos possis excurrere, sin; per litteras quaeso impera, quid fieri in Italia Galliaque velis, promptissimi obsequii animum faxo exosculeris. Fasciculos etiam, si quos paras, ut curentur recte opera dabitur. *Schelius* nudius tertius cum Hagae essem, abiisse ad plures *Claudium Sarravium* nunciabat: ita se ex Gallo quodam militum tribuno intellexisse. Verusne sit hic rumor, haud dixero: qui nullas a diebus quatuordecim e Gallia accepi litteras: negant etiam se acceperisse Elzevirii. Christinam meam Augustam qui eruditae juventuti sic commendes, amanter quidem facis, praeter ordinem tamen; cum longe infra praecognii tui benignitatem carmen id censeretur debeat. Succensere mihi serio *Gevar-tium* intelligo, quod in Austriacos asperius nonnulla dixerim. Sed si *Ferrarii* orationem legisset, Romam a Carolo Quinto crudelissime direptam, cum direptione Alarici Gothica odiose comparantis, si expugnationem Magdeburgicam invidiose ab eodem descriptam atque exaggeratam, ignosceret sat scio mihi, cum videret hominem pontificium, Mediolani sub imperio Austriacorum natum, oratorem denique, non poetam, sic Austriacis insultantem, ut hostium nemo acerbius mordaciusque possit. *Tollius* secum exemplar tulit, cum adesset nuper: de illo igitur securus esto. In Cinnamo quam diligenter operae pergant, doceri cupio. De fratre ejus omnes cogitationes cogor deponere. Cum adesset ultimo *Juniae*, quâquam in alio sermone toti essemus, invec-ta est illa ultro tanto impetu tantaque animi commotione in furem, ut vocat, domesticum; ut arduum mihi esset, ab intempestiva digressionem exulceratum ejus animum avellere. Lites, carcerem (& quae non?) illi minabatur. Minime igitur consultum putavi communicare cum illâ, quid inter nos actum esset: quod, per me quidem, ignorat haecenus. Puerum meum dimittam die crasti-

craftino, ne molestus esse pergat. Viatici nomine florenos viginti quinque illi destinavi, cum praeter victum & vestitum nihil, ut scis, promiserim. Liberalitatem meam plenius experiri poterat, si voluisset. Alius mihi oblatus est, quem frugi herus praedicat, natione Scotum, cum illo hodierno die transigam. *Holstenio* parum abfuit, quin cura Vaticanae bibliothecae demandata fuisset. Italum non esse adversarii argutabantur. Bononiensis igitur quidam illi praelatus. Tacitum videtur denuo editurus Elzevirius: gratum sibi fore dixit, si & textum recenses, & breves notas adderes, rogavitque ut per litteras ea de re tecum agerem. De Ovidii loco amplius cogitabo, dum *Rubenii* litterae compareant. Gellium ab Elzevirio nullum accepi. Salutant te parens meus, & qui nunc nobis adest, Goesius. Vale, meum decus, & frequenter scribe, alias etiam a me ante abitum expecta. Lugd. Batav. ciciocli. Nonis Juniis Gregor.

EPISTOLA CCXVIII.

J. F. R. GRONOVIIUS

*Nic. Heinsio.**Amstelodamum.*

O ptem & ego, amicissimum caput, congressum nostrum, priusquam discedas: sed excurrendi mihi copiam non facit medius cursus laborum nostrorum, qui sine magno & meo & illorum, qui me audiunt privatim, incommodo non potest interrumpi. Mandata vero, quae habeam potissimum, nisi ut juxta negotium Dominae te ipsum quammaxime cures, & serves incolume Musis & amicis hoc sacrum caput? nam ut memoriam mei excites apud eos, a quibus mihi cordi est amari, id ego te ultro facturum scio, etiam si nihil mandavero. Cuperem quidem nonnulla esse libelli, quem postremum edidi, exemplaria: sed tot fasciculis vix audeo recisas tuas sarcinas onerare, etsi humanissime promittas. *Sarravius* si obiit, est illa profecto ingens literarum clades. Mihi quidem ille jamdudum obiit, qui tot meis sollicitatus ne tralaticia quidem salute me dignum censuit: opto tamen, quia dubitas, ut nos iste rumor falsos habuerit. Illum, quem dicis indigne accepisse perfectissimum foetum tuum, vellem majore animo esse. Si quid tentabit pro titulo, quem gerit, verum iterum faciet illud. *Nec malus est servus; nec bonus historicus.* De puero laudo magnopere: effecisti, ut ille ubique & tuum & meum, qui tibi commendavi, beneficium agnoscat, brevique acturus sit poenitentiam, quod sua commoda parum intellexerit. De Tacito possem aliquid, si ocium esset: sed nec est, & nolo me fieri herbam parietariam. Satis erit, si Livii & Senecae bene habitorem sustinere famam potero. In Livio & pergo strenue, & tu σπένδοντα ἢ αὐτὸν ὀτρύνεις. Quicquid de illo promiseris, praestabo. Non est enim liber unus, quos quidem relegi, in quo non tantum notaverim, ut
vel

vel hoc ad modicam laudem sufficeret, ut taceam, quae in editis meliora feci. Pagellas Claudiani, quia primae aut vetustissimae editionis videbantur, ab homine, qui misere illis abutebatur, retraxi: videbis an quid boni sit: nam mihi ne inspicere quidem licuit. *Rottendorffium* iterum monui, ut MSS. mitteret: sed ille raro domi est, & identidem a vicinis Principibus evocatur: ita fit, ut tardius fere respondeat. Dionysius Halicarnassensis Lib. viii. facpius affirmat lege Cassia Latinos populos civitate donatos. Id ego credere illi non possum, & suspicor liberaliorem fuisse, quam ipse Cassius, cui hanc largitionem adscribit. Ubi de ipso foedere loquitur lib. vi. nulla mentio civitatis. Altero, quem dixi, libro Sp. Cassium, ait, partem agri voluisse dare Latinis & Hernicis, *recens civitate donatis*: quos Hernicos accepisse, ait, idem foedus quod Latinos. Mox Cassium inducit jactantem, *aequum civitatis jus Latinis impertitum*: idemque in sequentibus ter super haec affirmatur. Velim videas, an hoc ita sit in Graeco, quem non habeo. Occasio quaestionis est locus Livii lib. xxv. cap. iii. *Testibus datis, tribuni populum summovertunt, sitellaque allata est, ut sortirentur, ubi Latini suffragium ferrent.* Hoc placet *Sigonio*: mihi haudquaquam, partim quod illo tempore Latinos omnes habuisse civitatem credere non possum, partim quod etiam si habuissent, non erat id tempus sortiendi, qua in tribu essent, sed nec puto populos aut privatos civitate donatos tribum accepisse sorte. Itaque conjicio: *sitellaque allata est, ubi sortirentur tribus, ac dein suffragium ferrent.* Sortitionem intelligo de tribu praerogativâ. Digna tamen & illa res est, quae excutiatur: nec auctorem alium, quam istis locis Dionysium habet *Sigonius*. Apud Livium in illa historia silentium altum civitatis. Tu, si quid habes, & quid tibi videatur de ista conjectura, communica, & verba ipsa Dionysii, ni grave est, mihi describe. De Gellio graviter exposulavi factam nobis injuriam cum Elzevirio, & spero in officio fuisse vel fore. Vale, anime mi, & me ama. Daventriae. Non Jun. Jul. ciciocli.

Rubenio nostro jam, ex quo huc ex Hollandia redii, literas debeo, & scripturientem decies alia interpellarunt. Faciam tamen quam primum potero: interim, si ad eum scribes, roga, quaeso, ne mihi irascatur, neu quae suspicetur: fuerunt enim omnia ejus mihi gratissima, ut propediem & ex meis ipsius cognoscat literis. Videbo an proxime aliquid in Galliam curandum ad te mittere possim.

x In editis notis legitur, *ut sortirentur tribus.*

EPISTOLA CCXIX.

NIC. HEINSIUS.

J. Fr. Gronovio.

Daventriam.

TRajecto redux, quo proximis diebus profectus eram, tuas hîc offendi, vir clarissime, nudius tertius, quibus Claudiani vetustam editionem mittis, mihi hætenus non visam. De Rottendorphianis codicibus si quid sperandum, novi diligentiam tuam. *Sarravium* ad plures abiisse verus rumor fuit. Febre correptus, quæ illi mentem turbabat, intra paucos dies fati necessitatem expertus est, prid. festi Pentecost. e vivis sublatus. Hoc *Menagius* ac *Jacobus Puteanus* ad me, qui tenerrime illum amabant; ut dubitari jam non possit. Inique profecto tecum egit, qui accepti beneficii memoriam tam cito obliterari apud se passus sit: nec mecum benignius, nosti historiam: de me tamen poenituisse illum ferunt, sæpiusque perfidiam & *δῆνα* inculasse, apud quem tuto nihil non deponi posse arbitratus erat. Multum in isto capite amiserunt reformatæ in Gallia ecclesiæ. De itinere meo omnia adhuc incerta. Mandata enim regia, quæ jam ter expectare atque opperiri jussus sum, non comparent; videbimus quid hodiernus tabellarius ferat. Si quid fasciculi ad *Holstenium* aut alios curari vis, satis superesse temporis existimo, quo id commode fiat. *Bouchartus* cogitationes suas de itinere Suecico in autumnum proximum rejecit, quando sperat librum, quem de animalibus S. Scripturæ ingentem praelo commisit, Reginae inscribendum, absolvi posse. *Henricus Valesius*, qui una cum illo profecturus erat, nunc sententiam mutavit, Galliam certus non deferere. *Bullialdum* brevi hîc expectamus. Novus *Balzacii* liber, Gallico idiomate scriptus, ac varios sermones complexus, brevi prodibit. *Menagius* amanter te salutât. Livium tuum majori, quam hætenus, forma procu-di velint *Puteani*: qui communem esse in urbe sua doctorum omnium querelam de exiguis illis typis significant. *Barthii* Claudianum tandem acceperunt, sed indignum judicant, cui locum in bibliotheca sua indulgeant. ¹ Amici nostri mater quam infensâ sit *Tollius*, jam, credo, nunciavi ante: non igitur video quid in negotio isto fieri a me possit, nisi atrocissimam illorum indignationem velim incurrere, quos amicos ac faventes mihi maxime volo. Commendant certatim omnes juvenem boni omnes, inter quos *Antonius Aemilius*, Trajectensis humaniorum litterarum professor, qui Dominam *Thienboviam* aliosque hoc nomine compellarat, meque ipsum non semel convenit. Convenit & ipse *Tollius*, fratremque denuo commendavit. Adfuit & ipse juvenis, tradiditque carmen propempticum, non inelegans. Amicus autem noster, cum quo rem a me communicatam fuisse jam ante indicavi, quod eo ignaro nihil ten-

tan-

-1 *Isaaci Vossii.*

tandum ducerem, vide quam callidum consilium commentus sit. Ad rem quidem ipsam nihil respondet: caeterum significat gratum Serenissimae Reginae fore, si *Resandrum* quendam Suecum, sumptibus ac impensis regiis educatum, mecum feram, qui amanuensis operam mihi navet. Haeret ille Parisiis jam anno toto, & quod excurrit, libris Graecis describendis occupatus; quo nomine illum eo ablègavit noster, atque ita apud me subinde descripsit, ut hominem morbo melancholico prorsus furem. Parendum tamen erit, quamquam integrum mihi Domina reliquerit, ut cui vellem eam demandarem provinciam. *Salmasius* in *Miltono* defricando totus est: quem a me subornatum instigatumque palam praedicat, magnumque mihi ac patri malum hoc nomine minatur in apologia, quam parat, nobis tribus simul insultaturus. Mira profecto est haec hominis infania: quam impune tamen non feret: vidi freneticam ejus epistolam, qua existimationi nostrae dira quaevis portendit. A *Gervatio* tandem litterarum aliquid habui, de carmine hoc tantum: *Panegyricum tuum cum adjunctis poematis a D. Wallio nuper recepi, ingentis spiritus opus, & quod recentem te a Claudiano ista luisse evincit*. Haec ille. Censuras tuas mecum communicatas velim. De illo versu quod monebas, *quanta gravi vis iudicio felixque facultas; iudicium vix eo sensu apud bonos auctores sumi*, vide an non pro me faciant ista *Ovidii Trist. v, El. ult.*

Et petere Aoniae suadebant tuta sorores

Otia, iudicio semper amata meo

Et art. Amatoria:

Sunt qui praecipiant herbas saturea nocentes

Sumere; iudiciis ista venena meis.

Tacito breves notae addi possent. Vidi hîc apud *Johannem Sixium*, juvenem omnino bonum, partem *MStorum Sixtinianorum*, inter quos *Commentariorum Caesaris antiquissimum exemplar*, *Lucani etiam egregium*, & *Senecae nonnulla*, *Inscriptiones etiam multas non visas*. Amico nostro quid in mentem venerit, ut haec eripi sibi passus sit, miror. De *Halicarnassaei* loco videro, ubi *Leidam* revertar. *Gellium* ab *Elzevirio* tandem accepi: notas ei quaedam videtur additurus cognatus ille *Boxhornii*. Ad *Rubenium* quae vis, curae erunt, ut & caetera. Queritur *Vlitius* de rebus tuis nihil se a multo tempore intelligere. Vale, amicissimum pectus, & summae festinationi ignosce, cum *Leidam* hodie cogitem. *Amstelodami MDCLXX. xx. Junii Gregor.*

A *Vossio* epistolam modo accipio, qua nunciat *Petavianam* tandem bibliothecam in *Holmensem* portum appulisse, una cum quadringentis codicibus, magna ex parte Arabicis Hebraicisque, quos *Amplissimus Gaulminus Reginae* donavit. *Reinesio* inscriptiones suas communicatas velit, sed eas inter scrinia *Salmasiana Leidae* haerere adfirmat. Iterum vale.

De mandatis nihil; ea *Spiringium* allaturum puto, qui pristinae dignitati restituendus in procinctu stabat, ut in *Bataviam* proficisceretur.

EPISTOLA CCXX.

J. FR. GRONOVII

Nic. Heinſio.

Leidam.

PRimum ignoscas, oro, animo variis cogitationibus distracto, quod cum proxime ad te scriberem, nullam feci mentionem elegantissimae Elegiae, qua simul *Grafwinckelium* ornaſti, & meam imprudentiam, qui victus ipsius instantia nescio quid etiam nugarum in illam rem effudi, merito coarguiſti. Eam vero, ut omnia tua, & vidi ego libentiſſime, & cum illis, quos admirari ſcripta tua docui, communicavi. *Rottendorſium* per cives hujus urbis, affines meos, per quos ei Senecas & alios libros remiſi, tertio monui de illis, quae tibi promiſit. Triduum egerunt Monasterii, videre ipſum, quippe, ut eram ſuſpicatus, domo profectum, non potuerunt, literas tamen meas & mandata familiae reliquerunt. De *Sarravio* ergo ſine dubio palum factum eſt? Certe & Eccleſiae reſormatae, ut ais, & literae magnam jacturam fecerunt. *Menagium* gaudeo mei meminiſſe. Habeo parata exemplaria libelli, quae ipſi, quae *Puteano*, quae *Rigaltio*, quae *Holſtenio* vel tradas vel mittas. Livium quidni & ego cuperem majore forma edi? Ex Germania idem ſum monitus, & quidem ex ore Principis alicujus. Sed quis illos homines inducet, qui omnia ex ſuo conſilio & ſpe lucri agunt, nobis, non ut advocatis, ſed ut vilibus operis, utuntur? *Historiolam* de amico noſtro, qui tibi provinciam tant bello comite ornat, riſi, & illius acumine dignam judicavi. Miror ſuſpicionem *Ἰ δὲ νῶ*, qui Anglos contra ſe excitatos & ſubornatos putat. Scilicet non ſatis ipſe crabrones ſtimulavit, ut lenti ac ſtupidi non ſe commoverent, niſi veſtro ſtabello inflammati. De voce *judicium* hoc eſt quod volebam. Nos vulgo eam uſurpamus de vi illa animi & ingenii, per quam facere poſſumus delectum rerum & dijudicare illas: ut cum dicimus, *hominem magni*, aut *nullius judicii*: nunc animadverti hanc ſignificationem ſapere Galliſſimum aut Belgiſſimum: certe exemplum ejus apud veteres requiro, quos video *judicium* dicere, non pro facultate mentis judicatrice, ſed pro effectu ejus, ſeu pro ſententia & re, quae judicatur, ut etiam Ovidius in illis, quae allegas. *Vlitius* quod de me queratur, non habet, qui libellum, quem ei per te dono miſi, acceperit: necne, juxta cum ignariſſimo ſcire me ſinat. Ego certe poſt illas ad eum datas nihil ab eo accepi, quod monere poteſ, ſi forte quas dedit, male ſint curatae. Proxima hebdomade *σὺν θεῷ εἰπεῖν*, praelo dabitur primum folium novi libri *Observationum*, quas expreſſerat idem ille optimus *Vlitius* mihi, ut Livio Leidenſi daret. Sed haereo in titulo, quartumne an quintum dicam, an partem ſecundam aut nescio quid. Fortaſſis inſcribam Senatu noſtro.

1. Legitur illa lib. III, Elegiarum, pag. 66. inter Heinſii poemata.

stro. An igitur discedam a mea pristina simplicitate, & *Noctes Tubantas*, vel *Tubantes*, aut ejusmodi quid phalerarum vocabo? Da consilium. Quid habes de *Heilerfichio*? nam hîc nuntiantur φοβερόι, & quae vera nolim. Vale, praesidium & decus meum, & incomparabilem virum Patrem tuum a me quam officiosissime saluta. Daventriae postrid. Id. Junias Jul. CIOIOCLI.

EPISTOLA CCXXI.

NIC. HEINSIUS

J. Fr. Gronovio

Daventriam.

Tuas hesterno die, Vir Clarissime atque amicissime, lubens excepi, quibus responsionem debitam tanto minus differendam duxi, quod proximis diebus domo abfuturus vix occasionem te compellendi commodam tum invenero. Elegidii mei mentionem nullam penultimis tuis factam non est quod tam operose excuses, neque enim istam in spem miseram, qui censorem nugarum mearum te potius desiderem, quam laudatorem. De sensu & *Judicii* apud Latinos auctores manus tibi do. Videbar intellexisse, non alia significatione in veterum monumentis occurrere, quam si pro loco, in quem iudices conveniebant, sumeretur. Hoc me decepit. Poterit igitur in carmine meo reponi, *Quanta gravi vis arbitrio!* quod te non obnitente fiet, arbitror. De *Sarravii* morte cum communicarim tecum nuncios, cur *Smithii* nostri, viri optimi integerrimique e vivis nuperrime sublato, ignarum esse me passus es? Metuo ne & de *Holstenio* funesti aliquid mox intelligamus. Valetudine enim illum valde adfecta esse proxime monuit Eques *Puteanus*, adeo quidem, ut desint vires, ne in Heturiam se conferre possit, ad captandum coeli temperatioris frigus benignissimum, ut quotannis plerumque solebat. Recepit itaque se in monasterium Sti. Onuphrii, quod basilicae Vaticanae vicinum nosti, & ab aëris salubritate multum commendari. Memini in istam quoque urbis partem politissimum virum *Petrum Servium* habitatum concessisse, cum lento morbo, quem & fatalem expertus est, obnoxius esset. Spero amico nostro feliciter istam habitationem cessuram. *Menagio* scribam die crastino: faxo tum intelligat de exemplaribus libelli tui, quod mones. Equiti *Puteano* si unum miseris, praeter ordinem nihil facies. De *Tollio* adeo sollicitus amicus noster videtur, ut non modo Suecum illum mihi obtruserit, sed alium etiam postea Germanum ultimis litteris, quem ego *Holmiae* noram, juvenem elegantis ingenii, & cujus ¹ elegiam mihi inscriptam fatis venustam, tibi, credo, exhibui, cum hîc esses. Is ex aedibus heri, cujus liberos erudibat, ejectus est, instigante *Boeclero*, cum quo atroces inimicitias exercebat, Freinshemianis partibus

L1 3

addi-

¹ *Johannis Christiani Keckii* Argentoratensis elegia ad N. Heinsium, legitur in libro. I. A. doptiv. Carm. pag. 44.

addictior. Ego autem *Boeclerum* non magis, admissio *Keckio*, offensum habere mihi volo, quam, *Tollio* in comitatum meum adscito, *Vossium*. In eo etiam facetus est amicus ille noster, quod comitatu tam amplo me instructum cupiat, de comiteatu & viatico nihil addat. Apage tam bonum patrem familias! Atque hae illius partes esse debuerant: de comitatu ipse mihi abunde prospexissem. Circueat igitur quantum volet, & amanuenses undique e latebris protrudat, hero tamen illos fatuo non venditabit. *Keckius* interim, illa plenus fiducia, jam in itinere, credo, haeret, ut me comitetur. ¹ *Scribonii Largi* atrox contra rempublicam Anglicanam scriptum, praelo Holmieni jam commissum ferunt. Miser iste senecio prorsus delirat ac insanit. Misit duas in hanc urbem nuper epistolas, rabiei Sycophanticae non inanes, quibus omne se virus in me conversurum minatur, quod *Miltoni* scriptum probari a me intelligat. Ego vero & dixi & dicam porro, malam a *Miltono* causam tam bene actam, quam Regis infelicissimi causam pessime egit *Scribonius*. Hanc meam libertatem si ferre non potest, rumpatur. Adulatoris a me partes non est quod exigat; cum nescire non debeat, quam me servilis obsequii clientem haecenus non sit expertus. Hoc etiam maligne & *Salmasiane*, quod regibus non minus ac *Miltonum* me infensum fingit, cum publice jam bis testatus sim, quid de parricidio Anglicano senserim. Inter regicidas si locum mihi dat, ut omni procul dubio daturus, videbis brevi pro meritis ornatum & depexum. Nihil neque senectuti ejus, neque valetudini adversae parcam. Ita illum excipiam, ut parentem meum ille jamdridem excepit, pejus etiam, si potero. Comitatem & benignitatem omnem jam nunc valere jubeo & faceffere. *Commercia Turnus Sustulit illa prior*. Interim ne nihil agat, ex febricula decumbit, quam illi vindictae studium illud ardens conciliaffe visum, sic ultimi ferebant nuncii. *Vlitium* hinc expecto, itaque nihil litterarum illi paro. Ubi venerit, officii admonebitur. Scribit & *Rubenius* se mense forsan proximo nobis adfuturum. Te videre & complecti desiderat, si tantum otii mihi indulgebunt domesticae occupationes & mandata regia, una fortassis ad te excurram. De literis tuis interim spem illi, quam volebas, feci. Observationes tuas praelo committendas laetor. De inscriptione libelli, quanquam mei consilii non indiges, placet ut simplex sit nec longe quaesita, ita os obstruxeris & *Scribonio*, & alteri illi amico nostro, qui invidiam Germanis passim maximam conflare nituntur, ut nosti, tanquam phaleratos istos titulos immane quantum admirantibus. De *Heilderfichio* & *Zulichemio* tristitia narrantur, an vera nescio. Sciam cras aut perendie, quando Hagam cogito, & si fieri poterit, faciam ut intelligas. Locum Ovidii *Arte Amatoria* accuratius perpendi, omnino legendum, *non omni tempore sensus adest*, cum libris scriptis, quod tamen frustra sic interpretatur magnus *Scaliger*, ac si velit, neminem omnibus horis sapere. Scribe minima mutatione,

Effu-

¹ Ita puto appellari ab Heinio *Salmasium*, quia scribat erat, & plurima in lucem protudebat volumina.

Effugere hunc non est, quare tibi possit amica

Dicere, non omni tempore sensus adest.

Non omni tempore sensus Veneriarum deliciarum dominae tuae adfuturus, quare fieri quandoque possit, ut tibi dicat, *Effugere hunc non est*. Quod importunis & odiosis convitium dici solitum. Nosti illa, *Effugere non est, Basle, basiatores*. *Sensum* interpretor voluptatem, quae ex Venere aut amoribus percipitur, ut lib. II. *Tu quoque cui Veneris sensum natura negavit, Dulcia mendaci gaudia finge sono*. Si postrema illa, *non omni tempore sensus adest*, a puella etiam vis dici, nihil repugno. Vale, meum mel. Lugd. Bat. CIOIOCLI. a. d. IV. Kal. Jul. Gregor.

Initio lib. v. Metamorph. pro eo quod est in vulgatis, *fremitu regalia turbae Atria complentur*, libri vetustissimi, *fremida turba* agnoscunt, atque ita etiam pro diversa lectione tuus, qui nunc penes me, codex. Id an Latinum existimes scire velim. Haereo enim, nec ex illorum numero sum, qui sexcentis vocabulis Romanum sermonem ditare gestiant.

Haeserunt hae diebus aliquot penes me. Interim a *Vossio* literas accipio, quibus videtur arbitrari, me jam in Gallias profectum, cum ante sex hebdomadas indicaret, expectanda pleniora Reginae mandata, quae ego nulla accepi. Puto igitur Lutetiam missa. Scribam itaque mox ad Mercatorem, qui res Augustae ea in urbe agit, quacramque an mandata ulla acceperit. Si accepisse se adfirmabit, in pedes statim me conjiciam. Amicus noster adeo totus est in manuscriptis suis, & bibliotheca excutienda, ut aliarum rerum minime satagat. *Salmasii* in *Miltonum* invectivae jam eduntur. *Grafwinckelius* noster etiam Regum causam suscepit defendendam contra eundem *Miltonum*: quem librum Elzevirianis typis velit edi. Ego poematia mea coepi colligere, praelo mox committenda. Si intelligam a *Salmasio* me tangi, nec est cur dubitem, habeo quod illi ista occasione reponam. Quia enim calumniarum non desinit,

Maledictaque culpae

Adiicit, & non est patientia libera nobis,

Ibimus in poenas, & quo vocat ira, sequemur.

Fasciculos, quos promissisti, si pares quamprimum recte feceris, ne quid in te morae sit. *Boeclero* scribam anteabitum, si quid una vis, mitte. Ad equitem etiam *Puteanum* si epistolium exares, probabo institutum; sed hoc tempestive satis fiet post menses duos. Valde vir ille optimus Inscriptiones antiquas videre desiderat, in Germania edendas. Elzevirii edunt librum Hispani ejusdam mirum, de *duplici terra*. Nomen scriptori *Josepho Antonio Gonsales de Sala*. Scripsit adolescens in Petronium olim commentarios. Vidi epistolas ejus aliquot, satis humanas ad Elzevrios scriptas. Ad *Smithium* & μακαρίτην nuperrime Catalogum manuscriptum satis ingentem miseram nummorum veterum, qui in Italia venales sunt: eum ut mecum feram oportet, nec video, quo pacto ab haeredibus impetrari possit, qui nullum ex iis notum habeo. Elegia, quam *Grafwinckelio* inscripsisti, elegans est & erudita, ut ejus te pude-

re

re nequaquam debeat. *Heildersichii* & *Zulichemii* res tam malo loco non videntur esse, quam *Arsenii Somelsdyckii*, in quem faba nunc cuditur. Certiora mox intelligemus: mihi enim Hagam nondum licuit excurrere. Ovidium tuum jam absolvi, eum apud *Goesium* relinquam, aut, si occasio erit in promptu, tibi reddam. Vale, virorum amicissime. Kal. Juliis. Gregor. Amstelodami, ubi adhuc per triduum morabor.

EPISTOLA CCXXII.

J. FR. GRONOVIIUS

Nic. Heinso.

Amstelodamum.

Sane ita est, uti scribis, in optimo quoque *Smithio* fautorem nostrorum studiorum & vetustae φιλοκαλίας amisimus. Vtinam modo ne nuntii aequae graves de *Holslenio* sequantur, & restituat illum nobis habitatio mutata! Catalogum nummorum venalium puto te recepturum optime per generum Rev. & Cl. *Heidani*, cui, ni fallor, ¹ *Colvio* nomen, & magnum, ut audio, illic pondus & pretium est. Amicus noster, ut video, satis regie inimicitias & amicitias exercet. Porro Quirites! Timagenes Augusto Caesari tantum non indixerat odium, lingua intemperanter utebatur, historias rerum ejus gestarum ab se scriptas combusserat: eum tamen Pollionis domi esse optimus princeps patiebatur, hactenus se ultus, ut Pollionem θηρεοτροφεῖν diceret. Favorinum oderat Hadrianus: tamen in urbe esse, & coli atque adiri non indigne ferebat. Sed haec si scriberem nostro, Vulcano escam pararem. Te tam subito accusari, quasi non ex animo dixeris, *Unica abest absitque* profecto miror. Sed nec possum laudare delatores illos & emissarios, per quos rescivit laudari adversarium suum, non propter causam, sed quod qualemcumque causam ex argumento egit. Oportet hodieque illic subsidere, qui omnes rumusculos fermunculosque captent, praecipue de illis, quos merito sibi scit esse inimicos, & perscribant. Sensus & lectio, quam das Ovidio, valde placent, praesertim si addatur interrogatio: *Dedecet ingenuos taedia ferre sui. Effugere hunc non est, quare tibi possit amica Dicere? non o. t. f. ad.* Non decet hominem ingenuum & pudentem ferre sui taedia & ingratiis obversari. Quare igitur velis committere, ut amica tua possit de te dicere dicatque: *effugere hunc non est?* Crede mihi, non omni tempore placent puellis Veneriae deliciae. *Fremida* certe annotatione dignum: ut ab *algeo* *algidus*, *ningueo* *ninguidus*, *uveo* *uvidus*: ut *uvidus* uvens, vel qui uvet, ita *fremidus* fremens. Exemplum tamen expectabimus. Ad *Rubonium* hîc habes, quem si tecum hîc mihi complecti, & quidem domi meae hospites, licebit, in coelo me esse putabo. Ad *Cassianum Puteanum* faciam quod jubes:

¹ Fallitur. Fuit *Dionysius Crucius* dictus, qui *Mariam* majorem *Heidani* filiam duxit; quae post viduitatem iterum in Patris mei *Francisci Burmanni* thalamos concessit.

jubes: immo ingens beneficium a te accepisse me putabo, si tantum virum mihi fautorem effeceris. Mittam vel ad ipsum, si vis, *Gonsalium* exemplari sed haud scio, an gratum sit futurum, cum illic *ἄνευ ἐπιθέτης* appellatus sit: ergo contineamus nos, nec per ambitionem ludibrium debeamus. De Poëmatibus tuis colligendis laudo consilium. Vive, dum vivis. Meus libellus retinebit, quando ita suades, simplicitatem pristinam. Festi Avieni in Arateis de Argo ita lego: *neque enim se Thessala cymba Solenni in faciem rostro movet, extrema puppis Surgunt oceano: velut alto a gurgite nautae, Cum portum tenuere avidi, volitantia raptim Sipara convertunt, tergoque incurva remulco Litora certatim subeunt. an convellunt, aut convolvunt.* An qua parte melius aut aliter Grotius? Post novem paginas: *Argo, qua curvis puppim superattrahit oris, Tingitur, & duro cingit vada coerula dorso.* Sic lego, & aliter intelligo atque Scaliger ad Manilium p. 387. Quid Grotius? Ego editionem Avieni non habeo aliam, quam Parisiensem Morelli in quarto 1559. Adolescens quidam nudius tertius me poscebat sensum obscurum quorundam versuum in epistola Cydippes: quos post paullulum meditationis ita respondi legendos:

Hei mihi, quod gaudes, & te juvat ista voluptas!

Hei mihi, quod sensus sum tibi fassa meos?

Si me digna forem, tu nostra justius ira &c.

Credo idem jam a te observatum esse. An quid aliud habes?

Fuit hîc nuper, qui se Baronem *Risenburgium* appellaret, & *Racocci* diceret legatum: datumque sibi in mandatis in *Hollandia*, ut *Bisterfeldium* arcefferet *Lugdunum*, ad duplicem professionem Theologiae & Philosophiae, stipendio duûm millium fl. proferebat etiam literas commeatus, Ordinum sigillo subsignatas, & binas a Curatoribus Academiae ad *Racoccium* & *Bisterfeldium*: dein querebatur servum sibi cum xl. ducatis aufugisse, & petebat pecuniam mutuam in sumtum viae *Bremam* usque, depositis pro pignore illis literis. Ego diffusus homini negavi mihi nummos in promptu esse, sed consilium dedi, ut hîc potius expectaret, & ex *Hollandia* pecuniam peteret. Invenit alium, qui illi credidit. Scire velim, an noveritis hominem, & datas illis literas bona fide esse. Ad Boeclerum mittam ad te proxime. Quaeso respondeas de loco Avieni, & Barone isto quam primum. Homo dicitur remisisse pecuniam, & literas istas repetiisse, nos tamen dubitamus & fraudem suspicamur.

Quae ab Rottendorffio heri accepi, descripta ad te mitto.

EPISTOLA CCXXIII. NIC. HEINSIUS

J. Fr. Gronovio.

Daventriam.

FRustra haëtenus speravi, Vir Clarissime, aliquid responsi adfuturum ad illas, quas ante dies jam decem ad te perlatas oportet. Interim abutum
Tom. III. Mm meum

meum urgere *Vossius* non desinit, ita petente, ut fert, Regina: cum ego omnem jam cunctandi materiem consumpserim, cras Dordracum cogito, amicis valedicturus. Roterodami in transitu de navi mihi prospiciam, qua in Gallias tuto deferri possim. Spero me post decimum abhinc diem pransum paratum fore. Tu itaque ne cuncteris oro, si quid fasciculorum paras. *Freinsheimium* in extremis esse *Vossius* noster proxime nunciabat, ejus etiam conjugem gravissime aegrotare, quem morbus iste exitum sit habiturus, non nisi *Lutetia* nunciare potero, quo suas omnes amicus noster in posterum missurus. *Wulsenius* etiam ab aliquo jam tempore nec scripsit, nec scribet, ut arbitror, cum & is uxorem optimam, cum adversa diu conflictatam valetudine, nuperrime extulerit. *Holstenii* valetudo meliori nunc paulo loco est. *Salmasius Miltonum* suum defricare pergit, in edendo horribili isto scripto graviter defudant operae typographicae in Sueciâ. Me & patrem immortalitate etiam illa, ut gloriatur, occasione donaturus. Agat sane quod agit, ego vicissim meis partibus non deero.

--- Si quid mea carmina possunt,
Gallus & Hesperis & Gallus notus Eois,
Et sua cum Gallo nota Lycoris erit.

Miror intemperiem profecto hominis furiosi, & quietis impatientem animum. Tot praestantium animarum ultrices scilicet illum

Exagitant Furiae; & Furiarum maxima conjux.

In Galliis avide expector, habui literas nuper aliquot hujus argumenti, humanissimas imprimis a Marchione *Montoserio*. A *Rubenio* modo accepi, qui de itinere ad nos suo consilia in annum proximum rejecit. Affirmat nihil se literarum ad te dare, ne occupationibus tuis molestus sit, interim haec *Liviana* communicari tecum voluit, quae a te perfecta ut ad me revertantur rogo. Vale, meum decus, & summae festinationi ignosce. Probat *Rubenius* correctionem meam, *Effugere hunc non est*. Tu quid censes? Ovidiano tuo codice jam sum usus, quem aut *Goesio* tradam, aut *Elzevirii* tibi reddendum. Salutat te parens meus. Lugd. Bat. MDCLXII. ad. III. Eid. Jul. Gregor.

Grafwinckelio nostro, qui nescio quid in *Miltonum* parabat, typis *Elzevirianis* edendum, publica auctoritate silentium impositum, sic ipse mihi nudius tertius, cum Hagae essem.

EPISTOLA CCXXIV.

J. F. R. GRONOVIIUS

Nic. Heinsio.

Leidam.

Cum Lugdunum Batavorum commorandi aliquamdiu gratia iret cognatus meus, *Ludovicus Pincier*, Lubecensis LL. Studiosus (nam & alioqui te salutatus

taturus erat gnarus & nominis tui & amicitiae nostrae: vixit enim hîc antehac una cum consobrinis *Langermannis*, & post cum altero eorum *Luca* Helmaestadii: cui nihil aliud peto, quam ut humanum praebeas vultum) nolui diutius expectare te promissa mea. Habes igitur hîc exemplaria ad *Rigaltium*, *Puteanum*, *Bochartum*, *Valesium*, *Menagium*, *Cassianum a Puteo*, *Holstenium*. Habes etiam literas ad eundem *Puteanum* Equitem (quas potes claudere meo signo illaeso, & si vis, vel citius mittere, quam librum) & *Boeclerum*. Haec tibi tanta negotia ipse imponi voluisti: de caetero nihil tibi mando, quem satis scio fideliter annisurum, ut ex hac re gratiam mihi, non odia, aut contemptionem, compares. Proximas meas, quibus inclusae erant ad *Rubenium* & exemplum *Rottendorffianarum*, recte tibi redditas puto. Fac quaeso cognoscam, quod rogaveram, de Barone *Risenborgio*, & an fuerint illae sincerae literae de vocatione *Bislerfeldii*. Non poteram inducere animum, ut crederem hominem legatione tanta fungentem, & res pecuniamque omnem credere incertae fidei famulo, nec pecunia facile destitui, nec si destitueretur, vel ab Ordinibus vel Academia, cujus negotium procurandum susceperat, vel non potius ab ipsis hujus urbis magistratibus, quam a privatis sub tali pignore mutuum petiturum. Secus illi mea non defuisset quantumcumque brevis arca. Explora, quaeso, per famulum tuum, vivatne illic etiam *Christophorus Arnoldus* Noribergensis, & an acceperit fasciculum, quem per nautam jamdudum est quod ad eum misi: cui inter alia inerant exemplaria libelli mei, *Revio* & *Scriverio* destinata una cum literis: vel ab his potius cognosce, an haec acceperint. Vale, decus & praesidium meum. Daventriae. a. d. iiii. Kal. Quintil. ciciocli.

EPISTOLA CCXXV.

NIC. HEINSIUS

J. Fr. Gronovio.

Daventriam.

Quas ego nuperrime ad te dedi, virorum amicissime, una cum *Rubenianis* in *Livium* tuum emendationibus, eas recte tibi redditas confido. Hesternae vespéra *Dordraeco* reversus domum tuas offendi, quibus catalogum scriptorum *Rottendorffii* codicum, & alias *Rubenio* inscriptas addidisti. Pro catalogo gratias ingentes ago. *Ovidii* quidem & *Claudiani* nonnulla illic extare animadverto, sed quorum usus vix sperandus, cum in procinctu Italici itineris sim, atque eas propterea cogitationes in annum proximum differre cogar. Ad *Rubenium*, ne quid in me morae sit, die crastino tuas curabo. Nunc hîc a *Plitio* habes, qui librarii incuria factum queritur, ut observationum tuarum lectione haecenus fraudetur, rem ex ipso, ut arbitror, plenius cognoscēs. Catalogus nummorum veterum, quem *Smithio* miseram, per *Heidani* generum

Crucium jam mihi restitutus: omitte igitur curam. *Scribonius* quid in me molitur nescio. Sibi quidem magnum malum creaverit. Ludimagistrum vocat passim *Miltonum*: qui tamen & nobili loco natus, ut ferunt, qui hominem norunt, & in re lauta constitutus, variis peregrinationibus, assiduisque studiis privatus aetatem, quam quadraginta annis grandiore vix numerat, exegisse narratur: donec a consilio status Anglici ad scribae provinciam in isto collegio suscipiendam invitatus est. Virum esse miti comique ingenio ajunt, quique aliam non habuisse se causam profitetur *Scribonium* acerbè insectandi, quam quod ille & viros e maximis celeberrimisque multos nihil benignius exceperit, & quod in universam Anglorum gentem convitiis atrocissimis injuriis valde fuerit. Si quis Anglorum versibus illis meis, quos tu nosti, aliquid reponeret, nunquid ridiculus tibi viderer, si illum a *Scribonio* instigatum asseverarem? Sed illius ineptias, quarum finis non esset, missas faciamus. Poëmatia mea limam curatiorem exigebant: manum iis ultimam ne potuerim admove, variis in urbes vicinas excursibus factum, nunc qualiacunque sunt, publice ut legantur oportet. Unici id mihi solatii, meliora ab adversario non esse expectanda. Exemplaria Observationum tuarum, amicis Italis Gallisque destinata, quia hactenus non comparent, ne sero huc mittantur, metuo. Navis enim in portu Roterodamensi Gallias aditurae paratae jam adsunt, quibus ego, quamprimum ventus faverit, me sim commissurus. Quantum igitur in mora sit periculum tute vides. De *Freinshemio* nihil in ultimis *Vossius*, meliori itaque, quam ante, valetudinem ejus loco esse auguror. *Rubenium* hoc anno non esse nobis expectandum jam monui. De *Puteano* recte feceris, si cogitare pergas, est enim vir ille praestantissimus, doctorum omnium amore dignissimus. In *Avieno* legit secundum versum *Grotius*, *Solenni in faciem monstrat more: extima puppis* &c. reliqua fere, ut tu: nisi quod *tergo remulco* Latinum vix putat, cum *remulcum* sit substantivum: velit itaque cum antiquis libris, *tergumque in curva remulco*, ut sit sensus, *Litora subeunt certatim tergum navis remulco*, quod vix assequor. Altero loco, nihil *Grotius*, nisi *tangit* pro *tingit*, quid si *findit vada* legas? Epistola *Cydippes* inquinatissima est. *Hei* pro si scribendum utroque loco meminisse jam olim me vidisse, idque arbitror notatum mihi ad oram codicis in Suecia relictum. In caeteris aqua haesit: neque video quid tua correctione aptius excogitari possit. De *Barone Ri/enborgio* risi. Impositorem enim puto. Ab *Heidano* viginti quinque florenos mutuos credo sumpsit, quos post biduum se redditurum promiserat, sed eo insalutato abiit, hoc ipse mihi *Heidanus*. Metuo ne & *Curatoribus* Academiae nostrae verba dederit: cum indicarit illis *Bisterfeldium* sibi familiarem valde esse, obtuleritque operam suam, si quid ad *Bisterfeldium* vellent; ad quem literas puto impetravit, quibus aurem denuo vellerent de professione theologica jam ante oblata, an conditionem admitteret. Ille enim ad *Bisterfeldium* recta se cogitare adfirmabat. Diligentius in rem inquiram. Vale, meum decus. Literis tuis ut in itinere me convenias subinde rogo, ac perscribas fideliter, si quae nova ad te ab amicis perscribentur, rem literariam spectantia, e Germania praesertim, unde rarif-

rarissimae ad me perferuntur. Lugd. Bat. Anno MDCLII. a. d. xiv. Kal. Aug. Gregor.

Valesius junior panegyricum Dominae inscripsit nihil Ferrariana deterio-rem, sic ad me *Vossius*, qui & addit negotium tuum reginae commendatissi-
mum esse. Literas illi tuas measque exhibuerat. Gellium nondum acce-
perat.

EPISTOLA CCXXVI.

NIC. HEINSIUS

J. Fr. Granovio.

Daventriam.

TRadidit mihi proximis diebus cognatus tuus Observationum exemplaria, quae in Galliis Italiaque volebas curari. Literas ad Illustrissimum *Putea-num*, quas addideras, jam Romam misi. Postea nihil de te audire mihi con-
tigit. Puto tamen geminas meas postremas tibi exhibitas. Responsum tuam si Amstelodamum ad Goefianas aedes misisti, male factum: ille enim cum tota familia nunc Leidae est, & vereor, ne in alienas incidat manus, si quid litera-
rarum domum ejus perferendum volueris. De barone *Risenbergio* lepida om-
nino fabella est. Egi ea de re cum Syndico nostro. Rogavit is me, ut ex te quaererem, quo pretio literas Curatorum hujus Academiae oppignorasset. Si exigua esset summa, posse creditoribus satisfieri. Caeterum cum ego in
procinctu Gallici itineris tum starem, atque etiamnum stem (cum ventis ad-
versis haecenus conflictatus indignum in modum) cognato tuo negotium fer-
vide commendavi, ut ille, literis, quantum in se, prospiceret illis, Syndicum-
que voti compotem reddere conaretur. Livii hic nonnulla habes, quae jam
olim apud me inspexisti, ut si usui tibi esse possint, iis pro libitu utaris. Ty-
pographus quidam Salmurienfis non semel jam Elzevirium monuit, esse in
urbe sua virum doctum, qui multa in Livium observavit: ea illum tibi com-
municata velle, aut ipsi Elzevirio. Errata aliquot in prioribus editionibus
commissa in hanc schedulam, ut vides, conjecit, quae Elzevirius ut tibi mitte-
rem voluit. A *Rhodio*, *Ferrario*, *Liceto*, aliis amicis Italis nuper habui. *Fer-
rarius* Panegyricum denuo mittit, manu sua castigatum, quem ego in Gallias
mecum feram, ubi necdum visum arbitror. Idem scribit Prolusiones se nu-
per edidisse, in quibus parenti meo verbis admodum honorificis parentavit,
quem ad plures abiisse ex falsis rumoribus tum percepisset. Idem nunc est in
parte Rei Vestiariae secunda adornanda. Regina pro panegyrico torquem il-
li aureum magni ponderis decrevit: quo nomine gratias mihi agit. *Licetus*,
qui operas typographicas toto jam anno exercet, commentario de Lucernis
veterum edendo, mox & alium de Gemmis Annularibus magnae molis editu-
tus Serenissimae Reginae inscribendum: nunc morae hujus impatiens, multa

de typographorum oscitantia praequestus, ait; ne tanta cunctatione malum nomen apud optimam Principem videatur, se commentarium etiam de Lucernis mox proditurum, tanquam prodromum, Reginae destinare. Dedicationem literis addit valde operosam. Salivam credo illi movit munus *Ferrario* destinatum. *Rhodius* in Scribonio suo Largo adhuc defudat, mox Celso manum admoturus. Ad *Boeclerum* etiam hodie curavi. Vale, meum decus, & si quid in Galliis curatum vis praeterea, fac sciam. Ex Germano quodam intellexi hodie, *Bochartum* hinc mox expectari, ita se ex *Blondello* ferebat audivisse. Lugd. Bat. MDCLXII. a. d. XXIV. Julii Gregor. Festinationi tumultuariae rogo ignoscas.

Locus est apud Ovidium intricatus Pont. II. El. v.

*Dumque silent, adstat; status est vultusque deserti;
Spemque docens doctae vocis amicus habet.*

Nihil hinc intelligo. Primo bene editiones quaedam & scripti, *Dumque silens adstat*. Sequenti versu pro *docens*, membranae nonnullae, etiam veterimae Sarravianae, si memini, *decens*. Puto scribendum minima mutatione, *decens amictus*, hinc *togam componere* & similia: sic & eleganter habitum Phoebi cytharam pulsantis describit lib. XI. Met.

*Ille caput flavum lauro Parnasside vinctus
Verrit humum Tyrio saturata murice palla. &c.
Artificis status ipse fuit.*

Sententiam tuam de hoc loco scire velim.

EPISTOLA CCXXVII.

J. F. R. GRONOVII

Nic. Heinsio.

Leidam.

Binis tuis responsum debeo: prioribus, quibus nuntiabas te accepisse *Rotendorfii* catalogum, & mittebas (quod mihi opportunum fuit, gratiasque eo nomine ago) quae petieram ex Festo Avieno & Dionysio: posterioribus, quas receptis meis a cognato meo scripsisti. Si quas dedisti alias, ut videbantur hae postremae significare, redditae nullae sunt. *Risenborgius* quicumque sit ille, nostrati creditori fidem praestitit: nam missis Suolla literis cum argento publicas, quas deposuerat, repetiit recepitque. Credo non fuisse tanti, & ad majus opus eas servare. Petierat a me sex Ducatos, Brema rescribendos: ab illo quatuor imperiales abstulerat. Quae de *Vallesio*, *Ferrario*, *Liceto* nuntias, gratissima fuerunt, & laetor virtuti maximae Principis nostrae respondere seculum foecunditate ingeniorum, quae merito illam praedicent. Sed sumne ego infelix, qui nihil eorum legere possum? Si fieri potest, cura, quaeso, ut ex Gallia vel Vallesianum nanciscar. Locum ex Ponticis praeclare abs te re-

restitutum puto, & per eum licere nobis in utramque aurem dormire. De Poëmatibus tuis non intellexi fatis: absente igitur te uno corpore publicabuntur? Εἴχε ὦ φίλε ἡλίοι: qualiacumque sunt, bona & egregia sunt. Caeterum, ut scias, *Langermannus* meus nunc est. Parisiis, quem immortalis beneficio obstrinxeris, si, quod a me petit, notorem illi te commendatoremque apud illustres literis viros praestiteris. Atque ut id fiat commodius, literas ad illum his inclusi, quas per servulum mittere ad illum potes, & ad te arcessere. Quamquam peccarit in eo, quod solum mihi nomen mercatoris, apud quem inquirendus esset, designavit ignarus, opinor, moris & magnitudinis urbis. Itaque difficile tibi erit hominem invenire: sed ταυτέματον, spero, κάλλιον βουλευσεται. Quae Salmuriensis notavit, omnia, & multa alia ejus generis, jam correxi in parte illum, quam dudum habent Elzevirii. Si quae ab ingenio observata habet, non ingratus recipiam. Et de eo monebo ipse Elzevirios per literas, quando haud scio, Lugdunine an Parisiis has visurus sis. Sed ubicumque videbis, Deum veneror, ut felicissime tibi omne iter cedat. Meas quidem, quando ita vis, nusquam desiderabis, sed vellem ex desolata nostra etiam literis Germania saepius aliquid scribere tibi possem: nunc semestribus singulis vix unas a Reinesio accipio. Quod hoc ipso die ab operis specimen opusculi mei accipiebam, hic inclusi. Vale, magnum decus meum, & semper esto felix, nec cessa meo officio apud fautores nostro, quacumque transferis, fungi. *Philippum Vincentium* Rupellarum ministrum decessisse audio. Vidi penes illum partem *Livii* & duos, ni fallor, *Gellios* in membranis non contemnendis, ut primo aspectu videbatur. Vide an ea servare posses. Iterum Vale. Daventriae. xvi. Kal. Sextil. ciciocli.

EPISTOLA CCXXVIII.

NIC. HEINSIUS.

J. Fr. Gronovio.

Daventriam:

NUM diem Parisiis jam ago, virorum amicissime, ita distractus compellendis ac excipiendis amicis, ut vix respirare liceat. Mira est procerum & doctorum erga me benevolentia, quam quo minus promereor, eo magis jactare ac commemorare audeo. Apud illustriss. *Coadjutorem Parisiensem*, ac Marchionem *Montozerium* mecum pransus est diebus proximis *Menagius* noster, uterque tenerrimis arctissimisque complexibus me excepit. Cras *Fabroto* diem diximus. *Naudaeus*, *Patinus*, alii sequuntur, quibuscum rus erit adeundum. Ita aestivos fallo calores, qui de itinere Italico cogitare me non sinunt. Frequens tui inter nos mentio. Quantum video, manuscriptis libris excutendis vix licebit invigilare: sub initium enim mensis proximi fore auguror, ut coelo magis temperato viae committi tuto possim. Libelli tui exemplaria,
Putea-

Puteanis fratribus (quorum major natu pessime habet, morti, ut metuendum, vicinus) *Menagio* etiam *Valesio*que tradidi. Omnes gratias immortales tibi agunt. *Bocharto* suum etiam misi, quid respondi laturus sim, avide expecto. *Rigaltio* quod debeatur, cum ab urbe absit, *Puteanis* tradidi. Tuas hesternae vespere accepi; ex quibus summo cum dolore meo deprehendo, periisse illas, quas *Vlitianae* epistolae addideram, ac *Rubenianis* in *Livium* correctionibus. Puto hanc *Ludovici Elzevirii* negligentiam, quam & alias saepe expertus sum: ad illum enim curandas *Bonavontura* miserat. *Valesianam* orationem, quam nec ipse vidi hactenus, ut consequaris curae mihi erit. Habet is nunc a me *Ferrarianam*, de qua quid censeat, mox intellexero. Inveni hîc geminam a *Petro Possino* epistolam, (una cum *Theophylacto* de institutione Principis recens a se edito) qua narrat *Alexiadem* jam fere absolutam, eam sibi in animo esse ut *Christinae Augustae* inscribat, nisi ego dissentiam, mox secutorum *Cinnamum*. Respondi illi humanissime, vir enim bonus est, recte facturum, si & *Cinnamum* eidem *Reginae* inscribat. Alii alios parant. *Fabrotus* *Balsamonis* *Paratitla*, aliaque juridica *Graeca* hactenus inedita. De poëmatibus meis edendis *Goesius* viderit: illi enim ea cura demandata. Sed puto observabit primo, quid moliatur ὁ δῆμιος, quem ex amoris impotentia sic insanivisse olim ex amicis fide dignis hîc intelligo, ut vinculis constringendus fuerit: expecto totam historiam accurate descriptam. Serviet & hoc telum mihi aliquando. *Langermannum* tuum cum in hac urbe esse ac vicinum habitare mihi intelligerem, conventus a me est domi suae. Juvenis modestus est, & eruditus, quantum apparet. Deduxi illum ad *Puteanos* fratres, aliosque viros literatos, etiam ad praesidem *Thuanum* hesterno die, quem una salutavimus, ejusque e bibliotheca scriptos aliquot codices deprompsimus, ut *Macrobbii Saturnalia*, *Prudentium*, *Catalecta veterum poëtarum*, *Martialis* aliorumque, ac *Ovidii* nonnulla. *Senecae* multa ibi extant, geminum epistolarum ejus exemplar illic & vidi satis antiquum. Sed excutiendi otium non erit. *Langermanno* tuas tradidi, videtur non abhorreere ab itinere Italico, ego vero velim expensis regiis id fieri possit, nam *Resander* ille homo est, ut hîc intelligo, non modo morbo melancholico ad insaniam usque correptus, quod jam ante cognoveram, sed potator etiam strenuus, & venerius nepotulus, ut amicus noster deridendum me *Italiam* propinare voluerit, quo se ulcisceretur, credo, de *Tollio*; sed & ego illum vicissim lusero. Cum enim mercator *Serenissimae Reginae*, qui res ejus privatas agit, plane dissuaserit de *Resandro* in comitatum meum admittendo, literas hodie ad dominam dedi, quibus moneo consultum magis de *Langermanno* videri, & facile, arbitror, impetravero, nisi quid turbet amicus noster, quare si quid illi impofterum voles, mihi mitte: habes hîc ab illo. Vale, meum decus, & literarum. Plura volebam, sed lassus admodum sum scribendis in *Sueciam* atque *Italiam* literis: rogo igitur festinationi ignoscas, & frequenter impofterum scribas. Paris. CIOIOCLI. Prid. Eid. Aug. Gregor.

EPISTOLA CCXXIX.

J. F. R. GRONOVIIUS

Nic. Heinsio.

Parisios.

Pervenisse te saluum Lutetiam & illustrium virorum incredibili humanitate
 excipi gaudeo, & superis habeo gratiam. Mei quoque cum dicis memi-
 nisse nonnullos, amo te & fruor credulitate. De literis nihil est, quod ve-
 reare: omnes accepi, & omnibus, puto, respondi. Quod ut agnoscas, eae,
 quas Rubenianis addideras, nuntiabant de gravi *Freinsheimii* morbo, & *Hol-*
stenium convalescere: alteris loca Avieni & Dionysii adjeceras. *Langermanno*
 meo quae praestitisti, quaeque de illo cogitas, ob ea gratias & debeo, & ha-
 beo tibi immensas. Crede mihi, dum apud me fuit, non modo studiorum
 elegantium rudimentis eum feliciter imbui, sed vel in primis, ut veteres avias
 ei de pulmone revellerem, & animum ejus plenum officii redderem, mihi
 cordi fuit. Ni bonus, fidus, gratus est, quanticumque spondere velim. Cer-
 te si non est, magis me, quam quisquam unquam mortalium, decipit: sed ad
 fallendum natus minime videtur. Itaque perita, & totum tui beneficii red-
 de. Ego oppressus illis, non gravibus, sed minutis multis meis occupationi-
 bus nunc ad illum non scribo: faciam proxime: omnia tamen posthabui, ut
Vossium de vestro utriusque desiderio alloquerer, ne ille me ob causas, quas
 suspicari potest, hac de re parum laborare putaret. Scripsi igitur accurate,
 & ita, ut sciat, me non tantum favere illi, sed vehementer etiam hoc desi-
 derare: cum his literae illae Amsterodamum ad matrem ejus mittentur. E-
 go in Livio quotidie aliquid. Nuperrime lib. xxxiii. cap. xxxviii. me exer-
 cebant illa: *Smyrna & Lampascus libertatem usurpabant, periculumque erat, ne*
si concessum his foret, quos metuebat, Smyrnam in Aeolide Joniaque, Lampasum in
Helleponto aliae urbes sequerentur. Basileensium correctorum est, quas metuebat,
 quod vides sensu esse nullo. Moguntinus codex, unde pars ista libri hujus
 edita est: *quo; in Theba, sic etiam ediderunt Moguntini, Aldus Junta, Cer-*
vicornus. Videtur scribendum: *ne si concessum his foret, quasi tabe, Smyrnam*
in Aeolide: ne pestilentia illa velut rebellionis & importuni libertatis desiderii
& aliae urbes afflarentur & corriperentur. Dixit lib. ii. *postremo velut tabem*
pervenisse ad corpus. Observationum plus parte tertia jam impressum. *Schelius*
 noster aderat hic, cum tuas acciperem, Haga redux, ubi rempublicam for-
 titer feliciterque gessit. Magna res confecta est, concilio tanta cum concor-
 dia dimisso: magna res, mi Heinsi, & quam nos focii, nec hostes nostri spe-
 raverunt. Haec publica gratulatio cum nos poene in lacrimas prae gaudio sol-
 verat, accessit & privatum gaudium ex tuis, quas non ego libentius, quam
 ille legit, teque plurimum salvere jussit, desiderantissimus secessus, & prae-
 dio-

dioru suorum & bibliothecae, quibus bono publico, privato incommodo dudum abfuerat. Vale, & tot aevi decora, tot amicitiarum a me officiosissime saluta. Daventriae. xv. Kal. Septembr. cicioccli.

EPISTOLA CCXXX.

NIC. HEINSIUS.

J. Fr. Gronovio.

Daventriam.

VAlde me commovit, Vir clarissime, quod ultimis tuis nunciabas, non perlatas ad te literas illas, quibus & Rubenianas ad Livium observationes mittebam, & in ejusdem auctoris librum, nisi fallor, trigessimum primum *Claudii Puteani* notata ex Cujaciano deprompta codice, quae olim apud me vidisti. Cujus hoc negligentiae sit imputandum nescio, id scio, Bonavonturae Elzevirio fasciculum a me commissum, qui sine dubio Amstelodamum cognato suo miserit illum Daventriam curandum. *Rubenium* hujus jacturae certiorum facere potes; ut si apographum ejus servavit forte inter schedas suas epistolae, id tecum communicet, nolim enim te fraudari istis animadversionibus. Erat & eidem fasciculo, si memini, luculenta epistola *Vlitii* nostri inserta. Multis ipse jocabar in τ δέῖνα, quo magis indignor in alienas manus fasciculum delatum. Puto curiosos homines nonnullos literis intercipiendis invigilare. Ad *Bochartum* ter scripsi, ex quo in Galliis haereo. Semel *Rotomago*, cum & tuum illi libellum mitterem, quas cognato ejus *Langlaeo* commisi. Iterum postea, quibus incitabam illum Reginae nomine, ut itineri se Suecico ante hyemem accingeret. Postea brevioribus literis in Italiam abiturus valedixi. Hesterno vix tandem die ad ultimam responsi aliquid epistolam tuli: quo geminas priores ad se perlatas negat. Monui tamen hodie, ut apud *Langlaeum* diligentius inquiri curet, quid fasciculo sit factum. Mense Martio proximo ille *Valesius*que Suecicum iter auspicabuntur. Libellum tuum omnibus, quibus oblatum voluisti, obtuli. Quosdam etiam de responso conveni, sed promittunt, non praestant. *Naudaeus* nescio quid libellorum se seposuisse ait, ad te mittendorum: tradet, ut opinor, fasciculum *Langermanno*: epistolis scribendis invitum se vacare adfirmat. *Valesius* scripturum se tibi pollicitus erat, mox nescio quas occupationes sibi oblatas praeter expectationem missa ad me schedula causatus est. Unus *Maresius* hasce, quas vides, tradidit. *Salmasium* ex Suecia abiisse rumor hic est constans. Nam amicus noster ne γὰρ quidem hac de re suis ultimis; cum brevissimus sit, & a Lusitanis nescio quibus interpellatum, ne plura potuerit, argutetur, quo se conversurus sit nescio. Nam literis ad amicos suos in hac urbe datis, Batavos se praeteriturum minatur. Batavis de adventu suo spem facit. Puto rerum regiarum eventum operitur, quae loco esse pessimo dicuntur. Defensio illa plurimos etiam illi in Gallia

ini-

inimicos peperit, ut *Blondellianum* nunc oraculum agnoscam: is monebat olim, neminem in his oris doctum simul & probum esse, qui defensionem istam probaret. Aliquid de fortunis suis clam stabiliendis apud Condacum agit: sed illam rem turbabit, ut existimo, *Gaulminus*, quantum poterit, ut auctoritate apud illum potest plurimum. Donarat is Reginae nostrae quingentos circiter codices, tam Hebraicos, quam Arabicos Persicosque ac Turcicos, omnes ineditos, quod munus luculentissimum: *deiva* multum malignis verbis attenuasse apud Augustam Principem dicitur. Nemo certe fuit hactenus, qui Dominae nomine gratias illi vel tralaticias paucis ageret verbis, quae res stuporem mihi ipsi incussit. Metuo ne amicus etiam noster, *Gaulmino* non satis aequus, hinc aliquid turbarit. Mittit hinc ad te *Langermannus* excerpta *Liviana*, quae desideras, ex *Puteaneo* codice. Aliud auctoris illius exemplar antiquum satis in *Navarraeo* hinc extare collegio *Puteanus* idem monuit, curabo, ut id ante abitum inspiciam, non enim viae me accincturus sum, nisi post dies sex septemve. Spes erat facta de *Ovidianis* codicibus, qui in *Richeliana* extant bibliotheca, sed custodem nullis precibus expugnare hactenus possum, ut eorum mihi copiam faciat. Quatuor aut quinque amici exemplaria alia donarunt, plurimum spes est facta. Obiit *Tholosae* illustrissimus Archiepiscopus, ordinis sui vir longe doctissimus, quam jacturam boni omnes aegre hic ferunt: mei studiosissimus erat, ut non possim non in partem doloris publici venire: *Holstenius* melius nunc habet. *Freinshemius* in Germaniam revertitur, valetudini minus commodae sic prospecturus. Aestate proxima in Sueciam reversurum scribit *Vossius*: alii negant, quibus & ego accesserim. Vale, meum decus, & si me amas, frequenter scribe. Paris. CXCICLII. a. d. x. Sept.

Langermannum & suo nomine, & tuo etiam, multum amo. Spero impetratum me a Domina, ut sine expensis suis peregrinari imposterum possit, easque me inventurum literas, quibus annuat, Venetiis. Emit tibi *Langermannus* *Gruchium* de Comitibus ex editione *Vascosani* in folio, sed cum nesciat viam, qua ad te perferri possit, id exemplar mihi vindicavi, ea lege, ut tu meum ferres, & jam famulo parentis mandavi, ut id aut praesenti tibi tradat, aut per *Elzevirios* mittendum curet. Monet *Vossius* inventas a se pagellas duas in bibliotheca regia membraneas perantiquas, quas postquam diu considerarit, deprehendisse fragmenta esse historiarum *Sallustii* perditarum. Nuper incidit in manus meas *Claverii* libellus, quem *Florida* inscripsit, in illo inscriptiones satis multas alibi non editas extare animadverti, qua de re moneas licet amicum tuum in Germania. *Langermannus* in *Columella* veterrimo conferendo cum vulgatis libris nunc occupatur. Statium etiam vetustissimum contulit, cujus ego illi usum ex monasterio *S. Galli* impetravi. Dedi & *N. Fabri* excerpta, quae *Valesius* communicarat. *Freinshemius* in Germaniam discedit, valetudinem adversam causatus: anno proximo in Sueciam rediturum scribit *Vossius*, alii negant. *Langermannus* puto agit tecum de *Naturalibus Senecae* quaestionibus ad fidem exemplarium veterum castigatis, quas cum illo communicavi. Adest modo *Cl. Menagius*, qui te peramanter salutat, gratiasque

maximas agit pro observationibus ad se missis, quas *P. Sirmondo* commodavit, gratias etiam uberiores epistola acturus. *Petavius* languet, puto hunc morbum illi fatalem fore.

EPISTOLA CCXXI.

NIC. HEINSIUS

J. Fr. Gronovio.

Daventriam.

M *Aresii* epistolam proxime misi, Vir Clarissime, postea tuae ad me perlatae. Iis brevius, quam vellem respondere nunc cogor, quod in procinctu viae sim Italicae. Nullas ex meis periisse quod nuncias magna sollicitudine liberatus sum. Poëmatis quid fiat nescio, puto tamen praelo commissa. *Holstenius* pergit convalescere. *Freinsheimum* de discessu cogitare jam indicavi puto. Favorem regium *Langermanno* ut conciliem nihil non agam, & tuo nomini & ejus meritis hoc daturus: est enim juvenis praeclarae omnino indolis, & in quem incidisse me laetor. operam ejus Dominae utilissimam fore confido. Habes hinc ab illo, cum nuper, nescio quomodo excerpta ex pagellis Livianis mittere oblitus sit. Habes hinc & ab Illustrissimo *Puteano*, misit non obsignatas, ne fraudem hanc meam putes. Ad me haec inter caetera: *E troppo lo studio che VS. ha di favorirmi, quando, oltre il continuarmi il proprio, e stimatissimo suo affetto, m'ha procurato quello dell' eruditissimo Sigr. Gio: Frederico Gronovio, il cui nome, reso tra li scrittori hodierni illustre per le sue nobili fatiche attorno a autori antichi, etiandio frescamente col libro delle sue varie osservazioni, & le note, che va facendo sopra Livio, obliga ognuno a stima particolare d'esso, metteva me in desiderio di potergli divenir Servitore, ma apertamisi di questo la strada con l'humanissima lettera; che de' esso per mezzo di VS. ricerò, non posso dire a bastanza, quant' io mi ricolga tenuto, e me gli dedichi di cuore; pregandola a offerirgli l'opera mia per tutte l'occorrenze, che gli potesse in queste parti servire. Qui alligata viene la risposta, nell' invio della quale degnisi VS. di supplir per me, che vorrei habilita a far creder a quello, quant' io apprezzi la pregiabilissima sua gratia. &c.* In codice variorum epigrammatum *Thuaneo* chori duo aut tres *Senecae* extant. Varias lectiones, quamquam non magnae rei, mittam occasione magis oportuna. *Salmasius* ex Suecia jam discessit, mox vobis adfuturus. Res regis magnae Britanniae loco pessimo dicuntur esse. Cujus partes si succumbant, quis nostro in Batavia locus esse possit non video, nec suis acceptior futurus. Bellum civile Galliae mox incubiturum video, id enim utrimque jam agitur. En quo discordia cives. *Condaeus* *Burdigalam* se recepit. Sed de his alii certiora poterunt. *Schelium* nostrum totus depereo, nihil enim illo homine amabilius, elegantius, candidius. Totum me possidet, operam illi meam si offeras, multum te amavero, nam nunc ipse non possum. Vale.

Parisi XVIII. Sept. CIOICLI. multa nocte.

EPI-

EPISTOLA CCXXXII.

NIC. HEINSIUS

J. F. Gronovio.

Daventriam.

Opinor tibi redditas, meum decus, quas una cum Puteaneis Roma ad me perlatis nuper misi. Haec Lugduno festinans nunc scribo, cum in pro-cinctu sim Italici itineris. Expecto mox adfuturum *Argensonium* regis Chri-stianissimi Legatum, cum quo Venetias sum abiturus. Poëmatiis meis su-premam mox a typographo manum imponendam confido. Duo ad te libel-li ejus exemplaria ut mittantur *Goesium* nostrum rogavi, quorum alterum no-bilissimo *Schelio* per te oblatum volo. Scriberem & illi, meaque sisterem ob-sequia, nisi alio mentem mihi divisisset itineris suscipiendi cura. Observatio-nibus tuis quid fiat, velim me doceas. Si ad finem jam perductae sunt, aut mox perducendae, auctor tibi sim, ut exemplaria, quae amicis Italis oblata vis, *Goefio* tradenda cures, cum is poëmatum meorum exemplaria triginta Liburnum proxime sit missurus, eidem fasciculo libellus tuus inseri possit. In hoc regno ad bellum civile omnia parata sunt, quo magis de fuga tempestiva cogito. *Grafwinckelium* nostrum luci dedidisse Vindicias contra Miltonum suas audio, qua in re visus mihi est non satis prudenter egisse, rebus regiis ad institas redactis. *Langermannus* noster officiose te salutat. Pluribus ex Italia te-cum agam: tu vicissim fac ne diligentiam in te desideremus. Lutetiae *Men-telius* quatuor codices Ovidianos mihi donavit. Totidem Senator Tholosa-nus quidam ex amicis meis offert, quos ut Liburnum mittendos curaret ro-gavi. Haec subsidia facient, ut manum denuo auctori optimo admoturus sim. Vale. Lugduni MDCLII. a. d. III. Eid. Octobr.

EPISTOLA CCXXXIII.

J. F. R. GRONOVIIUS

Nic. Heinsio.

Venetias.

Quod libellis fideliter curandis memoriam mei Parisiensibus amicis refrica-sti, gratias ago tibi immortales. Literae, si quis ut scriberet, animum inducere potuisset, venissent sane desideratae: nunc quando nemini li-buit, tutum mihi de illorum benevolentia sufficit testimonium. Pigritia tamen aliorum aliquid gratiae Maresianis addit. Nam illustrissimi *Puteani* Roma da-tas poene oculis contrivi, & inter res pretiosissimas habeo. Inde licet aesti-

mes, quantum parario illarum tibi acceptum feram. Rescribam, ubi libellum, qui nunc sub praelo est, jam duabus partibus perfectus (intra mensem, credo iterum absolventur reliqua) paratum habuero. Te vanissimi homines (quod illorum capiti sit) & Hardervici, & Amstelodami, & Hagae dissiparant dominae gratia excidisse, & nunquam in Sueciam rediturum: quin etiam, quod maxime ridiculum est, simulato itinere Italico Lugduni in aedibus paternis delitescere. Adventus τοῦ δῆνα cum ingentibus famis. Quadrigae dono datae dicuntur, & ea gratia foenum comportatur in aedes. *Trium* millium Vallengium annua decreta pensio, millium uxori, si super vivere illam contigerit; eidem bacca praefens donata binum millium florenorum. De defensione defensionis incerta omnia: alii cum inspecta esset a Domina, & tradi operis iussa, audita Caledonia clade suppressam & inhibitam, missam inde Lutetiam & edi: alii nihil ejus etiamnum scriptum esse. *Miltoni* liber Londini auctior & augusta forma iteratur. Ingens rumorum materia discessus eodem tempore τοῦ δῆνα, *Freinsheimii*, *Boecleri*, *Moucheronis*: exhaustas arcas alii, alii gentis ferunt invidiam; *Franc. Junium* majorem Amstelodami nuper conveni: habet paratum Lexicon originum linguae patriae, in quo multa praeclara ex Anglosaxonum veteribus monumentis: an tamen ita omnia nostra possint; debeantque ad Graecos reduci, ut illi visum, tu judicabis: malo saltem nostra esse Graeca, quam Graeca & Latina esse Scythica. Alteram editionem operis de pictura adornat. *Vossii* etiam patris quaedam ἀνέκδοτα promittit, eaque de causa apud sororem hiemabit. Attulit ex Anglia a *Patricio Junio* ad te missa quaedam Ovidii vel scripta, vel excerpta scriptorum: ea accepta ab illo *Verbarius* iste dixit se tibi Lugduni B. traditurum, cum jam inde discessisses. *Langermannum* tibi, magis tractatum, magis placere mirifice laetor, tecumque esse velim vel ea praecipue de causa, ut quae a me accepit bonae mentis semina, ingentique deinde sua industria aluit ac nutrit; tua consuetudine in perpetuum confirmet & corroboret. Cave putes quemquam esse ex omni consanguinitate mea, quem magis amem, & de quo melius sperem. Itaque si quid est, quod his omnibus deferre velis mea causa, hoc in uno consumas licet, modo & ille, uti spero & certum habeo, partem apud te gratiam obsequio & observantia foveat, neque vitiis effundat.

Et quando Venetiis has accepturus es, illustris *Loredanum*, *Ferrarium*, *Rhodum*, quaeso, ut a me plurimum & officiose salutes. Ante omnia & P. *Intemelium*, si quidem ibi moratur, aut ubicumque in eum incideris. Dudum est cum misi fasciculum satis magnum ad *Loredanum*, in quo erant Seneca P. & F. integer cum notis meis, Observata ad Scriptores Eccl. A. Gellius; item altera exemplaria notarum & Observatorum *Ferrario* tradenda: an pervenerit, scies. *Is. Ballialdum* inveni Amsterodami: dixit se fundos populos *Rigaltii* confutasse, scripto ad Fr. *Puteanos*: item *Lambecium* multa queri de avunculo, quae resciscere potes. *Lambecius* agit Hamburgi, & nuper ad me misit Gellium cum regio codice collatum. Vale, decus meum & laetus age. Daventriae xvi. Kal. Nov. ciorccli.

EPI-

EPISTOLA CCXXXIV.

NIC. HEINSIUS

J. Fr. Gronovio.

Daventriam.

Quamquam temporis angustiis nunc premar, Vir Clarissime, vixque de scribendis ad amicos literis cogitare liceat, tamen cum Parens ac Goeffius essent compellendi, deque meo in has oras adventu certiores faciendi, peccaturum me in amicitiam nostram arbitratus sum, si eadem opera te non convenirem, verbis id facturis luculentioribus, ubi sedem Venetiis fixam posueram, majusque nactus ero otium. Alpium præruptas cautes salvos evasisse nos tempore minime oportuno si nunc nunciem, sufficiat. De studiis communibus differendi commodior mox locus erit. Poëmatibus meis quid fiat nescio, totis enim duobus jam mensibus nullos ex patria, nullos aliunde nuncios accipio. Venetiis omnia intelligam. Sirmondus ad plures abiit, ex quo Lutetia discessit. Langermannus noster, quem tenerrime amo, salutem tibi plurimam dicit. Ambrosianam modo bibliothecam adiit, in qua excutienda assiduus est. Vossius ultimis indicabat de itinere Hispanico se cogitare: forsan propositum mutavit. Holstenium valetudine necdum satis uti commoda intelligo. Vale, meum decus. Mediolani. A. CIOIOCLI. a. d. XVI. Kal. Decembr. Gregor.

EPISTOLA CCXXXV.

NIC. HEINSIUS

J. Fr. Gronovio.

Daventriam.

Ultimis tuis, Vir Clarissime, quas in hanc urbem adveniense Batavia missas apud mercatorem offendi, oportune profecto Senecae tui & observationum Lauredano offerendarum facta a te mentio est. Lauredanum enim postquam tuo salutassem nomine, deque libellis illis percunctatus essem, eos sibi visos negavit. Librarium itaque Johannem La Novium popularem meum, ad quem libellos a Ludovico Elzevirio suspicabar missos, sine mora hanc ob causam conveni, qui fasciculum cum epistola Lauredano inscriptum ex arca quadam confestim deprompsit, in qua jampridem latuisse videbatur. Quam acceptum viro nobilissimo id munus fuerit haec ejus epistola testabitur, brevis quidem, sed quam inter gravissimas occupationes luculentior parare nequaquam potuit. Aliâ occasione pluribus se acturum tecum pollicetur: hanc quoque vix extorxi. Augustus Venetae reipublicae Senatus Advocatoris provinciam

illi

illi commisit. Advocatorem illos scis vocare litium judicandarum triumvirum, quae dignitas ut maxima est, ita etiam longe molestissima, cum totos dies sibi vindicet sine intermissione ulla. *Ἀντίδωρον* mihi tradidit libellos aliquot suos ad te mittendos, quos eidem Johanni La Novio committam, cum ego proximis diebus Florentiam sim abiturus. Excellentiae titulo impoſterum a te compellendus *Lauredanus*. *Petrus Michaelius*, quem olim etiam hîc noſti, opinor, ante menses tres quatuorve ſublatus eſt e vivis. *Vintimilia* Italiam per vagatur, nec ſedem ullibi certam fixit, habui ab illo epiſtolium diebus proximis. *Langermannus* noſter Mediolano tandem huc advenit, excuſſis diligenter Ambroſianae bibliothecae loculis. Epiſtolam illi tuam miſi ante menſem, quam tamen redditam ſibi negat. Sed plura ipſe de rebus ad te ſuis. Obſervationes tuas per curſores Romanos Equiti *Puteano Holſtenioque* offerendas curavi, quem ſcuſculum ſibi redditum idem *Puteanus* jam bis teſtatus eſt, gratiasque tibi pro dono ſe acturum promiſit. Id tamen ne fervidius auſim flagitare, valetudini viri optimi non ſatis confirmatae acceptum refer. *Octavius Ferrarius* exemplar ſibi deſtinatum negat ſe accepiſſe. Nec inter ſarcinas La Novii comparuit. Tu igitur vide, per quem curaris. Mediolano ſemel ad te ſcripſi, ex hac urbe nunc ſecundum ſcribo. *Voffium* noſtrum adeſſe vobis confido. *Alaſtorem*, ut audio, febris bene habet Gottorpii. Ego valeo. Tu quid rerum moliaris ſac ſciam. Obſervationum volumen alterum jam prodiſſe auguror, ejus libelli exemplaria cum poëmatibus meis in Italiam a *Goeſio* mitti poſſint. Vale. Venetiis MDCLII.

Gellium tuum negat ſe accepiſſe *Voffius*: haec Ludovici Elzevirii culpa eſt, cui eum cum multis aliis libris Holmiam mittendis tradidi. Salveat nobiliſſimus quaefo *Scheliuſ*, de cujuſ rebus ſac nonnihil interdum intelligam.

EPISTOLA CCXXXVI.

NIC. HEINSIUS

J. Fr. Gronovio.

Daventriam.

PRaeter ſolitam diligentiam, Vir Clariffime, ut verum fatear, feciſſe mihi viſus eſ, qui tanto tempore nihil ad me literarum dederis. Jamque ſilentium iſtud tuum mirari inceperam, timebamque ne cum adverſa valetudine conflictareris; cum ecce tuae heſterno die tandem ſuperveniunt aliud agentibus quibus breviter nunc (eam enim legem temporis anguſtia praefcribit) reſpondebo. Gratum imprimis eſt, quod nuncias libellum Obſervationum tuarum mox prodiſſe: de quo ſpem jam feci illuſtriſſimo *Puteano*, is enim modo a me diſcedit, vir praefantiffimus. Gratias ſe denuo acturum per literas non ſemel promiſit pro nupero munuſculo: ſed cum & aetate ſit tam proveſtâ, & multis occupationibus diſtrahatur, non audeo promiſſum urgere. *Lauredani*
epiſto-

epistolam, quam Venetiis miseram, accepisti, puto, quanquam nullam omnino ejus mentionem in tuis facis. Idem tradidit fasciculum tibi offerendum, in quo scripta sua varia congeffit. Illum accipies, ubi libri mei, quos Venetiis comparavi, in Bataviam pervenerint. Pervenient autem satis tarde, cum arcam necdum navi creditam opiner. Negotium tuum, quod commendas mihi, spero curae fore *Vossio*, aut ipsi potius Augustae, quo erga res tuas affectu est. Amicum nostrum excidisse gratia Dominae constans in Batavia rumor est, ut intelligo, quem quin porro foturus sit *ô déva* nullus dubito: friget enim valde vetus inter utrumque amicitia. Quis commentus sit hanc fabulam non scio, splendidum esse mendacium mihi certe satis constat. *Alastor* meus an lucem sit visurus tandem, avide nuncium expecto, audio illum multa in me parata habere, ut causae nihil sit; cur illi parcatur. In Suecia inter proceres turbatur magis, quam velim. De *Messenio* regio historiographo jam audivisti. Indignum profecto literarum nomen est, quod ab optima principe tanto studio foveatur, si inde quoque monstra tam immania prodeunt, qui male illi velint. Sed viderit hoc carnifex, cui praeda jam, ut auguror, *Messenius* cessit. Ego matutinas horas & *Langermannus* Vaticanae damus. Me Ovidius, illum Theocritus exercet: illi enim auctori, quem unice indeliciis habet Augusta, ut manus admoveret, auctor fui. De Callimacho etiam cogitat. Si quid Palatina mihi suppeditabit bibliotheca, uni Ovidio totum me dabo. De Farnesiana, Sfortiana & Altempsiana inspiciendis spes quoque facta. Nam Barberina, quam ipse Cardinalis, Princeps humanissimus, mihi obtulit, vix quicquam habet, quod meis usibus possit inservire. *Holsenium* non nisi bis aut ter conveni, etsi mensem fere totum hîc jam agimus, quod ab urbe Perusiam sit profectus, reversum tamen hesternò die intelligo. De libris, quos petis, ut tui ratio habeatur, curae mihi erit. Vale, amicorum optime maxime, & frequentius impostero de rebus tuis certiore me fac. Romae. Anno cicioclii. iiii. Febr. Greogr.

EPISTOLA CCXXXVII.

J. F R. G R O N O V I U S

*Nic. Heinsio.**Romam.*

Quid ordiar, mi Heinsi, nisi antiquam adeo te venustatem tuam obtinere, ut voluptati obitus, sermo, adventus tuus, quocumque adveneris, semper fiet? Vel nuper, quam opportunum fuit te Venetias adire, ne Illustrissimus *Lauretanus* perpetuo ignarus observantiae meae, ego incolumitatis, honorum, amoris ejus erga me agitaremus. Itaque & illi laetissimum id fuisse cum literis ejus, tum tibi adfirmanti, facile credo, & apud me longe gratissimum tibi hoc officium collocatum semper praestabo. De nostro, quem in

Tom. III.

O o

pa-

patria fore putabas, audimus nihil, etsi ter ad eum a paucis mensibus scripserim, alii ex reduce, quem novisse debes, ajunt audisse non bella, vel potius indignabunda, sed haec nobis tacere licet, & te certe velim, haud dubie enim ab aliis ad eum deferentur. De Gellio quod scribis, ita interpretor, ut quod ad dominam Pallada missum est, pervenisse non dubitem; sed quod ipsi meo nomine tradi debuit, avarum typographum reglutinare a manibus non potuisse, itaque alia via exemplar ad illum misi. Cl. *Ferrario* & *Notarum* in *Senecas* & *Observationum* destinata exemplaria eundem in fasciculum addideram, ut cujuscumque tandem fraude illa inde exempta esse oporteat. Habes hinc alia singula, & recens editas observationes, in quibus iterum officium tuum apud amicos exspecto. Habes *Cassiano a Puteo*, *Lauretano* (quibus paullo otiosior scribam) *Holstenio*, *Ferrario*, *Rhodio*, tibi. Tuum, si quis est, qui uti velit, ubi usus ipse fueris, relinquere illi potes. Aliud elegantius hinc, ut & *Langermanno* servabo. Quem quidem *διὲν ἀρῖσεύειν*, mire lactator, sed & te, cum tantam ei copiam praebes bibliothecarum, non ipsum solum, sed & me beneficio aeterno devinxisse judico: sed *ὁ πᾶν*, quod non dico illius, sed tuam, sed meam gratiam tanto fastu contemnit, quale exemplum est? Habui tandem ab *Reinesio*, sed non ad illas, quibus ex tuis excerptum inerat de auctario Inscriptionum. Spem facit (nam ultro meam illi obtuleram operam) missurum quas habet, cum notis brevibus, ut hinc edantur, sed nescio quid de contractu loquitur, & scis horum libroriorum non esse, ut ab auctoribus quidquam redimant. Dolet tuum Claudianum isthic non videri, nominatque cui *Francosurto* bonum numerum exemplarium *Elzevirius* vendere possit, quem ego monere non intermisi. *Langermannum* oraveram in literis, quas vereris ne perierint, ut si vacaret primam illam decadem *Livii Florentinam*, quae antiquissima videtur, aut certo partem ejus conferret, ut gustum haberemus. Tu quoque, quando aut es isthic, aut eris, memineris requirere locum in *Hercule Fur.* vers. 277. *Cadmae proles cinis atque Ophionius*. Existetne illic, *civitasque Amphionis*, an mens obstiterit oculis meis. De *Livio* tandem aurem vellunt *Elzevirii*, dum illi cessarunt, toto hoc semestri jacuit, & *Plauto*, *Caesari*, quibusdam *Ciceronis* & *Senecae*, *Tacito*, juventuti nostrae praelegendis strenuam sane operam privatis scholis dedi. Poëmata tua desideramus vehementer ego & *Schelius*, qui nuper hinc fuit, teque amantissime salutat. Ad *Fabrotum* & *Gothofredum*, quod jusserat *Langermannus*, exemplaria *Observationum Ecclesiasticarum* misi. Valet. Deus vos salvos praestet, omniaque det secunda. Daventriae a. d. XIII. Kal. Mart. CIOIOCLII.

Misit mihi *Rottendorffius* aliquot libros MSS. inspicieundos, in his glossulas super complura *Ovidii*, sed, quo maxime delector, duos priores *Gellii* libros, quorum in fronte habetur illa praefatio, perinde ut in codice *Regio*.

EPISTOLA CCXXXVIII.
NIC. HEINSIUS.

J. Fr. Gronovio.

Daventriam.

Quas ad me a. d. xiiii. Kal. Mart. dederas, Clarissimè ac Amicissime Virorum, hodie accepi, nec trahendam responsionem arbitratus sum, etsi jam ante ex hac urbe ad te scripsi. De observationum tuarum exemplaribus, ut recte curentur operam dabo, ubi huc pervenerint. De poëmatibus meis lentum nimis est negotium, moram editioni injecit parens, quantum video, is consultum non arbitratur edi illa in *Alastorem*, quod periculum esse credat ab illa furia, ne fortunis meis in Suecia insidietur, qui metus quanquam vanissimus est, morem tamen geram seni nostro sic petenti. Eludere potest jambo meos *Alastor* in tempus, at non effugiet. Si quid in me viri est & ingenii, frontem istam praefractam iis stigmatis notabo, quae delere frustra moliatur inusta. Sed ad rem: *Vossium* jam adesse vobis confido. Hamburgo enim ad nos scripsit. De nostris in Vaticana lucubrationibus *Langermannus* tuus meusque. Patet nobis ad fatietatem usque praestantissima illa bibliotheca, & nimii in eâ sumus, fateor, adeo uterque nostrum non optime habemus. Exercuit me mensem totum Ovidius: Claudianum mox curis secundis aggrediar illustrare: in quem finem exemplaria quinque aut sex ejus auctoris proba iam seposui, unum praecipue vetustum, cujus excerpta a Jesuitis Antverpiensibus habui. Excutiam id de novo: nam fugisse multa *Livineum*, cujus excerpta illa erant, suspicor. Inter Palatinos libros *Metamorphosin* inveni omnium, quotquot vidi, veterrimam. Excerpterat diversas ex illo codice *Gebbardus* lectiones, ut & ex aliis, quas apud me vidisti, inveni tamen nonnulla satis bona. lib. i. vers. 226. Fab. Lycaonis. *Nec contentus eo est, missi de gente Molossa Obsidis unius jugulum mucrone resolvit*: pro *missi* codex ille satis emendatus habet, amici. Ego *Amyci*, quod obsidis sit nomen, vix dubito legendum. Expende quaeso locum. De Livio & Senecae tragicodiis curae mihi erit, ubi Florentiam venerimus. Inscriptiones multas collegit *Langermannus* in via, quibus Cl. *Reinesii* institutum juvetur. Prodiit tandem *Alexias*, quam apud *Holstenium* vidi, qui salvere plurimum & te jubet, ut & virorum optimus *Cassianus Puteus*. Vale, & summae festinationi ignosce, exarabam enim has multa nocte, jam literarum plurimum scriptione fatigatus, ne inanis ad vos tabellarius discederet. Nob. *Schelium* saluta quaeso. CIOICLII. Romae prid. Kal. April.

Nescio an monuerim te inscriptiones illas Zelandicas, quas tecum communicaram, *Reinesio* mittendas, esse jam in lucem prolatas ab *Olivario Vredio*, in ultimo tomo antiquitatum Flandricarum: accedunt & plures, nisi fallor.

J. FR. GRONOVIIUS

Nic. Heinsio.

Romam.

Quas una cum fasciculo exemplarium libelli recens deproperati ad adfinem tuum misi, jam opinor redditae tibi erunt. Ipsum videbis, ubi Deus & tempestates volent. Grandiusculus est, & pluscula officia tibi apud fautores meos meo nomine imperabit. Poëmata tua etiam exspectamus. Ad dictus ille tibi Hipponacteum praeconio, cui proscriptionem minaris, quid agat, nescio. Scripsi, misi: nihil respondit; non credo, tam silebit *Alastori*. Ad illustriss. *Putcanum* differo in diem, immo in horas scribere: promitto tamen te proxime habiturum: nam festino stans pede in uno, & paratus ad iter in Geldriam & propinqua divortiis Rheni, inde in Hollandiam, ubi ante omnia salutabo *Vossium* nostrum, & intelligam, quo numime laeso exciderit gratia dominae non *Reginae*, sed *Gallinae*. *Lauretani* epistolam accepi, & gratissimam habui, jamque eo nomine tibi gratias egi. Beatos autem vos, te & *Langermannum* dico, qui in divitiis deliciisque tantis agitis. Ego nunc Livio operas reddam, si modo licebit per adolescentes nostros, apud quos studium audiendi veteres crescit indies, neque id mea celsatione velim refrigerari. Sed Elzevirii videntur nunc demum serio abrumpere moram. Itaque quantum poterō, tempora partiar. In Ovidio tuo concedisne mihi, ut malim lib. 1. *Ingentes animos digna Jove concipit ira*. Et dein: *per flumina juro* &c. *Cuncta prius tentata*. Alterum videtur ortum ab iis, qui gnomen seu sententiam desiderabant. Mox: *Canicies eadem est, eadem violentia vultu*. Et paulo ante: *Quo tamen admissa quae sit vindicta*. Iterum, *& deplorata coloni Vota jacent*. Denique, *Et ducit remos illic, ubi nuper aratra*. Quantum nugarum! sed tu videbis. *Tollius* noster in Cinnamo strenue pergit: sed morbo, propemodum fatali, aliquot hebdomades, pausam facere coactus est. *Hornii* de origine Americanarum gentium prodiit, apparet plagae istius barbaricae valde peritum esse. *Malingrodium* nostrum pessima fama accidit bulla istinc missa sacerdotio exsutum esse. Et sane nimis acerbum se & pervicacem Pontifici recens electo praeestitit, quod vitium fatali quodam casu videtur hodie & Principibus magnis & nobilibus familiis tristitia minari. Sed omittamus cothurnum. Studiosi quidam hujus Gymnasii veniam impetrarunt a magistratu Herodem Infanticidam repraesentandi. Inde furere sacrificuli, homiliae integrae invektivae in fabulas & fabularum scriptores, quicquid uspiam est vel fuit. Ego laetor, qui ab ero ter has proximas hebdomades, dum res maxime fervet. Quamvis alioqui extra culpam illic sim, nam¹ curio noster maximus, qui fratrem habet, aulae Brandenburgicae & gratia

¹ Puto fuisse *Henricum a Dieß*, Theologiae Professore, de quo vide Revii Daventriam libr. VI. pag. 714.

gratia & frigore notum, omnem invidiam praeter spem in sese recepit, auctorque magistratui fuit. Vrit omne genus mordetque exemplum nuper Haegae in facundum illum adulatorem statutum. Itaque pene redii ad cothurnum, & tum mei, tum tui temporis obliviscor. Vale, amicorum princeps, & *Langermannum* meum, si meretur, fovere perge. Daventriae xi. Kal. Apriles. *MDCLII*. statim acceptis tuis, quas *III*. Non. Feb. dederas.

EPISTOLA CCXL.

NIC. HEINSIUS

J. Fr. Gronovio.

Daventriam.

Incredibili fane gaudio ac voluptate perfundor, Vir Clarissime, quoties compellationes tuae inter peregrinandum occurrunt mihi: ut vel nudius tertius, quando beatus sum suavissimis tuis, quas in procinctu Geldrici itineris exararas. Ad Illustriss. *Puteanum* si quid literarum dederis, feceris omnino recte: est enim tui studiosissimus, si quis procerum alius. Inventos a se codices tres aut quatuor Livianos, editos quidem, sed cum MStis collatos, partim in Vaticana, apud Jesuitas partim, *Langermannum* nostrum jam nunciassse tibi nullus dubito. Ego Claudianum cum sex exemplaribus Vaticanis contuli, nec pauca deprehendi post primas curas, quibus nova adornari possit editio, ex optimo praesertim illo, cujus excerpta *Livinei* manu ad oram Aldini libri notata Jesuitae Antverpiani mecum communicarant. Sed mira fuit ejus oscitantia in excutiendis membranis iis, qua de re multis tecum agam proxime, quando majus otium nactus ero. De Ovidio etiam garrere tecum libebat, sed exarandis in Sueciam ac patriam literis adeo sum fatigatus, ut nihil me sit languidius. Illo loco, *Ingentes animo dignas Jove concipit iras*, non improbo conjecturam tuam, sed tamen cum in optimo vaticano post *ad animo* aliquid erasum sit, nec satis agnoscatur, an a prima manu, *animo* & an *animos* scriptum exhibuerit, unusque praeterea atque alter non ex pessimis *Ingentesque* praeferat, erigi posse versus nonnihil arbitrabar, si legeres, *Ingentesque animo ac dignas Jove concipit iras*, vel &. *Cuncta prius tentata* legendum jam ante decennium vidi, cum recens essem ab itinere Britannico, idque notatum in illo, quo tum utebar, codice invenies, addita etiam exempla plura locorum. hoc modo corruptorum apud nostrum, ut gratuler nos concurisse. Omnia in sententias convertebant insulso illo & semibarbaro seculo, quo quisque sibi Cato videbatur. *violentia vultu* optimus Palatinus habet & fortassis alii. *Coloni vota* & *ducit aratra*, etiam in MSS. invenisse videor: quod eunctanter tamen adfirmo. Ego magis magisque, mi Gronovi, deprehendo nihil inquinatius esse optimo illo scriptore. Atque illo praesertim nomine perlustratam mihi Germaniam unice velim, ut bibliothecas iis in oris veteres liceret excutere, nec dubito quin & Claudiano ista peregrinatione sim consulturus optime. Utinam

Andreae Schotti excerpta aliquando mecum communices, quae olim apud te vidi! In Gallia spes est facta Cujaciani codicis. His praefidiis fretus novam editionem auspicarer. *Malincrodii* fortunam aegre fero. Scribit ad me *Datus* Florentia in Mediceo codice disertim exaratum extare, *Cadmaca proles atque Ophionius cinis*, ut somniasse me oporteat, cum illum excuterem. Inspiciam ipse hac aestate, ut confido. Aderam nudius tertius Cardinali *Barberino* per duas fere horas. Excepit certe me humanissime. Erat nobis sermo de rebus variis. Inter alia adfirmabat, se curaturum omni studio, ut inscriptiones antiquae post *Gruterum*, quas ipse partim plurimas ac praestantissimas possidebat, partim ad alios repertae, mox in publicum prodirent. Habet fastos triumphales luculentissimos in veteri marmore, quos communicaturum se mecum est pollicitus. Habeo ipse inscriptiones duas, quas a rusticis redemi, ¹ quarum altera,

HIC. EST. SEPULTA
PACILIA. SOSPITA. PIA.
PROBA. BONIS. PROBATA. SUMMA. QUAE.
VIXIT. FIDE. QUI. BENE. COGNORUNT. COGNITAM
BENE. EXISTUMANT. HAVE. ET. VALE. QUAE
OPTAS. EVENIANT. TIBI. ET. TUIS.
L. AQUILLIUS. FAUSTUS. DE. SUO. FECIT

Altera sic se habet literis grandioribus, ab una parte

DIS. MANIBUS
SEX. TERENTIO. POTENTI
CLAUDIA PHAREZIA
CONIUGI. B. M. P.

Ab altera parte marmoris,

M. SESTIDIUS. ZOSIMUS
FECIT. M. SESTIDIO
PRIMI GENIO. PATRONO BENE
MERENTI. ET. SIBI. ET. SUIS.
POSTERISQUE. SUORUM.

Plures hujus notae inscriptiones *Langermannus* noster collegit. Vale, decus nostrum praecipuum, cum tuis omnibus. Romae. CIOIOCLI I. xxvii. April.

¹ A Gronovio acceptam edidit Reines. xvi. 33. & alteram xiv. 142. Sed ultimo versu edidit, POSTERIS EORUM.

EPISTOLA CCXLI.

J. F. R. GRONOVIIUS

*Nic. Heinsio.**Romani.*

Ter meum Coloniam Agrippinensem usque produxi. Multa occurrerunt, quae oculos & aures praesentis meos, praesertim reficere me a laboribus & fallere tempus cupientis; nihil quod sermones nostros possit morari. Amsterodami demum in reditu reperi amicum nostrum, nihil immutatum, itaque omnem scribendi pigritiam bona fide ei condonavi. Inimicitiae inter ipsum & Heduicum publicae & satis jam nobiles sunt. Praetenditur pecunia, satis magna quidem, & quae possit disjungere animos (nam & ipse ob multo minorem omnia instrumenta reliqui ad litem intendendam triconi meo, invitissimus quidem & nunquam factururus, si consorti & haeredibus aliter satisfacere possem) sed vera origo altior. Ille non ferit obscure, sed palam affirmat communem nostrum ignominiosa missione jussum, quemque nunc deducit, facere ipsum privato consilio, ut sub ejus umbra in veterem locum irrepat. Literas accepit flagitatrices & acriores Amsterodamo, earum exemplum cum longa accusatione misit ad Dominam, nec quicquam omisurus est, quo, si possit, efficiat, quod jam factum esse criminatur. Denique de te jam mitius loqui ajunt, qui frequenter hominem vident. Ergo non nisi diem unum illic mansi, brevi alloquio hominem tenui, praesente ¹ illo, quem ex Allobrogibus arcessivit hac solum de causa, ut male faceret, quem postea mortuum ² *Morus* & ipse, nosti caetera. Is, lapso cum factione Thibaltica Athenaeo Medioburgensi, *Blondello* nescio quorum suffragationibus collega adjungitur; solitus antehac declamare in illos, quorum nunc stipendio conductus est, tanquam foederis Belgici ruptores, & in principalem domum ingratos. Adeo ignorant homines, quibus favisse volunt videri. *Schotti* excerpta Claudianica quod me poscis, frustra es, quicquid ejus est, jamdudum habes: nihil est enim, praeterquam quod inter versus ad marginem edit. *Barthianae*, quam tecum olim communicavi, adscriptum ex exemplari, quod a *Schotto* Francofurtum missum ad typographum, nescio quomodo, sive *Gruterus*, sive *Sixtinus* possederant. Ego vero fidem amicitiae nostrae testor, me scientem nihil habere istiusmodi, quod oculis tuis subduxerim. De Inscriptionibus & fastis Eminentissimi Cardinalis *Barbarini*, beasti me tam felici nuntio. *Reinesio* jam binis obtuli curam meam in edendis, si sua huc mittere velit, nihil ab eo his nundinis accepi. Quas ad eum curandas misit *Langermannus*, quod in me est, curatas dabo. Amicus noster, cui se ille commendatum cupiebat, videbatur ei non male velle. Sive perget cogitare de Statio, sive quid aliud volet, affirma ei nihil, quod in

mea

¹ *Alexandro Moro.* ² Vid. ad Epist. CLXXIII.

mea sit potestate, frustra a me petiturum. Literae hae hucusque scriptae dies decem & amplius hîc jacuerunt, dum nolo eas mittere sine inclusis ad Illustriss. *Cassianum a Puteo*, & identidem impediatur. Habes hîc tandem, utinam & fasciculum libelli mei: Ovidium interea tuum misit ad me affinis tuus, donum gratissimum: discrucior mihi vel differendum usum, dum religetur. Mox faxo sit in omnis nostrae juventutis manibus. Inter exercitia privata nunc tracto, quod mirere, divinam Aeneida, sed quoties nunc desidero *Pirium Valerianum*! frustra, cum & tu & *Vossius* longe. Manda *Langermanno*, si in eum incidat, ut mihi emat, quando id semper sibi petit negotii dari. Vale, nobilissime & optime *Heinsi*, & me ama. Daventriae III. Kal. Maij. CIOIOCLII.

EPISTOLA CCXLII.

NIC. HEINSIUS

J. Fr. Gronovio.

Daventriam.

CUM literae non compareant, Vir Clarissime, quas ad *Cassianum Puteum* pollicitus es jam dudum te daturum, facile persuaderi mihi patior, in via eas interceptas. Auget suspicionem, quod Goesianas nonnullas periisse deprehendam: quibus tuas illas additas fuisse sit verisimile. Nunc etsi nihil occurrebat ad te scribendum, *Langermannianas* tamen, quas vides, paucis verbis si comitarer, nihil praeter affectum videbar facturum, quo sane luculento ac tenerrimo te complector. *Vossium* nostrum cum Clarissimo *Bocharto* in Sueciam profectum intelligo. Quid dicturus es *deivæ*? qui ad amicos in Galliis suos scripserat, (unde rumor late post sparsus atque huc etiam delatus,) sua illum opera privatum favore Dominae, nec unquam in Sueciam rediturum. De me id ipsum credi voluit *Nycticorax*; adeo petulantiae modum non ponit, postquam transiit in clientelam *Palladis Arctoae*. Sed nulla aegis praestabit unquam, ne promeritus vapulet ac defricetur loris poëticis, si prurire pergent lumbi scabiosae huic aviculae. Sed de his satis. Inscriptiones quatuor communicavi tecum nuper: nunc tres addo, quas emi postea.

I.

MENESTRATO ANTONIAE
DRUSI. QUI. VIXIT. ANNOS. XXI.
COCCEIAE. PYRAMIDI. Q. V. A. XX
POSUIT. PUBLIUS. CORNELIUS. STRATO
FRATRI. SUO. ET. UXORI.

II.

1 Exhibet primam *Reines xv. 11.* licet nomina in indicem non sint relata. Secuudam *x1: 31.* Neque hic *Elaphio* in indice conspicitur, tertiam habet *xix. 9.*

II.

ELAPHIO. FECIT. SIBI. ET. PRIM O
CONSERVO. SUO. PISTORI. MARCELLAE.

III.

L. CALPURNIUS
L. ET BESTIAE L. HERMES.
V. AN. XX.

Multa hujus notae quotidie ad me deferuntur, sed delectum habeo: nactus sum & tesseram eburneam pulcherrimam quadrilaterem, cujus notae in Gruterianis inscriptionibus nonnullae extant, ejus ab uno latere M. VAL. CN. DO. ac secundo. PILODAMUS, a tertio IVLI. a quarto SP. A. D. III. K. FEB. illud *Sp. Sportulam* interpretantur, sed cum in alia apud *Franciscum Gottefredum*, antiquarium Romanum, tres Literas expressas viderim *SPE. Spectaculum* potius videtur interpretandum. Gemmas etiam multas, multos nummos nactus sum. Smithianis antiquitatibus quid sit? curam ut haberes in auctione bibliothecae Oconis Numismatum, jam ante te rogavi, multa enim in eo libro manu sua notarat ὁ παραείτης. Vale, decus nostrum. Romae. CIOICLII. xv. Junii Gregor. Salutant te amanter *Puteanus, Holstenius, Allatius*. De Ovidio tecum alias confabulabor.

EPISTOLA CCXLIII.

J. F R. G R O N O V I U S

Nic. Heinsio.

Romam.

ITA ut accepi tuas, ad respondendum me pono. Ad illustrissimum *Puteanum* misi jamdudum, & periisse aegerrime ferrem. Nimis vere de sua¹ ille potentia gloriatus est. Non enim se praestat illa mediam, sed tota in partes. Narrabo simpliciter, quae ad me alii, nam noster dissimulat. Scriptum est, ad fines praesto fuisse, qui pedem eum in terra Suecia ponere vetarent. Additum postea conditionem ei latam unicam, ut satisfaceret debitori suo, prius nihil clementiae exspectaret. Fuit postea apud auctorem tanti mali, qui vidit exemplum (vides nihil medii aut liberi sibi reliquisse) epistolae, quam ad² *Alopecium* Gallice ipsa dederat. mirari se stoliditatem ejus (*brutalité*, & facius ea vox fuit repetita) qui male tractasset tantum virum, quem vel in suam gratiam colere & suspicere debuisset: ideo monere, ne iter ad se promote-

¹ *Salmasius* ² *Is. Vossium*, quo nomine, dum esset juvenis, *Gerardus Joannes* pater. se etiam appellari voluit.

movere, neve in conspectum venire sustineret: justitia enim se adigi, ut munus illi datum abroget, & redire in patriam, ibique satisfacere, quem offendisset, jubeat; si pergeret, habiturum se infensorem, & experturum talem, qualem jam nunc se fore minaretur. Dedi ad eum literas, subjei aliquid consilii: sed non respondet, & apud communem amicum finxit se exspectare literas, quibus in Hispaniam aut Angliam ire jubeatur. Sed haec dissimulatio vana est, postquam res omnibus innotuit. Quasi, ut nullas subterfugeret indignitates, & vel argenti vehiculum projiceret, dummodo deliniret hominem & mandatis fungeretur, (nec enim haereditarias inimicitias, ut tu, exercet, nec rem familiarem videtur habere tutam, nisi ipsam exoraverit) nullum damnum, nullam indignitatem tanti esse, ut momento carere conspectu iratae velit, quam haud dubie instigaturos, quos ibi quoque habet, invidos, ut hoc frigus in odium perpetuum convertatur. Ille silet; nec audi vi quicquam postea. Videtur qui nunc palmam possidet, spem dedisse reditus; certe habet literas, quibus admonetur promissi, scriptas incredibili verborum humanitate; nunc tempus esse, nunc coelum valetudini & labori itineris minus inimicum, veniret, ac tanti voti se compotiret, omnia se illi futurum. Quam si non fallit opinionem (sed opinor fallit, saltem prae se fert in Galliam prius iter sibi faciendum) ego non dubito, teque & nos omnes inde exclusissimos fore. Hae sunt vicissitudines rerum, & adeo parum cuicumque est aulae fidendum. Velim ad me vicissim libere scribas, quaecumque de negotio illo inaudieris & senseris, nam hic jam τραγικά jactantur, & nescio quantae pecuniae rationes a te posci. Omen advertat Deus. De auctione Smetiana nihil accepi. Sed nec ullas abs te literas, quod meminerim, in quibus Occonis numismata in illa ut curae haberem, mandaris. Faciam tamen sedulo, ubi intellexero celebratum iri. Vale, Heinssi nobilissime & amicissime, & quicquid eveniet, τήν σου τὴν καρδίαν ἐν πίστει, multa enim praeter opinionem. Daventriae. XII. Id. Jul. CIOIOCLII.

EPISTOLA CCXLIV.

NIC. HEINSIUS

J. Fr. Gronovio.

Daventriam.

Post menses quatuor aut quinque urbi aeternae datas, Florentiam diebus proximis cum *Langermanno* nostro adveni, Vir Clarissime, ubi tuae, quas III. Kal. Majas exararas, mihi sunt redditae. Quas ad *Cassianum Puteanum*, nobilissimum & longe optimum virum addideras, recte curatae sunt, responsorias ejus ubi accepero, ad te mox venient. Amicum nostrum conventum tibi haetor. Quod addis nihil mutatum; facile credo: qui pigritiam ejus in scribendis literis quotidie experior, adeo quinque aut sex meis vix unas solet respondere, & eas quidem plerumque brevissimas. Misere itaque alium illa in aula quaero, quocum literarium commercium possim exercere, nam amico-
rum

rum caeteri nostro nihil sunt alacriores in administranda hac provincia. Fortunis ejus insidiatum ¹ *Marruccinum* fatiis novi: idque futurum vaticinatus sum non semel. Successum tamen adfuisse nefariis impuri nebülonis machinationibus ut credam non persuadeor. Regio quidem favore excidisse prorsus nostrum sua opera, nec unquam in Sueciam rediturum, gloriatus est scripta ad *Jacobum Puteanum* epistola: qui fratri porro suo Carthusiano id Romam nunciavit, ut ex *Holstenio* intellexi. Sed cum mendacii nunc manifeste sit convictus, ad argutatiunculas Sycophanticas confugere illum non miror. Non possum diffiteri, eam esse amici nostri multis in rebus supinitatem; ut pessum dare fortunas suas ipse facili negotio possit sine adversariorum opera: sed & scio non inexorabilem esse Dominae clementiam, obviamque semper veniae, & ignoscere nunquam non paratam. *Marruccinum* in Sueciam rediturum nunciari illa mihi jussit, cum Romae adhuc essem: Danos hinc contubernales habeo, qui adfirmant per patriam illum suam iter jam fecisse: quanquam de discessu ejus nihil haecenus nunciarunt amici ex Batavia. De me quod mitius jam loquitur, hoc uno sapit homo stolidissimus, postquam videt & cantare parem & respondere paratum. Nec eo tamen minus defricabitur. Maledictis in me congerendis parum haecenus, imo nihil profecit, apud Dominam, quin optem assiduum illum dies totos esse posthac, ut fuit haecenus, in proscindenda existimatione mea, sic aperte tandem mores ejus invidos perspicacissima Princeps rimari poterit. Ut omnem tibi de me metum evellam, audi quid amicus ad me scribat, vir integerrimus & intimus Augustae. *Unum si addidero, inquit inter alia, omnem meam penum effudi: & sine fuco id a me dici ut credas non contendam, qui animum hunc nosti & pectus tibi devotum. Quoties Regina in mentionem tui incidit, tanto affectu de te loquitur, & dotes tuas laudibus in coelum tollit, ut majores ipse desiderare non possis, quod scribere ad te necesse duxi, ut habeas, quo te contra inimici tui furorem & contumelias, quas spargere non desinit, tueri ac solari possis.* Alias post habui literas a regii cubiculi praefecto *Holmio*, quibus ter ad me scripisse Dominam nuntiat, quam ego jacturam supinitati amici nostri debeo, qui toto anno precibus assiduus rogandus fuit, ut me doceret, ad quem meas curare literas in Germaniam deberem Reginae mittendas, cujusque opera responsum mihi esset expectandum. Unas tamen ex regiis accepi Kalendis Maijs scriptas, quas licet luculentas, manu sua exararat totas Princeps optima. Illarum principium en tibi: *J'ay receu plusieurs de vos lettres, les quels m'ont fait entendre le soin & l'application que vous avez a mon Service. Je suis obligé de vous en remercier, & je ne manqueray pas aus occasions, dans les quels je vous pouray faire ressentir les effets de ma reconnaissance. ils seront tels, que vous n'aurez jamais sujet de regretter vos peines & noies, les enfruits & recompenses seront dignes de moy & de ma gratitude.* Deinde ubi mandata multa, quae curari a me velit, exposuit, ita concludit epistolam. *Je renouvelleray avant que de finir encore un fois la protestation, que je vous ay faite de le commencement de ma lettre, vous assurant, que j'auray le soin de recompenser dignement vos peines: que vous n'obligerez jamais une in-*

Pp 2

grate.

¹ Ita Salmasium, credo vocat, ex Catull. carm. xii. ubi *Asinius Marruccinus* perstringitur.

grate. Haec quam non convenient cum iis, quae *Alastor* spargit, vides. Ea tamen tibi soli habeto, non enim ad ostentationem proferuntur. Rideamus igitur odiosas Sycophantarum ineptias, rumoresque senum severiorum omnes unius aestimemus assis. Ovidius meus ne parum emendate sit editus valde metuo: quare si quae inter legendum tibi occurrent, ea ne inideas mihi rogo. Totum de novo cum octo aut decem codicibus contuli, nec pauca deprehendi curis prioribus addenda. Medicei codices excutiendi restant, quorum paucos evolvi olim. Vaticani ita me exercuerunt, ut non potuerim tria Virgilii exemplaria literis majusculis Romanis exarata pervolvere, quorum duobus etsi *Pierius* sit usus *Valerianus*, tertium Palatinae olim bibliothecae secutus sit in editione sua *Hieronymus Comelinus*, tamen post illorum messem relictum mihi spicilegium non diffido. Excutiam igitur in urbem reversus. In Siciliam enim excurrere me velit Augusta. Quartum ejusdem notae Mediceum jam olim contuli. His praesidiis instructus dare possim editionem divini auctoris non pessimam. Vale. Florentiae. CIOIOCLII. XVIIII. Jul.

EPISTOLA CCXLV.

NIC. HEINSIUS

J. Fr. Gronovio:

Daventriam.

Redditae mihi sunt suavissimae tuae hesterno die, mi Gronovi: ad quas paucis nunc respondebo, tum quod solito sim distractior epistolis exarandis, tum quod pleraque, in quibus illae se potissimum exercent, ultimis tuis jam praeoccupavi. Iis enim regiarum excerptum literarum addidi, ut quo loco res meae essent intelligeres. Amici nostri casum aegerrime fero. Quanquam negari non potest, suis illum auspiciis periisse. Quid enim opus erat, tanto studio belluam istam fovere? Meministi, credo, quid praedixerim tibi olim. Haec eadem cum amico nostro identidem occurrentem, nunquam auditus fui. De commodandâ pecuniâ, ne tam prodigus esset, quoties rogavi? Ille tamen sollicitudinem istam referebat ad simultates eas, quas cum *Alastore* & exercui semper, & exercebo impofterum, dum spiritus hos reget artus. Rem occultam apud me habuit haecenus: proxime tandem ab illo accepi, quibus aperte mecum agit, ac calamitatem suam, quam ex amicorum Parisiensium epistolis jam praeceperam, bona fide narrat. Cum habeat in patriâ, quo possit vivere, miror tam abjecto illum esse animo, ut injurias istas ferat. Non ferrem certe ego. Et tamen meâ magis interesse existimo, quam illius, ut bono loco sim in aula istâ. Nam quod tu existimas deliniri adversarium posse: fugit te ratio, mi Gronovi. Non talem tu expertus es, non talem alii, qui post offensas in gratiam cum illo reverti studuerunt. Fecit hoc quidem amicus noster, & epistolam illi supplicem scripsit, qua precaretur, ut inimicitiarum mis-

fam

fam faceret memoriam : sed fycophanta multis illam praesentibus vix inspectam in ignem projecit. Nihil tale de me audies unquam. Pereant potius & in malam rem eant fortunae omnes, quam facinus me indignum committam. In aulam rediturum *Alastorem* jussit ad me scribi Domina, mox subjunxit literas, de quibus nuper tecum egi, credo, ut omnem mihi metum excuteret. Rationes a me posci ullas atrox mendacium est, & *Alastore* dignum. Vix enim mille scutatos haecenus accepi ad iter faciendum : cum vana spes assidue detur, majorem pecuniae summam mox adfuturam. Ita factum, ut plus quam mille florenos ex meo aere jam expenderim, praeter mille alios, quos libris aliisque rebus emendis in privatos usus converti. Ne mihi credas, audi ipsam Dominam. *Mandez moy les Catalogues des livres, que vous avez achetés, & des ceus que vous avez fait copier, e le contes idel' argent, que vous avez dépensé, & pour vostre personne & pour vostre achat. Je vous feray tout paier, & mandè moy aussi combien vous aurez besoin, affin que je envoie les changes pour vostre voyage. Je ne vous puy rien dire, si non que je remette tout en vostre discretion.* Et haec quidem ad os calumniae obstruendum. Novit etiam omnium optime amicus noster, quam male mihi de omnibus prospectum fuerit in hoc itinere, quem gravissime propterea increpavi, simul ac Lutetiam advenissem, idemque facere non destiti omnibus pene, quas ex Italia ad illum dedi, literis. Inquire, quaeso, in auctorem hujus mendacii. Hoc mihi credas velim, Gronovi, si amici nostri loco fuissèm, nunquam de aula accedenda cogitassèm. Necessitas ad illam vitam me compulit, cui magis magisque ineptum me esse indies experior. Differui saepe cum amico nostro ea de re ante in Sueciâ. Sed alium ejus rei fructum non ferebam, quam ut ille melancholiam meam (sic enim vocabat) rideret, omniaque mox ad Dominam deferret, quae nonnunquam exprobrabat, satis se videre animum mihi esse ab obsequiis sibi praestandis alienum. Calamitatem de morbo patris jam intellexisti : quae reverti me domum, ut opinor, coget. Hoc certe ut liceret mihi, a Domina multis precibus proxime flagitavi. Vale, & scribe. Florent. CIOIOCLII. 12. Aug.

EPISTOLA CCXLVI.

NIC. HEINSIUS

J. Fr. Gronovio.

Daventriam.

Geminas nuper ad te dedi, Vir Clarissime, quibus rerum mearum statum abunde te docui. Nunc cur ad te scribam, optimus virorum *Cassianus Puter* est in causâ : a quo responsum hîc habes. Mediceam haecenus non inspe- xi, propter calores aestivos. In regiâ, de qua tecum egi, epistola multa intricate scripta legi vix potuerunt, corrige in excerpto, quod misi, illa : *que*

Pp 3

vous

utis n'aurez jamais sujet de regretter vos peines, & noiez. les enfruits, &c. quae etsi ipse non assequeretur, melius tamen legere non potui. Nunc diligentius excutienti, quaedam deleta leviter apparent. Caetera sic se habent. *que vous n'aurez jamais sujet de regretter vos peines: les bienfaits &c.* Amici nostri calamitas jam publica est & omnibus innotuit, postquam palam ostentare Reginae coepit epistolam *Alastor*. Scis quid olim vaticinatus sim tibi, idem & amico nostro praedixi non semel, utinam tempestive fuisset creditus. Si Juvenalis nunc viveret, novae Satyrae esset locus, in qua tamen repetenda ominino essent ista: *Stoicus occidit Baream, delator amicum, Discipulumque Senex*. Spero tamen in integrum restituendas ejus fortunas. Cum nihil succurrat, quod nunciare possim, literarum loco habe hoc elegidion, quod rogatus¹ nuperrime scripsi. Vale. Florent. CIOIOCLII. Kal. Sept.

De rationibus, quas a me petat regina, quam splendidum sit mendacium, agnoscere ex ipsius Dominae epistolâ potuisti, petit enim, ut significem, quid de mea pecuniâ expenderim: quod & indicavi. Inquire quaeso in mendacii auctorem.

¹ Additum erat carmen in Serenissimi Cosmi Medicis, magni Hetruriæ Principis, natalem decimum, quod legitur inter Heinii Poëmata lib. II. Eleg. 4. pag. 38.

EPISTOLA CCXLVII.

NIC. HEINSIUS

J. Fr. Gronovio.

Daventriam.

T Otis tribus mensibus nihil a te literarum vidi, Vir Clarissime. Ultimae tuae res amici nostri in aulâ turbatas nunciabant, & sinistros, qui *Alastoris* operâ de me spargebantur apud vos, rumores. Ab illo tempore tibi ad te scripsi. Nunc quartum scribo. Sed paucis. De me, quae spargi narrabas, quam sint falsa *Vossius* noster te docere possit. Non enim ignorat, quam parum viatici Lutetiae mihi a negotiatore regio sit datum, quasque de meo expensas fecerim. Sed hanc jacturam nihil moror. Nam ingrata se non fore pollicetur Domina, & si non promitteret, mores ejus ultro id sperare me juberent. *Alastor* impotenter nimis victoriâ suâ usus est, qua re, quod inter nos dictum, offendit illam non leviter, cujus a nutu pendemus. Certe nisi quid frigusculi intervenisset, jam rediisse in Sueciam debebat. Quod quare factum non sit, ipse omnium novit optime. *Bochartus* amici nostri res lapsas magno studio fovit, atque etiam in integrum restituit, ut confido. Ego inter Italos hibernabo. Quas ad te dedi ultimas, *Vossio* misi. Additae iis erant Illustrissimi *Cassiani Puteani* literae, *Langermannianae* etiam, si recte memini. Inceperat ille Livio Mediceo manus admove, jamque primae decadis libros duos absolverat. Mox intermisit laborem, totus in Manethonis poëtae Graeci A-

pote-

potelesmatis describendis occupatus. In Batavia quid rerum geratur, cum ignarissimis ignoro. Raras enim & breves a *Goëfio* accipio, quod domo plerumque absit. ¹ Genevenses illum in aedibus Alastoris magnas excitasse turbas audio. Mirum nō id jussu fecerit Jovis illius fui. Hic secundus erit Claudii Augusti triumphus de subactis Britannis. Poëmata mea non prodire indignor. Habeo elegias quatuor aut quinque; quae addi possint, nuper a me conscriptas. Ultima *Balzacium* compello, luculento carmine ab illo provocatus, quo Galliae calamitatem deplorabat. Ego Britannos depecto, ex occasione belli, quod inter illos ac nostros nunc fervet. Parisiis prodiit Sidonius Apollinaris curis *Sirmondi* secundis illustratus. Vitam quoque *Petri Puteani* a *Nicolao Rigaltio* descriptam jam videre lucem arbitror. *Gothofredus* Genevae obiit. *Vossium* in Batavia hibernaturum existimo. Ego Mediceos Ovidii codices, quos olim neglexeram, nunc evolvo, nec sine fructu. Velim literarium commercium minus inter nos frigeret. *Schelius* quid agit? quid alii amici? Excita quacso apud illos mei memoriam frequenter. Salutat te *Langermannus* noster mellitissimus. Vale. *Florentiae*. manu praecipiti. A. CIOIOCLII. XXVIII. Octobr. Greg.

¹ *Alex. Morum*, qui dicebatur subagitasse Salmasii ancillam vel contubernalem, genere Britannam.

EPISTOLA CCXLVIII.

J. F. R. GRONOVIIUS

*Nic. Heinsio.**Florentiam.*

J Amdudum tuum ad postremas meas responsum exspecto. Interea redditae mihi, quibuscum *Cassiani* gratissimas, nec minus gratum Natalem x. Cosmi misisti. Interea ex Hollandia tantumdem literarum, quam a te habui. Si apud alios sic filet a Stoico, ut ludis, occisus, quemadmodum cum olim libertas, sic nunc una cum Amyclis perdet silentium. Ego rogatus a Ludovico Elzevirio perpauca dies impendi P. Papinio Statio: correxi nonnulla in contextu: & reliqua in Silvis, gustumque Notarum ad Thebaida & Achilleida addidi. Libellus est ea forma, qua Ovidius tuus. Nihil exspectabis magni, praesertim ab homine sic districto & direpto. Jam sunt aliquot menses, cum quotidie sex horas occupo dictatis dandis saltem; quid dein putas effluere conquirendis & meditandis. ¹ Centonem varium & inaequalem Historiae universalis tandem accepimus. Ubi videbis, jurabis esse sui patris foetum. Palam profitetur se compilasse libellos istos, quos deprehenso aliquando in mensa, si meministi, ridebamus. Qui non legent tamen, immo & multi qui legent, magnifacient. Prodiit & *clamor Regii sanguinis*, sine auctoris nomine, quem tamen intelligo facile esse *Morum*, qui etsi vult videri se causae id

¹ Credo respici *Boxhornii* Historiam universalem, quae hoc anno prodiit Leidae.

de-

dedisse, satis prodit se potius id dedisse patrono hospiti, ut *Milto* frigidam suffunderet in antecessum, dum alter lacum aut mare criminum undique conductum parat. Ligurrit etiam adversarii sui τοῦ μαχαίρης locum, & si quid adhuc valebit patronus, obtinebit: nec desperat interim, si minus hoc procedat, & mulcere aures aulae Frisicae facundia patria, & tenere locum *Gloppenburghii* defuncti in Academia. Et ego putabam Amsterodami Graecaturum: jam vocatum, jam accepisse conditionem aiebant. Praefixi Statio breve colloquium ad Christinam Reginam, quod vellem recitasse tibi. Non tamen, spero, displicebit. Misi exemplum *Bocharto*: sed illi morantur, & operae praecipitant, ut rem videam esse commendandam fortunae. In Ovidio tuo lib. IV. met. de Clytie: *Et sub Jove nocte dieque Sedit humo nuda*. An non malis: *Et sub Jove nocte dieque Sedit humi nudo*. Illud haud dubie probabis lib. VII. de regia Creontis Corinthii Medae venenis accensa: *Flagrantemque domum regis male vidit: utroque Sanguine natorum perfunditur impius ensis*. Tu dedisti: *male vidit: utrumque*. Nimirum legendum: *Flagrantemque domum regis male vidit utrumque Sanguine* &c. Est enim, ut nosti, bimaris Corinthus. Pulcherrimos & castigatissimos versus tuos ad Sereniss. Etruriae Principem scis nemini magis ad gustum esse. Illustriss. Equiti *Puteano* scribam, ubi Statium mittam. Quid consilii ceperit *Langermannus* scire haveo. Si de sententia patris Germaniam petet, magnae commendationi erit illi in patria tempore Comitiorum vidisse Ratisbonam. Et inveniet ibi *Rottendorffium* nostrum Monasteriensis, Episcoporum aliquot vicinorum valetudines regentem, & meo & ipsius nomine sibi faventissimum. Vale, nobilissime & amicissime Heinssi, & me ama. Daventriae XIII. Kal. Decemb. CIOIOCLII.

EPISTOLA CCXLIX.

NIC. HEINSIUS

J. Fr. Gronovio.

Daventriam.

Pertinaciam silentii tui satis mirari non possum, Vir Clarissime. Totis certe quinque mensibus, quos in hac civitate jam ago, non nisi unam a te accipi, cum ego sextum septimumve nunc scribam. *Goesius* frequenter domo abest. Quare metuo, ne tuae interim, quas ad illum soles mittere mihi reddendas, aberrent. Rectius igitur facias, si *Vossio* nostro tuarum curandarum demandes provinciam. Observationes quoque tuas nec vidi hactenus, nec missas ad me scirem, nisi monuisses jam olim ipse. Immane quantum supinus est his in rebus *Goesius*. Totis fere tribus mensibus nihil ad me literarum dedit. Fasciculus, quem oblatum tibi *Lauretanus* voluit, in Bataviam jam pridem advenit. Haeret inter sarcinas meas, quas Venetiis ad *Goesium* misi, a quo pendendus est. *Langermannus* Romam discessit, ut absolvat, quae agenda restabant

in Vaticana. Abiturus tradidit mihi excerpta trium primorum librorum Livii Medicei, quae ad te volebat mitti. Ego vero consultius existimavi me facturum, si tibi ipsi ea traderem in manus, quod viderem itinera non esse satis tuta, literasque minus diligenter curari. Ante menses tres Illustrissimi *Puteani* epistolam ad te dedi, nec scire possum haecenus, an curata sit. Interim vir ille eximius diebus proxime elapsis anulos duos misit mihi veteres, quorum alteri Titi Imp. caput est insculptum, alter leonem exhibet. Iis te donatum cupit, quos a me accipies. Post duos enim menses, aut tres ad summum, Italiae limites excedam. Moratur discessum meum munus, quod *Hetruriae* Princeps Leopoldus Reginae parat. Curavit colligi carmina *Hetruscorum* Poëtarum praestantiora, quae lucem non viderunt haecenus. Tomi erunt tres aut quatuor. Ut autem commendet hoc munus, invitavit praecipua Italiae ingenia ad laudandam Augustam. Ipse praeivit aliis. Carmina sunt satis multa, quae operis vestibulum occupabunt. *Langermannum* Venetiis aut *Mediolani* expectabo. Unde *Genevam* cogito, atque inde *Bernam* & *Basileam*, ut *Bongarsianos* codices excutiam. Velim & *Augustam* excurrere. Sed dubito, festinandum enim erit. Illa mihi via probabitur prae aliis, quae maximam de *Ovidianis* codicibus spem faciet. *Mediceos* fere omnes, quos olim neglexeram, jam evolvi. Tu si quid in adventum meum potes corradere, hoc, quaeso, age. *Rottendorianos* praecipue. Codex *Metamorphoseôn*, quem ultimum mihi suppeditasti anno proxime elapso, satis bonus est. Inter alias unam in illo lectionem inveni, quam minime contemnendam puto; etsi a nullis confirmetur membranarum lib. xi. in fabula *Ceycis*. *Consulat ut sacras, hominum oblectamina, sortes*. Sortes quandoque metum incutiebant consulentibus, ergo non semper oblectabant. At tuus ille codex habet *homini lactamina*. quae vana spe plerumque lactabant homines. Quid dici poterat elegantius? Sed de his jam satis. Ubi salvus rediero, obtundam te assiduis quaestionibus: haeret enim mihi aqua in plurimis. Quo enim diligentius attentiusque evolvo praestantissimum auctorem, eo mihi videtur inquinatior. Tu, qui *Germaniae* bibliothecas praestantiores lustrasti, mone, quaeso, ubi locorum tempus aliquod videar cum fructu magno exacturus. *Schelius* noster quid agit? Amicis omnibus ut me commendes rogo. Salutem illis, *Alastori* furcam & restim, de cuius corio comitia habebuntur, ubi rediero. *Aethiops* socienus ejus triumphum egit, ut audio, in amici sui aedibus de subactis *Britannis*. *Gazettae* certe *Londinenses* fabellam narrant lepidissimam: palmam eam praereptam sibi dolet *Alastor*: quare similtates cum *Aethiope* nunc strenuas exercet, si quid famae creditur. Vale, decus nostrum. *Florentiae*. CXCICLII. X. Decembr.

I Alex. Morus.

EPISTOLA CCL.

NIC. HEINSIUS

J. Fr. Gronoviq.

Daventriam.

Quid meis factum sit literis, quas ex hac urbe ad te dedi, non scio, Vir Clarissime, hoc scio, dedisse me frequentissimas: quarum ultimae ante dies viginti, si recte memini, *Vossii* nostri curae sint commissae. Ego vero, postquam totis quatuor aut quinque mensibus nullas a te accepissem, Goesiana tandem opera diebus proxime elapsis nactus sum, quas XIII. Kal. Decembr. exararas. In iis autem quod ad alias nescio quas responsum flagitas, jam tenes frustra te esse, cum eas non viderim. Quare si apographum earum servasti, id ad me mitte, aut saltem indica, quid illae continerent rerum novarum, quidve exigerent officiorum, si quid exegerunt. Suas tibi redditas hesterno die monui Equitem *Cassianum*, cum illi forte scriberem. Ultimis meis jam credo intellexisti, penes me esse anulos duos antiquos, quos ille tibi oblatos cupiat. Accipies illos, ubi domum reversus ero. Observationum tuarum exemplaria nec vidi, nec quando visurus sim, scio. Mirum ni in Goesianis aedibus etiamnum morentur. Quod si ita res se habet, adde, quaeso, illis Statios, quot inter Italos amicos voles dividi, & fasciculum *Puteano* inscribe, Romanque per Elzevirium mitti cura. Operam vir ille nobilissimus dabit, ut comitatis exemplum est & lex unica, ne alii liberalitate tuâ fraudentur. Venetias tamen aut Patavium si quid mitti cupis, feceris consultius, si recta illic id omne perferatur, non Romam. *Carolus Datum* nolim a te negligi, tui meique in hac civitate studiosissimum; qui jampridem gestit tibi innotescere. Observationum & Statii exemplar mihi destinatum, apud te in adventum meum fac servetur. Equitem *Puteanum* non frustra a me diligere ac praedicari *Langermannus* te docebit: qui nunc Romae est, ejusque comitatem experitur quotidie. Obiit illa in urbe ante menses paucos Vaticanae bibliothecae custos, vir longe humanissimus, & cujus operâ factum est, ut omnia nobis patuerint fere, nihilque negaretur, dum illam frequentavimus. Successorem nactus est, insignis inscitiae ac rusticitatis hominem, quique *Langermanni* nostri patientiam indignis modis nunc exercet. Unde fit, ut nec amicus noster fructum magnum isto ex itinere sit laturus, nec ego etiam. In se enim receperat collationem gemini exemplaris Virgiliani, literis Romanis majusculis exarati, meae in spem gratiae. Quibus ego subsidii instructus divinum vatem plurimis locis emendatiorem dare poteram. Nam tertii codicis ejusdem notae, qui in Medicea exstat, excerpta penes me sunt, quarti Palatini penes Reginam. Doleo laborem hunc non susceptum a me, cum Romae essem. Sed dum *Goesio* gratificari studeo, dies quatuordecim perierunt.

runt in Agrimenſoribus conferendis, idque ſine utilitate ullâ. Amicus noſter Amſtelodamenſis, civiliter mortuus, & a Stoico magiſtro occiſus, quid rerum gerat, ſi neſcis, ego te docebo. Mutuum alienationem eſſe non poteſt con- coquere, cum omnia contraria a praeceptore doctus ſitiis, quae nunc mag- no ſuo malo experitur. Fortuna ejus quoque alienationem paſſa eſt, cum re- giae bibliothecae curam occuparit *Naudaeus*. Non defuerunt illi admonitio- nes meae, quas ſi tempeſtively amplexus eſſet, melius nunc ſecum agi videret. Sed innata quadam ſibi ſecuritate neglexit ac contempſit, quae fideliter fug- gerebam. Gaudebat iter Italicum a me magno ſtudio urgeri, ac perſuaſum habebat, me abſente turbas fore omnes facile ſedandas. Ego contra, quod omnem *Alaſtoris* iram ac rabiem ſolus ſuſtinerem, augurabar fore, ut, poſt diſceſſum meum, faba iſta in ejus caput cuderetur. Nunc vatem verum me fuiſſe agnoſcit. De pecuniâ, praefertim *Alaſtoris* filio, praestanda temerarium conſilium ſaepe interpellare ſum conatus. Meminiſſet ſe malo jam apud *Ala- ſtorem* eſſe loco, meminiſſet ſimultates nunquam poni ab *Alaſtore*, beneficia illi pro injuriis eſſe, aulam Gallis circulatoribus opplendam fore. Ad haec om- nia ridere ille, & me melancholicum appellare. In mandatis praeterea regiis exequendis mira fuit ſupinitate. Mecum ita egit, ut oſcitantius non potuerit. Vicies ad minimum ab illo petii, poſtquam Holmia profeſtus eſſem, ut ex miniſtris aliquem regiis per Germaniam conciliaret mihi, cui literas meas, quas Re- ginae ſcripturus eſſem, curandas committerem. Id enim Domina fieri juſſe- rat, ſuaque, ut fieret, intereſſe arbitrabatur. Romae deinum doctus ſum, Noribergam literas ad *Georgium Fuſtenbeuſen* eſſe mittendas. Ita factum eſt, ut nec ego *Fuſtenbeuſium* monere potuerim, ubi locorum degerem, & ille mei ignarus ex quatuor regiis epiſtolis mihi inſcriptis, unam tantum curavit. Cu- jus rei tota invidia noſtro illi incumbit. Sed ut hinc digrediar; quantum intelligo (ſcribit enim ad me ſubinde) totus eſt in depectendo adverſario, cui malum maximum minatur. Petit a me ut Solinos, Plinios, Histoſias Augu- ſtas, Tertullianos, conferam: omnium denique auctorum rationem habeam, quibus manum admoverit *Alaſtor*, oſtenſurum ſe brevi, nihil in ullis ſcientiis illum vidiffe, in Geographiâ eſſe aſinum, in Graecis infantem. Nilum ab illo frequenter in Solinianis exercitationibus appellari *μεγάλον ποταμόν*, & in nominativo *μεγάλος ποταμός*, hujus notae infinita alia ſe obſervaffe. Haec in aurem tibi. Ego vapulari favebo. *Clamorem regii Sanguinis* ab Anglo ſcrip- tam neſcio quo, ſed a *Moro* editam intellexeram. *Morum* tamen parricidae pro au- ctore ejus libri habent, ac egregie in Gazetteis, ut vocant, Londinenſibus de- fricarunt, tanquam compreſſa ſit ab illo *Alaſtoris* pediſequa, addito hoc epigram- mate, *Galli ex concubitu gravidam te, Bontia, Mori, Quis bene moratam morigeram- que neget?* Agnoſcis in illo Ouweniani acuminis ineptias, quod *Vlitius* heros me- cum communicavit. *Alaſtoris* ſcriptum contra Anglos avide expecto, de meo enim tergo quin illic comitia ſint habenda nullus dubito. Sic promiſit certe, cum *Miltonum* a me armatum perſuaderi ſibi paſſus ſit. Haerent in inſidiis Scazon- tes mei, mox provolaturi, ubi intellexero, locum mihi in cacatis iſtis chartis

dari. *Vossio* amoto nihil itineri suo Suecico ob stare credi vult, praeter meas fortunas: ab iis metum sibi esse. Quapropter literas a populari ejus, regio archiatro, non ita nuper accepi, quibus ad concordiam me hortatur, pacisque conditiones valde ridiculas proponit. Excepi hominem, ut merebatur, false satis. Audio valde nunc infensum mihi esse. Sed ego fortunas perire potius patiar, quam existimationem. Quancumque periculum non est, nisi regia promissa destituant. Semper enim est pollicita Domina, ad concordiam istam non fore adigendum me invitum: nec ego de pace unquam spem feci, quod hominis mores & ingenium probe nossem. Verum de his satis jam ac super garrivi. Venio nunc ad Ovidium, & tuas in eo emendationes. Libro iv. Met. *sedit humo nuda*. Nihil mutandum videtur, quod pace tua liceat dixisse: similis est locus Epist. Hypermnestrae, *Quaeque modo, ut posses etiam Jove digna videri, Dives eras: nuda nuda recumbis humo*. Trist. lib. i. Ep. v. *Aut ut edax vultur corpus circumspicit, Et quod Sub nuda positum cernere possit humo*, ex membranis, vulgo, *Sub nulla*. Met. iv. Fab. Persei. *Anguiferumque caput nuda ne laedat arena, Mollit humum foliis*, etiam ex MSS. vulgati, *dura*. Plura exempla collegi alibi. Altera correctio, *Flagrantemque domum regis mare vidit utrumque*, quantivis pretii est, nec dubitandum. Miror stuporem meum, qui non viderim, *utrumque* pro *utroque* edendum curavi, vetustiores membranas secutus. Epist. Phaedrae, *Et tenuis tellus audit utrumque mare de Isthmo Corinthiaco*. Ita est, mi Gronovi, nihil misero Ovidio inquinatius. Parum restat quin xvi i i. Metamorphoseos codices Mediceos absolverim. Utinam istud tempus licuisset terere in Germanicis bibliothecis, ubi vetustiora reperiri exemplaria nullus dubito. Sed hoc fortassis dabitur aliquando. Una nonnunquam litera quantas turbas dedit! Sic ult. Amor. Elegia. *Traditur haec Elegis ultima meta meis*, ut editi & scripti omnes, cum *Raditur* omnino sit legendum, ut puto jam olim me monuisse, apud Propertium quoque alicubi *Poma Tantalea tradere manu* legitur, pro *radere*. Medic. faciei, etiam non juvant MSS. illo versu, *Faemineâ vestri potiuntur lege mariti*, at scripserat Ovidius, *poliuntur* Trist. lib. i. i. *Nec male commissâ est nobis fortuna reorum Usque decem decies inspicienda viris*, *Tò usque* friget, quare vel invitis membranis repone, *Lisque*. lib. iv. El. i. *Sic si quem nondum portarum sede receptum Barbarus in campis repperit hostis, agit. portarum sede non placet*. Scribe *sepe*, pro *septo*. Met. xii. Fab. ix. *Arce locus summa, fessis loca grata carinis*, repetitio illa *locus loca* insulsa est. Lege, *Arce focus summa*. Pharon intelligit, sed duas ultimas emendationes a MSto confirmatas offendi. Ut & illam lib. vi i. fab. Cephali, *Dat. mibi praeterea, tanquam se parva dedisset Dona, canem munus*, cum perperam lectum sic haecenus *tanquam si*. Possem plurimas hujusmodi conjecturas proferre, quas in MStis postea offendi, sed ne mendax aut vanus videar, in notis ad Ovidium illas meis imputabo membranis. Ne in hisce levioribus pergam haerere, unum proferam locum satis difficilem Met. xiv. Fab. Pici. *Par, animus formae: nec adhuc spectasse tot annos Quinquennem poterat Grajam quater edere pugnam*. Haec sunt inquinatissima, nec juvant MSti multum, nisi quod pro *poterat*, agnoscant quidam,

poter-

poteram, poteras, poterant, & Graia pugna. Ero aliquanto audacior. Certum est haerere mendum in τῷ edere, pro quo suspicor legendum *Elide*, sed nec dum sanus est locus, quare pro *tot annos* velim reponi *per annos*, ut totus locus sic se habeat. *Par animus formae, nec adhuc spectasse per annos Quinquennem poterat Graia quater Elide pugnam.* Vide an quid melius excogitare possis. de Rottendorffianis Ovidiis aurem jam velli tibi: eos inspectos mihi cupiam. Amanuensi etiam opus mihi erit, ubi ab vos rediero, rediero autem mense Aprili aut Majo ad summum, nam famulum hîc sum relicturus. Vide an probum aliquem invenire possis. A Fabricio habui mellitissimas. Vale. Florent. ciciocliiii. vii. Jan.

Quia nugas meas non fastidis, addam ¹ Epigramma, quo nuper *Carolus Datum* compellavi, cum donarem pugillares illi eburneos. Ultimis meis falsus fui, cum affirmavi tuo codici deberi lectionem istam, *sacras homini lactamina sortes.* Extat enim in exemplari, quod eodem tempore ad manum erat, in Sixtinae bibliothecae auctione empto. Illud lib. i. Met. *Cuncta prius tentata* confirmat Mediceus unus. Notavi plura loca, in quibus eodem modo sic peccarunt librarii, quorum duo nunc succurrunt. Fast. lib. i. ubi festum Bacchi describit, *Fastus inest pulchris: sequiturque superbia formam.* leg. *pulchrae*, vel sine MStorum ope. Agit enim de Lotide. Amor. lib. iiii. Epiced. Tibulli; *Durat opus vatium, Trojani fama laboris.* imo, *vatis.* Cum de Homero adhuc sermo sit. & hoc sine MStis. Alia vellem. Sed finis sit nugarum.

¹ Editum lib. iiii. Silv. p. 200.

EPISTOLA CCLI.

J. F. R. GRONOVIIUS

Nic. Heinsio.

Florentiam.

Ego vero ne unas quidem tuas mihi conscius sum silentio transmisisse, quicquid tandem factum fuerit meis. Illustr. *Laurentani* fasciculum ab affine tuo petam. Exemplaria mei libelli discrucior nondum ad te pervenisse: nimis vereor, ne frustra ea in Italiam miserim. Excerpta Liviana, credo, recepero tempori cum adventu tuo: nam post Elzeviriorum mortes nondum intellexi filios id munus maturare. Ego tamen, quantum licet, progredior, ne, ubi volent, in mora illis sim. Annulos antiquos, quos mihi muneri destinavit illustrissimus *Puteanus*, nullo auro, quantumvis excocto, commutaverim: itaque diligenter adserve, rogo. Literas ejus mihi recte redditas jam ter aut quater, opinor, scripsi. Respondebo illis, cum Statium adjungere illis potero: quem scis rogatu Lud. Elz. dudum me percurrisse, & reliqua ad Silvas, gustum ad Theb. & Achill. addidisse. In fronte adoravi Dominam praefatiuncula, quam accommodatiorem auribus principum, quam sint aliae meae, judicat amicus no-

ster, qui has ad te curabit. Principis Hetruriæ nobilitati in commendando Reginae pariter & suo erga literas & ingenia studio mirifice faveo & applaudo. Erit haud dubie illud tam illustre monumentum, ut ex nullo alio probatura magis sit nostrum seculum posteritas. Itaque fac, quaeso, si potes, ut, ubi redieris, & ego ad lectionem ejus admittar, mitius feram, quod nec Ferrarii nec Valesii Panegyricos adhuc videre mihi contigit. A *Reinesio* tandem fenas uno tempore accepi, quas ille diversis temporibus dimissas, & cum diu subsedissent apud indiligentes amicos, ad se relatas, in unum conclusit fasciculum, & officii sui testandi causa, ut erant, venire ad me voluit. In illis tu quoque partes habes. xxviii. Octob. Anno 51. *Judicium, quod de Inscriptionibus fecit Ampliss. Heinsius, gratissimum est: utinam Vossianas videam quoque. A Donio Equite Flor. accepi plurimas per amicos: quasdam ejusdem inseruit libro de Don. & tabellis Thomassinus &c. Et in scheda addita: Cum signatas istas tabellario tradidissem, supervenerunt &c. Id saltem ingenti laetitia me adfecit, quod Ampliss. Heinsium ejusque propensissimam voluntatem in iis conspiciere mihi licuit. Gratissimae sunt Westcappellanae Inscriptiones &c. iv. Septemb. Anno 1652. Heinsium juniorem tuo, Gronovi carissime, monstratu cognovi optime: certat in Elegia cum veteribus, in Lyricis etiam novos superat. Critica vero ejus quam modesta mitisque: cum pro patre pugnat, ejusque filio, pietas fecit acriusculam: quam accurata & erudita! Luculenter de Claudiano meritum esse mussat etiam Lipsiensis momus: de Ovidio pariter nos speramus. In reditu si Augustam accedes, forte & excures Regimborgum vel Ratisbonam: invenies ibi Rottendorffium in comitatu Episcopi Monasteriensis, non cessantem, ut ipse ad me scripsit, colligere si quid possit veterum librorum. Salisburgi in palatio Archiepiscopi parvum scrinium est MSS. ubi Plautum, Caesarem, Celsum, Nepotem, Tibullum, Petronium, Statii filvas, & alios vidi: vix Silvas contuli. Monacii etiam Bavarica Septemviralis bibliotheca MSS. non caret: ut nec Caesarea Viennae. Schelius noster Hagae magnum virum praestat, & quantum in ipso est, arcet dominatum, quem sane non pauci vix respiranti libertati obducere conantur. Vale, Heinsi nobilissime & optime, & feliciter ad nos redi. Daventriae. Non. Januar. cxciccliii. quem omnem tibi secundissimum precor.*

Ex literis hominis nequaquam male volentis tibi: *Le ne voy aucune apparence de reconciliation entre Mons. de Saumaise & Messieurs Vossius & Heinsius, vous sçavez jusques ou portent les resentiments du premier, & qu'il a bonne memoire. Ces Messieurs peuvent a mon advis faire estat de ne plus retourner en Suede, ou le credit de leur partie est aussi grand que jamais, principalement depuis la venue d Mons Bourdelot, qui le sonstient puissamment &c.*

EPISTOLA CCLII.

J. FR. GRONOVIIUS

Nic. Heinsio.

REcte accepi tuas per affinem: tu interim, opinor, meas per *Vossium*. Profecto omnibus respondi tuis, meae si male sunt curatae, plane perierunt, nec enim exempla servare mihi, nisi rarissimarum, si quibus magnopere medietatis opus fuit, hae occupationes permittunt. De Statii exemplaribus, quae heri demum accepi, faciam quae praecipis. Nec obliviscar Nobiliss. *Dati*, quem quod studii amorisque erga me complevisti, gratissimum est mihi. De ¹ fulgurito vaticinia tua haud scio utrum magis doleam, cum tam vera, an cum minime credita fuere. Sed putas sectam, quam induit, Epicurei aut Stoici dei passuram, ne jaceat inultus? Ego quidem praeclara illa, quae minatur, vereor ne eundem habeant exitum, quem τὸ ἔ δώσονται ² Romani, popularis mei. Quin nec placet mihi jactari ista in literis, quae ad oculos Hypsamedusae perveniunt. Illa enim ipsa illa admiratione ἔ δένα, quam *Barea* noster fecit, attonita imperavit sibi, ne quicquam in isto norit fastidiendum, ne in Gorgone quidem, quam comitem habuit, & ut omnia patiatur, dum recipiat hominem, itaque ut nunc est, maledici illi non potest pati, utique a *Barea*, quem ipsa vetuit has simultates exercere, & hunc praetextum fulminis sumit, quod hoc tantum edictum curae cordique non habuerit. Dixi hoc quoque ei jamdudum, sed, ut est sui consilii, flocci faciebat. Nihil exspecto, nisi a tempore & fortuna, cum poenitebit eam nugarum, quas evexit. ³ *Nigritam* auctorem istius vociferationis esse agnovi statim e stylo. Frigidus ille rumor de Morata & inimicitias inter clientem & patronum, qui ut duceret voluisset, manabat ante sex menses & Hagae & Amsterodami. Sitne quid veri, resciscere in hunc diem a *Barea* non potui, etsi omni eo tempore, non literas, sed bina involucra, unum *Borharti*, alterum tuis, ad me dederit. Mire placet epigramma, placent & Ovidianae emendationes: maxime *Graja Elide*, cum etiam paucis ante diebus locus ille me incassum cruciasset. Meas facies tanti, quanti vis, sunt enim omnes subitae & fortuitae, dum aliud agens locum aliquem inquirō. Lib. I. Quaeque diu steterant in montibus altis, Fluctibus ignotis exsultavere carinae. O quam vellem, si quo invenires in codice: steterant in montibus alni. Sed forte superfluum est ingenium. Eodem: adeunt pariter Cephisidas undas, Et nondum liquidas, sed jam vada nota secantes, lego: Ut nondum liquidas, sic jam.

¹ *Isaaco Vossio*, ut credō.

² *Holstenii* puto. qui fuit *Hamburgensis*. *Hypsamedusa* est Regina. quis vero sub nomine *Bareae* lateat nescio, nisi sit ipse *Vossius*. *Gorgonem* esse putem uxorem *Salmasii*.

³ *Alexandrum Morum*. Vid. Epist. 250.

jam. Quid in concione Pythagorae: *I quoque delectos mactatos?* Nunquam hoc esse Ovidii credam, sed quid substituam, nihil constituere possum. Notas ad Livium repetitas perduxì ad Lib. XXI I. In decem primos de integro rescripsi: ita & mutavi & auxi: qui restat, levior labor, in quem nunc, quod vacabo, totus incumbam, nec interjungam, donec Θεὸς δίδωται & absolvero, inde omnia posteriora tragoediis Senecae. Vale, decus meum & me ama cum Langermanno, quem plurimum salvere jubeo. Daventriae. Prid. Kal. Febr. CIOICLIII.

EPISTOLA CCLIII.

NIC. HEINSIUS

J. F. Gronovio.

Daventriam.

INDigne pessimeque mecum agitur, Virorum Clarissime, cui tot tuae literae sint interceptae ac perierint. Quas Vossianâ operâ curasti, Nonis Januariis exaratas recte accepi. Alias a te multo tempore non vidi. *Langermannus* Neapolim se contulit, quam civitatem gestiebat perlustrare. Mediolani a me expectabitur, ut una in Germaniam excurramus. Ego Venetias nudius tertius adveni, post dies paucos Patavium abiturus. De Ovidio meo aliisque rebus proxime garrivi tecum verbosissime: quare Laconicum nunc me praestabo, idque eo magis, quod scriptionis desit argumentum. De *Reinesio* quae nuncias longe sunt gratissima. Velim profecto institutum viri optimi doctissimique singulari alioque officio fovere, si detur. Inscriptiones multas *Langermannus* noster collegit. Potero & ego non paucas suppeditare. Quae apud *Donii* haeredes, & *Holstenium* fere infinitae servantur, vix sperandum est, ut ex illorum manibus avelli possint. Cardinalis *Barberinus* suas omnes publici juris se facturum mihi est pollicitus. Sed cum totus sit in amoliendis insidiis, quas Barberinae familiae assiduas molitur hic Pontifex, per curas domesticas vix licet illi de re literariâ promovendâ cogitare. *Barthio* meas in Claudianum lucubrationes non improbari miror. Solebat enim gloriari, quantum ex *Langermanno* nostro intellexi, nihil alienae se diligentiae fecisse reliquum in isto auctore. Si Lipsiam excurremus, videndus nobis erit & compellendus. Ratisbonam ut videamus vix tanti est, mihi enim ob afflictam genitoris valetudinem ad vos festinandum. Si revertar in Italiam, ut futurum opinor, civitatem illam, Monachium, Augustam, Noribergum, Salisburgum aliasque perlustrabo. Nunc Helvetiam potissimum inspiciendam duco. Bononiae nactus sum Appiani Alexandrini Hannibalica & Iberica, quorum posterius scriptum ab *Hoeschelio* opinor editum. Hannibalica vix est ut credam prodiisse. Dux *Salviatus* ut MStos suos Graecos (centum sunt & triginta circiter) *Reginae* donaret effeci. De rebus Suecicis ita habet. Fortunas nostras assidue op-

pugnat

pugnat Burgundus ¹ histrio, *Alastoris* sociennus, strenue tuetur noster *Bochartus*. Somnum mihi machinationes istae non rumpunt: cum & innocentia mea fretus sim & regiâ benignitate. Agyrtae tamen isti per literas luculentas summam exprobravi perfidiam, qui cum olim in Galliis tanto apparatu ambierit ac captarit meam amicitiam, ut majori nemo: nunc nulla de causâ virus maligni ingenii in me convertat. Missis igitur aliis, quas ante struebat, insidiis, indignissimis modis se exceptum a me nunc quiritatur apud Dominam. Sed praesens optinae principi ostendam, quam in me fuerit injurius. Interim freudentibus ac invitis Sycophantis omnibus in aulam revertar. Non quod hoc cupiam vehementer, sed ut augures isti & aruspices omnes, qui male de me ominati sunt, rumpantur. *Alastor* magis friget illic terrarum, quam credas. Sed ea de re melius coram inter nos instituetur confabulatio. Ne tamen nescias non esse me apud Dominam tam malo loco, en excerptum ex epistolâ regii Cubicularii. Scripta est epistola pridie Eid. Januarias. *Jay* monstre vos lettres a sa Majesté mesme, la quelle m'a temoigné grand affection pour vostre personne, ausi bien que pour Mr. Langerman. Elle souhaite, que vous fusiez desja icy, & est fort aise que Mr. Langerman vienne avec vous. Il part avec cette ordinaire une lettre pour Mr. Bidal a Paris, par la quelle sa Majesté l'a commandé de vous fournir de l'argent pour vostre voyage, tant que vous en aurez besoin. &c. Et haec haecenus. Literas tuas si in posterum ad *Vossium* miseris; recte ad me perferentur. Vale, amicorum flos. Venetiis CIOIOCLIII. Prid. Kal. Martias. *Lauretanum* necdum vidi, videbo tamen hodie, aut die crastino.

¹ *Bourdilotius*, ut puto.

EPISTOLA CCLIV.

NIC. HEINSIUS

J. Fr. Gronovio.

Daventriam.

MOdo tuas accipio, Vir Clarissime, Florentiâ ad me missas, dum totus sum in exarandis ad amicos literis. Quapropter aegre ne feras rogo, si & breviter nunc & negligenter tecum agam, cum ipsae temporis angustiae hanc mihi necessitatem imponant. Jactura tuarum mihi permolesta est. Rogavi *Vossium*, ut apud tabellarium Daventriensem circumspiceret ac inquireret, si quid tuarum forsan istic literarum haereret, sed nihil unquam ad preces istas meas responsi dedit, etsi rogatus sit non semel. In caeteris diligentior se praestitit multo mihi jam tempore, quam solebat. Scribit enim frequenter, nec Laconissat amplius. Si quid illi credimus, res *Alastoris* magis in Sueciâ magisque frigent: quem inter & Aesculapium Gallum nescio quid occultarum simulatam nuper subortum. Nam de *Moro* dubitari non potest, cum lis Hagano foro jam sit credita. Nostras ille partes miro studio conciliare sibi nunc

Tom. III.

R r

studet.

studet. Utinam in vivis esset *Spanhemius*! Esset profecto, quo laetaretur maxime. *Bareae* succensuisse Dominam non dubito, quod ex amico inimicus *Alastori* sit factus. Ego miram odiorum constantiam semper prae me tuli illâ praesente, nec unquam aut promissis aut minis impelli potui, ut amicum me *Sycophantae* perditissimo fore pollicerer. Quod cum videret illa, meque valedicturum aulae citius animadverteret, quam admissurum aliquid indignum iis injuriis, quibus affectus eram gravissimis, nunquam ad concordiam adigendum fore me invitum multis praesentibus promisit. In contraria illam cum conaretur *Aesculapius* rapere, officii illum admonui per literas, sin persisteret, amicitiam, quam ambivisset ultro, meam ne propitiam impofterum speraret sibi, addidi. Male se exceptum a me nunc argutatur unice, & apud Dominam jactat. Sed habeo ejus literas, quibus flagitii non temere a me insimulatum liquido appareat, quas ipsi Dominae aliquando ostendam. Interim dissimulandum, dum praesens omnes ejus machinationes possim retundere. Iis, quas ex hac urbe ultimas ad te dedi, accepisse me regio nomine mandatum significavi, ut in Sueciam contenderem, ac *Langermannum* mecum ferrem. Is Urbinum se advenisse salvum, ac brevi ad me cogitare ante tres hebdomadas nunciabat. Miror quid cunctetur in viâ ac moram trahat. Iter solitarium, quod sine ullo comite suscepit, probari mihi non potest. Spero tamen mox adfuturum: quando consilium capiemus de itinere nostro. In Helvetiâ aliquo tempore haerendum erit, ut bibliothecas illo in tractu praestantiores pervolvamus. Tu si quid ad me voles, aut *Vossio*, aut *Goesio* mitte. *Tò montibus alni*, pro *altis*, ingeniosum est & vero simile. Illud certum, paulo post *auras*, non *aurae*, legendum ex uno Vaticano, & uno Mediceo, quod nescio an in textum receperim. In eodem Mediceo, *sic jam vada nota secantes*, non *sed*. Quod conjecturam tuam valde juvat, quam & a me in ora codicis cujusdam olim notatam videor meminisse. Sed hoc timide adfirmo. lib. xv. locus ille, *I quoque delectos matatos obrue tauros*, valde me exercuit. Optimus Vaticanus, jam ante a me citatus, qui & Palatinae bibliothecae fuit, *I quoque dilecto* habet, alter Palatinus, *In quoque dilectos*, vel, *Dis*, tuus codex a manu prima, *Hic quoque dejectos*, quidam, *Hos quoque*, *Hinc quoque*, *Dis quoque*, & *dilectos*. Unus Mediceus, *I quoque delecto*. Puto legendum, *I scrobe in egesta matatos obrue tauros*, vel, *Inque scrobe egesta*. Aliquid certe simile latet. lib. vii. *Haud procul egesta scrobibus tellure duabus*, in Fab. Medae. Sed de his melius coram, ut & de rebus Suecicis. Senecae Tragoediarum geminum exemplar Mediolani emi: tertium ibidem venale ut mihi addiceret, patrem *Sfondratum* rogaveram, sed quid de illo promittendum mihi sit vix scio: adeo nutat ac vacillat. Quartum habeo dono equitis *Puteani*. *Datus* ut te sui studiosum intelligat, operam dabo. Praelium atrox inter nostros & Anglos commissum proximis diebus in Hetrusco Mari. Naves hostium captae tres bellicae, duae incensae: reliquae novem in fugam actae, quas nostrae insequantur, sed ut puto frustra. *Johannes van Gale*, ductor Classis nostrae, pede uno mutilatus in praelio, incredibili animi constantiâ summam sui admirationis

rationem. Italis extorsit. Post acceptum enim vulnus, loco se non movit, sed cum ossa tali omnia attrita essent, abscindi, vocato chirurgo, pedem iussit, pugnae nihilominus intentus, & cum stando non posset vincere, sedendo vicit. *Langermannus* MStos aliquot codices Neapoli nactus est, quos inter duos Martiales: ego tertium in hac urbe, quartum Bononiae, ubi & Appiani Alexandrini Hannibalica inveni, quae lucem hactenus non viderunt, ut existimo. Vale, decus nostrum. Venetiis. CIOIOCLIII. XXI. Martii.

EPISTOLA CCLV.

J. F. R. GRONOVII

Nic. Heinsio.

Venetias.

AGyras nondum omnia posse, id vero ego laetor ita, ut qui pote maxime. Utinam tamen eo veniatis, priusquam optimus ille defensor decedat. Non oportet nimium causae credere, quia suam habet fortuna rationem. Ἰβηρικὴ & Ἀππιανικὴ Appiani jam bis a Stephano editae, si quidem eadem sunt, posterius cum versione. In excerptis Reinesianis hoc, ni fallor, oblitus sum: *Ampl. Heinsii Claudianum tandem nactus sum, eoque impense delector. Verum esse quod scriberas, mille locis meliorem eum fecisse prae Asiatico commentatore, reapse experior. Utinam Ovidium ejus pariter videremus & Venusinas lectiones Rutgersii, quarum spem facit. Extremo elegantiss. Notarum meminit epigrammatis nondum editi, quod in Leidensi bibliotheca exstet. Est vero id hexastichon particula carminis in nativitatem seu conceptionem Ἐ Θεανθεώπεια, vel de Maria Virgine ad Rusticianam scripti ab Andrea Oratore & Poeta Christiano, & publicati cum Paulini & Prosperi poematibus a Th. Pulmanno Antv. Anno 1566. Integrum etiam legitur inter epigr. Christiana e membranaceo libr. Bibl. Eleſt. Heidel. edita a Grutero Inscript f. 1174. sine auctoris & tituli mentione &c. Sic. 9. Novemb. 1651. Fasciculum Illustriss. Lauretani accepi tandem. Mandarem tibi quaedam ad illum, ut & Ferrarium, a quo nuper habui gratissimas: sed jam inde abfueris longe opinor, cum has acceperis. Meus fasciculus, quem te sperabam illic partitum, jacet, ut scribit affinis tuus, etiamnum Amsterodami. Vale, nobilissime Heinsi, & bene ambula cum *Langermanno* nostro. Daventriae. x. Kal. April. CIOIOCLIII.*

EPISTOLA CCLVI.

NIC. HEINSIUS

J. Fr. Gronovio.

Daventriam.

LAconicas tuas, amicorum decus, x. Kal. Aprilium exaratas modo accipio: ad quas pari oratione nunc respondebo. Sum enim in procinctu, ut cum *Langermanno* nostro Helvetios adeam, vobis mox adfuturus. Fortuna quod minari non desinit, aequiori, quam credas, mente fero. Quae si destituet, tanto arctius virtutem amplectar, ac omni opera cavebo, ne & illa partes deferat, aut a me deferatur. De Ibericis & Annibalicis fero errorem agnovi. Possideo enim utrumque Appiani libellum ab Henrico Stephano editum minori forma. Epigramma poetae Christiani, quod sub finem edidi notarum ad Claudianum, esse ab aliis jam in lucem prolatum nesciebam. Idque me ab eruditissimo *Reinesio* edoctum laetor. Non sum is, qui profitear Christianos poetas diligenter a me lectos esse, facile igitur labi hac in re potui. Tu, cum viro summo scribes, gratias meo nomine age, quod non gravatus sit, hujus rei me admonere. Conquisivi per omnem Italiam auctores diligenter, ex quibus inscriptiones antiquae depromi possint: horum opera institutum ejus ornari ac promoveri posse non leviter confido. Vale. Mediolani. Anno MDCLIII. Frid. Kal. Majas. Salutat te *Langermannus* noster.

EPISTOLA CCLVII.

J. FR. GRONOVIIUS

Nic. Heinsio.

Vellem quidem ego, Carissimum caput, quotidie tecum multis: sed nec materia suppetit, & ut nunc est, ad literas scribendas non nisi animo fesso fessaque manu accedo. Quid enim scribam homo minime garrulus, & inanibus effluens sonis ad similem hac parte mei? qui nec accipiam quicquam literarum, nec in sermones incidam, unde quod communicem tecum, gratum habeas. Meus autem dies omnis abit, dum excipio τοὺς ποιητάς, labore magno, sed jucundo, quia nihil audiunt, nisi ex quo ipse tractando proficiam. Quod superest soli mihi, cum Livio partior: nam quae ad ipsum rursus describo, correpta & circumcisa, quia visis, quae adornaveram, causati sunt Elzevirii, longe excessura unius tomi molem, & rogarunt, ut differrem in editionem, quam, si quando, promittunt maximam cum omnium observatis. Est & alius, qui eandem spem facit. Sic obsident tempora mea, & Sene-
cam

cam prioresque observationes, quas vehementer ardeo, & multo auctiores, & demptis aetatis festinationisque pristinae notis reddere, dum volentem hîc typographum habeo, rejicere in serius cogunt. Reditum in Aquilonem nunc credo lactiorem fore, post casum Phaethontis Asclepiadae, de quo jam certiora, quam ego nuntiare possem, te accepisse opinor. Utinam cum ipso refrigescant scenae & pulpita, quibus introductis, ut veras Musas pelleret, pessimam famam, cui minime vellemus, hîc locorum circumdedit. In Ovidio tuo praelegenti nuper in lib. VII. *Quodque suum securus arat Cromyona colonus*: venit in mentem scribendum esse: *Quodque suis securus*. Sus enim celebratur Cromyonia: & nosti illud: *securus amorum Germanae*. Eodem libro in legatione Cephali ad Acacum: *Postquam congressi, primi, sua verba tulerunt Cecropidae*. Tu dedisti, congressu primo. Nondum satisfacis. Vide an sit: *Postquam congressus primi sua verba tulerunt, Cecropides Cephalus peragit mandata*. Congressus primi tulerunt sua verba, dum legitima salutationum utrimque explicantur. Nec placere potest: *omnis erat rerum status iste mearum*: ut nec: *superat mihi miles & hosti*. Cognosce temeritatem meam: *Nec dubie vires, quas haec habet insula, vestras Ducite, & (o maneat rerum status iste mearum) Robora non desunt: superat mihi miles: & hoc est, Gratia diis, felix & inexcusabile tempus*. Ejusmodi tempus est meum, ut ejus praetextu sine auxiliis remittere vos non possim. Quamquam agnoscam illud, *Omnis eat*, modo ita distinctum, posse ferri. *Eat* pro sit. Sic procedant mihi omnes res, ut in promptu sunt robora juvenum, quae petitis. Haec ante tres propemodum hebdomades hucusque scripsi. Interea casus inopinatus ita domum meam turbavit, ut nec de his pertexendis, nec de aliis doctis literis scribendis cogitare potuerim. Juvenis e provincia Bremenfi (*Rosentagio* nomen est, notum forte Lucae nostro: certe parentes inter se familiares satis) magno animo literis incumbens, mentis morbum passus & phreneticus, haud scio unde, factus, & noctes & dies anxios sollicitosque nobis habuit, donec tandem adveniens cognitus eum ad suos reduxit. *Reinesius* Inscriptiones accepit, tibi que apud me grates agit, & pro his, & pro indicio de collectione Card. *Barberini*, seque eas ait jam contulisse in volumen suum, & notulas addidisse. A Langermanno unas Roma idibus Decembris datas heri demum accepi, Hamburgo missas una cum his ad illum, quas credo illi gratas fore. Vale, & me ama, Heinsi nobilissime. Daventriae. iv. Kal. Quinctil. cjdcccliii.

EPISTOLA CCLVIII.

NIC. HEINSIUS

J. Fr. Gronovio.

Daventriam.

Cum literarum nonnihil ad meos hodie in Bataviam pararem, paucis te compellandum duxi, Virorum Amicissime, quo itineris nostri successum
Rr 3 intel-

intelligas. Relictis a tergo Alpibus sum opinatus fore, ut sine mora ulla ad vos contenderem, sed res in Helvetiâ adeo turbatas offendi, ut sine praesentissimo discrimine viae committi non possem. Ita factum, ut mensem totum Geneva nos tenuerit. Per Gallias iter instituere animus non deerat, si per regiones milites licuisset, qui Belligardae obsidendae destinati, non Burgundiam tantum universam, sed provincias etiam vicinas depredationibus continuis valde infestant. Jacta tandem alea est. Basileam salvi advenimus ego ac *Langermannus*, per viarum ambages tamen & inaccessa montium, non sine magna difficultate. Bernates quod non licuerit adire, molestum omnino est. Si tamen post dies quinque aut sex hi motus componantur, eo excurrentur. Certe jam captus ille, qui tumultuantes rusticos ducebat, unde magis indies magisque animos illis frangi videas. In Bibliotheca hujus Academiae codices Ovidii nonnullos inveni haud contemnendae notae, quorum primus conjecturam meam ex parte confirmavit illius loci; *nec adhuc spectasse per annos quinquennem poterat Graiae quater Elide pugnam*. Audacior visus eram mihi ipsi, qui pro tot annos, emendassem per annos. At codex ille hanc glossam habet adscriptam: *Alia scilicet litæra habet sic, nec adhuc sp. per annos Quinqu. poteram Grajam quater edere pugnam*. Plures in eodem libro conjecturas confirmatas offendi, qualis & illa lib. XII. sub finem, ego sum sceleratior illo, *Qui tibi morte mea mortis solatia mittam*, cum legendum sit, ego sum sceleratior illo, *Ni tibi morte meâ mortis solatia mittam*. Codex ille tò *Ni* pro diversa lectione adscriptum habet in margine. Similis locus occurrit lib. XI. in fab. Alcyones. *Crudelior ipso Sit mihi mens pelago, si vitam ducere nitar Amplius*. Sed de his coram fortassis confabulabimur. In Batavia enim post dies ad summum viginti me futurum confido, secundo Rheno illuc properaturus. *Alastoris* sociennum, Archiatrum dico, periisse in aulâ jam credo intellexeris, calumniarum convivium insignium, quas de viro quodam Illustrissimo, & regiâ affinitate conspicuo, sparserat, quare res suas habere sibi jussus est. Sic nos servavit Apollo. Ego Aesculapio Gallum, qui ab illo morbo nos liberavit. Vale. Basileae. Anno CIOIOCLIII.

Si vales bene est, mi Gronovi, ego valeo. De me ut crebro ad te literas darem consultum non fuit, tum quod novivix habebam quod te juvaret, tum ut otio tuo non nocerem, quod tu tam sancte collocas: adde quod responsi vix aliquid a te possim sperare. Interim te saluto, & cum omni domo tua valere te jubeo, propediem etiam coram te amplexurum promitto: sive Hagae velis, sive Amstelrodami, sive domi tuae: Vale, mi Cognate & me ama, tibi ἀνυποκρίτως dovotissimum.

Haec scripta erant *Langermanni* manu.

EPISTOLA CCLIX.

NIC. HEINSIUS

J. Fr. Gronovio.

Daventriam.

Clarissime & Amicissime Virorum. Francofurto nunc a me compellaris, & quidem paucis, Basileâ compellatus jam ante. Moram in via diuturniorem traxi, quam fore putaram. Nam Basileae partim, partim Argentorati in Ovidianos incidi codices satis multos, quibus inspectis opus habebam: haec cunctandi fuit causa. Unus prae caeteris *Berneggerianus* magno usui fuit. Inveni in eo confirmatas tres aut quatuor conjecturas meas quantivis pretii, de quibus coram. Nunc enim festino. Si Rottendorbianos Ovidii codices etiamnum servas, eos quaeso aut Leidam aut Amstelodamum prima occasione mitte. Non enim diu in Hollandiâ sum cunctaturus. Tui tamen conveniendi facultas, ut spero, dabitur. Argentorati in bibliotheca publica veterrimum Senecae Epistolarum exemplar servatur, quo uti non licuit propter temporis angustias. Id inspexisses ipse vellem. Ante Kal. Augustas domi sum futurus. Vale. Salutat te *Langermannus*, qui parentem suum in acidulis Swalbacchianis heri convenit. Francofurti. CIOIOCLIII. xxx. A Julii.

EPISTOLA CCLX.

NIC. HEINSIUS

J. Fr. Gronovio

Daventriam.

De successu itineris nostri, Virorum amicissime, deque meo in has oras adventu, ut multis nunc tecum agam, nihil necesse, cum ex *Langermanni* mellitissimo ore omnia doceri possis. Te complecti praesentem vehementer velim: non enim desunt, quae tibi tradam. Argentorato multas attuli epistolas *Casauboni* & πέντε ineditas. Crastino mane Amstelodamum cogito; tum ut videam, an sarcinae advenerint Augustâ Vindelicorum, quos inter anuli duo veteres, tibi ab Equite *Puteano* destinati, tum ob aliud curandum negotium, quod familiam nostram spectat. *Goesius* hîc decumbit ex tertiana febris, satis periculose, nisi quod bene sperare nunc jubent medicorum filii. Ni melius processerit ejus valetudo, iter Suecicum promoveri a me vix poterit. Perendie Amstelodamo huc revertar, ut adsum aegrotanti. Arcas quatuor libris rarissimis onustas mihi periisse nuncio. Captae illae a pirata Anglo, mox a nostris recuperatae. Sed fama fert, praedam omnem Liburni publice divenditam.

tam. Ultimae tuae iv. Kal. Quinctiles exaratae Coloniam a *Vossio* missae, ea in urbe mihi sunt traditae. Alias tuas Heidelbergam se misisse adfirmat, quas necdum vidi. Non enim transire per illam civitatem mihi contigit: *Francisci Junii* opera ad me perventuras spes est. In Ovidio jampridem totus sum, ejus *Metamorphoses* nunc me exercent, ex occasione quatuor codicum scriptorum, quorum usum *Balthasar Moretus* mihi concessit. Locus ille, *Quodque suis securus arat*, jam a *Dionysio Salvagnio* notis in Ibin est occupatus, qui monuit sic esse restituendum. Idque mihi etiam probatur. Tò congressu primo in nonnullis membranis inveneram, & veram lectionem credidi, postea animadverti vetustiores libros exhibere *congressus primi*, ut tu coniecis: unde ego tamen fingebam,

Postquam congressus primi sua verba tulerunt;

Cecropidum Cephalus peragit mandata.

Cecropidum mandata, mandata Reipub. Atheniensis. Illud, *omnis eat rerum status iste mearum*, corruptum est omni procul dubio. Scripti quidam ex antiquioribus habent, & *omnis ait*. Ego tuam conjecturam non improbo, dum deest melior: paulo post, *superat mihi miles & hosti*, cum scripti quidam exhiberent *supereft*, tentabam olim, *supereft mihi miles*, & *o sit*, pro *o superfit*. quia *Cephalus* mox reponit, *Imo ita sit*. Tua conjectura, & hoc est ab excerptis Vaticanis confirmatur. Ego adhuc haereo. Libro xv. *I quoque dilectos mactatos obrue tauros*. Pro quoque, legendum *Scrobe* adhuc persuasum habeo. Sed cum veterrimus agnoscat *dilecto*, alii quidam *delecto* vel, *delectos*, simplicissima mihi lectio videtur, *I scrobe detecta mactatos obrue tauros*. *Scrobe detecta*, pro effossa. Sed modus non esset. Si ad nos excurrere non potes, ego ita iter fortassis instituiam, ut per civitatem vestram transeam. Vale. Lugd. Batav. iv. Eid. Sextil. Gregor. ciciocliiii. Multa nocte.

EPISTOLA CCLXI.

J. F. R. GRONOVIIUS

Nic. Heinsio.

Amstelodamum.

Non erat, quod nunc ad te scriberem, nisi forte illud (quod dubito num in mentem fuerit *Asclepiadae*, quippe cui gaudendum potius fuerit, quod cum spoliis opimis evaderet, quam dolendum, quod non ampliora exspectaret:) *Invitus Regina tuo*, cum sub ipsum tabellarii discessum literae ex Germania allatae me compulerunt de te *εὐαγγελία* mereri. Prodierunt enim (istitulus) *Casp. Barthii* Adversariorum Commentariorum tomi reliqui duo: secundus nempe & tertius: complectentes centum & viginti libros residuos, quibus auctor huic operi, senio & imbecillitate adactus, colophonem imposuit. Emendantur, illustrantur, constituuntur, universo hoc opere, centum octoginta commen-

tariis

tariis constante amplius duobus millibus Scriptorum ecclesiasticorum, aliorumque usquam ducentis locorum millibus, quorum pleraque pars intacta fuit hactenus, vel sic tentata, ut melior hac opera exeat: praecipue Christiana antiquitas curatur. Lipsiae edente auctore. Et corollarium, ¹ *Aeneae Gazaei & Zachariae Mitylenaei*, Philosophorum Platoniorum Christianorum, de resurrectione mortuorum & interitu mundi dialogi plus quam aurei. Caspar Barthius Eques interpretatus est, emendavit, & animadversionibus illustravit. Lipsiae edente auctore. Habes propter quae vadimonium deferere velis. Julianum an paraverint mihi *Langermannus* & *Bulfus*, quos salvere plurimum juveo, scire haveo. *Cecropidum Cephalus* magis placet, quam *Cecropides*. Vale, & feliciter ambulate. Daventriae prid. Id. Sext. CIOIOCLIII.

¹ Hi auctores prodire Anno 1655. post ejus mortem, cura *Daumii*, ut ex ejus epistolis ad *Bosium* III. & seqq. discimus; sed volumina illa adversariorum adhuc premuntur, & forte strangulata jam sunt.

EPISTOLA CCLXII.

NIC. HEINSIUS

J. Fr. Gronovio.

Daventriam.

DE discessu in Sueciam meo vellem adfirmari a me certi nonnihil posset, Virorum amicissime. Nam nec consultum videtur sine sarcinis illis, quas Venetiis expecto, in viam me conjicere, nec illae tantopere expectatae comparent. Quid quod ne doceri quidem a mercatoribus possum, quando sint adfuturæ. Adfuturas tamen brevi spem faciunt. Interim curae mihi erit, ne hoc otio abutar. Jam poematis meis manum admoverunt typographi, & supremam imponent, ut auguror, ante profectionem. Est enim pagellarum res paucarum. De *Naudaei* nostri morte jam ex *Langermannianis* intellexeris credo nonnihil. Ad Abbatis Villam (quod Picardiae oppidum) excessit, dum Parisios contendit versus. Novam *Alexiadis* adornari editionem a *Possino*, & hoc, puto, docuit te *Langermannus*. De Adversariis Barthianis gratus est nuncius. *Tò Cecropidum Cephalus peragit mandata* probari tibi gaudeo. Paulo ante dixerat, *Quae Cephalum patris aequae simul mandata ferebat*, de navi Atheniensis. Statii tui sex exemplaria ab Elzevirio tuli, quorum primum mihi vindicavi: secundum accepit *Langermannus*, tertium Eques *Puteanus*, quartum *Datus* habebit, de quinto & sexto, quibus mittenda sint, videro post. *Valerio* forsan *Chimentellio*, eloquentiae Pisis professori, & Comiti *Ferdinando del Maestro* Florentino. Paucas pagellas percurri festinans, quae plurimum placuerunt. pag. 183. *Mitior & senibus cygnis & pectore Phoebi Vox*. Videtur *pectine Phoebi* legendum, quale mendum etiam Ovidio abstuli. Lactantius de Phoenicis cantu,

Tom. III.

Ss

Quod

*Quod nec olor moriens imitari posse putatur,
Nec Cyllenaeae fila canora Lyrae.*

P. 177. *Sic erecta genas, aciemque effusa, trementi Sanguine.* Puto, *aciemque of-
fusa trementi Sanguine.* Virgiliana imitatio est ex quarto Aeneidos. P. 178. *nec
numina desunt, malo deerunt,* quod notis ad lib. 11. de raptu Proserp. non tan-
tum Claudiano, sed Virgilio quoque & Lucano ex MStis reddidi. Vale,
decus nostrum immortale. Amstelodami. Anno MDCLIII. a. d. VII. Kal.
Septembr.

EPISTOLA CCLXIII.
NIC. HEINSIUS

J. Fr. Gronovio.

Daventriam.

Venerunt nuper ex aulâ Suecicâ Juvenes hi duo nobilissimi, quorum majorem natu ex fama jam pridem noveram, probis omnibus probatum, & eruditione non levi tinctum. Alterius mores penitus licuit inspicere. Inserviit ille multis annis Augustae Principi, inter nobiles pueros adscitus, uniceque illi charus ac acceptus ob obsequia fidelissime semper praestita, quo in certamine reliquis sui ordinis omnibus palmam facile praeripuit. Major natu serius ad aulam accessit, cum ego jam inde discessissem. Haec cum ita se habeant, te per amicitiam nostram obtestor, Virorum Clarissime, per sacrum *Christinae Augustae* nomen, quod pari cultu uterque veneramur, ne illis studiorum causa ad te contendentibus desis. Missi sunt a Domina in Bataviam, ut inchoatis, quae dixi, feliciter studiis manum supremam imponant. Caeterum cum res Academiae hujus non sint eo, quo velim, loco, ac humaniores literae ob *Boxhornii* nostri diuturnum & pertinacem morbum valde inter nos fruant, auctor illis fui, ut tuae disciplinae se traderent. Hoc igitur age, ac persuasum certo habe, non tam me, cujus causa omnia te velle scio, hoc officio fore demerendum, quam Dominam, quae collatorum in suos beneficiorum oblivisci nunquam solet. Vale. Dabam Lugd. Bat. MDCLIII. Prid. Kal. Septembres. Festinanti ignosce.

EPISTOLA CCLXIV.
J. FR. GRONOVII

Nic. Heinsio.

Amstelodamum.

DE Poëmatis tuis euge, nec potest illa, quam hîc interim pones, mora melius collocari. De exemplaribus Statii, quicquid statues, mihi placebit. Sed

Sed cur omittis *Lauredanum* & *Ferrarium*? Alia igitur quoque duo fume, ne hi nobis praetereantur inhonorati, non enim sex tantum, sed quot velles, tradere tibi Elzevirium & adscribere meis rationibus iussi. Libenter vidi, quae animadvertisti in Statio; sed *pectinem* abstulerunt Apollini, & *pectus*, quod ab illis accipere dedignarentur, dederunt homines sine pectore, operae: nam omnes scripti & editi alii, *pectine*. Ego tamen fateor pectus me non habuisse, cum errorem tam crassum transii. A *Fabricio* accepi post longum utrimque silentium. Cogito illi respondere cum fasciculo, quem credo recte tibi, aut *Langermanno* commiseri, qui in itinere undecumque curare illi potestis, nam qua alia ratione mittam, nullam scio. Nobiles juvenes fratres, quos mihi commendasti, excepi libentissime, & faxy, ne venisse illos huc poeniteat. Jam in conducto commodo illos collocavi, jam horam attribui, jam semel audiendum me illis praebui. Non dubito te Leidae fore, cum auctio fiet librorum *Sm.iii.* Video in ea familias Romanas *Vrsini*, *Miscell.* in fol. n. 3. quem librum, si non plane conturbatorem mihi fore putas, si pretium ejus arcam meam posse ferre, ne dimiseris, te oro. *Higinum* ibidem num. 37. non mihi peto, sed amico, qui valde desiderat. In quarto optarem unum de *Oconibus* num. 17 & 22. In octavo num. 89: *Roberti Cenalis* de vera ponderum & mensurarum ratione. In Medicis in Octavo. num. 10. video *Penotum* de denario medico. Nescio quid sit, & numquid faciat ad rem numariam veterum aut antiquitatem quamcumque. Plures movent salivam, sed pauciores designavi, ut tanto fidentius scires in his me pecuniam contemnere. Recipies in aspero, simul significaveris, quid exposueris. Si tibi non vacat, do tibi optionem delicias nostras *Langermannum*. Χαίρετ' ἐμὰ ψυχὰς. Daventriae VII. Kal. Septemb. Jul. CIOICLIII.

EPISTOLA CCLXV.

NIC. HEINSIUS

J. Fr. Gronovio.

Daventriam.

M Agnusille: *Pan*, qui secundam *Vossio* ex Suecia fugam minabatur, mihi quoque mala multa, ac ipsi *Dominæ* exitium, nisi nos a se abigeret, ut ex *Moro* intelligebas nuper, nunc ad plures abiit. Alii *Spadae*, alii *Aquisgrani* in balneo mortuum ferunt. Trajecti ad *Mosam* sepultum certe constat. Nimirum, qui armis tantopere delectabatur, inter arma sepeliri voluit. Hunc casum accidisse mihi non valde lugubrem fateor: non quod minas hominis edentulas timerem, sed quod tranquillitatem animi unice amem, quam ille mihi propriam ac perpetuam haud quaquam reliquisset. Erat etiam eâ aetate, ut nihil solidi aut eruditi ab eo amplius sperari posset. Ut ne literæ quidem magnam

S s 2

1. Cl. *Salmasius*. Vide vitam ejus ante Epistolas. p. 54.

nam ejus morte jacturam fecisse sint existimandae. Sed de his fatis. Nolo enim *Mori* exemplum imitari, quem exultantem hoc nuncio modo vidimus. Causam is suam tenuerat contra Xantippen in Synodo Ultrajectinâ, atque hoc nuncio perculsum adversarium suum putat occubuisse. *Vossius* in Sueciam meus appulit, pristinae dignitati restituendus. Ego cras aut perendie eo etiam cogito. Te videre in via desideraram, sed per hasce pluvias vix licebit. Quare si *Schelius* noster etiamnum Swollae est, eo mitte, si quid voles: sin minus, Hamburgum. Exemplaria Observationum tuarum sex cum libellis in fasciculos divisi, ad amicos Italos mittenda. Aliud exemplar, quod mihi servem, a tua liberalitate expecto. Poëmatibus meis suprema tandem manus imposita. Rutgerianis quoque hac hebdomade imponetur. Ubi omnia erunt parata, *Goefio* curae erit, ut cum tuis libellis in Italiam mittantur. Tu ab Elzevirii tot pete exemplaria, quot voles. Si moram apud vos trahet *Schelius*, illius etiam ratio a te habenda est. Hodie mercator spem fecit fore, ut Swollae inveniam sarcinas meas tantopere expectatas, quas inter & duos annulos, quos Eques *Cassianus* oblatos tibi volebat. Iis quid velis factum, fac sciam. Statii tui duo adhuc exemplaria ab Elzevirio petam, quae *Ferrarius* ac *Lauredanus* ferant. rō *peſtine* gaudeo tuo suffragio probari. Erant plura hujus notae, quae differo in majus otium. Sum enim nunc occupatissimus, unde fit, ut doctissimo *Grevaeo* ne quidem respondere possim. Habui nuper a *Valesio*: is totus est in historiâ Eusebii ecclesiasticâ edendâ. Nobiles illos Suecos tuâ consuetudine non indignos fore spero. De libris in auctione Smethianae bibliothecae emendis utinam tempestivius me monuisses! Urfinus de familiis Romanis 20 Florenis est venditus. Puto illum tanti a te non fieri. Huc accedit, quod ex Elzevirio intelligam novam ejus editionem Antverpiae prodiisse. Caeteri quoque libri nimis caro venditi. Penoti de denario medico scriptum nugatorium est, agit de decem methodis morbos curandi. Vale, virorum amicissime. Amstelodami MDCLXIII. 16. Sept.

EPISTOLA CCLXVI.

NIC. HEINSIUS

J. Fr. Gronovio.

Daventriam.

Swollam cum advenissemus ego ac *Langermannus* noster, opportune illic deprehendimus allatam ex Italiâ arcam, quae sarcinas pretiosiores continebat. Depromsi inde confestim duos anulos, quos tibi destinarat Eques *Puteanus*: quamvis eâ ab illo ad me venerint conditione, ut mihi integrum esset, si placerent, mei illos juris facere, ut testis est *Langermannus*, qui viri humanissimi inspexit literas. Ego autem, etsi antiquariâ hac supellectile multum capiar, eos nequaquam invidendos tibi duxi. Reliquum est ut gratias viro optimo agas. Eas enim

enim differre, dum libri tui Romam perferantur, nimiae sit cunctationis. Nam nec naves Italiam aditurae sunt in promptu; & si maxime essent, tamen iter maritimum tardius plerumque nosti procedere. Anulum utrumque Anglo cuidam negotiatori, qui vicinum sese tuum adfinabat, tradidi, praesentibus *Langermanno* & Jurisconsulto alio, hospitae nostrae cognato. Anglum ipsum etiam sibi notum esse testabatur hospita. Si fefellit fidem, fac ut id intelligam, sin minus, paucis verbis hunc mihi scrupulum atque sollicitudinem exime. Rogavi te ultimis literis, ut duo poematum meorum exemplaria ab Elzeviriis peteres, quorum unum haberes tibi, alterum donares Schelio. Plura si desideras in Germaniam fortassis aut alio mittenda, non negabunt ea tibi Elzevirii. Ego certe tam malam mercedem ultro tibi nolim obtrudere. Ultimum Elegiarum libellum si properanti oculo percurres, multum me demereberis; sed eâ lege, ut errorum libere me admoneas. Caetera, quae jam olim legisti, non sunt tanti, ut bonas horas in iis finas tibi excutiendis perire. Si Hagam jam profectus est *Schelius*, aliud exemplar feret ab Elzeviriis. Id enim habent in mandatis. Trompio in viâ coepi parentare. Non potui cam mihi legem indicere, ut ab Anglis defricandis continerem manus, tam oportuna occasione. Interest enim bonorum omnium, ut flagitia gentis perditissimae innotescant posteritati. In ipsis poematis me nec illis pepercisse, facileprehendes. Volebam in viâ te salutare: sed festinandum fuit. Plurimum me obstringes, si quocunque pretio in auctione Brinckianae bibliothecae Meursium de funere & puerperio emendum mihi cures, is enim unicus libellus mihi deest ex scriptis Meursianis omnibus. Volebam & Horum Apollinem Hoeschelii; sed eo carere possum. De pretio securus esto: nihil illius tibi perierit. De Smithianis libris doleo me gratificari tibi non potuisse. Serius enim ad me portatae sunt tuae literae. Quanquam eo omnes pretio sunt venditi, quo tuos esse nolles. Ursinum de familiis Romanis edi rursus Antverpiae monuit Elzevirius. Occonem etiam auctiorem Patavini parant. Amicus noster salvus in Sueciam advenit. Hospitio Legati nostri excipitur, donec pristinam in aulâ sedem invadat, quae ab aliis videtur occupata. Gratissimus Reginae adventus ejus fuit. Nam nec voluit revocare Princeps optima, quem ejecerat, ne poenitentiam facti prae se ferret: & laetata est summopere rediisse sponte, quem adesse sibi vehementer optabat. Beatum morte suâ *Alastorem*, qui haec ferre non cogatur. Ferenda enim fuissent. Plura erant, de quibus tecum confabularer: sed urgent comites. Hamburgo fortassis iterum scribam. Vale, decus amicorum praecipuum. *Grevaeus* ad Ovidium quae observavit, satis sunt jejunâ. Respondebo tamen illi, ubi per occupationes licebit. Vale iterum. Bremae. Anno MDCCCLIII. XXIII. Septembr.

Langermannus Amstelodamo ante abitum ad te misit *Gevartii* Electa, & *Lexicon Henrici Stephani* Medicum. Fasciculus *Grevaeo* fuit inscriptus.

EPISTOLA CCLXVII.

J. F. R. GRONOVII

Nic. Heinſio.

Holmiam.

IMperaveram mihi, ne prius ad te literas darem, quam, quod vides, alloquium ad divinam Principem una mitti poſſet: ea res me in officio tardiorē fecit. Cruciavi enim me multos dies (quid dico dies, quaſi de ſolido die praeter unam alteramve horam reliquam faciant οἱ φοιτῶντες) ſed tamen aliquot dies abierunt, antequam incipere potui, & tot occurrentibus obtreſtantibusque invicem exordiis in uno certo mentem omnem figere & collocare, dum in vulgari argumento omnium vulgarium taedet. Non diffiteor me multum aeſtuaſſe: quin parum obſervare mihi majeſtatem tantam & fortunae & ingenii videntur, ſi qui audent ſecuri projicere, quod ad illam allegent. Nunc tuum eſt non minus acrimoniae in cenſendo, ſimplicitatis in monendo, ſi quid improbes ipſe, aut jure ab aliis improbari intelligas, fidei atque amoris in commendando, quae probes, ut intelligantur, adhibere, quam ego adhibui contentionis in ſcribendo. Voſſii quoque noſtri humanitatem & ſubtiles aures tibi non defuturas exiſtimo. Mortes hominum inſignium vellem paullo aegrius ferri: vereor enim, ne alterum dicant *rabere*, alterum *morari* prima producta deſiſſe. Sed prior ille quantus foret luſtus (poene inferui: quae de Priamo Juvenalis) ſi paullo moderatius egiſſet. Nunc vix extra domum, forſan ne ibi quidem pie ſatis lugebitur. Quin & adfertur nuntius horribilis de ſpectro viſo, quod mandaverit omnia ſcripta exuri, praeter Antimiltonum, & de majoribus monſtris, qui huic ludibrio paruerint. Sed eas fabulas cenſeo. Suollae inveniſſes exemplar Obſervationum, ſi tuae fuiſſent citius curatae. Sed quas die Lunae dederas, die Jovis demum in prandio mihi reddebantur, ut illo die nihil mitti poſſet. Servabitur hic integrum tibi, donec accipere poſſis. Poëmata tua exſpectamus ego & Schelius, qui in conventu Nobilium & civitatum nuper hic occurrit, & aliquoties ſuaviter egimus. Anglus melior omni gente ſua, certe quae imperat, recte curavit annulos, eoque nomine maximas tibi grates ago. Laudo pietatem erga *Trompium*. Digniſſima ingenio tuo virtus viri, & geſtio videre atque oſtentare. *Meurſius* de funere emptus eſt tibi. Juſſeram & Orum, ſed videtur deterrius pretio procurator meus, etſi juſtum non parvo excedendi poteſtatem ei feciſſem: venierunt ſatis care. Ant. Auguſtini dialogos habeo quinque florēſ, tantidem Vegetium Scriverii majorem, Thomam magiſtrum & Phrynichum tribus. Nunc Euſebium Scaligeri & Gymnaſticam Mercurialis apud Trajectum venor, qui nescio quomodo in immenſam Sophiſtarum turbam venerunt. Vale, decus & praefidium noſtrum, & quamprimum me tuis bea. Daventriae. iv. Eid. Octobr. Jul. ciciocliii.

EPI-

EPISTOLA CCLXVIII.

NIC. HEINSIUS

J. Fr. Gronovio.

Daventriam.

Alterum fere mensem jam ago Holmiae partim, partim Upsaliae, Amicorum decus. Upsalia reliquam hyemem, si quis conjecturae non vanae locus, nos habebit; quod Holmiam pestilentia adflare pergat. Ea res, ut multis aliis, ita mihi permolesta accidit. Vitae enim defultoriae pertactus post tantas itinerum molestias feliciter devoratas, de statione aliquâ certâ anxie circumspiciebam, cujus ope in gratiam cum Musis redirem. Opplata hîc omnia hospitium aulicorum confluxu. Tres aut quatuor simul in uno cubiculo, eoque angusto, vivimus. Meditationes omnes procul habendae. Vix scribendis literis locus, nisi inter continuas interpellationes hominum otiosorum. Felices vos, qui aetatem agitis tranquille, & procul a tam operosis ineptiis. Ex patria nuncios jampridem nullos accipio. Unde fit, ut ignorem haecenus, annulosne veteres acceperis, Illustrissimi *Puteani* munus, & meorum Poëmatum exemplaria. Scripsisse certe te, nec oblitum mei, ex iis, quas ad *Vossium* dedisti, nudius quartus mihi innotuit. Tradidit amicus noster dedicationem tuam Dominae, & placuisse testatus est. Si in meas manus ejus exemplar pervenisset (quod nullum haecenus pervenit, credo, *Goesii* supinitate aut absentia) pro eâ, quae mihi tecum intercedit, necessitudine, delevissem τὰ, *D. Gustavi filiae*, *D. Caroli Nepti* &c. Non enim ignoro, suis, quam suorum, laudibus censerî Dominam malle. Addebat *Vossius*, ne hoc quidem fatis illi probatum fuisse, *frontis imbecillitas*, credo, quod dicti elegantiam non perceperit. In Versione Graeci carminis vide an metrum satis ferat, τὸ *Propitiant*. *Johannes Schefferus* Argentinensis *Salmasio* parentavit hesternò in hac Academiâ die, idque jussu ac mandato regio. Multis & superfluis laudibus onerabat defunctum, ut audio, (nam nugis istis non vacabat mihi interesse) nec ab adversariis ejus vellicandis sibi temperabat, quos vespertilionum decorabat elogio. *Vossio* bilem movit haec dicacitas, mihi risum. Vide quid libido possit supparandi. Mihi enim certum est homini non malo haec dicenda fuisse nolenti. Edidit is nuper suos de Re veterum Navali commentarios: opus elaboratum quidem, quod tamen omnium expectationi responsurum non sit. In aulâ non id est literis nunc pretium, quod fuit olim. Studiis se denuo invigilaturam quotidie minatur Domina, & faciet fortassis. Ego praemium non vile pro confecto feliciter itinere Italico s[per]are. *Langermannus* in Hispaniam destinatur. Sed de rebus nostris plura proxime: quae tibi uni dicta sunt. *Vossius* hac hyeme in Gallias forsan exurret. Quod si fit, ex ejus ore omnia plenius, quae hîc aguntur, cognosces. Scis enim quàm

non.

non tuto chartae ista committantur. Vale CIOCCCLIII. Nonis Decembribus Gregorian. Upsaliae. *Meibomius* Sueciam deseruit. Ferunt non placuisse illi titulum subbibliothecarii, nec *τὸ sub* hominem delicatum potuisse concoquere. A Rege Daniae plenum bibliothecarii titulum obtinuit, si rumori credendum. Has jam exararam, cum *Schefferus* me convenit. Multus fuit in excusatione panegyrici funebris. Respondi, gaudere me, quod laudasset mortuum. Vale iterum, & scribe frequenter.

EPISTOLA CCLXIX.
NIC. HEINSIUS.

J. Fr. Gronovio.

Daventriam.

SERO quidem, non inopportune tamen, tuae mihi fuerunt redditae diebus proxime elapsis, Virorum amicissime, quas a. d. iv. Eid. Octobr. exarasti. Dedicationem Livio praefigendam amicus noster Dominae jam exhibuerat, ut ultimis meis significavi: sed arreptâ occasione nequaquam commodâ, adeo, ut, vix paucis versibus perlectis, propositum abrumperet illa, & confestim quicquid chartarum erat, redderet, credo quod arbitraretur schedas illas a te expectari typographo committendas. Aderat tum Legatus Hispanicus, vir non malus, sed literarum rudis, cujus interventum intempestivum accidisse facile intelliges. Praeterea turbatum valde in aula fuit per menses duos continuos, & ipsa Domina praeter solitum difficilis ac morosa. Detumuisse tandem, aut saltem detumescere haec videtur procella nunc paulatim, postquam impetum convertit omnem in caput illius, qui quondam unicus erat in palatio. De Archiatri sycophantae adversario puta me loqui & subversore. Is nunc & ipse cecidit, non tam dignitatibus, quam auctoritate omni exutus, & aulam iustus deferere ac ruri latere. Funestum profecto spectaculum. Causae proferuntur variae, & fortassis iustae. Sed hac de re aliquando confabulabimur, nunc non vacat. Ego patronum perdidi, sed nec praecipuum. Extat penes me atrox & plena fulminis epistola herilis, quâ culpam deprecanti & reditum in aulam captanti responderetur valde contumeliose. Sed de his non est hujus loci instituere narrationem. Ut igitur ad dedicationem tuam revertar, cum deprehensa esset a me Domina nudius tertius & sola & otiosa, tui mentionem injeci, quaesivique, an dedicationem legisset Livio destinata. Cum negaret se legisse, obtuli legendam: quam illa avidè arripuit, & attentâ lectione, quantum observare licuit, examinavit, & absolvit me praesente fere totam. Cum interpellaretur ab aulicis supervenientibus, complicatas chartas in sacculo recondidit majori, ut apparebat, cum otio legendas, nec hactenus reddidit. Locuta est de te valde honorifice: multa super te rogabat. An uxorem haberes? an liberos? an prolem masculam? an illa bonis artibus incumbere.

beret? Cum annuisssem, laudabat institutum. Inscriptionem dedicationis so-
lam non probabat, qua de re proxime tecum egi. Inter legendum semel
iterumque interrumpens negabat, tot suas laudes se vidisse unquam in unâ
pagellâ. Atque hæc de dedicatione tuâ. Venio nunc ad epistolam, ex qua
maxima percepi cum voluptate, redditos tibi anulòs ab Anglò vicino tuo. Of-
ficii memorem te fore confido, & gratias aut acturum brevi, aut jam egisse
Puteano nostro. De Scythomaniae¹ candidato facilis jactura est, postquam in-
genio suo coeperat abuti indignum in modum. *Alastorem* diutius vixisse forsan
praestitisset, nisi & ille omnem eruditionem nescio quibus ineptiis decrevisset im-
posterum dedicare, aut potius horrendis impietatibus, quas cum stupore ali-
quando ex me intelliges. Animam mortalem esse, mundum aeternum palam
hîc non tantum professus est, sed minabatur quoque ingentes pro more suo
commentarios illa de re se conscripturum. Sintne illae schedae, quas combus-
sit uxor, non dixerim. De spectro res faceta est. Coniux vivum exagitarat,
nunc ille conjugem mortuus. Appositum apud nos proverbium scis, *Elcke*
Duyvel heeft syn maent. Amicus noster pergit in proposito de Solinianis exer-
citationibus confutandis, praesertim cum intelligat Gallos Apotheosin mortuo
parare. Tu inimicum perdidisti majorem, quam sciebas. Poëmata mea nec-
dum vidisse te miror, cum ante menses tres quatuorve jam prodierint. Si nec-
dum vidisti, pete ab Elzevirio exemplar, vel plura, si voles. Judicium de iis
tuum invidere mihi noli. Musæum inprimis illum Elegiarum libellum, qui
novus accessit, cum cura lege, & quicquid a te in illo improbabitur, ad me
perscribe, ut mutetur in secunda editione & corrigatur. Trompiani manes
vellem accessissent. Luculenta est elegia, quam apud me videbis. Nunc enim
describendi ejus otium mihi non est. Exemplar *Vlitio* miseram, necdum per-
limatum: hoc illum cum aliis communicasse existimo. Vidi enim hîc literas,
quibus Hagâ scribant, non placuisse. *Boyis* puta & *Plantis*, quorum magnus
illic numerus. Pream, si nostri homines intelligunt, quid sit bene scribere.
Meursium de funere a te emptum mihi gaudeo. Serva illum diligenter, dum
adsum. Adfuturum enim me auguror ante aestatem proximam. Libellum sup-
plicem paravi Dominae, non sine cura conscriptum aut meditatione, in quo
magnâ verborum libertate causam meam ago, & officia a nobis in domum Re-
giam collata per annos fere quadraginta continuos, cum ingenti facultatum no-
strarum detrimento & jactura, recenseo. Libellus ipse huc spectat, ut Rut-
gersianae rationes tandem expungantur, mihi que confecto negotio recursus ad
meos concedatur. Nolle enim me diutius cum inscitâ mea conflictari, &
studia negligere, quibus vitam ipsam longe viliorē duco. Invita, sat scio,
perleget libellum: quod adesse me sibi malit, ut quem fidum rebus suis ex-
perta sit semper. Sed jacta alea est. Rationes non improbabis, quae me huc
compellunt. Salutat te Langermannus. Vale, flos amicorum. Upsaliae. Anno
MDCCCLIII. Prid. Fest. Natalit. Tumultuariæ scriptioni ignosce, quae pro-
peranda fuit inter continuos interpellantium aulicorum strepitus.

¹ Boxhornio.

NIC. HEINSIUS.

J. Fr. Gronovio.

Daventriam.

Commercii literarii studia inter nos jampridem frigere, Amicissime Gronovii, longe molestissimum est. Nullas a te accepi, ex quo in has regiones sum reversus, praeter unicam. *Goesius* rarus est Amstelodami: cujus aedes nemo inhabitat, hero ut plurimum absente. Unde fit, ut quae illuc feruntur literae, majori ex parte in manus meas non perveniant. Hoc fatum cum & tuas subisse existimem, recte posthac feceris, si eas Leidam ad paternos lares perferendas cures. Consilium, quod Regina cepit nuper, non potes ignorare ex publicis rumoribus, si literae, quibus rem totam nunciaram, aberrarunt. Post mensem, regiis insignibus depositis, privatae vitae addictam videbimus. Diadema successoris capiti imponet ipsa: quibus solemnibus peractis, in Pomeraniam confestim discedet, atque inde, quod minime forsan expectes, ad Spadanos fontes in Leodicensem agrum. Ab acidulis redeunti etsi perlustrandam fore nostram Bataviam nonnulli existiment, incertus tamen est is rumor, quem proinde a te divulgatum illic terrarum nolim. Si occurras illi in via alicubi, recte rebustuis consulas: praesertim si *Livio* tuo manum supremam typographi imposuerunt. Nihil non egit universus regni Senatus, ut ab hoc proposito Dominam avellerent: sed nimis alte ejus animo haeret impressa sententia vitae privatae instituendae, quam ut tolli aut mutari ulla ratione possit. Me quod spectat: nihil prius habui post iter Italicum, quam amicos subornare, qui reditum in patriam meum a Regina impetrarent. Videbam enim ipsam Dominam parcius jam capi & delectari studiis, videbam trahi Rutgerianum negotium, videbam quoque non eam mei in itinere habitam rationem, quam discedens sperare jussus eram. Sed dissimulatis hisce causis, ad alias confugiebam, quibus domum revocarer, senectutem & adversam parentis valetudinem praecipue prae me ferens. Per amicos cum nihil proficerem, ipse causam meam libello supplici Reginae tradito agendam duxi: in quo amplissimis verbis, quae dicenda videbantur, exaggerabam: de Rutgeriano potissimum negotio tandiu contra datam fidem protracto, questus liberissime. Paucis post diebus cum in Dominam incidissem, verbis humanissimis testata est lectum sibi libellum supplicem, meque adhortari coepit, ut consilium de patria repetenda projicerem. Ad quae fati frigide respondebam. Mox ejus nomine me convenit *Joannes Holmius*, qui de stipendio & dignitate seu munere aulico in me conferendis coepit differere, animum meum exploraturus. Sed cum adfirmarem fixam mihi esse de discessu sententiam: honores & stipendia inter meos mihi non defutura: interjectis post nonnullis diebus denuo reversus obtulit

obtulit diploma jussu Dominae, in quo praeter expensas in Itinere Italico a me factas quatuor aureorum seu thalerorum Imperialium millibus donabar, brevi persolvendis pro officiis Augustae praestitis: adjecto etiam titulo Regii conclavis Secretarii ab epistolis Latinis. Egi gratias luculentas pro hac munificentia, ut debebam, Reginae: de Secretarii dignitate tamen admittenda deprecatus sum onus, nisi Rutgeriano negotio finis imponeretur. Respondit illa, agrum jam se destinasse mihi in Pomeraniâ, qui aequaret summam debita pecuniae, & fortassis excederet. Eo si satisfieri sibi pateretur parens meus, nullam in se moram fore. Annui oblatae conditioni, petique effectum daret, ut rationes Rutgerianae quantocytus a Senatu exciterentur approbarenturque, si aequae essent. Aequas autem esse, jam intellectum sibi a Cancellario. Id autem me cupere, ne de agro controversia aut a Senatu aut a successore suo moveri mihi meisve posset, postquam regno sese abdicasset. Promisit & hoc & longe plura, sed ea conditione, ne clientelae suae me subducerem. Expecto anxie promissorum successum: quae si votis meis respondeant, cum Dominâ Spadam sum profecturus, id enim ut ego ac *Vossius* faceremus se velle jam significavit. Si destituent promissa, haerendum aliquo etiamnum tempore hinc mihi erit. Auctor enim est Illustrissimus Cancellarius, ne causae aequissimae partes deferam, trahi posse negotium rebus regni atque aerarii turbatis: non esse tamen de eventu prospero desperandum. Nec defuerunt ex proceribus, qui polliciti sint non contemnendos mihi in ipso regno honores, si e re mea putarem fore; ut sedem in Sueciâ figerem, & venturo Regi, quem bene mihi velle non nescirent, operam meam addicerem. Sed priores Dominae partes apud me erunt, si & promissa compareant, & ad intermissa studia curas denuo convertat: quibus vitam totam se destinasse reliquam ipsa vult credi. Habes hinc luculentam rerum mearum historiam, de caeteris aut coram, aut per literas: vides enim perplexa adhuc esse omnia. *Langermannum* quoque comitatu sub adscituram se Regina mihi adfirmavit jam non semel. Sed cum in omnibus paterna is magis consilia sequatur, quam mea, parens autem auctor illi sit, ut domum se conferat, non video, quid de illo credi certo possit. Totus enim fluctuat, & impelli se modo paternis monitis, modo Reginae jussu, nunc huc nunc illuc patitur. Haec in aurem tibi omnia. *Balzacius* ad plures abiit nuper in Galliis, & alter epistolarum scriptor, cui *Maresio* nomen. Vale, decus nostrum, cum tuis omnibus. Holmiae a. d. i i i. Kal. Majas. c i c i o c l i v.

Poëmata mea an videris non scio. Malum nomen fuit Elzevirius, si eorum tibi copiam non fecit. Habes hinc responsorias ad *Graevium*, quas cures quamprimum velim. Salutat te peramanter *Vossius*, qui mihi hinc nunc adest, cras uterque Upsaliam sumus redituri.

EPISTOLA CCLXXI.

J. FR. GRONOVIIUS

Nic. Heinsio.

Upsaliam.

EGO quoque mirabar sedulitatem in scribendo tuam mihi exaruisse. Nam post illas, quas anno praeterito pridie festi Natalicii dederas, nullum de te nuntium habui, etsi bis interea scripserim. Itaque avidissime arripui tuas venientes, resque & honores tuos (qui Deos oro ut proprii sint) libentissime, si quid unquam, cognovi. Etsi jamdudum me angit, sollicitat, cruciat transitus iste temporum, neque ullius solatii, nedum gaudii, compotem esse patitur. Quidquid admirer, quidquid voveam, quidquid ominer, nihil occurrit, aliud quam *Mea Glycerium, quid agis? cur te is perditum?* Itaque aeger animus omnia fastidit, & mentionem etiam istius rei horrebat. Contextus Livii absolutus est ab operis. Praefatio quoque jam impressa est, ut erat initio concepta, nisi quod delevi C. N. G. R. quando ita voluerunt, qui persuaserant S. M. Germanismum esse, qui erat Romanismus purissimus, ut Fasti consulares loquuntur totis paginis, ut Caesarum quoque tituli & Inscriptiones. Immo Germani, saltem quos ego adii, omnes istam rationem ignorant. *Theodori Johannis filii Delphenenses sunt.* Notas, si libebit, aggredientur propediem, quas nunc quoque nimium crevisse queruntur. At me ita jamdudum longi laboris taedet, ut sive minuendi, sive augendi, sive adeo absolvendi, quod parvum in fine restat, causa manum illis, etsi mihi aliquoties imperaverim, admovere nequeam. Exspecto, ut pro libidine sua ipsi scelestae truncent. Ne tamen nihil agam, subinde me revocat res nummaria veterum, cujus poene nullam partem non attingi in tribus jam affectis libellis de Sestertiis, quos indies exspectat typographus. Nihil magis vereor, quam ne illi, qui solus haec scire videri volebat, obtrectasse videar: adeo mihi saepe occurrit. Videbis tamen quam nihil quaesitum, quam mollis ad omnia, & ut sic dicam, in solum veniens occasio. Erunt & alia, spero, quae ubi videris, tibi placebunt. Non enim parum contendimus viriculas nostras. Etsi nunc totus langueam, torpeamque, nihil astute profecto cogitans; sed tantum dolens vicem gloriae, cui (non enim virtutis tantum, ut tu canis, hic exitus) in malum suum prona diisque aemulae propediem *ἐκ τῆ ἐν αὐτοῦ ἐὰρ ἐξαργύρηται.* De occurso, si eat ad aquas, recte suades, & ego equis, velis. Poëmatum tuorum ad me duo exemplaria misit Elzevirius, quorum alterum *Schelio* tradidi, etsi jam emerat. Non ignoras & tunc & aliquot postea congressibus certamen nobis fuisse, uter magis admiraretur genium tuum, uter plura, quamquam omnia sint, bene dicta annotasset. Vale, Heinsii nobilissime, & me ama. *Vossii τὸ πᾶν* fuit mihi salutatio gratissima, & quam non levioris animi officio remuneror. Daventriae. iv. Non. Jun. Jul. *ϞϞϞϞϞϞϞϞ.*

EPI-

EPISTOLA CCLXXII.

NIC. HEINSIUS

J. Fr. Gronovio.

Daventriam.

L Aetatus sum, ut qui maxime; acceptis literis tuis, Virorum Clarissime, quibus intermissum multo tempore scribendi officium instaures denuo & auspicaris. Sedulitatem istam ut probare mihi pergas, etiam atque etiam te adhortor. Rerum mearum statu nihil est turbatius. Instabat Domina discens, ut sese comitaretur in viâ. Sed cum nec Rutgersiano negotio finis imponeretur, nec expensis istis, quas in Italiâ nuper fecissem, perperam consulturus mihi videbar, si profectio accingerer. Non enim exploratum habebam satis, quam diu domo abfutura esset Domina, aut quo haec ejus consilia spectarent, in quibus nihil observabam praeter meras fluctuationes. Itaque amolitus a me sum itineris ineundi molestiam verbis, ut potui, mollissimis. Post discessum ejus optime de rebus meis incipiebam sperare. Nam animadvertēbam curas procerum potissimas occupari in aere alieno, quod conflasset Domina, expungendo; nec nesciebam esse me haud malo apud τὸ αὐτοκράτορος loco: cum ecce funestus advolavit nuncius de bello apud Bremenses, exorto praeter expectationem. Quo impulsore faba haec sit causa nescitur. Rege certe & Senatu invitis ad arma veniendum constat satis, qui nunc toti sunt in cogendo exercitu. Si gliscit haec tempestas, de qua componenda spem vix ullam opinor superesse, ego caeterique creditores jubebimur plorare. Facile enim intelligis, sumtus ad bellum maximos esse faciendos, qui in nostros usus converti potuissent. Quicquid sit, aestatem reliquam hîc exigendam mihi proposui, ut rebus meis invigilem, quo tempore si literis tuis frequenter me conveneris, multum cepero solatii ex amicâ compellatione. De aulae hujus statu plura ex amico nostro intelliges, qui jam ante mensem alterumque ad vos rediisse debuit. Opima is spolia & amplissimam praedam, sed valde invidiosam, ex regia bibliothecâ secum in Bataviam reportavit. Fremunt enim hîc omnes, & illi uni imputant direptam bibliothecam; quanquam ultimus accesserit ad depopulandum agrum tam fertilem, cum reliqui praedando jam fatigati essent; nec quicquam abstulerit praeter spicilegia, post diligentissimam Gallorum messem. *Langermannus* toto, quo hîc haesit, tempore, subirator mihi fuit: quod & se & alios literatos non eo esse loco in aula videret, quo futuros sibi promiserat. Qua in re nullam tamen culpam meam agnosco. Domina certe nusquam conveni, quin ferve illam & accurate commendarem, neglectis meis fortunis. In eo peccavit, quod rogatus, ut in Hispaniam excurreret sub adventum in has oras suum, ad perlustrandas regni illius bibliothecas, demandatam provinciam non solum deprecatus sit, quo nihil deliquisset,

T t 3 sed

sed recusaverit satis prae fracte & rustice. Nuper etiam abeunti Dominae & petenti, ut sibi operam suam porro addiceret, addicturum se negavit. Interim canonicatum Hamburgensem pro sororis marito obtinuit, & pro se locum, qui primus esset vacaturus, inter Assessores Vismarienses, etsi de Hamburgensi canonicatu rem dubiam esse adfirmet. Mihi autem cum non nesciat prorsus periisse longioris servitii tempora, tamen querelis suis molestus esse non desinit. Sed haec in aurem tibi. Amo enim juvenem egregium ex animo, & amabo semper. Tum suspicor haec parentis impulsu fieri, qui ad rem est aliquanto attentior. De Germanismo res est ridicula. Libere aliquando cum in gentem illam esset jocata, ut est dicax admodum, Domina amico illo nostro praesente, nec ille dicteria haec ejus concoqueret, monui ipsam & rogavi, ne id fieret imposterum. Illa vero post tanto fecit liberius, credo ut male esset auditori suo. Putat enim omnes eo debere esse animo erga patriam suam, quo est ipsa. De Germanismo tamen in dedicatione tua nihil illa apud me, sed apud Vossium. Nec ignoravi, qua auctoritate faceres. In tanto otio Ovidium secundae editioni adornabo hac aestate. De locis apud illum corruptis, qui sunt plurimi, velim subinde mecum agas. Vale.

EPISTOLA CCLXXIII.

NIC. HEINSIUS

J. Fr. Gronovio.

Daventriam.

PLuribus non ita nuper tecum egi, nunc paucis tantum licet. Instat enim atque abitur, qui hasce ad te feret nugas. iis fraudandum te non duxi, Virorum amicissime, quo es erga me meaque affectu. De rerum mearum statu nihil ex *Vossio* nostro intellexisti, intelliges ubi Amstelodamum veneris. Opinor enim non neglecturum te oportunam Augustae conveniendae occasionem. Mihi haerendum hic etiam, dum negotio paterno finis imponatur. Lento sunt ingenio plerique, quibus cum mihi res est. Multi in Senatu Fabii, Maximi pauci. Est tamen Heros ¹ *Bucephalus* unus instar omnium, quem honoris causa nomino. Miros, ut audio, ludos in itinere nostro illa Herois dedit. Doleo tam inconsulte rem geri. Sed quid agas? Suo relinquenda est ingenio. Sapiet aliquando, & ad se redibit, ut spero, utinam ne sero sapiat. Sed haec non sunt hujus loci. *Langermannus* jam in patriam reversus est, Duci Meklenburgico, Principi eximio, quem & tu nosti, operam addicturus creditur. Invitatus ab illo certe fuit sic satis benigniter: commendatitiis abeuntem prosecutus sum. Nos interim avidi expectamus, quid erabundae Isidi sit futurum, quo consilia ejus spectent. Et si arduum non sit conjectare, divinos honores vitam ista desultoria mirum si consequatur. Livius tuus

quo

¹ Credo innui *Oxenstiernam*.

quomodo exceptus sit a patrona sua cupio doceri. Frigebant apud illam hîc literae. Incalescet forsân rursus pulcherrimo ardore promovendae eruditionis. Ubi literas a te accepero, copiosius agam: Vale. Holmiae. CIOIOCLIV. a. d. XIV. Augusti Gregor.

Tomum Ovidii primum editioni novae paravi. Multa observavi de novo, quae primam fugere diligentiam. Epistolas Sabini tres multis locis restitui, ut & Elegiam in Drusi mortem. Probabis fat scio follertiam. Epistola Paridis ad Oenonem locus hic crucem figit, *Visaque post latam jacuit ulta deam.* Nam MSt. defunt, ad quos confugiamus. Ultimum in eadem epistola distichon ita restituendum. *Nunc locus Oenonae est: nunc illam ostende; parabis: Sive meos ignes pellere, sive tuos.* Multa sunt hujus notae: de quibus alibi.

EPISTOLA CCLXXIV.

J. F. R. GRONOVIIUS

Nic. Heinso.

Ignosce quaeso oblivioni meae; accepi epithalamium tuum, & cum ipse mecum, tum postea una cum *Schelio* nostro, pari utriusque admiratione & applausu, legi. Pro loco Glossarii gratias ago. Habui interea eundem, & plura in eandem rem ex Anglia, de quibus, quid sentiam leges in *Addendis*. Nam ille foetus propediem clamari coget *Ilithyiam*. Invenies pag. 636. *Cacterum Torrentiani codicis varietates communicavit mecum Nic. Heinsius, non hac occasione modo, non admonitione perpetua consociatissimae voluntatis cum maxime animo praesens meo, sed etiam quia justissimum dolorem partimur, quando, dum ille in Sueonibus est publice, ego haec meditor, accipimus ambo juxta amaros nuncios, decessisse illi patrem, mihi hospitem incomparabilem, nomen ingens & sanctum, qua patet eruditio; suavitatem carminis, facundia in utroque sermone, rerum divinarum & humanarum scientia, genio & indole scriptorum, elegantia vitae, neminem infra suorum temporum, paucis aequatum: quamvis maturum annis, & omnibus qua munerum, qua honorum, quae ingenio procedunt, emeritis stipendis, felicem in primis, quia claram successionem inclitorum studiorum servavit abeunti domus, lugens intestinum funus pietate: nam orbitas literarum est, nisi tamen heic quoque tristis ei accessit gloria, quod ubi illas, perque illas sese, sideribus intulit, cum sequiore sui parte sepulcro conditas invitus & hoc unum (si qua relictorum Manibus cura) moerens abstulit. Est, opinor, tanti, ut haec otiosus legas, priusquam te copia illorum, quae cognoscere de nostris avebis, obriam. Rempublicam te egregie gessisse gaudeo profecto, & hunc animum tibi gratulor. Sed quid prodest te facere strenue, quum alii tanta peccent. Pudit nos nuper sententiae, cui vir praestantissimus, tibi non alienus, una subscripsit. Nunc multo magis pudet foedissimarum pactionum, quae de praefecturis
 &*

& imperiis instituuntur. Quid juvat nos in sympulo compefcere ambitum, cum vos ultro tantos ei fluctus excitetis in Aegaeo mari? O Veneti, foli fcitis facram effe rempublicam. Sed mihi jam Cynthius aurem vellit & monet deductius canere. Itaque haec foli tibi. Senecam tuum recipies propediem. Abfit enim ut morer Ovidium tuum: nullum meum incommodum mihi tanti eft. Ipfe num illum dare poffim, dubito. Ita tempus eft, & inflare videntur labores mihi per ipfas ferias. Quod teque meque tantorum mendaciorum reos agit, quid dicam? Quis erit finis? Interim nemo tibi plus debet, quam fuffeffor, quippe quae manibus pedibusque laboret, ne quem poeniteat mutationis rerum. Vicofortium ut mea caufa alloquare jam tibi remitto. Aliunde refcivi, quod fcire defiderabam. De veftra auctione quid conftituiftis? Valetudo tua me cruciat. Amabo, da operam, ut eam in folido colloces. Vale, mi Heinfi, & ampliffimum Affinem tuum cum candidiffima fоре meo nomine obfervantiffime faluta. Daventriae xv. Cal. Januarias A. C. cxciclv.

Lipfi libellum, fi diverfus eft quam Leidae aliquoties ediderunt cum tr. de Magistratibus Ro. & nescio quibus aliis, non vidi.

EPISTOLA CCLXXV.

J. F. R. GRONOVIIUS

*Nic. Heinſio.**Holmiam.*

DEum teſtor, Heinſi cariffime, in ſumma laetitia & gratulatione fuiſſe me & Schelium, ubi intelleximus (& ego quidem ab illo primo) tam honeſtam legationem tibi eſſe decretam, & quae proxime peccaverat urbs natalis tibi, ei omnia bona fide condonaſſe. Sed tardioſorem ad ſcribendum, non amicis modo, verum & mihi ipſi, faciunt me aſſiduae recitationes, officia, domeſticae curae. Te tamen, vel dum omnibus aliis ceſſo, eximium habuiſſem, ſi poſt *Voffii* diſceſſum fuiſſet, cui ad te darem. Omnibus enim reſponſi tuis praeter binas: priores erant vetulae, Sextili datae, cum praecipiti Novembri mihi redderentur: poſteriores nuper ad me miſit *Romerus*. Livium noſtrum emiſerunt Elzevirii tribuſtomis, cauſati Notas nimium creviſſe: vendideruntque & diſtraxerunt (adeo contemnor ab illis, poſtquam naſti ſunt, qui illis comparet Commentarios Reales (vidi hominis ipſius chirographo conceptum titulum iſtum) ad Herodotum, cujus ne unam quidem periodum intelligit *Lipſii* & *Heinſii* ſucceſſor) totis tribus menſibus, priuſquam ad me verbum de illo: tum quoque ſacris literis admoniti, pro xxx. quae popoſci, tria mihi exemplaria miſere, quae ſtatim Antverpiam ego. Quae illis fortuna fuerit, juxta tecum ignoro: faxo tamen, ne me ſpes decipiat. Quicquid autem mihi vacui temporis proxime fuit, id occupavit pecunia vetus: quam ubi videbis, ſpero, non mirabere, dum iſta inveſtigamus, non aliorum eſſe nos potuiſſe. Vix
quar-

quarta pars est, quod dedimus antehac, & id omnibus partibus clarius, ornatius, auctius. Jam prima folia habet Lud. Elzevirius, qui suscepit editionem. Respublica nostra sane quam turbata est. Homines, qui gratia unius dudum fuere potentes, postquam regnum suum cessare vident, laborant manibus pedibusque, ut rursus imponant nobis unum, per quem ipsi possint omnia. Eo ut pervenirent, improbissimo ambitu, largitionibus manifestis, & coitione cum duabus civitatibus facta, invadere voluerunt duo honoratissima, & lautissima munera, alterum etiam, priusquam vacuum esset, in sortem mittendo. Restitit pars melior nobilium & haec civitas. Itaque per tumultum dissolutis comitiis, concilio ipsi per se, neque loco, neque tempore justo habito, omnia illa improbe facta confirmaverunt, tanquam plures, & insuper creaverunt Praefectum provinciae Auriacum, & dum ille pupillus est, amitae illius virum. Nos haec pro irritis habemus, & sic discidio prope insanabili separamur. Utinam mittere tibi possem libellum, qui pro hac causa cum maxime prodit! quem quidem eo libentius legeres, quia auctor ejus est amicus noster, quo nemo vivit reipubl. amantior. Tabellarii ordinarii operam sumere non audeo propter sumptum. Servabitur tamen tibi exemplar. In Ovidio gaudeo te pergere. Noli quaeso imitari amicum nostrum, qui postquam malis versibus decuriam comparavit, & scriptum facere coepit, curavit mihi nuper nuntiari, se in barbarorum castra transisse. At ego illum nunquam illis recte excessisse puto. *Hanc tua constituit genitrix.* Apostrophe est ad Tiberium, ut videtur. *Rebus*, quia ipsi Liviae concors cum Augusto matrimonium fuit, quod frustra tentatum fuerat in Scribonia, in aliis. Scis illud, *Ergo ego vos rebus duplices pro nomine sensi.* Quae tu notas, omnia mihi valde placent. In epistola Sabini & mihi pro desperato: *Visaque post latam.* Si pro jacuit reperire verbum aliud potes, sensum reperi. Scribo autem alia: *Ipsaque postlatum... ulta deum.* Martem nempe viro Anchisae posthabitu. Fabulam habet Servius ad II. Aeneid. vers. 650. *Cum inter aequales exultaret Anchises, gloriatus traditur de concubitu Veneris: quod cum Jovi Venus quæstæ esset, emeruit, ut in Anchisem fulmina mitterentur, sed Venus eum cum fulmine posse videret interimi, miserata juvenem, in aliam partem detorsit. Anchises tamen afflatus igne coelesti, semper debilis vixit.* Vide an hinc possis aliquid exsculpere. In eadem lego: *Si levat hoc iras, Item, Nondum tantus eram. Quo me genitore superbum Arguis, hos domino tunc. r. e.* Priamo scil. Nec placet: *Nec cecinit.* Et fortassis etiam: *Hanc cecinit Grajos illa tenere toros.* Illa, Cassandra. Sub finem temeraria forsan est conjectura nostra: *Ipse pater, curam natae male doctus habere.* Tu videbis. Vale, & rempubl. privatamque bene gere. Daventriae. a. d. ix. Kal. Janu. anni venturi cicioclv. quem tibi felicissimum voveo.

EPISTOLA CCLXXVI.

NIC. HEINSIUS

J. F. Gronovio.

Daventriam.

EX mēis, quas anno proxime elapso ad te dedi, Ornatissime & Eximie Vir, quanquam omnes non sunt redditae, apparuisse reor liquido, quae causae me potissimum permoverint, cur post quinquennium commodis Augustae datum, de aliis mihi dominis circumspexerim. Mirum quam illa ab antiquis moribus & indole praecleara defecerit. Stoicam in aula laudari passim Philosophiam, Epicuream in usu esse videres. Theologiae nullum pretium, nisi unius Mezentianae. Cui perditissimae sectae quod aperte obloquerer & adversarer, id herili favore me fraudavit quidem, (ut *Bochartum* paulo ante) Regi tamen Senatuque reddidit ac bono cuique gratissimum. Adeo ut res meae nunquam magis floruisse viderentur, quam post discessum ejus. Accedebat favor obvisummi Viri *Axellii Oxenstiernae*, in integrum a Rege restituti, qui quod difficillimis temporibus addictum me sibi magnā constantiā esset expertus, cum primae etiam necessitudines domum ejus vitarent, vix credas quibus laudibus hanc fidem apud me aliosque profecutus sit, ac praedicarit paulo ante quam in fatalem morbum incideret. Eo e vivis sublato in successore dignitatis paternae filio natu minore, quo familiariter jampridem sum usus, plurimum mihi praesidii erat, sed contemplatus magnas compilati indignis modis aerarii angustias, & nescio quomodo alieniores a gente nostra nuper factos Suecorum animos, melius me mihi consulturum sum arbitratus, si invitantes ultro ad id munus, quo nunc fungor, cognatos ac amicos audirem. Qui, quod ex meo didicissent responso, non fore ut recusarem Prolegati in hac aula provinciam, si a Patribus demandaretur, re in Senatu Hollandico proposita, effecerunt non modo, ut suffragiis omnium conspirantibus voto illic potirer, verum etiam ut Senatus ipse reliquis sex provinciis me fervide commendaret. Denique tanto impetu res confecta est, eaque celeritate, ut pene citius sibi consecutus quod volebam, quam candidatum esse me scirem. Soli Ze-landi & Frisones nonnihil obluetati sunt, idque pro more suo, ut sibi solis sapiant. Ita factum est, ut pro tempore delata sit dignitas, quam perennem ac perpetuam quinque provinciae mihi destinarent: addita tamen spe prorogandi ad vitam muneris. Hera autem, postquam animadvertit dominos non longe mihi quaerendos fuisse, (nam quod in aere meo esset, salutem a se solā meam pendere habuerat perperam persuasum) nunc & honorifice de me loquitur, & suum esse vellet, ut ex aula ejus amici duo nunciant. Sed hoc frustra. Spem praeterea facit mox fore, ut debitum expungatur. Quare iidem amici hortantur, ut illi blandiar per literas, & frequentius scribam impofterum, quod

semel

semel tantum a me factum est, ex quo hinc discessit, & quidem libere ac contumeliose satis, cum exprobarim pluris cytharoedos ac histriones ab illa fieri, quam homines literatos, in iis locupletandis dum exercetur, hos inopiae obiectos esse & plorare iussos. Etsi autem tredecim florenorum nostratium milia mihi etiamnum debeantur, eos tamen ut consequar, nulla contendam parasitandi arte. Amicus noster floret apud illum gratia, hinc plerisque inuisus est, quod illius, *Alastorisque* & Archiatri operâ heram periisse constans sit opinio. Nec de reliquis duobus dissentio. Tertium propugno ac defendo quantum possum, nullo tamen aut tenui admodum cum successu. Mezentiis tamen vellem paulo liberius se opposuisset. Sed de his omnibus coram aliquando confabulabimur. Audio enim senem nostrum in extremis esse, qui si supremum claudet diem, erit mihi ad meos excurrendum. Apud vos turbari doleo. Scriptum, quod polliceris, videbo. Sum enim & ego factus animal politicum: & quoties de publicis rebus in aula dissertandum est (quas tamen si dixerò parum a me intelligi, facile mihi accedes, sat scio) magna audior attentione, tanquam Solon aliquis aut Lycurgus. Nec quicquam mihi deest praefer confidentiam, quo minus πολιτικώτατος credar, & artes omnes patricias in numero habere. Ovidianos ex Reginae bibliotheca codices amicus noster sperare jubet, eos ubi nactus ero, & simul otium, supremam lucubrationibus imponam manum. Epithalamium Duci Mecklenburgico scripsi nuper trecentorum versuum, fuit enim arcta mihi apud Italos cum illo necessitudo, & studiis poeticeis non delectatur solummodo, sed ipse versus linguâ vernacula scribit elegantes. Ipsum carmen ut videas operam dabo. Agnosces tenues reliquias veterum elegantiarum. Ad epistolas Sabini habes hinc nonnulla, de quibus sententiam tuam anxie imploro. Conjecturas ad minimum viginti te probaturum auguror, quas ipse minus aestimo, hoc signo in margine notavi. Mirus fuit stupor meus, qui non viderim, quid sibi vellet, τὸ *Constituit rebus*. Vale, & si me amas, scribe frequentius. Schelio salutem. Holmiae. Nonis Febr. CIOIOCLV.

Has jam exararam, cum Schelii nostri libellum accipio Herois Beuningii operâ. De ipso scripto plura proxime.

1 Legitur lib. 11. Silvarum pag. 156.

EPISTOLA CCLXXVII.

NIC. HEINSIUS

J. Fr. Gronovio.

Daventriam.

Vide quam sim factus barbarus, ex quo negotiosus esse coepi. Parum abest, quin precer pessime elegantissimis tuis studiis; quibus tam pertinaciter tamque mordicus adhaeres dies totos, ut mei tuique ac officiorum paene

omnium obliviscaris. Patrem optimum scis amisisse me, mi Gronovi. Justissimo huic dolori adhibenda erant a te solatia, si a quoquam adhibenda: cum isthic terrarum sit nemo, quem prae te amandum ac colendum mihi proponam. Tu vero, amicorum jucundissime, cum blattis tineisque strenuus fortasse rem geris, & cum larvis effoetae vetustatis luctaris, dum alii, quos modicae necessitudinis usus mihi conjungit, officia tua tuasque partes incongerendis solatiis non expectati occupant. Quantillae foret molestiae curas istas ad breve tempus abrumpi, & haberi procul, ne amicus amico deesses! Invitus, si te novi, audies, quod subjungam, cum tamen sit verissimum. Quae ultro citroque quondam commeabant non frequentes tantum, sed propemodum assiduae epistolae, adeo lente nunc procedunt, ut anno toto vix duae aut tres a te mihi exhibeantur. Illas quoque sine jurgiis convitiisque vix impetro. Pleraeque certe ex iis, quas postremas a te accepi, diuturnum istud silentium aut excusant aut deprecantur; & cum agnoscant culpam, nihilominus haud corrigunt. Cur enim frequentia & assiduitate literarum officium explere non mavis, quam frivolis ac longe quaerendis excusationibus? Si locorum intervallo, quibus sejungimur, frigus affundunt pristinae consuetudini, da quaeso ex antiquis illis sapientibus (quorum omnium praecepta in numero habes, quosque penitus concoctos in succum ac sanguinem, quod ajunt, vertisti tantus vetustatis helluo) da, inquam, ex illis nonneminem, a quo edoctus sis absentes amicos esse negligendos. Fateor parum utilem minimeque fructuosam jure optimo tibi habendam meam amicitiam: nec aspernaberis tamen, si antiquam meminisses. Patere enim, ut veteratorie me tibi commendem, quando digne non possum homo veterum urbanitatum transfuga ac desertor. An plus lucelli ad te redundat ex supputata per lucubrationes continuas priscae monetae ratione? Laudem, inquis, & gloriam istis conatibus consequor, praeclaram omnino mercedem. Non nego. Recorderis tamen velim amicitiae constantibus & sua praesto esse ac fuisse semper praemia. Ago tecum ex lege ac privilegio temporis, cum nulla in te merita mea armare possim, quibus amorem debeas. Puerum olim dilexisti, mox & adolescentem & juvenem. Nunc virum ferme factum cur fastidis? Si necessitudini te subtrahis, necessitati non potes, quam continuatus tanto tempore benevolentiae alternae usus tibi praescribit, utcunque detrectes jugum. Sed dum in hanc aream liberius excurro, parum abest, quin exciderit injecta modo mortis paternae mentio, cui potissimum hanc epistolam destinaram. Illi parentandum esse si non intelligis, haud profecto capis quid te deceat. Quod sponte praestiterunt alii, etiam ignoti, tu familiaris & victor noster, quo tandem colore denegabis rogatus? Latus profecto amplissimusque aperitur campus, quo ingenium exeras ac ostentes, seu ligata malis oratione, seu soluta. Absit enim ut fibulam imponam, aut praescribam terminum tuae facundiae: dum ne obliviscaris, quid pietati dandum sit. Nec mea magis interest, ut vir, in vita laudatissimus, laudetur mortuus, quam tuâ, tuique similium, ne Galli ac Itali & gentes reliquae falso persuadeantur, cum illo litteras atque eruditionem apud nos interisse. Mox quippe colligam, fed

sed magno cum delectu, & publicabo quicquid ejus exequiis erit datum. Audio Leidenfes non defuiffe officio; fed ne operofe fint nugati metus eft. Si per Patres licebit, ad vos Julio aut Augufto mense excurram: ut res familiares curentur. Rex enim expeditionem in Polonos parat, Boruffiam, ut ferunt, invafurus. Quam oportunitatem elabi mihi non patiar. Si *Malingkrodi* aut *Rottendorffium* conveniendos Monafterii a me fore fperaret, per *Westfaliam* iter inftituereim, bibliothecam utriufque excuffurus, tum *Helmftadienfe* quoque ac *Ducis Lunaeburgici* illam celeberrimam. *Langermanno* nro nuper impetravi a Rege, ut emolumentis Canonicalibus poft hac fruatur non minus ac Capitulares reliqui, qui prae fracte illum hactenus excludunt hifce redditibus. Ad Ovidium rarus devertio. Loca tamen tria vel quatuor ecce, quam levioris illa momenti, quae nuper fanabam. Vale, mi Gronovi. Dabam *Holmiae*. Anno *MDCLV. a. d. xx. April. Julian. Graevius* ubi quaefo eft? Scripfi ad illum copiofe ante menses tres quatuorve: nec refpondet. Saluatim quaedam delibabam nuper in tuo Statio, nec fine fructu, fed quae corripgebam pleraque typographi errata effe fufpicio, non enim ulla mihi ad manum editio, praeter tuam illam, in quam operis typographicis non parum licuiffe animadverto. Mari hinc non nemo ad vos proficifcitur: jam que in procinctu eft. Illi epithalamium tradidi nuptiis ducis *Mecklenburgici* a me datum, ut ad te perveniret. Judicium de eo tuum, aut potius cenfuram, expecto. Humile dicendi genus felegi, quod *Hymenacum* inter cothurnatos Deos non effe numerandum fcirem. Ducem ipfum poëfos ftudiofum effe & literatum nofti, fed & uxor literas latinas eft docta. Hoc nescire te nolui, ne mentitum me crederes aut adulatum. Vale. pag. x. Epithalamii bis *Uranie* pro *Calliope* reponendum, qui lapfus eft memoriae.

† Addita erant huic & praecedenti epiftolae, quaedam in Ovidium, fed cum omnia in notas fnt relata, hic omittre vifum.

EPISTOLA CCLXXVIII.

J. F. R. GRONOVIVS.

*Nic. Heinfio.**Holmiam.*

Usjurandum arbitrato tuo dabo, Heinfii cariffime, non effe illam fientii mei caufam, quam diferta, fed invidiofa oratione fingis. Ego ne faftidiam, cui neminem mortalem ingenio, eruditione, virtute, moribus, comparem? neminem, cujus gratiam minus negleam, aut velim pro animo meo, aut pro meritis vel tuis vel tuorum debeam? Legitima immo eximunt mihi totos dies: quod fubfecivi eft, non falfo coniecifti fubfecivorum. (hunc indicem feci) pecuniae veteris vindicare curam. Non quod lucellum, quid enim fperem, poftquam mihi *Livius* decoxit? fed nec gloriam, qui numerare poffim, immo

V. v. 3

annu-

annulo inscribere, qui chartas istas lecturi & intellecturi sunt. Quid ergo est? tantum ut culpa caream, nec vanus in eum campum prodierim. Et crescit haec anxietas, quo propius est, cum nec bonis addere, nec ambigua corrigere licebit, quin derisorem nasum habeam testem. Quid ego tibi narrem, quanto sit opus tempore, dum de singulis quaestionibus omnes & omnium auctores consulo & expendo? dum in tumultum tantum tamque varium mentem mitto, meditor, concipio, enitor quid verius, potius? dum saepe multorum dierum transacta una suborta dubitatio retexit & irrita reddit? dum quod placuit, ita scribitur, ut spes sit posse & a mediocribus intelligi, & doctis placere? dum tot infinitae supputationes vel fiunt vel dispunguntur? in quibus quanto gravius offendisse *Scaligerum*, *Salmasium*, *Snellium*, alios, deprehendi, tanto mihi magis ipse diffido, & omnem festinationem excludo. Quid cum revocor ad illa, quae pro conclamatis extra curam posueram. Ter aut quater deposui, quasi exhausta omni materia, cui aliquid in me opis. Mox tenui principio, & oboriente scintilla lucis, ubi spissas antea tenebras acie nulla perfringere potueram, illectus, renovato impetu quasi novam exorsus telam, integra capita adjeci, alia tota retractavi, quaedam magnis supplementis firmavi. Nuper in Hollandiam excurreram syngraphae gratia, & quia cum novis spoliis redierat Francisci nepos. In eo itinere incidi in Onuphrii & Gassendi abacos veterem nummum cum vernaculo comparantes, quos adhuc nunquam videram, nec sciebam existare. Aggressus autem sum rem forte invidiosam, sed utilem, nec invidiosam, quia modeste & ratione ago: quia tot diversae exstant doctorum hominum aestimationes, ostendi quid in *Aldo*, *Sardo*, *Ciacconio*, *Agricola*, *Savilio*, *Snellio*, *Meursio*, *Salmasio*, aliis desiderem. Tanta nomina commode praetermitti non videbantur, & de posteriore urgebat *Chanutius*, apud quem primum librum vidi, qui etiam commodabat excerptum. Haec contentio totos quatuordecim dies domum reducem attinuit, & coniecit in eas disputationes, quas adhuc tanquam inexplicabiles vitaveram. Vix hos dimisi, cum, quia medio tempore aliud agenti apparuerat via enodandi loci difficillimi apud Heronem Alexandrinum, citati & depositi a *Scaligero*, is me totum ad se traxit, nec integra hebdomada, quamvis semper ante oculos tuae versarentur literae, aliam cogitationem me admittere sivit. Erant enim haec circa illam partem, quam quotidie praela expectant, ut nullus esset differendi locus. Jam in istis me operae pretium puto consecutum; at interea decem aliis observationibus mens gravis laborat, quam aegre sustineo, ut hanc tibi operam dem diu debitam. Et quot aliis me lentius etiam nomen esse censes? Sed haec paullo longius etiam eo, ut videas quam parum nunc sufficiam argumento illi, quod mihi iustissime imperas. Scis querelam Ciceronis, interpretationem juris dicendi cogitationem auferre. Multo magis istae tot molestae minutiae. Fateor tamen me debere, si cuiquam mortalium, & faciam quod potero, ut primum his curis, quibus nunc turgeo & urgeor, me exoneravero. Haec me verior causa incitabit, quam illa, ne Galli ac Itali &c. Quid enim illi falso persuadeantur, quo nullum est evidentius verum: Εἴρη τοῦ καλὰ,

καλὰ, mihi Heinſii: literæ ab ſtirpē interierunt: nec duo vel tres ſuperſunt, qui mediocriter de doctrina eleganti iudicent: nec id quiſquam magis, quam tu atque ego experimur. Cur tua poëmata, qui ſolus hodie verſus facis, illic, ubi tota theatra affurgere tibi & plaudere debebant, frigus ſentiunt, ut nuper ipſe querebare? Nam ego in ſolitudine relictus mihi viderer, niſi identidem ad me deferretur, ut deridear, quaſi ſtudiis & quocumque ingenio male uſus, & criticus, ut ſtolide amans veteres, & obtreſcator hodiernorum ingeniorum, quia in iſtis facilius correctiunculas inveniam, ut moleſte ſcribens (quod utrumque ſcis communem noſtrum & debitori tuæ & deceſſori, ubi nunc es, inculcaſſe, & illi ad omnem mentionem mei iterant) ut ſcribere neſcius, quæ verba meministi inimico ſuo de me tribuere Pontiaë illuſorem: ſed ipſius hic erat ſenſus, ut ex certis poſtea auctoribus didici. Cui non inter hæc omnes ſubſidant pennæ? Proſecto quod ſcribo, more potius vel morbo facio, quod non poſſim nihil agere, quam ſpe ulla commodorum aut honorum. Et poſteris forte in melius mutatis profuerimus. Nunc ſolus me *Schellius* novit hîc, ſed pejus, quod & ſolus ego illum. Hæc res ſanctiſſimum funus tuum maxime facit lugubre, & in lugendo præcipue commemorari debet: tantum abeſt, ut diſſimulanda ſit. Cæterum tibi cum ipſi omnia conſolationum genera in promptu ſint, unum (quod forte modeſtia tua tibi occurrere non permiſit) adhibebo, ut cogites te talem ab illo factum & relictum eſſe. Hoc & ipſi naturæ neceſſitatem feciſſe leviorem certum habeo, & tuæ pietati moderatiorem præcipere luctum exiſtimo. Uterque ex altero percepisti humano voto maiora gaudia: uterque officiis & patres & filios omnes noſtræ ætatis ſuperaviſti, inter vos paria feciſti. Ille magnitudinis ſuæ unicam imaginem in te transfudit: tu, qualia nemo, *Σπερτήρεα* ei perſolvisti. Cur doleas in breve tempus (breve voco, quamvis longiſſimum vitæ mortalis ſpatium, quod tibi & ominor & precor) te diſjungi ab illo, cui ſemper lætitiæ fuiſti? cur manes illius inquietes? Quæ ad, Ovidium & Statium notas, quantum conſiderare potui, omnia mihi vehementer placent. Niſi quod in tertia ep. Sabini non muto: *Omnia vera vides: ſuperant mea vulnera tantum, Utque tuam ſupplex*. Intelligit enim, vulnus, quo Paris periit, dum moratur Oenone, quæ ſola id poterat ſanare: de eo etiam ceciniffe ſignificat Caſſandram. Scis fabulam. Nec *dubium* Oeten concoquere poſſum, ſi vel omnes MSti. haberent. At non habent. Graeciſ ſemper Οἶτη, non Οἶτης. Vellem, hanc poſſes opinionem mutare. *Rottendorſium* invenies Monasterii, non item *Mallingrodium*, cui aqua & igni Episcopus interdixit. Epithalamium tuum videbo libens, ut vidi etiam, quo Regi gratulatus es. Elzevirii tandem mihi conceſſerunt exemplaria Livii, ex quibus unum tibi ſervatur, & tradetur, ſi ea via uteris, ut ſpero, hoſpiti. *Schellius* noſter eſt in ſuis prædiis: quoties adeſt, vix ullus noſter ſine te, & te dignus, ſermo. *Graevium* monui, ut ad te ſcriberet. Bonam mihi operam præſtat in corrigendo libro meo, cujus tredecim folia excuſa habeo: ad XL. ſient. Vale, decus meum. Daventriae. XIII. Kal. Apr. Jul. CIOICLV.

Licet.

Licetne ridere. Scribis alicubi nunc virum ferme factum. Omitte *ferme*. Audiimus & fama fuit. Novimus & quae te.

EPISTOLA CCLXXIX:
NIC. HEINSIUS

J. Fr. Gronovio.

Daventriam.

Mirabar quid tam pertinaciter, Mi Gronovi, & quidem tanto tempore, qui Pythagoream sectam nunquam antea apud me professus esses; cum ecce hesterno tandem die elegantes ac luculentae a te comparuerunt, quibus motos fluctus indignationis meae facile sedasti. Nam quod veteris pecuniae supputationes te exercent, fuda quantum voles in hac palaestra, dum nos etiam aliquo apud te numero simus, quorum explorato erga te tuosque adfectui non potes derogare pretium atque auctoritatem, tanquam annosae rei. Multa interim erudita ac haecenus ignorata a te expectamus in hoc argumento. Si adessem, poteram fortassis auctores nonnullos suppeditasse, quos necdum videris. *Salvotum* tamen scriptorem Gallum esse tibi ad manus opinor. Tu quaeso verbis vel tribus doce, quando lucubrationes istae sint nobis expectandae, de meo enim ad vos excursu pergunt esse incerta omnia, quod nihil possim sine consensu Patrum, atque illi preces meas haecenus excludunt. Narro enim tibi incidisse me in tempestatem ac procellam nupera illâ Bremensi longe atrocior. Nam per Polonorum latus Balthici maris imperium non clandestinis artibus, sed palam atque aperte petitur a Succis. Nostri homines id expedire nequaquam rebus suis existimant, nec imprudenter id sane aut praeter ordinem. Jamque rumor per aulam differtur, opem laturos Dantiscanis nostros, coque nomine classem conscribi validissimam. Tu nunc cogita, quibus ego hîc jurgiis ac simultaibus sim objectus, quas tamen non minus fortiter concoquo, quam alapas solent parafiti. Quod unum enim poteram, partes boni civis mihi ipsi demandavi, animusque ut ad preces, pretiumque ac minas invictus & inconcussus esset, operam diligenter dedi, caetera Fortunae crediturus. Utrique parti ut satisfaciam, ac prober, non est mearum virium. Proxime praeterea me spectant eorum commoda, qui me suum esse voluerunt nuper, quibusque servio. Hoc institutum cum sine laude Senatus universi publicâ ac gratiarum honorifica actione non abierit, me totum sibi posthac vindicabit, stimulosque addet, ne a me ipso degenerem. Fremunt tempestive patuisse consilia sua, ejusque rei invidiam in meum praecipue caput convertunt, ut male mihi omnino sit sperandum de tot aureorum millibus, quae deberi etiamnum nobis haud ignoras. Vide quantus artifex perierim. Sed de his tutius coram tecum confabulabor aliquando. Rex post dies paucos in Germaniam discedet. Ego secuturus sim castra, an, quod malim, reditu-

rus

rus domum, non liquet. Nihil certe non agam, ut adsum sub id tempus, quo parentis bibliotheca distrahetur. Quod placere tibi scribis omnia, quae ad Statium & Ovidium notavi, id vero mihi non placet. Nam si curate ea perpendisses, invenisses haud dubie nonnulla, quae jure optimo possent carpi. Minus liberaliter posthac proponam meas tibi emendationes. Nunc unam habe in tuo Statio, sed minime certam. Pag. 368. Gustuum tuorum ais, illum versum Epithalamio Stellae, *Prendisti portus, tumidae sic transfuga. Piscae*, videri corruptum, & recte quidem: quid enim sibi vult *Pisa* illa *tumida*? Testaris praeterea in Veterum uno pro *tumidae* legi, *miadae*, in altero *intiade*, prima syllaba in *tumidae* repetita est ex superioris vocis ultima, scriptum enim fuit, *Prendisti portum tum liado sic transfuga*, prima quoque litera in *miadae* perperam ex superiori voce adhaesit, nam in *intiade*, *m* in *in* degeneravit, ex *tiade* fac *liado*, vel *liadi* & apparebit primam literam propter elisionem excidisse, postremam propter vocis sequentis primam. Scripsit igitur, nisi fallor, Statius,

Prendisti portum. Eliados (vel Eliadis) sic transfuga Piscae &c. Eliadas equas dixit pari modo Virgilius. Rogavi amicum per literas, ut Vaticanos codices hoc loco consulat. Illustrandus enim est locus Ovidianis in Notis. Sylvas quidem Statianas cum tribus quatuorve Vaticanis libris *Langermannus* noster contulerat, sed schedae illae naufragio perierunt, cum meis illiusque aliis lucubrationibus. Pluribus garrirem nunc tecum, nisi essem longe occupatissimus. Orationem funebrem, qua parenti meo est parentatum, accepi hesterno die. Tu illic *Franciscus* nominaris. Sed & alii sunt errores. Laudo interim adfectum hominis minime mali. Nobiliss. *Schelium* in oculis fero assidue. Nihil enim eo viro amabilius, consummatiusque. Tu Vale, mi Gronovi, & inconditae huic scriptioni ignosce. Dabam Holmiae. CXCICLV. a. d. iv. Eid. Quinctil.

Epithalamium meum jam pridem tibi redditum est, ut spero. Jam enim intellexi eum, cui id ferendum dederam, advenisse sospitem in Hollandiam.

I Ant. Thyssi.

EPISTOLA CCLXXX.

NIC. HEINSIUS

J. Fr. Gronovio.

Daventriam.

Ulysses ille, post captum Ilium non erravit, credo, magis quam ego, ex quo ante hos tres menses e Sueciâ sum profectus. Dantiam petebam navi; atrocissimâ diu exagitatus tempestate in portum vix tandem Dantiscanum sum conjectus, & quidem aeger, Vir Clarissime; cum nihil praeter naufragium, & mortem certissimam mihi proposuissem. Nihil enim saevius, nihil pertinacius istis procellis, quae per dies octo con-

Tom. III.

XX

conti-

tinuos nos exercuerunt. Jam quassa & rimarum plena navis fatifcebat violento commotorum fluctuum impulsu. Jam navales socii aquae egerendae detrectabant onus diuturnum, quos & potus defecerat, vasis doliisque omnibus, quae cerevisiam & aquam victui destinatae continebant, inquietâ navis agitatione collisis ac contractis. Accedebat & aliud incommodum febris, quae navarchum primo, mox me, deinde complures alios ex vectoribus invaserat. Nunc littus Danicum nobis ante oculos, nunc Livonicum, Suecicum nunc denuo, aut Pomeranicum, ita crebro nostra relegamus vestigia, donec Dantiscanus, ut dixi, portus omni periculo nos exemit. Hic per dies triginta & sex decubui, nec solus tamen, sed quinque mecum alii ex vectorum numero. Officia *Fabricii* nostri singularia prorsus fuerunt. Nam & quotidianus me accessit, & illi deberi existimo, quod civitatis magistratus inusitata comitate me sit prosecutus. Confirmatis utcumque viribus denuo in navem me conjeci, qua Lubecam Dantisco deferrer, nec felicius id, quam ante. Tractum enim fuit iter in undecimum diem per procellas & ventos adversos. Ita factum, ut invalidus domum sim reversus, nec celsissimo haecenus Senatui me sistere potuerim, a quo in aulam Brandenburgicam destinari dicor, aucto & stipendio & titulo nuperae dignitatis. Sed haec etiamnum incerta, de quibus coram melius agetur. *Vossius* enim atque ego conspectum tuum valde desideramus. Quapropter vide, an res tuae ferant, ut huc excurras. Mihi quidem hicce in terris mora longa vix concedetur, nisi valetudo intercedat, quod non lim. Senecam Tragicum cum Mediceo codice a me collatum, si tecum tuleris, valde me demereberis. Opinor enim jam usum te eo satis. Epithalamium meum nuptiis Mecklenburgicis dedicatum an acceperis nescio. Nobilissimus *Schelius* quid agit? quid Sestertiis tuis fit? Romae ad sepulchrale C. Cestii monumentum columna nuper est eruta cum egregia inscriptione, quae penes me descripta extat. Vale, Vir eximie. Dabam Hagae Com. Anno MDCCCLV. a. d. XXVIII. Octobr. Gregorian. Meursium de unere & puerperio mihi a te emtum expecto.

EPISTOLA CCLXXXI.

J. F. R. GRONOVIIUS

*Nic. Heinsio.**Hagam.*

Felices & rei votorum sumus Heinsi dulcissime, quum te tot periculis & naufragii & valetudinis perfunctum patria incolumem recepit. Itaque ardeo ingenti desiderio te videndi, tenendi, audiendi narrantem per partes, quae compendio persultat tua gratissima epistola. Praesertim cum ad sit illic auris tertia non timenda, illius dico, qui post deos spretos deasque, post homines sanos feriosque pulsos, ultimus piorum, credo, isti cubiculo excessit, ne quid cum Scy-

Scythide nisi barbarum & mimitum vagaretur. Sed fumus in medio cursu recitationum, quas interrompere & mihi & adventoribus valde foret incommodum: & quod maximum est, puerperam domi habeo septimo foetu soluto ante paucos dies salvam quidem, sed etiam languentem, quae me tam suspecto tempore nusquam ex oculis amittit. Meursii de F. & P. hîc habes. Senecam tuum coepi quidem cum annotatis meis conferre: sed post occurrentibus aliis negotiis, & quod brevi sperabam indies me istius operae totum fore, intermisi. Itaque paullum etiam sustinebis. De Sestertiis quod me appellas, bonum nomen sum. Nec illos tibi, sed & denarios & flavos dominos, & aeris varietatem, sed & ficlos & obolos & drachmas cum minis & talentis, sed & solidos milliarense, folles ita tibi aestimatos dabo, ut si quid istis exigendum habeas, in posterum ad Quaestores tibi recurrendum non sit. Quin & solidum habebis aureum argenteumque cum sui denariis Clodovaei & veterum Francorum, nemini quod sciam, etiam intellectum: non certe *Scaligero*, non *Frehero*, *Lindenbrogio*, *Rualdo*, *Gassendo*: ubi simul nosces descriptionem librae secundum Francos, & originem pecuniae, qua hodie tum nos, tum vicini utuntur: quid sterlingus, quid libra esterlingorum, quid marca medii aevi, unde viginti stufferi librae nomen acceperint: non pauca alia (haec ita apud te) quae tu nec a me, nec a quoquam, οἷον ὅντων ὅποια εἰσιν, expectaris. Senecam Ph. Elzevirii coeperunt praelis reddere. Videbis notas, & meo non parvo & Rubenii egregio additamento auctiores. *Schelius* in hac urbe est, & una cum nostris proceribus republ. egregie suffulcit, quam mali cives pessum dare pugnant, te vero fert in oculis. Habes hîc & alia, quae debebam tibi, mea persona, quam tua digniora, quae boni consulas velim. Vale, decus nostrum, & me ama. Davent. III. Kal. Novemb. CIOIOCLV.

Ampliss. Affinem tuum cum uxore lectiss. & omni domo saluto. Si incidet in D. *Vicofortium*, rogo, admoneas illum mearum, quibus inclusae fuerunt aliae meae ad D. *Chanutum*. Inclusas rogo, ut diligenter cures, agitur enim res magna mea. G. *Vossius* de Vit. Serm. in *Sterlingus*, jubet adiri eruditos *Watsii* labores, seu Glossarium ad Matt. Parisiensem. Eum librum si habes, ut puto, vel in tua, vel Affinis, vel hereditaria bibliotheca, cura mihi quaeso describi, quicquid illic habetur de *Sterlingo*. Etsi enim sero sit, & jam mea impressa, cupio tamen scire, quid ille notaverit.

EPISTOLA CCLXXXII.

NIC. HEINSIUS.

J. Fr. Gronovio.

Daventriam.

EX quo postremas ad te dedi, quae reditum in patriam meum nunciabant, Amicissime Vir, in recidivam incidi. Febris ipsa, postquam per dies com-

plures gnaviter me exercuit, nunc continuam mentita, nunc tertianam duplicem, in quartanam degeneravit tandem. Vides lentum valetudinis restituendae fore negotium. Haec causa est, cur missas faciam cogitationes de legatione Brandenburgicâ, cui me nihil minus expectantem destinarent Ordines Hollandiae. Eorum enim nomine unus in aulam illam brevi contendet Orator, alter alterius provinciae nomine: duo nimirum sunt mittendi. Tres praeterea ad Suecorum Regem, in Daniam totidem. Etiam in Hispaniam legatio paratur. Mihi interim ignavissimus morbus aut lecto corpusculum affigit, aut cubiculo. Pro solatio tamen est, adeo placuisse patribus nostris meas in Suecia molitiones (ubi provinciam duram omnino ac difficilem feliciter sustinui contentiosis hisce temporibus, homo negotiorum publicorum rudis atque inexpertus) adeo, inquam, placuisse Patribus molitiones meas nuperas est pro solatio, ut omni procul ambitu ultro dignum me nunc judicent, cui majora credantur. Sed de his coram. Spero enim te feriis proximis nobis adfuturum. Feceris certe rem mihi longe gratissimam, etiam *Vossio* nostro. Commitem si adducas Senecam Tragicum, quem utendum olim a me accepisti, multum te amavero. Eo enim mihi nunc est opus: quod in Italiâ satis diligenter editione istâ sum usus, plurimosque inde locos in margine Ovidii mei annotarim, adscriptâ tantum paginâ, quam consultam vellem ad illustrandum ipsum Ovidium, ut fieri a me solet. Quod si mihi Notas in Ovidium meas mox adornaturo desit ista Senecae editio, valde aestuandum erit ac sudandum, ut alibi inveniam, quod hîc sine molestia offerretur. Pro Meursii libello satisfaciam, ubi veneris. *Viquefortium* videre non possum, cum domo haud procedam. *Chanutus* jam discessit hinc in Gallias. Ad *Grafwinckelium* quas commisi curandas, recte curatae sunt. Quaerebam nuper an Epithalamium meum accepisses, hunc nodum non solvis. Pro Livio & Observationibus plurimum tibi debeo. De Sestertiis commentarium quando videbimus? Hoc enim Itali certatim ac Galli ex me sciscitantur frustra. Heroïna nostra, quam suaviter nugata sit Oeniponti, jam intellexisti. Sed nihil praeter ineptias illa jampridem machinata est. Vale. Dabam Hagae Comitum die. xxx. Novemb. cldccclv.

Nescio an videris postumum Lipsii Libellum de Re numariâ, editum in Italiâ.

EPISTOLA CCLXXXIII.

J. F. R. GRONOVII

*Nic. Heinsio.**Hagam.*

Pande sinum, ut accipias divitias, non illas translaticias & vagas, quas tibi mihi que abjuravit, ¹ quae debebat; sed perpetuas & innoxias, quarum & tu, fi

² *Christina Augusta*, Sueciae Regina.

si velis, avidus, & ego, modo possim, prodigus erimus sine crimine. Quae tractantur dextra, non aere, sed chartis gravi, digitis non collybo, sed forte sepiâ decoloratis, non in avaritiae solatium, sed ad ingenii cultum. Veniunt autem ad te magnam partem rudes & indigestae, quod necesse fuit accideremagis hauriendae venae, quam repurgandae balucis studio, & copia aciem intentionis in singula abrumpente. Cur tamen non hoc quoque nomine tibi sint gratiores, quum non tantum spectaculo & voluptati erunt, sed etiam solertiam tuam invocabunt, dabuntque quod purges & polias, quod callidius & subtilius distinguas, quod peritiori manu administres. Vale, vir nobilissime & me ama. Daventriae. Idib. Febr. CIOIOCLVI.

EPISTOLA CCLXXXIV.

NIC. HEINSIUS

*J. Fr. Gronovio.**Daventriam.*

Vide quo me socordiae redegerit adversa valetudo, clarissime ac summe Vir. Irascebar tibi jampridem, sed quatenus amantes irascuntur, quod literarum tuarum jucundissimo conspectu me fraudares in ultimo Septentrione viventem. Hoc, inquam, homini curis assiduis gravissimisque occupationibus distracto indulgere vix poteram. Nunc vero pari culpa coepi esse obnoxius, ex quo geminis tuis nihil repono praeter silentium. Tu autem hoc mihi credas unice velim, occupationes partim, partim morbum in causa esse, quominus responsionis officio apud te sim functus. Nam quas ultimas ad me dedisti, eae mihi sunt redditae, dum rebus domesticis componendis apud Leidenfes incumbō, idque ante paucos demum dies, una cum praeclaro Veteris Pecuniae munere. Caeterum cum spem certam *Graevius* faciat mox fore, ut nobis adsis, quae in finem tuum effundenda habeo non pauca, in congressum nostrum differam. De libro vero tuo quid sentiam non possum, quin paucis tecum communicem. Cum enim tua omnia magni fecerim semper, ac vehementer sim admiratus, hoc tamen scripto quid possis in re antiquariâ liquido mihi visus es ostendisse. Tantum quippe reconditae ac diffusae eruditionis hoc in argumento illustrando contulisti, ut os quorundam calumniis obstruxeris, qui nihil posse te procudere praeter jejunas ac breves observatiunculas argutabantur. Nunc illi ipsi eruditionis tuae campum spatiis latissimis patere stupent & fatentur. Librum, quantus est, integrum jam perlegi semel, mox perlegendum denuo, idque majori cum attentione. Parentis mei mentionem illic fieri honorificam, ut vidi, valde sum lactatus. Ignosce, quaeso, honestae ambitioni. Pro hac pietate quantum tibi debeam aliquando intelliges, ut auguror. In auctione paternae bibliothecae non potui tuis commodis studere sic, ut volebam, quod libri plerique immenso pretio venierint. Ita factum, ut vix duos tresve tibi ac

Xx 3

amico

amico tuo sim licitatus. Omnibus, quos desiderabatis, pretium adscripsi, ut intelligatis ipsi, ere vestrâ fuisse, ne quid temere hîc molirer. A *Langermanno* proxime literas accipiebam, quibus moneret, sanctissimam matronam, genetricem tuam e vivis excessisse, quo sane nuncio vehementer sum consternatus, cum & ipsam Hamburgi nec semel convenerim, & jactura tua non possit esse a me aliena. Sed nolo vulnus rescindere. Vale, mi Gronovi, & si venturus es, fac ego ac *Vossius* id tempestive sciamus, ne absumus, forsan ab hac civitate, cum venies. Vale. Dabam Hagae Com. cıııııııı. a. d. iv. April. Gregor.

EPISTOLA CCLXXXV.

NIC. HEINSIUS

J. Fr. Gronovio.

Daventriam.

L Iteras a *Langermanno* nostro accepi, Vir Clarissime, easque paucos ante dies, quibus nunciat, applicuisse se animum novis amoribus. Habes hîc ipsam ejus epistolam, qua, nisi fallor, ad nuptias vocaris. Me certe jam vocavit, & quidem multâ cum prece. Nec obniterer, ni certus essem, sine nostra opera confici atque absolvi posse, quicquid ibi occurret agendum. *Holstenium* addit Archiepiscopatu Ravennati donatum a Papa. Augustam nostram graviter Romae aegrotare, ejusque valetudinem esse conclamata fert rumor. Addunt alii conatam Romanis elabi, sed nullo cum successu. Quicquid sit, periit illa jam pridem sibi & nobis. De regis etiam morte nil certi haecenus ad nos perfertur. Res Suecorum prosperas damnare Fortuna incepit. Inde factum, ut Oratores nostri sint dimissi, quibus manum injecerant contra jus gentium Phrenetici Septentrionis filii. Sed haec jam ignorare non potes. Ego post paucos dies Amstelodamum rursus cogito, quando curae mihi erit, ut tuus de Pecuniâ veteri commentarius in Italiam mox mittatur. Nobilissimum *Schelium* salvere plurimum jubeo. Vale, flos & ocelle amicorum. Dabam Hagae Comit. cıııııııı. a. d. xvi. May. Gregor.

EPISTOLA CCLXXXVI.

J. FR. GRONOVII

Nic. Heinsio.

Amstelodamum.

V Eteri meae culpa causa accessit nova: fui enim hos dies, sumque etiamnum distriictior, dum quae institui cum auditoribus meis, absolvere festino,

no, priusquam eos disjiciat abigatque pestilentia, quae ingravescere indies incipit. De nobis quae statuerit Deus, patienter expectabimus. Neque enim effugium datur: cum nec ipse domum in tanto periculo relinquere possim, neque etsi nonnulli in agrum invitent, numerosa cum familia quemquam onerare audeam. Jam proximus ardet Vcalegon, non quidem loco, sed gente: extulimus nudius tertius affinis mei uxorem, singulari probitate foeminam: cui aegrae quum soceri, affines alii, ipsa uxor mea, summa fide, contempto periculo adfederint, magnum erit, si ea sola defuncti fuerimus. Itaque vide, ne tibi propediem amico tuo sit condendum epicedion. Mihi animus satis aequus & fortis ad quemcumque casum subeundum: etsi frangit eum nonnunquam conspectus septem liberorum, intra teneros annos omnium. Sed fiat quod vult, qui nil nisi bene vult. Frisiorum *επαίνειν ἢ κλῆσιν* coegerunt me nostri, & extraordinario congiario, & auctis annuis ad mille centum florenos, cum nongentos haberem, & promissis aliis centum annuis, si quid contigerit illi, qui nunc eos opera senio & morbis otiosa detinet. Detur modo frui. Quae nuntias postremis tuis, omnia mihi grata fuerunt. Secessionem nostram sanatum iri magna spes, postquam praesentibus nobilibus nihil profligabatur, sine his ter coierunt legati trium civitatum: licet enim, & semper habent hi conventus singulares. Quid actum sit, celatur: nisi quod magis magisque animos conciliari prae se ferunt. Tentabam his diebus in Ovidio tuo lib. x. vers. cccclxx. *Et blandis inductae cornibus aurum.* Quid blandis? Omnino pandis. Lib. xi. vers. dclxxix. *Ingemit Alcyone: lacrimas movet atque lacertos Per somnum.* Quidam legunt *lacrimans*. Forte: *Alcyone lacrimans, motatque lacertos Per somnum.* Lib. xii. vers. cccxxii. *In tanto fremitu cunctis sine fine jacebat Sopitus venis Et inexperrectus Aphidas.* Lego: *junctis sine fine jacebat Sopitus vinis.* Ut Statius, *Funge puer cyathos.* Auctionis Vossianae quando catalogum videbimus? Ipsum & omnem domum, nec non affinem tuum meo nomine fac quam officiosissime salutes. *Schelius* in praediis suis est, legit tamen tuas mecum, & illis laetatus est, priusquam discederet. Vale, carissimum caput. Daventriae. a. d. xii. Jul. Quintil. cidoiclvi.

EPISTOLA. CCLXXXVII.

NIC. HEINSIUS

J. Fr. Gronovio.

Daventriam.

Vocatus Amstelodamum nuper a Consulibus per literas, Vir Clarissime, cum nescirem primo quid isthaec sibi vellet invitatio, intellexi illuc adveniens destinatum mihi esse provinciam ab iis satis opimam. Significabat enim Consul primarius, qui epistolam, quam dixi, exararat, patere mihi adiutum ea in urbe ad occupandum Scribae munus, Secretarium nunc vocant, id obla-

oblatores collegas mihi suos seque, nisi dissentiam. Quid multis? Accepi conditionem; sed eâ lege, ut integrum mihi esset, nihil inconsultis foederatorum Belgarum Ordinibus, quibus servirem hætenus, de me discernere. Hagam igitur confestim advolavi, & quod fore praevideram, Senatu foederato annuente, atque approbante hoc consilium, facile impetravi, ut Scribae cum munere dignitatem Residentis permutarem. Mireris forsan id institutum, nec primâ statim fronte perspicias, quo spectet. Rerum tamen gerendarum gnaris ac peritis caute omnino & circumspicte fecisse videor. Eram Sueciae peritæ, ut qui maxime. De Daniâ adeundâ eventus apparebat incertus: nec, si mei ea res foret arbitrii, (nihil quippe a Proceribus adhuc statutum est) debebam tamen istam praeferre Spartam huic provinciae, quam nunc suscepi, etsi honorata magis videatur, & fortasse sit. Deerat mihi plena rei publicae cognitio, quam, ut verum fatear, vix primis labris delibaram. Eam nunc ut explorem ac rimer prorsus, neque otium defuturum est, nec occasio. Nam cum plures sint Amstelodami scribae, variasque rei publicae partes administrant, mihi τῆς πολιτείας negotia erunt curanda. Solis enim Consulibus sum vacaturus. Sed coram de rebus meis confabulari tecum malim. Nihil me moratur in hac urbe, praeter stipendii causam, quod debere quidem se mihi non diffitentur Ordines, sed unde solvant vix occurrit, nisi Dii adsint e machinâ Amstelodamenses, debitumque in se recipiant, uti recepturos sese jam quodammodo sunt polliciti. Cum plures essent in amplissimâ civitate, qui cum laude eam, quam occupavi, provinciam adornare possent, foris fuisse quaerendum, idque sine exemplo (satis quippe civibus suis patere locum Consules hætenus voluere) nontam gloriator, quam miror. Post longos itaque peregrinationum fluctus compono me, & recolligo ad pedem in patriâ figendum. Atque hæc quidem hætenus. Sestertios tuos non sine foenore ex Galliis ad te rediisse laetor, primus id mihi significavit *Viquefortius*. Quanquam nihil ad sortem hæc usura. Est enim is commentarius tantâ eruditione refertus, ut te aestimare jam incipiant ipsi legulei & tenebriones scioli, qui, quis esses, minime hætenus intelligebant. Augusta nostra ex Italiâ in Galliam dicitur contendere, causata pestem, quae, Neapoli jam attritâ, Romam, proximasque civitates adflavit. Mirum ni ad nos excurrat. Non enim opinor fortunas ejus ferre istos sumtus, qui faciendi sint in aula Gallica, regio splendori pares, si moram illic diuturnam traxerit. Pontificem nonnihil offendisse dicitur dicacitate suâ, cum alias ob causas, tum quod Insignibus seu armis ejus, quae tres montes prae se ferunt, subscripserit, PARTURIUNT. Nosti caetera. Leidenses de te invitando ad professionem Graecae Linguae, quae *Lamberti Barlaei* morte vacat, denuo videntur cogitare. Sed cum constituti sint in re angustâ, tecum autem non male nunc agatur, potes invitantes negligere, quos necessitas ad te trahat, non tua merita, si te invitent. Venio nunc ad tuas, quae serius, quam par erat, mihi sunt redditae ante paucos demum dies, nec satis scio cujus culpa. Vestram quoque civitatem pestis contagio obnoxiam esse, id primum invitus ex iis intellexi, quare si salvas cupis artes, serva literis, quaeso,

eru-

eruditissimum caput ac scientiis, quarum salus tua pendet incolumitate. Hoc mihi credas, ac certo tibi persuadeas velim. Si de aedibus jam mihi prospexissem Amstelodami, eas ut invaderes cum tota familiâ non tam rogarem, quam pro imperio juberem, & faceres profecto, nisi me iratum atque aversum malles experiri. In Ovidio, quae notasti, placuerunt. Illud *pandis cornibus* animadverti jam olim adolescens. Nec dubitandum. *Tò junctis vinis* non videram, & placet. *Ingemit Alcyone lacrymans*, movitque lacertos conieceram olim ex illo Ariadnes,

Nullus erat: referoque manus, iterumque retento;

Perque thorum moveo brachia: nullus erat.

Tu *motatque* maluisti. Sed jampridem totus mihi locus est suspectus, quod ex vetustioribus libri quidam mox exhibeant, *Voce sui specieque viri*, non *sua*. Quare metuo ne tres hi versus, quorum initium, *Ingemit Alcyone*, ab interpolatoribus sint. Nam & in Alcyones oratione nihil dignum Ovidio, praeter brevitatem. Tu perpende locum, & quid sentias mone. Illustri *Schelio* plurimam salutem dico. Vale. Dabam Hagae Comit. Anno *ciciciclvii*. a. d. xxiv. Junii Gregor.

EPISTOLA CCLXXXVIII.

NIC. HEINSIUS.

cum *J. Fr. Gronovio*.

Daventriam.

VIr clarissime. Tuas nuper accepi cum libris Hamburgo allatis, in quibus nihil desideravi praeter Lucanum, cum scriptis codicibus a me commissum. Simultates, quae mihi intercedunt cum illa, quam ex fama nosti, aegre me habent, ex quibus ut me quamprimum expediam nihil non ago. Tu etiam juvare me possis. Notissima nostra illa fuit Croustiae cuidam virgini Trajectensi, quae postmodum nupsit Cosmanno cuidam collegae tuo in tribunatu plebis. Ea quid sentiat de nostrâ velim me doceas, sed ingenue, & tua fide. Altera enim alteram habuit exploratissimam. Croustia autem impudicitiae suspectam postea cum haberet, omnem cum ea familiaritatem abruptit. Tu vide, quid ex ea possis indagare rei arcanæ. Sed festinatione est opus. Sancte promitto, nihil tibi molestiae haece turbas exhibituras. Vale. Dabam Amstelodami. *ciciciclvii*. a. d. vii. Febr.

EPISTOLA CCLXXXIX.

NIC. HEINSIUS

J. Fr. Gronovio.

Daventriam.

Diebus proxime elapsis non sine voluptate summâ ex Elzevirio intellexi sospitem atque incolumem Hamburgo te reversum ad tuos. Spero itaque literariam inter nos consuetudinem diu intermissam integrandam denuo fore. Nisi tu praesentem nobis, quod malim, te stiteris. A *Rubenio*, quas vides, in *Livium* tuum animadversiones non ita nuper accepi. Filium is unicum, canis rabidi morfu necatum, inconsolabiliter luget. Habes etiam hic a *Langermanno*. *Vossius* noster Ruremundae etiamnum super agello nescio quo litigat. Mihi etiam, quod mireris & rideas, litem minatur puella longe quidem scitissima, & incomparabili praedita ingenio, quaeque pudicitiam suam *Lucretiis* antiquis illis aequare non dubitet: nisi quod sint, qui eam magno suo malo incidisse in *Tarquinius* non unum argutentur. Id illa prudenter pernegat, ego adfirmantibus facile accedo. Sed hac de re alias. Interim valetudo adfecta me hybernâ hanc tempestatem assidue exercet. Nunc ad me paulatim redeo, usus *Jesuitâ Medico*, qui artem invenit atque excogitavit novam, qua leni obstructo medeatur. Vale, vir & amice summe. Nobilissimus *Schellius* si apud vos est, is, quaeso, meis verbis plurimum salveat. Dabam *Amstelodami*. CIOIOCLVII. a. d. IX. Febr. *Jacobum Puteanum*, dum abfuisti, amisimus.

i Vid. inf. Ep. 297. & 302.

EPISTOLA CCXC.

J. FR. GRONOVIIUS

Nie. Heinsio.

Amstelodamum.

Iamdudum exspecto, si qua commodiore, quam per tabellarium, occasione hoc quicquid est sarcinularum ad te mittere possim: quam tandem nactus poene amiseram, priusquam intelligerem. Me *Hamburgi* quid egerim quaeris. Sane recreavi me post primi adventus lacrimas, & laetum fuit revisere incunabula, atque amplecti tot tanto tempore non visas, alias interea adjunctas & nunc demum visas necessitudines. Genio quoque curando potius omnia superfuerunt, quam defuerunt: ita sunt illic escae maximae, sed & electilis, vino veteri, & sive *Grajae*, sive *Ibericae*, sive *Rhenanae salivae*, non nisi optimae. At inter haec litigavi apud *Stadense forum*, & multa concursatio-

fatatione multoque labore poene pereuntes, hoc est, litigaturos, in concordiam redegi, & auctionatus sum tempore alieno, & magnas partes mihi debitas, ut gravior auctor essem, remisi & donavi, & (ne quid deesset damnosum) aedificavi, & mille curis animum lacerantibus saepe inter fictam laetitiam & regificum luxum distractus fui. Ad nostras Musas quis me revocaret, cum & ille, cui nos ambo, tu inquam & ego, dubium uter majore cum fide & majore profectu, eas tradidimus, frigidas habeat fastidiatque, in tantis opibus nil nisi lucra caninae eloquentiae somnians? Itaque abrui tandem Phaeacum delicias, & speratis, si praesens forem, commodis fraudari malui, quam non ocus reverti in hanc aridam meam moestamque, & tot luctuum admonitricem, solitudinem, sed dearum plenam. Responsum tamen paravi ad bellam illam de Sestertiis epistolam, quod mitterem, nisi *Schelius*, qui jam ultra octiduum detinet, me nondum recipere pateretur. Opto, ut duobus magnis malis, medico & tali lite, propediem libereris. Vale, praesidium & decus meum. Daventriae. a. d. prid. Id. Februar. CIOIOCLVII.

Schelius te plurimum salutat.

EPISTOLA CCXCI.

NIC. HEINSIUS

J. Fr. Gronovio.

Daventriam.

Codices, quos *Langermannus* noster ad me perferendos tibi tradidit, recte accepi, vir clarissime: gratiasque tibi ingentes pro officiosa hac sedulitate ago. Miratus tamen sum Lucanum inter illos meum, quem *Langermannus* nominat, non comparuisse. Claudiani & Ovidii exemplaria manu exarata *Rotendorphius* nuper mihi suppeditavit. Idem scriptum A. Gellii codicem recens a se inventum tibi offert utendum. Ego totus sum in nugacissimâ lite. Mira profecto fuit apud magistratum nostrum scorti putidissimi auctoritas, mira de ejus castitate concertatio. Sed postquam primus ille impetus deferbuit non-nihil, ad castra mea multi quotidie transeunt, qui certissimis argumentis impudicitiae illam convicturus mihi videor. Ferenda interim ac concoquenda impurae faeminae mihi contumelia est. Quid agas? Magnis se testibus illa tuetur. Procerum certe nonnullos sibi devotissimos & tantum non obnoxios habet. Quod nisi rerum adversarum exitum quemcumque forti animo mihi ferendum proposuisssem, omnemque potius fortunam statuisssem projiciendam, quam pudendas ac obscaenas nuptias admittere, jam Messalina illa me possideret. Sed de totâ re praestat coram confabulemur. Vix credas quantam pecuniae vim in lite molestissima prodegerim, cujus tamen eventus nunc a me speratur optimus, cum flagitia & libidines occultae paulatim e latebris eruantur, quas illa (ut est mire vafra) clandestinis artibus diligenter haecenus celat.

rat. Petii nuper, ut ingenue ad me & sine fuco perscriberes, quid collegae tui uxor Croufia de hoc monstro sentiat. Fuit enim inter utramque summa necessitudo ac familiaritas. Vale. Dabam Amstelodami. CIOIOCLVII. a. d. XVII. Martii Gregoriani.

EPISTOLA CCXCII.

J. FR. GRONOVIIUS

Nic. Heinsio.

Amstelodamum.

DE Lucano non intelligo quid velis. Certe enim in fasciculo erat Lucanus, & eum mihi, neque hîc reperio. Numquid duo exemplaria expectabas? Non intelligo etiam, quod scribas te a me petisse, ut perscriberem, quid collegae mei uxor Croufia sentiat de litigante tecum foemina. Neque enim collegam habeo, cui sit ejus nominis uxor (*Diestio* est Lennepia, *Loenio* Philosopho Holtia Swollana, *Tichlerus* Ic. caelebs) neque ejusmodi literas tuas vidi, qui post reditum non habui abs te, nisi unas ix. Febr. datas, in quibus mentionem quidem litis facis, sed nihil tale adjungis. Dederat mihi *Langermannus* & expressos in cera Hispanica nummorum typos, quos ad te curarem. Eos oblitus sum antehac mittere, & his inclusi. Vale & vince. Daventriae. Raptim. XIX. Martii CIOIOCLVII.

Ab Ampliff. *Rottendorffio* si mihi Gellium MS. impetraveris, gratissimum feceris. Ego ex quo librum de re nummaria cum meis ad illum mihi, literas ab eo nullas habui, ne quidem, quibus significavit se accepisse librum, quod quidem valde miror. Solebat enim in scribendo impiger esse. Iterum vale.

EPISTOLA CCXCIII.

NIC. HEINSIUS

J. Fr. Gronovio.

Daventriam.

Fasciculus ille, quem Hamburgo redux ad me dedisti nuper, nihil continebat praeter Stephanum de urbibus, excerpta Ovidiana cum membranarum veterum fragmento, & Claudianum in minori forma. Lucanus nusquam ibi comparuit, quem ego cum variis collatum MStis *Langermanno* ante triennium utendum dederam, a *Raphelengio* in Octava forma editum cum notis Grotianis. Eum excidisse fasciculo, vir clarissime, vix persuadeor ut credam, cum ne nummi quidem argentei exciderint, quanquam minutissimae chartae involuti. Librum ipsum si *Langermannus* tibi tradidit, ut tradidisse se scribit, inter

ter sarcinas tuas neglectus etiamnum haud dubie haeret. Tu, quaeso, eas excute diligenter. Traiecto literas ad te dederam, quibus petebam, ut collegae tui uxorem Croesiam percunctareris super Margaretâ Wullenia, quod ei intime familiaris & arctissimâ necessitudine fuisset conjuncta. Ais te nescire, quem collegam designem. Opinariis nempe de Professore quodam bonarum artium a me agi. Sed heus! Adeone parum memineras Tribunum plebis te esse? Si literae Traiecto ad te datae fuissent probe curatae, jam de Kosmanni, hominis mihi ignoti, uxore me locutum scires, cui nomen est Crousiaë, domo Traiectinae. Si hominis ejus mores non satis exploratos habes, noli te meâ causâ fatigare. Spero enim fore, ut mox defungar omni litis ingratae molestiâ. Jam enim Thaidi nostrae larvam Lucretiæ detraxi, multis procerum freudentibus, qui eam sibi mecum communem, credo, fore optassent. Sed hoc in aurem tibi. Habuit certe fautores plurimos, quos partim morum urbanitate, partim eloquio sibi conciliarat. Quanquam quid eloquium ejus tibi commemoro, cum incesta facies abunde pro se peroret? Ad *Rottendorphium* si quas mox literas dederò, de Gellio faxo sim memor. Typos nummorum cerae Hispanicae impressos, quos mittere te narras, non accepi. Vale, mi Gronovi. Dabam Amstelodami. CIOIOCLVII. a. d. XXIII. Martii. Gregor.

EPISTOLA CCXCIV.

J. F. R. GRONOVIIUS

*Nic. Heinsio.**Amstelodamum.*

DE Lucano, ὦ φιλότης, nihil aliud tibi dicere habeo, quam tractasse manibus meis, & semper voluisse includere primo, quem ad te mitterem, fasciculo, & credere in hunc diem inclusisse me illi, quem misi. Haec sine fraude me agere Deus sit testis. In meis quoque sarcinulis & forulis, quia jam quaesitum non repperio usquam, esse puto nusquam, ut canit Naso tuus, quicquid etiam illo tactum sit. Si tamen quandoque aliter esse apparebit, nihil fiet citius, quam ut te & conscium rei & possessorem libri tui reddam. Traiectenses, quas dicis, tandem accepi, postquam hoc oppido transito Zutphaniae oberrassent, & intellexi quem diceres, collegam meum. Sane jamdudum ille εὐχεται εἶναι, ex certâ, credo, spe ipse rumores distulit, se jam esse. Haec tamen ea bona spes hominem destituit. Si haberet tantum ingenii, quantum illa, quae astutia sua eum irretisse dicitur, esset. Non sunt mihi familiares valde: nec tamen multum effecero: praedicant illam callidissimam, certe non tam stultam, ut nescierit uti ludo aetatis. Eventum, quem promittis, sperabo tecum & precabor. Dura enim est provincia, quam suscepisti. Ista, etsi omnibus de illis constet, difficillimae sunt probationis. Plerumque malunt privilegio amantem uti, hoc est, pejerare. Sed fortasse hic saltus obseptus tibi. Bene erit, quacumque evades. Vale, & vince. Daventriae. xxvi. Martii CIOIOCLVII.

EPISTOLA CCXCV.

NIC. HEINSIUS

*J. Fr. Gronovio**Daventriam.*

ADoleſcens temerarius & incautus, qui Salmaſianas nuper epistolâs in lucem emiſit, *Goeſium* noſtrum præſatione ſuâ offendit, ut video. Is itaque Vindicias hæſce offerri tibi voluit. Lis mea foro necdum eſt credita. Primus itaque adverſariorum inſultus feliciter retuſus eſt & fractus. Qui toti in eo hæcenus fuerunt, ut me non adorirentur tantummodo imparatum, ſed inermem quoque expugnarent. De litis eventu jam ſpero optime. Vale. Dabam Amſtelodami. cicioclvii. a. d. xiii. Aprilis.

EPISTOLA CCXCVI.

J. FR. GRONOVIIUS

*Nic. Heinfio.**Amſtelodamum.*

PRo munere ampliffimi viri, affinis tui, & illi & tibi grates ago. Satis monui hominem incedere per ignes ſuppoſitos cineri doſo. Sed quod poteſt illis utiliter conſilium dari, qui, quod omnium erat optimum & veriſſimum, ut ſcilicet brachium etiam intra togam continerent, & multum lægerent, priuſquam ſcriberent, id præ famæ ſiti capere non poſſunt? De Lucano aurem mihi vellit *Langermannus*: jubet ſi forte aſtute agam, & adhuc velim perluſtrare, indicem ſaltem hoc tibi. Ego vero Deum immortalem juro, me nihil aliud de illo ſcire & credere, quam quod antehac ad te ſcripſi: fuiſſe in ſaſciculo, quem apertum mihi dederat cognatus, habuiſſe me in manibus hæc, non ut conferrem (neque enim hoc tunc otium) ſed ut obiter inſpicerem, miſiſſe ad te cum Stephano & Claudiano & caeteris. Si quid aliud eo, me volente & ſciente, factum, tum me ſalva urbe & arce Juppiter, ut ego quemcumque juſſeris lapidem. Quare autem ad te non pervenit, ſi ſcio cauſam, fiat mihi quod poteſt atrociffimum perjuris. Non poſſum interim, quin accuſem fortunam, quæ me cariffimis duobus amicis ſuſpectum reddit. Obſervationum veteres tres libros mirifice mutatos & auctos habeo, jamque ita paratos ut, ſi fors fuat, prælo dare poſſim. Hæc fuit una mea ſubſeciva opera, ex quo redii. Nunc Notas ad Senecam ſecundæ editioni, quam Elzevirii moliuntur, parare aggredior. Tu quando Ovidium? Numquid, ut ajunt, altera editio minoris formæ ſub prælo eſt? Vale, mi Heinfio, & incluſas Elzeviriiſ vel *Curcellæo*

cellaeo curandas trade, nisi forte tibi propior occasio est. *Schelius* abest, & abstulit secum musteum libellum affinis tui, vix ut cum saltuatim ac vellicatim percurrerim. Iterum vale. Daventriæ a. d. xi. Kal. Majas CIOIOCLVII.

EPISTOLA CCXCVII.

NIC. HEINSIUS

J. Fr. Gronovio.

Daventriam.

Q Uod unice cupiebam, praeſtare in rem meam non potui, vir clarissime, ut ſuaviſſimis tuis literis tempeſtivus reſponderem, dum domo frequenter avocor. Cave autem exiſtimeſ parum à me intelligi, qui fructus, quae utilitas ad me redundet ex tuis alloquiis. Iis enim etſi dignum fortasſe pretium non pono, pono tamen maximum. Exercuit me aliquamdiu negotium, quod noſti, domeſticum: nec pro voto aut expectatione haecenus ſucceſſit. Puta cum Sphinge rem mihi eſſe, aut cum Circe aliqua, quae miris modis Judicum animos excantet, & per ambages aenigmatum neſcio quorum abſtruſas aſſidue circumveniat. Cauſa igitur cecidi, ſed ſic ut ad forum Haganum certiffimâ victoriae cum ſpe provocarim. Poſt judicatam enim litem nonnulla ad aures meas ſunt perlata, quae ſi tempeſtīvius ſciviſſem, proſtigare partes adverſas etiam in Amſtelodamenſium tribunali, quanquam non nihil iniquo, poterant. Impegere iudices ad Sirenis hujus ſcopulos, quod illis mecum eſt commune. Nunquam credidiſſem tam durum telum eſſe mulierem venuſtam & ingenioſam. Sed vel ſic de rebus meis optime à te velim ſperari. *Bullialdum* Hagae bis ſalutavi, qui Legationi Gallicae eſt à ſecretioribus conſiliis, & victor Illuſtriſſimi *Thuani*. Timide tamen & parcè conveni, quod aedes iſtae nunc noſtratibus ſint ſuſpectae, cum Orator Hiſpanicus tuto conveniatur ab omnibus. Vide rerum viciffitudines. *Voffius* etiam ex Geldria eſt reverſus tandem, ſed ſic, ut eo ruſus videatur cogitare. Nam ne is quidem litem ex voto confecit. Interim oblatus mihi eſt Terentius *Boecleri* & *Guyeti* commentariis illuſtratus, liber ſane muſteus, & fruge refertiſſimus. *Boecleri* annotationes necdum vacavit percurrere. Neque enim is eſt vir ille, a quo mira ſint expectanda in hoc ſtudii genere: *Guyetus* multa habet praeclara: quanquam ſuccinctus nimis in plerisque, ad *Faerni* exemplum, & totus in emendationibus. In iis autem nimius etſi videri poſſit noſtris philoſophis & politicis, fatendum nihilominus eſt plurimum acuminis ac perſpicaciae ab eo collatum ad illuſtrationem auctoris terſiſſimi, in quo tam multa fuiſſe depravata nunquam credidiſſem. Sed de his alio tempore. Mox enim ad ſtudia revertar, nimis diu intermiſſa. Auguro etiam fore, ut mox nobis adſis. Sin minus, Auguſto menſe feriantem expectabo. Non poteris non venire optatiſſimus, quādocunq; veneris. Totus enim ardeo & flagro tui

ex-

auditorio domestico commissos jam absolvi. Interim & ita retractavi tres priores Observationum libros, ut poene rescripti videantur: nullum caput sine accessione notabili, quibusdam integra surrogata, singulis libris nova adjecta. Responso etiam ad epistolam *Salmasii* Hamburgi deproperato secundam manum admovi: egi fortassis acriter, & vitiis hominis haud quaquam parcens; doctum tamen & magnum fuisse nec negavi nec negare possum. Nunc ipsum cum *Scaligero* & *Petito* de anno Numae & intercalandi ratione, ob Livii lib. I. cap. xx. locum litigabam. Vide vero, amice, ne magnum malum arcessas tibi, quum me desideras. Veniam enim comitatus tot meis Caesiis, Aquinis, ut tibi *Guidetus*, quem laudas (etsi multa summae & Palmerianae temeritatis atque audaciae ab homine tam *ιδιογνώμονι* exspecto) modestus fuisse videatur. At ista *εὐαγγέλια*, Ovidio te mox operas redditurum. Redde vero, quas solus potes, & ut animo vacuo possis, Diique hominesque ad liberandum te illa, qua nunc coqueris, cura consentiant. Vale, unicum literarum, unicum meum decus. Daventriae a. d. VII I. Eid. Jun. CIOIOCLVII.

EPISTOLA CCXCIX.

NIC. HEINSIUS

J. Fr. Gronovio.

Daventriam.

DE molestiis, quae me nunc exercent, libero te omni curâ. Non enim spero tantum, mi Gronovi, sed confido etiam & prorsus habeo persuasum, cum liti finem fore, qui si mihi non sit laudi, cum adversae partis maximo certe opprobrio ac dedecore conjungatur. Nam ex quo iudices nostri a duabus facminis consularibus impelli se sunt passi, ut contra me pronunciarent, quamquam diu multumque renitentibus sententiis; multa ad aures meas pervenerunt, quae victricem causam non oppugnent solummodo, sed profligent plane ac evertant. Reliquum est, ut Judicium Haganorum nonnemo huc excurrat, qui testes quosdam per praescriptam jurisjurandi formulam compellat ad veritatis ingenuam professionem, quam meis precibus haecenus non indulgent. Iudices nostri si hac in parte mihi non defuissent, triumphasse nullo negotio poteram. De duabus consulum uxoribus quod dixi est verissimum: quae cum ipsae olim male audierint, crediderunt etiam hanc nostram immerito accusari impudicitiae. Sed utramque ajunt jam paenitere sui consilii. Tertius accessit causae meae oppressor Vir Consularis, qui nostram in deliciis habere aut habuisse saltem creditur. Sed censesne, mi Gronovi, tam abjecto me esse animo, ut Consules aut Consulum filios rivales feram, qui ne Jovem quidem tulerim? Haec in aurem tibi. Nemo adversariorum meorum opinatus est, tantum fore mihi confidentiae, ut ad tribunal Haganum provocare sustinerem, ipse pars magistratus ejus, a quo essem damnatus. Non desunt

Tom. III.

Z z

qui-

quidem, qui ereptam propterea mihi velint eam, quâ hic fungor, dignitatem: sed ita res est acta in judicio, totque & tam validis argumentis, ut illi ipsi, qui me damnarunt, facile praevideant longe alium fore huic negotio apud Haganos exitum, quam quem ipsi praestiterunt. Multum praeterea fiducia mihi addit ea ipsa, quae litem hanc mihi concitavit, quae quanquam victrix, cum ultro obnitentem me in jus primo rapuerit, nunc ita aestuat ac cunctatur, postquam ad forum Haganum confugi, ut nil movere litium audeat, ne alimentum quidem pro pueris petere, quod judices largituros illi vix dubitem. Sed quando ipsa cessat ac sibi deest, ego res ejus quamprimum urgebo. Expectandus tantum *Goesii* reditus, qui in Zelandia jamdudum haeret, eo missus ad componendam seditionem male feriatae plebis. Propinqui nostrae illius componi litem misere jam velint, sed non componam ego, nisi victor. Hoc enim existimatio mea vehementer requirit, ut quam impudicitiae palam accusarim, etiam convincam. Sed de totâ re fusius confabulabimur, ubi veneris. Constans est inter multos rumor, eam ex alio nescio quo non concessisse tantum, sed peperisse etiam jam ante: ejusque rei probe consciam esse Daventriensem illam, quam nosti. Quo magis vellem, rei ejus explorandae negotium a curâ tuâ ne putasses alienum. Judices Amstelodamenses a formâ ac ingenio sic commendant nostram, ut benignius splendidiusque non possint. Sed praestent mihi pudorem in eâ, ego formam & ingenium facile iis remiserim. De moribus mihi lis est, quos aequo liberiores nostrae esse, boni etiam judices non inficiantur. Atque haec haecenus. Videbis apud me testimoniorum magnam copiam, quibus illa graphicè, quae sit, describitur. Quanquam ne multis quidem testimoniis opus, cum illa de nuptiis nihil a me petierit, nisi si liqueret, nullam sinistro rumori causam a se datam esse, nec aliâ ego conditione quicquam sim pollicitus, ut ex ejus epistolis penes me extantibus liquidò apparet. Id tamen judices non viderunt nostri, aut quod est verius, videre noluerunt. Caeterum ut intelligas absterfui utcunque animo meo dolorem esse, quo exagitabar modis primo indignissimis, censurae tuae subjecio versus elegiacos, quos scripsi in gratiam *Gulielmi Pisonis*. Is, Principi Mauricio Nassavio in expeditione Brasiliana a Consiliis & Medicinâ cum esset, historiam ejus tractus naturalem confecit, quam secundae editioni nunc parat. Non potui homini Musas meas satis intempestive imploranti obluctari. Quanquam in negotio hoc pessime de me meritis sit. Nam cum gratiosus sit imprimis apud Urbis hujus Magistratum, & Penelopes nostrae inter Alcinoos sit unus, valde causam ejus publice promovit & commendavit. Sed cum exprobrarim compressam ab eo Penelopes sororem, faeminam nuptam, id enim certissimis argumentis habeo compertum, susceptam imprudenter causam prudenter nunc deseruit. Caetera Vir mihi perquam amicus est, & moribus elegantissimis ornatus. Versus ubi legeris, quaeso, ad me remitte, sed sic, ut cum lima & censura tua revertantur. Nobilissimo *Schelio* plurimam salutem adscribo. Dabam Amstelodami. A. MDCLVII. a. d. xxvi. Julii Gregor.

† Vide Poëmat. Heinſii lib. -III. Eleg. 5.

EPI-

EPISTOLA CCC.

J. F. R. GRONOVIIUS

*Nic. Heinsio.**Amstelodamum.*

Bene habet: modo ne Sabini, aut qui amant. Interim, utcumque sit, Brutissimum contemnere nummos & decidere. Quæ est enim illa sinistra existimationis interpretatio, aut potius crudelitas, vindictam ad ultimum persequi, & quod ei reliquum est pudoris, si tamen reliquum est quicquam, id etiam per judicem eripere? Cogita dicentem:

Si bene quid de te merui, fuit aut tibi quicquam

- Dulce meum.

Dein suavis esset fortasse qualiscumque vindicta, nisi tanto esset tuo cum periculo conjuncta. Scis te juxta bene sperasse de vestris Aræopagitis, & tamen destitutum. Ego non plus committerem iis, quos nunc habes, quam illis, quos habuisti. Recordor quam fuerint inepte misericordes in causa proditorum. Credo etiam honestius gratiusque id fore illis, a quibus provocasti, transigi potius inter vos, quam suam sententiam rescindi. Sed hæc ego non nisi eminus, & per caliginem contemplans causam tuam: tu ipse propius inspiciens cum propioribus videbis, quid maxime sit e re tua. Ego cur minus ad eam familiarem illius, quæ te malo petit lasciva puella, causa oborta est nova. Habet sororem ætatis integræ, nec deformem: quæ quum huc venerit salutandæ, ut ajunt, germanæ gratia, de industria detinetur a quibusdam, ut mecum illam conglutinent. Jam ad me verba fecerunt de conditione istius, & mirifice mores & ingenium commendarunt. Nam pecuniam non nisi modicam ultro fatentur. Mihi vero animus nondum, nec cordi fixa voluntas, de istis rebus cogitare, nec producere istam ac lactare, aut etiam hominum sermonibus occasionem dare libet. Me proxima hebdomade vel media vel ultima, si tibi videbitur, exspectabis. Carmen tuum haud quaquam præ se fert hominem, de capite & fortunis contendentem. Id *Schelius* (qui te plurimum salutatur,) & ego libentissime legimus. Unum illud, *Nerea classe fugat*, aut nimium est, aut non intelligo. Sed & submoneo, fatin' tibi audaciæ sit scribendi *Mauricius*, quum Martialis dixerit, *Probitate Marcos, æquitate Mauricos*. Vale, decus meum, & me ama. Daventriæ vi. Non. Jul. cxcxcvii.

EPISTOLA CCCI.

NIC. HEINSIUS

J. Fr. Gronovio.

Daventriam.

NOvi optime virtutes magnas commendationis non egere, apud te praesertim, mi Gronovi, qui in aliis multâ cum ingenuitate suspicis ac miraris, quod ipse domi possides: quia tamen Vir hic & natalium & provinciae, quam apud suos luculentam est nactus administrandam, splendore illustris, non ingratum sibi fore est testatus, si aditum ad te liberiolem sibi conciliarem, injuriam meis moribus videbar facturum, si promptissimi obsequii gloriam ac laudem mihi ipsi interciperem modesta nimis operae demandatae deprecatione. Glorior enim, ne me nescias, & superbo imprimis tua necessitudine. Metuo interim ne contumeliose videar egisse cum obvia illa & exporrecta comitate tua; qui tibi, tanquam difficillimi aditus atque accessus viro, virum talem commendem, qui plurimis se nominibus commendet ipse. Natales primum sunt nobilissimi. Ipse dignitati amplissimae jam nunc destinatus & tantum non admotus, Praefidis spartam adornandam Aquis Sextiis est natus. In Germaniam cogitat comitiis imperii proximis spectator interfuturus. E re tamen sua nequaquam fore est arbitratus, si pedem hinc moveret te non convento, cujus eruditionem ex scriptis & fama publica jam pridem deprehendit. Habet in comitatu suo virum variis scientiis excultum, & quem novisse gaudeas. Sed quid ego tibi perspicacissimo ingeniorum atque exactissimo cognitori commendationem supervacuum obtrudo? Fore enim praevideo, ut neque te compellatum neque illos compellantes officii paeniteat. Acriter mecum expostulavit *Alexander Morus*, quod convivam suum sibi passus essem nuper elabi. Sed tu videris. *Vossium* hodierno die dimisi. *Graevius* in patriam advenit. Erfurdiae codices omnes salvos invenit, quibus *Zinzerlingum* scis usum. Ovidii inter illos varii. Sed & praestantissimum exemplar Senecae Epistolarum. Quid thesauri reconditi sit allaturus secum mox videbimus. *Barthium* vivum sospitemque Lipsiae offendit: ad *Reinesium* cogitabat. Vale. Dabam manu praepropera. Amstelodami CIOIOCLVII. a. d. XVII. Sextil. Gregorian.

EPISTOLA CCCII.

J. F. R. GRONOVII

*Nic. Heinsio.**Amstelodamum.*

Recte intelligebas nec nobilissimi istius honestissimique juvenis personam, nec meam perpetuam consuetudinem, ad nos tales conciliandos medio aut interprete egere. Sed frustra vereris, ne male mecum agere putem interpositas literas tuas, quae si nihil aliud haberent argumenti, tamen nec supervacua nocent, ut IC. nostri loquuntur, & tui ingenii nihil est, quod supervacuum, quod non magnae rei sit. Itaque cum multas ob causas gavisus tam honorifica salutatione, tum maxime, quod eadem & tibi facta est, idque per te, qui fecerunt, me doceri voluere. Sic enim cognosco, non forte me placuisse, sed eo iudicio, quod tu merebaris, ego participavi, quia tu nescio quid viribus meis amplius illis de me promifisti. *Morum* nostrum exposulasse tecum puta, ut serio desiderasse nos, non verbis tantum inire gratiam voluisse videretur. ¹ Alter amicus noster quid illic negotii habuerit, demiror: nisi forte hoc transitu usus, dum redit in avitam patriam, & ei defert, quod adhuc debet, inanium impendiorum ludibrium. *Graevium* maxime virtute esse jubeo, tantis thesauris inventis: modo sit otium fruendi. Haec ad tuas. De me quaeris, nihil habeo, quod magnopere tibi venditem: praeter illud fortasse primum justumque, ut repetam tibi grates gratissimas pro benigno hospitio xeniisque tuis, & jugem memoriam tantae humanitatis promittam. Nam (ne quid aliud expectes) omne tempus, ex quo redii, cum oleo operaque perdidit in MS. illo Tulliano, stultus ego atque immemor, nullas domino ejus res suas, utcumque exiles, parvas videri. Jam dimidium voluminis absolveram, quum venit in mentem nudius quartus subducere rationes cum prioribus istius muneris curatoribus, ut scirem, quid mei collegissem, quid ab illis praecerpum ac delibatum. Quid quaeris? omnia cum pulvisculo conversa & occupata deprehendi, illa ipsa, quae pro illecebris ille ostentabat, *temperaret tollere* (quo delectabar valde, quod idem genus loquendi restitui Tacito lib. XIV. annal. cap. LXIII. *temperaret dolorem aeternum suscipere*: vide apud *Pichenam* scripturam Florentini codicis, nec dubitabis de hac correctione) & *Dionis in Persicis*, non a *Grutero* tantum, sed jam a *Victorio*. Nec aliter prius illud in Tragicis suis dedit *Scriverius* p. 162. Nihil mihi restat praeter varietates literarum libris antiquis suetas, *obtusus*, *proximus*, *filosofia*, *inploro*, *comprehendo*, *Hermione*, *Boetia*. Nisi ipse Tullius ex intervallo repetitus haberet *ἐλευσιὰ* sua, nihil esset solatii pro tot tam opportunis horis tam nequiter exemptis. Harlemensem Codicem accepi. In ludo de morte Claudii, cujus ergo maxime de-fideraram, nihil juvit. Sed habet & Valerium Maximum. In eo duabus ho-

Zz 3

ris,

¹ *Isaacus Vossius*. Vid. Ep. 228.

ris, quas ei impendi, plura reperi notatu digna quam in isto, toto propemodum mense. Inter alia lib. I. cap. I. ubi EXEMPLA EXTERNA: QUOD QUIDEM ad Pleminii facinus pertinuit, bene a Patribus conscriptis VINDICATUM EST. Quod ad violentas regis Pyrrhi sordes attinuerat, SEIPSAM potenter atque efficaciter DEA defendit. Sic vulgo. At MS. QUAE, QUOD ad Pleminii facinus pertinuit, bene a Patribus conscriptis VINDICATA, quod ad violentas regis Pyrrhi sordes attinuerat, SEIPSA potenter atque EFFICACITER DEFENDIT. Vides quanto rotundius & elegantius. Nam *τὸ Dea*, quod inferuerunt, ex praecedenti membro repetitur intellectu: *pecuniam dea &c. recuperavit*. Auctoribus sectionum & capitum in hos auctore, ut plures ejusmodi, haec corruptela debetur. Plura alias. Nunc vale & rem bene gere. Daventriae. XVI. Kal. Septemb. CIOIOCLVII.

EPISTOLA CCCIII.

NIC. HEINSIUS

J. Fr. Gronovio.

Daventriam.

Invito sane, si quid unquam, mihi accidit, ut suavissimae tuae epistolae ferus nunc, cum fieri id jampridem oportuisset, respondeam. Nosti animi minime defaecati praesentes molestias, quae praeter votum efficiunt, ut nec amici jure optimo officiorum rationem curatam a me possint exigere, nec ego ea praestare possim, si morosius exigantur. Hagam nuper evocatus ob turbas familiares, quas nosti, differre ad tempus sum coactus, quas nunc mitto. Vir Illustrissimus, quem tibi non ita nuper commendabam, *Marchionem de Bras* se vocat, Regi christianissimo a consiliis status, & Senatus Aquae Sextii Praesidem. Literas Coloniae Agrippinae post congressum vestrum satis officiosas ad me dedit. Ajunt nescio quas similtates inter illum & uxorem esse subortas, per quas fiat, ut exilium sibi ad tempus indixerit. Hoc *Morus* asseverabat: nec scio an vere. Epistolas Lutetiae complures nuper accepi, sed quae nihil nuncient, aut sperari ex typographiis Gallicis jubeant, quo res literaria ornetur atque augeatur, praeter Eusebium *Henrici Valefii*. Reliqua, quae nunc illic eduntur, ad illustrandum sermonem Gallicum praecipue spectant. A *Graevio* literas jam te nactum opinor, scripturum enim se tibi in postremis suis minabatur, nisi jam in eo est, ut ad nos recurat. Ego certe nihil postea de rebus ejus intellexi. *Crivitzius* non semel jam mecum egit, de filio suo tuae disciplinae committendo, tuisque aedibus. De aedibus dixi, quod res erat, vix fore, ut precibus ejus speique consentirem. De disciplina laudavi consilium. Sed cum rumor publicus hominem fordide avarum esse, & nimis ad rem attentum, vulgo disseminet, non video quid tibi sperandum sit pro labore molestiaeque hac praemii, nisi ut pro bonâ mente, quam filius a te mutuatur, men-

mentis bonae sororem Pater, quantum in se, tibi reponat. Amicus noster nuper hac transiit, non tamen eo animo, ut ad avitos Geldros excurreret. Peregrinatur quidem nunc, sed, ut solet, in Pomponio suo; ex cujus atomis collectum meteororum opus mox procudat. Misere profecto metuebam, ne pro asello tibi diaria obtruderet, commodato Tulliano codice, atque ita rem sese habere facile jam nunc intelligo. Codex, quem ego volebam, optimus quadrata erat formâ, & annorum octingentorum senium prae se ferebat. Alter ille, in quo tu frustra sudasti, annos sexcentos aut septingentos ad summum aequabat, quem ego paucis ad vulgatas editiones pagellis examinatis, facile deprehendi altero longe inferiorem ac valde depravatum esse. Tertium praeterea habet, literis Longobardicis descriptum, qui meus olim fuit, Regiae bibliothecae postea donatus. In Valerio Maximo operam melius feliciusque a te collocatam gaudeo. Extat penes me geminum ejus scriptoris exemplar manu exaratum, quod tuis usibus, si jussieris, libens suppeditabo, ut & fragmentum epistolarum Senecae, quamvis non valde antiquum. Aemilii Probi novam editionem Leidenfes parant. Si quid addendum operi huic habes, conferri poterit. Ejus ego quoque scriptum exemplar, sed chartaceum, possideo. Velim me doceas, quid sentias de Ovidiano illo loco lib. i. Art. Amat.

Inde propinator nimium quoque multa propinat,

Et sibi mandatis plura videnda putat.

Est enim corruptissimus. Ut & alter in Epicedio Drusi.

Quidque pudicitia tantum inviolata bonorum,

Ultima sit laudes inter ut illa tuas.

Haec nunc. Vale, decus literarum certissimum, & me, quod facis, ama. Dabam Amstelodami. cxcxcviii. a. d. xxii. Sept. Gregor.

Describebam nuper notas ad Penelopen Ovidianam, ubi occasio suborta est emendandi loci Propertiani, ejus quem nosti. *Tantine, ut lacrymes, Africa tota fuit?* Video ad istam correctionem praeivisse mihi Tibulliana ista, *Non ego sum tanti, ploret ut illa semel.* Si persistis tamen in proposito, facile tibi hîc, ut in caeteris, concedo. Vale iterum. Salveat quaeso perillustis Schelius.

EPISTOLA CCCIV.

J. F. R. GRONOVII

Nic. Heinsio.

Amstelodamum.

Vellem crebrae illae itiones Hagam aut cessarent, aut aliam causam haberent, non tantopere, quod ut quereris, reliquatores te amicis in scribendi officio reddant, quam quod animum inquietent tuum, & doctas curas impedian. Atque utinam vel nunc decideres, & jactura aliqua facta, quod tamen morae fori auferent, indigna & sordida lite exsolvere! Sed tu nosti melius

lius ipse causam tuam, & fortasse jam tantum profligatum est, ut de eventu fatis confidas. A Marchione habui & ego Colonia perhumanas. Videtur ejus esse haec pulcra ambitio, ut gaudeat epistolis illorum, quos in studiis operae pretium facere putat. Quae sane alenda est in homine ejus loci atque ordinis, itaque statim respondi. *Grævius* redux Senecam Erfurtensem opportune mecum communicavit: sum enim totus in Notis meis ad secundam editionem parandis. Inspexi jam non sine fructu libros de beneficiis & de clementia illis locis, ad quae aliquid notatum habeo, nam ad literam omnia conferre non est otii mei. Epistolae non tam bonae notae videntur, quam isti libri, & hiatu ingenti laborant. Tuum fragmentum si prodesse mihi putas posse, non repudio humanitatem tuam: fac ad me comseat. *Crivitzius* filium suum si mittere huc in disciplinam vult, non deerit illi labor meus. De convictu, recte negasti, non domus mea fert, non rationes familiares, dum sine uxore sum, & si unquam aliam duxero, ne illa quidem, opinor, patietur. In Ovidii loco tentas, credo, me, & lepus pulpamentum quaeris. Dicam tamen, & ludibrium tibi debebo, ut meliora & tua me doceas. Subscribo libris, qui *procurator* & *procurat*, habent. Non tamen, ut *Bersmannus*, accipio de illo, cui uxor, sed cui quaecumque aut quotâcumque res absentis domini mandata est. Ex eo, ex ea tuta frequentique, sed scelestâ, via per amici nomen fallendi, est etiam inquit, quod procuratores amplius, quam debent & possunt salva fide, procurant, & ipsi specie amicorum fallaces, suoque lucro aut commodo, & plura sibi providenda & curanda sumunt, quam dominus mandavit. *Videnda*, ut Terentius: *aliud lenius, sodes, vide*: ut Cicero, *mandavi ei, ut prandium nobis videret*: & saepe huic. In Elegia in mortem Drusi olim ad marginem libri mei notasse me video pro *inviolata* ex MS. cod. Bersmanni, *meruisse*. *Quidque pudicitia tantum meruisse bonorum &c.* Ut frugalitas ultima laus est in Scipione & Paullo aut rege aliquo, teste Cicero, ita pudicitia in foemina Principe, alios majores titulos nata, & eos tamen merita ipsa illa pudicitia, quae scilicet prima Augusto in Livia placuit. *Tantine ut lacrimas*, habet sane Venerem suam, praesertim si solum per se audiatur. Quin & forte fatebor tibi, si hoc accepissem, priusquam aliud in mentem venisset mihi, de alio non cogitassem. Nunc corruptus ingenioli mei lenocinio nescio quomodo has lacrimas minus huc convenire existimo. Videtur enim id, cujus intuitu & comparatione non tanti sit Africa, jam prior versus pronunciasse, nempe ut mutaret puellam. Durus, qui lucro puellam mutare potuerit: tanti non erat tota Africa. Vides sensum plenum, cui illud, *ut lacrimas*, non potest inferi, nisi ut, prope dixerim, inepte abundet. At *in lucris* commodissime: foret enim tum: tanti non erat totam Africam lucrari, vel in lucris habere. Tum illud, *At tum*, significat proximo disticho de alia prorsus persona agi, a qua jam rursus ad illam, quam prius allocutus fuerat, convertatur. Apud Tibullum quidem, *luctus renoventur acerbi*, & *Nec lacrimis*, respondent τῷ πλῶν plorare. At in toto Propertii verbum nullum est, quod lacrimas istas adfirmet. Hae tamen non sunt ἀποδείξεις

δέξας, & tam facile a te confutabuntur, quam nunc a me ponuntur. Quid igitur? hieran faciemus, ut cum Seneca loquar. Vale lux mea, & me ama. Daventriae. a. d. prid. Non. Octobr. CIOIOCLVII.

EPISTOLA CCCV.

NIC. HEINSIUS

J. Fr. Gronovio.

Daventriam.

Nihil quidem nunc occurrebat, quod scriberem, Vir & Amice summe, scribo tamen, ut valere etiamnum me scias, quanquam id ex Illustr. Schelio nostro jam nunc intellexisse te confido. Nam quod amici nostri mors inexpectata justum scriptionis argumentum est, esto. Malim hoc ex aliis, quam ex me cognoscas. Me certe ex ore Moreti exceptus primo nuncius, mox & per Gevartianas literas confirmatus adeo perculit ac consternavit, ut ne nunc quidem sim meus. Incomparabilem sane jacturam hoc tam funesto casu passae sunt Romanae antiquitates, heu quantum

Praesidium Ausonia, & quantum tu perdis, Jule.

Vivet tamen in Livio & Seneca tuis Rubenius, si alii cessabunt in scriptis ejus postumis luci committendis. Graevium jampridem ex Germaniâ Duisburgum rediisse ex Criwitzio heri intellexi. Nos totis septem diebus Thuanum hîc habuimus, splendide a Magistratu exceptum. Morus discedentem oratione panyrica prosecutus est, in qua adulationis multum, nec parum sane elegantiae. Ego paucos¹ versus adventui ejus dedi, etsi aliud agens, & totus in sorore, ejusque marito, hospitibus meis, excipiendis occuparer. In catalogo Nundinarum Francofurtensium nihil video praeter Gulielmum Britonem Barthianis commentariis illustratum. Statium ejus proximis nundinis expectare jubemur. Vale. dabam Amstelodami. CIOIOCLVII. a. d. XVII. Octobr.

¹ Editi sunt libr. III. Eleg. 9.

EPISTOLA CCCVI.

NIC. HEINSIUS

J. Fr. Gronovio.

Daventriam.

Postremae meae immaturam Rubenii mortem nunciabant, quas necdum videbaris accepisse, cum nuperrime me compellares, vir & amice summe. Gevartius tantum non imperiose epicedium a me flagitat, quod exigi ac requiri contendit a singulari illo adfectu, quo me meaque quisquillas ο μαλαετης

Tom. III.

Aaa

so-

solebat complecti. Et si autem eo loco non sunt res meae, ut cantare mihi conveniat, nisi Eumolpi Petroniani exemplum mihi proponam imitandum, vix possum tamen deesse supremo officio: quod non tam amicitiae nostrae, etsi huic quoque, quam egregiis viri praeclari in rem literariam meritis a me praestari omnino est aequum. Videbis itaque proxime forsitan nescio quid ¹ Elegidii: si talem jam inceptam licuerit pertexere. In carmine ad *Thuanum*, puto, aures tuas delicatissimas offendit istud, *Tantaque quem virtus comeret*. *Morum* certe offendeat, nec mihi ipsi satis arrisit, cum properanti calamo excideret; sed inter festinandum, curasque ab eo argumento prorsus alienas, meditationi locus non fuit. Ex *Criwitzio* pauculos demum ante dies intellexi *Graevium* ex Saxonia rediisse. Nam noster ipse reditum suum diligenter haecenus nescio qua de causa apud me occultum habuit. Ovidianos, quos erat pollicitus, codices confido illum advexisse: idque eo magis, quod & Senecae tibi factam esse copiam significas. Utinam exemplar istud Epistolarum veterrimum evolvisset, quod in Argentineni bibliotheca asservatur, hisce a me manibus tractatum! Sed non omnia possumus omnes. Meum interim hinc vides, de quo non ausim bene augurari. Locus Ovidianus, quem optime interpretari visus es, enodandus mihi erat propositus a *Peyraredo*, is audacter emendabat,

Propinato nimium, quo plura propinet.

Ego contendi vulgatam lectionem non esse sollicitandam, quod ea veterrimorum codicum auctoritate nitatur. Nisi quod unus Oxoniensis literis Longobardicis scriptus secundo versu *mandari pro mandatis* exhibet. Recentiores turbant mirifice. Tamen placuisse mihi non nego *plura jubenda*, quod est in nonnullis. Intelligebam autem de eo, qui procurabat convivium: quod meminisset Horatium Sermon. lib. 1. Ep. vi. ni fallor, ubi de convivio agit, procurandi verbo quoque usum,

Haec ego procurare & idoneus imperor &c.

Nunc tibi in omnibus accedo & acquiesco. Alter locus a *Peyraredo* propositus erat ex lib. 11. vers. 95.

Et tamen ulla viro mulier non expedit, inquit.

legebat ille,

Et tamen illa viro mulier non expedit, inquis.

Ego, etsi scriptis exemplaribus nil juvantibus,

Det tamen ulla viro mulier non expedit, inquis.

hoc est, sui copiam faciat. Meministi illorum,

Quae dant, quaeque negant, gaudent tamen esse rogatae.

Plura exempla sunt in promptu. Uter nostrum locum rectius emendarit, tu iudica. Versus proximus male intelligitur a *Bersmanno* de urina, nec verius ab alio interprete de femine genitali. Agit enim de aqua, quam abluendis obscenis partibus post coitum sumebant. Pluribus de eo ad ipsum Ovidium, quia video *Scaligerum* quoque falsum fuisse in huius loci explicatione ad Propertium.

In

¹ Legitur, lib. 111. Elegiar. 6.

In Elegia de morte Drusi, cave Bersmanno credas, vetustos codices jactanti, dum pro *inviolata* reponit, *meruisse*. Nam primo vetustos ejus poematii codices qui vidisset haecenus, inveni neminem. Recentiores tres quatuorve ipse evo vi, tum ex primis editionibus totidem aut plures, Sed illo loco conspirant pro vulgata lectione. Existimo ego *Bersmannum* incidisse in exemplar typis descriptum, cujus margini conjecturas nonnullas illeverit aliquis ex turba literatorum, quod argumentis liquidioribus probari a me posset, si id nunc ageretur. Sed de hoc poematio alias plura. Locus Fastr. 111. nuper in mentem veniebat fabula Didus.

Vincitur ars vento: nec jam moderator habenis

Utitur: at votis: his quoque pascit opem.

Turbant libri veteres, alii, *sic quoque*, vel *is*, vel *hic*. Puto ego,

Utitur; at votis vix quoque pascit opem.

Ut sit, vix etiam votis locus est. Super loco Propertii nolim diutius luctari. Vale, Vir Clarissime. Dabam Amstelodami. c1c1cclvii. a. d. xxiv. Octobr. praepropere.

EPISTOLA CCCVII.

J. F. R. GRONOVII

Nic. Heinsio.

Amstelodamum.

LUgeo, mi Heinsi, lugeo, & quidem gravissime, immaturam *Rubonii* nostri mortem. Sane, ut scribis, incomparabilis est haec jactura & literarum & omnium, quibuscum illi aliquid fuit. Id meo exemplo sum expertus, qui tam fidum in Seneca & Livio optionem habuerim. Ubi quod tu cum victurum auguraris, (& cur non primo ponis loco Claudianum tuum? sed utcumque erit, nullum illi apud me meritum peribit, vivam modo) propemodum tristius, quasi de tot vigiliis nihil reliquerit exactum usque ad sua cornua. Nondum hoc credam: sed inquire, quaeso. Vehementer etiam me conterruit in tuis illa cum Eumolpo comparatio. Quid expectem? An & illic sunt, qui noctibus sententiam vendant? Quod ne sirit Deus, nec patiatur Emporitanos tuos poenitere judicii sui, quod ducentis annis non melius fecerunt. Carmen tuum vidi libenter, & non mihi tantum, sed & multis amicis ingenium tuum probavi. *Tantaque quem virtus comeret*, & mihi & *Schelio* satis placebat. Recordabar quae ad Statii Silvas notavi cap. xxvii. *Graevius* non immemor vixit aut vivit tui: attulit codices Ovidianos, & nihil nisi occasionem mittendi expectat. Codex MS. tuus haud dubie aliqua proderit. Nondum eo potui uti, qui domo abfuerim aliquot dies, dum consobrinus *Pinciero* honores Academicos in jure Hardervici fumenti officium praesto: dein totus fuerim immerfus tractando loco Plinii lib. xxxiii. cap. 111. de aureo Romano, quem

antehac tangere non audebam, praestriktus oculos undecim summorum viro-
rum diversis sententiis. Puto me aliquid extricasse, & operae pretium habere.
Videbis, quae in eam summam conscripsi, ubi volueris, & habuero, qui de-
scribat, quia te quoque & tuas antiquas divitias interposui. Locos Ovidianos
ita continuas, ut non sit quod addam. *Meruisse*, si non est e MS. miror unde
sit: haud facile aliquid aptius reperiens. Inspice quaeso *Tristanum* tuum, &
Antverpienses nummos, num quis occuparit explicationem illius TROBS &
CONOB, quae in nummis aureis posteriorum principum toties reperiuntur.
Occo τῶ CONOB prorsus ridiculam e Cedreno apponit. Videor rem acute-
tigisse, nisi illi aut idem aut melius praeceperint. Vale, & secunda mihi quam
primum de te nuntia. Daventriac Cal. Novemb. MDCLVII.

EPISTOLA CCCVIII.
NIC. HEINSIUS

J. Fr. Gronovio.

Daventriam.

CUM Hagae nuper essem, *Christianus Hugenus*, Constantini filius, signi-
ficavit mihi in paternâ bibliothecâ extare codices nonnullos manu exara-
tos, qui *Iusti Lipsii* olim fuissent. Atque inter illos exemplar unum alterum-
que Ovidianum, quod mihi utendum offerebat. Succurrebat tum mihi, lauda-
tum me praesente a te exemplar Livii Lipsianum, quod ille in scriniis pater-
nis una cum Senecae Suasoriis extare etiamnum asseverabat. Offerebat prae-
terea, se id mihi exhibiturum, simul atque pater convaluisset, quem adversa
valetudo diu oppressit nunc paulo melius habentem. Hoc volebam nescius ne
esses. Hagam post dies pauculos denuo excurram, faxo tum mihi curae sit
ipso codices inspicere. *Rubenii* nostri mortem merito luges. Erat enim vir
ad ornandas literas unice natus. Vide, quaeso, quid exequiis ejus carminis
dederim, & lectum ad me remitte. Addo & alteram¹ Elegiam poematis Hu-
genianis dedicatam, eadem cum lege. Neutrius enim carminis exemplar
mihi superest. Miraberis tam canorum me factum, sat scio. Sed idem nunc
facio, quod viatores vacui coram latrone. Ne quid erres enim, archivorum
claves Consulibus jampridem consignavi, idque minime invitus. Videbam e-
nim undique confurgentes in me Maenadas Amstelodamenses, nec multo mi-
tius, quam Orpheum olim Thressae illae. Novi adfectus tuos, ut dubium
mihi non sit, quin adversis meis sis indoliturus; sed noli quaeso. Jam enim be-
ne jussus sum sperare; non defuturum meis fortunis patrocinium fautoris exter-
ni. Tentabo tamen prius, si quid in patriâ possim. Ego, mi Gronovi, in-
potissimâ voluptate hactenus duxi, ne quid cuiquam gravis essem: tum ab in-
imicitiiis semper immane quantum abhorruui. Videbam autem non tam aemu-
los, quam invidos mihi hîc obtigisse plurimos: quos tamen poteram tuto

¹ Exhibetur inter *Heinsii* Poëmata lib. I. II. Eleg. 4.

contemnere, si lupanar domi meae instruere voluiffem. Sed tanti nova non tuit arbor. Hoc unum velim habeas perfuafum, fcelus ab ingenio meo abfuiffe femper, & porro abfuturum. Maximam fim expertus perfidiam in iis, quos non tam effe mihi amicos credidi, quam quos effe oportuit. Sed illi viderint. τὸ *Tantaque quem virtus comeret*, Moro parum viriliter dictum videbatur. Nec obnifus fum. Soleo enim cenforibus mearum ineptiarum plurimum deferre. Nunc gaudeo tibi *Schelioque* aliter effe vifum. Quod nuncias a *Graevio* allatos codices Ovidianos, plurimum me beafti. Nam is ipfe nihil haftenus ea de re ad me. Plus dicam. *Criwitzii* famulus nuper inde redux in hanc civitatem, nihil ab illo mihi attulit praeter nudam falutem. τῷ CONOB. nihil memini ab antiquariis noftris illuftrando datum, praeter id, quod ex Cedreno parum congrue depromunt. Habes hîc *Cenalem*, quem *Bigotius* tibi promiferat. Trift. lib. v. El. III. ad Bacchum.

Sic micet aeternum, vicinaque fidera vincat

Conjugis in caelo clara corona tuae.

Zulichemianus liber, quod in aliis non inveni, exhibet, *Crefsa Corona*. Nec dubium, quin vere: meminifti illorum in arte amatoria,

Saepe reges dubiam Crefsa corona ratem.

Vale, Vir fumme, & praecipiti fcriptioni ignofce. Dabam Amftelodami. CIOIOCLVII. a. d. xx. Novembr.

EPISTOLA CCCIX.

J. F R. G R O N O V I U S

Nic. Heinfio.

Amftelodamum.

O Barbariem! o tyrannidem in medio finu libertatis graffantem! o indignitatem foediorum priore! Quae enim fi haec non contumelia eft? honeftam perfonam, de fumma republica bene meritam, tanta nominis ac literarum fama, fcripto condonari, quafi ad lenocinium damnari poena effet, ut ad bestias aut in metallum: dein, quia caftior eft iudicibus, a republica removeri. Nimirum hi quoque, quod eleganter unum & raro exemplo fecerant, non iudicio neque ex ufu disciplinae & morum fecerunt, fed brevi impetu commoti, qui animos fordidos, humiles, anguftos, nec tam bonorum fenfum capaces, cito deferuit. Aut locum facere tantummodo voluerunt, cui digniorem obftare credebant: infiar illorum, qui fictis adoptionibus aut fponfalibus, ut ad provinciarum fortem admitterentur, fubito patres aut mariti, poft tranfacta comitia repudiis & emancipationibus Poppaeam legem eludebant. Quicquid fpectarint, & illorum aeternum eft opprobrium, & atrociffima virtutis ac literarum injuria. Tu tamen bene, quum constas animo, nec cum invidiofis illis clavibus tranquillae mentis ordinem raptoribus doni fui tra-

didisti. Vetus querela est tibi non ignota: *tristis virtus Perversa tulit praemia recti: castos sequitur Mala paupertas: vitioque potens Regnat adulter.* Et, de pulvino surgat equestri. . . *sedeant huc Lenonum pueri quocumque in fornice nati.* Sunt salvae tibi sanctae artes sanctique mores: est recti conscientia: quicquid pateris, sustines, quia ab errore juvenili mature te revocasti, nec in barathrum impellentibus concessisti. Est patrimonium, cujus fructus si minus impendes posthac in nobiles delicias musei, at tolerandae frugalitati, opinor, tuae sufficiunt. Est gloria molita per omnes terras, nec egeres, etiam si cum Simo- nide naufragus nudusque in littus ejicerere. Interim velim quam tardissime de patria desperes, & quamvis longum ei des in poenitentiam spatium. Ubique maligni, libidinosi, ingrati, barbari sunt. Quod jam expertus apud Isidem, & ipsa experitur in se cum maxime, stulte opinata exteris se magis placituram ingenio, quam suis potentia & quantacumque factione, nunc vaga, miserabi- les & illis, quos laesit, poenas pendit, citius Epaphum, quam Aegyptum in- ventura. Nec tamen ἀπὸ βλήτα, undecumque apparuerint, θεῶν ἐλεγχδέα δῶρα. Sed non festinandum censeo, & his indulgendum aliquid temporis, si forte se colligant, & sanius consulant. Est denique Deus, qui castos respicit, & quantacumque mercede esse vult, seque etiam in ultimis casibus propitium ex- spectari jubet. Illi igitur commendemus fortunarum nostrarum vias, in quo ego te libenter & religiosissime juvabo. De Livio & Suasoriis Senecae mirifi- ce mihi salivam movisti. Fac impetres, quaeso, mihi utendos, & beneficii memorem fore spondeas. Diu ante calamitatem domus meae & iter Germa- nicum jusseram Elzevirios ad summum & illustrem virum Pecuniae veteris ex- emplum mittere, literasque adjungendas miseram, quae curata adhuc non nisi illis adfirmantibus credo. Piget non scripsisse me *Graevio*, ut codices Ovi- dianos vel huc destinaret: si tamen ea moles est, ut tabellarius pedes Gro- ninga Dusbürgum commcare suctus, portare possit. Est apud J. Jansonium seniore negotium mihi. Transiit nuper hac ex institoribus ejus Elias Ratel- bant, & commonstrato mihi mandato procuratorio, quo nomina domini exi- gere jubebatur, nummorum aliquid, quod ei debebam, apocha relicta, ab- stulit. Jusseram Antverpiensia Imperatorum Numismata, XII. florenis, & Quintilianum Parei, duobus ab ipso taxatum, cum primo nuntio mihi mitteret. Undecim dies abierunt, & nihil compareret: itaque incipio male suspicari. Quid sit, ex Jansonio cognosce obsecro: nec tamen hujus rei mentionem facias cum Elzeviriiis, qui forte acre laturi sint, cum illo quoque mihi commercium esse. Haec scribebam ad lucernam ante lucem. At cum ipsa luce adsunt Nu- mismata illa & Quintilianus cum literis. Itaque solutus hac cura sum, & te sol- vo mandato officio. Carmen utrumque impenſe placuit, non modo mihi, sed & *Schelio*, cui nudius tertius, (dies Dominicus erat) in prandio ea praele- gi: etsi vellemus alterius materiam non incidisse. Inclusas rogo, ut jubeas servulum tuum curare. Cenalem vidi libenter: sed ubi nunc *Bigotius*? Vale, & fortis esto. Daventriae a. d. XVI. Kal. Decemb. CIOIOCLVII.

EPISTOLA CCCX.

NIC. HEINSIUS

J. F. Gronovio.

Daventriam.

SI te colui & amavi unquam, quod omni mehercules studio a me fit haec-
 nus, nunc certe est, cur in te observando modum posthac mihi non po-
 nam, qui res & fortunas meas adfectu longe tenerrimo ac vere fraterno prose-
 quaris. Noli tamen, Vir eximie, nimium mihi indulgere in exagitandis iis,
 quos infensos mihi in hac civitate sum expertus. Si blandiri aut adulari voluis-
 sem, & fucum obtrudere uni alterique ex iis, quos ejusdem reos criminis, ei-
 demque mecum culpae obnoxios esse certò sciebam, poteram imminens nau-
 fragium securus elusisse. Nunc illos id meritò exasperavit, quod nullo un-
 quam verbo, nullâ compellatione supplicem aut dejectum me sunt experti.
 Divisum fuit hoc anno regnum inter homines non uxorios tantum, sed quod
 putidius est, inter ancillarios & meretricios. Sed fruantur illi suo ingenio.
 Unum in contentione molestissimâ probrum intimos mihi sensus, fateor, per-
 culit & afflixit: immane enim quantum id cavi semper, ne quid ignominio-
 sum admitterem. Fortunarum jactura minimum me movit. Ante exortum
 enim rixarum semper praedixi isti faeminae, quam fundi mei calamitatem ju-
 re appello, si quid turbaret publice, aut ad forum confugeret, nusquam se im-
 petraturam, ut ego sedem impofterum hac in civitate figerem: hanc autem
 emigrationem fore conjungendam cum ultimâ liberum suorum perniciem. Nec
 fore opinor, ut augurii hujus falsum me arguat. Exortis enim vix dum tur-
 bis jam tum e re meâ esse sum arbitratus, ut foris circumspicerem, si quis he-
 rus se offerret, qui diu quaerendus non fuit, sed ultro se captandum dedit.
 Hic successus animos mihi suffecit addiditque, fateor, ut ganeonis feroculi mi-
 nas & insultus insuper haberem. Tentabo hac hyeme, si conditio hâc terra-
 rum sit in promptu. Non enim desunt fautores, maxime inter Dordracenos.
 Sin minus, oblatam elabi non patiar, de quâ coram fortassis agendum, si huc
 excurras. Interim clam habere omnia sum jussus. Hesterno die Hagâ in hanc
 civitatem sum reversus. Dum illîc essem, nihil prius habui, quam Lipsianos
 codices in Zulichemianâ bibliothecâ excutere. Eos filius *Christianus* ostendit,
 ipso patre *Zulichemio* etiamnum aegrotante. Livianum exemplar geminum
 isthic vidi, alterum in membranâ, in chartâ alterum descriptum, neutrum ve-
 tustum. Membraneum tamen exemplar duas, ni fallor, decadas continebat
 diversâ manu exaratas. Suasorias Senecae nullas inveni, sed duos Declamationum
 codices sexcentorum circiter annorum aetatem prae se ferentes, & duos tresve
 libros, qui Philosophi opuscula nonnulla continerent. Si vis, ut utendi sibi
 concedantur, enitar. Extant ibidem varii auctores cum libris scriptis a *Lipso*
 col-

collati. Multae etiam epistolae, Scaligeri, Casauboni, aliorum ad Lipsium datae. Praeter Tristium codicem, ex quo τὸ *Cressa corona* nuper deprombam, Metamorphoseôn etiam exemplar inde depromsi, caetera quidem non magnae rei, sed quod emendationem ex meis non pessimam confirmaret lib. vii. in descriptione magicâ Medae,

Colligit exceptas lunae de nocte pruinas.

cum variare codices deprehenderem, atque ex iis tres quatuorve exhibere *luna de nocte*. Unum ex tuis, *per lunam nocte*. Alios aliter. Vetustissimum Florentinum S. Marci, *Lunae per nota*, facile subodoratus sum legendum *Lunâ pernocte*. Quam lectionem interlinearem Zulichemianus ostentat. Sed heus! inveni ibidem ante paucos dies fastos Ovidianos cum veterrimo codice satis accurate collatos. Manum collatoris non cognosco, nec enim est *Lipsii*. Ipsum codicem indignis modis fuisse interpolatum fidem facit collator, qui passim monet, suo loco veterem lectionem fuisse abrasam, non tamen id tam pertinaciter, ut non multae lectiones optimae supersint: quas tamen potissima ex parte jam occupavi, quantum primo conspectu apparuit. Sed exultavi fateor ad unam emendationem, quam isti codici debeo. lib. i i. Fast. meministi sacra inferna deae Tacitae describi. Ubi inter alios hi versus occurrunt vers. 578.

Quodque pice adstrinxit, quod acu trajecit abená,

Obsutum mentâ torret in igne caput.

Sic plerique codices. At vetustiores quatuor aut quinque, *Obsutum mentae*. Non expedi mihi. Scio *Mentam* nympham a Persephone in herbam ejus nominis mutatam. Sed quodnam *mentae caput*? Codex Zulichemianus, ne diu te teneam, *menae*. Legendum *maenae caput*. *Maena*, quae Graecis μαινίς, piscis minutus. Cujus & Persius Satyrâ i i i. meminit. Et Arnobius lib. i i i. ubi Neptunum *pistricum* & *maenarum dominum* vocat, & Cicero lib. i i. de Finibus, ubi maenam acipenseris opponit, pisciculum vilem pisci delicato & pretioso. Meminit & Plinius passim. Nec quaerendum, cur piscis, animalis muti, caput adhibeatur sacris Deae Tacitae. Plus dicam. Eustathius in Homerum τὸ δὲ μαινέας deducere videtur etymon τῆς μαινίδος, quem audi, θύεται μαινίς τῇ ἑκάτῃ; ταῦτον δὲ εἶπεν τῇ σελήνῃ. Ἀφ' τοῦ δοκεῖν εἶναι οἷς μανίων αἰτία εἶναι. Habes igitur alteram causam, cur hostiles linguas hoc pisce incantarent. Caeterum quod ait Eustathius ejus usum in sacris Hecates fuisse, etiam hîc ad rem facit. Idque ipsum confirmat Antiphanes Comicus ἐν Ἀγροίῳ apud Athenaeum lib. vii. ubi μαινίδας ἢ τεργλίδας pisces ἑκάτης βρώματα appellat. Capita maenarum pro medicinâ fuisse Plinius te docebit. Plura non addo. *Rubenii* nostri uxor maritum est secuta. Distrahetur itaque bibliotheca δὲ μακαρίτης. Habes hîc a *Gervatio*: quas mihi curandas commisisti, recte curabuntur. *Bigotius* an ad suos sit reversus haud scio, nusquam enim scripsit, ex quo hinc se proripuit. Nobilissimo *Schelio* salutem adscribo, cui me totum voveas velim. Vale, vir summe. Dabam Amstelaedami. A. CIIOCLVII. a. d. xxx. Novembr.

EPISTOLA CCCXI.

NIC. HEINSIUS

J. Fr. Gronovio.

Daventriam.

Quod postremae meae pollicebantur, Vir Eximie, curae mihi fore simul atque Hagam pervenissem, quo excursum tunc parabam, ut quos in Zulichemianâ bibliothecâ Senecae codices manu exaratos offenderam, tibi impetrarem utendos, id quantâ potui fide ac sedulitate dedi effectum. Ac primo quidem ejus opuscula Rhetorica ut ad te mitterentur petii, quod meminissem ac certò scirem non delibatos esse a *Lipfio* hos codices. Iis ubi eris usus, reliquos ad philosophiam pertinentes non denegabit *Zulichemius*. Nam omnes simul si flagitasssem, ne expugnatu difficiliorem is se praestaret metuebam, ac praevidebam fore, ut aegre postulatis meis gratificaretur. Codices sunt ante annos ferme sexcentos scripti, uterque Senecae patris. Opinor tres ad minimum superesse alterius Senecae nihil recentiores. Aveo doceri, ecquid instituto tuo emolumentum ex hoc subsidio accesserit. Commentarios tuos de Sestertio recte curatos ne dubita. Id ipsius *Zulichemii* literae tibi adfirmabunt pluribus, ni fallor. Ovidianos codices a *Graevio* nostro quatuor accepi, duos *Metamorphoseôn*, fastorum unum, unum itidem *Heroidum*, sed recentem. *Fasti* DC. annorum, nec tamen magnae rei, quantum primâ fronte apparet. *Metamorphoseôn* codex alter *Fastis* vetustior: sed nec ejus praestantia antiquitati respondet. Alter enim plurimis in locis melior. Ait tres alios in eadem bibliothecâ asservari cum *Claudio*, quorum usus sit sperandus, ubi hos receperint *Erfurtani*. Lib. II. *Metamorph.* in fabula *Callistûs*,

Neve preces animos & verba precantia fleant.

Multum fateor me exercuit hic versus. Nam quid inter *preces* & *verba precantia* intersit non video. *Barberinianus*, ni fallor, *verba superflua*. Sed ejus suspecta est auctoritas. Puto scribendum, *Neve truces animos per verba precantia fleant*. *Truces animos*, ut *epist. Phaedr.* *Fleite truces animos*. Sic & alibi. Excerpta *Fastorum Zulichemiana* sunt sane praestantissima, multasque correctiones ex aliis libris depromptas confirmant. Est tamen & ubi suggerunt quid novi. Ut in illo de *maena*, quod proxime tibi communicabam. Nunc ecce & aliud: sub finem libri V. *Fastorum* recordaris describi pugnam inter *Apharei* & *Tyndarei* filios commissam, ubi isti versus occurrunt,

Liber ab arboribus locus est, apta area pugnae:

Constiterant illo nomina fida loco.

Nihil, fateor, de mendo subodoratus sum. At codex ille praeclare,

Constiterant illic. nomen Aphidna loco.

Intellige autem de *Aphidna* *Laconicâ*, non *Atticâ*. Ne dubites, vide *Ste-*

Tom. III.

Bbb

pha-

phanum in voce Ἀφιδνα, ubi hanc Leucippidum patriam facit. Quanquam Pindarus & Theocritus in Messenio tractu prope tumulum Apharci pugnam fuisse commissam testentur. Sed inter horologia citius conveniat, quam inter poetas. Prodiit tandem eximium opus historiae Grotianae: nec dubito ejus jam tibi copiam esse factam. In poematis Herois nostri, quae hîc mitto, miraberis sat scio nimiam verborum licentiam, obscaenitatem fere dixeram: in epigrammatis potissimum & eo dramate, quod operis totius est postremum. Velim id a te & nobilissimo *Schelio* attente legi, ut sit, quod rideatis. Mortualia enim non sunt, ne tu nugas esse dixeris. Venio nunc ad illum nuncium, quem mihi funestissimum, tibi etiam flebilem, invitus, sat scio, excipies. Vir omnium longe optimus & maxime officiosus, *Cassianus a Puteo*, in vivis esse desiit. Nec ille tantum, sed & *Natalis Rondininius* Cardinalis *Rondinini* frater, juventutis Romanae doctissimus & cordatissimus. Dignus tuis lacrymis hic casus, si virum novisses. Mitto ipsius *Furstenbergii* literas cum versibus nonnullis, politis sane: ut videas in aulâ istâ non prorsus jacere literas. Eos cum additâ epistolâ, ubi commodum erit, ad me reverti velim. Ad *Zulichemium* si quid responsi paras, mitte quamprimum. Ego enim Hagam post dies sex septemve sum recursurus. Vale, Vir unice, & Heroi *Schelio*, cujus quotidianam consuetudinem parum abest quin tibi invidcam, me commenda. Dabam Amstelaedami. A. MDCLVII. a. d. xxiv. Decembr.

Audivisti facinus atrox ab illa Principe perpetratum nuper, quam nos omnes in oculis olim tulimus. En quo crudelitatis recidit Mezentianae theologiae candidatus animus? Celtarum quidem publico odio haec laniena tantopere illam exposuit, ut ei urbe Lutetiâ, quo properabat, regiâ auctoritate sit interdictum, ne piacularis victima & ipsa indignabundae plebi mactaretur.

EPISTOLA CCCXII.

J. FR. GRONOVIIUS

*Nic. Heinsio.**Amstelodamum.*

EGO vero non succenseam? non querar? non conviciar? Atqui polliceor tibi, nisi demetur injuria, & fueris in integrum restitutus, nunquam fore, ut reminiscar tam foedi ac multiplicis facinoris sine precibus Thyesteis. Quid si nos taceamus, an etiam tacebit posteritas, cui nihil tuorum neque prosperorum neque adversorum potest subduci? Me miserum, in tanta multitudine neminem reperiri mentis tam sanae, ut hoc cogitet? ut alios moneat terreatque? ne amicum quidem nostrum, nigellum illum cathedralicum ministrum! aut si quis cogitat, si monet, adeo hebetes ac stupidos immanesque esse caeteros, ut mordeant tantum frenum, & quid verecundia posteritatis sit, nesciant. Nimirum hoc nobiscum inique agitur, inter ignotos ignorantesque nostri vivimus:

mus: qui per caliginem & e longinquo nos nosse coeperunt, hoc est, animadverterunt paullo plus valere vulgo, invident, & ne se contemnere videantur, nos nosse dissimulant. Si omnibus vinculis tenerere, tamen aequum foret te liberari querela, & frangi potius venerandam legum potestatem, quam hominem in exemplum natum summo jure, quod summa injuria est, perdi, ob pauxillum & sine malitia peccatum. Nunc innoxius damnaris, & ad injuriam obtinendam non contenti semel fecisse, quia interceditur saevientibus in caput, saeviunt in fortunas tuas. Non possum exprimere verbis, quanta labes seculo, quanta florentissimae urbi inuratur, quam denique me pigecat temporum. Laudo tamen, cum ad hominum insolentissimorum genua non jacuisti, cum ipsum scelus clementer fers, solo probro te angi confessus. Id quoque jam callum obduxisse debet, & tamen eo nihil tibi crimini datur, quam quod deceptus ore & fronte aetati ludum dedisti in ea, quam tota laeva (ignoscat mihi genius tuus) respicere non debueras. Tua probitas, & quod cum Cressa cretissandum fero vidisti, te prodidit. Igitur consiste, ac mane in hac animi lenitate, & nos potius quam te indignari sine, vel ideo, quod lenes in injuria se potius quam hostem cogitant, & tectiore latere discedunt, & tempora sua commodius opperiantur, quam impatientes. Et quamvis expertus quorundam, quos fidissimos putasti, turpissimas prodiciones, idenditem dic tibi, παρ' ἐμοιγε, ἢ ἄλλοι, οἱ κ' ἐμὲ ἱμῆσουσι, μάλιστα δὲ μητιέτα ζεύς. Livios MSS. si commu-
care mecum dignabitur illustris *Hugenius*, habebo acceptissimos, & meritam ei laudem publice rescribam. In Ovidii utroque loco applaudo tibi mirifice. *Maenam* memini & Plauto appellatam in Poenulo a. V. sc. V. *Deglupta maena*. Ita enim MSS. quod cum probasset Turnebus, redit tamen ad *degluptam*, nescio quomodo, *Maenadem*, pro viro molli & obscoco, quae & *Salmasii* sententia ad Tertull. de pallio pag. 34. *Deglupta*, inquit Turnebus, *verbum turpissimum*. Certe cum dicitur, *Glubit magnanimos Remi nepotes*. At non cum dicitur *pecus deglubere*. *Deglupta maena* simpliciter & sine obscaenitate est exuta pelle. Ut quem vocarem, *een afgestroopten ael*. Deglubuntur alii pisces, alii desquamantur, cum parantur culinae. Ad *Gevartium* hîc habes. Bibliotheca *Rubenii* si distrahetur, fac mature nanciscamur catalogos. Ex auctione *Riveti* consecutus sum Juliani opera, & Lysiae orationes, & *Sirmondi* Propempticon, Facundum, Augustini sermones, Alcinum Avitum, Goffredum, Petrum Cellensem, ne tu me putes desuisse libros emere. A *Fabricio* accepi fascem cum *Salmasii* ad ipsum epistolis: in quarum una exagitur *Boxhornii* carmen in excessum Cunaci, sed fere, ut solet, cavillando. Vale, meum decus, & tempestatem illam, quae te premit, vince, non animo tantum, sed & fortuna. Daventriac. a. d. xv. Cal. Jan. anni, quem tibi feliciorum hoc praesenti omnino.

Est locus de bello Africano auctoris cap. XL. *capti conservatique parem gratiam in fide partienda praestare voluerant*. Vide quaeſo num differat *Torrentianus* codex, nam ad illa, in *fide partienda*, aliquid notavit *Lipsius* in exemplari suo, & quidem praeposita T litera, quod assequi nulla ratione possum.

J. FR. GRONOVII
EPISTOLA CCCXIII.
NIC. HEINSIUS

J. Fr. Gronovio.

Daventriam.

Zulichemianas Musas meâ curatas operâ ad te jam pervenisse confido. Interim ex tuis longe jucundissimis invitatus percepi, stomachari te etiamnum, & succensere iis hominibus, quos de me non bene esse meritos recte judicas. At illi mirifice in eo sibi placuerunt, mi Gronovi, & placere pergunt, ne tu speres fortasse meliora. Tecum hîc sentit Amplissimus *Beuningius*, & fremit ob indignitatem facti, sed nil propterea promovetur. Neque ego ita sum meus, aut tantum juris habeo in adfectus moderandos, ut concitatum haud raro mihi fuisse bilem inter tricas molestissimas versanti ausim negare: invenitamen, quo commotos animi fluctus componerem recordatus istorum, Patria est, Pamphile. Utinam boni isti viri, quos potissimum causae meae adversos sum expertus & mihi insidiantes, impuras atque illotas manus, quibus perditissimam mulierem contrectarunt, rei publicae castius & religiosius admoverent! Sed illi jampridem pro scorto ducunt, quicquid publicum est. In me uno si quid peccarent, facile id iis ignoscerem atque indulgerem. At tu miraris nil praesidii mihi fuisse in illa, arbore, sub qua non unam Thisben fuisse jugulatam rumor fert constantissimus, quasi colorem illa non mutarit jamdudum, & a candore degeneravit, si tamen unquam fuisse candidam sit verisimile. Est mihi in promptu querela multiplex de hominis istius nequissimi perfidiâ ac malis artibus, quas non tantum armavit ad me exponendum pollentis auctoritate faeminae inimicitias, sed nuper etiam exeruit intercipiendis literis non unis, quae ex Galliâ atque aliunde ad me mittebantur. Relinquamus igitur illum suae indoli & Diris Britannis exagitandum. Quid multis? Patriam ego novercam experiri malo, quam illa me privignum experiatur. Non invideo hoc gaudium adversariis, ut laetentur me privatim peccasse, dum mihi integrum sit dolere, quod illi peccent indies in rem publicam. Tua alloquia, Vir amicissime, tantum solatii mihi ferunt, ut adversorum sensum magnâ ex parte si non tollant, mitigent certe ac obtusiores reddant. Tanti propemodum erat esse infelici, ut experirer post res turbatas amicos mihi non deesse certos ac constantes, & quidem tales, quorum virtus & merita non sint obliteranda, nisi cum ipsis literis. Ad Ovidium quae notaram non improbari a te est quod exsultem. Multus ero imposterum in locis poëtae difficilioribus tibi proponendis. In Fastis nuper eram, qui turpissime sunt depravati, etiam post meas lucubrationes. Ultimum libri v. distichon valde me torisit. Agit ibi de ortu Hyadum, quae heliace sub id tempus emergant. Sed cur eas *Sidus Hyantis* vocat? an a fratre Hyae aut matre? Non video quâ possit. Zulichemii codex & alius, *Continuum*.

1 *Al. Morum* intelligit.

numque dies fidus Hyantis erit, & Auferat in superiori versu, quod postremum amplector. Expedi me hinc si potes: tum doceas velim, an legeris *tribunal* dici aes, quod Tribuni militum in bello merebantur. De *maena* loci Plautini oportune me admonuisti, est ea vox etiamnum in Halieutico corrupta. Nobilissimo *Schelio* velim significes *Crispinum Passum* spem facere de conficiendis hac hebdomade tabulis militaribus. Vale, & me amare tui studiosissimum perge. Dabam Amstelædami. Anno *MDCLVIII.* a. d. ix. Januarii. Gregor.

Ludovicus Elzevirius Senecam Tragicum tuis illustratum notis velit edere majori formâ. Sed Leidae intellexi, te Moyardo cuidam cum reservare edendum. Fac, quaeso, sciam quid decreveris. Vale iterum. Tuas tres recte curavi.

Rubenianae bibliothecae catalogum jam vidi, libris optimis instructissimum, sed inspiciendum tibi non possum impetrare a bibliopola, qui ostendebat. Expecto cum a *Gevartio*: is certe promissit. Si non frustrabitur, acceptum communicabo tecum. Ad locum Caesaris nihil notavi ex V. C. qui mutilus sub finem erat.

Epistola Oenones Sabiniana sub finem, *Ipse pater seu rem natae male tutus haberet*, qui locus est mendosissimus, & te quoque exereuit, scriptum fuit *ceu ren natae* (unde *seu rem* factum) & pro *haberet*, *habore*, vel *habere*. Lege igitur non magna mutatione, *Ipse pater Cebren natae male tutus ab ore &c.* Omnia jam sunt perspicua. Cebrenis filiam faciunt Oenonen (vide Stephanum in *Κεβρήνια*) Parthenius Eroticis Cap. iv. Apollodorus, alii. Iterum vale, & lituris ignosce.

Has jam exararam, cum ecce promissos a *Gevartio* Rubenianae bibliothecae catalogos, quorum unum ad te mitti voluit, per majus otium responsurus curate tuis literis. Auctio habebitur die iv. mensis sequentis. Ego libros nonnullos per Pluymmerum bibliopolam, hominem probum & officiosum emendos curabo. Tibi quoque idem hic gratificabitur, si voles, sed adde singulis libris pretium, cujus intra terminos sit subsistendum.

EPISTOLA CCCXIV.

J. F. R. GRONOVIIUS

*Nic. Heinsio.**Amstelodamum.*

HUgenianos codices remitto. Alter sane profuit: in altero ut tempus perderem, a me impetrare non potui. Si quid Lucii communicare dignatur, jam expectabo, dein Livianos. Adjeci tuum volumen epistolarum, quod miror ita cum Erfurtenfi & in ordine turbato & in defectu consentire. In utroque post *LXXXIV.* *Itinera mihi*, sequitur *LXXXVI.* In ipsa Scipionis: succedunt

cedunt LXXXVII. & LXXXVIII. post hanc ponitur LXXXV. *Peperceram tibi*: & inde alter, *Expliciunt Epistolae*, alter, *Explicit liber Epist.* Illustrium illorum etiam literis virorum ut excessus non parum me commovit, ita fuit aliquo solatio Romae doctos tam docte lugeri: & quidem ab illis, qui aula potiuntur. *Grotii* historiam majorem partem legi nondum editam, eoque patientius desiderium fero. Nomen viri faciet, ut appetatur etiam a barbaris & amicis, quos nosti, nostris, qui nolunt stilo sollicitudinem adesse. Secus quid ibi, quod aut isti intelligant, aut hi intelligere malint quam reprehendere? Facinus illud Amazonicum quis non detestetur? Sane & me jamdudum pudet tam falsa ominatum fuisse. Non poteram tamen excutere misericordiam, & veniebat in mentem illius *Tulliani*: 2. ad *Attic.* ep. 21. *Ut Apelles si Venerem, aut si Protogenes Ialysum illum suum caeno oblitum videret.* Scis caetera. Et flagitia utcumque excusari poterant: in sceleribus quid faciemus? Nimirum satis exultavit & illudit foccis: cothurnos indueret, oportebat, quorum exitus eo magis horresco, quia inevitabiles videntur, & exempli interest, ut sint. Noster quoque exulceratur dolor, quo allevari debebat, quod non una illa nobis decoxit. Quod ego minore interdum, tu ingenti cum maxime mercede exeperiris. Atque id eo indignius, quo nobilius & majore animo injuriam fers, quum & patriae ignoscis, & strenua ex literis solatia petis. Age, huc convertamur, & illi potius, ut *Amyclae* silentio nostro pereant, quam perpetua sint nobis querelarum causa. Non deerunt illis supplicia sine nostris diris. Et tibi citius melior hora veniet, si patientius eam, ut facis, opperiere. *Truces animos per verba precantia* rejicere nolo. Alioqui cogitaveram, & ita edideram in privatis auditoriis meis, & *verba rogantia*. Saepe apud *Ciceronem*, oro & rogo, quod non minus *ταυτολόγον*, si *ταυτολόγον*, quam *preces & rogantia verba*, *Aphidna* & *Cebren* extra aleam mihi videntur. In quinto *Fastorum* lego:

Auferat ex oculis veniens aurora Booten,

Continuumque diem, sidus Hyantis erit.

Ubi aurora amoverit occidentem Booten, si simul traxerit abstuleritque post se proximum vel continuatum sibi diem, illa nocte sidus Hyantis erit, nempe ortum vel conspicuum. Ut alibi, *Luna fuit*. Nec possum dubitare *sidus Hyantis* ab Hyante fratre denominatum, cujus memoriam fatali sibi luctu sorores sacrarunt. Si quid melius, ex te discam. Senecam Tragicum, in quo nunc omnis sum, fateor me Moyardo promississe, mediis atque interpretibus discipulis meis, privatim a me enarratum exceperunt, & illius convictu Lugduni utuntur. Et maluissem quidem separatim auctorem ipsum a Notis poni, sed ille publica infamia abreptus, ut hoc quoque remitterem, extorsit. Si scissem Elzevirium velle, haud dubie veterem amicum novo prae-tulissem. Et si ipse cum Moyardo ea de re transigere sustinet, praeda occupantis ero. *Schellius* noster te salutat oratque, ut interdum lenti istius tabularum promissoris latus tundas ac fodias: caeterum ut injuria tua vehementissime angitur, teque (ne tu infamia aliqua, quam apud sapientes habes nullam, nisi qua est infamia bonitatis, cruciari) omnibus partibus absolvit, ita de magno &

& honesto pioque animo tuo tibi juxta mecum gratulatus. Libros notavimus *Schelius* & ego emendos, quos vides, modo ne sero. Pretium nescimus: itaque apponere cessavimus. Justum utique & justo aliquanto gravius, modo ne modum excedet, non recusamus. Si negat ille, cui mandas, suscipere, tu appone tuo arbitrio, nostro periculo: satis enim callentem hujus rei te fecit usus. Si incidimus in quos ipse malis, libenter tibi cedemus. Vale, magnum decus, & dolor noster, sed non si male nunc, & olim. Daventriae Postrid. Id. Januar. CIOIOCLVIII.

EPISTOLA CCCXV.

NIC. HEINSIUS

J. Fr. Gronovio.

Daventriam.

HUgenianorum codicum alter ille, quem negas tibi profuisse, expectationem, quantum video, meam est frustratus. Alium enim, Vir eximie, & quidem vetustiore tibi seposueram, si quid memini, cum bibliothecam herois nostri perlustrarem. Erroris nuper admonui patrem liberosque, qui in se receperunt, curae sibi fore, ut fugitivus iste cum reliquis Lucii exemplaribus tibi destinatis ad me quamprimum veniat. Sed opinor frigus intensissimum hactenus obstare, quominus promissis tibi codicibus investigandis manum admo-rint. Paucis ab hinc diebus Hagam revertendum mihi erit; tum faxo, desideris tuis ne quid obnitantur. Tragoediarum exemplar nullum illic occurrat, sive scriptum, sive cum scriptis exemplaribus commissum. Si quid ejusmodi ibi extaret, jam scires. Minime enim negligenter Lipsii omnia evolvi. De Historiâ Grotianâ recte judicas. Fortassis audebo aliquando in eadem palacstrâ desudare: scis enim annos propemodum quinquaginta nobis per τ μακαρίτην reliquos esse, quos annos ille intactos reliquerit, a tempore induciarum. Sed aditus pateat oportet ad arcaniora reipublicae scrinia hoc tentaturo, & patebit mihi fortassis. Narro enim tibi ex collegio Ordinum Generalium nonnullos esse, qui me monuerint, Patres in eo esse, ut sibi addicant aliquem Romani sermonis non ignarum, cujus operâ in literis Latinis ad Principes externos exarandis utantur imposterum. Urgent rem prae caeteris Legatus Gallicus & *Petrus Grotius*; ex Ordinibus autem *Gentius* & *Amerongius* heroes, quorum hic totus mihi militat, etiam in privatâ causâ, oblato nuper testimonio, quo adfirmet virum nobilem ex cognatis suis se praesente fassum esse, pudicitiam Lucretiae nostrae sibi quoque substratam fuisse non semel. Sed haec in sinum tuum. Certum enim mihi fixumque est nil ambire. *Slingelandus* ex legatione Suevicâ nuper rem quoque promovendam suscepit apud Ordines Hollandiae, quibus idem debere curae esse contendit. Priapum illum Amstelreda-

laedamensem, (qui aperte & impudenter nimis causam profligatissimae foeminae agit, subornatis nuper in me duobus juris consultis Thaidi patrocinatoris) turbare omnia, omnemque lapidem movere certus sum, ut hoc patrum propositum mihi intervertat. Sed vel sic alias non defore fortunis meis instaurandis oportunitates idem *Amerongius* auguratur, cujus ego benevolentiam optimo *Beuningio* refero acceptam, ut plura alia. Hagâ ubi reversus ero, plura forsâ hujus argumenti nuncianda sese offerent. Litem, quantum possum, urgeo. nam adversaria mea an ex Fabiorum gente sit, quae antiquam nobilitatem tantopere jactet, nescio, cunctando certe rem gerit unice, nec persuaderi sibi patitur, ut ad accusationes meas respondeat. Jam ter hoc nomine notata, & tantum non damnata est a iudicibus. Itaque quicquid ad illam accusandam facit, jam nunc in horum manus consignavi, ut rem omnem mense proximo confectam habiturus sim, nisi illa Pythagoricae philosophiae mittat nuncium. Me vero jampridem quaenam agant intemperiae haud scio; qui totos dies aut cantem aut poëtas tractem, fortunis interim meis plorare jussis, de quibus quomodo ulcisci commodius me possim non video. In aula Danica confugium patebat mihi a Rege ultro oblatum, si causam non tenerem, sed vide rerum humanarum vicissitudines! Princeps optimus regno propemodum excussus in eo jam est, ut exulet ipse, nisi Deus rebus ejus afflictis adsit e machinâ. De *Cebrene* & *Aphidna* correctiones meas arridere tibi laetor. De *fidere Hyantis* oportune etiam mones, sic a fratre dictas *Hyadas*, idque ipsum noster alibi innuit istis, *nomina fecit Hyas*, sed an *Continuumque diem* rescribi possit dubito. Notant enim interpretes ortum *Heliacum Hyadum* sub hoc tempus incidere, si auctoritatem habent in promptu, qua id tueantur, nil ausim mutare, sed diligentius videbo. Alius est in Fastis locus, *Dux mihi Caesar erat, sub quo meruisse tribunus Glorior*, ubi idem *Hugenianus* liber & alter *Patavinus* probae notae, *tribunal* exhibent, quod an eâ significatione alibi occurrat tu docebis, aut nemo. In consolatione ad *Liviam*, sub finem,

Nec meritis quicquam illa juvant, magis adfuit istis

Mater, bonos. titulis nomina plena vides.

Non intelligo, ut nec illa lib. 1. Art. Amat. 428.

Si non esse domi, quos des, causabere nummos,

Littera poscetur, nec didicisse juvat.

Libri veteres, *ne juvet*. Unde videbatur scribendum, *ne nihil esse juvet* ne profit, quod causaberis nihil tibi esse numorum. Illa quoque non capio eodem libro, de ancilla,

Et secum tenui suspirans murmure dicat,

Ut puto non poteris ipsa referre vicem.

Liber veterrimus *poteras ipse*. Senecam Tragicum quod Moyardo promissisti, in eo nihil a te peccatum est. Ejus exemplar MS. hîc mitto ex mea bibliothecâ, si forte profit, alterum praestantioris notae ab Equite *Puteano* donatum periit naufragio. Habui a *Langermanno*, is *Consiliarium* se creatum esse nunciat Ducis Mecklenburgici. Caeterum a *Reinesio* se habuisse, quibus signifi-

nificetur, *Barthium* apoplexiâ correptum & mente captum esse. In *Vossii* Melâ jam totus est typographus. De libris, quos in Rubenianâ auctione emtos cupiebas, tempestivius vellem me monuisses. Scripsi tamen eodem die, quo tuas acceperam, ad *Gevartium*, idque illi negotium verbis feriis commendavi. Nihil hætenus respondi tui, ne quidem de iis libris, quos per alium mihi emendandos curaram. Hagae post pauculos dies auctio habebitur bibliothecae Nomfianae, sive Arlandervenianae, in quo auctorum veterum, tam Graecorum, quam Latinorum editiones optimae ad unum omnes fere occurrunt, & pretio commodo hi libri venduntur. Catalogum manu descriptum vidi, cum Hagae essem, editum si haberem, mitterem, sed non habeo. Auctionem fortassis distulerunt, quam habendam fore die undecimo mensis hujus Gregoriano typographus indicabat. Vale, decus literarum & nostrum. Salveat illustris *Schelius*. *Crispinum Plafsum* urgebo, ut mones. Dabam Amstelædami. die. v. Martii. CIOIOCLVIII.

Crispinus Passius ait tabulam aeneam jam paratam esse: nec mitti hætenus potuisse, fluviis hoc gelu adstrictis. Docceas me velim, an *Dare exequias* usquam legeris, præterquam apud Ovidium in Fastis.

*Dat tamen exequias, nec jam suspendere fletum
Sustinet.*

EPISTOLA CCCXVI.

NIC. HEINSIUS

J. Fr. Gronovio.

Leidam.

NUdius quartus puerum ad aedes meas mittebat Ill. *Thuanus*, qui & festinatum die altera prandium prolixè excusaret, & te rogaret mecum denuo. Respondi, meam fuisse omnem culpam, qui intempestive te adduxissem. Promisi etiam me adfuturum, de te polliceri non posse, qui Leidam jam profectus esses. Invitaverat & *Vossium*, nullo præterea vocato, credo ut de studiis nemine interpellante nobiscum differeret. In prandio rursus petiit, ut se tibi excusarem, poculumque salutis tuæ dicari voluit. Elzevirium audio libros ex Galliis accepisse. Percunctare, quaeso, quamprimum, an adsit cum iis fasciculus, quem *Bigotius* jampridem ad me misit, & si adest, fac confestim ad me perferatur, ut homini longe officiosissimo die crastino, quando tabellarius Lutetiam discedet, pro munere gratias agere possim. Librum *Fabri* protinus tecum communicabo. Vale, & hoc quaeso age. Dabam Hagae Comit. CIOIOCLVIII. a. d. XIX. Martii.

EPISTOLA CCCXVII.

NIC. HEINSIUS

J. Fr. Gronovio.

Daventriam.

SEmel iterumque ante Haganam profectionem ad te scripsi, Vir Eruditissime: quas ego literas tuis oculis non fuisse fraudatas auguror. Ad-dideram iis exemplar Tragoediarum Senecae manu exaratum, sed recentioris illud, nec probae admodum, quantum ex primo inspectu licuit observare, notae. *Zulichemio* multum negotii exhibui assiduâ interpellatione, ut Senecae codices omnes, quotquot in bibliothecâ sua antiquos possidet, tuis usibus se-poneret. Nec ille obluatus est, sed demandata ab illo hac filiis provinciâ, veterum librorum minime peritis, eos obtinui codices, quos tibi minime pro-futuros ex caractere vitioso & recenti facile colligebam. Controversiarum Se-necae duo alia exhibuerunt exemplaria, prorsus ejusdem notae, cujus exem-plar alterum, quod negabas tibi profuisse. Itaque reddidi possessoribus, ne te inani ac superfluo sumtu gravarem. Tandem ad me missum est exemplar Con-troversiarum, quod vides. Id cum altero, quo jam usus es non contemnen-do, seposueram ad bibliothecam inspiciendam primo admissus. Hinc si quid lucubrationibus tuis augmenti atque ornatus accesserit, gaudebo mehercules at-que exultabo. Plures sunt Philosophicorum operum codices huic aetati nil cedentes in istâ bibliothecâ, quos postea conabor impetrare. Nam haecenus flagitationes meae parum proficiunt, siue difficilius possessorum ita tulit inge-nium, siue supinitas & in conquirendis codicibus segnities. Ego jam in eo-sum, ut *Amstelædamensibus* vale dicam, Hagam hinc emigraturus, ubi ae-state proximâ, ut spero, te complectar. Partes adversas hoc consilium vehe-menter turbavit. In quibus profligandis multum proficere me existimo, quia responsum iis ad accusationes meas nullo haecenus conatu ac sudore possum ex-primere. Ridebis, sat scio, si dixerò ad *Morum* nunc a *Thisbe* confugi, cu-jus patrocinio se credat. Impendit vir ille bonus omnem facundiam isti rei, ut mihi persuaderet laudabilem esse clementiam. Pudicitiam ejus omnibus non solummodo suspectam esse, sed communi jam suffragio damnatam. Accedere causae pessimae inopiam atque egestatem facinae perditissimae. Liti eam sustinendae non esse parem. Possit me defungi omni molestiâ, si sumtus utrim-que factos ego unus in me recipiam. De pueris alendis facile mihi cum illâ conventurum. Hoc & plura ille, sed furdo omnia. Nusquam enim efficiet, ut opere in medio aratra relinquam defixa, finem lite jam spectante. Nam si-ve tacere perget nostra, mensis unius restat negotium, ut conficiatur penitus, cum soli testes de novo sint audiendi iudicibus, a quorum confessione res pen-det: siue respondebit, testes in promptu sunt alii, qui flagitiorum haecenus in-tacto-

raactorum eam convincant, & quidem enormium ac minime ferendorum, atque hi numero non pauci. Vir ex collegio Ordinum Generalium non postremus nominavit mihi cognatorum suorum nonneminem, qui fassus sit se rem cum illa habuisse, ejusque rei testimonium mihi obtulit. Circumfertur etiam ejus imago nuda per hanc civitatem. Neu figmentum credas, Apelles est in promptu, qui fassus sit coram teste non uno, se nudam expressisse ad vivum hanc Venerem; & ne quid Paridi concederet, utramque sororem addidit huic Gratiarum uni, egregius formarum arbiter. In eo tamen urbane fecisse nostra visa est severis Amstelodamensibus, non impudice. Sed plura sunt, & forsan graviora. Atque haec haecenus. A *Rottendorphio* accepi nuper humanissimas. Proponit mihi loca nonnulla satis feliciter a se restituta in Ovidio. Ex iis tres commendationes meam editionem jam occuparunt, auctoritate librorum veterum nixae. Quarta nihil reliquis est deterior, nec a quoquam observata. Trist. II. vers. 433. ubi rescribit probabili conjectura,

*Quid referam Ticide, quid Memmi carmen? apud quos
Rebus abest omnis nominibusque pudor.*

Vulgata certe lectio sensum commodum non habet. *Faber* Leidam non est venturus, ut professionem linguae Graecae adornet. Jam de novo de te cogitatur, quod ego negotium fervide iis, a quibus pendet, commendo. Mirum, si bona sua intelligant. Vale. Dabam Amstelodami Anno MDCLVIII. a. d. v. Aprilis.

Pomponius Mela amici nostri jam fervet sub praelo, etiam Ovidius meus.

EPISTOLA CCCXVIII.

J. F. R. GRONOVIVS

Nic. Heinsio.

Hagam.

Binis tuis responsum debeo. Priores codicem Tragoediarum comitabantur, Octavo decimo demum, postquam scriptae erant, die mihi redditae, clausis viis per restagnantes aquas: ne omnem moram mihi adsignes. *Tribunal* videntur fecisse, qui parum intelligebant rō *meruisse*, non meminisse certe me usquam hac vi legisse. In consolatione ad Liviam lego:

*Nec meritis (quanquam illa juvant magis) abfuit istis,
Mater, honos. titulis nomina plena vides.*

Inducit ipsum Drusum matri pro solatio ingentem res ab se gestas. Subjicit: etsi majus in his momentum, tamen & illud pro solatio valere potest, quod virtus mea illustri gratia excepta est, quod pro ea honores & praemia tributa sunt. *Nec didicisse juvat*, non videtur mutandum: sensus, & damno est scire literas. Nosti dictum Neronis. *Nec juvat*, exponendum, & inutile vel noxium est, quod didicisti scribere, si enim nescires, non poterat cautio vel ob-

ligatio a te posci. Similis lusus Appuleji in Apologia: *Jam illa inter virum & uxorem nota collusio: qui amplam stipem mulieri detulerunt, nemo eos observat: suo arbitratu discedunt, qui inaniores venere, signo dato pro adulteris deprehenduntur, & quasi ad discendum venerint, non prius abeunt, quam aliquid scripserint. Ut puto, non poteris ita semper accepit: verba ancillae ad dominam jurantis hujus amore mori amorem, tam fidum, tam deditum obnoxiumque dominac, ut vix illa par sit aequandae fidei ejus & affectui. Dare exsequias non succurrit nunc alibi lectum. Mojardus ipse fecit, ut peccarim facilitate. Renuntiavit enim conditionem mihi, quod intellexerit, Elzevirios brevi post edituros Senecam variorum, atque in eum addituros excerpta Notarum mearum, ita suum opus vendibile non fore. Hanc mihi reddit gratiam, postquam ipsos tres menses omnes horas meas subscecivas occupatas habuit. Gevartius significat Vivianum parasse quosdam ex illis libris, quos desideraveram, quasi sibi, sed paratum mihi transdere, quanti coëmit. Illi nimio videtur, & bibliopolam (nam & illi mandarant) suum, non nostrum, negotium egisse. Non invideo homini lucellum, dummodo accipiam libros. Praebui ei mercatorem Hamburgensem, qui per nautam Amsterodamum missos (opinor enim hac illac sine periculo commeari naves) reciperet, eidemque solveret & librorum pretium & vecturam. Maluisssem tibi hoc delegare, sed saepe aberas: maluisssem Elzeviriiis, sed verebar, ne negotium inter illos esset, & abhorreret pro nummis rationes accipere. Tu si Antverpiam scribas, urge, quaeso, Gevartium. Alteras Declamationum exemplar promittentes solas quidem, sed paucis diebus post ipsum cum alio fasciculo ab Elzeviriiis accepi. Nondum adhibui, sed satis primo aspectu se probat. De lite tua & spe, quae utraque epistola scribis, gratissima. Atque utinam tandem illa prorsus liberere, haec fruaris ex sententia! Placet autem mirifice ille impudicae patronus. *Res agit uxoris? res agit ille suas.* Illa etiam *εὐαγγέλια* de Pomponio Vossii & tuo Ovidio: sed utrum vestitum notis tuis, an iterum solum minore forma exspectabimus? Lugdunenses quid de me cogitent, videbo. Si prius cogitassent, minus mihi deliberandum reliquissent. Nunc vereor, ne frustra imputent locum: commodis vincant, oportet. Nomen autem professionis privati scholis sterile, & quibus hinc maxime juventutem juvo, vetabunt qui profitentur illa quidem, sed longe secustrant. Sed nihil negotii est, si homines sint boni, & quae praefereunt, agant. In tempore autem oppriment coelibem: nam si ad secunda vota transiissem, difficilius forsitan erant moturi. Cogitabam excurrere istuc his feriis, sed rumor ille me domi tenuit. Et forsitan evanescet, ut alias. Schelius abest: sed aderat, quum priores tuas acciperem, & pollicebatur se gratiam suam apud illos, qui ex hac provincia Patribus assident, pro te interpositurum. De conjectura Graevii (hunc enim designas, opinor, quem *Rottendorphium* nominas) libens assentior tibi. Migrationem tibi bene evenire volo, Vale, Heinfi nobilissime & amicissime, & rem benegere. Daventriae. Nonis Aprilibus CIOIÖCLVIII.*

EPISTOLA CCCXIX.

NIC. HEINSIUS.

J. Fr. Gronovio.

Daventriam.

Um rei familiaris cura me avocatur, & transferenda in aliam civitatem sedes, voluptatem coactus sum mihi intercipere, quam ex te per literas convento cepi semper maximam. Nunc majorem partem defunctus hac molestia, redeo. Vir Clarissime, ad officium, quod mea sponte nequaquam intermisi. Leidenses nostros tandem aliquando frugi factos esse, & cum bona mente si non penitus in gratiam rediisse, inducias saltem pepigisse, qui te ad se evocarint, gaudeo. Quo tamen loco res sit, quid de admittenda conditione oblata sperare nos tui studiosissimos jubeas, doceri vehementer velim. De stipendio ut tecum anxie velitentur, tam sordidos fore non auguror. Quamquam ea sunt tempora, ii mores, ut ultro munificos vix sis experturus, nisi a te ipso, quanti sis, sentiant intelligi. De collegiis privatis domi tuae instituendis, per quae juventutem erudias, si paciscaris cum Academiae Curatoribus, ut id agi a te liceat, facile obtinebis, ut per amplissimos historiarum ac politices campos, ac universam antiquitatem, hoc est per regnum tuum, tibi inoffenso pede, intra privatos parietes praesertim, liceat spatari. Oportune nuper e vivis illic excessit e grege consultorum nonnemo, qui, quantum in se fuit, barbariae atque inscitiae patrociniū minime negligenter suscepit, ac pomoeria ejus latè extendit. Is erat *Jacobus Maestertius*. Sed de his coram aliquando confabulabimur. Nam dubium mihi non est, quin excurras mox ad nos, sive prospecturus tibi de aedibus, quas occupes apud Leidenses, sive etiam praesens cum Curatoribus acturus. Expecto sane adventum tuum ferve; sed eā lege, ut apud me devertaris. Idem contendet a te noster *Vossius*, sed habet ille matrem & anum & aegram, cui religiosius sit obsequendum, domi suae. Ego solus sum, nec ad cujusquam nutum me compono. In Consolatoriā Elegiā ad Liviam, feliciter reponis, *quanquam illa juvant magis*. Quam ego castigationem loci turbatissimi veram esse censeo. *Nec didicisse juvat* quomodo capiendum esset, datis jam ad te literis, ferus deprehendi. Sic Trist. II.

Hei mihi! cur didici? cur me docuere parentes?

Litteraque est oculos ulla morata meos?

Dare exequias habes Fast. IV. 849. Sed cum in optimo codice erasa esset haec syllaba, ita tamen ut prima litera appareret *J*, *Jt* scribendum esse judicavi. In Elegia tamen ad Liviam habet, si locus est integer, *At pedes exequias reddit equeſque duci*. Ex illo ejusdem Elegiae loco minime me expedio, vers. 103.

Te queritur, casusque malos, irrisaque tales

Accusatque annos ut diuturna suos

Artis Amatoriae lib. II. vers. 308.

Ipsos concubitus, ipsum venerere licebit,

Quod juvat, & quaedam gaudia voce notes.

Ita scripti quidam etiam, *quaedam gaudia vocis habe.* Sensu parum commodo. Vulgata lectio commentum est criticorum, cum de querulâ voce jam praecesserit. Vetustiores, *quaedam gaudia noctis habe.* Tu videris. Sed nec illum locum intelligo Amor. lib. II. El. XIII. *Qua cingit lauros Gallica turba tuas.* Hoc unum video, de Isiacis Sacerdotibus, quos Gallos, seu Gallicam turbam vocet. Plura erant, de quibus proxime. Nunc enim me totum accingo ad editionem adornandam optimi poetae. Accedent notae, sed breviores. De Graevii conjectura quod augurabar, frustra fuisti. *Rottendorphius* erat. Is Martialem nuper ad me misit MS. sed non bonum. Declamationum Senecae exemplar inveni inter libros meos, quod mox accipies, cum Tragoediarum altero codice, sed illo recentiori. Libros Bruxellenses jam accepisse te opinor. De Graevio totos jam quinque menses nihil audio. Non minus in uxore totus esse videtur, quam parasitus ille apud Comicum in patinis. Vale meum decus. Dabam Hagae Comit. MDCLVIII. a. d. XVI. Maji. Egeram cum Typographo Amstelaedamensi Plumerio de editione Scheliani commentarii, qui videbatur ab hac cura non alienus. Tu nobilissimum & optimum Virum meis verbis quaeso saluta. Festinationi ignosce: erat enim ad Lud. Elzevirum paranda epistola, cujus expectationem frustrari in diem crastinum diu nimis elusum, non audebam: ei addo, quam a me nunc accipies. Locus est Statii vexatissimus Epicedio in Patrem, qui cum ad partes esset vocandus in Notis Ovidianis, in transcurso eum illic emendavi. Sed volo prius scire, quid tu de conjectura nostra sentias. *Si Thessalicis Admetus in oris, Silva una retro Phylaceida rettulit umbram.* Sic vetusti libri. Una litera mutata habebis veram, ni fallor, lectionem. Si pro *Silva* reponas *Si lux.* Unus enim dies indultus Protefilao ad superos redeundi. Vide dialogos Luciani mortuorum, ubi Protefilaum cum Plutone inducit loquentem. Ibi bis terve ejus rei mentionem invenies. Iterum vale.

EPISTOLA CCCXX.

J. F. R. GRONOVIIUS

Nic. Heinsio.

Hagam.

Quod transtulisti vasa, & ex tumultu eo ac trepidatione ad ordinem vitae familiaris redisti, gaudeo, mi Heinsi, atque ut haec sedes tibi propria sit & auspiciatior, Deum veneror. Vellem, tu paria omina meis votis reddere posses. Quod quidem futurum brevi te vehementer tibi promittere intelligo: ego autem, quam mox futurum sit, atque adeo an futurum sit unquam, indies decerno minus. Vocarunt illi quidem, sed ea formula, qua, satis

fatis sciebant ipsi, neminem fore tam stupidum, ut plectus cum Aesopeo cane corpus dimitteret, umbrae inhiaret. Nam quam possint orexin facere ista frigida: *op de tractamenten en emolumenten daer toe staende?* Expectabam, atque id aequum censebat fidissimum mihi consilium *Schelius* (hinc noscas, quod etsi me invitissimus hinc mittat, tamen ob spem restituendarum literarum vult migrare, modo honeste fiat) nos igitur expectabamus, ut publicis illis litteris accederent aliquae privatae, puta unius Syndici, quibus istud aenigma explicaretur, & siquidem non placeret conditio, aliam juberer ferre. Nihil apparuit. Confirmant autem omnes mihi, qui volunt videri satis id certo scire, istum, cujus in locum nominatim vocer, non percepisse, nisi mille annuos. Quod si est, serione agunt, an derident? Respondi tamen publice caetera humane, sed ut intelligerent frustra arcessi me, si vectigalia mihi fierent deteriora. Addidi privatas ad Syndicum: ostendi quanti hic docerem: id augeri oportere, & quidem pro ratione diversae utriusque loci annonae. Mensis est solidus, ex quo cursorem cum hoc responso dimisi. Nuntii interea prorsus nulli mihi, tanquam poenitisset. Et excurrissem forte isthuc sine invidia post primam appellationem: nunc vero, praesertim, cum ita rescripserim, id haudquaquam mihi decorum ducor. Denique si nihil habent amplius summantes viri significandum nobis, nec ego quod rogem illos. Neque enim aut loci hujus, aut hominum aut morum taedet. Domum publicam colo, mihi & familiae satis sufficientem & commodam. Salarium annuum mille centum floreni. De centum accessuris in certum & non longinquum casum diploma habeo. Allegerunt in secundum ordinem, & deliberationibus voluptatibusque publicis adhibere gaudent. Dicavi libellum: laute remunerarunt. Livium: Senecam, alios non dicatos obtuli tamen in viginti exemplaribus: (tot enim assident in Curia) receperunt, & edocti de pretio voluminum, id ita renumerarunt, ut plerumque C. plus minus florenos donarent. Pecuniam veterem oblatam centum Philippis, eandem Delegati Ordinum (eo ipso tempore hac in urbe congregati: novem erant exemplaria, quae distribui) cxxv. florenis prosequuti sunt. Neque impudenter haec illis obtrusi, aut humili adulatione obrepfi, sed ab ipsis ultro semper haec facere jussus sum, quaerentibus occasionem testandi, quam grata voluntate labores meos excipiant. Hanc ego tantam gratiam temere effundam? & quasi per viatorem vix ad imperandum, ut loquebantur veteres, accitus occurram sollicito, & ad limina fastidiose admittentium excubabo? Non ea frons mihi, nec si auderem, probarem, opinor, mores meos tibi, ut adhuc probasse me puto. Frisii cum darent mille quingentos annuos, censebam conditionem meam meliorem non fieri, & censuisse laetor. Quotquot autem hic plurimum in me possunt, & acquissime mecum agunt, ita sentiunt, si videant notabilem fortunae meae accessionem fieri, se nihil me moraturos: sin, cogent & vincunt amare praesentia. De collegiis spes honesta, sed incerta, nec minimi laboris hic mihi fuit, ut adsuefacerem juventutem bona pati consilia. Etiam insusurratum mihi, ne mentionem ejus rei facerem apud Curatores: facile adsensuros illos quidem, sed pro magno imputatu-

taturos, nec citra invidiam collegarum, quum interim semel in ordinem receptum nemo impediturus sit, partim ob commune jus Professorum, quibus in quaque facultate, quicquid ad eam pertinet, privatim docere permittitur, partim ob ingenuam pigritiam illorum, qui aemulari possent. Haec in sinum tuum effudi, ut scires, quam parum etiam de eventu polliceri possint sibi tua *Vossique* & mea desideria. Neque enim negare possum longe desideratissimam esse mihi vestram amborum viciniam. Cupio etiam esse, qui pro virili, si possim, nobilissimo conventui

Vindicet antiquam faciem vultusque ferinos

Detrahat.

Sed paterfamilias sum: sed mutatio sedis sine magno emolumento gravis: & retinent hi omnibus viribus, illi petunt tanquam Caesaris candidati. Igitur haec fatis relinquemus. Locum Elegiae video me olim ad marginem ita tentasse: *Dequeritur casusque malos injustaque fata.* Quod nescio an possim tibi probare. *Dequestus* scis esse Statii. Ad Ovidii duo loca nunc quidem nihil est in promptu. Conjectura in Statio haud quaquam displicet. Libros accipi, idque illos jam rescivisse opinor pecunia soluta. *Schelius* abest. Fessus sum, & vix in haec duravi, proximum triduum ita vexatus destillationibus, ut vix caput rectum gerere possem. Postquam respiravi, quod primum potui seriae cogitationi attendere, tibi dedi. Nobiliss. *Vossium* plurimum salvere jubeo. Vale, meus amor. Daventriae a.d.v. Eid. Majas. CIOIOCLVIII.

EPISTOLA CCCXXI.

NIC. HEINSIUS

J. Fr. Gronovio.

Daventriam.

Concitarunt mihi bilem, quae scribis de frigidâ istâ invitatione Leidensium. Tu vero, Vir Clarissime, quanquam mei consilii nil eges, hoc tamen tibi mihiq; des rogo, ne hominibus tam tui ac literarum ignaris fascis ullâ ex parte submittas, aut quicquam vel minimum indulgeas. Valeant potius, & eant in malam rem cum suâ illa bonarum artium pernicie, (eam enim in sinu fovant) quàm ut tu in spem esuritionis & praesentissimi damni vasa transferas in eam civitatem, quae nihil nunc ostentat, praeter funus & cineres suae gloriae. Tanti non sunt, quos tu cum fortunarum tuarum dispendio vel levissimo eripias ex eâ tempestate, quam quia non satis assequuntur, aut capiunt sibi imminentem, eo stupidiores, mihi crede, sunt habendi. Aliter sentit amicus noster, sed inconsulte prorsus. Qui ex collegiis domesticis magnum tibi lucrum adfore auguratur. Sed recte tu atque ordine hoc, ut caetera, qui privati laboris emolumenta publico gravaris imputare. Mecum tecumque sentit *Gellius*, cum quo de rebus tuis hesterno die mihi erat sermo. Volebam tum
&

& Syndicum juniorem hac de causâ convenire, ut sanam, si possem, mentem ei inculcarem, sed illum nuptiae instantes & sponsa Delphos domo avocarant. Intelligo tamen proximis diebus convenisse Curatores, ac tum de tuo negotio nonnihil denuo inter illos esse deliberatum. Sed quid consilii ceperint haud scio. Tu jam scis haud dubie. *Strevelshoeckius*, & gener ejus *Slingelandius*, literarum satis amans, jam compellati mihi fuissent hoc nomine, sed uterque hinc se proripuit, soluto expectatione meâ citius nupero Ordinum conventu. Redituri mense proximo non desinam iis commendare salutem Academiae. Quanquam operosus satis, nec semel, jam in hoc argumento fui. Joannes Elzevirius Senecam Tragicum Notis tuis illustratum eâ, quâ volebas, formâ sese editurum minatur. Jamque operis specimen mihi ostendit. Si persistet in proposito, recte sibi consulet: nam solebat fluctuare, nec esse, cui tuto multum crederes. Optat tamen fore, ut sedem Leidae figas. Nec detrectet ex suo dare tibi annum stipendium Philipporum centum, si operâ consilioque tuis possit uti in eâ, quam minatur, veterum auctorum editione. Utinam curatores nostri, quid sibi de te sperandum sit lucri, tam probe intelligant. *Vossii* nostri Mela satis jam promotus est. Ante proximam caniculam, si sic pergat, omnia habebimus confecta. Quae ad primum Ovidii tomum pertinent, omnia hodie mitto ad Elzevirios. Notis tamen meis manum admove different, dum ipsi Ovidio nihil amplius cum praelo sit negotii. Multa sub manum nascuntur, quae ante non videram. Vellem de multis convenire te, sed metuo gravis esse. Locum in Epicedio Drusi, de quo proxime egiisti, depono tanquam conclamatum. Poteram proferre conjecturas nonnullas: sed non libet esse ingenioso in alienis scriptis, quando lectionis pristinae ductus abeunt longius a meis conjecturis. Ad reliqua loca tibi proposita nollem ἀσύμφορον accessisses. Aliquid enim dicendum mihi erit, & quando meo ore loqui non possum, alieno libenter loquor. Vide igitur, an comminisci aliquid apposite possis. Et poteris, modo vim ingenii intendas ac nervos. Libro primo *Metamorph.* ipso statim initio locus est foede depravatus

Quaque erat & tellus illic & portus & aer.

Nec constant sibi codices vetusti, Gifanius ex quatuor suis *Utque* legebat, quod & alii probarunt, & nostri nonnulli exhibent. Alii ex nostris, & quidem vetustiores, *Ut qua erat, Qua erat, Atque ubi erat, Quaque fuit, Utque erat tellus, Qua erat, Utque erat, Atque ubi erat, Ast ubi erat, Quaque ubi erat, Quanquam erat.* Et quid non? *Quaque fuit* etiam Porphyrius agnoscit ad Od. IV. lib. III. Horatii. Sed nihil est; ad quod τὸ Sic referatur in sequenti versu. Pudet initio pulcherrimi operis locum tam turbatum occurrere. Et erit tamen ex hisce omnibus lectio feligenda, quam probemus. Tu videris. Eram proximis diebus in Phaedro, eram & in Martiali. Multa occurrebant in utroque auctore, quae visus sum non infeliciter restituisse, plura, quae intacta reliqui, quod otium non esset de singulis deliberandi. *Bullialdo* jam Mazariniana Bibliothecae cura quodammodo erat demandata, ut ex ipso *Thuano* intellexi. Nunc bonus Cardinalis videtur denuo tergiversari. Romae novas in-

scriptiones curat edi *Barberinus*. Haec haecenus. In re tuâ, si operam meam opinaris tibi utilem fore, eâ unice velim utaris. Nobilissimum & nunquam satis laudatum *Schelium* velim salutes meis verbis. Vale. Dabam. Hagae Comit. CIOIOCLVIII. a. d. xxvi. Maji Gregor.

EPISTOLA CCCXXII.

J. FR. GRONOVII

Nic. Heinio.

Hagam.

PEndebam animi expectatione judicii tui, & verabar, ut tuâ duorumque benevolentissimorum nobis, *Vossii* & *Schelii* (hoc est, heu me! omnium, qui in libero Belgio literas norunt) vota pro eo ac debeo curâe cordique habere viderer. Vultis enim, opinor, uno animo, ut illa mater ac nutrix ingeniorum, quantum per unum potest, in locum restituatur pristinum. Nunc bene habet. Postquam probavi tibi sententiam meam, nihil recusor. Utantur ingenio atque instituto suo, dum mihi maneat non me prodere, nec nubem pro Junone aut Helena amplecti. Si nihil est illis subiti, ego vel Fabius: si ocquexerunt, cevebo simul: si dormiunt, nunquam a me excitabuntur. Tu quoque ne verba perdideris. Μάτην γὰρ, ἃ ν' εἶπης γε, πάντ' εἰρήσεται, & subornatum putabunt, si censent peccasse me, qui non sine exceptione ad primam sollicitationem me dederim. Sin consuetudine & negotiorum mole constantur, sponte resipiscunt, & eandem meam simplicitatem experientur. Nec spem ullam facilius projiciam, immo magno aestu me liberatum credam, si de poenitentia hominum quicquam certi intellexero. Ἐς ὧ τὸ μέλλον, quodcumque sit, quod eo levius feremus, dum Ovidio tuo & *Vossii* Mela animum avocabimus. Hos multo impatientius expecto, quam fastidiosos Palladis vocatores. Quaque erat ἔ' tellus, mihi quoque suspectum tanta reddit varietas. Nec tamen video, quod ei, non dico praeferam, sed vel comparem. Nisi forte Quaque fuit. Nam τὸ sic non indiget alia superiori particula, sensus enim: ita fiebat, ut tellus esset instabilis, unda innabilis, aër caecus. Eadem prorsus in parte, serie, & congerie indivisa indistinctaque erant terra, mare, coelum: ita eveniebat, ut &c. *Schelius* in praediis suis, ni fallor, aedificat. Vale, τὴ μὲν σέβας μέγιστον, & me ama. Daventriae Kal. Jun. Julianis CIOIOCLVIII.

EPISTOLA CCCXXIII.

NIC. HEINSIUS

J. Fr. Gronovio.

Daventriam.

DE delato tibi a Leidenſibus noſtris honore lentum eſſe negotium & video & indignor. Sed raro illi conveniunt, nimirum vix ſemel toto trimeſtri ſpatio, idque aliud agentes plerumque, & feſtinanter, ut re infectâ ut plurimum diſcedant. Egi cum *Slingelandio* nuper reipubl. Dordracenae Syndico de iſta invitatione, apud quem ego & *Voffius* noſter tum prandebamus. Eſt autem literarum gnarus ſupra vulgarem captum. Dixi omnia pendere a nutu ſoceris *Strevelshoeckii*, apud quem ſi rem urgeat, dubium non eſſe, quin egregie ſit conſulturus bono publico. Promiſit ſe facturum. Atque ita diſceſſimus. In *Voffii* Melâ pars fere tertia typographis conficienda reſtat. In Ovidio meo parum promovent typographi. Adeo cogitationes meas avocat ac avertit lis moleſtiſſima. Eſt enim mihi pugna cum belluâ multorum capitum. Sed vel eo triumphum mihi ſpondeo ſolidiorem. In Ovidio *Quaque erat* ferri non poſſe, cum idem verbum proximo verſu denuo ſequatur, diu eſt, quod vidi. Quare aut *fuit*, aut *ierat tellus* reponendum exiſtimo. Cactera recte ſe habere tibi aſſentior. lib. III. Art. v. 61.

Dum litet & veros etiam nunc editis annos,

Ludite. Quid ſibi volunt iſti *veri anni*? an juveniles ac proinde amoribus apti? Videtur id paulo durius. Nec juvant libri veteres. Ego tamen *vernos annos* reponi debere conjicio. Faſt. III. 216.

Jam ſteterant acies ferro mortique paratae,

Jam lituus pugnae ſigna daturus erat.

Libri duo ex vetuſtioribus, *Jam tubicen lituo ſigna* &c. Eleganter fane. Niſi quod parum proprie videtur locutus, qui lituum det tubicini. Tu judica. Suſpicabar ego latere lectionem magis reconditam, quam non intelligentes muſtaſſent librarii: eam ecce. *Jam liticen pugnae ſigna daturus erat.* lib. IV. 353.

Cur vicibus factis ineant convivia quaero,

Tum magis indiſtas concelebrentque dapes

Illud *Tum magis* (ſic enim veteres; non *tunc*) valde me offendit. Utinam & te! videtur enim otioſum. Quare ſuſpicabar vocem aliquam latere, qua convivia iſta designarentur, eamque vetuſtam ac obſoletam, quam ejeciſſet aliquis ſciolus. Inire hujusmodi convivia Megalenſibus *mutitare* dicebant veteres, aut *mutuitare*. Quod ex duobus Gellii locis diſcimus. Itaque ipſa etiam convivia *mutuita* fuiſſe dicta opinabar. Libri veteres habent ex parte *ineunt*, & *concelebrant*. Quare conjiciebam

Cur vicibus factis ineunt convivia, quaero,

Mutuita; indiſtas concelebrantque dapes.

In sequenti etiam versu ad id nomen manifeste alluditur. Apud Varronem teste Nonio *mutuiter* pro *mutuo* poni scis, puto. Haec sunt somnia mera, ne forte censeas pro oraculis a me venditari. De *maena* multis suo loco disserui. Sed plurimum negotii mihi exhibuit Plautinus locus ille

Deglubta maena, sarrapis sementium.

Ita vetusti libri, in postremis nihil capio. Nam de *Sarapi* nugae sunt. Latet nomen aut piscis aut alterius rei spurcae foetidaeque. Ex illo *sementium* exculpebam *meientium*. Idque *Vossius* noster postea ostendit in veteri codice extare, qui & ipse haeret in hoc loco. Jam nimis sum, fateor, nec tamen te dimitto. Apud Propertium lib. iv. Elegia occurrit, cujus initium,

Terra tuum spinis obducat, lena, sepulcrum;

Et tua, quod non vis, sentiat umbra sitim.

Mihi versus posterior visus est menda laborare. Aliter sentiebat amicus noster. Nam cum priori jam versu dixerit, *tuum sepulchrum*, illud *tua umbra* me offendit. Quam aio esse otiosam & ingratam repetitionem, nec cultissimo Propertii ingenio dignam. Tum illud, *quod non vis*, quam frigidum ac jejunum! Fuisse longe depravatissima ejus auctoris exemplaria jam ab aliquot saeculis vel non juranti facile, si te novi, credes. In iis scriptum fuisse puto *Et tua* (vel *tula*) *invisam*. Tenebrionem postea aliquem, qui videret hiare versum, reposuisse, *quod non vis*. Quod apud Ovidium ac Martialem non minus insulse quoque inculcatum memini. At quantilli erat negotii refingere?

Et vetula invisam sentiat umbra sitim.

Neglexerat nimirum geminare librarius τὸ & lapsu frequentissimo. Damnat amicus noster, & pugnat pro vulgata: Tu utri accedis? Sed alio tempore proponam tibi conjecturas in illo auctore, quas magis probes. Vale. Nobilissimum *Schelium* nuper hîc vidimus, sed in transcurso.

Romae novum volumen inscriptionum veterum auspiciis Cardinalis Barberini editur. Urbinensis bibliotheca in Vaticanam est translata. Sed id jam ante a me monitum fuisse existimo. Sub exortum caniculae hîc te expectamus.

EPISTOLA CCCXXIV.

J. F. R. GRONOVIIUS.

Nic. Heinsio.

Hagam.

Qui tradituri sunt has tibi, egregii juvenes, *Henricus ter Borch* & *Goswinus Hogerus*, Daventriae bono loco orti, & olim perpetui fuerunt auditores mei, eo profectu, ut te *Vossiumque* nostrum, non modo ex consuetudine mea, sed etiam ex scriptis vestris intelligant atque admirentur. Itaque quum exacto hîc quoque, quod visum est, biennii, opinor, & quod excurrit, tempore, in Galliam iter meditentur, non ausi sunt communi patria excedere,

re, nisi parata, qua sciunt se una maxime magnis in peregrinatione viris conciliatum iri, tessera, notitia vestri. Jamque promiseram, praesentem me illis ad vos deductorem fore: sed quia & nunc vehementer impediior, & alioqui aut fine hujus, aut initio proximae hebdomadis isthuc mihi eundum est, impetravi, ut apud te literis meis, apud *Vossium* tua commendatione contenti essent. Ne poeniteat illos novisse causam meam, in tua est manu, si quae me saepius de amicitia nostra praedicantem audierunt, eorum fructum adventitium illis non invidas, & simul te, simul incomparabilem amicum nostrum, paulo propius atque interius inspiciendos praebeas. Feceris gratissimis, & mihi non minus quam illis beneficium expensum feres. Vale, literarum & seculi decus unicum, & me ama. Lugduni Batavorum a. d. iv. Cal. Octob. c. d. c. l. v. i. i. i.

EPISTOLA CCCXXV.

J. F. R. GRONOVIIUS

*Nic. Heinsio.**Hagae.*

Burgius & Hogerus mirifice praedicaunt mihi singularem utriusque vestrum humanitatem, quo nomine & ego me plurimum vobis debere profiteor. Oden hanc me vobis recitaturum putavi, sed quia profertur dies, nolui diutius vobis honorem & voluptatem, amico plausum ingenii invidere. Compellunt me mandare typis, quod hîc primum publice dixi. Vix tria implebit folia. Quod si imperare posses tibi, ut accineres aliquid, quo augerentur charitae, & saltem hoc boni haberent, faceres mihi gratissimum. Nam, ne ambitionem putes, quamvis amplum est a te laudari, & ignoscendum, si quis cupiat, ultro hoc unum precor, ne amorî indulgeas, & quidvis potius interponas, ut Simonides apud Phaedrum gemina Ladae sidera: nec enim quidquam nunc magis vito caveoque, quam invidiam. Debueram te & *Vossium* invitare ad haec solennia: sed primum majorem vestri reverentiam habeo, quam ut possim vobis coram inepte facere: dein (fatebor vobis indigentiam meam) possum vos invitare ad prandium, aut ad coenam, invitoque quoties huc accedetis, constituoque vobiscum, ne alio hospite utamini, sed non est, ubi vos collocem noctu. Consuevi enim habitare in aedibus, ubi dominus praebet lectos, quales jam fastidit Batavus nitor, nec vult nisi mobiles, quos ipsi apportant auferuntque inquilini. Itaque vix in usum sufficit, & in quo ipse cubo, a *Bornio* nostro commodatum sumsi. Hanc igitur culpam mihi condonabitis. Erit forsan, cum erimus lautiores. *Vossii* Melam, opus tot linguis praedicandum, quot complectitur illud vastum, quod Mela descripsit, accepi libentissime, & nunquam inspicio, quin recedam doctus. Valete, patroni mei indulgentissimi, & me amate. Leidae, pridie Liberatae urbis A. c. d. c. l. v. i. i. i.

EPISTOLA CCCXXVI.

NIC. HEINSIUS

*J. F. Gronovio.**Leidam.*

Vir Clarissime. Complures jam sunt dies, quod aedes meae occupantur a nonnullis hospitibus, ex numero testium, quorum fide mihi nunc est utendum. Quae causa est, cur ad suavissimas tuas nihil hactenus respondeam. Ut intelligas interim, nihil esse quod aut velim aut possim tibi negare, ecce ⁱversus, tumultuariâ quidem operâ & aliud agendo effusus, quos tamen spero meae erga te observantiae obsides qualescunque fore. Habebis eos fortassis aliquando magis limatos: nunc trahere te longa exspectatione nolui. Rogo has Amstelodamensi nautae cures quam primum tradendas. Est enim periculum in morâ, & quidem grande. Crastino die, si fieri possit, ut tradantur illi, ad quem destinantur, mea maxime interest. Vale. Plura proxime. Iterum commendo tibi negotium de curandis sine mora literis. Hagae MDCLVIII. IX. Octobr.

ⁱ Quibus Gratulatur Gronovio in Academia Batava Graecas & Romanas antiquitates publice professurô. Leguntur inter Poëmata lib. III. Eleg. ult.

EPISTOLA CCCXXVII.

J. FR. GRONOVIIUS

*Nic. Heinsio.**Hagam.*

Qui tradet has tibi, *Marquardus Gudius*, juvenis eximius, ingenii politissimi & rarissimae eruditionis, & scriptis editis clarus & majora moliens, *Reinesii*, *Freinsheimii*, *Boecleri* perfamiliaris, tantis nominibus te *Vossiumque* adjungere gestit. Mihi autem tantum honorem habuit, ut quod exquisitissimis ejus studiis obvia vestra tribueret humanitas, ejus me quoque ponere voluerit in gratia. Admittite: reperietis dignissimum, cui vos totos aperiat, & quem de praeclaris suis inceptis facunde differentem audiat. Vos quidem ille non nunc primum discet, sed quales dudum didicit & miratur, agnoscet. Ne quid ei denegetur, non tam illius, quam literarum interest, quas non potestis non fovere, quum propemodum soli earum dignitatem sustineatis. Valete ac salvete, Lugduni Batavorum a. d. VII. Idus Decembres MDCLVIII.

EPISTOLA CCCXXVIII.

NIC. HEINSIUS

J. Fr. Gronovio.

Leidam.

INjectâ forte apud *Bigotium* nostrum mentione veterum auctorum, theologorum imprimis, qui in bibliothecis hîc antiquis hactenus inediti delitescunt, inter illos *Polycratem* recensui, scriptorem Graecum, quem Amstelodami me vidisse inter libros rarioris notae non paucos memineram apud Cl. *Junium*. Ejus autem filius, cum institutione tuâ utatur, teque quotidie accedat, non opinor arduum tibi fore, ut certiora me de codice isto doceas, quam quae petenti *Bigotio* possum ultrò respondere. Ait salivam de scriptore hoc per meas literas sibi motam esse, ac serio fervideque instat & urget non titulum solummodo, & initium voluminis describi, verum etiam percupit doceri, uniusne tantum *Polycratis*, an plurium auctorum scripta eo in exemplari habeantur, tum cujusnam argumenti, & quam multa ea scripta sint. Praeterea ullisne argumentis possit colligi, hunc esse *Polycratem*, Ephesium illum, magni in antiqua ecclesia nominis scriptorem, cujus meminit *Eusebius*, prolato ex ejus epistolis fragmento. Ex ipso praesertim operis initio describi nonnulla optet, quae speciminis sint loco, & ex quibus de praestantia auctoris ipsius conjectura fiat. Auguror hominis utrique nostrum amicissimi desideriis non gravate te subscripturum. Erit enim & illi & mihi hoc officium longe acceptissimum: praecipue si omni mora ac cunctatione posthabitâ, quamprimum hîc nobis gratificeris. *Vossius* noster Apologiam suam praelo jam commisit; quae adversarium ejus & adversarii plausores non modice irritabit. Est enim asperior, quam velim. Etsi ego & Illustris *Beuningius* auctores illi fuimus, ut rationibus potius, quam maledictis pugnaret. Dedit quidem manum nostrae sententiae ex parte, nec tamen per omnia, nunc jacta alea est. Speram fore, ut diebus proxime elapsis praesentem te nobis sisteres: sed non comparuisti. Trist. v. El. v. in Natalem Uxoris occurrunt illa.

Omnia nunc credo: cum tu non stultus ab Arcto.

Terga vapor dederis.

τὸ non stultus parum probatur. Tu videris. *Rhodius* abiit ad plures. Vale, Vir Eximie. Leffenium quaeso bibliopolam mone, aut moneri per tuos jube, ut, si quos mihi libros in auctione postremâ addixit, eos ad me perferri quamprimum curet. Maximè si inter Theologos in folio scripta *Theologorum Wittebergensium* amoebea, & *Hieremiae* Patriarchae Constantinopolitani emta sunt, quod negotium affinis tuus in se receperat. Est enim post dies pauculos liber ille in Gallias mittendus. Iterum vale.

Dabam Hagae Comit. cicioclviii. a. d. xii. Maji.

EPI-

EPISTOLA CCCXXIX.

J. FR. GRONOVIIUS

*Nic. Heinsio.**Hagae.*

Junio ostendi, quod scribis de *Polycrate*. Promisit curaturum, ut aut quae petis, notata, aut ipsum librum propediem hîc habeamus, quo ipsi notare possimus. Lessenius pollicitus est te cras habiturum, & quos ipse, & quos affinis meus emit. Sed *Witebergensium* & *Hieremiae* scriptorum volumen elapsum est ipsi, dum *Golio* producenti horam operam dat. Habet Hackius, & haud dubie, non tam parvo dimittet, quam nactus est. Accepi hodie mane literas a *Maresio*, in quibus haec erant: *Ante paucos dies mihi aderat amicus vetus Ampliff. Graswinckelius, qui referebat se audisse quasi ex ore tuo, me calamum stringere in celeberrimum Vossium. Miratus sum, unde ille rumor: nam ut patrem habui, quoad vixit, inter amicos, sic nihil minus cogitavi, quam filium laceßere vel offendere. Ad haec ut jam senesco, ita compono me paulatim ad quietem, tantum abest, ut velim extra meum chorum saltare.* &c. Fac quaeso haec resciscat amicus noster. Fac etiam credat pro certo inter illum, quem indigne fert, dixisse de bonis fociis, & alterum, nihil prorsus intercedere familiaritatis, etiam propter factiones, adeo ut toto anno non videant se, nisi in senatu. Nec se immiscebit alter, nisi laceßatur. Vale, meum decus. Raptim III. Id. Majas CIOIOCLIX. Si fieri poterit, die Saturni adero.

EPISTOLA CCCXXX.

NIC. HEINSIUS

*J. Fr. Gronovio.**Leidam.*

Modo tuas accepi, Vir amicissime, ex quibus lubens intelligo, de *Polycrate* negotium tibi curae fuisse. Reliquum est, ut alterum de *Hieremiâ* Patriarchâ, si fieri possit, conficiamus. Urget enim scriptorem illum & fervide flagitat *Bigotius*. Tenta igitur quaeso, an Hackium expugnare possis, qua vales apud illum auctoritate, ut librum a se emtum, eo, quo distractus est, pretio, tibi concedat. Sin minus, adde aliquid pretio, ut amico gratificemur. Quas feceris hac in re expensas, eae tibi apud me paratae jam nunc sunt, & adventum tuum operiuntur. Quo minores tamen erunt, eo acceptiores amico nostro futuras facile intelligis. Doleo affinem tuum auctioni non po-

potuisse vacare sub id tempus, quo liber est distractus: hic enim unus mihi instar reliquorum erat omnium; quod non mihi posceretur, sed amicissimo capiti: cujus operam in officiis longe majoris rei utilem mihi & necessariam quotidie experior. Certus igitur esto fore, ut duos una hac operâ demerearis, me, inquam, quem multis jam ante beneficiis tibi addixisti, & illum, qui virtutes tuas ac eruditionem summam pro magnitudine suâ mecum metitur. Vale, & ut polliceris, die Saturni proximo expectandus veni. *Vossium* nostrum monebo de iis, quae *Maresium* spectant. Apologiam ejus, si statò die nobis aderis, typis descriptam haud dubie hîc offendes: in eâ enim se exercent operae. Dabam Hagae Comit. CIOIOCLIX. a. d. XIV. Maji.

EPISTOLA CCCXXXI.

J. F R. G R O N O V I U S

*Nic. Heinsio.**Hagam.*

P*Olycratem* illum falso creditum tractavi & inspexi. Nec diu, quum clamavit se non *Polycratem*, sed *Athanasium* esse. De quo ne dubites, en tibi duplex principium & indicem operis. Est etiam credibile, hoc ipso codice usum esse *Comelinum*, quum *Athanasium* ederet. Nam ex auctione *Sixtini* comparatum audio. Cras, Deo volente, aut perendie me videbis. VIII. Cal. Jun. CIOIOCLIX.

EPISTOLA CCCXXXII.

N I C. H E I N S I U S

*J. Fr. Gronovio.**Leidam.*

Commendatitias, quas affinis tuus hesterno die a me petebat, Vir Clarissime, ecce, mitto. Eram praeter solitum tum occupatus, unde factum, ut eas praesens praesenti non tradiderim. Si tempestivius paulo me monuisset, ad plures amicos scripssisse poteram. Nunc instar omnium sit noster *Bigotius*, qui, cum bibliothecas & viros urbis eruditos omnes in numerato habeat, & ubique sit admissionis intimae, qua est benignitate, affini tuo facile in omnibus grâtificabitur. Plura in rem ejus si praestari a me posse opinaris, noli dissimulanter mecum agere. *Vossii* nostri responsio, puto, jam prodiit in lucem, aut prodibit hodie. Apud Ovidium lib. VII. Met. in fabula Aesonis,

Verba simul fundit, terrenaque numina lenit.

Non constant sibi libri veteres, quorum plurimi, *numina poscit.* Alii *mulcet,*
Tom. III. *Ecc* *&*

& similia. Duûm veterrimorum alter *levit*, alter *livit*: & pro *fundit*, *fudit*. An *linere* pro *ungere cibo*, aut perfundere & aspergere? Si exemplum similis locutionis habes in promptu, juva me, quaeso. Vale, Dabam Hagae Comit. MDCLIX. a. d. ix. Julii.

- *Bigotium* affinis tuus apud *Menagium* inveniet, cujus est convictor *au clostre nostre damme*, nisi Rhotomagi etiamnum haeret apud patrem, qui illic praeses est: eo enim mense proxime elapso est profectus, nec haftenus inde in urbem rediisse se nunciavit.

EPISTOLA CCCXXXIII.

J. FR. GRONOVIIUS

Nic. Heinsio.

Hagam.

Narro tibi, Heinsi Nobilissime, fortunam hesternae diei. Venit ad me Criticus novus: *Johannem Guilhelmum Capoferreum* se vocat. Pollicebatur in Tragoediis Senecae nihil a se mendarum relictum, & petebat quod hujus rei causa scripsisset, typographis commendarem. Miranti & ambigue respondentem ostendit jam editum Lipsiae¹ animadversionum in *Classicos Auctores lib. 1.* qui est in Ovidii *Metamorphosin*: sed multo splendidiora promissa, in reliqua Ovidii, in Corn. Nepotem, Petronium, Vellejum, Plinium, Curtium, Claudianum singulos libros: tum praeterea in varia loca omnium. Sunt quidem nonnulla tibi jam aliisve observata, quaedam confidentiae ingentis: reperi tamen primo intuitu locum similiter a me emendatum, quod etiam confestim in exemplari meo illi ostendi. Scis in lib. xiv. *Achaemenidae*

Hac mihi si potior domus est Ithaceque carinâ.

Ille hanc e levissimis suis conjecturis se ducere aiebat, & longe nobiliores certioresque in libro suo proditas. Monui omnino te illi salutandum esse: quicquid in Ovidio tibi probaret, in eo me quoque plausorem habiturum. Et promisit se facturum, ubi *Amstelaedamo* rediisset, eo enim prius excurrendum sibi. Volo, resciscas per famulum, an ille, quem aiebas vicinum affini tuo habitare, sit *Adolphus Henricus de Raesfeld*, Dominus in *Twickel*, & gener Comitis de *Flodorp*: habet enim duos fratres, ex quibus alter, ni fallor, etiam jam rempublicam tractat, & legatione aliqua fungitur: dein, nunquid in praefens sit Hagae. Vale, decus meum. Lugduni a. d. vi. Cal. Quintil. MDCLIX.

¹ Hunc Ovidii editioni novae adjiciendum curavi.

EPISTOLA CCCXXXIV.

NIC. HEINSIUS

J. Fr. Gronovio.

Leidam.

Beavit me profecto tuus ille nuncius de novo e Germaniâ Critico. Vix tuas attentâ lectione hauseram, cum is ipse, quem tu ad Amstelaedamenses profectum esse narrabas, supervenit hesternâ vespërâ. Hodie, ad Ovidium quae notavit, perlegi omnia. Quid quaeris? Sacpissime aberrat a scopo. In multis tamen verum mihi dixisse visus est. Nec offendor ejus erroribus. Miror magis, hominem ludo literario innutritum, & rebus adversis oppressum, tum, quod rei caput est, omni veterum exemplarium ope destitutum, adeo sagacem fuisse in indagandis errorum fontibus. Frigidâ, sat scio, hominem perfudi, qui tot ejus observationes jam aut a me, aut ab aliis deprehensas invito, quod facile credas, ostenderim. Sed vel sic hortari non desinam, modo me rursus accedat, quod jam pro virili feci, ut telam, quam feliciter auspicatus est, pertexat. Fraudatus fuit hætenus, quantum apparet, consuetudine literatorum hominum. Quod cave credas vitio a me verti. Nam vel sic causas mihi aequissimas esse agnosco, cur hominis a fortunâ parum instructi ingenio adsurgam. Denique ne quid virtutis aut eruditionis in illo desideres, etiam poëtam se profitetur. Vir est liberrimi ingenii, & qui hac potissimum de causa Saxoniae solum se vertisse prae se ferat. Tu hortare illum, ut pergat in auctoribus antiquis illustrandis esse diligens. Et de typographo, si potes, illi prospice; cui specimen aliquod lucubrationum suarum committat edendum. A Seneca tamen manus vellem abstineret, ne post te Roscium saltaturus deridendum se praebeat. Atque haec hætenus. *Rasveldius* ille, quem quaeris, non is est affini meo *Goesio* vicinus, sed alius nescio quis, qui frequenter quidem ad nos ex Geldriâ excurrit, nunc tamen neque est in urbe, neque quando sit huc venturus satis scitur. Ita ex iis modo intellexi, quorum hospitio solet uti. Nihil tamen impedit, quominus vel sic nos te quamprimum hîc videamus. Es enim venturus & mihi & nostro *Vossio* optatissimus. Vale, decus nostrum certissimum, & si *Capoferreus* te accedat, fac quaeso intelligat, esse suas virtutes mihi commendatissimas. Dabam. Hagae Comit. CXCICLIX. a. d. xxvi. Junii.

EPISTOLA CCCXXXV.

J. FR. GRONOVII S

Nic. Heinsio.

Hagae.

Q Uid circuitione apud te utar, frater sanctissime? Daventriae fui nuper, & mansi in sextum diem, & redii sponsus: neu dubites, *Schelius Graeviusque* subsignarunt mecum tabulas. Nomen matronae est *Catharinae Glagoviae*: pater olim urbi ab archivis, & alterius filiae maritus in eodem munere successor: junxerat priorem torum cum *Comrado Nilandio*, bono & primario cive, cujus frater *Aegidius xxxvii*. jam annum honoratum in curia, & nunc ipsum primum septimo tenet locum. Hujus Aegidii filia major nupta est fratri meae defunctae conjugis, & horum utriusque sororem duxit uxorem ejusdem filius major. Vides qui pro me absente sint procaci. Maxime optimus senex auctor his nuptiis affinem (nam & alteram vel tertiam *Glagoviam* conjugem habuit, & in hujus haeredibus liberos suos fore sperat) gavissus est penes me deponere, & postquam veneram manifestus amator, ne differrer, considerans ille, quam parum hoc tempore anni nobis ab operis ordinariis otii sit, institit. Ipsa meae aetatis, forma sufficiente in uxore, moribus laudatis & commodis, orba & testamento libero, cui haec accedit laus toti civitati cognita & testata, tres mariti prioris filios (jam cives locupletes, in his unum non modo causarum patronum, sed & eleganter doctum, & per triennium auditorem meum) ab infantia sic educasse, ut illi se novercam sensisse sancte negent. Hoc quantum apud me potuerit, facile intelligis: neque enim tam mihi voluptatem & opes, quam praesidium quaesivi meis, quibus me mitem & tenerum esse fateor. Ergo quibus commodum dicere *Hymenaeum Gronovio* & *Glagoviae*, hem tempus est: nam ut spero, tertia hebdomade genialem letulum calfaciemus. Vide an hoc ad te pertinere patiantur tempora tua. *Graevius*, ut audiit e foceris meis antehac me venturum, festinatis literis jussit me postulare *Vossium* nostrum duos libellos, per *Fr. Junium* sibi dono missos a *Mer. Casaubono*. Feci quatriduo ante discessum, & quo magis mulcerem, Lexicon illud Anglosaxonicum, quod nomine avunculi a me repetierat, simul remisi. Responsi accepi nihil. Dixit autem mihi coram *Graevio*, aliis ex *Gudio* literis intellexisse se, nescio quomodo, libellos istos a *Vossio* tibi curandos datos. Quod etsi uterque mirabamur, visum est tamen operae pretium, quid ejus sit, ex te resciscere. Ipse & *Schelius* te peramanter salutant. Vale, meum decus & me ama. Lugduni iii. Non. Decemb. Anno C. cicioclix.

EPISTOLA CCCXXXVI.

NIC. HEINSIUS.

J. Fr. Gronovio.

Daventriam.

INcredibili gaudio perfusus sum, accepto de secundis nuptiis tuis nuncio, quas instare postremae tuae significabant. Vellem equidem res meae ferrent, ut Epithalamion justum tam auspicato festo conscriberetur. Tu vero, vir amicissime, cum abunde exploratum habeas rerum mearum statum, cumque satis intelligas quantâ nunc verfer in charybdi, ignosces facile laetitiam omnem averfanti, cui vix vacet aut integrum sit plorare. Habes versus paucos, si non expectationi tuae respondentes, at tenerrimo cum adfectu effusos. Amicus noster argutatur Epicteti Enchiridion & Casaubonianam de Homero dissertationem libellos *Graevio* destinatos mihi fuisse traditos, in eo injuriosus & falsus est. Obtuli operam in iis curandis meam avunculo ejus *Junio*, qui cum responderet, se post biduum Leidam cogitare, & tum fore, ut libelli tuas in manus traderentur, nolui pluribus rem urgere. Ne interim *Graevius* noster fraudetur suo Casaubonianae dissertationis exemplari, meum en mitto. Ex Anglia Galliave si quid rerum novarum, quod studia nostra spectet, didicisti, imperti quaeso. *Holstenius* convaluit, ita Roma ad me scribitur. De novo Inscriptionum antiquarum volumine lentum omnino est negotium, quae praelum Romanum haecenus exercent, & tarde procedunt. Haec nunc. Vale, flos virorum. Dabam Hagae Comit. MDCCCLIX. a. d. viii. Decembr.

Lis mea etiamnum trahitur, & trahetur in menses duos aut tres proximos.

IN SECUNDAS NUPTIAS

Eximii ac summi Viri

JOANNIS FREDERICI GRONOVII,

Et lectissimae Matronae

CATHERINAE GLAGOVIAE.

Pertaesus vidui Gronovius otia lecti,
 Frigidaque in vacuo regna peracta toro,
 Conjugis abruptos per fata resuscitat ignes,
 Et quam sopierat Styx inimica facem.

Ecc 3

Offi.

tissimam habui. *Ei omnia fausta & pacata precor, & si qui sunt alii apud vos, qui rem literariam ornant ac tuentur.* &c. Haec ille, quorum partem velim cum nobiliss. *Junio* communicates, & meum illius responsum. Etiam *Lutetia* quaerit *Menagius*, sintne penes Nobiliss. *Vossium*, *Porphyrri* scholia in *Homerum*, rogatque ut libri titulus mittatur: parasse enim se aliquid in *Homerum*. Accipi etiam *Parisiis* specimen τ παλαιᾶς λογαρικῆς, in qua promittenda toties ostentavit se *Salmasius*, quod ad te mitto ea conditione, ut bene custoditum diligenter remittas. Primo res inexplicabilis mihi videbatur: dein saepe retrahendo penetravi & pervici. Atque adeo en tibi duos primos versus: Εἰς τὰ ἐπτακαίδεκα νομίσματα ἀπáιτει δικέρετον νόμισμα ἐν τρίτον δωδέκατον ἐξαφόλλον νομίσματα & τρίτον τεσσαρακοσὸν ὀγδοον· ὁμοῦ σὺν δικερέτῳ ἢ ἐξαφόλλῳ νομίσματα ὀκτώ ἢ δεκά ἡμισὺ τίταρτον τεσσαρακοσὸν ὀγδοον. Hoc est latine: *In septendecim solidos exige dicerati nomine quincuncem*: (i. v. milliarenfes) *hexaphollon solidi triens* (iv. milliar) *scilicis* (sex folles) *simul cum dicerato & hexaphollo solidi octodecim dodrans* (ix. milliar.) *scilicis* (vi. folles.) Sic & reliqua. Videtur, nisi aliud tibi, dignum, quod Pecuniae veteri addam: haud scio enim, simile an ullum monumentum exstet. Vides me non ita immersum fuisse amoribus, ut *Musas* interim non respicerem. Vale, decus meum, & me ama. *Lugduni prid. Cal. Flor. Tan. Faber* Aeliani varias propedum praelo daturum se minatur. Si plura desideras exemplaria, posce, quotquot libet.

EPISTOLA CCCXXXVIII.

NIC. HEINSIUS

J. Fr. Gronovio.

Leidam.

DUm responsum protrahit quotidie & procrastinat *Bontius*, multum temporis elapsum est; quam cunctationis meae causam & originem fuisse non falsus tibi persuade. Nam si tempestivius responsum tulissem, jampridem nonnihil reposuissem jucundissimae tuae epistolae, quae multâ profecto me perfudit voluptate, quod secundas nuptias ex voto tibi celsisse testata est. *Epithalamion* meum quod laudas, pro caetero facis affectu & summâ benignitate, qua mediocritatem ingenii mei fovisti haecenus & prosecutus es. In eo emendes haec tria velim, *Coniugis abruptos post fata*, pro *per fata*, deinde *Graecia cara* pro *Graecia magna*, & sub finem, *superfit amans* pro *superstes agat*, quanquam nullius pene sunt momenti. Quae doctissimus *Casaubonus* ad te perscripsit de nova Criticorum operum farragine, *Junio* nostro legenda exhibui. Is vero ex *Biaeo* typographo, nescio an alio, se didicisse affirmat commendantibus rem *Milto*no & *Gattackero* de supplemento facis criticae Gruterianae edendo cogitatum esse. Nam quod primo affirmabat jam tomum unum alterumque esse editos, id nunc ex fama se audivisse ait, cum videretur ante ea de re loqui tanquam

quam testis oculatus. Quare Casauboniana epistola dandam fidem esse censeo, falsos rumores de edendis Criticis jugulanti. Porro de Anacreonte quae *Joanni Cottono*, viro nobilissimo & literarum egregio fautori promiserit, ea se jam praestitisse mihi significavit, missis ad illum nonnullis suavissimi poetae versibus, qui lucem necdum videre. Vale.

EPISTOLA CCCXXXIX.

J. FR. GRONOVIIUS

*Nic. Heinsio.**Hagam.*

Qui has tibi tradet, conjugis meae sororis filius est, & *Assueri Strockelii*, urbi Daventriensi a secretis, olim discipulus meus, nec literarum ignarus. Cupit autem ediscere quaedam de itinere legatorum, qui in Gallias ad gratulandum destinantur: quippe suo sumtu se comitem iis adjuncturus. Vide an ipse haec illum docere possis, an alium ei monstrare magistrum, per quem discat. Et facies mihi gratissimum. Vale, vir nobilissime & humanissime, & me ama. Lugduni. xxviii. Aprilis cicioclx.

EPISTOLA CCCXL.

NIC. HEINSIUS

*J. Fr. Gronovio.**Daventriam.*

Vir & amice summe. Epistolium hoc rogo ad Cl. *Fabricium*, a quo per literas hesterno die sum compellatus, perferri cures. Agit mecum de Theologo, quem valde laudat, & credo sane laudanti. Sed cum nostri idiomatis usus potissimum requiratur, apud nostros homines, qui longe plures sunt Holmiae, quam Galli, aestuo, & amplius deliberandum censeo. Quando te visurus sim ignoro: sunt enim, quae me pedem ex hac civitate efferre non permittant. Regina Suecos suos denuo adiit, quo successu mox intelligemus. Vale, & me ama. Dabam praepropere. xiii. Sept. cicioclx. Hagae Comitum.

N. I. C. H E I N S I U S.

1875

Negotium, quod proxime commendabas, curae mihi erit. Sed ne spei fallatur amicus tuus, Vir Clarissime, jam nunc moneo, Legatos hinc non profecturos, nisi post factas nuptias, quarum videndarum desiderio potissimum illorum comitatum is mihi visus est ambire. Coram illi sententiam meam de re tota ingenue & sine fuce exposui. Si propositum nihilominus premit tenetque, nil obnitar, aut obluctabor, paratus tibi illique in omnibus gratificari. Habes hîc ¹ epithalamion, quod jussus & coactus proximis diebus scribebam, cum ab ineptiis nugisque hujusmodi abstinere maluissem. Addo & ² versus alios, sed majoris rei, quia regiae imagini addendos. Quare rogo censuram tuam, & quidem severam experiantur, ut tempestive mutetur, quicquid mutandum esse censebis. Extorserunt eos mihi familiares regii, qui nefas fore argutabantur, si herilis imago sine meo elogio prodiret in lucem. Librum Geometricum per cursores Florentia ad me perlatum, a praelo etiamnum recentem, diu est quod Cl. Golio legendum misi, & Schoteno, ea lege, ut mox lectum ad me remitterent, cum ejus excutiendi desiderio magno Amplissimus Witthius ac Christianus Hugenus teneantur, quibus eum exhibere non minus, quam Golio & Schoteno sum jussus. Mone quaeso Golium, ut libri examen maturet absolvere, ne sua cunctatione Italos suspensos tenere pergat, jam pridem scire cupientes, quid nostris mathematicis de isto opere videatur. Vale. Dabam Hagae Comit. c1010CLX. a. d. xxx. April.

1 In nuptias *Susannae Hugeniae*, quae nupsit *Philippo Doubletio*. Vid. lib. iv. Eleg. 1.

2 Vid. lib. 111. Silvar. pag. 204.

N I C. H E I N S I U S

Consuetudinis tuae desiderium impatientius, quam credis, fero. Sum praeterea in aere tuo, ut nosti, & usuram praestari jampridem tempus est. Fac igitur tribus ex te verbis intelligam, an res tuae ferant, ut diebus proximis huc excurras. Sin minus, ego tibi mox adero. Volo enim confabulari super re non una, quam in sinu premo. Epithalamium Nuptiis *Susan-*

nae *Hugeniae* a me nuper dictum jam misi, una cum epigrammate, quo Regiam imaginem commendabam. Censuram tuam imploravi; sed frustra. Nunc aliud quid nugarum mearum accipies. Vale. Dabam Hagae Comit. c1610CLX. a. d. VIII. Junii.

1 Carmen in *Monckium*, quod legitur lib. III. Eleg. 10.

EPISTOLA CCCXLIII.

J. FR. GRONOVIIUS.

Nic. Heinso.

Hagam.

Armina tua disertissima omnia recte accepi, & sane quam illis delectatus sum. Postremi etiam argumentum magnopere probavi. Euge, inter tot etiam corvos poëtas & poëtrias picas apparuit unus, qui sacro ore honesta canere, quam fortuita maluerit. Quare nihil commovere te debent, qui ajunt parum πολιτικῶς. Ita enim hodie loquuntur, ut πολιτικὸν dicant, quod Cicero ἐπικούρειον. Quisquis non omnia facit, dicit, cogitat in rem suam quaestumque, is parum πολιτικῶς. Neceffe igitur & parum πολιτικῶς sibi que inutilis fuerit, *Tempore sustinuit*. Quod pulcherrime abs te dictum, nec ego hos quidquam πολιτικώτερον censeo. Neque enim hoc titulo dignor, quod non sit cum salute & securitate patriae & civium conjunctum. Immo jam & audio ita, sive indita & jussa, sive quia blanda putant, loquentes, ut videantur velle verum reddere illud Cornelii, *beneficia eousque laeta sunt*. Ita extenuant, quo nihil ego fortius, fidelius, sapientius, felicius hoc seculo gestum existimo: & coactum poene fecisse, neque aliter potuisse. Absit, ut ita sentiant, quo palpantur. Sed utcumque est, tu laudasti meritam, & laudibus, quas agnosceret posteritas. Eadem judicio tuo pariter & ingenio gratiam rependet. Si venire voles, eris mihi hospes gratissimus. Ego, nisi aliquo Saturni die, veniam mihi nullam video ante ferias caniculares. Elzevirius tandem bona fide aggredi videtur Tragoedias Senecae. Vale. Idibus Jun. c1610CLX.

Casaubonus iterum ex me quaerit, numquid Fr. Junius praestet de Anacreonte.

EPISTOLA CCCXLIV.

NIC. HEINSIUS.

J. Fr. Gronovio.

Leidam.

IN versibus meis, Vir Clarissime, quibus *Monckium* laudavi, ut mihi visus sum, merentem, nihil a te spectari volui, praeter animum res praeclare gestas

stas mirantem. Quod ut successisse mihi lubens agnosco atque intelligo, ita voti summam excessit, quod non argumentum solummodo, sed in ipsis quoque versibus nitorem ac elegantiam commendasti. De *Casaubono* omitte sollicitudinem. Adfuit enim *Cottonus* ipse nobis, cui ego & gemina Euripidis exemplaria, manu magni *Scaligeri* passim emendata, tradidi utenda, & Anacreontem a parente meo locis non paucis castigatum. Si a *Vossio* nostro non impetravit, quae desiderabat, Anacreontis ἀνέκδοτα, *Langermannus* ea mihi petenti facile concefferit. Hoc, quaeso, doctissimus *Casaubonus* ex te intelligat. Quamquam & tu desiderio ejus potes respondere, qui Palatinum codicem descripsisti. *Franciscus* tamen *Junius* jam non semel mihi serio affirmavit, se nonnulla Anacreontis Londinum misisse, & quidem inedita, quae qualia sint haud scio. Nam amicus noster ad hujusmodi quaestiones raro, ut scis, accurate respondet. Cum tamen illo praesente spem fecissem nobilissimo *Cottono*, fore ut a *Langermanno* obtinerem Anacreontem auctiorem vulgatis editionibus; regerebat is, se longe plura Anacreontis habere, quam *Langermannum*. Sed & *Cottonum* ab edendo cultissimo poeta revocare enisus est, dum praetendit, virum nobilem, & ad haec opibus affluentem fovere literas debere, & bibliothecam domi instruere, ipsas literas non esse tractandas, nisi a minorum gentium dis, aut, ut ejus utar voce, magistellis. Haec quo consilio ille *Cottono* persuasa voluerit haud scio, scio non persuasisse. Specimen Senecae tui ostendit mihi Elzevirius, quo viso haud modice sum laetatus. In meo Nasone procedunt operae, sed testudineo gradu. Videbis tamen, quando huc te conferes sub proximas ferias, quae ad primum tomum notavi pleraque typis descripta. In Valerio Flacco sum nunc totus, quantum per alias licet occupationes ac litem molestissimam, &, nisi mihi blandior, multa feliciter restitui. Initio operis velim me doceas, quid sibi velit, quod agens de laboribus Herculis, addit, *olim Lernae defensus ab angue Arcas*. Cum Arcadium non vastarit Hydra, sed agrum Laconicum? quid illa

*Sceptra tui toto Pelias sub nomine Phoebi
Maxima Ec. tenens?*

Nam reliqua tu egregie emendasti? Quid sibi vult sub finem operis de *orbatis* sive *Bacchis* sive *vaccis*, quas cum jejunis comparat Leonibus? Hujusmodi infinita sunt. *Graevius* noster *Martinii* libellum tibi feret, quem memini te desiderare. Monente *Vossio* nostro rem militarem *Patricii* tibi emi duobus florenis totidemque assibus, quod affirmaret eo tibi libro opus esse. Si aliter res se habet, monere quaeso quamprimum. Est enim *Wallius*, sunt alii, qui cum vehementer exoptant. De codicibus Noricis Nasonis salivam mihi movit hinc discedens *Gudius*. Si opinaris eos impetrari posse, scribam vel ad *Arnoldum*, vel ad alium quemvis. Sed de his plura ex *Graevio* nostro intelliges. Vale. Hagae Comit. c1696. Lx. a. d. xxvi. Junii.

EPISTOLA CCCXLV.

J. FR. GRONOVIIUS

Nic. Heinsio.

Hagam.

DE *Patricii* Re militari curasti probe: sed unde isti amico nostro tanta cura mei, tam bonum consilium? Non tale certe, quod Britanno nobili dedisse scribis. Tu vero mitte quamprimum, & meae arcae confidito. Nec ingratus ei comes erit *Ber. Martinus*, si quidem in promptu est. In Παιδικαῖς Στεγῶν & num quid sit *Anacreontis*, male memini, qui a multis annis non inspexerim: sed perſalutabo. In *Valerii Flacci* loco memini pro nomine me olim *limite* ſubjeciſſe: nec illud non interdum cogitavi pro *Arcas*, legendum *Argos*, ſed quid fiet τῷ *defenſus*? Hoc tu me docebis. Tertium locum nondum inſpicere potui. Nec nunc etiam ſcripſiſſem, niſi veritus eſſem, ne ſilentium meum *Patricio* alium faceret dominum. Mitte igitur. Audio *Profeſſorem Franequeranum. Chriſtianum Scotanum*, in edito I. tomo *Hiſtoriae Eccleſiaſticae* late diſputaſſe contra aetatem mundi, & quidem prius, quam factum eſt a meo collega. *Arnoldum* ſalutabo tuo nomine: nam commodum adfuit, qui mihi ab illo literas. Quia brevior ſum, producam hîc incluſis. Forſan docere me potes, quod illi reſpondeam. Vale, meum decus, & perge in *Ovidio*, in *Virgilio*, in *Valerio Flacco*, quo te fata vocant. Lugd. Bat. prid. Cal. Jul. cııııclx.

EPISTOLA CCCXLVI.

NIC. HEINSIUS

J. Fr. Gronovio.

Leidam.

PArabam ad te literas, Vir Celeberrime; cum, ecce, a te adferuntur longe gratiſſimae. *Patricium* gaudeo acceptum tibi eſſe: eum hîc mitto. Utinam & *Martinum* poſſem! quem ex Galliis ad me nuper ab amico miſſum, & huc perlatum, tibi ſepoſucram in bibliotheca meâ. Nunc illo loco, quo reconditus erat, non comparet. Metuo ne quis furacem illi manum injecerit. Nam & *Juſtini* exemplar diligenter a me perlectum, ac frequenter verſatum nunc fruſtra quaero. *Martinus* tamen ille fugitivus ſicubi occurret, ad te mittetur, ne dubita. *Holſtenius* auctores aliquot antiquos edidit, ſed rem eccleſiaſticam ſpectantes, in quibus nihil tui guſtûs. *Capellanus* te aſſidua ſalute impertit in ſuis literis. Valde ſollicitum habent virum optimum & officioſiſſimum

finum fortunae affinis tui, quantum video. Narrabat non ita nuper legisse se partem poematis Latini ab illo Regiis Nuptiis dicati: & laudabat venam atque ingenium adolescentis. *Bigotius* Romae & Florentiae menses nonnullos dedit, variosque auctores tam in Vaticana, quam Medicea bibliothecis descripsit, annum proximum in Italiâ exacturus. Notae in *Heroidas* *Nafonianas* meae jam ad finem a typographo sunt perductae, quas apud me, ubi voles, videbis. *Amorum* libro i. El. vi. locus est, qui non parum me torfit. *Excute: sic nunquam dura religere catena.* Atqui religatus jam erat catena Janitor, ut ex ipso elegiae initio satis apparet. Libri veteres praestantiores constanter, *sic unquam longa relevere catena.* Quare corrigo, *sic unco longae relevere catena.* Neque tamen satis exploratum habeo, *unco/ne* vocet annulos illos ferreos, ex quibus catena erat contexta, quemadmodum hamos ferreos vocant in lorica, qui revera anuli sunt in orbem coeuntes, an de *unco* capiendum sit, qui catenam aut parieti aut vecti affixerat. Expedi haerentem, quaeso, vel tribus verbis quamprimum. Urget enim typographus. Alter locus est eodem libro El. xiv. *Non anus Haemonia perfida lavit aqua.* De aqua hac magica ecquid observasti? Sin minus, patere reponi, *laesit acu.* Nam *laesit* est in nonnullis libris scriptis. De acu, puto, intelligis quid velim. In Valerii loco *Arcae Lernaee defensio ab angue* gaudeat fortuna sua. Habebam in promptu conjecturam satis speciosam, quam valere nunc jubeo. Nam ejusdem libri 108. *Arcadio armata veneno tela Herculis* vocat. Quod utique de Lernaeco veneno intelligendum, & habuit haud dubie Flaccus auctores suos, quos secutus est. *Defendere ab angue* ut lib. vii. *Audeat atque meum casu defendere ab omni Aesoniden.* Sed is loquendi modus satis obvius ac protritius. Alio loco, v. 484.

Sceptra tui toto Pelias sub nomine Phoebi;

putabam τὸ nomine cognatam vocem *Haemoniae* absorpsisse, quales ego mendas plures in Valerio observavi.

Sceptra tui Haemoniae Pelias sub numine Phoebi.

sub numine: ut alludat ad benevolentiam Phoebi erga domum Admeti universam, aut etiam quod greges in Thessalia paverit. Tertio loco viii. 457. *apage Bacchas* interpretum & *Barthianas hyenas:* *vaccae* etiam cum leonibus & *lupis* non bene comparantur. Ego scribendum suspicabar *orbataeque trahant suspiria tigres.* Quam vocem duae syllabae posteriores in *suspiria* non absimiles abstulerant. De orbatis tigribus comparatio obvia apud poetas. Meministi illorum Juvenalis,

Tum gravis illa viro: tunc orba tigride pejor.

Acris mihi disputatio erat cum amico nostro hodie super altero Flacci loco, qui ipso operis initio occurrit. *Cum jam genitor lucebis ab omni Parte poli.* Negabam me probare τὸ *ab omni parte.* Quod in omni turre paulo ante praecessisset. Deinde *genitorem* hîc appellari *Vespasianum*, quem modo *sanctum patrem* appellasset, otiosum mihi videri asseverabam. Ac proinde pro *genitore* forte scribendum *senior*, quomodo apud *Nafonem* Met. xv.

*Nec nisi cum senior similes aequaverit annos,
Aethereas sedes cognataque sidera tanget.*

Ille vero clamabat, hoc esse urere & secare. Quanquam & alios poëtarum locos adferebam id ipsum confirmantes. Magis vero efferebuit, audito alio loco sub finem libri VIII.

*Si Pagasas vel Peliacas hinc denique nubes
Cerneret, & Tempe viridi lucentia fumo*

Ego enim contendebam nihil esse *nubes Peliacas*, nec pluris a me fieri *viridem* illum *fumum*. Itaque pro *nubibus*, *rupes* a me reponi, & *viridem dumum*, pro *fumo*. Nihil potui excogitare convenientius, fateor, nam & *dum* rupium proprie sunt, & *Dumosas rupes* Maro dixit Ecloga prima. Amicus tamen noster omnia antiquitatis scrinia excutiebat, ut *fumum* illum *viridem* mihi venditaret. Nam & in fummis montibus Tempe Theffalicorum sacrificia solere fieri, & hinc *fumum* illum *viridem* promanare. Cum omnia illi concederem de fumo, praeter *viridem* colorem, ad opticem confugit, in qua ait plurimum se videre, de Iride deinde multis differuit, deque percusso sole a nubibus ac silvis. Poterat compendiosius nugari. Tandem, postremo apud Valerium versu cum affirmarem legi oportere, *tempora quaerere dictis*, pro *currere*, ne hoc quidem impetravi, sed amplius deliberandum esse respondit. De codicibus Nasonianis, quos in bibliotheca Norica asservari, atque unum in his veterrimum, *Gudius* mihi persuasit, velim negotium tibi curae esse. Tum de illo, quem *Nicolaus Rittersbusius*, vir doctissimus possidere dicitur. Totum huic rei Gronovium velim impendas: a clarissimo *Arnoldo* hos, ut spero, facile impetrabis, quem si vicissim demereri possum sive communicatis iis, quae ad Diras Catonis fide veterum membranarum notavi, sive alia quacunque in re, non hercle neglegam speratam occasionem. Sed festinatione opus. Hoc enim anno lucem Notae meae videbunt. De codicibus ipsis, si qui mittentur, curae mihi erit, ut quamprimum, & quidem tuto, meis impensis Noribergam revertantur. Nec de fide mea crit periculum, quam nosti. Dabitur hîc oportunitas publice laudandi Cl. *Arnoldum*, cujus eruditas in Catonem notas nuper evolvi. Vale. Dabam Hagae Comit. MDCLX. a. d. XXIX. Junii.

Dum loculos bibliothecae & scrinia diligentius excutio, ecce *Martinius* diu frustra quaesitus sese offert. Locum Nasonis in Arte Amatoria, *maciè male viva sua* suggerebas olim a *Douſa* sic emendatum. In quo commentario *Douſae* restitutio illa loci Nasoniani exstet, velim me doceas. Illa enim occasione vapulabit *Faber* in Notis meis. Iterum Vale.

EPISTOLA CCCXLVII.

J. F. R. GRONOVIIUS

Nic. Heinsio.

Hagam.

Libros accepi, & in altero studium tuum, in altero liberalitatem agnosco libens. *Capellani* humanitati cultum mutuum rependo, & unum illum jamdudum esse autumo, penes quem Gallici carminis hodie summa constet. Si regibus hymenæum dici iusta licentia est, ipse suam illam tum nobilem ubi remque veniam fodicit stimuletque, censeo: adolescentem, quem ab illo amari scribis, rectius fecerit, si monuerit, ut ludibrium debere caveat. Sed scis prurientes versificatores quam aegre addiscant se poëtas non esse. Sic unquam longa relevare catena, haud video, cur conjecturis indigeat. *Haemonia* acu nihil neque elegantius neque acutius videtur. At *Valerii*, quorum meministi, pleraque talia sunt, ut nisi urendo & secando sanari nequeant, eoque pro desperatis semper habuerim. Tamen tempora quaerere dictis perplacet. *Genitor* etiam apud *Statium* & in tragoediis, quae sub manu habeo, ἀντὶ τοῦ *Senior* vulgo obtinuit. Quid si tamen, cum jam meriti. Ab omni parte vix videtur sollicitandum: non enim *Cynosura* nec *Helice* ab omni parte: & propterea his potius novum fidus futurum. De male viva haud scio an mihi imposuerit memoria. In *Centurionatu* & ad *Horatium* est aliquid de male vivere: sed alio sensu. *Gevarcius* autem in *Electis Doussae* tribuit male nisa. Nec tamen evadere tibi ille potest, si dignaberis meminisse *Pallii Claudiani*. Ei ego acceptum retuli ad *Epist.* 87. *Senecae*. Et ne nihil subijciam eorum, quae iste post alios, ita flentibus adflent, conjecit olim *Piccartus* *Peric.* *Crit.* cap. xxiii. Cum *Arnoldo* agam diligenter: sed miror non statim te mihi remisisse epistolam. Velim etiam si quid resciveris de *Manasse*. *Schefferus* absolvisse scribit librum *Lectionum Academicarum*, in quo *Notae* ad nonnullas *Plinii* epistolas, in *Pacati Panegyricum*, *Matthiae Camariotae* synopsis *Rhetoricam*, *Senecae apocolocyntosin*: item commentarium in *Taciti Agricolam*. Tum *Graphicen*, seu de arte pingendi, qua ab ipsa pueritia in hunc diem se delectatum ait. Nunc *Phaedrum* sub manibus habere in usus scholasticos. Promittit quoque ad officia *Ciceronis*, de re vehicularia, de philosophia *Pythagorea*, de permutatione literarum. *Matthias von der Laghe*, juvenis, ut ibi creditur, eruditus jam ante biennium publicavit pro *Barthio* adversus *Vlitium* *Lipsiae* forma, quam in 4^{to} vocant. Idem in nescio quem hymnum *Prudentii* aliquid edidit. Legavit ei *Barthius* tomum secundum *Adversariorum*, quod cum aegre ferrent haeredes (quippe aestimatum tribus aut quatuor millibus florenorum) lite vincendi fuerunt. *Statianus* commentarius sudat etiamnum sub praelo, mole aequaturus bina volumina, quale occupat *Claudianus* ejus. Vitam
Bar-

Barthii parat *Christianus Daumius*. *Hulfemanni* laudatio funebris in eundem lingua Germanica jam exstat. Vale, & me ama. Lugduni prid. Id. Quintil. CIOTCLX.

EPISTOLA CCCXLVIII.

NIC. HEINSIUS

J. Fr. Gronovio.

Leidam.

INcuria, fateor, mea factum est, quod *Arnoldi* epistola necdum ad te rediit. Eam, Vir Clarissime, nunc mitto, teque iterum ac iterum obtestor obsecroque, ut negotium de scriptis codicibus Noricis omni cura urgeas. Bibliopolae nostrates proximas nundinas Francofurtenses adituri quicquid erit sarcinarum nullo, ut scis, negotio perferre huc possint, si tempestivius occasio libros mittendi non dabitur. Quod si subveretur forte doctissimus *Arnoldus*, ne periculum libris sit a longiori viâ, quanquam nihil tale metuendum est, si tamen aberrent, nec ad possessores suos revertantur, fidem do, pro unoquoque codice duo me repositurum scripta exemplaria nihilo deterioris notae. Scis enim ex amicorum munificentia ac dono non paucos penes me extare codices Nasonis manu exaratos, qui nulli aut exiguo sunt usui, cum eos jam abunde sim perscrutatus. Hoc, quaeso, officium praesta non tam mihi, cui longe maiora praestitisti, quam Nasoni. Quid detrimenti passus sit a¹ populari suo recordaris. Qui dum maximam vim codicum scriptorum vana crepat ostentatione, omnes deterruit a medicina optimo vati admovenda. Idem ne & nunc eveniat metuo, cum tamen infinita propemodum supersint in eo castiganda. Quare non gravabor subire laborem quemcunque in conferendis scriptis exemplaribus Sulmonensis nostri, dum illum paulo cultiorem, quam nunc circumfertur per eruditas manus, praestitero. Nolim enim *Ciofanis* annumerari, ut ambitionem meam ingenue tibi aperiam, quem nihil mearum ineptiarum soleo celare. De *unco catenae* nihil necesse esse oportune me mones. Vellem tamen paulo tempestivius monuisses, sunt enim ea jam a typographo descripta & praelo commissa. Sed cum ipse demum dubitarem, timide conjecturam istam proposui legentibus. Utinam in hoc uno peccassem! Sed alia erunt laud dubie majoris rei. Quare nolim de hac Nasonis editione praeclari aliquid tibi pollicearis. Animo enim defaecato haec studia erant tractanda, qui nullus mihi adfuit. Itaque curas secundas feliciores fore auguror. In ista de *unco* observatione alium Nasonis locum tentavi in Ibide vers. 166. ubi pro *Infi-*
cusque tuis ossibus uncus erit, contendo scribendum esse *faucibus*, quod uncus gutturi solet infigi. Si hoc bonum habet ista observatio. non prorsus est superflua. In Valerio plurima castigavi, sed cruda etiamnum & immatura,

Intellegit *Herculem Ciofanum*.

nec satis percocta. Interim designavi locos mendosos, ut aliorum quoque conjecturae sit locus. Nec satis mirari possum bonorum interpretum sive oscitantiam, sive securitatem, qui tot loca pessime a librariis affecta transiliant, nulla aut medicina admota, aut interpretatione, unde possit liquere ea illos intellexisse, quae ego non assequi me lubens agnosco. *Ab omni parte poli* non esse sollicitandum tibi prorsus assentior. Tamen inconcinnum τὸ *omni* bis occurrere tam sibi conjunctum. Τὸ *genitor* otiosum esse videtur, cum jam dixerit, *sancte pater*. Τὸ *senior* suam vim habet, ut in illo Horatiano, *Serus in caelum redeas*, ad Augustum, & plus dixit, quam si *senem* appellasset. Nec tamen *meriti* respuendum. Quae sequuntur velim scire an satis Latina tibi videantur, *neque enim in Tyrias Cynosura carinas Certior*. Habeo enim & in illis quod emendem. Caeterum ex elisione literae unius, aut syllabae, praesertim concurrentibus duabus vocalibus, saepe in illa peccatum est a librariis festinantibus: ut vers. 66. *jussos sic tandem quaerere colchos*. Libri scripti *sectantem*: sic tandem conjectura est Baptistae Pii, ut puto. Lege, *jussos sic tandem avertere Colchos*. Jasonem sibi gravem amoliri & amovere cupiebat. vers. 68. *Creditus ignaras*. Nullus est sensus, nisi reponas, *Creditae ut ignaras Cereris*. *Creditus* primo scriptum erat. *Credere Cererem terris* elegans & dignum Valerio. vers. 89. *dabit auratis & cornibus igni*. Quid est dare *colla igni*? Scio quid velit. Sed durum est & inficetum. Transpositas opinor esse voces, & reponendum, *dabit aurato praesignia cornu Colla pater*. Sic & Nasoni, *Vittis praesignis & auro Victimae*. mox pro *altaria cingent* libens castigarim, *tingent*. Sed hoc leve. vers. 342. in pulcherrima Aesonis oratione, *ut dent nostro tot in aequare reges*: scribe, *video en nostro tot in aequare reges*. Sed quod sequitur, *tales, tales ego ducere suetus Atque sequi*. *Tales ducere* honorificum Aesoni, illud *atque sequi*, ineptum est, cum crescere potius oratio debuerit, quam tenuari. Repono meo periculo

— *tales, tales ego ducere suetus,*
Statque equidem nunc ille dies, (det Jupiter oro)
Ille super: quo te &c.

Sed modus garrulitatis non esset. Mirabar stuporem Carrionis, qui libro v. pro *dedere labores* non vidisset corrigi debere *edere*. Sed nunc video id te occupasse. Illud vero opinor mihi integrum relictum libro iii. vers. 693. pro *Fert dolor etiam est* reponendum esse. Addam aliud. Auroram scis Tithoni conjugem esse, tamen *Tithoniam* non posse dici autumo. Quomodo a Nasone, Statio tuo, hoc ipso Valerio, aliis tamen non uno loco appellatur, nisi addatur *uxor* vel *conjunx*. Quomodo apud Maronem,

Te potuit lacrymis Tithonia flectere conjunx.

Quid ergo? Quoties τὸ *Tithonia* simpliciter positum pro Aurora apud poëtas occurrit, id in patronymicum *Titania* mutari debere contendo. Hoc si tibi persuasero, omne equidem tulero punctum. Sed pergamus de Aurora bene mereri. Apud Flaccum nostrum libro ii. 73.

Jamque sub Eoae dubios Atlantidis ignes.

hoc est *Pleiadum* inquiunt interpretes. Credo quod Virgilius *Eoas* quoque dixerit *Atlantidas*. Sed aliter iste locus Maronis est intelligendus, quam opinantur. Ego *Eoae Pallantidis* censeo corrigendum. Tu videris. In Italia, Romae praefertim, quid fiat, haec *Bigotii* epistola te docebit: quam perlectam mox remittas velim, cum rescribendum sit proxime. De *Scheffero* quae nuncias fuerunt accepta. *Matthiae Lagii* nihil haecenus vidi. Amico tamen nostro non possum non favere vapulanti, qui crabrones istos irritarit. Ad *Graevium* si scribes, rogo commendes illi rem de codicibus Saxonice Nasonis. Notas meas ad *Heroidas Medonio* inscripsi, ad *Amores Mario* Senatoribus, huic *Divionensi* illi *Tolosano*, ad *Artem Amatoriam Menagio*, quae *Artem* in primo tomo sequuntur *Bigotio*, *Tibi*, *Langermanno*, *Graevio*, Notas ad totum tertium destinavi, quorum cura ac officio haec studia egregie sunt ornata. *Phaedrum Schefferi* videre opto. Observavi nonnulla ad elegantissimum scriptorem, quorum nonnulla inserui lucubrationibus ad *Nasonem*. Velim fit, qui *Rhemensem* codicem diligenter excutiat. Nam *Rigaltium* in multis supinum fuisse animadverto. Certe schedae *Vossianae* paucarum pagellarum in multis a vulgato *Phaedro* discedunt. *Fabrum* tentabo ad bonam mentem revocare, si possim. Non poterat locus oportunior offerri illo in *Arte Amatoria* de *male viva macie*. Qui locus cum variis conjecturis sit exagitatus, sic ut nullus intoto *Nasone* magis, ille tamen audet negare locum cuiquam haecenus suspectum fuisse. De *Menasse* agam cum *Vossio* nostro. Sola enim ex fama is mihi notus est: quem in *Zelandia* ante biennium e vivis sublatum videor intellexisse. Rem fregisse nesciebam. *Amstelodamo* tamen emigrarat. Vale. Dabam manu propria. Hagae Comitum MDCLX. x. Julii.

EPISTOLA CCCXLIX.

NIC. HEINSIUS

J. Fr. Gronovio.

Leidam.

Spero perlatas ad te esse, quas nuper dabam. Erant illae solito loquaciores: Sita tum factum est, ut negligere rem tibi commendare, super qua amicus quidam non semel jam me convenit. Is literas mihi exhibuit a *Joanne Holmio*, homine apud Suecos, ut scis, opulento: qui filio suo praeceptorem circumspicit, juvenem aliquem literatum, cui & studia ejus committat, & mox in oras externas abiturum credat. Si quem nosti apud vos, aut alibi morantem in vicinia, quaeso; mone. *Graevio* nostro haec sparta vellem ornanda obtigisset. Opinor impetrari ab *Holmio* posse, ut praeceptori filii sui praeter victum quingentos florenos annuos stipendii loco assignet. Praesentem te videre gestio, quando venturus sis, nam venturum hisce feriis te promissisti, fac sciam: ne absim domo, cum venies. Vale & me ama. Dabam Hagae
Co-

Comit. cccclx. a. d. xix. Julii Gregor. Paginas Senecae tui recentes a praelo velim tecum feras.

EPISTOLA CCCL.

J. F. R. GRONOVIIUS

Nic. Heinsio.

Hagam.

IGNOSCE quaeso, quod tam tarde remitto Bigotianas, quibus profecto immensum quantum me oblectasti. Plerumque sub tempus exeuntium recitationum occupatiores sumus, dum incepta utcumque finiri desiderant auditores. Ad *Arnoldum* tamen, ut jusseras, statim dedi: & inserui excerpta e tuis, si magis eum movere posset tam honesta oratio. In Valerio infinita esse corrigenda fateor, sed vide tamen ne lascivias ac sufflaminandus sis. *Certus in me*, hoc est, erga me, pro fido fidelique, cur non dicam? Sic *certa Cynosura in Tyrias carinas* est fida illarum dux. *Qua jussos sic tandem quaerere Colchos Arte queat*. Equidem ars erat Peliae Jasonem amovere volentis. Sed nihilo mollius decurrit oratio: se odiis cogi immania in freta, qua arte possit se (Jasonem) Pelias avertere Colchos. Nec *jussos*, nec *queat* hic commode poni videntur. Potius dicere debuerat se averti Colchos, qua arte cogatur in freta, ut ibi pereat. At vulgatum ego semper sic accepi. Mox intellexit Jason, dolum huic imperio subesse, nec velleris curam esse Peliae, sed ut Jasonem irato objiceret mari, rem quidem spe esse humana majorem. Qua enim arte, via, ratione, se inventurum dictos illos Colchos? Interdum optabat plantaria Persei, aut Triptolemi currus: interdum cogitabat de seditione movenda: interdum, tentandum tamen, saepe unde periculum quaesitum sit, gloriam provenisse. Nam *quaerere* accipio cum effectu, pro invenire, nancisci, parare, acquirere, ut saepe solet. Conjeci etiam aliquando: *qua jussos sectando quaerere Colchos Parte queat?* qua parte terrarum. *Aut curru saevos frenasse dracones*, *Credita ut ignaros Cereris*, non audeo repudiare. Illud, *aurato praesignia cornu*, prorsus *Ἀλεξάνδρειον*. Quid ni *Igni* sit aris, vel ad aras. Scis *Justini 22. expositis ignibus Cereris tactisque*. *Tingent* facile admiserim, nec non, *Video en. Atque sequi* non persuades ineptum esse: nec illa incrementa, ut quibusdam locis, ubique necessaria. *Sequi*, nempe seniores, & est ὕστερον πρῶτον. Nec valde pulcrum, *Stat super*. *Est dolor* non incommodum, sed nec *Fert* spreverim, est enim fert in diversas partes, differt, distrahit. De *Tithonia* non inanis est scrupulus, quem injicis, & valde blanditur *Titania*. De *Pallantide* quoque facile tibi subscribo. Proxima hebdomadis initio spero me ad vos excursum. Hoc quod nunc est otii impendo notis Variorum ad Senecam recensendis, hoc est, stabulo Augiae purgando. Rejeceram eam curam in bo-

ferre possim boni, quod non praeceptum animo, cognitumque habeas: nihil nugarum (quam majorem opinor partem fore) quod non tibi ante omnes alios putescat & sordeat. *Guideti* Senecam excipiam libens, & quod juverit, quum ipsi, tum Cl. *Menagio* acceptum referam. Sed properato opus: neque enim cessant operae. Nec tamen poenitebit me, quae suis locis poni non potuerint, in appendicem conjicere. Ego quicquid mihi temporis praesens cura donat, in Homero Vossiano contero. Noto diligenter (mihi puta, ne tu censeas me manus sancto codici afferre audere) quid habeat commune cum Eustathio & Didymo, quid peculiare. Et utriusque generis invenio non pauca. Non possum etiam pati, quin ex rubricis illis, quas versiculis singulis interjectas habet, quasdam exemplari meo allinam. Atque utinam id incepissem facere jamdudum, nec discessus domini in Britanniam (hunc enim mihi terminum liberalitas ejus constituit) me occupet, maxime ardente ejus laboris siti. In *Priapejo* videtur legendum:

Ille vocat, quod nos psolon, psoloenta ceraunon.

Est enim ψωλὲς verpus. Atque etsi nos eam vocem in Latinis non reperiamus, non est tamen incredibile in ejus generis epigrammatibus alicui placuisse, ut inter Latinas adscisceretur. Distuli has ad te dare, dum MS. Horatio infidior, sperabam enim me hesterno, dum patet bibliotheca studiosis, eum ablaturum inscio illo, qui summum in ea jus habet. Id frustra fuit, cum scripti omnes propriis armariis sint inclusi. Itaque etsi valde invitus homini quicquam debeam, tamen in tuam gratiam vincam pudorem meum, ut hominem compellem. De meo adventu nihil etiamnum est certi. Vale, Decus meum. Lugduni vi. Id. Sextil. CIOICLX.

In Hercule Oetaeo vers. 1821. Lipsius notat ex libro: *Ubi negata est*. Delrius scribit eum conjecisse: *Ubi ei negata est*. Et sic editum in *Lipsii* notis a *Scriverio*. Ego suspicor codicem habuisse, Lipsiique manum fuisse: *Uni negata est*. Dissentio autem ab illo in adjecta vocula *Est*. Quanto enim rotundius: *Hic pax cruento rege prostrato data est, Uni negata*. Vel, *data, Uni negata est*. Considera adhibita, si quam habes, vetustiore Lipsii notarum editione. In eodem vers. 1792. *Totus uretur dolor*, conjicio *notus*. Nempe Junonis, hoc est, Ipsa Juno noto dolore uretur. Notavi ad marginem exemplaris mei, nescio quid ad eum locum notare *Barthium* ad Claudian. p. 823. Vide quaeso, quid illud sit: & nisi nimium est, transcribe. Quum haec scripsem, nuntiatum est mihi legationem tibi esse decretam, quam ut tibi & reipubl. fortunet, Deum opt. max. veneror toto pectore.

EPISTOLA CCCLIII.

NIC. HEINSIUS

J. Fr. Gronovio.

Leidam.

DE *Guideti* Seneca, recte te facturum opinor, cenſeoque ſcribas ad *Tennuylum* vel tribus verbis, jubeasque ejus uſum a *Menagio* petat. Quem codicem, Vir Clariffime, ut tempeſtively nanciſcaris, hodierno die rem *Tennuyllo* commendes velim. Eſt enim in procinctu, excuſſurus ad nos mox, *Bullialdus*, quo latore codex ad te curari poſſit & tuto & cito. Peterem hoc ipſe a *Menagio*, niſi ſcriptionis officio nuper admodum defunctus eſſem. Homerum Voſſianum pro ingenti theſauro habendum cenſeo. Atque utinam ex diſcipulis tuis aut familiaribus nonneminem ſubornare poſſis, qui vicariam in ejus editione procuranda operam tibi præſtet? Niſi feceris, laudem, ut prævideo, divulgati hujus tam docti commentarii Britanni ſibi vindicabunt. Eufſtathium multa inde in commentarios ſuos tranſtuliffe ſum certus, cum fateatur ipſe: perſuaſum tamen habeo non pauca illic ſupereſſe, præſertim *μυθικά*, quæ Eufſtathius vix delibavit. De diſceſſu amici noſtri in Britanniam neſcio an ante hyemem aliquid expectandum ſit. Locum in *Priapeis* recte a te emendatum judico, atque adeo confido omnia in illo epigrammate jam bene ſe habere. Nam verſ. 7. *niſi res non munda* vix ſatis explicat, quid velit, quare opinabar reponi debere, *merda huic non munda*. Dedecent enim ſalaciſſimum Deum, & cui craſſa erat *Minerva*, circumlocutionum ambages, adde quod ipſe apud Horatium dixerit, *merdis caput inquiner albis*. Lectioni Senecæ tui necdum licuit incumbere, niſi quod heſterna nocte, dum ſomnum experior difficilem, nonnulla in *Hercule Furente* ſummis labris attigi, quæ mire placuerunt. Choro actus primi diſputari & quaeri ab interpretibus video, quid intelligatur per *baccas Cadmeas*; at mihi vix eſt dubium *Cadmeas Bacchas* a Seneca nobis hîc loci datas eſſe, nec *Thebanas* intelligi debere, quanquam has quoque, ſed *Cadmi filias Ino, Autonoe, & Agaven*, quæ *Pentheum* diſcerpſerint illo loco. Erat enim locus ille in agro *Thebano* notiſſimus, & peregrinis oſtendebatur, ut ex *Statio* tuo liquide apparet: ad caedem *Pentheï* illum reſpicere ut credam, verſus ille facit, *Asperſa die dumetæ rubent*, ac ſi occulte vellet, *quæ ante Pentheï ſanguine aſperſa rubuerunt*. Fuit etiam, cum ſcribenbum putarem, *incita Bacchis*, ut in illo verſu, *plauſuque pedum gemit incita tellus*. Sed hoc vix neceſſarium videtur. Dum has ſcribo, perferuntur ad me pagellæ illæ notarum ad *Nafonem* mearum, quibus *Fabrum* defricui. Vellem proſecto vehementer hunc contentionis ſcopulum præternavigare licuiſſet. Sed oſ homini ſemel obſtruendum fuit, ne pergat impoſterum ſui ſimilis eſſe. Illa occasione curam adhibui toto diſticho lib. 11. Art. 659. illuſtrando, cujus primam

primam partem nemo, quod sciam, mendi haëtenus suspectam habuit.

Si paeta est, Veneri similis : si flava, Minervae.

Sit gracilis, macie quae male viva sua est.

Paeti oculi in Venere commendati, in Minerva flavi. Notus Priapejorum versus, *Flavo Minerva lumine est, Venus paeto.* atqui Naso vult vitia puel-
larum proximitate boni alicujus excusanda esse. Si flavi igitur oculi in Mi-
nerva, in Venere paeti boni ac laudati sunt, cur non & in puella? Sane
Naso excessum aliquem vitiosorum oculorum respexit, quod ex vulgata scrip-
tura tamen non deprehendas: jam dixerat fuscas vocandas, quibus sanguis esset
pice nigrior. Non multis te morabor. Scripti majori numero,

Si crassa est Veneri similis, si parva Minervae.

Quidam *Grassa*, & *Grossa*, & *laesa*, sed illi recentiores, & pro *parva*, unus *pra-*
va. Conjeci igitur,

Si qua straba est, Veneri similis, si rava, Minervae.

Nam omnium veterrimus Regius, *Si crasia est.* Militat pro hac conjectura
locus Horatii libro I. Sat. III.

At pater ut gnati, sic nos debemus amici,

Si quod sit, vitium non fastidire, strabonem

Appellat pactum pater.

Ravi quoque oculi pessimi habiti, ut ex Festo docemur, qui medii erant inter
flavos caesiosque, quales Palladis credebantur. Pluribus hanc conjecturam in
notis asserere sum conatus. De legatione conditionem nondum accepi. Habui
a *Langermanno* nuper, quibus de adversa valetudine queratur, seque exauctorã-
tum a Principe Mecklenburgico post longas preces affirmet. *Lipsii* ad Senecam
Notas habeo ex editione Raphelingiana CIOIOCLXXXIX. in iis quoque legitur,
ubi ei negata est. De altero Senecae loco *Barthius* ad Claudianum censet, non
esse eum culpandum cum Heinsio, esse enim eruditius dictum, quam sonare vul-
go audiatur. Sic *famem pascere* Eucheriam dixisse Paraenetico ad Valerianum,
hoc interno ac salubri cibo disce animae famem pascere, nihil praeterea. Mitterem
nunc catalogum bibliothecae cujusdam mense proximo hîc dividendae; sed
interpellor, mittam igitur proxime. Vale, decus nostrum. Dabam Hagae
Comit. CIOIOCLX. a. d. XI. August.

EPISTOLA CCCLIV.

J. F. R. GRONOVIIUS

Nic. Heinsio.

Hagam.

¹ CUSTodem Palatini nostri Apollinis bis domi conveni. Ille contumeliam
interpretatur, semper adiri abs te perallegatum, se etiam veterem fami-
liarem

² *Ant. Thyssus*, Bibliothecae praefectum.

liarem tuum esse: denique cum heri in templo assidentem monerem, forsan hac hebdomade me istuc iturum, repetebat. *Ad me scribat.* Oportet huic ambitioni indulgeas, & ad ipsum des literas quamprimum, si habere vis. In Homero non poenitet laboris. Sed quod ego maxime venabar, quodque vos tam magnifice praedicastis, de fabulis alibi non proditis, frustra fuimus. Duos libros absolvi tanta diligentia, ut nullam literam me fugere volens passus sim: folium cum maxime LII. tracto: intelligo autem folia duorum laterum paginas: nullum nomen ibi fabulare occurrit, nulla narratiuncula, quae non sit eadem in Didymo. Verbum aliquando unum aut alterum discrepans, sed ita ut nunc scriptus, nunc Didymus editus meliora habeat. Tamen non poenitet operae, & velim me omnem percurrere posse. De *Cadmeis Baccis* an *Bacchis* scito eadem in mente fuisse mihi, & prioribus quoque interpretibus, ut videre potes vel apud *Farnabium*. Sed non potui mihi satisfacere. Itaque omisi rem, & distuli in alium diem. In loco Ovidii & miror te, & valde places. Vale, nobilissimum genus & ingenium. Lugduni a. d. x. Cal. Septemb. CIOIOCLX.

EPISTOLA CCCLV.

NIC. HEINSIUS

J. Fr. Gronovio.

Leidam.

AD collegam tuum, quando aliter Horatius obtineri non potuit, scripsi, usumque desiderati libri in dies paucos poposci, qui tamen tanti non est, cujus causa excursum ad nos tuum differas aut trahas, Vir Clarissime, si collega tuus eum ad te mittere cunctabitur. Scholiasten Homeri votis tuis atque expectationi non respondere doleo, cum ego nunquam perlegi, aut evolvi, sed amico nostro de fabulis reconditis & penitus ignoratis magno illic numero occurrentibus multa jactanti credidi, fateor, & quidem temere, cum ille saepenumero in similibus os mihi subleverit. Exprobravi hoc illi praesente *Ludovico Fabricio*, viro doctissimo, & epistolam tuam majori ex parte praelegi. At ille confidenter dicta sua, quod mireris, etiamnum tuetur, atque asseverat, si nondum invenis fabulas aut historias ullas Didymo intactas, inventurum tamen te: nec quinquaginta paginas, quas pervolvissē te scribas, de toto opere sententiam posse ferri. Hoc quoque scholiasten suum laudandum, quod unicuique fabulae auctores suos adscribat, qui a Didymo dissimulentur. Caetera, quae narranda habebam, in congressum nostrum, rectius rejicientur. Si juvenem quem apud vos nosti ex candidatis Theologiae, qui & literatus sit, & verbum divinum utraque lingua, hoc est Gallica ac vernacula, coram populo interpretari possit, hunc mihi dispicias velim. Stipendium ei a republ. assignabitur. Inquirendum tamen occulte, nec mei mentio facien-

facienda: cum munus legationis Suecicae necdum admiserim, & fortassis admissurus non sim. Si admiserero tamen, festinanda erit profectio ante hibernam tempestatem. Itaque in antecessum de theologo mihi prospicere volui, ne ea res moram objiciat properaturo. Vale & veni. Dabam Hagae Comit. cicioclx. a. d. xxvii. Augusti.

EPISTOLA CCCLVI.

NIC. HEINSIUS.

J. Fr. Gronovio.

Leidam.

Fraudare te nolui lectione hujus epistolae, quam mihi nudius tertius a *Gudio* tulit tabellarius Parisiensis. Commendam illi hinc discedenti Remensem inter alias bibliothecam, quod eam codicibus manu exaratis instructissimam esse in Burgundia e Divionensibus olim intellexissem, nec excussam esse ab hominibus literatis probe nossem. Secutus ille consilium meum, quos studiorum profectus illic fecerit malo ex ejus epistola, quam ex me intelligas: ubi perlegeris epistolam, ea ut ad me mox revertatur, da quaeso operam. *Bullialdum* die Lunae aut Martis proximo cum Illustrissimi *Thuani* uxore hinc expectamus. An Senecam *Guyeti* secum ferat, ubi venerit, faxo ex me intelligas. Juveni Gallo, quem mihi commendas, gratificari multis nominibus optem. Unus de sermonis nostri vernaculi cognitione est scrupulus, qua si vel modice sit instructus, cum alteri, quem *Scultingius* commendat, praetulerim. Tuum est hoc arbitrari. Si integrum tibi non est ad nos excurrere, vobis ego proximis diebus adero, quando pluribus de hac re agemus. Qui profectio ad Suecos meae prae fracte apud Amstelodamenses ac pertinaciter obnitebatur, victus est suffragiis universi Senatus, ac manum dedit. Postea Ordines Hollandiae me mittendum eo censuerunt, ac cum iis Zelandi conspirarunt. Reliquas provincias quoque consensuras auguror. Sed an profectio auspicaturus sim ante tempestatem hibernam dubito. De Nafone quoque meo lentum est negotium. Notas ad Fastos meas jam describere inceperunt operae typographicae. Elzevirium Leidensem rogo moneas, famulo suo ad nundinas Francofurtenses profecto quamprimum in mandatis det, ut si quid fasciculi aut sarcinarum tibi mihi in inscriptarum ea in civitate acceperit, id ne caeteris adjungat sarcinis, sed ocus huc secum ferat. Nam si Norimbergenfes membranas Nafonianas meis usibus concefferint, eas ante profectio Suecicam a me pervolvi est necesse, ac propterea festinandum, ne cum reliquis libris huc missae, ac proinde tardius perferendae, meis usibus subtrahantur. Vale, vir amicissime, & mihi bene velle imposterum perge. *Vossius* noster graviter aegrotavit: sed jam convalescit. Dabam festinus v. Octobr. Hagae Comit. cicioclx. *Menagii* versus, quorum *Gudius* meminit.

Tom. III.

H h h

nit

nit ad copiam mihi fecit, misissem una cum literis; sed eos mox reddendos *Christianus Hugenus* heri a me abstulit: redditos, si jubebis, mittam: ut videas non immeritas nimiae libertatis poenas amicum nostrum dedisse.

EPISTOLA CCCLVII.

J. FR. GRONOVII

Nic. Heinsio.

Leidam.

Quum *Limogius* noster, (hic est, quem *Fabricius* egoque nihil profecto supra meritum tibi laudavimus) negotii cujusdam causa Hagam excurreret, auctor illi fui, ut te saluaret. Nec renuit ille, & epistolam, quam alioqui debebam tibi, poposcit. Videbis an tibi satisfaciât. Legationem tandem bona fide etiam ab obtrectatoribus tibi decretam ex animo gratulor. *Goedii* literas vidi libentissime, & cum gratiarum actione remitto. *Elzevirium* monebo hoc ipso, opinor, die: nam proximum triduum domo egressus non sum corpusculi curandi ergo, quod horrores morbi minabatur. Cl. *Vossium* convalescere gaudeo. Cl. *Bullialdus* si secum tulerit *Senecam Guideti*, ut quam primum mittat, rogo, cures. Ne nihil tibi reddam pro epistola *Gudii*, in conspectum curarum *Mallingrodii* in Hieronymum. *Menagii* versus exspecto. Vale, meum & literarum unicum decus. Lugduni vi. Idus Octobr. cicioclx.

EPISTOLA CCCLVIII.

NIC. HEINSII

J. Fr. Gronovio.

Leidam.

Tardius ad tuas respondeo, vir summe, quam fieri oportuit. Sed dum *Bullialdi* nostri adventum ac congressum operior, officium scriptionis differre sum coactus. Is ergo, quod mirere, nihil mihi tibi que a *Menagio* attulit, cum tamen tibi *Senecam Guyeti*, mihi *Virgilium* manu exaratum obtulisset. Credo hominem existimationi contra insultum Senatus tuendae intentum de promisso non potuisse cogitare. Accepi tamen poematum ejus novam editionem, pro quo munere cum gratias illi sim acturus perendie, de *Virgilio* non misso obiter mentionem injiciam. Si quid de *Seneca Guyeti* vis additum, tempestive monendus sum. *Limogius* me convenit, placuitque. Sed hominem sermonis Belgici vix gnarum, qui commendare possim Proceribus haud video. Nos de re tota coram aliquando confabulabimur. Nam de prosecutione mea, quantum video, lentum erit negotium. Mea enim interest ne pedem hinc

hinc moveam, nisi lite judicata, quae sola me moratur, quod cum procures nostri intellexissent, heroes *Wittius* ac *Bellimontius* instructi publica auctoritate Judices convenerunt, monueruntque interesse rei publicae, ut causae meae discutendae suprema manus quam primum imponatur, idque se facturos judices sunt polliciti. Interim ambitiosis, quaeso, titulis abstine imposterum. *Megnagii* versus hîc habes, cum *Gudii* epigrammate apologetico, nimis certe bono in mala causa. De codice Norico multa magnifice amicus ille noster erat pollicitus, qua in re alienis potius oculis, quam suis, credidit. Est enim codex recentis notae: an castigatus sit & fidus, necdum affirmare possum. Mox intelliges. De codicibus Remensibus plus spero. Lucani tria exemplaria a *Rottendorphio* accepi, quatuor ab Illustrissimo *Thuano*. *Spanhemius* interim, ea de re non semel per me monitus, prae fracte tacet. Utar igitur illis codicibus mihi. Anacreontem *Fabri* habeo, sed necdum perlegi. Meis in Fastos animadversionibus supremam manum post biduum triduumve typographi imponent. Vale, flos & ocellae elegantiorum literarum. Dabam festinus Hagae Comit. MDIOCLX. a. d. xx. Octobr. Gregor.

Christianus Hugenus Lutetiam profectus est, ante discessum proposuit mihi castigationem in *Nasone* suam, quam puto esse verissimam, libro XII. *Met.* initio fabulae de singulari *Achillis* & *Cygni* certamine,

----- *Hectorea primus fataliter hasta,*
Protesilae, cadis: commissaque praelia magno
Stant Danaïs, fortesque animae, neque cognitus Hector.

Itane vero? non cognitus *Danaïs Hector*? qui virum fortissimum *Protesilaum* interfecisset? Legit feliciter, si quid video, *Hugenus*, fortisque animae nece cognitus *Hector*, ut per fortem animam *Protesilaum* intelligat, cuius paulo ante meminerat. Pro specimine editionis *S. Hieronymi Malincrotiano* multum tibi debeo: de *Capellani* nostri ode iudicium tuum fac ex te audiam. Nam & ad illum proxime sum scripturus.

EPISTOLA CCCLIX.

NIC. HEINSIUS

J. Fr. Gronovio.

Leidam.

Proxime praeteritis diebus uberius ad te scripsi, Vir Clarissime. Hasce nunc paucis verbis, & quidem festinans, sed magno cum affectu exaro, commendaturus tibi Nobilissimum hunc juvenem, cujus pater primis in republica *Gedanensi* dignitatibus fungitur, uti ex *Fabricii* nostri epistola plenius intelliges. Cum ante quinquennium in portum *Gedanensem* tempestate atrocissima compulsus in urbem aeger me recepissem, atque illic multo tempore decumberem, Pater fraterque generosi hujus juvenis plurimis officiis me sunt

prosecuti, quibus paria facere cum non possim ipse, ad te aliosque amicos est confugiendum, ut officio partibusque meis succedatis, & egregiam animam omni ope praesidioque vestro foveatis. Vale. Dabam Hagae Comit. cxcix. a. d. xxi. Octobr.

EPISTOLA CCCLX.

J. FR. GRONOVIIUS

Nic. Heinsio.

Hagam.

Ita me circumstrepunt diripiuntque adventores & auditores quotidiani, ut longinquis & absentibus respondere parum possim. At te diutius carere minime decet, quae benignissime mecum communicasti. Placuerunt autem omnia valde, in primis ode *Capellani* nostri, quae & ipsius cum ingenio, tum fama & nobilitate dignissima mihi visa est. Vellem unum, non contemptos novos soceros. Sed in hanc partem apud suos peccare non potest. *Vossius* δὲ πᾶνν *Homerum* suum repetiit, cujus usum certis verbis mihi concesserat usque ad iter suum Britannicum. Si, quia ad inquirendum aliquid ipse indigebat, facile patior: sed ita ut quamprimum remittat, quod, ubi cum videris, te pro me oratorem esse velim. Conjectura in Ovidio non displicet: nescio quid tamen retinet, ne extra aleam eam ponam. *Gedanensis* mihi est eritque commendatissimus. Vale, mi *Heinsi*, & bene remgere. Patribus causam tuam curae esse gaudeo. Iterum vale. vi. Kal. Novemb.

EPISTOLA CCCLXI.

NIC. HEINSIUS

J. Fr. Gronovio.

Leidam.

Pro *Bigotii* epistola ad me remissa multum tibi debeo. Habes hinc *Menagii*, quam postulabas, ea quoque cum commodo tuo mox ad me revertatur licet. Ad *Tennuylium*, cum literarum non nihil dabis, memineris velim odes nuptialis a *Capellano* nuper editae, meaque opera tibi traditae, ut jussus eram ab auctore ipso. Poteris autem gratiarum actioni laudis nonnihil inferere, si quod encomium versus illos meruisse judicabis. Hoc officio hominem tui studiosissimum demereberis, & ad res *Tennuylii* porro fovendas provehendaeque, quod multa cum sedulitate fecit hactenus, de novo accendes. Si notum habes nomen bibliopolae Amstelaedamensis, apud quem vaenales exstant *Reinesii* epistolae,

istolae, id, quaeso, ut sciam fac quamprimum. Vale, mi Gronovi. Dabam Hagae Comit. cioroclxī. a. d. iiii. Februarii.

EPISTOLA CCCLXII.

NIC. HEINSIUS.

J. Fr. Gronovio.

Leidam.

MEnagii epistolam vix ad te miseram, cum ex proceribus nostris maxima sane cum voluptate intellexi, dignitatem illam, quam votis omnibus tibi destinabam, in te collatam esse. Serus tamen gratulator te accedo, quod mihi visus sim, longe majori jure hoc officio apud Academicos vestros functurus, quam apud te. Ad quos, si bona sua intelligunt, honoris tibi habiti pars potissima profecto spectat. Vnum dolco, integrum tibi per hunc magistratum vix fore, ut ad nos excurras, tuoque conspectu, quo fruiante abitum in meis aedibus unice optabam, me quodammodo fraudari per demandatam tibi hanc de novo provinciam. Caeterum exactâ illâ sedulitate tua atque accurata diligentia fit, ut nemini Leidenfium vestrorum libentius molestus obstrepam ac importunus, quam tibi. Duas accepi nuper epistolas, ex Galliis alteram, alteram ex Italia. Utramque ubi legeris, facile agnosces, ut puto, nihil tibi cum iis negotii esse, sed quicquid illic a me postulatur & contenditur, ad Cl. *Golium* majori ex parte pertinere. Atque hoc ipso nomine nunc te compello, ut illi utramque harum, quas nunc mitto, epistolarum aut tradas ipse aut tradendas cures, simulque effectum des, ut & de Indice operum *Vietae* ineditorum serenissimo Etruriae Principi quamprimum gratificetur, & V. Ampl. *Bernardi Medonii* Senatoris Tolosani, de illustranda veteris Urnae inscriptione, desideriiis satisfaciat. Character urnae inscriptus est Arabicus, ni fallor, sed antiquus. Nam quod eam ad Neronem trahunt, nugae maximas opinor esse. Sed vos videritis. Si aqua hîc haeret doctissimo *Golio*, alium esse apud vos linguarum Orientalium probe gnarum intelligo, cui *Nisselio* sit nomen. Vale, vir & amice summe, atque operam da, ut ambae mox epistolae cum responsione ad me revertantur, ne praeter fas & aequum preces hominum optime de me meritorum odiosa procrastinatione ludam, aut frustrari pergam. Senecam Tragicum quando videbimus? Dabam Hagae Comit. die x. Febr. cioroclxī.

J. FR. GRONOVII
EPISTOLA CCCLXIII.

J. FR. GRONOVIIUS

Nic. Heinsius.

Hagani.

Quod mihi gratularis hoc annuum collegii nostri magisterium, habeo gratiam. Sane si a multis annis hoc cuiquam nec cupido nec optanti obtigit insperatum, is ego sum: sed non habuit omnem fortuna campum, in quo tu quoque suffragator fuisti. Video umbram honoris, aliquid praesidii ad rem familiarem, molestiae invidaeque satis, adversum quas an semper hominibus, incertum est, animo certo meo & instituto, Deo benevolente, satisfecero. Ad *Goliathum*, quae jusseras, statim detuli, & tundere hominem non destitui, donec, quod vides, ab eo nanciscerer. Tituli exemplum arbitratus est se jure suo retinere. De Pythagoricis non aufert omnem spem convertendi, sed praecipuam difficultatem ait esse in nominibus propriis, quae sic primum Arabes, deinde & librarii contorserint ac depravarint, ut quid Graece sonent, aegre post multam meditationem reperiatur. Senecam operae, velearum dominus, morantur. De centesimis usuris & unciario foenore *Αντεξήγησις* dedi alii typographo, & jam tria folia sunt expressa. Capellani memor ero. Nomen bibliopolae, unde emptae epistolae *Reinesii* sunt, est *Pieter van den Berg*. *Glandorpius* in *Onomastico* scribit *Rob. Titium* lib. I. contr. locorum cap. IV. legere apud Festum: *Raviliae a ravis oculis, quemadmodum a colore fusco Sullae*. *Scaliger* ad Festum hoc *Turnebo* tribuit. Velim scire, utrius putes, & ut verba *Titii* in hanc rem describi mihi cures. Vale, vir nobilissime, animo & genere, & me ama. Lugduni a. d. XIII. Cal. Mart. CIOICLXL.

Nobilissimum *Vossium* plurimum salvere jubemus ego & *Junius*, qui grates illi agit ingentes, nec potest induci nunc quidem, ut delatam conditionem accipiat. Hoc coram illi vel ego vel ille renuntiassemus, si redux *Amsteladamo* domi nos heri invenisset.

EPISTOLA CCCLXIV.

NIC. HEINSIUS

J. Fr. Gronovio.

Leidam.

De urnâ veteri rem diligenter a te curatam esse gaudeo apud Collegam tuum, Amplissime & Magnifice Vir: quo officio cum me, tum *Medonium* quoque, hominem tui studiosum imprimis ac observantem, demeruisti. De

De indice operum *Vietae* ineditorum vellem pari passu negotium processisset: quem si a *Cl. Golio* frustra speramus, aut a *Schotenii* ἑταίρῳ fratre, aut a *Johanne Elzevirio* obtineri posse non despero, nisi is a civitate nunc abest. De Pythagoricis Arabum scriptis promissa *Golii* flagitare & convenire *Datus* non definit: cui praecipuae curae est, ut ipsos libellos Arabicos consequatur, si sermone Latino donatos impetrare non dabitur. Nec quicquam causae est, cur morae multum neccat *Cl. Golius* in depravatis nominibus propriis; quae in integrum restituenda & vindicanda a mendis ipsi *Dato* malim relinquat. Affinis tuus ad me scribit, se nunc in *Porphirii* Pythagoricis occupari, quorum codicem vetustum ex *Memmiana* bibliotheca depromptum sit nactus. De centesimis usuris quae commentatus es, avide expecto. Locum *Festi Titius* libro 1. cap. iv. locorum controversorum adducit, sic ut in epistola tua exhibetur, quo vulgatam in *Plutarcho* scripturam contra castigationem *Sigonii* tueatur. Sed nihil in *Festo* se mutare aut corrigere monet, aut addit, ut verisimile sit *Turnebi* conjecturam esse, quod tamen ex indice adversariorum haud liquet: disputat autem *Titius* contra *Sigonium* super nomine *Sullae*, quod is in vita *Coriolani*, ubi agitur de cognominibus Romanis, Σίλλας, ἀντί τῶ Σύλλας reposuisset, contenditque nomen *Sullae* a colore corporis derivari. *Holstenium* graviter aegrotare, & tantum non conclamatum esse narrat *Bigotius*. *Silvercronius* ex *Suecia* redux, asseverat *Heram* suam *Aprili* mense nobis adfore. Quae *Vossio* nostro significari jubes, significabuntur. Vale, decus immortale literarum. Dabam *Hagae/Comit.* c1810CLXI. a. d. xix. Febr.

Sed heus! *Menagii* epistolam, quam nuper a me flagitabas, necdum ad me rediisse velim memineris.

EPISTOLA CCCLXV.

NIC. HEINSIUS

J. Fr. Gronovio.

Leidam.

Ussit noster *Graevius*, ut hoc commentarii in *Statium Barthiani* specimen ex *Germania* recens allatum ad te mitterem. De *Adversariorum* tomo inedito necdum decisa lis est. Quid ex *Italia* nunciet *Bigotius*, ex ipso, quam ex me malo intelligas. Quare literas ipsas hinc mitto, sed ea lege, ut ante diem *Mercurii* proximum ad me revertantur, cum responsum illis sine mora sit parandum a me, ne id *Romam* perferatur, post amici nostri ex illa urbe profectionem, quam ante festum paschale parabit. De *Indice operum Vietae* edendorum aurem rursus tibi vello, aut si nihil expectandum est a *Schotenii* fratre & ab *Elzevirio*, fac id sciam quamprimum. *Bacchanalibus* hisce si diem alterumque poteris vacare mihi, & ad me excures, multum me demereberis. Lectissimam quoque uxorem quominus hospitam mihi adducas, nihil, ut opinor,

opinor, obstat. Commentarium tuum de centesimis usuris fac brevi videamus. Vale, Vir Magnifice, dabam Hagae Comit. CIOICLXI.

De *Menagii* quoque epistola velim memineras. In *Schotenio* aut *Elzevirio* compellendis operam vicariam doctissimus *Junius* non invitus tibi, ni fallor, praestabit.

EPISTOLA CCCLXVI.

J. FR. GRONOVIIUS

Nic. Heinſio.

Hagam.

DE Arabicis Pythagoreis diem profert, & spem convertendi redintegrat possessor. *Scoteni* fratrem percontatus sum: negat putare *Vietae* alia habuisse aut novisse fratrem, quam quae ediderit: tamen schedas ejus se perlustraturum. A *Golio* antehac accepit, *Spagnetum* fuisse Senatorem *Burdigalensem*, qui complura inedita *Vietae* habuerit, & missurum huc, ut typis describerentur, pollicitus fuerit: eum postea excidisse gratia regis, & *Burdigala* exfulare jussu: inde nescire, quid homini, quidve scriptis illis acciderit. De *Menagii* & *Bigoti* literis amo te plurimum. Priores quod accipis tardius, memoriae & festinationis meae vitium est. Auxit hoc triduo negotia nobis *Capuzellus*, qui fatuus, quum & capite census esset & proletarius, putavit decoquere sibi licere: quod jure suo primae centuriae faciunt. Hodie Deo volente primum praesidebo in tribunali, & offendendum aut dextrum aut sinistrum cornu; medii nihil est. Non sum avidus simultatum, nec modestiae, ut spero, fines egrediar: sed quia evadere non possumus, ita potius agamus, ut si qui oderint, bonos tamen viros fuisse sentiant. Tibi, puto, probabo rationem meam. Vale, mi Heinſi, Lugduni vi. Non. Mart. CIOICLXI.

Ad *Spanhemium* scribendum est. Puto me optime per te literas commendaturum *Grotio*. Iterum vale, decus meum.

Haec ut intelligant lectores, sciant in Senatu Juridico Academico primum locum *Rectori* cedere, qui ad dextram habet quatuor ex Professoribus Assessores, ad sinistram quatuor urbis Consules, & duos Scabinos. Quod vero se non posse utriusque cornu gratiam tenere queratur *Gronovius*, idem nobis adhuc evenire solet, qui saepe memores inde iras sentire cogimur, cum solius aequi & legum rationem habendam esse censeamus.

EPISTOLA CCCLXVI.

NIC. HEINSIUS

*J. Fr. Gronovio.**Leidam.*

A *Spanhemio* has hoc ipso temporis momento accepi, quibus cum perendie sit respondendum, nihil tamen te ignaro atque inconsulto agendum mihi putavi. Quid responderi velis tute praescribe, de tuo enim capite comitia, ut vides, habentur, & de tuo corio luditur apud Heidelbergenses. De indice operum *Vietae* ineditorum non posse me gratificari Etruriae Principibus vehementer doleo. Egi ea de re hesterno die cum ipso Elzevirio, cum forte in hac civitate ipse mihi obvium dedisset: sed & ille perplexe dubieque respondet. De *Chapuzello* risum movisti. Fatuum tu appellas, & subscriberem ego huic elogio, nisi homines longe magis se fatuos invenisset, de creditoribus me loqui facile intelligis, quamvis Sphingem domi non habes, quae hariolari te doceat. Vale. Dabam praecipiti calamo. Hagae Comitum. MDCLXI. a. d. III. Martii.

EPISTOLA CCCLXVII.

J. FR. GRONOVIIUS

*Nic. Heinsio.**Hagam.*

Ignoscendum viris bonis, quando, ut praeco Granius, non contemnunt se. Nec necesse est, ut nos contra fastidiamus. Ego in fine epistolae adjeci post illam scriptam te egisse mecum, & me aegerrime ferre, quod non equis, velis. Sed cogitare ipsum jussi, uxorem me habere, & ex priori conjugio quatuor liberos: illam haeredes, hos avitam haereditatem habere Daventriae. Hoc tantum, & his poene verbis. Tu adde, quae videbuntur, dum ne illos videamur spernere. Vale. Lugd. Batav. MDCLXI. a. d. v. Martii.

† Ex his discimus, actum fuisse a Palatino Electore de evocando *Gronovio* in Academiam Heidelbergensem.

EPISTOLA CCCLXVIII.

NIC. HEINSIUS

J. Fr. Gronovio.

Leidam.

Narro tibi, Magnifice & Celeberrime Vir, *Holstenium* nostrum e vivis excessisse, maxima sane jactura rei literariae. De operibus ejus postumis in lucem proferendis cum cogitent Cardinalis *Barberinus* & *Bigotius* noster, atque horum nonnulla typis nostratibus describi velint, tu quid censeas ante explorandum duxi. *Jamblichum* & *Hieroclem* non opinor multum vendibiles fore. *Stephanum Byzantium* & *Geographos* ineditos reor praestare ut feligamus. Sed tu videris, quid de te polliceri aut possis aut velis. Nam me in Sueciam advocari meministi. Certe si rei literariae commodis consultum non cupis, quod te cupere, & quidem maxime, sum certus, & aliquid gloriae popularis tui dandum esse haud ignoras, nec pietati erga illum tuae defuturum te auguror. Caetera *Bigotii* ipsius plenius te docebit epistola, quam hîc mitto. Mitto & alteram, quam a *Gudio* accepi hesterno die. Perendie summo mane *Bigotio* sum responsurus, nec procrastinationem res permittit, cum ille Roma ante exactum quadragesimalis festum jejunii sit discessurus. Fac ergo, ut vel tribus verbis die crastino intelligam, quid responderi velis. Vale, & me totum tuum ama. *Spanhemio* tuas jam misi. Dabam manu praepropera Hagae Comit. CIOICLXI. a. d. ix. Martii Gregor.

EPISTOLA CCCLXIX.

NIC. HEINSIUS

J. Fr. Gronovio.

Leidam.

Cum pedem jam fixerim in Sueciâ, Vir summe, ejus rei si te ignarum esse patereis, nequaquam facturus videbar pro arctissima necessitudine, quae mihi tecum intercessit haecenus. Occurri in ipsa via Reginae nostrae, quae omni officiorum genere me prosecuta est, sic ut invitum quodammodo ac nolentem compulerit ad relegendum leucarum quatuor Suecicarum iter; idque in Halandia provincia. Helmaestadii diem unum est morata, quod dolores dentium causaretur. Adfui illic ei assiduus, atque una pransus sum. In viâ multus nobis de te sermo fuit, rheda enim sua me exceptum interrogabat plurima cum cura, quid tu, quid caeteri homines apud nos literarum periti ageretur. Opuscula *Holstenii* postuma, *Stephanum Byzantium* imprimis ut ederes, officii tui.

tui contendebat esse, seque per literas hac de re tecum velle agere asseverabat. Hamburgi in autumnum proximum est moratura, inde per Bataviam nostram iter Romanum meditatur. Mores & sermones satis compositos prae se ferebat, tum literarum quoque amorem. Mortem *Holstenii* multum deplorabat, ac querebatur eo e vivis sublato vix esse, cui bibliothecam suam posset committere. Commendavi illi *Meibomium*, quod is Hafniae paulo ante me convenisset, nonnihil jam mutatus ab illo Hectore, qui arroganter omnia solebat agere, orbatus enim *Gersdorpio* patrono, alium circumspicere se haud dissimulabat, cujus in clientelam transfiret, aulae Danicae pertaesus, & egestatis, cum qua nunc ibi conflictandum est. Admisit commendationem Regina: petiitque ut per literas cum *Meibomio* hac de re agerem. Sic post protractos in multas horas sermones ab illa discessi, quod Holmiam mihi esset contendendum; ipsa Danicum iter prosequeretur. Omnia ex sententia apud illam cum mihi cesserint, illud unum parum pro expectatione contigit, quod in aere meo se esse non quidem inficiabatur, sed dissimulabat. De paterno negotio, cujus ipse mentionem injiciebam apud proceres Suecicos a me urgendi, sic dissierebat, ut cum multo rubore culpam suam agnosceret, seque male omnino de me meritam fuisse fateretur. Cum asseverabam, eo nomine me peccasse, quod rarius se curis gravioribus distractam de hoc negotio interpellassem, cum totos interim dies a praefractae frontis hominibus obtunderetur, reponebat, modestiam meam non debuisse mihi nocere, seque pudere facti indignissimi, quod si revocari posset, libentissime se mihi gratificaturam. De successore suo sic loquebatur non semel, ut notis minime occultis ejus odium proderet. Praesertim temeritatem ejus culpabat, stultitiam, ut verbis ejus utar, qui nostros homines infensos sibi reddidisset, & cum illis navali certamine ausus esset congregi. De praelio Finonico laudabat fortitudinem & bellandi peritiam in milite nostro, tum addebat, & *Δύνα* primum omnium orbi universo revelasse horribile arcanum, Suecos videlicet non esse invictos. Plura hujus generis commemorare possem, si essent ea hujus loci. De litis meae eventu cum ultro me compellaret, respondi victoriam adhuc ambiguam, ac in dubio palmam esse. Sed quid si succumbas, inquit, herbamne porrecturus es adversae parti, & in judicium sententiam concessurus? Minime, inquam, cum pateant non quidam altae caligantesque fenestrae, quod ille ajebat, sed amaenissima terrarum Italia, & tuum patrocinium, quo confugere possim. Subrisit illa, & accipiens omen, utinam hac lege vincaris, ait, hospitemque me sibi fore longe gratissimum addidit. Ita frontem ultro citroque in via exporreximus. In laudibus meis ad nauseam usque apud Italos suos operosa erat. Me scilicet unum esse, quem Latinae Musae hac tempestate benigniter respexissent. Dum sic nugabatur illa, vix a risu temperare mihi poteram, cogitans ac mecum perpendens, quanti laudes illae mihi constarent. Mallem certe gratis negligi ac contemni, quam praeconiis tam pretiosis cumulari. Et haec haecenus. *Elzevirii* Amstelaedamensibus in mandatis jam pridem dedi, ut Nasonis mei exemplar quamprimum ad te mitterent, quod ab illis jam factum esse opinor. Scis

ipse, quam non defaecato animo me accinxerim ad notas & castigationes in hunc poetam meas chartae illinendas: quas curis secundis aliquanto limatiores dabo. Tuam interim censuram avide expecto. Non enim dubium mihi est, quin multa improbaturus sis in istis observationibus. Lucani Amstelædamensis cum editis codicibus conferendi si memores, bonum factum est. Ego exemplaria ejus membranea quinque Hamburgi apud *Langermannum* nostrum inveni, & diversas lectiones ex totidem codicibus excerptas. Jamque multa restitui non infeliciter, ut mihi visus sum, in hoc scriptore, partim ingenii alis innixus, partim membranarum fretus auxilio, de quibus alias tecum agam. Regem & Reginam matrem ab hac civitate absentes necdum salutavi. Senecam tuum impatienter expecto, illum, & si quid praeterea ad me voles, Elzeviriis Amstelædamensibus crede. Codices nonnullos ex *Rhodianis* Hafniae apud haeredem ejus *Thomam Bangium*, Theologiae professorem, vidi, atque in his Livianos tres quatuorve, & Senecae philosophi unum, qui Cardinalis *Bembi* fuisse dicebantur, non tamen antiquos. Si quid ex Galliis aut aliunde rerum novarum didicisti, imperiti quaeso. Vale, flos literarum. Dabam festinus Holmiae Suecorum CICIOCLXI. a. d. xi. Junii Gregor.

VV. CLL. *Rufius*, *Vorstius*, *Golius*, & *Bornius* ut exemplar Nasonis ferrent meo munere, Elzeviriis injunxi: officium si negligunt, ejus quaeso admoneantur.

E P I S T O L A CCCLXX.

J. F R. G R O N O V I U S

Nic. Heinſio.

Holmiam.

T Enco tandem & cum sacro horrore tracto Ovidium, tersum, politum, & ut illi loquebantur, sub ascia dedicatum: qualem ante mille & quingentos annos si legerunt Romulidae, magnum est. In Notis vero quid prius mirer? laborem inaeſtimabilem? an divinandi in tam perplexis ambagibus sagacitatem? an multiplicem reconditamque eruditionem? an tot lectorum locorum memoriam? an tot alios auctores feliciter restitutos, ut vel sine Ovidio satis gloriosum tibi volumen facerent? Denique penu quoddam uberimum omnis Latinae elegantiae nobis dedisti. Tanto in publicum merito addidisti amplum mihi, ut & in parte operis aeterni titulum mihi poneret, & passim hoc nomen velut adjutoris celebraret.

Tunc & meas respexit Alcides manus.

Scis ubi dicat Theseus: sed ille necessitate, tu benevolentia: quam propemodum praefers nimiam, & quae mihi benigne tribuis, gratiae suspecta reddis. Sed & hoc mihi proderit haecenus, ut placabiliorem invidiam experiar: ego interim & pro ipsa benevolentia satis tibi debeo. *Rufio*, *Vorstio*, *Golio*, *Bornio*, quae jussisti, exemplaria tradidi: & illi grates magnas agunt, *Vorstius* etiam se

se scripturum pollicitus est. Congressum tuum & colloquium cum Regina legi summa cum voluptate. Si Stephanus *Holstenii* huc mittetur, satis confido nos inventuros typographum. Lucani lib. 1. contuleram exiguo fructu, cum institerunt reposcere Amstelaedamenses. Tragoedias Senecae (in quibus cura nostra tantum relinquitur a tua proxima, quantum ab Ovidio Seneca) nihil moratur, praeter picturatum instar Indicis. Fac proximis tuis nomines mihi, ut fecisti antehac, quem procuratorem suscipiendis, quae ad te destinabuntur, Amstelaedami constitueris: nam & apud *Vossium* e Gallia est fasciculus, quem cui commendemus, ignoramus. *Tan. Fabrum* explevisse mortalitatem Cadomo scribit mihi *Mat. Beuningius*. Est hîc familiaris ejus, qui narrat hominem a convictoribus ac discipulis collegisse paucis annis 50000 flo. & non inopia, sed lucri desiderio, & illius pecuniae fiducia petisse locum inter mancipēs: habuisse etiam emptum 12000 fl. suburbanum, quo saepe excurrere & mirifice delectari sit solitus. Laboribus perpetuis eum succubuisse putat. Evasit ille quidem sensum poenae, quam sibi pro tanta malignitate debebat: fatendum tamen est literas in eo haud mediocre damnum fecisse. *Heribertus* quoque noster, si hoc ad curam tuam pertinet, nuper decessit, postquam triduum siccus esse, & averfari vinum coepisset: jamque ab tuto bonis affinibus agnoscitur. *Rittershusiani* codicis ob morosum dominum spem omnem tibi praecidit *Arnoldus*. Vale, ingens literarum incrementum, & Deo juvante effice, ut qui virtutem tuam & studia reveriti non sunt, revereantur in republ. gerenda felicitatem, Lugduni in Batavis a. d. xvi. Cal. Sextil. cıııııclxi.

EPISTOLA CCCLXXI.

NIC. HEINSIUS

J. Fr. Gronovio.

Leidam.

DE affectu erga res meas meaque studia tuo nunquam dubitavi, Vir summe: non enim poteram nisi ingratiſſimus. Quod tamen tam profusis laudibus meos in Nasone illustrando conatus ornas, non praeter expectationem solummodo meam est, sed spem quoque omnem longe excedit. Fuit, fateor, non minimi laboris ac taedii in tanta veterum membranarum sorde tanto tempore jactari ac volutari, sed quis haec digne praeter te unum aestimabit? Ingenii ac eruditionis laudem aut nullam in hoc opere, aut admodum exiguam mihi vindico. Plurima etiam meliora fieri posse curis secundis & scio, & meliora, si Deus vitam concedet, praestabo. Caligavit mihi in densissima quiesquiliarum nube frequenter animus, effecitque, dum minutiora nimis anxie confector, ut quae majoris momenti erant nonnunquam minus feliciter sum affectus. Partem operis non minimam, & in qua omnium felicissime sum versatus, tibi inscriptam dicatamque volui: quod curis secundis plenius apparebit,

quando praeliminari epistola mihi eris compellendus. Nunc instituti hujus vicem nomen tuum occupavit, ac palam facit in hoc majoris operis gustu, quid postea sim factururus. Inchoatus certe labor nunquam me fatigabit, quamdiu exemplaria probae notae in manus meas de novo venient, quorum ope terfior prodire possit hic auctor. Viris Clarissimis, collegis tuis, *Rusio*, *Vorsio*, *Golio*, *Bornio*, grata fuisse exemplaria gaudeo. Apud *Golium* utinam de imperandis Arabicis Pythagoreorum scriptis aliquid proficias. A *Dato* totis jam sex mensibus nullas accepi, cum soleret ante diligentissimus ac frequentissimus scribere; metuo misere, ne hominem tot irritis pollicitationibus offenderim, qui in mea causa semper officiosum ac paratum se praestitit. A *Bornio*, cum occasio feret, repetas velim *Nardii* in *Lucretium* commentarios, & *Septalium* de cura rei familiaris, quos ille libros jamdudum apud se servat, cum centies interea temporis eos perlegere potuerit. *Nardii* quoque commentarios a *Brunello* munus jampridem accepit, ut meo exemplari commodum carere possit. *Fabricium* nostrum *Hamburgi* fuisse *Langermannus* me docuit; eum postea in latrones incidisse, atque amissis sarcinis vix sceleratas evasisse manus, rumor nescio quam verus ad nos tulit. Regina optime se mihi velle fingit, sed non ego credulus. *Claudianum* secundae editioni adornare incipio. Si illa aequè negligeret res meas curat ac promovet, ut fecit haecenus, etiam hinc novum patronum mihi fore quaerendum video. Aurem illi super debito vellebam nuper. Hodie officiosas ad illam scripsi literas, ne me hircinam argentariam appellet, etiam de *Stephano Byzantio* tuae curae credendo monui. Si nihil respondet, non patiar me diutius vanis promissis ludi, quae *Silvercronius* pleno ore jactare non desinit. Senecam tuum impatienter expecto: quare fac, quaeso, quamprimum is ad me perferatur. Quicquid ad me voles, nulli tutius, quam *Elzevirio Danieli* aut *Ludovico* commiseris: cum illi frequenter ad me & scribant, & sarcinulas mittant. Literas etiam tuas *Strykero* in eadem civitate degenti possunt tradere, cui munus incumbit, singulis ad me hebdomadis publico nomine scribendi. In *Lucano Amstelaedamensi* si perdebas operam, quod totum cum vulgatis libris non contulisti, recte atque ordine a te factum est. Ejus codices viginti jam aut plures antiquos evolvi: nec multum inde frugis hausi. Unus *Vossianus* instar omnium est: in quo lectiones aliquot optimae exstant, quas frustra alibi quaero. Ex ingenio nonnulla in melius mutare sum conatus. Versus multos adulterinos deprehendi, quos miror virum summum *Hugonem Grotium* fugisse, de quibusdam tamen non miror, ut de illo loco sub finem operis, ubi de *Pothini* morte, qui sic legendus.

----- non factum meriti poena/que *Pothini*

*Distulit ulterius, sed non, qua debuit, ira;
Non cruce, non flammis, rabido non dente ferarum,
Magni morte perit.*

Nam iste versus ante ultimum insertus,

Heu facinus cervix gladio male caesa pependit,

Ineptus est, & totum loci acumen atque elegantiam plane intervertit. Quasi vero

vero nemo intellecturus esset, qua morte ceciderit Pothinus, cum Magni eum morte cecidisse dicat, nisi cervicem ei gladio abscissam esse addidisset: deinde quid hoc est, *gladio cervix male caesa pependit*? *pendere* pro *mutare* alicubi dixit Lucanus, sic *domus illi pendent*, quae ruinam minantur. Sed hoc hic locum non habet. Illud elegans ex Vossiano Codice, quod pag. 132. Notarum in Metamorphoses protuli de *percutiendi* verbo textorio: illud etiam libro ix. Lucani vers. 475. *Stat certior illic*.

Jupiter, ut memorant: non *corniger*, cum *tortis cornibus Hammon* mox sequatur, quae *ταυτολογία* prorsus ineoëcinna est. Erant plura; de quibus alibi. Nam illud quod conjeceram libro ii. pro *Hinc & Sidoniae gentes* legendum esse, *Hinc Eshedoniae gentes*, non *& Sithoniae*, ut alii voluere, plane confirmant excerpta veterrimi codicis S. Germani a *Langermanno* mecum communicata, in quibus, *hinc Isadoniae gentes*, etsi reliqui omnes à me inspecti pro vulgata stant lectione. *Fabrum* obvisse nollem, erat enim, ut tu recte censes, qui ornare literas posset. Interim spero censuram meam alios officii admonituros, si illum admonere non potuit intempestiva morte praereptum. Pluribus volebam garrere tecum, sed urget abitum tabellarius. Vale, vir & amice summe, & frequentes fac in ista, quicum nunc luctor, solitudine, & a te & ab aliis amicis videam. Dabam manu praepropera. Holmiae Suecorum A. MDCLXI. a. d. xx. Augusti.

EPISTOLA CCCLXXII.

NIC. HEINSIUS

J. Fr. Gronovio.

Leidam.

Vir magnifice & clarissime. De Theologo, qui verbum divinum & mysteria religionis nostrae in aedibus meis interpretetur, negotium mihi commendare non desinunt, quotquot ritibus ecclesiae nostrae in hac urbe initiati sunt. Et quia procures nostri de stipendio rem ab aerario suo videntur velle amoliri, ut frugalitati impense nunc student, promittunt illi, qui Theologum desiderant, ex suo censu annum illi stipendium trecentorum scutatorum fore praestandum: praeterea de victu illi prospiciendum fore suis impensis, si ne eas quidem in se receperint procures nostri. Vides conditionem satis lautam, quae in scutatos quadringentos augeri atque excrecere possit, si Gallici sermonis etiam sit peritus, ac duplici idiotismo seu sermone, hoc est tam Gallico, quam vernaculo, sacras scripturas commode interpretari possit. Erunt praeterea in promptu alia emolumenta, de quibus polliceri nihil nunc volo. Id dixisse suffecerit. *Ludovici Gerii* Theologum Bernatem domo, qui post duodecennem moram nuper hinc discessit, abiisse ditatum censu octies mille ad minimum scutatorum. Communica quaeso rem cum amicis, & vide, an hominem idoneum

inve-

invenire possis, sed ita ut alienae commendationi parum, tuis auribus plurimum hîc tribuas. Ex eorum numero, qui Curios simulant, neminem desidero. Juvenem probum, pium, literatum & disertum inveniri opto, qui sine ostentatione ac rigidâ severitate divinis praeceptis inhaereat. Atque haec de Theologo. A *Scheffero* epistolam habui nudius tertius, qui & salutem tibi plurimam dicet, & Senecam tuam avide ac impatienter a se desiderari testatur. Secundae Nasonis editioni manus jam nunc admovissem, nisi ab hoc instituto me publicae occupationes avocarent, quae solito nunc densiores instant, sub hybernâ tamen tempestate, mari videlicet clauso, nonnihil, nisi fallit augurium, remissurae. Horis tamen subsecivis vix temperare mihi possum, quin ad hoc pensum identidem recurram. Istis cogitationibus ubi totum me dabo, fore praevideo, ut observem multa, de quibus primae curae non cogitaverant. Notis ad Epist. Heroid. ix. vers. 78. *Aequaque formosae pensa rependis herae*, multas diversas lectiones ex codicibus antiquis congeffi, qui locum demendo suspectum reddunt. In additis tamen, vulgatam lectionem ex illo Propertii tueri conor,

Et graviora rependit iniquis pensa quasillis.

Nunc adducor ut credam Nasonem scripsisse,

Netaque famosae pensa rependis herae.

Consule diversas lectiones a me prolatas, & scripturae hujus vestigia in iis deprehendes. Est autem id verbum saepe corruptum, ut Notis ad Eutropium Claudiani, & Nasonianam Ibin jam docui. Ad Epist. xvii. vers. 16. *Nec sedeo duris torva superciliis, Nec videor* in aliis scriptis legi jam monui. Utrumque otiosum videtur. Opinor autem ab oscitante librario primum fuisse exaratum, *video pro rigeo*, atque inde *videor* & *sedeo* fuisse conflata: versu proximo non placet illud, *Fama tamen clara est*. Otiosum enim est, quod famae celebritatem hîc jactat, cum de pudicitia sua agit. Quare vide ne scripserit Naso, *Fama tamen cara est*. Caram habeo existimationem meam. Famae studeo. Sed haec levia. Not. ad Metamorph. xiv. vers. 334. *Ancipiti Jano*, multi ex melioribus scriptis *Jonio Jano*. quod interpretari sum conatus, nunc parum abest, quin *Inoo Jano* censeam scribendum esse. *Janus* enim Palaemon seu Portunus nonnullis dictus. Vide duas inscriptiones apud Gruterum pag. xcv. & Festum in *Claudere*. Quid quod Venilia, quae uxor Jano hîc datur, nonnullis Salacia est dicta, ut Varro nos docet libro iv. de LL. & Servius ad vers. 76. libri x. Aen. Quae omnia in Notis nostris pluribus adstruemus. Est enim tota Jani Historia valde etiamnum intricata, & quam non nisi obiter tangant, qui de diis Gentium ex professio scripsere. Sed quid Marciano Capellae agemus, qui initio operis *Argionam Jano* dat uxorem? quod nomen alias mihi non est lectum, nec dubito mendosum esse, ut alia infinita in scriptore doctissimo, sed pessime, si quis alius, habito: cui utinam manum aliquis admoveret! Castigavi certe plurima ex ingenio nuper illum percurrrens, & si vacaret attente singula examinare, nulla esset pagella, in qua non errores multos possem exhibere commissos: quid pag. 8. ed. Grotii, sibi volunt illa? *tertia viventis plum-*

bi fusili robore videbatur. Nisi me fallit conjectura, scribendum, *rodere vel rodo.* Nam *Rodus, raudus & rudus* dicebatur: *plumbi paxillum rodus* Lucilio apud Festum, quem vide in *Rodus*, atque illic Scaligerum. Simile mendum sustulit ex libello Apulei de deo Socratis elegantissimus Mercerus p. 94. *non secus quam plumbi rodus, & lapis suo pte nisu caducae terris illiderentur.* Apud eundem Marcianum pag. 336. quid illud?

Artes creagris vix amicas Atticis

Forte *theatris Atticis.* Sed verius *choragis*, oblique perstringit Satyrico dente Athenienses, tanquam scenae addictos. Sed in toto illo carmine nihil fani est, quod alibi emendare conamur. Nunc ad Lucanum, in quo nunquam placere mihi potuit libro VI. vers. 356. *Atque olim Larissa potens*, quare minimum abest, quin refingendum censeam, *Atque soli Larissa potens*, nimirum, ut in superioribus, ita etiam hîc Homericum epitheton est aemulatus, cui *Λαρίσσα ἐρίβωλαξ* non semel dicta, quod & Horatius imitatur illo, *Larissae campus opimae.* Libro. VII. vers. 607. *Jam Magni deseris arma, Successor Domiti?* Acuta sunt & docta, quae vir maximus illo loco protulit, veriora tamen fortassis, quae nunc ego in medium fero. Scripti fere omnes *Succensor.* Optimus Vossianus *Succentor.* *Succentorem* belli civilis vocat, quo modo, *tubam belli* & similia dicimus. *Succentores*, qui alteri praecinenti accinebant, ita oblique secundas Caesari in bello civili facit Domitius, Pompejus primas. *Succentores* quinam dicti, docet Varro libro I. cap. II. de RR. *Incipit nempe hic philosophiae magister sive Stoicus, succinit beatulus hic, sive discipulus.* Papias, *Succentor est, qui subsequenter canendo respondet.* Horat. libro I. Epist. XVII.

*Est fundus nec vendibilis, nec pascere firmus,
Qui dicit; clamat, victum date succinit alter,
Et mihi dividuo findetur munere quadra.*

In *choris incentiva dextra, succentiva sinistra.* Magni igitur *Succentor* Domitius, qui Magno assentabatur. Plura ad rem in Adversariis congesti.

Sed desino ineptiarum, quarum me non omnino paenitebit, si tuarum vicissim observationum aliquid elicuero. A *Bigotio* nuper habui Mediolano missas, quem jam ad suos reversum esse arbitror. Ait literas *Octavii Ferrarii* apud *Bernandinum* sibi visas fuisse, quibus significat adfuisse sibi *Spanhemium* nostrum. Addit praeterea quatuor postremos *Polyaeni* libros in gratiam *Graevii*, a se cum codice Vaticano collatos esse; unde multa praeclara cruerit. *Themistii* quoque *Ambrosianum* codicem se excussisse magno cum successu, idque in gratiam *Cossardi*, cujus *Themistius* Lutetiae jam pridem sub praelo fudet. Vide ut ab *Boeclero* obtineas aliquando excerpta, aut diversas lectiones, ex codice *Epistolarum Senecae* *Argentinenſi*, qui longe veterrimus in publica civitatis illius asservatur bibliothecâ, vocibus ut plurimum inter se cohaerentibus exaratus. Amicos omnes jubeo salvere. Cl. *Bornium* velim cogitare de *Lucretio Nardii* restituendo, & *Septalio* de cura rei familiaris. Scripsi etiam ad *Syndicum* junio-rem *Leidenſem*, & libros duos trefve repetii, tibi tradendos, cujus opera ad me perferantur. A *Clariss. Golio* nihil expectandum video, de toties promissis

missis Arabicis Pythagoreorum scriptis. Metuo ne haec repulsa amicissimo *Dato* me invisum fecerit. Totis enim octo mensibus nihil ad me scribit, qui solebat esse diligentissimus. Vale, nostrum decus. Dabam festinans Holmiae Suecorum. Anno CIOIOCLXI. a. d. xvii. Sept.

De *Vlitio* nostro miror tanto tempore me nihil intellexisse. Nam *Vossius* quod nihil scribit, in eo antiquum obtinet, ac solens facit. Lis illa, quae Academiae vestrae cum Leidenensibus intercessit, quem eventum fortita sit doceri vel tribus verbis cupio.

EPISTOLA CCCLXXIII.

J. FR. GRONOVIIUS

Nic. Heinſio.

Holmiam.

BInis tuis cave putes mihi quidquam suavius fuisse, Heinſi maxime: sed quod tardius respondeo, ignosce, quaeso, catenatis laboribus, qui me exercere ac propemodum enecare non desinunt. De sacrorum famulo egi cum *Coccejo*, & commendavit mihi quendam ex veteribus discipulis *Borsmannum*: cujus ea de re quae sit sententia, ex inclusa scheda cognosces. *Goliſ* modo dat spem, modo aufert: postremum rogabat, numquid *Porphyrum* de vita Pythagorae ex editione *Rittershusii* & *Holſtenii* haberem: & se illis ad hoc ipsum, quod desideras, ubi vacuus foret, usurum. *Bornius* ait, libellos tuos in fida esse custodia, nec se adhuc *Nardium*, unde sperabat, accepisse. De *Fabro* noli vereri: vivit & valet, sed animo dejecto ob casum *Fulqueti*. Nec tibi iratus est, ut ex *Graevio* aut cognovisti aut cognosces. Rumor de morte ortus est ex *Beuningii* literis, Cadomo ad *Vossium* & me datis. In *Lucano* nondum persuades versum illum esse παρεμβεβλημένον. Quotidie contingit in suppliciis, ut non omni cervice divisa haereat exigua male caput amputatum parte, ut etiam meministi apud *Senecam* esse. Et, absque illo foret, obscurum & ambiguum maneret illud, *Magni* morte perit: nesciremus enim, confossus, an capite truncatus esset: quod utrumque passus *Pompejus*. Nec possum probare illud insolens, *Succentor*, de *Domitio*. Annon habes apud *Suetonium*, in *Julio* cap. 34. L. *Domitio*, qui per tumultum successor ei nominatus. *Appianus*: ἐφ' ᾧ δὲ σφόδρα πάντες ἀνέκρουον, ὡς ἐπὶ πολέμῳ καταγελία, ἀγέδοχον εἶναι Δεύκιον Δομίτιον. Et, opinor, alii. Sed nec *Creagris* moverim, sic enim solet ille per ostentationem doctrinae ad ineptias prolabi. *Pelagos* vocat, quos *Barbaros Poticios* *Plautus*, *Romanos*. Hoc ex *Cicerone* habet: hos dicit se velle docere artes, quae vix ab Atheniensibus vel Graecis, ad studia natis, comprehendantur. Caetera & in hoc, & in *Lucano*, & in *Ovidio* facile mihi probas, & applaudo ingenio tuo. *Bredam* rediit *Vlitius*, nec elegantiora loquitur de aula, quam reliquit, quam caeteri. Aemulationem ejus erga *F. I.* in Anglofaxonicis hac pe-

re-

Franciscum Junium.

reginatione mirifice crevisse non est quod dubitemus. . Lis nostra trahitur artibus, aliorum sperantium, morae nos pertaesum iri, aliorum, gaudentium se nactus, quo homines suae sententiae, & semper in alia omnia euntes vincere consilio possint. Congredimur tamen in conviviiis, & hilare invicem Concordiae publicae propinamus. Meus ille ¹ provocator edidit Vindicias serias suae opinionis de foenore unciario, satis contumeliosas, & gloriarum plenas; in re omnia σοφιστικά & ἰδιωτικά. Contemnebam hominem, & me satis explicasse quaestionem illam arbitrabar. Pervicere amici (in his *Rufius*) ut secundum cum illo congrediderer. Successit res praeter expectationem: nata sunt quaedam, quae non erueram prius: & erant ab illo nonnulla, non docte, sed callide & obscure dicta, quae decipere improvidos possent. Responsum jam est in mundo: sed nondum emitto, ut poliam, & non illi modo grave atque acerbum, sed & vobis suave ac jucundum faciam. ² Amici nostri οὐκ ἔστι οὐκ prodiit. Undique coeunt crabrones, hinc jam duo minantur, H. & V. Nescio quis & Delphis aliquid moliri dicitur. Observationum mearum praelo reddi coeptarum Elzevirianis typis, sumptibus Gasbequii, folium primum jam exstat. Senecae duo exemplaria Elzevirio misi tibi destinata, quorum alterum serves ipse, alterum *Scheffero* cures. Vale, vir nobilissime, & me ama. Lugduni in Batavis iv. Cal. Novemb. cıııııııııı.

¹ Est *Martinus Schoockius*, qui in Exercitationibus sacris, Exer. xxviii. n. 4. disputat contra Gronovium; cui opposuit Gronovius *Antexegefin de centesimis usuris & foenore unciario*, cui vindicias illas opposuit *Schoockius*, & respondit iterum *Gronovius*. vide illas *Antexegefes* ultimae editioni de Pecunia veteri additas.

² *Isaaci Vossii*.

EPISTOLA CCCLXXIV. NIC. HEINSIUS

J. Fr. Gronovio.

Leidam.

Senecam tuum impatienter quidem, sed frustra, quantum video, expectavi Shactenus. Per hibernas quippe tempestates claudendo mox mari ut liber huc perferatur non est sperandum. Rari etiam sunt, qui sub id anni tempus ex Batavia itinere terrestri huc excurrant, ut ne sic quidem spes affulgeat, voti compotem me fore, nisi sub aestatem proximam fortasse, quando terrâ marique iter oportunius fiet. Duas non ita pridem longe verbosissimas epistolas ad te dedi, in quibus Lucani, Nasonis, ac Marciani Capellae loca nonnulla in vulgatis libris male affecta tentabam: quibus cum nihil a te reponatur, facile intelligo aut conjecturas ipsas se tibi non probasse, aut nimium me fuisse in venditandis hisce ineptiis. Interim perlatus est huc rumor Hamburgo, qui ab Electore Palatino te evocatum esse, ac Freinshemio destinatum successorem spargat. Hujus rei nil latere me debebat, Vir Eximie, si per occupationes

K k k 2

den-

denissimas liceret tibi pristinae consuetudinis nostrae meminisse. Prandebat nuper hîc mecum clarissimus *Schefferus*, & cum illo *Coyetus ac Figarelius*, Regi a studiis ac moribus formandis, cujus de Statuis antiquis exstat luculentus commentarius. Plurimus tum de te tuisque virtutibus sermo nobis fuit, libato etiam saluti tuae poculo. Sedem ex quo hîc terrarum fixi, de Musis vix cogito, nisi in transcurso, & aliud agens. *Metamorphoses* Apulei nuper in manus sumebam, elegantissimum *mehercules* scriptum, sed pessime a librariis habitum. Nullibi latiore campum conjecturis & hariolationibus apertum fuisse affirmo. Quod si vetusti codicis copia in promptu foret, auderem fortasse post tot viros insignes in hac palæstra desudare. Interim Claudiano recensendo coepi incumbere. Libro II. de laudibus Stilichonis vers. 141. *non tempora somnus agendi Frustratur*, rectius fore videatur, si reponamus, *Furatur*. Sed Claudianum nunc missum faciamus. Apud Nasonem Fast. I. vers. 451.

Ergo saepe suo conjunx abducta marito

Vritur in calidis alba columba focis.

Miror non vidisse me jamdudum, scribi oportere,

Vritur Idaliis alba columba focis.

vel in *Gnidiis focis*, cum optimus Mazarinianus *ignitis* praeferat. Nam cum anserem Isidi, gallum Deae Nocti immolari solere mox dicat, cur non & hoc loco aram exprimat, cui columba immolaretur? Plura hujus farinae in medium proferre nunc poteram, sed desino nugarum, ut tu aliquando incipias loqui. In Lucani tamen loco ut me expedias hacrentem velim. Is est libro IX. vers. 809.

Utque solet pariter totis se effundere signis

Corycii pressura croci.

Neque enim satis percipio vim comparisonis hujus, aut quid sibi velit, *effundere signis*, quid *pressura croci*. Tu videris. Ex Galliis Italiaque diu est, quod literarum nihil accipio. *Bigotium* tamen ad suos rediisse *Capellanus* nunciat. Vale, Vir summe, meque, quod facis, amare constanter perge. Dabam Holmiae Suecorum. CIOIOCLXI. a. d. XXVI. Novembr.

EPISTOLA CCCLXXV.

NIC. HEINSIUS

J. Fr. Gronovio.

Leidam.

CUM proxime ad te scribebam, Vir summe, de silentio tuo nonnihil subque-
rebar, quantum memini, quod nullas a te multo jam tempore accepissem. Postea mihi traditae sunt, quas a. d. IV. Kal. Novembr. ad me dederas, longe jucundissimas, & plurimarum rerum fruge refertas. Iis ne nihil reposuisse videar, en *Schefferi* nostri epistolam, quam per me curari voluit. De sacrorum famu-

famulo, gratum fuit quod significasti; & multum te ob sedulitatem hanc amo. Vide tamen ne clarissimus *Coccejus* amoris erga discipulum nimium indulgeat. Non sum is ego, qui divinum esse me aut credam ipse, aut aliis persuasum cupiam, ex ipsa tamen, quam tibi scripsit vir bonus, epistolâ facile conjicio, oratorem illum esse subfrigidum & minime vehementem; nisi tu conciones ejus audivisti forte, atque iis auritus testis aliquid deferendum censes. Scribam proxime ad Patres nostros de hoc negotio, & ubi desideriis meis indulgentes habuero, de eligendo homine idoneo nec trivialis facundiae curatius cogitabo. *Golium* miror a te postulare Porphyrium de vita Pythagoræ, quem a *Vossio* jampridem me præfente utendum accepit: quique passim apud bibliopolas invenitur facili negotio vaenalis. Sane vir ille, dum omnibus officiosum se præstare contendit, magno conatu neminem demeretur. *Bornio* asseveranti libellos meos esse in fida custodia facile accedo: sed sic, ut tamen habeam persuasum, apud me tutiores fore. Nec sane video, quid homini aliena quadra viventi, utilitatis adferre possit *Septalii* liber de cura rei familiaris, mihi certe lectionem ejus fore utiliorem non negabis sat scio, cum familia satis numerosa nunc sit alenda. Nasonis mei exemplar tuto quoque apud illum deponi credebam, cum donavi. Expectabam tamen fatcor ab homine, & aulico, & Ethicam publice profitenti, ut levem gratiarum munusculo reponeret actionem. Quod quia non fecit, per me licet aulam Ethicenque suas sibi habeat impofterum: aliter profecto nostri rure solebant. *Tanaquillum Fabrum* revixisse gaudeo. Dabit enim aemulus iste uberrimam mihi materiam, ut auguror, de aliis apud Nasonem hætenus corruptis locis cogitandi, qui manum medicam frustra expectant; modo pergat fovere consilium & propositum de caeteris epistolarum tomis, quos est pollicitus, in lucem proferendis: a *Graevio* hujus rei me admonitum cave opineris, nihil enim prorsus epistolarum ab illo ad me perlatum est, ex quo domo absum; etsi hominem ad scribendum bis terve jam provocarim. Nunciavit tamen optimus *Schellius*, *Aemilio* illum successorem a Trajectinis destinari. Itaque, quicquid id est, quod ad *Graevium* de me perscripsit, & de meo Nasone *Faber*, fac cognoscam. De *Lucani* versu, quem spurium esse opinabar, manum tibi do, quia tamen pro *rapuit* in multis veterum, etiam in optimo *Vossiano* legitur *avido non dente*, in aliis quibusdam *rabido*, proxime sequentem versum suspectum habui. Truncatum sive Pompejo, sive Pothino, caput morti eorum non videbatur accensendum, cum uterque post mortem capite truncatus sit, si tamen capite truncatus Pothinus: gladio occisum Pothinum videtur designare. Nam si capite plexus est Pothinus, quod versus ille, *gladio cervix male caesa pependit*, videtur velle, non occubuit ille Magni morte, cui caput post mortem demum sit ablatum. Si abscissum post mortem Pothino caput, versus ille, quem suspectum habui, mentem auctoris sui non satis exprimit. Perpende quæso locum, & si persistis in proposito, scito me tibi cedere. Certe plures in *Lucano* hîc illic versus spurios offendi, de quibus, uti spero, mecum aliquando senties. De *incentoribus* & *succentoribus* locus luculentus est apud *Varronem* li-

bro 1. de RR. c. 11. p. 57. Ed. Comel. ubi inter alia, *Et quidem pastorum vitam esse incentivam, agriculturalum succentivam. Quocirca succinit pastorali, quod est inferior, ut tibia sinistra a dextra foraminibus.* Avienus, scriptor doctissimus, Orbis maritimae descriptione. p. 272. ed. Pithoei;

Caucaseas arces & dumicolos Arienos

Incentore canam Phoebo.

Sed & *Succentores* in choro *praecentoribus* opponebantur, quorum meminit Apulejus & Columella, vide Indicem Elmenhorstii Apuleianum in *Praecentor. Incentivum* apud Jul. Firmicum. libro. 1. cap. 111. *Hinc intelligi datur stellarum quidem esse quod patimur, & quod nos incentivis quibusdam stimulat ignibus. Incentor* igitur pro stimulatore. *Succentor*, qui incentori vicariam operam praestat. Potissimum me movit ad locum sollicitandum, quod in plurimis veterum codicum *Succensor*, in nonnullis *Accensor*. Glossa Petaviani, *Succensor*, qui eadem arma succendebat ad bella civilia. Vossianus autem, qui aut raro aut nunquam imponit, *Succentor* disertim. Vulgatam lectionem optimis auctoritatibus tueris, quod & vellem vir summus praestitisset, qui nimium brevitati hoc loco studuit. Geminam igitur scripturam olim in veterrimis exemplaribus exstitisse opinor, aliis, *Successor*, aliis *Succentor* praeferentibus. Expectabam fateor, ut & tertio loco vulgatae scripturae causam agendam susciperes, *Atque olim Larissa*. Sed olim & quondam uno eodemque versu minus convenienter poni agnoscas. Fuit cum conjicerem *ovium Larissa potens*. Sed alterum Homérico epitheto magis respondet. De variis Lucani & Apulei locis nunc vellem iudicium tuum explorare, sed in immensum abirent quaestiones. Claudianum recensere coepi. Nascuntur sub manum nonnulla, de quibus curae priores non cogitaverant. Libro 1. in Eutrop. vers. 111. *Corruerat passa facies rugosior uva*. Tò *Corruerat* offendit aures. *Pricaeum Aruerat* reposuisse video. Mihi rectius videtur *Marcuerat*. Plinius libro xv. cap. xiv. *in rugas marcescere* de pomis dixit, atque hinc *Marcentes uvae* apud Martialem libro v. Epigr. LXXIX. intelligendae, pro passis aut ruga obfritis. Orientius commonitorio,

Pendula quae marcent rugis deformibus ora,

Protulerant quantum conspicienda decus?

Ita scribantur versus illi. priore loco male legitur *maerent* pro *marcent*, posteriore *vanum* pro *quantum*. apud eundem Claudianum paulo post,

— *tantone libet mortalia risu Vertere?*

Vertere risu inconcinne dictum. Quare *nisu* censeo reponendum esse, quo modo apud Lucanum, *tantus ne evertere, dixit, Me superis labor est.* In Marciano Capella minus me pudet errasse, quam in Lucano. Est enim scriptor ille operose in multis ineptus. *Vlitium* rediisse ex Britannia tu primus me doces. Vindicias tuas avide expecto; sed Senecam impatientius, quem, utinam paucis diebus citius, mari necdum clauso, ad Elzevirium misisses! Nunc vereor, ne hybernae noctes sine hoc contubernali mihi sint agendaë. De amico nostro Hebraicae veritatis oppugnatore quid dicam, nisi Catullianum forte illud? *Otium Catulle tibi molestum est. Scheffero* cras aut perendie de Seneca tuo

tuo spem faciam. Vale, decus literarum immortale. Exarabam Holmiae Suecorum. Anno CIOIOCLXI. a. d. XIV. Dec. Gregor.

In Phaedro suo me nonnunquam exercet *Schefferus*. libro IV. Fab. LX. cd. Rittershusii. *Sic valeas, inquit, ut farina es, quae jaces, nihil video leporis aut acuminis, nisi scribas, quae neces.* Sic tu, inquit, valeas, ut alii per te valent, quos sub farinae specie necastii. Fab. LXIV. p. 57. *Quae saevum ingenium variis involvens modis.* Emendabam, *variis dolis*, hinc πολυμήδης Medea Apollonio Rhodio dicta. Apud Nasonem Met. VII.

*Neve doli cessent, odium cum conjuge falsum
Phasias assimulat, Peliaeque ad limina supplex
Confugit.*

Apposite ad hanc Phaedri narrationem.

Adjecta erant huic epistolae duo carmina in Delphinum Ludovico XIV. natum, quae leguntur in Poëmatibus Heinsii lib. IV. Eleg. 4. & lib. III. Silvar. pag. 205.

EPISTOLA CCCLXXVI.

J. F. R. GRONOVIIUS

Nic. Heinsio.

Holmiam.

Binas tuas recte accepi. Quia nondum videris decrevisse de sacrorum cure. *Johannes est Hogersius*, meus olim per triennium discipulus, & tantundem puto temporis *Heidani* atque *Cocceji*, cum maxime ex Gallia redux, juvenis Hebraice, Graece, Latine supra vulgum doctus, frater *Gosvini Hogersii*, qui nuper *Graevio* Daventriae successit: & prorsus ille, quem designavi in meis ad Senecae Nat. Q. notis pag. 305. Non audiui quidem publice verba facientem, testantur tamen mihi, qui Daventria veniunt, cum plausu audiri. Nec scio, an conditionem accipere velit: est enim in re bona. Sed si velit, neminem nunc nosse me puto, qui & studiis tibi placere possit. Has autem properavi, ne decernas, priusquam, si videbitur tibi, cum illo egero. Ex Epistola *Tan. Fabri* ad *Graevium*: *Legi nuper notas V. Cl. Nicolai Heinsii, quae mirifice mihi placuerunt, in illis etiam ipsis, quae contra me dicuntur. Tu conjicito caetera. Si quid autem sit, quod in illo egregio opere displiceat, hoc unice unicum est, quod putavit Vir clarissimus, me Salmasii notas ad lib. Tertulliani de Pallio legisse, cum tamen nihil Salmasii unquam legerim, praeter nescio quas Notas, quae una cum aliorum notis ad Plautum apud vos editae fuerunt. Sed uti dicebam modo, quae a V. Cl. scripta sunt, adeo me non moverunt, ut contra, si quid unquam otii mihi fuerit ab aegritudine & molestiis, quae mihi animum exedunt, reliquas omnes meas conjecturas ad Ovidium descripturus sum, & ad eum missurus. Harum certe nonnullae, ut ex perlectis Cl. V. notis, intelligo, maximo poëtae utiles esse poterunt. Sed quod Elzevirii vestri splendorem chartae ac nitorem characterum in editione tanti operis neglexerunt, id vero est quod mihi véλοδεν ἐν κρηδίνσ dolet, si quid est, quod mihi nunc praeter illustris amici casum doleat. Hic enim liber, si quid in eo genere sapio,*

us sum ab ejus incolumitate publicam pendere. SALUTI DOMUS AUGUSTAE; scis quam frequenter ea formula in Inscriptionibus antiquis occurrat. Si quid melius excogitare potes, communica, quaeso. In Claudiani loco recepta scriptura *Frustratur* defendi nullo negotio potest. *Furatur* tamen magis appositum fore censeo. De Lucani versu, in quo *pressura croci* occurrit, quid arbitreris aveo doceri. Cui accedat Phaedri locus iste Fabularum libri v. initio. *Detrito Myronem argento. Fabulae exaudiant Atleo fugatae*: nam neque numeri neque sensus constat versibus. Tentavit locum Salmasius Solinianis Exercitationibus pag. 406. sed infeliciter, si quid video, dum reponit, *Trito Myronem argento. Fabulae exulant Ideo fugatae*. Egregia sane ratio, cur exularent fabulae. *Faber* in editione sua nodum Gordium secuit, omittis, quae non intelligebat. Fab. LXIII. sub finem, *Quacunque summa tradet luxuriae domum*, opinor mendosa esse, nam cur *luxuriae domum* appellat? scriberem,

Quacunque summa tradet licituris domum.

Observavi satis multa ad tersissimum scriptorem, quae *Scheffero* tradam. Is enim ejus editionem novam molitur. Ad Statii Sylvas amoenissimas otiosus nuper devertebar. Utinam secundis aliquando curis eas perpurges! Plurima in iis restituisse mihi non infeliciter sum visus, de quibus tecum acturus sum, cum audire nugantem vacabit. Non possum tamen, quin pauca nunc ex iis delibem. Rifu Saturnalitio ad Plotium, vers. 24. *Caesis pilea suta de lacernis. Scribo Scissis*. Proximo versu cur *luridas mappas* appellet, velim me doceas; fuit cum *sordidas* reponi debere censerem: sed ἐπέχω. vers. 27. *Nusquam turbine conditus ruenti*, cur *ruentem turbinem* dicat, nemo est qui sit interpretatus, nec opinor esse, qui commode possit. Reor scriptum fuisse, *ruventi*, pro *rubenti*, atque hinc natum errorem. Coctana enim & pruna in vas testaceum rubrum recondebantur, & turbinatum. vers. 29. *non replictae bulborum tunicae* vix opinor sanam esse scripturam, tuum est me erudire. Proximo versu, ne illud quidem placet, *ova tantum*: olim tandem legebam; nunc *ova matrum* emendo. vers. 33. *lardum grave*, & versu proximo *graves Falisci* non quadrant. Quis enim credat elegantissimum poetam bis eodem epitheto, nullo fere orationis interstitio, fuisse usum? vers. 44. *Cumano patinas in orbe tortas*, malim, *vel orbe*. Rotam figulinam innuit, quanquam & vulgatum defendi potest. vers. 45. cur *albos calices* dixit? vers. 4. *Si post hoc aliquid mihi remittas*. Usus Latini sermonis videtur postulare *remittes*. vers. 9. τὸ *Praeter me* nescio an satis sanum sit. vers. 13. *Aut Byzantiacos colunt lacertos*. τὸ *colunt* offendit aures meas. Vide ne scripserit Statius *olent*, sic vers. 40. pro *cereos nitentes* vetus editio *Parmensis*, quae penes me exstat, *olentes* agnoscit, nec male. Omnia enim deprimit Statius, nisi *olentes* pro odoratis interpretaris, quomodo Naso: *solvit odoratas pennarum vincula ceras*. vers. 47. eadem editio, *Nil mittis*, pro *Nil mutas*. vers. 49. pro *Illatam salutem* conjeceram *Illotam*, quod id optime τῷ *semi-crudus* videretur respondere. Video id & aliis in mentem venisse, & a te daminari. Velim tamen exemplum suppeditari, quo *Inferre salutem* veteres dixisse

liqueat. Vides quaestiones sat multas tibi solvendas proponi. Sed addam plures, libro 11. Epicedio Pileti vers. 53. cur *Haemonium Pyladen* appellat, quem *Phocensem* fuisse constet? cur libro 111. ad Claudiam Uxorem vers. 48. *Aegialen* castis uxoribus accenset, quam impudicam fuisse non est ignotum? Sed in duobus istis conjunctis versibus nihil omnino est fani. Nam & *Meliboeae* nomen inter praeclaras faeminas est obscurum, & Ariadna nuptis perperam accensetur: cur libro. v. Epicedio Patris vers. 130. posteriorem in *Maeon* corripuit? cum *Μαίωv* Graecis sit. Sed ea scriptura Domitii somnium est, nam in Parmensi editione *Mater* ejus loco deprehendi occurrere, in alia *Major*. Hunc tamen scopulum securi interpretes praeteriere. libro 11. Epicedio Glaucia. vers. 130.

----- brevibus constringere laenis

Pectora, & angusta telas arētare lacerna.

Quid est *telas arētare lacerna*? Spero me habiturum te conjecturae meae obsequentem, qui corrigam, *talos arētare*. Ad talos enim lacerna descendebat: de instituta Horatius, *subfuta talos tegit instituta palla*. Libro v. Abascantii Pietate vers. 215.

----- praereptaque templis

Tura, Palaestini simul Hebraeique liquores.

Recte tu *Palaestinis*, sed nihil opus id τῶν simul construi, *praerepta tura templis Palaestinis*, ut ad victoriam Vespasiani de Judaeis alludat: nam *Palaestini liquores* & *Hebraei* eidem: quanquam vix persuadeor ut credam, τὸ *Hebraei* a Statiana manu esse, cum nullus, quod meminero, poeta meliorum temporum hac voce sit usus. Coercuissim nonnihil hanc profusam loquacitatem, nisi defunctum magistratu Academico jam scirem. *Carolus Datus* aurem pervellit denuo de Pythagoricis Scriptis. Sed jubebo virum optimum de hoc negotio desperare. Vale, magnum literarum decus. Holmiae Suecorum. a. d. iv. Febr. Gregor. ciccclxii.

EPISTOLA CCCLXXVIII.

J. F R. G R O N O V I U S

Nic. Heinsio.

Holmiam.

Rectoris tandem invidiosum nomen evasi. Nondum tamen rediit sperata vacuitas: adeo multa ex superiori tempore dilata, & quasi reliqua officiorum & curarum certatim ingruunt, & se quodque primum vult. Sed tuarum querelarum, Heinsi dulcissime, justam invidiam diutius ferre non possum. Genethliacon tuum quotquot viderunt, mecum admirati sunt. Ingesta enim & alia erant, sed quae vidisse statim piguit, & jam ab amicis reposci tuum illud

os

2 In Delphinum Franciae natum.

os magna sonaturum, quum repente tua epistola non modo illis satisfecit, sed & omnium expectationem vicit. Cum convivas habuisti, quos commemoras, credo vobis fuisse frui votis usque ad invidiam felicibus: nisi dum me, tanquam *Ἀβυδηνὸν ἐπιφύρημα*, interposuistis. Et credo venisse alicui in mentem: *Nulli homini perpetuum bonum. jam huic voluptati hoc adjunctum est odium.* Non indignor tamen me tanti esse fautoribus, ut tot Veneres & Gratias voverint parum suavi mentione interpellare. Fac, quaeso, omnes a me per occasionem quam officiosissime salutes. Laetatus etiam sum, quod cognovi primum ex tuis, Ampliff. *Figrelium* tenero Achilli Gothico datum Phyllyriden. Soli profecto reginas & reges pupillos recte educant Sueones. *Hogerfium* tentavi: sed corpusculi sive imaginaria, sive vera imbecillitas, tenet hominem inter suos: quemadmodum & vix visam Galliam, *Fabrumque* & *Amyraldum* curriculo deferuit. *Bornium* raro video: jam enim ¹ discipulum ejus taedet hujus secessus, & cum ipsum, tum cohortem omnem percepit Lotos Comitatensis. De loco ² Apollinis Palatini supplendo nihil aliud scio, quam quod tu ipse ad me olim detulisti. Sic etiam ex Sicambris, Saliis, Frisiis mihi gratulati sunt, tanquam ad magnum emporium ituro. Ego vero haec spargi ultimus rescisco, nec ullo aut dicto aut facto rumores laceffi. Suspicantur aliquid homines ex superioris anni actis, dein id quasi certo futurum narrant. Sed egerint, tulerint nos terriculis, minis, sumptibus, tardato salario judicibus. At vivere & stare in frivolis nostris, at medios & quosdam ex ipsis bene sentire de nobis patiuntur: frontes quoque, utcumque sit animus, obviis exporrigere sustinent. Itaque, ut nunc est, ut deferendum censeamus ³ *Πολιῆχον*, quum praesertim tu & pauci hoc homine vehementer illam indigere judicetis, nondum a nobis impetramus. Et quis est, a quo caveamus, ne vitantes ³ villae Trivici lacrimosum fumum ad Beneventanum hospitem & macros turdos ardeamus? Praeterea si non ad summam illam Epicteti accessimus, ut accusemus neminem, gradum tamen hunc tenemus, ut libentius nos, quam alios accusemus. Itaque si quid fuit acidi, id ipse me mihi miscuisse debeo credere. Quid enim? non merito plectimur, qui magistratum, jusjurandum decreta Ordinum esse aliquid putavimus, & pro his tanquam rebus praeclaris pugnavimus, ubi jamdudum ista omnia mera ludibria sunt, & nil nisi nomina sine corpore ac specie? Posthac igitur alio conferetur gratia: hoc est, opera dabitur, ne sex, aut, ut mire bene se habeant res, septem millibus nummum sester-tium tentemur ad serviendum & fidem prodendam. Sit ita: hoc fortem ani-

mum

¹ Principem Arausionensem Gulielmum *III*. cujus studia regere jussus fuerat.

² Intelligit Professionem Heidelbergensem, quam Gronovio oblatam fuisse rumor sparserat, natus forte, quia Senecam Tragicum Carolo Ludovico Electori dedicaverat. Frigus vero Magistratum Leidensium (quos, cum Rector esset, offenderat, dum jusjurandum & decreta Ordinum tueretur. Vid. supra Epist. *cccLxvi*.) non effecturum tamen indicat, ut *Πολιῆχον*, id est, Pallada Leidensem deferat, aut minis &c. deterreatur a recti tramite. Quid dicemus? eandem fabulam, mutatis actoribus, saepe in Academicam hanc scenam relatum videmus, & dolemus,

³ Respicit ad Horat. *i*. Sat. *v*. 79.

num tolerare jubeamus, nec fugiemus quae effugere non est. Sed haec in aurem tibi. Quid est autem, cur te tantopere offendat illud: *Nec tempora Somnus agendi Frustratur*. Immo perbelle dictum autumo, quod sit, eximit, eludit, ut irrita & sine actu elabantur. Scis *fallere, decipere diem*. Scis apud Plautum, *sopor manus calvitur*. Sed nec displicet *Corruerat*: certe magis placet, quam *Aruerat*, aut *Marcuerat*. *Stantia pectora* cogita in puellis laudata. Sic *stat facies* plana & non rugosa: rugosa & pendula corrui. Facit huc & Statii: *totas duxere in lumina frontes*. Satis etiam fero: *tantone libet mortalia risu Vertere*. Non utique jungendum *vertere visu*, sed *vertere*, tanto risu hominum accidente, aut tam ridicula mutatione aut vicissitudine. Nullus hîc nîsus, nullus labor: ultro volvitur fortunae rota: sed saepe cum magnis ludibriis. Phaedri autem: *Sic valeas, inquit, ut farina es, quae jaces*, sine magno peccato non potest sollicitari. Est enim dictum, ut Antonii apud Suetonium Octav. cap. LXIX. *Ita valeas, uti tu, hanc epistolam cum leges, non inieris Tertullam, aut Terentillam aut Rufillam*. Deos oro, inquit, ut non alia conditione tibi bene sit, quam si es, quod esse te simulas. Si *satis Augusti publica jussa mihi*, non putavi antehac esse nihili: sed si *jussa Augusti mihi satis publica*, intelligebam, si pro republica mihi satisfecerunt Augusti jussa: si non optavi vetera, contentus praesentibus. Nam qui priora malebant, iis non *publica*, quae Caesarea. Lucanus, *Usque ad Thessaliam Romana & publica signa*. Tacitus: *postquam nulla jam publica arma*. Obsecro te, ne lomento & nitro nimis utamur, & dum sordes eluimus, venas ac viscera auctorum aperiamus. De caeteris non habeo vel quod dicam, vel cur tibi adveser: aut si quid erit, cognosces proxime, quando nunc satis garrivi. Vale, unicum literarum & amicorum decus. Lugduni Non. Mart. CIOIOCLXII.

EPISTOLA CCCLXXIX.

NIC. HEINSIUS.

J. Fr. Gronovio.

Leidam.

Puto mihi hoc apud te licere pro jure necessitudinis nostrae ac pristinae familiaritatis, ut quae in buccam subinde veniunt, ea sine delectu ut chartis illinam, quoties per literas mihi compellaris. Nam quae ipse pro certis habeo, nec in discrimen voco, tanquam indubitata, iis te obtundere quid attineret? cum is mihi propositus sit scopus, non tam ut doctum doceam, quam ut proficiam ex tua institutione, quo nihil neque jucundius neque honorificentius in vita mihi potest obtingere. In Claudiano quae annotaram displicuisse tibi haud miror, cum unam ex tribus conjecturis a me quoque ipso minus fuisse probatam, cum postremas ad te exarabam, potueris agnoscere. Somnus enim tam frustratur tempora, quam furatur, ut tu optime mones. *Corruere* quo-

quoque *facies* prae macie potest dici, quomodo & *labi*. In epistola Cydippes apud Nasonem habes, *Concidimus macie: color est sine sanguine*. Postremum illud, *tantone libet mortalia nifu vertere* pro evertere interpretabar, tu ad rotam Fortunae maluisti referre. Conjecturam illam ne penitus damnam, facit auctoritas duum codicum Vaticanorum, quos inter unus omnium optimus, in quibus τὸ *nifu*, cum Claudianus novae nuper admodum editioni a me pararetur, eamque in rem diversas veterum membranarum lectiones excuterem, scriptum exstare deprehendi. Sed major tua apud me est auctoritas. In Phaedro elegancia & *Sic valeas*, inquit, non me praeteribat, ad quam confirmandam Suetonianus locus oportune omnino & apposite a te productus est, sed concoquere vix poteram τὸ *jaces*, in istis, *ut farina es, quae jaces*. nam & farina ipsa jacebat per pavementum dispersa, & videbar autem jure meo requirere verbum aliquod, quo mustela a farina discerneretur. Alterum, quod postremis literis suggerebam, ex eodem Phaedro *Quacunque summa tradet licituris domum*, vereor etiam ut se tibi probarit. *Luxuriae domum* si retineri placet, credatur dictum, quomodo *Victus luxuriae* in Petronio, *Luxuriae victu Martis marcent maenia*. Ita enim illic scribendum esse opinor, pro *victu*. Quamquam domum splendide atque affatim supellectile lauta instructam, non propterea *luxuriae domum* dicendam esse contendo. Atque utinam eadem opera Lucani locum, quem tibi proposueram, enodare voluisses! nam mihi plurimum negotii exhibuit. Quid enim est, *pressura croci signis effusa*. Non desinam aurem tibi vellicare, donec mihi hîc satisfeceris. Atque adeo, ne impune silentium id feras, ecce alium in Martiali nodum libro Epigr. v. 10.

Sic veterem ingrati Pompeji quaerimus umbram,

Et laudant Catuli vilia templa senes.

Quinam hi *Catuli senes*? quae *vilia templa*? nam prior versus difficultatis habet aliquanto minus. Quae interpretes de Capitolio, quod Catulus refecerit, huc congefere, ea ἀπεσδιόνησα mihi videntur. Cur idem Martialis libro x. 64. *Reginam* vocat *Pollam* Argentariam? Cur *viduam platanum* libro v. 104? nam si propterea viduam dicit, ut volunt interpretes, quod fructum non ferat, cur non & aliae arbores sic dicantur, quae haud sunt frugiferae? Quae *prima cervix* illi dicta, & quare, libro i. Ep. 52. Sed ohe jam fatis est! In Statii tui *Silvis* proximae meae sese occupabant, vereor ne & nimiae fuerint. Rifu Saturnalitio illud *Praeter me* subobscurum est. Versu quarto scribendum, *Si post hac aliquid mihi remittes*, nam hoc proxime praecesserat. De caeteris meis conjecturis agam uberius fortasse, cum intellexero, quas ex nuperis illis damnes, quas probes, aut verisimiles arbitreris. Genethliacum placuisse tibi, gaudeo impenſe. Quis enim est ex numero mortalium, cui conatus meos aequae gestiam probatos, quam tibi? Senecam tuum impatienter expecto: qui tamen ne perierit nobis, video subverendum esse. Negat nimirum ille, cui librum se tradidisse huc perferendum scripserat Elzevirius, de re credita quicquam sibi constare. Cujus tam inopinati responsi certiores jam feci Elzevirium, quid ad haec ille sit repositurus cupio

quamprimum cognosse. *Figrelii* quia mentionem injicis, non possum quin narrem, ejus curae creditam esse bibliothecam regiam, cui ingens incrementum accesserit ex praeda Danica Polonicaque. Vidi illic *Meursii* complura inedita. Praecipue magnam collectionem Antiquitatum Atticarum, tam editarum jam ante, quam edendarum. Tres praeterea peculiare commentarios de antiquitatibus Rhodi, Cretae, ac Cypri, praeter alia, quibus recensendis nunc non est locus. Imprimis Regni Laconici, sive legum Spartanarum librum singularem, quam Justus Pluymerus Miscellaneis Laconicis debebat addidisse, & ut addat operam dabo. Confido enim proceres compelli posse ad permit-tendam editionem eorum, quae ex lucubrationibus *Meursianis* illic supersunt ἀνέκδοτα. Lutetiae eduntur familiae Romanae *Fulvii Ursini*, cum auctuario trecentorum & plurium numismatum ad id argumentum spectantium, quae lucem haecenus non viderant. Curat nummos etiam suos publicare Comes *Briennius* filius, Regi Christianissimo ab Epistolis. *Spanhemius* Romae aetatem agit. Eodem quoque contendit nuper deserta Gallia noster *Gudius*. Expectari illum Florentiae sub aetatem proximam scribit *Carolus Datus*. Ab Apolline Palatino miror nec gratiarum actionem, nec redhostimentum ullum haecenus ad te venisse pro donato Seneca. Nostri homines quod merita tua parum intelligunt indignor. Sed quando eam institisti semitam, quae paucorum solo sit trita, ferendum & concoquendum a paucis te capi & digne aestimari, quorum in numero me esse ac fore semper persuasum habe. ¹ *Alopecius* noster commentarios Chronologicos Reginae munus non ita pridem miserat. Rescripsit illa, hominemque tetigit paulo asperius aculeatis verbis, ac serio hortata est, ut a vepribus & spinis theologicis contineret male feriatam manum. Mirari sese vehementer, quo consilio argumentum tam invidiosum suscepisset pertractandum. Esse quippe mortalium plerosque eo ingenio, ut juniores videri gestiant, quam revera sint. Illi hoc esse propositum, ut fenium orbis ac mundi universi aggraves, oneretque bis mille annis. Facete quidem hoc illa; sed amicus noster, si quid video, mallet illam cogitare aliquando de solvendo debito. Virgilio manus admove-re jam coepissem: sed metuo ne mihi sordeat omnino Claudianus & negligenter tractetur, ubi divina gravissimi scriptoris majestas in venerationem suam me pertraxerit. Claudianus igitur praemittatur praestat. Quamquam jam nunc non sine taedio huic cogitationi incumbo, praesertim post decursum Barthiani operis latum illum ac sterilem campum, quem quamvis summis, quod ajunt, pedibus vix delibavi festinans, tamen temporis plurimum mihi absumpsit. *Bornius* ne discipulum suum magno pretio nihil scire doceat valde metuo. Invasit spartam ejus de Lucretio edendo *Tanaquillus Faber*. Idem commentarium de poetis antiquis vernaculo sermone conscriptum divulgavit. Apollodori quoque bibliothecam, additis notis illustravit, sed brevibus, ut solet, & opera perfun-

ctoria.

¹ *Isaacus Vossius*, qui de *aetate Mundi*, edidit A. 1659. librum, cui cum *Hornius*, *Colvius*, & *Schotanus* se opposuissent, ille A. 1661. iterum edidit, addito etiam libro de *LXX.* interpretibus, & de eorum *Versione & Chronologia* dissertationibus.

etoria. Dionysius Salvagnius Boessius suos in Ibin Nafonianam Commentarios longe auctiores publicavit. Libellum necdum vidi, sed ex Galliis expecto. *Graevium* sic oblitum mei esse equidem miror, ut toto jam anno nullis literis ter quaterve compellatus me dignetur. Diversas tamen Polyaei MS. lectiones illi impetravi a *Bigotio*, quas Danielelem Elzevirium secum e Galliis esse allaturum spes sit. Hoc ex te intelligat velim. *Langermannus* Viennam Austriorum ad aulam Caesaream ante menses hosce tres profectus est, promisitque Hamburgo discedens bibliothecas veteres per illos terrarum tractus diligenter sibi excutiendas fore. A *Vlitio* literarum nonnihil habui. Queritur ille panegyricum suum furdis Britannis cecinisse. Sed manum de tabula tolli jam tempus est. Vale, decus Musarum. Holmiae Anno *MDCLXII. VIII. April.*

Apologeticon tuum adversus *Schoockium* an lucem videat cupio doceri. De Theologo impetrando nihildum promovi apud Patres, & sane rem istam hactenus urgeo parum fervide, quod alia sint, quae me exerceant, non minoris momenti, praesertim causae iurgiorum de novo exortae in littore Africano inter utramque gentem. Velim me doceas, quid sint *penaces* in veteri epigrammate Turcii Rufii Asterii Apronii, quod Virgilio suo praefixit, qui in Medicea bibliotheca fervatur longe vetustissimus. *Distinxi emendans gratum mihi munus amici: Suscipiens operi sedulus incubui. Tempore quo penaces circo subjunximus, atque scenam Euripo exstulimus subitam*, &c. Vale, Vir summe. Exarabam Holmiae. *MDCLXII. X. April.*

Juvenem aut adolescentem si quem nosti, qui amanuensis spartam apud me adornet, Latini ac vernaculi sermonis non ignarum, mei memineris rogo. Nam is, quem ex patria mecum abduxi, vix ullam literarum Latinarum cognitionem habet, ut quarum primis tantum elementis leviter imbutus sit, & cum spem mihi fecerit fore, ut studiis totum se daret, nihil minus cogitat, quam de promissis praestandis, Bacchi quam Musarum studiofror. Agam igitur cum Parentibus ejus, ut illum ad se revocent. Iterum vale.

EPISTOLA CCCLXXX.

NIC. HEINSIUS

J. Fr. Gronovio.

Leidam.

NAe tu odiosam in me loquacitatem, & ineptas quaestiones cordate & sapienter vindicasti, mi Gronovi, qui nodos hosce Gordios non gladio, ut ille, sed oportuno silentio perquam simpliciter, & tamen ingeniose omnino, solvis! Pervenit interim ad manus meas Seneca tuus, exoptatissimum munus: pro quo & ego, & *Schefferus* tantum nos debere tibi agnoscimus, quantum maxime obaeratos par est. Ei perlegendo jam me totum coepi accingere, atque in proposito tenacissime persistam, dum observationes tuae ad me perfe-

ran-

rantur, quas sub praelo typographico sudare *Graevius* jampridem significavit. Ego Maroni manum mox admovebo, non quod huic telae inter publicas occupationes detexendae nunc par sim; sed quia flagitatores obstrepant assiduum Elzevirii, quos toties repellere non est meae frontis. Circumspicio igitur, si quid membranarum veterum indagare possim, quae conatibus meis non nihil auctoritatis ac gratiae apud fastidiosos lectores addant. Membranis Mediceis longe vetustissimis me usum esse in Italia meministi, quem librum sub Virgilii Carpensis nomine *Aldus Manutius* in Orthographia, aliique homines eruditi frequenter laudarunt. Est praeterea nunc in manibus mihi Mentelianus liber ante annos DCCC. exaratus. Sunt & quinque alia exemplaria, sed recentis notae. Vossianae bibliothecae duo aut tria praeter haec expecto. Leidensem codicem evoluisse me recordaris, puto. Exstat in iisdem scriniis aliud Maronis exemplar, & quidem eo, quo jam usus sum, vetustius, nisi imponit memoria; sed quod nisi obiter a me inspectum est, cum Servii commentarios, quibus annexitur, perlustrarem. *Boeclerus* suas in Maronem curas jampridem pollicetur, si quid certi de iis rescisti, impertire, quaeso. *Langermannus* Vienna nuper admodum rediit. Nasonis & Claudiani nonnulla in Caesaris, ac Bavari Ducis bibliothecis, meae in spem gratiae, se commisisse cum vulgatis editionibus narrat, eaque se missurum mihi pollicetur. Addit praeterea, quod rideas, *Lambecium* ducta uxore quinquagenaria, mox conjugii pertaesum, tertio nuptiarum die, amicis & marita insalutatis, se clam proripuisse ex aedibus, atque ex civitate, nec sciri, quo se contulerit, sed suspicionem esse, legi ab illo vestigia heroidis Christinae, quae biduo triduo ante Hamburgo esset profecta. Haec in sinum tuum, dum certiora nunciare possim. Spero enim fugitivum nostrum post carecta alicubi latere, nec animum revertendi penitus amisisse. *Carolus Moronus* de novo Inscriptionum vetustarum opere, quod praelo commisit, spes nostras fovere pergit, idque Gruterianum volumen ipsa mole facile aequaturum esse minatur. Si verum dicit, toto decennio illi opus erit ad provinciam hanc administrandam, nam & ingenio admodum lento est, & *Holsenii* ope consiliisque destitutus, valde metuendum, ne portum contingat inter tam vastos fluctus. *Ferdinandum Furstenbergium*, mihi quondam amicissimum, perquam elegantis ingenii virum, Episcopatu Paderbonensi auctum jam puto significavi. *Dionysius Salvagnius Boessius* secundam editionem Commentarii sui in Ibin Ovidianam vulgavit. Librum ipsum ex Galliis expecto. *Phaedrus Schefferi* praelo mox committetur. Vale, decus immortale literarum. Exarabam Holmiae CXCICLXII. a. d. XXIX. May Gregoriani.

EPISTOLA CCCLXXXI.

NIC. HEINSIUS

J. Fr. Gronovio.

Leidam.

A Scheffero, quas nuper admodum accepi, tibi inscriptas, hîc mitto. Grattias, ni fallor, agit pro Senecae Tragoediis, a te recensitis, praeclaro mehercules munere. Ego sane maxima cum voluptate observationes tuas ad gravissimum scriptorem jam perlegi.

Nec satis est legisse semel: juvat usque morari.

Relegam igitur iterum iterumque, dum aliud quid muneris literarii a te adsit, quod de novo in eruditionis tuae admirationem me impellat. Mitte, quaeso, quamprimum quicquid minaris. In Seneca mentionem mei honorificam non semel a te fieri agnosco cum pudore meo. Nonnullas ex iis, quae videntur tibi non displicuisse, conjecturas retractavi ipse. Quale quod mones ad Herculem Furentem vers. 89. *Supernas sedes*. Legendum enim,

I nunc superbas caelitus sedes pete.

Claudianus bello Gildonico de Roma, Jovem apud superos conveniente --- *talique superbas Irrupit clamore fores*, ubi perperam olim *Supernas* ex veteri libro placebat reponi. *superbae fores* apud Virgilium non semel occurrunt, & *postes superbi*. Sed de his ad ipsum Claudianum. Oedipo Actu 11.

Incipit Lethaea vates spargere horrentes comas.

Lethaeae vati nullus hîc locus, non improbabas meum illud ejus loco *repleta vates*, sed cum in vetusto codice Mediceo sit, *loeta vates*, literis transpositis emendo, *Letoa vates*, cujus glossema est, quod in nonnullis codicibus apparet, *Phoebea vates*. *Letous* pro *Latous* in vetustissimis membranis Nasonis, Horatii, Aufonii passim exarari ad ipsum Nasonem jam monui Trist. 111. El. 11. sed τὸ *Lethaea* ut hoc loco perperam inculcatum est, ita male Actu 111. ejusdem Tragoediae ejectum.

Et obsidentem claustra lethalis lacus.

Lethaei lacus opinor: apud inferos enim nihil lethale, & post mortem. Medea choro actus secundi, monere oblitus es, in membranis Florentinis legi, *Attica tardus plaustra Bootes*, non *Arctica*. Ego quidem τὸ *Arctica* pro *Arctoa* apud nullum primi aut secundi ordinis poetam legisse me recordor. *Attica plaustra* hîc prorsus oportuna & tempestiva mihi visa sunt, quod meminerim Booten hunc a multis credi Icarium Atheniensem, qua de causa Valerius quoque Flaccus *Attacum Booten* dixerit. Sed de Seneca alias videbimus. In Lucano non potui concoquere illud, lib. v. vers. 771.

Utque solet plenis se effundere signis Corycii pressura croci.

Crocum in theatris per fistulas expressum fuisse, & in spectantes sparsum haud

Tom. III.

M m m

ignoro,

ignoro, sed tale nihil comparatio ipsa videtur admittere. Quid si legas, *plenis se effundere sinis Corycii sparsa aura croci*, vel *spissa aura*, vel denique *versa aura*, a vergendo. E finis enim & canistris crocum quoque in theatris effusum ac sparsum fuisse quid prohibet? *pressura*, pro *spissa aura* ex elisione natum, vel pro *sparsa aura*; certe in vetustis Nasonis aliorumque poetarum exemplaribus pro *spissus* non semel, *pressus* & *sparsus* exaratum offendi: jam *aura croci* pro ipso croco solemne Martiali non uno loco, & Statio in patrem Epicedio vers. 41. Ipsi Statio quod manum post te admovere sum ausus, ignosce confidentissimis conatibus. Tò turbine rubenti non improbabis omnino, si recordaris, quae de coctanorum vasis prorsus similia occurrunt apud Martialem, apud quem etiam *ova matrum* non semel habes, ut & apud Juvenalem ac Nasonem, ita factum ut *ova tantum* minus placeret. *Albos illos calices* si mihi sistere non potes ex antiquitate depromptos, lege meo periculo,

Obbarum, calicum, atque cacaborum.

Obbas & *calices* Varro quoque conjunxit apud Nonium in *Obba*. Occurrunt & *obbae* in Persio. Plura volebam, sed immensus dolor ex repentina Sororis optimae morte conceptus totum me sibi vindicat, & nondum excidit, jam me nimium fuisse in hisce apud te nugis. Vale, Vir summe, & feliciter rem gere. In Virgilio, quantum per occupationes licet publicas, diligenter pergo, & video ex membranis antiquis plura depromi posse, quam olim habui persuasum. Suos codices ut ad me mitteret *Vossium* rogavi, sed tuli repulsam, cum minetur de Virgilii nova editione paranda sibi quoque cogitandum mox fore. *Lambecius* vetulae suae elapsus Viennam Aultriorum advenit, ad castra pontificia transiturum nullus dubito, modo conditiones satis laetae offerantur. *Vlitius* obtundere me cum non cessaret, Runicis, Gothicis, Islandicis libris flagitandis, ut ineptire desineret, aut saltem ut minus operose nugaretur hominem sum hortatus. At ille serio mihi succenset, magnumque malum minatur. Iterum vale. Holmiae. xxviii. Junii. cidoiclxii.

EPISTOLA CCCLXXXII.

J. FR. GRONOVIIUS

Nic. Heinsio.

Holmiam.

Nihil tuum mihi senio esse potest, Amicorum suavissime: nihil quod ulcisci debeam: sed continua praesentium occupatio me absentibus pro voto fervire non patitur, & ad hos adigit comperendinatus. Quod si de modo conjectandi verbum adpersi, id non proprie dictum tibi putabis, sed unum ex promiscuis & translaticiis, quibus vulgo in tali re uti solemus, quaeque ad mediocria ingenia pertinent. Tuos autem igneos impetus cave me sufflammandos existimes putare, aut ita interpreteris, quasi minus apud me tibi licere postu-

postulem. An adeo me invenustum credere potes, ut impedire ausim progressus meos, qui tuas nunquam deponam nisi doctior? Nam & sicubi te sequi & capere altitudinem sensus tui non quimus, addiscimus & admonemur multa, quae nemo alius fuggerisset. Itaque hujus rei me vel maxime poenitet, quod non parata semper vice tuum illud promptum & exsertum excipere, saepiusque ad me convertere possum. Tu ergo scribe quicquid & quoties libuerit, & fer indulgenter me respondere, quoties breve otium, & quod ingenii tarditas permittit. De *Meursii* ineditis beata nuntias, & opto, gloria intret animos possidentium, ut tantum boni publico non invideant. Epistolam Heroidos non nimium placuisse olim suspicabar. Profectus erat ad salutandum¹ brevis successor meus, & quia non offenderat, reversus huc narrabat accepisse ab seniculo exultante, allatam e Gambriviis. Eopse die hac transiens redierat ille domum. Recurrit ergo eadem Gr. sed redux alto silentio acceptam dissimulari ferebat. *Ant. Hulsii* pro Hebraica veritate scriptum acre prodiit, cum *Fr. Plantae* acerba magis, quam auctore indigna elegia, in qua jactat nunc Bavios & Maevios se vindicare. Ita exedundum est illi etiam, quod non intrivit. *Terbarius* me nuper allocutus mentionem habebat Virgilii, cui multa Scaligeri manu adscripta fuissent, apud *Car. Labbaeum* visi. Vossianos MSS. paratos esse mihi dixerat Elzevirius, modo inveniretur, qui hîc locorum conferret. Itaque ego cum contubernali meo *Junio*, & is id facturum se recepit, si codices impetratos sibi tradidisset Elzevirius. Quo magis miror eum, qui tantam Camerinam movit, cogitationi de Virgilio edendo vacare. Nec tamen hoc prae se ferenti fidem omnino abrogare audeo, quia videtur ea solum velle tentare, quae tentaturum nemo sperasset. Nam & de aestu maris promittit. Interim & meus aemulus in illum prurit, jamque aliquid aut edidit, aut sub praelo habet. Quae rogas, pleraque sunt ejus generis, ut ego potius, quid tu de illis sentias, cognoscere, quam ipse de illis sentire velim. Ut tamen nonnulla, quae me intelligere putavi, acceperim, libenter tibi fatebor. Martiali dicuntur *senes*, non Catuli, sed Romani, qui scilicet per aetatem videre potuerunt stans Capitolium Catuli curatione exstructum, antequam bello Vitelliano conflagraret, tum quoque illud laudare, non ratione, sed fastidio praesentium, quum vile fuerit, si cum eo, quod restituerat Domitianus, compararetur. *Reginam* Pollam vocari puto, quod Martialem salutatorem crebro sportulis aut rectae coenae partibus prosequeretur: ut, quum canit,

Qui me respiciet, dominum regemque vocabo.

Viduam platanum, quae sola umbram faceret, inter myrteta & tonsilia buxeta, quae non intelligimus, nisi pluribus arbusculis conjunctis & in se flexis, maritata. *Cervicem primam*, quam habet primae formae fera aut pecus: etsi facile possis *opima*: quod tamen nolim. In Statio, *Praeter me*, est, praeter laborem ingenii & temporis, quem ei impendi. *Caesas lacernas* dixit, ut Martialis *rasa sagis vellera* de lanis, quae forcipe aut pectine demebantur sagis vel lacernis

M m m 2

novif-

¹ An. J. G. Graevius,? qui in Daventriensi professione successerat, sed paulo post Ultrajectum vocatus erat.

novissimo purgamento, ut loquitur Plinius: nam ex illis tomenta pilaeque & olim, & hodieque fiunt. *Luridas mappas* accipiebam pallidas, paullo minus quam albas: etsi *lucidas* possis, & de purpureis interpretari: nisi haec nimis pretiosae. *Turbinem ruentem* interpretor metam inversam, vas inversae metae figura: videtur enim *ruere* dixisse pro deorsum fastigari. Hic ego, quum heri jam concubia nocte sisterem eo animo, ut hodie caetera persequerer, inque his lugerem tecum ornatissimam matronam Sororem tuam, quam semper singulari reverentia dilexi, ecce subitum fulmen nuntii, incomparabilem *Schelium* nostrum fuisse: quo quidem ita concidi, ut vix quidquam jucundum in vita sentiam. Nec quomodo in tanta reipublicae ac literarum clade, inque tanto meo dolore aut taceam aut loquar, scio. Tua Melpomene lugubres cantus praecipiet. Vale, mi Heinse, & salvus honestusque diurna. A. d. xiii. Cal. Sextiles Gregor. ϵΙΘΙΘϸΛΧΙΙ.

EPISTOLA CCCLXXXIII.

N. C. HEINSIUS

J. Fr. Gronovio.

Leidam.

IAm contabueram praec desiderio tuarum, Gronovi jucundissime, cum post longam expectationem epistolium a te accepi, in quo habenas omnes dilatae multo tempore confabulationis effusus esse videbaris, nisi telam inchoatam abruptisset superveniens de morte *Schelii* nostri intempestivâ funestus ille nuntius, qui me quoque plus quam credas afflixit. Poteram lamentis inanibus nec profuturis indulgere, nisi pulchrius laudabiliusque nostrum utrique fore arbitrarer, si ad aeternitatis praesidium hic confugeremus, & tam desiderato capiti, quantum in nobis, vitam redderemus, huc collatis omnibus ingenii instrumentis. Quod ut felicius praestem, diem a publicis occupationibus feriatum unum alterumque jam nunc circumspicio. Caetera suavissimis acceptissimisque literis tuis unice id defuit, quod de Observationum tuarum nova editione, quam *Schelius* ὁ μακροχρόνιος, *Graeviusque*, jam pridem jusserant sperare, nullam omnino fecere mentionem, quasi nihil ad me pertinerent curae tuae immortales, aut eas aestimarem pro illorum captu, qui nil admirantur, praeter tenebrosam Lucis suae obscuritatem. Virgilium plurimis locis ex veterum membranarum fide castigatum jam misi ad Elzevirios: quos editionem divini poetae mox paraturos esse praesagio, nisi promissa illorum me ludunt ac frustrantur. Notas & observationes etiamnum premo, dum plures membranae hinc inde ad me perferantur. Codices Hamburgo duos *Langermannus* se missurum esse pollicetur, totidem a *Rottendorphio* proximis diebus accepi: nonnullos e Gallia, praeter jam missos, jubeor sperare. Nam suus amicus noster ὁ φώσφορος mari se crediturum negat aut terrestri viac, & preces meas non obli-

oblique reppulit. Si quid per hibernam tempestatem otii concedatur (& solent proceres sub brumam Decembrem Januariamque rusticari) Valerio Flacco & Silio Italico recensendis supremam manum imponam, dum ad Maronem observata maturescunt atque elimantur. Amici nostri & *deiva* nuperum scriptum a Gallis Italisque exhibetur, me nolente. Ego, quo magis indies magisque comperio, mortalitati hanc inhaerere labem, ut nimia ingenii nostri indulgentia transversim agamur, & in scopulos frequenter impingamus, eo constantius te amicum gratulari mihi soleo, qui luxuriantem lascivientemque castigare possis, & erranti saniora suppeditare. Etsi parcius modestiusque id facis, quam aut sacrosancta sincerae amicitiae lex, aut meus impetus, quem plus aequo sibi interdum indulgere agnosco, permittunt. Ad Statii tui Silvas non pauca annotavi, de quibus agetur a me aliquando, si Poëma illud curis secundis illustrandum tibi propones. Nunc eorum, quae una alteraque epistola apud te excutiebam vix satis memini. Tò *Maeon* in Epicedio Patris non concoquo, & sane libri veteres id non agnoscunt, in quibus *Major*, si recte memini. Editio Parmensis optima, *Mater*: tum *Phrygius qua puppe magister* in margine ejusdem ex veteri libro annotatum, non *Graius*, pro quo tu *gratus*. ibidem notatum *Velie*, ex antiquo codice, pro *Selle*. Pro *adscita colonis*, malebas *adscripta*. Sed vide ne vulgata scriptura defendi possit ex illis Surrentino Pollii.

*Inde Dicarchaeis multum venerande colonis ,
Hinc adscite meis.*

Tentabam igitur totum locum sic constituere ex vestigiis veterum librorum,

Te de gente suum Latiis adscita colonis

Graja refert Helie: (vel *Hyele*: nam utroque nomine *Velia* Graecis est dicta: quod pluribus, si necesse sit, facile demonstrarim) *Phrygius qua puppe magister* (Palinurum intellige, qui prope portus Velinos apud Maronem, ut scis, submersus interiit. Locum libro Aeneidos sexto consule)

Excidit, & mediis miser evigilavit in undis.

Mater & inde (vel *unde*) *suum longo probat ordine vitae Maeoniden*. prius egerat de paterna origine, cui maternam subjungit, eam ab Homero descendere hoc argumento evinci contendit, quod poëtas complures dederit. Tò *ordine vitae* non satis capio, & sane *Velia* cum secundum veteres colonia sit Phocai-ca, nihil mirum fuisse illic familias, quae Homerum in majoribus suis numerarent: quae sequuntur, *aliaeque aliis natalibus urbes Diripiunt cunctaeque probant*, etiam minus videntur sana, pro *immanis gloria falsi*, Parmensis & *inanis*, quod praetulerim. mox illud minime potest ferri,

Atque ibi dum profers annos, vitamque salutas.

Nam cum de infantia patris jam egerit, perverso ordine ad nativitatem ejus primam recurrit, quare corripiebam, *vitamque solutam*, hoc est otiosam, privatam, ita Cicerō alique optimaē Latinitatis scriptores frequenter. Male etiam paulo ante videtur circumferri,

Protinus exorto dextrum risere sorores:

Quis enim credat tam inepte loquacem Statium fuisse, ut nativitatis paternae ter meminerit, interrupto ordine & processu orationis? Vide igitur ne scripserit, *Protinus exserto. exserto*, quia deficiente censu equestri purpureos amictus posuerat, uti paulo ante praecessit. Longe plura ex eodem epicedio poteram subtexere, sed metuo ne jam nimius sim. Istud Martialis

Et jactant Catuli vilia templa senes.

A Scriverio, ni fallor, mutatum est. Codices sane veteres plerique *Julia templa*, unde suborta suspicio rē *Catuli* mendosum esse. Neque enim satis est veri simile, aedificia Domitiani cum Catuli capitolio, toties instaurato, nostrum voluisse componi. Simiam Augusti Caesaris fuisse Domitianum in aedificiis publicis splendidissime struendis, exhausto hanc in rem & attrito aerario, potes meminisse. Huic adulatus, ut solet, noster, hoc videtur egisse, ut structuras Augusti prae Domitiani sui templis deprimeret. Quare suspicabar illum reliquisse,

Et laudant fatui Julia templa senes.

Fatui senes, quomodo *deliri* apud Horatium. *Julia templa* ab Augusto structa, ut *leges Juliae* ab eodem conditae. *Julia templa* habes apud Statium quoque E-quo Germanici. de *Pompeja umbra* (sic enim malo, quam *Pompeji*, quod vix aliter locutos meminerim) recte addit; nam praeter instauratam ipsam porticum & splendidiorē factam a Domitiano, pro *uno nemore duplex* ei postea accessisse ex alio ejusdem Martialis loco videor deprehendisse. *Viduum platanum* ingeniose interpretaris. *Caelibem* eandem Horatio memineram dici, sed ubi hanc cum ulmis, quae maritae, conjungit. Quare suspicabar a Martiali relictum esse, *Vdaque platano*. Meministi illorum nostri de eodem, *Crevit & affuso laetior umbra mero*, ubi minus bene *effuso* circumfertur. Sed tu rem acu tetigisti. In Statii loco *turbinem ruentem*, pro meta inversa interpretaris. Metae formam ejusmodi vasa exhibuisse memini, de metae inversae forma non recordor; nescio an monuerim videri mihi scribendum *turbine rubenti*, nam ex testa rubra fiebant, ut curis secundis ad Fastos Nasonis pluribus monui. Pro *caesa lacerna* vide ne *rasa* debeat refingi, quamquam *scissa* placebat olim ex Sat. V. Juvenalis. Haec copiosius quam putaram. Vale. Schefferi Phaedrus praelo jam commissus est: ejus epistolam mittebam tibi nuperrime. Apud Phaedrum Fab. LXXXVII. haec leguntur in ed: Rigalt. *Chorus reducto tunc & notum canticum Imposuit*. an chori erat imponere canticum? at supra dixit, divitem illum nobilemque virum, qui ludos erat facturum, cum tibicine pepigisse: ut tantum se ostenderet in theatro, cur ergo hīc canticum illi inponitur? deinde si notum fuit canticum, cur decepit id tibicinem, ut de se factum crederet? certe Pithoei editio *ignotum canticum*, verius omnino fuit, cum legendum putarem, *chori reducto tunc ignotum canticum Imposuit*. Chori canticum ignotum tibicini in theatrum reducto imposuit, i. e. verba dedit, delusit hominem. Tu videris. Vale, c1p1ocLXII. a. d. XVIII. Oct. st. no.

EPISTOLA CCCLXXXIV.

NIC. HEINSIUS

J. Fr. Gronovio.

Leidam.

CUM Nobilis hic adolescens, *Johannes Leiencronius*, peregrinationis studio incitatus, iter ad vos moliatur, rogatus sum a parente ejus D. *Johanne Leiencroon*, cum quo multos jam annos arcta necessitudo mihi intercedit, ut filio suo commendatitiis adessem, arbitranti, quod res est, ex consuetudine praestantium virorum praecipuum ad peregrinantes fructum ac utilitatem potissimam redundare. Quapropter optime de adolescente ipso, optime etiam de me meriturus es, si studia ejus, quae rebus politicis historicisque dedicavit, non tantum consilio tuo moderari interdum digneris, sed etiam si des operam, ut in contubernium viri cujuscumque eruditi & honesti admittatur, quo studia ejus rectius procedant. Magni beneficii loco operam hinc tuam sum accepturus. Vale, Vir Eximie. Exarabam Holmiae Suecorum. Anno MDCLXII. XIV. Novem.

EPISTOLA CCCLXXXV.

NIC. HEINSIUS

J. Fr. Gronovio.

Leidam.

NI SI Musis atque rei literariae viveres, mi Gronovi, mortuum te mihi ducerem, qui tam rarus literis tuis me convenias. Scio in Livio recensendo te esse nunc totum. Sed tamen amicos ne sic quidem fastidire debebas, aut insuper habere. Misi etiam jampridem ¹ Epicedion Schelianis manibus dictum, in quo te alloquebar, sed tu ad mortuales ejuscemodi naenias aurem delicatam jampridem obstruxisti. Observationes tuas nec vidi, nec quando sim visurus scio, cum oportuniora navigationi tempora sint expectanda, quae ante Majas Kalendas vix sperantur. Utilem & laboriosam mihi operam tuus *Junius* praestitisse dicitur, commissis inter se compluribus Maronianis codicibus vetustis. Ego mehercules Juveni egregio ob singulare officium nihil non debere me & intelligo, & publice etiam profitebor. Interim dum haec aliaque subsidia expectantur, in ordinem jam nunc redegi ac descripsi, quae ad Valerium Flaccum olim annotaram. Praeter excerpta codicum trium quatuor-

ve

¹ Legitur lib. IV. Eleg. 7. qua simul iusta persolvit Sorori suae unicae, *Elisabethae Heinsiae*.

ve Vaticanorum, & Oxoniensis, a te quoque inspecti, alius mihi in Regia hujus civitatis bibliotheca sese obtulit, sed recens admodum. A Valerio ad Silium digressus sum, cujus libros quinque priores jam castigavi, reliqua feriis Paschalibus descripturus. Sed morantur impetum, quae desunt ad septem posteriores libros excerpta codicis Oxoniensis & editionis Romanae ejus, quae in publica Academiae vestrae bibliotheca asservatur: ea enim *Langermanno*, cui librum dederam utendum, subrepta sunt. Tu si ex scriniis tuis id damnum potes refarcire, plurimum me demereberis. Spero animadversiones meas non tantum in scriptorem utrumque, sed in Maronem quoque hoc anno absolvi posse. Circa Maronem cura praecipua versabitur. *Schefferi* & *Loccenii* literas, cum hujus opere historico jam te accepisse confido. *Schefferi* Phaedrum autumno jam prodiiisse, sed necdum vidi. De Mauricii Tacticis edendis nunc cogitare dicitur, quae luci parata jampridem habet. Nunc potissimum scriptionis hujus argumentum habe. Florentia *Gudius* ad me scribit, se vobis aestate proxima adfuturum, monetque ne Livianam editionem nimis urgeas. Habere enim sese in promptu, quae tibi tradat, non pauca subsidia, editioni huic ornandae multum profutura. Exemplar Romae se nactum cum libris scriptis a *Mureto* collatum. *Pichenae* codicem a *Carolo Dato* se accepisse praeterea utendum, tum praestantiora Mediceae Bibliothecae exemplaria a se diligenter evoluta esse. Praeterea aere suo se sibi addixisse duos aut tres scriptos codices probae ac vetustae notae. Haec ut ad te perscriberem rogavit. Me sperare jubet Nasonis codices manu exaratos quatuor aut quinque, quos vaenales nescio ubi invenerit, praeter varia excerpta. Appulejanae etiam Metamorphoseos exemplaria bina. Quid horum promissorum sit praestiturus postea videbimus. Si reditus ejus nobis ante mensem Majum fuisset exspectandus, jam prospexeram illi de luculenta conditione. Magnus quippe regni hujusce Cancellarius extulit nuper liberum suorum praeceptorem, cujus in locum me commendante *Gudium* cupiebat suffectum. Sed cum de adventu ejus nil certi possem polliceri, alio cogitationes, ut opinor, convertit. In Epicedio Scheliano curis secundis nonnulla castigavi, quod moneo, ne tu id me inconsulto typis describi patiare. Litem, quam nosti, denuo cessisse parum ex sententia mea intelligo. Sed parum res haec me movet. Tu velim tunc demum me victum arbitreris, cum videbis huic judicio manus porrigentem. Sed hoc inter nos. Amicos omnes plurimum salvere jubeo. Vale, decus nostrum immortale. In loco Statiano, quod *talos arctare* pro *telas* reponebam, nunc minus necessarium videtur. Nam & apud Lucanum recordor occurrere *telas laxare* contrarium τῷ *arctare*. Iterum Vale. Holmiae Succorum. A. CIOICLXII. a. d. VII. Martii Gregor.

EPISTOLA CCCLXXXVI.

J. F. R. GRONOVIIUS

*Nic. Heinsio.**Holmiam.*

Ignosce amicorum prime: Maleum non navigavi, sed natavi. Ita tertium additus me agitavit atque in suam unius ditionem redegit T. Livius, quasi, quod tam diu dilatus esset, ulcisceretur. Notas ita paratas, ut in singularem tomum conjicerentur, dum refingo, ut commode, ac sine supervacuis ipsi corpori auctoris quaque pagina submittantur, propemodum omnes descripsi. Subortae sunt interim complures *δευτεραι προτιδες*, ut necesse est: & scis vitium solenne, nihil ut meum recensere possim, quin saepe stilum vertam, mutem, recidam, augeam. Lactarunt & tres codices Vossiani, secundi quidem generis illi, tamen quibus caruisse nollem. Sed & ideo relictis rebus hoc unum egi, ut, quia tam longum opus tarde procedit, in antecessum mature omne detextum haberem, ne me poeniteret edendorum, si quid interea, dum in cursu sumus, me fieret, & finem videre prohiberet. Ita enim me confudit hic necopinatus amici excessus, ut nullam horam meam putem, quam non rapui, & incerto casuum subduxi. Et indulsit hoc quidem Deus immortalis: retractavi totum, & nunc, quia difficilius lectu chirographum est meum, studiosa manu describo, ut operarum labor levetur. Sic quoque tamen, dum partes singulas trado, dum ante praelum jam compositas & correctas relego, & plurimum me moratur, & nonnunquam crescit, quo me jam perfunctum putabam. Verum est igitur, & tuae de hac cura spei, & posterorum, si quae consequentur, commodis te condonare peccatum meum: cui non minimam causam praebuit, quod te, tuos oculos & aures, revereor, nec nimis sollicitam in eo diligentiam esse posse autumo, quod tibi vel primo approbandum est. Neque invides, opinor, juvenibus nostris, quibus quo majorem ingenere cupiditatem tantopere antehac spretarum literarum, eo saepius ab illis interpellor, & adjutorium ministeriumque consilii mei me flagitant. Et tum tamen tu nobis non longe: vides enim, commisi privato auditorio Metamorphoses: quinque & viginti alacres nobis operam dant, qui omnes tua editione, me auctore, utuntur. Exemit praeterea hebdomadem unam & alteram languor quidam & incertus hic veris aër, movens quicquid est corporibus aegrum: quod ut cessavit incommodum, duplicavi laborem, ut tot dierum damnum compensarem. Nunc venio ad tuas. In praefica tua Elegia legenda & recitanda non potui satiari, & identidem tam justas lacrimas repetivi. Satis apparet ingenium crescere veritate doloris: & quamquam semper ita canis, nemo ut sanus contra te coronam petat, tristius tamen solito argumentum disertiores luctum tuum reddidit. Pietas & amicitia certare videntur, utri plus deferas: & utri-

Tom. III.

N n n

que

que cumulate satisfecisti. Ego vero ut crucior desiderio, ita laudibus meritis mulceor ac delector, quas intellexi primus, quas, quod in me fuit, alui & produxi, cujus virtutum & morum & doctrinae pars mihi debetur; sed multo major Deo datori & ipsius felicissimae indoli, & generosissimo animo, & efficacissimae industriae. Itaque ingens solatium capio ex hac tanto viro dignissima laudatione; non tantum ex honore, quo me maectasti eximio, quum unum omnium ex tot lugentibus tam debiti officii participem invocavisti. Nam quod & sororius planctus huic continuatus est, pro fratre me habitum duco. Quod si jucundius est laetis adhiberi, tamen de illis, quibuscum tristitia communicamus, honestius judicamus: nec vero minus animum fauciavit ac laniavit meum crudelis sententia, qua rursus petierunt caput tuum, quibus summum jus est summa injuria. Videntur homines quidam dedita opera hoc moliri, ne satis in Magno expellendo patria peccaverit. Tu vero τέλασθαι, ac fide Deo & virtuti tuae, & spera esse adhuc aliquid praesidii in bonis; quod hic si destituat, non ista, & alibi fore innocentiae atque ingenio locum. Ad Statii desperata quid me revocas? An non satis est semel ineptiisse? Et vera forsitan est conjectura tua: neque enim refuto: dicam tamen, quid jam pridem mihi in mentem venerit. *Adscisci in civitatem*, cui civitas datur, satis memineram: sed *colonis adscisci* parum placebat. Sciscendo, id est, suffragio ferundo, liberi populi peregrinis suae civitatis jus impertiebant. Coloni non sciscebant de eundo in coloniam, sed in eam conscripti domo mittebantur. *Adscribi* autem *colonis* oppida, quae in album coloniarum referrentur (qualia fuisse docent Agrimensores) multo commodius videbatur dici. Sed hoc remitto. *Adscita* est adjecta vel addita aliis coloniis vel Latinis, vel civium: atque etsi coloni non dicerentur sciscere de eundo, tamen populus Romanus sciscebat de deducenda colonia. Deinde legebam: *Graja refert Siren*, hoc est, Parthenope, sive Neapolis, illa Siren, origine Graja, nobilitata colonis Romanis, te suum refert. Tum, *Trous qua puppe*: nam Virgilius excidisse Palinurum ostendit haud longe ab Sirenum scopulis. Ad Veliam non excidit, sed delatus est postquam ipsum triduum ac trinoctium nataffet. *Maeon* Domitius fecit ex *Major*: nec potuit quicquam propius. Dixerat duas esse terras, quae cive Papinio gloriarentur, quod majores ejus partirentur. Altera Neapolis est, altera Cumae, ut videtur. Refert te suum Siren Parthenope: refert & illa, unde Maeon post multa secula, te velut recidivo Homero dato, probat Maeoniden suum ortum fuisse: quasi diceret: & Cumae deductae ab Aeolica Cyma, quam veram patriam Homeri fuisse vel tu ex ossibus ejus existens probas. Plutarchus testatur ex Ephoro Cymaeum fuisse Homerum; fratres Atellam, Maeonem, Dium; ex Maeone & Critheide Atellae filia provenisse Homerum. Sequitur: *aliae quem aliis certantibus urbes Diripiunt*, per hypallagen, quem aliae aliis certantes ad se unaquaque trahunt. Accipio autem *diripi* eleganti more illo, quo apud Senecam lib. III. de ira cap. XXIII. *Cunctaeque probant*, ex ipsarum opinione certis argumentis id demonstrare sibi videntur & jactant. *Immanis gloria*, multo

1. Credo H. Grotium intelligi.

magis placet quam *ἐὶ inanis*. Plerumque enim magis glorianur, qui minus vere. *Vitamque salutas* non de recens nato infante accipio, sed de adolescente, qui se vivere intelligit & incipit nosse, quid sit vita. Quod si tenes *solutam*, explica, non otiosam, privatam, sed liberiolem, sine paedagogo, toga pura accepta: quum, si Romae fuisset, *tota impune Subura* permisisset ei *sparsisse oculos jam candidus umbo*. *Exserto*, vehementer abhorreo. An quia purpureos amictus non habuit (nec fatis decrevi aut sana esse verba, aut hoc sensu, quibus id dici censes) ideo nudus incescit, aut exsertus Cethegus. *Sic laudant Catuli vilia* ex tribus MSS. ante *Scrivarium* dedit Gruterus. *Goedius* pollicetur egregia: utinam respondeat eventus, & brevi. Utrum fefellit illum, an te poenituit addere, fragmentum Petronii in Dalmatis repertum, atque in eo nunc, sitne τοῦ ποιητῆ, an παρεμβεβλημένον, doctos disputare? Mihi quidem sic, & sic tantum, Roma scribitur. De Silio mandavi *Jacobo* meo, qui & in Virgiliis conferendis *Junii* adjutor fuit. Sed audi aliud κύντερον. Quum nuper audiisset (nunc quidem secundum) lib. v. versu cxxxī. *aut totidem tollebat farris acervos*, postero die, memor quae legisset in quarto Observationum *ὡς τοῦ cogere fructus*, rogabat, annon potius scripsisset, *cogebat farris acervos*. Item versu DLXXII. *natae secura repertae*. Hanc tu lasciviam fac patruo convicio objurges, & jubeas eum redire aliquantisper ad nuces. Amplissimi *Loccenii* historiam accepi, gratissimum munus, & ipsi, ut & elegantissimo genere ejus, propediem respondebo: nunc enim intelligis me defatigatum esse. Quidam, qui valde volunt amici nostri videri, specie dolentium vicem tuam, acerbè mihi exprobrant, nescio quid iterum infuscatum, & te laborantem in *Charybdi* etiam *Scyllam* adscivisse. Quid auctor es? Arguone mendaces, an demitto auriculas, ut iniquae mentis asellus, cum gravius dorso subiit onus. Vale, decus nostrum & melioribus utere fatis. Lugduni a. d. iv. Non. Majas CIOICLXIII.

Quid si sic legas: *Te de gente sua* &c. *Graja refert Siren, Trous* &c. *Major* & unde suam longo p. or. v. *Maeonides*. Suam puta gentem. Sed fatis difficilium nugarum. Vix enim reperiemus in quo uterque acquiescat. Nobilis juvenis, quem mihi commendasti, Patrem grates egisse tibi puto. Ita nulla in re, quam a me exspectare potest, illi defum. Iterum vale.

EPISTOLA CCCLXXXVII.

NIC. HEINSIUS

J. Fr. Gronovio.

Leidam.

MAcerabar jampridem expectatione literarum tuarum, meque excidisse tibi penitus habebam persuasum, cum oportune admodum uberes & copiosae a te exaratae mihi traduntur. Livio primas a te deferri longe est acqui-

N n n 2

simum,

simum, quem ego scriptorem in paucis veneror ac admiror. Hunc tua cura sic expolitum mox videbimus, ut ne ipse quidem, si reviviscat, melius de se mereri possit. Tu modo spartam hanc adornare constanter perge; &, ne nimio constet mihi silentium tuum, spem nostram & desiderium frustrari morâ diuturniore noli. Obdurabo interim animum adversus solitudinem omnem, & si rarius a te compellor, posteritati tempus in lucro esse arbitror, quod mihi apud te perit. Cautè & prudenter, ut caetera, id a te fit, mi Gronovi, quod lucubrationes jam nunc in scriniis paratas & descriptas tenes, ne, si suprema dies superveniat, nos tanto thesauro carcamus, & tibi labores tui pereant. Idem consilium & ego nuper sum amplexus, dum quae ad Maronem, Silium, Flaccum Valerium hîc illic annotaram, colligo & dispersa compono, a prima manu opus omne jam detextum est, sed quod limam secundae curae etiamnum desideret ac requirat. In Silio multum jacturae feci, amissio codice, cujus marginem occupabant diversae lectiones mea sedulitate collectae, quas Colonienfis & Oxonius libri manu exarati, tum editiones tres quatuorve priscae suppeditarant. Passus erat perire *Langermannus* id exemplar negligentius servatum: sed & cujus loco obtulerit schedas inde excerptas non nimis accurate, dum festinat & aliud agit, & illas quidem haud integras, atque in libro decimo desinentes. Colonienfi libro praeter *Modium* usus fuit & *Carrius*, ut meministi, cujus exemplar esse opinor, quod utendum mihi concessere patres Societatis Jesu Antverpiani, quam multae fugerint ex praecipuis praestantissimi hujus codicis lectiones bonum *Modium*, videbis aliquando. Sed & illud exemplar fuisse mutilum videtur, cum in libro Silii decimo sexto deficiat, quo diligentius mihi ad libros duos postremos consulendas esse duco vetustas editiones, & si quid Oxonius codex tuo beneficio nobis suggeret. Mediolanensem tu laudas alicubi, mihi haecenus non visam. In regia hujus civitatis bibliotheca nuper offendebam Parmensem anno MCCCCLXXXI. editam, qua nec ipsa ob varias occupationes uti est datum. Post descriptas in ora Dausqueiani codicis observationes meas, quae tu hîc illic, quae *Barthius* in Adversariis illustrastis, percurri. Multa agnovi a vobis occupata, quale illud inter caetera, quo mihi placebam, *Maenia barbarico Nomadum sociata tyranno*, & illud *vage chrysa* Barthianum. In libro decimo quarto uterque feliciter versati estis. Illud tamen vos fugit ipso propemodum libri initio:

Nec res dedecori fuit, aut mutasse pigebat

Sicanum Siculo nomen: mox accola Minos

Duxerat Etretum non fausta ad bella cohortes.

Valde exercuerunt Dausqueium *Etretum* illae cohortes, alii alia commenti sunt. Monet idem Dausqueius a Modio proferri ex Colonienfisibus membranis

— *mox duxerat aëtos Maenibus e centum non fausta ad praelia Minos.*

Ubi id produxerit Modius doceas me velim. Nam in Novantiquis ejus nil tale comparet, citat & alia ejusdem Modii passim Dausquejus, quae non recordor in ejus hoc scripto me legisse. Membranae Colonienfes pro tribus versibus duos exhibent hoc modo:

Nec

*Nec res dedecori fuit, accola duxerat aētos
Maenibus e centum non fausta ad praelia Minos.*

Nec abludit Puteaneus codex, nam caetera subsidia hīc deficiunt me haēte-
mus, nisi quod in eo, *accola duxerit aētus Maenibus ereptum.* Scribo minima
mutatione.

*Nec Cres dedecori fuit accola: duxerat aētos
Maenibus e centum non fausta ad praelia Minos.*

Κρήτην ἐκατόμπολιν nosti. Sed Livii tui modo injecta mentio alterum Silii
locum pessime affectum mihi revocat in mentem ex libro xiiii. vers. 30.

*At contra Agrippa haud parvum decus, inclyta namque
Semina ab Oenei ductoris stirpe trahebat
(Aetolidas inter fuit haud ignobile nomen)*

Laetus opum.

Et quae sequuntur. Τὸ *Aetolidas* non est nauci, & peccat in legem metricam,
nec saniora sunt caetera. Sed videamus scriptos. Primo bene Colon.ensis, *At
contra Argyripae primum decus.* Puteaneus *Aggripe parvum decus*, pro *Oenei du-
ctoris* uterque codex, *Oeneā ductoris stirpe.* Versum tertium sic exhibet Colonien-
sis, *Autolidas id fuit ignobile nomen.* Puteaneus *Oetolidas fuit haud ignob. n.* pro
Autolidas id, facio levi mutatione, *Aetoli Dasio.* Locum integritati pristinae
restitutum ecce:

*At contra Argyripae primum decus, inclyta namque
Semina ab Oenea ductoris stirpe trahebat
Aetoli, Dasio fuit haud ignobile nomen*

Argyripam non Silio solum libro xvii. ubi *Argyripae campos* habes, pro *Ar-
pis* poni; sed Virgilio etiam haud ignoras. *Argyripae primum decus*, quia ab
ipso Diomede Arporum conditore originem trahebat vir altae nobilitatis, sed
pravo ac perfido ingenio, hic Dasius Altinius, quem ad Hannibalem defecisse
Livius testis: eum vide libro xxiv. cap. xlv. Injurius igitur est Hubertus
Goltzius, qui in magna Graeciā pro *Dasio Altinio* illic reponendum esse cen-
set nomen *Cassii Atinii*, nescio qua auctoritate permotus. *Dasio fuit nomen*
plane Silianum est, libro xi. vers. 58. *Pacuvio fuit haud obscurum crimine no-
men.* libro xiv. vers. 150. *Asilo nomen erat*, & alibi, *Cristae nomen erat.* Sed
jam nimii sumus. Nasonem nostrum tua commendatione florere & studiosae
juventuti in manu esse gaudeo. Castigationum in *Metamorphoses* mearum si
quid est, quod se tibi probet, pulchre successit opera. sub finem libri vi,
cum mutavi, *barbam rutilis subnixam capillis*, toto aberrabam caelo. Sed nec
illud libro xii. quod nuper tibi proponebam, nunc placet, pro *Macedonia sa-
rissa* rescribi *Lacedaemoniam*, nam *Μακεδονίην* etiam poëtis dici observo, quo-
modo apud Periegeten,

Θεσσαλίη δ' ἐπὶ τοῖσι Μακεδονίησε πόλεις.

Mimnermus apud Athenaeum libro xiii,

Ἀλλὰ Μακεδονίης πάσας κατενίστατο λάγας.

Quae filius tuus castigavit, amplector, eumque famae paternae tam feliciter

succrescere laetor. natae *secura repertae* elegans est, nec minus alterum *cogere acervos*. *Tollere* tamen pro auferre interpretabar, ut in illo Maroniano,

Tollite cuncta, inquit, coeptosque auferte labores.

Post trituram farra tollebantur ex area in horreum recondenda: habes patruam censuram, cui tamen nec ipse subscribo nisi dubie & cunctanter. Funebrem elegiam variis locis correxi, deque iis, quae videbantur mutanda, *Graevium* jam monui. Tibi me hîc placuisse non postremae felicitatis est. Vellem & in caeteris. Flagitant Elzevirii novam poematum meorum editionem, quam ipsi mox parent. Quare proximis diebus festis redigam fortassis omnia in ordinem, & pro duobus Elegiarum libellis, praeter juvenilia, alios totidem dabo. Duos Silvarum, epigrammatum unum additurus, qui septem libelli corpus integrum voluminis absolvant, nam juvenilia auctarii accedent loco. Curas in Nasonem secundas ne haecenus detexam facit *Gudius*, qui huc properantis impetum nonnihil sufflaminavit, promissis novis subsidiis, quae expectasse operae sit. *Junio* & filio tuo *Jacobo* plurimum debeo, quod meos in Marone recensendo conatus fovere non sunt gravati, idque beneficium publice gratus agnoscam. Codices *Moreti* minimum vetustatis prae se ferunt, *Vossianos* antiquiores esse arbitror, exemplar in *Leidensi* bibliotheca satis luculentum servatur, cui integra *Servii* commentaria praefiguntur, quodque dolco a me evolutum non esse, nam altero ejusdem bibliothecae usum esse me, puto, recordaris. In eo cum offendifsem libro v. vers. 620. *Fit Beroe Marii coniunx longaeva Dorycli*, quod & ipsum ex plerisque suorum annotavit *Pierius*, non *Is-marii*, scribendum esse *Tmarii Dorycli* suboluit; uti curis ad *Claudianum* secundis monebam bello Getico vers. 18. nam & *Eccloga* viii. veterrimus liber *Mediceus Aut Maros aut Rhodope*, hanc conjecturam tres ex *Moretanis* codices confirmant, quod in excerptis caetera accuratissimis non est annotatum, ut nec illud libro vi. vers. 209. ex iisdem *Moreti* codicibus, *crepitabant bractea vento*, adeo nulla diligentia potest nimia esse, & sane dubito, an non id ipsum me quoque fugerit, cum *Mediceum* illum longe vetustissimum evolvebam: nam caeteri fere omnes probatoris notae sic agnoscunt: nam cum ramus esset aureus, singula rami folia singulas bracteas conficiebant, eo igitur, quod dicit, *crepitabant bractea*, plures fuisse bracteas designat. Vult *Moreti* codices ad me venire *Elzevirius*, quos cum excerptis committam, ubi primum erit integrum, & fore proximis feriis opinor. In hac enim solitudine illud obvenit mihi perquam commodum, quod procures frequenter rusticantur, & ferias sibi ac nobis indicunt, quas otiaando perire mihi non sino. Eas sibi proxime vindicabit *Maro*, quem miror tam supine ac negligenter ab interpretibus tractatum esse. Urget hunc herois *Christina*, & sibi lucubrationes nostras inscribi postulat. Promisi morem postulato huic a me gerendum fore, sed ea lege, ut ex aere meo sese expediat tandem aliquando. Jamque versus habeo paratos, per quos opus id illi dedicetur, ut serio rem a me agi intelligat. ¹ horum epilogum ecce.

Post

¹ Vid. lib. iv. Eleg. vii.

*Post palmas toties dextra victrice relatas,
Auttaque consiliis, spretaque regna tuis; &c.*

Phaedrum Schefferi jampridem accepisse te oportet, quem mari ante hos triginta dies & plures ad Elzevirias aedes Amstelædamum misi. Conjecturas meas minima ex parte operi inseruit amicus noster; vereor tamen, ne vel sic nimius hîc fuerit. libro I. fab. IX. male editum est *mortis en solatio*, pro *solatia*, quomodo legendum videbatur. Libro III. fab. XL. corrigebam, *quale te dicam bonum Antebac fuisse*, ut in illo, *Forma bonum fragile est*, sed monendum non putavit: ut nec illud libro. V. LXXXVI. quod bis castigabam, *verrem ut subesse pallio contenderent*, & *pervellit aurem verri, quem celaverat*, non *verum*, vero. *verrem* pro porcello posuit, quomodo & in fabulâ proxime antecedenti. Sed tu de his videris. Nunc Mauricii Tactica praelo subjecit. Ut veniam tandem ad Observationes tuas, munus longe gratissimum, jam eas percurri ea aviditate, qua tua soleo. *Nec satis est legisse semel, juvat usque morari*. De iis quaecumque dixerò, longe infra operis meritum erunt. Tentatur illic locus a te Statianus ex Tiburtino Vopisci, ni fallor, quem ego jampridem sic constituebam,

*At nunc ignarae forsan vel lubrica Nais,
Vel non abruptos tibi debet Hamadryas annos.*

Tibi debet, quia illis propter te & in te parcitur, nam, *fatum Naidos arbor erat*, ut in Fastis inquiebat ille. Sed nae ego fatuus sum, qui sus Minervam, praesertim in illo scriptore, qui nemini plus debet, quam tibi. Pro caeteris, quae in illo epistola tua me docuit, grates ago, quantas par est. Palinurum mediis in undis effusum, & terrae adnatantem describit Maro, nec deprehensum ab Aenea hunc casum, nisi cum jam scopulos Sirenum esset advectus. Sirenum scopuli e regione promontorii Minervae, & Caprearum. immensum sane itineris spatium conficiendum fuit Palinuro natanti, si Neapoli usque Veliam sit delatus. Nam Sirenum scopuli inter Neapolim & Veliam medio fere itinere, quo devecta navi jampridem excussus erat Palinurus. Nondum igitur displicet *Graia Hyele*. *Hyele* enim *Graii*s, Latinis *Velia* est dicta. In *Velien*sium nummis apud Goltzium passim ΤΕΛΗΤΩΝ. Sed nec *Phrygius magister* amovendus, cum nitatur vetusti codicis auctoritate, quicumque vir doctus nescio quis antiquissimam editionem Parmensem commisit in museo meo exstantem, nec dubitari de fide ejus potest, cum multae lectiones inde depro-mantur a receptis plurimum discrepantes. parentis mei illud *Nubigenas clypeos* & Politiani alterum *Quam tuus ille dies*, aliaque id genus plura ibi exhibentur. Quare nec temere rejiciendum, *Mater & inde suum*: pro ordine vitae forsan castigandum ordine avito. *Tò Maeon* manifeste in legem metricam peccat, nisi quinti sit casus. *Tò exserto* capiebam respectu illorum, *nobile pectoris aurum*, quo exuto, tamquam amoto omni impedimento, Musas coepisse illi favere, neque enim *exsertus* pro nudo semper sumitur, sed quandoque pro parato aut expedito aut exercitato, *exsertus lentandis navita tonsis* apud Claudianum. In Senecae Tragoedias nonnulla fuggeram, quae nescio an acceperis. Sunt in prom-

promptu longe plura. De Petronio cum alii, tum *Carolus Datus* nuper admodum nonnulla significabat. Ipse tamen suspensam tenet fidem, nec quicquam arbitratur temere credendum. Deditse quidem se literas Romam ad *Octavium Falconerium*, elegantis ingenii virum, per quem sperabat certiora de re tota posse cognosci, caeterum eas serius Romam delatas esse, *Falconerio* jam in Gallias profecto, quo se cum *Raspono* nuper contulit. De Scylla post Charyb-
din securum esse te jubeo, satis enim superque per hanc fundi nostri calamita-
tem sum attritus. Quos autem innuas amicos nostros haud scio. Praeter te
enim & *Beuningium* vix opinor illic terrarum esse quemquam, cui id nominis
conveniat. Nisi ¹ homines designas in Gothicarum, Saxonumque ac Islan-
dicarum antiquitatum luto spurcissimo assidue volutantes, qui cum veterum
elegantiarum omnemque priscae eruditionis cultum stolide ejurarint, & castra
nostra turpiter deseruerint, quo jure se pro amicis meis ausint venditare non
video, digniores profecto qui huc relegentur terrarum, quam ego. Esse hîc,
qui male de me aut loquantur aut sentiant, non miror, cui res longe odiosissi-
mae fuerint tractandae haecenus, ac inter caeteras urgendum supplicium juvenis
nobilissimi, & cognationis vinculo procerum plerisque adnexi, qui piratarum
manu instructus nautas Hollandos complures trucidarat. Is jam poenas pro
meritis me accusante dedit. Ne quid erres, amice, fuit hîc nonnemo nuper
ex discipulis tuis, qui pro venerio nepotulo te palam traduceret, aliis etiam
viris honestissimis pari modo obtrectaret. Hunc ego a me removi, cum domi
forisque saepius jam digladiatus esset, & nunc alios pugnis depexuisset, nunc
vapularet ipse, jurgiisque ac calumniis modum non faceret, tum ex famulis
meis unum trino vulnere lethaliter confecisset. Tanta in illo erat calumniandi
libido & infania, ut & hîc terrarum viros primates duos prodicionis, & Vien-
nae in Austria unum ex Proceribus paederastiae infimularit, atque hanc ob
causam inde nocturnus clam profugerit.] *Schokium* quando pro meritis a te or-
natum videbimus? aut cur premis tanto tempore, quae legi publice non tuâ
tantum, sed omnium, quotquot te & literas aestimamus, intererat? In ² [†]
deiva quae dixi, sunt verissima. Gessit enim se perquam nequiter, ut mini-
mum prae aliis delictis in eo peccarit, quod in scriniis meis compilandis manu
sinistra non belle usus est: hoc enim illi fraternum esse quodammodo videri
potest. Scis, quid in Vossianis aedibus evenerit. Deprensus & convictus coram
tribus testibus ad calumnias confugit, & invenit, qui aurem hîc illi commodaret,
Trajecti nonneminem ex familiaribus nostris. Sed haec contemni & negligi prae-
stat. Tu vale, mi Gronovi, & cum vacabit horam unam alteramque amicis im-
pertiri, fac intelligam de rebus tuis nonnihil. Exspecto indies, ut rationum mea-
rum examen Proceres nostri absolvant, tum curae mihi erit, ut per Elzevirios,
quod debeo, tibi numeretur. Vides, quam manum de tabula non tollam tem-
pestive, cum ad te scribo. Vale, Holmiae Suecorum. CIOCLXIII. a. d. VII.
Junii Gregor.

EPI-

¹ *Janum Viliium* intelligit. ² *Jacobum Tollium*, quem puto indicari in praefatione Hein-
sii in Valerium Flaccum, & qui notas ejus subduxerat.

EPISTOLA CCCLXXXVIII.

J. F. R. GRONOVIIUS

*Nic. Heinsio.**Holmiam.*

Quasi non satis negotii Livius faceret mihi, desubito admisi & Plautum, Heinsi jucundissime. Nam quum significasset typographus se subjecturum praelo, qualem antehac dederat, & phalerarum aliquid posceret, quod commodo meo facere possem (hac enim semper & anxie formula mecum agit, ne quid imputem) promisi, nihil aliud tum destinans animo, quam veteres nonnullas miniatulas cum eo communicare. At re diligenter tractata intellexi aut totum mihi Plautum in fulloniam esse mittendum, aut iterum fore, ut & chartae & formae tam nitidae perirent, ac si quid eo conjiceretur meum, ignoscat mihi genius tuus, in oletum adderem. Ita vanum omnem *Gruteri* laborem tantum reddidit nomine suo corruptissimo exemplari praeposito *Aug. Buchnerus*, quem secutus est noster, & hic margines scoriis suis & foriis oplevit. Quid ille, qui non observavit, quid esset *in mundo esse*: quid *Sic dero*, vel *Sic datur*: quid in imprecationibus, *Qui illum*: quid *Condigne*: quid *Eadem* pro eadem opera, & alia passim occurrentia? & his tentandis se prodatur correctorem se prius prodiisse, quam domi sedisse lectorem Plauti? Scis penes me legatum esse ¹ *Philippi* justum Animadversionum (ut in brevioribus editis appellat) volumen, haud facile edendum: ita deterret parochos moles libri, nihil nisi varias lectiones, & magnam partem inutiles, continentis. Ignorassem, quam fidelis & exacta fuerit opera *Gruteri*, nisi centies istum viderem conqueri, vitiatos ab adversario suo versus deletis aut transpositis, aut additis vocibus. Neque enim diffitetur in MSS. sic repertum, & lex illa metrorum, quam Comicis nuper indixerunt, & Plauto & Terentio, opinor, magnum malum dedit. Pauca tamen occurrerunt, in quibus & contentionis studium abduxisse *Gruterum* videbatur: in quibusdam judicium sefellerat: erat, ubi differrent, & neuter aliquid commemoraret auctoritatis: alicubi hic ait, ille negat sic in scriptis haberi. Ergo optavi videre & illos, quosque potui paravi, tres a Vossio in membranis, chartaceum ab *Had. Junio* Rectore Amstelaedamensi, quo ² *Marcus* olim usus: licet omnes non ultra fabulas octo contineant. Sic exemptae mihi feriae, adeo quidem, ut nec uxorem Daventriam ad communes necessitudines visendas profectum comitatus sim. Sed Plautum multis locis illustriorem, passim antiquis exemplaribus congruentiorem habebitis, ut tu statim, quum legeris, quae displicent, divinando restituere possis, nec vereare, ne male inculcata quanquam, quae vis est ingenii tui, meliora reddideris, longius tamen a prisca manu recedas. Qua in re non semel

¹ *Jo. Philippi Parei*, qui legatum Gronovio reliquerat. Vid. supr. Ep. CLX. ² *Boxhornius*.
Tom. III. O o o illu-

illufit ſibi *Salmaſius*, pro ſcripta lectione accipiendo, quae recentiorum erat conjectura. Sic *Moſtellaria* 2, 2, 23. *Pulſando pedibus poene confregi affulas*, vetus eſſe putat, quum ſit *haſce ambas*. Et ſtatim verſ. 38. *Dii te deaque omnes perduaxint cum iſto omine*, ſiliceret a veſtigiis ſcriptae lectionis recedere, primum fore notat legere *perduint*: ſed *perduo* antiquum feciſſe *perduaffo*. At ſcripta lectio eſt *axint* vel *faxint*: & hoc recte: intelligitur enim, male perire. Hoc ego vos periculo liberabo. Te quoque jam inveni locum, ubi intexerem: nempe ad *Deglupta Maena*. Quae literis tuis miſces *φιλολογήμενα*, meli fuere omnia: In altero *Silii* loco multos annos eſt, quum ex vulgata conjeceram: *Duxerat. & Cretum*: ſed remiſi, quia *Cluverium* occupaviſſe cognovi. Placet & conſilium de *Virgilio*, *Silio*, *Valerio Flacco*. Age ſane, da illos ſacros ſinceros, quod ſolus potes, & quamprimum: feſtina, urge. Potin, ut hos nobis ſiſtas pure lautos terſosque? en erit unquam, cum hoc tui Muſci munus habebimus. Nec levius tibi convicium faciemus, ſi ceſſaverint poemata, quae quidem nunc domi deſidero: nam cum homini nobili *Transſalanae* civitatis ea praedicaviſſem, & commodaviſſem, nunquam poſtea recuperare potui. *Oxonienſia* excerpta, quae deſiderabas, en tibi filii manu: quae ex Romano exemplari, proxime mittentur. Amicorum tu nomen in arctum concludis: Sed ita eſt: ego quoque idem indies magis experior in meis, pauciſſimos eſſe. Interim vulgi more loquutus eram: & ſunt hiſc quoque, qui, quae parum ſecunda audiunt, ſpargant ſpecie dolentium, cum revera ſint in ulcere ungues. Ita certatim de poſtrema ſententia ingeſſerunt mihi, & quia te bono eſſe animo dicebam, exaugebant periculum, ſcilicet illi quaſi ſolliciti tuam vicem, quae ſi fierent, nil niſi cachinnarent. Sed iſtos merito contemnimus. *Euathli* mei *παροιμία*s cognovi apud *Plumerum*: ubi *Sannionem* aut *Ballionem* ſane quam riſi: in te patrata tuli aegerrime. Quem ſcribis ei aurem commodare, miror proſecto, ſi eſt, quem cenſeo. Honorem, quem ſtudiis veſtris habitum ivit *Galliarum* rex, libens vobis gratulor, ut & iſtam magnitudinem animi, atque exemplum merito praedico: licet ipſe faſtiditus, ſcilicet quia infortunati amicus. Ita enim ad nos ſcriptum eſt, meum quoque nomen (& hoc multum ſatisque eſt mihi) ibi a primo receptum fuiſſe: ſed nescio quem faſcinantibus oculis ſubmonuiſſe, in rationibus vincti munuſculum mihi expenſum ferri; ita illud expunctum. Bene habet: dum honos ſit literis, non invideo felicioribus. Quae in leſſo tuo correxiſti, recte facies, ſi nobiſcum communicaveris, ut ſint in promptu, ſi forſan edatur. Vale, decus noſtrum, & pectus amicitiae. Lugduni a. d. prid. Cal. Septemb. ciccclxiii.

N I C. H E I N S I U S.

J. Fr. Gronovio.

Leidam.

DE Regis Christianissimi munificentia erga viros, literarum cognitione potissimum sub hanc tempestatem florentes, res non te latet. Ego quamquam ante menses hosce sex septemve *Capellano* nostro auctor fuerim, cum de Regis hoc instituto mecum per literas agebat, ut tui in praecipuis rationem haberet apud illustrissimum *Colbertum*, cui negotii totius cura a Rege erat demandata, quemque *Capellani* consiliis inniti hic haud ignorabam, hominis sibi per quam familiaris: (cum pudore enim nostro conjunctum fore videbatur, si aliquo essemus loco, ubi tu non admittereris, optime, si quisquam, de literis meritis) rescripsit tamen *Capellanus*, se nolente tui rationem nunc quidem habitam non esse, quamquam virtutes tuas operose commendasset *Colberto*, sed nec te unum esse praeteritum in hoc numero, nec de re ex voto meo conficienda desperari oportere in annum proximum. Id vero ut oportunius confieri possit, Livium tuum aut ipsi Regi, aut saltem *Colberto* dedices atque inscribas censeo; nisi fidem tuam alius jam patronus oppigneratam tenet. Sin minus, vide fodes an e re tua sit, florenos mille annuos fastidiri. Si paratus es consilio meo manum dare, ita causam tuam in aula Gallica sum acturus, ut certo intelligas, quid tibi sit sperandum, priusquam horum, quos jam designabam, alterutri Livium inscribis. Fac quaeso hic saltem responsi a te nonnihil obtineam, & quidem mature; ne cum dolore meo denuo te praeteritum esse, quod abominor, intelligam. De Marone & studiis meis proxime nonnihil fortasse, quamquam satis ac super hisce frivolis jam nuper te obtundebam. Habe nunc hoc¹ epigramma regiae pietati a me datum, ne ἀσύμβολος te accesserim. Vale, mi Gronovi. Holmiae. MDCLXIII. XII. Sept. Gre.

1 Editum lib. 111. Silv. p. 207.

EPISTOLA CCCXC.

N I C. H E I N S I U ' S

J. Fr. Gronovio.

Leidam.

DE castigandis Plautinis Comoediis te cogitare ut lubens intelligo, mi Gronovi! Inopinatò equidem supervênit mihi hic nuncius, cum solum a te Livium impatienter expectarem, cujus editionem egregie ornabit tibi Gu-

dus, si salvae sunt schedae omnes, quas ille tuam in rem apud Italos collegemat. Ipse *Gudius* non longe a vobis potest nunc abesse, cum Lutetiam jampridem incolumis advenerit. Fortunas ejus habeo profecto commendatissimas. Quare, si me audit, de conditione a Duisburganis oblatâ nunc quidem non cogirabit, sed secundam ad externos profectioem molietur, quam priore hac longe utiliore sibi fore experiatur aliquando; ego certe id expertus sum. Occasio rei oportuna non deerit, siue *Leeuwencronii* filio operam hanc addicet, quod pater mihi visus est optare, siue alteri cuicumque. Indolem *Leeuwencronii* adolescentis perspectam tu habere jam potes, quam si minus probaris, alibi facile comitem itineris illi inveniemus, quem per Europam sine impensis suis circumducatur. Velim tamen anno alteroque interea sedem apud vos figat, & nonnihil prodat in lucem suarum lucubrationum, quo facto existimationem apud homines literatos multam haud dubie est collecturus vir egregius. Rogo & auris illi a te vellatur super iis quamprimum ad me mittendis, quae multo studio conquisivit undique, Nafonis novam editionem non parum exornatura, quam parari a me posse ante tempestatem vernam confido. Multum quippe praesidii hoc acturo mihi in se fore, jam non semel est pollicitus. Sed ad Plautum tuum ut revertamur, memineris velim pervetustum ejus exemplar; typis tamen descriptum, in Leidensi bibliothecâ adservari. Teneo & ego Venetam editionem Anni MCCCGLXXII. quam *Georgius Alexandrinus* recensuit: ad haec Plantinianam manu *Scaligeri* passim emendatam. Si quid horum codicum desiderabis forte, id in tuos usus esse apud me paratum scito. Nam Aldinum codicem cum MStis, si recordor, collatum utendum a me *Goesius* ante annos complures acceperat. Filium ejus, nepotem meum, per literas monebo hodie, ut libri hujus copiam tibi faciat. Praecipuo tamen usui erunt Schedae Gruterianae, quas Amstelædami apud *Johannem Sixium* vidi olim. Eas *Rufus* noster facile tibi impetrabit, ut spero, nisi ille hoc officio jam est perfunctus, quod malim. Commentatores varii quidem penes me exstant, sed quorum neminem te fugisse opinor. De me ut addam nonnihil deque studiis meis, exerceor etiamnum membranarum Maronianarum evolvendis, labore ingrato & molesto, sed qui ad finem jam propemodum sit perductus. Duodeviginti codices, & aliquanto plures etiam, fuerunt excutiendi. Nunc restat, ut quae inde deprompta sunt, veterum Grammaticorum auctoritate nonnihil confirmem. Eos enim nosti in Marone ad partes vocando tantum non assiduos esse. Hinc ubi me expediero, castigationes ad Val. Flaccum & ad Silium Italicum continuata opera detexam. In Flaccum Commentarios integros *Baptistae Pii*, hactenus mihi ignotos, ex Upsaliensi bibliothecâ sum nactus, quos percurrendos proposui, praesertim cum membranarum vetustis se usum esse Valerii passim deprædicet. Silii quoque editionem Parmensem hîc inveni, quam cum Romana in plurimis consentientem deprehendo. Libro XIV. apud illum sub finem scis illa occurrere; *non aera vacabant; quae scirent Ephyren;* ea negotii nonnihil & mihi exhibuerunt, & tibi quoque quantum video. Tò *vacabant* in Juntarum editione Florentina, anni MDXV. quam *Ambrosius Nicander Toletanus*

interpolator se gloriatur castigasse, video comparere. Idque Aldus etiam secutus est, & Aldo obsecuti caeteri typographi. At vetustiores cum Marso cumque scriptis exemplaribus, *juvabant* constanter; nisi quod *juvabat* in Colonienſi. Idem quoque, uti & Puteaneus, & Oxonius *Quem scire*, non *Quae scirent*. Videor videre quid velit Silius, verba tamen ejus an exhibere possim & revocare fugitiva dubito. Tentabam tamen,

— *non usquam clarior illo*

Gloria picturae saeculo; non aeris (avitam

Qua scires Ephyren) fulvo certaret ut auro.

Non usquam clarior illo saeculo gloria nec picturae nec aeris, ut etiam auro certarent, nec minus cara haberentur signa aenea; qua gloria (ad aes refer) facile scires avitam esse Syracusanis Ephyren. Syracusae autem Corinthiorum colonia, hinc supra hoc ipso libro vers. 181. *Ephyraea moenia* Syracusas appellavit. Vide & vers. 52. ex literarum transpositione error subnatus videtur. Tu judica. *Ephyraea aera* pro signis aeneis faberrime factis in proverbium abierunt apud Maronem aliosque. Ut cogitarim aliquando in Petronio scribi posse: *Aes Ephyres laudabat miles in umbra*. Quo ductus vetustae scripturae invitabant Mediceorum codicum. Et quia Petronii oportune mentio est injecta, narro tibi Italos de scriptore illo recens invento, ut aut integer mox in lucem sit proditurus, aut integro simillimus, pergere praeclara omnia polliceri. Nunciat *Carolus Datus* codicem ipsum ab amico quodam suo, rerum haud imperito, esse inspectum, qui testetur pervetusta manu omnia esse exarata, nihil inculcatum interpolatumve, aut quod de dolo malo suspicionem possit injicere. Idem ex Italia ad se perscribi *Bigotius* asseverat. Nobis obdurandus est animus, dum videamus, quo evasura sint promissa. Munifice me habitum fuisse a Rege Christianissimo qui spargunt, nil mentiuntur. Quamquam Proceres nostri fructum liberalitatis regiae omnem mihi intercipere videntur velle. Munus ipsum ut iis ignaris admittendum non putavi, sic neque invitis iis id sum amplexurus. Te praeteritum moleste aegerrimeque tuli. Auguror tamen huic errori posse a nobis occurrere, praesertim si consilium meum sequeris, de quo proximis literis tecum agebam. Possis autem officii partes haud incommode sic dividere, ut *Livius Regi*, *Colberto* Plautus inscribantur. Ego utrique grates per epistolam jam egi. Ubi rescribetur nonnihil, rem tuam urgebo, quantum potero. *Fulqueti* patrocinium quod scribis invidiosum noxiumque rebus tuis hinc fuisse, ita jam suspicatus eram, & video nunc nihil conjecturae me falsum. Sed mederi conabimur huic ulceri. *Colbertus* ultro humanissimis literis ignotum ignotus compellavit, quarum exemplum hinc habes. Ad *Loccenium* & *Schefferum* tuas perendie curabo. Noster ille post *Phaedrum* commentariis illustratum, *Mauricii* atque *Arriani* tactica praelo nunc subjecit, etiam *Opus de Philosophia Italica Sectae Pythagoreae*. In *Phaedrum* conjecturarum nonnihil tecum communicabam nuper, de quo quid sentires, vellem explicasses paullo apertius. Sunt enim non pauca ejusdem notae mea, quae amicus noster observationibus suis inferenda non duxit, credo, quod ea improbaret.

Ego tamen, ut nostra nimii plerumque nos amamus, ea prorsus ut damnum induci nondum possum. In Marone conjecturae omnis sum parcissimus in tanta copia veterrimorum exemplarium. Ausus tamen sum quandoque aliquid tentare, praesertim quod exploratum habebam ipsis membranis, antiquissimis utcumque, naevos pertinaciter nonnunquam inhaerere. Sic *Hylas* pro *Hylax*, & *Sardonii herbis* pro *Sardois*, *Projiciunt* pro *Porriunt* aliaque hujus notae plurima. Quare in Bucolicis adversus membranarum auctoritatem tentabam Ecloga vers. 30. *thiasos indicere Bacchi*: non *inducere*. *Bacchi* pro *Baccho* est in scriptis omnibus. Aeneidos x. *Aut ubi curva choros indixit tibia Bacchi*. Statius tuus Achill. *Sed Bacchi comites discussa nube soporis Signa choris indicta putant*. Aeneidos primo vers. 548. putabam, *Non metus*, officio ne te certasse priorem *Poeniteat*, pro *nec te*. Non est metus, ne te poeniteat. vers. 737. *Primaque libatos summo tenuis attigit ore*. latices nimirum: non *libato*. Scis poetarum accuratissimos quosque diligenter cavere, ne voces duas in eundem sonum definientes conjungant. Sed, ohe jam satis est. Filium tuum ob excerpta Siliana Oxoniensis libri ad me missa amo vehementer. Vale, Vir summe. Exaratum Holmiae. MDCLXIII. a. d. xxvi. Sept. Gre. De Quinctiliani editione ne quid temere aut inconsulte *Screvelius* vester agat erit monendus. Pithoeanum exemplar hanc in rem offert *Bigotius*, locis plurimis castigatum. Tum *Tur-nebi*, *Guieti*, aliorum notas, per quas editio ornari egregie possit. Cogitare se de castigando hoc scriptore *Graevius* diu est quod monuit, etiam de Hesiodo. Utrumque institutum praeclare non uno subsidio poterat promoveri, si hoc serio illum agere haberem exploratum. *Graevius* noster, quid rerum molitur, ubi curas occupet potissimum, sciscitatus jam non semel est humanissimus *Bigotius*, ad quam quaestionem respondere nil possum. Velim tamen obligatam de Polyaeno edendo fidem aliquando liberet. In *Schelii* epicedio quae hîc illic emendaram, is jam pridem a me tulit. *Schoppiii* Minervam Sanctianam scis, puto, jam proflare venalem. Si *Plumerus* aliam ejus libri editionem parat, ut opinor, auctor illi esto, ut reliqua ejusdem argumenti Sanctiana opuscula Minervae subjiciat: quicquid hujus notae in scriniis tuis meisque desideratur, *Bigotius* se aliunde investigaturum esse promittit.

EPISTOLA CCCXCI.

J. F. R. GRONOVIIUS

Nic. Heinſio.

Holmiam.

Bonitas tua & studium in me commendando, Heinſi excellentissime, pluris est mihi, quam regia pecunia. Itaque in magno beneficio mihi licet expensum feras, & quod ita fieri oportere judicasti, & quod, ut fieret, elaborasti. Eas tibi ego grates habebo immortales, & Deum veneror, te supra omnes au-

augeat, quum tam benevole alios tibi aequari cupis. Rem ipsam ita cecidisse magis laetatus sum vestra, quam dolui mea causa. Didici enim multis casibus non accusare homines ob ea, quae contingunt, quam omnia referre ad divinam providentiam: quae mihi quamcumque partem adsignat, ea laetus vivo: si cui prolixior alluxit, non inde ὀφθαλμὸς πονηρὸς mihi. Deinde amor ille infinitus literarum, qui me tot cogit suscipere ac tolerare labores, vetat indignari, ut vos magis illis enitescere, ita etiam eas in vobis magis honorari. Sed & gloria magni regis salva est, quoscumque ille munificentia sua dignos probet, dummodo hanc ob causam probet. Quid ergo me sollicitas, & amicum tuum, quem tantopere monstrando evexisti, illum deprimis indigna suadendo? Primum ambiguum est an haec sit ad utilitatem via. Deinde ut sit, praecipua rei gratia interit, quae est, quod ultro & non expectantibus provenit. Ac forte ob id ipsum non proderit: nam & ego ambiendo viliorem me fecero, & illi, si rationem mei haberi debuisse intelligant, nolent agnoscere in iudicio se peccasse. Itaque eant illa, quo volent: ego de fortuna habeo, quod illa sponte detulit, non quod importunus fatigatae extorsi. Livium mihi auctor est *Rettendorffius* ut ad Paderbornensem Principem allegem. Plauto (scis enim quae postremo Sextili ad te scripsi) videbo, si quem salvo pudore invenero. At tu, o fidissimum & carissimum caput, alium quaere feliciorum, in quo gratiam tuam experire: istos arbitrato suo uti, me nemini molestum esse patere. Quod adjecisti, *Tale tuum carmen nobis, d. p. nosti caetera.* Vale & salve, ὦ φίλτης. Lugduni a. d. i i i. Cal. Octobr. c i o i o c l x i i i.

EPISTOLA CCCXCII.

NIC. HEINSIUS

J. Fr. Gronovio.

Leidam.

Solet mihi plurimum apud te licere, flos amicorum, unde fit, ut manu praecipiti incogitanter plerumque illinam chartae, si quid ad te perscriptum cupio. Id ipsum ne & nuper mihi evenerit metus est, dum in partem regalis munificentiae te adhiberi cupio. Nam quemadmodum meritis tuis cum haberi honorem vehementer optabam, atque etiamnum opto, qui viris nequaquam tibi comparandis, meritique longe minoris, obtigisset nuper, ita in ea nusquam fui sententia, ut aliquid te indignum hinc tibi faciendum, & ad lucra sordide adspirandum esse, arbitrarer. Quid enim? Egone venalem te exponi velim, aut quicquam a te fieri, quod & ipse averfer, & in mores ingenuos cadere non possit? Cum abhorream & ego ab intempestivo honorum ambitu, putare noli, id tu ut facias a me postulari. Si quid tale scripsi aut flagitavi, praeter mentem praeterque animi sententiam id flagitatum ac scriptum esse scito. De Livii tui editione Regi aut *Colberto* dedicanda tempesti-

ve te monendum duxi, ne post acceptum beneficium, si beneficium tamen esses accepturus, ferum foret ea de re cogitare; ubi alteri jam addixisses, quod benefactoribus deberi judicabam. Volui praeterea & ipse de re certus esse, ne, qui *Capellano* negotium omne commendaram ferve, & de grati animi in te laude eximiâ multis eram praefatus, viderer fidem obstrinxisse, quam liberare non possem, si ad alios patronos irent Livianae lucubrationes, quae inter scripta tua principatum tenent. Sustine igitur parumper, & consilium in arena cape, cum ad umbilicum jam perducent id opus typographi, de patrono libri eligendo. Nolo enim ut tu occupes aut venêris beneficium; sed ut beneficium te deprehendat volo, paratum tamen & accinctum, ne, cum velis praestare te gratum, non sit, quo praestes. *Paterbornensi Principi* volo optime, & mihi plurimam olim Romae cum illo fuisse necessitudinem haud ignoras, nec quicquam impedit, quominus ad illum Livius sese convertat, si nil interea regiae monetae ad te redundarit. Petii, fateor, a *Capellano*, ut tuis meritis aulam conciliaret, aut, si tu parum illic esses intellectus, ut mihi in hoc negotio gratificaretur, qui honori regio omnia, tuo nihil ambirem. Regium enim honorem consummari posse hoc facto. Satis is exploratum habet per se, nec eam tibi mentem, nec eo fortunas tuas esse loco, ut extortum Regi cupias, quod ultro deferendum fuisse nemo non intelligit ac fatetur. Sed de his jam plus satis. De *Paterbornensi Principe* & *Rottendorphio* si quid potes nunciare, nuncia quaeso. Scripsi ad utrumque plus vice simplici, sed biennium jam ferme est quod neuter respondet. *Rottendorphius* ultimis suis iter cum Colonienſi Electore Hildesum a se parari significabat. In ipso itinere bibliothecas veteres non unas perlustrandas fore. Si quid illic reperiret, aut Maronis, aut aliorum poëtarum, ex horum praesertim numero, quibus ego manum jam admovissem, diligenter se curaturum, ut eorum mihi fieret copia. Saltem monitum esse sese de iis, quae illic invenisset, per literas. Ille vero haecenus ne quidem, ut mirer hominem in vivis adhuc esse, quem ad plures abiisse ex pertinaci silentio suspicabar. Pergo interim in Marone, quantum per alias occupationes licet; & ni blandior mihi, multas deterfisse nitidissimo scriptori maculas me opinor, de quibus per duodena saecula ne cogitatum quidem fuit. Praelucet mihi facem in plurimis Silius, quem studiosissimum Maronis fuisse imitatore haud ignoras. Aeneidos x; 455. pro *meditantem praelia taurum*, Mediceus codex omnium veterrimus *meditantem in praelia*, non dubitabis de scriptura elegantissima, si Silium audis: is libro x.

*Haec dicens Silarum meditantem in praelia telo
Praevenit. hasta volans imo sub gutture sedit.*

Sed majoris momenti illud sub finem Georgicon primi.

*Ut cum carceribus sese effudere quadrigae,
Addunt se in spatia.*

quaenam ista sit Latinitatis ratio, *Addere se in spatia*, non video. Affirmat Picrius in nonnullis veterum *se* omitti, ac legi *Addunt in spatia*. Idem de iis, quos

quos inspexi, assevero. Prior Mentelianus omnium veterrimus post Medicum, *Addunt spatia* omiſſis duabus vocibus. Mediceus ipſe *Addunt ſpatio*. Nimirum Maro ſcripſerat *Addunt in ſpatio*. Cum carceribus ſeſe effuderint, magis adhuc effunduntur in ipſo circi ſpatio. τῷ *Addunt* videtur *curſum* eſſe ſubintelligendum. Sic *addere gradum* habes apud Plinium, ea, ni fallor, epiſtola, qua mortem Plinii majoris Tacito enarrat, pro augere aut incitare gradum. Sed audiamus denuo Silium xvi. verſ. 372. ubi agit de re ſimili; *Jamque fere medium eveſſi certamine campum In ſpatio addebant*. Ita enim Coloniensis & Putaneus codices. nam vulgati *In ſpatia*. Bene Servius *currendo curſum augere* interpretatur. Erant plura, quibus recensendis nunc ſuperſedeo. Collegam tuum ex aedibus Bredani hoſpitis fato paraſitico turpiter ejeſtum eſſe audio, remque totam plenius cognovi ex epiſtola publice edita. Videor mihi videre praefricſtam Stoici, ſi diſ placet, noſtri frontem. Mirum, ni filio monitor fuerit, dum domo inprovidè occupatâ emigrabant inviti uterque. Spectaret, & in haec tempora ſeſe natum meminifſet, quibus animum conſtantibus exemplis obfirmare oporteret. Deos tamen fervide precatum eſſe fit veriſimile, ut omen averterent: dum hoſpes interim & uxor hoſpitis Jovi Liberatori libabant. Vale. Habes hîc denuo nonnihil nugarum poëticarum. ¹ Ultimum epigramma tibi ſoli habe. nolo enim me auctorem ejus circumferri. Quintum diſtichon eſt acerbum ſatis, quo rem annonariam a Mario ſordide, & multâ cum populi Romani querela adminiſtratam tango. Caeterorum nihil in obſcuro tibi poteſt eſſe, qui hiftoriam omnem Romanam penitus exploratam habes. Ob inſcriptionem *C. Billieni* plurimum te amo. Utinam plura ejusmodi monumenta antiquitatis ab Amſtelaedamenſibus noſtris eruantur. Holmiae. cccclxiv. xvii. Octobr.

Schefferus, qui nunc nobis adefſt, plurimam ſalutem jubet tibi dici. Quando *Schoockium* defricatum videbimus? niſi feſtinas, denuo interveniet hyems, & me deſiderati libri conſpectu in aeſtatem proximam fraudabit.

¹ Primum editum legitur lib. iii. Silv. p. 108. ultimum hîc ſubjici curavimus.

EXPEDITIO ROMANA.

M Artia gens Senones iterum cum triſte minentur
 Excidium laribus, Roma, famemque tuis;
 Jam tibi Viſtoris Ludovici foeta triumphis
 Caſtra ſuburbanam cum populentur humum;
 In duce ſpes Mario eſt: Mario te vindice tutam
 Credis. ad hunc belli ſumma relata novi eſt.
 Hoc Capitolinam cuſtode tueberis arcem?
 Hic tibi defeſſae Manlius alter erit?
 Ad mala per longos, fateor, praemuniit uſus,
 Inque Saguntinam Romula teſta famem.

*Sic tamen ad Cimbros Marium Numidasve relego.
Hinc tibi sub Mario forte triumphus eat.
Laudo ducem Marium. Sed dux, mihi crede, Camillus
Hoc foret utilior tempore, Roma, tibi.*

EPISTOLA CCCXCIII.

NIC. HEINSIUS

J. Fr. Gronovio.

Leidam.

CUM Illustrissimus Comes *Turo Oxenstierna* filios suos peregrinationi Belgicae accinctos habeat, qui sedem aliquo tempore apud vos fixuri sint, rogo & obtestor te, ut adolescentibus splendidissimo loco natis consilio atque alia quavis ope adesse ne graveris, quorum Avus Archidapifer & Prorex Regni Succici, totiusque Senatûs Princeps, D. *Gabriel Oxenstierna*, magni illius *Axelii* frater, de Republica foederati Belgii optime olim sit meritus. Confido reapse illos esse intellecturos, preces meas nonnihil apud te potuisse, quem immane quantum demereri hoc officio potes. Quamquam meae commendationi vix est locus, ubi de votis ac desideriis illustrissimae gentis *Oxenstiernarum* agitur, cui te studere vehementer ac unice cupere sum certus. Vale, Vir Celeberrime, & te tui similem, hoc est virum comitati natum nunc praesta. Exarabam Holmiae Suecorum. *MDCLXIII. a. d. XVII. Octobr. Gregor.*

EPISTOLA CCCXCIV.

NIC. HEINSIUS

J. Fr. Gronovio.

Leidam.

PERLATUS est ad me hesternae die recensitionis tuae Plautus, vir Clarissime, una cum Apologetico rem nummariam spectante. Atque hunc quidem jam perlegi libellum non doctum minus atque elegantem, quam aculeatum & de corio adversarii tui suaviter ludentem. Plautus ut a capite ad calcem totus quoque pari diligentia a me percurratur proximae mihi curae erit. Scis enim quam tua omnia unice probem ac venerer. Utriusque voluminis cum geminum exemplar mihi sit oblatum, alterum ad me pertinere facile sum arbitratus; de altero quid capias consilii sum docendus, quamquam est suspicio *Scheffero* munus istud destinari. Sed divinum me venditare in conjecturis, quae frequenter imponunt, vix ausim. prodibat post paucos dies amici huius nostri de Italica Pythagoreorum Philosophia commentarius, Mauricii quoque & Arriani *Ta-*
ctica

Patrum regis ne fortunis omnibus exutum videremus periculum proxime fuit, post custodes tanquam jam captivo appositos. Imperium quippe militiae utriusque deberi sibi contendebat ex ultimis fraternae voluntatis tabulis; praevaluit tamen gratia candidatus *Vrangelius*, & aemulum submovit. Vale iterum.

J. F R. G R O N O V I U S

Holmiam.

P p p 2 rum

† *Marquardus Gudius*, cujus contubernalis fuit *Schiassius* vel *Schaffius*, Belgice *Schas*, quem in itineribus comitatus est, & postea heres ab eo scriptus consecutus magnas opes, & bibliothecam instructissimam. Intelligi vero *Vossii* similitudines, ex epistolis sequentibus apparet, ubi sub *Gelotiano Vossius*, sub *Probrino Gudius*, sub *Gazaeo* dives *Schaffius* inducuntur.

rum istic putabat, pravitas, invidia, & poene dixerim perfidia. Sed nosti forte aliunde fabulam. Vocatus est Teutoburgum: sed nullo modo dimittit hominem contubernalis ille triennii, qui raro exemplo decrevit in literis vitam agere, & hoc, quamdiu potest, adiutore uti. Quin nunc ipsum adornant iter in Germaniam, excussuri ibi quoque, quicquid est bibliothecarum. De fragmento Petronii quaeris? quasi non dissimulando sententiam tuam me quoque ad opinandum tardiolem facias? Dicam tamen aliquid. Timeo tum Danaos, tum Dalmatas & dona ferentes: & ut agnoscam nonnulla haud inficeta, ac propemodum credam, qui fuit hunc centonem, paullo pluscula, quam antehac edita habuimus; excerpta & reliquias ejus auctoris habuisse, tamen totum hoc textum Arbitri esse adfirmare haudquaquam ausim. Primum monstra vides plurima quaesitae ostentationis: ex quibus tamen quaedam procuravimus. *Iliada & Odyssaeam*, inquit, *aclenatis gladiatorium munus non licebat multitiam considerare: nos jam ad triclinium*. Scripsit, qui condidit: *ac Laenatis gladiatorium munus. Non licebat tralaticia considerare, nam jam ad triclinium*. Laenatis intelligo Popillii cujusdam. Juvenalis: *Quod captator emit Laenas*. Picta autem gladiatoria munera etiam publice solita proponi nosti. Rursus: *Ipse nescit, quid habeat, adeo saplutus est; sed haec lupatria providet omnia*. Scribendum, *Zaplutus*, ζάπλυτος: deinde, *haec laecastria*. Λαικάστρια, πόρνη. Postquam itaque omnes bacalusias consumpsissem. Vult, omnes baculas jam consump. Ab hoc ferculo Trimalcio ad lasanum surrexit. Valde blanditur, & cupio esse Petronii. Scribendum autem: *ad lasanum*. Scis Horatii lib. i. Sat. vi. *lasanum portantes oenophorumque*. Ubi Acro, *vas, in quo exoneratur venter*. Eadem vox desideratur inferius, ubi Trimalcio in convivium redit: *Si quid plus venit, omnia foris parata sunt, aqua, lassant, & caetera*. Scribendum: *aqua, lasanum vel lasana*. &c. Ubi quod sequitur, fuit: *Credite mihi ἀναθυμίασις* (vel *anathymiasis*) *in cerebrum it*. Restant multo plura: sed tu jamdudum me derides, adfectata forsitan haec vitia sanare dignantem. Neque enim credis Petronii esse *impropero, abstinox, urceatim, linguosus, desomnis, larifuga, gaudimonium, tristimonium, corporaliter, depraesentiarum, inspeciosus, apoculo*. Quomodo autem persuadebo tibi domi nata, non adoptata, & plecta atque excantata aliunde, quae sequuntur? *Fundos habet, qua milvi volant*. Suum hoc clamat Juvenalis Sat. ix. *tot milvos intra tua praedia lassos*. Cum *mulsi pultarium* (forte *sextarium*) *obdixi, frigori laecasim dico*. Martialem volvit, si nasum habeo, hic Petronius, cujus est lib. ii. 59. *Λειχάζειν* cupidae dicet avaritiae. Mox: *Chrysanthus animam ebulliit*: quod & repetit alibi, Senecae subreptum de morte Claudii. *Et ille quidem animam ebulliit*. *Habitabat ad arcum veterem*, nonne mutuatus est a Juvenali Sat. iii. *Restitit ad veteres arcus madidamque Capenam? Piper, non homo*, ut *Phantasia non homo, Discordia, non homo*, ad taedium usque adumbrata ex Ciceronis ad Atticum, *Metellus non homo, sed litus atque aer & solitudo mera*, iterumque, *non hominem, sed scopas solutas*. Jam vero, *piper, non homo; is quacumque ibat, terram adurebat*, partim ex Martialis 8, 59. *Autolyti tam piperata manus*, partim ex Plauti Epidico, *Quaqua tangit, omne amburit*: & profecto.

Quo magna mirasunt, ni mirificus hic Petronius *Petri Scriverii* notas in Martialem lectitavit. *Nomina omnium reddere* Seneca ei praestitit ex Constant Sap. cap. xiii. Brevit. vitae cap. xiv. i. de Benef. cap. iiii. *Echion centenarius* evocatus videtur ex Justiniani Institutione p. iiii. de succes. libertorum: atque ad horum imitationem dictos *sestertarios & dupondiaros homines, sestertarios gladiatores*. Nisi tamen & *sestertiarium ac dupondiarum foenus* ab Salmasio didicerat hic Petronius. *Nisi te toga perversa ubique fuero persecutus*, prodit hominem: est enim, quod meminerim, τῇ ἀπαξ ἐπιημένων apud Senecam de Ira i. cap. xv. *etsi perversa magistratui induenda vestis*. Magis illud: *Et quia bonam mentem habet, attuli illi Roma munus* (sic enim legendum) *cultros Norico ferro, quos jussit statim afferri, inspectosque miratus est, & nobis potestatem fecit, ut mucronem ad buccam probaremus*. Decet Dalmaticum Arbitrum mentio ferri Norici, sed quid, malum, est *mucronem probare ad buccam*. Scias & Suetonii clarorum Rhetorum non ignarum fuisse, utcumque male intellexerit, ibi habes cap. v. Sex. Clodii jocum. *Fulviam Antonii uxorem, cui altera bucca inflator erat, acumen stili tentare*. Haec nunc satis: quae vide, numquid ipse tibi, ego certe ea tibi me approbaturum diffido. Uno tamen loco juvari & verus Petronius videtur. *Processit statim scissor, & ad symphoniam gesticulatus ita laceravit obsonium, ut putares essem Darium hydraule cantante pugnare*. In editis deest τὸ εἶναι. Et satis tamen verisimile Petronium scripsisse: *ut putares effedarium hydraule cantante pugnare*. Scis gladiatores *effedarios*: unde hic noster mulierem *effedariam* commentus est. Academia nostra non modo *Vorstium*, sed etiam *Lindium* luget: & velit Deus op. max. ne plures, adeo minari incipit contagio. Vale, decus nostrum, & me ama. Lugduni vii. Id Quinctil. cicioclxiv.

EPISTOLA CCCXCVI.

NIC. HEINSIUS

J. Fr. Gronovio.

Leidam.

Mirifice adfectus sum mehercules litteris tuis, quae & valere te & mei meminisse, quo nunciare nil jucundius acceptiusque potuissent, egregie significarunt, virorum amicissime: tum quod de *Gudii* nostri adfectu securum esse me jubes. Optimum factum est. Cujus ipse argumentum indubitatum veterrimas Maronis membranas, easdemque praestantissimas, sed quibus ob publicas occupationes uti haecenus non est datum, nuper Elzevirio curante perveniri ad me voluit. Utinam pari facilitate Nasonem meum foveat; praesertim si quid veterum exemplarium notae minime vulgaris, aut excussit nuper in peregrinatione ex priscis bibliothecis, aut aere suo comparavit noster. Quod tu, cui patuere ejus scrinia, arbitrari optime omnium atque unice, ni fallor, potes. Nasoni enim recensendo, hibernas lucubrationes destinavi. In-

terim gaudeo vehementer, quod Italia Galliaque perlustratis, Germanicam quoque profectioem sibi nunc proponit *Gudius*; nec dubito quin in Holfatia, Gottorpiam bibliothecam sit inspecturus, quae & Wouwerianos libros complectitur, & alios complures in membranis exaratos, qui a *Lindenbrogiis* fratribus ad principem transivere. Contemplatus sum illic semel iterumque, quae non modice placerent. Sed adeo me totum sibi vindicabant Nasonis exemplaria, quae ibi adservantur nonnulla, ut praeter unicum Lucretiani fragmenti codicem nihil horum in usus meos converterim. Et si triumviros amorum cum vetustis schedis a *Wouwerio* collatos plurimum inter alia minime protrita gestiebam, praeter hanc cum Argentina & Basiliensi bibliothecis nullas in Germania excussi. Sed & illae ob angustias temporis, quibus premebar, unico Nasoni a me sunt datae. De Bernensi Bongarsiana praeclare multum *Langermannus* mihi est pollicitus, cui sane hîc credo. Ut operae pretium facturus sit amicus noster, si eo iter convertat. Wyngartensem si probe memini, in Helvetia *Johannes Rhodius* Scioppiana fide vehementer mihi olim commendavit, sed nae ego nugator sum insignis, qui homines rerum peritissimos erudiendos mihi propono. Quid simultatum inter nostrum hunc & *Alopecium* sit subortum equidem cum ignorissimis ignoro: nec fuit haecenus, qui apud me vel levissimam rei indignae mentionem impetret. Narra igitur sodes, & expone apud aures fidissimas omnem querelae istius originem. Non enim dubito quin ὁ δ᾿εὶνα etiam hîc mirificum sese Philosophum, & plane paradoxum sit professus. Cl. *Schefferus*, vir tui amantissimus, pro praecclaro munere ἀντίδωρον deposuit apud me de Italica Philosophia Commentarium, quem mittam proxime. Auguror etiam fore, ut Mauricium & Arrianum ejus, scriptores tacticos, ante Januarias Kalendas nanciscaris, nescio an idem de Livio tuo mihi debeam polliceri. Sed polliceor tamen. Tu da operam quaeso, ne mea apud me vacillet fides. Nam vel eo impensius scriptorem longe optimum a te castigatum desidero videre, quod hac lucubratione defunctum ad intermissa jam pridem compellationis epistolariae munia te rediturum spes est, cum hanc ego solitudinem impatientius, quam credi mihi a te posset, feram. Βασίλεια nostra, rerum peregrinarum pertaesa, praesertim ex quo & litibus alienis incautius sese immiscuit, & ob id contumeliose a Gallis ac Romanis ipsis haberi coepta est, nunc id agit, quantum video, ut in patriam revertatur, quod ut sibi liceret hisce comitiis apud regni ordines per *Appelmannum* illa serio contendit. Nec abnuere postulato ordines, sed regni Senatus conditionem duram addidit, ne integrum illi esset, celebrare sacra ac rem divinam ritu Romano, aut sacrificuli cujuscumque pontificii opera, atque caeremoniis uti. Si illa nihilominus huc pergit, metuo, ne Papa suspicatus de Palinodia cogitari, manum abiturienti injiciat. Et haec quidem inter nos. Ego interim occentare illi per litteras haud desino, antiquum, *omite mirari beatae Fumum & opes strepitumque Romae*. Nudius quintus regiae munificentiae monumentum secundum ex Galliis ad me pervenit, addita Colberti humanissima epistola. Sed negant munera hujusmodi a me admitti oportere ii, a quorum nutu pendeo: nec descen-

descendam ego ad preces in contraria euntes, ut iudicio magni regis liceat frui, *Neve mihi noceat quod vobis semper, Achivi, Profuit ingenium.* Novisti caetera: renuntiandum igitur erit regio favori. Si nescirem litteras, essem felicior. Claudianum meum aut cum hisce accipies, aut mox habebis. Certe quae praefationi addenda sunt omnium postrema, nisi jam nuper ad Elzevirium. Adjecta & Claudiano Lactantii de Phoenice Elegia, locis plurimis non infeliciter, nisi mihi Suffenus sum, a me castigata: veterum exemplarium, uti videbis, quam debui, rationem habui in omnibus fere; nec potui tamen mihi temperare, quin ad conjecturas quandoque confugerem, praesertim ubi in membranis nihil erat praesidii, talis est ille locus, *Magnitiem terris Arabum quae gignitur ales Vix aequare potest.* *Magnitiem* interpretantur avem: nec tamen quae sit haec avis nos docent; credo quod ipsi nesciant. At ego in Animadversionibus moneo & scribi oportere, *Magna etiam terris Arabum quae gignitur ales Vix aequare potest*, & de Struthiocamelo intelligendum esse demonstro, quae *σπεθὸς ἡ μεγάλη*, & *ἔρνις ἡ μεγάλη* Graecis dicatur, Claudiano *vasta ales*: *Libycam* quidem avem Graecis juxta Romanis scriptoribus frequenter appellari scio, quod Struthius in Libya sit frequentissimus, sed & in Arabia occurrere hanc avem Animadversiones nostrae ex Xenophonte, Aeliano, Herodoto palam faciunt. Adde quod illic admonere me fugit, tabulas antiquas Arabiae chorographicas, qualis illa in notitia Imperii vetere, Struthiocamelos & serpentes promiscue existere, tanquam huic regioni familiares admodum. Nec dubitemus de struthiocamelo agere Lactantium sequentia faciunt, *seu fera sensit avis*. Rerum quippe naturalium auctores ubi id animal describunt, ferisne terrestribus an volatilibus sit accensendum, in incerto relinquunt. In Nasone nuper occurrebant illa libro VII. *Metamorph. florentemque Cythnon, Scyron*, loco suspecto: nam priorem in *Cythnos* posse corripere non opinor, idque *Raphaelis Regii* commentum est; cum vetusta exemplaria ad unum fere omnia agnoscunt, *Florentemque Tyron Cyprum*, vel *Cypron*; nisi quod tribus quatuorve *Florentemque Ciron*, in uno Thuaneco *Chiron*. Alii alia suggererunt, corripere ego, *Florentemque thymo Syron*. per omnes Cycladas uberrimus mellis proventus, ac proinde etiam Thymi, maxime in Insula Calydna, quam Hymetto & Hyblae proximam faciunt mellis copia atque probitate Strabo & Plinius: hinc *faecunda melle Calydna*, bis terve apud Nasonem occurrit. Sed & Syros mellis laudatissimi & thymi ubertate commendatur a Columella, quem vide omnino RR lib. IX. vers. 14. ubi in transcurso monendus es corrigi oportere ex optimis membranis S. Germani, *rursus in insulis Cycladibus, cum ex aliis transportantur Syrum*. Scyros si melle fuisset faecunda, ejus rei meminisse Statius in Achilleide non neglexisset, puto. mox sequitur, *Quamque impia prodidit arcem Sithonis accepto quod avara poposcerat auro*. Codices vetusti habent maxima ex parte, *quamque impia prodidit Arne Sithonis*. vel, *quoque impia prodidit Arnon*, nullo arcis ullibi relicto vestigio, & stat pro *Arne* vetustus argumentorum in fabulas Nasonianas auctor. Praeter haec in optimo Berneggeriano & uno Ciofani, *Sithon* & *accepto*, omnium veterrimus Florentinus *arci Sithon accepto*. Emendo, *quamque impia prodidit Arne Siphnon*,

Et accepto quod avara poposcerat auro Mutata est in avem: auctor argumentorum refert haec ad Minois expeditionem. Certe Siphnos omnium Cycladum maxime vicina Cretae, & a Cretenfibus frequenter oppugnata, ut quodammodo apparet ex excerptis Valesianis Diodori Siculi p. 338. opulenta eadem, aurifodinis commendata olim, ut animadversiones nostrae pluribus ubertim evincunt: hinc vetusta adagia *Ζίφνι & ἀρραβων*, & *Ζίφνια ποτήρια*, quod ex auro scilicet potabant, etsi alii ad gulam Siphniorum referunt. Sed scrinia mea nunc non compilabo. Faistorum vi. 680. *in plaustro scirpea lata fuit.* Diversas lectiones codicum in Notis congeffi, legendum tamen, *in plaustro sirpea strata fuit*, quod suo loco pluribus illustramus. Faistorum ii. 572. monui jam non probari mihi *anum annosam* dici, *Et vinosam* proinde illic inculcabam, nunc *anus pannosa* magis mihi arridet: anum enim pauperculam describit, qualis illa, *pannucea Baucis*. Egestas juxta ebrietas senectutis comites, hinc illud Comicis & aliis scriptoribus familiare, *annis pannisque obsitus*. Epistola Deianirae loco vexatissimo ex scripturae discrepantiis jam exhibitis castigo,

Scilicet immanes elisis faucibus anguis

Infantem nodis involuisse manum.

nudis pro nodis exaratum erat, hinc tot monstra lectionum prognata. De *nodis* serpentium nos illic copiosè. De Petroniano fragmento alias agemus, mihi enim alibi occupato vix semel hactenus id properata lectione delibatum est, pleraque frigere mihi visa sunt, & ad nativum illum orationis Petronianiae nitorem nequaquam adfurgere. Ita semibarbara, solaecca complura, sunt tamen & nonnulla ex reconditis scriniis ultimae antiquitatis deprompta, quae ab homine nostrorum temporum semiliterato confingi vix potuerunt. *Schefferus* noster omnia illic genuina, sed admodum depravata opinatur. *Octavius Falconerius* Roma perscribit, sibi aliisque hominibus in urbe aeterna eruditis supposititium videri foetum. Cui accedemus? Tuum iudicium mihi quidem perplacet, dum videamus, quid *Schefferus* in causam suam publice sit dicturus. Videtur enim obervationes in id scriptum meditari. Quae tu illic animadvertisti, & in integrum restituiisti oppido feliciter, pro iis plurimum me debere tibi agnosco. Habebis & aliquando, quae mihi hîc illic castiganda sese obtulerunt. De castigatione mea loci Maroniani illius, *in spatio addebant* sententiam tuam non dissimulasses vellem, tum & conjectura ad illud Silii xiv. 654.

non clarior illo

Gloria picturae seculo, non aeris, avitam

Qua scires Ephyren, fulvo certaret ut auro.

susplicabar aliquando scriptum fuisse, *fulvo, consertare an auro*, pro *consertaque ab auro vestis*, unde *certaret ut* prognatum esset. Sed nunc placet nil mutari. Syracusae Corinthiorum colonia, ut alias monebam. Corinthus non ab aeris solummodo signis affabre factis commendata, sed picturae etiam mater & inventrix habita, ut apud Plinium in Naturali historia apparet, artem utramque Syracusanis Silius hîc, ut vides, cum Corinthiis communem facit. Tu vide an meliora comminisci possis, atque interim vale. Holmiae ciccioCLXIV. xvi. Aug.

EPI-

EPISTOLA CCCXCVII.

J. F. R. GRONOVIIUS

*Nic. Heinsio.**Holmiam.*

DE frigusculo inter *Gelotianum* & *Probinum* accipe paucis. Simul intellexit tantum priscarum & literatarum pellium advectum, vivere veneno invidiae homo, & se vertere in omnes formas. Apud *Probinum* contemnere totum hoc genus: aliquando me coram aspernabatur ipsum conferre: nunquam per sese, semper conducta opera aut per amanuenses id facere: denique si sit, qui digitum tollat, quamvis vili, quicquid haberet, & tantum non nummo sestertio addicturum, sive ut satis philosophus videretur, sive ut gaudia nostra refrigeraret, seu denique stultissima spe, posse istum imbibere sensus, quos hic simulabat, & abjicere, quod ipse per se aut per alium colligeret. Apud *Gazaenum* longe aliter; hunc seducere, severe monere quasi nescientem, thesaurum agi inaeestimabilem: ne pateretur sibi fucum fieri, neu velut scruta, velut frivola, condonaret homini peregrino, propediem in vervecum patriam ituro. Ille contra, quicquid esset, *Proбини* esse, nihil in eo sibi juris. Alter ridere quasi mimum, non dubitare, quin illius aere forent paratae, ne vano captus nomine benevolentiae aut grati animi (esse abunde aliarum copiarum, unde utrique satisfacere posset) rebus tanti pretii tamque raris sese & Batavos fraudaret, posse eos consociare hujusmodi opes & instituere MSS. tabularium, quod, dum viverent, haberent commune; decedentes novo in his terris exemplo, & ingenti cum gloria publico relinquerent. Sic terque quaterque tentatus *Gazaenus*, quum maneret in eo, quod semel dixerat, *Gelasimus* aggressus est fratrem, videret; illos de compacto agere, ut quod haud dubie ipsorum pecunia (erant autem fratres ercto nondum cito) & magna & pretiosum ipsum emptum esset, hic alienigena auferret. Postquam hoc quoque parum processit, nec nisi ad frigida murmura valuit (etenim mox homo sordidus turpissimam suscepit litem, dum biennio major fratrem perpetuum pupillum destinat habere, neque aut tutelae suae aut patrimonii compotem reddere, quae controversia consiliis maxime *Proбини* justos & optatos eventus sortita est) apud ipsos Proceres, & quosdam e curia Hollandiae ingentem *Probino* invidiam conflavit: quae simul cum discessu ejus in insulam propinquam erupit: sed paullo post tamen evanuit. Eo autem hoc aegrius ferunt uterque, quod speraverant, te absente, nemine cum alio se conjunctius victuros: ὁ καλὸς καὶ γὰρ ὁς etiam, quod scis, ubi nunc est, a plerisque vehementer hominis mores improbari, ipse illorum ignarus semper repugnauerat, atque existimationem ejus defendebat. Quid apud Britones effecerit, quid ad Sequanam, omnino ignoro. Non nemo, qui forte eodem comitatu partem itineris fecerat, retulit mihi e famu-

Tom. III.

Qq q

lo

lo audisse, portare librum offerendum τῷ μέδοντι. Cujus liberalitatem (quam vel unico illo epigrammate meruisti) etiamnum invideri tibi, doleo & indignor. Scilicet hanc legem curant, qui omnes, quoties opportunum est, ambitioni donent. Quae ex sanctiore promissu eruditionis tuae aerario, me quidem capiunt omnia: neque est quicquam, quod sine probabili conjectura & ratione dicatur. Livius noster ad finem properat: mensem tamen facile unum alterumve eximet. Accepit mantissam haudquaquam spernendam ex Gudianis, partim excerptis, partim membranis. Jamque exspectatur a Principe Paderbornensi: quod aegre ferre non potest ¹ Janiculi cultrix, quippe quae ad se profecto, atque etiam arcessito, nullum, ne verborum quidem, honorem habuit. Interim rursus ad urbanae frontis praemium descendit. Scis patrum ² τῶν Κυκεωνίων, solum ex tanta familia pestilenti fidere abreptum, Quintiliani opera, *Bigoto* potissimum instigante suscepta, destituisse. De Institutionibus neque consulunt me, neque ego, nisi quod vivo pauculas conjecturas dedi, me immisceo. Sed declamationes avi misere periissent, nisi ultro manum admovissem. Persuaserat sibi *Aerodii* editionem Pithoeanae praestare: & hoc etiam typographo inculcarat, qui secure post mortem hominis eam dederat operis exprimendam. At Pithoeana & auctior est, & multis partibus e veteribus scriptis emendatior: ne dicam *Aerodium* sibi jus fecisse totos versus, non solum vocabula, inferendi ad sententiam complendam. Sed quibus nunc vulgo Pithoeanis utimur, ea tot scatent operarum culpis, ut aegre nomen tanti viri sustineant, & in contrarium quinquies aut sexies integras periodos, quae in *Thaddaei Ugoleti* editione legebantur, & sine dubio auctoris sunt, dissimulent. Inter hanc Scyllam & Charybdin ut medium tenerent, frustra docebam homines imperitos: ipsum me oportuit ire viam: hoc est, ex tribus illis exemplaribus parare unum, mea manu interlitum, cui subjiciuntur *Aerodii*, *Pithoei*, meae notae: habeo enim satis multas, jam ex quo M. Senecam recensui. Ita rursus in pistrinum conjectus fui. In Petronii fragmento facile concessero esse quaedam Petronii antehac ἀνέκδοτα: totum contextum multum laborabit amicus noster, si germanum esse evincere velit. Verba illa, *cum multis pultarium obduxi*, sollicitari non debebant. Aucupatus est eam quoque raram vocem, quae Cornelii Celsi est lib. II. cap. XI. *caliculus quoque aut pultarius oris compressioris*. Et Plinii lib. VII. cap. LIII. *calidam potionem in pultario poposcit*. In principio: *Venerat jam tertius dies, id est, expectatio liberae coenae*. Videtur voluisse, *libertorum*, aut *libertinae coenae*. Statim: *evitaremus procellam, unus servus Agamemnonis*. Puto, *procellam, Manius servus Agamemnonis*. Fuit id quandoque antiquis servile nomen. *Et circulis ludentem accedere*. Forte, *circulos ludentium*. Tum, *Et quid jam principium coenae videtis? Et jam non loquebatur*. Lego, *Ecquid jam p. c. v. Etiamnum loquebatur Menelaus*. Post aliqua: *Nondum mihi suave erat in triclinium absens more vobis venire, sed ne diutius absentivus essem, voluptatem mihi negavi*. Censeo illa, *absens more vobis*, superscripta fuisse τῷ absentivus: inde non suo loco in con-

¹ Christina Regina.

² Corn. Schrevelium, auctorem multorum Scriptorum, cum notis variorum editorum.

contextum relata, sive in veteri libro sic fuit, sivi docti hominis conjectura erat, ut legeretur: *Nondum mihi suave erat in triclinium venire, sed ne diutius absens morae vobis essem, voluptatem mihi negavi.* Illud etiam videbatur juvari posse: *Sed quomodo dicunt, ego nihil scio, sed audiui, quomodo incuboni pileum rapuisset, & thesaurum invenit: si reponeremus: Sed, quomodo dicunt (ego nihil scio, sed audiui) cum Euclioni pileum rapuisset, & thesaurum invenit,* id est avaro domino libertatem extorsisset. Sed de his viderit ὁ πάλιν Schefferus, cui materiam ingenii exercendi praereptum ire nolo, & jam scribendo fessus sum. Versiculi, quos vides, cujusdam sunt auditoris mei Amstelaedamensis, qui quam spem faciat de se, agnoscis. *Gudium & Sciaffium* adhuc exspectamus. Tuas Hamburgi eos reperisse opinor: fuerunt enim illic, & jam inde discessere. Vale ac salve plurimum, decus meum, una cum optimo *Scheffero*. Lugduni VII. Id. Novemb. CIOIOCLXIV.

EPISTOLA CCCXCVIII.

J. F R. G R O N O V I U S

*Nic. Heinsio.**Holmiam.*

Nunc certe tu in culpa es, quam si expiare voles, potes cum aliquo modo meo. Est Bremae Vicariatus, ut vocant, ad Altare SS. Trinitatis, & B. Caeciliae, cujus fructus adjumentum studiorum olim mihi concessit Archiepiscopus, susceptor meus, *Johannes Fredericus*, Dux Holsatiae, cui pater meus ad viginti annos a consiliis fuit. Scis, opinor, quum post pacem Monasteriensem illa bona dividerentur in bene meritos de republica, Sereniss. Reginam me ultro jussisse petere, quemcumque vellem opimum Canonicatum; meque respondisse, satis mihi fore, si, quod haberem, non eriperetur. Illa tum pristinum jus meum non modo auctoritate sua confirmavit, sed idem in filium quoque majorem meum post mortem meam in dies vitae ejus contulit. Ejus codicilli manu sigilloque regio muniti exemptum fide publica confirmatum proxime ad te mittam, si forte opus sit. Jam nuntiatur mihi Brema, *Guthmuthum Specium*, regium Secretarium, sibi eandem donationem a Rege factam ferre, & per *Scherium* quendam indictum colonis, ne posthac procuratori meo solverent. Et vix nuntiatum erat, quum superveniunt literae istius *Scherii* satis inverecondae, quarum exemplum his inclusi. Puto virum illum, quippe illustri loco positum, tibi notum esse. Si vis eleganter facere, hoc est, & bonae causae & amicitiae servire, explora, quaeso, ex ipso, num quid ita se res habeat: mone, quam indignum sit me justissima possessione pelli, regia diplomata pro nihilo putari, praesertim ab eo, qui auctor illorum esse soleat: doce rem illam tanti non esse (neque enim centum reficiuntur floreni annui) ut ob eam vir

tantae dignitatis, & communibus studiis praeditus, in hominem studiosum, & de plurimis nobilissimisque ex juventute Suedica egregie meritum & merentem, faevire velit: si opus putabis, etiam allega; & credo invenisse te aliquos nomini nostro benevolos. Quod si auctoritas tua non valuit, ut aliunde regiae liberalitatis particeps fierem, valebit utique, ut hanc stipem mihi retinere liceat. Eoque enixius te operam mihi navaturum spero, & ne pigrescere, te vehementer etiam atque etiam obsecro. Vale, decus & praesidium meum. Lugduni a. d. VII. Non. Mart. CIOIOCLXV.

EPISTOLA CCCXCIX.

J. FR. GRONOVIIUS

Nic. Heinsio.

Holmiam.

Accepisti, opinor, meas, quibus tibi commendavi raudusculum *Pauperis & tuguri congestum cespitem culmen* quod mihi superest in agro Chaucorum. Postea locutus sum cum *Appelbomio*: ei visus tutissimus consiliorum portus recta ire ad Regem, atque obtinere aditum per *Berenclavium* & *Erenstenium*: eam esse unicam rationem, fundandae in perpetuum rei, & omnium impetum non hujus modo, sed & quorumcumque in posterum declinandi. Parui salubria monenti, & libellum supplicem literasque ei commisi, quibus ille se suae suffragationis pondus adjecturum promisit. Quod si ergo nondum interpellavisti hominem, videbis, numquid etiamnum opus sit. Nam si fecisti jam, nihil peccatum censeo tamen: sive enim durum invenisti, huc eundum erat: sive justum, non tam adversus illum, quam alios infidiatores, quicquid impetraro, mihi proderit. Apud *Berenclavium*, *Erenstenium*, *Figrelium* si quid poteris, opportunum erit. Item si quid resciveris, ut literae exceptae sint in utramvis partem, per te cognoscere melli erit. Claudianum tuum ab Elzevirio accepi, & grates ingentes ago; sed per fidem, etsi fateri pudeat, inspicere nondum licuit: ita diripior. Quintilianum absolvit Hackius, cujus exemplar propediem Elzevirio committam, ut ad te curetur. ¹ τὸν Τηύσιον obiisse scis: & exspectas fore, ut mihi bibliotheca credatur. Exspectabam & ego, sed monitus, nisi prensarem, alio delatum iri, circumivi sane, ambigua spe dimissus. Ajunt & ² Μάγερρον hiare, & qui jamdudum amico nostro Vindicias Ebraicas minatur, quas credo una cum Caro τοῦ δέινου apparituras, & nescio quos alios. Certe ³ ὁ Πρίσιος mihi confessus est se facturum, nisi ego facerem. nam quia iste habuit, se quoque & quemvis verum esse. Quid de aliis titulis facturi sint defuncti, ignoro, nec me immisceo, loco meo contentus. Bonus noster ⁴ Κερατίας nuper incidit in valetudinem mentis, adeo

ut

¹ Ant. Thyssum.² Joh. Cocceium.³ Alb. Rufius.⁴ Georg. Hornius.

ut per aliquot dies custodiendus fuerit: sed jam restitutus est. Vale τοῦ μὲν μέ-
λημα, & me ama. Lugduni a.d. xiv. Cal. April. cīcīcclxv.

EPISTOLA CCCC.

NIC. HEINSIUS

J. Fr. Gronovio.

Leidam.

NE mirare, Vir Clarissime, si mea interpellant avocantque officia, qui pu-
blicae tranquillitati insidiantur. Ex quo a male feriatis Britannis terrâ
marique turbari intempestive coeptum est, nuncius a me Musis & Apollini,
quibus operabar nonnumquam ante, confestim mittendus fuit: adeo seriis oc-
cupationibus totum me dedi, dum illi fide subleſtâ hunc quoque Septentrio-
nem in partes suas pellicere contendunt, nec omnino frustra. Interim dum
alius ex patriâ adventurus huc speratur, qui sistat ac coërceat infrenem gentis
efferatae libidinem, meae mihi spartae invigilandum esse intelligo, ne quid
detrimenti aut incommodi per supinitatem meam capiat res publica. Quo ae-
quius est, abs te ignosci ac veniam dari nobis, si mutuae necessitudinis legem
sacrosanctam minus religiose observamus duro ac molesto hoc tempore, rerum
privatarum negligentes, dum publicis toti curis vocamus. Duabus abs te epi-
stolis non ita nuper ditatus, responsione Laconica defungar, auguratus mox
adfutura oportuniora confabulationis tempora. De injuria insigni, quam po-
steriores tuae instituunt, querelam eam invitus equidem & indignabundus acce-
pi. Vellem solummodum paucis diebus temporius epistola fuisset mihi tradita,
ut ante ferias Paschales tuis commodis studere licuisset, nunc rusticatum abie-
re ex civitate procerum plerique, aberuntque, ni fallor, in Eidus usque Apri-
les. Quaesivi tamen, si quis *Speeckium* istum haberet compertum, qui me
latuit ac praeterivit haecenus cum ignotissimis ignotus. Quos percunctatus sum,
illi hominem se novisse pernegarunt, omnem exemisset scrupulum *Figrelus*,
quem die hesterno sciscitandum super re eam proposueram mihi; nisi ille ad
convivium quoddam in villam suburbanam Cancellarii tum fuisset evocatus.
Vide interim, ne is, quem tu hominem esse pretii quantivis opinaris, nebulo
sit magnus. Novi complures, qui Regi ab actis & epistolis se venditant, ut
hujus farinae ingens est in hac aula numerus: nec gloriari ausim, omnes id ge-
nus mortales hîc terrarum mihi cognitos atque exploratos esse. Suspisor ta-
men apud Stadanos in Bremensi provinciâ oportere quaeri, quem in hac aula
investigamus. Ea de re certiora proxime significabo. Tu interim diploma
regium describendum, ejusque apographum ad me mittendum cura: ne tela
non sint in promptu, dum ego rei indignitatem, injuriamque fortunis tuis insigni-
ter factam, ab hoc sycophantâ apud proceres Suecicos invidiosa narratione per-
curro. Historiam de frigusculo inter *Gelotianum* & *Probinum* legi ac relegi mal-

tâ animi contentione, & patricias artes in homine privatae vitae hætenus addicto sum miratus: quamquam, ut, quod res est, dicam, antiquum mihi visus est obtinere, in similibus jam olim a me deprehensus non semel. Livium tuum impatienter nimis exspectamus, quem jam luce publicâ donatum oportet, si quid postremis Elzevirii bibliopolae litteris credendum. Eundem mecum *Schef-ferus* avidissimus exspectat, cujus Arrianum Mauricumque, ac de dogmate Pythagorico libellum autumnno proxime elapso ad vos misi: nunc demum intelligo navem illam, cui fasciculus tum fuit concreditus, non hybernasse tantum in Daniâ, sed Lubecam propediem cogitare, cum Amstelodamum esset destinata, ne in piratas incidat Britannos. Valde me percellit hic nuncius, cum facile hinc colligam, tarde admodum copiam munusculi istius esse tibi faciendam. Haeret penes me ejusdem amici nostri de Stylo commentarius editionis tertiae, quem nuper admodum munus ad te volebat perferri; nunc, ni fallor, in fragmento Petronii edendo occupatus. Claudianum meum ad te jampridem perlatum esse confido, etsi tu nihil omnino de hac re in tuis. Invitus deprehendo mendas complures huic operi irrepsisse: quibus tu clementer ignoscas aequum est. Sub finem libri nonnihil inculcatum est praeter rem ex nescio quo schedio. In Elegiâ de Phoenice perperam, *praeminet iste locus*, pro *eminet* conjiciebam. Vidi enim postea *τὸ εἰναι* cum quarto casu etiam a Manilio conjungi. Cl. *Brunnerus*, qui Graecae litteras publice apud Upsalenses profitetur, in Attico vocabulario Thomae Magistri edendo totus est, cui Mocrin Atticistam hætenus ineditum subjunget, ut alias monuisse me recordor, & excerpta nonnulla ex Orionis Thebani etymologico, quae ex schedis Vaticanis descripta *Oëavius Falconerius* Roma ad me miserat, sed monet *Bigotius* integrum Orionis etymologicon, duobus voluminibus magnae molis comprehensum, a *Gudio* in Italia repertum venalem, atque inde ad Belgas foederatos auctum esse. Verusne sit is rumor, per te doceri cupio. Nam ab ipso *Gudio* tale quid nequicquam exspectem, quem ejurasse litteraria commercia haud nescis. Janiculi cultricem nobis hac aestate adfuturam speraveramus; sed cum ex aula Gallica huc perscriptum sit, illam nescio quid rerum novarum in religionis negotio hîc esse machinaturam, aut saltem Pontifici fidem de hoc conatu obstrinxisse, nescio an prudenter sit factura, si huc excurrat, quamquam tale quid abs se promissum cogitatumve ipsa pernegat. Quintilianum tuum aeque ac Livium avidus & impatiens gestio videre. Ad Petronii fragmentum quae observasti, mirifice placuerunt. *Petri Francii* versus laudibus meis datos, politos sane & rotundos praedicarem pro merito, nisi nimius is esset in meis praeconiis. Tibi interim, mi Gronovi, maximam felicitatem gratulor, cui inter tot ingentia in rem litterariam merita laus provenit uberrima ex compluribus discipulis eruditionis fama praestantibus, in quibus post te longum superfis, saeculumque nostrum, quamvis ingratum, demerere. Barthianos in Statium commentarios vidi, sed vidi tantum: infeliciter locum illum sub finem epicedii in Glauciam conjectura superflua tentavit, *insontes animas nec portitor arcet, Nec dirae comes ille ferae*. Ad Silii enim librum XIII. vers. 845. de Othro seu Orthro, bicipiti cane Ge-

Geryonis, haec intelligenda monui, qui Cerberum fratrem apud inferos comitari credebatur, ab Hercule una cum Domino interfectus. Nam & in Silio ex Coloniensibus membranis castigandum, *illatrat jejunis faucibus Orithrus*. Ubi plura ex Graecis scriptoribus ad rem. Vale vir summe, & mihi favere perge. ciōcclxv. a. d. xi. Kal. April. Holmiae Suec. Paucissimis verbis te convenire propositum mihi erat; cum interim in molem maximam excrevit epistola.

EPISTOLA CCCCI.
NIC. HEINSIUS

J. Fr. Gronovio.

Leidam.

GUdmuthus ille *Spaackius*, quem frustra aliquamdiu quaesivimus inter deos majorum gentium, quique Regium sese Secretarium venditabat tibi, collegio rerum maritimarum (Admiralitatem vocant) in hac civitate est ab actis & epistolis. Rem omnem, ut augurabor fore, *Figrelius* me perdocuit: miratus ille impudentiam in homine, quem caetera minime malum aut improbum contendit esse. Quapropter opinatur procuratorem ejus *Scherium* negotium omne fervidius paullo urfisse. *Spaackium* obtinuisse quidem jus tibi ac filio tuo succedendi, ubi in vivis esse desieritis, quod frequenter hîc fieri consuevit: vivos ac videntes possessione dejectos nolle, contra quam *Scherius* rem est aggressus. Et hoc quidem suspicatur ille, pollicitus mihi operam in hoc negotio suam, ubi proceres post res prolatas denuo sunt conventuri in aulam, quod propediem fiet. Tu interim mitte ocus regium diploma, quo nobis opus esse etiam *Figrelius* arbitratur; apographum diplomatis suffecerit, sed cui aut ab *Appelbomio*, aut a notario sive tabellione publico auctoritas accedat. Pluribus tecum agebam proxime. Tu vale, Vir eximie, & rem feliciter gere. Exarabam Holmiae Suecorum. ciōcclxv. a. d. viii. April. Gregoriani.

EPISTOLA CCCCII.
NIC. HEINSIUS

J. Fr. Gronovio.

Leidam.

Proxime significabam habitos a me sermones cum *Figrelio*, quem *Grypenbelmum* nunc vocant, super negotio, quod tibi faceffitur a tenebrione quodam male feriato. Postea & *Chrestenium* super re eadem conveni, qui & operam suam nobis non defuturam spondebat, & libellum a te supplicem accepisse testabatur Regi offerendum. Caeterum absentibus ab aulâ procerum plerisque,

ac

ac rebus prolaeis, expediri te hinc haud posse: quapropter oportunius expectandum esse tempus. Evenit autem commodum, ut spe nostra citius magnus regni hujus Cancellarius nudius quintus rure in hanc civitatem recurreret, valetudini curandae intentus, quod in praetorio suburbano minus sibi licuisse ob continuas amicorum interpellationes ac frequentes convivas querebatur. Illi negotium istud fervide satis hesterno die a me commendatum est. Respondit benigniter admodum pro caetera comitate sua, ac luculento erga universum litterarum nomen, curaturum, ne tibi negotium exhibeatur a *Spaackio*, aut *Spaackii* similibus: quod facinus invitus ex libello tuo supplice cognoverit, sed dolere praeter hoc, non esse rem majoris momenti, de qua gratificaturus sit tibi. Addebat nonnulla in laudem eruditionis tuae, commendabat merita in nationem Suecicam privatim, cupereque liberos suos, quos post annum alterumque studiorum causâ in Bataviam esset missurus, disciplinae tuae traditos. Haec & plura ille: quae dubitare nos non sinunt, rem ex sententia tibi cessuram esse. *Figrelium* nobis non male hîc consuluisse opinor, quo est candore. Nam reliqui illi, ad quos confugiendum esse *Apelbomius*, vir satis officiosus, rebatur, cum fastidio quodam curant litteras, & cum frigore, quibus tamen fortunam omnem referunt acceptam. Visi praeterea jam non semel foederatis Belgis haud quaquam favere; quod inter nos sit dictum: ut recte ordineque sis facturus in posterum, si remissis ambagibus ipsi Cancellario per litteras te sistas, quotiescunque auctoritate regia adversus istiusmodi harpyias tibi erit opus. Ego interim urgere negotium non cessabo, dum in tuto navigemus. Claudianum mecum ad te pervenisse satis est, quid enim evolvas, unde nihil a te proficiatur? *Thysium* e vivis excessisse nescirem, nisi tu nunciaffes. Accipio enim litteras rem privatam spectantes ab amicis e Batavia oppido infrequentes. Quibus a me hîc ignosci eo aequius est, quod primae necessitudinis consanguinei nihilo illis diligentiores in hoc officio mihi se praestant. Bibliothecam ni credunt tuae custodiae Curatores academici, pessime de republica merebuntur. Vellem adesset nunc vobis *Beuningius*, cui commendari negotium istud a me posset: quamquam virtutes tuae commendationis amplissimae locum obtinere debent. Vale, Vir summe, & me, quod facis, ama. Holmiae Suecorum Nonis Aprilibus. Anno MDCLXV.

E P I S T O L A CCCCIII.
N I C. H E I N S I U S

J. Fr. Gronovio.

Leidam.

Cum illustrissimus atque excellentissimus Dom. *Gustavus Bonde*, Regni Suecici aerario praefectus, & regis tutor, par liberorum suorum ad te nunc mittat, ut studio bonarum artium, & tui nominis celebritate excitati adolescentes hi nobilissimi, disciplinae praestantium eruditione virorum se tradant, quos Aca-

de

demia vestra complures habet quidem, sed tamen haud quemquam, qui laude meritissima doctrinae ac rerum usu tibi sit componendus; rogo obsecroque te pro jure diuturnae necessitudinis, quae inter nos fuit haecenus, ut splendidissimo prognati loco adolescentes re ipsa intelligant, commendationem meam nonnullo apud te fuisse loco. Praestabis autem abunde, quicquid abs te officiorum hîc promitto mihi, si ad te ventitantes consilio & hortatu omni impleas, talesque abs te dimittas, quales pater illustrissimus cum rege & Republica, ad quam sunt nati, videre reduces exoptant. Ita aliquando est futurum, ut tibi maximam partem referant acceptos honores illos, quibus olim laudabiliter ac digne capeffendis jam nunc destinantur, conspirante omnium suffragio. Haec ut prolixius a te contendam facit cum indoles ipsa adolescentum, nil non praeclari spirans, tum insignia parentis in me merita, qui prudentia & auctoritate per universum Regni senatum prorsus nemine est inferior; quemque hac opera sic nunc demereri potes, ut nunquam magis. Vale, vir summe, & me in tuis porro habe. Exarabam Holmiae Suecorum. A. CXCICLXV. a. d. XVII. Julii.

EPISTOLA CCCCIV.

J. F R. G R O N O V I U S

*Nic. Heinsio.**Holmiam.*

Bibliothecam tamen mihi crediderunt. De aliis titulis hominis quid faciant, susque deque: neque enim ego πολυπράγμων, & illi, si quisquam, ἰδιογνώμους, ut commendari ab aliquo nostrum poene sit praerogativa repulsae, ut sic dicam. Caeterum id carum quaecumque depositum dum recenseo, dum per Cocceji valetudinem Hesychio Hackiano, atque etiam Sallustio (ita nobis exedundum est, quod illi varie valentes, capigrenum & pantherinum genus, intriverunt) oculos commodo, dum Livio supremam manum impono, dum privatas scholas, ut commode ante ferias absolvam, multiplico, diutius in aere tuo fui. Interim multum debeo tibi pro ternis jucundissimis tuis: nam & sollicitudinem tuam in negotiolo meo testabantur, & ex honestis procerum judiciis boni eventus laeticiam praecepi. Nunc iterum tibi onus injungendum habeo, ut illustrissimis illustribusque illis viris, quorum propitias in me voluntates deprehendisti, in primis Dn. Figrelîo & Dn. Erensteinio, per occasionem meo nomine exquisitissimas grates agas, meque hujus beneficii memoriam omnibus officiis tum in nobilissimam universam gentem, tum erga eos, qui contulerunt, prosecuturum polliceare. Idque eo majorem in modum peto, quod intelligo, quantum eis ponderis adjectura sit & persona tua ac dignitas, & delenifica facundia, & ille, quem in paucis experior, fidus & sincerus amor mei. Cl. Bruneri coeptis mire faveo. Sed quod penes Gudium vetus Lexicon est, non est ejus, cui gentilis ac civis filias.

Tom. III.

Rrr

Hanc

*Hanc non foemineum jugulo dare pectus aperto,
 Illam demisso per fortia vulnera telo
 Pro populo cecidisse suo,*

Canit vates, a quo tu civicam; verum Photii. Cl. Schefferi, cujus munera exspecto cupide, mentio me revocavit ad illud fragmentum *ψευδώνυμον*. Ubi de Fortunata & Trimalcione: *Ad summam, quemvis ex istis babaecalis in rutae folium conjiciet.* Hic crucem figere lectoribus voluit Praetor ab Illyriis. Sed vide, ne se perdiderit. Nam *babaecalos* istos unde hausit, nisi ex Arnobio Salmasiano lib. iv. pag. 141. *ut babaecali adolescentes solent, salax deus*: nam vulgo *bacchari* legitur, & *Heraldus* adversus nescio quem, qui *vagari* substituerit, tuetur. *Salmasius* autem id videtur finxisse ex apicibus codicis Regii: ac valde vellem, exposuisset nobis, qui essent *babaeculi*. Potest videri a *βάβαξ*, *φλυαρός*: sed quid hoc ad libidinem? An igitur a *βιβάζω*, de admissariis equis: ut sint libidinosi, instar admissariorum adhinnientes. At quemadmodum haec significatio convenit sententiae hujus, si diis placet, Petronii? Dein, quid est *in rutae folium conjicere*. quo & *παράκατιών* delectatur: *nisi dominum tuum in rutae folium non conjecit*: ubi forte voluit, *meus conjecerit*. Numquid alludit ad Syracusanum *πεταλισμὸν*, de quo Diodorus Siculus lib. xi. cap. lxxxvii. sed ibi est *πέταλον ἰλαίας*. Numquid igitur ut toties barbaros, & soloecos, & fabulam veterem conturbantes (ut in Diomedem & Ganymedem fratres, & Ajacem insanire desiderio Iphigeniae facit convivas suos) ita hunc voluit, dum eruditionem ostentat, imperitiam confiteri? ut *in rutae* (*oleae* voluit dicere) *folium conjici* sit *ἐκπεταλισθῆναι* vel *ἐξοσεγκισθῆναι*. At sine persona ineptit etiam de Habinna: *oneratusque aliquot coronis & unguento per frontem in oculos fluente, praetorio se loco posuit*. Quia legerat apud Plutarchum de consulari loco in lectis, putavit etiam bene dici *praetorium*. Cur non & *aedilicium* & *tribunicium* & *quaestorium*? Non longe a prioribus, quae tentavimus, verbis: *Nam mihi nihil novi potest afferri, sicut iste fericulusta mel habuit praxim.* Legendum: *offerri, sicut iste ferculus, tamen habuit gratiam.* Nisi homo passim palam *κακόζηλος* scripsit *graxim*. Meministi in Asinariae prologo aliquando lectum, *cave ne graxis, pro gratiis.* *Ferculus*, ut *caelus*, *candelabrus*, *malus fatus*, *balneus*. Nunc accipe, quam mihi cogitationem fecerit ista quaesita barbaries. Ad illa veri Petronii verba: *Contubernalis mea fastum mihi facit: ita, si me amas, male dic illam verbis, ut habeat pudorem*: hic ille legerat apud Gonsalium: *Servile hocce*, prorsus verbum & inurbanum vilique mancipii ingenio adprime conveniens, qui personarum mores mire a Petronio servati. Hoc ille, ut Thracius rusticus apud Gellium putationem vitium accipiens, putavit se pro germano Petronio facillime probaturum, si libertinorum dialogos barbarismis & soloecismis inquinaret. At nugatur Gonsalius: sunt enim ista purissimae Latinitatis: nec usquam Petronius servos fugitivos & scorta, quantumvis insana dicerent, legem aut morem loquendi migrare passus est. Quemadmodum Comici frigida quidem & plebeja & incompta, atque etiam nonnunquam fordida, vilibus tribuunt togatis & palliatis personis, at non male Latina vel Graeca. Quem-

ad-

admodum in Bucolicis est quaedam simplicitas rustica, quae & verbis & sententiis proditur: nec Graeci tamen nec Latini suos opiliones & caprarios tam stulte ac palam βαρβαρίζειν jusserunt. *Clamat itaque primus, cum pataracina poposcisset. Puto amaracina. Et mundum frigus habuimus*, suave est, sed Martiali furto subductum lib. 3. ep. 58. *At tu sub urbe possides famem mundam. Stamina duxi & plane matus sum.* Haud dubie madidus: forte & geminatas, nisi potius heminarias i. e. non sextantes, non trientes, non quincunces, sed sex cyathorum potiones. Non potuit enim praeterire ullum rarius vocabulum, quin colligeret, & nunc nimium doctis, nunc nimium barbaris libertis daret. *Baliscus fullo est. balneus*, ut apparet. *Tamen bene elatus est, vitali lecto.* Credo, vittato lecto. Id est, coronis strato. *Puto illum reliquisse solida centum, & omnia in nummis habuit.* Aut rursus voluit σολοικίζειν suum Seleucum, aut nos conjicere, *solidum centies.* Illud in nummis habuit emendicatum a Cicerone lib. VIII. ad Att. ep. x. *se quod in nummis haberet, nescire quo loci esset.* ¹ *Gelos*, homo mirus, post reditum ex peregrinatione immutatus prorsus & alius videtur. Bene rursus de literis sentire, nomen Grammatici non vile putare, venditare διορθώσεις, requirere nomina & indices omnium pusillorum librorum, quos te confectari olim criminabatur. Visebat ad me nuper cum splendido comitatu nobilis & perelegans adolescens Lutetia: is ex eo audisse ajebat, Phaedrum esse penes se MS. non versibus, sed fabulis, sed paginis multis auctiorem: id supplementum, missum a se ad *Tanaquillum*, in via periisse. Hoc tu cave Scheffero nostro dixeris. Crederet enim, quod tu & ego non facimus. Sed charta deficit, non animus tecum garriendi. Quintilianum & duos Livios, quorum scilicet alterum Scheffero tradas, Elzevirio dedi ad te curandos. Vale, pectus amicitiae, & cum privatam, tum in primis publicam rem hoc difficili tempore bene gere. Idibus Quintil. CIOICLXV.

I Gudius.

EPISTOLA CCCC.V.

NIC. HEINSIUS

J. Fr. Gronovio.

Leidam.

Livium & Quintilianum tuos tandem aliquando post longam expectationem accepi. Horum alteruter cum sat superque muneris per se esset, tu utrumque ad me simul pervenire voluisti, insigni plane munificentia. Seposui & hunc & illum mihi sub proximas ferias perlegendos, imo conterendos, sunt enim ejus notae tua omnia, ut satis evolvi non possint. Vellem equidem non nihil nunc & meis frivolis reponi, si quid esset in promptu. Poëmata prope diem videbis, quae morantur libelli duo adoptivi variorum carminum ab

Rrr 2

ami-

amicis meis mihi inscriptorum. Hos enim & addi bibliopola cupit, ut in molenti nonnullam liber excreseat, & sic ut fiat viri ex praestantioribus quidam sunt auctores. Agmen illic ducunt dux *Montozerius* & *Briennaeus* comes. Nam de *Furstenbergio* vix exploratum habeo, an & sua illic legi, quae ad me dedit aliquando, aequo laturus sit animo. Diu est quod super illa resciscitatus sum *Rottendorphium*, qui cum nil respondeat, vix est ut quicquam ausim tentare *Furstenbergio* nolente, aut de consensu ejus parum certus ac securus. Quae in Maronem, Flaccum Valerium, Silium Italicum tantum non parata habebam; etiamnum premo, quod difficultati horum temporum a me datur, quibus nec publicae res, nec privatae fatis sint in tuto. Affulgebunt mox, spero, pacatio-ra. Interim Salustium tuum, quem jam prodisse audio, mirum in modum gestio videre, ut absentem erudire pergas, quando ab absentis ore pendere haud concedetur. Elegiam, cum in Galliis esses, ni fallor, ad me ante annos complures dedisti & epigramma. Utrumque adoptivis insertum cupio. Quare si quid in iis mutasti aut mutaturus es, Elzevirio quaeso permitte, quod de suis versibus *Hugenius*, *Vlitius*, *Wallius* jam fecere. Urget enim editionem libri bibliopola, quem ante Februarias Kalendas juris publici faciendum spondet, nisi mora a nobis objicitur. Hic igitur quaeso gratificare mihi, tum si quid novi in litteris meditaris, communica. Habes hic a *Scheffero*, cujus varios libellos non unâ occasione ad te misi, nec scio tamen si quid horum haecenus ad te sit perlatum. Phaedri fabellas & Pacati Panegyricum editione secunda molitur. Sed de his ipse, ut opinor, ubertim ad te. Vale, vir summe & amicissime. Nosque, si meremur, in oculis ferre perge. A *Gudio*, *Graevio*, *Vlitio*, tota denique amicorum cohorte, diu est quod nec litteras nec nuntios accipio. Nam *Vossius* nil praeter solitum facit. Iterum vale. Exarabam Holmiae Suecorum CIOIOCLXV. a. d. XXIII. Decembr. Gregor. Habes hic non-nihil nugarum mearum, quod rogatus ab amicis Parisiensibus effudi.

E P I S T O L A C C C C V I .

J. F R. G R O N O V I U S

Nic. Heinsio.

Holmiam.

Vellem, aut satageres minus, aut plus profligares. Hoc tempus igne spectat qui amant tuam meamque nutricem: & ad obrussam vix quisquam. Unus amicus certus in re incerta cernitur, qui benignus in vos, me sibi privatim nihil debere voluit. Itaque jam & amare fastosum possum, quamvis derelictus. Expungat nos, quantum volet, dummodo sic laudi serviat. In hujus gratiam, si non bonos, at fatis bonos, aut certe non malos fore puto, in quibus laboras. Et is, ut opinor, & certe, qui supra nos negotium curat, nescere vult virtutem duris, non extinguere. Quare ne concidamus animis. Sex-
tus

tus eousque mari felix, ut se Neptuni filium diceret, ac caeruleum paludamentum fumeret, constantia tamen bis fugati, bis naufragi Octaviani periit. Nam ille alter, qui pro pedo sumsit hastam, & deglupto suo pecore nunc brevem rabiem in alieno satiat, plus habet quam meretur gloriae, quod unum ex Selectis Trajectensibus terrore exanimavit. De versiculis, equidem omnes aboleri mallet: & cum ad bonos emendandos tam pigre veniatis vos disertissimi vatum, quibus vix unus & alter limandus locus, quid eos oportet, qui scribunt Musis & Apolline nullo? praesertim si paullo plus habeant sensus, quam ut ineptos tolerant; minus autem facultatis, quam ut recte tornatos reddant. Tamen quia imperas, sic illum accipe,

*Tu melior, tam rara quies & vivida virtus
Ad laudem pleno quem jubet ire gradu.*

Tum istum,

Et facilem raperes artis ad omne decus.

Sed & hunc talem:

*Me, cum seducto tibi venit Apolline carmen
Ab Nasone suo quale Corinna tulit.
Aut Nemesis cupidam quod rure avertit ad urbem,
Detinuitve oculos, Cynthia pulcra, tuos.*

Malim etiam, *Atque impar quamvis. Item. Et numeros virtus implet. Denique:*

*Mitte tuas curas, sola haec medicina veterni,
Rursus & agnoscet se prior ille vigor.*

Haec si placent, utere. Quod de historia cogitas, probo vehementer, & *σπεύδοντα ἢ αὐτὸν ὀρεύνω*. Quamquam omnis propemodum doctrinae & scripturae liberalis sterile seculum fortiti simus; tamen hac ipsa nihil desolatus: & tu unus, qui eo munere nos ornare potes. Euge igitur, nec cessa, utique ubi Maronem, Flaccum, Silium restitueris: & jam nunc consilium formare te velim, unde incipias, quantum complectare, patrias res, an & Europae, immo & per omnem orbem cognitum, tradere malis. Atque utinam domum revocatum, instrumenti publici copia facta, commodis ita tractarent Patres, ut huic uni curae vacare posses. Quae a Cl. Scheffero tu, & ipse in suis per nobiles quosdam adolescentes allatis, promittis, jamdudum exspecto: & minus tarditatem miror, cum ille noster in magno emporio (solus qui ἢ ἐνθάδ' αὖ, non tamen naso) tam fuerit negligens, ut quos ego Livios mea manu inscriptos Cadomi & Salmurii legi putabam, eos nuper Hamburgi oberrare, & dominum quaerere acceperim. In Sallustium nihil ausus sum: sed filius meus, qui in gratiam Hackii postrema operarum specimina relegit, ex opusculis meis excerpta, & de marginibus quaedam descripta nostra in Variarum veterem illam congeriem addidit. Hesychianum opus exigit Coccejus: & cum parum vacat, ad me veniunt. Certum habeo, si minus esset difficilis, tibi, qui reticet, egregiam accessionem fore: sed in hoc quoque coisse videntur nostra amborum

Rrr 3

fata,

¹ Hae emendationes sunt elegiae Gronovianae, quae legitur in Heinsii Adoptivorum carminum lib. I. pag. 35.

fata, neutros ut agnoscant proximi, nec quam praestamus pietatem reddant. Ego nunc paullulum interjungo, etsi est qui Diatriben, ille ipse qui Observationes. Sed horreo stabulum Augiae, nonnunquam tamen sic quasi limis. Et vide quid mihi nuper in mentem venerit. Scis in Soteriis Rutilii:

*Non labente Numa timuit sic curia felix,
Pompejo nec celsus eques, nec foemina Bruto.*

Non possum probare curiam illam felicem. Felicior ego, si bene conjeci:

Non labente Numa tenuit sic curia fletus.

Inspice superiora & arbitrare. Ante omnia vale, & rempublicam privatamque bene gere. Lugduno a. d. IIII. Id. Decemb. CIOICLXV.

I Credo temporis notam non recte aut hîc, aut in superiori epistola expressam, nam idibus Decembribus non potuit respondere Gronovius ad priorem, datam XXI. Decembris, nisi Heinsius suas Novembri mense dederit.

EPISTOLA CCCCVII.

NIC. HEINSIUS

J. Fr. Gronovio.

Leidam.

Diu est quod litterarum nonnihil abs te exspecto. Quae cunctatio tua ut permolesta accidit mihi, sic gaudeo tamen, me, quando aliis artibus te sperare non possum, diligentia saltem & affectu victorem evasisse. Nam quod occupationes tu silentio praetendas, nunquam effeceris, ut te magis negotiosum credam, quam sim ego: nec scripsissem sane nunc, nisi & poematum meorum exemplar allatum tibi vellem, & quas hîc vides, ad te curandas mihi credidisset noster Schefferus: haeserant illae aliquamdiu penes me, dum praestoler tuas. De Statio bis terve nuper tecum egi, & pluribus fortasse, quam par erat: *de luce una* retro referente Protefilaum, puto rem ipsam me tetigisse. De Admeto, ut, quod res est, dicam, necdum mihi satisfacio. Alcestin Admeti loco reponebam ad Nasonis Fastos: illa enim ab Hercule ad superos reducta. Sed *lux una* illi reductae haud respondet. Admetus vicaria uxoris morte jam morti vicinus, sed necdum mortuus, aut ad infernos delatus, liberatur a praesentissimo periculo. Ut nec in illam ista satis quadrent. Vide igitur num exciderit versus unus atque alter, quomodo & paulo ante postilla, *gavisaeque vovit Quae lamenta tulit. pro vovit, ego fovit*, hoc est aluit, nutritivum hortando vel laudando. Sic *fletus immodicos corde fovere* Abascantii pietate. Apud Lucanum pari modo scribendum censeo de Cornelia, *fovitque sui solatia casus*, non, *volvitque*, libro VII. vers. 659. cum MScriptis pluribus exstet *vovitque*, quod & Vossii unum praestantissimum occupavit, vel *novitque*. lib. X. vers. 500. *cladem fovere Noti*. Ausonius Parentalibus carmine 5. *Dicebas sed te solatia longa fovere.*

vere. Illud *seynes vias gravatus* nondum displicet, & *vias gravatas* minus probo, quia *graves arenae* paulo post sequuntur, quod tantumdem est. Tu vale, & feliciter rem gere. Holmiae Suecorum CIOIOCLXVI. a. d. xvii. Martii manu praepropera.

EPISTOLA CCCCVIII.

J. FR. GRONOVIIUS

*Nic. Heinsio.**Holmiam.*

Quod jamdudum desiderasti, mittitur tandem ad te lectu Ordinum, qui caerimoniis domui tuae praesit. Neque ipse modo, si quid vellem, sed & omne venerabile collegium hujus urbis, ut eum tibi de meliore nota commendarem, multis verbis mecum egerunt. Virum invenies, ut testati sunt mihi, pium & probum & religionum interpretandarum satis peritum, tum ad ea, quae ποιμένα λαῶν, μάλλον δὲ ἔ̃ περισίε̃ λαοῦ, videre, accurare, festinare oportet, summe promptum atque industrium: aliarum rerum, quae extra id officium sunt, nec callidum nec πολυπραγμονοῦντα. Tuum nunc est operam dare, ut apud coetum vestrum ob honorem, quem illi tribues, in merita dignatione sit, nec eum tantum iter pietatis colendae causa fecisse poeniteat, utque libenter te mutuis officiis prosequatur, nec Borean Arctonque in isto contubernio sentiat, denique non illic modo, sed & hîc laudi tuae serviat. Id te rogant omnes vehementer, & non minus ad suam, quam ad tuam existimationem pertinere judicant: tuque cur ita judicent: facile intelligis. Ad literas tuas alia via otiosior respondebo. Nunc accipies & Salustium, quando ita voluisti, etsi in eo me vix agnosces. Vale, vir summe, & rem publicam privatamque bene gere. Lugduni a. d. vi. Non. Maj. CIOIOCLXVI.

EPISTOLA CCCCIX.

J. FR. GRONOVIIUS

*Nic. Heinsio.**Holmiam.*

Statim & olim credebam tibi, Patrone beneficentissime, tua nominatione inter dignos congiario regio mentionem mei factam. Nunc ¹ *Aedituus* ipse id

¹ *Joh. Capellanus* intelligi puto: nam illa verba, quae mox in hac epistola referuntur, legi in epistola Capellani ad Heinsium viii. Aprilis hoc anno data, qua & Heinsio indicat, se per

id confirmat mihi, teque in magna apud me gratia ponit, & assidua admonitione tua potissimum se incensum & captasse eam, & oblatam rapuisse occasionem confitetur. Equidem tanti faciebam testimonium & iudicium tuum, ut eo contentus esse, ac fortunae jus donorum suorum aequo animo relinquere possem. Quod autem & contendisti vehementer honoris mei causa, & indignitates, frustrationes, repulsas pertulisti, nec nisi perfecta re conquiesci, id prorsus est sanctissimorum morum tuorum, & insignis cujusdam erga me benevolentiae. Omnino ambiguum fecisti, tibi plus an illis, quos expugnasti, deberem. Itaque stabit hujus quoque facti apud memorem gratia, & agnosco paratissimo animo ingentem cumulum tuis erga me meritis accessisse. A² *Venatore* non est, quod in posterum literas expectes. Ille enim uxoris impatiens, postquam non secubuissent modo aliquandiu, sed & semigrassent, domo, suppellectile, bibliotheca, creditoribus & hastae subjectis, non hoc tantum dolore, sed tum quoque ζήλοτυπία ipse suum cor edens, in conducto obiit, vix, qui funus prosequerentur, inventis. *Vossius* de Nili & aliorum fluviorum incrementis Regi, appendicem de Lucis natura *Capelano* dicavit. Is negat te causam habere, cur excursum in has partes desideres, & melius tibi consulere Patres, qui non indulgent; fore enim si apparueris, ut hospitio publicitus excipere munere dominae. Non video quid haereas in illo: *Virtus sopita admonitu parvo resurgit, & implet numeros suos, ut ante.* De *Delrio* bene mones: sed quae est illa Solini editio? mihi non est nisi Stephanica, in qua nihil tale reperio. Sallustium misi tibi per eum, qui rem divinam domi tuae facturum est. Rogarunt me nostri Κήρυκες, ut hominem diligenter insinuarem tibi probum & piū, & disciplinae, quam proficetur, bene gnarum asseverant, alia exigere te non debere. Quin & excusant ultro, inconsultis ipsis ordinatum, si adhibiti forent, alium validiorem externis, magisque ad aulam factum circumspicuros fuisse, talem tamen orant ut toleres, foveasque etiam existimationis tuae causa. Ο' Αρτυρς fuit meus φοιτητής, frugem facturum, si maturescet: ut nunc etiam est, frenis indigere videtur: itaque vereor, ut expectationem tuam sit impleturus. De *Diatribis* post illa vix cogitavi, adeo huc illuc diversus trahor: sum tamen in speculis, si quid otiosi, eoque grata sunt, quae subiecisti, nec *Parmensis* codicis, sed nec Solini *Delriani*, & *Epitomarum* MS. usum fastidio. Mitte, ubi via dabitur. Epigramma de bis fulminato magnificum & ingenio tuo dignissimum vidi libenter, multisque admirantibus recitavi. *Palmerius Grentemenius* Exercitationes suas in optimos quosque veterum Graecorum doctissimas per *Bigotium* mihi volenti commisit edendas, & jam operas exercent. Vale, decus & praesidium meum, & me ama. Lugduni a. d. xii. Cal. Junias Gr. cicioclxvi.

Has

per Colbertum impetrasse a Rege viris doctis, *Gronovio*, *Reinesio*, *Conringio*, & *Ferrario*, liberalitatem insignem, qua illi octingentis imperialibus donati fuere. *Heinsio* eadem pecuniae summa data, quam ille, quia in Sueciae regno Oratorem agebat, ex legibus patriae accipere non poterat, Vid. supr. Epist. cccxc. & seqq.

² *Jano Vlitio* puto, qui Venationem novantiquam edidit.

Has obſignabam, cum mihi reddita eſt gratulatio tua, cui caput ex literis *Aeditui* adjeceras. Quid illi homines, oro te, de me exiſtimant? aut quis iſtic locorum mihi frigidam ſuffundit. Mirabar in ipſius ad me epiſtola tam anxie commendari gratiarum actiones. Non minorem in iſta curam video. Et opinor quidem haecenus me ſatiſfeciffe: jam enim reſponſum habeo ad illas *εὐχαριστίας* ſatis humanum. Sed potin' mihi commentarium facere in illa verba: *quoy qu'il ne m'en euſt pas donné grande occaſion, & que des ſçavans de voſtre connoiſſance trouvaſſent eſtrange, que vous vous eſchaufiez ſi fort en ſa faveur.* Si de alio haec ſcriberentur, & magni alicujus eum peccati reum, & graves habere obtrectatores crederem. Ipſe nec iſtius mihi conſcius ſum, nec hoc meruiſſe me cenſeo. Iterum vale.

Nondum manum de tabula. Venit enim in mentem ſcribi aliquid oportere, cujus exemplum, ſi tibi videtur, ad *Aedituum* mittas. Hoc igitur habe. Narro tibi, Heinſi Ampliſſime, tandem me quoque reſpexiſſe R. C. liberalitatem, non quidem cupidum optantemque (neque enim improbis votis indulgere ſoleo) ſed tamen gratam animo proprie, & quidem tanto gratiorem, quanto minus exſpectatam: ſic enim & danti honeſtior eſt & accipienti. Nam quod tardius, fatum eſt meum ſero agnoſci, hoc in omni praemio (neque ullum niſi labore ac virtute, ſi hoc adjici pateris, quaeritum habeo) jamdudum experior. Quare vivat Ludovicus Adeodatus, unicum hoc tempore toto terrarum orbe magni regis exemplum, in quo & ſpes & ratio ſtudiorum ſolo eſt. Vivat, & Majeſtati ejus placeat *Colbertus*, qui tam glorioſa conſilia ſuggerit, & eam aerario copiam praeſtat. Vivat & canat aeternum *Capelanus*, qui Magno Miniſtro me tradidit. Vivas tu quoque & floreas, juxta canore Heinſi, qui *Capelanum* mihi benevolum reddidiſti. Nam (ne ignores candorem & civilitatem viri ſummi) cum totum commendationis beneficium ad ſeſe vindicare potuiſſet, te admittit in partem, ultro confeſſus, inter alias, quae ſe moverint, cauſas aſſiduam interpellationem fuiſſe tuam. Cacterum is honor meis

Molem immenſam humeris & vix tractabile pondus

Impoſuit.

Nam qui conſtitueram poſthac abſtinere ſcribendo, aut ſaltem interjungere aliquamdiu, tanquam rude donatus, video novo auctoramento me retractum in hunc ludum, nec quieſcere poſſe, priuſquam publice grates egerim. Ea cura nunc me coquit, & verſat ſub pectore fixa. Tu, cui coepiſti, me commendare perge &c.

EPISTOLA CCCCIV.

NIC. HEINSIUS.

J. Fr. Gronovio.

Leidam.

INDIGNABAR, fateor, & aegerrime ferebam a congiario regio te excludi, nec in partem admitti meritissimi honoris, non quod fortunis tuis multum incrementi inde accessurum censerem, sed quod cum ignominia quadam ac certissimo pudore regis maximi conjunctum videbatur, te fraudari ea munificentia, quam alii tuis virtutibus haud quaquam pares toto jam triennio essent experti. Nunc securum rei totius me reddidit industria optimi *Capellani*, omnemque exemit huic pectori ac deterfit penitus molestiam, etsi serius id multo quam fieri oportuisset. Esse in urbe principe Galliarum, qui minus tibi velint, jam dudum est, quod agnovi, quanquam nec auctores indignissimi facinoris compertos habeo, nec causas fatis excogitare possum. Interim optime, ni fallor, consules tibi, si & cum *Capellano* nostro, & cum aliis viris illic terrarum aut eruditione aut dignitate praestantibus, quos hoc ambire ac ultro velle deprehendes, literarium commercium instaures minus frigide, quam haecenus est factum: operumque tuorum, si quae in posterum proditura sunt, copiam iis facias. *Venatoris* excessum permolestie tuli. etsi ille ex quo barbaram antiquitatem venerari coepit, me ac mea quodammodo neglexit atque insuper habuit. Certe vellem paulo meliora fata ante diem extremum esset expertus. Meus in patriam excursus, ne quid detrimenti rebus meis ferat pulcre, ut spero, providebitur: eum urgeo praesertim, ut aut stipendio majore doner a patribus, aut si difficiliores mihi hîc erunt, alios mihi circumspiciam heros; ac simul plorare illam in perpetuum jubeam cum suis, quae me indignis modis lufit haecenus atque exagitavit. De stipendio augendo dudum spes est facta, & quidem per Senatusconsultum scripto consignatum; nec tamen quicquam promoveo, cum, quia absentium ratio vix solet haberi, nec adest vobis, qui res meas multo ardore fovebat, *Beuningius*, tum quia Ampliss. *Isbrandius*, qui, quo est in me animo, hanc rem utpote aequissimam praecipuae curae sibi fore, simulatque domum rediisset, erat pollicitus, hîc terrarum longius expectato detinetur. Is testis oculatus abunde exploratum habet, quam caro constet vivendi ratio in hac civitate, idque non levi suo cum damno. Accedit nunc cumulus haud exiguus huic incommodo bellum Britannicum, per quod fit, ut pretia mercis transmarinae in immensum excrescant, interpellantibus commercium omne piratis Britannis. Ne tamen omnino molestum sit hoc exilium faciunt, tum is, quem designabam modo, *Isbrandius*, vir comis & literis probe instructus; tum orator Gallicus *Dandillaeus Pomponius*, elegantissimi eruditissimique homo ingenii, quem in hoc suburbio vicinum habeo. Is *Fulquetus*
tuo

tuo unice aliquando carus, & ejus ob noxiam in aula Gallicana parum gratiofus, nunc denuo pro meritis haberi coepit: hunc mihi *Montozorius* & *Capellanus* plurimum commendarunt. Prudentio manum nuper admovebam, promissi reus apud praefulem Paterbonium, qui postulavit hunc laborem sibi dare, idque iteratis jampridem precibus, paucorum dierum otio est opus, ut reliqua detexam, quae in libris adversus Symmachum praecipuam partem occupantur, ubi membranae vetustiores me deficiunt. Si quid hîc potes juva. Reginam nostram, quae Virgilium publico a me dari cupit, rogavi, ut codices bibliothecae suae Maronianos a me excutiendos huc ferat Roma secum: venturam enim sese jampridem minatur. Quod senatus regni minime fieri velit. Quid totius rei sit, & an allatura codices, quos desidero, propediem videbimus. Ego certe scriptorem tantum non sine cura castigandum mihi proposui. Interim poemata jam mea, nisi fallor, prodierunt: quorum exemplar ab Elzevirio accepisse debuisti. Inspicies librum aliqua cum venia, me absente, & tempore maxime alieno, juris publici factumi. ¹ Alastor illic pro meritis habetur. Voluissem limam huic poematio admove. Quod in posterioribus, quorum initium, *Age literarum dic facete dictator* utcumque a me est praestitum; in prioribus vix licuit, quod occupationes publicae alio me vocabant. Eo majori cum venia abs te legenda sunt, si tanti facies id carmen, in quod oculos conjicies. Plantinianam Solini editionem innuebam, non Stephanianam. Nec quidquam *Stephanus* praeter solitum fecit, si tollenda inde curavit pro superfluis, quae paginas complures occupabant. Theologus ille non male, puto, apud me erit. Si *Boekhorstio* negotium concreditum curae fuisset, uti debebat, alium haberemus. Sed is cum toto quadriennio mandata publica & meas adhortationes esset frustratus, tandem opera *Isbrandiana* apud patres foederati Belgii hac in re sum usus, qui Batavis meis id beneficium debere maluissem. Ajunt hunc nostrum satis facundum esse. Id si sic habet, applausum facile & approbationem omnium ac meam facile consequetur: nam alter ille, quem *Gherii* fratres alunt, vir quidem bonus est, sed orator minime vehemens. *Schefferi* Upsaliam antiquam proxime ad te misi, quem ab Elzevirio librum accipies. *Palmerii Grantemenilii* illa, quorum meministi, quaeque *Bigotius* jam apud me laudavit, videbo libentissimus: *Phaedrus Schefferi* necdum typis describi coeptus est. Velim scire ecquid in vivis etiamnum sit *Fereri*, ejus rei sciscitatore habeo assiduum *Henricum Moucheronium*. Plura, quae his addam, nunc non occurrunt. Vale, vir summe, & me, ut solebas, ama. Holmiae Succor. CIOIOCLXVI. a. d. IX. Kal. Quintil. Gregor.

¹ *Selmasius*. Vid. lib. II. Silvar. pag. 165.

EPISTOLA CCCCXI.

NIC. HEINSIUS

J. Fr. Gronovio.

Leidam.

Sallustium, munus ab te jucundissimum, tulit ad me theologus ille noster: quem jam verba publice facientem audivimus non sine plausu. Mores viri ad vitam aulicam magis compositos optaremus. Sed & sic, docilem modo se praestet, poterit nobis probari. Et vivit jam sub disciplina illustrissimi *Isbrandii*, apud quem puto proficiet nonnihil. In eloquio & doctrina hominis nihil desideramus. Sallustium perlecturus sum brevi una cum tuo Livio. Quamquam Livium jam fere totum evolvi. Sed opus est iterata cura, ut hîc mihimet ipsi plene satisfaciam. Interim poemata nostra tibi exhibita jam esse opinor, de quibus judicium tuum non sine acri censura expeto. Apud Prudentium libro primo adversus Symmachum quid sibi velit, *communes de matre Dii*? ubi agit de Dioscuris, an *communes* quod ex meretricibus ac prostibulis prognati? Emendatione locum aggrediuntur *Barthius* & alii: sed non persuadent. *Reinssius* me monet apud Nasonem Met. vii. vers. 291. legendum esse, *capit hoc ab Aetide munus*, ut Αἰτῆς dicatur pro Αἴτῆς, resolvendo diphthongum in duas vocales. Tu vide, quaeso, an id liceat, & exemplum suggere, si potes. *Schefferus* noster Phaedrum editionis secundae praelo commisit. Miratur nullas se tanto tempore abs te accepisse. Tu vale, virorum doctissime, & solens me ama. Exarabam praepropere Holmiae Suecorum CIOIOCLXVI. ad XIIX. Quintil. Gregor.

EPISTOLA CCCCXII.

J. FR. GRONOVIIUS

Nic. Heinsio.

Amstelodamum.

Rurfus ergo decoxi tibi? certe tardum & impeditum nomen fui, non feci copiam mei, latitavi vel post columnam. Quid faciam? tot circum undique; in his, qui nihil numerarunt, tamen ferunt expensum, instant, flagitant, poscunt de praesentibus. Ego autem, ut homines infirmi atque obnoxii solent, rem perdere malle, quam miserum pudorem: & tamen hîc quoque postea laeditur: nam postquam negare non sustinui, quibus nihil debeo, ad reliqua non respondeo. At tu, oro, da mihi & hanc veniam, atque ignosce, quemadmodum soles: posthac frugi sat scio me fore, si culpam emendare permi-

miseris. Nec tamen feriatus tibi complicatis manibus fedi. Nam praeter illa legitima, diatribas publicas & privatas, senatulos, puteal Libonis (affedi enim) officia, cum aliquamdiu inter orsa Statiana, & Noctes Atticas A. Gellii, & Senecas meos, huc divisus & huc fuisssem, & in singulis non parum operae temporisque posuisssem, chartasque aliquammultas nugarum implesssem, repente rebus relictis unus me Tacitus addixit sibi. Id factum intemperie istius, qui Cajum Aleandri merere noluit, ut vultum tuum subiret. Coeperant hîc locare miscellum famen (si me pateris cum Martiano loqui) an misellum, ¹ *Franciscus Rufus* conducere, cum duo ² *Danieles* (& alteri, cum forte demulcendum haberem ob rem urgentem, vivo etiam tum affine ejus, id receperam) ita institerunt, ut manum darem. Habebis igitur, si tibi mihiue Dii favent, Tacitum cum *Lipsii* integris, *Merceri*, *Gruteri*, *Salinerii*, *Freinsheimii*, *Pichenae*, *Grotii*, fere integris, aliorum excerptis, & si quas mihi residuas fecerunt, notis. Sed quoties inter haec ego, Bovi clitellas? Nam praeclari artifices centonum suendorum ut magni imperatores fortuito cibo, obvio poculo, sic illi, ut quaeque fors obtulerat, omnibus contenti, nullo delectu, labore minimo defungebantur. At homini neque omnino naris obesae, nec mentis male sanae, isto cum stomacho & fastidio, ubique occurrunt *Plura quidem tollenda relinquendis*: & cum post arrosos saepe ungues tandem acquievi, ac satis curate fideliterque rem gessisse videor, quantum feci, poenitet. Sed intrivimus, exedundum est: praela sistere metuunt. *Jac.* quoque *Palmerii* Grenthemenilii Exercitationes, opus doctum, sed ne popularibus quidem, nedum Germaniae superioris officinis admissum, quia omne in Graecorum optimis restituendis & illustrandis occupatur, hîc inveni, cui obtruderem, ita tamen, ut postremam spectationem suscipere me oportuerit. Nec desinit *Rufus* eadem fini Helychii sui (bis destituti, primum morte *Schrevelii*, postea morbo *Cocceji*, etiam postquam is convaluit) unumquodque folium missitare. Ita subegerunt me ingratisissimi mortaliū, & gratis imperant laborem, quem multo leviozem minusque utilem magna mercede alioquin emere solent: postquam facilitatem meam & studium in fovendis juvandisque omnibus, quae literis profutura sunt, deprehenderunt. Ad Prudentium me vocabas in postremis tuis, hem, hic est, qui primus impetum meum ad respondendum tardavit. Dum jam pridem non inspectum cupio replicare non in tuam tantum gratiam, & de die in diem ad id mihi otium frustra promitto, menses abierunt. Ad Symmachum tandem curriculo quasi transii, dum quaero *Communes de matre dei*, nec reperio, sed *Corrupti de matre nothi*, & *Cognatos de Marte deos*. Invenio autem ad marginem ver. LXIV.

Capta quibus volucrem virguncula ferret amorem,
me maluisse olim, *amantem*. Ver. CLX.

In-

¹ *Franciscus Hackius* Bibliopola.

² *Daniel Elzevirius* & *Daniel Gaesbeeckius*. eadem; quae *Heinsio*, fere scribit *Octavio Ferrario*, in epistola edita inter *Ferrarii*, parte III. pag. 104. *Gronovius*.

*Indomitum intendens animum semperque paratum
Ad facinus.*

Non sufficere videbatur *animus*, quia saepe paratus miles arma non habet: itaque cogitabam, *nervum*, quem mox *ramum* vocat. Versu CXLIII.

*Mox Ariadnaeus stellis coelestibus ignis
Additur, hoc pretium noctis persolvit honore
Liber.*

Naso tuus, opinor, dixisset, *hunc*, pretium noctis, persolvit honorem. An & Prudentius, tu videbis. Versu CLIX.

*Inde puellarum ludibria, pignora, partus,
Et furtivus amor juvenum, & deprensa jugalis
Corruptela tori.*

F. raptus alleveram, & *defensa*: omnia enim ista *defensa* & velata sunt nomini-
bus deorum. Ver. CXCV.

Talis & antiquum servavit terror asylum

Conjeceram *sacravit*, & propemodum etiam *torpor*. Ver. CCXXVII.

*Illic Alcides, spoliatis Gadibus, hospes
Arcadiae, fulvo aere riget.*

Potesne concoquere *Arcadiae* positum pro Euandro jam in Latio regnante, ut *Hac Tyron*, *hac profugos*, an mavis *Arcadii*? *Aetis* dicere non ausim: sed, *capit hoc ab Aetide munus*, jam olim notaram ex codice Menardi, & probaram: non enim insolens Graecis diphthongum in media voce ante vocalem aut diphthongum aliam corripere. Sic Aristophanes in Pluto:

Εγὼ τοσαῦτα δυνατός εἰμι εἰς ὧν ποιεῖν.

Sic Homero *Δρυάντος υἱὸς Λυκίεγγυ*, Theocrito *ᾄειδε τοιαῦτα*. Quod imitatum Ovidium non audacius putabam, quam dixit *Dyspari Priamide*. Si vidisti *Passionem Perpetuae* & *Felicitatis*, scis, unde suppositor ille fragmenti *Petroniani* acceperit, *liberam coenam*. nam, ut homo *Italus*, exemplar de illis, quae typis facta supprimebat *Holstenius*, facile habere potuit, habuitque. Restat, ut poemata tua quantopere permulserint me, demeruerintque, referam. Tu vero, quae vel in theatro vel in auditorio honorificentissima & studiosissima potest *ἐπισημασία* dari, ea me usum interpretare: nam quicquid dixerō, minus erit, nec, quid de illis sentiam, satis unquam eloquar. Ita quicquid moliris, omnibus numeris perfectum est, & virtutes veneresque pectoris instructi & aetherio spiritu calentis possides universas. Vivet hoc opus, neque in eo est quicquam, quod aetatem non ferat, nisi forte qua me quoque immortalitati admovisti. Ea vereor, ne, ut aries aureus *Hellen*, prodat *Pegasus* tuus. Vale, decus praesidiumque meum, & feliciter age. Lugduni a. d. pr. Id. Febr. CIOIOCLXVII.

Solinum Plantini unde mihi? si non sunt nimis multa, posses ex tuo exemplari describi jubere.

EPISTOLA CCCCXIII.

J. F. GRONOVIIUS

*Nic. Heinsio.**Hagam.*

Valde amo te de *Octavii Falconerii* V. Cl. musteo libello, quem mecum in primis communicare dignatus es. Et doctae ejus conjecturae, quantum ex properata lectione decernere possum, facile subscribo: nam *Persea* & *Danaen*, *Telephum* atque *Augen* cogitare cum alia, tum aetas maris figurâ vetat. Sed & jucundum est & pium sanctissimorum initiorum nostrorum umbras & simulacra penes τὰς ἐξω agnoscere. Ego praedicto die & hora, sexta scilicet matutina, in lintrem me conjeci, ubi desideratum te mutasse consilium putavi: adeo non exspectabam tibi jus esse fidem meam appellandi. Vin' signi quid amplius? Dum absentis *Volbergii* commodum ab hora XI. usque ad mediam secundam opperior, confectis ubique prandiis gancas & popinas frustra circumii, & vix tandem magna mercede reperi, qui recalfaceret focum, & viscus nobis semicrudum, ut *Velitris Marti*, apponeret. Ad *Graevium* quas mandaveras, statim misi. Nuper a recitatione publica regressus in veste longa obvium auspicato habui illustrem *Slingelandum*: qui statim ut me salutarat (ego enim ablatus aestu dictorum & exterritus etiamnum parum utebar oculis, & poene haud agnitum praeterieram) de novo vicino sibi gratulabatur. Vale, & me ama. Lugduno a. d. III. Cal. Maj. CIOIOCLXVII.

EPISTOLA CCCCXIV.

J. F. R. GRONOVIIUS

*Nic. Heinsio.**Hagam.*

Hominem te lepidum & festivum! quia semel ineptire me vidisti, putas idem quotidie posse facere. Atqui nosse debebas ingenium meum, & me ab istis fragilis gloriolae choragiis alienum quam qui maxime, neque unquam huc (descendere enim me puto, cum illuc escendo) nisi instaret Διομήδης ὁ ἀνάγκη. Scis etiam moris non esse, & difficulter exemplum novum introduci, nec quicquam me posse tale conari, nisi tot approbantibus. Apud quos si verbum ea de re faciam, exspecto, ut amici nostri (illi ipsi, quos tu atque ego diutissime coluimus) interrogent: num Criticus est? num literam occidere scit? num collegium in I. & F. habere vult? hac enim adventicia plerumque

I Credo notari *Justinum* & *Florum*.

que amoris & honoris causa excipior. Quemadmodum autem effugero, ne raudusculum quaerere, aeruscare, stipem petere, ut *μυτραγύτης*, videar dicarque? praesertim tam recenti exemplo ejus, qui ducentos praesentes, quadringentos annuos, jussu, ut prae se fert, Panegyrico meruit? Taceo alia multa, quae me deterrent. Quare te oro, obliviscere hoc, & pro non scripto habe, & ne dicas cuiquam hoc tibi in mentem venisse, sed sine me latendo & quiescendo vitare derisum & ciconias a tergo pincentes. *Laur. Megalottus & Paullus Falconerius* me dignati sunt alloquio pleno humanitatis, elegantiae, eruditionis. Transire tum putabam τὴν μέγαν, & hos esse de cohorte: sed interrogare non audebam, ne invitarer ad faciendum officium, qui illo sermone uti dedidicerim, neque ullum habeam, quo tam delicatas aures permulceam. Si naenia est parata *Golio*, hem tempus est. *Fabricio* pro me satisfecere *Francium* nostrum jussi. Si tibi curandi occasio est, curabis; sin, ad me redeat face. Vale, meum decus, & noli me apud gentem omnium subtilissimi sensus & nasi traducere. Lugduni a. d. xiv. Cal. Januar. cicioclxvii. 1.

I Ad hasce & quasdam sequentes desunt Heinsii epistolae, quibus respondet, unde clarior lux appareret. Sed agere Gronovium puto de Allocutione ad Cosmum, magnum Etruriae principem, cum Academiam Leidensem visicaret, facta publice a. d. iv. Idus Januar. CIOICLXVIII.

EPISTOLA CCCCXV.

J. FR. GRONOVIIUS

Nic, Heinsio.

Flagam.

Bene habet: lusimus aliquid, & ἐπεὶ πτερόεντα literis revinximus: sed tuo periculo, qui me hoc posse hominibus persuasisti, & me credere iussisti. Audietur nonnihil de honore loci; pauca, sed nervose, de Italia & Florentia; multum de gente Medicea, sed ita, ut res gestas persequar, nomina nulla interponam; plurimum de ipso & de hoc consilio peregrinandi; tum vota & bona omnia, quae tamen omnia intra dimidium horae facile possint pronuntiarī. Sed heus tu doctor meus, quam longe aberras? Cosmo Franciscum scribis ex Blanca Capella sublatum. At Cosmus ex Petri Toletani regno Neapolitano praefecti filia quatuor filios sustulit, in his Franciscum & Ferdinandum, Blanca Capella primum fuit Francisci delicata, & tum, ni fallor, ex eo peperit. Postea Franciscus duxit Austriacam Ferdinandi filiam, Maximiliani Caesarum sororem, quod scire potes ex P. Victorii praefatione comm. in τὰ πολιτικὰ Aristotelis. Et hinc provenisse censeo Mariam. Ea mortua publice collocantibus Venetis duxit Blancam iusto matrimonio, sed ex ea nihil procreavit, quae causa mortis utrique fuit. Hoc tamen ex misso stemmate dici

dici Mariam Francisci fuisse filiam, quam ego Ferdinandi putabam. Nunc non in praesentem usum, sed animi gratia cuperem scire, quemadmodum Cosmus I. Magnus dux descendat a Laurentio Cosmi P. P. fratre? nam Cosmi Petrus & Johannes filii fuerunt: Petri Laurentius & Julianus: Laurentii Petrus, Johannes, (qui Leo X.) Julianus, qui pater Julii, hoc est, Clementis VII. Petri Laurentius dux Urbini, pater Catharinae Henrico II. Christianissimo nuptae, & Alexandri Ducis, in quo Cosmi stirps defecit. At inter Laurentium Joh. filium Cosmi P. P. fratrem, & Johannem Cosmi M. D. Patrem neminem novi. Sed de his, ubi bene vacaveris. Vale, meum decus & praesidium. Lugduno a. d. pr. Cal. Januar. quas toto pectore tibi opto auspiciatissimas.

EPISTOLA CCCCXVI.

J. F. R. GRONOVIIUS

*Nic. Heinsio.**Hagam.*

A. d. xiiii. Calendas Febr. quum tuae mihi redderentur, nihil jam poterat cum *Calcaneo* agi. Mos enim solennis illi pomeridianum agitare Dolae, non quae iram Borbonii sustinuit, sed ubi facta est pugna porcorum. Postridie igitur bene mane, & quae ad ipsum erant data & excerpta ex iis, quae ad te, quatenus ad illum pertinebant, ad hominem misi, & ille se, quod opus sit, curaturum respondit. Habet auctores suos, quibus utatur, licet. Plurimum praestitero, si attendero, ne quid fiat inepte nimis. Nam fatigari quis velit, & operam navare homini, qui pro triennii assiduo & quotidiano labore sex scilicet assignat exemplaria? Tu vero mone communes amicos, ut impudentem & arrogantem paedagogum istum norint & fastidiant, nisi ab eo velint epistolis missitandis occidi. *Ευφημία* illa nostra sub praelo est, & cum hac hebdomade, quamquam moratores, finem promittunt. Dein dies abibunt, dum glutinantur exemplaria. Etiam scire me oportet, quot velis tibi mitti, nam & circa ipsum aliqui, opinor, erunt promerendi. Sed unde fiducia tibi, futurum ut ea causa sit unctiusculum olus? nam vexatio transierit: sed infumere praeterea & nescire, an id sumptum exerceat suum, durum est. Praefationem aliam nullam adjunxi: nam ad ipsum, id esset nimis profiteri, quid expectes; ad Curatores, de ipso desperare. Homines vulgo, quoties nego adhuc factum quicquam, derideri se putant, & me scilicet egregii mortalem altique silentii. Placetne addi tria carmina? Mihi fere, tibi si minus, fac me moneas. Vale & laetare, quicquid erit. Lugduni a. d. viii. Cal. Febr. CIOIOLXVIII.

EPISTOLA CCCCXVII.

J. FR. GRONOVIIUS

*Nic. Heinsio.**Hagam.*

Scisti, qua cogere posses, quamquam munere isto oderim te odio Vaticano. Vix mihi satisfacio paratissimus. Nunc ad omnia flagitiose imparatus sum. Itaque ludibrium debebo, & habebunt, quod semper rideant. Fac tamen sciam quamprimum, quod nomen & ipsius & patris, quae aetas, num qui fratres aut sorores. Quando venturum putes, & sed interrogandi finis non est. Vellem disceres omnia, quae ego debeo. Vale.

EPISTOLA CCCCXVIII.

J. FR. GRONOVIIUS

*Nic. Heinsio.**Hagam.*

Mitto tibi sex exemplaria, quorum tria, si tanti est, offeras aulae, unum tibi serves, unum, quorum carmina misisti, unum *Schatzio* nostro, ni grave est, tradas. Nec mei honoris causa frontem perfrices. Ego enim ut ista, si sponte veniant, accipere grate possum, ita eadem facile aspernor, si minima subsit indignitas. Meministi, quid olim ad te scripserim, cum de Gallico congiario mecum ageres. Caeterum posthac hujusmodi me commissionibus cave objurges. Aliquot millia passuum commoratus es non cantharum, sed Cornelium Tacitum, & aliquid etiam tempestivius, quod parabam ei, qui quanto civilius fert me sui oblivisci, tanto magis operam mihi dandam puto, ne ille me sui oblitum sentiat. Vale, & me ama. VIII. Id. Februar. CIOIOCLXVIII.

Haec scripseram cum mihi reddebantur tuae. Ego nec quid scribam, scio, nec cur etiam epistola molestus sim, causam video. De libello, inquiram. Iterum vale.

EPISTOLA CCCCXIX.

J. F R. G R O N O V I U S

*Nic. Heinsio.**Hagarn.*

ET voluntati tuae & operae & consiliis gratias habeo habeboque immortales. De exemplarium & cultu & numero utinam me monuisses, quum rogabam. Epistola, & quae alia jubes, exemplaria parata sunt, sive hîc ea adventum tuum manere velis, sive istuc mitti, sive denique ad Elzevirium: modo sciam quot exemplaria, & glutinata an soluta, aut quot utriusque generis. Vale, & valetudinem cura in primis. Lugdunia. d. v. Idus Februar. CIOIOCLXVIII.

EPISTOLA CCCCXX.

J. F R. G R O N O V I U S

*Nic. Heinsio.**Holmiam.*

TAmen aliquando ad officium redeundum est. Hoc dudum non semel ipse met mihi dixi, & succensui jam hoc agentem interpellantibus; cum tandem, Tollito cuncta, inquit, & tui me primam rationem habere jussit, quem tu (bene apud memorem veteris stat gratia facti) tantam mei rationem habere compulisti. Is cum in curandis ad te suis meam fidem legisset, justis desideriis tantorum fautorum moram nec facere nec fieri sustinui. Accessit alter monitor amplissimus *Thevenotus*, quem scis, opinor, ab aliquo tempore hîc defedis, dum persequatur Arabum τὰ γεωγραφούμενα. Ego & consilium nobile ac salutare non omni genere subsidii prosequi barbarum, & nostrae Academiae amplum ratus habere, quod alliciat demereatque hospites longinquos & honoratos, (quum praesertim & divinus *Capellanus* eam rem sibi quoque gratam agnoscere dignatus esset) quod possum, indulgeo libens, & vellem me plura posse. Quicquid tamen facio, non dono, sed foenero: ita praesentem & improbam mercedem capio, propemodum ὑπεροδανείσης, consuetudinem viri & studiis, & moribus, & sermone ad miraculum usque politi, & judicio elegantissimo, qua nihil potest contingere jucundius, suavius, amoenius. Saepius tamen filium ei delego, quem nunquam non meliorem & doctiorem dimittit. Hic igitur etiam tui crebram semperque dignam virtutibus tuis facit mentionem, cum accessione illa legitima, ut quoties ad te scribo, ab se amicissimam salutem & promptissima obsequia tibi deferam. *Brummeri* legem Cinciam accepisse te puto, a me ad Elzevirium missam. Nostra ad majorem Plinium una

cum praefatione, jam pridem profligata, expectant reliqui operis consummationem. Alter quoque Plinius, ad quem manipulum observationum dedimus, ad carceres haeret. Interim & Plautus repetitus praelis, cui denuo aliquot horas impendi: venitque in mentem, quod suadebas olim una re deterrito, ne ambitione honorem corrumperem. Nunc quia speciosior gratiarum agendarum titulus succurrit misero pudori, & haud scio, quam mox, quamque facile iterum eam sim habiturus copiam, conjeci quaedam in chartam, quibus Principi Ministro dico speculum vitae vulgi, sed duorum cultissimorum populorum. Amstelaedamenses cum de instaurando Lyceo suo cogitarent, & mihi honorem habuerunt. Retinuerunt (qui calculus & in priori migratione plurimum valuit) mortui, & vergens aetas corpusque labori pristino impar, & crebrius solito languidum; denique contentus praesentibus animus. Itaque simpliciter, nihil cauponatus, gratiam feci. At ὁ ἑφοιτητῶν μου τὰ πρῶτα (cui ad rogantes, cum de me desperarent, meritum testimonium perhibueram) cum praebere aurem & tractare conditiones coepisset, apud aestimantes recte suos, quid perderent, commoda mirifice auxit. Profuerunt haec τῷ τελευνήσαντι & proderunt, modo pressis manibus tenere fortunam sciat. Vale, meum decus & praesidium, & rem bene gere. Lugduni tuae a. d. vi. Idus Majas cicioclxix. Ampliff. & Optimo *Scheffero* plurimam salutem, cui etiam, quod debeo, exsolvam quam primum. Minantur quidem se meam effigiem aere reddituros. Quid subscribam? Puto nil nisi nomen. Quid enim mihi opus invidia. Iterum vale.

EPISTOLA CCCCXXI.

NIC. HEINSIUS

J. Fr. Gronovio.

Leidam.

Duturnioris silentii culpam agnosco & deprecor, Vir Celeberrime, cujus summa ad valetudinem referenda est jam ferme annuam: ex quo enim regressus sum in hanc aulam, morbos tantum non continuos experior mihi familiares. Hiemem certe proximam aut lectus aut cubiculum me sibi adfixere toto temporis quadrimestris spatio. Nuper etiam in recidivam sum lapsus, ex qua lento processu nunc vix tandem emergo. Hoc rerum mearum statu confidebam equidem fore, ut gratiam mihi facerent patres demandati publico nomine ad Ruthenos itineris, concordiaeque hosce inter ac Suecos instaurandae. Cui ego me spartae non parem esse jam saepe numero apud amicos, Amplissimum imprimis *Beuningium*, per litteras eram testatus: quibus ex Senatu absentibus causam meam proditam ac profligatam invitus nunc intelligo. Itaque nil integri relictum nobis, praeter obsequii gloriam. Nec tamen mihi tempero, quin illa Fortunae meae occentem nonnumquam:

Ergo erat in fati Scythiam quoque visere nostris!

No-

Novisti cetera. Meram igitur barbariem spiranti, & in irae permolestae cogitatione defixo tuae mihi reddebantur proximis diebus, ex quarum lectione tale delinimentum cepi, quale sopor fessis in gramine. Epistola optimi *Capelani* haesit in via multo, quantum apparet, tempore: meliori tamen fato usa, quam ejusdem penultima, in itinere unacum Illustrissimi *Colberti* literis intercepta, quod nunc primum doceor. Amplissimi *Thevenotii* consuetudinem quotidianam tibi quin invideam, minimum abest, etsi nunquam non secunda quaevis rebus tuis apprecatus, tantum ex ea voluptatis atque emolumenti ad te redundare sum certus. Utinam illi tibi que iter, quod molior, commodi non nihil foret! Ita enim uterque de me meriti estis, ut, sine animi ingrati nota praesentissima, utilitati vestrae deesse haudquaquam possim. Quae de viri virtutibus uberi oratione subjungis, ea ex tripode proferri mihi sunt visa, veris nihilo majora. Quapropter iterum iterumque meis verbis quaeso, salveat homo ad unguem factus: atque ex te cognoscat, absentiam a solo natali meam multis mihi nominibus molestam esse, nullas tamen ob causas molestiorem, quam quod per illam fit, ne in commune studiis suis publico profuturis a me consulatur pro virili. Sed & Magnum Etruriae principem sic res in Brittannia suas componere est rumor, ut per Belgas Foederatos iter in patriam moliturus credatur. Videbis igitur Heroem praestantissimum, & dextram tot meritis insignem proxime continges.

At mihi Sauromatae pro principis ore videndi.

Fragmentum Petronianum, in Dalmatia repertum, Romam perlatum esse nuntiabat non ira nuper *Falconerius*; nec de impostura aut dolo malo suspicionem apud homines rerum peritos in urbe relinqui, ex quo compererunt, codicem ipsum ante annos ccc. esse exaratum, hoc est, illo tempore, quo fraudi litterariae inter Barbaros locus non erat. Cl. *Schefferus* valet utcumque, ac totus est in adornandis de re vehicularia veterum commentariis, quos describit ac luci parat. Idem aliquando fert iniquius Navalem militiam, post priores curas parte altera auctiorem, ab Elzevirio negligi: qui erat pollicitus, nullam editionis in se moram fore, simul atque librum accepisset. Eum & accepit anno proxime decurso mea opera, & tamen nescio quid cunctatur, ac promisso deest. Admoneatur is officii interdum per te, quaeso, objurgeturque; dum in publicum consulat. Ait quidem se in Spanhemiano opere edendo occupari, & has excusationis ambages jam praevидit fore objiciendas *Schefferus* autumnio proximo, quando alter ille negabat, procrastinationi hac de causa vel minimum subverendum esse: sufficere enim sese utrique telae simul detexendae. Hortatu *Graevii* nostri, qui typographum non de fore *Meursii* postumis edendis asseverat, petii a Magno Regni hujus Cancellario, ut quae vir ille doctissimus super Antiquitatibus Cretae, Cypri ac Rhodi commentatus est, & quorum exemplar hîc in arce Regia asservatur, mitti in Belgium pateretur juris publici facienda. Promisit ille cum senatu sese ea de re propediem esse acturum, & bene nos sperare jussit. Ceterum studia omnium hîc unice occupantur in edendis libellis nescio quibus Gothorum veterum historicis, & ad institutionem

regiam pertinentibus, quae & cura Schefferum nostrum a melioribus avocavit. Brummeri Commentarios ad Legem Cinciam nuper admodum accepi, nave, qua libellus vehebatur, tempestatibus multum jactata, & in portu Gothoburgico hybernare compulsa. Pliniana tua mirum in modum oculis hisce usurpare gestio: utinam hic mihi comitatus obtingat ad Ruthenos excurrenti! armarem certe hoc me amuleto adversus omnem barbarae fascinationis adflatum, sed nec invitus evolvam, quae ad Plinii junioris epistolas, & ad Plautum curis fecundis annotasti. Plinii epistolas in manibus habebam lecto nuper adfixus, & ex Membranis Florentinis ad Aldinam Editionem complura visus mihi sum observasse, haudquaquam insuper habenda. Etsi Aldus ipse ea praefatione gloriatur, membranas sibi praesto fuisse ex Galliis allatas longe vetustissimas, & ad Plinii ipsius aetatem proxime accedentes. In Hendecasyllabis certe Sentii Augurini: qui libro IV. Ep. XXVII. exhibentur, scribendum codex me docuit,

Ille o Plinius, Ille, quot Catones!

I nunc, quisquis amas, amare noli.

Nam ita disertim illic legebatur, nisi quod mutavi, *Quod Catones, in quot.* Plinium instar habere plurium Catonum voluit, & hoc jam monui ad Nasonem. Vale, vir Eximie, & si vacabis a continuis occupationibus, fac litterarum aliquid a te adipiscar, in Ruthenis constitutus. Exarabantur Holmiae Suecorum Anno MDCLXIX. a. d. XVII. Junii.

EPISTOLA CCCCXXII.

J. F. GRONOVII

Nic. Heinsio.

Holmiam.

DOlui non semel, Heinsi jucundissime, vicem tuam, in tam profundam barbariem missi: ubi non virtus tua, non fama, non ingenium, non suavitas tanta publicae causae suffragaretur: unde, quum quasi Persicus Angaros δι' ἐλαχίστων γεγραμμάτων, aut instar Scytales Laconicae iussu eo portasses, meram ἀπὸ Σκυθῶν ῥήσιν referres. Sed & ego (tanquam ita consentiret nostrum utriusque astrum, ut necesse foret eodem tempore ambo miseros esse) interea rerum mearum satagi. Decubui enim in sextum mensem cum exigua spe salutis, & alterum tantum jam temporis quassatam valetudinem inter Phinea edundi fastidia traho & vix sustento. Praeterea jacuit non tamdiu quidem, sed identidem pari desperatione universa domus, quam ἡμιτελῆ, non tam cubili, quam censu, reliquit, quae fidei ac pietatis nostrae & veterum dolorum immemor, nos alii Phinearum volucrum generi, quos ipsa pessime oderat, diripiendos prodidit. Itaque non modo corpus & vires, sed & rem amisimus. Sed vita cum superest, bene est: non tam mihi, qui satis firmaveram animum

ad

ad transitum per quantumvis ardua in pacem aeternam, quam parvis meis, quos, si quid accidisset mihi, non aliis, quam quibus me vivente ac vidente sub specie bonorum novercae redigendorum praemio quaestuique fuerunt, commendare poteram. Talis tamen anno praeterito variis molestiis dies noctesque inquietatus gessi magisterium collegii nostri, in quo seniorum jam quartus sum: sed numerus ejus major, quam umquam fuit: quemadmodum nec viae urbis auditoriae, atque Album Academiae solita frequentia carent. Familiae forsan etiamnum sentiunt, quos perdiderint: sed ut quaeque meliore statu sunt, minus, ut reor, inter adversa, quod contigit, numerant, quia computant, multis repente adeptis, ad quae nunquam alioquin aut tarde fuerant perventuri. Caetera civitas, praeter paucos, quos reliquiae mali languidos tenent, Κρότων & Ὑγιέσσειοι, adeo ut medicum nuper mitioris autumnii se non meminisse, & die sacris solenni nullas preces pro aegroto desideratas, quod XL. annorum ministerio sibi non evenisset, de suggestu praedicantem audierim. Quod mihi quaestionem ponis de veredis a te incitatis, & te recte consuluisse judico, & illos merito gressum accelerasse, utique si gerebant & fiscos cum pecunia, quos ferro tonsitari solere a compare ginno Phaedri Aug. Lib. didicerant. Nec fugae nomen invidiae sit: nam ipse Apollo per flumina jurabit

Infera sub terris tacito labentia luco

fugam honestam esse, quae te, delicias ejus, servavit; nec te quicquam tota vita excusandum habere, quam quod, dum te Herculem putas, unam excetram non fugeris. Plinium & Plautum, filiique Macrobius jamdudum adservo tibi: de Polybio promittere vix possum, adeo indigne nobiscum agunt mortalium sordidissimi & ingratiissimi: quod possum tamen, promitto. Habeo etiam ab *Aprosio* ad te *La Belisa* tragoedia, *Il Veratro*, *Le Vigilie del capricorno*, & instar vitae tum Parentis tui, tum tuae manuscriptum. Quod in literis aliud hinc exspectes, nihil est, nisi forte Stephanum de Urbibus cum versione & notis bonae frugis, quantum ex uno alterove specimine praefagio, *Abrahami Berkelii*. *Schefferi* V. CL. Militiae navali mancipem quaerere non omitam, etsi jam ab uno alterove repulsam tulerim. Causantur priorem editionem nondum esse distractam: erat, qui, si pretium facere vellem, sena exemplaria sibi esse in promptu diceret. Sed haud dubie politissimum opus praejudicio gravat, qui adhuc lactavit auctorem, sociennensis occultior, non melior: quem, si lucrosam rem fore speraret, nunquam dimissurum fuisse ex suo & ipsius ingenio interpretantur. Sed videbimus. Vale χαρίτων κελαδενναῖν καθαρόν φέγῃς, & mei memor esto. Lugduni prid. Cal. Mart. CXCCLXXI.

Sto compilando la seconda Pentecoste della medesima in cui non mancava qualche Grillo a VS. Ecc^{ma}. ed al Sig. Heinsio. Ma già che di lui favelliamo non so se m'habbia a dolere, mentre havendo egli publicati nel CXCCLIII. i suoi Poemi, si sia di me affatto dimenticato. E pure non gli mancava occasione a pag. 119. nel registrare l'Epigramma In Talpam impudentem plagiarium notato come fattolo a mia istanza, egli l'haveffe. Poco pero mene curai. Ma spiacquemi vedere taciuto il nome dell' Ill^{mo}. Sig. Tommaso Spinola, che fu figliuolo de Giuliano, così anco d'altri

ami-

amici Genovesi. Intendo che egli habbia stampato Ovidio con le sue Note, non per ancora io l'ho veduto: & lo bramo al maggior segno, pero che havendogli donato un MS. delle Epistole di quello, per lo quale havendomi ringratiato di Venetia con le sue lettere delli 13. del caduto CIOIOXLIIIX difendomi: Nec dissimulabo hoc beneficium in Notis ad Ovidium istis, essendoci passati tanti anni di mezzo vado sospettando, che egli habbia segnata la promessa nelle efemeridi dell' oblivione. V. S. Ecc^{ma}. si compiaccia di non tacerle queste mie juste doglianze: che se ho torto, lassò che egli medesimo l'habbia a giudicare &c. & vorrey pure prima di finirlo riverire con tutto l'affetto il mio Sig. Heinsio. &c. di Vintimiglia. 2 Martze. CIOIOCLXIX.

EPISTOLA CCCCXXIII.

NIC. HEINSIUS

J. Fr. Gronovio,

Leidam.

Nuntio, rediisse me ad meos, nec tamen omnino salvum. Est enim negotium cum pedibus ingratum, qui nisi clavo trabali adfixum tenerent lectulo, jam ad te advolassem. Tu, si melius voles, fac, quaeso, quod a me fieri non posse permolestè equidem fero. Vale. Hospitio utor, quo & ante hoc triennium sum usus. Hagae Comitum a. d. v. August. CIOIOCLXXI.

EPISTOLA CCCCXXIV.

NIC. HEINSIUS

J. Fr. Gronovio,

Leidam.

Lubens equidem rescivi nudius tertius ex Amplissimo Terborghio, in quem forte incidebam, die crastini te nobis esse adfuturum, Vir Celeberrime. Hospitio meo nihil tibi debet esse antiquius, quod pro veteri illius jure, abs te promitto mihi. Etsi & pessime illic exceptus nuper, & alibi lautius fat scio, habendus, justissimas potes proferre causas, cur nos sordeamus tibi ac praetereamur in posterum. Tamen nolito tui esse dissimilis, aut severius vindicare in nos homunciones longe longeque tibi devotissimos: si quid nuper est peccatum, non tam mea supinitate aut culpa, quam absentia illorum, quorum aedes nunc inhabito, ut sane peccatum est gravissime. Catalogos si tecum tuleris bibliothecarum proxime apud vos auctionibus publicis distrahendarum, rem pergratam feceris. Atque adeo auctor sum filio tuo, eos, qui posthac in lucem prodituri sint, ut ad me mittat. Nondum enim emacitatis antiquae morbum expugnavi. Vale & veni. Hagae Comitum A. CIOIOCLXXI. a. d. xvi. Octob. Greg.

EPI-

EPISTOLA CCCCXXV.

NIC. HEINSIUS

J. Fr. Gronovio.

Leidam.

DE Thesauro *Stephani Henrici* memorem te fore spes est, Vir amicissime: ut mihi is addicatur, si exemplaris sit neque immundi, & pretio salubri possit comparari. Idem de *Reusneri* familiis dictum esto. Quamquam si tu eas tibi destinasti, usu harum me non fore defraudandum possum mihi promittere. Velim & *Glandorpium*, si commode vendetur. Est enim mihi exemplar ejus jam olim acquisitum. Nunc video & exhiberi Senecam cum commentariis variorum ex editione Aurelianensi. Si recordor probe, illi accedunt notae *Francisci Jureti*, quae ab aliis absunt editionibus, cujus rei admonitum te volui. Navali militiae *Schefferianae* si spei nihil reliquum est de typographo apud vos inveniundo, certior faciendus erit quam primum istius rei amicus noster. Aufonium nuperae editionis evolvo, ipsi frontispicio abesse epistolam *Theodosii Aug.* miratus sum, quae laudes poetae luculentum in modum complectitur. Praefatione Aufonii ipsa ad *Theodosium*, quid sibi velint illa, quoties contra parem dubites, doceas me rogo. Nam nec Latina satis sunt, & peccant in legem metricam. Vale. Hagae Comitum. a. d. XXI. Octobr. CIOIOCLXXI.

EPISTOLA CCCCXXVI.

NIC. HEINSIUS

J. Fr. Gronovio.

Leidam.

CUm *Langermanno* ut agam ipse super negotio, quod nosti, consultum opinor. Ne si tibi acius nonnihil fortassis excidat, quod fieri interdum possit, ego vos collisisse arguar immeritus. Hodierno die monendus erit amicus noster per litteras, ne aurem nimis credulam praebere pergat hominibus id genus garrulis, & supra modum aut malignis aut improvidis. Ad quae quid rescripturus sit, tibi postmodum communicabo. Ob minacias cur irascaris huic tanto animi fervore, agnoscis, puto, tute, causas non esse tibi longe justissimas. Si tecum perpendis aliquanto meditatus, esse naturae legibus ac pietati convenientissimum, ut existimationem paternam etiam, cum jure sugillatur, ab omni opprobrio, quantum in nobis, vindicemus atque adferamus. Agit autem sic tecum amicus noster, ut delatori non plane subscribat, sed haereat

ambiguus mediusque credentem inter ac narratis derogantem. Nec dubium est, quin, quando ex me intelliget, inficiari te rem omnem; tibi potius, quam alteri accessurus fidemque habiturus sit. In loco Aufonii etsi minus Latine dici videbatur, *dubitare contra parem*, tamen quid istis vellet auctor, cetera non inelegans, minus obscurum censebam, sed de loco corrupto cur liberius sententiam ferrem, faciebat posterior syllaba correpta & *contra*: quod praeter exemplum esse, nec ferre legem metricam persuadebar ut crederem, & adhuc ut credam persuadeor: cum noster sit accuratissimus in ratione Syllabarum servanda; Graecis nonnullis exceptis, in quibus accentibus & pronuntiatiōi, pro more temporis sui, se praebet plus nimio obsequentem. De claris urbibus in laude Athenarum occurrit quidem

*Unde per Joniae populos, & nomen Achæum,
Versaque Graia manus centum se effudit in urbes.*
Vel, ut scripti potiores, *versa, & se fudit*, cum prima in *Jonia* corripienda fuerit, producenda secunda. Sed scribendum utique,

*Unde per Jonii populos, & nomen Achæum,
Sparsam Graia manus centum se fudit in urbes.*

Jonio in magno, cum mare subintelligatur. De Arelate ipso statim initio *Pande duplex Arelate tuos blanda hospita portus.* *Arelate* in carmen ipsum subrepsit ex lemmate carminis & titulo, de Arelate certus sum Aufonium scripsisse;

*Pande, duplex Arelas, tuos blanda hospita portus
Gallula Roma, Arelas.*

quod ipsa repetitio Arelatis sat evincit. Sed haec in infinitum abirent, si percenferem omnia, quae castiganda in Aufonio supersunt, post curam ultimi interpretis. Quem miror non solum omisisse Divi Epistolam in ipsa operis fronte, quam illic legi Aufonius ipse haud dubie voluerat, sed amoebeas Paulini litteras, per quas Aufonianis respondet, cum in vetustis Aufonii membranis legantur, utpote ab ipso Aufonio juris publici factae. Non dissimili modo frater ejusdem, qui Appianum nobis dabat nuper, Illyricis omissis, quo nomine nos omnes Belgae exteris ludibrium debemus, quasi consultores illi defuerimus, cum ipse, credo, defuerit consultoribus, cum nemine hominum litteratorum communicato consilio hoc suo ac proposito. Sed ad rem. Tentabam in nostro; *quoties cum pare res dubia est, vel contra operi indubitas.* Sed non satisfacio. Vide, si quid aptius hinc extricare possis. In Caesaribus.

Tertia finit hiems grassantia tempora Gaji. vel, *crassantia*, ut in aliis. Liber Vossianus veterrimus *transatia*, alii quidem *tranantia*. Conabar, *transacti tempora Gaji*. Sed exemplum desidero; quod suppeditari a te velim. Apud Florum, *bellum cum Pompejo peractum*. Peractus Pompejus, & cum Pompejo peractum bellum. Sed de *peragendi* verbo hac significatione complura in Adversariis annotavi ad illa Martialis vulgo mendo-
sa, Jam Lachesi jamque peractus eras. Apud eundem Aufonium Epistola joco-

Jacobi Tollii, cujus frater Alexander.

Ter quisque manus jactare micantes.

EPISTOLA CCCCXXVII.

Nic. Heinſio.

Stephani integri cum Glossario & bene compacti copiam tibi de sua copia
defert, librarius quadraginta florenis, si libido est.

EPISTOLA CCCCXXVIII.

J. FR. GRONOVIIUS

*Nic. Heinsio.**Hagani.*

Qui has portat, de auctione tibi satisfaciet, in qua qui bene emerunt, aut albae gallinae filii fuerunt, aut rivali caruerunt, aut nihil, quod placet, carum putant. De D. Magno credo & praeclaris speciminibus, quorum mihi copiam facis, & ipse olim expertus, etsi nunquam ei tam enixam operam dederim, ut de industria eum ad suam ipsius & majorum obrussam exigentiam; sed si quid tamen in eo vidi, obiter & non hoc agenti natum sit. Sed ab tirone isto quid majus expectare potuisti? Non cuivis datum, ut bonos versus facere, ita Poëtas restituere. Utrumque tuum solius est, non in his modo, sed quot aut fuerunt, Aut. &c. Vale, unice *Cantandi positor, cantati sancte repostor*, & salve plurimum, me autem ama, cui nec molestus unquam, & omnium minime, cum doces. Lugduni. raptim a. d. iv. Non. Novem. A. C. CIOICLXXI.

EPISTOLA CCCCXXIX.

NIC. HEINSIUS

*J. Fr. Gronovio.**Leidam.*

Opinor filium tuum ad te pertulisse, quorum causa huc missus erat nuperime. Cum Regina litem antiquam mihi esse nosti, aut potius aeri meo. Quae quod nomen haud bonum esse pergit, ac sui similis, flagitatione Musicae proximis diebus a me conventa est, non quia sperem sive negligentiam ejus, sive dolum malum cantando rumpi ac expugnari posse, sed ut posteri cognoscant, si huc pertinet mei fama, non potuisse verba semper dari mihi nimis stulte credulo. Ipsosne versus ad illam sim missurus an pressurus tenebris, nondum satis apud me deliberatum est. Mittendos tamen fore potius est ut credam: quos iudicio tuo, sed censorio, non indulgenti, proinde commissos nunc volo, ea lege, ut a te solo inspiciantur, ac revertantur post ad me, ubi commodum tibi id erit. Cum Romana urbe & Arca mire difficili exoptulare me

1 Hanc elegiam periisse doleo, qua debitum, de quo toties in epistolis ad Christinam queritur, sibi tandem post tot moras solvi postulat: erat vero ad Arcam Reginae exoptulatio. miris laudibus saepe a celeberrimo Graevio hoc carmen praedicari audivi, qui & sibi deesse quebatur: & a recitante Heinsio non potuisse exemplum obtinere, ex ejus Epistolis videbimus.

me potissimum vides, quae tamen quorsum spectent, tu & illa, credo, intelligetis. Nunc habe ex septem Ausonii sapientibus nonnihil, ne otiosus plane te accedam. Biante.

*Sed nemo quisquam tam malus iudex fuit,
Qui non bonorum partibus se copulet.*

V. C. *nemo quiquam, & iudex fiat, & qui non amborum, opinor:*

*Sed nemo sui umquam tam malus index fuit;
Quin jam bonorum partibus se copulet.*

Possis & *sui usquam.* Quod sequitur, etiam corruptum est,

Jam fugit illum nomen invisum mali.

Tò illum videtur irrepsisse ex praecedenti versu, sive ille vere bonus est, ejusque loco excidisse *omnes*, ob cognationem proxime subsequentiis vocabuli *nomen*. Audax videbor, corrigo tamen, cum melius nihil succurrat.

Tum fugiunt omnes nomen invisum mali.

Non enim jambum in secunda sede horum versuum semper admittit Ausonius. Paulo ante.

Qui jus & aequum & sacros mores negligunt.

Sacrosque mores liber veterrimus. Ni fallor,

Qui jus & aequum, sacraque & mores negligunt.

Sed praestat non moveri hanc camarinam: inquinatissima enim sunt omnia. Tu Vale cum Collegis Clarissimis, *Heidano, Colonio, Rusio.* Hagae Comitum Anno MDCCCLXXI. a. d. VII. Novem. Gregor.

Habui hesterno die Roma a *Falconerio*. Is cum de Manichaeorum secta scriptores antiquos ineditos collegerit nonnullos ex Vaticana aliisque bibliothecis, luce publica propediem donandos, ejusdem argumenti libellum misere quaerit, nempe *Cyriaci Spangenbergii* Historiam Manichaeorum, sub finem superioris seculi Ursellis editam. Tu consule ex Theologis Leidenfibus amicos, an praestare hunc librum aut eruere ex forulis bibliothecarum possint, demerituri hominem inter Italos longe officiosissimum. Iterum vale.

EPISTOLA CCCCXXX.

J. F. R. GRONOVIIUS

Nic. Heinsio.

Hagam.

Dignos profecto versiculos, qui non modo, quod flagitant, sed & alterum tantum auferant. Vide tamen, ne res eat in exemplum, atque ut inter vos duos hoc arcanum pereat, (nam ego facile tacitum premam) verendum est enim, ne tibi, quibuscumque credidisti, relinquantur, & mala nomina simulent, si sciant etiam in obvagulando & pipulo poscendo te tam dulcem esse. Libellum de Manichaeis ignorant omnes: hominem aliunde norunt: nec sibi

quisquam de illo quid magni promittit. Aufonio te operam dare pergere gaudeo. Ego plusculos dies parum bene me habui, bis quartanae impetum sensi: prae gravedine vix sustineo caput, nec stomachus respondere ac nauseare desinit. Itaque totus torpeo-jaceoque adeo impar curis, ut & in Tacito invitis invitus operis ferias interposuerim. Tu melius vale, & me ama. Lugduni prid. Idus Novemb. cicjoclxxi.

EPISTOLA CCCCXXXI.

J. FR. GRONOVIIUS

*Nic. Heinsio.**Hagam.*

En tibi, quas heri accepi a praestantissimo *Thevenoto*. Responsum ad me mittere potes, aut, si mavis, recta ad illustrem *Capelanum*, sunt enim inter se amicissimi. Nudius tertius; etsi religiosius Attico mysta jejunium servassem; & ne sidera quidem visa inediae mihi gratiam fecissent, venit ad constitutum acerbissima quartana: & quamvis bene calefactis stratis ac lodiculis foveretur, miserum corpus quater ac vexare ad numerum & legem suam perseveravit. Secus eo die apparatus epulis in ipsa Patris tui bibliotheca invitabar, & non tam cibo, quam tot occurrentibus memoriae jucundissimis congressibus, amplexibus, alloquiis, convictibus, praeceptis & hortationibus divini senis refici potuissem. Hesternum subsidens fatigatio & acutus capitis dolor eximit: hodiernum ignavia & taedium rerum eximet, ut & crastinum expectatio accessionis recidivae. In hac jactor charybdi, donec in utramcumque partem juxta propemodum optatam miseretur ὁ κρείττων. Cui tuam valetudinem resque omnes toto pectore commendo. Lugduni a. d. xi. Cal. Decembr. cicjoclxxi.

EPISTOLA CCCCXXXII.

NIC. HEINSIUS

*J. Fr. Gronovio.**Leidam.*

Pro Thevenotianis curatis ad me litteris non parum tibi debeo, rescripturus ad illas ea, quam designasti, viâ. Cum Quartana negotium tibi esse permolestum audio equidem invitus. Multum molestiarum eadem haec bellua truculenta mihi exhibuit ante annos complures, atque hoc in omine vix tandem intermisit, ut me alteri harpyae & homini rapacissimo; hoc est belluis nihilo mitioribus, simul despoliandum objiceret. Tibi meliores successus precor.

cor. Sed ajunt, qui te aequae ac ego multos in annos vitalem ac superstitem videre pervelint, cum diaeta rationem minus curatam a te iniri. Cruda omnia, nec foco admota procul sunt habenda, quae grato quantumvis sui frigore febrim nutriunt & irritant. In rapis passulisque, quas Corinthiacas vocant, plurimum praesidii fuisse mihi recordor. Detergent enim mirum in modum vitiosos sanguini humores. Quae cum tibi non magis sint ignota, quam mihi, reliquum est, ut ea tantum adhibeas, quae si profutura non sint, morbum tamen nec possunt augere: piscium esu, marinorum maxime, cum febris profligata quodammodo jam videretur, recidivam me passum plus vice simplici, & hoc recordor. Non eris vilis tibi met ipsi, si memineris, quanti nos omnes te faciamus, qui bonis artibus consultum cupimus, quorum & in numero Illustris est *Capellanus*, qui in suis omnibus & salvere te jubet, nec parum sollicitudinis ad se redundare ex adversis tuis hisce profitetur. Ego quidem (non enim ignoras quam timori amor sit obnoxius) vehementer metuo, ne in causis sim scelestae quartanae, adfusa nuper frigida tot nugacium observatiunculorum. Itaque manum nunc de tabula revoco, de studiis communibus non acturus tecum, nisi post debellatum morbum. Epistolam tamen hanc a *Scheffera* nuper ad me perlatam subtrahere oculis tuis non poteram; quod noluiisset auctor ipse. Multum curarum demseris nobis, si verbis vel tribus interdum scribas, quo loco res sint tuae. Mihi enim ob dubiam quoque valetudinem vix est ut liceat ad te excurrere, easdemque ob causas manu aliena nunc utor, quod tu in bonam partem interpreteris velim. Cum in omni vita numquam non sis eruditissimus & felicissimus antiquitatis aemulator, hanc tamen gloriam, vix erit, ut certius nobis des approbandam, quam si curae tibi esse, & quidem unice, valetudinem ostendas. Hagae Comitum a. d. xxii. Novemb. cccxcxxxi.

Hic finis factus commercii literarii inter duos Viros summos, nec tam eruditione & ingenio, quae tamen in utroque summae fuerant, quam sanctitate amicitiae perpetuae aeternum celebrandos: adjicere visum. Filiorum epistolas, quae de obitu patris nos edocere possent.

EPISTOLA CCCCXXXIII.

LAUR. THEOD. GRONOVII

Nic. Heinsio.

Hagam.

EN quae voluisti describi ex Solinianis. Libri, quos jufferas emi, pretium quod definieras, excesserunt: nam *Pontanus* septem florenis & undecim stiveris. Rituale graecum quatuor florenis constiterunt. Itaque doleo me tibi parare eos non potuisse. Pater nondum languere desiit, & te plurimum atque officiose salutat. Vale, & me in clientelam tuam suscipere ut digneris, oro.

Lug-

Lugduni in Batavis a. d. tertium Id. Novemb. CICICLXXI. Augustinum natus sum, sed pessimae notae & vix ultra centum annos. Rei Rusticae scriptores nullius fuere momenti, nec textus aderat, nisi altera pars tantum notarum.

EPISTOLA CCCCXXXIV.

NIC. HEINSIUS

Laur. Theod. Gronovio.

Leidam.

Est sane, quod studium in te singulare prorsus mei demerendi collaudem atque exosculer. *Pontanus* in Maronem alibi Bibliothecae meae jam tenetur mancipatus; alioquin majus ei pretium posuisssem. Rituali Graeco addidisses mallem pretii nonnihil; etsi parum refert: nam nec liber magni faciendus is est, & haberi venalis etiamnum in bibliopoliis potest: pro excerptis vero *Salmasianis* de *Clavicula* Germanici Caesaris gratias habeo ingentes, relaturus, cum voles. Videtur autem locus Germanici scribendus

*Quali ferratos obices clavicula dente
Succutit, & foribus praeducti vincula claustri,
Talibus est positus stellis.*

Ex postremo versu, *talis disposita est stellis*, fecere, *talis dispositis stellis*, ut *Puteani* codex, & vulgata exemplaria. *Talis* pro *talibus* dederat festinans librarius. Hinc incrementum sumpsit error: illud autem, *meritae non justa piacula matris* haud quaquam mutandum fuit in *meritam*, cum *meritae* tueatur etiam *Puteanorum* fratrum, quo olim usus sum, exemplar. Est epexegetis elegantissima. Ipsam *Andromedan* dicit non justa piacula meritae supplicium matris, quod luebat inique filia maternae poenae supposita. Parentis tui, viri summi, valetudo dubia nos miris modis anxios habet, cui meliora precor. Vale tu quoque, & vestigiis ejus innitere. Si ex amicis tuis nonnemo *Lutetiam* aditurus est propediem, habeo fasciculum paratum, quem illustri *Capellano* traditum velim. Is *Wierii* opera ad se mitti voluit, quibus opus habeat. Fasciculus ipse nihil praeterea librorum complectetur! Tu, si quem scis illuc excursurum, tempestivus, quaeso, mone. Vale. *Hagae Comitum* CICICLXXI. XII. Decemb.

EPISTOLA CCCCXXXV.

LAUR. THEOD. GRONOVII

Nic. Heinsio.

Hagam.

Ita quotidie cogimur ire in lacrimas, & supplices numen tentare precando: *En* vindicem peccatorum, hinc nobis prima mali labes, δίκαιος ὁ Θεός. Ex supe-

superioribus audisti, si mensem nunc, si septimanam, si diem, immo si noctem imminentem trahere possit. Haec *Silvius* noster. Precibus tum publicis, tum privatis commendatus est humani generis servatori, cui & ipse nos vicissim, jam lingua deficiente, commendavit. Ferreus profecto es, nisi solatium aliquod aut carmen mediteris: a quo praeter te, consilium, auxilium, opem implorare possumus? de oratione funebri te appello, interpellavi saepius afflictum, at ille recusat, *vanitas vanitatum* ait. Certum est Senatum Academicum *Coccio* hoc officium injuncturum: non patiar, nosti mores hominis. Frater etiam saepius mihi testatus est, non videri sibi, ut quisquam hanc tragoediam agat, nisi melior. Quid si amicus tuo nunc amico; sed valetudo, vereor, ut excuset. Fac, summis precibus oro, periculum. Profecto nulli hîc placent. Haec te volvere in animo & quam celerrime respondere oramus & precamur: an Frater redeat! pater ipse ante dissuasit, ipse tamen, voluit. Suntne hîc multi patris familiares ad funus invitandi? de loco etiam te digno, quaeso, fismemor. Oratio ut habeatur, ex animo dico, nisi praeposita conditione, non placet. Vale, & ignosce mihi in tam acerbis luctibus. a. d. xiiii. Kal. Jan. Non sunt haec digna, quae in oculos incurrant. *Terborchius* est ne adhuc apud vos? quaeso, significes, etiam *Hugenio*, de patris valetudine. Iterum vale, & responde.

EPISTOLA CCCCXXXVI.

NIC. HEINSIUS.

*Laur. Theod. Gronovio.**Leidam.*

INvitissimus profecto, nec sine lacrimis profusis, ex epistolio sum edoctus, jam nunc in manus mihi perlato, loco esse perquam afflicto Parentis tui valetudinem. Pervelim mehercules occurrere, suprema excepturus mandata, & officia arctissimae necessitudini, quae tanto tempore inter nos vigit, convenientia exhibiturus. Sed debilitas pedum vix permittit mihi reptare per cubiculum, nedum ut domo prodire possim, aut iter ad vos moliri hoc tam inclementi caelo. Salutabis meis verbis optimum desideratissimumque senem, deque affectus mei constantia certiolem facies, quamquam spero adfuturum e machina deum. De funebri oratione, si huic sit locus, nolim in *Coccium* aliove simultatum quid suscipias, sed rem omnem Senatus Academici arbitrio permittas, quando opinioni tuae apud vos non est locus. Nihil hoc impediet, quo minus ex amicis paternis aut *Graevius*, aut alius quicumque, spartam hanc majori cum applausu adornent postea. Vale, & certus esto, non te magis adversis tuis indolere, quam me tibi amicissimum. Dabam praecipiti manu. Hagae Comitum. xxi. Decemb. cııııclxxı.

EPISTOLA CCCCXXXVII.

LAUR. THEOD. GRONOVII

*Nic. Heinsio.**Hagae.*

O Θεός ὁ ἐλεότης respexit patrem, postquam sex septimanarum spatium vehementes & acres febris παροξυσμὸς & impares tantillo corpori expertus esset. Die dominico xx. hujus mensis cum afferretur jusculum aliquod, primum sumsit, dein manum allevans non poterat repetere vices, *en, fili non possum*: & ita vespere ejus diei ingravescente morbo, petenti veniam peccatorum, esse puerilia & aetatis, non solum veniam dedit, sed & solatus est, & ita manum exosculandam porrigens, nihil peccasti, esto bonus & probus, *Godt sal het maecken*. De studiis multa volebam, nihil, nisi *perge, ut coepisti*: interim lacrimis sermonem abrumpentibus, ultima haec, quae integris & validis viribus ὁ μακάριος effatus est: donec tandem per septimanam sine cibo & potu lecto afflictus animam reddidit ei, a quo accepit,

Sub pedibusque videt nubes & sidera Daphnis.

Ergo ad exequias Gronovii, quibus commodum est, sorores, & ego invitamus eum, cujus praesentia ipse pater, si mortuis sensus, exultaret. Interim cura valetudinem, ne quod in patre amisimus, in te duplicetur. Vale, mi Heinsi, & me ama. *Colonius* te plurimum salutat, & petit documenta ad parentandum. Tu, si simile munus suscipias, facies rem gratissimam & fratri, & mihi. Alexander, ni fallor, nolebat depingi nisi ab Apelle, & Achilles, non nisi Homerum optavit laudum suarum decantorem, sed non possumus ita ut volumus. Iterum vale a. d. iv. Cal. Jan. *MDCLXXI*. Ignosce festinanti & in tantis doloribus. *Hugenium*, opinor, invitabit *Ryckius*, ego praedolore vix mentis compos.

EPISTOLA CCCCXXXVIII.

NIC. HEINSIUS

*Laur. Theod. Gronovio.**Leidam.*

EXcessus optimi parentis tui nemini luctuosior potest esse, quam mihi accidit, adeo totus animo dejectus sum, post acceptos de hac tam insigni calamitate nostra nuntios. Quapropter auctor tibi sum, ut quae nequicquam exspectes a me solatia, a temet ipso mutueris, ac nobis fortiter subministres. Quod feceris profecto, si relictis sororibus tuis animi dolore, erigas te viriliter,

ter, atque in eo cogitationem omnem exerceas, ac penitus defigas, quam via te parenti tanto simillimum praestare possis, ac ereptum nobis feliciter re-ferre. Nos quidem nulla admittimus solatia, praeter id unum, quod uti a te pendet, ita nihil est causae, cur longe quaeratur. Agnosceis paternum omen, quando exegit a te moribundus senex, ut studiis pergeres inhaerere. Exequiis ἔμπαρθε si interfuturus haud sum, imbecillitati virium id adscribas necesse est. Optime enim intelligo, quanto majora summi amici singularibus erga me meritis debeantur. Cetera ex *Ryckio* nostro jam cognovisti; Ampl. *Terborchius* sese comitaturum funus spondebat hesterno die. Vale, cum lectissimis sororibus, & me tuum crede. Hagae Comitum manu propera. Pridie Kal. Jan. CIOIOCLXXII.

EPISTOLA CCCXXXIX.

JAC. GRONOVIIUS

*Nic. Heinsio.**Hagam.*

Nobilissime & Eruditissime Vir. Denique a quotidiano ἔμπαρθε *Valesii* congressu, & ultra fidem grato suavissimi *Thevenoti* contubernio avulsus, ac postpositâ in Italos meditatione ad agnoscendam fatōrum meorum saevitiam huc appulsus, secundum vix diem ago, quum ab hoc redduntur mihi literae, in quas aliae ad te conjectae erant, quas vides. At quantam jacturam! quam verum & inveteratum amicum tu perdidisti! quam dignum politissimi ingenii tui aestimatorem! quam fervidum cultorem literae interiores, jam velut publico jure despectae! quam fidum serperastrum, quam benignum praebitorem juvenus mea & tenera studia! Obmutesco & obstupeo ad considerationem tam crudelis, tam inexpectati, tam indigni casus. Damnum majus est, quam ut ipsum capere queam. Invidiam facere fatis doctrina arcet, quam unicus hic praeceptor mihi inculcavit. Quod possum igitur, refero me pietati, & summo numini grates laudesque ago, quodei, qui sortem ab ipsis vitae principiis vel maxime irrequietam expertus est, tandem indulserit propriam & sinceram missionem, etsi magno nobis constantem. A te solum omni prece contendo, ut, sicut cum nomine familia ἔμπαρθε transibit, ita quoque in te amando, curando & admirando universum ejus jus transmitti permittas. Quod si abstulero, tum vere vos amicos fuisse censebo, tum me non penitus periisse. Propter nugas domesticas jam plura scribere prohibeor. Deum Opt. Max. annos, quibus pater meus fraudatus est, tuis adjungere & longam ac propriam salutem tibi largiri ex toto corde precor. Vale, Vir Nobilissime, ac fratris, qui te multum salutat, misere & mei, qui ero semper profundissimae doctrinae, & limatissimi ingenii tui admirator & cultor observantissimus. Lugduni Batav. a. d. XII. Cal. Febr. CIOIOCLXXII.

*Jac. Gronovio.**Leidam.*

Sospitem ex peregrinatione Gallicanâ te rediisse ad tuos, Gronovi praestantissime, gaudeo mehercules, ut qui maxime. Quamquam si votis meis fuisset locus, meliore rediisses auspicio, illumque domi invenisses saluum ac incolumem, cujus excessu universum literarum nomen graviter afflictum est, & conturbatum. Sed quando publicae calamitatis fatum averti non potuit, praesentissimi solatii medelam a te omnes artium bonarum sectatores expectamus, quo subveniatur immoderato dolori nostro: nimirum ut scripta quae *ὁ μακρείτης* complura reliquit luci parata, ea publico quamprimum permittas, ac sinas per ora famae volitare. Ita fiet, inquam, ut verba sibi det maeror hic noster, ac Gronovium a te nobis exhibitum in scriptis, tanquam superstitem ac praesentem interesse vivis credamus. Hoc igitur age, quaeso, amota omni procrastinatione, & tantum genitorem ab oblivione saeculi pientissimus filius, cui debes omnia, assertum ito. Reliqua differemus in congressum nostrum: opinor enim fore, ut compositis rebus domesticis, ad nos excurras, quando per valetudinem mihi haudquaquam integrum sit, pedem ex hoc oppido movere, cui pertinacius equidem, quam vellem, adfixus haereo, non sine taedio sedentariae hujus vitae. Clarissimus *Thevenotus* responsum propediem ad suas a me feret, pro quibus ad me gnaviter curatis, est quod plurimum debere me tibi agnoscam. Caeterum de affectu meo, si quid emolumenti rebus tuis hinc sperandum, quacvis promittas tibi par est; nihil enim est quod in rem tuam non velim, cum paterno nomine, tum tuo. Vale, doctissime Gronovi, cum fratre sororibusque te dignis, & in meis esse perge. Hagae Comitum a.d. xxiv. Jan. cicioclxxi.

*Nic. Heinsio.**Hagae.*

Non existimo arcessitis allegationibus me debere uti ad impetrandum, ne haec annua cessatio mea a te subscribatur, aut si forsitan ista fidem meae in te observantiae in aliquam suspensionem adduxerit, eam ne altius in animum tuum descendere patiaris. Fateor enim paratius sequendum fuisse diem, quo tibi,

tibi, Honoratissime domine, non solum ut principi paternarum amicitiarum (in quibus omni genere amplectendis majorem mihi injunxi religionem, quam quas ipse conciliavi) certa debiti obsequii argumenta acriter significanterque deferrem, sed jam quoque propter successionem familiaritatis paternae in me transcriptam ac propagatam, ut censori meo vitae rationes ederem & approbarem. Verum si quid in eo est alienum officio commissum, illud inducet ac pro me satisfaciet infinita haec, & aetati meae imperturbata literarum amoenitate abuti ac foveri solitae incognita tum temporis, tum omnium ferme rerum acerbitas; quae quum quasso ac labefactato mihi vix ullam a miserrimis cogitationibus avocationem concefferit, spero aequius te causam meam ac justa cogniturum, si congelasse nec officiosae mentis stipendia prompte meruisse videar. Itaque confidens & voluntatis tuae securus, quam primum horam aliquando tandem excitata nostrorum hominum virtus in tam longinquo exilio mihi dedit ad liberum os circumferendum, & animum aegritudine haecenus conclusum laetius diffundendum, eam sumo potius ad Hispanicae hujus peregrinationis fortunam tibi significandam, quam ad declarationem mei in te prosequendo fervoris; quem constanter mihi haerere ardentissimum, & quocunque tempore fore, ut si aliquam demonstrandae sedulitatis causam mihi dederis, rebus & exitum talem me sis cogniturus, qualem velis, firmissime tibi persuadeas, precor. A Fontarabiensi munitione, hoc est, introitu Hispaniae, usque ad hanc metropolin nihil omnino, propter quod pedem moveas, in rebus nostris occurrit dignum; adeo mera & una vastitas inertiaque illic cunctos tenet, ac immani cautium istarum horrore exaequavit. Hic diu multumque per sacrarum aedium scrinia concursavi: sed quum earum pleraeque nuperrime sint erectae, nullos in iis libros conservari deprehendi, nisi ex quibus horum hominum vitilitigationes instrui ac formari possunt. Eadem plane ratio Compluti & Salamanticae est, nemine ullo jam peregrinas linguas & veterem urbanitatem morante. Caeterum ante dies, quum publica fama nos excitasset ad videndam elegantiam Marchionis *Lichei* (is filius *Ludovici de Haro*, frater major hodierni Flandriae praefecti) quam in colligendas tabulas pictas pulcherri mi operis ex more horum procerum contulit, praeter expectatum inducti sumus in bibliothecam satis egregiam, ubi inter alia erant MS^{ti} Plautus, Livius, quondam Alphonfi Arragonum regis, post a *Cujacio* missus ad *Lipsium*, deinde *Jani Wowerii* Antverpiensis; Caesar, Ovidius cum commentariis, Plinii historia naturalis, Curtius, Suetonius, Claudianus, Donatus in Terentium: omnia non antiquissima. Item aliqua ex adversariis Hier. Suritae, in quibus libellus antiquarum Inscriptionum, de Familiis Romanis, de nummis; quae si otiosius tractare permetteretur, non dubito, quin operae pretium facturus essem. Sed unde hanc spem mihi destituto illa intercessione, cujus expectatione ad hujus itineris molestiam sum impulsus? Quare undique exclusus, ne nimium macerer, quamcumque rationem in eo & omnem occupationem aucupor, ut hic taediosissimi temporis cursus quam celerrime sine sensu meo avolet. Sic quamvis facile conjicerem nihil me profecturum, neque praeter lapides quidquam

visurum, Escoriacum (ubi quum prima vice librorum MSS. conspectum mihi comitum meorum impeditus sit insulsiatate, deinde temere sparfos in tabulato vix per cancellos aspexerim, nunc aliquam partem recollectos vidi, habuique in manibus Horatium, Claudianum, Terentium, Ciceronis nonnulla, etsi quota illa pars prae istis, quae propter festinandam profectiorem praeterire debebam intacta?) inde Abulam (ubi etiam apud Dominicanos quaedam latebant) Salamanticam, Vallisoletum Segoviamque excurri, in quarum ultima urbe merita cum admiratione contemplatus sum aquaeductum opere fornicato a Romanis, ut volunt, fabricatum, undiquaque integrum, maximaeque altitudinis. Vivit hîc *Bartolomaeus Bagnanius*, qui immensam & lectissimam nummorum veterum vim ex auro, argento, aere corrasit, tam Graecorum, Siculo- rum, Hispanorum, quam Romanorum: ipse mihi affirmavit *Carcavium* jam incepisse licitari, seque ut precium conveniret, proposuisse omnia in Galliam ad amicum quendam mittere. Caeterum ex his omnibus existimare potes, Hein- si politissime, quam libenter hinc essem discessurus, si scirem, quo me verte- rem: quum & mare sit infestum, & Italiam petere, id quod omnibus certe votis praeferrem, arceat incertus ille domesticarum opum status, tantaque ja- ctatio. Ita dum expedire nequeo, quid sit satius, hîc desideo, & fallendis ho- ris, quas mihi comitatensia munera reliquas faciunt, recipio me ad libellos, licet paucos, tamen quietis probatissimae portum experior, donec me casus qui- dam hinc sit erepturus. Quod si tu me errabundum in his fluctibus consilio juvare, sicuti potes, ita dignaberis; certe maximo me beneficio devincies, & ego tempora mea ad sententiam ac arbitrium tuum accommodare & compo- nere laetabor. Illustri Patronus meus die dominico, hora undecima, de prae- senti rerum ratione cum Regina, ac deinde omnibus magnatibus egit. Deus Opt. Max. in hoc procellarum concursu incolumem intactumque custodiat. Vale, Amplissime & Nobilissime Vir, meque in tuorum numero habere per- ge. Mantuae in Carpetanis, quorum nulla supersunt vestigia: a. d. v. Nonas Julias CIOIOCLXXIII.

EPISTOLA CCCCXLII.

JAC. GRONOVII

Nic. Heinsio.

Vix literarum tuarum splendor me inertissimo annui temporis somno, sopitum dicam an mortuum, expergefecerat, quin continuo oculis meis mentique Italia tot votis, sed irritis semper successu petita, obversari coepit. Itaque quam- vis mihi consilium tuum retractanti & non modo elegans ac verissimum, sed necessarium existimanti & propterea statim sequuturo, inopina debilitas & mox febris (eadem certe omina, quae ante biennium Parisiis pares cogitationes fo- ventem reprefferunt) viderentur obnunciare; tamen rationes meas, simul con-

valui, ad auctoritatis tuae momentum potius, quam ad rerum aut domesticarum aut publicarum statum subduxi, & ad ignaviae Hispanae scabiem in Etruria primum excutiendam, recta illuc viae me commisi. In qua uti scias desideria tua maximae mihi curae cordique fuisse, strigavi integrum diem Caesaraugustae, tantum quo diligentius possem investigare significatum tibi Catalectorum codicem. Qua de re hoc solum affirmare habeo, neminem Caesaraugustanorum scire in illa urbe bibliothecam esse, praeterquam in suburbano coenobio, nomine Francisci, ad alterum Iberi latus; ad quam admissus credere quidem potui ejus partem a *Surita* venisse (quippe syllabae ac literae in affixis ad earum tergum chartulis eandem formam ac manum ostentabant, quam in libris Marchionis *Lichei* cognoram). cacterum nec nomen ejus, nec quidquam hujus generis ad margines scriptum annotavi, nec monachorum quisquam noverat, unde hi libri venissent. Virgilium sane inter istos neminem offendi, nedum Catalecta. Scilicet hic cumulus praeteritae infelicitati imponendus restabat, ut ne tum quidem usui tibi esse potuerim, quò multum doleo, etsi profecto, Heinsi maxime, nullus dubitem, quin perrupturus sis facile, quidquid scrupulosi nodosque occurrat, modo se vivacitas ingenii tui vere divina illuc immerferit. Meae nunc res ita se habent, ut si aliquam spem paulo firmiorem habere unquam potero reparandi mei temporis, eam plane exploratam ac certam mihi haec civitas praebeat; ita vixdum ingressò ipsum thesaurorum suorum, qui sunt maximi, sinum patefecit ac obtulit, eoque magis me amo, quod bene monenti tibi obtemperarim. Hoc omne debeo amicitiae *Ant. Magliabechii*, quem virum quum experiar in studiis utriusque linguae & aliis artibus liberalibus eruditissimum, in censendo ac disceptando limatissimum sincerissimumque, in devinciendo unoquoque promptissimum & effusissimum, denique omnia virtutum stipendia acerrime merentem, nescio, quo digno honore nominis ejus mentionem prosequar, ita ut jure palmam amicitiae Principalis obtineat. Ne enim de triduo dicam, quod penitus mihi impendit, simulatque Magnus Dux ex secessu Artaminensi in hanc urbem rediit, confecit mihi quotidie Laurentiana bibliotheca utendi commeatum; id quod praecipue scis ad me pertinere. In qua sicuti te desudasse multum scio; ita si quid residuum esse nosti, quod collatum aut exscriptum velis, recipere jam tibi possum, non incassum te id mihi imperaturum. Ipse etiam Clarissimus *Magliabechius* a me petiit, ut & hoc facerem, & sui de scriptis tuis politissimis judicii & erga Heinianum nomen observantiae certum te facerem, cum precatione faustissimae salutis. Quum maxime in supplendis Aeneae Tactici lacunis ex vetustissimo codice sum totus, cujus jam possem dare documenta, nisi vererer Musarum commoda morari. Itaque Vale plurimum, Nobilissime Vir, meque commendatum tibi habe. Florentiae ipsis Nonis Octobr. c1010CLXXIII.

ISAACI VOSSII
ET
NICOLAI HEINSII
EPISTOLAE.
MUTUAE.

EPISTOLA I.
ISAACUS VOSSIUS

Nic. Heinsio.

Leidam.

Ampridem tibi, amicissime Heinsi, misissem Codicem hunc MStum, nisi plenius tibi satisfaciendi spes fuisset. Quippe & alia quaedam opuscula Ovidii MSta, quorum spes mihi facta erat, una mittere decreram. Sed post longam cujusdam absentis expectationem, sensi me operam perdidisse. Interim si opinio nos frustrarit, compensabit id libri hujus bonitas. Quod tu ipse melius judicabis. Videtur autem is codex esse ex bibliotheca S. Nazarii, ut in fronte scriptum offendi. Auctores Mechanicos & Tacticos, quorum mihi copiam fecisti, simulac usus fuero, mittam: vixdum enim inspexi, quod haecenus meis, quae jam eduntur, paulo fuerim solito occupatior. Si & alia opuscula Ovidii MSta acceperim (hoc ut fiat opera dabitur) non segnior mea in mittendo, quam tua in pervolvendo erit opera, etsi eam maximam fore omnes confidimus. Quamquam molestissimum id mihi videatur, quod plerique hîc, in quorum Bibliothecis hujuscemodi patent thesauri, gryphis sint simillimi: auro incubant, attingentibus infesti. Vellejum Paterculum primae editionis *Rhenani*, qui in instructissima vestra Bibliotheca est, si miseris, fratrem maximopere tibi devinctum reddes. Vale, spes magna magni patris, & patriae communis. Amstel. c1c1ccxxxvii. Decemb.

EPISTOLA II.

ISAAAC. VOSSIUS

*Nic. Heinsio.**Leidam.*

Mitto tibi, Doctissime Heinsi, Epigrammatum librum, quem a me, dum una tecum Lugduni perquam familiariter sermones sererem, petiisti: plura missurus, si postulasses, vel mihi quidnam tuis laboribus potissimum inserviret, compertum fuisset. Socium tamen addidi Glossarium, quod vides, pervetustum, ἀνέκδοτον hætenus, cui & in fine adjunguntur Glossæ *Eucherii* Lugdunensis Graeco Latinae: quamvis vocabula Graeca Latinis characteribus sint concepta, & ut plurimum corrupte, nihilominus multa inde hauries (si visum fuerit percurrere) quorum non poenitebit. Testamentum cum variis MSS. collatum si Illustris parens tuus aliquid inde emolumenti capere possit, statim mittam. Quaeso fac sciam, non diu morabor, ἀμ' ἐπὶ ἀμ' ἔργον. Si alia fuerint, quibus indigeas, velim perscribas. Si detur facultas, non deerit voluntas mittendi. Vale, non juvenum minus, quam amicorum meorum purpura. Amstelodami Pridie Kal. Febr. ciciocxxxviii. Epicteti ἐγχειρίδιον MS. quod penes vos me vidisse memini, rogo transmittas. Si & Plinium MSS. carere aliquamdiu possis, quaeso, mitte & hunc. Iterum vale.

EPISTOLA III.

ISAAAC. VOSSIUS.

*Nic. Heinsio.**Leidam.*

Tuas accepi, doctissime Nicolae Heinsi, una cum libris, quos misisti, pro quibus tantas me debere profiteor gratias, quantas nec possum dicere. Codices, de quibus ad me scripsisti, constitueram *Gronovio* dare, ut tibi traderet, sed ille præter opinionem præterita Leida, recta Hagam perrexit. Hætenus idcirco a me protractum fuit negotium. Decreveram una libros nonnullos, quos a te habeo, remittere, ut *Atheneum* & *Britonem* περὶ μηχανημάτων, & præterea Epictetum, sed tutius mihi visum, ut differrem in tempus, quo ipse Lugduni excurrerem, quod brevi, uti spero, fiet. Vale, & plurimum saluta Illustræ parentem, & suavissimam sororem. Amstelodami.

EPISTOLA IV.

ISAAC. VOSSIUS

*Nic. Heinsio.**Leidam.*

Quibus verbis gratias tibi agam, doctissime Heinſi, equidem nescio. Caudex eſſem, ſi me ea humanitas, qua una cum Clar. *Boxhornio* me excepiſti, non admodum cepiſſet. Ingratus, ſi non paria referre, quoties licuerit, ſtuderem. Interim pro libris ſcito me tantas tibi agere gratias, quantas & debeo & poſſum. Mitto Iſidori gloſſas, altera parte auctiores, quas e Bibliotheca *Guilhelmi Noomſii* ἔμακαρεῖται accepi, ut memini me tibi ante hac retuliſſe. Aliud quoque addidi Gloſſarium, quod videtur eſſe *Macri* cujuſdam, mihi ſane ignoti. Diſpicias ipſe, quid bonae frugis inde poſſit demeti. Multa ſane cum *Papia* habet communia. Mittere tamen volui, ne ulla in parte negligentior viderer. Ubi meliora majorave petieris, & iſta mittam, ſi in manu fuerit noſtra. Salutem Illuſtri parenti, & Nobiliſſimae ſorori plurimam impertias. Amſtelodami. Poſtridie Kal. Majas. Raptim. CIΩCΩXXXVIII.

EPISTOLA V.

NIC. HEINSIUS

*Isaac. Voſſius.**Amſtelodamum.*

IN mandatis hodie pater meus mihi dedit, Voſſi praeſtantiſſime, ut ſacrum hoc Exercitationum exemplar ad Parentem tuum τὸ πᾶν quam primo curarem. Scripturus ipſe, niſi Hagam neceſſariis de cauſſis evocatus eſſet. Eam itaque in me curam quamlibentiſſime recepi. Sed cum nonnulla eſſent, quae te vellem, tum etiam de librorum quorundam, quos beneficio tuo natus eram, reſtitutione cogitarem, ad te ire malui. Nec tantum a pudore meo impetrare poteram, ut tanti viri occupationes interpellarem. Eo praeſertim in negotio, quod per te melius curari poſſe non ignorabam. Si enim tua acceſſerit commendatio, opus illud acceptius aliquanto parenti tuo futurum confido. Tibi nunc incumbit, ut & noſtrae & tuae commendationi pondus aliquot accedat. Ovidii excerpta, de quibus aurem mihi nuper vellit, cum hîc eſſet, frater tuus, una mittimus. Uſui non exiguo videbantur ea mihi futura, niſi a *Puteanis* fratribus eorundem codicum excerpta mihi impetraviſſet *Fabricius* noſter. Utraque prorsus ſibi ſimilia ſunt, niſi quod alter nonnunquam ea neglexit, quae ab altero notantur. Adjectum erat inſuper ſchedium cum

cum longe diverso codice collatum, quo in Italia *Claudius Puteanus*, ejus enim praeferebat manum, usus aliquando videbatur. Tibi interim quidvis pro tam liberali opera debere me profiteor. Novi quoque Testamenti collationes ut vobis remitterem jussit parens meus. Dolet admodum tam sero eas ad se pervenisse, usui alioquin maximo futuras. Secundae interim editioni reservari poterunt: aut illis, quibus id ipsum moliri vacaverit. Glossaria etiam illa vetustissima, nunc tandem tibi reddimus. Omnes jam dudum remissos oportuit; sed nescio quae ista confidentia mea est, ut in te plus licere mihi putem, quam in alios. Quare iis, qui restant, adhuc utar. Quin & novos mihi polliceri audeo. Seneca & Prudentio tuis, utroque MSpto, mihi opus est. Nactus enim comitem sum, qui conferendi laborem mecum subire velit. Claudiani editiones Aldinas si quas habueris praeter illam, quae anno MDXVIII. prodiit, simul expecto. Colinaei & Gryphii editiones haecenus non vidi. Fortassis instructissima Bibliotheca illa vestra nos hîc juvare possit. Ad Cl. *Rompfium* si quando scribes aut excurses, una de fastis illis Ovidianis MSptis velim inquiras. Nulla enim cum viro isto, ne de facie quidem noto, mihi familiaritas intercedit: ut parario hîc mihi opus sit. Vides quam impudenter haec a te flagitem. Sed absolvet me candor tuus, & affectus ille, quo φιλομαθῆς omnes ipse πολυμαθῆς, amplecti soles. Vale, juvenum doctissime, & me, quod facis, amare porro perge. Lugd. Bat. CIOIOCXIX.

EPISTOLA VI.

ISAAC. VOSSIUS

Nic. Heinsio.

Leidam.

PAullo diutius, juvenis doctissime, quam vellem, aut deberem, distuli postulato tuo satisfacere. Sine dubio expectas, ut meditato sermone socordiam meam ea in parte excussem. Facerem equidem, nisi scirem, amicitiam nostram firmiorem esse, quam ut leviculis ejuscemodi delictis solvi, aut labefactari possit. Si qua in re peccatum sit, id neque negligentiae, neque sinistro effectui, sed soli absentiae viduae *Arlerveniae* imputes velim. At, inquires, hoccine igitur obstitit, quo minus calamum arripere posses, meque ejus rei certiore facere? Dicam, mi Heinsi: ex eo tempore, quo mihi postremam epistolam tuam tuus attulit cognatus, de die in diem viduae ejus expectabatur adventus. Ita frustra aliquot elapsae sunt hebdomades, dum quotidie id, quod petebas, praestare me posse considerem; & ubi praesens dies exspirasset, in proximum plerumque rejicerem. Ecquid praeterea profuissent literae meae sine libro, quem petebas? Prudentium enim petebas, non cassum aliquod epistolium. De numismatis quod scribis, memor ero. Mitto patri tuo viro maximo *Freinsheimii* Curtium, nomine *Joachimi Wicefortii*. Post octiduum,

duum, ut spero, te Lugduni videbo, & pluribus compellabo. Vale, Clariss. juvenis a tuo ex animo Iſaaco Vossio. xv. Julii cxcxcxl.

EPISTOLA VII.

ISAAAC VOSSIUS

Nic. Heinsio.

Leidam.

Tuas mihi ante triduum quatrimumve attulit doctiss. juvenis *Vlietius*. Prudentium hodie restituit. Quanquam non erat, cur ita in reddendis meis festinares, cum ipse, qui plura melioraque a te habeo, in iis restituendis tardior haecenus securiorque fuerim. Gratias interim quam maximas ago, & pro literis, & pro restitutione librorum. Codices MSptos *Vickevortii* quod attinet, illi perpauci admodum sunt, & quos vix aliquid ad gustum tuum facere arbitror. Pomponium Melam exinde habeo, & Censorinum eodem corpore contentos, quos Cl. *Golio* utendos dedi. Siquid tamen inter eos repererim, quod ad rem tuam faciat, enitar ut habeas. Sed vix putem. Martianum Cappelam mittam post hebdomadam, aut ante. Haecenus nullum mihi ad conferendum eum cum editis fuit otium. Caetera quoque, quae a te accepi, ubi usus fuero, remittam ilico. Vale, & parentem maximum salutes omnium nostrum nomine. cxcxcxl. Amstelodami Octob.

EPISTOLA VIII.

ISAAAC VOSSIUS

Nic. Heinsio.

Leidam.

Literae tuae, Nicolae Clarissime, non ea in urbe mihi perlatae fuere, ad quam illae a te fuerant destinatae. Siquidem cum tu eas Lutetiam mihi tradendas misisses, ego vero interea temporis in Italiam discesserim, factum est ut Romae demum in manus meas pervenerint, adferente eas mihi *Vincentio Noghera*, nobili Lusitano. Ubi ubi locorum in eas incidissem, pergratae mihi fuissent. Gratiores tamen fuerunt, quod in tam remotis a patria nostra terris illas perceperim. Scis quid mercibus quibuscvis evenire soleat, quae tanto cariores habentur, quanto eae e longinquiore oris adportentur. Sed quamobrem longe mihi gratissimae fuerint, erat, quod ex iis intelligerem, te ita bona valetudine, ut inquis, redditum esse, & patriae, & urbi ei, cui & tu, & ego natales nostros debemus. Quereres quod non ita laxè tibi patuerit usus librorum in Anglia atque optasses. Justius ego forsàn hanc querelam in
me

me transferrem. Nam cum sint hîc innumerabiles poene Bibliothecae librorum scriptorum, qua in monasteriis, qua in principum & nobilium quorundam aedibus, adeo tamen difficilis est aditus, ut non nisi favore aliquo singulari, uti interpretantur, liceat vidisse. Vidi jam egomet aliquas, sed ita vidi, ut perinde sit, atque si non vidissem. Illi, qui eas possident, quamquam a literis saepe sint alienissimi, adeo tamen amant, adeoque custodiunt, ut non putem gryphas ita auro incubare, atque illi custodiae librorum suorum: nam non tantum adtingentibus, sed videntibus etiam invident. Nonnulli itaque non ea cura, & anxietate, uxores suas recludunt, qua Bibliothecas. Etiam si quis utroque brachio post terga religato eas ingrediatur, timent etiamnum nequid oculi inde furripiant & exportent. Praeterea ubi semel videris, nulla posthac iterum videndi spes relinquitur. Non defuit tamen mihi favor, etiam praecipuorum in hac aula hominum, qui aditum ad eas mihi parare voluerunt. Sed frustra fuere plerique. Verum neque *Holstenius*, neque quisquam eruditum, impetrare id sibi unquam hîc Romae potuerunt. Sed haec haecenus. De veritate lectionis Ovidianae in epistola Hypsipyles ad Jasonem, noli dubitare. Quid opus est testibus? Etiam pessimo cuivis libro, eam attestanti, quis fidem detraxerit? De Codd. MSS. ejus auctoris hîc in Italia nihil quidquam dicturus sum, cum non satis diligenter in illos haecenus inquisiverim. Maximum interim numerum librorum Ovidianorum vidi ubique, praesertim Neapoli in *Jani Parrhasii*, & Florentiae in Medicea Bibliothecis. In eadem quoque urbe, in conventu quodam Divo Marcò dedicato, exstat integrum Ovidii opus, cum pluribus MSS. ab *Angelo Politiano* collatum. In Claudiano, de quo itidem scribis, videsis an illae collationes, quas penes Cl. *Gronovium* reliqui, in Burgundiam discessurus, aliquid te juvare possint. Discrepantes lectiones in reliquos ejus poëtae libros ipse tibi, ut spero, allaturus sum. Interim salve, mi Heinse, cum omnibus tuis, a tuo ex animo Jf. Vossio. Romae c1010cXLII. pridie Kal. Quint.

EPISTOLA IX.

ISAAC VOSSIUS

Nic. Heinse.

Leidam.

SI dies & hora adventus tui me non latuisset, obvius tibi processissem; aut saltem, si id non licuisset, fecissent id literae meae. Nunc quoniam occasio illa transierit, non alio, quam eo, quo fieri solet, modo inter sinceriores amicos, testari possum laetitiam, qua me desideratissimus adventus tuus perfudit. Gratulor itaque Magno parenti tuo, cui iterum restitutus es: gratulor tibi, quod & parenti, & tibi ipsi sis redditus: mihi vero gratulor tum ob haec, tum etiam ob illud, quod cum corporis valetudo in melius mutata sit,

Yyy 3

de

de quo multum gaudeo, animus tuus & affectus, ut fidem mihi fecerunt literae tuae, idem erga me permanferit. Sed tu, Clarissime juvenis, mavis amicitiae, quam veritati favere, cum putas aliquid aliud in me esse, quamobrem amorem tuum promerear, quam id solum, quod te amem. Quinimo, si me rectius loqui patiaris, ne ob istud quidem, quod ita ego erga te affectus sim, ut tu pari modo erga me adficiaris, ausim expostulare: sponte enim tua id facies, nullo meo ductus merito; neque enim potes naturam tuam, & innatam ei humanitatem non sequi; te vero cum diligo, nihil nisi debito meo fungor: neque id sponte tantum facio, sed etiam ex lege quadam necessitatis. Esto tamen, ut tu me ames, nunquam me ita amabis ut ego te; & si in omnibus vincas, hoc uno non vinces: quin potius quantum in reliquis me superaveris, tantumdem ego te in amore superabo. Pro libris, quos remittis, summas ago gratias. Tuos quoque remitterem tibi, nisi mallem omnes simul reddere. Est inter illos unus & alter, quo aliquamdiu etiamnum utar, si patiaris. Utinam id, quod promittis, exequaris; nimirum ut per otium huc excurras. Impatienter enim te videre desidero. Si moraberis huc venire, ipse Leidam festinabo. Si festines, ego morabor. Vale CIOICXLIV. XXIII. Octobris.

EPISTOLA X.

ISAAC. VOSSIUS

Nic. Heinſio.

Parifios.

TU quidem, jucundissime Heinſi, si doles quod infalutatis amicis discesseris, felicitatem tuam doles. Ego vero, si idcirco dolerem, minus te quam meipsum amarem. Gratulor tibi potius felicissimum tuum in Galliam adventum; & si quid sit, quod dolorem adferat, non jam hoc est, quod tam longe a nobis absis; sed quod discedentem te corpore non acque atque animo comitari licuerit. Hoc si fuisset, jam tecum forſan gauderem inter Regias istas & Thuaneas delicias, quarum vel ipsa recordatio ingentis mihi loco est poenae. Tu jam illis ad ſatietatem usque frueris, & quod mihi non licuit, majori oblectamento & fructu. Tuam itaque vicem tantum gaudeo, quantum meam deploro; qui nunc demum, cum tempus & occasio transiere, negligentiam & supinitatem meam accuſo. Vellem jam ſcire, in quibus potissimum autoribus verſeris: ſcio enim te nunquam otioſum eſſe. De Martiale quod aurem vellas, vix dixerim quam gratum feceris. Diu est quod auctorem illum e manibus deposuerim. Sed si tu etiam in eo corrigendo juvare me volueris, aliquid audebo. Ejus autoris paucos codices vidi Parifiis, & ne illos quidem contuli, nisi ex parte, inter quos est Codex Puteaneus, scriptus forma quadrata, at parum antiquus, ut videtur. Itaque ſex tantum libros priores abſolvi. Excerpta Martialis, quae exſtant in illo optimo codice Thuaneo, in quo

quo & Gratius, & Oppiani Halieuticon, & alia quaedam Epigrammata, satis diligenter examinavi; uti & alterum codicem Epigrammatum satis vetustum (in quo itidem ejus auctoris aliquot Epigrammata habebantur) qui exstabat in Bibliotheca *Petavii* Senatoris. In ejusdem quoque Senatoris Bibliotheca vidi alium codicem, illum quidem chartaceum, sed de quo tamen plura mihi promittam, quam de illo antiquo Puteaneo. Plures Martialis codices Lutetiae mihi videre non contigit. Vix tamen dubito, quin & alii in aliis Bibliothecis reperiantur, quas non vidi, uti est illa S. Victoris, & Cardinalis *Richelii*, cujus aditum parare possis per Dominum *Stellam*, si ille sit Parisiis. Sed optimi proculdubio libri exstant in Bibliotheca Memmiana. Utinam in illam penetrare possis. Est in ea inter alia aureus Varronis codex, quem non vidit *Scaliger*. Sed intelligo *Memmium* esse inter eos, qui malint habere libros nondum collatos, quam collatos. Quod si magnus *Valesius* non possit tibi aditum procurare, poterit nemo. Bibliotheca Mazzarinica necdum, puto, Parisios advecta est. Ignatii Epistolae, quibus & Barnabae epistolam addidi, nondum prodierunt, sed non plus quam quinque aut sex folia supersunt. Coepi & ego instruere Bibliotheculam librorum MSS, & jam ad ducentos collegi. Si Aurelias excurras, rogo, ut inquiras de quadam muliere nobili, quae degit x. aut xii. circiter leucis extra urbem, in via, quae Bituriges versus tendit. Habet illa MSS. quamplurimos, quos parvo velit pretio vendere. Aliquot ex iis acceperat Bibliopola quidam, quos mihi vendidit. Cumque reliquos peterem, dixit mihi, matronam illam in luctu versari ob mortem filii, & proinde sibi non licuisse cum illa pacisci. Bibliopola ille habitat in angulo cujusdam plateae, ubi degunt reliqui Bibliopolae Aurelianenses. Ante aliquot dies promisit mihi quidam, sese missurum collationes ex optimo codice Epistolarum Ovidii, qui exstat in Frisia. Ubi eas accepero, faciam te participem. Vale, Clariss. Heinsi, & corculum illud gratiarum, *Menagium* dico, plurimum salutes. Amstelodami ciciocxlv. xxvi. Nov.

Diu est, quod Cl. *Menagio* miserim epistolium cum pauculis aliquot emendationibus in Diogenem; quod nescio an acceperit. Rogo ut me certiore facias. Sed & hoc rogo ut excuses, si propter absentiam meam, tardius tibi rescribam. Iterum vale.

EPISTOLA XI.

ISAAC. VOSSIUS

*Nic. Heinsio.**Parisiis.*

PROcul dubio exspectas, mi Heinsi, ut multis apud te verbis, silentium, quod mihi objicis, excusem. Facerem certe, si plus apud te valerent excusationes, quam ipsius rei veritas. Sed cum omnis, qui se excusat, crimen agnoscat,

noscat, parum essem sincerus, si non innocentiam meam apud te potius tuerer, quam si veniam peterem, etiam cum nullus esset errori locus. Et tamen si me purgare apud te esset animus, non deessent rationes: uti sunt absentia mea ab hac urbe, & amborum fratrum obitus, & alia, quibus etiam delicatissimi fastidii amicis satisfacerem, si paulo in scribendo fuisset segnior. Sed quam id non fuerim, agnosces spero, ubi Venetias veneris. Cur autem eo potius literas meas miserim, quam Lutetiam, in causa fuit *Boxhornius* noster, cui cum eo adessem tempore, quo mihi recens literae tuae in manus venissent, dixerat mihi te jam in Italiam concessisse. Quominus ex Parente tuo certiora intelligere licuerit, obfuit quod tum magnus tuus Parens domo abesset, ego vero Amstelodamum properarem. Quo cum venissem nullam interposui moram, quin me debito exsolverem. Quas itaque exaraveram literas, tradidi *Wickfortio* nostro, qui eas Venetias ad aedes Reinstianas mitteret; quod utique, ut quidem arbitror, fecit. Judices jam, mi Heinse, an tam graviter deliquerim, quam tibi videar. Verum amice, quam tu me fefellisti, quam ego te non injuria reprehendam, qui tam facile offenderis ob res, quas amici amicis soleant condonare, etiam tum, cum de culpae veritate nihil tibi quidquam constiterit. Si me reprehendisses tanquam negligentem (quamvis neque hoc forsan verum fuit) rem longe fecisses gratissimam: tuis enim monitionibus non ipse tantum melior reddor, sed & tibi utilior: quod vero tot annorum amicitiam, tanto desiderio & tot votis a me expetitam, tot mutuis officiis confirmatam, velis in dubium vocare, & ob unicum negligentiae nondum manifestae crimen missam facere; res mihi videtur ab exactissimo judicio tuo plane aliena. Sed forsan tibi visus sum talem promeruisse poenam, tu vero, ut rigidus exactor, non potuisti peccantem non castigare. Hoc si ita esset, jam poenam non deprecarer: imo te condonante, non cessarem me ipsum ulcisci. Verum cum aut nihil aut parum deliquerim, non ego hoc supplicio dignus, verum tu nimium severus, qui ex suspicione & inaudita causa amicum condemnas. Ut ut sit, rogo, ut de omnibus potius dubites imposterum, quam de affectu meo: quodcunque potius minere, quam quod mihi minaris, nunquam te mihi posthac scripturum. Procul dubio jam Parisios reliquisti, aut brevi relicturus es: quamvis non ignorem mercatorum res saepe in longum trahi. Si *Reinstium* Venetias usque velis comitari, sive per Helvetios sive per Massiliam iter instituas, utroque modo Mediolanum videbis. Proculdubio ea in urbe aliquantum moraberis. Bibliotheca ibi instructior, quam ulla in tota Italia, excepta Vaticana. Aditus praeterea facilior, cum singulis diebus pateat, viri etiam eruditi ea in urbe, quorum tibi familiaritas & grata, & utilis erit. Ego certe tantum debeo humanitati *Bern. Ferrarii*, Doctoris Collegii Ambrosiani, viri scriptis clarissimi; ut plus cuiquam debere non possim. Ille mihi in aegritudine magno fuit solatio: usum praeterea MStorum ejus Bibliothecae procuravit, & in aliis omnibus & consilio & re semper mihi adfuit. Sed & plures ea in urbe sunt literati, literarumque amantissimi; uti Pater *Sfondratus*, Ordinis Theatini, & praeterea Illustrissimus *Joannes Maria Vicecomes*, cujus carmina, ubi vi-

deris, non poteris non probare. Sed quoniam carminum incidit mentio, non possum dissimulare, quantum ea videre desidero, quae tu Parisiis edenda curasti. Rogo ut quam primum possim exemplar habere, prout promisisti. Si ego tibi Ignatium meum mitterem, qui jam aliquamdiu lucem vidit, quorsum id fieret? an ut iterum eum in Hollandiam remitteres? Differam itaque in tempus, donec nos mutuo iterum aliquando licebit amplecti; quod nisi votis tuis forsan esset contrarium, ut quam citissime fieret, exoptarem. Interim omnia tibi ex animo eveniant, pacata & jucunda itinera, aditus ad quasvis Bibliothecas facilis, corporis habitudo athletica, & qualem desideras. Semper elige tutiora, mi Heinse, nullam tentes semitam, cui non & vorsum & retrorsum videris impressa vestigia; aliquando etiam, ubi otium fuerit, memineris ejus, qui semper tui memor est, *Isaaci Vossii*. In Bibliotheca Ambrosiana Mediolani Martialis ter MStus habetur. Unus codex ex iis in charta scriptus, cui varias lectiones & commentarios suos ad oram adscripsit *Perottus*, longe est optimus. Illum tantum aliquot locis inspexi. Alios duos, quamvis & illi sint boni ut arbitror, vix vidi. Pater *Olgiathus* bibliothecarius est Mediolanensis Bibliothecae. De aliis Italiae Bibliothecis & Bibliothecariis scripsi in epistola, quam Venetias misi. Vale, clarissime Heinse. Amstelodami iv. Aprilis. CIOIOCXVI.

EPISTOLA XII.

ISCAAC VOSSIUS

Nic. Heinse.

Romam.

IN postremis, quas ad te dedi, literis, Heinse clarissime, purgavi me ego apud te, neque dubito quin etiam satisfecerim. Nunc vero etiam si id quammaxime possim, nollem tamen, non quod verba aut argumenta defutura essent, quibus me excusarem, apud te praesertim tot regionibus distitum; sed quia cum non omnino culpa me possim eximere, velim tibi non deesse occasiones, quibus labenti subinde amico possis ignoscere. Noli tamen aut negligentiae aut parum sincero affectui tribuere, si quid forte peccaverim. Neque enim proximis duobus mensibus per alios licuit mihi esse otioso. Sed sane fuerim talis, ipsa mea negligentia magni amoris indicium tibi esse potuit. Minus enim si amarem, non cum tanta securitate peccarem. Sed spero non ex sola negligentia patere affectum meum, neque opus esse ut pluribus illum persuadeam. Nam erga te si affectum mentirer, nimium certe mentirer. Ex altero epistolio tuo, quod mihi ante quadriduum in manus venit, intellexi te Romam pergere, quo proculdubio jam veneris. Si Florentia aliquamdiu te detinuerit, diutius id factura est illa orbis metropolis. Bibliothecae ibi longe plures & me-

Tom. III.

Z z z

lio-

liores, ima una Vaticana melior omnibus. Verum aditus forsân erit angustior. Tibi tamen spero patebunt, si non omnes, saltem plurimae. Farnesiana proculdubio jam aperta est, quae toto, quo Romae egi, tempore clausa fuit; uti quoque illa Cardinalis de *Altaemps*, quas prae reliquis instructissimas esse arbitror. Jesuiticam vidi, sed vidi tantum. Nihil in ea singulare, quam libri aliquot a *Mureto* collati cum codicibus scriptis, an bona fide nescio. Est inter eos Codex Apicii de re culinaria, vulgatis multo auctior & emendatior, cujus libentissime apographum habuissem, si per patres Collegii licuisset. Sed hoc non magni est momenti ratione eorum, quae ex aliis possis tibi comparare Bibliothecis, quarum notitiam accipies ex Cl. viris *Luca Holstenio* & *Leone Allatio*. Neapolin si excurras, ibi videbis Bibliothecam *Sannazarii* in conventu S. Joannis Carbonarii. Praeest ei, nisi fallor, Pater quidam *Chrysostomus*, ad quem ab *Holstenio* habui commendatitias. Inter eos libros est codex fatis vetustus Varronis de re rustica, quem dolet non contulisse cum editis. Vidi quoque in eadem urbe pauculos aliquot libros Patrum Theatinorum, sed nihil in iis boni, quam Frontinus de aquae ductibus integer, cujus a Cl. *Holstenio* speramus editionem. Multos ibi invenies viros mediocriter eruditos, inter quos tamen recensendi non sunt tres ¹ *Camilli*, *Gloriosus*, *Tutinus*, & nescio quis tertius. Si conspexeris ² *Januarium Grossum*, is plura anagrammata e nomine tuo eruet, quam in eo sint literae. Id ferme studium est Academicorum ea in urbe, qui se Otiosos vocant, & revera sunt. Bibliothecam Proregis non vidi. Non me permisit studiis multum vacare amâenitas ejus urbis, quae omnium, quotquot usquam vidi, longe est pulcherrima. Hoc & ipse forsân non sine studiorum tuorum jactura experieris. Romam cum deferis, Flaminiam proculdubio carpes. Non praeteribis utique Bibliothecam Urbinatam, quae hactenus tamquam intacta est. Senecam Tragicum a te Florentiae denuo collatum intelligo. Neque dubito, quin potiori diligentia id praestiteris, quam non licuerit Cl. *Gronovio* propter nimiam festinationem. Audio quoque Cl. *Bulialdum* multa Astronomica ex ea Bibliotheca depromsisse. Aveo scire an prodierit vita B. Perpetuae; cujus editionem parabat *Holstenius*, item Tiberius Rhetor *Leonis Allatii*; & si quae alia melioris notae Romae excuduntur. Dolet per *Gaddium* non licuisse, quominus Martialem conferres. Spero te non neglecturum in alia ejus poëtae exemplaria inquirere. In Vaticano proculdubio aliquot invenies. Ego nullum in Italia contuli; quam Florentinum: Mediolanense inspexi tantum. Vellein scire, an codex ille *Notitiae Imperii utriusque*, qui in Vaticana existat Bibliotheca, sit antiquus, & an inultum differat a vulgatis. Quod si verum sit, utinam aliquis vel quocunque pretio conductus ejus con-

¹ *Joannes Camillus Gloriosus* Philosophus & Mathematicus, Professor Patavinus, vide *Toppii* Biblioth. Neapol. p. 142. & *Nicodem* Addit. pag. 118. Alter *Camillus Tutinus* sacerdos secularis Neapolitanus, qui propter satyrica scripta contra Hispanos coactus fugere Romam, ibi in miseria obiit. *Toppii*. Bibl. pag. 55. Tertium puto *Camillum Peregrinum* fuisse, virum doctissimum, de quo idem *Toppius* pag. 55. & *Nicod.* addit pag. 55. & nos nuper in praefatione ad Tom. ix. Thesauri Italici pag. 3.

² *Januarii Grossi* obiter meminit *Toppius* pag. 105.

conferendi laborem velit suscipere. Sed vix mihi persuadeo id permissuros ejus bibliothecae custodes. De Justino quod mones, non memini me videre codicem antiquum adeo inter libros Mediceos, & certe si vidissem, non praetermisisssem eum cum editis committere. De Nobiliss. *Donio* quod mones, illum non obtinere munus illud, quod credideram, gratias ago pro indicio. Nescio quis mihi persuaserit. Et certe ipse, dum haec scriberem, dubitabam. Utinam in eo non male conjecerim, non meo tantum sed & publico bono. Legi poemata tua magna cum voluptate & desiderio. Petis ut, quid de iis sentiamus, perscribam: verum cum nolis auribus tuis aliquid tribui, imperas nobis silentium. Nihil ego auribus tuis darem, siquid in iis minus fuisset laudabile: nunc vero cum id longe aliter sese habeat, non debet operum tuorum perfectio obesse, quominus sincerus tibi videar esse amicus. Sed non nos tantum musas tuas merito admiramur, verum eas etiam probant delicatissimi fastidii homines, quique non solent alia, quam sua solum in pretio habere. Ego post Ignatium nihil in lucem dedi, nisi paucula quaedam in historia Patriae; cujus mihi scribendae onus imposuere Ordines nostri. Bibliothecam meam multis auxi MS. Emi illos, quos olim possidebat Medicus Reginae Bohemicae. Multos quoque accepi ex Germania, & plures exspecto. Verum de eo coram aliquando, ut spero, garriemus. Interim, tu Heinssi Clariss. valetudinis tuae rationem habeas quam diligentissimam, & si e re tua fuerit, fac ut te spoliis onustum Italicis reducem quamprimum videre contingat. Amstelodami MDCCXLVI. XIX. Decembris.

EPISTOLA. XIII.

ISAAC. VOSSIUS

*Nic. Heinssio.**Romam.*

Non doleo, Heinssi clarissime, periisse literas, quas tibi in Italiam discedenti exararam, neque enim quae in iis de Bibliothecis Italicis monueram, talia puto fuere, quin ea vel tua sponte, vel etiam aliunde melius cognoscere potueris; verum illud ex animo doleo eas, quoquo modo deperditas, visas tibi fuisse nescio quid frigusculi amicitiae nostrae attulisse. Nam cum nihil mihi quidquam carius pretiosiusque sit amicitia tua, non possum non gravissime ferre jacturam rei licet levissimae, & quae tamen tantum apud te potuerit, ut propterea minor tibi videar amicus. Num tabellarii incuria, an obitu *Reinstii*, an vero alio casu literae meae amissae sint, neque *Vicquesfortius*, neque ego dicere possumus: verum illud tibi affirmo, si quod literis non perlatis commissum est, literis posse emendari; licet non sim scribacissimus, contentus amicos animo potius, quam voce coluisse: centenis tamen aliis damnum istud apud te libens repararem. Magna vero me adfecisti voluptate, quod indicaveris te in-

Z z z z

cum-

cumbere coëmendis libris rarioribus, five editis, five etiam manu exaratis. Verum eorum, recte mones, magna Romae est penuria. Aliqua forsan crit copia Venetiis & Mediolani. Multum tibi propitiam habeas fortunam necesse est, si quid alibi reperias. Veterum cujuscunque generis nummorum admodum sum egenus; si quostamen habeam, libentissime illos tibi concedam. Verum nihil me aeque adficit, quam quod inscriptionum antiquarum studio tenearis. Multum ego illis delector, quoniam major earum mihi usus videtur, quam nummorum, licet istis plus debeant oculi. Pamphyliarum credo tibi apographum comparaveris. Erunt proculdubio inter eas aliquot pulchrae. Clarissimus *Holstenius* magnam jam copiam collegerat meliorum inscriptionum, cum Romae versarer, nec dubito quin interea temporis plurimum creverint. Innumeras quoque in unum congefist *Donius*. Illas mallem potius publico daret, quam vel Pandecten suum, vel Muscam veterum, vel observationes de penula, quamvis & illis capiar. Efficias quoque apud Cl. *Holstenium*, rogo, ut & ille tandem aliquando nobis det passionem B. Perpetuae, quam impensissime omnes exspectamus. Verum nunquid & alia ab eo habebimus? Gaudebo ubi quoque prodierint illa *Leonis Allatii*. Diu est, quod nescio quis (nisi is sit *Salmasius*) mihi retulerat de *Bulialdo*, id, quod ad te scripseram. Mirum cur *Junium Moderatum Nypsum* descripserit, cujus tamen plura exemplaria, vel in ipsa Gallia, habere potuisset. Alia certe ex ea Bibliotheca comparare sibi potuisset, quae nusquam exstarent. Majori credo delectu utetur in lustrandis Graeciae Bibliothecis, si quae usquam sint. Quod Martialem contuleris Vaticanum, ago gratias, mi Heinsi, ago gratias. Si quid ego pro te possim, vel nunc, vel posthac, utere opera mea pro arbitrio tuo. Epistolarum heroicum Ovidii, cujus Groningae exstare scriptum codicem indicaram, nondum nactus sum collationes. Credo amicum illum, a quo illas postularam, noluisse conferendi laborem suscipere. Post menses duos, nisi fallor, Frisiam adibo, & procurabo ut quoquomodo eas habeas. *Barlaeus* noster Poëmata *Intemelienfis* Monachi recte accepit. An etiam responsurus sit, nescio. Versatur ille in novo orbe, & brevi dabit librum de gestis Comitis Mauriti in Brasilia, cui magnitudine cedat Livius ingens. *Holstenio Allatioque* diu est quod miserim exemplaria libri Parentis de vitiis sermonis; uti etiam Ignatium meum, dubito, an jam ad eorum manus pervenerint. Curam eorum mittendorum susceperat *Petrus Lambecius*, cognatus *Holstenii*. Prodibit etiam intra aliquot dies liber Parentis de arte Poëtica. Neapolin credo jam videris, aut certe non diu exspectabis. Commodius illa hoc tempore, quam aestate, adiri potest, quando reditus est periculosior, propter nescio quam aëris antipathiam. Pax non ita certa est nobis cum Hispanis, atque vos istic creditis. Longius ab ea forsan recessimus, quam antehac arbitrati fueramus. Invident nobis Galli istam felicitatem. Obiit ante hebdomadem unam alteramque *Beverovicus* Medicus. *Boxhornius*, ut intelligo, mediocriter valet, & totus est in originibus Graecis Latinisque e Frisia accersendis. De Bibliotheca *Goldasti*, quam Bremae venalem proflare indicasti, necdum aliquid

rescire potui. *Rumfius* junior dixit mihi, te *Lucanum MS.* ab illo commodato tenere, illud nimirum exemplar, cui *Glossae antiquae* ad oram sunt adjectae: dubito an recte meminerit. Vellem certior fieri. Apud *Holstenium* vidi librum nummorum Sicularum *Philippi Parutae*. Vellem illum quoquo pretio comparares vel tibi, vel mihi. Ego tardius ad te scribo, quam debueram, quod per hebdomadem unam alteramque febricula laboraverim. Iterum de reditu tuo nihil mones. An inexpectatus forsan aliquando supervenies, ut nos majori gaudio perfundas? Mihi certe, qui semper tui sum memor, nunquam inexpectatus aderis. Vale, clariss. Heinsi, & viros summos *Holstenium*, *Allatiumque* plurimum salutes. Amstelod. c1010cXLVII. VIII. Martii.

EPISTOLA XIV.

ISAAC VOSSIUS

Nic. Heinsio.

Neapolim.

Nisi te ita amarem, Heinsi clarissime, ut nullus plane sinistro cuidam affectui locus relinqueretur, multum equidem inviderem tibi delicias & oblectamenta, quibus nunc tantum non ad satietatem usque frueris. Refers mihi *Pausilypum*. Nempe ut & mihi memoria tam divini loci voluptatem aliquam concilies. Gaudeo tuam fortem. Ego vero non possum sine dolore meminisse tam sacri nominis. Suavis est praeteritorum malorum recordatio: at vero ea, quae nobis jucunda aliquando contigerunt, animo revocare, id nunquam sine moerore fieri possit. Hoc te ne nunc quidem latet, utinam tamen id reipsa etiam quamprimum experiaris; neque id eo, quod aliquid tibi imprecer mali, vel quod gaudia tua velim minui, verum ut ea diuturna sint magis; imo perpetua. Quid enim si diutius moreris in oris istis felicibus non sordebit tibi, huc praesertim reverso, ubi de omnium elementorum iniquitate jure conqueri possis? Rogo itaque ne ista *Parthenope*, nec *Mergelline*, nec *Circe*, aut si quae aliae *Campanae* sint *Sirenes*, ulterius mentem tuam excarent. Redde te tandem Patriae, Parenti, amicis, imo & tibi ipsi. Nec tamen tua tuorumque desideria, tantum apud te possint velim, ut tempore hoc inopportuno te in viam des. Scio quam periculosum sit *Neapolin* relinquere hoc praesertim mense, ardente & coelo & solo. Expectandi erunt, nisi fallor, dies pluviales. Intermedium tibi interea tempus, sat scio, non peribit. Moram istam compensabit vel solus *Arusianus Messus*, & forsan non solus. Multum tibi literati omnes debebunt, quod istum autorem e tenebris erueris. Meminit ejus alicubi in castigationibus ad *Virgilium Piërius Valerianus*: Quod in nummis antiquis conquirendis tam bona utaris fortuna, & hoc quoque tibi gratulor. Magno alioqui opus est judicio in distinguendis istis metallis ve-

ris a fictitiis, quos magno indies numero procidunt verpi isti Romani, idque tanto artificio, ut saepe etiam peritissimos fallant. Multum quoque te amo, quod inscriptionum copiam congefferis. Earum ego usum potiore ducō, quā nummorum; licet illi plus oculos afficiant. Malum mihi adtulisti nuntium literis tuis, quod Passionem B. Perpetuae non ita cito videbimus. Utilissima mihi esset ea hoc tempore, quo mihi quaestio est cum *Blondello* de veritate Epistolarum Ignatii. Ostendi ei in omnibus eum esse nugatum, quae ad fidem earum epistolarum labefactandam in praefatione operis de Episcopis & Presbyteris scripsisset. Ubi iterum responderit, curabo ut scripta ista simul excudantur, quo eruditi de illis judicent. Si meae quidquam preces apud Cl. *Holstenium* possent, rogarem eum maximopere, ne nos ulterius tam pulcri & antiqui monumenti desiderio excruciet. Romam si revertaris, & Vaticanam iterum adeas, peto a te, ut inquiras, an illic habeantur Homiliae Origenis in Lucam Graecae. Si habeantur, quaeso, ne graveris, inspicere initium Homiliae Sextae, ubi Ignatii facit mentionem, & unicum tantum illum versum describere. Quoniam *Blondellus* propterea, quod istic Ignatius citetur, negat Homilias istas esse Origenis, sed Ruffini, somnia sua Origeni affingentis. Ego contrarium evincam, praesertim vero, si possim verba ea Graece habere. Ex affine Ampliff. *Goefio* intellexi, geminum te exemplar comparasse columnae Trajani; si alterum pro amico emeris; rogo ut tibi ego sim ille. Pretium vel affini tuo, vel cui placuerit, refundam. Patris istius Veneti libellum *Barlaeus* noster se accepisse jam olim mihi dixit, quamvis primo subdubitaret. Ab aliquo tempore in magno versatur periculo, ne in veterem suum incidat morbum. Nimium ad animum creditur revocasse obitum *Hoofdii* dynastae Mudani, cujus amicitiam prae omnibus caram habebat. *Rumfio* non impune erit, quod Lucanum MSptum apud te esse commentus sit. Si Neapoli etiamnum verferis, plurimum meo nomine salvere jubeas *Nicephorum Melissenum*, & *Chrysostomum*, Patres Augustinianos, viros optimos & humanissimos. Si vero Romam reversus fueris, officiosissime a me salutabis *Allatium Holstenium*que, quibus propediem mittam librum Parentis de arte poetica, & alia quaedam. Sin vero maritimo itinere Liburnum veneris, ubi Pisas & Florentiam videris, *Donio Gaudentio*que omnia mea officia deferas. Vale, Clariff. Heinfi, & me ames. Amstelod. MDCLXVII. xxv. Julii.

EPISTOLA XV.

ISAAC. VOSSIUS

Nic. Heinfi.

Venetias.

SI unquam mihi gratae fuere literae tuae, Heinfi Clarissime, certe nunc Squam. gratissimae fuere. Magna enim eae me sollicitudine liberarunt, cum
ex

ex iis te non vivere tantum, sed etiam recte valere intelligerem. Nam quales proh Deum, & quam improbi huc de te rumores sunt allati! quantos mœrores & luctus illi mihi dedissent, nisi prius aliter edoctus omnem plane iis fidem denegassem. Ante quippe jam certior eram factus ex literis, ad summum Parentem tuum scriptis, te Bononiam saluum sospitemque pervenisse. Tantum itaque non exhorruui, cum mihi narrarent etiam tuo sanguine expiandam fuisse nequissimorum hominum rebellionem & insaniam. Scias tamen me talia audientem non leviter fuisse commotum, utcunque enim aliter essem persuasus, talia tamen vel audire saltem non poterat non esse gravissimum. Riseris tu forsan vanam meam credulitatem, verum si etiam noveris, quam saepe plus possit apud amicum suspicio, licet intempestiva, quam ratio & veritas, non certe riseris. Ne itaque mihi tales unquam adferantur nuntii, nec mihi adfectus meus poenae potius fuerit, quam voluptati. Gratulor tibi adventum ad istos olim strenuos Milēsiōs. Eorū urbs si exspectationem tuam fefellerit, meam certe non minus fefellit. In carcere mihi somniasse videor, quamdiu illic fui. Literatum vel literarum amantem nullum plane inveni, nisi forsan duos vel tres (si bene memini) paedagogos famelicos, in quos si incideris, vae tibi. Martialem cum Vaticanis codicibus collatum, tibi & mihi periisse non doleo, nec ipse, si te amēs, dolere debeat. Voluptas, quam ex eo, quod ipse evaseris, concepi, non patitur, ut de iactura, quantumlibet magna, sim sollicitus. Agnosco interim beneficium, mi Heinssi, agnosco. Multum quoque tibi debeo, quod ita me vindices apud istos Italos, qui mihi ingrati animi vitium obijciunt. Apud nonnullos fateor vix me possim excusare silentii, vellemque sane aliter factum. Sed neque illi propterea me odisse debebant, si ego sola mente animoque erga illos gratus haecenus fuerim. Tu meos nostri mores, etiam cum pudore meo, nec tamen propterea me odisti. Ego vero ob id impensius te amare cogor, quia non tantum malis meis moribus veniam des, sed & aliis, idem ut agant, sis auctor: garrulis nonnullis si non pari semper garrulitate responderim, non multum curo. Eorum ego amicitiam & inimicitias juxta aestimo. Unus item & alter fuere, qui si me comiter exceperint, beneque de me fuerint meriti, mox beneficium istud perdiderunt nimia loquacitate sua, cui tamen ego nullam dederam occasionem. In coëmendis libris Bononiae gaudeo, quod tam bona usus fueris fortuna. De MSptis laceratis dolet. Sed tamen & inter fragmenta illa aliquid forsan bonae frugis inveneris. Venetiis proculdubio, si otium fuerit, invenies aliquid librorum, qui ad gustum tuum faciant. Sed majora ausim promittere de Mediolano. Est ibi aliquis bibliopola *Bidellus* nomine, qui tantam habet librorum copiam, quantam alibi videre non memini. Is ipse, nisi fallor, est, e cujus officina maxima pars Bibliothecae Ambrosianae est conflata. MStos tamen paucos, aut potius nullos, apud eum reperi. Sed tu, uti in omnibus, ita etiam hac in parte me felicior eris. Moraberis vero aliquanto diutius ea in urbe; nam & singulis diebus patet ingens illa Bibliotheca Ambrosiana, & invenies in ea, quae tibi, ut arbitror, placebunt. Vidi in ea exemplaria duo vel tria Martialis, quibus ta-

men

men non sum usus. Unum aliquot tantum locis inspexi, doluitque quod non permiserit tunc valetudo, ut integrum conferrem. Est quidem istud in charta scriptum, sed tamen egregias ex eo lectiones haurire est. *Perottus*, qui bonam commentariorum suorum partem orae adscripsit, etiam varias aliquas lectiones, ex aliis, ut puto, codicibus excerptas, addidit. An etiam bonae notae sint alii Martialis codices, id dicere non possum. Vidi in illa Bibliotheca Quintilianum uncialibus literis descriptum. Libros vero Graecos ineditos innumeros vidi. Catalogus codicum, qui exstant, ab imperito contextus est, cum vix tertiam librorum scriptorum partem contineat. Est etiam illic MStum Rufi Festi Avieni Periegeseos, cui additur Ora ejusdem Maritima, quam nosti, senariis conscripta. Vellem, ut horulam unam collocares huic postremo scripto conferendo. Licet codex sit chartaceus, aliquid saltem bonae frugis inerit. Est in eodem volumine, nisi fallor, *Gratius Poëta*, & nescio quae alia. *Holstenius*, quantum ex literis tuis possum colligere, videtur morem suum pristinum servare, & mirum in modum amans esse quietis & otii. Cognatus ejus & haeres, *Petrus Lambecius*, qui nuper lectiones varias in Gellium dedit, ad Romanam sese recepit Ecclesiam. Nunc altercantur de eo *Sirmondus* & *Mileterius*, quorum iste prior cupit, ut Jesuita fiat, alter mavult potius, quam hoc fiat, ut ad priorem revertatur haeresein. Literas tuas ad Clarissimum *Gronovium* prima, qua potui, occasione transmissi. Vocatus ille fuerat ad Professionem Hardervicenam, invitatus illuc stipendio mille florenorum. Sed postquam Daventrienses tantumdem illi polliciti sunt, mavult non migrare. Dolet ipsum excidisse spe edendae Annae Comnenae. Exemplar enim illud MStum, quod transmiserat *Holstenius* ad *Puteanos* fratres, obtinuit ab illis *Poussinus* quidam Jesuita Tolosae, cum non huic, sed *Gronovio* nostro tradere debuissent. Panegyricum, quem edidit ad Principem Arausionensem, nondum potui vidisse. Accepit pro eo munus satis liberale. Scire velim quid in Italia judicent de libro *Samuelis Boucharti* de Coloniis Phoenicum & posteritate Noachi. Tanti fieri audio Parisiis, ut ipsi illi, qui amicissimi sunt *Salmasio*, judicent illum unum esse librum, cui ipse debeat invidere. Audio *Petavium* scribere contra illum. Cathedram Bononiae tibi oblatam intelligo. Sed illa nimium angusta fuerit pro meritis tuis. Gratulor itaque, quod recusaveris. *Boxhornium* nostrum nemo quiverit revocare ex isto Scythiae eremo, non ipse tuus Pater, qui illum mallet potius ἀποσκυθίσαι. Totus est in laudibus Barbarissimae gentis, quaeque nihil hominis habet, praeter figuram. Ait illos non in terris tantum latissimum obtinere imperium, sed & in coelis longe lateque dominaturos: facilius enim eo posse penetrare integram legionem Scytharum, quam unum vel Florentinum vel Neapolitanum, quibus totis saeculis vix unus nascatur pius. Venetiis discessurus, non opinor, moraberis in urbibus illis, per quas est transitus Mediolanum euntibus. Videbis ibi *Livii*, *Pliniorum*, *Catulli*, & istius Principis poetarum natalibus nobiles urbes. Hac manent, illi olim fuere. An ea loca effoeta sint post tantos partus, vel an etiamnum similia producant ingenia, de eo aliquando coram. Bibliothecas me-

meliores nullas, ut opinor, in hoc tractu invenies, nisi forsan aliquae lateant apud importuosos homines. Mantuana olim est direpta a Germanis, a quibus mox redempta fuit paucis aliquot musti amphoris per Anglos nonnullos, qui praedam eam secum avexerunt. Sed & Mediolanensem Bibliothecam hoc modo crevisse arbitror. Si tibi tales occurrant praedones, quibus tam care possis vinum vendere, proculdubio oenopola fias. ¹ Epistolae isti Scioppianae, de qua scribis, respondebit Pater in secunda parte de vitiis sermonis. Sed modeste, neque enim scorpiacum reponet. Ante aliquot dies prodiit liber parentis mei de arte Poëtica. Mitterem tibi exemplar, si crederem id tibi gratum fore. Sed quorsum id facerem, nisi ut remitteres? Pro literis Clariss. *Donii* ad me missis gratias ago maximas. Rescribam ei proxima occasione, quoniam nunc tempus non patitur, ut ei dem apographum quarumdam notarum ex quodam libro MSto. Boethii de Musica. Tu vero, Vir Clarissime, si quos mei memores invenias, eos plurimum meo nomine salutes, & id quod facis, me amare pergas. CIOIOXLVII. Kal. Nov.

¹ Credo intelligi *Scioppii* animadversiones in *Vossii* librum de vitiis sermonis, Ravennae Anno 1647. & Amstel. 1666. editas, inscriptas *Matthaeo Defendio*; *Vossium* respondisse non reperio.

EPISTOLA XVI.

ISAAC VOSSIUS

Nic. Heinsio.

Venetias.

ANte geminas hebdomades misi ad te epistolam bene longam, Heinsii Clarissime, eodem vero tempore etiam altera tua epistola ad manus meas pervenit scripta Patavii xvi. Octobris. Pro illa, quae prius mihi fuit reddita, gratias egi proximis literis: pro altera nunc id ipsum ago. Interea etiam accepi literas *Gronovii* nostri, tibi exaratas, quas cum superiori hebdomade mittere animus esset, intellexi affinem tuum ampliss. domo abesse. Veritus itaque ne, si alteri traderem, minus tibi perferrentur, usque in hunc diem distuli eas tibi mittere. De lucernis *Smetii* nihil ad me rescripsit *Gronovius*: sed, credo, ipse in suis ad te literis ea de re agit. Mitto responsum ad Epistolas *Donii* & *Caroli Dati*, quas tuo beneficio acceperam. Spero te non in sequiorem partem interpretaturum, quod eas hoc eodem involucro incluserim, teque rogem, ut siquando ad alterutrum scribas, simul quoque meae perferantur. Si commodam aliquam scribendi Florentiam occasionem perspexissem, gravis tibi & molestus non fuisssem. Librum *Donii* de Musica tardius, credo, accipiam, nec tamen ideo minus erit gratus. Aveo videre musas tuas Italicas, Pausilypum dico, & Epicedium in Poëtam illum Florentinum, de quo ad me scribit *Datus*. Verum de his alias, nunc rogo ut excuses brevitatem: & boni consule, quod tam paucula verba tanto pretio redimere cogaris. Amstelodami. CIOIOXLVII. xv. Novembris.

Tom. III.

A a a

EPI-

EPISTOLA XVII.

ISAAC. VOSSIUS

Nic. Heinsio.

Venerias.

MAjori cum affectu quam voluptate legi literas tuas, Heinsi clarissime. Non permiserunt tot ac tanta funera integro me, uti solebam, frui gaudio. Movit me obitus *Servii*, *Nicii Erythraei*, aliorumque, quorum vidi scripta nonnulla: quoniam tamen neque literis, neque aliter, familiaritatem cum iis colui, ideo mihi facilius visa est jactura eorum, quam *Donii* nostri, cujus funus caeterorum omnium instar fuit. Nullum inter Italos novi, in quo tantus candor & doctrina concurrerent; nemo etiam erga me fuit humanior. Non solum benevole & peramanter me in aedibus suis semper excepit, sed & ipse quoque saepius me invisit, & in villam amoenissimam abduxit, & aliquamdiu detinuit. Non possum itaque non ex animo dolere fatum viri optimi & eruditissimi, quique etiam hoc nomine carior mihi est, quod te magni fecisse intellexerim. Utinam ipsi per fata licuisset absolvere opus illud inscriptionum, quod non possim dicere, quanto desiderio videre expetam. Non dubito quin id quamprimum daturus sit praestantissimus *Carolus Datus*, modo Florentiae typographum possit invenire. Quod si minus procedat, saltem in his terris non deerunt, qui talem thesaurum in lucem protrudant. Vix autem ambigo, quin tantum facile valeas apud *Cl. Datum*, ut alterutrum praestet. Vidi etiam aliquot inscriptionum spicilegia apud *Holstenium*, sed ab illo nihil posthac sperandum. Differt ille, credo, omnia sua in adventum Messiae Judaeorum. De *Plempii* obitu miror quis tibi indicarit. Reliquit ille quidem pro tempore suos Lovanenses, sed nondum inter mortales esse desiit. Inde proculdubio natus error, quod aliquis ad te scripserit Lovanio Plempium discessisse. Agit ille, nisi fallor, medicum Monasterii apud Legatos Hispanicos. Verum apud nos *Barlaeus* ante biduum morte repentina extinctus est. Vides itaque non in Italia sola mortem grassari inter viros doctos. Sarcinarum tuarum causa, quas Neapoli reliqueras, & ego sollicitus sum: vereor ut illae sint direptae, praefertim si in Romerianis fuerint aedibus. Quamvis ipse *Romerus* ad mercatores nostros scripserit, levissimum sese perpeßum esse damnum, aut potius nullum. De quo tamen multum hîc dubitatur, cum probe norint, quanto in eum odio plebs flagrarit ob conducta vectigalia. Avidissime omnes hîc scire desideramus, quænam tandem exitum habitura sit tragoedia haec, quæ in ista urbium pulcherrima non fictis personis luditur, cujusque tu principiis interfuisti. Quis credidisset ex corbe pomaria talem subito potuisse nasci rempublicam? De *Scioppio* quod novas iterum similtates quaerat, miror maxime. Uti iste homo vivens timuit semper, ut quem amicum haberet; ita etiam moriens cavere videtur,

detur, ne quis ipsi post mortem sit amicus. Bene vero actum, quod musas tuas Ausonias inscripseris viro egregio & vere generoso, *Cassiano a Puteo*. Gaudeo, cum video insignia quaeque opera insignibus dedicari viris. Pati vero vix possum viros quosdam etiam eximios, qui, ut aureos aliquot acquirant, insulis nescio quibus, & non tantum aeterna, quam tribuunt, fama, sed & vita, qua fruuntur, indignissimis monistis, labores suos inscribunt. Hoc quoque scio, te inter omnes istos personatos moriones, quos tempore hoc quadragesimali visurus es, ne unum quidem *Cassianum* reperturum. Verum quid de Bibliotheca Veneta, concediturne libertas ejus adeundae? Vix arbitror. Non poteris belluam istam expugnare, bibliothecarium ajo, hominem & in literis, & in omni vita plane rudem & barbarum. Tales asinos passim in Italia lyrae admovent, & bibliothecis praeficiunt. Caussam nondum adsecutus sum, credo tamen aliquam subesse: neque enim Principes Italiae, ut sunt acuti, frustra aliquid faciunt. Alexiadis edendae occasionem indignatur quidem *Gronovius* noster sibi praereptam, nescit tamen in quos facinus istud ulciscatur. *Puteanos*, *Jesuitas*, *Holstenium*, *Lambecium*, omnes suspectos habet. Seposuerat opus hoc ad ultimam aetatem, & decreverat omnibus eruditionis suae flosculis illud quam ornatissimum reddere. Dicit tamen se propterea nolle senescere. Adfuit nobis aliquamdiu, herique demum discessit. Rogabam eum, ut aliquid mihi literarum ad te relinqueret, sed negabat id fieri posse, nisi prius visa epistola tua, quam ego Daventriam miseram, ignarus de discessu ejus. Sed promisit sese quamprimum tibi rescripturum. Epistolas, quas ad *Donium Datumque* scripseram, miseris proculdubio: verum illae priores inutiles erunt magno meo cum dolore. Vellem itaque ut remitterentur, vel saltem gratia folii cujusdam, quod ex libro quodam MSto. excerpseram. *Blondellus* scripto meo pro Ignatio non respondit. Rogavitque me *Sarravius*, ne ulterius virum optimum vexem, cum tamen nihil acre in illum dixerim. Sed haec haecenus. Clarissimum *Rhodium* plurimum meo nomine salvere jubeas. Vale clarissime & eximie vir. Amstelodami CIOIOCXLVIII. XXVIII. Januarii.

EPISTOLA XVIII.

ISAAC. VOSSIUS

*Nic. Heinsio.**Venetias.*

ANtequam prioribus tuis responderem, etiam alterae mihi perlatae sunt a te literae, Heinsi clarissime. Quum enim hebdomadem unam alteramque Lugduni & Hagae abfuerim, facile, ut spero, ignosces, si nunc demum officio meo fungar. Dum ibi moror, legi poemata tua in Italia a te scripta & edita, quae mihi summus tuus pater communicavit. Nunquam ego aliquid a te non magnum & ingenio tuo dignissimum expectavi. Lectis vero iis,

Aaaa 2

omnem

omnem fateor spem & expectationem longe superasti. Non miror in illis versuum concinnitatem & euphoniā, non rerum pondera & sententiarum acūmina, non denique sermonis Latini elegantiam & nitorem, sed omnia simul. Pereant lutulenti isti urbis lutosae magistri, qui gentis nostrae carmina cerevisiam olere mentiuntur; cum tua nihil, nisi Veneres, Gratias & venustates spirent. Ipsi vero scribunt carmina luto suo lutosiora, aqua, quam bibunt, frigidiora, & scriptoribus suis fatua magis & insipida. Nec tamen omnes urbis istius poetas culpaverim, nec laudaverim omnes nostros. Habent enim & illi, quos suspiciam, *Menagium* aliosque: habemus & nos *Plantam* & *Boyum*; sed ut quorundam laus caeteros culpae non eximit, ita nec paucorum crimen omnibus impingendum est. Sunt illi quod voluerint: tu vero, mi Heinſi, esto semper & patriae tuae gloria, & malevolorum invidia. Mense Martio demum te Venetos relicturum fuisse, satis potuissim conjicere, etiam nullo indicante. Operaepretium enim fuerit cum bacchantibus illis simul quoque bacchari aliquantisper. Eodem quoque tempore, nisi fallor, nempe bacchanalibus exactis, & ego Mediolanum olim me contuleram, sed me gravis morbus in itinere oppressit, quem an aestus solis, quem intensissimum illis diebus persenssi, abjecta praesertim umbella; an vero non bene servata adtulerit diaeta, ne nunc quidem satis dixerim. Illud interim certo scio, me in popina nescio qua Venetiis diu satis haesisse inter Germanos quosdam & Anglos, id est inter famem & sitim, nec alii rei quam ventri & gulae operam dedisse. Neque hoc eo refero, quod periculum tibi sit a simili consortio, verum ut exemplo meo monitus, valetudinem tuam semper cures, ne tibi ob immoderata studia contingat id, quod mihi ex nimio cibo potuque contigerit mali. Scio enim nunquam te esse otiosum, etiam cum maxime videris. Ne mediis quidem Bacchanalibus aliter te quam carmine luisse existimo. Proculdubio autem dedere ea argumentum vel hymno vel Satyrae alicui. Verum nonne etiam elegia aliqua celebraſti jacturam nobilis istius capillorum ſt ructoris *Campanii*, nuper admodum in finibus Venetorum a Turcis capti, & inter regia Regis Byzantini ſcorta emancipati, ut & officio eſſet Gallus, qui Gallus eſſet natalibus? Tumulum certe & epitaphium merentur partes illae, quibus olim, ut audio, multum valebat. Norunt hoc Principes Galliae matronae, norunt Polonicae; & etiam nunc, poſtquam ipſe non unam ob cauſam factus eſt inteſtabilis, ſi velint, poterunt teſtari. Quod ſarcinas tuas Neapolitanas recuperaturum te ſperes plurimum gaudeo. Utinam & bona aliqua fortuna Martialem tibi mihiſque reddiderit. Male ſit nequiſſimis furunculis, qui eum tibi ſublegerunt; utilior illis & convenientior reſtis aut laqueus erat futurus. Sed tamen everſo Neapoli Hiſpanorum imperio, & indulta priorum criminum venia, forſan eum poſſis recipere, cum illum tuto poſſit reſtituere, qui abſtulit. De antiquitatibus Veronenſibus quod monueris, gratiſſimum fuit. Vidi olim opus hoc, antequam extuderetur, tabularumque, quae librum exornare debeant, ſatis recordor. Bene vero actum, quod *Datio* auctor fuerit, ut inſcriptiones *Donii* quamprimum in lucem protruderet. Quod ſi poſſis efficere, ut auctaria illa Holſte-

steniana una excudantur, multum sane effeceris. *Pyrrhi Lighorii* nomen mihi notissimum est, scriptaque ejus nonnulla habeo. Tomos illos inscriptionum, qui in Bibliotheca Farnesiana exstant, saepius apud *Holstenium* vidi, & ipsum maximam longe partem inscriptionum suarum iis debere, & ego olim animadverti. Verum auctor non sim, ut tot simul opera jungas. Difficulus enim reperietur typographus, cum libri magni non nimium sint vendibiles. Opus *Donii* vel solum satis justae erit molis, & si invenerit typographum, qui id velit excudere, non deerunt, qui auctaria & spicilegia velint edere. Scis quam vili olim prostitit pretio labor ille *Gruteri*, qui nunc tam care dividitur, cujus rei recens admodum apud typographos est memoria. De inscriptionibus, quas habeat *Sixtinus*, nihil certi potui; ejus enim verbis non multum fido. Nosti hominem, si non de facie, saltem ex relatione *Gronovii* nostri. Erit sane quod gratulentur sibi cruditi, ubi vir iste supremum clausit diem; reviviscent enim multa egregia scripta, quae nunc secum sepulta servat. Sed ipsum longaeva manet aetas, quod cum multis insanis commune habebit. De morte *Boxhornii* non miror adeo constantes in Italia fuisse rumores. Miraculum multis videtur, quod vivat, cum desperatissimo morbo per integrum annum decubuerit. Fumo, ut scis, semper ille vixerat, fumo quoque revixit. Cessarent medicorum remedia, cessabat omnis spes; jamque ultima ei hora denuntiata fuerat; & ille haustu istius herbae novum quasi spiritum concepit, medicos omnes elusit, omnesque aegritudines, imo ipsam etiam mortem solo odore pelli posse ostendit. Correctiones tuas in Martialem probo, multumque etiam propterea te amo. *Holstenius* quum senis tuis literis nullum reposuerit responsum, fecit, quod facere solet. *Donio* olim nostro, aliisque ipsum hoc contigit. Si velis, ne tale posthac crimen committat, una id tantum via possis efficere, nempe si nunquam amplius scripseris. A Venetis ne ultra aliquid expectes. Magno credo illi beneficio te adfectum esse putant, quod eorum Bibliothecam semel videris. Mediolani omnia tibi ex animo fluent, praefecto praesertim ei Bibliothecae reverendo *Bernardino Ferrario*, viro humanissimo, & ita-
 lorum omnium longe doctissimo. De libris quibusdam in ea Bibliotheca alias ad te scripsi. Sed de his, cum Mediolanum veneris, fusius. Vale, clarissime & amicissime Heinsi, & *Rhodium* virum clarissimum, plurimum meo nomine salutes. Ejus in causa si quid possim, faciam quam libentissime. Amstelodami MDCCXLVIII. XII. Martii.

EPISTOLA XIX.

ISAAC VOSSIUS

Nic. Heinsio.

Quod augur optimus fuerim, nec frustra metuerim, vellem sane aliter factum, Heinsi clarissime. Malim ego non esse augur, quam tibi, tuique simili-

Aaaa 3

inilibus amicis (si quos tamen similes habeam) futuri aliquid mali praedicere. Cavebo, ne in posterum idem contingat; fausta omnia & felicia tibi praedicam, quorum vel ipsa expectatio sit jucunda, tumque demum optimum me vatem censeas licet, cum optima & gratissima tibi praenuntiavero. Jam vero antequam literis tuis certior fierem, etiam ampl. adfinis tuus aliquid de morbo tuo indicarat, qui me admodum perculit, quoniam persuasus eram a Parente tuo, bene te valere, dudumque Italiam reliquisse, ac propediem se literas tuas e Gallia expectare, neque enim rescivisse eum arbitror, te adversa usum esse valetudine. Male sit istis prandiis Venetis, quae tantum tibi fastidii adtulerint. *Mariotti* nomen pene exciderat. Sed unde isti homini tanta saturitas, qui ante paucos annos aeterna fame tabescebat. Saepius mihi miserationem movit, saepe etiam risum. Aderat ei ut plurimum alius quidam paedagogus brevior, qui Longinum Italice vertit, sed multo politior illo & minus turbulentus, quique tantum mihi profuit in emendis bonis libris, quantum alter ille obfuerit. Sed quid factum de libro, quem *Mariottus* iste scribere coeperat adversus historiam Tridentinam Patris *Pauli*? an tandem resipuit? Vides tamen quid non audeat supercilium paedagogicum. Ambrosiana proculdubio tibi bibliotheca placuit, propter multitudinem librorum & facilitatem accessus. Non soli, credo, Ovidio impenderis bonas istas horas, quas in ea transegeris. Rogassem te, si paulo maturius mihi in mentem venisset id, quod nunc peto, ut mihi procurares verba illa, quae de Joanna Papissa habentur in codice quodam MS¹ Anastasii Bibliothecarii, vel potius Damasi Papae (ut in veteribus libris vocatur) quem in ea bibliotheca olim vidi. Dixeram *Sarravio*, *Blondello* aliisque vitam ejus Papissae haberi etiam in hoc codice Ambrosiano; nunc vero quoniam quaestio illa, fueritque scortum istud nec ne, a multis agitur, & video fidem meam in dubium vocari, te ex animo rogo, ut paucula illa verba mihi transmittas. Quod si Mediolano discesseris, quod verum esse arbitror, quid obstat, quominus etiam opera alicujus amici ea possis procurare, cum certo sciam, neminem esse Mediolani, qui te norit, ac non libentissime tui ergo id sit factururus. Ego quamobrem non hoc ipse exigam ab amicis Mediolanensibus, causas habeo gravissimas, quas alias explicabo. Spero etiam te contulisse Rufi Festi oram maritimam, quod unice a te postularam, praesertim cum is paucarum sit labor horarum. Literas Clariss. *Gronovii*, quas ante duas fere hebdomades miserat, propter absentiam ab urbe, nunc demum tibi exhibeo. Intra paucos dies in Brabantiam tendo. Tu interim per Galliam reditum tuum maturabis, ita aliquanto invicem erimus propiores. Felicem illum diem, quo alter alterum dextra possit contingere, quod ut quamprimum fiat, hoc votum est tui ex animo Isaaci Vossii. Amstelod. CIOIOCXLVIII. III. Kal. Quint.

¹ De hoc saepe Sarravius in Epistolis. verba Anastasii ex codice Regio exhibet Epist. cxxxviii. Vid. & Ep. clxxviii.

EPISTOLA XX.

ISAAC VOSSIUS

*Nic. Heinsio.**Leidam.*

CUM hesterno a nobis die discederet *Gronovius* noster, excidit nescio quomodo, ut scripta illa, quae a te habeo, cum reliquis ejus sarcinis compingerem, quod & ille permisisset, & ego libentissime praestitissem. Nunc id uno die ferius ago, gratiasque simul refero quam maximas. Pauca sunt ea, quae nos habemus ejus generis scripta, parva quoque sunt illa, quae a me proficisci possint, officia, qualiacunque tamen ea sint, non opus esse puto ut tibi offeram, cum abunde tibi constare putem, me meaque omnia non tua minus esse, quam nostra. Salutem rogo plurimam magno parenti tuo, & eximio hospiti dicto. Vale, vir clariss. & me ames. Amstelod. cicicxlviij. XIX. Nov.

Vellem per unum alterumque diem uti Virgilio, quem cum Mediceo codice contulisti. Si illum per Cl. *Gronovium*, vel quacunque alia occasione mihi transfunderis, summopere me obstringes. Iterum vale, vir eximie.

EPISTOLA XXI.

ISAAC VOSSIUS

*Nic. Heinsio.**Leidam.*

VENIT ad te, Heinsii clarissime, Magni *Casauboni* ¹ filius natus minor, Principi Walliae a Secretis. Desiderat is & summum parentem tuum, & te quoque videre & salutare. Non ausim tantum tibi nomen commendare, tum ne praesumptuosus tibi videar, tum etiam quod opus non esse putem tibi commendare illum, quem vel ob hoc solum commendatissimum fore scio. Ante biduum remisi tibi Arusianum Messum, & annotata in Avienum, cum altero illo MSto, quem mihi communicaveras. Spero te eos recepisse. Postulabam quoque eo in epistolio, ut mihi concederes per unum alterumque diem Silium tuum Italicum, quem cum codice MSto. contulisti. Nunc vero id ipsum etiam atque etiam rogo, & excusatam habeas peto libertatem meam, quod cum non possim de te bene mereri, porro me tamen tibi obstringere desiderem. Vale, vir eximie, & salve a tuo plurimum Isaaco Vossio. Amstelod. cicicxlviij. XXVIJ. Novemb.

¹ An ille sit *Jacobus*, quem Cl. Almelov. in vita Casauboni ultimam prolem facit, nescio, neque aliunde quidquam de hoc filio mihi constat, neque Almeloventius, praeter natales ejus, quidquam narrat.

EPISTOLA XXII.

ISAAC VOSSIUS

*Nic. Heinsio.**Leidam.*

Non opus esse arbitror, Heinsi clarissime, ut multis silentii mei rationem tibi reddam, cum comperta mihi sit humanitas tua, habeamque nunc causas justissimas, quibus me apud te possim purgare. Ab eo enim tempore, quo a te discessi, continuis incubui itineribus, donec in hunc tandem locum, unde nunc ad te scribo, perveni. Vix autem hîc deposueram lassitudinem, quam ex via contraxeram, cum mihi nuntiatus fuit tristissimus Parentis mei obitus, qui me ita adfecit, ut nihil minus cogitarim, quam de literis ad amicos exarandis, quas si ipse eo tempore ab iis acceperissem, fuissent sane maximo mihi solatio. Sed amicis forsân ad me scribendi defuit occasio, mihi voluntas; non quod non semper velim esse officiosissimus erga illos qua rebus, qua verbis; sed quia iniquum videbatur, eos, quos impensissime amarem, doloris mei facere participes; sufficere enim arbitrabar, ut solus lugerem. Nunc autem licet recente adhuc luctu, ad veterem redeo scribendi consuetudinem, idque non tantum sponte mea, sed & jubente Serenissima Regina, quae, ut miro omnium studiorum desiderio tenetur, ita imprimis poësi delectatur. Quantum ea in arte valeas, jam ex aliis cognovit; vult tamen etiam ipsa tua videre poëmata, existimatque sese in illis dignum tanto patre filium esse reperturum. Mittas ea ergo rogo prima, quae sese offerat, occasione, & consequeris gratiam Serenissimae Regiae Majestatis. Non autem vult, ut carmen aliquod in laudem suam mittas, sed ea poëmata, quae jam olim Parisiis & Patavii edideris. In quo quidem an parendum sit Majestati ejus, tuo relinquo arbitrio. Id tantum tibi adfirmo, si Principem hanc noſſes, habiturum te ampliorem carminibus materiam, quam tibi unquam contigerit vel contingere possit; nam neque majus, neque amabilius, neque divinius quidquam toto orbe reperiri posse existimo. Vale, vir clarissime, magnumque Parentem tuum plurimum meo nomine salutes. Animus erat etiam ad *Gronovium* nostrum scribere, sed tempus non patitur, ut id nunc faciam: rogo itaque, ut ei significes, illum commendatissimum esse Serenissimae Reginae, eamque summopere exspectare ejus Senecam. Sed & hoc quoque pene, mi Heinsi, exciderat, desiderari quoque ab ea editionem Ovidii tui & Claudiani; magis tamen Ovidii, quem unice deperit. Iterum vale. Stockholmiæ CIOIOCXLIX. scripsi celerrime. Kal. Maj. CIOIOCXLIX.

EPISTOLA XXIII.

ISAACUS VOSSIUS

*Nic. Heinsio.**Leidam.*

TArde admodum literas & poëmata tua accepi, Heinſi clariffime. Ex quo enim ad te ſcripſeram, tres fere abierunt menſes, antequam ea hue perlata ſunt. Tradiderat ea affinis tuus *Appelbomio*, is autem commiſerat nobili Suedo, ille iterum nautae; ita dum multorum contrectantur manibus, moram non exiguam in itinere paſſa ſunt. Ut vero mihi redditus fuit faſciculus ille, obtuli ſtatim ſereniſſimae Reginae carmen, quod mittis, moxque etiam alia tua poëmata. Admodum autem ea placuerunt incomparabili huic heroinae, & quamvis recentium poëtarum carminibus valde mediocriter delectetur: continua enim Graecorum Latinorumque veterum lectio reddunt eam nimium delicatam, tuas tamen Muſas non benigniter tantum excepit, ſed & legît, & laudibus non vulgaribus extulit. Gratiffimum itaque ſibi fore ſignificavit, ſi, quod in literis tuis promittis, facias quoque, praefentemque te aliquando ſiſtas: ipſa viciffim beneficentiam benignitatemque ſuam pollicetur, facturamque, ne unquam ſuſcepti itineris poenitentiam habeas. Sed quid opus eſt iter tuum differre in feſtum coronationis? Integer exſpirabit annus, antequam tempus iſtud adveniat. Adeone tibi breve hoc intervallum videtur? Si noſſes divinae illius Principis virtutes, aliter ſane faceres, vel hoc ipſum ſpatium carum te reddere poſſet. Praevertas itaque tempus iſtud praeftitutum, atque ita exiſtimes, adventum tuum, quanto fuerit celerior, tanto quoque gratiorem fore ſereniſſimae Reginae. ¹ *Paganinum Gaudentium* in Italia obiſſe moleſte fero. In multis negotiis utilis mihi eſſe potuiſſet impoſterum opera illius viri. *Spanhemii* quoque mortem ex animo doleo. Multum in eo perdidit Academia veſtra, ſed tamen, ſi verum ſit, quod intellexi, *Bouchartum* venturum, non minor debet eſſe laetitia de tanto ſucceſſore, quam luſtus de fato alterius. Claudianum tuum brevi lucem viſurum eſſe ſane gaudeo. Senecae quoque Gronoviani editionem quod urgeas, & hoc quoque gratum eſt. Non poſſum dicere, quam auctores illos avide exſpectem, uterque enim & ingenio & eruditione veſtra jamdudum indigebat. Multum quoque tibi debeo pro officiis praefſtitis matri meae, & pro luculenta voluntate minuendi dolorem noſtrum, quam in literis tuis oſtendis. Et tibi quoque, mi Heinſi, ſi quid unquam injucundum contigerit, ne deſint, rogo, qui te tam bene ſolentur. De gemmis & nummis Cardinalis *Boncompagnii* comparandis ſerio cogitavit Regina. Sed hoc tempore neminem habet in Italia, qui res ſuas agat. Italis autem quis tale negotium

¹ Vid. Epist. Gronov. cccclxxiii. de eo legenda Naudaeana pag. 90. & addit. pag. 212, Tom. III.

gotium committat? Interim si sine fraude & fallacia possit comparari iste thesaurus, adfirmavit sese emturam. Posset hoc negotium pulcre curari per *Cassianum a Puteo*, cujus viri probitas & generosa indoles etiam hîc est notissima. Bene autem feceris, si istius Musei indicem tibi comparaveris, quem huc transmittas. Si alicubi in Italia Bibliothecae librorum manu scriptorum exstant venales, & hoc quoque explores, rogo. Sed hîc cogor abrumpere, plura itaque alias. Vale, clarissime vir, & maximo parenti tuo omnino mea officia offeras. Holmiae. XIV. Aug. CIOIOCXLIX.

EPISTOLA XXIV.

ISAAC. VOSSIUS

Nic. Heinsio.

Hamburgum.

GAvisus sum plurimum, ita ex animo processisse iter tuum, ut bidui spatium Norcoppingam adtigeris. Spero reliquum, quod superest viae, simili te celeritate & fortuna absoluturum. Et jam forsân, dum haec scribo, non longe a Dania abes. Quod si sit, & sane existimo, nescio an te meae literae in via poterunt offendere. Neque enim diu, ut opinor, aut Hafniae, aut Gotorpii, aut Hamburgi commoraberis. Quod si tamen eae ad manus perveniant, priusquam ad tuos fueris reversus, peto ne obliviscaris sedulo inquire in libros MStos¹ Bibliothecae Ducis Holsatiae, in qua optimos adservari codices probe nosti. Rogo etiam ut memineris librorum venalium in Cathedrali Ecclesia Hamburgensi, & eorum, quos reliquit *Lindenbrogius* Amplissimum virum D. *Langermannum* plurimum meo nomine salutes, scribam ad illum proxima occasione. Poteris illo sequestro nancisci codices illos, vel saltem catalogum eorum. Postremae literae, quas ex Hollandia accepi, nuntiarunt nobis mortem *Scriverii*. Significavi hoc serenissimae Reginae. Jussit itaque illa, ut significarem tibi, ut quoquo modo codices ejus manu exaratos emereres. Pecunia, quae ad hoc tibi opus fuerit, quamprimum remittetur. Ubi eos comparaveris, tradas obsignatos *Apelbomio*, cui, quid facto opus sit, indicabitur. Misit jam tertium vel quartum ad Regiam nostram literas ejusdem argumenti² *Berlicomius* quidam. Non novi hominem, sed ex literis, quas tibi transmittito, adparet esse paedagogum pinguem & obesum. Excipias eum pro meritis rogo. Litteras *Cassiani a Puteo* exhibui, ut jusseras, Reginae. Retinuit illa

¹ Vid. Epist. cccxvi. ad Gronovium.

² Quis ille sit nescio, sed *Andream* quemdam *Berlicomium* edidisse A. 1656. librum de rerum naturalium gravitate, pondere & impressu, video ex Biblioth. Lippenii: quia vero ille liber Rotterodami impressus est, & sequenti epistola Rotterdamentis ludi magister dicitur, videtur ille fuisse. sed an filius fuerit *Balduini Berlicomii*, a *Valerio Andrea* memorati, aut eum aliqua cognatione attigerit, non certo mihi constare fateor.

illa sibi epigramma inclusum *Holstenii*, & folium exiguum, continens non catalogum nummorum, sed brevem tantum descriptionem. Vellet Regina ipsum videre catalogum: postulat idcirco, ut eum cures afferri per cursores, nam mari nimium tardum fuerit negotium, praecipue cum sit periculum in mora. Atque haec quidem hactenus, plura ubi in Hollandiam veneris. Vale. Raptissime xvi. Martii. c1010CL.

EPISTOLA XXV.

ISAAC VOSSIUS.

*Nic. Heinsio.**Leidam.*

GAudeo ex animo tam te feliciter emensum esse tractum illum horribilem, ut vocas, quem vix firmissimus quisque tantillo spatio absolvere potuisset, hoc praesertim anni tempore. Miratur quoque Domina nostra potuisse te tam celeriter trahere corpus tam infirmum & imbecille, quod alii vix e lectulo movere potuissent. Non possum vero tibi reticere, mi Heinsi, quam magna cura & sollicitudine liberatus sim, nec tamen omnino. Nondum enim Dominam nostram reliquit febris, quae eam & heri & praeterita nocte exercuit vehementissime. Mitigata vero est plurimum, &, ut spero, nunquam revertetur. Si id tamen certe mihi constaret, jam *συνήεια* te poscerem, versus nempe aliquot pro reddita salute & Dominae & nobis, quibus meditandis satis in itinere est otii. Quam autem vellem carminibus tuis illam posses addere vim & efficaciam, quam Homericis inesse versibus olim nonnulli putabant, quibus febres & alia id genus mala facto emplastro tollerentur. Absit tamen imposterum, ut ejus rei experimentum facere cogaris. Prioribus literis praefestatione omisi includere epistolam Roterodamensis Ludimagistri, & alteras *Cassiani*. Eas nunc hîc habes, uti quoque syngrapham *Meissii*, quam hîc vides. Aliter hoc negotium non potui, quamvis etiam plures allocutus sim, ipsumque etiam *Ludovicum de Geere*. Sed de his sequenti occasione vel etiam coram. Nam post duas hebdomades vestigia tua legam. De libris *Scriverii* cordi tibi erit, quod proxime clapsa scripsi hebdomade. Vale, & me ama. Ego quidem amare te nunquam cessabo. Holmiae xxii. Martii c1010CL.

EPISTOLA XXVI.

ISAAC. VOSSIUS

Nic. Heinsio.

Amstelodamum.

Reddita mihi est epistola tua, qua saluum sospitemque te Hafniam pervenisse significas. Fuiſſet mihi illa, uti omnes tuae, jucundiffima, ſi ullum voluptati locum reliquiſſet adſtrictiſſima Dominae noſtrae valetudo. Indicavi tibi praeterita hebdomade initium morbi, verum ita interea accrevit hoc malum, ut ne quidem explicare illud ſiccis oculis valeam. Nulli unquam vitam ita gravem fuiſſe exiſtimo, atque mihi tota hac fuerit hebdomade. Omnia ego tormenta perpeti malim, quam ut tales mihi unquam recurrant dies. Nudius demum tertius coepi deponere ſollicitudinem, ſi quidem tum certa futurae ſalutis ſigna apparuerunt. Tunc demum ſpiritum recolligere, & iterum vivere incepti: neque enim aliis illis diebus me vixiſſe exiſtimo, aut ita ſane vixi, ut ipſe nescierim, nam & amens, & excors, & ſine ſenſu mihi fuiſſe videor, licet infinitos ſuſtinuerim dolores. Quanto tu felicior, mi Heinſi, ad quem tanti mali ſenſus non ante pervenit, quam & ſimul intelligeres, quod te ſolari poſſet. Quamvis autem non omnino abſit febris, cum tertio quoquo die revertatur, intantum tamen mitigata eſt, ut jam omne periculum abſit. Spero me ſequenti hebdomade ſignificaturum, ipſum etiam abeſſe morbum. Jam vero ut ad tuas redeam literas, gratum feceris Sereniſſimae Reginae, ſi libros *Lundii* quoquo modo comparaveris, ſi alicujus tibi eſſe pretii videantur. De libris *Scrivarii* id ipſum ſignificavi praeteritis literis. Verum de ſimilibus fuſius tecum coram. Omnino enim in Hollandia te videbo, antequam huc revertaris. Habeo nonnulla, quae te ſcire velim, non quidem illa magni momenti, ſed tamen quae libenter intelliges. Literas *Caffiani* cum fasciculis adjuſtis aperui ut juſſeras. Catalogum nummorum vidit Regina noſtra. Plerique ſunt Romani, & quidem Caesarum. Conſulares nulli, uti neque Graeci, niſi forſan altera catalogi pars, quam ſequenti promittit hebdomade, eos exhibeat. Syngrapha *Chriſtiani Meyſi* proculdubio ad manus tuas perveniet, alteram ipſe nunc tranſmitto, una cum literis *Puteani*. Hoc ipſo momento, quo haec ſcribo, redditur mihi Seneca, & literae *Gronovii* & *Rottendorſii*. Tempus nunc non ſuppetit, ut illis respondeam: faciam hoc ſequenti occasione. Aliud quod ſcribam jam non ſuccurrit, niſi juſſiſſe Reginam noſtram, ut tibi plurimam nomine ſuo ſalutem adſcriberem. Vale, & mei ſemper memor eſto.

Literarum ad te fasciculum ut juſſeras, aperui, idque in praesentia Chriſtiani *Meys*. Reperi in eo folium Claudiani, allocutionem maximi parentis tui ad Reginam, & folium complicatum, quod ſtatim judicabam eſſe epistolam affinis

nis tui. Itaque mox obsignavi eam, tradidique mercatori huic, tibi remittendam. Allocutionem vero obtuli Reginae. Sed illa jam se eam vidisse, te ostendente, mihi significavit.

EPISTOLA XXVII.

ISAAC. VOSSIUS

Nic. Heinsio.

MUltum gaudeo, quod catalogum transmiseris MS. codicum, qui adservantur in bibliotheca Ducis Holsatiae. Videram olim magnam eorum partem, sed propter festinationem ipsa etiam nomina exciderant. Vellem etiam misisses catalogum librorum *Lundii*, quem promittis. Nondum occasio sese obtulit, ut de eo alloquerer Reginam: vix enim est hora, quod mihi tuas literas adtulerit *Meissius* noster. Reliquam partem catalogi nummorum transmisit *Puteanus*. Litteras ejus mitto. Catalogum ipsum vel mecum feram, vel per primum nautam transmittam. Regina nostra adhuc decumbit tertiana, spero tamen eam jam extra periculum versari. Plura ut tibi scribam, tempus non permittit. Sequenti hebdomade pluribus tecum agam. Vale, Dn. Silvercronium plurimum meo nomine salutes.

EPISTOLA XXVIII.

ISAAC. VOSSIUS

*Nic. Heinsio.**Romam.*

AD singulas tuas haecenus respondi, Heinsi clarissime. Ad illas tamen, quas a priori a te accepi hebdomade aliquanto *λακωνικώτερον*, quam ad reliquas, si bene memini. Omnes vero tuas ostendi serenissimae Reginae, & gratae admodum fuerunt, illae vero gratissimae, quas postremo exarasti, quibus subjunxisti indiculum meliorum codicum Bibliothecae Bremensis. Vides me non falsum fuisse, qui tibi jam olim retulerim armarium illud, quod contineret libros MSptos *Goldasti*, non esse valde magnum, sed tamen optimis libris refertum. Ego certe longe majoris eos facio, quam illos, quos vidisti in Bibliotheca Ducis Holsatiae, licet longe plures sint numero. Quod autem postulas, ut tibi Catalogum transmittam librorum Chymicorum, qui exstant in bibliotheca Dominae nostrae, in eo sane vix possum tibi morem gerere. Quid enim merui, ut me ad metalla damnares? Non te fugit innumerabilem esse librorum talium copiam, quorum vel index magni instar libri sit futurus. Cui & hoc addas, quod Teutonice vel Boemice sint conscripti, quam ego scripturam non adse-

quor. Praecipuum vero quod te scire velim est illud, quod non sim Germanus. Plane ineptus sum ad talia officia, defunt enim mihi omnes istae virtutes, quae ad *πινακογραφικὴν* requiruntur. De libris vero *Scriverii* allocutus sum serenissimam nostram Dominam. Quodcunque optimum esse censueris, id plane tuo relinquit arbitrio. Sed verum est id, quod refers, illam nullo loco habere libros, qui historiam Belgicam adtinent. Si non possunt seorsim comparari MSpti, optimum Dominae nostrae videtur, ut exspectes tempus illud, quo publica auctione distraherentur: tum enim aequissimo poterunt haberi pretio. Quod si discesseris, antequam tempus illud advenerit, possis alteri curam relinquere. At de his brevi coram, ut existimo. Regina enim nostra jam convalescere incipit. Si carmen aliquod composueris in receptam valetudinem, proculdubio id gratum erit futurum. Vale, clarissime vir, & magnum parentem tuum plurimum meo nomine salutes.

EPISTOLA XXIX.

ISAAC. VOSSIUS

*Nic. Heinſio.**Leidam.*

ET ex tuis, & ex illis, quas a cognato meo *Junio* accepi, intellexi dedisse te etiam alias ad me literas, quae priori hebdomade reddi debuerant. Nondum tamen eae ad manus meas pervenerunt, ideo credo, quod eas *Apelbomio* tradiderit *Junius*, ille vero nautae. Nauta vero heri huc adpulit, verum quia navis ejus adhuc in portu Thaleræ commoratur, nondum potui literas tuas obtinere. Spero tamen me habiturum eas vel cras, vel perendie. Quod autem iter tuum adtinet, cujus mihi rationem perscribis, gaudeo id tibi tam feliciter successisse, simulque deum rogo, ut tibi non minus facilem & jucundum largiatur reditum. Inclusas vero ad Reginam reddidi eodem, quo eas accepi, momento. Fuere autem ei gratissimae. Verum & quas ad me scripsisti, communicavi serenissimae nostrae Dominae. Perquam ei placuit, quod ita sedulam navaveris ubique operam indagandis libris & numismatis veteribus. Nondum ad singula responsum tibi mittere possum. Nam praeterquam quod necdum satis firma utatur valetudine Domina nostra, etiam hoc accedit, quod tot negotiis, tot salutationibus quotidie distinetur, ut de talibus colloquendi vel cogitandi vix otium aliquod superſit. Dixit tamen sibi curae fore, ut oblata occasione libros *Goldasti* suos faciat. Quod autem *Holsati* ducis codices adtinet, res erit aliquanto difficilior, praesertim cum libris, ut scribis, delectetur, eosque saepius eminus adspiciat. Quod si successerit permutatio illa cum *Oleario*, quem adfirmas brevi in Hollandiam venturum, jam ego multo te peritorem censebo in chymia, quam illum, licet professione sit chymicus. Tu enim aurum e re vilissima conficies, ille vero ex auro plumbum & nugae, imo nihil.

nihil. Aurei enim sunt revera codices quidam bibliothecae illius, sed hoc nemo resciverit non eruditus. At vero alii isti, quos vicissim spondebis, multo magis aurei, & illi, & duci Holsato videbuntur: nam & aurum promittunt, & auro amiciuntur; auratas insuper habent fibulas, auratas etiam imagunculas. Quod autem intellexisse te ais, multos exstare codices manu exaratos in bibliotheca principis istius Lunatici, id ipsum etiam aliunde intellexi. Sed & illic, ut opinor, frustra aliquid tentabis. Nam si tanto in pretio habeat ille & postillas & methodos, fieri non potest, quin carissimum ei sit, siquid boni inter libros suos esse cognoverit. Operae pretium tamen fuerit, ut adeas bibliothecam ejus, indicemque rariorum codicum tibi compares, cum non sit opus, ut multum a via declines. In Regis Daniae bibliotheca recte mones nihil reperiri praeter pulverem & sordes. *Zeveldi*: Bibliotheca satis est bona, sed non tantum liberali, sed etiam prodigo eget emptore. De libris Anglicis quod nihil sperare me jubeas, id me male adficit. Pereant isti nebulones, qui, quidquid apud eos est boni, carceri emancipant. *Scrivarium* revixisse ex animo gaudeo. Ejus enim generis homines merentur, ut quam diutissime posteritati suae interfint. Videris nihilominus, an vendere velit eos, quibus non amplius utitur, libros, cum & oculis orbatus sit, & ardor iste studiorum pristinus discesserit. De libris *Sixtini* & *Latii* alloquetur te cognatus meus *Junius*. Mentitur vero Livonus ille, qui dicit se in mandatis habere a Regina, ut libros illos emat. Non novit illa hominem. Nummos Siculos & Graecos *Wicquefortii* si emeris, credo id gratum fore dominae nostrae, sed de eo, & caeteris proxima te hebdomade certiore faciam, de singulis enim dominam nostram alloquar, si occasio tulerit. Respondebo quoque illis tuis literis, quae prius tradi debuerant, quas crastino, ut spero, die accipiam. Vale, mi Heinse, & maximum parentem tuum plurimum meo nomine salvere jubeas. iv. Maj. CIOIOCL. Holmiae. Postquam haec scripsissem, jussit Serenissima Regina, ut & parenti & tibi salutem suo nomine adscriberem plurimam.

EPISTOLA XXX.

NIC. HEINSIUS

Isaac. Vossio.

Lutetiam.

IN Bataviam te advenisse saluum, idque illo fere tempore, quo pedem inde moveram, proxime intelleximus. Quae quidem res ut mirae voluptati mihi fuit, cum de itinere tuo minus prospero multa hinc spargerentur, ita doleo & congressu tuo me fraudatum, & maluisse ex aliis, quam te ipso tam laetum a me nuncium intelligi. Ne arbitreris igitur silentium istud tuum laudem apud me promeriturum, loquacitate injuriam hanc vindicare statui: pluribus etiam acturus, nisi persuasum haberem, vix futurum, ut haec epistola in Galliis te de-

deprehenderet, cum constans rumor sit, in eo te totum esse, ut brevi nobis adsis. Nudius tertius huc perlata est Anthologia Latina cum Appiani Illyricis, quae clementissimae Principi nostrae miseras. Perlatum etiam Balzacianorum Poëmatum exemplar illud, quod offerri a me voluerat *Menagius*. Libera igitur amicum illum nostrum omni metu, si in illum forsan incideris. Multis tamen diebus tempestivius huc perlatum, quod ego ab Elzeviriis redemptum exemplar miseram. Fasciculum, cujus mittendi spem ultimis suis *Sarravius* faciebat, negat sibi visum Domina. Tu igitur omni cura hoc age, ejus desiderii ut respondeas, operamque des, ut aut fasciculus iste, quanta fieri poterit festinatione, huc mittatur, aut si missus jam est, & in via intercidit, de novo conquiras, quicquid libellorum continebat. In Bataviam ubi reversus eris e Gallia, memineris velim percunctari harum rerum peritos, quid Regiis ac Ducis Bucquingamii statuis ac marmoribus antiquis sit futurum, quae venalia proflare sunt, qui ferant. Cui hoc petam non ignoras, quo magis confido omnem a te diligentiam fore adhibendam, ut certi aliquid de re tota intelligas, nobisque proxime impertias. In auctione Sixtinianae Bibliothecae libros aliquot pro me emerat *Junius* noster, quos apud illum discedens reliqui, quod negaret de pretio eorum satis certo sibi constare. Petebam igitur, ut expensas in schedulam conjiceret, *Goesioque* una cum libris traderet, illum satisfacturum. Quid factum sit nescio, scribit tamen *Goesius*, caeteros a se libros nautae post discessum meum traditos, illis tamen exceptis, quos *Junius* non misisset. Parisiis si incidis in Gutherium de Jure Pontificio, Paschaliū de Coronis, Schioppii suspectas lectiones, Lambecii notas in A. Gellium, tum Tristani ac Sirmundi exiguum dissertationem de nummis antiquis a Cramoisis nuper editam, eos libros ut mihi compares rogo, de pretio nihil perdidideris. Catalogum numismatum Romanorum ab *Equite Puteano* missorum videre vehementer gestio, quem avexisse te intelligo. A *Gevartio* litteras tandem accepi, negat impetrari a *Moreto* typographo posse, ut codices suos manu exaratos vendat, vides itaque nihil hinc sperandum. Apud equitem *Wourvium* Hagae vidi paucis, antequam e patria discederem, diebus libros aliquot scriptos, sed qui ad Historiam gentis nostrae potissimum pertinerent. Duo inter illos extabant codices satis vetusti, e Monasterio Egmundano deprompti, quorum alter scholiasten Lucani antiquum, alter Aululariam Plauti versibus Elegiacis expressam, aliaque quaedam contineret. Eos aliis libris facile permutabis, cum a possessore non magni fiant. Haec festinans, cum comitiis spectandis intentus fuerim, quorum hodierno die auspiciū. Vale, & amicos communes saluta. Holmiae CIOICL. v. Julii Juliani.

EPISTOLA XXXI.

NIC. HEINSIUS

*Isaaco Vossio.**Parifios.*

Quaquam & tabellioni nuperrime literas ad te ferendas commiserim, & vix occurrat, quod nunc scribam, scribo tamen, mi Vossi, cum certum fixumque mihi sit, eo diligentius crebriusque te compellare, quo tu diligentius taces. Dominae nostrae valetudinem loco non malo esse, hoc primum intellectu gratum ac jucundum tibi fore confido. Distinetur illa nunc quidem gravissimis occupationibus, iisque tam continuis, cum alia ex aliis negotia se ingerant, ut respirandi locus vix detur: spero tamen futurum, ut sub reditum tuum intermissis studiis alacrius incumbat. De inauguratione nihil haecenus certi, ut causa deesse videatur, cur in patria aut Gallia deferendis praecipitem te praebes. Ubi certo tempus solennis festi decretum erit, tempestive te monebo. Allatum huc esse nuncium de marmoribus Regiis ac Buckinghamianis, vaenum brevi exponendis, aut jam expositis, proxime significavi. Omni igitur cura id a te agi velim, ut in rem totam diligenter inquiras, nosque quanta fieri possit festinatione certiores facias, quid hic sit sperandum. Sarcinae meae proximis diebus in hunc portum advenerunt, doleo iis additos non esse libros, quos in Sixtinianae bibliothecae auctione ut mihi compararet, Junium nostrum rogaveram. Nam de navi mox discessura in tempore illum monui, quo magis miror insuper ab eo habitam tam opportunam me demerendi occasionem: nisi quod facturum auguror, id quod factum non est haecenus. Congressu tuo me fraudatum in patria aegerrime tuli: erant enim super quibus compellatum te vehementer cupiebam, quaeque non ignorari tua fortassis interfuisset. Quanquam rumusculos istos hominum malignorum & contemni a te scio, & futurum, si eorum rationem habendam existimas, ut auctores facile per te deprehendantur. *Erpenium* conveni de re, quam nosti. Fassin mihi est à *Ludolforum* fratrum altero, quos *Rosenhanii* contubernales non nescis, accepisse se literas ruri scriptas, quibus indicaret intellectum sibi ex amicis, non deesse inter aulicos, qui male tibi vellent, quod Janitorem Linguarum palam traduceres. Hoc se in familiari colloquio uni mortalium *Boxhornio* narasse, non nominato tamen auctore, a quo id hausisset, neque unquam arbitratum se futurum, ut ejus rei quicquam propalaretur, cum tui studiosissimum se profiteatur. Reginae autem nullam in iis literis mentionem factam. An suspicatus sit *Boxhornius*, a me id perscriptum, non dixerim, cum ille neget rem ulli a se relatum, meive mentionem factam: si is rumoris auctor, per imprudentiam potius, quam malignitatem peccaverit. Plura ex ipso *Erpenio* intelliges, qui testabitur in meis ad se literis nunquam te nominatum. Vique-

fortianorum nummorum, qui Graeci omnes sunt, numero quadringenti maxima ex parte argentei, catalogum tibi exhibebit *Silvercronius*. Vide, quaeso, an operae pretium futurum sit ut redimantur: magni omnino a possessore fiunt, & meo quidem iudicio pluris, quam merentur. Si ante iter Gallicum compellatus a me esses, rogassem, ut quocunque pretio Parisiis comparasses mihi Thesaurum Linguae Latinae Lugduni anno saeculi superioris septuagesimo, ni fallor, tertio editum. Apud nos enim nullo modo haberi potest. Prostat quidem in officina Jansoniana exemplar, sed quod multis locis sit mutilum. Quid sperare nos jubeat *Gevarcius* de *Moreti* manuscriptis codicibus proxime perscripsi, idem aurem mihi vellit de Manilii prima editione, quam sibi a te promissam, nec oblatam queritur. Ovidii exemplaria Gottorpiana utinam excutere licuisset! Videbantur enim bonam de se spem concitare. *Sixtini* manu scripta omnia redemeris, ut spero. Habemus hic *Conringium*, virum sane egregium, & *Christianum Ravium*. *Boeclerus* etiam in hac urbe est, cujus negotium necdum compositum. Quid apud vos aut in Gallia rerum agatur, fac sciam. Imprimis autem operam da, ut valeas. Matri tuae, praestantissimae matronae, cognato *Junio*, caeterisque amicis salutem dico. Holmiae. Anno cıııııııı. Eid Julii Julianis.

EPISTOLA XXXII.

NIC. HEINSIUS.

*Isaaco Vossio.**Parisios.*

TERTIUM nunc ad te scribo, postquam Holmiam adveni, Vossi amicissime, quanquam omnem scriptionis materiam consumpserint priores illae literae, nec occurrat quod iis addam. In statuas Anglicas ut diligenter inquiras rursus moneo. Nimiam esse Dominam in negotiis regni sui tractandis & video jampridem, & aegre fero, praesertim cum valetudine sit, ut apparet, necdum satis confirmata. De inauguratione nihil certi haecenus intelligo. Eam plerisque amplecti opinionem video, diem solenni festo statum non fore decernendum, nisi post adventum Principis Palatini ex Germania, quem brevi expectamus. Legatus Lusitanicus hesterno die huc advenit. Codicesne ullos manu exaratos secum ferat non dixerim: sciam brevi. Meos Reginae obtuli. In Gallia quid tu effeceris desideramus scire. Utinam Petavianam bibliothecam tecum feras, spem enim esse intelligo de successu. Quicquid sit, bonae frugis inanem non adfuturum nobis confido. Vide, mi Vossi, an fieri ullo modo possit, ut Ovidianos Gottorpianae Bibliothecae codices in mensem alterumque obtineas, dum illac transibis. Me quidem mirum in modum istoc beneficio devinxeris. Vale. Holmiae. cıııııııı. xx. Julii Juliani.

Catalogum numismatum Romanorum quod abstulisti tecum, aut ablatum huc non

non remisisti, cum in Gallias proficiscerere, nolim factum. Nam & de nummis quid sentiam velit scire Domina, & responsum eques *Puteanus* urget, ne in alienas manus incidat hic thesaurus. Ego vero neutri possum satisfacere. Praesertim metus est ne id accadat, quod tu ac ego nolimus fieri, quorum interest, ut desideriis Dominae satisfiat.

EPISTOLA XXXIII.

NIC. HEINSIUS

*Isaaco Vossio.**Lutetiam.*

DE itineris Suecici successu, deque rebus, quas in his oris agam, scripsi jam non semel, mi Vossi: tibi quid evenerit ab eo, quo hinc discessisti, tempore non constat: nisi quod e Galliis jam reversum auguramur. De inauguratione regia nihil adhuc certi. Principem Palatinum ex Germania expectare pergimus; ubi venerit, plerique existimant fore, ut negotio finis imponatur: & certe, cum autumnus sit prae foribus, festinandum, aut solennia haec in aetatem proximam rejicienda: quod persuaderi sibi vix est, ut Regina patiatur. Quapropter hortor te, de reditu in has oras tuo ut cogites. Nam & Dominae rem gratam feceris, & tibi recte consulueris. Cum *Scrivario*, dum in Batavia essem, sedulo egi de vendendis, quos possidet, Reginae libris manu exaratis. Primo congressu exorandus non videbatur, faciliorem postea se praestitit, & nisi iter Suecicum intervenisset, de indice librorum conficiendo se cogitaturum promiserat, qui Dominae exhiberetur. Vide, quid tu apud illum possis efficere. De Ovidianis codicibus, quos Gottorpie vidi, monui proxime. Gratissimum foret, si usus utriusque in mensem alterumque mihi concederetur. Decrevi enim Ovidio manum ultimam hieme proxima imponere; scis quid Dominae pollicitus sim. Sed haec cum commodo tuo tu videris. Plura quae addam non habeo. Tu hoc age, ut & valeas; & brevi nobis adsis. Holmiae. CIOIOCL. III. Kalend. Aug. Julian. Nisi quid a te literarum proximus huc ferat tabellarius, nolo quicquam a me expectes posthac praeter silentium. Nihil enim reliqui jam, de quo nunc scribam.

EPISTOLA XXXIV.

NIC. HEINSIUS

*Isaaco Vossio.**Parisiis.*

PEtavianam a te bibliothecam emptam cum ex Domina nudius tertius intellexerem, mirum quanto gaudio perfusus sum, mi Vossi. Gratulor tibi to

to animo rem tam feliciter confectam: quanquam non tam gratulationes quam querelae, & quidem atrocissimae, forent expectandae, qui nulla me litterula dignatus sis haecenus, ex quo hinc discessisti. Sed crambem non recoquo. Cum *Scrivario* velim agas ante discessum de scriptis, quos possidet, codicibus Reginae vendendis: non enim videbatur ab hac re animus illi valde alienus paucis ante meum ex Hollandia discessum diebus: propter festinationem tamen non licuit finem negotio imponere: fieri hoc a te desiderat Domina, quo magis rem curae tibi fore confido. De caeteris jam ante scripsi. De Polybio Bremensi memineris rogo, deest enim solus ferme is auctor mihi ex scriptoribus antiquis meliorum temporum. *Salmasius* hodierno die huc advenit, ut audio. Libros, quos *Junius* noster in auctione bibliothecae Sixtinianae mihi emerat, magna ex parte accepi. Miror inter illos non comparere, *Piecarti Pericula Critica*, *Dausquei* notas in *Q. Calabrum*, *Ferrarii* in *Claudianum* nunquam mihi visas, *Metamorphosin* *Ovidii Aldini*, *Plinii* epistolas tam ex editione *Casauboni*, quam *Claudii Minois*, ejusdemque *Minois* in *Ausonii Idyllia* duo aut tria observationes. Horum enim plerosque *Junius* a se emptos mihi exhibuerat, sed ait *Goefius*, non omnes tum nescio qua de causa se accepisse. De inaugurationis die adhuc disputatur. Ego auctor tibi sim, ut itineri te committas, ne secus huc venias. Matri tuae, amplissimo *Beuningio*, *Junioque* ac caeteris amicis ut me commendes rogo. Extremum quod te alloquor hoc est. Vale. Holmiae. MDCLXVII. Aug. stilo Juliano.

EPISTOLA XXXV.

ISCAAC VOSSIUS

Nic. Heinsio.

Leidam.

Non possim dicere, mi *Heinsi*, quam injucundus & ingratus mihi contingerit ille, qui paucis post discessum tuum de te huc allatus fuit, nuntius, impegisse te gravissime in palum, bis cecidisse in aquam, & adstrictum glacie in tabernam fuisse delatum. Addebant quinetiam spoliatum & exarmatum fuisse te a nequissimis quibusdam rusticis. Sed tamen cum scirem gladium excidenti tibi hac urbe excidisse, nec viderem quomodo postea exarmari potueris, suspicatus sum statim, animi gratia haec fingi, vel in majus saltem extolli. Suspicionem meam non parum augebant lepidissimae illae, quae de famulo tuo narrabantur, fabellae; quomodo nempe inscius in nives deciderit, & tamen se progredi existimarit, quomodo deinceps, ubi errorem suum cognovit, in tam profundos inciderit cachinnos, ut aurigam & comites inclamare fuerit oblitus, & quemadmodum ubi ad se rediit, vox ei fuerit congelata: haec inquam atque similes nugae, id tantum efficiebant, ut neque illa, quae de te narrabantur, crederem. Sed tamen cum & ipse in literis *Rhensburgi* in *Dania*

nia exaratis, damni alicujus a te perpeffi facias mentionem, invitus cogor & ipse credere ea, quae facta esse nollem. Spero autem reliquum itineris feliciter, & ex animo tibi processisse. Valde itaque primos ex Hollandia nuntios exspecto, qui me & de tuo, & de *Silvercronii* adventu certiores faciant. Ego ex sordibus & pulvere librorum tandem emerfi. Omnia siquidem jam in ordinem digessi, neque superest quidquam, quod Bibliothecae addatur, nisi ea tantum, quae ad ornatum pertinent. De libris *Stephanii* agam cum *Stirnhelmio*. Epistolum tuum communicavi Serenissimae Reginae, uti omnia tua facio. Porro si quid sit, qua in re putes operam meam posse tibi esse usui, utere ea pro arbitrio tuo. Vale, & summum parentem & amplissimum adfinem plurimum meo nomine salutes.

Inter literas, quas tibi remisi, una (nisi me fefellerit manus) erat *Equitis Puteani*, vellem scire, nunquid ille aliquid de *Holstenio* rescripserit, miror enim nondum me ab eo aliquid accepisse responsi. *Silvercronium*, rogo, plurimum meo nomine salutes, scribam ad eum proxima occasione. Vale & me amare perge. xv. Martii. CIOIOCLI.

EPISTOLA XXXVI.

ISAAC. VOSSIUS

Nic. Heinsio.

Leidam.

Accepisse me priores tuas literas, quas in Holsatia scripsisti, jam ante duos tibi significavi hebdomades. Quamvis autem longe fuerint gratissimae, multo tamen gratiores & jucundiores fuere istae, quas ante horam demum tradidit mihi *Wullius* noster. Ex iis siquidem certior factus sum, saluum te & sospitem in Bataviam rediisse, de quo valde eram sollicitus, cum propter adversam tuam valetudinem, tum etiam propter vulnus, quo te in itinere affectum esse intellexeram. Valde quoque amo te, quod tam multa docueris me ad rem literariam pertinentia, quae quantam mihi legenti voluptatem adtulerint, nunquam satis possim exprimere. Bibliothecam *Stephanii* quod adtinet, de ea nihil certi possum rescribere. Exspectat Serenissima Regina ex Gallia aliquot Bibliothecas satis instructas libris editis, inter quas etiam erit illa, quam nosti, *Memmii*, quae ubi huc una cum aliis advecta fuerit, tum, ut puto, minime indigebimus illa *Stephanii*. Observationes antiquarias *Vlitii* valde avide exspectabo, neque dubito, quin erunt gratissimae Dominae nostrae. Sed ex quo tempore *Gronovius* noster Historiae Ecclesiasticae animum adpulit? Certe nihil a quoquam unquam minus, quam ab hoc amico nostro talis argumenti scriptum exspectassem; non quod existimem ingenium ejus minus esse aptum ad sacras, quam ad alias materias pertractandas, quid enim de illo credere non possimus? sed quia arbitrabar illum haec studia in ultimam aetatem

Cccc 3

sepò-

seposuisse, nec ita celeriter transire potuisse a Caesare, Livioque suo, ad illos scabrae eloquentiae & injucundae historiae compilatores. Admodum itaque me beaveris, si tuo beneficio libellum istum quamprimum videre possim, illudque pro certo habeas me quidem scriptum *Vlitii* valde expostulare, illud vero *Gronovii* ardentem desiderare. Manilium ex prima editione quamprimum mare sit navigabile tibi transmittam, ut eum tradas *Gevartio*. De *Scriverii* MSptis vellem aliquid certi nobis rescriberes. Valde puto gratum fore Dominae nostrae eorum catalogum, si istum possis nancisci. De *Boxhornio* miror quod scribis. Illius sane me miseret, post tam longum morbum nondum tamen convaluisse. Theocritum jam transmisissem *Elzevirio*, si per me stetisset. Sed exemplar illud, quod cum variis codicibus contuleram, cujusque orae annotata mea commiseram, in itinere Ubsaliensi perdidit serenissima Regina. Novi hinc nihil possim rescribere; nosti enim ingenium meum, quam id sit parum rerum novarum cupidum. Si tamen aliquid dignum auribus tuis imposterum intellexero, faciam te semper certiores. Vale, mi Heinse, talemque meum erga te animum esse scias, ut amantior esse non possit. CIOIOCLI. IX. Aprilis st. N.

EPISTOLA XXXVII.

ISAAC VOSSIUS

Nic. Heinse.

Leidam.

Non possum dicere, mi Heinse, quam gratae & jucundae Sereniss. Dominae fuerint literae tuae. Significassem id jam tibi priori hebdomade, sed cum mihi paululum tantum ante discessum tabellarii tuae fuerint traditae, coactus sum in hunc diem id differre officii. Animus autem fuerat facere hoc verbis quam plurimis, sed cum mihi plures hac ipsa luce exarandae sint literae, praeter institutum cogor esse quam brevissimus. Scias tamen & vultu & verbis significasse optimam Principem, gratissimas sibi fuisse literas, gratissimas quoque futuras quascunque ad eam imposterum scribes literas, & tanto quidem gratiores, quanto crebriores. Verum & illam, quam ad me dedisti, epistolam ei legendam exhibui, una cum apographo literarum *Gronovii*. nostri. Addidi quin etiam preces meas, & justitiam postulati amici nostri quantum potui commendavi. Libenter illa me audivit, promisitque sese non tantum in hoc negotiolo velle satisfacere *Gronovio*, verum etiam libenter decuplo majora praestitutam fuisse, si postulasset. Verum audi nunc, quare non ulterius progressus sim in hoc negotio. Accessit me aliquoties ille, qui huc ab *Hamburgensi* Ecclesia est missus, is me obnixe rogavit, ne pergerem quidquam pro *Gronovio* sollicitare, neque enim ullum esse periculum, ut ipse canonicatum perdat, si caeteri retineant. Quod si vero caeteris is adimatur, tum me posse pro illo sollicitare, quod si nunc fecero, id nullum ipsi adferet emolumentum, caeteris vero

vero damno & detrimento erit maximo. Ita quidem ille, verum ego animadverti illum admodum metuere, ne serenissima Regina prae affectu, quo *Gronovium* nostrum prosequitur, plus ipsi, quam caeteris Canonicis conferat ex istis bonis Ecclesiasticis *Hamburgensis* Ecclesiae. Vellem certior fieri quid *Gronovio* nostro animi sit in hoc negotio, & quid a me fieri desideret. Ista autem jactura temporis nihil ei possit afferre detrimenti, si quidem sit, quod vel ipsi, vel matri ejus perierit beneficii, id ei etiam cum lucro compensabitur. Petat modo quod velit, spero eum non frustra petiturum. De mea vero ergo ipsum voluntate, ne patiari rogo ut dubitet. Vereor enim ut perpetua mea negligentia in causa sit; ut aliter de affectu meo existimet quam existimare debeat. Liber *Miltoni* heri huc est allatus. Exemplar meum petiit a me Regina. Ipse non nisi cursim dum perlustravi. Nihil tale ab Anglo expectaram. Et certe, nisi me animus fallit, placuit quoque, uno tantum excepto, incomparabili nostrae Dominae. Dicit tamen *Salmasius*, se perditurum auctorem cum toto Parlamento. Vale, & me ama. raptissime XII. April. CIOIOCLI.

Vid. Epist. *Heinsi* ad *Gronovium* CCXIV.

EPISTOLA XXXVIII.

ISAAC VOSSIUS

Nic. Heinsio.

Leidam.

SI non melior esset illorum, de quibus scribis, ratio, *Heinsi* praestantissime, quam sit tua, qua me negligentiae convincere conaris, valde ego me ab omni culpa immunem esse existimarem. Siquidem cum ad omnes tuas responderim, nec pauciores reddiderim, quam a te acceperim literas, non video quomodo mihi illud, quod fingis, crimen possis objicere. Non diffiteor merito de me conqueri posse alios nonnullos, quod toto fere anno vix semel eos compellem, quibus tamen me obstrictissimum esse & scio & agnosco, sed uti illi recte me reprehendere possunt, ita tu injuste mecum agis, quod adfectatam nescio quam negligentiam mihi exprobes. Scias, mi *Heinsi*, me ne ex bonis quidem operibus (si quae a me proficisci possint) aliquam velle captare laudem, ne dum ex iis, quae palam sunt vitiosa. Quod omnibus non possim amicis satisfacere, non id meae imputandum voluntati, sed forti & humanitati communi, quae non patitur, ut erga multos simus officiosi. Saepius igitur cum mihi plures redduntur epistolae, quam ut omnibus respondere possim, hoc me pacto expedio, ut neque his neque illis quidquam reponam. Huc accedit quod tanto aliquando scribendi laborem taedio (licet hoc forsan mireris, cum me quam rarissime scribere existimes) ut vel per integrum diem remosducere vel pistrino tradi malim, quam vel paulisper calamum arripere. Quod si
hanc

hanc pigritiam aut negligentiam esse dixeris, habeas hoc tibi responsum, non esse pigrum eum vel negligentem, qui gravissimo malit operi infundere, quam ei, quod levissimum est facillimumque. Ut paucis absolvam, nimis mihi otiosus esse videor, cum literis ad amicos scribendis vaco. Verum ut injucunda haec missa faciamus, habeas tibi persuasum velim quartum me nunc ad te scribere. Prioribus meis literis respondi iis, quas tu Rheinsburgo in Dania ad me misisti. Duabus dein hebdomadibus serius iterum ad te scripsi. Elapsa vero proxime hebdomade respondi duabus tuis, licet raptim & festinanter admodum. Nunc ad postremam tuam venio epistolam. Quamvis in ea non unius criminis reus a te peragar, non dubitavi tamen & illam quoque more meo communicare serenissimae Reginae. Gratas autem admodum ei esse plerasque tuas literas, ex prioribus meis jam intellexeris credo. Quod *Elzevirium* porro monueris, ut pleraque ea, quae in lucem prodeunt, modo alicujus sint momenti, huc transmittat, pro eo gratias ago maximas. *Miltoni* apologiam] pro Parlamento suo priori accepimus hebdomade. Legit istud scriptum incomparabilis nostra Domina, & nisi fallor, valde ei placuit. Certe & ingenium istius viri & scribendi genus multis praesentibus collaudavit. *Salmasius* jam sese ad respondendum accingit, quamvis necdum a diuturno morbo convaluerit, ira tamen satis ei suppeditabit roboris & armorum. *Menagii* origines statim, ut accepi, obtuli Serenissimae Reginae, nec tamen sponte, sed ita ea postulante & volente. Ubi eas recepero, non praeterrittam gratias agere auctori, quantas debeo. Verum & *Gronovii* lectiones & observationes Ecclesiasticas etiamnum habet Serenissima Regina. Interim valde te amo, etiam hoc nomine, quod mihi tuum transmiseris exemplar. Nam illud, quod ad me misit ipse *Gronovius*, nondum comparuit. *Sirmondi* historiam poenitentiae publicae, & disquisitionem de azymo misit ad me *Sarravius*. Percurri jam ea opuscula, & valde miratus sum libertatem ejus in scribendo. *Scriverium* si videris, rogo meo nomine plurimum salutes. Vellem scire, quid cum suis facturum sit manuscriptis, quibus imposterum, ut puto, non utetur. Vellem eos Serenissimae Reginae venderet. Non dubito quin gratissimam ei rem praestiteris, si catalogum eorum transmittas. *Gronovio*, *Scheelio*, *Rubenio* *Gevartio*que, plurimam rogo salutem a me denunties. Idem rogarem ut faceres *Ampliss. Dubletio*, *Beuningio*que, sed me fere pudet tralatitio eos more salutare, ad quos creberrimas dare debueram epistolas. Brevi, ut spero, omnibus me exsolvam debitis, interim rogo, mi *Heinsi*, ut nostri memoriam & amorem & tecum & apud alios, quantum fieri possit, conserves. Vale. CIOIOCLI. XIX April.

EPISTOLA XL.

ISAAC VOSSIUS

*Nic. Heinsio.**Leidam.*

PLacet Serenissimae nostrae Reginae, ut quamprimum te ad iter Italicum accingas, Heinsi clarissime. Jussit itaque illa, ut tibi significem, gratissimum sibi fore, si pleraque, quae tibi in Batavis agenda supersunt, negotia quam citissime expedias, & te viae committas. Mavult autem nunc Domina nostra, quod & ipsum quoque te malle existimo, ut per Galliam iter instituas. Causa haec est, quod universam Cardinalis *Mazarini* librariam supellectilem comparare sibi in animo habeat. Prostat illa venalis, nisi fallant nos literae Parisienses. Quod si verum sit, nullum est dubium, quin aequo admodum pretio tam vasta poterit emi bibliotheca. Hoc si bene successerit, opus non erit, ut impofterum Domina nostra de libris editis sit sollicita, cum illic sit quidquid fere boni malique unquam in lucem prodierit, postillas tamen excipio, non enim, ut nosti, nomen merentur librorum. Sumtus vero & ad redemptionem bibliothecae, & ad iter tuum Italicum necessarios exhibebit, quem nosti, *Bidalius*, cui id jam in mandatis datum. Virum vero summum parentem tuum quod adtinet, ejus, ut opinor, facile impetrabis adfensum, praesertim cum norit iter hoc non fore tibi inhonorificum aut damnosum. Verum & hoc quoque eum movere debet, quod nunquam tibi melius sit, quam cum peregrinaris. Jam vero quod & ipsum quoque apud eum non parvi fore momenti existimo, hoc est, quod incomparabilis nostra Domina desideret, ut quamprimum iter tuum absolvas, ut brevi possis & se, & parentem revisere. Atque haec sunt, quae jussu ad te Dominae perscribo, caetera ex *Bidalio*, & ex literis, quas sequenti ad te scribam hebdomade, intelliges. Vale, vir praestantissime, & summum parentem tuum plurimum meo nomine salutes. xxvi. April. CIOIOCLI. Stocholmiae.

EPISTOLA XLI.

ISAAC VOSSIUS

*Nic. Heinsio.**Leidam.*

Quinque a te accepi literas, ipse vero nunc sextum ad te scribo. Ultimas tuas heri mihi adtulit *Wullius* noster. Valde illae fuere biliosae, & vanis plenae suspicionibus. Scriptas a te fuisse puto dum febricitares.

Tom. III.

Dddd

Quod

Quod enim existimas a me & *Mercera* fuisse confictas lepidas istas de itinere tuo fabellas, in eo valde falleris. Scias me cum *Mercera* de te aut negotiis tuis ne verbum quidem permutasse. Amicus ille, quem tibi haec significasse scribis, strenue mentitus est. Literas illi tuas legendas exhibui, ut discat impostum aut minus esse malignus, aut saltem cautius mentiri. Omnia illa, quae de itinere tuo ad te perscripsi, intellexi in aedibus *Spiringii*. Tota ejus familia hoc testabitur, & libenter fatebitur. Ne itaque *Mercerae* tribuas id, quod amicis, & quidem amicissimis tibi, est imputandum. Jam vero quod me jubas certiore facere *Merceram* calamitatis tuae, quaeso, ad hoc alios elige nuntios. Literas illius ad pictoris cujusdam Galli conjugem quod adinet, quibus a me communicatas sibi fuisse ait nescio quas narratiunculas famae suae noxias, ac hoc me nomine laudet, eas sane non moror. Et illius laudes & tuas propterea reprehensiones juxta pono. Quamvis non addideris, quidnam id esset, quod confabulatrici suae perscripserit, satis id tamen possum conicere. Cum hinc tota urbe spargeretur illud, quod de *Riveti* conjugis & mihi & aliis narrasti, illa me tanquam ejus rumoris auctorem insimulabat. Ego hoc falsum esse respondi. Ad haec illa, igitur *Heinfus* est, qui haec sparserit. Bene, esto, inquam, dummodo ego non sim. Ille enim est inimicus vester, ego vero amicus, itaque ab illo possis merito suspicari hos & similes spargi rumores, non autem a me. Vellem scire, mi *Heinsi*, quid hinc reprehendas. Valde enim mihi videris indignari, sed an cum ratione aliqua, de eo valde dubito. Esto, ut aliquid ipsi retulerim, quod a te haberem, quod tamen verum non est, quid mali in eo, ipse quippe negas arcanum id fuisse: arcanis enim apud me locum non esse, idque te probe scire. At vero, mi *Heinsi*, ipse fateris me multa in sinum tuum effudisse, & tanquam arcana tibi commisisse. Vide igitur quanto ego amicior tibi fuerim, quam tu, qui nihil mihi credideris. Ipso itaque te confitente ego te prodere non possim, cum nihil mihi commiseris; tu vero jactas te habere a me, quod prodas. Si itaque velis esse proditor, per me licet, ego tibi istam non invideo gloriam. De imperio in me *Mercerae* quod narras, id non minus lepidum est cacteris tuis nugis. Taedet illis immorari; itaque iis omiſſis ad ea deveniam, quae ut tibi significarem jussit serenissima Regina. Priori hebdomade indicavi tibi voluntatem & desideria Serenissimae Reginae. Non dubito, quin eae tibi literae recte tradentur. Valde autem cupit, ut negotium illud de emenda *Mazarini* Bibliotheca dissimuletur. Quod si illa necdum venalis proſtet, gratum erit Dominae nostrae, si rem commiseris *Bidalio*, ipse vero quamprimum in Italiam proficiscaris *Rezandrum* si tecum ducas, & hoc quoque non ingratum erit Serenissimae Reginae. De catena aurea trecentorum ducatorum scripsi ad Dominum *Silvercronium*. Neque dubito, quin is tibi communicabit literas illas. Attamen si jam per *Bidalium* Venetiis mavelis conficiendam curare, tuo hoc permittitur arbitrio. Caetera sequenti hebdomade. Vale., III. May. CIOCCII.

1 Uxore Salmasii.

EPISTOLA XLII.

NIC. HEINSIUS

*Isaaco Vossio.**Holmiam.*

DOrdraco nudius tertius redux, quo ante dies aliquot profectus eram, ut cognatos salutarem, offendi hîc orationem *Ferrarii*, quam vides, panegyricam, incomparabili Reginae inscriptam, Patavio recens per tabellarios al-
latam: eam mittendam tibi existimavi, ut, si tanti videatur, in Augustas manus perveniat. Non defuere forsan alii, qui me praevenerint. Pertinere ta-
men ad me istam curam arbitratus sum atque id officium, ut si per viarum am-
bages non liceret mihi primo esse, diligentiae saltem meae ratio tibi consta-
ret. Errores, qui irrepere satis multi, per te corriges: quos & ego jam ex
parte correxi. Placuit, fateor, non leviter id scriptum, bis terque jam à me
relectum, typis etiam describendum in hac urbe curassem, nisi mitti ad vos
consultius credidissem. Nihil in illo reprehendit *Boxhornius* noster, praeter
nimiam antiquitatis aemulationem, quam ego nimiam vix posse reprehendi
existimo. Editionem ejus novam si Jansonianis typis procuraris, recte feceris.
Hoc certe officii tui videtur esse, ut, cum ipse nihil hujus argumenti haec-
tenus moliaris, qui & omnium optime id poteras praestare, & maxime debebas,
alienae saltem pietatis laudem ne patiaris obscurari. Amplissimus vir *Johannes
Forestus*, in supremo hujus reipublicae senatu consiliarius, ut nosti, Graecis ac
Latinis litteris non perfunctorie tinctus, indicabat nuper, ante menses tres, &
quod excurrit, *Viquesfortio* litteras se tradidisse mihi inscriptas, quas ille Holmi-
am ad *Cantersteinium* miserit: eidem fasciculo epistolam & versus insertos, qui-
bus Reginam compellaret. Fasciculo isti quid factum sit haecenus ignoramus,
cum neque *Viquesfortio* respondeat *Cantersteinius*, nec inscriptas mihi litteras huc
remittat. Exequias Turni idem *Forestus* luculento nuper carmine celebravit,
quod ille supplementi loco, ad exemplum *Maphæi Veggii*, editioni Virgilianae
alicui velit attexi. Editionis curam cuidam ex clientibus suis, Rectori, cre-
do, Scholae Hornanae mandarât: quam in se recepisse Jansonium is postea
testatus est, ea tamen lege, ut Reginae inscriberetur. Excusavit id factum
multis apud me verbis *Forestus*, negavitque sine typographi impulsu tale quid
aufurum se fuisse. Libello ipsi quid acciderit, non scio; nisi quod exemplar
ejus manu nitida descriptum Jansonio traditum intelligo, una cum dedicatione
& litteris ad Reginam, cujus oculis libellum exhiberi voluerat, antequam in
lucem prodiret. Haec me absente & inconsulto jam pridem acta. Si igitur
fasciculus iste (missum enim a Jansonio ad vos arbitror) in Regias manus inci-
derit, quaeso, intelligat ex te Domina, mi Vossi, non esse mendicabulum ho-
minis *Forestum*, sed virum in amplissima Fortuna constitutum, neque egestatis aut

avaritiae hunc errorem esse, sed venerationis, qua senex optimus incredibili in virtutes regias exarsit. Non improbante Domina conatum ejus, poematum hinc aut Holmiae procudi possit. Legimus id ego ac *Kinschotius* meus ὁ μακρὰ εἰς ἡμᾶς ante biennium, & probavimus. Vigor quidem, qui debebat, non semper adest: sed in sene quis hoc non excuset? Venio nunc ad tuas, quas secundas, postquam e Suecia profectus sum, accepi, ex quibus mira cum voluptate intellexi, Memmianam Bibliothecam Regii juris factam. E Stephaniana potes enotare, quicquid ad gustum tuum fecerit, postquam de tota emenda cogitationem deponis. Creditoribus enim fixum, si deesset, qui integram licitaretur, per partes fore vendendam. Si quid curatum vis ea in re, utere Danielis Elzevirii operâ, qui in Daniam nuper hinc discessit, is abunde tibi hinc gratificabitur. De Memmiana aliisque Gallicis a te emptis vellem paulo fusius ac explicatius egisses. *Vlitium* urgebo, ut observationes antiquarias pertextat. Quae sivit me hinc nuper, cum Dordracum profectus essem. Manilii primam editionem recte feceris, si *Gevartio* mittas. Scripsi illi non ita pridem, sed nihil respondi fero. Succensuisse illum mihi intelligo, quod in Poëmatio Reginae inscripto Auftriacos acerbius exceperim. *Scriverius* altero etiam oculo laborare incipit: decumbentem ex podagra nuper offendebam, aderant tum *Gronovius* *Walliusque*: ita factum, ut de manuscriptorum catalogo aurem illi vellere non potuerim, faciam tamen id brevi. *Silvercronius* aegrotavit aliquamdiu: nunc melius habet, quem a quatuordecim diebus non vidi, nec hoc mense videbo, ut arbitror, cum Amstelodamum ac Trajectum cogitem, ac is quoque suis negotiis promovendis occupetur. Comitem *Torstenonium* e vivis excessisse, non ex te, qui nihil horum soles, sed ex aliis intelligo: comitem etiam *Petrum Bihæ* gravissimo cum morbo conflictari. De *Mercerae* litteris si quid acerbius mihi nuper excidit, id ex justa indignatione profectum: existimationi enim non tam meae, quam tuae isto facto perperam consului, quo nihil in hac urbe notius, adeo litterae illae paucorum oculos fugerunt. Sed novas turbas excitare nolo. Virulentum *Milioni* librum jam dudum ad vos perlatum confido. Ejus editiones quinque jam hinc vidimus: Belgicam etiam versionem, Gallicam nunc adornari ferunt. *Bruno* non semel consilium meum imploravit de itinero Suecico: sed ad *Zulichemii* domesticum oraculum a me ablegatus est. Fortunis suis quia negat fatis prospectum conditione illa, quam *Junius* tuo nomine obtulit, te ipsum litteris suis ut compellaret auctor fui: eas se missurum promissit, nec mittit tamen. *Meibomius* in Muscis suis lente admodum pergit, quorum tertiam adhuc partem edendam superesse intelligo. *Tollius Cinnami* historiam Constantinopolitanam praelo cum versione sua commisit: cum transiret nuper per hanc civitatem, meque saluaret, de fratre suo mentionem injiciebat, eumque famulum in Italicam peregrinationem ut admitterem, rogabat. Ego amplius deliberandum respondi ob causas, quae te spectant. Jubet me sperare *Gronovius* noster a *Rottendorffio* Ovidianos aliquot & Claudianeos codices, quos avide expecto. Incipit enim molestum mihi esse hoc otium. Roma nihil ab aliquot jam mensibus. Effigiem Reginae, quam a *Beckio* emi, Equiti

Puteano offerendam apud me servo hæctenus, quod artis pictoriae periti multa in ea carpant. Oculum alterum altero majorem expressum adfirmant, atque alia hujus notae. Miror de existimatione sua tam securum *Beckium*, tam lucri cupidum, ut, Romam ubi venerit, ludibrio haberi malit ab emunctae naris hominibus, quam aliquo loco esse. Habes hîc verbosam epistolam, cui si pares imposterum desideras, ut & tu loqui incipias necesse est. Vale Lugd. Bat. CXCICLI. die VIII. Maii. stilo novo. *Bouchartum* intra octiduum nobis adfuturum *Morus* modo adfirmabat.

EPISTOLA XLIII.

ISAACUS VOSSIUS

Nic. Heinsio.

Leidam.

Quinque jam a te accepi epistolas, mi Heinsi, ex quo hinc discessisti. Istae vero, quas vides, sunt octavae. Ita enim imposterum tecum agere debeo, ne mihi semper, quod facis, negligentiam objicias. Mitto tibi nummum, quem una cum catena aurea trades *Ferrario*, simul atque Patavium perveneris. Torquem quod adtinet, de eo mentem Serenissimae nostrae Reginae fatis, ut puto, ex prioribus cognovisti literis meis. Quod autor fueris *Gronovio*, ut iteratam Livii editionem heroinae nostrae inscriberet, id optime a te factum. In *Riveti* Bibliotheca nihil erit, ut puto, quod magnopere cures. Epistolam *Puteani* Junioris nec vidi, nec de ea quidquam potui rescire. De *Silvercronio* varii admodum huc perferuntur nuntii, non nisi unicum ab eo accepi epistolium, & tamen jam ter ad eum scripsi. Rogo salutem ei meo nomine annunties plurimam. Aureum nummum statim mihi se allaturum promiserat *Holmius*, sed non fecit: sequenti illum mittam hebdomade. x. Maii. CXCICLI.

EPISTOLA XLIV.

NIC. HEINSIUS

Isaac. Vossio.

Holmiam.

Panegyricam *Ferrarii* nostri orationem misi tibi proxime, mi Vossi, addidi & litteras ad Dominam. De oratione quid arbitreris, fac sciam, quid ipse sentiam apud te tum dissimulavi. ¹ Virginis Gallicae eruditae illius quod me-

mi-

¹ In Panegyrico ipso, video mentionem fieri pag. 361. Edit. Patavinae 1668. prolusionum, Virginis, quae in Belgio sexum & seculum nobilitat. &c. nullum vero Gallicae virginis, an correxerit monitus ab Heinsio errorem nescio. Forte confudit Gornaeam (de qua vide Heinsii ad Gronov. Epist. xci.) cum Schürmanna.

minit, nescio quam velit. Nisi *Schurmannam* nostratem fortassis Gallam credidit. De choreis etiam quod addit sub finem orationis, rem, ut gesta erat, non visus est narrare, sed hos errores multo verborum nitore abunde compensavit vir disertus. Mitto nunc *Rigaltianam* de Fundis populis, super loco quodam Ciceronianae pro Balbo orationis, dissertatiunculam: quanquam carere ea poteras, malo tamen nimius esse hisce suppeditandis, quam videri desideriiis tuis aut defuisse, aut mearum non fategisse partium. Accepi eam per tabelarios nuperrime ex Gallia. *Bouchartum* in procinctu esse, ut ad vos excurrat, *Puteani* scribunt, sic & *Morus* credi volebat: negant tamen profecturum una cum illo *Valesium* natu majorem, quanquam abunde illi prospectum sit iussu Reginae de omnibus, quae ad iter tam longum ac molestum requiri videantur. *Blondellum* heri salutavi. Is in opere vasto typis edendo nunc versatur, quod ad Regum Gallicorum auctoritatem stabiliendam pertinet. Tomus primus jam fere absolutus est, qui genealogiam Regum continet. Secundus aget de lege Salica, qua foeminae a Gallici imperii regimine capeffendo arcentur. Tertius de primo loco inter Principes Christianos Regi debito. Adeo haec cura hominem doctissimum occupavit, ut de lectionibus publicis cogitare haecenus non possit. In *Chiffletium* haec faba cuditur. Inter alios sermones cum *Boucharti* nostri injecta esset mentio, negabat expectandum, ut vir ille summus ante bimestre tempus hac in Sueciam transire posset. Vides igitur quam incertum hoc sit negotium. Petavianam bibliothecam jam ad vos perlatam arbitror, sic certe factum Parisienses amici confidunt. De Memmiana nullus praeter te, mentionem facit. Utinam Viennenses codices aliquo artificio juris regii fiant! De successu non videtur desperandum, si operâ Legati, qui Viennam hac aestate abiturus, libri isti cum archetypis Austriacorum imaginibus in arce Pragana captis permutentur. Credibile enim est, quovis eas thesauro libenter redempturum Caesarem. Sed tui est officii ea de re cogitare. Mazarinianam fore distrahendam rumor erat, nunc mutarunt consilium, qui auctionem maxime urgebant: nihil igitur sperandum. *Scriverium* bis terve conveni, sed aut ex adversa valetudine decumbentem, aut amicorum caterva obsessum, ut de re, quam non semel mihi commendasti, agi vix potuerit. Nunc in suburbano suo vivit, rariusque in civitatem excurrit. Aderit tamen, ut existimant, brevi; sin minus, in ipsa mihi villa erit compellendus. *Vlitius* frustra me quaesivit nuper, cum Dordracum profectus essem. quod igitur coram monere non potui, per litteras agam, ut festinet Observationum editionem. Magistratus jam est reipublicae Bredanae, metuendum itaque, ne publicis occupationibus curae istae posthabeantur. Ex Germania scribunt, *Barthium* quidem in vivis adhuc esse, sed oculis laborare. Eam illum ad egestatem redactum non ignoras, ut libros, quos & multos & minime vulgares possidebat, accedentibus viris doctis venales offerat. Quapropter nihil praeter ordinem feceris, si manu exaratos codices, quoscunque reliquos habet, tibi vindices. *Reinesius* inscriptiones ineditas luci parat, notis suis illustrandas. Sperat per *Langermannum* impetrari a te posse, quas collegisti. Habet nunc sub praelo libelli nescio quid
eri-

eristici adversus *Andream Rivinum*, Professore Medicinæ Lipsiensem, editorem *Kuegvidov* ex versione Latina, & sermonum quorundam Hildeberti Cenomannensis, si libellos forsan vidisti. Prioribus tuis duabus jampridem respondi. Tercias ante quatrimum hîc inveni, caeteris nihilo prolixiores, cum negotia & occupationes more solito causeris. Si sic pergis, fore praevideo, ut brevi commercium istud inter nos frigeat. Tribus jam mensibus Holmia absum. Tanto tempore, si horam nullam seponere vacuam litteris ad me scribendis potuisti, quid imposterum sperare debeam facile agnosco. Quam negligentem te praestiteris in itinere Gallico meministi, quamque ego tum de omnibus, quae Holmiae agerentur, certiores te fecerim assiduus. Servilis obsequii scis esse compellere non respondentes, quod frustra a me exigas. Pudor etiam meus non patitur, ut semper loquar, tu aut pauca aut nihil reponas. Argumentum scribendi si deesse tibi queraris, injurius sis in incomparabilem Reginam, cui quotidianus ades, & cujus dicta factaque omnia non epistolis tantum, sed annalibus etiam luculentis satis superque argumenti suppeditare possint. Illa voluit, ut frequenter scriberemus alter alteri; nec ego delum haecenus; plenius etiam id facturum, si inveniam qui meo se exemplo patiatur excitari. Redditas fuisse, quas primas ad Dominam dedi, laetor. Quid ni & acceptas fuisse? Agnosco solitam in divina Principe benignitatem. Ex Miltoniano libro unicum tantum exemplar Holmiam perlatum miror: cum tria uno eodemque tempore fuisse missa sciam. Primum a *S. Iuercronio* ad Reginam, secundum ad te ab *Elzevirio*, quod & accepisti, tertium ab *Herebortio* Philosophiae Professore ad *Salmasium*. Est is liber in omnium hîc manibus ob argumenti nobilitatem, & jam quatuor, praeter Anglicanam, editiones vidimus: unam in quarta, ut vocant, forma Goudae editam, tres in duodecima, quarum primam *Ludovicus Elzevirius*, secundam *Johannes Janssonius*, tertiam Trajectensis ne cio quis edidit: quinta in octava forma editio Hagae sub praelo sudat, ut monet *Elzevirius*. Belgicam versionem video etiam circumferri, Gallicam expectari ferunt. *Miltonus* ille quis sit non satis constat. Vidi qui adfirmarint infimo loco natum, eruditum tamen, & plebeiorum factione ad maximam dignitatem promotum. *Ludovicus Elzevirius* adfirmat, certo sibi constare; hominem esse & nobili loco natum & opulentum, a reipublicae muniis negotiisque omnibus remotum, ac sibi in rure suo viventem. Refutavit Anglicano sermone Iconem Basilicam, qui liber inter Parlamentarios maximo est in pretio. Poëmata etiam Latina edidit, sed quae in manus meas haecenus non pervenerunt. Si certiora cognovero, faciam, ut ex me intelligas. *Gronovii* nostri negotium Serenissimae Reginae quod commendasti, optimum factum. Monui illum ea de re, ac quid fieri porro vellet percunctatus sum. Questus ille jam olim non semel mihi, cognatos illos suos non bona secum fide agere. Suspecta igitur habeas velim illorum consilia, donec ipse, quid agendum, doceat. Haec Amstelodami exarabam, quo protectus sum, partim ut sororem viderem, partim ut *Moucheronio* ad vos abiturienti valedicerem. Moratur iter ejus uxor valetudinaria, quae nudius tertius abortum fecit. Amicos omnes ut

sa-

salutes rogo, *Wullenium* imprimis, *Holmiumque*, ac *Spiringianos* omnes. Vale.
A. CIOIOCLI. xv. Kal. Junii Gregor.

EPISTOLA XLV.

ISAAC. VOSSIUS

Nic. Heinſio.

Leidam.

Circa finem prioris hebdomadis, mi Heinſi, adpulit huc navis, quae *Petavianos*, aliosque nobis adtulit codices. Venere una cum illis libri *Clarissimi Gaulmini* Arabici, ut noſti, Hebraicique maxima ex parte: pauci admodum ſunt Armenici, *Perſici*, *Copticique*, *Graeci* vero nulli omnino. Numerum vero librorum quod adtinet, is longe minor eſt, atque exiſtimaveramus, ſi quidem in univerſum non ſuperant dies unius anni. Id cum ita ſit, opus non eſſe exiſtimo, ut tibi rationem reddam vel temporis vel ſilentii mei. Verum cum videam, quam ſis difficilis & moroſus, vereor ne & hoc nomine magnum tibi videar commiſſiſſe crimen, quod vel ſemel officium meum diſtulerim, licet ad caeteras tuas epiſtolas extemplo reſponderim. Ego quidem, mi Heinſi, diligentiam tuam laudo, proque ea gratias ago maximas, mallem tamen minor eſſet illa, dummodo minus quoque mihi exprobrares negligentiam meam. Neque hoc ideo dico; quod non mihi quam gratiſſimae ſint literae tuae, vel quod breviores a te flagitem, cum quanto prolixiores, tanto quoque mihi ſint jucundiores; ſed quod continuae illae de ſilentio & torpore meo querelae, immenſum quantum minuant voluptatem, quam tuae mihi adferunt literae. Et ſane quaenam eſt illa mea, quam fingis, negligentia? cum ad omnes tuas, ex quo hinc diſceſſiſti, reſponderim, aliquando brevius, aliquando etiam prolixius. Interim ſi quempiam hîc habeas, qui majori cura, fide, affectu & ſedulitate, & literis & deſideriis tuis ſit ſatiſfacturus, non ego illum tibi invideam amicum. Quod vero inquis argumentum ſcribendi mihi neutiquam poſſe deeſſe, cum luculentiffimum exhibeant dicta omnia factaque *Sereniſſimae Reginae*, in eo non ego, ſed tu potius injurius es *Incomparabili Reginae*, quum argumentum, quod vel luculentiffimis annalibus, ut ais, poſſit ſufficere, quodque non eſt epiſtolare, mihi homini, ut ipſe fateris, negligentiffimo velis committere. Valde ego infelicem exiſtimarem principem noſtram, ſi noſtris illa egeret praconiis. Quod vero dicis, me non ſignificaffe tibi mortem *Forſtenonii* & alia id genus, id libenter fateor. Si non ex aliis atque ex me in poſterum intelligas ea, quae hîc aut publice aut privatim geruntur, valde imperitus eris rerum *Suedicarum*. Ego enim & ſum, & indies magis magisque reddor hîc peregrinus. Si bis de hebdomade in publicum prodeam, vix unum alloquor. Et hoc quoque negligentiae meae tribuas licet. Sed de his jam fatis: nunc ad epiſtolam tuam venio. Gratum admodum fuit,

fuit, quod transmiseris scriptum illud *Rigaltianum* de Fundis populis. Habet illud Serenissima Regina, ego non, nisi obiter, inspexi. Valde mihi jejunos videtur libellus. Amici illi tui, qui negant *Valesium* una cum *Bocharto* venturum, illi non recte sentiunt. Spero utrumque vel jam vobis adesse, vel brevi affuturos. Opus *Blondelli*, de quo scribis, erit laboriosius, quam utilius. Valde optarem, ut vir ille egregius, relictis illis tricis genealogicis, meliori tandem accingeret operi, criticae nempe Sacrae, de qua aliquoties cum eo egi. *Vlitii* observationes avide exspecto. *Reinesium* moliri editionem inscriptionum ineditarum gaudeo. Libenter ei meas communicarem, si essent ad manus. Sed, ut nosti, magnam scriptorum meorum partem habet *Salmasius*, quae omnia Leidae reliquit, ipse vero hîc paucissima habeo; plura enim relictâ sunt Amstelodami. Verum & tu quoque non pauca ad hoc opus possis conferre. Quod si feceris, & ipse quoque omnia mea exhibebo. Quod *Gronovio* significaveris ea, quae ad te scripseram, pro eo gratias ago maximas. Valde quoque gratum erit, si porro significaveris, quis & qualis sit iste *Miltonus*. Iconoclastem si habeas, rogo ut transmittas. Allocutus me est ¹ *Keckius*, quem nosti. Is opera *Boecleri* excidit gratia patroni sui. Vellet is tibi itinere Italico comes haerere & inservire. Rogavit me itaque, ut hoc tibi significarem. Dixi ego existimare me te jam alium comparasse tibi, cujus in hoc itinere opera sis usus, libenter tamen tibi significaturum. Interim ipse recta in Hollandiam, & inde Parisios tendet. Promisi me commendaturum illum diviti cuidam mercatori, cum quorum liberis possit peregrinari, si tecum non possit. Vale, mi Heinse, & salutes plurimum omnes nostros amicos. Inter Codices *Petavii* multa sunt Ovidiana, quae proculdubio videris, verum id quod te vidisse non arbitror, est codex Fastorum, exaratus ante octingentos annos, vel certe non multo minus. IV. Junii CIOIOCLI. stilo novo.

¹ Vid. Epistol. Heinse ad Gronovium ccxxi.

EPISTOLA XLVI.

ISAAC. VOSSIUS

Nic. Heinse.

Leidam.

NON conqueror, mi Heinse, quod tam acriter & prolixè adeo de silentio meo expostules: fieri enim potest, ut id facias amore nostri & desiderio literarum nostrarum; sed cum id tam acerbe & inusitate agas, nescio num & id ipsum quoque tuo erga me adfectui debeam tribuere. Exprobras mihi, tanquam si rem magnam ac me dignam me praestitisse existimem, quod omnibus tuis responderim literis. Atqui tales conjecturae & suspiciones locum habere non debebant in benevolo pectore, praesertim cum probe noris, me non ob aliud hoc tibi scripsisse, quam ut istud, quod mihi intentabas, negligentiae crimen a me repellerem. Jam vero quod audeam tibi affirmare, me non tan-

Tom. III.

E e e

tum

tum longe abesse a negligentia; sed etiam officium implevisse, non debet hoc tibi mirum videri. Ab eo tempore, quo hinc discessisti, vix scio an quatuor aut quinque neglexerim occasiones, quibus ad te non scribserim. Et non tantum tuis respondi, verum etiam nonnunquam scripsi, cum nullas a te accepissem literas. Quod vero mihi objicis negligentiam, qua usus sum erga te in itinere Gallicano, in hoc maxime te miror, cum te non fugiat, nullas me omnino a te literas in toto illo itinere accepisse, nisi demum reducem in Hollandiam. Atque illinc, fateberis, absurdum fuisset tibi rescribere, praesertim cum sperarem me citius tibi affore, quam fecissent meae literae. Nosti omnes istas tuas ad manus meas pervenisse, postquam demum essem in Suediam reversus. Egi tum tibi gratias, quantas potui, satisque significavi dolere me, quod istum laborem frustra suscepisses. Et sane fateor me multum tibi hoc nomine debere, plusque etiam deberem, nisi ipse nimia praedicatione beneficiorum tuorum tibi ipsi esses injurius. Sed quandonam erit querelarum finis, e quibus magnam partem epistolarum tuarum video constare? Mutemus stylum & argumentum scribendi, & habebis me multo ad scribendum promptiorem & alacriorem. Injucunda est prorsus ista contestatio, & sane agnosces me non adeo indiligentem fuisse, quam tibi videbar, cum ista scriberes. Atque haec quidem hactenus. Nunc ad literas tuas accedo, licet sero. Inter libros meos, quos heri demum accepi, si quid sit tuum, moneas me, restituam quamprimum. Pro communicatione literarum *Holstenii* gratias ago maximas. Ipse vicissim tibi remitto *Foresti* literas, quas mihi tibi transmittendas commisit incomparabilis nostra Domina. Scripsi hodie ad illum, gratiasque ei egi nomine Reginae pro inscriptione operis. Gratum vero erit Serenissimae Reginae, si id in Batavis potius, quam hic lucem adspiciat. *Salmasius* totus est in meditatione operis contra *Miltonum*. Lepidum est, quod de ¹ *Graswinkelio* narras: male mulctabitur, si *Miltonum* adtigerit. De itinere tuo in Galliam responsum sequenti hebdomade exspecto. Proculdubio enim jamdudum Hollandiam reliqueris, neque enim quidquam accidisse arbitror, quod itineri tuo moram injicere potuerit. De Bibliothecis *Petavii*, *Gaulmini*, & aliorum ad te priore scripsi hebdomade, uti quoque de codice antiquissimo fastorum Ovidii. Verum & alia reperi Ovidiana inter scripta *Gruteri*, quae ab haeredibus *Sixtini* redemi. Faciam te certiore de omnibus, simul atque ea excussuro. Nondum enim omnia pervolvi, licet toto die hesterno nihil aliud egerim. Ea ipsa est causa, quod & hodie tardius me ad scribendum accinxerim. Talium enim rerum adspectus non me minus possit retinere, quam te nundinarum Leydensium adspectus. Vale, mi Heinssi, & me ames. Raptissime CIOIOCLI. XI. Junii stilo novo.

¹ Vid. Epist. *Heinssi* ad Gronov. ccxxiii. in fine, ubi interdictum ipsi, ne contra *Miltonum* scriberet, narrat. sed Epist. ccxxxii. edidisse librum suum se audivisse scribit

EPISTOLA XLVII.

ISAAC VOSSIUS

*Nic. Heinsio.**Leidam.*

TErtius jam fluit mensis, mi Heinsi, ex quo nullam, nisi unam, si bene memini, neglexerim occasionem, qua non aliquid ad te dederim literarum. Quamvis autem non aequae omnes fuerint prolixae, tales tamen fuisse existimo, ut ex iis facile conicere potueris, alienum me esse ab eo crimine, quo me jam toties notasti. Hac hebdomade nullas a te accepi. Credo te Hagam excurrisse, vel saltem non fuisse Amstelodami, ubi te versari intellexeram; arbitror enim, si ibi fuisses, utique non praetermisisses, aliquid reponere responsi ad literas illas, quibus tibi voluntatem Serenissimae Reginae, ut in Galliam Italiamque quamprimum proficiscerere, exposui. Quamvis vero non dubitem, quin jamdudum te in viam dederis, nisi tamen omnes meas in Hollandiam, ad patrem tuum, qui proculdubio eas ad te perferri curabit. Quas vero imposterum scribam, eas recta in Galliam mittam. Sed vero necessarium erit, ut semper me in tempore certiore facias, quamdiu in singulis locis commoraberis, ne aut frustra, aut intempestive te meae quaerant literae. Ea quippe tendis in loca, unde alter ab altero, non nisi trimestri demum elapso spatio, responsum possit consequi. Verum de his, ut puto, non eges me monitore; ipse enim modum, quem tenere debeam, praescribes, verum ut id quamprimum facias etiam atque etiam te rogo. *Gronovii* adversam valetudinem aegre admodum fero. At vero plus aegrotat *Graswinkelius*, si cum Anglo isto molosso, *Miltono* dico, sese commiserit. Arbitrabar ego intimam tibi cum illo intercedere familiaritatem, sed sane non videris multum ei favere; id enim si faceres, nec probares, nec permetteres ejus institutum. Rex sane Scotiae, si sapit, quovis pretio silentium ei imponet; Parlamentarii vero laborem ejus luculento etiam proposito praemio debeant juvare. De *Ferrarii* oratione quid sentiam, jam superioribus ad te scripsi literis. *Salmasius* quanti eam faciat, dicere non possum, necdum enim illam vidisse eum existimo. Ipse totus nunc est in confutando scripto *Miltoni*, cui totidem reddet convitia, nec patietur, ut a minori vel hac in parte superetur. Tu vero vicissim velim rescribas, quid judices de oratione *Valesii* nostri. Mitterem tibi exemplar, nisi crederem te jam habere, vel habiturum brevi, nempe simulatque Lutetiam veneris. Ego sane nihil quidquam in eo reperiri existimo, quod vela fastidiosissimo possit carpi. Rerum novarum nihil ad te possum perscribere: scis enim me nec esse valde curiosum his in terris, nec quenquam nosse, a quo novi aliquid possum cognoscere. Hoc solum habeo, quod tibi significem, *Wullenii* conjugem obiisse & heri tumulo esse traditam, quod & ipsum quoque ignorassem, nisi ante aliquot dies ad funus fu-

issem invitatus. Verum & hoc nunc addo, *Freinshemium* & conjugem ejus esse in extremis. Ita adfirmavit D. *Chanutus*, qui intra paucos dies Lubecam sese conferet ad tractatus, ut vocant, pacis. Tradidi illi jam olim literas tuas, uti quoque Illustrissimo *Salvio*: a neutro aliquid accepi responsi, nisi hoc tantum, ut te resalutarem. Frustra jam a te peterem, ut communes amicos in Batavia nomine meo salutes: proculdubio enim jam eos reliqueris. Aliud itaque jam a te peto, nempe ut si occurras *Bocharto Valesioque*, omnia illis mea officia offeras; ubi vero Lutetiam perveneris, ne rogo praetermittas, quoscunque nostri memores & amantes inveneris, meo amplecti nomine. Dolet, quod in postrema peregrinatiuncula, debitum non potuerim singulis exhibere cultum, & observantiam: scis quam exiguo ibi commoratus sim tempore, idque totum tamen librariis impenderim. Tu vero in omnibus me sis fortunatior, & si me ames, non tantum tuo satisfac officio, sed & meam, si quam contraxerim, diluas culpam. Caeterum si mea non adspernaris vota, omnia tibi fausta & felicia precor in hoc itinere, valetudinem prosperam, mentem hilarem, & bonam fortunam in comparandis iis, quae te jam gratum incomparabili nostrae Reginae, longe tamen faciant gratiorem. Me vero scias & esse & semper futurum tui amantissimum. Vale. mi Heinssi. Literas *Foresti* superiori hebdomade apertas; ut vides, a Regina acceperam. Oblitus fui eas tum literis meis includere. Regina omnia tibi fausta & felicia in itinere precatur. Jussit ut hoc suo tibi nomine significarem. iterum vale. Holmiae CIOIOCLI. XVIII. Junii stilo novo.

EPISTOLA XLVIII.

NIC. HEINSIUS.

Isaaco Vossio.

Holmiam.

Meministi, Isaace Vossi, vir clarissime, compellatum me tibi in musaeo meo Holmiae hyeme proxime elapsâ, cum adesset *Silvercronius* noster, atque ibi inter varios sermones injectam forte ¹ *Mercerae* mentionem, cujus tu superbiam & incredibilem fastum commemorabas. Gloriari illam frequenter, & mira subinde narrare de summa familiaritate, quae sibi cum Reginâ Bohemiae ac Principe Auriacâ matre intercessisset: nota se ac penitus explorata habere aulae utriusque arcana: nihil illic geri, quod se lateret, aliaque, quae profusum nobis tum risum exprimebant. Hic tu quaerere, quicquamne mihi constaret de hisce rebus? Negavi me scire, quo illa apud Reginam loco esset. De Principe non videri vera, quae jactaret. Esse enim delicati ac fastidiosi ingenii faeminam, nec facillimae admissionis, & a moribus illius nostrae immane quantum averfam. Narratum etiam mihi jam olim ab aulico non ignobili, conventam aliquando & salutatam ab illa Principem, praesente D. *Ri-*

veti

¹ Uxor *Salmasii*.

veti uxore, quae nostram, nisi fallor, eo deduxisset, cum primus is esset aditus: atque iis tum gesticulationibus illic usam *Merceram*, ut iudicaret postea morum gravissimorum, & ineptiarum impatiens Princeps, non esse illam inter sapientissimas numerandam, aut bene educatas. Haec fabella quia ad aures *Mercerae* delata est, aut a te id factum oportuit, aut a *Silvercronio*. Uter vestrum reus sit mox videbimus: apparet certe mihi valde amicum non fuisse; nam historiam veterem ac obsoletam, mihiq; ab illo aulico ante annos duodecim & plures narratam, tanquam rem novam & nuperrime gestam *Mercerae* vendidit, & ad exaggerandam facti invidiam, ostentatas a me Holmiae palam plurimis hujus argumenti litteras, quas a Gallo quodam recentes Hagâ acceperim, tantum abest, ut ostenderim De *Silvercronio* non possum suspicari, cum & bene erga me affectus sit fueritque semper, nec tam plenus rimarum, ut soleat perpluere. De te non esse novum, ut amicos sic soleas, facile illis persuadebo, qui mores tuos perspectos habent. Quanquam in auctorem harum turbarum frustra inquirō, quem expressis verbis *Mercera* nominat in epistolâ. Quid enim aliud sibi vult hoc exordium? *Jé apprend par un rapport du Sieur Vossius*. Non ait, se ex aliis id intellexisse, sed *Vossio*: hunc auctorem nominat. ex aliis jam ante aliquid istius rei si intellexisset, cur in te rei totius invidiam derivavit? Ex aliis quidem id antea illi intellectum tu adfirmas, sed & sic teneris. Alii enim illi te rumoris sparsi auctorem nominarant, quare & jure tecum expostulavit *Mercera*, ut fateris ipse. Bis ergo peccasti, qui & apud alios me prodideris primo, & postea apud *Merceram*. Nam sibi apud quemquam ejus aliquid rei excidisse negat *Silvercronius*, & persuadet. Narratione igitur ista tua hoc effecisti, ut meam & caeterorum amicorum de te confirmaris opinionem, qui existimamus, arcanis nullum apud te locum esse: deinde viris in hac urbe honestis tam firmiter persuasum est, ut avelli suspicio non possit, occultum te mihi hostem esse. Quod eo illi magis mirantur, cum benignissime me semper & honorifice de te loquentem adiverint. Existimationem etiam tuam sciant tam acriter contra plurimos oppugnantes, qui facto quasi agmine in te irruebant, nescio quae de causa, & superiori, cum e Suecia huc reversus essem, & hoc anno a me defensam, ut fraternam non magis possem. Quo in instituto, quia optime successit, & plurimum laudis mihi conciliavit hactenus, pergam alacriter imposterum, teque tuo relinquam ingenio. Dixi quidem illis, nunquam silentii fidem a te exactam mihi: sed vel sic tuarum arbitrantur partium fuisse, absenti amico non nocere. Garrulitatem istam nulli non pudendam esse, iis etiam, qui in aula versantur, perniciosam. Huc accedit, quod non cum *Mercera* tantum, quod leve, absentem commiseris, sed cum *Riveti* vidua, quam ego mariti sui nomine (ab illo enim quamquam ignotus, dum viveret, amabar) veneratus semper sum, & quod omnium pessimum, cum Principe Auriaca: hoc justissimae indignationi omnem occasionem dedit. Sed iis turbis tu ac *Mercera* nunquam efficietis, ne verum ego dixerim. Negat unquam a se compellatam Principem praesente *Riveti* uxore. Meminerit, quaeso, a qua ad Prin-

cipem primo sit deducta. Sin minus, haec jam illius culpa est, a quo id accipi, non mea; quare compellabitur a me, ubi Hagam proxime excurrero, nec negabit fat scio rem gestam. Poterit & nominari, si res sic ferat, & defricandus objici *Mercerae*, ea tamen lege, ut & mihi liceat lege agere in duos illos professores, quos testes laudat de caede in mariti caput a me excogitata; qua de re oportune a te sum admonitus. Vides quantas in molestias te praecipitaris. Quod porro de odio meo Vatiniano queritur in illa epistola, quam ego totam legi, ne dubitare possis, aut febricitare me credas; qui innocentissimum animal fraudisque ac doli inscium, qui miserrimam faeminam, & vix unquam mihi visam, exagitandam sumpserim, miror impudentiam ejus. Illi ergo licebit palam & ubique existimationem meam inter notos ignotosque proscindere, (quod Leidae semper, Holmiaeque nuper fecit promiscue) mihi non licebit illam, quae sic infaniam, pro fatua habere? Nam hinc illae lacrymae, hinc turbae omnes. Neget se de universâ Batavorum gente benignius locutam palam in conviviiis circulisque, cum Lutetiae esset, & tum vicerit. Denique eligamus amicos nostros arbitros utrimque, iisque judicandum relinquamus, uter nostrum, omnibus bonis ac honestis oblatret ac obganniat, uter censuram in mores ac vitam gentium, regum principumque, quorum munificentia alamur, exerceat, uter beneficiis acceptis animum ingratum reponat, si ego is esse arguor, tum triumphet ac exultet *Mercera*, ego vapulem. Venio nunc ad Apologiam tuam, mi Vossi: ac primo quidem suspicionibus ac bili nimis me addictum reprehendis, deinde quereris, quod non aperiâ dilucide, quid velim, de turbis a *Mercera* excitatis, quas tamen diluere conaris. De suspicionibus miror, qui turpissime deprehensus sis. Agnosco historiam te praesente narratam, laudat te testis *Mercera*: legi epistolam ab illa scriptam. & tamen suspicionibus indulgeo. Utinam vero tu non indulgeres? Nam quod ego querebar fabellas in Salmasianis aedibus non sine tua ope excogitatas, de iisque ab amico me monitum: tu *Wullenium* interpretatus es amicum; si dixissem e Suecia id ad me perscriptum, de *Wullenio* suspicari poteris, quamquam nec ille solus ad me scribat: ab amico me monitum dixi. An ignorabas igitur, *Gerium* hîc esse cum duobus filiis, esse *Trippium*, esse *Silvercronium*, esse chirurgum *Reginae*, ejusque fratrem, atque alios, qui aut recentes ex Suecia tum advenissent, aut qui frequentes inde litteras acciperent, ex quibus id haurire potui? Pergis profecto sine causâ injurius esse in virum optimum, nec unquam male de te meritum. Sancte enim testor, nullas adhuc ab illo ad me perlatas litteras, cum ista scriberem. Bilem etiam frustra in me reprehendis, qui tot conviciis immerentem premis *Wullenium*. Caeterum quidquam esset, quod ad confabulatricem perscripserit *Mercera*, non addidi accurate, fateor. Quod augurarer conscientiam suam id abunde tibi suggesturam. Nec conjecturae falsus fui, quod obnoxium tanto magis te culpae arguit, cum jam nullo negotio divinare potueris, quid vellem. Non febricitavi igitur, cum ad me perlatum est, functum te officio hominis minime amici, valeo enim, nec quicquam mihi negotii cum febre est, postquam in patriâ aetatem ago. Utinam, mi Vossi, non majori jure febrem istam lentam, & quidem per-

petuam, amici uno in te ore reprehenderent! Denique non hoc volui, cum nullum apud te arcanis locum esse exprobravi, nihil a me commissum tibi unquam fuisse, sed magno meo malo me expertum, tuto nihil committi tibi posse testatum volui. Multa sunt, quae nos conjungere arctissimo vinculo debebant, Serenissimae imprimis Reginae auctoritas, quae non semel hoc imperavit, & cujus tu mandata religiosius observare debebas. Cum multos mihi ex amicis propensissimos experiar, unus tu tamen inter omnes, cujus affectum precibus lacrymisque tantum non supplex, quod alius frustra speraret, in me derivare contendi: idque frustra. Poteram isto obsequio barbaros quosvis demereri: te non potui. Cum monerem libere multa, ut amicum decebat, indignatus es: cum monenti ego gratias semper egerim. In faciem multa tibi exprobrabam, quae excusabam apud alios. Hoc amici est officium. Pergam mei similis esse, nec committam unquam, ut malignum mihi animum fodalium quisquam possit objicere. Cum *Mercera* si unquam bene tibi conventurum putas, falleris: saepius hoc monui. Vive tamen cum illa concorditer, aut litigare perge, dum modo nexu vestro ego non constringar. Taedet harum nugarum, quas proinde abrumpo. Vale.

EPISTOLA XLIX.

ISAAC VOSSIUS

*Nic. Heinsio.**Leidam.*

CRedo, mi Heinsi, jam dudum id te agitare, ut cum scias me omnes tuas Serenissimae Reginae legendas exhibere, quod & discedenti tibi promiseram, & postea literis iterum confirmavi, tu tam pulcra utaris occasione, qua omnia mea crimina retegas, & hoc me pacto invisum facias apud omnium optimam benignissimamque Principem. Si tam callidum tibi placeat commentum, non video quo pacto possis profiteri illum, quem toties & ad nauseam usque jactas, amorem erga me & benevolentiam. Nam si amicorum honor & fama apud quoscunque etiam tuenda est homines, quanto magis id apud illos fieri convenit, quorum in manibus spes & fortuna eorum sita & collocata est? Gloriaris te existimationem meam apud nescio quos Leidenses tuos acriter defendisse; at vero quisnam iste est perversus affectus, velle meam causam agere apud eos, qui aut parum aut nihil omnino laedere me possunt, eam vero oppugnare & prodere apud illam, in qua non spem tantum & fortunam, verum & honorem, famam, salutem, vitam, omnia denique mea posita esse decrevi. Nisi enim hoc agere volueris, quo pertinent tot crimina, tot exprobrationes, tot sinistra de me aliorum judicia, a te in unum congesta, cum in superioribus, tum in postremis tuis potissimum literis? Ne tamen existi-
mes

mes gratis te ea vel finxisse, vel ab aliis conficta huc transmisisse, ad singula tibi quam brevissime respondebo. Commemoras primum sermonem, proxime elapsa hyeme in cubiculo tuo habitum de *Mercera*, liberiores forsan, quam apud te instituere debueram. Quorsum vero istud? Promiseras in superioribus te omnia ista, tanquam arcana, pectore tuo clausa velle continere, nunc vero quare ea in literis tuis repetis. Amicitiae & affectui debes, si quid ego liberius in sinum tuum deposuero. Ex animo angebar, cum te viderem afflictissima valetudine oppressum, aegerrimeque ferentem injurias & persecutiones inimici tui, quas nec ipse dissimulabas; mene nunc reprehendis, quod ea apud te amoris & libertatis ediderim signa? Quid si & mihi animus nunc esset revocandi tibi in memoriam verba illa, in quae ut erumperes, imbecillitas & extrema te addegerat desperatio. Quos non ille tuus hostis de te triumphos ageret, si tale quid resciret? Quod vero inquis me quaesivisse a te, quo loco in aula Bohemica esset *Mercera*, in eo valde te memoria decipit. Certus sum me nihil tale unquam a te postulasse. Si de versu aliquo Ovidiano fuisset quaestio, quo is loco reperiretur, de eo te potius consuluissem, quam de loco, quo esset *Mercera* in aula Palatina. Satis enim noram; te non minus atque sim ego, esse ibi peregrinum. Verum & tum quoque fallit te memoria, cum negas te ulli, nisi *Silvercronio*, & mihi, narrasse eam historiolum. Narrasti enim omnibus *Spiringii* filiabus, me quoque praesente. Hoc & ipsae testantur, & insuper addunt, sese diu, antequam a te fabellam istam accepissent, eandem quoque ex aliis intellexisse. Illae porro narrarunt multis. Et hoc libenter agnoscunt. In tuum itaque recidit caput garrulitas illa, quam mihi objicis, cum jam ipse plures tibi retulerim, quibus id narra-veris, tu ne unum quidem possis adferre, apud quem ego ea de re habuerim sermonem. Nam quod ad *Mercerae* literas provocas, miror equidem. Inquis te mores foeminae istius probe habere perspectos, videris tamen velle eos nunc ignorare. Tu producis testimonium unius mulieris, quam mihi male velle ipse fateris; ego vero plurium apud te utor testimonio, quarum nulla est, quae tibi non ex animo faveat. Ais me bis peccasse; primo cum aliis, dein cum *Mercerae* historiolum istam narraverim. At vero tu bis nugaris, mi Heinse, primum cum verborum tuorum es immemor, deinde vero cum maligne & culpam & tuam, & aliorum, immerenti imputas amico. Sed video quid velis, indignaris me tibi esse amicum, omnibusque modis efficere conaris, ut candidissimi illi amici tui, inter quos versari te inquis, qui tibi persuaferunt occultum me tibi hostem esse, vera dixisse videantur. Nisi enim id tibi sit animi, quorsum ista bella argumentatio, *Silvercronium* non potuisse sermonem tuum aliis communicare, quoniam is tibi sit amicus, ergo me esse, qui illum in vulgus sparserim. Pro inimico igitur me habes. Id si ita sit, quomodo de te amice possim existimare? Si vero postulas, ut amice de te sentiam, cur me pro inimico habes? Adfirmasse hoc tibi inquis candidos istos tuos amiculos, quos & honestos, & eruditos & eximios vocas. Sed fane quicumque illi demum fuerint, illos ego & honestos, & candidos fuisse

nego

nego. Imo quidquid in contrarium adtuleris, ego scurras & nebulones fuisse convincam. Vix duo vel tres sunt in tota vestra urbe, cum quibus mihi vel modica unquam intercefferit familiaritas. Eos autem nimium probos & ingenuos esse existimo, quam ut de me, nihil certe mali de ipsis promerito, tam improba tibi suggesserint mendacia. Si qui aut hoc aut superiori anno, facto, ut inquis, agmine contra existimationem meam conspiravere, pessimos sane eos & nequissimos fuisse oportet, cum tantum absit, ut unquam eos laeserim, ut ne de facie quidem noverim. Et sane recte fecisti, quod addideris, te nescire qua ratione certatim in me incurrerint, cum nulla prorsus sit. Gratis quippe sunt nebulones. Falleris vero, si putas multum me tibi debere, quod apud tales defenderis. Odi approbationem improborum. Indignus est amicitia bonorum, quisquis scurriles captat applausus. Ultro itaque te rogo, ut vilissimos istos homines imposterum moribus & ingenio suo vivere permittas. Quanto illi acrius in me debacchantur, tanto illos magis contemnam. Pergis deinceps garrulitatem mihi objicere, & hoc crimine, inquis, me ab aliis quoque notari. Ipse nimium garris, mi Heinse, cum talia fingis. Nemo est, qui hoc me nomine reprehendit, tuum est hoc commentum. Scio quidem, quantopere laboraveris, *Silvercronio* id ipsum persuadere, sed frustra, ut opinor, fuisti. Improbe vero & pessime a te factum, quod *Wullenii* in literis tuis mentionem feceris, cujus causam dum agis, simul quoque prodis. Nam cum in superioribus tuis literis diserte significes, illum solum esse in Suedia, qui ad te scribat, in his plane contrarium adfirmas, & te alios quoque habere ais, qui id tibi praestent officii. *Silvercronius* vero ista non tibi significavit. Ex aedibus enim parentis ejus habebam omnia ea, quae tibi rescripsi. Sed neque caeteri, quos nominas, hoc tibi retulere. Etiamnum in Suedia commorabantur, cum ista ad te scriberem, & fero admodum in Hollandiam venerunt, chirurgus praesertim, qui solus aedes *Salmasii* frequentabat. Caeteros ipsos eorum, quae a me aut *Mercera* aguntur, valde ignaros fuisse existimo. Verum itaque hoc superest, ut aut *Wullenius* tibi significarit, aut ipse finxeris. Elige quod mavis. Quod vero mihi exprobras pergere me male mereri de *Wullenio*, quid hoc ad te pertinet. Res tuas age. Mihi semper, ut spero, cum *Wullenio* bene conveniet, nisi tu nos commiseris. Illud vero praeclare a te dictum, posse te, si velis, vindictam de me sumere, manifestando ea omnia, quae tuae commisi fidei. Tunc de vindicta cogitas, qui primus tot me injuriis & calumniis oneraveris? Fac quod velis, dic omne, quidquid de me dicere possis, dic publice & privatim, non renuo. Cognoscetis & tu, & *Salmasius*, qualis erga vos fuerim. Interim scias, quod res illa non sine insigni tua infamia peragetur. Dicis Serenissimam Reginam voluisse, ut essemus amici. Cur ergo solvis sanctum illud amicitiae vinculum, & falsissima mihi objicis crimina, vel a te, vel ab aliis non sine ope tua, excogitata? Mihi objicis febrem, eaque te non amplius laborare significas. At vero gravius illi laborant, qui se laborare nesciunt. Exprobras mihi, quod erga alios non sim officiosus. Tanto minus tu debes conqueri. Aliis istas relinque querelas. Illud vero prae caeteris satis mi-

rari non possum, quod toties repetis insignia illa tua erga me officia pariter & beneficia. Visne, de eo quid sentiam, breviter tibi exponam. Suspectum mihi est, quidquid nimium ostentatur. Ubicumque fuerim terrarum, in nullum haecenus incidi, vel notum, vel amicum, qui vel praeclaram illam tuam erga me benevolentiam, vel invidiosum aliquod mihi praedicarit testimonium tuum. Sed neque unquam id a te flagitavi; probe enim mihi sum conscius, me nihil tale promereri. At vero cur silentibus caeteris ipse tua jactas beneficia. Ideo proculdubio, quoniam alii tacent. Si id ita sese habeat, laudo acumen tuum, mallet tamen ea ab aliis praedicari. Nihilominus si aliter tibi visum fuerit, per me licet. Sequere ingenium tuum. Nunc vero illud a te unice peto, ut siquid mihi, dum meipsum purgo, acerbius exciderit, id benigne accipias. Deinde & hoc quoque te rogo, ut tu, qui primus odiosae istiuscriptioni ansam & originem praebuisti, eidem quoque primus finem imponas. Ut omnium obliviscar, tu facile possis efficere. In me nulla erit mora, ut tales imposterum permutemus epistolas, quales inter amicos decet. Verum & tu, mi Heinse, fac illud, quod promittis, & ne unquam permittas, ut beneficiis a me vincaris. Minime id tibi difficile; nam neque ea mihi fortuna est, ut magnopere te obstringere possim, & etiam si possem, nunquam id tamen faterer. puderet enim me meorum apud quemquam meminisse beneficiorum. Sed vero tu innumeris cum me jam, ut inquis, obstrinxeris modis, illud quoque caeteris adde meritis, ut de tuis erga me benefactis moderatius imposterum judices, de meo vero erga te animo benignius. Vale. xiv. Junii ciciocli.

EPISTOLA L.

ISAAC. VOSSIUS

Nic. Heinse.

Leidam.

ARbitror te jam Lutetiae versari. Tamen cum tempus & diem discessus tui non significaveris, consultius visum est, ut & has quoque literas mitterem in Hollandiam, praesertim cum non multo celerius iter suum absolvant cursores illi, qui recta Lutetiam, quam qui per nostras eo tendunt terras. De itinere tuo nihil est quod intellexerim ex Serenissima Regina, quod non tibi indicaverim. De Bibliotheca Cardinalis quid futurum sit, ipse videris, ego enim nihil certi de ea possum rescribere. De *Silvercronio* quid fiet, ipse, ut existimo, brevi te poterit certiores facere, nempe simul ac pater ejus fuerit reversus. Gellium *Gronovii* avide exspecto. Vellem illum per cursores transmissis, neque enim magnae molis librum esse existimo. Negotium ejus commendatissimum est Serenissimae Reginae. De torque aureo recte judicas. Et mihi quoque, cum ad te scriberem, istud consultius videbatur, propter pericula itinerum. Amplissimum *Sarravium* obiisse ulcere hepatis ultimis intellexi.

leximus litteris. Mortem ejus ex animo doleo. *Valesium* & *Bochartum* necdum sese itineri commisisse idem adtulit nuntius. Detinet *Bochartum* liber de animalibus & plantis biblicis, *Valesium* vero *Bochartus*. Uterque aliquot meas ad se scriptas in *Hollandia* offendet literas. Gratum erit *Serenissimae Reginae*, si omnem tuam contuleris operam, effecerisque, ut se viae quamprimum committant. Nisi enim quamprimum se itineri huic accingant, vereor ne hyemem caufentur. Sane non puto defuturos, qui curam editionis libri *Bochartici* suscipiant, etiamsi ipse absit. Sed de hoc mentem *Serenissimae Reginae* sequenti, ut spero, significabo hebdomade. Uti quoque de libris *Eguillonae*, aliisque. De nummis curae mihi erit id, quod postulas. Quamdiu in *Parisiis* haerebis avide scire desidero. Pro fragmento literarum *Cassiani a Puteo* gratias ago maximas. Domino *Holmio* tradidi literas tuas, longeque ei fuere gratissimae. *Stephanianam Bibliothecam* *Serenissima Regina* pretio suam fecit. Illustrissimus *Salvius* & Dominus *Chanutus* hac hebdomade *Lubecam* profecti sunt. Aliud, quod tibi significem, nihil habeo. Vale. xxiv. Junii. stilo novo. c i o i o c l i.

EPISTOLA LI.

ISCAAC VOSSIUS

Nic. Heinsio.

Leidam.

Heri mihi reddita est epistola tua scripta idibus Jun. Greg. Inquis in ea, te nullas illa hebdomade a me accepisse literas, quod, quâ factum sit, divinare non possum. Certus enim sum me ab eo tempore, quo te de itinere Italico certiore feci, nullam praetermisisse occasionem, qua non aliquid ad te dederim literarum. Aut itaque illae interceptae sunt, aut proxime secuta hebdomade geminas accepisti. Tuas vero more meo legendas exhibui *Serenissimae Reginae*. Negat illa unquam se sermonem habuisse cum *Salmasio* ea de re, cujus in epistola tua mentionem facis. Miror itaque imprudentiam viri, quod ea rescripserit, quae, etiamsi vera fuissent, alto fuissent premenda silentio. Tu vero, mi *Heinsi*, melius facies, si haec tacite concoxeris & contempseris, quam in vulgus sparferis. *Regina* procul abesse vult a vestris litibus, nec vult quidquam cum iis habere commercii. Miror te in literis tuis nihil de itinere tuo scribere. Mortem *Sarravii* ex animo doleo. Verum est, *Bochartum* & *Valesium* distulisse iter suum in mensem Martium anni sequentis. Sed tamen spero illos denuo consilium mutaturos, & praeventuros hyemem. Tuum est urgere eorum discessum, simulatque in *Galliam* veneris, magnam hoc nomine gratiam *Dominae nostrae* demerebere. Videntur illi existimare *Suediam* esse inaccessam & inhabitabilem hyeme. Tuum est eos hoc errore liberare, & commoditatem adeundae *Suediae* significare. Si *Parisiis* videris *Thevenotum*, agas cum eo de libris *Pyrrhi Lighorii* vel describendis, vel comparandis.

Ffff 2

Transmi-

Transmisit ad me eorum ¹ fragmentum de antiquitatibus Tiburtinis. Regina ad matrem contendit Nicopiam, nec nisi post octiduum reversura una cum matre ad exequias *Torstensonii*. In Italiam ubi veneris, habebis commendatitias Serenissimae Reginae ad magnum Hetruriae Ducem, & fortan ad alios principes. *Spiringius* cum tota familia ante complures dies jam hinc discessit. Filius ejus quamprimum huc revertetur, ut offerat Serenissimae Reginae picturas, caeteraque patris cimelia. Quas ad te scripsi literas de discessu tuo in Italiam, nulli ostendas vel communices rogo. Causam nosti. Neque id mihi tantum, sed & Dominae nostrum gratum fore confido. Plura alias. Nunc enim ideo brevis esse cogor, quod totum fere pomeridianum tempus mihi abstulerit Illustrissimus D. *Skytt*, vixque ante horam a me discesserit. Petit is aquas Spadanas valetudinis ergo. Vale, & me ama ¹ Julii St. N. CIOIOCLI.

¹ Illud est, credo, de *Villa Hadriana Tiburtina*, quod insertum nunc legitur tomo IX. Theatri Antiquitatum Italiae; ex Vossiana enim Bibliotheca, quae accessit Leidensi Academicae, est de promptum.

EPISTOLA LII.

ISAAC VOSSIUS

Nic. Heinsio.

Leidam.

HEri in loco tribus milliaribus hinc diffito animi deliquium passa est Serenissima nostra Domina, Heinsi praestantissime. Creditur hoc malum sibi conciliasse ex nimio aquae haustu. Nullo siquidem alio hoc tempore utitur potu incomparabilis nostra Domina, quam aqua cruda. Et hoc aequis cogimur indies spectare oculis, nec quisquam est nostrum, qui tantum nefas vel possit, vel ausit reprehendere. Invitis medicis & omnibus suis pergit in hac prava consuetudine, & nequidem tantillum vini aquis suis permiscere dignatur, ut vel pallorem saltem deponant. Tu qui olim in aquae potores stilum exercuisti, experiare nunc vires tuas. Utinam carminibus tuis id posses efficere, ut divina nostra Domina, tanto laboraret aquae, quanto nunc vini odio. Si teipsum, si nos omnes ames, & quod praecipuum est, si tibi curae sit salus illius, a qua nostra pendet salus, hoc tuum nunc sit officium, si nihil profeceris, nihil certe nocebis. Reversa est autem illa in urbem hanc ante horulam circiter. Tradidi ei tuas legendas, quamvis nunc nihil habeam, quod tibi rescribam nomine illius, quamvis etiam nihil novi resciverim, quod tibi possim significare, tamen quia postulas ut semper vestigia tua legam, & ad omnia accurate respondeam, parebo libentissime. Iter tuum quod adtinet valde miror te etiamnum in Batavis haerere, praesertim cum novem jam effluerunt hebdomades, ex quo voluntatem Serenissimae Reginae tibi significarim. Nescio vero quanam sint illa mandata regia, quae te exspectare dicis, prius quam te in viam des, neque enim politica sunt ea negotia, quamobrem in Galliam Italiamque tendis, ut multis & prolixis egeas, quas vocant, instructio-

etionibus. Satis, ut opinor, mentem suam coram significavit tibi Serenissima Regina. Quod siquid sit, de quo dubites, abunde tibi est temporis, ut de eo quid sentiat serenissima Regina possis explorare. Commendatitias jam dudum ad Bidalium misit D. *Holmius*. Pro oratione *Ferrarii* puto me jam tibi gratias retulisse, quod si id non satis sit, nunc iterum gratias tibi ago. Non tradidi illam Serenissimae Reginae propterea, quod illa duobus tribuere hebdomadibus antea aliquot ejus orationis exemplaria esset nacta. Hoc itaque quod transmittebas, mihi servavi. De *Foresto* jam dudum te certiore feci. Literas quoque tuas ad D. *Salvium* & *Chanutum* me curasse, & hoc quoque diu est quod significarim. Ne itaque mihi negligentiam hoc nomine imputes. Literae vero meae quod tam sero tibi reddantur, ea non mea est culpa. Indica aliam mihi occasionem quamcunque volueris, in me nulla erit mora, quin eam accuratissime servem. Quod autem dicis postulare te id tantum, ut ad ea respondeam, quae ex me scire desideras, arbitror me id satis diligenter praestitisse. Nam quod inquis, me ne γὰρ quidem reposuisse iis, quae de oratione *Ferrarii* scripseris, id omnino ita sese non habet. Non semel mentionem ejus orationis in literis meis feci. At in eo non erras, quod inquis me non tibi significasse, debere sine *Ferrarium* de torque aureo certiore facere, nec ne. Quomodo ad hoc respondere potuissem, cum tu ipse nullam ejus rei in literis tuis feceris mentionem, uti neque poteras, non enim eras divinus. Opus praeterea non esse existimabam, ut de eo quidquam ad te scriberem, siquidem jam, antequam exemplar tuum ad manus meas pervenisset, nomine incomparabilis dominae egeram *Ferrario* gratias. Hoc itaque argumento nihil proficis, uti neque sequenti, quod nimium leve & prorsus te indignum, nempe quod non rescripserim me literas tuas Serenissimae Reginae tradidisse, cum tibi significarim me tuas accepisse literas, poteratne dubitare de illis ad Serenissimam Reginam? De Memmiana, Mazariniana aliisque bibliothecis, nihil certi tibi possum affirmare. Et sane perridiculus essem, si in talibus apud te verbosus essem, & e Suedia ad te scriberem ea, quae Parisiis aguntur. Nonne hoc esset nuntios cum iisdem remittere literis? Quae te adtinerent, vel quae esse grata Serenissimae Reginae vel scirem vel crederem, significavi tibi omnia. De libris τὰ μακροῦτα *Sarravii* nihil habeo certi, quod tibi rescribam. Vix existimo Serenissimam Reginam eos velle comparare. Si aequae esset instructa ejus Bibliotheca, atque sit Thuanaea vel Puteanea, libenter procul dubio eam aequo ab haeredibus pretio redimeret. Ipse nosti magis e re esse Dominae nostrae, ut semel instructissimam aliquam comparet sibi bibliothecam, quam multas imperfectas. Quatuor aut quinque illi MSS. quos habet *Sixius*, illi mei esse debuerint. Sed sane perinde est, uter nostrum eos habeat, cum a multis annis simus amicissimi. Caeteros omnes ipse emi, una cum scriptis *Gruteri*. Inter ea sunt triginta libri Suspicionum ejus inediti. Sunt & alia multa vel illius, vel aliorum eruditorum manu exarata, sed tam misere lacerata & conspurcata ab isto impurissimo homine, ut videantur esse Annales *Voisii*. Relicta sunt omnia Amstelodami, exceptis Suspicionum libris, & aliis nonnullis. Malo enim

nim abesse, quam ut eorum faetore cubiculum meum inficiatur. Magni tamen mihi constant, quod tamen soli imputo *Sixio*, qui nunquam permisit, ut quemcunque librum bono unquam compararim pretio. Adeo mihi damnosa semper ejus fuit familiaritas. Et tamen sumus amici, & erimus semper. De *Miltono* jam certior factus sum ab avunculo meo *Junio*, qui cum eo familiaritatem colit. Is mihi significavit cum Parlamento esse a Secretis in negotiis externis, esse multarum linguarum peritum, non quidem nobili, sed tamen generosa, ut ipsi loquuntur, ortum stirpe, discipulum *Patricii Junii*, comem, affabilem, multisque aliis praeditum virtutibus. De *Keckio* nolim ita accipias, tanquam si eum tibi commendarim. Ego tibi simpliciter significavi, quid ille desideraret. Et huic & caeteris longe debes praeferre *Resandrum*, non quod cum illis eruditione possit certare, verum quia diu jam inservierit Serenissimae Reginae, mediocremque habeat cognitionem linguae Graecae, & scripturam librorum manu exaratorum satis bene adsequatur, satisque bene litteras pingat. Verum apud te rationibus opus non est, cum solam tibi Dominae nostrae voluntatem sufficere existimem. Vale & me amare perge. VIII. Julii stilo novo CIOICLI.

EPISTOLA LIII.

I S A A C. V O S S I U S.

Nic. Heinsio.

Leidam.

TRadidit mihi literas tuas *Wullius* noster apertas, Heinsi Clarissime. Adideras tantum sigillum, quod vocant, ut puto, volatile. Nempe voluisti D. *Wullium* prius eas legere: statim itaque ut eas accepi legendas, ipsi obtuli, verum ille recusavit. Serenissimae vero Reginae eas tradidi more meo, simul atque sese obtulit occasio. Nondum eas recepi. Non puto autem, nisi me fallit memoria, aliquid esse in iis, de quo responsum exigis. Diligentius tamen eas perlegam, & siquid sit, de quo possim aut debeam rescribere, non ero negligens. Hic novi nihil est quod sciam, aut siquid sit, id ex *Wullenio* melius & accuratius possis intelligere. Ego nihil aliud habeo quod a te postulem, nisi id tantum, ut me porro amare pergas, si isto tibi honore dignus videar. Vale xv. Julii CIOICLI.

EPISTOLA LIV.

ISAAC VOSSIUS

*Nic. Heinsio.**Leidam.*

QUum tam acriter urgeas, ut ea tibi mittantur mandata, quae tibi promississe significas S. Reginam, heri iterum vesperi eam sum allocutus, Heinſi clarissime. Inquiebat illa, ſatis ſeſe coram mentem ſuam tibi expoſuiſſe, & vix poſſe te ea in re peccare: neque enim praſcire ſe quinam libri & Bibliothecae venales proſtabunt, & proinde imperare ſeſe non poſſe, hoſne an potius iſtos debeas comparare, totum id tuo permitti iudicio. Juſſit tamen, ut breviter in cartam conjicerem ea, quae te deſiderare exiſtimarem. Feci id quam libentiſſime, ſtatimque ei obtuli. Cum vero occupatior mihi videretur, & interpellaretur ab aliis, juſſit, ut id negotium in ſequentem differrem hebdomadem. Quod vero in literis meis pollicitus ſim ſequenti me acturum hebdomade de caeteris rebus, iter tuum adtinentibus, in eo non me poſſis reprehendere. Non potui tibi plura ſignificare, quam ex Sereniſſima Regina intelligerem. Quidquam autem ex ea intellexi, id tibi ſignificavi. Nummi vero aurei aliquot ad *Bidalium* ſequenti hebdomade tranſmittentur, a quo tuum accipies. Libros Elzevirii aſide exſpecto. *Gronovium* ſe iterum accinxiſſe ad meliorum autorum emendationem ex animo gaudeo. Nam certe *Aldhelmus* iſte, aliiſque huiuscemodi verſificatores, non merentur, ut in iis tempus terat, quod multo dignius poſſit collocare. Non deſuere, qui titulum libelli reprehenderent, quod *Eccleſiaſticas* inſcripſerit *Obſervationes*, cum nihil prorſus in iis occurrat, quod ad Eccleſiaſticam pertineat hiftoriam, & ſint mera Grammaticalia. His tamen reſpondi, non mihi videri in eo eſſe peccatum, utcunque enim ſcriptum illud nihil haberet Eccleſiaſticum, pertinere tamen ad hiftoricos Eccleſiaſticos, quorum multa in eo loca illuſtrantur. Porro in hac noſtra Petaviana multa & Aldhelmi, & ſimilium autorum ſcripta exſtant inedita. Sed nondum otium fuit illis pervolvendis, haſtenus enim melioribus, ut mihi quidem videtur, vaco. Et ſane nullus tranſit dies, quo non aliquid ſeſe offerat novi. Hoc ipſo die, quo haec ſcribo, incidi in duo folia ſtupendae antiquitatis, quae poſtquam diligentius adſpexi, ſtatim conjeci eſſe fragmenta deperditarum Salluſtii hiftoriarum. Continent illa bellum Servile Crixii & Spartaci. Non potuiſſet vel tu vel alius in lacrimas me pronior ſiccis ea oculis intueri. Attamen non ideo minus dolui. Et ſane quis non doleat & indigneſcat tam divini autoris tam laceras videre reliquias? Forſan ante pauca ſecula delirus aliquis bibliopola, ut miſſalia aliaſve veſtiret ineptias, totum conſumſit opus, paucaeque haec nobis reliquit, non tam ſolatio, quam macrori. Poëmatum aliquot novorum quod editionem moliaris, gaudeo. Eufebius, quem

ſub

sub manibus habere scribis Janfonium, opus erit longum & laboriosum, nec intra triennium absolvendum. Multa sunt & pulcra, quae addidit isti editioni *Scaliger*, non tamen pauciora & deteriora erunt ea, quae ipse, ut spero, conferam. Quod tamen ne aut ostentatione ingenii, aut quadam vanitate dici a me putes, quod ope eorum codicum, quos olim contuli, & quos nunc beneficio Serenissimae Reginae nactus sum, hoc me posse praestare existimem. In Theocrito, quo editionem Elzeviriorum juvem, nihil habeo hoc tempore ad manum. Exemplar meum, cujus ad oram nonnulla congefferam ex veteribus codicibus, perditum est nescio quo casu in itinere, quod ante aliquot menses Serenissima Regina Ubsaliam instituerat. Alterum exemplar una cum aliis ad Theocritum annotatis, quomodo perierit, retulit jam tibi mater mea. *Wicquefortium Silvercroniumque* mirari, me nihil quidquam rescripsisse *Foresto*, id ipsum valde miror. *Forestum* aliquid transmisisse Serenissimae Reginae, neque ipsi neque alius quisquam mihi significavit. Et plane ignoravi, antequam tu me certiores faceres. Mox indicavit idipsum Serenissima Regina, jussitque ut ei rescriberem. Feci id eodem die. Cinnami historiam quod nunc demum in lucem protrudat *Tollius*, in eo operam ludet. Ante triennium quadrienniumve donavi, vel saltem communicavi ei codicem istum, ut ex ejus editione aliquam sibi compararet gloriolam. Nunc autem praevenietur a Jesuitis, qui id ipsum longe accuratius praestabunt. In titulo tamen ipse minus peccavit, quam Jesuitae. Illi namque *Ginnamum* pro *Cinnamo* substituunt, nulla prorsus ratione aut autoritate. *Cinnamum* esse viri nomen constat etiam ex Martiale. Monui ea de re jam ante decennium *Clariss. Holstenium*, qui illum autorem Jesuitis communicavit, is tamen maluit in errore perstare, quam meis hac in parte obtemperare monitis. Bibliothecam librorum manu exaratorum Archiepiscopi Tholosani, Incomparabilis nostrae Domina suam faciet. Habeo hîc catalogum, cujus apographum sequenti hebdomade ad *Bidalium* remittam. Postulat pro ea decem scutatorum millia. Sed proculdubio multum de ea summa remittetur. *Freinshemius* in Germaniam valetudinis ergo proficiscetur quamprimum, sequenti reversurus aetate. *Salmasius* abitum meditatur. Vale, & salve a tuo ex animo Vossio. Holmiae ciciocli. xii. Julii.

EPISTOLA LV.

ISAAC. VOSSIUS

Nic. Heinsio.

Leidam.

Literas ad Serenissimam Regiam, quas tuis ad me incluferas, simulatque Laccepi, obtuli Incomparabili nostrae Dominae. Jam olim te certiores feci, quam illae semper sint gratae, nunc tamen non possum praetermittere, quin

quin id denuo tibi indicem, cum novis illa & non tralatitiis verbis iterum significarit, valde sibi gratas esse & literas & officia tua. Ipsas quidem quod adtineat literas & genus scribendi, id certe usque adeo laudavit, ut impensius laudare vix potuisset. Testabitur hoc quoque *Wullius* noster, qui & ipse aderat, cum eas offerrem. Cave itaque dubites imposterus, gratane sunt Dominae officia tua, nec ne. Imo id ego tibi adfirmare audeo, tanto te rectius facturum, quanto saepius eam literis tuis compellaveris. Optime vero a te factum, quod itineri te tandem accinxeris. Quanto id promptiore fecisti animo, tanto te rem gratiorem praestitisse scias incomparabili Reginae. Eorum, quae postulas, vel quae tibi ad iter sunt necessaria, nihil omnino defuturum spero. Mandata illa, quae postulas, sequenti transmittam hebdomade. Aliquid enim intercessit, quamobrem illa expediri nunc non potuerunt. Laborabo ut simul transmittantur nummi promissi. De argenteis, quos petis, certiora sequenti rescribam occasione, simulque de historia plantarum Mexicanarum, quam habet *Wittius. Graswinkelio* interdictum esse ne pergat in *Miltono* confutando, aegre fert *Salmasius*. Verum idem ex animo gaudet librum *Miltoni* Lutetiae publice a carnifice esse combustum. Non opus est ut meum de hoc scripto interponam iudicium: interim hoc scio, fatum esse bonorum fere librorum, ut hoc modo vel pereant vel periclitentur. Homines plerumque propter scelera & pravitatem manus carnificum subeunt, libri vero virtutis & praestantiae ergo. Soli fatuorum labores tales non metuunt casus. Sed sane frustra sunt, qui se hoc modo extirpare posse existimant *Miltoni* & aliorum scripta, cum potius flammis istis mirum quantum clarescant & illustrentur. Quae autem de *Miltoni* conditione ad me scribis illa convenire puto cum iis, quae tibi ante hebdomades aliquot significavi. De Cardinalis Bibliotheca non debes omnino desperare. Forsan solos possis comparare Manuscriptos. Gellium *Gronovii* nondum accepi. Minus tamen illum nunc desidero, cum nihil quidquam editioni huic accessisse significes. Quod vero rogas, ut diligentem imposterus habeam curam eorum, quae sis postulaturus, de eo nolim te dubitare. Verum quod existimas me maximam habiturum curam eorum, quae ad augmentum pertinent bibliothecae Regiae, & ad propagandos, ut loqueris, imperii mei terminos, in eo omnino falleris. Ita, ut spero, semper inserviam Serenissimae & incomparabili nostrae Dominae, ut unusquisque possit cognoscere, me vel parum vel nihil propriis studuisse commodis & utilitatibus, nec alium ob oculos scopum habuisse, quam voluntatem honorem & gloriam incomparabilis Reginae, cui si servitium meum quaecunque non improbetur, jam nihil est quod ultra desiderem. Illi non displicuisse, id omni mihi honore & munere carius semper erit, & quodcunque mihi in vita contigerit, id mihi perinde est, dummodo semper huic inserviam: id enim si licuerit, semper beatus moriar. Atque haec quidem me ex animo proferre ostendet, spero, perpetuus vitae meae tenor. Erras itaque, cum putas me propriis studere commodis, quin potius ita habeas velim, te tibi ipsi comparare, quidquid Incomparabili comparaveris Dominae. Nam certe si & ipse non detrectes curam Bi-

bliothecae Regiae, multum fane gaudebo. Nihil enim est quod aeque optem, atque ut hujus tot sint curatores, quot aliquando literarum amantes & studiosi Dominae nostrae aderunt, inter quos si postremum meruero locum, satis mecum benigne agetur. Sed haec haecenus: alia alia ad te scribam occasione. Vale, & amare pergas Vossium tuum. ad v. Aug. CIOIOCLI.

EPISTOLA LVI.

ISAAC. VOSSIUS

*Nic. Heinsio.**Leidam.*

NUnquam plura habui, de quibus te certiore facerem, nunquam tamen magis in arctum fui redactus, quam hoc tempore. Plures mihi epistolae hoc die scribendae fuere in Hollandiam ad amicos, aliquot etiam nomine Reginae. Magnam praeterea temporis pomeridiani partem abstulere Lusitani quidam. Una tantum aut altera superfuit horula, quam tuis literis respondendis destinaram. Attamen cum scirem me non tantum, sed & ipsam Reginam promississe habiturum te ea mandata, quae toties flagitasti, contuli me iterum ad illam, petiique mandata. Verum illa diu quaesivit, attamen frustra. Tandem jussit ut alia scriberem. Feci id quam raptissime, ut vides. Illicoque illa subscripsit. Verum haec non sunt tam ampla, quam illa, quae prius exararam, defuit enim tempus. Verum tamen, si quid sit, quod desit, certiores nos fac, & curabo, ut voto tuo satisfiat. Velim convenias abbatem *Tintum*, qui nunc Parisiis agit, cumque eo conferas de libris & bibliothecis Italicis. Gratum hoc erit Serenissimae Reginae. Tribus tuis epistolis non possim nunc aliquid reponere: faciam id sequenti hebdomade. Vale, mi Heinsi CIOIOCLI. XII. August.

EPISTOLA LVII.

ISAAC. VOSSIUS

*Nic. Heinsio.**Leidam.*

PRO apographis literarum, quas transmittis, magnas ago gratias, Heinsi clarissime. De Stylo *Liceti* recte judicas. Indignum est tanto viro tam ineptum scribendi genus. Non sine indignatione, ne dicam risu, legere potui *Caucaso* illos *contemplativos*, & *Caucaseas majestates*. Quis non *Caucasias* patiatur *hyemes* talia audiens. Et tamen hoc condonandum viris quibusdam insignibus saeculi nostri, quod Mercurium non in lingua, sed in pectore habeant.

Quan-

Quantum autem diversus ab illo *Ferrarius* ejus collega, cujus stylus, licet magnificus sit, & multum adsurgat, nihil tamen minus, quam operosus & intricatus dici meretur, in quod tamen vitium ut plurimum deflectere nosti eos, qui sublime illud dicendi genus sequuntur. Historiam Plantarum Mexicanarum nactus sum, & prima transmittam occasione. Inter scripta, quae in Italia excudi significas, nihil est quod aeque videre gestiam, atque *Camilli Peregrini* Campaniam felicem. Jam diu & hoc scriptum & alia quaedam non absimilis argumenti sub manibus habuit, quae ut aliquando publici faciat juris ex animo desidero. *Celsi* Rhetoricam inquiram, & cum altero, quem statim nominavi, libro transmittam. Fasciculum vero, in quo Gellius *Gronovii* & alia, necdum accepi. Credo tamen adpulisse navem, quae ista mihi advehet. *Grenirius* iste Zelandus, qui in Gellium notas scribit, quis sit vellem addidisses. Intra unum alterum que diem profecturus est hinc *Salmasius*. Caetera malim ex *Wulio* nostro intelligas, quam ex me. Vale, mi Heinse, & salve a tuo ex animo Vossio. A. MDCLXIX. August.

EPISTOLA LVIII.

ISAACUS VOSSIUS

Nic. Heinse.

Parisiis.

SAlvum te ac fospitem Lutetiam pervenisse ex animo gaudeo, Heinse clarissime. Non nego longe mihi majori futurum fuisse gaudium, si majorem quoque animi quietem & tranquillitatem tecum Parisios adtulisses, attamen cum existimem istam perturbationem esse fructum inimicitiarum tuarum, quas cum aliis exerceas, minus excrucior, cum sciam me ab omni culpa abesse quam longissime. Nam nisi hoc sit, quod quietem tuam turbet, quid rogo me tam multis, sed inanibus tamen, oneras criminibus, quae quamvis essent verissima, tanta non sunt, ut propterea de affectu meo sinistri aliquid suspicari, cum talia morosissimi etiam homines facile suis soleant condonare amicis. Nam quale est, quaeso, illud de *Ferrarii* oratione, quod una forsitan alterave hebdomade serius gratias tibi retulerim. De nummis vero aureis argenteisque non video quare me increpes. Etiam si illorum facta mihi fuisset copia, scis tamen non semper paratas adesse occasiones, quibus possimus illos transmittere. Olim me non recte fecisse adfirmabas, quod unicum illum aureum tabellariis Gallis commissem, nunc vero mirari non debes, quod te monente cautior sim factus, praesertim cum plures postules, plusque proinde sit periculi. Unum tamen, quem hinc vides, aureum *Ferrario* exhibendum ad te mitto. Caeterum enitar ut etiam reliquo tuo desiderio possim satisfacere, observaboque occasiones, quibus possim efficere, ut etiam aliquot habeas argenteos: quae si defuerint, ipse ad te veniam; faciamque, si possim, omnium te votorum tuorum

Gggg 2

com-

compotem. Jussit enim Domina, ut in Hispaniam me quamprimum conferam; cum vero necessarium sit, ut per Galliam iter instituam, dabitur, ut spero, occasio, qua te possim convenire. Unicum, ut spero, diem alterumque tecum Parisiis in transitu eximam, multa enim habeo, de quibus tecum agere velim. Verum non debes propterea committere, quominus quam diligentissime ad Serenissimam Reginam perscribas singula. Quamdiu etiamnum hîc sum, ad me mittas literas tuas, ubi vero discessisse me compereris, gratissimum erit Serenissimae Reginae, ut ipsam semper compelles. Jussit vero ut tibi significarem postulare sese, ut in ea, quam haecenus praestitisti, diligentia perstares, nihilque tibi tam exiguum videretur, quod modo alicujus esset momenti, de quo ipsam non faceres certiores. De *Resandro* iterum allocutus sum Serenissimam Reginam. Illa vero lectis tuis literis dixit sese liberum relinquere tibi, quodcunque de eo visum fuerit. Catalogum librorum *Richelii* jamdudum tibi transmisissim, nisi illum perdidisset *Salmasius*, cui cum communicaram. Bibliothecae Mazarinicae nullam te in literis tuis fecisse mentionem valde miror. De Memmiana possis cum *Bidalio* agere, praesertim si aliquid de pretio remiserit vidua. Intra biduum triduumve discedet hinc *Salmasius*. Servos, ancillas, sarcinas, & omnia impedimenta, excepta conjuge, jam praemisit. Dominus *Holmius* quamprimum tibi responsurus est. Nunc vero jussit, ut te peramanter suo nomine salutarem. Recte feceris, si ad cum aliquando literas dederis, omnia enim tui causa vult. Vale, mi Heinse, & amicos communes Parisienses meo nomine salutes quam plurimum.

EPISTOLA LIX.

NIC. HEINSIUS

Isaac. Vossio.

Holmiam.

ADfuit mihi tandem commendatus a te tantopere *Resander*. Juvenem vidi, aut apparebat, bonum. De morbo ejus melancholico mira mihi alii nar-
rarunt, atque hinc majorem sibi in hac urbe famam comparavit, quam Graecarum
literarum cognitione. Mihi quidem justissimam exprimit miserationem: quan-
quam loco nunc satis sit commodo ejus valetudo. Primo congressu multa con-
questus est, & merito, de summa, qua cum conflictatur, rerum omnium inopia.
Negat se vel obolum ex Suecia toto hoc anno accepisse, hoc est a septem vel
octo mensibus. Carceris colonum jam dudum se proculdubio fuisse, nisi per
Vicquefortium stetitisset, qui fidem suam apud hospitem caeterosque creditores
interposuerit. Idem & mihi *Vicquefortius* narravit. qui mensam illi suam do-
mumque obtulit, quam conditionem cur amplexus non sit, vix video, nisi in-
jurium se hoc pacto in Dominam fore crediderit. Tu tecum cogita, an bene
mihi consulueris tibi, ac ipsi Dominae, qui Italico itineri hunc hominem desti-
na-

naris. Debet in hac urbe, ut *Vicquesfortius* adfirmat, scutatos minimum ducentos, quos ut ego pro illo refundam, in mandatis non habeo. Ex meo autem aere id ut fiat, non arbitror consultum. Auctor igitur sim tibi, ut bonum juvenem angore animi, ac molestiis assiduus, cum quibus luctatur, liberes, domumque reverti jubeas: aut si vis, ut in Italiam me sequatur, intercedas pro illo apud D. *Holmium*, quo flagitationibus creditorum se subducatur. Id nisi tempestive feceris, metuendum est, ne clam aufugiat, atque ita & suam & popularium existimationem in hac urbe prostituat, ad extremam desperationem redactus. Aperte tecum ago, & sine circuitione, ut vides: neque exiguam ipse occasionem dedisse mihi videris huic melancholiae. Aut enim domo cum ablegasse non debebas, aut postquam ablegasti, curam ejus majorem habuisse. Mihi ad iter Italicum sexenti scutati assignati sunt. Ejus summae partem tertiam jam numeravit Bidalius. Centum florenos expendi, dum ex Hollandia in hanc urbem contendo. In hac urbe dies quindecim jam vixi, vivam dies ad minimum totidem. Ubi discessero, praeter famulum, una *Langermannus* ibit. Rationes a te diligenter subduci velim. Rem magnam fecero, si in mensem Januarium suffecerit pecunia haec. Sed ea de re non laboro. Novi enim Venetiis mercatores, quibus commendatus sum a consanguineis: illi de pecunia abunde mihi prospicient. Tantum ideo tecum communico, ut videas quam non possim *Resandro* succurrere. Bonum igitur patrem familias imposteorum age. Et quia efficere gravatus es, quod saepe a te contendere, ut aut diurnum aut menstruum in hoc itinere stipendium mihi procurares, quod moris haecenus per totam Europam apud reges Principesque fuit omnes, id quia gravatus es, inquam, nunc saltem ne onera viribus majora mihi imponas rogo. Nec stipendium istud hoc flagitavi nomine, ut melius mihi esset, quam nunc est: sed quod molestum fore praevidebam, si expensae omnes minimae maximae in rationes essent referendae, id quod nunc mihi faciendum. Volo enim omnino videatis, nihil me lucratum ex hoc itinere. Vale, & tibi uni haec dicta puta. Ego stilum & pugillares exercebo.

EPISTOLA LX.

ISAAC VOSSIUS

Nic. Heinsio.

Leidam.

ANte biduum huc est reversa Serenissima nostra Domina, Heinsi clarissime. Abfuisse enim illam aliquamdiu Nicopiae, matris invisendae gratia, ex superioribus meis jam intellexisti, ut opinor. Quamvis autem ex ea statim, ut reversa esset, intelligerem, redditas sibi fuisse Nicopiae duas, quas ad me scripsisses epistolas, adtamen non nisi ante horulam demum eas videre contigit, quod nescio quibus aliis fuerint permixtae reculis. Si itaque non prolixè ad

G g g g 3

fin-

singula respondeam, non id animo, sed tempori imputabis. Gratias ago, quod nomen mercatoris significaveris, ad quem literas Venetias debeam mittere. Proculdubio vero cum calores jam remiserint, tempusque praestitutum transierit, jam te in viam dederis. Quod si ita sit, precor ut & hoc tibi iter tam feliciter cedat, quam quod felicissime. De me vero noli dubitare, mi Heinfi, quin omnia ea, quae postulas, ante discessum meum vel perficiam, vel saltem perficere coner. De tumultibus Neapolitanis, ipse videris. Verum & de hoc ipse statuas licet, utrum Romae, an vero Florentiae instantem velis exigere hyemem. Scis optimam & incomparabilem nostram Dominam liberam in talibus tibi reliquisse voluntatem. Recte itaque feceris, si eo te conferas, ubi operam tuam maxime utilem & necessariam fore existimaveris. De *Langermanno* valde gratum est Serenissimae Reginae, quod scribis. Colloquar cum Domina nostra uberius de illo, eritque, ut opinor, quod sibi gratuletur de hoc suo consilio. De catalogo Bibliothecae Richelianae quod scribis, non tanti est, ut propterea mihi succensere debeas, significavi tibi superioribus literis *Salmasium* esse in culpa, quod ille perierit. Recte vero facis quod instigare non cesses *Cunradum* & *Menagium* de edendo eo, quod meditantur, opere. Scriptum, quod transmittis, Frontonis nondum vidi, uti neque caetera, quae literis tuis adjunxeras, omnia ea habet Serenissima Regina. Quod ideo tibi significo, ne mihi imposterum succenseas, quod nihil ad ea rescripserim tibi. Liber Marchionis *Montoserii* gratus erit Serenissimae Reginae. Caesaris Commentariis a Rege translatis possit carere Serenissima nostra Domina. Libri illi, quos in aedibus Elzevirii exposueras, periire, ut existimo, de quo & in superioribus ad te scripsi literis. Verum neque Gellius *Gronovii* comparet. Quod vero nummum *Menagio* destinatum adtinet, illum jam dudum habuisses, si per me stetisset. *Capellani* epigramma necdum vidi. *Tactica* illa, quae *Resander* descripsit, grata erunt, ut arbitror. Valde doleo periisse opus satis prolixum sub nomine Aristarchi, quod ipse a se descriptum juniore commiserat *Freinshemio*. Immerito certe hominem illum odit *Bidalius*, cum & optimae sit indolis, & in Graecis eruditissimus, verum & in Latinis multum profecit, ex quo Parisiis commoratus est. Quod autem *Bidalius* objiciat ei melancholiam, quid hoc mirandum? quem non is corripit morbus, qui cum simili colluctetur fortuna? Non cuique datum est, esse in miseriis hilarem. Verum de *Resandro* satis jam superioribus ad te perscripsi literis. Caeterum non praetermittam Dominam nostram rogare ut dissolvat id, quod Parisiis contraxit, aes alienum. Judicium *Valesii* de oratione *Ferrarii* sane non miror. Jam pridem cognovi, *Valesium* non probare id genus dictionis, quod usque adeo a Cicerone abhorreat, cui se totum a multis tradidit annis. Et sane per me licet ut inter sese dissentiant viri illi egregii, Dummodo in eo conveniat uterque incomparabilem esse, quam laudare, dominam, & longe facundia sua superiorem. Pro epigrammatis *Menagii* gratias ago maximas. De bibliothecis autem Italicis quidquid mihi succurrit, diligenter ad te perscribam. Phoemionis Philosophi cynosophion hactenus non vidi. Possumus tamen eo facile carere, cum multa praestantiora scripta ex-

exstent adhuc inedita, quaeque longe nobilius tranſtant argumentum. Agathemerus in omnibus paſſim exſtat bibliothecis, ipſeque etiam olim in deſcribendo, aliquot perſidi horulas. Catalogum Archiepiſcopi Rhemenſis jam olim accepimus. Nullos is continet codices manu exaratos. *Poſſino* nomine Reginae gratias egi, quod & ſuperiori tibi ſignificavi hebdomade, niſi me fallit memoria. Haſtenus literis tuis reſponſi, nunc ad alia venio. Accepit Domina noſtra ante biduum catalogum accuratiſſimum librorum bibliothecae Althaemſianae. Non poſſum tibi exprimere quanta cum voluptate illum perlegerim, adeo is multos & rariſſimos continet libros. Procuravit hunc Dominae noſtrae *Vincentius Noghera*, qui & ipſe brevi quoque ſe tranſmiſſurum promittit Catalogum librorum Farnelianorum. *Noghera* autem is eſt Eques Luſitanus, a multis mihi jam notus annis, vir probus, doctus, & Dominae noſtrae ſtudioſiſſimus. Habitat Romae in aedibus, ut puto, Barberinianis. Caetera ex aliis intelliges. Cupit Sereniſſima Regina, ut illum convenias, neque enim dubitat, quin plurimum inſtituto tuo poſſit prodeſſe. Scribit ille exiſtimare ſeſe Ducem illum, cujus eſt bibliotheca, libenter aures praebiturum cupientibus illam emere, cum nihil minus quam libros curet, ut pote cum ſit totus deditus venationi. Facile itaque vel totam venditurum, vel etiam aliquam ejus partem, quod ſane ego longe praetulerim. Nam multa haec quoque continet bibliotheca, quae vix ſit operae pretium tranſmittere. Juſſit itaque Domina, ut Catalogum illum diligentiffime perlegerem, & quoscuque exciperem libros, qui modo alicujus mihi eſſe viderentur pretii. Tempus non permittit, ut id hoc faciam die. Curabo, ut ſequenti hebdomade & tu & *Noghera* habeatis excerptum ex hoc catalogo, quod omnes contineat codices, quos emere deſiderat Domina noſtra. Id ipſum faciam in Farneliano, aliisque, quos ante diſceſſum meum accepero, catalogis. Venetias ubi veneris curabis, ut ſpero, deſcribi Didymum de plantis Aegyptiacis. Liber enim is digniſſimus eſt bibliotheca noſtra. De libris quibuſdam rarioribus ineditis in bibliotheca Laurentiana ſcribam ad te ſequenti hebdomade. Prae caeteris vero memor eſto Manethonis Aegyptii apotelesmatum, conſcriptorum carmine heroico, item topographiae Chriſtianae Coſmae Indopleuſtae. De aliis alias. Vale, mi Heinſi, & *Langermannum*, cui quamprimum reſcribam, plurimum meo nomine ſalutes. Poſtquam haec exaſſem, Clariſſime Heinſi, juſſit Regina ut te plurimum nomine ſuo ſalutarem, omniaque tibi fauſta & felicia in itinere precarer. Curam quoque *Langermanni* habituram eſſe ſeſe ſpopondit. Iterum vale, mi Heinſi, & me tui amantiſſimum ut viciffim ames, etiam atque etiam rogo. De itinere meo in Hiſpaniam necdum certus ſum. Velim *Langermannus* uſuram Ptolemaei ſui mihi concederet. Diſceſſit hinc *Salmaſius* ante duas hebdomades. Utrumque filium hic reliquit. Verum haec accuratius ad te *Wullius* noſter, ut arbitror. XXI. Septemb. ciciocli.

ISAAC. VOSSIUS

*Nic. Heinsio.**Parisiis.*

Nuntio tibi, mi Heinsi, rem non mirandam tantum, sed & prorsus incredibilem. Aliquid jam forsan ex communibus percepisti rumoribus, verum an iis credideris id vix arbitrator. Sceptrum & coronam suam deponere velle videtur Domina nostra. Cui eam vult tradere, is est *Carolus* princeps. Audistine unquam aliquid simile, Reginam & in flore aetatis, & cui omnia ex voto fluant, tantas unquam opes fortunaeque abdicasse? Quod si & aliqui alii imperio suo unquam valedixerint, certe illorum fuit longe alia ratio: nam aut ignavia, aut vi adacti, aut annis graves, aut denique quod ob aliud quid imperio essent impares, id ipsum fecerunt: id vero prodigiosissimum, virginem reginam primis juventae annis, tanta circumdatam gloria, quanta nemo alius regum, possidentem regnum pacatissimum domi forisque, timentem neminem & ab omnibus amatam, tanto denique praeditam intellectu & ingenio, quod vel imperio orbis possit sufficere, tam divinum audere facinus, quale ne heroica quidem unquam viderunt saecula, nec credent futura. Uni huic facto omnia ego Romanorum gesta longe posthabeo. Libens autem haec ad te scribo, mi Heinsi, quoniam jam dudum cognovi te non esse unum ex iis, qui Dominam nostram propter opes colunt, memor quippe sum verborum, quae te saepe repetentem audiui, te multo velle libentius privatae alicui servire dominae, tantis praeditae virtutibus, quam cuicunque reginae. Quod si ex animo id verbum provenerit, jam voto potieris. Et profecto non fallor, cum existimo vel ob hoc ipsum propositum multo te promptiorem paratioremque fore ad quaecunque servitia, quam ante; non quod non hactenus fueris promptissimus, sed quod probis & honestis viris jucundiora fiunt officia sua, quando compensationis spes vel adimitur vel minuitur, tum enim animus & voluntas eorum maxime cognoscitur. Atque haec quidem pauca de re omnium maxima & miraculosissima dixisse, apud te nunc sufficiat. Literas tuas quod adtinet, eae valde fuere gratae & jucundae. De Bibliotheca *Mazarini*, Archiepiscopi Tholosani & aliis emendis, recte judicas. De *Gaulmini* libris vero non recte existimas, si eos non gratos fuisse putes Serenissimae Reginae; fuere enim gratissimi, neque dubito quin id ipsum munere etiam testabitur Domina nostra. Quas proxime elapsa hebdomade misi literas, eas ad mercatorem, cujus mihi significasti nomen, transmisi. Quod vero rogas, ut cum praefecto tabellariorum agam, quo literae tuae secure possint ambulare, faciam id quamprimum. Pro Catalogo librorum *Jusselli* gratias ago maximas. Vidi illum etiam olim, & nihil prorsus continet singulare, & imensum est, quod postulat pretium. Verum & *Gaulminianorum* librorum, quod

quod transmiseris catalogum id quoque optime factum. Intra decem vel duodecim dies discedam. Promisit Serenissima Regina sese curaturam, ut ea, quae vobis debetur, pecuniae summa in camera rationum adprobetur, mihiq; scriptum illud patri tuo ferendum committat. Occupatissimus sum in concinendo catalogo librorum bibliothecae Regiae. Per quinque jam hebdomades nihil aliud ago. Brevi tamen & forsan intra octiduum me inde expediam. Vale, & me amare pergas. VII. OCTOB. CIOIOCLI.

S. Regina dixit sese rescripturam tibi, ubi hinc discessero. Ipsam itaque semper compelles velim.

EPISTOLA LXII.

ISAAC VOSSIUS

Nic. Heinsio.

Leidam.

NON existimaram me plures ante discessum meum ex Suedia ad te scripturum literas, sed video iter meum cum ob alia, tum etiam propter difficultatem viarum, de hebdomade in hebdomadem differri. Tertia jam est hebdomas quod nullas a te acceperim. Unde conjicio te jamdudum in Italia esse, modo non aliquid incommodi in via tibi contigerit, quod utinam deus avertat. De juvenibus aliquot in poesi Italica exercitatis huc transmittendis egi superioribus ad te literis. Valde gratum erit Serenissimae Reginae, si eam certiore facias de quibusdam eruditis in Philosophia, praesertim quos huc posse evocari existimas. Valde enim illa desiderat excellentem aliquem Philosophum Italum sui facere juris. Significabis itaque nomina & ingenium eorum, qui maxima cum laude & gloria studium id profitentur, & exercent. Mitto ad te literas, quas ad *Vincentium Nogheram* exaravi. Inclusum iis est epistolium Serenissimae Reginae ad eundem. Rogo ut id ei quamprimum Romam transmittas. Ipsum enim te nondum eo venisse existimo. Arbitror maximam hyemis partem aut Mediolani aut Venetiis exacturum te esse. Ut ut sit, rogo verbulo significes: plures meas invenies Venetiis, nonnullas apud illum, cujus mihi primo nomen significasti, alias apud alterum istum Belgam. Literas tuas imposterum ad *Georgium Furstenhausum* Consiliarium Reginae mittas Norimbergam. Is porro huc transmittet. Transmitto literas *Wullii*, quas hîc vides. Sequenti hebdomade fufius ad te scribam. Vale & me ama.

EPISTOLA LXIII.

ISAAC. VOSSIUS

Nic. Heinſio.

Leidam.

Epistolium, quod Divione prid. Kal. Octobres exarasti, reddidit mihi Regina hoc ipso fere, quo haec scribo, momento. Casu nescio quo inter alia id conjecerat scripta. Quod in eo denuo silentium meum reprehendas, facis in eo quidem pro more tuo, attamen vix puto eam tantam esse, quantam tu existimas. Ex animo tamen opto voveoque, ut meliorem diligentiorque in *Bourdelotio* amicum habeas, quam me haecenus habueris. Credo & spero quoque libenter, illum satisfacturum tibi in omnibus, desideriaque tua ad meliorem perducturum exitum, quam ipse haecenus fecerim, verum an tui futurus sit amantior, de eo admodum dubito. Regina modo promisit mihi se ipsam tibi missuram epistolam commendatitiam ad magnum Hetruriae ducem. Non cessabo flagitare, ut id quam primum faciat. De libris Cardinalis *Altemps* emendis agas cum Domino *Vincentio Noghera* domestico, ut existimo, Cardinalis *Barbarini*. Excerpta catalogi transmittam, simul atque in Hollandiam venero. Destinavit *Nogherae* torquem aureum Regina, quem ut quamprimum offerre possis curabo, ut spero. Nummus jam transmissus est *Bidalio*, quem appendas. Novus jam cuditur aureus nummus, cujus aliquot tibi promisit exemplaria Domina nostra. *Wullenius* non diffitetur negligentiam suam, ultro & sponte eam agnoscit. Si illum culpa liberavit nuper calamitas domestica, nunc illum non minus liberare debent novi amores, quibus totus est irretitus. Distrahunt animum ejus duae viduae, utraque pulchra & opulenta. Illam non novi, alteram vero, in quam pronior videtur, quamque diligentissime observat, licet id ipsum quoque alii faciant quam plurimi, sui videtur esse facturus juris. Nomen ei est *Annae Kock*, maritus ejus olim hinc fuit praefectus rei monetariae. Quod ideo tibi significo, ut si forsan animus tibi sit Epithalamiolo aliquo nuptias ejus cohonestare, ne nominis ignoratione id omittas. Et sane brevi eae celebrentur, si *Moncheronio* & aliis credendum sit. Ejus gratia jam tabaco valedixit, & liberos in Hollandiam transmisit. Est autem nunc vicinus meus in hac arce, proximum siquidem meis habet cubiculum, animoque non minus, quam loco vivimus conjuncti. Is & *Moncheronius* jam mihi (coenaturi mecum) adsunt, quae causa est ut nunc brevior sim, plura ex Hollandia. Mirari vero non debes, quod literas nullas Lugdunum miserim, neminem ibi novi. Tres aut quatuor, nisi fallor, misi Venetias, priores quidem ad *de Wilm* & *Strickerum* mercatores, alteras ad *Lumagam*, quem mihi indicasti. Vale & me ama.

EPI-

EPISTOLA LXIV.

ISAAC VOSSIUS

*Nic. Heinsio.**Parisios.*

A Quatuor hebdomadibus vix quatuor a te accepi lineas, mi Heinsi. Jam itaque video verum esse id, quod mihi minabare, te quoque post hac *ἄνωγειν* fore, nisi ipse prius mores mutarem. Ego quidem, ut verum de me fatear, licet raras easque breves admodum ad te saepe dederim literas postremo hoc bimestri spatio, mirari tamen id non debes, praesertim cum jam significaverim tibi, quantus mihi fuerit exantlandus labor, in tam vasto librorum numero denuo digerendo, colligendoque. Licet enim amanuenses mei Catalogum fecerint, eum tamen ipsi conficere non potuissent, nisi ipse prius bonos a malis separassem. Nunc demum, mi Heinsi, postquam tam vasto & molesto defunctus sum labore, iterum respirare incipio, videorque mihi de supulchro prodire: nam certe si me vidisses insidentem cumulo Germanicarum postillarum, cinctumque undique tam inamoenis dapibus; non certe meliorem meam judicasses conditionem, quam eorum, qui busta inhabitant: imo aut ego fallor, aut multo me magis miserum ipsis mortuis censuisses, illi siquidem quiescunt, & summa fruuntur tranquillitate, ego vero in tam injucundo & inamabili adeo labore utrumque exercui latus, & tantum non contabui, at tamen semel ea fuit exedenda molestia. Hodie sumnam huic labori nondum potui manum imponere, fiet id tamen quam primum. Non itaque debes mihi succensere, mi Heinsi, quod tam raras tamque breves interea temporis ad te dederim literas, neque id debes imputare etiam negligentiae meae, nam certe multo libentius literis ad te scribendis vacassem, quam molestissimo huic labori, qui totum poene meum labefecit corpus. Atque haec quidem de me sufficiant. Ad tuas autem ut veniam res, scias Reginam promississe, sese quamprimum missuram, quas ad magnum ducem promisit, commendatitias. Hodie a me quaesivit, ubinam terrarum te nunc agere existimarem, dixi me arbitrari te vel venisse, vel brevi venturum Venetias. Neque enim diu te Massiliae, aut alibi in Gallia moraturum existimo. Proculdubio te aliquamdiu detinebit Mediolanensis Bibliotheca. *Wullii* nostri nuptiae differentur necessario in aliquot menses propter luctum conjugis defunctae. Nomen sponsae superioribus jam tibi indicavi literis. Vides quam brevi inter hunc & illam convenerit. De voluntate Reginae in deponendo sceptro quae tibi ante aliquot scripsi hebdomades, noli ea credere. Brevi certiora intelliges. Iter meum in *Hif* aniam non succedet. Nescio an hîc commorabor, an vero per aliquot menses me in Hollandiam conferam, quo jam omnia mea praemisi. *Spiringium* senem credo jam intellexisti missum esse a Regina ad parlamentum Anglicanum. Pictori

Hhhh 2

Becco

Becco animus quoque jam est adire Italiam. Jam sese ad iter accinxit. Nescio unde is cognovit ea, quae de ipsius ad me scripsisti picturis. Ipse conjicias, vel forsan id jam tibi significavit *Wullius*. Non bene admodum erga te animatus est hoc nomine. Sed scio te non curare hominem, qui a vilissimis vapulat scurris. Verum de his ipse ad te *Wullius*. Mihi rogo nihil quidquam ad haec postrema rescribas, ob causam, quam nosti. Vale, mi Heinse, juvenum maxime & eruditissime, & salve a tuo aeternum. Holmiae 11. Novemb. 1691.

EPISTOLA LXV.

ISAAC VOSSIUS

Nic. Heinse.

Amstelodamum.

Nescio an ultimum sit, quod ex Suedia ad te scribam, hoc tamen scio me non ultra octo vel decem dies hinc commoraturum. Significavi vero tibi jam superioribus literis, me ante non hinc discessurum, quam obtinueram literas Camerae rationum, ut vocant, quibus promittant solutionem summae vobis debita. Allocutus jam sum *Guldenclavium*, ut ab eo postularem cartam illam, quae continet vestras rationes, verum negat is exstare eam aut apud se, aut in Camera. Forsan folium istud Reginae tradidisti, quod si sit, vereor ut perierit. *Wullius* quoque negat se id habere, alia itaque tenenda via est; de qua cum Regina agam, ut spero. Celsi Rhetoricam, quamvis jam saepius inquisiverim, nondum tamen reperi. Librum de Plantis Mexicanis tradam affini tuo, diu enim est quod eum a *Wittio* obtinuerim, sed occasio saltem defuit, qua eum transmitterem. De *Sanctamantio* idem quod tu ad *Wullium* scribebas, scripsit ad me *Valesius*, cui nomine reginae respondi, eum imprudentissime mentiri, priusque illam cocum suum esse missuram, quam talem gnathonem. Munus, quod ei dedit Regina, non tam amplum est, quam ipse jactat. De honore ei exhibito ipse praesens cum fueris possis judicare. Transmitto tibi epistolam *Thevenoti*, ut videas ecquid ea tibi prodesse possit. Catalogus librorum *Altempsii* Cardinalis nimis est magnus, quam ut per cursorem transmittatur. Excerpta habebis simulatque in Hollandiam venero. Mediolani operae pretium fuerit describere inscriptionem quandam prolixam, ante aliquot annos in Creta repertam, & Venetiis excusam, sed valde vitiose. Ex apographo autem Mediolanensi innumera ejus inscriptionis loca suppleri & emendari possunt. Exstant quoque ibidem Constantini Porphyrogennetae Strategica seu *Tactica*, quorum principium edidit *Meursius*. Velim quoque cures conferri Catulli quoddam exemplar satis vetustum, nempe illud, in quo Catullus solus continetur. Alterum, quod & ipsum satis est bonum, ipse olim contuli. Innumeris locis auctorem illum emendavi, & ubi otium fuerit, novam ejus da-

bo

bo editionem, haud paulo meliorem ista *Scaligeri*. In Bibliotheca Medicaea Florentiae haec maxime succurrunt, quae digna existimo, ut describantur. Hippocratis Chirurgia, cui accedunt & alia scripta medica Apollonii Theros, Amyntae, Sorani, Oribasii, Heliodori, Archigenis & aliorum. Exstat iste liber in scamno septuagesimo quarto. In scamno autem xxv. exstat liber quantivis pretii, nempe topographia Christiana auctoris incerti, constans libris quindecim, cujus ego particulam tantum descripsi. Inter poëtas Graecos habentur apotelesmata Manethonis Aegyptii, conscripta carmine hexametro, inter philosophos vero, ut puto, Eutecnii Sophistae paraphrasis in Nicandri Alexipharmaca. In capsula vero clausa, quae est in ultimo bibliothecae recessu, existimo haberi Porphyrii philosophi libros contra Christianos, & Xenophon-
tis Milesiaca. *Bourdelotium* avide videre & cognoscere desidero. *Wullius* jam est vicinus meus in hac aula. Hac ipsa vespera, qua haec scribo, mecum coenabit cum aliis quibusdam. Jussit ut te nomine suo salutarem plurimum. Si ad me posthac scripseris, recte feceris, si literas tuas Amstelodamum miseris. Vale, mi Heinse, & ignosce properantiae.

EPISTOLA LXVI.

NIC. HEINSIUS

Isaaco Vossio.

Amstelodamum.

ADhuc in Suedia haereo, mi Heinse, cum propter alia quaedam, tum vero maxime propter difficultatem viae & profundum lutum. Simulatque nives ceciderunt, viae me committam, brevissimoque spatio tractum illum absolvam, faciamque te & de itinere meo in Hispaniam, & de aliis quibusdam certiore. Iterum jussit mihi incomparabilis nostra Domina, ut per hunc ipsum cursorem significarem tibi, valde se desiderare, ut in omnes eos, qui arte poëtica aliquam sunt consecuti famam, diligentissime inquiras. Valde enim desiderat illa egregium aliquem poëtam Italum sui facere juris. Qualibus debeat ornatus esse dotibus, qui Dominae nostrae possit placere, non opus esse existimo, ut tibi significem: ipse enim tua sponte satis hoc possis colligere. Interim nosti praestabilius esse, ut is sit juvenis. Praeterea, ut sit gratiofus apud Dominam, oportet ut ipse prius gratiis litarit. Quod siquid aliud sit, quod in eo illa desideret, faciam te certiore simulac intellexero. Verum ipsa forsitan Domina nostra disertius mentem suam in literis suis ad te explicabit. De itinere meo Hispanico adhuc incertus sum. Quod si illud succedat, non praeterrittam nomine tuo salutare illos, quorum mihi indicasti nomina. Imposterum literas tuas ad mercatorem illum Venetum mittam, cujus mihi significasti nomen. Has tamen & priores nonnullas ad affinem tuum misi Amstelodamum, quoniam praefectus hac in urbe cursorum negabat, se sine maxi-

mo suo incommodo eas posse Venetias transmittere. Sequenti hebdomade parabo occasionem, qua possis tuto & celeriter non literas tantum omnes, verum & libellos & quoscunque fasciculos tuto transmittere. De *Moraei* Manuscriptis gratias ago, quod me monueris. Gratum fuit Serenissimae Reginae, quod libros illos haecenus ineditos Lugduni emeris. *Wullius* noster secundas, ut videtur, brevi celebrabit nuptias. *Bourdelotius* intra hebdomadem unam & alteram, ut spero, aderit. *Salmasius* Gottorpium in Holsatia decumbit. Quod me reprehendas, quasi non praestiterim quod promisi, cum scias me in culpa non esse, quominus illud quam primum tibi exhibeatur, parcius, ut mihi quidem videtur, reprehendere me debebas. Imo aut fallor, aut nihil est, in quo mihi peccasse videor. Nam quod dicis prudentis non esse aliquod promittere, quod praestare non possit, non tam hoc me tangit, quam ipsam Reginam, cuius nomine haec tibi promisi, itaque si aliquando tardius tibi contingunt ea, quae promittuntur, non hoc mihi imputare debes, qui nunquam cessio urgere executionem promissorum Serenissimae reginae, ut testari possit D. *Wullius*. Auctor tibi aliquando fui, ut humaniores ad *Holmium* exarares literas, quod si feceris, nunquam sat scio te huius facti poenitebit. Ego in itinere saepissime ad illum scripsi, hocque pacto mirum in modum hominem mihi conciliaui. Scis illum esse distributorem expensarum Reginae, scis illum regere *Bidalium*. De meo vero affectu utinam non dubitares. Nam certe toto vitae meae tempore ostendam, ut spero, me ne meipsum quidem plus amasse, quam te amem. Videbo an sequenti hebdomade literas Reginae ad te possim impetrare. Italum aliquem si huc miseris, multum bene de Regina mereberis. Fac ut decenti sit facie, fac elegantibus praeditus moribus, & si fieri possit, aulae non imperitus, verum haec tibi soli iterum. Vale, xxv. Novemb. cicioccli.

EPISTOLA LXVII.

ISAAC VOSSSIUS

Nic. Heinso.

Romam.

PER mensem integrum peregrinatus sum, mi Heinso, tantum nempe periit mihi temporis, dum Holmia in patriam tendo. Ejus mihi conspectus ut semper, ita nunc quoque est jucundissimus; nunc, inquam, postquam nulla hic amplius aula, nulli scurrae & externi apparent parasiti. Itaque non possum oculos mentemque conjicere in eam, quin pulchrior pulchriorque mihi semper videatur. Et sane si barbaris & feris quoque gentibus amor inest patriae, miserrimae saepe & sterilissimae, qui non possim amare & deperire nostram hanc tam florentem, tam jucundam, tam fertilem invita licet natura, tam denique potentem, ut vel quorumcunque regum & tyrannorum minas secure possit contemnere. Non possum itaque tibi satis exprimere, vel tam brevis ha-

harum terrarum conspectus quantum mihi afferat voluptatis. Tua tamen absentia, mi Heinſi, facit, ut nullum mihi gaudium integrum videatur. Itaque ſaeppiſſime illud mecum repeto, utinam adeſſet Heinſius. Huc vero ut veni, quatuor una eademque hebdomade accepi epiſtolas tuas. Una ante quatuordecim circiter dies matri reddita eſt, alteram mox exhibuit adfinis tuus; aliae duae ex Suedia mihi ſunt tranſmiſſae. Magnas vero tibi ago gratias, quod cum ipſe breves admodum & incultas ad te ſcripſerim literas, tu tam prolixas & elegantes ad me mittere non dubitaveris. Libenter agnoſco liberalitatem tuam, mi Heinſi, & fateor, me, ſi quis non animum, ſed exiguitatem officiorum ſpectet, non promeruiſſe, ut me vel ſemel compellares. Attamen quanto id minus promerui, tanto magis devinctum me tibi eſſe ſemper agnoſcam. Multum quoque doleo, quod non omnes meae ad manus tuas pervenerint. Nam quas ad *Stryckerum* miſi, tibi non redditas fuiſſe ex literis tuis cognovi. Mirari autem non debes, quod illum praetulerim *Lumagiis Coloniſque*, eorum enim nomina ignota mihi fuere, antequam tu ea ſignificares. Literae vero illae exaratae a me fuerunt, antequam tuas acciperem. Et tamen jam ante ſcripſeras, ut recta Venetias mitterem quaſcunque ad te impoſterum deſtinarem. Praeter vero *Strickerum* & *Guilhelmium* nullos alios noram mercatores ea in urbe. Neſcio vero gaudeamne an doleam, quod cum tanta codicum venalium proſtet copia, eorum tamen comparandorum deſit tibi facultas. Jam dudum ante diſceſſum meum ex Suedia affirmavit mihi Regina, ſeſe triginta ſcutatorum millia uſibus tuis deſtinariſſe, utinam tamen illa aut jam comparuiſſent, aut brevi ſaltem compareant. Stephanum autem de urbibus noli quaero dimittere, libentiſſime pro eo centenos perſolvam imperiales. Pro Ptolemaeo, quem comparaſti, immenſas tibi refero gratias. Quamvis non admodum bene de te mereri haecenus potuerim, ſcias tamen nihil meum fore, quoad vivam, quod non tuum ſit futurum ubi volueris. De *Langermanno* quod mones optime feciſti. Promiſit Regina ſeſe rationem ejus habituram quam maximam. Exaravi ad illum tria verba raptim, cum Hamburgum tranſirem. Pluribus eum compellabo, ſimulatque reddita mihi fuerit ejus epiſtola, quam ex Suedia exſpecto, eo enim illam tranſmiſit ampliſſimus ejus parens. De *Bourdelotio* ita habeas, illum ante quinque vel ſex hebdomades in Suediam appuliſſe. Gaudet is titulo primarii archiatri, honoribuſque ampliſſimis. Nullus unquam princeps majori exceptus eſt pompa. In *Wullenium* plenam exercet autoritatem, tanquam longe ſe inferiorem, quem tamen *Bourdelotio* minorem non eſſe exiſtimo. Aequo autem haec animo concoquit *Wullenius*. Antequam Lutetia diſcederet, coegit *Bidalium*, ut ſingulis annis quatuor ſcutatorum millia ipſi perſolverentur, idque in ipſa Gallia ſex menſibus antequam tempus ſolutionis exſpiraret. Exegit ab eodem pro impenſis itineris quatuordecim florenorum millia. Obtinet praeterea domicilium ampliſſimum in arce regia, ferculaque accipit innumera ex culina Reginae. Vides quid non poſſit impudentia Gallica. Quis non juret daemonum fieri inſtinctu, quotieſcunque probus aliquis & pudens vir aulam ingreditur? Verum de his liberius aliquando coram garriemus

mus. Nescio vero quis tibi persuaserit, ut literas Hamburgum ad *Mejerum* mitteres, quem tamen nullum esse existimo. *Mullerum* credo voluisti dicere. Curat is negotia Reginae ea in urbe, sub nomine Residentis, estque gener *Salvii*: *Ciconius* iste an verum tibi retulerit de *Holmio* valde dubito. Fieri tamen aliquando possit, ut in Galliam excurrat. Literas *Macedonis* transmisi Reginae. Jam dudum nempe ante tres menses monui te de mittendis Norimbergam literis tuis ad illum, qui res agit Reginae ea in urbe. Nomen fere excidit, tum tamen tibi significavi. Puto esse *Furstenhause*, estque consiliarius Reginae. Quod si detrectet literas tuas recipere, & porro in Suediam mittere, significes hoc Reginae, vel ipse significabo. Velit, nolit, cogetur id facere, nisi sponte pareat. Verum plura, ubi Hagam venero, eo me jam confero. Vale, mi Heinfi. Velim scire an *Holstenium* aliqua in re offenderim. Aliquoties meipsum consului, & conscientiam meam, nec tamen quidquam in ea reperio, quod eum laedere potuerit. Velim verbulo certiore me facias. Amstelodami XIII. Martii CIOIOCLII.

EPISTOLA LXVIII.

ISAAC. VOSSIUS

Nic. Heinso.

Romam.

DUas hebdomadas Hagae & Leidae exegi, mi Heinfi. Promiseram me inde ad te scripturum, & nescio quid factum sit, ut inter crebras amicorum salutationes convivionesque, non tui, neque enim hoc unquam fiet, verum mei fuerim oblitus officii. Pridie tamen quam ad te scribendae essent literae, seposueram vesperam aliquam vel noctem potius integram, qua tam prolixas ad te dare literas constitueram, ut earum lectio non tibi tantum, verum patientissimo cuique Stoico taedium adferre potuisset. Verum tam laudabile propositum interruptit heros noster *Silvercronius*, qui ipso coenae tempore me accessit, totamque noctem apud me extraxit. Mihi quidem intempestive visus est me accessisse: effecit enim ut non erga te officiosus esse potuerim: ut tamen verum fatear, valde opportunus negligentiae meae hospes advenit. Mortem vero parentis ejus jam dudum intellexeris, ut arbitror. Ipse cum matre & sororibus universaque familia in Suediam contendit. Ita ut tibi non defuturum sit bonum sodalitium, ubi in Suediam fueris reversus. De *Bourdelotio* jam bis aut ter te monui. Tu quidem confidis in hoc amico; nimis tamen mihi videtur inimici tui partes agere, quam ut vel minimum tua agat gratia. Credo illum vix compellare te audere, adeo is se obsequiis & nutibus Domini sui devovit. *Vincentii Nogherae* captivitatem doleo. De Catullo quod scribis valde te amo, uti quoque de caeteris libris a te vel emptis, vel descriptis. Transmisi Reginae ante biduum Elegiam tuam, quam literis incluseras. Li-
te-

teras illas obſignatas mihi tranſmiferat *Langermannus*. Certus ſum gratiſſimam fore Reginae elegiam iſtam, atque utinam illa ſaepe tale quid a te habeat. Vellem quoque, ut ſi quid ab Italis in honorem Dominae noſtrae poſſis impetrare, id quam primum tranſmitteres, mirum enim in modum Italorum illa delectatur carminibus, & certo ſcio quam liberaliſſime compenſaturam Dominam tales conatus. *Bochartum* hîc ſingulis diebus exſpecto. In portu Gratiae occaſionem huc tranſfretandi exſpectat, aut forſan jam inde ſolvit. Is tenerime te amat, ut ex literis ejus conjicio. Commoraturum hîc aliquandiu ſpero, neque enim ante ſex aut octo hebdomades hinc diſceſſerim libens. *Salmaſius* omnibus modis bellum mihi indicere parat. Ego ſecurus finem fabulae exſpecto. Vale, & Clariff. *Langermannum* plurimum meo nomine ſalutes. Si tibi uſura Vaticanæ conceditur, vellem vitam Perpetuae deſcribendam curares, quæ codici cuidam Cypriani eſt adfixa, ut mihi olim ſignificavit *Holſtenius*. Et illum & *Leonem Allatium*, & ſi quos alios noſtri memores videris, plurimum rogo nomine meo ſalutes. Amſtelodami ciciocclii. Menſe Aprili.

EPISTOLA LXIX.

ISAAC VOSSIUS.

Nic. Heinfio.

Leidam.

SI ſubitus tibi nuper viſus ſit meus ex Hollandia diſceſſus, multo magis ſubitum videbitur ad hanc reditus. Helmſtadium & fines terræ Suedicæ jam adtigeram, ¹ mi Heinfio, cum mihi nil tale exſpectanti, allatum eſt mandatum horribile, quo juſſus ſum pedem referre, & a *Salmaſio* veniam petere injuriarum, quibus a me ſit affectus. Quaeres fortassis, quænam illæ fuerint injuriæ, quibus uſque adeo irritarim Sereniſſimæ Reginae erga me animum. Rem breviter narrabo. Nuper, ut noſti, ex Suedia in patriam reverſus, coepi a *Salmaſio* exigere mille iſtos & quingentos ſcutatos, quos mihi debet. Ille tergiverſari, atque æs iſtud nihil quidquid ad ſe pertinere contendere; ſimulque exprobrare quam plurima, quæ nihil quidquam ad rem faciebant. Inter crimina, quæ mihi objiciebat, ſupremum & forſan unicum fuiſſe iſtud, quod tecum arctam, etiam poſtquam ipſe in Suediam veniſſet, coluerim amicitiam, facile, ut opinor, poſſis conjicere. Praecipue vero objicere, patuiſſe tibi etiam aditum ad aedes meas per portam clauſtam, ſequæ hoc ſedulo obſervaviſſe. Ego non negare factum, verum ultro fateri, feciſſe me id, ut imbecillitati ejus conſulerem. Aequum vero eſſe, ut tibi hanc relinqueret querelam, quod non per honoratiorem te admiferim portam. Statim ut ab eo digreſſus fui, dixit pluribus, me nulla alia de cauſa eum acceſſiſſe, quam ut contumelia adficerem. Meque

¹ Confer cum his Heinfianas ad Gronovii Epiſt. ccxlvii, & ſeq.

que esse impostorem, & postulasse ab eo magnam pecuniae summam, quam jam Regina persolvisset. Ego ubi haec intellexi, rescripsi falsissimum hoc esse, perque notarium *Sitterum*, quem nosti, ut puto, eum in jus vocavi. Tum ille in furias ignemque adversus me ruere, & ridere quod cognatum habeam, qui notarius, seque nullum in tota urbe Leideni agnoscere vel forum, vel tribunal, a quo citari possit. Ego ad haec, perinde mihi esse, quorum sese vellet submittere iudicio, dummodo solverit, sive Academiae, cujus esset membrum, sive curiae Hollandicae. Rescripsi quoque notarium illum, qui mihi aliqua junctus esset adfinitate, virum esse probum & honestum, & vel illius cognatione dignissimum. Injurias quoque plerasque mihi inflictas in illum retorsi. Has ille literas statim ad Reginam transmisit. Atque haec quidem est causa, quamobrem Serenissima Regina hanc mihi, quam retuli, poenam indixerit. Fuit id quidem mihi molestum, & injucundum, verum multo id molestius accidit Cl. *Bocharto*, a quo, ut dixi, *Helmstadiæ* divulsus sum. Agit is quidem nunc causam meam apud Reginam, verum quo eventu nescio. Adversatur ei in omnibus *Bourdelotius*, qui solus apud Reginam potest, quidquid vult. *Τάχα τ' αὖτις ἐξέτ' ἀμείνον.* Ego feci quidquid potui, ut *Salmasium* mihi reconciliarem, epistolamque ad eum exaravi humanissimam, qua petii ut praeteritorum omnium oblivisceretur. Verum hanc bellua ista, etiam priusquam legisset, igni tradidit multis praesentibus. Avide scire desidero, an probatura sit tam memorabile facinus Serenissima Regina. Proculdubio aliptes ille *δοκισισοφος* aliquod *σοφὸν φάρμακον* contumeliae huic adhibebit. Nam cum fortunam suam *Salmasio* acceptam ferat, non potest non ejus ergo omnia velle. Urget is valde meum in Hispaniam iter. Fuisset id quidem gratum alias, verum nunc non potest quam maxime illud displicere, tum quia supplicii instar id mihi injungatur, tum etiam quod tuo exemplo sapere incipiam. Non tamen, mi *Heinsi*, mihi irasci debes, quod nihil eorum, quae tibi promissa fuerant, praestetur. Ab eo tempore, quo a nobis discessisti, non eo apud R. fui loco, quo forsân existimas. Quicquid itaque scribis de numismatis aureis argenteisque, de paternis rationibus adprobatis, de commendatitiis ad magnum *Ethruriae* ducem & alios Italiae principes, haec non mihi sunt imputanda, sed illis, qui nos perdere fatagunt apud optimam Reginam. Eorum enim culpa non haec tantum perficere non potui, verum neque id saltem potui impetrare, ut vel de necessariis ad iter sumtibus tibi prospiceretur. Quod autem attinet auctorem de plantis Mexicanis, illum dedi affini tuo, ut oblata occasione eum ad te transmittat. Dudum eum me quaesivisse testis erit idem ille tuus adfinis, nempe a quatuor aut quinque mensibus, ex quo in Hollandiam reversus sum primo. De *Holmio* quod scribis valde miror. Is in scribendo liberalior erit imposterus, invenit siquidem aliquem, qui ei sit ab epistolis. Utinam is aeque in praestando atque promittendo esset liberalis. Et sane potuisset ille, si voluisset, rebus tuis in tempore prospicere, cum custos sit aerarii privati Dominae nostrae. Sed nosti mores hominis. Aditurum eum Italiam necdum credo. Actum est de ejus fortunis, si eo se conferat. Sed credo haec eum scribere, & tui &

& *Cicconii* gratia. De una alteraque epistola, quia de rebus & adventu *Bourdelatii* te certiore reddideram, quid factum sit coram narrabo. De fasciculis in Suediam missis nihil certi tibi renuntiare possim. *Bochartus* quin te plurimum amet, cave dubites. Nihil est quod ipsi aeque in Suedia doleat, quam quod neuter nostrum ipsi adsit. Utinam vero vir iste & amicus noster summus quantum nos amat, tantundem pro nobis posset apud Reginam, id si esset, frueremur votis utrique. Verum improbus obstat aliptes, qui artibus aulicis longe eo est potentior. Vidi literas ejus Latinas ineptissimas: vocat se semper *Protomedicum*, lepido fane vocabulo: verum de his coram. Manuscriptos, quos emisti, nescio quomodo secure in Suediam, vel huc possis transmittere, cum bellum Anglicanum omnia maria tanquam tempestate praecluserit. Sed spero securitatem brevi redituram, praesertim si nobis victoriam concesserit deus, de gente & sibi & omnibus hominibus invisa. Et jam forsan, dum haec scribo, praelium commissum est, ultimus siquidem nuntius adtulit non longe ab invicem distare classes. Legati nostri re nulla peracta domum reversi sunt, bellumque jam utrinque declaratum est. Duo hinc legati in Suediam ituri sunt intra duas hebdomades. Nomina eorum necdum cognovi, alterum tamen existimo futurum *Beuningium*, nisi ipse recusaverit, quod ego nolum. *Appelbomius Spiringio* successit. Is re infecta, ut narratur, ex Anglia huc est reversus. *Spiringius* junior, vel, ut accuratius loquar, *Silvercronius* hinc etiamnum haeret, abiturus & ipse intra unam alteramve hebdomadem in Suediam. Mater cum caeteris ejus fororibus jam Holmiam appulit, nisi fallor. Ex beneficio ipsis fruendo post mortem *Spiringii*, Regina dimidium abstulit, quod valde male habet istas Dominas. De Ptolemaeo cum manuscriptis collato magnastibi ago gratias. Multum quoque debebo *Langermanno*, si suum codicem Reginae obtulerit. Si me Serenissima Regina dignum denique suo servitio existimarit, potero, ut spero, ejus fortunis prospicere. Utinam inter caetera, quae sibi ex Bibliotheca Ambrosiana comparavit, etiam essent collationes in Historiam Augustam, cujus ibi satis bonum exemplar exstat, ex quo innumera possunt restitui loca. Id utinam ego olim contulissem, sed nimius erga *Salmasium* affectus non permittebat, ut quidquam in istos auctores post illum tentarem. Verum de Stephani Byzantii *αὐτὸ πῶλεων* codice MSS. quid factum est? Utinam illum quovis pretio mihi comparaveris. Quidquid dederis libenter refundam, magnoque insuper beneficio me obstringes. *Bekkius* pictor hinc est: is Italiam cogitat. Verum & hic viaticum a Regina exspectat. *Cyperum* ejus socium, & illum a Regina discessisse existimo. Quod sacculum tibi plenum araneorum esse conquereris, hoc commune habes cum ea, ad cujus exemplum vivere debemus. *Blondelli* oculos tanta invasit caligo, ut parum a caecitate absit. *Miltonum* in Anglia idem invasit malum. Intra duas tresve hebdomades sciam, ut arbitror, quid de me futurum sit. Quod *Holstenium* mei non dissimilem esse inquiras gaudeo, nam si in illo excusatum habeas id vitii, non debes me propterea odisse. Vera causa, cur non saepius ad te scripserim, ea fuit, quod nihil boni pro te apud Reginam efficere potuerim. Quod vero ex Hollandia rarius scripserim, id fieri

aliter non potuit. cum non nisi brevissimo spatio substititerim, nempe per quatuor vel quinque hebdomades, reliquum temporis periit mihi, dum vastum istud spatium, quod nos ac Suedos interjacet, bis recurro. *Naudaeus* in Suediam est venturus, is forsan mihi succedet in Bibliotheca. Incomparabilem parentem tuum non bene valere ex affine tuo intellexeram, nunc vero ex famulo ejus audio illum graviter admodum decumbere. *Salmasium* mentitum esse, cum me male de eo apud Reginam locutum esse dixit, vel publice ostendam, Spero deum redditurum valetudinem tuo parenti, cogniturum que veritatem. *Annae Schurmannae* aliisque similia persuasit, aut saltem persuadere conatus est. Sed ostendam illum esse nebulonem. Amstelod. cicioclii. xix. Julii.

EPISTOLA LXX.

ISAA C. VOSSIUS

Nic. Heinsio.

Venetias.

Proluxiores ad te praeterita hebdomade literas dedi, mi Heinſi, quibus quo in ſtatu res meae ſint fatiſ, ut opinor, fuſe tibi ſignificavi. Satiſ quoque ex iis potuiſti cognoscere, nihil eſſe eorum, quae me adtinent, quae non libenter tibi cupiam aperire. Quoniam autem liberiores fuere literae iſtae, peto, ut quod *Salmaſius* odio mei, id ipſum tu faciaſ mei amore, nempe ut eaſ Vulcanſ offeraſ, ne fraudi mihi ſit aliquando mea apud te libertaſ. Superiori hebdomade vix audebam indicare tibi adſlictiſſimam ſummi Parentiſ tui valetudinem, jam conclamatum fuiſſe nuntiarat mihi adſiniſ tui famuluſ illo ipſo, quo ad te ſcribebam, die, verum gaudeo quod nunc meliora tibi poſſim adferre. Si quidem hodie intellexi ita remiſiſſe morbum, ut ſpeſ ſit brevi eum priſtinae poſſe reddi ſanitati. Commorabitur tamen affiniſ & ſoror tua per aliquot etiamnum dieſ Leidae, quamviſ enim omne, ut audio, periculum abſit, nondum tamen diſceſſit morbuſ. Quod vero in literiſ tuiſ ſcribiſ Parentem tuum intellexiſſe, me non honorifice de te apud Dominam noſtram eſſe locutum, ſciaſ velim eam eſſe meram *Salmaſii* calumniā. Nunquam vel dixi vel cogitavi aliquid dicere, quod Parentem tuum laedere potuiſſet. Ex eo tempore, quo in Suediam venit *Salmaſiuſ*, (verum etiam ſemper) tanti mihi non eſt viſa amicitia *Salmaſii*, ut eam improbo aliquo facto comparare voluiſſem. Ut me exoſum faceret apud omneſ amicos, nihil eſt quod non tentarit. *Blondello*, *Annae Schurmannae*, *Gronovio*, *Becharto*, *Golio*, pluribuſque aliis perſuadere conatuſ eſt peſſime me de ipſiſ apud Reginam eſſe locutum. Verum, ut opinor, erit mihi de illo vindicta. Nihil eſt quod aeque illum urat, quam quod Notarium quendam dixerim eſſe dignum ejus cognatione. Atqui notum eſt cognatam illiuſ *Salmaſiam* diu ancillatam fuiſſe concionatori cuidam Carantonenſi. Nupſiſſe vero non ita pridem inſtitori cuidam ligularum, cui nomen eſt

est *Eusebio Lehan*, viro probo admodum, & quo merito gloriari possit *Salmasius*. Adeo quippe sincerum esse dicunt, ut in mercibus suis vendendis, emptores nunquam vel uno emunxerit obolo. In reliquam ejus cognationem tu proculdubio inquires. Aequum enim non est, ut tam heroica genealogia ignota in tenebris diutius lateat. Verum neque oblivisci debes quartae, quam vocas, Gratiarum. Avum habuit institorem panni, & inde familiae nomen. Verum haec tu diligentius. Ex animo cuperem habere collationes in Augustam historiam, de quibus proxime ad te egi. Utinam eam conferas: id enim si feceris, habebis, quo *Salmasium* possis vexare. De Anglicanis rebus nihil certi tibi possum rescribere. Classis *Trompii* Dunae portum reliquit, septentrionemque versus contendit, ad persequendum, ut creditur, *Blacckium*, qui strenue nostrum contemnit, tanquam detrectantem certamen. *Beuningius* intra unam alteramve hebdomadem in Suediam discessurus est legatus. De me ante duas vel tres hebdomades nihil certi possum adfirmare. Vale, mi Heinse, & me ames. Amstelodami. CIOIOCLII. XXVIII. Julii.

EPISTOLA LXXI.

ISAAC VOSSIUS

Nic. Heinse.

Venetias.

Literas, quas ad me scripsisti in Suediam, inde mihi esse remissas, ex superioribus meis jam intellexisti, mi Heinse. Dolet quod nihil omnino iis possum reponere. Scis mea non esse factum culpa, quod rebus tuis tam male consulatur, quomodo enim absens tuam potuissim agere causam, cum meipsum expedire nequiverim! Noli itaque mihi imputare, quod cum tam multa promiserim, nihil tamen eorum praestiterim: nosti enim jussum me ista scripsisse. Meminique me hoc saepius tibi significasse. Ex iis praeterea literis, quas ante duas ad te exaravi hebdomades, satis potuisti colligere, quo in statu res fuerint nostrae, ex quo e Suedia discessimus. Si illae tibi redditae sint, peto fac, quod praeterita postulabam hebdomade. Ego etiamnum Amstelodami haereo, incertus quamdiu. Si recte calculum pono, succedet iter Hispanicum, de quo saepius alias. Perstat enim in voluntate Regina, omnibusque modis cupit, ut eo me conferam. *Salmasium* quod adtinet, is quomodo meas tractarit literas, jam intellexisti. Accepi vero modo literas *Bocharti*, quibus rescribit hunc in modum: *J'ay leu a Sa Mte & celles que vous m'escrivès, & la copie de celles que vous escrives a Mr. de Saumaise. Elle en est demeurée satisfaite. Et pour moi je ne juge, que vous en devies faire d'avantage.* Avide scire desidero, quid dictura sit Serenissima Regina, ubi intellexerit eum combussisse meas literas. Ego sane hoc facto gaudeo. Male mihi semper conveniat rogo cum nebulonibus. Olim, ut nosti, non suspexi tantum, sed pene adoravi eruditionem istius hominis, nunc vero,

ex quo majorem coepi cum illo familiaritatem colere, moresque ejus penitus inspicere, cognovi & minus doctum esse, quam existimaram, & minus generosum. Imo pusillum esse ostendam & vilissimi animi hominem. Jactat genus & proavos, cum omnes fuerint ignobiles. Mutuo accipit pecuniam, quam postea vel nolit, vel non possit reddere. Vult heros videri, cum scurrilia committat. Verum & in literis ostendam illum non esse id, quod quidam existimant. Palam fiet aliquando, imperitiam saeculi unicam fuisse felicitatem istius nebulo-
nis. Sed de his alias. De itinere meo in Hispaniam scribam ad te simulatque aliquid certi cognovero. Parentem tuum, virum summum & incomparabilem, convaluisse ex animo gaudeo. Rerum novarum utinam hîc non tantum indies audiremus. Creditur jam Admirali noster non longe abesse a classe Britan-
nica. Verum de eo nihil tibi certi possim adfirmare, cum rumores sint meri, nulloque nixi testimonio. Velim tecum adferas opus cujusdam poëtae Itali de bellis Granatensibus, quod mire in Gallia commendant, adeoque ipsi *Tasso* praeferunt. Auctoris nomen nunc non succurrit, verum vocat se Mutinensem, & inservire se Mutinensi duci. Plura per sequentem tabellarium, nunc enim Hagam propero. De Stephano Byzantio utinam sis memor. Quicquid habeo tuum erit, si illum mihi procuraveris. Vale, mi Heinſi, & me ames. Amstelodami 11. Aug. C1612.

EPISTOLA LXXII.

ISAAC. VOSSIUS

*Nic. Heinſio.**Venetias.*

ANte octiduum accepi e Suedia literas istas tuas, quibus alias ad Reginam incluſeras. Statim illas una cum iis, quas ad me scripſeras, remisi. Id ideo feci, ut cognosceret Serenissima Regina, unde factum esset, quod earum laesum esset sigillum: ejus siquidem pars aliis tuis adhaeserat. Nihil autem est in illis, quod nolis rescire Dominam nostram. Verum est in his, quod ego cam ignorare vellem. Attamen frustra; nota est enim Reginae negligentia mea, nec tamen propterea me odit. Tu vero, mi Heinſi, cum jam olim cognoveris, naturale mihi id esse vitium, nondum tamen me infectari desinis. Parcius rogo imposterum me increpes, sitque tandem aliquis querelarum modus. Si omnes computes hebdomades, quibus hîc, post discessum meum priorem e Suedia, substiterim, plures erunt, quibus ad te scripserim, quam quibus non scripserim. Atque haec quidem ita sese habent, ut autem ad tuas veniam, ex animo dolet, quod nihil habeam, quod illis possim reponere. Scis enim me longe abesse ab aula, diuque in eo fuisse statu, ut neque tuam, neque *Langermanni* causam agere potuerim. Verum omnia, ut spero, brevi mutabuntur. Expectemus & patiamur etiamnum paululum, & triumphabimus,
ut

ut spero, brevi de hoc nostro communi inimico. Multum jam ejus cristas subsedisse existimo, aut si nec dum subsederint, videbis eum hominem brevi eo redactum insaniae, ut scribat in Reginam. Divinas ad eum literas misit Regina nostra, quibus ejus superbiam, inconstantiam, invidiam, & malignitatem ita graphice depinxit, & retudit, ut mira prorsum res sit, si non in rabiem agatur. Verum haec tibi soli dicta sunt. Ego in Hispaniam brevi proficiscar. *Naudaeus* interea curam habebit Bibliothecae. Transiit is hac ante mensem fere, nec tamen me compellavit, instigatus, ut credo, a *Salmasio*. Atqui tamen ego istum primus Reginae commendavi, invitavique eum literis in Suediam. Una cum illo vocatus est in Suediam Gallus quidam, nomine *du Fresne*, mihi quidem ignotus, Praefecturam is exercebit in picturas & Cy-melia regia. Anglicana illa puella, quam vidisti apud *Salmasium*, compressa est a Moro. *Salmasius* cupit, ut eam in uxorem ducat. Nescio quid facturum sit *Morus*, qui affirmavit nonnullis, se Anglicanam istam iniisse tanquam Professore, non autem velut verbi divini ministrum, ideoque non curare monita Ecclesiae. Intellexeris vero jam dudum illum vocatum esse huc ad Professionem Graecam. *Blondellus* necdum a caecitate sua est liberatus. *Bochartus* in gratia est apud Dominam nostram. *Beuningius* Legatus discessit in Suediam ante duas circiter hebdomades. *Beckius* hîc per Hollandiam discurrit, tectus octo vel decem catenis aureis. *Spiringius* jam per multos menses meditatur iter in Suediam, nec tamen eo proficiscitur. Detinent illum nescio an novi amores, an vero lites cum avunculo. Filiam graphiarii *Mussi* dicitur ambire. Adfinem tuum brevi senatorem fore spero. De motibus Anglicanis certiora proculdubio ex illo intelligere possis. Ego quippe raro in publicum prodeo, & non me multum immisceo publicis rumoribus. *Miltonum* caecum esse factum jam tibi significavi, addunt alii etiam mortuum. *Patritii Junii* locum obtinet *Duraeus* quidam. Ipse vero rure alicubi vivit. *Seldenum* haeredem esse omnium fere bonorum Comitissae Cantii, & hoc quoque indicavi. Dum vivebat nupserat ei quodammodo, erat enim, ut vulgo loquuntur, maritus conscientiae. Verum in partem haereditatis venit etiam Maurus quidam, egregie mutoniatus. Ipsi tamen *Seldeno* cessit & aula, & reditus quadraginta fere millium florenorum. Aliqui etiam longe majorem eum faciunt. In Suedia febris quoddam genus multos abstulit. *Wachtmeisterus* & *Wittenbergius* obierunt. Comes *Magnus*, Princeps *Carolus* aliique innumeri diu decubuere. Mortuus quoque est *Sopius* pater. *Tiffenhausius* colosseus ille, quem nosti, homo, dicitur occisus esse a *Wrangelio* quodam. Aliud quod scribam nihil succurrit. Vale, clarissime Heinsi. Si Romae etiamnum commoreris, peto, ut ab *Holstenio* postules collationes, quas habet in inscriptionem Herodis Attici, quam edidit *Salmasius*. Vale, & *Langermannum* plurimum meo nomine salutes. Kal. Sept. cıııııclıı.

EPISTOLA LXXIII.

ISAAC. VOSSIUS

Nic. Heinſio.

Venetias.

Vix signaveram superiores meas ad te literas, cum mihi tuae redderentur, mi Heinſi. Scriptae illae sunt Florentiae ix. Aug.. Valde mihi ingrata fuit & injucunda earum lectio, quod videam rebus tuis tam male consuli. Pene maledixerim illis, quorum pravitate haec tibi contingunt, quique non patiuntur, ut sese benignitas Reginae erga te quoque exerat. Verum paululum etiamnum obdura, brevi forſan fabellae istius *καταστροφὴν* videbimus. Quae tibi priore scripsi hebdomade verissima sunt, sed tibi soli dicta sunt. Coram aliquando tibi ostendam apographum epistolae R. cujus si me sciret habere apographum adversarius, nollet, credo, vivere. Tantum certe illa jam effecit, ut cogitationem de adeunda Suedia omnino abjecerit. Adfirmavit id ipsum nonnullis conjux ejus ante biduum triduumve, cum huc forſan excurrisset ad mercatum vaſorum Chinenſium. Verum alterum istud strenue diffimulat, ut existumo. De *Capellano* miror jam tum reſciviſſe, quae reſcribis. Attamen fallitur in eo, quod putat *Freſnium* bibliothecarii munus obiturum. Illo ſiquidem durante abſentia mea fungetur *Naudaeus*. Verum erit cuſtos cymeliorum & picturarum. Sua jam, ut audio, cymelia &c. obtruſit Sereniſſimae Reginae pro ſexaginta ſcutatorum millibus. *Cicconus* hiſtrio proculdubio & ipſe magnam abſtulit pecuniam in deducendo grege. Quanto melius & utilius tantam ſummam tuis deſtinaveſſent uſibus diſpenſatores aerarii Dominae noſtrae. De Stephano immenſum quantum me obſtringes. Multum tamen me magis obſtringes, ſi per te poſſim conſequi collationes codicis iſtius Ambroſiani Hiſtoriae Auguſtae ſcriptorum. Ducentis imperialibus libenter a te redimam collationes iſtas. Fac, mi Heinſi, ut quoquo modo eas habeam. Videbis quid poſſim contra *Salmaſum*. Utinam autem etiam minutiffimae quaeque diſcrepantiae codicis iſtius annotentur, cum licet non admodum antiquus, valde tamen ſit bonus. Haec dum ſcribo redduntur mihi etiam alterae tuae literae, ſcriptae xx. Auguſti, eademque in urbe, qua priores. Significas in illis reditas tibi eſſe tandem literas ab iſto Vaſcone, quibus multa promittit & plura minatur, niſi turpiſſimum aliquod commiſeris facinus. Verum, mi Heinſi, ſi me audias, valeant promiſſa & minae talium nebulonum. Si te ſubmitteres homini, qui & te & ſummum Parentem tuum tantis affecit injuriis, nemo eſt, qui te non viliffimum & abjectiſſimi animi mortalem eſſe exiſtimaret. Sceptra ipſa & coronae hac lege tibi diſplicere debeant. Ita itaque habeas, vana eſſe iſta promiſſa, longe autem vaniores eſſe minas. In me longe diſpar eſt ratio, nam ſi ego quidpiam fecerim, feci id non impulſu Vaſconis alicujus, aut ho-

hominis, qui malit videri, quam esse, sed Reginae omnium maximae. Scis praeterea quanta mihi olim cum isto tuo inimico fuerit amicitia. Cave itaque putes me quidquid pudendum commisisse, aut velle committere, quoquo proposito praemio. Rogo tamen in omnibus literis ostendas, tibi nihil aequè gratum esse, quam obsequium Serenissimae nostrae, nec vel praesentes misérias tibi esse molestas, si eas ipsius perferas nomine. Certus enim sum, si cognoverit Incomp. Nostra Domina se a te amari (quod sane verum est, cum praesens tuus status id satis testatur) fieri non potest, ut te non vicissim redamet, & non triumphes de omnibus nostris inimicis. Si vehementiores & acriores literas scripseris ad *Holmium*, rogo, ut eas emollias. Ratione enim nobis procedendum est, si velimus de inimicis nostris triumphare. Verum prae omnibus istud ostendas, nihil te praeferre obsequio Dominae nostrae. Plura non possum, jamjam enim discessurus est tabellarius, nisi forsan jam discesserit. VII. Sept. CIOIOCLII.

EPISTOLA LXXIV.

ISAACUS VOSSIUS

Nic. Heinsio.

Florentiam.

ANte tres circiter hebdomades postremas tuas accepi, mi Heinsi, scriptas Florentiae xx. Aug. Pauca admodum tunc illis reposui, quia Hagam festinabam, ubi allatum esse cognoveram fasciculum literarum ex Suedia, mihi inscriptarum. Continebat autem is cum aliorum, tum etiam *Bocharti* literas, quibus significabat Serenissimam Reginam decrevisse, me Constantinopolin mittere ad inquirendos codices Graecos. Vides itaque egregie te falli, cum existimas me tibi successurum in itinere Italico. Promittit vero commendatitias ad *Rakoczium*, & Legatum Gallicum, qui est Constantinopoli. Rescripsi me iturum quandocunque Dominae nostrae placuerit. Antequam tamen discedam, petam ut matri meae vel avunculo annumeretur stipendium meum annuum in hac urbe per mercatorem aliquem, idque quamdiu absim. Probabis puto hoc consilium. Reliquos, quos mihi concesserit nummos S. R. itineri impendam. Intra duas vel tres hebdomades responsum exspecto, faciamque te certiore quamprimum. Si per Germaniam iter instituas, uti olim minabar, forsan tibi occurram. Constitui enim aliquandiu morari Augustae Vindelicorum. Quod si etiamnum diu tibi Italiam inhabitare statutum sit, facies me, ut spero, certiore simulatque illuc venero. Peregrinationis meae ratio non permittet, ut tibi ulterius occurram. Cupit enim Regina ut per Vienneam Byzantium tendam. Verum de his fusius ad te scribam, simulac ipse certiora cognovero. Valde autem, mi Heinsi, doleo, ita avare compensari diligentiam & operam tuam a ministris incomparabilis nostrae D. Verum rogo,

Tom. III.

K k k k

us

ut paulisper etiamnum obdures. Spero enim Serenissimam Reginam & tibi & mihi simul prospecturam. Quod si ego prius expediar, ita habeas velim, commune me tecum habiturum quidquid accepero. *Bourdelotii* minas quanti debeas facere ipse iudices. Non semper protomedici regnabunt, ut spero. *Naudaeus* & ipse jam in Suediam, ut existimo, appulit. *Fresnius*, qui cum comitatus est, erit *Garde du Cabinet des antiques*. In Suedia omnes hi mortui sunt; Princeps Palatinus pater, Praefectus Stabuli, pater nempe Comitis *Magni*, quorum neuter, ut nosti, immatura periit morte, uti neque *Salvius*, qui & ipse supremum vixit diem. Praeterea obiere, *Joannes Wachtmeister*, & *Tissenhausius*, colosseus ille, quem & ipsum nosti. Obiere etiam alii complures minus tibi noti. *Bochartus* est in flagranti apud Reginam Gratia. Compelles illum rogo literis tuis: nihil non tua facturum gratia. *Beuningius* in Suediam appulit. Appulit quoque Legatus Hispanicus, nomine *Pimentellus*. Statim profecturus est hinc in Suediam *Silvercronius*, cujus hae sunt, quas vides, literae. Adest nunc ille mihi, nec patitur pluribus tecum agam. Vale, a tuo aeternum Vossio, sequenti occasione plura. xxvi i. Sept. cicioclii.

EPISTOLA LXXV.

ISAAC VOSSIUS

Nic. Heinsio.

Florentiam.

EXISTIMO te jam Florentia discessisse, mi Heinsi, cum neque affinis tuus, neque ego ab aliquot hebdomadibus ullas a te acceperimus literas. Postremas tuas ad me ante quinque circiter hebdomades tradidit mihi *Blaeuwius* typographus. Iis jam respondi bis aut ter, quamvis brevissime. Literas vero meas misi *Georgio Ebertz*, persolvique Mantuam usque, prout jusseras. Rogo ut significes, qua te semper via possint invenire epistolae meae. Nam non semper affinis tuus in hac urbe versatur. Ipse etiam non minus Hagae habito, quam Amstelodami. Quamvis autem nihil hoc tempore habeam, de quo operae pretium sit te monere, scribo attamen, ut tuo postulato & meo satisfaciam officio. Nescio tamen an alterutri unquam satisfacere potero, cum neque tu postulandi finem facias, & ego plurima jam debeam: verum obruam te aliquando crebritate literarum, faciamque ut potius loquacitatem, quam silentium meum accuses. Valde scire desidero, quale a *Burdome* protomedico responsum referes. Significes rogo, quid ille de me in suis ad te scripserit literis, quarum facis mentionem. Mihi soli dicta erunt quaecunque scripseris. *Beuningius* in Suediam adpulit ante tres circiter hebdomades. Bis audientiam, ut vocant, habuit ipso, quo adpulit, die. Primo allocutus est Dominam nostram Latine, deinde Belgice privatim. Plura de illo necdum intellexi. *Naudaeus* quoque adpulit, & *Fresnius*, terrestri itinere prior, alter vero mari. De me quid

quid futurum sit intra unam alteramque cognoscam hebdomadem. Hispanicum Britannicumque iter jamdudum evanuit. Huic successit Byzantinum. Et illud quoque jam vacillare incipit. Verum forsan erit, quod mihi praedixisti, me successurum tibi. Verum non illud alterum, conclamatum esse fortunam meam in Suedia. Spero enim, imo certus sum, me esse gratum Reginae. Verum constanter opperiar tempus, donec omnes istae tempestates transeant, & majorem nobis reducant tranquillitatem. Vellem & te quoque ita esse animatum. *Silvercronium* in Suediam concessisse jam superioribus monui. *Bochartum* esse optimo apud Dominam nostram loco, & hoc quoque indicavi. In postremis ad me literis scribit sese occupatum fuisse in perlustrando catalogo, quem transmisisti Codicum, qui Florentiae adservantur, excerpisseque eos, qui maxime merentur describi, verum nondum potuisse sese eos offerre S. R. cum Stregnesiam discesserit ad exequias Principis Palatini. Zelandos Principem Arausionensem Gubernatorem suum declarasse, Wilhelmumque comitem Frisiae Capitaneum, ut vocant, Generalem, aliunde, ut puto, jam intellexisti. Valde id aegre habet Amstelodamenses, aliosque, quos vocant Lovensteinianos. Aliud novi nihil omnino habeo. Vale, mi Heinse, & me ames. Salutes cum alios communes nostros in Italia amicos, tum praecipue *Ferrarium* utrumque, & maxime Mediolanensem. Significes ei, rogo, quam honorifice de illo sentiam, quamque me illi obstrictum esse confitear, quod utinam aliquando ullis possim aut obsequiis aut officiis ostendere. Amstelodami. CIOIOCLII. IV. Octob.

EPISTOLA LXXVI.

ISAAC VOSSIUS

Nic. Heinsio.

Florentiam.

GEminas tuas epistolas ad me heri vesperi perferri curavit *Blauwius*. Scripta Gerat postrema XXI I. Sept. altera ejusdem mensis Kalendis. Non dubito quin utraque diu apud *Blauwium* jacuerit. Scis eum hominem esse satis lentum, nec nimium erga amicos officiosum, quo citius iis fruar, nec tibi negligentior videar, quam revera sim. Noli vero dubitare, quin tuto mihi tradentur. Ex animo vero gaudeo, mi Heinse, quod insolentissimis circulatoris istius literis tam animose responderis, & nec ipsam quidem, quam maximi facis, Serenissimae nostrae gratiam, turpi aliquo facinore velis comparare. De Aethiope & Angla lepida sunt & festiva, quae reponis. Sed nunc negant ea vera esse, & sparsa esse ab malevolis quibusdam. Sane constat mihi Anglam istam omnes Aethiopi reddidisse amatorias suas. Inter ipsum & *Salmasium* lis forsan orietur (quaenam enim inter tales possit esse diuturna concordia) propter librum quendam hîc excusum, cui titulus, *Clamor sanguinis regii in coelum*. Scri-

ptus ille videtur a quodam anonymo Anglo, transmissus vero *Salmasio*, divulgatus vero ab Aethiope. Propter sexaginta exemplaria, quae promisit typographus, inter ipsos est contentio. Aethiops ea sibi vult vindicare, decrevitque sex exemplaria inscribere Reginae nostrae, totidem vero Regi Angliae. Alia item sex Galliae Regi, & sic porro, ita ut Regina Bojohemica, & Arausianensis vidua unum etiam alterumque habiturae sint sibi inscriptum. Caeteris exemplaribus ipse typographus suam addidit dedicationem. De studiis *Langermanni* quod scribis gratum est. Quod autem vereatur ne *Salmasius* eum in edenda Anthologia praeveniat, id frustra veretur. Nunquam huic operi manum adhibebit. De Simplicio aliquando coram. Noli vero nimium esse sollicitus in colligendis ejus codicibus aut collationibus, puto me in Suedia habere sex aut quinque minimum codices collatos. Vel unus & alter sufficiebat. Verum longe ardentius a te postulo, ut de Historia Augusta non tantum cogites, verum ut serio & diligenter eam conferas. Optimus est codex, & quamvis non videatur multum antiquus, continet tamen lectiones praestantissimas, & ex quibus facile verum possit exsculpi. Quidvis tibi debeo, si tuo beneficio has nancisci possim varias, quas dixi, lectiones. Innumeris me jam modis obstrinxisti, unum tamen & summum hoc caeteris precor addas tuis beneficiis. De Stephano Byzantio doleo, sed minus dolebo, si alterum hoc praestiteris. Pro honore habito tibi Florentiae gratulor tibi. Verum plus tu Academiae isti, quam illa tibi possit conferre. *Bockartus* hyemem transiget in Suedia. Possis itaque illum convenire literis tuis, quod proculdubio illi erit gratissimum. Valeat agyrta iste, nec amplius rogo eum compelles. De *Fresnaeo* gratias ago quod monueris. *Naudaeus* vir est bonus, ut credo, sed & ille tamen nihil audebit facere, quod agyrtae displiceat. Ego illum & commendavi, & vocavi literis meis, nec tamen me ausus est hac in urbe compellare. *Bockartum* optime tibi velle cognovi ex literis ad me *Beuningii*. Res meae non optimo sunt in loco. Iterum illa erga me mutata est. Sed haec tibi soli. Vale, & me amare pergas. Graeciam, Hispaniam, Italiam, Germaniam Britanniam, & omnes regiones adire jubeor, & tamen nullam adeo. Nescio quid causae sit. Sed omnia illic plena sunt araneorum. Plura libenter scriberem, sed heri demum vesperi traditae mihi fuere literae tuae, hoc vero mane discedit tabellarius. Plura itaque alias. Datum, *Cavalcantem*, plurimum meo nomine salutes. Amstelodami CIOICLII. XVIIII. Oct.

EPISTOLA LXXVII.

ISAAC VOSSIUS

*Nic. Heinsio.**Venetias.*

DUabus postremis occasionibus nullas omnino ad te dedi: neque enim quicquam mihi succurrebat, quod operaepraetium esset tibi significare. Valde praeterea metuo, ut meae non recte curentur, quas tamen semper Mantuam ad illum, quem iusseras, mercatorem transmisi. Verum in ultimis tuis III. Kal. Oct. exaratis, nullam mearum facis mentionem. Traditae mihi sunt illae aliquanto serius, Hagae enim aliquandiu substitit *Goesius* noster. Quod in illis scribas revocatum te esse in Suediam, literasque inde humanissimas accepisse, valde me id recreat & reficit. Tabescet *Sagmarius* heros, ubi hoc intelliget: pergit enim jactare neutrum nostrum subducturum esse subligar posthac in Suedia. De *Moro* vero quae scribis, quam sunt ea lepida, quam venusta. Auctor sane ei sim, ut nummum det cum hac inscriptione, SUBACTA BRITANNIA. Verum vide quam ingratus sit iste heros erga Aethiopem, cujus tamen clavae istam debet victoriam: quoniam is non cupit eam uxorem ducere, acerrime nunc illum persequitur. Mihi sane *Aethiops* multo rectius facturus fuisse videtur, si ex Ovidii tui praecepto a Domina incepisset. Minor quidem voluptas ista fuisset, sed longe majorem inivisset gratiam. Divulgata est passim haec fabella etiam in gazettis publicis Londinensibus. Addita etiam epigrammata. De *Bordelotio* quae scribis, ea mirifice mihi placent. Verum non est *Vasco*, ut existimaram, morum & ingenii conjectura ductus, sed est popularis *Salmasii*, nam & ipse est Burgundus. Non itaque mirandum est tam bene convenire nebulonibus istis. Gallus aliquis non indoctus, olim comes *Bocharti*, nunc vero ex Suedia redux, multa mihi narravit de prodigiosa hominis istius inscitia. Cum aliquando *Bochartus* adfirmaret veteribus ignotum fuisse genus illud florum, quod Galli *oeillets*, nos *caryophyllatas* vocamus, aut etiam corruptius *girofles*; ipse corripuens *Bochartum*, florem dictum inquitbat appellatum fuisse *ocellum* a veteribus. En impudentiam. Alio tempore pertendebat, praesente Serenissima Regina, Sidonium Apollinarem Psalmos sacros Graeco vertisse carmine, non autem Apollinarium. Valde infensus est *Valesio*, quoniam illi apud nonnullos excidisse cognovit, *je ne sçay comment la Reine soit infatuè de cet hableur la*. Itaque ipse *Valesium* paedagogum vocat, & qui nihil legerit, aut sciat praeter Ammianum Marcellinum, & varias lectiones Cassiodori (nota & hîc inscitiam) se vero nosse vivere, & ferere jocos, qui placeant Reginae. Verum de his coram. Sane tantum potest iste homo apud Serenissimam nostram, ut etiam persuaserit, legere *Pecqueti* observationes medicas, chirurgi, nisi fallor, cujusdam Parisiensis, aut anatomici saltem. De Hi-

istoriae Augustae Scriptoribus gaudeo quod promittis. Noli vero existimare *Casaubonum* ejus codicis lectiones vidisse. Jam mihi contrarium constat. Scribam de his plura proxima forsan occasione. Mea fortuna in Suedia sive perierit, sive non, perinde est mihi. Saltem velim; ut Regina veritatem aliquando cognoscat, nec vel *Sagmariis* vel *Bordelotiis* & similibus scurris credat. *Meibomius* in Suedia utitur tua bibliotheca. Prius ambulavit per multorum manus. Nunc non magis est tuta. Nosti omnes Germanos, iste vero pauper est & famelicus. Incendium magnam partem Holmiae consumpsit. Centum nempe & quinquaginta domus lapideae combustae sunt. Podagra iterum affligitur *Salmasius*. Dicitur jam illa coxas, & latera ejus invasisse. Vale, mi Heinfi, & amicos communes si quos videris, illos plurimum meo nomine salutes. Amstelodami CIOIOCLII. VII. Novemb.

EPISTOLA LXXVIII.

ISAAC. VOSSIUS

Nic. Heinfi.

Venetias.

VAlde futurum verebar id, quod postremis tuis significas, mi Heinfi, ut non bene meae ad te curarentur literae. Utinam tamen solae istae perierint, quibus *Silvercronii* incluferam epistolam, nihil enim in illis scripseramus, quod arcanum esse debeat, priusquam enim obsignaret, ipse mihi eas praelegerat. Et si bene memini, versabatur maxima ex parte in depingendis amoribus *Mauri*, nymphaeque Britannidis. Verum quas ad te postea scripsi, eas nullomodo mihi periisse velim; non quia eae negligenter fuere scriptae, aut quod graviter feram literarum mearum jacturam, verum quod liberius aliquanto de statu aulae nostrae in illis sim locutus. Vix autem mihi persuadeo opera pueri eas periisse, utor enim semper in curandis literis opera *Christiani*, quem nosti, qui mihi iterum commendatus a *Spiringiis* adest. Tuas autem omnes an acceperim nescio, verum illae, quibus *Puteani* incluferas epistolam, salvae ad me pervenere. Habet eas jamdudum *Gronovius*. Quod autem tibi in Italia hibernandum fore significas, valde id mihi est molestum. Speraveram enim te hanc hyemem nobiscum esse transacturum. Attamen si haec mora aliquod rebus tuis adserat aut subsidium aut solatium, non dolebo. Et sane non est quod existimes res tuas in Suedia esse conclamatas, quamdiu illic agat *Bochartus*. Ex illis ipsis, quas ab eo hac, ut scribit, hebdomade, accipies literis, satis ejus erga te animum poteris cognoscere. Quo praeterea obtinuerit pacto, ut conterraneus iste *Salmasii* cogeretur epistolam tuam exhibere, & hoc puto intelliges. De ipsa autem epistola tua ita judicat, *la lettre de Mr. Heins est bien admirable, pour tesmoigner le peu d'estat, quil fait des fumees de la Cour, mais dont la liberte a semblé a quelq' uns un peu excessive. Je luy en escriray plus au long a la*
pre-

prochaine. Gratias tibi maximas habeo, quod argumentum istius epistolae trans-
miseris, multo me tamen magis obstringes, si integram transmittas. Ex ani-
mo peto, ut hoc facias. Quod autem medicus libertatem in ea arguat, pec-
cares, si in eo peccasse te crederes. De insigni istius hominis in literis pro-
gressu jam ad te scripsi occasione praeterita. Et tamen si aliquis esse cupias in
hac aula, oportet ut huic placeas. Solus enim ibi sapit, & solus omnia potest.
Bochartus & ipse etiam nunc in aulam migravit. Ad eandem omnes mensam
accumbunt & ipse, & *Naudaeus*, & *Fresnius* & *Bourdelotius*. Verum hic po-
stremus est tanquam Jupiter inter minores deos. Vide quanto majus sit videri,
quam esse. De *Salmasio* nihil omnino habeo quod tibi significem. Credo eum
etiamnum cum solito suo malo conflictari. Retulit tamen nonnemo, eum
nunc meliuscule valere. Lis ipsi est cum *Moro*. Cupit enim ut is Anglicanam
suam in uxorem ducat, quod alter recusat. Verum isti duo boni amantes, qui
nuper tam suaviter & amice oscula jungebant, valde nunc sibi invicem sunt
intensi. Ante quatrimum siquidem, cum forte *Maurus* huic nostrae occurre-
ret in vasta ista area, quae aedibus *Salmasii* adjacet, statim illa capillitium ejus
invasit, pluribusque adfecit verberibus: neque eo contenta etiam fuisse in il-
lum saevire conabatur, nisi bonus ille socius in horreum confugisset super strui-
cem quandam, jactuque se vindicasset caespitem. Huic spectaculo non defuit
ingens spectatorum numerus, qui ex vicinia passim eo confluxerant. Vides
quam omnes iis in aedibus sint *γυναικοκρατούμενοι*. Facile hinc possis conjicere
falsos fuisse rumores, qui de *subacta Britannica* passim fuere sparsi, cum illa po-
tius *Maurum* subegerit. Vel si verus sit rumor, adparet non satis fuisse suba-
ctam. De me vero nihil habeo, quod scribam. Quo enim loco sim apud Re-
ginam ne ipsam quidem Reginam scire existimo. Si *Bochartus* aliquid pro me
agat, id statim destruit aliptes. Video me nimium esse Reginae. Missionem
petam quamprimum. Valde hoc placebit *Salmasio* & conterraneo illius. Huic
postremo praesertim. Attamen, si me ipsum amem, ita mihi faciendum est.
Illi enim quamdiu bene sit in Suedia, video mihi bene esse non posse. Habet
nescio quas artes circulatorias, quibus pene infatuavit Reginam. Mimimum agit
praeclare. Cantica novit plurima, eaque non infeliciter profert ad sonum ci-
tharae. Odorarius est praeterea, unguentariusque. Rem quoque culinariam
probe intelligit. Scripsit duo volumina satis grandia cum hoc titulo, *Les apo-
pthegmes de la Reine de Suede écrites par son Protomedecin*. Nescio an lucem vi-
debunt, puto tamen. *Salmasius* quoque ut & is aliquandiu triumphet per me
licet. Ostendam tamen illum esse nebulonem, & alterum scurram, nec me-
reri nomen medici, sed vespillonis potius, cum tam multos occiderit, inter
quos *Tissenhausium* nostrum, aliosque complures, de quibus alias. Excussi jam
aliquam partem exercitationum Plinianarum. Portentosos multos deprehendo
errores, & quales vel mediocriter eruditus nunquam commisit. Nilum ali-
quoties vocat *μεγάλον ποταμόν* & in nominativo. *μεγάλος ποταμός*. Nonne
hoc omnem stuporem superat. Libellum quendam de resurrectione, & alium
de virtutibus cardinalibus, qui haecenus sine nomine auctoris prodiit, dicit
esse

esse scriptum aevo Cypriani. Atqui est *Bernardi* cujusdam monachi, qui vixit ante annos quingentos. Plura ex his libellis testimonia petit contra *Grotium*. Quod & ipsum mihi perquam videtur lepidum. Aliquot millia similium errorum colligam, & huic nostro heroi, qui se impeccabilem esse existimet, solvenda proponam. Ex correctionibus decem vix unam veram esse ostendam. In botanicis perpetuos committere errores. In Geographia esse asinum, & nihil unquam boni observasse. Prae caeteris suis correctionibus solet saepe jactare illas in Manilium, cujus locos a *Scaligero* pro desperatis relictos se ex ingenio emendasse existimat. Velim, si in codicem aliquem bonum Manilii incidas, ea loca, quae *Scaliger* asterisco notavit, cum manuscripto committas. Vellem videre specimen aliquod Manethonis, quem descripsisse ais nostrum *Langermannum*, de quo sane multum gaudeo, forsan ex illo potest multum illustrari Manilius. Vellem quoque describeret Topographiam Christianam, Cosmae Indopleustae. Quod si Romam denuo repetas, ut scribis, utinam possis accessum impetrare ad Bibliothecam Altemasianam. Exstant in ea Isidori Characeni Stathmi Parthici, cujus exiguum fragmentum edidit *Hoescheli*us. Exstant quoque ibi plura alia, quae frustra alibi quaeras, uti sunt Antonii Aureliani architectura, Apollodori Atheniensis Grammatica, Censorinus de planetis, Manilius cum veteri Scholiaste. Exstat quoque ibi Spartianus manuscriptus. Verum haec frustra. Vereor enim ut tibi non pateat accessus ad illam. Ubi ubi vero sis peto, ut diligenter inquiras in illorum autorum veteres codices, quos edidit *Salmasius*. Nempe Tertulliani de Pallio, Solini, & historiae Aug. Scriptorum. Utinam quoque conferas caput illud Plinii libro postremo, quo gemmarum nomina ordine alphabetico recensentur. Scis librum postremum in plerisque fere Plinii codicibus abesse. Multas magnasque nugas ad hoc caput congeffit *Salmasius*, cum & ipse veteribus hic destitutus fuerit membranis, ex quibus solis aliquando sapit. Postquam haec scripsissem, diu mihi redditae sunt *Bocharti* literae, in quibus ita scribit. *Les lettres de Mr. Heinsius ont fait icy grand bruit. Je ne luy repons point encore, pource que ma responce doit estre accompagnee d'une autre, qui n'est pas preste.* Verum haec haecenus, plura per sequentem tabellarium. Vale, mi Heinsi, & me ames. Tuus, quem nosti, totus. Amstelodam. CICIDCLII.
xxiv. Novemb.

EPISTOLA LXXIX. NIC. HEINSIUS

Isaaco Vossio.

Amstelodamum.

Ultimas meas duas tresve Amstelodamum ante ad te misi, ut jufferas, mi Vossi, superest, ut recte curatas intelligam. Iisdem interim vestigiis insistam

¹ Hanc epistolam & alteram n. LXXXVI. edidit nuper Halae CICIDCCIX. Henr. Augustinus

sistam porro, ut si non perferantur mea, obsequium saltem meum agnoscas. Quas ad te dedi proxime, alias *Gronovio* inscriptas secum trahebant. Spero curae tibi fore ut *Daventriam* mittantur. Ab amico illo nostro nullas totis quatuor jam mensibus accepi, quod quid sibi velit prorsus ignoro; suspicor tamen apud *Goesium* haerere, qui & ipse jam pridem nec compellat me, nec respondet provocatus. Cum insultandi finem non faceret, meque ut improvidum & incautum saepius traduceret, quod & causam nostram communem prodidissim in Suecia, & stationem creditam deseruissim: mihi praeterea ipsi consuluissem perperam, in hoc itinere regio viatico destitutus: respondi nonnulla acerbius, quae & puto male illum habent. privatam nostram causam, cui promovendae iter Suecicum a me destinatum erat, ut nosti, regiis commodis posthabui, fateor, quia luculenta polliceri meus in Italiam excursus videbatur; nec instituti aut obsequii poenitet, etsi fefellerit successus. Caetera quod spectat, nihil minus quam improvidum me fuisse, tu testis es, qui nimiam in me sollicitudinem ac anxiam futurorum curam solebas reprehendere. Nihil mihi defuturum promittebatur identidem. Ego autem, etsi parce promissis crederem, tamen naturali inhibitus verecundia nihil unquam petii, tum ne viderer meae utilitati iter Italicum dedisse, tum quod augurarer ultro facturam Dominam pro insigni sua clementia, quicquid flagitare in rem meam ipse possem. Expensarum facilis omnino iactura est. Illud aegerrime fero, quod cum male mecum ageretur atque indigne, Alpha tamen grammaticorum *Alastor* palam iactet, multa scutorum millia me dilapidasse, quorum rationem reddere non possim regiis dispensatoribus. In aula quoque frigere res meas post operam tam fideliter navatam molestum est. Illud vero longe molestissimum, quod meis ludibrium debeo. *Goesianus* tamen iste aestus deferbeat necesse est. Tu dissimula horum quicquam te scire, & exige ab illo, si quas aut *Gronovianas*, aut alias mihi inscriptas acceperit, easque tua opera ut nanciscar, quaeso. Urit etiam illum, quod duo florenorum millia poscam, quibus & aes alienum hinc a me conflatum expungam, & laribus paternis sistar. sed nihil posco, nisi quod sit meum. Rebus meis, dum in Suecia esses, consuli sic ut velles a te non potuisse facile credo. Tu in indicando tamen aliquem, ad quem aut *Noribergam*, aut *Hamburgum* meas deberem mittere, nimium cunctatus es. Quo fit, ut & rarissimas nunc ex Suecia accipiam, & ad suas responsiones plerasque non perferri a me argutentur aulici. *Holmius* certe quater ad me scripsisse Dominam adfirmat, cum ego non nisi unicas acceperim, quaeque fidem certam facere videantur, nullas antea ab illa scriptas esse. Negat quoque, praeter unicas istas, alias ad se ullas pervenisse *Furstenbergius*, qui rerum suarum satagit in omnibus, & valde accuratus est, ut video. Jurat tamen per Deos omnes *Holmius* rem sese ita, ut adfirmat, habere. Parisios cum advenissem, tibi non semel significavi, ad quem Venetias tuae essent mitem.

nus *Groschupsius* in nova librorum rariorum collectione; Fasciculo I. 8. sed vitiis calami admodum deformatas.

tendae, significavi & *Holmiø*. Ille vero negat, aut meas tum ullas se accepisse, aut te discedentem ex Succia verbo vel uno monuisse, ad quem curare suas deberet, invenisse se ultro tandem viam, qua me compellaret, immenso, quo me prosequatur, amore compulsus, usumque se opera *Fincleri* Hamburgensis, illius scilicet, qui quartas regias perire passus sit. Denique impudentiae in suis me notat, quanquam verbis humanissimis, quod rebus meis discedens melius non prospexerim, tibiue potius, quam aliis omnia crediderim. Ego mi Vossi, deprehendi jam olim, post *Alastoris* laetum in aulam introitum, nostra omnia retro illic sublapsa referri, etiam cum tu maxime securus esses. Haec quia mutari jam non possunt, reliquum est, ut tergo luat scabiosus *Alastor*, quicquid in nos fortuna peccabit. Luiturum autem sum pollicitus Protodemio illa epistola, quae tantas turbas excitavit, ut nuntias. Bibliothecam meam homini ingratisimo & pessime de me merito patere indignor. Scripsi hodie ad *Silvercronium*, petiique ut ejus usu illi interdicat, nisi regia auctoritate sit munitus. Illis autem mandatis quod opponam nihil habeo. Nebulo iste non modo conditionem a me oblatam comiter averfatus est de peregrinatione, quam *Langermannus*, longe meliori natus loco, non dubitavit ulnis ambabus amplecti, literasque hujus argumenti petulantissimas scripsit ad *Alastorem*, ut meministi: sed postea etiam, cum intercedente *Doubletio* illi ignovissem, nonnullaque ad Musicos, quos luci parabat, maxime facientia Parisiis submissem, pluraque missurum me esse pollicitus; nunquam vel verbo unico gratias mihi agere est dignatus. Bibliotheca vero mea, ut in Bataviam mitteretur, tribus quatuorve literis continuis, cum in hanc urbem ante menses advenissem quinque, a *Wullenio* contendit, quod nec fecit ille, nec meis etiam precibus quicquam reposuit. Multo tamen tempore moratum Nicopingae fuisse narrat *Holmius*, ut excusari quodammodo possit. Venio nunc ad tuas, mi Vossi, die xxiv. mensis proxime elapsi exaratas, quae nudius tertius mihi exhibitae fuerunt. Primo omnium rogatum te volo, ut ambitiosis titulis *Agentis* & *Consiliarii* in posterum abstineas. Neutram enim dignitatem mihi vindico, & si vindicarem maxime, hac in urbe dissimulari tamen praestaret, in qua cum tenuiter satis vivam, aulam, quantum possum, fugio, unicumque a Musarum sacris & Medicea bibliotheca, & paucorum amicorum congressibus capio solatium. Famulum a me jam pridem removi, sic necessitate cogente. Id enim malui, quam *Langermannum* amoliri, juvenem suavissimum meique amantissimum. Apud Italos quoque, quantum possum, dissimulo, etsi dissimulari vix possit, Dominae me inservire, ne illi inceptam de ejus maximo erga litteras adfectu opinionem projiciant. Nescio an narraverim tibi jam ante, agere actatem in hac civitate, ac ali stipendio magni Hetruriae Ducis *Johannem Pricaeum*. Is cum solitudinis quoque sit amantissimus pulcre mihi cum illo convenit. Vides quo loco res sint *Agentis* tui? & sane si grammaticis fides habenda, cum *luci* dicantur quod minime luceant, & *Parcae* quod par-

parcant nemini, *Agens* & ego recte dicor, tanquam qui agam nihil. *Langermannus* Romam profectus est, ut *Anthologiam* absolvat. Sed omnia illic invenit difficilia aditu & occlusa, cum novus Vaticanae sit custos datus, altero viro optimo, & humanissimo nuper e vivis sublato: *Holstenius* denuo repulsam est passus, puto igitur futurum ut *Langermannus* brevi huc revertatur, ne cum inscitissimo isto custode conflictari pergat. Ex tuis, quas ad me dedisti, vix ullas periisse opinor. Omitte curam igitur. De Nympha Caledonia nimis est lepida, quam narras fabula. Herae suae, Furiarum maximae, numine fuisse plenam oportet, quae miserum amantem sic defricuerit. Heu quantum mutatus ab illo Hectore noster graeculus, qui ζῶνι καὶ ψυχῇ modo sub lodice relictis, praeclarum de Britannis subactis triumphum meditabatur. Tales etiam clitellas *Alastori* Ononymo a Clytemnestra sua, Tyndaridarum fortissima, imponi rumor est, ut mirum non sit *defricandi* verbum tantopere in deliciis illi esse. Quod tamen cur ille semper in ore foveat cum nescias, caussam ego te veram aliquando docebo, doctus ipse Parisiis, ubi vacabit ridere: nunc enim paullo sum morosior, & nihil fabella illa festivius. A *Bocharto* nullas accepi hactenus; ubi accepero, faciam ut intelligas. Alteras illas, quas affirmat necdum paratas esse, Protomedici erunt, ut opinor, quem mihi infestissimum puto, nihilque non acturum, ut ab aula excludar. Nec enim supplicavi ne fieret, scio enim preces meas frustra fore. Unum machinationem ejus turbat, quod videat perire me non posse, nisi pereat & *Alastor*. Minatus enim sum, si quid evenerit mihi praeter votum, ut innotescat publice operam me daturum, quid de procerum Suecicorum superbia, de veneno sibi ab illis dato, aliisque rebus in Galliam perscripserit *Alastor*, denique quam petulanter Lutheranis insultet dissertatione de transsubstantiatione, aliaque hujus notae, quae cum non nesciat esse verissima, Protomedicus valde socienni sui rebus illic terrarum timet. Epistolam frustra a me petis, est enim diffusissima. Quid quod in exemplari penes me relicto multa sint omissa, quae inter scribendum illi alteri inferui. Nonnullae enim fabellae de *Alastoris* virtutibus erant narrandae, quarum quasdam addidi alteri epistolae hinc illic, cum earum meminisse in meo exemplari neglexissem. Et doleo sane tam supinum me fuisse. Quae tamen Dominam spectabant satis magna cum cura examinavi antequam chartae committerem. Magnam ubique libertatem prae me tuli, vitae etiam aulicae contemptum. Uno loco forsan aut altero offendi posset Domina, praesertim si consiliis Protomedici utatur: volebat ille, ut non modo *Alastorem* amarem in posterum, sed etiam laudarem publice. Rationes cum alias cur hoc fieri oporteret, tum hanc proferebat: *La Reine l'estime infiniment*. Reposui expertum me hoc scire, nec illum, si nobis esset felicior, propterea & meliorem esse. Fuisse apud *Gustavum* olim magnum loco non pejori fortassis & Patrem meum & Avunculum, eas esse rerum aulicarum vicissitudines. Heroe illo immortalitate dignissimo superstite non fuisse metuendum, ut vacua regnaret in aula *Alastor*, & fortunis nostris pro lubitu insultaret. Sed epistolam lituris plenam apud me videbis aliquando. Tui illic mentio honorifica non semel facta. De

litteris in ignem coniectis rem quoque narravi. An impune laturus sim illam epistolam tempus docebit. Non opinor tamen, nisi ut dixi, mihi parcat Protomedicus, ne & noceat *Alastori*. Ego vero, mi Vossi, & protomedicos *Alastorum* admiratores, & protomedicorum sociennos protosycophantas *Alastoras* non morabor. Quorum quidem ut hi vapulabunt, si quid in me viri est, ita illi vapulantibus medicinam faciant licet, sed vespilloniam, & qualem fecerunt haecenus. Apud Clariss. *Bochartum* velim dissimulas de illa epistola tibi quicquam constare. Nos exitum tragoediae brevi videbimus. Multa sunt quae urent Protomedicum, inprimis ne me parasitum esse aulicum crederet, qui bonos malosque amicos uno ordine ducerem, ac promiscue laudarem. Experiatur me tamen amicum si velit. Sin *Alastorem* pro Jove suo adorare, ad ejusque nutum se perget componere, nullo apud me loco erit, ejusque nomen inter patellarios & minorum gentium deos referam. *Alastorem* nihil *Miltono* haecenus reponere indignum est profecto augusta viri maiestate. Utinam quod tu paras brevi videamus. *μεγάλος* iste *Ποταμός* risum mihi movit maximum. Scis ut Africam olim omnem, ita Nilum maxime monstrorum proventu fertilem fuisse, dum in illo hippopotamos venantur alii, is miram & haecenus ignotam belluam venatus est, Onopotamum videlicet. Certe *μεγάλος ὄν* non pejore jure tibi dici possit *Alastor*, quam ipse Nilum *μεγάλον* dicit *ποταμόν*, Prodigious errores, quos in Anthologia describenda commisit, aliquando videbis, ubi redierimus ego & *Langermannus*. Certe negligi a te non debet praeclarum ejus furtum, quo Scholiastem Palatinum ovi Simmiae miserrime Cyclopeo more devoravit totum, inque succum & sanguinem convertit. Dissimula tamen, quaeso, *Langermannum* de Anthologia cogitare, ne & ejus fortunis infidietur. Quicquid enim de nobis fiet, e re nostra erit, aliquem in aulam illam irrepere, quo familiariter possimus uti. De historiae Augustae scriptoribus nihil promitto. Scias tamen velim, si res id meae ferrent ullo modo, me Mediolanum excursurum. A patre *Sfrondato* litteras habui, sed *Stephani* non meminit. Quare dubito an is nobis expectandus. Supplicavi tamen quantum potui. Ego totus sum in *Ovidio*. Si mensem adhuc unum hic morari mihi continget, ut vix dubito, codices auctoris illius Mediceos omnes absolvam. Sunt quidem recentioris plerique notae, qui tamen antiquis interdum nihil cedent. Diversas lectiones Manilii Veneti a *Gronovio* jam habes. Alterum ejus exemplar veterrimum Urbini exstare monuit *Holstenius*. Vellem *Langermannus* eo excurreret, sed & is jam magnas expensas fecit, nec scio an restituendae illi a Domina sint unquam. Haecenus certe scire non possum, an ejus obsequia sint accepta in aula. Manilium misit; ego quoque *Mediolani* emtum possideo, si recte memini. Haeret is codex cum reliquis Venetiis, sed recens est. De *Altempfiana* bibliotheca negotium commendavi *Langermanno*. Nam *Nogherae* res sunt eodem loco. Quod Stathmos illos integros ibi credis exstare, fugit te ratio, aut si exstant, jam eos descripserit *Holstenius*. Vendidit Ducis hujus pater *Paulo* quadraginta circiter codices ex melioribus, qui in Vaticanam sunt translati, eos tamen describendos ante curarunt. Latina exemplaria Msta e-

jus

jus bibliothecae sunt notae recentioris pleraque, quae mihi videre contigit: multi enim capsis erant inclusi, ad quos aditus non patuit. Nihil est incitius stolidiusve Duce. Topographia ista Christiana cum immensum sit volumen, describi non sine magna molestia poterit. Patet enim per horas tantum res matutinas Medicea, & adest tum semper aliquis Canonicus. Si praestitisset promissas commendationes ad magnum Ducem Domina, nihil occlusum foret. Petii quidem eas non semel, sed frustra. Longe me felicior fuit *Citharoedus ille Italus*, ex infima plebe ortus hic in Hetruria, qui magno cum splendore huc venit, & regias literas magno Duci obtulit. Contemptim tamen est habitus, quod hominem novisset. Sed hoc inter nos. nam & citharoedus mihi amicus est, & caetera virum bonum existimo. Solini exemplar vetustissimum extare hic apud Franciscanos monuit *Langermannus*, ego bibliothecam illam necdum vidi; in Leideniensi esse codices tresve quatuorve bonos memini. In porphyrium contra Christianos animus erat inquirere, sed praevenit me iussus a regina idem Citharoedus, qui cum palam heri jactaret, cum codicem a Regina desiderari summopere, tu jam intelligis, quid sit sperandum. Plinii & Tertuliani codices antiquos haecenus vidi nullos. De nave nostris erepta in Liguriensi portu scripsi proxime. Indignissime id factum fert magnus Dux. Architalafus Anglicus jam ab illo in carcerem conjectus, navibus etiam mercibusque anglicis, quae 8. millionibus aureorum aestimantur, manus iniecit. Quid porro futurum sit exspectamus. Navis ipsa nostris erepta in Ilvam insulam deducta est ab Anglis, cum elabi posse se desperarent. Illam quoque magnus dux sui fecit juris, & Hollandis, ut opinor, restituet. Vale, mi Vossi. Salutant *Datus* & *Cavalcantes*. Anni novi exordia tibi tuisque secunda voveo. Florentiae CIOIOCLII. XVII. Dec. Ignosce festinationi.

EPISTOLA LXXX.

ISAAC VOSSIUS

Nic. Heinsio.

Venetias.

Redditas mihi literas, quas per *Goesium* curaras, satis ex postremis meis potuisti conjicere, mi Heinsi, licet nesciam, an earum in meis meminerim. Faciam vero id quod cupis, & ad *Colonium* omnes meas impofterum transmittam. Huic etiam misi, quas ad te postremo exaravi. Spero securiorem fore illam occasionem, quam qua haecenus usi sumus, si enim unquam, certe nunc quam maxime desidero, ne nobis damnosa sit libertas nostra. De literis Dominae quod scribit *Holmius*, in eo solitum facit. Placet, nisi fallor, hoc artificium ipsi etiam Reginae. Ubi Hamburgum veneris, ex ipso *Finclero* contrarium intelliges, si tamen tale nomen existet in rerum natura. De nummis ex Suedia verissima sunt quae scribis: frustra hoc tempore aliquid inde ex-

spectes. Late apud eos regnat paupertas, solisque affluunt mendicis. Nec mihi ex ea terra aliquid haecenus venit. Praeter biennii proventum etiam alia debentur. Mille & quingenti scutati, quos in gratiam Salmasii se mihi reddituram esse promiserat Regina, ne illi quidem comparent. Studiosus quidam, quem illic reliqueram, ut res meas curaret, is nihil obtinuit, & re infecta domum revertitur. Quamvis autem molesta sit sex septemve scutatorum millium jactura, longe tamen molestior est librorum jactura, quos omnes, ut nosti, una cum scriptis, penes se servat Regina, nec tamen utitur, cum jam dudum poene omnem literarum affectum exuerit. Benigne mecum agi existimarem, si vel illi soli redderentur. Significavi jam proximis meis petiturum me quamprimum dimissionem, ut si huic nostri memoria exciderit, mihi saltem liceat fortunis meis prospicere. *Bochartum* quod saepe literis tuis compelles, gaudeo. Valet ille multum gratia, illo tamen, ut scis, longe gratiofior est *Jatralliptes*. Per hunc omnia nunc in Suedia & aguntur & moventur. Praesidet ille noviter erectae in aula Academiae, ut vocant, & assessores habet *Naudaeum* & *Frenium*. Cum primo tamen minus ei nunc bene convenit, quod cum ipse a jocis & salibus liberioribus abstinere non possit, alter ea non possit concoquere. Huic Academiae interesset etiam cogitur *Bochartus*, ita volente Regina, subtristis tamen, & ab ineptiis, quae illic pertractantur longe, ut nosti, alienus. Nuper examinata fuere in hoc reverendo confessu Poëmata *Mori* in Reginam, verum ea futilitatis & inscitiae fuere damnata: cumque *Bochartus* & *Naudaeus* causam absentis tuerentur, exemplo Virgilii & Horatii, interlocutus est D. Praeses, affirmando, sibi plura quam trecenta vitia in illis autoribus esse annotata, ideoque parum tutam esse defensionem *Mori*, si talibus niteretur autoribus. Tecum tamen rem habere non cupit Scurra iste, ut cum ex aliorum, tum praecipue *Beuningii* literis intelligo, is siquidem haec postremis ad me literis. D. Heinsius ad Bourdelotium, qui eum ad deprecandam Salmasii iram hortatus fuerat, scripsit magni ingenii atque animi literas, & non modo Salmasium valde depexuit, sed ipsi Bourdelotio deforme suum in patronum obsequium, in te injurias & alias malas artes libere exprobravit. Commovisse ea res dicitur virum, sed cum eodem stylo respondere non possit, neque in ea contentione victoriam sperare audeat, statuit tacere, & injuriae sensum silentio premere. Secretarius ille Reginae, qui Venetias adpulit, vocatur *Lagé*. Mihi commendatus fuerat a *Valesio*, *Thevenoto*, & aliis. Cum primum in Suediam venisset, valde in flagranti gratia fuit apud R. Sed ea spatio trium quatuorve mensium tota defecit. Enormia crimina commisisse eum non existimo. Verum est illum vomuisse aliquando ad mensam Comitis de la Guardie. Debet is mihi octoginta vel nonaginta imperiales. Monebo eum sequenti hebdomade, ut eos tibi annumeret, me enim illos tibi debere. Sed, nisi fallor, aliquam inveniet excusationem. *Morus* Anglicanam in jus vocavit, mendacii convincere studet. Soluta est fere inter illum & *Salmasium* amicitia. De novellis memor ero. Verum nunc nihil est ad manum, & non dubito, quin Amplissimus *Goesius*, qui reversus est in hanc urbem, id abunde sit facturus. In Angli-

gliam ad repetendas naves Suedicas denuo missus est *Bonellus*, quem nosti. De meis rebus plura alias, nunc addam hoc tantum, valde me desiderare, si quae ad Martialem habeas, ea mihi communices. Mille locis me istum auctorem emendatorem daturum existimo. Vale, mi Heinsi, & *Datum* & alios amicos, si qui sint, salutes plurimum. Amstelodami. CIOIOCLII. XII. Decemb.

EPISTOLA LXXXI.

ISAAC VOSSIUS

Nic. Heinsio.

Venetias.

INDIGNOR tam raras meas ad tuas pervenire manus, cum tamen ab octo jam mensibus singulis duabus ad te scripserim hebdomadibus, idque sedulo semper observarim, & non nisi bis aut ad summum ter scriptionem in tertiam distulerim hebdomadem. Sed metuo ne maxima pars earum literarum, quas Mantuam ad *Ebertum* miseram, perierit. Spera meliorem fore fortunam illarum, quas Venetias ad *Abrahamum Colonium* & jam misi, & imposterum sum missurus. De libris MSS. *Salviati* ducis & S. Marci quod scribis, doleret, si nobis in Suedia porro vivere contigisset, & Serenissimae Reginae idem fuisset erga literas amor. Sed jam dudum ex illa aula Musae ejectae sunt, admissis illic Mimis, musicis, circulatoribus aliisque id genus scurris. Literae non nisi pro praetextu serviunt. Itaque nec *Bochartus* diutius illic haerebit, ut opinor. Scribit is, se primam captaturum occasionem, qua huc redeat. Mirum ni jam ab illo aliquot acceperis epistolas. In postremis suis ita ad me scribit. *Il est vray aussi, que ce n'est pas icy un petit peché, que de vous avoir pour ami, & M. Heins. & encore plus vray, que c'est un peché, du quel bien loin de me repentir, je me y engageray toute ma vie de plus en plus, sachant ce que vous valez tous deux, & que par mi tous ceux, qui vous cognoissent, ce me sera tousjours de l'honneur d'avoir part a vostre affection.* Promissa ipsi fuerant cubicula in ipsa aula, sed adhuc commoratur in caupona, nescio qua. E contrario *Naudaeus*, *Fresnius*, alique *Bourdelotii* ministri jam in ipsa habitant aula. Ipse vero *Bourdelotius* ne ipso quidem Jove sese minorem existimat. Solus omnia istic terrarum potest. Mensam habet instructiorem, quam habeat comes *Magnus*, vel alias quisquam magnatum in hoc regno. Is vero Comes longe minori est in gratia, quam nunc sit *ιατεργλείπης* iste. Forſan ideo tabescit, nam etiamnum decumbit, ut ajunt, & forſan semper decumbet opera proto-medici istius, cujus in re est, ne unquam convalescat. Bonus iste vir non tam clanculum, quin facile omnes animadvertant, docet & profitetur illic atheismum: ait enim nullos esse deos, coelum inane, & mera esse verba virtutem, ut lucum ligna. Haec sunt ejus mysteria, quibus initiatos esse oportet, qui ullam illic captare cupiunt gratiam. *Beuningium* quod adtinet, is non tanta illic est in gratia, quin longe acceptior sit Hispanicus legatus. Cum proxime conaretur

Re-

Reginam flectere, ut foedus nobiscum iniret contra istos parricidas, & nunc latrones, moneretque illos ne ab ejus quidem navibus avaras abstinere manus, jamque duas vel tres naves Suedicas auro onustas diripuisset, illa respondit, longe sese prudentiorem fore, quam ut parieti ruinam minanti adniteretur. Si Angli aliquot suas naves auro onustas coepissent, sese alias totidem illis missuram. De *Trompii* successu in his maribus intellixisse te jam existimo. Mutabit hoc proculdubio multorum animos. Egregie sane ultus est filium, atque utinam caetera similiter succedant. Viginti siquidem navibus quadraginta sex adversariorum in fugam egit, captis octo vel novem. Verum de his accuratius adfinis tuus, ut arbitror. Musici, de quibus scribebas, numero septemdecim jam in Suediam adpulerunt. Constitutum est singulis salarium annuum trium millium florenorum. Exceptis nonnullis, qui duplum istius summae merebuntur. Magna sane res fuerit, si vel semel persolvantur. Interim istud hominum genus vides in quanto sit pretio. *Naudaeus* jam illic Bibliothecae habet curam. Subbibliothecarii munere fungitur *Meibomius*. Debet & is mihi aliquam pecuniae summam. Sed manum injiciam ejus Bibliothecae, quam hîc reliquit, nisi quamprimum solvat. Mirum quanta superbia istum homuncionem subito invaserit editione istorum Musicorum, in quibus tamen nihil praeter paedagogicam navavit operam. Inscrispsit eas Reginae nostrae. *Morus* in jus vocavit *Salmasium* cum tota sua domo. Exitum litis ubi cognovero significabo. *Salmasio* ego vitam diuturnam precor, ut cognoscat se non frustra me laesisse. Attamen consultius fuerit forsan prodromum majoris operis nunc in lucem dare. Verum de his proxima ad te scribam occasione. Addidi his literis epistolum, quod si videris rogo ut tradas *Lageo*, qui mihi nonaginta debet imperiales. Scribo me istam summulam tibi debere, & rogare propterea, ut istam tibi persolvat. Vale & me ama. Ineunte anno CIOIOCLIII. quem tibi felicem opto. Raptim.

EPISTOLA LXXXII.

ISAAC. VOSSIUS

*Nic. Heinsio.**Venetias.*

ANte duas hebdomades vix meas ad tabellarium miseram, cum mihi reddita^e sunt tuae, mi Heinsi. Inclusae illis erant aliae ad *Gronovium*, quas statim perferendas curavi. Rescripsit vero is, sese per affinem tuum superiori hebdomade literas ad te misisse, denuoque te compellaturum sequenti hebdomade. Simulatque illas mihi, ut promittit, transmisit, curabo ut quamprimum habeas. Cum adfine tuo, viro optimo, noli quoquomodo contendere verbis. Siquid illi calidius nonnunquam excidat, debes hoc imputare naturae & temperamento ejus. Sedulo dabo operam, ut, si colloquendi ulla sese of-
fe-

ferat occasio de his rebus, cognoscat quantum tibi sit injurius. Ante tres hebdomades convivio ab illo fui exceptus. Interea temporis eum non vidi. Leidae enim haesit, nisi fallor, aut Hagae. Hodie aut cras illum accedam, cavebo tamen diligenter ea quae mones. De *Holmio* nescio quid sim dicturus. Mavult, ut videtur, esse asellus clitellarius Protomedici, quam noster amicus. Artificia ejus, quae narras, sunt quidem sinistra, non tamen subtilia admodum. De *Alastore* non nimium debes esse sollicitus. Quod ille jactet tot te scutatorum millia dilapidasse, non video quare hoc injuriosum tibi esse existimes. Apud Reginam id potius tuum commendat negotium. Quod autem dubitare videris, utrum aliquid in lucem daturus sim contra illustre illud Grammaticorum ἀλφα, brevi faxo ne dubites. Nimis longum esset omnia ejus opera examinare, saltem aliquot folia operis Soliniani percurram, & ostendam aliquos errores ineptissimos, offeramque vel centenos scutatos illi, qui aliquam in toto hoc opere paginam possit ostendere, in quo non sit turpis aliquis error. Caetera ejus opera strenue contemnam, & praesertim, illa omnia, quae in *Hollandia* scripsit, ut quae mera sint ὑπνωτικά φάρμακα. De ovo *Simmiae* & alis mentionem facerem, si ad manum esset Scholiastes ille ¹ *Pediafinus*, ut puto. Sed, ut nosti, omnia mea scripta & libri sunt in *Suedia*. Foedi tamen aliquot errores etiam in hoc opusculo occurrunt. Quam ineptum est id, quod in limine statim occurrit, cum eundem esse putat *Herodem* magnum Regem, & *Herodem* Tetrarcham. Verum & illud, quam ineptum, quod *Coon* & *Ceam* eandem esse putet insulam, & *Simonidem* semper *Coum* vocet? Multum me tamen obstringet clariss. *Langermannus* noster, si transmiserit scholium illud *Pediafini*. Omnia quae ego vel hîc, vel in *Suedia* habeam, vicissim illi offero. Velim quoque posse impetrare ab *Holstenio* pauculas illas correctiones in inscriptionem *Herodis*, quas ille ex collatione ipsius lapidis observavit. Tibi vel *Langermanno*, ut opinor, hoc non negabit. Gratias illi pro communicatione faciam publice. Fugiam enim quantum possim, ne dum alium reprehendo; ipse quoque errorem committam. Verum & alterum est, de quo ut me certiore facias quamprimum obnixè rogo. Nempe ut significes, quale munus a *Venetis* pro inscriptione operis Soliniani acceperit *Salmasius*. Verum quia opus nostrum nimis sit futurum prolixum, & interea *Heros* iste grammaticus aliquid possit humanitus pati, prodromum dabo intra mensem, vel sex ad summum hebdomades, ne porro gloriari pergat, neminem nostrum se vivo aliquid audere. Rogo itaque ut simulac possis de hoc me certiore facias. Saepius oblitus sum tibi significare exstare ² *Eutecni* sophistae Scholia in *Nicandrum* in Bi-

bli-

¹ Exstat ille in Bibliotheca Leidensi, in Vossiano codice pag. 39. qui in Catalogo est MS. Graecor in Octavo n. 8. pag. 399. in quo & multa epigrammata Graeca inedita habentur.

² *Eutecni* Sophistae paraphrasis Prosaica in Oppiani Ixeutica edidit ex MSS. & Latine vertit *Erasmus Pauli F. Windingius* Hafniae 1702. duobus se auctor MSS. exemplaribus usum scribit, quorum unum *Avi sui Erasmi Windingii*, alterum *Bartholi Bartholini* manu erat descriptum ex Vaticana Bibliotheca, cui & additae erant emendationes, quas *Lucas Holstenius* margini adscri-

bibliotheca Florentina, ea sane merentur, ut describantur. De *Bocharto* nescio quid futurum sit. Solus illic potest omnia scurra iste, quem nosti. Autor est *Bochartus* ut missionem petam a Regina, & simul veniam ad breve tempus illic commorandi, quo possim res & libros meos colligere. Nescio quid facere debeam. Vellem hîc esses. De *Priceo* gaudeo quod scribis. Valde istum virum amo. Sed metuo ne eum nostra offenderit negligentia. Avunculus *Ju-
nius* ante diem unum & alterum Heidelbergam contendit, non nisi post duos vel tres menses rediturus, vel etiam serius. Jussit ille ut plurimam illi per te adscriberem salutem, idem & meo nomine facias rogo. Nunc Hagam propero. Prolixius ad te sequenti scribam occasione. Valde enim multa habeo, de quibus tecum velim agere. Sed tempus effluxit, & ego sum occupatissimus. Vale & me amare pergas XVI. Januarii MDCLIII.

scripserat. Habeo hanc paraphrasin mihi Hafnia transmissam a doctissimo, & dum in Belgio versaretur, amicissimo mihi viro. *Matthia Ancherfen*, cujus benignitatem gratus agnosco. Ex adductis post praefationem ex *Lambecii* Biblioth. Caesar. Tom. II. contin. p. 544. & literis Illustris *F. Rostgaurdi*, discere lector potest, quibus in Bibliothecis alia *Entecni* in Oppiani reliqua poemata & Nicandri reperiantur.

EPISTOLA LXXXIII.

ISAAC VOSSIUS

Nic. Heinsio.

Venetias.

CONstitueram tibi apographum mittere literarum *Bocharti* nostri ad me, quae mihi ante biduum fuere redditae, sed adeo nunc diversis obruor negotiis, literis praesertim in Suediam ad Reginam & alios scribendis, ut nullum omnino tempus iis describendis supersit. Sunt enim prolixissimae, & alteri istud officium non libens commiserim. cognosces forsan, & agnosces iis lectis, nec nos esse tam viles atque existimas Serenissimae Reginae, nec *Alastorem*, ut nominas, tam acceptum. Et profecto aut ego fallor, aut in nostra situm est potestate, ut ille aliquando sit exosissimus. Forsan & Protomedicorum non erit aeternum imperium. Fatuis istis cibis & sermonibus circulatoriis brevi, ut opinor, satiabitur optima nostra Princeps. *Bochartus* causam nostram apud illam egregie sane egit, frendente licet altero, multisque offensas a te acceptas exaggerante. Verum haec fusius ipsae significabunt literae, quas sequenti habebis hebdomade. *Salmasius* totus est in responso ad *Miltonum*. Coeptus est jam excudi ejus liber, qui mole non erit minor priori. *Miltonum* passim Catamitum vocat, aitque eum in Italia vilissimum fuisse scortum, & paucis nummis nates prostituisse. Examinat quoque passim carmina ejus Latina. Diffidium vero, quod exercet cum *Moro*, indies crescit, praesertim postquam in jus vocavit Anglicam. Infensus quoque est alio nomine, nempe quod

quod *Morus* ipsum cornigerum vocarit. *Morus* autem valde nunc ambire videtur nostram amicitiam. Ante biduum Hagae prandio eum excepi: multa tum mihi perquam sane lepida, & de illo, & de Xantippe, narravit. Valde is desiderat, ut & tu quoque Scazonte tuo illum invadas. Sed de *Alastoris* titulo vide quid faciendum sit, valde enim hoc gloriatur, quoniam & Juppiter aliquis ita olim dictus est. Respondi *Moro*, si & ipse Juppiter aliquis dici & haberi velit, posse eum facile impetrare ut Juppiter Ammon vocetur. Ab aliquo tempore imperium in suam Xantippen coepit exercere, sed quomodo illa novam istam ulurpationem sit latura, multi avide admodum scire desiderant. *Hugenius* noster solet illam vocare la *chaudronniere*. Cogites an aliquid possis elegantius reperire. *Salmasium* jam incipere dubitare de gratia erga se Dominae, certis mihi constat experimentis. A tribus aut quatuor mensibus nullas ab ea accipit literas. Ipse in literis ad *Bochartum* & in sermonibus passim jactat, omnes Reges & principes non posse quietem & tranquillitatem suam turbare, nec posse se excidere gratia. Certus sum, si, quod veretur, contingat, scripturum illum in *Reginam*. Lepidum vero illud, quod de tranquillitate sua jactat, quem etiam musca aliqua possit insanum & furiosum reddere. Vae illi, si haec intelligeret Tanaquil sua. Ut autem ad literas tuas veniam, ita habeas, me heri reducem Haga duas hîc invenisse. Priores scriptae sunt pridie Kal. Januarias, alterae una hebdomade ferius. Epistolium ad sororem tuam statim curavi. In literis posthac mittendis sequar, quod dedisti, consilium. De *Plinio* noli sollicitus esse; secum illum advehet *Bochartus*. Ante aliquot hebdomades miseram epistolium ad *Lageium* olim *Reginae* a Secretis, debet is mihi nonaginta imperiales. Si illos tibi reddiderit, utere tanquam tuis. Sed profecto puto & illius sacculos esse plenos araneorum. De rebus porro novis melius aliunde, quam ex me intelliges. Interim vides parietem nostrum non esse tam vicinum ruinae, quam existimabat optima Princeps. Incipit jam & illa de foedere nobiscum ineundo cogitare. Vale, & me ama. xxxi. Januarii ciciocliii.

EPISTOLA LXXXIV.

ISAAC VOSSIUS.

Nic. Heinsio.

Florentiam.

Quod jam priori hebdomade promiseram, id nunc demum praesto. nempe ut mittam apographum eorum verborum ex epistola *Bocharti*, quae nos utrosque attinent. Sunt igitur haec; *En ce jour qui est icy le premier de l'an, apres tant de lettres facheuses, je vous en donneray pour estreine une, qui ne vous deplaira pas. il y a quatre ou cinq jours, qu'estant au cabinet de sa Majeste, je luy parlay d'une longue lettre, & de quelque vers, que Mr. Heins m'avoit envoye de Florence, & de la ayant pris sujet de fort louer ses vers & sa prose; j'adjoustay que*

Mmm 2

S.

S. M. pouvoit dire, quelle avoit eu les deux hommes du monde, qui escrivent le mieux en Latin, a sçavoir *Mr. Heins & Vossius*. Comment, dit elle, je les ay eu? Pourquoi parles vous ainsi, ne les ay je plus? ne sont ils pas encore a moy? Ouy bien, luy dy je, *Mad.* Mais j'entendois que vous les aviez eu pour ornement en vostre cour, ou ils ne sont plus, & d'ou ils sont a present si fort éloignez, cela, dit elle, ne durera pas tousjours, & *M. de Saumaise* me permettra bien, s'il luy plaist, de les garder: je les ay eu, & les auray tant que vivray. il est vray que *Mr. Heins* n'a pas eu raison d'offenser *B.* dans les longues lettres, qu'il luy a escrites, & que voudrois pour l'amour de luy, qu'il ne peust pas faiet. Je luy dis *Mad.* ce n'est pas a *M. B.* qu'il en a, mais a un autre pour une vieille querelle, qu'il n'a pas commencè. Sur cela le *S. B.* qui estoit present, exaggera fort les sujets des plaintes qu'il pretendoit avoir de ces lettres, ce qui n'empêcha pas, que la Reyne ne retournast aux louanges des deux, que j'avois nommes. &c. Post multa deinceps *B.* voluisse suscipere, inquit, defensionem *Salmasii* contra me, *Reginam* silentium illi imposuisse, par une repartie fort verte, qu'il n'osa depuis dire aucun mot. Et quelque autre de nouveaux venus ayant dit avoir appris a *Leide*, que la source du mal venoit de ce, que vous aviez declamè devant sa Majestè contre *Xantippe*; Sa Mte vous justifia, disant que vous n'estiez point homme porté a la mesdisance, ne que luy eussies jamais faiet de mauvais contes de quique ce soit. Mais je vous diray, dit elle, qui c'est, qui a descriè *Xantippe*, & luy a rendu prez de moy de tres mauvais offices: & comme nous attendions le nom du delateur, elle adjousta en riant, c'est elle mesme. Deux jours apres a la face de toute la cour en plein firquant, qu'on appelle icy, Sa Mte retomba encor sur vos louanges, & de *Mr. Heins*, & se plaignit de ce que vous ne luy escriviez plus. &c. Verum nimis longa est epistola, & procul dubio ipse de his ad te *Bochartus*. Caeterum haec sufficiunt, ut arbitror, ut cognoscas quo in praedicamento sint res nostrae in *Suedia*. Ipse autem *Bochartus* nescit unde ea mutatio facta sit, nisi forsan *Serenissima Regina* paulatim magis magisque fatigetur cibis istis insipidis, & ut ipse loquitur, cavis ferculis. Hoc est, ut ego interpretor, sermonibus & gesticulationibus circulatoriis. Attamen aliae literae, quas ante biduum ex *Suedia* habui, longe contrarium affirmant, in quibus est *Bourdelotium* etiamnum regnare, & quidem solum, & *Serenissimam Reginam* credere vitam & salutem suam hujus artibus & consiliis inniti. Nemini patere praeterea aditum, nisi hoc admissionali, ut vocant. Imo neque videre, nec ab aliis videri, nisi per illum. Iste autem *Bourdelotius* nuper promovit ad Centurionatum cohortis praetoriae longurionem istum Gallum, quem nosti, nomine *Monceau*, ut puto, altero illo, quem & ipsum nosti, *Echovio* ejecto. Comes *Magnus* nescio qua melancholia in quartanam incidit. Is multis offensus, quae istic contigerint, dimissionem petiit a *Regina*. Sed illa, ut creditur, eum placavit munere magni *Thesaurarii*. Frater ejus *Jacobus* duxit *Ebbam Spar*, quam nosti, alter junior *Pontus* nomine hac transiit ante mensem, peracto itinere, & ipse ducturus *Coningsmarcii* filiam. Celebratum est nuper convivium deorum in *Suedia*, ubi *Uleveldius* Jovem egit, Procancellarius *Poloniae* Bacchum, *Hispaniae* legatus Martem, Comes *Magnus* Apollinem. Valde omnia magnifica & sumtuosa fuisse inquirunt. Admodum

dum hoc probant hîc terrarum, minus vero priores illos rumores de Danis bello inferendo a Suedis, quos tamen hoc tempore non tam pertimescendos esse arbitrantur. Quoniam vero statim Poloni feci mentionem, operae pretium est, ut dicam, quis is sit. Confugit in Suediam procancellarius Poloniae ob odium sui regis, justum nec ne, id sane nescio. Is simulatque venit, a Regina benignissime est exceptus, admittitur indies ad secretius colloquium, tantum non in coelum laudibus fertur, nihil jam illo viro majus, nemo huic prudentia aut sapientia comparandus est. Et tamen, qui bene hominem norunt, ajunt illum pene stultum esse. In tali aula quid nobis est sperandum! Sed de his coram. *Salmasium* non esse nobis valde pertimescendum omnino mihi persuasi. Regina etiam in praesentia multorum valde illum contempsit. *Morus* & *Salmasii* domina publice hîc de Helena altercantur in foro. Necdum exitum rei cognovi. Omnia undique testimonia conquirit *Saumarius*, ut *Morum* impudicum & scortatorem esse ostendat. Dicitur habere testimonium unius alteriusve ancillae, quibus vim inferre *Morus* voluerit. Quid non dares, ut praesens in curia tam lepidae posses interesse disputationi, & coram audire tam bellam Musicam, quam duo ista tintinnabula, ubi committuntur, efficiunt. De Anglis non puto multum te esse sollicitum. Procul dubio ex fratre, cum jam dudum huc sit reversus, certiora intelliges. Hortabor illum, ut diligentius posthac ad te scribat. In Anglia omnia novis turbis impleri videntur, si vera sunt, quae hîc nuntiantur. Illud sane constat, illos caudam remulcere & utero subjicere. De itinere tuo nihil in postremis scribis. Velim ut in tempore me moneas, ne te frustra meae inquirant literae. Partum felicem sororis tuae jam cognovisti. *Maestertius* Lugduni est Magnificus. De *Vorstio* multa tibi lepida narabo, sed coram. Vale, mi Heinse, & salve. Amstelodami, CIOIOCLIII. XIV. Febr.

EPISTOLA LXXXV.

ISAAC VOSSIUS

Nic. Heinsio.

Venetias.

JAm te apud Venetos versari existimo. Quamvis enim tempus profectionis non addideris, attamen & ex illis & ex prioribus tuis satis colligere potui, non te diutius Florentiae moraturum, peracto eo, de quo scribis, negotio. Utinam tamen contuleris ante discessum exemplar illud Historiae Augustae, quod in conventu quodam exstare dicis. Licet id recentissimum sit, ut ais, erit tamen non minus bonum, quam illud, quo usus est *Saumarius* heros, neque enim illud magni videtur fuisse momenti, aut saltem pessime eo est usus. Quod si non integrum, partem saltem, ut opinor, contuleris. De literis meis quod scribis, nullas ad tuas pervenisse manus, valde miror. Sancte tibi

Mmm 3

adfir-

adfirmo, me a multis mensibus nunquam, nisi semel, in tertiam hebdomadem distulisse scriptionem. De Stephano quod promittit *Sfondratus*, utinam praeestet. De metu calculi quod scribis valde me male habet. Cave tamen putes me hoc mirari, imo miror ullum esse malum, quod te non invaserit, imo miror te vivere. Quî enim bene valere possis, cum totos dies in sella sedeas tripede, pronus uni alicui imminens libro? Ego certe, si ita viverem, intra triiduum apud inferos epularer. Gaudeo vero, quod nullam hujus tormenti insequentibus tuis literis, quae mihi superiore hebdomade redditae fuere, facias mentionem. De MStis quod scribis, non possim dicere quantae mihi haeres sit indignationi. Quam vellem ut sumtus illi, qui scurris & histrionibus fuerent impensi, tuis fuissent destinati usibus. Attamen si libri isti sine nobis in extremum deportati fuissent septentrionem, jam animum muto, ac malim ut illic, ubi sunt, porro habitent, ac saltem inter homines maneant. Quod scribis, *Bochartum* nullas ad te dedisse literas, id valde mihi suspectum est. Quale id sit, quod suspicer, tu optime nosti, qui scis, ut puto, quam nobis *Bochartus* bene velit. Novi quod tibi significem non multum habeo. Legati nostri ad comitia Lubecensia missi, *Wittius* nempe & van *Wavere*, domum quamprimum revertentur, uti quoque *Chanutus*. Omnes ibi operam luserunt. Novum bellum Germania desiderare videtur. Regina quoque undique copias contrahit. Negotia nostra cum Anglis satis videntur esse tuto in loco, praesertim si classis nostra salva domum revertatur. Videtur plus nobis esse periculi a tempestatibus hybernis, quam ab inimicis. Valde Anglos fefellit concordia nostra, & praeterea foedus cum Rege Daniae. Quantum enim & in hoc postremo sit momenti, vel inde possis colligere, quod nullas posthac classes fabricare aut in mare educere possint, nisi prius fretum illud vi aperiant. Verum nunquam significasti, quidnam Itali de hoc nostro bello sentiant. Atque haec quidem haecenus. Priori hebdomade literas *Bocharti* communicavi affini tuo, itaque jam, ut opinor, ex illo intellexeris, nempe illum scribere, *Bidatio* tandem jussu esse, ut pecunias tibi annumeraret. Sed profecto, priusquam ex te ipso intelligam, non credam. *Bochartum* ipsum quod adtinet, is Phalegi sui specimen dedit in Academia illa nova, quamque ipsa etiam Regina frequentat nonnunquam, illamque ajunt valde in admirationem sui rapuisse. Istam Academiam frequentat quoque *Beuningius* noster, qui valde nobis favet. Utinam in Suediam venias, illo etiamnum illic commorante, certus sum non parum tibi profuturam illius amicitiam; longe enim alio nunc loco est apud Serenissimam Reginam, quam antea. Valde autem contemnit *Saumarium*, adeo ut eum vocet omnium fatuorum doctissimum. Scias praeterea dissidere jam inter sese *Bourdelotium* & hunc nostrum, de quo loquimur, heroa, atque brevi in apertas inimicitias esse eruptura eorum odia. Praeterea Reginam permittere, ut contra *Salmasium* scribam. Sed haec raptim, & tibi soli. Vale, mi Heinse, & me, ut facis, ama. Amstelod. CIOICCLIII. XXVIII. Febr. st. N.

EPISTOLA LXXXVI.

NIC. HEINSIUS

*Isaac. Vossio.**Venetias.*

Vide quam dissimilis mei factus sim, Vossi amicissime, qui unas, duas tribus solebam remunerare, nunc tribus tuis responsum debeo. Earum primae in Hetruria sunt mihi redditae, cum jam essem in eo totus, ut Florentia Venetias contenderem convasatis sarcinis. Secundae mihi post perreptas Apennini rupes Bononiae occurrerunt. Tertias hodierno die accepi hinc a *Colonio*. Haec verbosius, ut agnoscas mea culpa non evenisse, quod praeter solitum cunctatus sim, ac protraxerim aliquamdiu responsionem. Et si enim & plurimas amicorum epistolas in hanc civitatem consecutus sim adveniens, & ex itinere molesto valde langueam, noctibus sine somno tribus in via exactis, nihil tamen prius habui, quam confabulationem tecum instituere, cum quo garrio libentissime. Inprimis autem curae mihi erit, ut tuis ordine respondeam. Deinde si quid ex hisce oris habuero nunciandum, id omne proferam in medium, nec tibi invidebo. Res aulicas fluctuare, & nos cum illis, non tam miror, quam doleo. Narravi proxime accepisse me ab *Holmio*, quibus promittat non prospecturam tantum Dominam rebus meis, sed & jam scripturam mihi. Nunc alias ab eodem nactus sum, quibus denuo testetur, datum *Bidalio* in mandatis, ut viaticum mihi curet annumerari; desiderari valde ab Augusta meum in aulam reditum, quem eo fore gratiorem, si *Langermannum* mecum duxero. Apographum litterarum, si per temporis licebit angustias, in calcem hujus epistolae conjiciam. De *Bidalio* quid sit futurum nescio. Post dies certe paucos compareat, si quid ab illo expectandum. Ego illum litteris urgere non desino, quae si aliquid efficiant, ne successum rei ignores opera a me dabitur. Pro Gronovianis multum me debere tibi agnosco. Alias ejus, quas ad *Goesium* videtur misisse, nullas vidi hactenus. Nec miror frequentius perire litteras, cum noster ille domo absit plerumque, quapropter fieri a te velim, quod non semel jam rogavi, ut apud Daventriensem tabellarium investigari cures, si quid illic forsan inscriptarum mihi literarum haereat. Ego totis sex mensibus vix unam a *Goesio* habui, aut a Patre epistolam. Pater tamen per valetudinem aut senectutem cogitur officio deesse. *Goesium* quid excusare possit non video. Sororem ne gravidam quidem scivi, tantum abest, ut scierim peperisse. Utrumque nunc primum ex te intelligo. Haec cum me lateant, quid de rebus Anglicis scire possim hinc licet conjecturam facere. Leidae etiam quid fiat cum ignarissimis scio. *Scotannum* obiisse, *Mestertium* rectoratu fungi academico ex popularibus hodie meis contubernalibusque nonnullis didici, quorum ingens numerus in hanc civitatem ad bacchanale spectaculum confluit. Idem

nar-

narrant, sex demum naves Anglicas a nostris interceptas, quae ex Lusitania in patriam contendebant, Londini omnia turbari, *Cromwelli* auctoritatem nutare: de pace inter nos & illos facienda spem affulgere magnam, praesertim cum Arbitram liti componendae sese offerat Augusta nostra. Scriptum, quod minaris in *Alastorem*, brevi videamus velim. Florentini omnes favent vapulanti plurimum, quibus est invisissimus, ut & Italis fere omnibus. Libellum tuum amplecti vehementer desiderant. Sed cum in ultimis duabus ejus non memineris, non tam cito ac pollicebaris videtur expectandus. Scazon meus luce nequaquam fraudabitur, ubi ad vos reversus ero. Nolo enim existimationem meam gravare pergat Protomedicus assiduis accusationibus, dum absum, praesens causam meam Principi clementissimae fatis superque sum probaturus: ipsius etiam Protomedici epistolam diligenter servo, ut Domina intelligat, ea inspecta, non defuisse mihi rationes, cur hominem nugacissimum verbis pupugerim acrioribus, qua enim, petulantiane dicam, an perfidia, ipso illo fere tempore, quo litteris omni cumulatissimis comitate Princeps optima de favore suo quaevis magna me jubebat sperare, ausum Protomedicum minarum plenam exarare epistolam, quae praefracte neget fore me in aulam admittendum unquam, nisi cum hoste redeam in gratiam? Id autem fieri alio modo non posse, nisi laudem publice ac privatim numen istud litterarum. At promisit semper Domina, quod tu non nescis, nunquam fore me compellendum ad amandum hominem, cujus odium aperte prae me tuli. Non frustra fuerit in me injurius Medicus ille gallica hieme frigidior. Tibi etiam cum volet nocuisse, tempus aliquando veniet. Sed de hac re melius aliquando coram differemus. Tu tuas interim litteras huc mitte ad *Colonium*: vix enim fiet, ut ante Kal. Apriles Italiam sis relicturus, cum & responsum a *Bidalio* sit acceptandum, & operienda sint magis opportuna itineri faciendo tempora. Est enim valetudo mea continuis lucubrationibus non modice adfecta. Etiam cum reliquero Italiam, ut tuae literae me deprehendant in Germania *Colonus* diligenter curabit. Nam & Basileae & Bernae, ubi Bongarsiana Bibliotheca est, & alibi morandum erit nonnihil. Majore tamen mense ut vobis adsim omni nisu conabor efficere. *Langermannum* Neapoli reducem expecto, ubi advenerit, ut Scholium in ovum Simmiae consequaris, & quae praeterea desideras, opera dabitur. Habet idem *Langermannus* quae *Holstenius* ad Herodianum marmor observavit, nec illa tibi invidebuntur. Quo munere a Venetis sit affectus *Alastor*, quis me docere possit praeter *Nicolaum Crassum* vix scio, cum plerique hujus urbis literati ad plures abierint. *Crassum* igitur de ea re conveniam diebus proximis. De *Euthymio* Medico satis memineram, sed frigida suffusa est istis curis, quod viderem tam negligenter ac contemptim agi ab aulicis, & tua me vestigia detererent. Promisit tamen mihi discedenti Princeps *Leopoldus*, nihil esse in Medicea, quod non libentissime sit communicaturus cum Augusta. Ego officio nequaquam defui. Vix enim Florentiam adveneram, cum indicem omnium librorum Dominae misi, qui inediti exstant in illa Bibliotheca, satis diligenter confectum, petique ne gravaretur monere, quosnam ex iis desideraret maxi-

maxime. Sed nec ad illas, nec ad alias, quibus de Numismatis & istis MSS. venalibus egi, quicquam responsi unquam comparuit. *Pricaeum* tuo & Avunculi tui nomine salutavi, quod officium gratum & acceptum valde habuit. *Samuelem Bochartum*, virum clariss. quidni parentis loco veneremur, qui innocentiam nostram contra nefarias Protomedicorum artes ac insidias tam fervide tueatur? Rarum certe in illo exemplum est, summa integritas cum summa eruditione conjuncta. Nullas ab eo accepi, quamdiu in septentrione haesit; fortassis intercipiuntur a Protomedico, cujus audacissimam inscitiam quae satyrae, quis Lucilius expiare satis digne possint? Sed de responso ad meas magni *Bocharti* minime sum sollicitus, dummodo sic ab illo, ut scribis, amari nos constet. Gratias illi agam pro adfectu proxime, nunc enim sum paulo occupatior. *Miltonum* mortuum credideram, sic certe nunciaras. Sed praestat in vivis illum esse, ut Sycophantae cum Sycophantis committantur. *Poëmata* ejus mihi ostendit *Holstenius*. Nihil illa ad elegantiam apologiae. In prosodiam peccavit frequenter. Magnus igitur *Salmasianae* crisi campus hîc apertus. Sed qua fronte alienos iste versus notabit, cujus musis nihil est cacatius? Quod ait adversarium nates *Ital*is vendidisse, mera est calumnia. Utinam ejus malae tam tutae fuissent a pugnis uxoriis, quam posticum *Miltoni* os a sicariis *Hetruscis*! Imo invisus est *Ital*is *Anglus* iste, inter quos multo vixit tempore, ob mores nimis severos, cum & de religione libenter disputaret, ac multa in Pontificem *Romanum* acerbe effutiret quavis occasione. De rixis inter *Morum* (cujus patrem fuisse gente *Scotum* audio) & nostrum sycophantam multum triumphabant *Angli*. Nobis etiam nocere lites istae nihil possunt. De *Alastoris* nomine noli sollicitus esse: ego unum ex equis *Plutoniis* respexi, qui sic appellatur. Nosti illa *Claudiani*: *Ditisque nota signatus Alastor*. Jovem *Alastorem*, sive *ultorem* a *Graecis* fuisse cultum satis constat. Sed quid ille ad hunc nostrum? An quia *Martem* illi peperit (*Getica qui nunc bacchatur in arcto*) delictum foeminini sexus *Juno*, idque sine mariti ope, Jovem se credi velit? Id si accedet, quid ni *Salmasiolus* quoque *Alexandrum* magnum se jubeat appellari, qui si *Hammonem* patrem non habeat, habet saltem vitricum. De ista foemina cum narrationes facetiae nunquam exauriri possint, quarum ingentem acervum cumulavi, unam tamen fabellam non prorsus illepidam, vix a me impetrare nunc possum, ut silentio finam involvi. Eam *Sueciae*, ubi res gesta est, debemus. Scis quam sordide sit avarum istud myrothecium *Gratiarum*. Convivas quidem excipit dapiliter, quia raro: sed sola obsonat parcissime, ut inter ejus prandia & aliorum jejunia nihil aut parum intersit. Deliciarum si quid forte gratis consecuta est obvia, ut solet, amicorum liberalitate, earum solo odore pascit Jovem suum, gustum sibi ac *Hebae* suae omnem vindicat. Emerat illa forte nonnullos pisciculos, cum recens in *Sueciam* advenisset, quibus appositis nescio quo fato evenit, ut unus illorum integer ac intactus prandio subductus sit. Hunc cum sibi destinasset famulus, ac oculo famelico avidissime involasset, dum patinam ex mensa tollit (ventrem enim habebat inanitate plenissimum, & morbo isti chronico valde fuerat obnoxius, ex quo in *Salma-*

fianam irrepererat culinam, quam tutissimum esuritionum asylum nuncupare possis) arrepta, inquam, patina dum gaudet miser, ecce carminis horrendi legem. Intonat voce stentorea Juno, ac pisciculum servari sibi in coenam jubet. Indignatus ille, ac herili parcimoniae offensus subducit se in angulum domus remotiorem clanculum, & patina commicta custodiendum ancillae pisciculum tradit. Magno sub noctem apparatu in coenam pisciculus prodit, novo jusculo conditus. Quid multis? dividunt inter se dapes Ambrosias Juno & Hebe Caledonia, divisisque vescuntur. Famulus ancillae rem jucundam narrat, ancilla Junoni. Nec mora, de natibus rei miserrimi comitia habentur; quo supplicii genere si delectari Junonem non nosti, nihil nosti profecto. Nunquam inter Italos tam praesenti periculo objectus fuit *Miltonus*, hoc mihi credas velim. Annum agebat decimum plus minus octavum puer iste, ut ex amicis Parisiensibus intellexi. Lutetiae enim haerebat, quo profugerat puer, cum & ego in illa civitate essem ante menses duodevicesimos. Sed eventum fabulae jam pridem exspectas. Demissa igitur ad talos pueri bracca, & levato magna religione sipario, quo sacra illa castis oculis non inspicienda solent involvi, virga nudatos clunes acriter fricare coepit, & mira constantia Rhamnusias Opis. Jam ad flagra illa venerea incalcescebat Attys noster mutoniatus, arrectaeque horrore comae cum voce ad ejulatum composita, & protenta non manu supplice, sed illa parte, qua viri sumus, utinam, inquit, hera, meae virgae tantum in te liceret, quantum tuae in me licet. Gallice miram hoc habet emphasin, *virgam Sancti Benedicti* vocant. Subrisit illa, & magnum pueri acumen mirabunda suspiciens saevire destitit. Sic servavit vapulantem non Apollo, sed Priapus. Et haec quidem haecenus: alia occasione plura, jam enim charta deficit. Parum abfuit, quin neglexerim te monere nactum me Bononiae Appiani Alexandrini Iberica & Hannibalica Msta. Iberica, si memini, edidit *Hoefschelius*. Hannibalica an lucem viderint non scio. In *Roberti* certe *Stephani* editione, quae ad manum est, frustra ea quaesivi. Si non prodierunt, magnum thesaurum consecutus sum. Vidi in eadem civitate apud *Ovidium Montalbanum* duos codices Graecos, quorum unus continet *Zonarae historiam*, alter *Libanii plurima*. Tertium etiam Latinum ante dc annos scriptum, in quo *Vegetius*, *Solinus*, *Macrobiani saturnalia*, *Vitruvius* & *Aethicus* iste nugator, haecenus ineditus. Volebat eos permutare mecum, si sibi emerem theatrum *Bauhini* botanicum. Tria sunt volumina, quem librum in hac urbe si invenero, illi mittam. Gallicam quam dixi, *Holmii* epistolam non vacat totam describere, partem ejus potissimam describam. *J'ay montré à sa Majesté mesme vos lettres, laquelle m'a témoigné grande affection pour votre personne, aussi bien que pour Monsr. Langerman; elle souhaite, que vous fussiez déjà ici, & est fort aise, que Monsr. Langerman vient avec vous. Il part avec l'extraordinaire un lettre pour Monsr. Bidala Paris, par laquelle sa Majesté a commandé de vous fournir de l'argent pour votre voyage tant que vous en auriez besoin &c.* Has jam descripseram, cum & Florentia magnam chirographiam accepi. Adfunt a patre, adfunt a *Goefio*, quibus uxoris partum imminere adfirmat. Gronovianas tamen nullas mittit. Parisiis *Peta-*

vium obiisse scribunt. *Langermannus* Romam rediit, multos Neapoli libros nactus bonae notae. Sed de his alibi. *Lagerius* hinc discessit, ut audio in Gallias, cum luculentam nactus sit haereditatem mortuo avunculo, quare literas illi tuas exhibere non potui. Apud *Ducem Salviatum* effeci, ut promiserit, se donaturum Reginae suos codices. Litteras ad Dominam, una cum Hetrusco carmine (pollet autem multum poësi) hîc exspecto. Cum salutarem illum, aderant comes *Ferdinandus del Mestro* & *Andreas Cavalcantes*, uterque mihi amicissimus. Frendebant tamen illi, codices praestantissimos Italiae fore subducendos, quantum ex commissis illorum capitibus musitationibusque colligebam. Ducis Oeconomo centum aureos promisi, qui negotium promovit. Si pecuniam habuisssem illam in promptu, poteram abstulisse libros, nunc vereor, ne meliores furripiantur, antequam mittat huc aliquem Regina, qui libros auferat. Vale, mi Vossi, cum tuis omnibus. Dabam Venetiis An. c1610 c1611. prid. Kal. Martias.

EPISTOLA LXXXVII.

ISAAC. VOSSIUS

Nic. Heinsio.

Venetias.

PRolixas tuas heri accepi, una cum inclusis ad Patrem, affinem & *Gronovium*. Omnes statim curavi perferendas. Nunc cogor Laconice tecum agere, quoniam quod scribam deest. Breviculas enim ex Suedia accepi hac hebdomade literas a *Bocharto*, quibus nihil aliud significabat, quam tradidisse se S. R. epistolam meam, verum nullum ab ea tulisse responsum. De proto-medico tamen aliquid addebat, nempe illum brevi illuc accessurum dignitatis, ut omnes, quotquot Suedia indigent, & illo quoque indigeant. Cave itaque hunc talem tantumque virum offendas. Quod existimas me non cogitare de scripto erga communem nostrum adversarium, falleris admodum. Crescit illud indies, & videbis, ut spero, bonam illius partem luce donatam, antequam reversus fueris. Sed a scommatibus plane abstineo; malo enim ut ab his ipse prius incipiat. Quod *Avvibani* Appiani te habere MS. inquires, nec ea reperiri in tuo codice, aliud oportet Appiani exemplar habeas, quam quo ego utor. Quod lapillos in renibus concoxeris valde gaudeo. Fabella de *virga S. Benedicti*, quam narras, valde est lepida. Dux *Tremolius*, alias princeps Tarenti, Hagam venit, is operam suam offert in reconciliando *Moro* cum *Salmasio*. Quod ad finis tuus rarius ab aliquo tempore ad te scripserit, mirari id non debes. Vides enim in longe potioribus laborasse eum, quam in scribendis literis. *Gronovius* Statium Papinium jam in lucem protrusit. editus est eadem forma & iisdem characteribus, quibus Ovidius tuus. *Gustum* (ita vocat notas suas) addidit in Statium. Inscripsit vero Reginae. De cambio spero aliquan-

quando vera dicturum *Holmium*. Valde reditum tuum exspecto. Sed & *Lan-germannum* spero hac transiturum, ostensurumque nobis, quantum in Italicis bibliothecis profecerit. Recte vos facturos arbitror, si omnia vestra scripta vobiscum feratis, nec marium vel praedonum periculis permittatis. De proelio inter nostros & Anglos jam intellexisti ex superiore nuntio. Saltem id constat, spe excidisse Anglos potiundae tantae praedae, & non minus verum etiam multo magis vapulasse, quam nostros, si verus sit hic, quem transmitto, catalogus, de quo tamen valde dubito. Et tamen vix dimidia aut tertia pars navium nostrarum pugnavit. Nebulones enim aliquot capitanei, Gallis Rupellensibus & aliis vendiderant pulverem suum pyrium, itaque cum ad pugnam esset deventum, nihil habuere, quo se defenderent. Lotharingos aliquot a nostris fuisse assatos jam dudum intellexisti, ut opinor. Istorum nidor reliquos pepulisse videtur. Abstinere enim a nostris finibus. Vale, & me ama. xiv. Martii. CIOIOCLIII.

E P I S T O L A LXXXVIII.

I S A A C. V O S S I U S

Nic. Heinso.

Mediolanum, aut Basileam.

IAm statim Amersfurto domum redux, mi Heinso, tuas offendi, & longas & jucundissimas. Scribis in illis, ut literas imposterum tradam aut affini tuo, aut ad aedes paternas mittam. Verum id, ut opinor, efficiet, ut cum singulis duabus ad te scripserim hebdomadibus, nunc una hebdomade serius ad te meae perveniant literae, nam, ut nosti, uno die serius, quam huc, literae ex Italia Germaniaeque adveniunt, alter hinc discedit tabellarius. Valde autem gaudeo quod videam te iter tuum maturare, celeremque promittas reditum, qui quamvis celerrimus fuerit, nunquam tamen erit inexpectatus. Utinam si quam scribendi negligentia aut raritate apud te contraxerim culpam, eam omnem praesentibus possim compensare officiis, haecenus non ingrata nobis & injucunda fuerit mutua istaec inter nos benevolentia, multo illa, ut spero, erit gravior, ubi iterum praesentibus officiis & consuetudine jucundiores facere possumus amicitiam nostram. De historia Augusta ita est, ut olim dixi; quamvis codex iste Mediolanensis sit recens, innumera tamen loca ex eo restitui possunt. Sed opus est naso, quo caruisse videntur illi, qui eorum autorum primam dedere editionem. Non recte enim illo libro usos esse (si tamen sint usi) statim adparebit, si quis vel unam conferat pagellam. Vellem cum D. Ferrario arctam faceres amicitiam, mirum enim in modum illius imposterum tibi prodesse possit familiaritas, in consequendis melioribus istius bibliothecae monumentis. Quod nonnullos tibi rariores comparaveris codices valde gaudeo: velim ut illos tecum terrestri itinere deferas, ne forsan aut mari aut pi-

piratis Anglis ea cedat praeda. Habes hîc literas Gronovii. Intra aliquot dies hîc nobis aderit, si stet promissis. Valde capior ejus familiaritate. Sed utinam quoque tu adesses, id si esset, nihil nobis deesset. *Bochartus* quando huc rediturus nescio. Ipse scribit se non posse de reditu cogitare ante tertium mensem elapsum. Si maturaveris iter tuum possis illum in Suedia offendere, uti quoque D. *Beuningium*. Ex Suedia nihil novi. Crescit illic indies paupertas, & sane videretur ea regio brevi futura mendicorum ditissima, nisi deus aliquis prospexerit, ac de Polonis aut aliis inimicis bonam illis praedam concesserit. Ipse ὁ παντοκράτωρ ἀλείπτῃς aliquid se percepisse negat in Suedia, sed jam de suo expendisse ultra viginti florenorum millia. Quid de *Bocharto*, quid de nobis sperandum in tanta egestate? Sed de his coram. De *van Galio* modo rumor est allatus, illum duas Anglorum naves occupasse, & alias quatuor in fundum egisse, aut consumpsisse flamma. Nos strenue pergimus in Antipliniano nostro. Affinis tuus Leidæ est, ut mihi statim narratum. De *Moro* nihil intellexi ab aliquo tempore. Aliud quod scribam nihil jam succurrit. Vale, & matures reditum & me amare pergas. Amstel. ix. April. CICIOCLIII.

EPISTOLA LXXXIX.

ISAAC. VOSSIUS

Nic. Heinsio.

Coloniæ.

Valde anxius fui de tuo reditu, quinque siquidem jam transierant hebdomades, ex quo nemo hîc terrarum aliquid de te cognovisset, cum subito laetissimum nobis nuntium adtulit affinis tuus, salvum te venisse Genevam. Heri vero etiam literas adtulit Basilea datas, quibus certam spem facis affuturum te Coloniam intra duodeviginti dies, quos jam praeterisse existimo. Utinam iter tuum matures, quantum fieri potest. Simul Suediam repetemus, si dîs placet, nam & ego nunc revocor. Propempticon nobis scribet *Morus*. Tonforis rustici filius abiit, evasit, nescio aurone an diris onustior. Valde aestive viaticatus illuc venerat: auferet vero nunc plusquam quinquaginta imperialium millia. Infinitas de illo fabellas coram narrabo. Transiit hac praeterita hebdomade *Bochartus* & *Naudæus*, in comitatu uterque *Chanuti* Legati. Non nisi per unum diem hîc substiterunt. Ex Suedia ad me scribit *Beuningius* sperare se habiturum te locum *Lagerii*, aut similem, nempe ut sis S. R. ab epistolis Latinis. De *Bidalio* dolet quod scribis. Sed poteris de illo ultionem accipere, si ita tibi visum fuerit. Multa habeo, quae in aurem tibi dicam, quae non audeo literis committere. Spero tibi ea non ingrata fore, quamvis imprudenter facta videbuntur, sed tamen optime exciderunt. *Fraxineus* adhuc in Suedia est: huic soli cum tonforis *Michonis* filio quomodocunque adhuc convenit. Et ipse tamen quamprimum discedet, nisi fallor. Literas mitto

Gronovii, quas hoc ipso fere momento Haga redux domi meae offendi. Tutius forsan eas hîc servassem, cum nesciam an ad manus tuas sint perventurae: spero enim te prius Colonia discessurum, quam istae perferantur, cum nihil ea in urbe sit, quod te multum moretur. De Catalogo Bibliothecae Bernensis noluissem te sollicitum esse. Jam olim eum mihi descripsit cognatus *Junius*. Vale, & reditum festines; peream si quid in mundo sit, quod majori cum impatientia desiderem. Famulus non deerit. *Gronovio* & ipsi haec res cordi est. Vale x. Julii CIOIOCLIII.

EPISTOLA XC.

ISAAC. VOSSIUS

Nic. Heinsio.

Holmiam.

Non nisi per unicam horulam licuit versari in Bibliotheca; ob causas, quas coram melius explicabo. Omnia illic sursum & deorsum volutata inveni, itaque tam brevi spatio nihil neque in usus tuos, neque etiam meos potui efficere. Ovidium & Statium MSS. pauculosque alios exposui, uti volebas, habebisque quandocunque placuerit. Transmitto clavem interioris cubiculi, quam tradas rogo *Holmio*, aut Serenissimae nostrae, si tempus & occasio tulerit. Inclusas rogo tradas *Holmio* obsignatas. Valde jejune sunt exaratae, sed jam pridem cessat mea erga hominem istum reverentia. Qualem erga me se gerit, talis quoque ero erga illum. Si homo literarum & omnis civilitatis expertus nesciat libros, quos separavi, a caeteris distinguere, adjuves illum rogo. Si tibi comparaveris libros, qui in anteriore sunt cubiculo, praedam non contemnendam habebis. Sin id neglexeris, fac tamen rogo, ut & illi convasentur, & cum caeteris transmittantur. Pileum, quem volebas, reliqui adfixum parieti cubiculi mei. Si *Silvercronium* videris, salutes non tantum meo nomine, sed etiam commendes illi arcam, quam reliqui, ne forsan servorum pateat fraudi. Velim itaque quam libentissime, ut illam quam ocyssime auferat Gertrudis, quam nosti, Beuningiana, ut istam una cum heri sui suppellestile reliqua in Hollandiam transmittat. Simulatque in Hollandiam venero pluribus tecum agam, nunc enim raptim haec exaravi, redeunte ad vos famulo meo. Quis futurus sit status aulae Serenissimae nostrae Reginae tribus rogo rescribas verbis, quandoquidem id nunc secure licebit, nempe an *Comes a Dona* comes itineris sit futurus, *Silvercronius*, *Marescallus*, quid alii item. Northolmiae nunc verfor. Responsum si quod transmiseris, id hac praecipue vice tradas domino *Oste*, ut includat literis suis ad D. *Beuningium*. *Langermanno* rogo omnia mea offeras officia. Mittam illi quae promisi, simulatque eum Hamburgum reversum esse cognovero. Vale & me ames. IV. Junii Gregor. CIOIOCLIV.

EPI-

EPISTOLA XCI.

ISAAC VOSSIIUS

*Nic. Heinsio.**Holmiam.*

NAe illi lepidi sunt homines, mi Heinsi, qui tam magnifice sentiunt de munusculo librorum, quod mihi indulgit Domina. Illinc, an vero ego debeam indignari, quod cum pulcherrimam in Suediam advexerim bibliothecam, in qua nullos omnino veterum auctorum desiderabatur, quaeque ultra quingentos numerabat manu exaratos codices; nescio quas receperim quisquilias, in qua ne unus quidem bonae notae sit auctor (exceptis paucis aliquot meis) digni prorsus omnes, qui a cacantibus legantur. Nolim tamen ut apud Suedos nimium de iis contemtim loquaris: e re enim mea esse possit, ut magnifice de his sentiant. Constitui enim Catalogum omnium istorum librorum plurimumque aliorum, quos ad speciem admiscebo, quamprimum in lucem dare. Transmittam illum, simulatque excusus fuerit, ut videas ecquis illic sit emptor. Prorsus enim est digna haec bibliotheca, quae ad locum, unde venit, revertatur. Atque haec quidem de libris. Hamburgensi quod excideris Canoniatu, non est quod doleas. Nimium id pusillum fuisset praemium pro laboribus tantis. Spero successurum id quod scribis, nempe ut ordines te illic utantur oratore. Non erit hoc, ut existimo, inconsultum aut honori tuo, aut utilitati. D. *Beuningius* jam de eo egit apud ordines nostros. Non male feceris, si unam alteramve scripseris epistolam, quam communicare possit illis, qui nunc plurimum possunt. S. Regina adhuc Hamburgi haeret, indiesque hinc exspectatur. Avide illam exspecto etiam ipse, tum ut videam ecquid sperandum sit de solutione stipendii, tum vero magis de repraesentatione summae expositae. Libros, quos petis, habebis omnes. Multum me obstrinxeris, si per famulum tuum inquisiveris in volumina quaedam, quae mihi sunt subiecta in Suedia, ut existimo, a famulis quibusdam, dum transferuntur, vel etiam in ipsis aedibus D. *Beuningii*, praesertim in navigationes quasdam in Indiam, *Francofurti* editas in folio, quorum figurae coloribus sunt variegatae. Praeterea itinerarium *Rauwolfii*, innumeraque alia scripta, vellem quoquo pretio recuperare. Sed de his alias. Ante duas hebdomades transmisi tibi libellum *Miltoni* contra *Morum*. Vale & me ames xxx. Julii. CIOIOCLIV.

EPISTOLA XCII.

ISAAC. VOSSIUS

*Nic. Heinsio.**Holmiam.*

Accinctus ad iter Antwerpense, ut illic S. R. conveniam, haec scribo. Itaque non possum ad singulas literarum tuarum partes respondere, hoc saltem nunc promitto, me sedulo omnia curaturum quae postulas. Nunc praetermittere non possum quin significem, D. *Beuningium* strenue causam tuam egisse apud Ordines, atque ita de te esse locutum, ut non dubitem, quin si resciveris sive ex me, sive ex aliis, quomodo ille te laudesque tuas praedicarit, longe tibi gratissima sit futura ejus erga te viri benevolentia. Itaque jam parum superest quin omnium nomine electus sis ad munus illud publicum in Suedia obeundum. De salario annuo non ultra quatuor florenorum millia impetrare potuit, quamvis illis necessitatem alendi currus famulorumque aliquot fatis indicarit. Non nisi per biennium illic commoraberis, ut existimat. Ubi reversus fueris, syndicus eris urbis alicujus primariae. Dum interim illic versaberis pulchre rem tuam facere poteris. Vale, mi Heinsi, ubi Antwerpiam venero, ubi nunc agit Regina, dabo ad te prolixiores. CICIÖCLIV. VIII. Aug.

EPISTOLA XCIII.

ISAAC. VOSSIUS

*Nic. Heinsio.**Holmiam.*

An te biduum Antwerpiam veni. Regina vero abest, sed hodie reversura esse creditur. Bruxellas & praedia nobilium quorundum, circa illam sita, per aliquot dies invisit. Mansura vero est etiamnum per menses minimum tres vel quatuor. Verum de his certiora potero rescribere, ubi ipsam compellavero. De te vero quid statutum sit apud ordines nostros superioribus perscripsi literis. Putabat itaque Heros noster *Beuningius* brevi te habiturum acta illa, quibus quid tibi faciendum sit poteris cognoscere. De Ovidio quod scribis memor ero, simulatque domum fuero reversus, quo admodum festino, transmittam omnia, quae in Bibliotheca mea Ovidiana monumenta invenero. Vellem id ipsum apud *Moretum*, quocum familiaritatem inire statui, mihi liceret. Sed vereor ne is recuset codices illos suos in tam longinquas oras transmittere. *Graevius*, qui mihi Amstelodami adest, cujusque utor opera in concinnandis operibus paternis, describit Ovidianas lectiones *Gruteri*, excerptas ex variis
ejus

EPISTOLA XCIV.

ISAAC. VOSSIUS

Holmiam.

ET alia, & praesertim morbus gravissimus matris, effecere, ut spatio trium quatuorve hebdomadarum nullas omnino ad te literas dederim. Singuli dies extremam illi horam minati sunt, & tamen dei beneficio illam evasisse speramus, licet admodum diminuto calore naturali, ut in tam senili solet corpore. Nunc ante quatrimum demum Antwerpiam reversus, tuas illic offendi geminas, quibus responsum cogor in sequentem hebdomadem differre, adeo nunc mihi multa sunt negotia peragenda. Hoc tantum nunc dico, habere me hîc fasciculum literarum a *Furstenhausio* ad te transmissum, quem Regina aperuit, sed meras continet novellas Garmanicas de morte Caesaris & similia. Grandior is est, quam ut transmittere possim, alia itaque id transmittam via, praesertim cum nihil contineat, quod scire magnopere velis. *Fraxineus* & *Picquetus* huc adpulere. *Bourdelotio* significavit Regina, se non egere medico. *Wulenus* jam hinc in Suediam discessit. *Chanutus* hodie hinc discessit, post moram quatruidui. Caetera sequenti hebdomade. Antwerp. ciciccliv. 11. Octob.

EPISTOLA XCV.

ISAAC. VOSSIUS

*Nic. Heinſio.**Holmiam.*

Superiore hebdomade redux Amſtelodamo paucis te compellavi, vir clariffime, quoniam aliter ut facerem tempus non patiebatur. Significavi tunc me geminas tuas hîc offendiffe, nunc vero, id eſt heri, tertiæ tuæ ad manus pervenere. In omnibus poſtulas, ut tibi transmittam Ovidiana quaecunque vel hîc, vel Amſtelodami invenerim. Noli dubitare, quin id facturum ſim intra paucos dies, modo non deſit occaſio, qua codices illos poſſim transmiſſere. Per hunc ipſum tabellarium ſcribam ad avunculum *Junium*, ut id negotii ſuſcipiat. Tria exemplaria *Metamorphoſeos* hîc habeo, omnia in pergamento, ſed omnia mediæ antiquitatis, ut ſolent eſſe pleraque ejus auctoris ſcripta. Ad-
dam & alia quæ habeo. Miror cur *Platonem* alioſque, quos habeo a te, libros addi velis. Non potui illos reddere hætenus vel affini vel ſorori tuæ, cum hîc in Anglia, altera vero *Leidæ* ſemper fuerit, ex quo huc reverſus ſum. Itaque neque alteram hætenus iſtam ſummulam refundere potui. Sed & pugillares eburneos debeo. Et hos quoque brevi habebis; intra paucos enim dies *Lutetiam* tendo una cum *D. Silvercronio* & *Fraxineo*. Regina hîc commorabitur, niſi fallor, per totam hyemem. Ipſa tamen non tam diu ſe hîc velle hæerere dicit. Sed Princeps *Condaeus* proculdubio detinebit. Comites itineris futuri ſunt *Silvercronius*, *Piquettus*, *Fraxineus*, & ego, ſi velim. Sed non hinc diſcedam, niſi prius impetrata ſumma illa, quæ mihi debetur. *Silvercronius* liberalis admodum eſt in promiſſis. Itaque non mihi tantum, ſed & tibi ſe velle ſatiſfacere dicit. Sed ſane factus eſt alter *Holmius*. Suedos autem *Wolſium*, *Wrangelium* & alterum illum, qui piſtillo regio in plebeo conformatus eſt mortario, abdicare velle videtur Regina. Silium, quem petis, deſcribi curabo. Sed proſpecto hæc ſunt minuta, ſi cum iis comparentur, quæ aliquando apud me videbis. Spero non diuturnam fore tuam in Suedia moram, ſed te revocatu-
ros intra annum unum aut ſaltem alterum *D. ordines* ad meliorem, aut ſaltem beatiorem conditionem. Interim & de hac quoque tibi gratulor. Sed proſpecto nihil minus, quam lucroſa hæc tibi erit dignitas. Verum refundent ordines quidquid de tuo expenderis. Ad hoc impetrandum ſufficiet tibi *Beu-
ningius*. Mortem *Cancellarii* tui maxime ergo doleo. Beneficium confer in ſenes, moriuntur, confer in juvenes, oblivſcuntur. Utroque modo infelix hætenus fuiſti. Tempus eſt, ut illis operam tuam offeras, qui nunquam moriuntur, & apud quos nunquam, ut ſpero, ſeneſcet gratia. Salutavi nomine tuo *Gewartium* & *Jefuitas*, illi omnes amanter te reſalutant. Antverpiæ XVIII. Octobris MDCLIV.

EPI-

EPISTOLA XCVI.

ISAAC VOSSIUS

*Nic. Heinsio.**Holmiam.*

QUinque, nisi fallor, hebdomades sunt, aut aliquanto minus, ex quo Lutetia ad te scripserim, mi Heinsi. Qua potissimum de causa eam adierim jam cognovisti, ut opinor, nempe ut summa ista, quae mihi debetur, ex illis persolveretur rebus, quas *Du Fresno* ad suos tantum usus in Galliam transtulerat. Duae jam effluxerunt hebdomades, ex quo inde reversus sum. Sed totum illud tempus impendi convasandis denuo libris Bibliothecae nostrae, quae Bruxellas migrabit ad aedes Egmondanas, simulatque glacies, quae etiam hîc pleraque invasit flumina, fuerit soluta. Ante biduum demum huc reversus nihil mihi prius jucundiusque esse potuit, quam ut tibi rationem redderem itineris Gallici, simulque eorum, quae a me postremis tuis flagitasses. Sic itaque habeas, comparasse me tibi pleraque quae jusseras, nempe tomos tres Sanctamantii, Sidonium Sirmondi, aliaque nonnulla. Sed & omnes illos auctores, qui de numismatibus antiquitatibusque Romanis agunt, illic inveni, meique feci juris. Inter illos multi sunt hactenus tibi invisi, quos tamen libenter patiar ad tuam transire bibliothecam, si in ea desint. Verum de libris coram aliquando videbis. *Pyrrhi Ligorii* opus jamdiu Lutetiam advectum est, intra paucos, ut spero, dies huc mittetur, nempe simulatque Parisios reversus fuerit *Bidalius*, qui hoc ipso die peracta negotiatione sua satis bene contentus hinc discessit. *Menagio* persuasi ut huc se conferat. Dixit mihi velle se Serenissimam Reginam comitari in itinere Italico, jamque seposuisse ad hoc octo scutatorum millia. Hodie illi transmisi literas salvi, ut vocant, commeatu. Sed & *Beuningius* heros promittit brevi se huc excursurum. *Fraxineus* Parisiis haeret, nec forsan huc reversurus. Eo quoque se contulit *Piquetius*. Regina in servitium suum adscivit Dominam *Donneau*, & sororem *Janetoniam*. Harum frater post *Antonium* praecipua nunc floret gratia apud Reginam. *Wolfius*, *Wrangelius* & *Lilicronius* ad suos quamprimum revertentur. Itaque nos supradicti heroes & heroinae vacua dominabimur aula, si dîs placet. Hactenus in aula Archiducis vivimus, qui nos splendide excipit. Post septem, aut octo dies ad domum Egmondanam transibimus. Pulchre omnes curamus cuticulam. Musici, histriones, chorauli & crotalistriae ad nauseam pene nos compellunt. Principem Condacum quod adinet, is abruptit commercium cum Serenissima Regina; iisdem, quibus Archidux, honoribus adfici cupiebat, id quod recusavit Regina, itaque soli Hispani hîc aulicantur. *Janetonia* & ipsa jam incipit verba Hispana conari. De summa, quae tibi debetur, bene spero. *Silvercronius* omnia promittit, verum is valde est prolixus, & omnino alter est *Holmius*. De pecunia tamen despero, sed picturis, libris, gemmis

aliis rebus, ut puto, compensabitur. Ita omnino ego facere proposui. Brevi de his certiora potero rescribere, interim non cessabo & ipse negotium tuum urgere, quantum potero. Magnus quidem est numerus librorum geminorum, veruntamen illi non ad tantum adfurgunt pretium. Recte feceris, si Reginam aliquanto humanius compellaveris, quam in Suedia feceris, si non ob aliud, saltem ne obsit, quominus tibi satisfaciat. Rogavit me jam aliquoties ecquas a te accepissem literas. Sed illas non potui exhibere, ut ipse facile conijcere possis. De sequentibus melius spero. Interim ita habeas velim, si non aere aut argento, saltem aliis rebus Serenissimam Reginam compensaturam esse summam, quam tibi addixit. Vale, vir eximie, & me ames. Bruxellis II. Januar. CIOIDCLV.

EPISTOLA XCVII.

ISAAC. VOSSIUS

Nic. Heinſio.

Holmiam.

SI pro infrequenti literarum officio, meum etiam erga te studium & affectum Saestimes, mi Heinſi, longe profecto ego alius videar, quam vel sim, vel esse debeam. Sed certe nimium me amas, quam ut de affectu dubites; negligentiae vero crimen utcunque non detrectem, tanta tamen forsan non est, quantam existimas. Nam quod scribis tribus integris mensibus nihil te literarum a me accepisse, id valde miror, cum nunquam tandiu officium meum intermiserim, optimeque recorder, me tribus quatuorve circiter hebdomadibus, antequam illas, quarum mentionem facis, ad te exararem, alias ad te dedisse in procinctu a me scriptas. Quas si non recte curarit *Bidalius*, nihil in eo praeter morem egit, cum neque tuas illas verbosissimas curarit, quarum in literis mentionem facis. Porro quod superiorem tuam epistolam adtinet, quam per *Holmium* curasti, illam ante tres circiter hebdomades accepi. Verum vix lectam per *Janetoniæ Reginae* offerendam curavi, quae istam sibi servat hætenus. Legerat illa tuam, multumque hac commota fuit, adeo ut diceret, *Heinſius me traite comme si j'estois la plus vile creature du monde*. Ego, ut haec mitigarem, dixi te tamen cum summo honore & affectu de ipsa loqui in tuis ad me literis. Itaque exhibui. Praecipue aegre ferebat, quod *Pantolabi ſcurrae Nomentanique nepotis* faceres mentionem. Rogavi vero *Janetoniæ* & *Silvercronium* (qui valde tibi irascebatur, jamque responsum nomine Reginae meditabatur) ut aestus istos componerent potius, quam de vindicta cogitarent. Quamvis autem pulcherrima ista sit epistola, meritoque illam amare debeas, non tamen tanti facere debes dicta aliquot arguta, ut propterea tot scutatorum milia perdere velis. Porro quod cupis, ut moneam Dominam de responso Italici parando, pro illo Poëmatum a te transmissorum volumine, faciam ubi aliqua

qua adfulserit occasio. Quamvis cum ipsa literas tuas habeat, & proculdubio legerit, hoc opus non videatur, praesertim cum ipsa Bruxellis sit, ego vero Antverpiae habitem, & quidem occupatissimus, dum tuis meisque commodis omni modo inservire studeo. Libris ne pretium supra aequitatem imponatur curae erit quam maxime. Aliquot centenos & quidem optimae notae jam exposui, minimeque timeo, ne hac in parte negligens tibi fuisse videar. Transmittam tibi eorum catalogum intra tres hebdomades, tanto enim minimum tempore indigebo, antequam negotium hoc potero perficere. De picturis aliisque agam tecum sequenti occasione, simulatque *Silvercronius* huc advenerit, quem indies exspecto. Absque illo enim nihil hac in parte possum. Ovidiana omnia, quae petis, jam convasavi, habebis illa quandocunque volueris. Antverpiae cicjccclv. xiiii. Martii.

EPISTOLA XCVIII.

NIC. HEINSIUS

*Isaac. Vossio.**Bruxellam.*

TOtis quatuor aut quinque mensibus non nisi unicam a te accepi epistolam, vir Eximie. Cum decies ego ad minimum interea scripserim, teque compellarim. Nimia fieri loquacitate meâ suspicor, ut ne respondeas. Quare frenabo posthac hunc impetum, & pruritui garrulitatis moderabor. De Excerptis tantum Ovidianis verbo vel unico quid sit factum opto doceri, quae *Puteanus* ad me mittenda *Bidalio* ante annum commisit. Major est thesaurus ille, quam ut negligi a me aut insuper haberi debeat. Sed & scire cupiam, an egeris cum Dominâ de responsione Principi Hetruriae *Leopoldo* paranda, deque gratis illi agendis pro carminum luculento munere, per me Majestati ejus oblato. Metuo enim ne Domina, si officio diutius desit, Italorum animos alienos a se reddat, quos sui studiosissimos & experta jam erat, & porro erat expertura, si grato animo Serenissimi Principis munus excepisset. *Octavii Ferrarii* Oratio an visa sit tibi nescio, quae **CHRISTINA ABDICANS** inscribitur. Ego Parentem optimum nuper amisi, qui casus miris modis me adflixit. *Flemingius* mense Maio ad Dominam hinc proficiscitur, magnam pecuniae vim vobis allaturus. Mei aliquam haberi rationem velim, antequam hinc discedat. Sed sine mandato ipsius Dominae nihil est sperandum. Utinam *Silvercronium* nostrum tam officiosum, tamque mei demerendi cupidum experiar, quam *Beuningium* heroem sum expertus, & quotidie experior. *Holmii* jam adeste vobis arbitror. Is me ignaro hinc descessit. Carmen nuper Epithalamium scripsi, etsi Musarum transfuga, ejus ut copia tibi fieret, Amplissimum *Beuningium* rogavi. Tu vale, & memento mei. Dabam Holmiae. A. cicjccclv. ad diem xxvii. Martii Gregor.

Oooo 3

EPI-

ISAAC. VOSSIUS

Nic. Heinsio.

Venetias.

PEnc tibi irascor, quod tam aequo animo feras negligentiam meam, mi Heinsi. Quamquam enim valde gaudeam nonnunquam quod istam feras, malo tamen, ut more tuo mihi irascaris, quam ut perinde a te habeantur studia & officia mea. Acres omnino & virulentas a te exspectabam literas, jamque longas excusationum ambages meditabar, cum ecce prodit postrema tua ad me epistola, plena amoris & affectus planeque contrarii argumenti atque exspectabam. Quod si illum erga me animum geras, ut vitio huic ignoscere possis, & non tantum me non odisse, verum etiam eodem, quo ego te, affectu prosequi; jam te impensius amo, petoque ut sic me semper amare pergas. Catalogum librorum, quos pro te exposui, tradidi adfini tuo jam ante sex septemve dies, puto illum jam hunc ad te transmisisse. Implent isti tres vastas satis capsas, quas una cum quinque aliis meis tradideram nautae, Hagam deferendas, sed quid illis factum intelliges ex literis *Gevartii*, quas hîc habes. Interim crastino mane denuo Antwerpiam repeto, efficiamque, ut libri nostri intra unam alteramve hebdomadem huc adferantur. Nisi sperarem brevi te huc adfuturum, longas tibi scriberem historias, quo pacto illas obtinuerim. Nosti enim ille noster amicus quam sit longus. Pretium puto non displicebit, praesertim ubi coram aderis librosque videris; in catalogo enim illud praecipue cavi, ne librorum tituli nimium essent speciosi. Simulatque illae Parisienses cistae, quas abstulerat *Fraxineus*, Bruxellas allatae fuerint, habebis alios, & quidem aliquanto rarioris generis, ut spero. Porro *Fraxineus* dedit mihi *Lazii* Graeciam, tibi tradendam, quoniam istam te desiderare significaram. Ante octiduum Hagam habitatum concessimus, itaque jam totus in eo sum, ut bibliothecam, quae satis est luculenta, in ordinem digeram. Spero permissuram Reginam, ut hîc aetatem transigam. Attamen prius me Antwerpiam & Bruxellas conferam, ut videam ecquid etiamnum efficere possim in communi nostro negotio. Ubi picturae Parisienses a *Bidalio* transmissae fuerint, bonam exinde portionem obtinebimus uterque. Sed & in illis exhibendis adeo tardus est amicus noster, ut pene scribere pudeat. De die in mensem, imo in annum jam differt, licet Serenissima Regina jam saepius jusserit, ut nobis satisfaceret. Quod si illum officii admoneam, serio irascitur. Verum de his coram, quod utinam quamprimum fiat. *Wullenius* in epistola ad *Silvercronium* valde de te conqueritur, quod te in Suedia omnium asperrimum inimicum experiatur. Ego id verum esse negavi; dixique me existimare, magis te esse ipsi amicum, quam ipsemet sit sibi. Certe soror illius, in novis aedibus suis, quas Amstelodami conduxit, valde te impatienter exspectat, nec suum potest dis-

diffimulare affectum. Noli itaque cum viro optimo odium exercere, amicitiamque veterem levi de causa dissolvere. Si non hoc ipsi velis praestare, at saltem praestes sorori, quae se totam tuam esse dicit. De Domina nostra coram multum narrabo, verum utinam iter matures. Ita enim habeas rogo, inter omnia mea desideria maximum esse illud, ut te videam: Vale, vir Nobilissime XIII. Maii MDCLV. Hagae Comitum.

EPISTOLA C.

ISAAC VOSSIUS

Nic. Heinsio.

Holmiam.

PRIORE hebdomade tuas accepi, vir amplissime, quibus nuntias redditas tibi esse literas nostras, mense Majo exaratas, id est ante quinque, & quod excurrit, hebdomadas. Miror affinem tuum simul non transmisisse Catalogum, quem illi tradidi. Existimavit forsan me aliud quoque exemplar tibi transmississe, sed profecto, nisi fallor, diserte illum rogavi, ut quem unicum haberem, illum quoque ad te mitteret catalogum. An placitura tibi sint librorum nomina valde dubito, verum illud existimo non displiciturum tibi pretium, ubi coram videris, praesertim si cum meis comparaveris. Interim ita habeas, me non paucos libellos rariores, qui bis inter libros Reginae exstarent, mihi adtribuuisse, tum quod illi meae deessent bibliothecae, olim enim illos donavi Serenissimae Reginae, tum quod existimarem eos in tuis, vel saltem in paternis exstare libris. Si quid attamen in iis sit, quod tibi magnopere arriserit, non me difficilem experire, quod enim aliquanto plures mihi adtribuerim vel usurparim, id antiquo dandum est affectui, quo illos potissimum amplector libros, quibus diutissime usus sum, utpote meis, & in quibus magnam memoriae meae partem collocavi. Porro quod de Ovidii codicibus scribis, de eo noli amplius dubitare, non pauca enim in illis tuis capsis invenies haecenus tibi, ut existimo, invisa. Verum & alia illic invenies dudum tibi desiderata, Austriaca Lazii, Familias Ursini, Olai Historiam Gothicam, fratrisque ejus Joannis, Opera Gesneri, Augustini & Hieronymi opera ex editione Plantiniana, Opera Mirandulae, Cuspiniani, multaque alia, quae forsan desunt, ipse suppeditare potero, & praesertim illa, quae in schedula proxime transmissa postulas. Libri Parisienses an ante discessum Reginae sint adfuturi ignoro. Quia enim *Bidalius* necdum obtinuit a Rege confirmationem eorum agrorum, qui ipsi adsignati sunt, ideo recusat reddere, vel differt saltem omnia ea, quae penes ipsum sunt, Reginae bona. Iter Reginae in Italiam incidet in Mensem Septembrem. Comitabantur illam *Pimentellus*, *Dom de la Cueva* cum conjuge, *Comes Montecuculus*, *Silvercronius*, *Lilicronius*que. De me nihil certi possum promittere, licet enim & me quoque comitem postulet Serenissima Regina, dicere tamen non possum quanto secessus flagrem desiderio

rio. *Jannetonia*, *Donneus* cum conjuge, in Hollandiam revertentur. Verum comitabuntur duo Secretarii *Apelmannus* alter, alter vero *Gilbertus* quidam Gallus, nec non *Apelgrenius*, & praeterea cohors xxv. militum pro custodia corporis. *Rubenium* saepius nomine tuo salutavi, vivit is valetque, ac saepe alter alterum videmus. Adventum tuum in Hollandiam impatientissime speramus omnes, quandocunque venies, nunquam certe inexpectatus aderis. Vale, vir nobilissime & me semper ames. Libri tui una cum meis salvi Hagam sunt allati. Mater capsas nostras alias ab aliis non potuit distinguere. Itaque hoc differendum est in adventum nostrum. Interim tuto adservabuntur. Iterum vale. x. Julii cicioclv.

EPISTOLA CI.

ISAAC VOSSIUS

Nic. Heinsio.

Holmiam.

Valde tibi ipse es molestus, mi Heinsi. Vide ne dum paucis quibusdam os obstruas, omnibus aperias. Multo hoc salubrius consilium, quam illud, quod mihi dedisti. Inquis, quod honorem *W.* apud *Goesium* & *Wicquefortium* & alios prosciderim. Hoccine de me dicunt illi? non credo. Apud *Wicquefortium* nunquam *W.* mentio incidit, cum ille Hagam eam habitatum venisse significaret. Hoc tibi renuntiavi. Auctorem etiam addidi te petente, neque enim in eo quidquam mali. Verum tu, ut solent qui suspicionibus indulgent, ipsum adiisti, ut videres, num, cum *W.* fieret mentio, alii quoque de ea habiti essent sermones. Promas illos, si qui fuerint. Sed & ista profer, quae adfini tuo dixi, confirmabo libens. Verum alii isti ubinam sunt? nusquam ut opinor. Quae suspicaris, vel potius quae somniasti adfirmas. Illud non probe a te dictum, quod illustrissimo *B.* . . . litem intendi ab illa, & mea culpa obtorto collo in jus rapi scribis, te tamen pro tua pietate illum ex his turbis conari extricare. Facit me profecto ridere ista pietas. Nempe significavi & olim & nuper, *B.* . . . me praesente defendisse honorem *W.* apud *B.* . . . Indicasti hoc dominae tuae, quae nunc lites hoc nomine minatur, cum gratias agere debuisset. Fingis dolere tibi *Beuningii* vicem. Sed istum dolorem & istas lites valde contemnet heros noster. Dicis illam fremere. At vero ego valde illam laetari existimo. Sin minus, subde matellam. Adfirmasti enim nuper valde hoc esse utile remedium ad compescendam choleram. *B.* . . . obiisse dicis. Cur viventem non consuluisti, jam siquidem triennium effluxit, ex quo id facere potueras. *V.* . . . scribis factum, ut a me narratum est, infitiari. Hoc verum esse non potest, qui enim infitiari possit, cum ipsa non interfuerit? Dixeram tibi *V.* . . . proculdubio notum fore, qualiter de tua domina senserit & locuta sit *B.* . . . His tamen veluti manifestis, jubes ut tonsorem nominem. Ego vero nullius

lius tonforis nomen novi in tota vestra urbe. Ipse quaeras, mea enim nihil interest, utrum tu privatim, an vero cum aliis puellam tuam possederis. Caeterum ut signum habeas, quo eum forsan possis cognoscere, is ipse est, qui sese jactabat alteram ejus sororem a lue Venerea liberasse. Pergis dein & dicis non deesse mihi inimicos, qui mihi calumniatoris notam inurant. Quinam sunt illi? Si jam tuo more agere vellem, vel edere istorum nomina deberes, vel ipse pro calumniatore haberi. Ipsissimum hoc est argumentum tuum. Dicis cautius me facturum fuisse, si praeterito *Goefio*, tibi uni credidissem. Quomodo tibi uni, cum aliis quoque, ut vel ipse fateris, & praecipue Dominae tuae, apud quam omnium minime decebat, haec eadem communicaris. Inquis W. . . tuae constare quid Hagae sparserim, & me natales ejus lacerasse apud *Goesium*, cum tamen constet illos esse nobilissimos. Et hoc quoque aliter sese habere ipse testabitur *Goefius*. Inquiebat is sese ex te intellexisse puellam esse nobilem. Adhaec ego, nihil me aliud scire, quam patrem fuisse pastorem Lutheranum. Cujas sit mea nihil scire interest. Quam vero es ridiculus, cum me periisse adfirmas, nisi alteram de pudicitia ejus proscissa causam egero. Utinam tuo capiti non majus immineat malum, quam mihi. Quorsum vero cupis me testimonium ferre de castitate puellae, quam tu intus & in cute nosti? De *Genegio* quid iterum quaeris, cum olim B . . . nominarim? De fama mea noli esse sollicitus. Tu tuam & existimationem & valetudinem cura diligenter, si per Dominam tuam liceat. *Beuningii* literas quod adtinet, ita habeas; nihil in iis esse, quod puellam tuam tangat, verum id simpliciter, quidquid facturum esses, sperare se nihil te indignum commissurum judicio & prudentia tua. Hoc idem retuli adfini tuo, ac promiseram me ipsas tibi ostensurum literas, tui enim videndi gratia Amstelodamum me properare. Facere id sum oblitus, fiet quandocunque volueris. Interim boni consulas ingratum hoc scriptionis genus, cui tu occasionem praebuisti, daturus literas jucundiores de codicibus Ovidianis, quos hîc inveni, aliisque quae magis faciant ad animum tuum, ubi aliquanto fueris tranquillior. Vale, & si potes me ames, sin minus, saltem desinas me odisse illo, quo me amare debeas nomine. Ruraemondae v. Octob. *ciciciclvii*.

EPISTOLA CII.

ISAAC VOSSIUS

Nic. Heinsio.

Amstelodamum.

Superiori hebdomade scripsi ad te epistolium, quod quando sit reddendum Signoro, Vir amplissime. Miraberis forsan quod in illo commendarim mulierem mihi ita ignotam, ut nesciam an alba an atra sit, cujusque negotia nec ad te, nec ad me quidquam pertineant. Sed profecto mos hac in parte gerendus fuit communi nostro amico, quem ista paupella aliqua videtur adfini-

Tom. III.

Pppp

tate

tate attingere. Siquid itaque possis in hoc negotio, fac rogo: interim noli aliquid facere quod displiceat, scio enim tales commadatiunculas minime esse jucundas. Facile unum & alterum invenies papistam, quem nioris, cui ejus negotium verbulo commendes. Ego etiamnum haereo Ruraemon-dae. Sperabam jamdudum finem negotio nostro, sed praeter opinionem tam diu hîc detineor. Dum itaque indies reditum ad vos paro, factum est ut tam diu responsum distulerim. Attamen, ut verum fatear, etiam alia tam diuturni silentii fuit causa, nempe quod de iis, de quibus mihi controver-siam movisti, malim coram, quam per literas tecum decernere. Non quod periculosum esse mihi existimem publice etiam ista testari, quae jam olim tibi indicavi, sed quod famae tuae id consultius esse credam: transigi enim ea res non possit, quin in amicum, vel quod longe majus esse existimas, in amicam crimen aliquod committas. Caeterum jus nullum pertimesco, libens me sistam iudicio, dummodo tibi prosim. Facias quodcunque placuerit, nunquam te adeo metuum, quin semper te amabo impensius. Quod autem dixi mea nihil interesse an solus an cum aliis amicam tuam possederis, in eo non video, quare me reprehendis. Si animus esset eam tibi matrimonio jungere, multum sane mea interesset; verum quia hoc deus avertet, non video quid obesse possit, etiamsi millenis quoque aliis cessisset procis; imo aut ego fallor, aut hoc multum tibi prodesset. Amstelodami sane si me hoc nomine postulaf-ses, libenter haesisssem, etiam cum magno meo dispendio. Siquid mea prae-sentia possit efficere, maturabo reditum. De *Beuningii* erga te animo multum tibi mihiue gratulor. Is si te amet, non poterit nostrum improbare consili-um. De libris, quos hîc mihi comparavi, praesens ipse dijudicabis. Non pau-cos eosque valde raros hîc, & in vicinis urbibus locisque inveni. Verum de his coram. Vale & me ames. Ruraemondae xxvii. Januar. ciciöcclvii.

EPISTOLA CIII.

ISAAC VOSSIUS

*Nic. Heinsio.**Hagam.*

Licet multum me adflixerint literae, quas de adversa matris valetudine do-mo accepi, mi Heinsi, dicere tamen non possum, quantum huic dolori laetitiae accesserit ex tuis, quibus simulatorum erga te amorum exitum mihi commemoras. Si nunc tanto in te flagret odio, quanto olim affe-ctu, spero ut olim adfectus, ita quoque odium ejus irritum futurum & va-num. Vellem jam nunc praesens tibi esse, ac nostras operas tuis conjun-gere, sed tamen nullas nectam moras, simulatque intellexero posse me huic negotio prodesse. Unum me male habet, quod mihi videor ex tuis posse colligere literis, quod nempe huic formosulae videaris te obstrinxisse promisso matrimonii. Nam si hoc sit, merito illam possis ridere, si in jus,

vocere. Millies licet ipsam inieris, non tua, sed hujus stultitia fuit, quod sese divaricarit. Sed neque promissum absque scripto ullius est pretii. Unice itaque a te peto, ut statum quaestionis paucis perscribas. Non opus est ut nomen adscribas. Tu Cajus, illa vero sit Caia, vel quod placuerit. Omnia quaecunque in tuam potero colligere gratiam, faciam colligamque ex animo; ac si placet, dissimulato nomine, negotium hoc communicabo cum quibusdam amicis meis juris canonici consultissimis, qui hac in parte nostris advocatis longe sunt versutiores. B. . . . testimonium & aliorum vel coram exhibebo, vel per literas significabo, si volueris. Sed ante omnia oportet hoc, quod dixi significare, & si quidquam promiseris, etiam illud addere, quando promiseris, & quibus verbis. Ex animo peto, ut quamprimum me de eo facias certiores. Utinam & in hoc & in aliis nostram erga te diligentiam & affectum possim testari, bene de me ipso mihi mereri videbor, si quoquo modo tibi prodesse possim. Avide itaque literas tuas exspectabo, ac tum quamprimum me in viam dabo; interim vale, & salve ab omnium quotquot vivunt hominum longe tui amantissimo. Ruraemondae raptim. CIOIOCLVII. Febr.

EPISTOLA CIV.

ISAAC VOSSIUS

Nic. Heinsio.

Holmiam.

Quaeris, vir clarissime, ut pro amicitia nostra, quid de *W.* . . . sententiam sincere & breviter exponam. Faciam id admodum libenter, tum quod honor tuus id exigat, tum quod veritatis ratio semper sit habenda. Licet itaque injucundum & ingratum auribus tuis forsitan sit futurum, dicam tamen audacter, non me existimare tantum, sed si qua in rebus humanis sit certitudo, nosse me & pene posse jurejurando adfirmare, istam tuam pulchellam, antiquum & tantum non exsoletum esse prostibulum. Duodecim aut etiam plures jam elapsi sunt anni, quod communi fama scortillum istud cognoverim, ac quamvis haec aliquanto cautius peccaret, quam soror ejus, prostitutissimi pudoris femina, sed quae obtentu matrimonii tutius poterat moechari, iisdem tamen esse moribus omnes adfirmabant, ac in eadem domo cum iisdem misceri. Bene memini in plerisque conventiculis & circulis crebros admodum me audivisse sermones de impudicitia istarum sororum. Reversus ex Italica Gallicaque peregrinatione intellexi eadem quae prius. Quae in Suedia cognovi his similima sunt. Paulo ante coronationem illuc, nisi fallor, se contulerat *M.* . . Instabat frater medicus apud Reginam, matronas nobiles, & *Holmium*, ut soror ejus ancillarum numero adscisceretur, eodemque loco haberetur, quo *Tongelia*, & episcopi filia. Convenit me tunc *Holmius*, dixitque valde se mirari, qua fronte aliquis auderet Serenissimae Reginae publicum obtrudere scortum. Idem postea adfirmavit

vit ipsa Regina, addiditque valde se mirari visum tibi fuisse, tam lepidam & festivum ad se deducere scortillum, sese tamen ne quidem adspectu suo illud fuisse dignatam. Verum ut scias istam formosulam non tantum belle meretricari, sed & insignem esse conciliatriculam, audi quid ante quadriennium acciderit. Ibamus visitatum Magdalenam *B. . . Ill. B. . . . & ego*. Incidit nescio quo casu mentio *M. . . . B. . .* laudabat ingenium, formam aliasque ejus dotes. Tum *B.* mirari se talem a tanto laudari. Non quidem se infitiri ingenium, hoc enim cum multis aliis scortis habere commune, sed mores: eo enim processisse impudentiae, ut non dubitarit sese ad simile vivendi genus invitare, adserendo virtutem esse vanum nomen, bene & sapienter illos facere, qui sensibus obsequuntur, solam in his consistere felicitatem, caetera esse somnia ac mera commenta. Adfirmabat *B. . .* adeo se turbatam fuisse hoc sermone, ut sese proripuerit, alteramque domo in perpetuum excludendam curarit. Inquiebat praeterea qualis esset sermo, talem etiam esse vitam ejus. Irretire quoscunque juvenes, & omnium amoribus patere. Nominabat etiam locum, ubi diu fuisset detenta & alta sumtibus *Genegii* puto cujusdam, hominis mihi ignoti. Negabunt haec, & ille, & caeteri proci. Sed sane si amantium te jusjurandum moveret, dignus esses, qui ab illis decipere. Parum ab illis subsidii puto habebis in indaganda veritate. Quidquid dixerint perinde erit. Nulli tenentur turpitudinem suam fateri. Si tamen fateantur, perit testimonium, cum proprii criminis agnitione testimonii efficaciam evertant. Hoc posito, jam nullum scortum impudentiae possit convinci. Vide itaque quanto melius sis facturus, si ipse tecum judices, an fieri potuerit, ut mulier juvencula, formosa, sola & ne uno quidem ancillariolo comitata, sponte sua tot maria tot terras pertransierit, pudorem inter tot gentes conservarit, nullis illicebris aut blandimentis allecta, nulla ne armatorum quidem vi coacta, tui demum vultus elegantia victa castitati renuntiavit. Miraculum certe hoc longe maximum fuerit, & non tantum nostro, sed & pristino seculo inauditum. Ego quidem sic censeo, illam toto licet ferme pervagato Septentrione aequae virginem domum rediisse, atque inde digressa fuit. Si aliter existimes, rogo quamprimum rescribas, plura reponam, quae nunc non succurrunt. Vale, mi Heinſi & me ames. Ruremondae CIOICLVII. . . . Febr.

EPISTOLA CV.

NIC. HEINSIUS

*Isaac. Vossio.**Hagam.*

QUod tuum de LXX. interpretibus commentarium non es gravatus ad me mittere, grates longe maximas pro illustri munere habeo, vir summe: quan-

quanquam liber ipse etiamnum in itinere obhaeret, nec ad me perventurus est ante vernam tempestatem. Navis enim illa, per quam ab Elzevirio mittebatur, nescio quas ob causas cunctata diutius in via, quam oportuit, Hafniam nunc demum appulisse, atque illic hybernatura dicitur, summo meo cum dolore, qui oculis avidissimis scriptum illud devorare gestiebam. Literularum tuarum nonnihil expecto, idque impatienter: scio, quam invitus scriptioni te accingas. Sed amicis indulgentissimum te solebas praestare. Accedat igitur hoc beneficium longe plurimis, quae tibi debeo, ut quo loco res tuae sint, subinde intelligam, teque in epistolis tuis complectar vel absentem. In aere tuo etiamnum me esse probe recordor. Sed mox ut auguror, ex illo nexu me expediam. Nasonis mei exemplar cura Avunculi tui, viri optimi & eruditissimi, ad Equitem *Twisdenium* in Brittannis pervenisse spero. *Schefferum* hortari non desino, ut Urbicium luci committat. Sestadiana bibliotheca, quam, puto, Rynstadii olim videras, in arcem Regiam huc translata est. Vale, decus nostrum. Exarabam festinus Holmiae Suecorum. A. MDCLXII. ad diem VIII. Jan.

EPISTOLA CVI.

NIC. HEINSIUS

Isaac. Vossio.

Hagam.

Perlatus est nuper admodum ad me commentarius de marino motu tuus, idque te auctore: voluisti enim munificentiae ac benignitatis tuae tesseram hoc volumen apud me exstare, vir summe. Librum ipsum majori jam ex parte omnem perlegi. Quid quaeris? omnia illic avita atque erudita: quaeque palam faciant, quam feliciter penetraris in interiora Philosophiae arcana. Vellem equidem par pari nunc referre; sed, nec unquam dabitur eniti mihi ad tam optatos studiorum successus, nec in promptu nunc est, quo animum saltem haud omnino ingratum testari detur. Erit tamen, ut puto, ante exortum anni proxime subsecuturi, nisi Typographi me frustrantur. *Martinus Brunnerus*, qui Upsaliae literas Graecas profitetur, ac eruditionis suae specimen Palaephati Mythologica publico nuper admodum dedit, cum de Thomae Magistri lexico Attico recensendo cogitet, valde me per literas obsecravit; ut si quod in bibliothecis vetustis scirem latere ejusdem argumenti scriptum, aut ipsius Thomae veteres membranas, quarum opera editio haec ornatior luculentiorque posset in lucem proferri, horum uti copiam atque usum sibi impetrarem. Scire praeterea se cupere, quis fuerit hic Magister Thomas, & qua vixerit aetate. Tu si expedire nos hic potes, aut haec studia fovere, plurimum de re literaria mereberis; nec patiemur hoc ab illo dissimulari beneficium, cum vir sit bonus omnino, nec culpa animi ingrati obnoxius. Castigationes in Ma-

ronem nostrae lentius procedunt, quam vellem. Morantur harum editionem, quae ex Gallia sperare sum jussus. Promisit & Regina suos codices, sed de iis parum mihi blandior, cum rem esse plane incertam haud ignorem. Deest & amanuensis, ad cujus opem possem confugere: Nam ¹ qui nuper a me discessit, manu sinistra in scriniis meis pervolvendis non belle utebatur, quamquam & alia graviora peccavit: nam istud illi erat fraternum. Memini enim quid gestum sit in parentis tui aedibus. Καὶ ταῦτα μὲν δὴ ταῦτα. Amicos omnes jubeo salvere, atque in hisce Heroidas quoque nostras. Exarabam Holmiae suecorum A. CIOIOCLXIII. ad diem XXVII. Junii Gregor.

¹ Vid. Epistol. ad Gronov. ccclxxxvii.

EPISTOLA CVII.

ISAAC. VOSSIUS

Nic. Heinsio.

Holmiam.

QUod magnifice adeo judices de nostris libellis, id non tam nostro merito, quam tuo tribuo affectui, Vir amplissime. Utinam omnes aeque ac tu benigne de iis sentirent, verum tantum abest, ut hoc sit, ut nullum nostrum scriptum, quantumvis leve & pusillum, in lucem prodeat, quo non odium magis & invidiam, quam amorem & benevolentiam nobis conciliemus. Ego tamen minime hoc nomine offendor, quin potius quanto iniquiora sint judicia, quantoque plures contra me scribant, tanto mihi plus gratulor. Quamvis enim jucundius videatur adprobationem quam reprehensionem promeruisse, si tamen propriam spectem utilitatem, est quod aliter existimem. Quod enim metallis contingit, ut ea demum perfectissima in suo genere habeantur, quae quancunque flammam integra eluctantur, ipsum quoque hoc & de nostris & de alienis sentio laboribus, & ea solum probari velim, quae quibusvis ictibus & cuicunque examini valeant resistere. Si commoditas pateretur & ulla adesset occasio, transmitterem ad te responsum nostrum ad objectiones professoris cujusdam Mathematici Ultrajectini, & alias cujusdam *Petiti* medici Parisiensis. Quod ante mensem & aliquanto diutius in lucem prodiit. Scripsere & hîc & in Germania sex septem contra me Theologi, e quibus licet ne unus quidem sit responso dignus, singulis tamen aliquid dabo responsi. De Moschopulo quod quaeris ita habeas, me geminum hujus scriptoris habere exemplar MStum, quorum neutrum Thomae Magistri nomen praeferat. Alterum exemplar est ἀκέφαλον, aliud vero sic inscribitur, Μοσχόπουλος ἐξ Ἀττικισμῶν. *Erasmus* olim habuit exemplar hujus scripti, quod Theoduli nomen praeferret, ut ipse testatur ad xi. cap. Matthaei. Aetatem quod attinet, de ea nihil certi habeo quod affirmem, hoc tamen certo possim affirmare, illum sex seculis recentiorum esse. Complura id genus monumenta habeo Graecorum Grammaticorum, longe antiquiora & meliora istoc Thoma-

ma-

magistro, dignissima quae aliquando in lucem prodeant: sed de eo alias forsan, hoc ipso enim puncto Hagam Amstelodamo redux, & pluribus distractus vix tantum mihi superest otii, ut haec pauca expediam. Vale, vir amplissime, & me ames. Geoponicis Graecis cum MStis Palatinis collatis si usus fueris, rogo, ut illos remittas. xxii. Julii cicioclxiii.

EPISTOLA CVIII.

NIC. HEINSIUS.

Isaac. Vossio.

Hagam.

Commentarios de rebus Philosophicis tuos invidiam & lites tibi conflare, mi Vossi, doleo & miror. Tanti tamen est qualemcunque exhibere hanc molestiam ne gratis constet triumphus, ex scriptis adversariorum nil vidi hactenus praeter *Coccei* & *Brunii* nonnulla. Ajunt & *Petitum Gallum* & *Bredanum* nescio quem in te insurrexisse. Sed horum lucubrationes me latent. De Germanis antagonists quod addis, id quale sit, ignoro. Dantisco tamen ad me scribunt esse in ea civitate homines studii philosophici admodum peritos, qui invenerint, quod carpant & reprehendant in postremo scripto tuo de motu maris. Adversariis tuis quid respondeas avidissimus videbo. Nec deesse tibi potest libelli ad nos mittendi oportunitas, cum singulis mensibus ter quaterve naves Amsteladamo huc contendant, ut si *Elzevirii* fasciculum commiseris curandum, ad me cum bono Deo salvus sit perventurus. Nescio an significarim jam tibi *Mauricii* *Tactica* hactenus inedita typis *Ubsalienfibus* describi, versionem latinam addit operi *Job. Schefferus*, & *Ariani* commentarium exiguum de eodem argumento, quem *Bigotius* illi misit, a se ex membranis vetustis descriptum. Idem *Mocrin* *Atticistam Brunnero*, quem de *Thoma* magistro edendo cogitare monui, pollicetur. Vellem ut tu operam conferres. Certe vetusta sive *Thomae*, sive *Moschopuli* (nisi unus idemque scriptor est) exemplaria, quae possides, *Brunnero* non negari interest rei litterariae. Cujus comodo cum totum te des, promitto mihi operam tuam ne hic quidem nobis defuturam esse, si pateris te exorari, ut & haec & alia, quae penes te esse asseveras *Atticismum* illustrantia, nobiscum communices; mature facto opus est, ne tempestates superveniant hybernae, & propositum hoc intervertant. Viam jam indicavi, qua tuto ad me perferri possunt. Geoponicos scriptores, quos repetis, nec utendos a te habeo, nec habui, quantum recordor umquam. Horum exemplar possideo, quod magno redemi ex bibliotheca paterna. Vide ne tuum illud *Goefio* dederis utendum, quamquam ne id quidem pro re certa ausim adfirmare. Observationes in *Maronem* meas hoc anno absolvi posse spes est, ejus exemplaria complura hinc inde ad me missa sunt, sed duo in his per vetusta, quae *Bigotius* a *Jacobo Mentelio* in usus meos obtinuit. Vale, Celeberrime ac summe vir. Exarabam *Holmiae Suecorum* cicioclxiii. ad diem

VIII.

VIII. Augusti. Antagonistae tuo Bredano ajunt applaudisse *Franciscum Plantam* protervis & contumeliosis in te versibus. Si res sic se habet, non abibit insultus homo insulsus. Paro enim jam nunc novam poematum editionem, cui attexi a me possunt epigrammata nonnulla in *Mauritiadem* ejus, jam olim scripta, quo poemate nihil est ineptius.

EPISTOLA CIX.

GERARD. VOSSIUS

Nic. Heinsio.

Leidam.

NObilissime & doctissime Heinsi, non ita diu est quod Ovidii opera cum MSS. collata nactus sum. Statim igitur ea obiter pervolvere coepi. Et certe non pauca mihi invenire visus sum, quae in iis multo integriora, quam in impressis codicibus, legebantur. Ea perscriberem, nisi talia essent, ut te in eo auctore recensendo adeo subacti judicii, facillime ea perspecturum putarem. Codicem igitur ipsum mitto, e quo siquid utilitatis ad te redire possit, ad me redibit laetitia quod quomodocunque tibi inservierim. Ego jam in Censorino restituendo occupor. Sed quandoquidem MSS. ejus summa penuria est, editis fere exemplaribus uti compellor. Ac habeo quidem tres editiones, Aldi Majoris, Carrionis & Lindenbrogii. Memini me ante sesquiannum circiter in bibliotheca vestra vidisse Censorinum Aldi nepotis. Eum si aut ipse transmiseris, aut latori harum *Joanni Christophoro Huisvedelio*, & doctrina & modestia praestanti juveni, tradideris; rem mihi feceris acceptissimam. Parens adhuc distinetur opere de Theologia gentili, & Physica Christiana: in quo ut nationum Idololatriam, sic miranda persequitur naturae & eorum causas. Jam ad finem opus properat. Simulatque prodierit parenti tuo τῷ πάνυ ἀντίδωρον transmittet. Si scisset tam diu cessaturos typographos, jam diu parenti Clarissimo per literas gratias egisset. Nunc, quia cessare coepit, & occupatissimus est, tribus me verbis perscribere hoc jussit. Sed, ut dixi, simulatque opus isthoc lucem videbit, exemplar transmittet, & per literas simul gratiasaget, lubens enim meritoque pro tam illustri dono obstrictum se proficitur. Amstelodami CIOICXL. III. Id. Feb. Raptim.

J A N I V L I T I I,

E T

NICOLAI HEINSII

EPISTOLAE.

MUTUAE.

EPISTOLA I.

JANUS VLITIUS

*Nic. Heinso.**Leidam.*

ALtera, Heinsi Suavissime, volvitur Hebdomada, ex quo conspectu vestro longe gratissimo miseri caruimus; necdum tamen ad vos regredi ultimae Cognatae nostrae (addam si licet, amatissimae) Cognatae inquam P. M. habendus honos siverit; dum simul parentari Manibus quietissimis (quid enim ego istos *ἡμετέρας* moror?) vel non volentibus Musis conamur. Seceſſeramus nos, ſecure quidem, in Alberti-montium noſtrum, quod jure merito Academiae ſuae praetuliſſet Cicero, niſi ſubitus ille dilectiſſimae Animulae deceſſus eò retraxiſſet, unde ſummo jam cum ſaſtidio abieramus. Ne tamen interim Voſſianae inveteraſcerent, (quippe qui poſt funus unius, etiam ſi Diis placet ad nuptias alterius vocor, ne brevi me inde rediturum videam) jam omnino graviter ad vos ſcribere adaſtus fui. *Vicquefortius* tuus, ne meis negotiis mandata poſtpoſuiſſe tua videar, nihil librorum accepit, ut aſſerebat *Iſaacus*: ipſe tamen paucos poſt dies Martianum Cap. MS. (non etiam impreſſum, quem negat penes ſe eſſe) remittet. Pater *Voſſius* Salmaſianas calumnias ex me avidè expiſcabatur; verum ita moderate, ut quibus adhaereſceret partibus, non facile diſcoſceres. Quid igitur ad me, cujus aequior ſit calumniatio? Tibi ut placeam omnimodo inſervire cupio. Modo tu ne nimium mihi inſervias. Scis quid velim. Have.

Triftia ſeſtantur miſeri Naſonis amores. &c.

Literas has ad hoſpitiſm meum ferri cura; ſic ſaluti tuae ex Pegaso (mirabere aliquando poculi genus) propitiè libabimus. *ciōiōcxl.* Octob.

EPISTOLA II.

JANUS VLITIUS

*Nic. Heinſio.**Leidam.*

IAm eo provecti sumus, Animose Heros, ut lapidem laverimus, si nunc primum de subitae profectiois excusatione sermo institueretur. Quin potius de ipso itinere haec habe: Nonis Martiis Norwichum secundo flumine subvecti equos scandimus, & sex dierum spatio primum per paludosam, hinc per planam, plurimum deinde per asperam, montanam, & nivalem regionem, plus minus cc. Millia passuum confecimus. Summo tum labore aërium jugum continui montis supergressi in novum (ita vocant) Castellum pervenimus. Schotti hîc castra posuerunt a prima belli origine. Milites non magis strenui, quam religiosi. Mira tamen facies in vultu omnibus; nisi magis in habitu. Pileo, qualis *Erasmo* a pictoribus imponitur, sed caeruleo omnes galeati. Quidam non braccati, investes clunes brevi togula obumbrant: credas ludibrium spectatoribus debere. Nos tamen ulterius eorum lustra pervagari decrevimus, si non frigus nos retorserit: est enim hîc vehemens, tum propter Maenalin vicinam, tum propter montanas nives & continuos e jugo rivos. Meliora omnia speramus simul ac in Heborenses tractum redibimus, in quo non pauca monasteria in transitu numeravimus, quae subsistere nos praeter alia ibi agenda facient. Ibi literas a matre exspecto redux. Si quid tuarum, Mi Heinſi, addere dignaberis, ut de tuo itinere certus Londinum me tempori conferam, grates gratas agam. Quanta ibi, Deus bone! conjecturarum agmina agemus, si nos Imperatores Legiones nostras coadunato subsidio instruxerimus? Interim Vale. Novi Castelli. xiv. Kal. Apriles Stilo Juliano.

In agro Eborensi prope Carleton marmor hoc visebatur:

DEAE SURIAE

SUB CALPURNIO AG

RICOLA LEG. AUG.

PR. PR. A. LICINIUS

CLEMENS PRAEF.

III. A. IOR

in pede Saxi:

TUSCO ET BASSO COS.

Porrigitur ab hac urbe Zephyrum versus murus antiquissimus, quem Pictonibus a Claudio Caes. oppositum memorant Historiae. In eo aliquot vidi inscriptiones, quas per occasionem describam & tecum communicabo alias. Nunc vale.

1 Est mutilum apud Gruter. LXXXVI. 7. vide Casaub. ad Capitol. Antonin. Phil. 8.

EPISTOLA III.

JANUS VLITIUS

*Nic. Heinsio.**Leidam.*

Pomponium Melam, si commodum tibi fuerit, generose Heinsi, cras remitti mihi desidero. Quaedam, quae in eo & Periegete adnotasse memini, usu nunc mihi veniunt, dum supremam Gratio operam addico, quem cum comitibus suis a manu dimittere in Galliis decrevi; non adeo, quod liberos velim tam cito, quam ne ulterius molesti mihi sint. Si quid commendationis frontibus eorum a te, tanquam magno & tam celebri praecone, accesserit, poterit praecipitationis meae crimen aliquanto excusabile videri, si quidem sufficiens auctoramentum acceperint. Et omnino inopportunos fuero in refrigerando memoriam tibi, si non solita porro humanitate, unde confidentia suboritur audaciae meae, Vlitium tuum mactaveris. Percurrebam oculo jaculo nunc jam Halieuticôn fragmentum, quod Gratio meo stilus vindicat, & locutionum quarundum, ut ostendamus, mira affinitas. Ovidio quod ascripserit Plinius, memoriae lapsus dicendus est. Ejus non esse, quis dubitet, cum intimus Nasoniani Genii mystes Heinsiades meus abnegaverit? Si quid tamen in eo observaveris, ne me lateat, magni mea interest. Item quid ad ista Maronis:

Corpore tela modo, atque oculis vigilantibus exit.

Nam ex Manilio Gembl. adducebas aliquid olim, quo, *excit* legi volebas. Iter meum proxima septimana auspabor. Sed spero te cum *Kinschotio* hîc interim affore ob occasiunculam aliquam. Eodum, Nobilissime Heinsi, incolumem te servet Deus. Vale. nec oblivione omni dignum me judices, velim. Dabam Veneris Die, natali meo. Hagae e Musaeo CIOIOCXLI. XI. April.

EPISTOLA IV.

JANUS VLITIUS

*Nic. Heinsio.**Aquaſgrani.*

Ne ex me novi quicquam exquiras, *Brunonem* scito id negotii a me suscepisse, eique mandatum, quod bene curatum hac in re volui. Et quamquam non videris a me tale quid scriptionis expetere, ego tamen tanti credidi te nolentem compellare vel volentem, ut hoc operae pretio vel sponsum vel responsum a te exigam. Carmen dico, quod Gratius meus meruit, quod fidei tuae erit exolvere, si liberatam eam apud me voles. Age, Heinsiade, si quid agis, & quid possis ultra, quam aquae potiores hactenus, praesta. De re

Qqqq 2

litte-

mea gratia commendationis tuae jacturam periculitari velis. Non facies, si Horatianum sapias, ne

Incutiant aliena tibi peccata pudorem,

Sed quem commendes etiam atque etiam inspicias; quid de Ovidio tuo sentiat, quantum Maroni deferat, & an *laesos lepores* quam versus malit *δισκάζοντα*. Imo quidni, mi Heinſi, ſiquidem *σκάζων* eſſe debeat? Nam qui a recto aberrat, ſive parum ſive longius viam excedat, quid refert? Ἰσα γὰρ τὰ ἀμαρτήματα, ἢ τὰ κατορθώματα, inquiunt Stoici. Ita qui claudicat utroque pede, non magis a recte incedenti differt, quam qui uno. Sed

Quem penes arbitrium eſt, & juſ & norma canendi.

aliter uſus habet, inquires. Fateor. Si tamen alia exempla ſunt, ſatis apparet non voluiſſe uſu tanquam convento ſtare Martialem. Omitto jam, cujus maxime ratio habenda tamen eſt, ſententiae & ordinem & veritatem. Quid enim deliciarum habet *laeſus canis Gallici dente lepus*? Quid memoratu dignum Gallicus canis habet, ſi laeſum dente leporem refert delicatulo Baſſo, qui alias ille laeſum vulgo etiam referre ſolet? Ita te purumputum Rhenanum illud merum delectet, ita tibi fontes Spadani ſapiant, etſi non palato, ſaltem ſtomacho proſint, & cordi & ſaluti ſint, ut Baſſo ille laeſum leporem ne invid eas. Nec ego tibi Symmachum, nec reliquos, quos ſectaris codices, ipſo domino licet *πρεσβυτέρως*, invideo, o noſter, ſi modo τὴ κοινότητά τῶ φίλων cogitas. Ego ſane nunquam committam, ut ejus culpaſ jure merito reus ab ullo amicorum agi poſſim. Interim redditum tuum omnes optamus. Cum *Wallio* acris mihi interceſſit de thure in ſacris ab Idololatriſ incenſo diſputatio, illo thuribulum tanquam aras & focos propugnante. Ego gentilibus, quam Chriſtiano dignius eſſe oſtendere laboro. Haud dubie in redditum tuum vices ſcribendi & reſcribendi extrahemus. Leidae veſtrae, dum nuper eram, nihil proficitur. *Salmaſius* totus adhuc in Papam militat. De reliquis nihil audivi. Vacuna nunquam remiſſius regnavit, quam hac rerum prolatione. Notae Grönovianae etiam feriantur. Ipſe brevi huc tranſcurret, & ni fallor, feriis Julianis. Vale, Amicorum meorum Ocelle, Vale, Heros Nobiliſſime, & me, quod facis, amare ne deſine. Sic te ad nos incolumes incolumem reducat Deus O. M. Hagae v. Kal. Septemb. A. S. C. *MDCCXLV*. *Kinſchotius*, an te, citius reduces videbimus, eventu dubium eſt, niſi tempus praſcriptum, & illos occupas. *Jardinius*, cum quo heri Italice pransi, te ſalutat officioliſſime.

EPISTOLA VI.

JANUS VLITIUS

Nic. Heinſio.

Pariſios.

Quamquam omne ex voto tuo tibi iter ceſſiſſe gaudeo, eoque nomine tibi tuiſque gratulor, nihil tamen praeter votum meum & augurium id eveniſſe.

Qqqq. 3.

nisse literae meae, quas ad te Kalendis hujus mensis dedi directas, evidenter testari possunt. Est itaque & quod mihi de tanta εὐτοχία & dexterrimo augurio gratuler, & porro quid amicorum divinationi insit considerem. Hoc insuper nomine tibi gratulandum censeo, quod meliore consilio, quam quo hinc instructus abiveras, usus, *Sarravio* te permiseris, & tam moderato sermone *Salmasium* tetigeris, ut non temperaverit huic inexpectatae laetitiae suae ὁ δεινός, quin *Rivetum* ejus participem fecerit, & mirum in modum candorem tuum & ingenuitatem depraedicaverit. Addens porro, si ita te apud omnes gesseris, magnum meritis paternis & tuis vel hinc momentum accessurum. Voluit & *Rivetus*, cum *Sarravianas* mihi praelegeret, ut se autore hoc tibi suaderem: quanquam scio nihil eo opus esse, postquam semel inimicitiam omnem exueris, & animum odio vacuaveris. *Elsevirius* tandem ad te abiit, ita prope ablatus, ut verear ne mandatorum etiam post se memoriam relinquat. Eoque factum ut *L. Rhodia* penes me manserit, quanquam non magni intersit nunc an postmodo habeas, cum nihil in schedis istis sit, quod non a *Leunclavio* in Jure Graeco-Romano sub finem editum. Si tamen mitti tibi vis, imperata simul exequar, cum *Gratium* mittent *Elsevirii*, qui tandem publicum nactus est, & vespicitur aura aetheria. Exemplar ejus eadem occasione ad te etiam feratur curabo, vel ipse ab *Elsevirio* pro jure tuo petas. *Hulstae* obsidio optime (favente autumnus) vertit, uno *Spinola* refractante, jam utrinque cincto pluteis, & ferventissima manu quotidie oppugnato. Sunt qui hoc ipso mense, dato pignore, de occupanda urbe certent; ii, qui particulam proximi adjiciunt, modo ne post Idus Novemb. extendatur obsidio, plus mihi sapere videntur: illi vero non modice furere, qui xviii. m. florenorum pignore *Antverpianam* hoc eodem anno nobis cessuram asserere ausi sunt. Doleo sane, & porro ne mei id doleant item posterius, summopere vereor, *Gallos* adeo audacter publice *Gassionis* sui fortunae adscribere, quod cc. non amplius equitum praesidio omnes stationes hostiles perruperit, & hoc suo periculo Imperatori nostro viam ad *Translegianos* & *Hulstam* usque aperuerit, quam ille noster xxx. m. exercitui instructus ne v. quidem mensium spatio tentare ausus fuerat. Si lubet mendacia haec propius inspicere, praecedentis hebdomadis narrationes historicas repete. Sed cave interim ab istis saperdis. Vale, praestantissime *Heinsi*, & quod ego & *Kinschotius* optamus tibi ex animo, vive tibi, tuisque: is enim scriptioni huic interveniebat, ut *Voorburgium* ad nundinas me abduceret ἐκόντ' ἀεχόντι γε δῶμα. Cras *Leidam* imus. Nusquam adeo libandi aliquid salutis tuae deficit, & nulla, quae dabitur, peribit occasio. ὡς τάχιστα. *Hagae nostrae*, in pistrino pristino xvi. Kal. Novemb. ciciocxlv.

EPISTOLA VII.
JANUS VLITIUS*Nic. Heinsio.**Parifios.*

DUm decem circiter in castris moror dies, praeterierunt vices meae, quas *Kinschotius* & ego mutuo alternare tecum decrevimus. Eas vero jam non sine usura tibi praestabo. Primum tamen ut tuis respondeam aequum est, nisi quatenus *Kinschotius* noster partem laboris levavit. Ita is ipse, dum intervenit scriptioni huic, mihi asserit magna ex parte tibi satisfecisse, adeoque non opus esse ut in te absentem, quam in illum & alios cum illo praesentes, & aegritudini meae succurrentes, officiosior sim. Ignosce itaque magna praefato & amphoram exorso, ut currente rota urceum tibi propinem. Hoc est, quod agitur. Ego die Veneris castris excessi, & eopse die huc appuli. Adeo ego unus sacculus tibi sufficiam novarum rerum, quae inibi post expugnationem Hulstae aguntur. Obsidentur Moerspuya, Moncado, & S. Andreae munimenta: haec minori vi, illud summa omnino, & ne sic quidem satis expugnabile, ingruente hyeme & aquarum vi ingenti, quarum illic copia suppetit. Urbs expugnata, quam biduo vel triduo inhabitavi, ruinae quam Troja olim similior. Nihil integrum, excepto templo majori. Cordi mihi erat intelligere, quanta copia MSS. librorum ab exercitu nostro prostrata, & perdita esset in expeditione Flandrica, quos tamen summo fastidio intactos praeterierant plerique. Spero aliquos me brevi nacturum ab Equitum Praefecto adgnato mihi. *Zulechemius* non inelegans Hexastichon Gratio meo conscripsit, & simul epistolio, benevolentiae suae uberrimo teste, me beavit. Impedior sermonibus amicorum fritillum quatientium. Vale, Heros Nobilissime, & amare tamen me perge. *Kinschotius* te salutatur postridie natalium suorum XIII. Novemb. CIOIOCLV.

EPISTOLA VIII.
JANUS VLITIUS*Nic. Heinsio.**Parifios.*

NEgligenter nimis apud te, Heroum genus, praeterita hebdomade scribendi officio me functum esse memini, cum ipsi scriptioni vixdum inchoatae intercederent amici aliquot nostri, quos ad fritillum convocaveram. Multa etiam promississe, nihil praestitisse memini. Quapropter repeto vicem meam, & simul alteris tuis XI. Novembris ad me datis respondebo. Gratii exemplaria centum & amplius in Gallias miserunt *Elsevirii*. Ex iis tu, quot
vō-

voles, elige. Praeterca, si molestum non erit, sex alios pete, ut quatuor cum literis hisce *Menardo* Andegavum mittas per tabellarium, qui bis singulis septimanis, nisi fallor, eo proficiscitur: reliqua duo *Sarravio* & *Bulialdo* cum multa salute offerri cures. Vel si hic nondum ex Italia rediit, quod innuere videris, *Puteanis* asservandum in reditum illius committe. Mandarem etiam ipsis fratribus aliud dari, nisi jam memoria illorum totus excidissem, qui nunquam illos nisi in transitu, quo per Bibliothecam eorum in *Thuanacam* itur, salutaverim. Tu tamen, quod aequum videtur, pro arbitrio tuo age, & codicem *Gratii*, ab illis *Crommonio* in usum meos commodatum, considera. Amplius item *Petavio* Consiliario, quod pene oblitus eram, unum saltem depromi jube, & officio meo apud illum fungere. R. P. *Mersenno* Minimorum maximo & subtilissimo ingenio, quem Roma rediisse audio, unum quoque tradesis, si eoque jam excurris. Toto enim milliario illorum coenobium ab hospitio tuo, nisi id mutaveris, abest, non longe *Tulliano*. Nunquam tamen itineris suscepti poenitebit te scio, ubi semel humanitate optimi senis perusus fueris. Sed tu rerum tuarum satagis magis, quam ut me monitore indigeas. Quae tamen de *Sarravio* scripseram, ab ipso *Riveto* tui studiosissimo, non a me dictata tibi esse puta. Nequam isti, novarum rerum buccino facta atque infecta canenti, vereor ne potior pars id genus hominum consentiat, qui jamdudum voraci oculo opima novalia, & navalia nostra maxime oblimant. Audio illum ab asino ad bovem, & a bove ad asinum jam multoties desultoria quadam lubricitate devolutum, nec, quicquid malarum artium est, intentatum reliquisse quicquam, quo famem sustineat, usque adeo ut ad versificandi rabiem etiam elapsus fuerit. Tandem autorem simul ac typographum novellarum sibi suarum factum. Qui fustuario mulcandum strenue tecum censuerunt, & ipsi item Legato nostro, si id juberet, operam suam polliciti sunt, vidi unum atque alterum, qui proximo trajectu ad suos reduces facti, quos forsitan nosti. *Tulpius* certe ad id praestandum viribus & animo mihi par visus est. De *Zinzibero* quod scribis, mirum magis, quam novum mihi est. Is enim ipse ante triennium, dum Andegavi agerem, ostendit mihi multa, quae contra novas *Salmasii* de mutuo & uluris opiniones moliebatur.

Quid dignum tanto feret hic promissor hiatu?

Nisi forte ut uxorem suam, quae mutuo alteri jampridem cessit, alienatam a se doceat? E re itaque magis boni viri erat, ut quamvis mutuatariam factam, non alienatam crederet, si nondum fera bestia modo facta sit, & revertendi animo apud adulterum haereat. Quis credat post duos Belgas, & geminos Germanos, alterum Gallum in eadem arena deplumare difficile negotium Antagonistae nostro fore? Credo actum aget, nec impune: cum infectum volet, quod citius aut omnino non factum oportuit. Jube tamen *Elsevirium* exemplar unum vel alterum, simulac prodierit liber, cum illo, quem comparare mihi discedens promisit, data occasione ad me mittere quamprimum: nisi forsan ipse auctor aliquid mihi daturus est, quum sane ipsi *Gratium* per *Menardum* offerri mandem. Quid novi hic agatur, paucis dicam. *Boyus* dignam se Epigram-

grammatum farraginem Hulstae devictae illufit. *Zwylechemius* etiam aliquot utraque lingua composuit, quae videre te volo. En & aliud ejusdem, de quo memini proxime scripsisse, inter amicorum meorum versus suo loco inferendum. *Bruno* etiam e multis plurima, cum Leidam mecum nudiotertio iret, recitavit, quae ut ederet, autor fui; ut auctoritati meae cederet, nondum obtinui. Spero tamen non detrectaturum, simulac Heros ipsius iudicio meo subscripserit, qui crastino hîc cum Principe aderit, ut dum perendie Vulcanalia celebrentur, laetitiae nostrae dator ipse intersit. *Rivet* *Grotium* depectere pergit non exiguo nimis libro, ut ipse spondet. Vale, meae & omnium Belgarum Deliciae, Heinsiade Praestantissime, & amare perge Vlitium tuum ἀπλως. Daham festinanter XII. Kal. Decemb. CIOIOCXIV. Hagae Comitatus. Nota bene me *Volcanalia* dixisse, quia viae tum fere *vol canaille*, & plebecula scatent. Ride argutias meas, modo ignoscas impudentiae, qua tot molestias tibi pario. *Kinschotius* proxime respondebit, quia versificatur Hulstae, Gallica ode.

EPISTOLA IX.

JANUS VLITIUS

Nic. Heinsio.

Parisis.

Heros praestantissime. Nisi omni modo vices meas & officium tibi probare meum gestirem, erat quod in justam excusationem allegare poteram, sive silentii, sive brevioris, quod aequius videretur, responsi. Non fritillum, non veteris codicis inspectio: sed convivium biduanum, quo *Kinschotius* Σπυβατήριον suum hilaritatis memoriae consecrare, & tristes habitu suo amicos laetiore poculo fallere decrevit. Hodie inter conjuges, cras inter juvenes innuptasque puellas sacra illa, non sine Cerere aut Baccho, nec forsân absque Venere, quae ut frigeat metus nullus est, solemniter peragenda sunt & pervigilanda cantibus. Nec enim deerunt, Opimianae notae fonte rigati, *Kinschotius*, *Wallius*, *Crommonius*, &, ni fallor, ille ille, quem nominare sufficeret, nisi jam scires a tali caetu abesse non posse. Verum ne praepropere eo abripiatur, quo totus gestit, animus meus, paucis primum multis illis tuis petitionibus & jussionibus respondebo. De gemino exemplari Gratii non est quod imputes, nec gratis tibi cedere, si bene supputas, putes. Apud *Boswelium* brevi causas tuas perorabo; quanquam praeter consilium meum id nunc acciderit, ut negligentiae tuae potius, quam festinationi, quod tibi videtur, patrocinandum sit. De *Zinzibero* sententiam non muto; sed omnino placuit lepidissima illa tua, & nihil illi profutura unquam defensio. Erras vero, si quid praeter salem & mensam, aut eo animo a me dictum quicquam reris. Amicitiam nostram & Jovem hospitem testor, nunquam me scivisse inter illos ullo gradu quenquam ad te pertinere. Imo etiamnum nihilo certior sum: nisi *Lu-*

Tom. III.

R r r

cium

cium illum extra pellem suam mihi constituere videris, sub qua ego semper *Vinnium* latuisse credidi, & a plurimis mihi persuasum habui. Noli tamen propterea me incomitari. Caeterum quod de *Salmasio* melius, quam istis omnibus sentiam, vehementer nimis decipior, si non in eo etiam tu mecum *ὁμοφροσύνης*. De Phoenice illa nihil dico; quae non minus omnium iudicio, & meo etiam, excellit, quam deplumator ille operam perdidisse in deplumatione ejus censendus est. Quid tamen ad hanc cuculus aliquis, aut id genus alii? Non ita argumentantur cati homines; ut vitulum qui sustulerit, bovem ferat: qui leporem aut ovem vicerit, leone etiam validior existimetur. Melius itaque & tu, si sapias, de amicis tuis opinare. De novatoribus illis, quos dicis, plurimi hîc & ibi, inter quos agis, sunt qui aliter judicant. Non homines, sed res ipsae considerandae. Corrigere itaque antiqua, quae longo abusu a veritate deflexerunt, omnino licet. Vide ea, quae *Tertullianus*, *Arnobius*, *Minutius*, & alii pro novatione, quae illis objiciebatur, religionis, & quae reformationis nuperae autores & defensores in pari causa calumniatoribus suis opposuerunt: eadem videbis argumenta in omni dogmatum correctione militare. Sed super eo non est, mi *Heinsi*, quod contendamus. Transeat illa qualiscunque tibi visa est suspicio, & serio mecum in gratiam redi, qui totus amore tui ardeo, si sincere vis me loqui. Absit omnis verborum fucus, quae, ubi deficit aliquid consummandae amicitiae, in complimentum vulgo invicem obtrudi solent. Perge itaque amare, quod facis hactenus, & illibato affectu prosequere tuum ex omni animo *Janum Vlitium*. De Angliae statu nihil praeter debitum sollicitus sum; multo minus nunciorum, qui facta infectaque ad satiem nobis cotidie narrant, sectator. Odi istud hominum genus, bilingue, duplex, turbatores universorum commerciorum, & rerum publicarum. Quare etiam ut meo exemplo ab illis caveas moneo. Latet anguis. *Gronovius* prole mascula auctus, ut scis, quam ego, ne nescias, suscepi a baptifmate, salutari te voluit, & in memoriam tibi revocari, quae in *Livio Petaviano* & *Regio* inspicienda mandaverat, ut inspiceres. Sed, ohe! jam ad patinas. Vale, Deliciae meae, *Heinsiade* εὐγενέστατε; & hem tibi ter, ter etiam *Lisae* tuae, quicquid est: ἀμυσί, nequid fallare.

EPISTOLA X.

J A N U S V L I T I U S

Nic. Heinsio.

Parissos.

Q UOD hactenus ad te scribere distulerimus *Wallius* & ego (quanquam elegantissima tua Elegia in venerationem tui toti proclives redditi) ipse tibi imputa, mi *Heinsi*, qui Italici itineris scrupulum nihil tale sperantibus injecisti, quasi jamjam eo abripereris. Quid namque restabat miseris, nisi ut solemnibus votis & precibus pro salute tua susceptis (de qua sollicitos nos reddide-

ras

ras summopere, ne coeli solique ac soli mutatione turbaretur) abeuntem potius comitemur, quam Parisiis absentem compellaremus? Jam vero, ut ex *Brunone*, qui Parenti tuo apud *Graswinckelium* diversam longe a tua sententiam pronuncianti affuit nuper, intellexi non ita diis visum superis, lubens ac laetior aliquanto ad literarium hoc nostrum colloquium redeo. Et primum de exemplarium distributione gratias tibi ago, quam pote, maximas; & quod mandati, quasi id excessisses, reus fieri anxie nimis vereri videris, eo nomine securum te esse jubeo. Tum quod *Sengibero* ea, quae Andegavenfibus destinaveram, commiseris, perquam opportuna occasione usus es, ut & duplici illum damno mactares, & dupliciter mihi satisfaceres: quia sic & opera sua, & mutuo illo (quod vere alienabitur, siquidem ita vult) mihi tenetur. Caeterum rogo, ut iterum, vel, si forte ab incommendato tantum negotii obtrudi potuit, jam saltem me ei commendes. Nam si ob eā, quae nuper tibi super ejus cum *Salmasio* contentione in aurem dicta volui, me homini iratum, atque adeo id fieri nolle putasti, nae tu, quae joco dicta sunt, pessime interpretatus es. Amplissimis *Sarravio* etiam ac *Petavio* iterum atque iterum commendanda, & quod tanta expectatione frustratus illos sim, quantum debet ob libelli tenuitatem & inficetias, quem non talem expectaverant, etiam atque etiam excusa. R. P. *Merfennum* cum accedes, ab eo saluta, qui *Beverovicii* literas cum libello ejus de Calculo, ante fere quadriennium ipsi tradidit, tumque aliquoties revisens modo Bibliothecam inspexit illo duce, modo Musicen docentem audivit. Nam a nomine vix puto me cognoscet: quia id, quod scribo, non *Vlitium*, sed *Ulitium* τετεγούλλαβον pronunciant Galli: quod autem ore profabar, alii *Welit*, vel *Velit*; nonnulli *Hulict* vel *Vulit* scribebant. Eodem errore quo *Kinschotium*, dixere & scripsere *Quinxotium*, quasi cognominem Fabulatoris Hispanici, vulgo notissimi, cognomento Manicati. Noster ille Monasterii serio ac sedulo Pacificis Dominis suis, qui haecenus salutant tantum & salutantur, operam navat, & rerum, quae illic agitantur, salutationumque illarum septiduana nobis Ephemerides concinnat, ac transmittit. Quales siquidem & tu requiris, ab eo petas malim, quam ut me negligentiae accuses, quod de morbo Principis, quasi non ipsa hiems perpetuus illi morbus esset, certiores te non reddiderim, atque ea sane tam acris nunc est, ut nulla hoc saeculo, citraque viventium memoriam par fuerit: fortean nec illa, quae in Kalendario annotatur ad annum cixcxiii. gelu suo maris aestuaria aliquot occupasse. Quod enim nunc est frigus, quo omnia Germaniae flumina, ne Danubio quidem excepto, usque ab fontibus suis consistunt, adeo durabilius & vehementius est, ut tota maris nostri ora glacie praetexta sit: quae in speciem aggeris ita excrevit, ut tanquam obice facto nec appellari nec deduci lembi possint, nisi validissimis ferramentis & labore maximo dissipetur. Ita & fori nostri piscarii celebritas jacet, & salsamentariorum commercia frigent per omnem fere Bataviam. Cespitibus & stipitibus res strenue agitur: sed & horum cum inopia caritas in dies crescit: quam ego quidem non moror

Dum meus assiduo luceat igne focus;

Rrrr 2

Sed

Sed illi, quibus quotidiana eleemosyna producit vitam ad miseriam, impatientissime ferunt tam diuturnum frigus, & duplex dispendium etiam ejus, quod non nisi precario habent. Καὶ ταῦτα δὴ μὲν ταῦτα. Ut eo, unde abii, revertar, quam putas opportunum mihi aut commodum tam frigido coelo auras & rumores hominum captare, ut tibi nihil tale quid sentienti frigida manu & calamo gelato transcribam? *Wallius* vel a tota scriptione excusari jam posse confidit: mihi apud te venia nulla sit, nisi ex lubitu tuo totus obrigeam? Nam quantillum id erat, quod diem & consulem non ascripserim, qui nec mei forsitan ad ecstasim usque frigentis tum meminerim? Bona verba, quaeso, mi Heinssi, & expiare me hoc piaculum aliquando sine. Imo vel jam, ne iterum quid committam, ea tibi narrabo, quae foris ad meas aures intra privatos parietes agentis advolarunt. Principem Guilihelmum Gallias cogitasse, praetentu inaugurationis suae, qua Arausionibus initiandus esset, animo revera apud Parisios Bacchanalia, quae instant, libere celebrandi. Quod cum Proceribus inoluisset, quorum arbitrio negotium hoc permiserat Pater Patriae, non tantum institutum improbarunt, sed & Patri idem haud dubie meditati persuaserunt. Ne itaque totus proposito suo excideret, eo quod ex conjectura mea intellecti, idem hinc absolvere decrevit, omne genus choraularum & saltatorum convocando, qui proximis feriis in tot conciones, quibus e suggestu quotidie in Aulicos furores invehuntur Theologi, splendidissime debacchabuntur. Unus ex illis nostratibus misterii Evangelici ministris non ita diu pro concione agitavit, cum Idololatri pacem non ineundam esse, & Asam ideo Pedibus aegrotasse, Θεραπεύμ. lib. i. cap. xvi. Quod non ita Pater Auriacus, quasi ad se pertineret, podagra affectissimum accepit, quam Gallorum residens Legatus apud Ordines questus est, contra conventionem publicam id intentatum. Illi ergo coram adesse jusserunt, reprehensumque dimiserunt arte oratoria male usum Technaeum nostrum. *Gronovio*, quod volebas, significavi. Is proxime vii. viris ad Negotium Pacis Legatis Daventria Monasterium discedentibus περὶ ἐμπλήκων prorsus oratione scripsit. *Claudius* noster praeter geminum Militiae opus, quod utraque lingua cuditur, etiam aliud quid ἐπιστικὸν meditari dicitur. Vereor ne is homo ad ingenium redeat, & vel *Cypriano*, vel *Singiberi* libro, antequam prodeat, anticipatorie respondeat. Item illud Mauritiados opus, quod dudum apud te memini vidisse, in lucem prodit, a Lamaerio cubitum longis literis in foliis integris excusum, tabulisque aeri incisis non paucis nec vulgaribus, quarum archetypa in atrio Mauricii Comitis ostenduntur, splendide ornatum, ne pretium operae desit, aut materiae opus. Ipse Φιλαυτώτατ^{ος} author amplissima, quod ajunt, in forma palliatus frontem operis sui occupat, tanto Elogio maectatus, ut vel Maro ei possit invidere, vel parciori contentus esse, in cujus aemulationem xii. Libros augustissimo numero clausit. Quare mirum videri non debet, tanto Heroi miserum & plagosum Priscianum impune toties vapulare; ut cum primam in *propitius* producit, in *flagitat* corripit, & ultimam in *Iber*, quanquam hoc ego ferre poteram;

1 *Franciscus Planta* qui *Santrae* nomine in saturnalitio Lusu Heinssii est nobilitatus.

teram; nisi *Bruno* id inter plura alia annotasset, quem recensionem ille praefecit; postquam sero rescivit, Patrem tuum aliosque viros poëtas, quibus legendum commiserat, veritatis odio obsequium praetulisse. Idem ille ὁ δῆνα in Lauro Hulstica, non exiguo poemate, eadem autoritate primam in *detur* bis corripuit, ne qua scilicet mora etiam in re fieret, quia bis dat qui cito dat. Non aliter sane ac ille, qui ut legendo

Venit ad Euphratem subitoque exterritus haesit

Ut cito transiret corripuit fluvium.

Secunda puta in *Euphrate* correpta. Frustra tamen id expectat etiamnum. Et Princeps, quanquam prolixissime de se meritum, parco admodum praemio, verborumque ejus compensavit; centum nempe florenis non numeratae sed promissae tantum pecuniae; quantum & *Brunoni* & *Boyo* addictum: *Kinschotio* triens additus: *Thysio*, & ineptissimo omnium declamatori, qui se Regium vatem jactat, alterum tantum: *Barlaeo*, solitum & annuum fere stipendium, trecenti. Sunt & alii, quos non memini, aut non novi, minorum gentium Panegyristae, an Panagyrtae dicam? Feracissima enim mendicabulorum haec nostra tempestas. Prædiit haud dudum *Valeriani Sigismundi Rozzen*, Theologi & nobilis Poloni (de se si creditur ipsi) *Astra inextincta coeli Batavorum*, horribilis liber, quem potius fuerat δόμον εἰς Αἴδαο περῆσαι; nisi ventri auctoris, cui fame alias pereundum erat, ita unice consultum videbatur. In eo ille multos laude indignissimos eximie laudavit; alios, qui potissimum merebantur, aut parce admodum, aut omnino praeteriit; nec Latine, sed Barbare mihi loqui videtur. Ignatii Epistolae a *Vossio* propediem edentur, ὡς αὐτὸς ἔφα. Ego de Antichristo novam opinionem & diversam fere a reliquis, qui hodie id agunt, procudo, & totus in SS. Patrum lectione sum. Eadem opera Idololatriae tam Gentilis, quam Papalis, originem ac progressum ostendere laboro, nova prorsus methodo. Nimirum illam ex ceremoniis Judaicis autore Diabolo, eodemque Antichristo, propagatam, & a Gentilibus iterum ad Christianos transcriptam. Longa est narratio, longae ambages. Verbum itaque non addam, praeter solemne illud, Vale, Heinse, decus meum, Praestantissime, & amare me persevera Tuum & πάντα Vlitium. Dabam raptim, frigida manu, quanquam solvente se gelu. III. Kal. Febr. MDCCXLVI. Hagae.

EPISTOLA XI.

JANUS VLITIUS

Nic. Heinsio.

Parisiis.

O Rbis delictum. Nae tu brevi responso literarum mearum odiosae prolixitati abunde respondisti, & paucis plura, quam ego, immanibus verborum periodis, complexus es. Quanquam est iterum quod causari possim, ne descriptione avocer a necessitatibus meis, nolo tamen absque auspiciis nostris & pre-

Rrrr 3

cibus

cibus votivis iter illud tam inexpectatum aggrediare, neque votis incommittas Italiam accedas. Quid itaque felix tibi, faustumque tuis; & reipublicae nostrae salutare sit, maxime literariae illi, quae totam in te uno nunc spem fovet, *I sequere Italiam ventis*. Patavium ubi adveneris, memineris promissi, quo mire me desideriumque nostrum excitasti. Bononiam vero postquam transiveris, noli S. Salvatoris coenobium vel mea causa illustratum praeterabire, in quo Nemesiani liber de Aucupio jam olim reconditus asservatur, siquid ¹ *Gesnero* ita in Bibliotheca sua tradenti fidei tribuendum. Sin migraverit inde, facili negotio inquirere poteris, quo translatus sit. Age, nobilissime Heinss, & heic patriam tuam agnosce, & famam auspicare, quae inibi patriis remigiis dudum tibi praevelificatur. Euge, optime merito nihil alienae commendationis ad amorem, quique illic vigent, bonorum hominum conciliandum opus est. Tuo vel nomine vel nominis praevio rumusculo rigidissima Bibliothecarum claustra ipsemet referabis. Quid vero illam Venerem tuam, quam prostitutam aliquando tandem gaudemus, ut publici juris non scortum, sed corculum fiat, loquar? Nae tu sapias, qui Italorum libidini sic serio te applicas. Nos interim Junonem Lucinam invocabimus, sed domesticam, quae iterum prospera nobis fuit, ut parienti parentique subveniat. *Brunonem* parum abfuit quin hodie ad officium erga te reduxissem: rediturum brevi, non dubito. Ita amnestiam dolet, poenitetque incogitantiae. *Kinschotio* etiam hodie salutem a te mandabo. Salutat ille & te. Sed illi Pacifici, non pacem, sed monstri aliquid alunt. Proximo heptiduo & nos hîc strenue bacchabimur, ut vicem illis reddamus, qui paci publico ludibrio insultarunt. Scis quid rei actum sit in natalitiis Dunensis Comitum. Intervenit scribenti *Wallius*, & ut apud te intercederem de negligentia sua salute plurimum dicta voluit, nisi forte citius hinc dimissus scriptioni vespertinae (quod tamen myopi salubre non fuerit) vacabit. Vale ergo, & plurimum Vale, Heinss praestantissime, ac spatio illo, quo a nobis porro divideris, metire affectum, quo nunquam vel latum unguem a te abscedit. Hagae xxvii. Febr. sive pridie Kal. Martias cxcxcxvi.

¹ Rectius, in Epitome aucta per *Simlerum* & *Frisium* dixisset. Fragmentum, sed sparsum, edidit Vlitius post Nemesiani *Cynegeticon* pag. 34. Ridicule vero hunc *Olympium Nemesianum* in duos Poëtas divisit *Clericus*, in *Arte Critica* cap. 2. ubi commendat *Eclogas Olympii & Nemesiani*: quod nescio cur memoriae vel calami lapsu accidisse credat *Cl. Fabricius*, cum sequentia verba de duobus eum serio agere ostendant, & pag. seq. repetat idem ignorantiae specimen, cum *Janum Vlitium* edidisse *Gratum cum Olympio & Nemesiano* scribat, quos ego ad eum usque diem Criticum illum inspexisse numquam puto, sed ex indice aliquo novisse.

EPISTOLA XII.

JANUS VLITIUS

*Nic. Heinsio.**Parisios.*

Orbis deliciae politioris. Binis tuis quod simul respondeam, iter Amstelodamenſe effecit; cui acceſſit biduum, quod popularibus tuis & penatibus, optimoque Parenti rediens impendi. Deus bone! quam volupe mihi fuit ipſum te quaſi praſentem recordari, ubi in ore tot illuſtrium animarum, quas cubiculum iſtud habet, apud optimum ſenem de amicitiae noſtrae incunabulis, & aeterno vinculo non ſicco ore teſtari licuit. Aderant affinis *Goefius*, & comes meus *Richter*, ſi fando id forte tuas pervenit ad aures amiciffimi ac ſtudioſiffimi hominis nomen. Ibi de ſumma republica non deparcus, nec temere divulgandus ſermo. Multa ſuper foedere & conjugio inter Gallicum Puerum & Infantem Hiſpanicam, ſalute noſtra dotandam, ac mira in pernegando conatum ſuum Gallorum pertinacia: multa item de reditu Legatorum, & *Eſtradae* legatione: ſuper te vero ac itinere illo, quod moliris, quamplurima ac ſummo affectu egimus, quaſi de ſalute tua in medium conſulendi. Audivimus etiam ea, quae pudor tuus ex aliis quam ex te audiri maluit: ſcilicet quo honore apud utriuſque ordinis praecipuos viros exceptus ſis. Nihil non lubenter accepimus, quod ſummam exiſtimationem tibi conciliare videbatur. De itinere tamen ſubdubitatum, an aequae proſpera fama te ad Italos ſecutura ſit, & an non melior virtus ſit partam tueri, quam hac deſerta novam quaerere. Viſus eſt (ut pace tua dicam) non ita ex animi ſui ſententia, quam ad deſiderium tuum votis tuis ſubſcripſiſſe amantiffimus tui Pater, ſubſcripſit tamen. Ergo, quaſi eo indigeres, ac noſtri res arbitrii eſſet, aſſenſimus & nos, & quod felix fauſtumque ſit, more majorum litantes, vovimus unanimiter, atque ita diſceſſimus. Poſtridie ubi domum redeo, ſiniſtro de *Kinſchotii* noſtri deſperata propemodum valetudine rumore primum adveniens percellor, patremque fere conclamantem de unico haerede invenio. Revera aeger erat, & duobus medicis jam commiſſus: ſed acceſſerat rumor jam diem obiſſe; ipſo tabellario id Monafterii percrebuiſſe referente. Dum angimur, dum fletur, ſupervenit alter cum ipſius literis ad Patrem, ad *Wallium*, ad *Brunonem* (nam & hic pro me ſcripſerat) ad me, & hiſce, quas vides, ad te mihi commiſſis. Salva res eſt; convaluit, aut ſaltem convaleſcit. Tu tamen tutius ac ſimul timere amico noſtro & tam caro capiti, ſimul gratulari poteris. Sed jam literas tuas repeto. Quae ad *Gronovium* mandavi, perſcripſi heri. Exemplaria Poëmatum tuorum, quibus ventos ſecundos precamur, cum appulerint, (quam deſideria noſtra morantur) ex periculo recitandis nominibus reddi curabo. Etiam *Brunoni*, quia ita ſedet ſententia, quod reliquum erit, puta reſtim & ſequeſtria, ex aſſe relinquam, ne quid incurioſus mandatorum tuorum

exc-

executor cenſear. De Epigrammatis in Papam, gratias habeo. Recitavi heri ea apud Ill. *Boswellium* praefente *Jardinio* meo, abſque quo fuiſſet nihil intellexiſſemus: ſed etiamnum interprete meliore opus eſt nobis; utque tu is eſſes, rogatum te voluit ὁ δεῖνα, utque adderes tertium, ſi vacat. Salutavit te uterque quam humaniſſime. Quod tamen apud hunc profeſſus ſum ¹ *Gaulminum* pro authore haberi, id mihi ne ſuccenſeas, rogo. Muto dictum puta. Addebat ipſe credibile videri, quo idem ante xv, aut amplius, annos verſus admodum virulentos & ſatyricos publicarit, quos editioni Erotici cujuſdam Graeco-Barbari autoris adjecerit. Quod de Nemefiani ἱξευτικοῖς & Calpurnio promittis, pergratum feceris. Cogita & de Demetrii Conſtantinopolitæ κωνηγετικοῖς, quae me nondum potuiſſe videre conqueſtus ſum in Comm. ii. pag. 364. ſed tandem nactus ſum ex Editione Pariſienſi. Si terra Italiam petis, aut ſaltem Tiguro redis, quaere ibi in Bibliotheca publica, quae in pontis limine lacum proſpicit, Gratii &c. editionem ² Tigurinam, & a quo ad quod exemplar procuſa ſit. Nam Profeſſor ille, ad quem cum *Kinſchotio* nuper ea de re ſcripſeram (qui literas tibi Lugdunum curandas commiſit, nec neglexiſſe te confido) nondum reſpondit. Nomen excidit, ſed tu fortaſſe meminiſti. Scripſeram & ad *Taubmannum*, qui ibi concionator eſt: neque is reſpondit. Quam Opinionem de ea Editione in Proleg. ad Gratium habui, vereor ut me deceperit. Vale, φιλατατον κάρα, & diis ducentibus i atque redi. Dabam ὡς ὠκιστα, x. Kal. Aprileis, ciciDCXLVI. Hagae.

¹ Vide Henſii Epift. ad Gronovium cxxxv.

² Hanc prodiſſe A. MDXXXVII. dicit *Barthius* ad Nemef. Eclog. i. vs. 67. & paſſim in notis eam laudat, ſed ſuſpectam ſibi Barthii fidem oſtendit Vlitius in Prolegomenis p. 87.

EPISTOLA XIII.

J A N U S V L I T I U S

Nic. Heinfio.

Venetias.

ETiamne in Galliis haeres, Heinfii Suaviſſime, quem dudum Venetiis compellavi? Ita jufferas. Quamdiu ſit, recte nescio. Computo tuo inſtituiſſe me certe ſcio. Et jam totum menſem Bredae ago cum univerſa familia & domo mea. Interim afferuntur tuae Lugduno viii. Maji in procinctu datae. Poëmata tua an appulerint ignoro. Curabo tamen, abſente me, commode per alium diſtribui. Nondum enim domuitionem cogitat animus noſter, qui mire loci hujus genio & ruris vicini deliciis capitur. Accedit totius aulae & ordinum generalium, & quicquid eſt in patria noſtra domi militiaeque majorum gentium, in eundem locum confluxus. Nunquam tanto hominum coetu Breda ſuperbuit, quam hoc ipſo tempore. Quicquid agendum erit (de quo per compendium ab iis, qui huc ex omnium ordinum conſeſſu ad hoc delegati ſunt, deliberabitur) haec ipſa belli pacisque ſedes futura eſt. De Pace ut melius

melius speremus, suadent plurima. Nuncii ex Brabantia, & ipsa Hispania continui. Brabantinorum praesidiorum, quae nobis objici solebant, evacuatio, & universa eorum vis in Gallos conversa. ¹ Academiae in hac urbe, sive Collegii Auriaci (quia Principe autore & institutore) erectio. Professores quinque electi, praesentes, & brevi inaugurandi.

I. *Renessius* Past. hujus Eccl. Theol. Prof. & praeses Coll. Aur. futurus.

II. *Brosterhusius*, Botanices, & Gr. Linguae Prof.

III. *Kyperus* Med. Prof. & Math.

IV. *Philemon* Histor. & Juris Prof.

V. Ignotus mihi Philosophus. Inaugurationem, quae proximo mense fiet, praecedet biduum Supplicationis. Quae omnia retro caderent, aut successu felici saltem carerent, si ipsa urbs porro tanto praesidio, ut hactenus, occupanda esset: puta cohortibus minimum quinquaginta, id est, hominum millibus quatuor. Non bene enim conveniunt in eadem sede armorum & literarum studia. Atque hinc quidem Literariae rei status, quem necessario sequitur publicae rei restitutio, & securitas. Quae, me iudice, non procedet, nisi invito Gallo, qui mire ad omnem nostrorum capitum conjunctionem ringitur, & nodum in scirpo quaeri jubet. Quos ego! sed motos praestat componere fluctus. Quamdiu enim in tot bellorum oceano versamur? Nunc ad summam res redacta est. Aut nunc semel quiescemus, aut nunquam. Auriacus Pater bene se, pro aetate & afflictu corporis, habet. Utitur utroque *Zulichemio* secretorum ministris. Excitavit nuper omnium indignationem foedum ² *Philippi* Bohemiae Principis & Venetorum Imp. designati facinus, quo *Espinocum* in ipso foro & mero die propria manu obtruncavit, fugientem & inermem armatus, solum auxilio sociorum ad id assumpto & ministrorum septus, sceleris participum; inopinum insidiator. Advenit huc Patrocinatum reo, Domino suo, cui a secretis & consiliis futurus erat in Expeditione Cretensi, *Petrus Grotius*: sed frustra praecoccupatos abominatione omnium animos tentat. Galli quinquaginta, hausto in id vino, sanguinis singulorum guttis aliquot mixto, in vindictam quovis loco modoque peragendam conjuraverunt. Non dubito, quin in Angliam transfretaturus sit reus, infelicis domus infelicissimum incrementum an excrementum dicam? Quid agat *Kinschotius*, ex ipso malim resciscas. Bene valere, proxime significavit in iis, quas xv. Kal. Junias Monasterio ad me dedit. Galli Cortracum pressio pede obsident, frustra aliquoties obsistente Hispano. Urbs, quantumvis valida, & bis mille hominum praesidio munita, non ultra octiduum putatur posse defendi. Hinc illis prona via Gandavum erit. Ego eventum consiliorum hic praestolabor: ut, si induciae concedantur, Antverpienses & Bruxellanos amicos revisam. Si bellum continuatur, Artverpiae ob-

¹ Vide Aitzemae lib. xxvi. principio, ubi & *Tauberus* sive potius *Dauberus* Juris Professor, *Bornius* & *Rouwsius* Philosophiae memorantur Professores. Caruit vero successu hoc Gymnasium, & brevi dilapsi, qui studiis operam dabant.

² Aitzema hanc caedem narrat libro xxvi. sed tacito *Philippi* Principis nomine.

obsidio interfim, de quo non dubitatur. Exercitus omnis brevi hîc futurus est, ut, quam persuaderi sibi non patiuntur, extorqueamus miseris conditionem. Tu interim quid agis? quo vadis? Romam? non puto. Nec Venetorum turbæ te forsan delectant. Paduæ vel Bononiæ hærebis potius. Tum, quid promiseris mihi, cogita. Literas tuas Hagam optime destinabis, quia certius. Has Antverpia tamen accipies. Sed nescio quamdiu hîc subsistam. Vale, præstantissime Heinſi, & cura salutem maxime. Saluto te osculatim. Quid *Schoppius* agat, fac ſciam; Quid Papales copiae, & quibus adiutoribus. Dabam raptim (quia in antiquam illam Abiegnam ſilvā feſtinabam) Bredæ III. Kal. Quintil. A. S. N. CIOIOCLVI.

EPISTOLA XIV.

J A N U S V L I T I U S

Nic. Heinſio.

Florentiam.

U Nicas tuas, poſtquam Lugduno abiſti, nec uno exaratas tempore, Kal. Novembris, Florentia accepi, Heros ἀνεβήλεſατε. Non exprobro tibi incuriam; ſed mihi gratulor, de reſtituta valetudine tua citius, quam de morbo, nuncium habuiſſe. Quanquam ſemper de inſtituto iſthoc mali aliquid præſagiit animus: idque tibi nondum ad id procincto ſignificare memini. Sed cum patris voluntati tui jam derogatum eſſet, leve erat meum ſpernere conſilium. *Rheimſus*, quo duce gloriatus ſæpe es, nae ille malam præcivit ſemitam. Benerte, quod recta aberrantem deſerueris, etſi parum audio abſuiſſe ut ſequereris. Non placebat moleſtus ille per Alpinas regiones tranſitus, aëris intemperantia, & coeli, æſtatiſque inclementia: tum periculosa valetudinario proſectio, ac iſtius orae linguaeque imperito incommoda hoſpitia. Gaudeo tamen, tibiſque gratulor, vel nobis invitis, id tibi alia via, tui ex animi ſententia, optime ſucceſſiſſe. Ea gratia hos effudi Phaleucos. Vides quanto affectuum æſtu modo huc, modo illuc abreptus fuerim. Parum mihi ſatisfacere videbar, niſi idem, in quo exprimere me & tibi probare volebam maxime, bis terque more meo repeterem. Multa etiam deſcribenti acciderunt, ut ſolet, quae prioribus etiamſi nihil meliora eſſent, tamen ἀκμὴν ſuam urgent, & momentanea, ut ita dicam, allubentia iudicium corrigentis turbant. Ita nata haec tibi Phaleucorum Farrago, corniculæ inſtar Aëſopicae aliorum plumis undiquaque adornata. Nec quicquam de ea addo, ne commendare tibi potius, quam excuſare, videar. Affectum tu modo boni conſule. Nunc ad tuas reſpondeo. *Gronovius* brevi hîc erit, curarum ſecundarum in Livium excudendum volumen adferens. *Salmaſius*, poſt librum de Tranſſubſtantiatione, vel militat, vel mutuatur toties recoctam cramben. *Wallius* promiſerat ſuas meis juncturum ſe, ſed vadimonium deſeruit, Delphos proſectus. *Brano* proxime meo hortatu ad officium rediturus eſt: nolit enim munere tuo carento hanc

hanc otiositatem pensare. Parens tuus nobis exemplaria tua distribuit. Grattias habeo maximas. *Viquefortius* heros negat se ullas ab *Isaaco* literas ad te habuisse: sed haud dubie Fratri traditas existimabat, qui Amstelodami agit. Publica *Kinschotius* docebit, cujus manibus haec tibi mittenda sunt. Vale, mi anime, & hoc sedulo cura, ut angore nos liberes. Si enim me amas, saepius rescribe. Dabam cursim x. die Septembris CIOIOCLVI.

AD NICOLAUM HEINSIUM,

cum, incerta valetudine profectus, Florentiam salvus advenisset,

FARRAGOPHALEUCIA.

HEINSI, Castalidum chori sacerdos,
 Sincerae columen Latinitatis,
 Proles unica maximi Parentum;
 Nunc desiderium dolorque summus
 Optimi senis, optimi Parentis,
 Ac tot, quotquot habes, amiculorum:
 Quis te nam furor abstulit, domosque
 Ignotas petere, & procul remotam
 Cedentemque retro magis magisque
 Fussit Italiam sequi per undas?
 Quaenam tanta agitat tuae salutis
 Desperatio te, malusque morbus,
 Ipso vel Jove non probante, anbeli
 Iras spernere ut audeas Leonis,
 Vesanique ruens Canis per ora
 Fluctus scindere cogites Etruscos?
 Nulla te rabies furentis Austri,
 Nullus te rabidae furor procellae,
 Nec tot naufraga saxa, uberisque
 Colles acriter imminentis Afri
 Nullus te potuit metus morari?
 Atque omnem speciem periculorum
 Rides in mediis protervus undis,
 Securusque jaces utramque in aurem?
 Ecquod robur & aes triplex chalybsque
 Circa pectus erat tibi, caducam
 Cum dares pelago ratem minaci?
 Infames scopulosque, tot Charybdes,
 Nec quovis scopulo minora monstra

Siccis heu! poteras videre ocellis?
 Non te cautibus asperis inhorrens,
 Multos parturiente monte in annos,
 Caucasus genuit, nec efferato
 Hyrcana ubere tigris educavit.
 Tanta at molis erat, Beate Mystes,
 Ab! longis quoties petita votis
 Antiquae Hesperiae subire regna.
 Tanta molis erat, laboriosum
 Tritarum pretiumque semitarum,
 Romam, maxima qua fuit jacetque,
 Et qua nunc superest, videre Romam.
 In fatis erat hoc tuis, ut ULTRA
 PLUS semper sequerere, quo praeiit
 Ingens gloria nominis paterni,
 Atque illam pede quo pari secuta est
 Praecox fama tuae Eruditionis.
 Quae natalitios lares relinquens,
 Et longe Batarvis citata ab oris.
 Totum sedula permeavit orbem,
 Magnasque ivit & exiit per urbes.
 Illa & per medios diu Britannos,
 Et Calcedonios in usque fines,
 Pictos perque Brigantas, atque Iernae
 Infraenem populum, ultimamque Thulen
 Nequaquam tacitis vagata linguis
 Illustre hospitium tibi paravit.
 Illinc cum propere nimis profectus
 Totum te eriperes meis Britannis,

Invitumque relinqueres sodalem,
 Extremas eadem magistra rupes;
 Vix tantum tua vela non sequentes,
 Formosam docuit sonare Lisen,
 Lisen Heinfiadae intimam medullam,
 Lisen ter referente utrimque ripa.
 Hinc tum praevia (dum venire cessas,
 Et maris calidos natare fontes,
 Quam vel caeruleum vebi per altum)
 Pinna trans freta celsiore vecta,
 Et coelo caput inferens, ad aliam,
 Quae nunc Aonides tuas dicavit
 Victurae genio perennitatis,
 Optato appulit Universitatem.
 Heic quamvis poterat, probante coepta
 Summorum quoque calculo virorum,
 Aeternum tibi consecrare nomen,
 PLUS ULTRA nihilominus cucurrit,
 Totque emensa soli salique tractus,
 Ut vix se tulit arduas per Alpes,
 Primis Ausonas attigitque plantis,
 Prorsus, pene-tot-insularum ocellum,
 Natalem tibi, Quinte, Sirmionem,
 Atque istos Salisubfulos Colonos,
 Ac magni Patavina tecta LivI
 Ala remige praepes ut reliquit,
 Detorsit Venetos ad usque cursum;
 Hos ut multiplici replet ore,
 Te jam nominis, aestimationis,
 Et virtutis imaginem paternae,
 Haeredem genitoris universi,
 Adventare procul, cui supremos
 Transcribant titulos, paremque cultum,
 Totque insignia caerimoniarum,
 Quot Divus dare posset ipse Marcus.
 His dictis Medicaea regna, & altam
 Supremi Ducis advolavit arcem,
 Certum Castaliis diis asylum,
 Certam Romuleis domum Camaenis.
 Heic fastigia Fama anhelata scandit,
 Seque inter Medicaea condit astra.

Tu vero propiore Sole gaudes,
 Tot curasque molestiasque laeto

Compensas animo viae peractae
 Magni Principis hospitalitate,
 Nec durum reminisceris caducum.
 Heic tibi Criticen professi Clio
 Tot cimelia, totque verminosos
 Excussas pluteo schedas revolvit,
 Per te luce frui serenior.
 Insignesque notis Opimianis,
 Cultores sapientioris aevi,
 Toto suppeditat sinu libellos;
 Tot volumina, totque codicillos,
 Veras delicias tuae ministrans,
 Felix Critice, curiositati.
 Heic tu mille colos araneorum,
 Blattarumque colonias edacum,
 Foedorum omne genus pediculatorum,
 Aevi incommoda, putidosque vermes,
 Plenos papilionibusque nidos,
 In praeceps ruere & perire cernas:
 Ut tandem tuus ille Naso, tandem,
 (Qualem noscere, qualem amare possit
 Vatem post cineres suum Corinna)
 Arcana redvivus arte Naso
 Sistatur dominae patrocinant.
 Et quem saepe pari soles favore
 Multa fingere lucubratione,
 Relicto tibi Claudianus Orco
 (Dum surdos Hymaenaeon ante postes,
 Et diu sonat inferos Camoenae)
 Tandem prodeat integer suusque
 Dignus hic labor Heinso, o Heinsi,
 Dignus Heinsius unus hoc labore.
 Sic te gloria stabit aeviterna;
 Et lauru decorandus atque myrto,
 Quod cives Latio suos reduxti,
 Binis tempora civicis coronis
 Cingeris, Pater o Latinitatis,
 Romani bone Sospitator anni.
 Sic te, sic recinent tui clientes
 Lisen Heinfiades, uterque, amores,
 Lises Heinfiaden suaeque vitam.
 Hic Pelusiaceum movendo plectrum,
 Optatum tibi praecinens triumphum,

Dig-

Dignis grande epos intonabit orfis.
 Alterno numeros trahens pede alten;
 Non quales Tomos exulantis audit,
 Toto ad plestra gemente saepe Ponto,
 Testes ah! nimii sonos doloris
 Testes immeriti sonos reatus:
 Sed quibus coluit modis Amorem,
 Et culti teneras Amoris artes;
 Quis fictae potuit placere amicae,
 Ac nequicquam inhiante janitore
 Nocturnas toties fores fefellit:
 His idem celebrabit Heinſianos
 Vates imparibus modis amores,
 Atque illam Paphia docebit arte
 Argutum ut tibi cingulum relaxet,
 Liſaeumque lubens finum repandat.

At tu jam nimium moraris, Heinſi,
 Qui Liſen nimis ah! tuam moraris,
 Liſen delicias tuas, ô Heinſi!
 Quae nunc lacrimulis madens ocellos,
 Nulla lumina vinciensque ſomno,
 Heu! dulces Elegos fugacis Heinſi,
 Solamen viduae unicum puellae,
 Triftis leſtitat, & modo ore hiulco,
 Modo frigidulis premens papillis,
 Nunc praefens ſibi, nunc videtur abſens
 Praefentem modo baſiare in illis,
 Abſentem modo te ſequi per auras;
 Ah! longe nimis ah! relicta Liſe!
 Saepe illam horrifico metu labantem
 Ingens cura rapit periculorum,
 Quae ſpernis temerarius, petiſque,
 Imperterritus omnium viator.
 Saepe & ne Italidas, leves puellas,
 Se ſpretâ, levis appetas, inhorret,
 Vixque irâe moderans imaginofa
 Heinſi! vociferatur, at te, at omnes,
 Quos jurare nimis mihi ſolebas,
 Te perdant, malefide, dii deaeque!

Ergon' illud agis, tuamque ludis
 Ficto nomine literisque Liſen,
 Aeneae male dum patrocinaris,
 Reſponſum miſerae & reſers Eliſae?
 Sic ſic, perfide, me valere jūſti,
 Sic cum Sidonia perire Dido?

Si non fleſcere vota lacrimaeque,
 Non te ſollicitae preces minaeque,
 Nec triftes poterant movere Dirae;

At, ſi cura tuae tibi ulla Liſes
 Reſtat, nec ſibi vera ſenſit illa,
 Sola te poterit movere Liſe.

Ergo fleſcere, fleſte lora, amator,
 Seu nunc Euganeum bibis Timavum,
 Alpinaſque nives: (at. abſtine illis,
 Exemplo modo ſi ſapis doceri)

Seu celſam meditaris ire Romam,
 J, felix, propero gradu, redique,
 Et, quantum pote, duplicato grefſus.
 Dulcem reſpice Patriam, ſenemque
 Vultu, reſpice, quo reſers, Parentem;
 Qui nunc te, veniente ſole, ſolum,
 Solum te que, abeunte luce, clamat.
 Nos & te, Nicolâe, nos vocamus,
 Et te Leida, Sororque te, tuuſque,
 Heroum genus, invocat, Phylaſter.
 Te, te nunc toties mei vocarunt,
 (Quis nullus modus, inquis, eſt) Phaleuci:
 At te mox, iterumque te vocabunt,
 Qualeſcunque vides, nihilque curas,
 Saecli incommoda, peſſimi Phaleuci:
 Donec incolumis mihi tuiſque,
 Parenti ante alios, amiculæque,
 Et ſodalibus, & piæ Sorori
 Siſtaris, quaſi publice citatus,
 Quo ſolet fugitiva turba duci.

Ohe! jam ſatis eſt, ohe! Phaleuci,
 Ohe! plus ſatis eſt. Meis Phaleucis
 Ergo hic terminus eſto, tu VALETO.

EXCUSATIO.

Cum neque quod nitidis Elegis contendere poſſem,
 Heinſiade, nobis invida Muſa daret:

Ssss 3

Nec

*Nec tua non grata venerarer munera mente,
 Qua mihi das aliquo nomen habere loco,
 Nomen ut aeterno nostrum cum carmine vivat,
 Et tecum fato stetque cadatque pari,
 Hæc saltem, numeris quia nam certemus inique,
 Hæc tibi, sed numero, qualiacunque damus.*

*ὁ αὐτὸς, αὐτοεχέδισι,
 de se si creditur ipsi.*

EPISTOLA XV.

J A N U S V L I T I U S

Nic. Heinsio.

Florentiam aut Romam.

Quintum nunc ad te scribo, Amicorum Praestantissime, ex quo Italiam attigisti: binas tantum inde a te accepi; quarum prioribus Kal. Augusti datis, x. Septembris, addito etiam Phaleucio carmine, geminum responsum, alterum per Patrem, per *Kinschotium* alterum, dedi; posterioribus xxiiii. Septembris scriptis, Kalendis Novembr. acceptis, nunc etiam respondeo. Querelae tuae, quae plus una pagina tibi fecerunt, vanae sunt; jamdiu enim Poëmata tua accepimus, legimus, osculati & admirati sumus; quippe te & Heinsiano nomine digna; non tamen desiderium nostrum exsatiarunt magis; quam irritarunt. Plura scimus potuisse dari, & danda fuisse. Age, mi Heinsi, hoc age! *Vive memor lethi: sed te prius eripe letho; Et meliore tui parte superstes fac sis.* Ovidio tamen & quid debeas, memineris; quid & Claudiano; & pro iis omnium, qui se praestare student, votis. Sed Nasoni maxime omnium tandem, aliquando tandem, justa & vota simul exolve. Audi, exaudi flebile vatis ebur; aspice laceras manus, quas tibi tendit inops. At quantus ille futurus, si semel integer sui que, nec tui nihilominus, juris prodierit. Fidem tuam testor, mi Heinsi, geniumque summi Poëtae, nihil me posse & faelicitati & perfectioni & amoenitati perfectissimi operum Metamorphoseos contendere. Fasti etiam me valde capiunt, quia re etiam juvant antiquitatis studiosum. Nec numeri, qui exilii amaritudinem sapiant, ut illi Tristium & de Ponto. Nuper admodum lectionem eorum repetii; tum & Kalendarium, quod in Paterna Edit. item accedit, examinavi. Nihil inconcinnius aut absurdus. Omnia confusa & alienis locis inserta. Festorum ordinem, quorum gratia id aggrediebar, restitui: multa superflua recidi: quae deerant, supplevi. Calculum passim emendavi. Summa, novum Kalendarium ex Fastis confeci. Dum textum repetebam, egregie juvabant, quae pridem ex ore tuo excerpisse memini. Eorum, quae olim partim, partim nunc quoque tentavi, en tibi specilegium. Lib. ii. vs. 326. *Conditaque in pharetra tela minora sua.* Imo, *minore.* Jocus est non insolitus ingeniosissimo yati;

vari; ut ipsam pharetram Omphales minorem dicat telis Herculeis. Lib. III vs. 166. *Quae consumatur partibus, una dies.* Omnino ¹ *Consummatur.* Atque ita puto alias Editiones habere. vs. 316. *Arbitrium est in sua testa Jovi.* Fateor; sed cum de fulmine agatur, cur non, *tela?* Lib. IV. vs. 78. *Phryx prior in silvis facie spectabilis altis.* Scio perpetuum id silvis epitheton esse. Malim tamen, *Attis*, vel *Attys*; ut Metam. x. *Cybeleius Attys.* vs. 479.

*Jamque Peloriaden, Lilybeaque, jamque Pachynon
Lustrarat; terrae cornua prima suae.*

Prima, potest esse, pro extrema; ut *altus*, pro profundo, & similia. Vide, sed vide, an non potius, *trina?* Ut paulo ante:

Terra tribus scopulis vastum procurrat in aequor.

Trinacris, a positu nomen adepta loci.

vs. 735. *Unda prius spargat, virgaque, verrat humum.*

Unda non spargit, sed spargitur. Lego:

Uda prius spargat, virgaque verrat humum.

Ut modo:

Udaque rorales laurea misit aquas.

Et lib. v. 677.

Uda fit hinc laurus: lauro sparguntur ab uda Omnia. &c.

vs. 944. *Sustulit immenso ter jubar orbe saum.*

Lego, *Emenso t. j. orbe.* Lib. v. vs. 149. Distinguo obiter:

Est moles nativa (loco res nomina facit)

vs. 466. *Uberaque expositis ille ferina dedit.*

Lego, *ulla ferina dedit.* Quae pluribus asserendum esset, si charta & tempus paterentur. Lib. VI. vs. 125. *Nil agis en, dixit: nam te &c.* Sensus postulat: *Nil agis; en, dixi, nam &c.* Praecessit enim ab ipso Poëta, *Nil agis, Stulta, &c.* vs. 140. *horrenda stridere nocte solent.* Non placet, *horrenda nocte*, construi. An Graecismus? Sed quo illa caesura, quanquam non insolens Nasoni, cum evitari possit scribendo, *horrendum?* vs. 165. *de spina sumitur alba.* Sensus requirit, *subditur*, vel tale quid. vs. 212. *Si titulos quæris: Sylla probavit opus.* Non probo. Recitat tanquam ex titulo sive tabella autorem: SYLLA ROGAVIT OPUS. Id est, fieri jussit, curavit, ex solemnī formula Rogationum. Alias PARAVIT, vel PEREGIT planum sit; sed mihi neutrum placet. vs. 751. *Tunc cum observatas augur descendit in herbas.* Pro *augur*, omnino rectum est, *anguis*. Caeterum ita quoque conjiciebam. *Cum coacervatus anguis desc. in herbas.* Qua voce in Metam. alicubi ita utitur. Sed haec talia non sunt, ut ideo videar falcem tuae messi immisisse. Miutias hasce forsan non consectaris, aut praeteriisse potes. Forsan & animadvertisti. Quod si intelligam, laetabor de Symphonia nostra. Locum in Metam. audaci conjectura emendatum velim mihi gratuleris, cum & hunc videbis lib. XI. vs. 411. *cornum sine cuspidē fixit.* Adeo me ejus non poenituit, ut quod nunc contigit, semper crediderim certissimam esse, & aliquando posse adstrui.

Vide,

¹ Hoc neglexit & improbavit Heinsius, sed nos adserere conati sumus.

Vide, si tanti est, quae super eo ad Gratum p. 145. incertus & quasi haesitabundus adhuc adduxerim. Si commentanti succurrisset, potuissem & tribus locis in eodem opere restituere, *Cinyphios*, pro quo perperam *Cinephius* aut *Cinipheus* legitur. Hunc quoque locum Polyphemi minantis: *Perque tuas spargam (sic se tibi misceat) undas*. Ubi vulgo languet sensus. Quaero adhuc cujus sint illa argumenta Fabulis praefixa: Luctatiine, an recentioris? Item illa, quae Epistolis praemittuntur. Fac per te certior sim. Nam quod quaeso initium illud: *Mittit Hypermnestra &c?* Quid *Mittit*? Multa in ea luxa, mutila, ac transposita. Fortasse ita inceperat:

*Mitis Hypermnestre de tot modo patribus uni,
(Cetera nuptiarum crimine turba jacet.)
Clausa domo teneor, &c.*

Sed nec ita tamen aptum exordium est. Forsan tale quid praecessit:

*Mittit Hypermnestre, quam perdidit ipsa, salutem,
Quem salvum, quam se, maluit esse, viro;
Mitis Hypermnestre &c.*

Non possum non manum addere loco corruptissimo, quem ita constituo:

*Quam ne caede putes fungi potuisse mariti,
Scribere de facta nunc tibi caede timet.*

Sensu aperto, quia alias nullus. Possit tamen retineri: *Quam tu caede putes, & nunc sibi c. timet*. Quid porro illud, *comitum clamore frequentes*? nisi, *frequenti*? & illud: *jacui frigida facta toro*? nisi, *paeta*, ut Vellejus lib. i. c. i. de *paeta* Orestis. Tum quis putet hos Nasonis numeros: *externis danda forent generis*. Cum pronum fuisset: *Externis generis quae modo danda forent*. Et quo illa Ius alienissima fabula? & quae praeter temporis constitutionem, de bello Aegypti, ejusque victoria. Tu expedi, mi Heinss, quid sentiendum sit; ac interim haec boni consule. De pace nondum ita plana res, quam audiveras. Haeret adhuc nobis aqua: quam Galli turbare pergunt, ut in turbida piscentur. VI. Provinciae, solis Zelandis dissentientibus & inducias, quam pacem optantibus, unanimiter mandarunt, ut conficeretur negotium. Sed & illi hodie adesse debent, ut rationes exponant dissensionis suae; & nisi probaverint, quod in facili non erit, ut invitis se nobis pacem non invideant, quam Batavi omnimodo poscunt. ¹ Velsaliae obsidionem deseruisse Principem, tam extrema aetate, haecenus invictum fere, dedit alto corde dolores omnibus, & externis ludibrium debere scio: Maxime Gallis, qui nimis insultant temerario conatui. In Anglia a Scotis deliberatur, Regemne vel ne Regem velint. Certe auro eum tradere & prodere cogitant. Interea, examinum instar,

*Qui patriam malunt, trifidasque relinquere ripas,
Sceptraque civili subversa furore, fideles
Regis amore pii, merito quam sanguine dextras
Imbuere ultrices, profugi venerunt Britanni.*

Kin-

¹ Venloae Heinssius in margine notaverat.

Kinschotius Monasterii adhuc agit. *Wallius* te salutat, & si memini, nuper tibi scripsit. Vale, nostrum decus, & si quid mea carmina curas. Sit tibi cura tui, sit tibi cura, salus; Quam plurimam, integerrimamque tibi voyet Tuus, sed omni pectore tuus, Vlitius. Hagae Com: dabam feriatum aliquantum, Nonis Novembris; in foro boario, porcarioque: ast apage porcos & boves, Inimica Musis ora secedentibus!

EPISTOLA XVI.

JANUS VLITIUS

Nic. Heinsio.

Romam.

Heros Maxime. De adventu in eam Urbem, unde merito reliqua despicias, summo opere tibi incolumi gratulor. Nec enim ego nescire debebam Romam terrarum caput cur haberetur; nec tu illud,

Non cuivis homini contingit visere Romam.

Me quidem Matris repentina mors jam iter ingressum a summa illa semper votorum meorum revocavit: *Kinschotium* vero Patris imperium. Qui, cum ipsi literas tuas praelegerem heri, dicebat se potuisse filio suo Italiam visendi gratiam facere, nisi ipse illam perlustrasset; multosque cognosset, quos, postquam Italia excessere, Italia tamen non deseruerit. Tristissimum & pene domesticum mihi exemplum praebehit *Jardinius* apostata, qui ipse profitetur huius, ut vocat, conversionis suae fundamenta Romae sibi apud PP. Jesuitas jacta. Comes ejus per omne iter *Carpentierius* misere etiam animi turbatur, & fluctuat. Non tamen ideo haec tibi allego, mi Heinsi, quod tam parum de constantia tua mihi promittere posse videar, sed quo rationi tuae respondeam hac mea. Ut fatear mereri tantum periculi ac laboris & Romam, & Latium, & quae tota ibi superest vigetque, antiquitatem, atque omnem denique Italiam; ut fatear quoque memet ipsum summis votis illam cogitasse ac petiisse, ac non nisi summa fati vi potuisse contineri; at te, Heros optime, (si pateris modo sincero in Parentem tuum ac pene fraterno tecum affectu certari) te, inquam, Patris, senis, valetudinarii, vidui, sorore nuper & altera uxore sive matrefamilias orbi, & jam post omnia filiae quoque dilectissimae confortio in summa solitudine orbandi, prorsusque desolandi, Patris illius, iterum dico, te tui misereri oportebat; aut, si tamen tanti est Romam vidisse, ut & illud *Lipsii*, ni fallor, videaris cogitasse, monentis Italiam in transitu modo lustrandam, ne illecebris suis patriae parentumque desiderium imminuat, jam jam oportet. Deum testor, veras mihi jam saepe lacrimas expressisse, non sine lacrimis vel cogitanti repetendas optimi Senis de longinqua absentia, & pertinace in fugiendo se instituto tuo querelas. Quid autem illi futurum censēs, cum intelliget, quod ipse legens horruī, Neapolim porro te cogitare? fortasse & veriturus, ne, ut solent peregrinantes minus ac

minus de reditu cogitare, quo ulterius progressi sunt, ac ulteriora tantum considerare: & inde Hierosolymam vel Africam videre pari fervore abripiare, quo huc usque avectus es. Interim ego vel commiserationis ergo vicem tuam obeam, ac saepissime penates vestros viso atque reviso, nunquam non accedentem, & quasi memoriam ac imaginem tui novantem, tenerrimo amplexu excipiente optimo illo tuo Parente. Ah! quoties anxie roganti de salute tua, se nunquam te visurum reducem certo opinari, respondit! Utinam vel semel audiisses hos gemitus, ut solet, fundentem! jam adesses credo tanquam conclamatis rebus. Ignosce, mi Heinse, vera monenti; nec monita, si sapias, nimium sperne. Gaudeo tamen bene & ex merito tecum ab *Holsteinio*, aliisque summis viris jam ante agi. *Bullialdi* ille concursus mirus sane mihi videbatur. Ut laudes tuas, quae ipsae hoc magis merentur, obtrudi mihi patiar, sola in affectu conscientia est: nulla de versibus meis (qui jam φαλευκωτάτης nomen mihi fecerunt apud *Brunones* nostros) confidentia est. Etsi ita tamen nunc agam, ut absentibus te *Kinschottique* etiam Poëtam me jactem vulgò, quem praesentibus cygnis ut graculum obstreperere nefas erat. *Wallius* & ipse hunc pudorem mihi imperare poterat, nisi is adeo raros ingenii sui foetus exhiberet, ut vel solo silentii illius intervallo ad defungendum furore meo mihi frui sufficiat. Is *Wallius* forte cum *Brunone*, nec non *Crommonius* meus, ad Saturnalitiam Symbolam vocati, mihi Genioque Poëtico vacabant, IV Idus Janu. cum suavissimae, & suavitae sua omne desiderium vincentes literae tuae adferrentur. Nihil communi omnium decreto prius habitum, quam ut saluti tuae confestim libarem, antequam lectionem, cui omnes attentissimi inhiabamus, exordiremur. Eadem ad medium fere perductis pausa, eadem finientibus clausula fuit.

Nec non & Lise, Magnoque ante omnia Patri,

Qui tuas illas epistolio comiter comitatus erat. Symposii nostri causa non proletaria, qualis nunc temporis homines congregare solet, sed mira ac inusitata erat. Composueram Epithalamium Sereniss. Electori Brandenburgico, atque in tempore obtuleram. Ea maxime de causa, quod videbam multos illum in procuratione munerum complecti favore suo, & passim promovere etiam apud Principes Arausionenses. Quo non mihi tantum, qui semper hactenus pependit hamus, sed etiam affinibus meis certa occasione opus erat. Quodque non solum mihi praestitit benevolentissimus Elector, sed insuper, in qua porro in re favore suo uti vellem, nunquam defore promisit. Hac summa ejus munificentia cum abunde & plusquam satis mihi factum esset, quasi parum tamen id illi videretur, discedens insuper in vicem τεκμηρίῳ torquem aureum cum gemmata pyxide, effigiem ejus continente, donari mihi curavit per Procubitorem suum. Sed is homo tantum sibi apud facillimum Principem licentiae adrogavit, ut detracta pyxide solum torquem mihi miserit, promittens aliam postea daturum. Torquis ipse minimum cc scutatos aureos pendet, quo xci. versus, & vel avarissimi lucripetae famen exsolvi ac ledari posse nec tu scio negaveris. Velim ego tibi fortasse jam desideranti tam care
emp-

emptum carmen videre, ipsum id exhibere, nisi typis tam grandibus, ac in tam vasta ac vere regia papyro impressum esset, ut ipsa mole & portorii pretio terreri posses. His enim lenocinium vel fucum oculis Principis fecisse me jure dicas. *Barlaeus* (quem hoc nomine Archimendicum vocare solet *Bruno*, quod ejusmodi occasiones nunquam negligat) & simia ejus solito epigrammate *Boys* item, atque *Planta* (quem tu merito Romanis tuis compares, qui, quod loquuntur, non intelligunt) nec non *Bruno* easdem quoque nuptias carminibus suis celebrarunt: sed omnes post festum. Et, quantum intelligo, πάντων ἡ ἐλπίς ἀποτάσσεται. *Barlaeum* tamen non puto mercede sua, vel patrocinate *Zulichemio*, ut solet illi semper, cariturum. At viden' mi *Heinsi*, quam largus rerum mearum praedicator sum? Plura etiam promittere possum, quae reduci tibi exhibeam. Ante omnia, Quinquatruum Braedanarum libros duos, quos de inauguratione Scholae Illustris Auriacae jussu Principis Matris conscripsi versu Heroico. Mirabere, unde tam vastum opus? Atque ita quidem meorum rationem habe. *Kinschotius* paci jam jam perpetratae, immaniter indignantibus ac ringentibus, & tantum non minantibus Gallis, extremam adhuc manum accommodat. Quam ob causam hac hebdomade huc appulit *Servientius*, alter ex Plenaepotentiae legatis Gallicis, ut minis & intercedendo ordinum consilia tractationesque cum Hispanicis turbaret ex propinquo. Sed nihil illa curaturos Patres Patratos spero. Nolim tamen eam tibi ulterius progrediendi occasionem nasci; sed potius pacatos Belgas tuos revisendi. *Mollius* ille acris disputator ante triennium vel amplius, quem puto te novisse vel per *Kinschotium*, patrocinate Electore, Senatorum numero a Principe adscriptus est, atque insuper Procurator negotiorum Electoris (Residentem vocant) quae hic agenda, designatus. In Anglia Scoti, qui videbantur Regem velle restituere, accepta, quam in sumptus auxiliorum suorum pacti erant, pecunia Regem deferere velle, atque domum jam cogitare dicuntur. Rex autem vel huc vel in Gallias, vel in Hiberniam, ut verisimile magis, fugam meditatur, seque non invitis custodibus suis Scotis subducere. Est adhuc Neocastelli. Tantum de Publicis: nunc & privata aliqua attexam, ne quid paginae vacet. *Gronovius* mihi edendum commisit Observationum librum singularem, in quo promissa ac praetermissa ad Livium absolvit: nec non & alios authores illustrat. Scripsit nuper ad me, ut considerarem caput aliquod, quod totum in Ovidianis emendationibus est, salvone id jure amicitiae vestrae tibi non praereptum videri, & quasi messe tua exemptum posset. Sed recusavi arbitrium, quod mihi detulit, ne aut invidiae, aut altrinsecus neglecti officii reus agar. Utrique faveo. Delevi tamen locum unum atque alterum, quae jubebat. Tu modo, Heros maxime, tandem nobis fidem tuam libera, & quod facis, amare nos quamlibet longinquus perge. Vale, diligenterque ut valeas, cura. Dabam, raptim fere, Hagae Com. Pridie Idus Januarias (tertio post allatas tuas, xxiv. die Novembris datas, quas longo intervallo praecefferunt proxime datae Florentiae xix. Julii) anno a Christo Nato, cio dcc xlvii, qui faxit Deus tibi felicissimus sit, nobisque incolumem reducat. Iterum vale, mi Anime.

T t t t 2

EPI-

EPISTOLA XVII.

JANUS VLITIUS

Nic. Heinſio.

Romam.

Heros Nobilissime. Quantas injurias contumeliasque nuperrime perpeſſus ſim, ſi nescis, gaudeo, mi Heinſi; ſi ſcis, nec calumniae aliquid, ut vulgò factum, miſeriarum mearum cumulo acceſſerit, verae narrationi lubens acquieſco; nec te quoque miſertum mei dubito. Nolo utcunque recens vulnus, & jam pene cicatrice aliqua oblitteratum retractare. Hoc tantum gloriari licet, & fortiter impetum furoris me tuliffe, & ferendo ac cedendo omnem ultionem abſolviffe. Qui rerum mearum dominium expulſo me aſſeruerant ſibi, etiam literas tuas xix. Januarii die Roma datas pari licentia involaverant, & ne quid conjurationis lateret ſcilicet, reſeraverunt. Ac vix tandem precanti reſtituerunt: detentis vero illis ad *Kinſchotium*, quas, cui tu commiſeras, illi credere gravabantur. Ut elegantiffimas obſervationes tuas inſpicere licuit, multum lenſi triſtitiae taediique mihi demptum. Tum vero & in adverſis meis laetitiae aliquid ſuboriri coepit, cum; quantopere mihi affectum tuum probares, iterum atque iterum relegendo conſiderarem. Neutri beneficio- rum horum ex aequo aut merito reſpondere jam me poſſe, hoc quoque jam etſi ſummo dolore fere ſublevatus doleo, Heinſi amiciffime. Faciam tamen, ſi quid valeam poſthac, ne, uti eruditionis ac ingenii tui praeflantia & longe quidem, ita etiam amicitiae officiorumque certamine a te vincar. Enotavi lubens cum ea, quibus aliquot conjecturas meas & tuo & codicum conſenſu aſtruïs, tum illa lubentiſſime, quae ſponte tua in Ovidio & Val. Flacco mecum communicavi. Emendationis illius (*aerata torſit grave cuſpide cornum*) nuſquam me in additis ad Gratium, quod ais, poenituiffe ſcio: etſi fatear parum mihi ſemper arriffe. Nam locus ex xii. Metam. *Fixit in adverſo cornum ſine cuſpide vultu*, nihil juvat ſententiam meam, quia *cornum*, ut fructum, pro arbore ipſa accipiebam. Hic enim revera cornus arbor intelligenda eſt pro haſta poni, ut Silius lib. x. *Sic propria miſeri tranſfixit tempora cornu*: & lib. xiii. *cornumque ſonantem* dixit. At in priore illo Naſonis loco non poteſt ita accipi, ni *grave* adverbialiter, & *cornum aerata cuſpide*, ita uti, *lato venab. ferro*, ſumas: ac ſequentia quoque in ſequiorem ſexum mutes: *Qua bene librata voti- que pot. futura*: quod tamen nihilo magis placet. Tu vide, & ſi quid rectius iſtis noris, candidus imperti; ſi non, his utere mecum. Imo, ſi tantum tantilla merentur, utere ut tuis. Nihil mihi ex aurea illa, quam brevi ex- peſtamus, meſſe tua, nec ſpicilegium quidem depoſco. Age, Heros praeflan- tiſſime, & non tantum ſuaviſſimos venae tuae liquores orbi erudito indulge, ſed & originem ejus in omnes, qui poeſin vel amant vel affectant, (exceptis quales ego vel Cluvienus) liberali manu deriva. Ipſum ipſum Naſonem te

poscimus, ut quid vera falsis distent, tandem agnoscamus. Imo & illi omnes agnoscant, qui nihil te operaque tanta dignum in eo restare putant, ut hoc, quod negant, vel taciti & pudore victi fateantur. Non pauci fane ii numero sunt; de quo jam triumphare potes. De *Gronovio* quod quereris, forte casu magis, quam dolo aut culpa ejus accidit. Nam mihi fane & frequenter scribit, & ultro saepe cessantem provocat. Faciam ut scias brevi, quanto plus tibi se debere fateatur. Jam enim responsum meditor consolatoriae illius, quae non tantum mihi animum cum rebus meis fractum solidavit, sed etiam diligentissima quaeque, quae in hoc genere Stoici scripserunt, (quorum Philosophiae me jam addixi) meo iudicio aequavit. Fragmenta L. Rhodiae Ampliff. *Goefio*, affini tuo, cum domi meae rebus adhuc turbatis me viseret, tradidi. collationes quoque obtuli. *Salmasii* Militia vacat: quamquam de Pace nihil certi adhuc: imo retro sublapsa referri in nihilum potius videatur. Altum certe hoc publico iustitio silentium de ea factum. & *deava* librum de anno climacterico ex Epistola, ut solet illi, natum Elseviriorum praelo commisit. Ita tres nuper de cruce responsorias *Bartholino* dedit: in quibus & ipsum *Bartholinum* & *Vorstium* & omnes quidvis aliud sentientes acriter perstrinxit. Imo & ipse sic adeo vehementer excruciat, ut sui quoque, nedum induciarum cum Nobiliff. Patre tuo, oblitus sit. Crucem Christi ita depressit; ita omnia, quae haecenus communi opinione recepta sunt, impugnat; ita nescio quam ficulneis argumentis suam astruit. Et quam ob rem vide sis? ut hyssopi sesquipedali ramusculo os Christi crucifixi ab humi stante aliquo attingi potuerit. Ego nec *calamum* pro caule, nec *hyssopum* pro caule hyssopi, poni, nec tam valido caule, aut tam obviam ac vulgo ad manum fuisse ut credam, haecenus induci possum. Hyssopus nulli alii rei inservit ibi apud Johannem, Cap. xix, 29. quam cui alias solebat, scil. ad refocillandum deficientis spiritum. Et quidem ipsi aceto mixtam fuisse vult Nonnus, cum ait: ὑσσώπον κεκερασμένον ὄξος ὀλέτρῃ. Diversa itaque a καλάμῳ longe est, quâ spongia porrigebatur: & solent saepe Evangelistae diversa diversi referre. Lego apud Johannem mutato tantum casu: ὑσσώπον περιθέτης, & *hyssopum circumponentes*; nimirum spongiae aceto impletæ. Quam sententiam peculiari tractatu aliquando asseram, Deo volente. Tu vide, mi Heinsi, an tot magnorum virorum opinionibus contendere possit: aut saltem novi alicujus instar habe, cum nihil aliud sit, quod addam. Vale, meum & bonorum omnium decus, & quod facis, strenue ama Nominis familiarumque vestrae devotissimum cultorem Vlitium ὅλως tuum. Hagae Com: pridie Kalendas Apriles, cio dc xlvii. Aliud quoque a te responsum jam praestolor ad eas, quibus progressum in itinere tuo impedire conabar, ante duos fere menses datas.

EPISTOLA XVIII.

JANUS VLITIUS

Nic. Heinſio.

Romani.

HEros Praestantissime. En quas a Gronovio tibi promisi literas, cum III. Kal. April. ad te scriberem: quae de turbis rerum familiarium questus tum quoque fui, penes te pereant quaeso, ne paria cum adversariis fecisse videar, qui αὐτῆς τῆς ἀμνηστίας, qua mutuo obstricti sumus, ἀμνηστῶσιν. Addam hinc tantum aliqua, quae heri de pacis negotio comperi. Legi ingens scriptum, quo *Servientius* partim de Hispanorum fraudulenta commerciorum tractatione, partim de legatis nostris *Pavio* & *Knuytio*, ut nimium illorum parti addictis, partim illorum quoque de Ordinibus nostris Hispanis magis, quam Gallis auscultantibus, prolixè querebatur. Quorum omnium causam ipsis istis Legatis imputat; & maxime *Pavio*; quem solum Mediatorem inter se ac Gallos sumpserunt Hispani. Imo vix tantum non repetundarum utrumque insimulat; falsi non semel; doli mali, ubique. *Pavius* (qui solus hactenus Monasterii egit, ideoque collegas omnes semovisse ibidem accusatur, ut libera potestate solus omne cum Hispano negotium conficeret) tandem impetravit, ut huc se conferre liceat, & calumniis *Servientii* praesens collato pede respondeat. Hac ipsa hebdomade hinc affore creditur. Interim *Servientius* aegrotare simulat; donec *Monfr. de la Tuillerie* ex Gallia accedat, & junctis viribus nobis pacem cum Hispano diu pactam, peractam, & ab ipso Rege ratam habitam extorqueant. Ne separatim rem nostram ageremus, urgent ea, de quibus inter nos ac Gallos quotannis fere convenit; neutros scilicet invita altera parte foederi renunciaturos, nec non nisi conjunctim cum Hispano quicquam pacturos. Perfidos, & foedifragos nos fore, si separatim & invitis Gallis pacem cum Hispano ineamus: potissimum pacem quoque illis petentibus, si modo honestae conditiones haberi queant. Nihil autem honesti illis videtur, nisi quod tantae, quanta Hispanorum unquam fuit, ambitioni illorum consentaneum sit. Quas illi conditiones non accipere, sed armata manu imponere malint. Ita aperte loquitur *Servientius*. Heic terminus haeret. Nam quod sociorum restitutiones & conservationem praetendant, scimus cui serviat iste praetextus. Quid his querelis responsuri sint Ordines, incertum. Ambigue hactenus responsum. Nondum enim inter nostrates satis convenit, veterine foederi cum Gallo, an novae cum Hispano stipulatae pactioni standum potius sit: Diversi diversa volunt. Imo & ipsos Bataviae nostrae Ordines contrariae factiones distinent. Populares tui bellum quam pacem malle feruntur: metuentes potissimum, ne Walonibus domum recedentibus, panni commercia & civium frequentia magnopere imminuantur. Ita & alii ex privatis commodis publica negotia tractant. Plurimi tamen pacem poscunt. Militis ac nautarum universa gens in turbido piscari ma-

malint. Hispanorum Legati petierunt simul cum *Serventio* admitti, ut audita altera parte quid credendum sit appareat. Sed hactenus Gallorum ope salvus conductus illis negatur. *Brunio* potissimum, in quem immodice invehitur *Serventius*. Interim *Phillippus* Regius pro Rege suo *Philippo* tanquam privatus rem publicam agit, & Gallorum machinationes subinde evertit. Hoc anno tres Galli, prior solus duodecenni puellae, alteri duo virgini sponsae publica via intra primum ab urbe hac lapidem vim intulerunt: & indignantur etiamnum populares illorum supplicio afficiendos publicae securitatis turbatores. Non puto tamen impune illis fore, ne bene cuiquam cedentis nequitiae exempla foveat *Batavia* nostra. Haec obiter & vix Latine tibi narrare lubuit, mi *Heinsi*, ne vacuae chartae includerentur haec ab *Gronovio* literae. Ignosce & festinationi; & turbatae adhuc menti, quae non nisi extra hos coetus, & rure potissimum, refici potest: qua gratia in *Brabantiam* migrare decrevi, ac *Bredae* forsitan sedem figemus.

Tu Tityre lentus in Urbe

Formosam resonare doces tibi Tibrida Lisen;

Nec patriam, nec forte senem reminiscere Patrem:

Ni reducem melior faciat Deus

Redi, dum vales: & vale, ut redeas. Salutat te *Wallius*. Etiam *Bruno* salutari te vellet, si non jam memoria tua excidisse meritum suum agnosceret: vel postquam *Zulechemiis* laribus exire, imo efferri, proximus est. Jam enim Epitaphium sibi genioque suo scripsit. Iterum vale, φίλτατον καὶ ἀγαπῶμαι, & perge amare, cujus sortem odisse potes. Dabam raptim, Hage-Com. xi. Aprilis die, natali heu! mihi; quia scilicet annis Debuerat nostris imposuisse modum. A. S. N. M DC XLVII.

EPISTOLA XIX.

JANUS VLITIUS

Nic. Heinsio.

Mediolanum.

Nihil profecto me felicius, mi *Heinsi*, qui post exantlatas tot aerumnas, ut me denique in portum tranquillitatis recepi, resque meas in pristinum statum restituere coepi, simul quoque amicitias veteres recuperavi, novasque non pauciores acquisivi hominum non illiteratorum. Ante omnes autem longe tua illa, Praestantissime heros, excellit, quae etiam in medio illo calamitatum incendio efferbuit. Quod etsi tuis minus, aliorum tamen literis, qui ex te intellexerant, mihi non semel significarunt, quam sedulus in officio perstiteris, abunde mihi testatum fuit. Sed damnum hoc, quo non parum tactus fui, reliquis imputare calamitatibus & computare non gravamur, cum & ipsa viarum fortuna, ultimas illas incolumes nobis praestando crimen suum quodammodo excusaverit: quae quidem post illas, quas Româ initio praecedentis anni dede-

dederas, quibusque responderam, unicae ad nos pervenerunt. Bene existimationi tuae prospexi, Heinſi Nobiliſſime, quod & Italis memoriam tuam publica commendaveris gratitudine. Quale id ſit, cum a te proſectum, etſi praeauguramur, videre tamen etiam deſideramus: imo vel te ipſo citius, quem potius nihilominus expetimus. Si commode rebus meis proſpicere alicubi potes, amice & benefice feceris. Gratum cum MS. aliquo recentioris notae & mediam plus partem mutilo collatum *Iſ. Voſſius* nuper mihi dono dedit. Et, ni fallor, id ipſum eſt exemplar, quod tibi innuit. Initio legitur ibi, *Dona como*, pro *cano*. & ſecunda pag. *de valle ſubudae*, pro, *Sibyllae*, quae vox ultîma eſt, quam notaverat *Voſſius*. Vide, quaefo, an nihil ulterius compareat. Si & ad Nemefianum varias nanciſci potes, gratum mihi operaeque pretium feceris. Quae caetera ex *Kinſchotio* cognoscere me voluiſti, cum ille neglexerit, neſcio qualia ſint. Ex te ergo, ſi tanti, malim reſcire, quam neſcire. Quid in *Bojum Plantamque* cuſum ſit, deque illius Viennam deſtinato itinere ex ipſo intelliges latius. Quid in Patria tua agatur, raro huc nunciatur. *Schola Illuſtris Bredana*, etſi *Rivetum*, *Dauberum* JC. erudiſſimum, alioſque Profeſſionis ſuae peritiſſimos habeat, ſucceſſu ſuo nondum fruitur. In cauſa eſt Principis ad alia quaevis major, quam ad honeſta inclinatio. Venatur ille conjugis immemor, ſed Veneres ſuas: in ſilvis quoque immodicus: in circo (quem litus maris facit) curſor quotidianus; inter aleatores Galloſque adulatores aſſiduus. Scenam quoque publica auctoritate proſcriptam, privatis inſtruere dicitur ſumptibus. Heu quantum à patre avoque degener! Sed nolo foris domeſticam infamiam evulgare, nec faſtidium patriae noſtrae tibi parere. Redux cognoſces, quantum Gallica ſocietate proſecerimus in eorum imitationem. Tu interim, Heinſi praetantiſſime, perge patriſſare (ut ita loquar) & ex patris optimi monitu memento, *ἀνὲν ἀπίσσεύειν*. Ante omnia cura ut valeas, & incolumis nos quamprimum reditu tuo bees, quod ſummum nunc votorum noſtrorum eſt. Vale, meum decus, & quantum facis, amare nos perge. Dabam ruri, ubi nunc totum fere annum degimus (ſed pace promulgata urbe mutare eſt animus, quae hinc vix II. M. diſtat) prope *Bredam*. XIV. Kal. April. CIO DC IIL.

CL. NOBILIQUE VIRO

NICOLAO HEINSIO D. F.

incolumem ad patrios lares reditum ex animo gratulatur

JANUSVLITIUS

Leidam.

Nunc libet exclamare, Eſtis io! Superi, qui Heinſiadem nobis poſt tot Ulyſſaeos errores, & tanta pericula viarum atque undarum ſalvum, ſoſpit-

temque restituis. Nunc votis rite perfectis tremula fere facta sociales imbuat aras, agna, & laeto demus pingua thura foco. Ergo nec inania suscepimus vota, quorum summa, & felix faustusque finis, *Heinsius Redux*. Fateor citius gratulandum tibi fuisse, si putassem in tanta laetitia prorsus verbis defungi me posse. Carminis aliquid parabam tibi, Heinsi Nobilissime, & jam exhiberem, nisi maligna nobis vena prae tua ista ubertate exaruisset, & noster Phoebus tuo illo longe splendidiore hebetatus fuisset. Patere ergo sinceris rectisque non versis verbis tibi me dicere, exoptatus ades. Utinam per te licuisset de adventu tuo certiolem fieri? Nam quantumvis fidis amicis vix credere potui, quod cogitatione nostra multis saepe praecambulis nunciis frustratâ majus videbantur. Sed ecce miraculi instar! dum ita mecum exoptulo, ecce, inquam, tuas geminas literas a *Kinschotio* excipio. Cumulasti me nimio propemodum gaudio, cum non tantum reducem mihi te sistis, sed & usque mei memorem. Ut ad literarum, quas ad me dedisse credenti asseris, multitudinem respondeam, certo tibi affirmo omnes, quas recepi unquam, inter cimelia diligenter asservasse, nec plures ex Italia habuisse, quam Florentia tres, Roma totidem, quarum ultimae XIX. Januarii datae toto mense calamitates nostras praecedebant, atque exinde unicam Patavio eodem primoque mense hujus anni; nullas praeterea: exceptis binis illis ultimis. Non parvi sane tantam facio jacturam; sed dolorem meum solatur affectus tuus nequaquam interruptus, & integer adhuc. Ego (ut hoc etiam scias) multò plures, imo vel bis totidem ad te in Italiam scripsi. Caeterum quod me, quasi parum ingenuum ex amici officio in versus tuos Italicos censo egerim, amicis tamen verbis accusas, paribus excusandum puto. Testor itaque amicitiam nostram fidemque, quam nondum mihi negaveris, scio, nihil unquam carpendi animo in iis vel penes me animadvertisse, multo minus ut apud alios te eo nomine notaverim, unde iste, quem ais, rumor evaserit. Scio ego quis sim, & quae domi mea vineta caedenda restent. Nec errorum meorum adeo oblitus sum, ut in tuos tam inunctis oculis inquirere praesumpserim. Imo quos, inquam, tuos errores, quos in tam culto poemate naevos vel cogitatione assequi potuissem? Pereat omnis mihi apud te fides, mi Heinsi, si tale quid in mentem mihi unquam venit; quapropter (si me amas) animo tuo istam exime atque eradica suspensionem. Vel, si diligentius inquirendum putas, amicis istis (quos ego nescio quam amici mihi in tali delatione fuerint) testimonium defer, jurati dicant, vel literas meas (nam absens qui alio modo potuissem?) in medium proferant. Atqui leve hoc & praetereundum censo ego gravissimum crimen, amici famam meritosque honores fugillare. Majora profers, sed ejusdem generis, ac culpa: te de popularibus tuis parum honeste sensitse, cum caneres ¹ *Patria da veniam, rustica terra tua est*; idque me authore in vulgus sparsum. Iterum antiquam fidem testor, nihil tale quid me divulgasse; nisi pro divulgatione habeas (nec enim fateri turpe puto, in quo

¹ Haec leguntur lib. 1. Eleg. iv. Italicorum, & magnam Heinsio invidiam apud nostros fecerunt.

quo nullius mihi culpae conscius sum) quod *Kinschotio* & quidem soli (nisi me memoria fallit, &, forsitan, idem *Wallio* nostro scripserim, sed puto tamen, soli *Kinschotio*) aliquando per lusum & jocum scripserim, vindicias pœticas in *Heinsiaden* decernendas, quod rusticam indigitaverit terram patriam. Ad quae en ipsa verba quae respondit *ὁ δεινός*. *Oblitus fere eram probare tuam in Nicolaum nostrum censuram. Certe data occasione poenas dabit, quod tam male de patria nostra locutus sit.* Indignum te & amicitia nostra esse existimo, malignitatis eo nomine vel me vel *Kinschotium* arcessere. Bona verba, ô noster? Quae joco dicta sunt, ut inter poëtas (quibus nullo meo merito vos me accensere soletis Viri Poëtae) eane tu serio reprehendere praesumis? Si bene te novi, mi *Heinsi*, haec a candore tuo aliena sunt, nec tamen puto, peregrinos adeo mores a peregrinatione tua te traxisse, ut istius spectatissimae in te ingenuitatis quicquam mutaveris. Sed tamen vindicandam censuit hanc contumeliâ patriae a te illatam. Non a vulgo sane, sed ab amicis: non vulgari vindicta, id est, sinistro rumore, malisque conviciis, sed amice & scazonte aliquo, vel mordace jambo. Non a quovis, sed a *Kinschotio*. Imo, si pateris, & ego te rusticum dixerò, qui te in rustica terra natum fateris, & quidem cum pudore. Qui enim in Italia nasci maluisses, nunquid te patriae tuae te pudere profiteris? Atque ita continuo subdis, patriam tuam rusticam terram esse; id est, locum, ubi natus es. Non enim e terra terrae quasi filius natus es, sed in terra ista rustica, cujus te pudet, ita ut malis in Italia natus esse: & quidem, non ob laurum, platanos, myrtos, cypressos, & reliquas arborum delicias, quarum summum decus ruri est, atque adeo rusticae deliciae merito vocentur, sed ob praecedentia, ubi ingenium isti orae peculiare attribuis, quasi, qui eam nunquam adierint, nullum habeant, & tuum quoque ibi primulum vernaverit, & incaluerit: qui quodammodo antea, ut in rustica terra natus, nullum habuisses. Ergo non ego rusticitatis arguendus, sed tute ipse es. Ego rusticam terram patriam nego, nec fero ita vocari: tu asseris rusticam esse prae Campania molli ista & infami olim regione. Sed terram intelligere te dicis, & quidem respectu arborum istarum. Nec in hoc vinces, mi *Heinsi*, patriam tuam magis rusticam esse, quam ullam silvis omnigenis vestitissimam. Utroque enim rusticari licet, & rusticos invenire, id est (ut Cicero vocat) imperitos morum & agrestes. Ergo rusticus silvestri non potest opponi, sed urbano & bene morato: ut Ciceroni frequens. Quinimo Virgilius Musam suam modo *silvestrem*, modo *rusticam* vocat, eodem sensu. *Silvestrem* Ecl. 1. *Rusticam*, ubi ait, *Pollio amat nostram, quamvis sit rustica, Musam.* Ego, cum rure hîc agerem, arboribus omne genus vestitissimo, rusticatum, & rusticum me egisse fateor, quia non in urbe degerem. Sed patria tua ruri non est, sed in urbe Leida, sed in urbe arboribus vestita satis, nec illarum quoque, quas callide te respexisse subjicis, inope & egena, quanquam non abundante. Liquet hinc te rusticam opposuisse ingeniosae, & ingeniorum scilicet foecundae ac nutrici Campaniae. Nihil te Alcraeus juvat Hesiodus, nihil Ovidius, Hesiodi illud in patriam convitium citans. Hic certe patriam nimis laudat, quam ut tibi patriam dedignant

opituletur: de illo quid senserint Ascraei, serum est disputare: nec ideo ad universos Graecos pertinet, sed ad solos Bocotos, quorum convicium videris patriae tuae velle applicare, cum hoc Hesiodi allegas opprobrium. Non ita habemus aurem Batavam, ut nesciamus quid auris Batava apud vicinas gentes audiat. At quid ego pro Batavis velitationem hanc subeo cum Batavo, qui Batavus non sum? Viderint Batavi, an bene cum illis egeris, ego Batavus non sum, sed forsan majora de iis & merito magis conquerenda habeo. Ignosce ergo, Heinssi Praestantissime, isthaec prout calamo incurrunt, effutienti. Pluris mihi amicitia tua est quam rusticitatis Batavae quaestio. Nec puto aliquid scripsisse vel posuisse hîc, quod praeter salem & mensam sit. Tu vero quid de *Barthio* rescieris, scire aveo. Non quod verear, quin idem ipse sit *Barthius*, sed nec aream istam instantibus Saturnalibus ridendi materia. De *ITALIA* Elegiarum tuarum libro modestia tua, nec tenuitas mea & rudis, quo nunc utor, stilus patiuntur, ut digna loquar. Quod in ea nomini meo quoque fulgorem dederis, grates habeo meritissimas: sed minimum hoc est, cur tanti, quanti par est, faciam divinum illud tuum Opus. Ignosce ergo iterum, quod nullo operis tui, nec nominis mei honore induci potuerim a te, quin merito etsi amicus sed amice apud amicum carpendus mihi visus fueris, & in eo haecenus perseverem, donec Patriae tuae palinodiam occinueris, vel sensum verborum meorum melius interpretatus fueris, quam mea mihi dicat ratio, & sequentia quoque evincunt, cum canis: *Ab nullo patriae genio loquor, &c.* Vale, Musarum nostrumque decus, & quantum facis, sepositis nugis istis, amare me ne desinas. Dabam, die solis, qui unicus mihi a munere meo feriat. Properatissime. Bredae, XIII. Decembris MDCCIII. Illustriss. Parenti S. D. devotissimam, cum delatione debiti officii. In fato isto tuo, nihil est quod me spectat, qui & praesenti & absenti idem semper atque aequae amicus fui, eroque dum vivam. Sed meum illud in hoc iterum agnosco, quo sinistrae famae reus agor, & pro tali traducor ab iis, qui hoc agunt ipsi, quod in me culpant. Vale iterum, Heinssi praestantissime, & si unquam mihi fidem praestitisti, in hoc saltem ne negaveris.

EPISTOLA XXI.

JANUS VLITIUS

Nic. Heinssio.

Leidam.

Heros Praestantissime. Agnosco mehercule antiquum illum totiesque in te exploratum candorem. Quapropter non modo de te reduce, sed eodem tibi bique simili mihi reddito gratulor. En dextra, fidesque, qua vetus illud amoris pignus accipio ac repromitto. Ad literarum quoque commercium non invitum revocas. Nec incommodum erit ministerio nautarum, qui singulis hebdomadibus Leidam Bredamque eunt redeuntque, ad hoc uti. Sed unde hasce

ordiri congruum atque tempestivum fuisset, ne prorsus obliviscar, Auspiciis felix totus ut hic annus eat tibi tuisque, votum solemne facio. Nunc ad id redeo, quod lubens praeteriissem; nisi quaedam replicasses, quae nova expurgatione indigent. Pro solito candore mecum agis, mi Heinfi, quod censuram nostram, etsi indignam, non defugis. Hoc tantum culpae videris, quod eam aliis, quam tibi, proposuerim. At quî potui, fodes, cum ex eo tempore, quo Italiam tuam accepi, tuque jam eam egressus esses, nunquam certior reddi potuerim, quo loco degeres? Testis sit idem, quem nuper citavi, *Kinschotius* noster. Is in eadem epistola, ex qua illa pro me nuper addixi, subdit: *Incertus sum ubi nunc degat; puto Genevae.* Nam id scire ab eo postulaveram. Ad quem tamen, cum ad te non possem, censuram meam (quae vix talis vocari potest, cum joco magis quam serio proposita sit) destinavi? nunquid ad aliquem e vulgo *σπερμολόγον* qui istud dispalaret? nunquid ad inimicum? nunquid ad multos, unde facilius divulgaretur? Nihil minus. Sed ad tibi proximum, fidelem, amicissimum, imo te alterum, & quidem unicum (quod asserere non vereor) *Kinschotium*. Quo etiam animo id fecerim, testentur literae meae; nimirum, ut de eo sive crimine sive errore ad Senatum Virosque poëtas relatio fieret: querebar nempe, non ferendum tale facinus Viris Poëtis Batavis; quos duorum numero, *Wallii* & *Kinschotii* scilicet, includebam. Allegabam illud Epigramma, nescio *Kinschotiine* an meum vel utriusque, quod in *Fabricium* te praesente & probante censuram, in tuo Musaeo cudebamus.

Stipitibus Batavos similes quicunque profatur,

Stipitibus Batavis excipiendus erit.

Immerito ergo me sinistri istius rumoris reum agis; qui unde ad *Schelium*, (quem tamen ne nomine quidem novi hactenus) atque per eum ad *Gronovium* pervenerit, cum ignarissimis plane nescio. *Gronovii* de loco illo controverso iudicio nihil detrecto, imo lubens subscribo, meoque calculo etiam te ingrati in patriam animi absolvo; nam etsi mihi verborum alia videbatur esse sententia, non ita continuo ipsa re te convici. Unusquisque verborum suorum interpretis est. Quoniam itaque negas bona fide nihil minus te cogitasse, quam patriae tuae contumeliam ullam afficere, cum isthaec caneres, interpretationi & menti tuae tam sinceræ nullus adversor, sed acquiescam posthac. Atque ita aeterno silentio controversiolam hanc mando, ea conditione, ut quemadmodum nec tu in Patriam, quod videri poterat, ita nec ego sic arbitrando in te famamque tuam (quae si vindice indigeret, me quoque pro vindice haberet) nec *Kinschotius* quoque, injurii fuisse censeamur. Quod Italorum hospitalitatem tantopere extollas, patior facile; nec tibi invideo, Heinfi Praestantissime, qui vel majora mereris, sed mihi experiri eam non licuisse, postliminio doleo. Certe in paucis Anglis etiam ego majorem comitatem expertum me fuisse testor, quam in cunctis Batavis. De *Barthio* quae nuncias, nescio an contemnere, quam risu digno aliquando excipere praestiterit. Notus jam mihi iste Thraaso. Et miror quid in Claudianum addere velit, nisi nugis nugas tegere satagat,

ne

ne perpluant. Non est cur ejus gratia desideratissimam omnibus Editionem tuam differas. Sed Ovidium postpositum haecenus, nonnemo mirabitur; ego saltem diutius differri aegre fero; fidemque tuam de eo liberari publice opto. Columnae Trajani exemplaris oblationem gratissimam habeo, & tanti apud te me esse, ut in hoc *Vossio* praeferar, summo honori duco. Quia tamen libris Practicis coemendis plusculum hoc anno praeter solitum insumpsi, quorum cotidianus mihi usus est, occasione tam haecenus optata & beneficio tuo gaudere non possum. De *Gronovio* Leidam evocato in locum *Boxhornii*, qui Maximi Parentis tui emeriti vice fungatur, successuro, nescio quid rumoris huc advolavit, cujus certior fieri velim, antequam optimo amico nostro gratuler. Tu, nostrum Musarumque aeternum decus, Heinsi Nobilissime, vale, &, ut facis, amare perge. Dabam raptim *Bredae* VII. Idus Januar. CIO IDC IL. in vico macelli, vulgò dicto. Quas inserui, tuis ad *Gronovium* ut jungas, commendando.

EPISTOLA XXII.

JANUS VLITIUS

Nic. Heinsio.

Leidam.

UT diutius silentio indulgeam, non patitur tua illa tot benefactis probata mihi humanitas; quam oblivisci, imo vel inlaudatam praeterire, * *ἔμψυχ' ἔσθιον*. Quid enim ab ullo affinium pro necessitudinis vinculo desiderare potuissem, quod tu, cum in urbe vestra nuper morarer, non praestiteris? Multum certe in aere tuo sum, nec sine foenere exsolvendo: non tamen alio, quam Trapezitico. Utinam ipsa sorte aliquando, imo quantocyus, sponse *Kinschotio*, exonerare debitorem tuum velles! praesertim hoc tempore, quo Regi Principibusque feriamur. Tu vero quid agis, Idalione, an alio cales numine? Cytheraeo an Cyrrhaeo? an utroque? ut vester mos est, viri Poëtae. Quomodo se habet orta mari Cytheraea ista, quam Nereinen dicitis? Facilem tibi promitto victoriam *Kinschotio* ultra Alpes remoto, & jam jam cantaturo.

Nos patriam fugimus, tu Tityre lentus in umbra

Formosam resonare doces Nerëida nymphas,

Vicinoque fretum claudentes obice colles.

Vel tale quid aliud *μυσικώτερον*, & se dignum. Audisti puto ἢ *δῆνα* Ausoniam cogitare. Sed non invitis neque dissuasuris illustribus Vatibus *Boyo* atque *Plana*; ut saltem proxima Saturnalia immunes celebrent, & suas interim populo cantilent naenias. Dic ingenue, mi Heinsi, si unquam lepidiora habuisti Saturnalia. Doleo me celari, cui auctori tam argutum ac falsum debeat ferculum. *Kinschotius* tantum non irascitur mihi, quia sibi adscripserim. Si illi obtrudi non potest, ad te ibitur. Nam ad alios, praeter vos, & *Wilium* (si hic tamen addi debet) frustra ea laus deferatur; me iudice Si me amas, dubitatione hac me

libera. Quod ut ne gratis facias, en tibi pro Minervali conjecturam, quae inter legendum tuum Nasonem mihi, fungorum ritu, nata est, liberaliter dono: Libro de Arte amandi secundo (quem te nocturna diurnaue versare manu hac tempestate opinor) prope medio, legitur:

Afferat aut uvae, aut quas Amarillis amabat,

At nunc castaneas, nunc amat illa nuces.

Nasute quidem Virgilii illud tangit Naso tuus,

Castaneasque nuces mea quas Amaryllis amabat.

Jocus in eo est, ut innuat, non opus fuisse *nuces* addere, cum *Castaneas* simpliciter ponere suffecisset. Qui ut elucesceret magis, legebam, *non amat illa nuces*: utpote superflue appositas. Hisce vale, & siquid novisti rectius istis Candidus imperti, si non, his utere mecum. Salvebit a me Illustris Parens tuus: Etiam, si videbitur, *Elsevirii*; quibus dolium Bredani decocti plenum mitto, non indigni spero palato tuo, si lubuerit per otium. Iterum vale, Heros ἡρωικότητι. Dabam Bredae x. Kalendas Quintiles cio io il. Addo carmen, quod rogatu Ill. Boswellii imprimi curavi. Autorem nescio; sed Episcopum aliquem Anglum esse reor.

EPISTOLA XXIII.

JANUS VLITIUS

Nic. Heinsio.

Holmiam.

EX quo amplexu nostro & in Sueciam te subduxisti, Amicissime Rerum, te plurimum noctu diuque in oculis ferimus, animoque fovemus suavissimam illam tui memoriam. Cum itaque jam te apud Reginam tuam appulisse rear, & augurer, gratulandum tibi eo nomine censui, salvo incolumique. Sed infelicem me, qui vix trium horarum spatio ab ultimis tuis amplexibus exclusus fui. Eodem enim mane, quo tu Amstelodamum petebas navem conscensus (si bene memini) ego Leydam appuli, & continuo ex *Elseviriis* te perfectum intellexi. Quid mihi tunc animi putas fuisse, cum ea spe, ut vota mea repeterem pro incolumitate tua ante hac suscepta, & quidem praesenti nuncuparem, statim post adventum meum hinc me Leydam contulissem? Ne Patrem quidem tuum, & religiose semper mihi cultos Penates tuos jam magna familiae parte carentes adire aut intrare sustinui. Hagam itaque reversus sum, & ibi moerorem meum auxit iubitata mors Soceri mei, & infinitae in erciscunda familia, molestiae, ac rixae quibus etiamnum inhaeremus. *Vossium* interim Parisios transcurrentem vix tribus salutavi verbis. *Wallius* & *Crommonius* ante octo dies huc advecti primum mihi obtigere solatium. *Wallius* e Brabantia attulit effigiem τῆ μακαρίτη nostri *Kinschotii* cura & impensis suis ab *Hollaro* insigniter, non tamen satis ad vivum expressam; quam puto ab illo brevi habebis, & miraberis aenigmatis appositi inventum. Non dubito, quin videris *Barthii* illum
tam

tam diu expectatum in Claudianum tuum commentarium, vastum, operosum, & ut verbo absolvam, autore suo dignum. Miror minas illas in me jam pridem jactatas, & quarum rumorem per te, perque alios toties exceperam, inventos abiisse; nihil enim invenio, quod me tangat; & si saepe Gratium & comites ejus ad partes vocet; & quidem multis locis a me emendatis aut retractatis post illum *Gronovius* interim non semel vapulat, & audit nuperus Criticus, & nescio quid non? Sed frustra & temere. Tu autem magno malo mactaris, tam vastum librum percurrere coactus; si modo tanti videbitur. Nunc quid in publico actum sit, apponam. Heri cum finis expectaretur tot contentionum & conventuum ad missionem militum temperandam convocatorum, Princeps, cum votis suis excidisset, militibus suis Palatinis sub specie exercitandi convocatis aulam undique stipari, aditusque servari curavit; & sub meridiem *Wittium*, Dordracenum Exconsulem & Ablegatum, *Ruylium*, Harlemensium Syndicum, eorundemque magistratum *Waelium*, cum gratioso & interrito illo Medemblicensium Oratore *Stellinghwerivio*, alteroque Hornensium Syndico (dubito an plures alios) ad se evocatos in aula sua separatis locis detineri jussit. Quo facto duae centuriae militum Delfis, aliaeque deinceps Roterodamo ad hoc accitae Hagam jam tumultu civium repletam aulamque intravere. Plures etiam aliunde cum Equitum turmis expectantur. En quo discordia cives Perduxit miseros! Quid Amstelodami agatur, ubi LX. centurias a Comite Guilelmo Frisio introductas rumor est, inde certius tibi nunciabitur. Ego de successu tanti conatus sine exemplo, nisi forsan *Barneveldium* spectes, nihil habeo quod judicem: exitus acta probet. Tu interim otio tuo fruens, & particulam ejus aliquam etiam nobis indulge, promissi carminis memor, Scanzontis dico. Nec non de *Salmasii* appulsu, & reliquis rebus Reginae Vestrae, aliquid significa. Vale, Musarum nostrumque decus, Heinsiade, & nos amare perge. Dabam tuis turbisque immixtus, Hagae, pridie Kal. Sextil.

CICIDCL.

EPISTOLA XXIV.

JANUS VLITIUS

*Nic. Heinsio.**Holmiam.*

Tandem ergo Claudianum tuum videre mihi licuit, mi Heinsi! tandem teuge, postquam ineunte aestate a nobis discessisti, saluum incolumemque te apulisse adulta jam hyeme intelligere contigit. Quid miraris? literas tuas Idib. Augustis Holmia datas, & has quidem unicas post discessum tuum, cum Claudiani exemplare, per Clariss. *Goesium*, cui probe illas commendaveras, ante paucos demum dies accepi. Ego tamen jam statim & vix elapso post abitum tuum mense ad te scripseram; & jam iterum scripsissem, iterumque te compellassem obtestatusque fuissem amicitiam nostram, ne ejus immemor

mor esses, aut nunc denique te poeniteret, nisi inopinanter & vel invitus in Magistratum hujusce urbis primum ordinem ab Optimo (heu quondam!) Heroe nostro adlectus fuisset proximo elapso mense; ex quo publicorum negotiorum mole tantum non obrutus fui. Arridebat quidem primulum inexpectata haec conditio, quia non tantum par, sed superior quoque tot meis publicaeque quietis hostibus evaseram. Nam quorum tyrannidem incussasse summum in me crimen fuit, eorum curules non vacuas tantum vidi; sed & successor occupavi. Verum, ut ingenue fatear, uti bellum, ita & imperium hoc quaecunque, dulce inexpertis; grave autem jam gerenti est. Quapropter non alienus jam videbar a Professione Eloquentiae et utriusque linguae suscipienda, quam idem noster ὁ μακάριος Heros mihi destinaverat. Cujus tam inexpectata, & non sine horrore accepta mors,

Venturo nunquam satis excusabilis aeo,

omnia nunc in incerto reliquit: & parum abfuit, quin & respublica universa cladem hanc secuta fuisset, nisi divina manus, eademque, quae tantum vulnus fecerat, pari festinatione fomentum aliquod applicuisset. Ego interim inter sacra & saxum haereo, & in publico tanquam privatus vivo: dulcesque ante omnia Musas (quicum in gratiam redire non tantum in votis, sed & in spe erat) subcivis horis non remisse colo. Unde intelliges, mi Heinfi, (ut ad te & munus tuum redeam) quam opportuno tempore elegantissimus, & quod per te nunc dicere licet, tersus ille tuus huc appulerit Claudianus. Pro munere nunc quidem grates ago, quas possum, maximas. Sed quam gratus fuerit, & iudicium meum, ut tu quidem vis, vel potius applausum & album ad omnia calculum meum, ut ego censeo, proximo intelliges. Jam enim admirari elegantias tuas vix satis licet; praecipue tam recenter & vix primoribus labris degustatas. Vix quidem unam atque alteram Panegyrim percurrere potui. Et hoc quoque aliud agendo. Non possum verbis eloqui, quam gestiat animus. Ennam illam tot novis flosculis a te ditatam & praeter consuetum nitentior, involare, & tot mellea prata depascere: quibus maxime Sylvas meas, quas in mortem *Kinschotii* & *Brosterhusii* meditabar, exornare decrevi. Nam ut publico luctui solaminis aliquid afferam,

absumptae vires, & copia fandi

Nulla mihi; dignumque nihil mens fulmine tanto

Repperit, inferior vox omnis, & omnia sordent

Plectra;

Tuo tantum excepto, mi Heinfi. Quare, nisi me ἐνοδιώκην aspernaris, hoc nunc age, & paternum illud exemplum in Manibus Arausiis deffendis redde; & Patriae nostrae, quae a te hoc officii exigit, iusta sua persolve. Jam enim puto sat festo Divaeque tuae dedisti: jam, si bene auguror, transiit illa Dies, qua nullam sacratiorum aut desideratiorum vidit ab axe propinquo Invida quantumvis Helice. Sed manum de tabula; praesertim pleno jam margine chartae. *Guarrinum*, cuius nomine malum nomen apud te audio, ante tres menses per Elsevirium ad Paternas aedes deferri curavi. Si me amas, quamprimum Panegyrico

rico tuo nos bea, & festinationi, quam semper in scribendo caufaris, plus etiam indulge; ut prolixitati quoque ignoscamus. De *Salmasio* saltem quae digna vel indigna sunt, omnia perscribe. *Rivet*us *Bornius*que (qui nuper *Orci* faucibus ereptus est) te salutant. *Wallius* quid aut ubi agat, & quando *Kinscottium* nobis redivivum dabit (nisi quod imaginem ejus curaverit exprimi) plane ignoro. Quaeso & illum, ut hoc agat, pro autoritate tua qua polles, serio exhortare. Cl. *Vossium* salutâ quam pote officiosissime. Vale, saeculi & orbis nostri decus, & nos amare perge, qui te in oculis ferimus, & *Claudianum* tuum quotidianum comitem adscivimus. Iterum atque iterum Vale Mellitissime *Heinsi*. Dabam *ὡς τάχιστα*, Bredae III Kal. Xbres. Gregor. st. anno. S. N. cicioccl. Per *Goesium*. CL. missas.

Nescio, an tanti videbitur, liceatque examini tuo submittere hoc quicquid est Epigrammatis sive Eidylli *Italico* rythmo compositum.

„ Ter eere van het Vreughde-vier by de Wet en Gemeente der Stadt
„ Breda ontfteken over de Geboorte, van de Nabootigen Sone
„ ende eenigh Na-saet van H. L. M. S. Hooch^e. &c. Baron van Breda.

Uw' frissche STAM, Breda, in't bloeyen van sijn leven

In wien gy al uw' roem en hope hadt gestelt,

Wiert door de Doot (helaes!) ontyd'lyck neergevelt,

En 't scheen dat met sijn val de moet was opgegeven.

Maer neen; God leeft, en doet de Goddelosen i beeven.

En maakt te schand' hun vreught in't vallen van den Helt.

God heeft een jonge SPRUYT (in spyt van Doots gewelt)

Van d'afgehouwen stronk op uwen stoel verheven.

De naare duyfternis, die op u neder quam,

Is door dit nieuwe licht, en onverwachte stralen

Van God's erbermend' oogh, van u weer afgerweeken.

Juycht dan, tot Godes Eer, en laet dees vreugde-vlam

Verlichten uwe rouw, en treurigh bert ophaelen;

Doch in uw' Ziele meest een geestlyck vier ontfteeken.

Post nubila Phoebus V.V.

i Tales hic plurimi, qui defuncti mortem laetissime exceperant, foti ea spe. ut comes Johannes Nassovius ex testamento Philippi successisset. Vlitius.

EPISTOLA XXV.

JANUS VLITIUS

Nic. Heinsio.

Holmiam.

Quas ad me Eidibus Novembr. Gregor. anni superioris Holmia misisti, eas demum pridie Kalendas Februar. hujus anni (quem tibi Musisque tuis propitium felicemque precor) accepi, secundas, postquam a nobis discessisti.

Tom. III.

XXXX

Munus

Munus autem, quo me beasti, vixdum hac hora, qua hasce ad te depropero, per *Wallium*, qui & literas tuas praemiserat, huc allatum videre contigit. Sed bene tamen nobis, quos immodico desiderio nostro frustrari noluisti! Judicium nostrum, vel potius praëjudicium, si postulas, dicam quantum potero ex ungue Leonem aestimare: vix enim primam perlegi paginam, nec tamen, ut fatear, lepidissimum illud in ἑσχατοκολλίῳ in *Olo* Epigramma non potui prurienti oculo temperare, quin obiter inspicerem. Verbo absolvam, ne frustra meritum carminis laude condigna acquare coner, verè nobis Augustam dedisti. Sed cave ab *Olo*, si monentem non indignaris. Ut metuas, nihil metuo quidem; sed tamen, ut cautè vindicem agas. Ad mellitissimas literas tuas redeo. Cl. *Vossio* curam Regiae Bibliothecae demandatam, eamque undique accersitis incrementis jam in immensum auctam, lubens intellexi. Quod de *Brunone*, etsi sui pene, non nostri tantum, oblito, sollicitus sis, pro candore tuo agis. Faciam quamprimùm injuriam suam erga te, tuamque simul benevolentiam, intelligat, si quis humanus in illo sensus restat. Claudiani tui geminum exemplar, a *Goesio* unum, alterum per *Elsevirium*, nisi fallor, probè accepi, & hoc quidem puto me tibi nuperis meis ante tres fere menses datis non sine gratis significasse, ut & alia de rerum nostrarum quàm publico, quàm privato statu. Interea notas tuas a capite ad calcem percurri, & cum textu alios contuli. Deus bone, quam insignes easque infinitas in tam brevi opusculo nobis emendationes dedisti! Ita ut una fidelia non unum parietem unaque opera non Claudianum modo jam vere tuum, sed tot innumeros autores demerueris. Ut *Silium*, ut *Stadium*, *Val. Flaccum*, aliosque, quorum nomina & singula loca mihi descripsi, omittam, sane tot palmariae in *Ovidio* tuo correctiones non potuerunt non salivam nobis movere, & ad pleniores in illo dapes nobis a te debitas praegustationem, ut ita loquar, acuere. Non meum tibi judicium hîc depromam, ne adulari tibi existimes, sed aliorum & quidem Antverpiensium *Henschenii*, *Bolani*, *Gervartii*, denique & *Moreti*, quos cum *Bornio* ante triduum invisimus. Omnes uno ore civicam tibi decrevere: nos &, si pateris, triumphum de omnibus, qui Claudiano hactenus manum admovere, quos inter non *Barthium* & id genus alios nugatores, sed vel *Scaligeros*, *Raphelengios*, & caeteros ἀκίβδηλες αὐτῆς heroas accenseo. *Hofschii* sententiam ex ipsius, quas ab *Henschenio* accepi, ad Jll. Parentem intelliges. Poëmation ejus, si occasio feret ut commode mitti poterit, simul videbis. Sed ad Claudianum tuum redeam, si pace tua liceat liberè unum atque alterum locum tangere, non notandi gratia, sed ut vel hinc colligas, me ferio illum notasque tuas evolvisse. In Conf. Prob. & Olybrii v. 202. in tua legitur,

taceat Nereida nuptam

Pelion, duplici foecundam Consule Matrem, &c.

In aliis, *Pelione*, duplici, &c. Neutrum placet; & forsan in tua operae errarunt. Nec enim aut metrum aut sensus constat. Ego ex corrupta vet. lect. rescribo:

taceat

Legitur inter *Heinsii Poëmata*, lib. I. silvar in fine pag. 148.

taceat Nereida nuptam

Pelion. O! dupl. faec. Conf. matrem,

Felicemque uterum, qui nomina parturit annis!

Nam & in fine hac distinctione caret tua. Quod in Calpurnio meo, *gentilia poma*, pro *genitalia*, rescribas, si modo autoribus, quos laudas, libris, probo sane. Nam & *Genitalia*, quod Romana & omnes Pythaeanae secutae tenent, saeculi istius genium sapit, idemque valet ut ex Ammiano notavi ad Nemefiani Cyneget. pag. 411. qua eadem pag. videbis etiam me *Mazacas* contra *Salmafium*, *Mazaces* praefерentem, asseruisse, ex iisdem, quos tu pag. 142. citasti autoribus, sed memoria te puto fallebat, cum Gratium, pro Nemefiano, appellares, quod leve est. Item Raptus Proserpinae lib. II. video te reposuisse, *Parthenium canibus sectatur odorem*, pro *odoris*, quod quidem satis docte asseris, sed (pace dixerim tua) nondum probas. Nam quae adducis exempla, de canibus, quos odor tangit, loquuntur; at hic de Diana scrutante agitur, vel, si id parum est, opponam vel unum Maronem, apud quem *odora canum vis*: Ut Laevii *odorisequos canes* omittam, quae nota est sagacium. *Parthenium* autem, quod Chersonesi promontorium est, eodem modo indiget Val. Flaccus V. Non tamen hoc tanti est, ut tecum ideo, multo minus cum libb. Vett. auctoritate, contendam. Postquam isthaec in chartam coniecissem, non potui non Augustam tuam in manus repetere, ubi continuo textum illud tam graphice a te detextum in oculos occurrebat. Nihil potuit augustius, nihil tanta Augustâ dignius, aut tali festo convenientius, pingi fingive. Quam egregie autem invidiam Fati, quam alii accusassent, excusasti! cum dicis,

Solus sibi vindicat aether

Invidiam hanc, & prona neci Diisque aemula virtus.

Quàm vere divinum hoc posterius! Tum illud quam numerosum, *Pesque pedi, manibusque manus, osque ore premuntur*. Nec illud minus ingeniosum,

Et ventis debentem inimicis nomen Adonin;

Quod vereor ut quis digne legat, qui Ovidianam tuam Emendationem ignorat, Et perdunt iidem, qui praestant nomina, venti. Diras vero illas in Regicidas Britannos (hactenus enim continuata mihi unico spiritu lectio) quis non tibi invidet? Sed infinitum esset, singula iterum iterumque legi digna enotare, cum nihil non te dignum, imo vel majus, siquidem & te ipsum in hoc poemate superaveris, & ipsam (pace ejus mihi dicere liceat) Augustam aequaveris, ubique occurrat. Veniam precor, mi Heinse, si amore, imo ardore reliqua legendi abreptum scriptionis hujus jam taedeat. Sed heus, o bone; quamnam ego a te poenam merui, quod ad Augiae stabulum, Barthii Commentarium dico, me ableges? Egone ut inventis glandes jam praeferam aristis? Plus eruditionis spero ex unica tuarum pagina, quam ex toto illo volumine. Rivetum postridie Non. Jan. obiisse puto intellexeris. Sed levis haec nobis jactura, qui hominem istum jam probe novimus. Obiit sane Christianus; nisi quatenus nihil fordidiſſimae avaritiae ad extremum usque remiserit, cum & publicis impensis sepeliri voluerit. Haec inter nos. Wallium, ut Kinschotium nobis reddat,

X x x x 2

serio

seriò, & non sine exprobratione aliqua tam supinae procrastinationis, monui. Ego, etsi in curia totus, aliquid tamen libelli Augustae tuae inscribendum paro; & jam absolvissem, nisi deesset typorum commoditas. Exercitationes antiquariae erunt. Tu videris, an liceat & mihi Regiam intrare, Vale, Musarum nostrumque decus, & nos amare perge, *Vossiumque* meo saluta nomine. Dabam *ὡς ὤκιστα*, Bredae Idib. Februar. CIOIOCLI. *Bornius* te salutat, & Claudianum tuum, quem a me habet, diligenter legit.

EPISTOLA XXVI.

J A N U S V L I T I U S

Nic. Heinsio.

Leidam.

ET si quidem, si unquam, nunc maxime in hoc civitatis nostrae gemino-justitio (nam & *Arsenium* Praefectum fatis functum, & causam Dominae nostrae retractari novo appellationis judicio ignorare non potes) summis districtus negotiis, suavissimis tuis literis, nedum tam prolixo geminoque affectui, condigne respondere nequeam, nolui tamen diutius superfedere, quin saltem binas illas tuas cum Regio numismate postliminio accepisse significarem. Grata laetaque omnia fuisse, parum est, imo & supervacuum, ut addam, qui quanto unquam affectu tua excepi, legi, aestimavi; tanta nunc religione sacrosanctum hoc amicitiae nostrae mihi semper futurum pignus, non modo expansis manibus, sed intimo quoque corde recepi: nec minimae gloriae duco, praeter tot tua munera & beneficia, quibus me pridem devinxisti, nunc Reginarum illam Reginam parariam accessisse. Si non vani sunt vates illi, qui olim Principum imaginibus arcani divinique quiddam affinxerunt; jure equidem affirmare possum, Regio isti nummo secretam quandam vim vel ab ipsa auctore vel a te inspiratam, qua in perpetuam devotionem abreptus sum. Et sancte jam promitto, me simulac impar illud humeris meis & vere iniquum onus, magistratum inquam, deposuero, vel saltem mutavero meliore mihi que convenientiore conditione (quorum alterutrum propediem fore, certum habeo) totum inquam me accincturum, ut illam, quam profiteor, devotionem aliquo saltem effectu ipsi Dominae, (quid ni enim ejus potestati me quoque subjiciam, qui plusquam aere paratus sum?) testatam faciam. In quo non dubito, quin & votis meis aspires, & propitius mihi futurus sis, Heinsi Amantissime. Verum de hac re, ut & de reliquis, spero me intra paucos dies praesenti tibi (nisi iter meum, quod civitatis nomine ad Principem Regiam suscipiendum molior, praevertere mavelis) expositurum; nec in hoc malum nomen a me auditurum (etsi non a me sed ab aliorum suffragiis pendeat, ut ego potius quam alius mitatur) confido. Tum simul & alterum illud, quod in te Dordraci quaerendo indiligentior fuerim, expuncturum me, puto. Interim miserum illum Regum patronum *κλαίειν τε ἡ ἀλγεα πάσχειν*, teque gaudere & bene rem gerere jubco. Vale,

Vale, saeculi nostri aeviternum decus, Heinſi Nobiliſſime, & me, vel, ſi minus, meas prolixiores propediem expecta. Illuſtrem Parentem valere & ſalvere velim. Dabam feſtinanter Bredae III. Idus Junias S. N. A. CIO IDC LI. De *Gronovio* dudum nihil intellexi, ut nec de *Brunone*, & quo loco res ejus ſint. *Thibautii* caſum perincommode fero, *Crommonii* mei cauſa, qui ejus ope, patris ad Rempublicam curandam promoti loco ſufficiendus videbatur. Sed utinam modo non gravioribus malis; quae tamen proſpicio, Principis noſtri interitum deploremus. Iterum vale, meum decus. *Bornius*, quem tenerrima familiaritate complexus ſum, & vel eo magis, quod te tuaque debito honore proſequatur, te ſalutat. Quaeso apud Bibliopolas veſtrates inquire, an ullibi *Bernardini Rutilii* de veterum JCtorum vitis liber, quem *Gefnerus* in Bibliotheca ſua paſſim citat, haberi poſſit, quovis etiam pretio: vel alias commo-
dato.

EPISTOLA XXVII.

JANUS VLITIUS

Nic. Heiſio.

Leidam.

Imulac ſuaviſſimas illas tuas acceperam VII. Id. quas ex Elſeviriorum taberna Hagae a. d. IV. Idus Quintiles ad me dedisti, Amicorum Praeſtantiſſime, jam totis velis vel illuc, vel ſaltem Dordracum, in amplexus tuos ruiturus, contende-
bam. Quid enim gratius, quid ſuavius mihi evenire poſſet, quam vel una hora tecum eſſe; & tenerrimum illum amorem meum, quo te ſincere (ſi modo non praeter reverentiam loquor) diligo, jucundiſſimo viſu tuo tantisper exſatiare? praecipue hoc tempore, dum animus mihi, abitus illo tui nuntio graviter percuſſus, nescio quid inominati praefagit, ita ut, niſi ſtato tempore utar, vix toto triennio te viſurus ſim. Sed vide quam moleſtus hic mihi ſit magiſtratus, cum alias, tum praecipue hiſce XIV. diebus, quibus vices meae inciderunt, ut cauſis diſceptationibusque forenſibus pro tribunali & quidem gemino, decidendis vacare cogor; nec non (ut ne tantulum quidem otii ſuperſit) quotidianis levioribus rixis ex arbitrio, poſt meridiem, componendis praeſſe. Id ſcilicet cauſae erat, cur ille, quem dicis, e magiſtratibus noſtris, vicinus & affectu pater meus, vir optimus atque integerrimus, *Drabba* nomine, negaverit me pedem hinc poſſe movere. Cur vero ante hoſce dies atros non venerim, proximis, quas negligenter ad te pridie, niſi fallor, nonas Quintil. dedi, ſignificavi. Quapropter, ne fidem meam ludere videar, polliceri quidquam non audeo: Sperare tantum dicam, me octavo abhinc die hinc in Batavos & ad te, ô Bataviae decus unicum, iter moliturum. Iterum dico, non addicere me; ſed ſperare ut, rebus prolatis, excurrere poſſim. Interim, de *Brunone* noſtro, & *Gronovio*, quae ſignificas, grata fuerunt: quae de *Freinſhemio* *Holſtenioque* grates habeo. De *Sarravii* obitu, jam antea, & ni fallor, ex te,
in-

intellexeram. Quid vis dicam? omnes una manet via leti. Ad te, mi Heinſi, ſpectat, quod dignum laude virum Muſa vetet mori. Hac occaſione non poſſum quin te exhorter, ut qui jam Galliis, Italiae, & Sueciae ſingula monu-
 menta ingenii tui dederis, jam & Patriae aliquid maturae meſſis relin-
 quas. Scio enim pro crudis te habere (non ego) quae ante x. & quod excurrit
 annos concinnasti. Ad *Gronovium* quod attinet, obſervationes ejus tuo mu-
 nere acceptas, nondum, niſi oculo jaculo, videre aut legere contigit. Mi-
 rus eſt caſus. Bibliopola, cui ſarciendas commiſeram, haecenus amiſſas vel alie-
 no domino traditas aſſeruit. Pauci ſunt dies, ex quo iterum inveniſſe ſignifica-
 vit: nondum tamen compactas dedit. Haec cauſa, cur nondum lectis ejus ob-
 ſervationibus, reſpondere ſuperfederim. Sed beneficio tuo utar, ut ſaltem a te
 admonitus officio non deſim. Imo jam hîc teſtes habes literas meas; quas, ſi
 venia dignum me putas, commendatione tua ut augeas, rogo. Ulterius etiam
 tendo, & obſecro, perque communia Muſarum Sacra oro, ut *Bernardini Ru-
 tilii* & *Ant. Auguſtini* libros de vitis vett. Jctorum neceſſario uſui meo ex in-
 ſtructiſſima Illuſtris Parentis Bibliotheca, tanquam pararius, ſuppedites: fide-
 meam obſtringo, brevi reſtitutum iri. Ne quid enim neſcias, erit & ob-
 ſervationum mearum pars illis deſtinata, dum jurisprudentiae incunabula quae-
 ro, progreſſum & maturitatem indico, abuſum & declinationem (ut ita lo-
 quar) demonſtro. Tum quoque, ut Jctos ſuae quemque aetati, quam Lam-
 pridius in Severo, ſi modo probi ſunt codices, mire confudit, aſſignem; &
 an idem ſit Tertullianus, cujus opera extant, & cujus in pandectis centuncu-
 los habemus, diſquiram. Denuo itaque rogo, mi Heinſi, ut pro conſueta be-
 nivolentia illos mihi vel per nautam, vel potius per Elſevirium quantocius
 mittas; ſimulque itineris tui, qua via quoque die ineundi, certiorum reddas; ne
 aut fruſtra, te proſecto, adcurram, aut unius horae negligentia fructum iti-
 neris mei perdam. Arras promiſſionis, vel potius ſpei meae, habe ſacrae ima-
 ginis exemplum, quod (ſi modo non indignaris) emplaſtro formari curavi,
 quo plures & in hac Muſarum colonia Dominae tuae cultores facerem. *Aurea
 donanti ſic aerea reddimus arma.* De reliquis, volente & favente Deo, coram.
 Interim vale, fideliſſimum pectus, Heinſi Nobiliſſime, & nos, quantum facis,
 amare conſtanter perſevera. Illuſtrem Parentem, *Boxhornium*, etiam Σκυδι-
 ζοῦλα, *Wallium*, reliquosque amicorum ſalvere jubeo. Dabam feſtinans in cur-
 ſum piſtrinum. A. D. v. (vide enim an bene calculum poſueris, qui tuas a. d. iv.
 dederis) v. inquam, Idus Quintil. cio idc li. Bredae. *Bornius*, qui finienti
 ſupervenit, te & τὴν δέαντα Parentem officioſe ſalutat.

EPISTOLA XXVIII.

JANUS VLITIUS

*Nic. Heinsio.**Parissos.*

Etsi equidem haecenus ignorem, ubi nunc terrarum agas, nolui tamen diutius in aere tuo esse, quin aliquid saltem reponam ingenti tuo erga nos amori, quem novissimis tuis literis, quasi supremis tabulis (absit verbo omen) tanto cum studio mihi testatus es, Heinsi, politiorum quicquid est mortalium decus. Nec possum sane dijudicare, utrum illae plus gaudii an moeroris mihi attulerint. Quid enim gratius, quam affectus tui quasi in extrema tegula perseverantiam; quid tristius, quam unius aut alterius dieculae dispendio amplexu illo tuo desideratissimo exclusum me, intelligere? Quanquam postmodum ex *Elsevirio Joanne* nostro hinc acceperim, te multis diebus post illas a. d. xviii. July ad me datas, in procinctu stetisse, & Leydae mansisse. Infelicem me, qui tam cito desperaverim! Sed quandoquidem sic fuit in fatis, age sequor te animo per Terrasque tractusque maris coelumque profundum; & quocunque loco te subsistere intellexero, mutui amoris testes interpretesque ad te mittam, literas meas. Tu modo, amabo, fac intelligam, quo tempore quoque usque loco iter tuum prosequitur sis. Interim, ut absentem quoque amplectar, audeam, videamque, (quod de amante *Didone Maro*) *Christinam* tuam, non argenteam, sed vere auream illam dico gremio teneo, genitoris, id est, autoris imagine captus. Saepe jam illam repetii, sed nunquam sine novis deliciis, quae non nisi attente legenti apparent. Tantum inest reconditae eruditionis. Sed ne merita ejus deteram, cum inferiora sint omnia, quae dicere queam, tacita mente potius illam adorare pergam. Licetne tamen ut modeste interrogem, cur non *Talaonion Adrastum* malueris, quam *Talaonium*, caesura periculo evitato? Etsi sciam, *Aetaeo Aracyntho*, infinita talia extare, quae & ego avide imitor; sed inum desinentia desidero. Tum & *transformia corpora* quaero adhuc: tibi exemplum suppere non dubito. Postmodum *Fast* i. *transformis adulterat arte* *Calepino* citatum video, pro quo tamen a. Ed. & parentis tui, *transformat & alterat*. Et hoc me expediri velim, utra genuina MSS. lectio sit. Deus bone! quid de misera *Britannia*, legumque pudore nunc diceres, si iterum instantem Regi cladem, forsitan & caedem, videres? Quanquam primum tam laeta omnia, ut jam *Soli* restitutum publicum novum fuerit. Nec jam *Galliae* sincera quiete, ut vides, fruuntur. Nos saltem haecenus post publicam gratiarum actionem. Me quod attinet, vereor ut magistratus hic meus mihi vel invito congelaciet. Dum enim residua litis inter Principes comperendinantur ex consuetudo, vereor ut comitia nostra, quibus x. Octobris dies praestitutus, haberi possint. Quod si fit, miserum me, qui voti mei vix compos fieri queam. Conabor tamen omni modo solitudine & molestis hisce me subducere, &

vitae

vitae me reddere priori. Vale, Heinsi suavissime, & si me amas, cura valetudinem tuam. *Augustini* & *Rutilii* vitas, quibus *gratia* & favore tuo perusus sum, Opt. Parenti ipse intra xv. dies restitutum me polliceor, recipio. Iterum atque iterum, Vale, Cor meum. Dabam tolutim, ut nautae abeunti has traderem. Bredae, xiv. Kal. Octobres, CIO IO CLI. *Bornius* te salutat.

EPISTOLA XXIX.

JANUS VLITIUS

Nic. Heinsio.

Florentiam aut Romam.

Tandudum, quo loco viveres, ab omnibus, in quos incidebam, tuis scilicet, quaerebam, jamque id incommodum mihi erat, nihil certi de te intelligere, cum tu ipse primus Parisiis te salvum incolumemque esse significasti. Et jam hoc saltem gaudeo, nihil periculi in tam diutino silentio fuisse. Sed, ut primum commercii nostri ratio inter nos constet, scito me & novissimas, quas cum in procinctu stares, ad me dabas, & hasce nunc unicas post discessum, ix Septembris datas mense fere altero post, accepisse, Interim me circa idem fere tempus ad te scribisse, easque Ill. Parenti tuo commendasse. Et paulo post Rutilium & Ant. Augustinum per *Elsevirios* restituisse, quorum nomine & tibi nunc ut parario grates habeo maximas. Multum enim me juvit Rutilius, exactissimus autor. Tametsi instituto meo ingentem moram iniecit publica, quae mihi cum nonnullis perditissimis collegis, omnis aequi bonique hostibus, aliquamdiu fuit contentio, quae nondum deferbuit; nec spes mihi est, ut unquam cesset, nisi cum illorum ejectione, vel mea saltem migratione in alia castra. Quod & ipsum fieri non potest nisi controversia Principali decisa primum fuerit. Ego, quamvis non sine magna spe gloriosae victoriae publicam salutem defendam, tamen admodum moleste fero, tantisper musaco meo excludi, & quodammodo a Musis librisque exulare. Nihil enim magis ex votis mihi est, quam ut Deus nobis haec otia reddat; quibus tu interim, mi Heinsi, tam abunde frueris. Non possum tibi verbis exprimere, quantum animus mihi pruriverit, cum tuas observationes vidissem. Nec potui, quin continuo Gratium in manus sumpserim, ut conferrem. Varias lectiones Codicis istius Thuanæi jampridem beneficio *Crommonii* mei (qui nuper Senatui Principali a Regiâ adscriptus est) nactus fui, & libello meo inserui. Quod *profecto* rescribas loco *profecti*, cum in V. C. sit *profectu*, pace tua dixerim, non persuades, saltem hactenus; utitur enim autor perpetua metaphora, a viatoribus petita, qui compendia itineris quaerunt. Sic venatores illos *propiore via profectos* dicit, qui Rationem *comitem* (quae etiam metaphorae ejusdem vox est) assumfere, ut ea duce uterentur. Praeterea tu videris, an satis poëtica vox sit *profecto*. Paulo post pro *cecidit violentia retro*, quod *cessit* reponas, edidit ita sua auctoritate *Barthius*: quod & ego rectum censeo, si libri addicant. Alias *retro cadere*, ut

retro

retro sublabi, apud Maronem AEn. 1. *retro sublapsa referri Spes Danaum*. Et ibid. *Sic cunctus pelagi cecidit fragor*. Quod denique, & non sine carmine *nifus* (sic saepe Cicero, *praesidio alicujus niti*;) loco *lusus*, restituas, ut ego quidem ex conjectura edidi, gaudeo sane *ὁμόφρον* te mihi, etiam inopinanter, factum. Quae de Phaemonis Editione monuisti, libens intellexi, gratiasque habeo. De *Alexiade* edita *Gronovium* monebo, nisi jam audivit, nimia expectatione sua se operam tam periculosam luisse, aliumque fructus praecepisse. Poëmata tua edi nondum audiveram. Gaudeo vehementer. Miror tamen *Grotium*, *Rufium*que, quicum nuper Hagae salutis tuae non semel libavimus, nihil ea de re mihi significasse: nec adeo *Elsevirios*. *Salmasium* veniam a Regina tua, citius faciliusque forsitan, quam voluisset impetrasse, ex Anglia dudum nuntiatum, & novis ordinariis (gazetas vocant) additum fuit. Postea *Holmia*, vel *Upsalia* potius, a *Matheos* quodam Professore (Ex *Bornio*, quicum hasce relegeram tuaeque libabam salutis, postmodum intelligo, *Ravium* esse Hebraeae linguae Professore, cujus literas vidi.) perscriptum, eum de eventu proelii Regis Scoti consilium suum vel huc vel in Gallias migrandi suspendisse: quod si sit, jam vos quoque Gallia junget. Sed quid ego tam late, qui quo hasce mittam, vel ubi te conveniam, & quando isto regno excessurus sis, nihil scio. Utinam hospitia vel locum aliquem, *Venetis* vel *Florentiae*, & ubicunque moraturus sis, designasses, quo meas destinarem: jam saepius sine metu perdendae operae ad te scripsissem. Nam *Leydam* retro dimittere, cum citius vel *Lutetiam* perferri possent, sane admodum incommodum est, tam vicinâ *Antverpiâ*. Quare iterum rogo (si hasce tamen brevi antequam *Alpes* transcenderis, accipias) hospitia tua vel argentarios tuos, quibus uteris, mihi describe. Iterum Vale, Decus meum, & si me amas, saepiuscule mecum age per literas. Dabam raptim, *Bredae* pridie Kal. Novembres. CIO IO CLI.

EPISTOLA XXX.

JANUS VLITIUS

Nic. Heinsio.

Id Italiam.

Tertium jam ad te scribo, mi *Heinsi*, ex quo abes. Quarum secundis respondi tuis *Lutetia* datis. Ego cum diu molitus sim trajectum in *Angliam* ad fundos remque familiarem curandam, haecenus difficultate bellorum & partium detentus fui. Nunc Legati tres eo proficiscuntur, & princeps eorum *Catfius*. Is, cum comitem me illi obtulissem, curavit ut non otiosus vector adsciscerer: Legationi enim a secretis futurus sum. Conditio & commoditas praecipue haud spernenda mihi & omnibus amicis visa est. Facilis itaque consensus fuit: etsi intelligo non facile negotium fore. Hujus rei nescium te esse nolui, ut si commode meis respondere possis, *Londinum* tuas curares; sin minus, ne infalutato te neglectoque amicitiae officio profectus viderer. Novi

Tom. III.

Yyyy

hic

hic parum est, nisi quod omnis cura Patrum, omniumque consideratio in illam legationem feratur. Hinc summam reip. pendere etiam vulgus animadvertit. Audisti puto Edictum ab Anglis emanasse, quo exteris naviculariis omnia commercia interdicuntur. Ei dies praestitutus Kalendae decembres. Hunc praevenire omni ope nituntur Ordines, adeoque quantocyus nos solvere jubent. Jam nonae sunt, & primulum tempestates sedere, Eurisque flare incipit. Ita fit ut undique obruar, &, dum scribo haec, interpellat. Vale itaque, decus meum, & si me amas, etiam Londini fac pignus amoris tui excipiam aliquod. Iterum atque iterum vale, & valetudinem tuam cura. Dabam in procinctu, Nonis decembr. CIO IDC LI.

Poëmatum tuorum desiderio nimis maceror, & vereor ut ullum exemplar ante abitum videam. Lentulus ille *Kinschotii* Editor *Wallius*, puto, iterum nescio quid morae injicit. Praefatio illa plus taedii nobis affert, quam officii tibi. De *Salmasio* altum silentium est. Ego *Miltoni* familiaritatem jam praecepi, Parariis viris doctis, qui mecum eunt. *Seldenum* quoque & *Junium* (si in vivis adhuc est) adibo frequens. Hinc quoque commoda itineris mei, etsi

Hiberno molimur fidere classē,

Et mediis certum est aquilonibus ire per altum,

metiri mecum potes. Postremum & jam vale:

EPISTOLA XXXI.

JANUS VLITIUS

Nic. Heinsio.

Florentiam.

EX quo in Angliam trajecimus, nihil mihi suavius fuit, quam tuas videre. Quas enim Bredam ad me, Scabinum scilicet, destinaveras, mi Heinsi, eas hic, dum Legationis secreta curo, xxv. die, postquam Venetiis datae sunt, feliciter accepi. Itineris profectionisque hujus meae, antequam e Patria discederem, certiore te feci. Nos inde satis commode prospereque tranquillissimo mari navigavimus, quod biduo emensi, ad Mariae portum xxiv. die Septembris stetimus, & postridie Gravesandam prope anchoram jecimus; unde publicis phaselis Londinum pervecti, ibique xxvii. magnifice excepti legati; quibus Lautia sane lautissima per v. dies praebita. Atque ita ipsis Kal. Januariis, quas propitias tibi ominor, in aulam nostram peculiarem migravimus, quae est in via Reginae (Queene-street) non longe a Drury-lane, ubi *Joachimus*, & tu olim divertebamini. Aedes illae memoriam tui mihi subinde referunt. Ex xx. Nobilibus, qui nobiscum venerunt, solo *Lud. Hugenio* familiariter utor, dignissimo Patre suo filio. *Seldenum*, dum exequiis defunctae Comitissae Cantii intentus est, cujus ingenti haereditate auctus est, haecenus videre supersedeo: ut & *Miltonum*, quem adire decrevi. De *Salmasio* ne γὰρ quidem auditur. Nec magis & *Patricio Junio*, qui Oxoniae, est, *Duraeo* in praefecturam

ram Bibliothecae D. Jacobi suffecto. Nihil haecenus publice actum post primum accessum, Orationemque a Domino meo *Catsio* in Senatu habitam. En tibi epigrammation extemporaneum. Quamquam vereor ut hasce per Galliam missas recte accipias. Dudum est, quod scire expostulem, ad quem literas meas destinare possim. Nam ad Parentem, nunc praecipue, incommodum videbatur. Partem sextam Poëmatum tuorum; quae Christinae pleraque habet, paucos ante dies accepi: in qua expressum video iterum illud, *aut Talaonium Adraustum*; Quid si *Talaonion* scripsisses? Sed tuum id est dispicere. Interim vale, Decus meum, & si me amas, scribe aliquando ubi & quando hic vel ibi futurus sis. Dabam raptissime & occupatissimus, eadem, qua tuas accepi, nocte, XII. die Januarii MDCC LII. Londini. Obseratis referatisque literis addere visum fuit (cum post admissionem Legatorum in Consilio, quod vocant, status aliquantulum ocii superfit) hodie Dominis nostris oblatum Poëmatum volumen satis prolixum in honorem *Cromwellii* rerumque ab eo gestarum, auctore milite quodam *Fishero*, quem *Petreyus* (nostri puto hunc Ministrum) ejecto Marone, utpote obsoleto & fabuloso, in Scholas inducere suadet; & tantum non persuadet. Carmina sunt heroica non ita inepta. Sed manum de tabula. Lupus est in fabula? Vale iterum atque iterum vale, rerum dulcissime, & cura valetudinem.

EPISTOLA XXXII.

JANUS VLITIUS

Nic. Heinsio.

Romam.

Tertias a te, dum hac in gente moramur, recepi heri, mi Heinsi, pridie Kal. Apriles Româ datas. Secundis tuis Florentia missis Martio mense, eodem respondi; measque, ut & hasce, Caletio, curâ nostratis *De Glargii*, Romam curavi: ignarus qua via tuas habeam: certus autem hanc compendiosam maxime, dum per Gallicas turbas licet impune nostris ire redire literis. Quod jam ante ex urbe ad me scripsisse, geminisque meis respondisse addas, puto te errore loci lapsum, ut pace tua dicam. Florentiae enim id factum: nec praeterea ullas ex Urbe a te habui interim. Sic constat nobis scriptionis mutuae ratio. Nunc ad tuas illas venio, quibus nihil mihi suavius gratiusve inter molesta haec negotia obvenire potuit. Quapropter & stilum publico subtraxi, ut tibi quantocyus responderem. Valetudinem tuam te curare, gaudeo imprimis: utque ante omnia cures, moneo, memor istius,

Οὐκ ἔσθ' ὑγείας κρείττον' εἶν' ἐν βίῳ.

Pejusculum tamē te habere, non placet. Quantum a fructibus cavendum sit, doctum non docebo. Non minus id tibi usu venit forte, quam nobis a bubulae ovillaeque esu hic abstinendum; aut saltem moderandum. In quo multi nostratium gulae suae poenas dederunt. Meministi peculiarem carnivorae gen-

Yyy 2

tis

tis hujus morbum esse. Sed quid ego nunc aliena ago? Quod Vaticanae & amoenissimo isti literarum studio totum te des, non culpo: imo cuivis, quam tibi, invidere hanc felicitatem possem. At enim

Non cuius homini contingit

Romae nutrirī atque docerī.

Nobis non licet esse tam beatis.

Utinam aliquando Ovidium tuum tandem non diutius promittas, sed praestes. Quid de poematibus tuis factum sit, dudum non audivi; Petro nostro *Vincen-* *tio* mortuo. Christina ultimam paginam facit, quam *ὁ μακαρίτης* mihi misit. Eam multis hic ostendi. *Seldeno* non licuit; quia omnibus advenis, praecipue nostratibus (ut credo me nuper significasse) Musaeo & congressu suo interdixit. Oxoniae nondum fui. Non patiuntur enim pro arbitrio excurrere concatenati, quibus hic implexus sum, labores; tota fere Legatione (absit invidia verbo) mihi incumbente quodammodo. Praeterito tamen mense com meatum a Dominis impetravi, Eboracum usque eundi, ad res privatas curandas. Hoc itinere Lincolniam, Nottinghamiam, Northamptoniam, caeteraque, quae se offerebant, oppida perlustratus sum, vidique militum (an belli?) maximas clades, templa vastissima, arces praecipuas atque palatia Regia passim dejecta, nonnulla & solo aequata non sine indignatione vidi. Eadem & Bibliothecas passim involvit calamitas, Cantabrigiam fere desertam inveni. Populum ubique sortem suam regnique deplorantem, & jugum indignantem. In pago quodam exiguo Lincolnienſis agri, cui a parva arce, quae ibi a Romanis quondam extructa fuit, Littleburgh nomen mansit, numismata aliquot aerea bonae notae forte fortuna nactus sum; Rustici incolae suillam pecuniam ibi vocant, quippe plerunque a suis erutam. Spero me plura, etiam argentea, inde accepturum. De Bello inter hanc & nostram Remp. nec verus, nec vero nimis absimilis nuntius ad vos pervenit. Domini mei tamen, ut pacem habeamus, omni opera adnituntur. Hoc opus, hic labor est. Quod nisi (favente Deo) perficimus, ego quoque operam meam luſero. Ne de Hispano caeterisque inimicis nostris in sinu gavisuris jam loquar. Gravelingam arcta obsidione premi, & quid in Galliis barbarum sit, aliunde citius certiusque intellexeris. Salutat te Dominus meus *Catsius*, gratissimamque habuit, quam illi a te identidem dixi, salutem; eoque magis, quia Roma missam. Vale, Musarum Literarumque Assertor atque Vindex, & nos amare perge. Licet tuas huc mittas. Non enim jam propinqua nobis domuitio promittitur. Vereor ut saltem in Patria hibernare liceat. Spero tamen meliora, & post tot moras expeditiora negotia. Iterum atque iterum Vale, Heinſi dulcissime. Dabam Chelsiae secundo a Westmonasterienſi Palatio lapide in villa amoenissima, quae *Buckinghamii* nuper Ducis fuit. Postridie Nonas Majas CIO IOCLII.

EPISTOLA XXXIII.

JANUS VLITIUS

*Nic. Heinsio.**Florentiam.*

Pertinax sanè nimis indignumque amicitia nostra silentium illud fuit, mi Heinsi; cujus quod tuis Kal Sept. Florentia datis repagulum amoveris, habeo gratias. Ego enim, ex quo Laestrygonum machinas evasi, patriaeque incolumis ab ingruente in classem tempestate redditus fui, nihil prius quaesivi, quam ut reditus nostri te certiozem redderem. Sed dum rationes & diaria Legationis absolvo, quae subita profectioe infecta reliqueram, multum temporis incopinanti elapsum. Nec interim quemquam obvium habui, ex quo quid ageres, & quibus in oris degeres, intelligere potuerim; donec tandem Amplif. *Goesius* vester casu quodam se mihi obtulit hîc Hagae, ubi non mea sponte toto jam mense partim publicis, partim privatis incommodis atque negotiis detineor. Obiit enim hîc ante triduum, ex morbillis, quibus vehementer aliquamdiu laboraverat, filiola mea natu maxima, qua ingeniosior mihi que suaviorem nullam expecto. Nam & calamo & gypso egregie pingebat, & Gallicè eleganter docta erat me uno magistro, septennis. Jamque arithmeticae & musicae discendis totam se dabat; & in omnibus multum supra vulgaria ingenia praestabat; nemine non mirante. Sed hui mihi! quo me abripit paternus affectus, cui tamen quin apud te quoque, mi Heinsi, venia sua sit, non est cur metuam. Nam & te optimus Parens tuo merito aestimat; & tu ejusmodi ingeniola aspernari non soles. Secure itaque, nunc in viam redeo. Dum ego ita aegrotanti, ipse etiam articulari morbo aeger accumbo, tuas illas exeunte jam Octobri Bredâ (nam eo jam perlatae fuerant) tandem recepi; & de valetudine tua caeterisque rebus tuis, ac imprimis de affectu tuo ergo nos, quae semper optavi, commode intellexi. Quod etiam Academiae vestrae me interesse cupias, ego in hoc optimam voluntatem tuam magis agnosco, quam ut votis tuis aequae atque meis (quibus Italiam aliquando videre necdum despero) respondere impraesentiarum possim. Nunc enim, ut scias, totus iterum ζῶον πολιτικόν factus sum, & non poenitendos honores propitiæ mihi Regiae Principis gratia pollicetur, simulac lis illa Principalis, quae Hydrae ad instar in nova indies capita regerminat, semel aliquando decisa fuerit. Quod tum demum erit, ubi litem lite dirimere desinent Judices. Omne autem, quod nunc restat certamen Bredam nostram petit; cujus imperium Regia, impatiens consortis, soli sibi ex jure dotali vindicat: altera commune cupit. *Nec quenquam jam ferre potest aut illa priorem aut ista parem.* Sed (quanquam equidem haud nostrum est tantas componere lites) omne pro Regia jus est; pro hac nimius militat favor. Quo loco resp. sit, haud aequae dijudico. Hactenus certe procerum ducumque navalium discordiam multae secutae sunt calami-

tates. Et quanquam a *Wittio* nuper strenue pugnatum feratur. (vix enim certi quidquam nuntiatur, dissidentibus partium studiis, & sibi tantum faventibus) viribus & numero saltem victus cessit. Jam vero ad *Trompium*, cui res primum male gestae imputabantur, spes & vota rediere. Is cum C. navium redintegrata classe propediem mare remetietur usque Gades, onerarias huc illic ducturus & reducturus. Quid *Galius* noster in Mediterraneo agat ex propinquo audis: nos audire indies expectamus. Nunc de privatis. De *Salmasio* ne *γῆ* quidem. Prodiit nuper liber, cui tit. CLAMOR REGII sanguinis ad coelum. Angli *Morum* pro autore habentes, nupero novorum schedio eum vehementer perstrinxere, inter alia facinora objicientes adulterium cum *Salmasiana* pedissequa (dame suivante) quam hoc epigr. notarunt:

Galli e concubitu gravidam te, Bontia, Mori,

Quis bene moratam morigeramque neget?

P. Grotius Rhyniam suam, invitis matre & necessariis, quippe procuratoris filiam, caeterum praedivitem, bellam lepidamque puellam, nec nimis catholicam, tandem duxit, votisque suis fruitur beatus. Non diu est, quod is *Vossium*, *Gronovium*, & me habuerit convivas, tui non immemores. Ut & *Bredae* cum *Bornio* vivitur. Sed is nunc *Leidam* vocatus abit, supra numerum, non extra ordinem tamen, Philosophiam suam professurus. Ita spes omnis Scholae-*Illustris* cum illo moritur. Mortuo nuper *Philemone*, & *Pellio* in Angliâ subsistente *Elsevirium* utrumque senem obiisse, intellexti puto. *Thysium* in ordinem tandem redactum fama est. *Catfius* ab Itinere Anglico & tempestate illa nondum firme convaleuit; & jam se tranquille in *Curaefugio* suo, ubi habitat, ad aeterna totus componit: SEPULCRUMQUE suum, postumum opus futurum, indies absolvit. *Boyus* *Muffii* manes vehementer vexat. Vidi nuper apud *Grotium* Epigramma Reginae tuae (verè dico tuae) imagini appositum ab ipso heroë; ex quo ita saltem memini; si recte memini

Quisquis Hyperborei cernis miracula regni

Tantaque totque una in virgine dona stupes.

Quid mirare suas moderantem Pallada terras?

Haec etiam Arctoo nata Tonante fuit.

Placet, si tibi non displicet. Ego jam ad aemulationem rapior. Vale, Suavissime *Heinsi*; & amore tuo me porro complectere. Dabam ex grabato, Hagae, vi. Id. Nov. CIO IO CLII.

EPISTOLA XXXIV.

JANUS VLITIUS

NICOLAO HEINSIO S. P.

faustumque ad suos reditum ex animo precatur.

Florentiam.

JAM alteras subsicive ad te parabam, Heinſi Praeſtantiffime, cum ecce tuae peropportune afferuntur, Florentiae datae vii. Kal. Januarias, & Kalendis ipſis Februariis huc demum perlatae. Hoc ſcilicet compendii facimus, dum tuae Antverpia, quo omnes ex Italia Germaniaque epiftolarum fasciculi perferuntur, non recta Bredam, ſed prius Leidam mittuntur, atque inde iterum ad nos. Idemque puta factum de illis, quas ad te dedi. Sed utcunque tandem tuas accepi, nihil mihi gratius deſideratiuſve accidere potuit, quam longinqua iſta conſolatio; & amoris tui viva expreſſio. Quanquam ſane parva illa videri jactura poterat, unâ de tribus amiſſâ, cum paucis poſt diebus Bredam reverſi utramque ſuperſtitem etiam amiſerimus, eadem morbillorum ſive Exanthematum (ut vocant medicorum filii) peſtilentiſſima lue abreptas. Ita ut ſoli nunc domo moeamus vacua. Suſtinui tamen damna univerſa brevi epigrammate ſive cenotaphio complecti;

*Qui modo tres habui, cariffima pignora, natas,
 Furaque tergeminae prolis adeptus eram;
 Mox orbis totidem moeſtiſſima funera duxi,
 Intra bis denos praecipitata dies.
 Abſtulit idem omnes morbus, menſisque November,
 Deliciasque ſimul, diſcipulaſque meas.
 Hei! mihi, quod nullo procedant ordine fata,
 Cogar ut haec natis reddere juſta pater!
 Hoc ergo meritis poſui pro marmore carmen;
 Debuerant ipſae quod poſuiſſe mihi.*

Quin addidi & epitaphium monumenti vice, quod, quia longiuſculum, hîc omittam; ne ferali hoc menſe ferales literas ſuperaddam. Sat naeniis lacrimisque datum. Et dolorem abruptit novum gaudium, quod hiſce diebus percepimus ex ſententia pridie Kal. a Senatu Hollandico ſecundum Regiam Principem, Dominam noſtram, latam. Quanquam nullus dubitem ad Supremum Senatum provocatum jam iri ab Avia, quae nihil intentatum reliquit, quo Illi adverſaretur. Nec parum laetitiae publicae acceſſit, quod Regina tua, quam arma in nos ſpirare, & piratis Britannis plus aequo favere acceperamus, pacata & in mutuum foedus propenſa certo feratur. Hoſtibus noſtris illius ira, nobis omnino propitia Pallas illa maneat. In quem finem non inglorium tibi fuerit, mi Heinſi, tam ſalutarem Patriae tuae operam navare; & vel

car-

carminibus tuis delinire subirascentis Dominae mentem. Encomia Etrusca simulac absoluta fuerint, vehementer videre gestio. Jam enim ista lingua maxime capior & delector. Saepenumero etiam aliquid in illa molior; quale nuper hoc Epigramma, quod Sobrinae meae Arseniae, puellae nobilissimae, & linguae etiam istius studiosissimae me & Bornio (is nunc domuitionem parat; imo mutationem dicere volebam. Leidam enim vocatus est ad Professionem Philosophicam, supernumerariam, non tamen extra ordinem. Tametsi adhuc fluctuare videatur, dum dimissionem differt Domina. ἢ ταῦτα μὲν ὥσπερ ἐν παρόδῳ) auctoribus & institutoribus dicavi, aliud agenti excidit.

S O N E T T O.

Alla virtuosa Signora, la Signora ISABELLA ARSENIA.

*De la beltà, ch' il ciel donna vi diede
Il men si scuopre, il piu dentro s' asconda;
Begli occhi, bianco sen, & chioma bionda
Ogn' uno amante adora, non che vede
Ma la virtù che l' anima possiede
Et l' arte delle lingue in te ch' abonda
Nel cuor mio un piu schietto amor diffonda
Et d' esser fra gl' amanti tuoi concede.
Non tu pero ch' adorna la natura
Sopr' al consueto, Arsenia cortese,
Col pettine ti dar fastidio ò vetro
Ma questa sempre sia tua prima cura
Di far tuo nome ubombar adietro
In Roma, Francia, Olanda & terra Inglese.*

Has enim quatuor linguas callet. Sed quid ego aliud, quam noctuas Athenas, qui rude hoc tirocinium tibi in Etruriam, & quidem inter ipsos Academicos versanti mittam. Ignosce, mi Heinfi, & studio imputa, si quid peccavi. Vel si ulcisci temeritatem meam animus est, aliquam ex tuis illis Elegiis in Britannos piratas vibratis appone. Jam enim dudum est, quod expectatione Poëmatum tuorum discruciamur. Et altrinsecus frustratur nos quam foedissime cunctator Wallius, qui Kinscotiana etiam prorsus supprimit. Tu cave ne tali executori tua aliquando committas, mi Heinfi. Sed jam manum de tabula. Voco enim in Senatulum nostrum, cui totum me jam mancipavi, donec liberius postmodum licebit πολιτεύεσθαι, simulac Dominae gratiâ destinatum aliud munus obtinuerō. Tu interim, Heinfi Amicissime, vale, & nos amare perge, qui te tuaque studia in oculis ferimus. Dabam Bredae, ante focum, quia frigus erat, v. Februar. cio dcc lxiij.

De Alastore tuo (nisi is jam piscis factus, qui graculo quovis antea loquacior fuit) saeculum est, quod nihil audiverim. Nec quidem de Gronovio amplius quicquam habeo, ex quo Hagae una fuimus. Grotius heros optima spe ob-

obtinendi muneris Graphiarii (quod vocant) pessime excidit; idque unius opera *Wevelinchorii* vestratis, qui unus, cum reliqui patres conscripti assensissent, paterna supplicia, & religionem objiciebat, non sine acri exprobratione anteaكتورum. Patienter tamen ille repulsam fert, & conjugis in gremio se solatur, imagine captus. Iterum Vale.

EPISTOLA XXXV.

JANUS VLITIUS

Nic. Heinsio.

Leidam.

Quam jucunda mihi sit dieculae istius tecum novissime ac tam suaviter actae recordatio, etiam postquam in pistrinum meum redii, nullis equidem verbis exprimere tibi possum, mi Heinsi. O utinam alteram atque alteram licuisset adjicere. Utinam & tu vicissim nos hic in amoenissimo pineto invisas. Sed jam vercor reorque te in Sueciam properare, turbatamque relinquere velle patriam? Deus bone, quo loco vivimus! Ubi ista, qua res nostrae creverunt, concordia? En quo discordia cives perduxit miseros! Videant nunc saltem obsessi & perplexi Ordines, quanta fati vis sit, quae ab Arausionensi gente pendet. Agnoscant vel cum pueris proavi merita in pronepote. Sed ego tamen rebellionem istam, quae veluti arcana febris totum reip. corpus infedit, minime probo. Et maluisssem ipsam causam quoque procul abfuisse. Interim Hannibal ad portas, ad portus inquam. Nec desunt vires, nec animus. Quare te felicem praedico, mi Heinsi, qui in tantae Reginae sinu patriae labantis casum solari potes. Memineris, quaeso, mei, si (quod avertat deus) terra mutanda, aliaeque sedes quaerendae sunt. Jam, puto, concinnata habes, quae mandaveram, exemplaria. Sin minus, Elseviriiis meo nomine commenda, ut recte curentur. Parnassi mei alterum exemplar tibi tradidit reor Typotheta Nicolaus. Fac intelligam quando discessurus sis: & si quid voles, liberaliter impera. Ego pro virili annitar, ne indignum haecenus tam amice habueris: neve poenitendi aut desinendi causam ullam habeas. Suavissimos *Elsevrios*, ac reliquos amicos, si qui mei memores ibi vivunt, salvere plurimum jubeo. Vale, Saeculi & Musarum decus, & mei memor vive. Deum veneror, ut propitio pede ad Reginam redeas pergasque. Iterum iterumque vale. Dabam Bredae, c Diaeta mea IV. Idus Sextiles, A. MDCC LIII. Xenia, quae addo, boni consule.

EPISTOLA XXXVI.

JANUS VLITIUS

NICOLAO HEINSIO

*Omnia ex voto propitia, ventosque in vela secundos, animitus vovet.**Leidam.*

Qua quidem prece Epistolii hujus meliorem absolverim partem, quando-
quidem incertus sim an naviganti, vel navigaturo saltem, tradetur. Non
potui tamen pro affectu, quin novissimis tuis nil nisi merum amorem spirantibus
aliquid reponam, quod hactenus vel invitatus differre coactus fui; ut facile ex
his, quas *Rufius* heros & ego tumultuarie nuper ad te dedimus, colligere po-
tueris. Rediit interim ὁ περιπατητικὸς ex itinere *Bornius*, retulitque attonitus
domi vestrae totum νοσοκομῆον factum; unde, non sine dolore, percipiebamus
manum fatalem properanti injectam. Imo forsan in proximum annum iter diffe-
rendum. Quid enim facias, mi *Heinsi*, obluctantibus fatibus; ac ingruente jam
hyeme. Si me non audis, at *Dido* tuae saltem ausculta, monenti ac precanti;

*Ne mediis properes Aquilonibus ire per altum**Crudelis. Quid? si non arva aliena, domosque**Ignotas peteres?*

Caetera abominor. Ausculta potius *Nasoni* etiam tuo; *Quo ruis, obstat hyems,*
& quae longo ordine apud eum sequuntur. Quae satis feliciter expressit in
Suasoria sua Elegia *Rufius* ὁ δῆνα, quam nuper demum mihi dedit, cujus ini-
tium:

Per mare turbatum petis impia litora, Vliti?

(media enim hyeme post maximas tempestates in Britanniam solvebamus) per-
gitque.

*Quo ruis? obstat hyems, & vetat ire Deus.**Quo ruis? obscaenis vento prohiberis ab oris.**Iustior, atque animo mitior ille tuo est.**Debuit hoc coelo tellus Tamesina relinqui,**Et per naufragium terra paterna peti.*

Sed plura non addo, quae tu novisti rectius ipse. Tantum *Nasonianum* addo
illud, vere ac tempestivum consilium:

Grande morae pretium; tuta futura via est.

Nec omittere possum, non me capere, cur tenebris te Suecicis damnare, quam
patria luce ulterius frui, malis. Audio enim hyeme *Apollinem* tuum (qui te
non respexit inertem) obliquo admodum lumine plagam illam vix per quatuor
horas illustrare. Ignavi domum & penetralia *Somni*, tuus dixisset *Ovidius*,

mutamque illic habitare Quietem. Quid si tenebrionem atque lucifugam te aliquis dicat? Quin itaque patriis laribus hyemem hanc indulges; & proximo vere Amphitruonaeas, vel potius Herculeas dies illas expecta. Nos enim congressu tuo vel hîc, vel quocunque jusseris loco lubenter fruemur. Subscribunt precibus meis *Rufius* (qui lepide nos indies excipit, visitque vicissim) & *Bornius*, tui, ante aliquot lustra, aequè amantissimi. Utinam votis nostris te nulla fatalis necessitas obstringat! Sin pergis,

J. pete CHRISTINAM, felix, ventisque secundis.

Scio te non immemorem nostri navigaturum, mi Heinsi, quod ut crebrioribus tuis subinde intelligam, & quando solves, & cum appuleris, rogo, atque obsecro. Deum veneror, ut omnis calamitatis expertem te navigantem vel potius proficiscentem prosequatur, aegrosque vestros pristinae restituat sanitati. Vale, Nobilissime Vatum; meque, quod facis, amare persevera. Dabam Bredae postridie Nonas Septembres, cio DCLIII. *Rufius* P. S. Sal. tuam *Renano* addidit. CHRISTINAE luce forsân omnes tenebras, quae instant, dissipatum iri dicas. Carmen illud, in quo *rei* correptum recte notasti, (nam *reii* scribendum fuit, ex Lucretio) cum caeteris libris, quos illic reliqui, ut mittant *Elsevirii*, quaeso illos, S. P. dicta, moneas. Exemplaria REGINAE destinata bene curata, ex *Bornio* intellexi, habeoque gratiam. Si conveniens censueris, literas ad Ipsam AUGUSTAM addam. Tametsi ego quidem plus Suadae tuae, quam stilo meo confidam. Iterum semperque vale.

EPISTOLA XXXVII.

NOBILISS. HEROI

NICOLAO HEINSIO

JANUS VLITIUS S. P.

Ventosque in vela secundos, animitus vovet.

Laidam.

C*Imbrica te Tethys hiemalibus aspera nimbis
 faciat? an Arctoi naufraga spuma freti?
 Di maris & coeli faveant modo; Di modo damnent
 Plurima quae dixi solvere vota tibi.
 Phoebe, tuum serves, servant pia numina, vatem.*

Sed quo abripitur stilus, epistolam non carmen exorsus; Praestat itaque desistere, quam male finire. Vides, mi Heinsi, quo me lectio poematum tuorum, quae altera manu haec scribens tenebam, externatum abstulerit. Quis enim possem mihi a furore poetico temperare, qui plenus adhuc calor tui sum? Adeo igne illo tuo, qui plurimus ubique in tuis spirat, me afflatum sentio.

Zzzz 2

tio. Jam nihil nisi otium depono, ut tester tibi, quantum lectione entheorum versuum tuorum profecerim. Multum enim profecisse mihi videor. Quamquam non parum laboris mihi restat, in indagandis Heroicis illis, quibus luxurias & indulges, patronymicis. Nec desinam, donec omnia excussero. Sunt enim divina prorsus, ac veluti emblemata operis materiam exornantia. Trompiacos Manes *Rufius* & ego grato excepimus animo, legimus ac relegimus. Jamque praelo descripsissem, nisi scrupulus obstaret, quo super te consulere prius, decrevimus. Videmus enim te miramurque ultimam in *juventus*; ut & in Eleg. 1. Italicorum lib. 11. in *servitus* corripuisse. Incerti prorsus quo auctore, quave ratione id a te factum. Si exemplis te tueri potes, quaeso, quantocyus nos dubio hoc expedi, & ignorantiae nostrae ignosce. Sin minus, candori nostro fave, & remedium adhibe. Scimus enim quantum festinatio tua veniae apud aequos judices mereatur: & quam facilis ipse amicorum censor semper fueris. Quare omnino aequum censemus

Peccatis veniam poscentes reddere rursus.

Si tamen error erat: nec nos peccavimus ipsi. Quo loco res publica sit, dicere non possumus. Videmus enim omnia paucorum factionum arbitrio res domi bellicae hactenus agi, pacemque cum Laestrygonis vel iniquissimis conditionibus prope emendicari; quos sub Regiis auspiciis contundi satius ac facilius esset. Sed manum ego de tabula. *Bornius* ante XIV. dies Lugdunum transmigravit: quem Propemptico hoc prosecutus sum; si tamen haec *χάλκεα χρυσείois* admittis. Quod res ac literas meas tanto cum affectu in te suscipias, mihi Heinso, gratias habeo maximas, quas publice etiam testari brevi conabor; modo conanti tuus adsit Apollo. *Rufius* hic hiberna agere sperat; eoque cohortem suam huc transferri parentis fratrisque opera curat. Rumor est, eum Arleniae, sobrinae meae, amore teneri, cui ipse causam praebuit. Quotidie enim accedit. Sed de amore ejus mihi tamen nihil omnino verisimile est. *Boxhornium* in fata concessisse, haud tu omnium ignoras, aut mirari potes, qui jam moribundum abiens reliqueris. Nos unice desideramus de adventu tuo in Sueciam quantocyus certiores fieri: eaque gratia Deum Opt. Max. ferventissimis veneramur precibus. Vale, Musarum saeclicum decus; & nos amare perge. Dabam Bredae VI. Kalend. Novembris. CIO IDC LIII.

Quod ¹ *Maji* nomen aeternitati sacraveris, nollem factum. Fuit enim in Regem perfidissimus, scripsitque annales jussu parricidarum, quo nomine monumentum publicum, quod Monasterii descripsi, ab illis meruit; auditque ibi, si Diis placet, Historicorum ac Poëtarum sui temporis facile princeps, ut caetera mendacia omittam. Miror item maximopere, quod Trompiacos Manes tibi obfuturos metuas, postquam tam largas publicato nomine vindicias a Regicidis sumferis. *Langermanno* Clariss. S. P. D. nec non Clariss. *Vossio*; si nostri memor agit.

¹ Edidit *Thomas Majus* supplementum Pharsaliae Lucani, quod carmine laudavit *N. Heinso* inter Juvenilia lib. 11. p. 274. edito.

ODE προπεμπική

ad CL. V. HENRICUM BORNIIUM.

BReda, victoris monumentum Arausi
 Quamque Hyantaeis nova regna divis
 Diximus nuper, Claria revincti
 Tempora lauru.

At tuus jam nunc ubi ubi ille restat,
 Notus Eois Libycisque terris,
 Splendor, & nitentis in astra praecox
 Fama Lyaei?

Occidit plenus Fredericus aevi,
 Occidit primis Gulielmus annis,
 Patriae heu! quondam decus unicum, nunc
 Flebile nomen!

Ilicet raptis ducibus profundo
 Aream belli Veneris maritus
 Fixit, ingenti meditatus umbrae
 Solvere iusta.

Pallas inversam quatiens olivam,
 Et faces post terga rotans supinas
 Funus Heroum comitata terras
 Mœsta reliquit.

Nec sequi diavam placido moraris,
 Integer morum, pede, Brosterhusi,
 Tuque supremum regimen Minervae,
 Docte Philaemon.

Caeteras quid jam cumulare clades?
 Quid juvat sero sapuisse Troas
 Hectore amisso? Sophiae ille verae
 Publica cura,

Una collapsis mora spesque rebus,
 Bornius, scenae satur otiosae,
 Jam lares vertit, vitreoque Rhenum
 Praetulit Adae.

Hoccine, o Borni, fuit? hoccine illud
 Ultimum cladis miserae quod addi
 Restitit Bredae? silvasque & urbem
 Linqvis amatas?

Hei mihi! quid jam vasuo Lycae?
 Quid putas mutae fieri cathedrae?

Jamque feralis Sophiae dicata
 Atria circum
 Horror obsedit: pariesque & ipse
 Fidus auditor tuus, ut profectum
 Sensit, ubertim maduisse fletu
 Fertur amaro.

Vidimus summa trepidare ripa
 Vortices Mariae; lachrimosque multo
 Imbre crescentes sibi miscuisse
 Vidimus Adam.

Pinea Nymphas ululasse silva,
 Foederis nostri memores, & hujus
 Carminis testes tibi quod vovebam,
 Credere fas est.

At mihi si quid faciles Camoenae
 Intuas olim peperere laudes,
 Ne queri hoc ipsum, te abeunte, possem,
 Cuncta negarunt.

Nam quid haec surdis rapienda ventis
 Vela qui longe tua propulere
 Fundo nequiquam? Batavum momordit
 Anchora litus.

Sospitem jam te Zephyri tulerunt,
 Qua caput ponto vetitum reclinat
 Rhenus & flexi mediam instar arcus
 Circinat urbem.

Jam reor notum ac veterem clientem
 Pallas excepit, Sophiaeque in aede
 Entheo circumradians honore
 Rite sacravit.

Fallor, an laetam video juventam
 Ad novi mystae properare dextram.
 Fallor? an crebros resonare testis
 Audio plausus?

Instat exultim numerosa pubes,
 Gestit & plenis pluteis doceri:
 Et Batavorum stupuit loquentem
 Purpura Patrum.

Zzz z 3

Euge

*Euge! sic veri dubiam Stagyren
Affere, & serae vigiles lucernas
Dedica famae, ratione certa
Singula firmans.*

*Euge! sic dia Sapientiae arte
Imbue attentas docilesque mentes:*

*Quam secuturis meliore saeculis
Fonte nepotes
Hauriant. Sic, sic Sopbia magistra
Itur in coelum: & penitus reclusa
Sensibus natura patet, stupore
Libera ab omni.*

EPISTOLA XXXVIII.

JANUS VLITIUS

Nic. Heinsio.

Holmiam.

Quas Hamburgo ad me candoris affectusque plenissimas dedisti, iis obiter quidem, sed non ex merito, respondi, Heinsi dulcissime. Quapropter continuo me adlectionem Poëmatum tuorum totum accinxi; utque diligentiae meae specimen tibi mihiue constaret, plurima hinc inde, (instar florilegae mellificantis apis) delibavi, unde peculiarem favum conderem, quem nunc primigenio auctori suo, tibi, inquam, Mellitissime Heinsi, gratiarum ergo, oblatum eo, volo. Duplicem tamen veniam in praecambulo mihi posco; Primam, quod nonnunquam liberius te imitatus sim. Non id plagiariè factum puta: sed quod cum tua tam lubenti animo hauserim, altius memoriae sensibusque infixata infederint. Ita postmodum mihi item evenit, ut Elegiam alteram, quam *Catsio* meditabar, exorsus fuerim; *Carmina quae tenero juvenilia lussimus aevo*; cum postea vidi, te Epigramma tuum praeliminare hoc ipso inchoasse versu. Appositum ad hoc memini Anglorum diverbium; *Goodwits jumpe together*. Tametsi de caetero minimè diffitear, me data opera ac studio pluscula ex tuis adumbrasse, nec id vituperio, sed laudi potius duco. Alterum quod excuses, est, quod primum hunc meum in Elegiaco genere conatum, tibi, ὡς περ γλαῦκας Αθηνᾶζε praesumserim inscribere. Quanquam facilem mihi in utroque veniam a candore tuo spondeam. Major adhuc animo inhaeret scrupulus, an commodè navigaveris, & an, *Holmiacos teneat salva carina sinus*. Cujus omnino certior fieri desidero; tum item, an quas VI. Kal. Novembres ad te dedi, acceperis; & quid in dubitato illo in Manibus Trompianis versu reponi cupias. Nos enim nullam adhuc auctoritatem, quae isti loco patrocinetur, invenimus; & omnes Grammatici clamant τὰ in US tertiae ultimam producere. Nisi tu illis hic crucem figere voluisti. *Rufius*, qui mecum haec sentit, adhuc in urbe nostra haeret, amore Arseniae Sobrinae meae, ut videri aliquomodo vult, detentus. Et jam vulgo dudum pro sponso declamatus. Ego quid sentiam, haud dum dijudico. *Bornius*, ut scis, Leidae jam est: sed magno cum detrimento stipendii, quod cum altero divisum habere fertur. Si ita est, praestitisset integrum hinc etiam in otiosa scenâ servare. Haec quidem domi. Mil tiae autem novas iterum turbas exhibet incur-

cursus Lotharingiorum in ditionem Gemenensem, quae dubitatur & disputatur, an Silvaeducensi subsit, an sibi relicta. Legati ex Anglia reduces re infecta expectantur, a Cromwellio non semel jam elusi. Va'e Nobilissime atque amicissime Heinsi, &, quandoquidem me amas, perge studia mea apud AUGUSTAM tueri. Dabam festinanter, Kalendis Decembribus. CIO IO CLIII. Memineris, ¹ Propempticon meum ita impressum, ut possit nuperae Gratii Editioni, post Epistolam meam ad te datam, commode inferi. Cujus misi exemplaria aliquot, quae, si videretur, & tuis infererentur Exemplaribus. Si typis interfuissem, nonnulla mutassem. Puta illud

Rufius haec mecum calamo non ludit agresti,

Dodonis Elysium qua legit umbra nemus.

Et, *Mox Aganippaeae propter Sibethidos urnam.*

Et alia, quae festinatio eripuit. Initio autem errore impressum fuit: *Postulat* *hos, pro hoc;* tametsi semel ita emendaram.

¹ Legitur illud libro II. Adoptivorum Carminum ad Heinsium p. 63.

EPISTOLA XXXIX.

NICOLAUS HEINSIUS.

Jano Vlitio.

Bredam.

Minus diligentem me expertus es jampridem in scribendis literis, Vliti suavissime, quod valetudo non procedat optime, & vires langueant. De adventu tamen in Sueciam meo certiore te feci, deque Gratio tuo fere-nissimae Reginae oblato. Excepit illa munus praestantissimum solita benignitate, & pergratum sibi esse verbis amplis est professus. Quare si liberaliter tecum non est actura praeter ordinem, id temporibus potius adscribe, quam ipsi Dominae: quae pretium praeclaris ingeniis scit ponere. AErarium ejus attritum esse valde nuper significabam, si pax inter Anglos & nostros sancitur, melius procedent omnia. Rarius illam accedo, tum quod Hyberno coelo non libenter me exponam, corpore haud satis firmo, tum quod ipsa tota sit in publicis, credo, ut privata tanto diligentius posthac curet. Conscriptus est Senatus huius Regni de rebus arduis, quantum apparet, acturus. Negotium totum brevi intelliges. Ego interim Principem optimam conciliare tibi haud negligam, ubi occasio sese offeret non longa quaesita. Venio nunc ad tuas, quarum alterae vi. Kal. Novembribus, alterae Decembribus ipsis Kalendis anni proxime elapsi exaratae erant. Posteriores Elegiam elegantissimam habebant additam, quam profectioni in Sueciam meae dedisti. Totum te esse in lectione poematum meorum quod prioribus testareris, versus expectabam, si non malos, at ne bonos quidem, ut ingenue nunc proferam quod sentiebam tunc temporis. Jam vero, cum nihil contagii contraxeris ex tam pestilenti & lutulento libello, facile agnosco venam perennem tibi esse, & prorsus defaecatam. Si primi co-

natus

natus in elegiaco carmine tam feliciter succedunt, quid a te promitti non potest post exercitatum in hac palæstra usu continuo ingenium? Perge igitur, ut caepisti, & gentis nostrae gloriam arte poeticâ quaesitam latius propaga, ac extende. Primo intuitu offendeabant nonnihil oculos Tò *Dodonis* secunda correpta, & *sebethidos* pro *Sebethi*, & *Anienis* pro *Anienius* aut *Anio*: sed priora duo a te praecoccupata mox vidi & laetatus sum; quanquam ipsa sunt ejusmodi, ut eruditos etiam lectores possint fallere. Carmen istud hodie aut cras ipsi Dominae exhibebo, si aditus mihi ad illam patebit. Si quid interim in eo mutari vis, secundae poematum meorum editioni para, quam libro adoptivo auctam atque ornatam dabo. Trompianos manes nimio impetu effuderam, ut mirari non debeas, si quae occurrant in illo carmine non satis ad limam exacta. Revocavi ad curam paulo post omnia, & non nulla addidi; praesertim in digressionem illâ invectivâ, qua Anglos defricabam. Placeo enim mihi, ne quid dissimulem, in exagitandis feroculis istis belluis. Legatus Pelopidarum hic palam jactat, a suis hoc bello captas naves Batavicas Mcccc: idque pro re certissima & Dominae & cancellario, & aliis proceribus juratus per Cromwellum (quem τὸν Δια τῶν Κρητῶν nosti, cuius sepulchrum utinam brevi ostendent, ut nunc ostentant cunas) adfirmavit. Plures ejus facetias proferre nunc possem, si id ageretur. *En fin, om dat hy souw toonen dat hy een Engelsman is, soo liecht hy leugens met fleerten.* Sed ad Trompianos manes ut revertar, versum illum, qui te merito offendit, cum aliis multis iam secundis mutaram curis, hoc nimirum modo, *Gloria par proavis nostra juventa suis.* Si otium nunc esset, carmen integrum describerem, sed tanti vix est. To *servitus* recte etiam carpis in alterâ elegia, quanquam enim non nesciam & posteriorem in *Palus* ab Horatio correptam contra leges Grammaticorum, & hujus notae plura corradi ac proferri posse ex aliis optimae notae poëtis, culpam tamen & supinitatem ingenue profiteri malo, quam alienâ licentia me tueri. Hujus farinae multa ne exciderint metuo incogitanti. Sed hanc labem feras necesse est in homine, tot jam annos vitam vere scythicam barbaramque in equis & plaustris assidue agenti, & a bonis auctoribus non minus exulanti, quam a patriâ. Utinam cum Musis ac Bibliothecâ meâ aliquando redeam in gratiam, ut emendare possim quicquid peccavi, & vineta mea caedere. Eo certe curas omnes jam converto, & spero votis meis Dominam non obnifuram ultra. Interest enim mea, ut tandem Ovidius post tanta promissa & tantos hiatus lucem aliquando videat notis necessariis illustratus. Coeperam ei jam manus admoveere, sed quid possim, inter turbas aulicas? Otio opus est, ut a contemptu conatus istos vindicem. Omnia mensium quinque aut sex spatio absolvi possent. Videbis coniecturas plurimas non contemnendas, plures locorum restitutiones ex libris manuscriptis depromptas: versus etiam ducentos & plures adulterinos hinc inde ejectos, qui aut adversantur poëtae menti, aut inepti sunt, & pulcherrimum corpus deformant. Quod miror tot eruditos interpretes non vidisse: praesertim cum a melioribus membranis nonnulli illorum absint. Ode Propemptica ad *Bornium* scripta valde mihi

† Vide quae de his commentatus sum in Ovidii Metam. lib. 1. vers 121.

hi placuit, ut tua solent. *Mayum* laudaram iam ante decennium, cum praefagire non possem Regi infestum fore. Editum etiam carmen illud jam ante septem fuit annos Parisiis, ut fero nunc sit futurum, si id premam. Cum *Bornio* agi non bene quis miretur? Cum ita curetur res Academiae post evocatum ex Galliis *Alastorem*, ut bonis male, malis sit bene. *Boxhornio* successor datus nescio quis, rejecto *Gronovio*, qui solus ex nostris hoc munus merebatur. Sed relinquendi sunt suo ingenio, aut Curatores dandi Curatoribus. Ipsi vident & fatentur annis proximis homines aliquot putidissimos in Academiam vocatos, & tamen non discunt sapere. *Rufum* nostrum in oculis fero assidue. Is quaeso salveat. Vale, vir amplissime, cum tota familia, & subinde literis tuis me bea. Upsaliae x. Kal. Martias. CIO IOCLIV.

EPISTOLA XL.

JANUS VLITIUS

Nic. Heinsio.

Holmiam.

EX quo in Sueciam appulisti, unicas tantum a te habui, Heinsi amicissime, x. Kal. Mart. Upsalia datas: alteras, quarum in istis meministi, non accepi. Iamque dudum iis respondissem, nisi te cum Regina huc adventurum exinde certo credidissem: vel saltem brevi subsecuturum. Dum vero spe ista oblector inani, aliquot elapsi sunt menses, antequam officio meo me defuisse agnovi. Quod uti ingenue fateor, ita facilem mihi a te veniam promittere audeo, mi Heinsi. Quanquam alias & alias caussari possim occupationes, quae publicas quae privatas. Reip. enim atque historiae Bredanae serio simul me accinxerunt. Pleraque ex media barbarie indaganda. Quo factum, ut vix Latine scribere possim. Conatus tamen fui, secundum exhortationem tuam, aliquid in laudem Reginae tuae proferre. An tanti sit, tuo relinquo iudicio. Statueram ipsi offerre. Sed dum sub praelo Moretiano erat, illa Bruxellas excurrerat: & antequam inde redierat, ego domum vocabar. Ita factum, ut ipsam viderim quidem, non autem allocutus sim: Oden autem meam cum *Vossio* reliqueram, qui postmodo scripsit se illam Reginae tradidisse. Nec deinde quidquam aut de Reginae approbatione, aut quid de ea actum sit intellexi. Varii tamen in vulgus sparsi rumores, de ipsius Reginae tum animi tum morum instabilitate. Hispanicae factioni addictissimam; muliebrem sexum prorsus averfari, neque opera aut consortio muliebri hactenus in Belgio usam. Ministros etiam Evangelicos a se dimisisse pridem, tanquam inutiles & superfluos comites. Gestus sane observavi non nimis decoros aut bene compositos. Archidux *Leopoldus* palatii sui partem excipiendae Reginae paravit; ubi hibernatura dicitur, a Legato *Pimentello* Regis nomine colenda. Reditus etiam a Suecorum Rege negari fama est. Et nescio quae non; Bohemiae regina illam jam recenter invisit Antverpiae, picturis spectandis intentissimam, a Sacris omnibus alienissimam, in Scenicos lusus, aliasque nugas nimis propensam, &

Tom. III.

A a a a

plura

plura ejusmodi convitia jam dudum etiam apud bonos fidem invenere. De Rom: Rege eligendo, inter Reges ingens certamen. Mazarinum pro suo agere; seque in PP. locum destinare ferunt. Alii Suecorum Regem idem affectare. Reginam tamen Austriacis favere. Ego nuper Opt. Parentem tuum, Leidæ cum essem, vidi: corpore animoque satis adhuc pro ætate valentem: memoria autem labili. Jubebat enim, ut te suo nomine salutarem, simulac ad te venissem. Ante paucos dies Leidæ iterum cum essem (cruris enim exulcerati causa identidem ad Cristianum chirurgum remeare cogor) ex ancilla vestra intellexi, te Legati ordinarii titulo auctum. Quod si ita est, ex animo tibi gratulor. Sin minus adhuc perfecta res est, opto ut ex animi voto tamen succedat. Res publicæ hic nondum satis quietæ: Principe a Transilvanis in præfectum, Gulielmo Comite (qui & Princeps nunc audit) pro præfecto, creatis: quantumvis obnitentibus Daventriensibus. Gelri & Ultrajectini idem moliri dicuntur, Hollandis licet ringentibus. De gravissima Delfensium clade jam audiisse te reor: uti & Anglos Gallias infestare. *Pompejus*, ille olim a te debellatus, sobrinam meam Waesdorpianam ante triduum duxit, improbante & adversante focero quondam suo. *Rufius* heros alteram sobrinam Arseniam jamdudum frustra in matrimonium efflagitat. Haec sunt quæ impræsentiarum tibi scribere potui. Vale, Reip. novum decus, & nos amare perge. Plura brevi forsan de rebus nostris intelliges ex *Wyckio* vicino pridem meo, nobili Westfalo, qui Militiæ Succicæ pro militum centurione operam suam addixit; & proximo anno eo navigaturus est. Iterum atque iterum Vale, Heinssi Amicissime. Dabam Hagæ Comitum, ex aedibus quondam Kinschotii nostri, cujus poemata frustra etiamnum desideramus, xxiv. Novembris cio idcliv.

In Elegia mea recte carpis supinitatem meam. Puto tamen me dudum correxisse *Dodonis Lysium qua tegit umbra nemus*. Vocatur *Liesbosch*. vulgo. Poëmata tua quotidie adhuc revolve; nihilque vena tua indignum præterea invenio. *Thysium* quondam affinem *Boxbornio* suffectum scire te existimo. *Bornius*, egregie agit.

EPISTOLA XLI.

A M P L I S S. & C L. V.

NICOLAO HEINSIO

JANUS VLITIUS

Novam gratulatur dignitatem.

Holmiam.

Quas tu anno jam elapso, mense Novembri ad me dedisti, Heinssi suavissime; eas hoc demum anno (quem faustum propitiumque tibi cum multo honoris amplitudinisque auctu precor) atque mense accepi. Eodem fere tempore atque argumento ad te scripsi; addita Ode ad Christinam Aug. Quæ quidem interea temporis Bruxellas migravit, aulaeque in parte recepta est ab Archiduce Leopoldo.

do. Parum abfuit, quin addiderim; *Et nunc ille Paris, cum semiviro comitatu;* cantorum puta, quibus imprimis delectatur. Fama, cui ludibrium nimis illa debet, nuper Regi Hispaniarum, deinde ejus Spurio Joanni, nunc ipsi Archiduci nupturam tulit. Quod luculento isti chirographo suo, quo te donavit, detraxit, id nunc in histriones & pantomimos larga manu effundit. Non audeo tibi vel in aurem committere quae hîc vulgo de ea narrantur; ne injuriam faciam & tuae & meae tam recenti de Augustae laudibus ac virtutibus opinioni. Hoc unum animo infedit atque inhaeret. *S. M. Estant demandée, si elle n' avoit point des ministres ou prescheurs dans son train, Elle respondit, que non; d' autant que partant de Suede elle s' estoit defait de tout ce que luy estoit inutile.* Ad te nunc redeo, mi Heinfi. Postridie cum ad te novissime, ut dixi modo, scripsissem, in *Ommerium* nostrum forte incidi. Is mihi tum, quod subaudiveram, asleveravit te Legati titulo condecoratum, stipendioque quater M. Florenorum auctum: Ordines vero mirari, se hactenus nullas a te accepisse literas: Promotorem tuum fuisse Amplissimum *Beuningium*, quem, caetera hactenus ignotum, vel eo nomine plurimi facio, & data occasione colere atque observare annitar. Laudo sane consilium tuum, quod tempori, ut ajunt, te temperaveris, fortunamque tuam melius, quam Domina, stabiliveris. Ubi *Vossius* haesitet, dudum nihil audio. Certum mihi est, contemptum iri. Tota enim Hispanis verpis addicta est; moderante utrimque omnia *Pimentello*. Nuper cum *Leidae* aliquamdiu agerem (occasione ulcerati malleoli pedis, quem feliciter sanavit chirurgus ille celeberrimus *Christianus Regius*) optimum Parentem tuum obiter conveni; qui videbatur mei adhuc meminisse, jubebatque, simulac te accessissem, suo nomine plurimum salutare. Caetera enim sane mecum locutus fuerat. Adeo ut mirarer; nec minus ingemiscerem ob injuriam aetatis. Usus fui hospitio *Bornii* nostri, qui sane strenueque philosophatur, tui semper memor. Conflictum habuerat acrem cum *Heidano* caeterisque, ob suffragii jus. Quod nolueram quidem. Sed tamen Curatorum patrocinio triumphavit. Mira tum temporis res acta in corrigendis erratis typographicis *S. Scripturae* vernaculae versionis. Magno enim molimine atque sumtu nihil prorsus actum. Sed jam in pistrinum hora me vocat. Vale, Amplissime Heinfi, & si me amas, saepiuscule compella Vlitium tuum. *Rufius* ingenti ardore sobrinam *Arseniam* meam, puellam ingeniosissimam, me fere conscio, hic amaverat. Et videbatur voti compos. Sed illa *Hagam* simulac migraverat (mortuo praeside *Arsenio* avo suo, cujus nunc aedes inhabito amplissimas) sub patruo curatore animum mutavit; qua re factum, ut heros noster, tentatis frustra omnibus remediis, spe sua lusus sit. Ne pagella haec vacet, claudum addam epigrammationi, a claudicante aliquo inter navigandum elapsum.

*Aulam Guilelmus quam Archidux Leopoldus
Habitavit olim, fertur ipse Christinae nuper
Fecisse vacuam, seque jam in Gynecaeum
Quod Isabellae dicitur, recepisse;
Effoeminatum nunc utrum magis dicas?*

Aaaaa 2

Ego

Ego interim in annalibus Bredanis concinnandis totus sum. Vernacula omnia agam. Quod si Epigrammatio aliquo opellam meam condecorare dignaberis, gratissimum erit. Iterum Vale Heinfi suavissime, & cura Patriae nostrae incolumis, diuque vivas. Braedae dabam pridie Kal. Februarias MDCLV.

E P I S T O L A XLII.

J A N U S V L I T I U S

Nic. Heinſio.

Stokholm.

Ick sal by desen een aanvangh maeken van't geene ick lange gedreyght, en ook by eenige vrienden in trayn gebracht hebbe, te weten om eenmael myn moederlycke tael wat beter en meer te oeffenen, ende de correspondentien daer door te bath faciliteren. Ick vertrouwe dat uwe Ed: sulx niet onaengenaem sal wesen, dewyl Uwe Ed: selver nu sich in gelycke betrachtinge vindt, waer van wy de blyckelycke proefstucken in weeckelyke missiven aen haer Ho: Mo: met curieusheid en niet sonder verwonderen ettelycke maelen gesien hebben. Het is my van gantser herte leedt, dat de doot van den goeden heer uwer Ed. Heer Vader het eerste subjet moet zyn, waer over myn Duytsche penne haere schuldige plicht van condoleantie by Uwe Ed: te bekleeden heeft, hoewel ick niettemin wel verseekert ben, dat Uwe Ed: het verlies van soo Weerden Vader des te geduldiger opneemt, voor soo veel als de Nature, in regarde van syner Ed: Zaliger. hooggeklommene en afgesloofden ouderdom, haeren vollen loop gebadt heeft, en de doot syn Ed: veel eer verlost als verrast heeft. Ick hoope de eere te hebben van myn naem mede ontrent syne Ed: tombe te laeten hooren, hoewel niemant weerdigh genoegh daar toe en zy, soo lange Uwe Ed: en syner Ed: papiere kinderen leven sullen. Uwer Ed: aengenaemen van 20. der voorleden maent is my spoedelyck en wel geworden. Ick sal Uwer Ed: adresse aen Bisdommer, die wy in de Engelse Ambassade mede gebruyckt; en leeren kennen hebben, behoorlyck en wat dickwyls waernemen. Ondertusschen werden my weeckelyck toegesonden de copyen van Uwer Ed: missiven aen Staet Ex quibus lubentissime perspexi, te Sparten istam, quam virtute tua nactus es, pari industria velle ornare atque tueri. De Zelandis non est, quod metuas: certe si modo Crommoniorum partes non prorsus subvertantur. Si scirem tibi place-re, mitterem Augustae quondam nostrae novam P. Pontio artifice effigiem, cui epigramma inscripsit Gevartius, & ad me misit. Apparet inibi Pallados ritu armata, deposita tamen mitis galea, ut loquitur ὁ δ᾿ ἄναξ. Miri hic rumores de Suecorum auxiliaribus copiis, quas illa fertur huc in Brabantiam curare acciri, jamque in procinctu stare xiv. m. hominum. Spero vanos fore hosce rumores, ac timores rusticorum. Certius compertum habemus, Regem Sueciae in Polonos velle movere, & ingentem parare exercitum, uti ex tuis item vidimus. Sed mentione iconis Regii habita, occurrit & meae, quae sub Pictoris stilo est, memoria. Non lac lacti similis dixeris. Si vel disticho aliquo id condecorare dignaberis, habebo ceu non intermorituri affectus tui quotidianum & tanquam dome-

domesticum pignus. Si pluribus te exprecari anniterer, vereor ne & in pronam humanitatem tuam & in publica commoda, pariter peccarem. Vale ergo Amplissime Legate, & nonnunquam vel per otium Vlitii ἀπλως tui esto memor, qui tibi omnia fausta & propitia auguratur.

Sed cum amphora coepit

Institui, currente rota cur urceus exit?

Elegantia stili tui in novissimis tuis, quas repetebam nunc, ita subito captus raptusque fui, ut patrii sermonis pene oblitus sim. Iterum atque iterum vale. Hymen tuum Mecklenburgicum videre gestio, mittamque vicissim poemation meum in laudem Sorghvltii Catfiani vernaculis ryhtmis conscriptum, quod nunc sub praelo est, ut operibus ἔδαινος accedat. Καὶ σὺ μὲν, καὶ ἄρα φίλτατον τὸ τρίτον ἔρρωσο.

Breda 20. April 1655.

EPISTOLA XLIII.

JANUS VLITIUS

Nic. Heinsio.

Holmiam.

Est ita, ut scribis, mi Heinsi: imo plus etiam quam scribis, siquid judico, excellunt literae tuae Latinae. Nec ego, ut ingenue tecum agam, vernaculas praetulerim; nec scabram adhuc nostram esse linguam, tametsi invitus, diffitear. Cogitabam nihilominus non sermonis vernaculo id vitio vertendum, sed nobis, qui dum exoticas linguas excolimus, maternam & indigenam, ut ita loquar, negligimus atque incultam relinquimus. Itali jam ante saeculum fere hodiernum, quo utuntur, idioma suum ita perpolivere, ut vel minimum, meo judicio, absit a prisca Latii nitore. Hinc ille Tisso Maronis aemulus, Guarini Terentium imitatus, Ariosto felix Ovidii tui affectator, & reliqui non poenitendi sane vates. Galli etiamnum linguae suae eliminandae studio inhaerent. Nec Angli cessant πολυγλωτταν linguarumque, ut ita dicam, farraginem augere; quaecunque in unaquaque delicatiora sunt mutata dialecto in suam asciscendo. Nos soli masculam nostram αὐτόχθονα, nec exotici fuci egentem indignam censemus, quam exornemus. Unus mihi visus est satis feliciter id inchoasse Catfius. Parentem tuum proximum constituo, qui liquido usus est sermone in παρέργois suis Belgicis. Nam reliqui (pace magnorum aliquot virorum dixerim) exasperare potius sermonem patrium, quam ut expolirent, tentavere. Haec me ratio impulerat, ut nuper Belgice ad te scriberem; ut & alios. Eo magis, quod & felicissime te hanc Sparten, quam nactus es, exornare videbam, & provinciae isti conveniens studium censebam. Quo accedit, quod dum continuis litigatorum barbaris indies exerceor, Latii sermonis magis magisque obliviscar. Nec tamen indignum operae pretium videbatur, quod Belgae bene & praeter vulgus Belgice & loqui & scribere anniterer. Jam enim & poemata subinde vernacule pango: quorum unum

A a a a 3

Catfio

Catſio noſtro ita placuit, ut operibus ſuis, quae in unum nunc colliguntur volumen, praefigi juſſerit. Jamque ita aſſuefactus fere ſum, ut ne ſummo quidem conatu Latine dignum aliquid efferre potuerim, quod & *μακαρις* Parentis tui Illuſtri tumulo apponere auſim. Quid, quod nec amiciffimi *Crommonii* mei manibus, ante menſem nobis immatura ſubitaque morte intercepti, haecenus juſta reddere valuerim? Sed jam in otium me componere decrevi feriis rebusque prolatis, ut utrique quoad poſſim, ſatisfaciam. Scribam interim Leydam, ut intelligam, an Oratio funebris, vel ſaltem vita optimi Parentis tui haberi queat. Petierat enim id quoque Eccleſiaſtes noſter Gallicus *Hulſius*, Vir non minus probus, quam doctus, praecipue in Orientalibus linguis, quarum hinc Profeſſor audit; quibus, hortatu meo, piis manibus Parentis tui, niſi nonvis, mi Heinſi, parentare promiſit. Sed ut finem hiſce imponam, agamus porro, Amicorum ſuaviſſime, tu Latina, ego utralibet, prout occaſio ſe mihi obtulerit. De *Ruſio* noſtro dudum eſt, quod nihil audiverim. Et, ut in ſinu tuo querar, videtur is, ex quo Sobrinae meae amore fruſtatus eſt, contumeliam ſuam contemptu noſtri velle ulciſci; immerito! Per me enim non ſtetit, quo minus ea potitus ſit; nec per *Catſium*: ſed avus morti vicinus interdixerat; milites ſemper, & maxime obaeratos, utpote homo opum ſtudioſiſſimus, cane pejus & angue, exoſus. Oblitus paene eram pro cultiſſimo & anguſto vere Epithalamio tuo meritas grates agere. Miror unde homo tam negotioſus tantum otii nanciſci poteris. Quod patriam reviſere cogites, probo, gaudeoque maxime. Ego interim, ut quid agam intelligas, horrendae lanienae Valdenſium miſeratione tactus, origines eorum ac ſucceſſionem Eccleſiae noſtrae ab Apoſtolorum tempore vernacula deduco. Ordines noſtri, exemplo Protectoris, vel forſan jam novi Regis an Imp. vindicias haud dubie poſcent: niſi metu advenientium huc, ut rumor fert, Suecorum ſibi potius conſulere compellantur. cxxv. cohortes turmaeque in Tranſyſalania deducuntur, ut limites tueantur. Galli xviii millia equitum, peditum vii. in Artesiam ducunt. Hiſpani ſecuri ſe praedae ſervant, nihil molientes. Mirabilis haec futura videtur aeſtas, praecipue in Germania, ubi omnes principes, etiam Palatinus, ad arma convolare dicuntur. Imaginem Reginae proxime mittam, Antverpiâ ubi venerit. Vale, Ampliſſime Heros, & nos, ut facis, amare perſevera, tui obſervantiſſimos. Dabam ex aedibus Arſenianis, quondam Soc. J. xxii. die Juny cio dcclv.

EPISTOLA XLIV.

J A N U S V L I T I U S

Nic. Heinſio.

Amſtelodamum.

Est fane, ut ſcribis; non vere tantum, ſed & jucunde: imo jucundiſſime. Placet mihi ſic a te increpari. Placet etiam vel rixoſum me tibi videri; aut, quod

quod malim & verius est, consultus juris & actor causarum mediocris habear, modo tu rixam istam mecum habere pergas; & cum litigatoribus meis sic porro litiges. Sed quid tu illis mali tantum minaris, qui verbis tantum eminus velitaris, nec coram congredieris? apage illa terriculamenta, merasque formidines; & in arenam: si quid audes, & vir es, descende. Hic Rhodus, hic saltus; Bredae inquam. Ubi, cum Appolline tuo nos serenaveris, non dubito ullus, quin continuo diffugient omnes isti adversarii nostri,

Vasta fundorum barathra, bruta legum cymbala,

Et toga tenus patroni, qua imperitiam tegant,

Ut ego olim, cum meus essem, de illis, quos nunc, pro dedecus! quotidie frequento, ut literas, dulcesque ante omnia Musas, & si quid humani paulo ante in me fuit, dediscam, & obliviscar. Id sane nupero, tametsi momentaneo, congressu nostro, Jucundissime Heinſi, intellexi, quantum mutatus essem ab isto Hercule, qui tam suaviter olim tecum vixit; & cum suavissimae memoriae *Kinschotio*. Intellexi item, quam efficax monitor, imo medicus sis, qui me brevi in integrum mihi restituere, & ad sanam mentem revocare valeas. Huc ades, ergo, bone medice, & aegrum tuum tuique amore languentem revisas. Invenies eum vel in amoenissima, quam unquam videris, diaeta, geminos quae prospicit hortos; vel in amplissimo Musaeo, quod hoc titulo cognosces, τῆς ψυχῆς ἰατρῆον: quod sane per te nunc instructius invenies liberalissimo ἀνιδώρω illo, *Haraei* Annalibus, quos avide percurri protinus. Plura adderem, nisi coram exponere malim; modo tu festines horti mei fertilitate, annique opportunitate uri. *Brunonem* post discessum tuum vel ad fatiem vidi; erat enim jam mane prope satur, vinum absintiacum totus redolens. Donavit me Psalmis suis, satis concinne redditis, nisi quod se Belgicae novae versionis Hebraïsmis nimis adstrinxerit. O imitatores servum pecus, Flaccus dicat. Me autem hora iterum in pistrinum vocat. Vale, mi Heinſi, & affectus nostri securus esto, dummodo meus esse possim.

Dabam Bredae CIO DCCLVI. III. Kal. Septembres..

EPISTOLA XLV.

JANUS VLITIUS

INCOMPARABILIBUS VIRIS

NICOLAO HEINSIO ATQUE ISAACO VOSSIO

Hagam.

QUam jucunda mihi consortii vestri & eruditorum sermonum memoria sit, carmine hoc, rudi licet Minerva deproperato, testatum vobis reddere volui, Amicissimi Viri. Non quod vobis meliora non deesse nesciam, sed quo saltem non ingratus tot antehac & recentium beneficiorum ratiocinator viderer. Melam Nasonemque vestros testor, assiduos dum grabato claudus detineor

neor comites meos, nihil mihi domum reduci prius fuisse, quam ut studia ista recolerem, & beneficia vestra in utroque auctore agnoscerem. Nam tametsi publicis negotiis plerumque districto non semper, ut olim, vacat privatis studiis animum intendere; non tamen ulla mihi dies abiit haecenus, quin dulces ante omnia Musas istas saltem velut in transitu salutaverim. Nolo verbis meis credatis, sed ipsi, amabo, huc adeste (nam ita fere promissistis abeunti) & lectos, grabatula, diaetas & cubicula mea inspiciate; quorum si ulla non aliquot bonis autoribus instructa, vel ullum eorum non probe attritum & annotationibus libatum reperietis, tum vero tot prandiorum coenarumque dicam mihi scribite, quot dies illis me non dedisse judicabitis. Sin vero infontem invenietis, ut revera istius criminis conscius mihi non sum, cur pro desertore habear, causam non video. Sed quid ego haec apud vos allego, Amicissimi Heroës, quos tale quid de me suspicari, nefas sit cogitare; quique me toties beneficiorum vestrorum participem non reddidissetis, nisi ea summopere mihi grata fuisse perspectum habuissetis. liceat hîc ex Nasone inferere, *Utque ea non sperno, sic acceptissima semper Munera sunt, autor quae pretiosa facit.* Quae fane tot ac talia sunt, ut nisi ea assidua gratitudine recolam, ingratus & indignissimus mortalium sim. Avertat id Deus; & studia vestra propitiet atque publico bono aeternet. Valete, Nobilissimi Heroës, & amare pergite Vlitium vestrum, qui vos in oculis fert. Dabam Braedae ex grabatulo assiduus VI. Kal. Octobres CIO IDCLVIII.

En nucus meae exequias addo, si per Heinsum licet Nasonianae querelae obstrepere. Oden rogo & reliqui amici, ad quos pertinet, videant. Nam, singulis eam describam, nausea impedit. Si vero censura vestra dignum judicabitis, monitus libentissime corrigam. Iterum valete, docti duo lumina mundi.

I Carmina, quorum in hac Epistola mentio fit, non reperi inter schedas.

EPISTOLA XLVI.

J A N U S V L I T I U S

Nic. Heinso.

Hagam.

Q Uod insalutato te, ut & reliquis, quos Hagae habebam, amicis, huc recta contenderim, mi Heinse, per Flaccum tuum jam excusaveram, non apud te modo, sed & caeteros ibi amicos, *Hugenios, Junium, Vossum,*

Si quis & est alius, qui memor usque mei est.

Non tempestati tamen id, quam vocas, Poëticae, sed necessitati imputatum velim, quae me inopinum domum revocavit, jam supra mensem evagantem. Ita ut nec carmen meum typis absolvere licuerit, quod alias tecum omnino communicassem; non quod tanti sit, sed quia te consulto mihi in istis semper opus

opus fuit. Quapropter etiamnum te obsecro, ut, cum Leidam excurre, impressa jam inspicias, revideas, libereque censeas, atque indices quaecunque (si non omnia) displiceant; idque quantocyus. Mihi enim eo excurrere minime nunc quidem vacat. Idcirco en tibi, quos comites mihi indixeras, Higinum atque Palladium; quibus ego binos tuos addidi libros, non omisis, quas maximas pro usu eorum debeo, gratiis. Addidi & quaedam ad Optimum *Junium* pertinentia, quae rogo ut ei cum pari gratiarum actione ac S. P. restitui cures. Addidi denique, venia cum tua, aeneam tabellam Elsevirio vel ejus institutori tradendam, typographoque transmittendam; Symboli & numismatis Regii, cujus mentio fit, qualemcunque expressionem continentem, & averse fac titulo pagellae imprimendam. Nasoni tuo de seria cura tua & gratulor, & libenter gratificari vellem, si quid in me esset. Sed heus, quae ista furda an absurda, quam absenti & nihil sentienti minaris, Germanica an Thraonica vapulatio est? Aperte loquere, quidquid id est. Nihil metus est. Et quin tu potius, ut promiseras, huc excurras, ut liberiore aëre animoque defaecatiore hîc fruaris. Hoc age, mi Heinse, & bea temet ipso Vlitium tuum. Dabam inter rabularum verbosas litigationes e Senaculo Bredano xxiii. Julii die, cio dcclx. Quidquid est, quod *Flaccus* de Rege imprimat, velim mihi mitatur. Nisi desistat ob ineptissimum libellum nuper Dordraci ejus de Rebus impressum, ubi & tua carmina, inter meras nugas, immerito suo leguntur. *Calepinus* & *Smetius*, quem remitto, tuus, mihi pessime persuaferunt secundam in *Delibutus* posse produci, quod *Flaccus* revincit, Patrisque tui Hippoanax hodie primum me monuit. Quid consilii? quid statuendum.

EPISTOLA XLVII.

JANUS VLITIUS

UNICO, QUI RESTAT, POETAE

Nic. Heinse.

Hagae.

Quod me pararario, Optimo Regum te notum charumque reddere vo-
lueris, grates habeo quammaximas. Adeo quae Musae tuae ¹ genuinum
foetum protinus accuratissimo descriptum stilo, praesente, sed nihil ista, ut
scis, curante *Bornio*, Regi supplex obtuli, laetissimo illum suscipienti ac con-
tinuo perlegenti vultu. De Icone nihil addere potui, quippe ignorans. Cae-
terum quod censuram meam expetere super Epigrammate tuo videris, id soli-
tae humanitati tuae potius acceptum do, quam ulli merito meo datum accipio.
Utinam coram tecum consilia communicare, gaudiaque jam indies non nascentia
modo, sed maturitati proxima participare liceat, mi Heinse! Utinam

Op-

¹ Credo duo intelligi epigrammata, primum de Caroli i. caede, lib. iii. *Silvar.* p. 192; alterum, in effigiem Caroli ii. pag. 204.

Optimo Regi te sistere velis! Veni, eja, veni, & sapientis jam saeculi commo-
modo fruire. De Hymenaeo tuo quod scribas, non mittas, enecas me. Age
& te & illum nobis praesentem siste. Quin & Icona Regiam tecum affer, si
parata est. De *Brunone* misere dejecto, imo abjecto, quod jocularis, non pla-
cet. Misero enim calamitas addenda non est. Optimis Heroibus *Zulichemiis*,
Grotio, *Junio*, *Vossio*, *Wallio*,

Si quis & est alius, qui sacra nostra colit,
officia & obsequia mea cum S. P. offero. Tibi imprimis, rerum optime,
fausta omnia, litisque perniciosissimae felicem exitum precor. Vale, mi Hein-
si & si quid me amas, nil mihi rescribas, at tamen, ipse veni. Dabam raptissime
charta manuque bibula, iter urgente *Bornio*, qui hasce secum ferre recuset,
si quid carminis inesse sciat. Quare cave canem; imo Platonem dico. Scis
enim quam inimicus sit *κυνισμός ἐν τῷ πλύνει. Αὐθις ἢ αὐθις ἑρῶσο*. Bredae a. d.
xxlii. Aprilis, cio idclx.

EPISTOLA XLVIII.

JANUS VLITIUS

Nic. Heinso.

Hagam.

Hoccine est aequi in amicum Judicis, inauditum indicta condemnare causa?
Egone, ut Heinssii me oblitus videar, ab ipso condemner Heinssio; *Hoc vel
Planta velit, vel si quis stultior alter*. Amicitiam nostram, Musasque tuas, dulcissi-
ma mihi numina, testor, meo te pectore semper, Semper & ore meo, noctesque
diesque fuisse. Haga cum discederem, supremum tibi caeterisque simul amicis
valedixisse memini; cum Braeda recta Helium peterem, qui potui? At quid
criminis, quod horribilem tamen in modum exaggeras, Panegyris mea com-
meruit, quae ne Regiis quidem se oculis haecenus communicavit, quippe in-
augurationis festo destinata, nedum ut publicitus se prostituerit. Nemini,
dico atque redico tibi, ejus copia quidem me volente aut sciente huc saltem
usque facta est; nisi quod me absente Magistratus nostri, qui id juris sibi vin-
dicarunt, cum eorum auspiciis quasi illa prodierit, amanuensem eo adegerunt,
ut negare iis, etiam dominis suis, id non potuerit. Quod autem in Musas
tuas adeo injurius sis, ut eas cum quisquiliis meis compares, nae tu pol quidem
aut merita tua ignoras, aut me ipsum non nosti. Verbo dicam, non tali me
dignor honore. De Epicedio grates habeo, ut & *Earlius* pro salute, quam
illi tuo dixi nomine, simulque illud obiter communicavi. Sed & ille & ego
nunc maxime diversim adeo occupati atque distracti sumus, ut de Bibliotheca
nihil inquisiverim, tametsi & illam cum caeteris dissipatam nullus dubitem.
Nullam etiam haecenus adire per continua forensia negotia potui. Et vix u-
num atque alterum inter doctos in transitu salutavi, *Molinaeum*, *Pellium*, *Phi-
lippium*, *Dugdaliū*. Totos dies aut Palatinum aut fori Curiaeve limen obsi-
deo,

deo, nec quando expugnaturus sim etiamnum video: instante jam quippe xx. Decembris, quo Senatus uterque dissolvetur, ut inaugurationi, quae vii. Februarii futura creditur, melius vacari possit. Maximo sumtu cuncta eo parantur. Caetera ex impresso cognosces. At quid tu interim, mi Heinfi, Nunc iterum hiberno moliris fidere iter? De munere & gaudeo & gratulor ex animo. Quid de lite tua interea temporis fiet? De qua securus mihi quasi videris, qui ea posthabita, alienam curas. Utinam modo in tua felicior sis, quam in sua meus ille affinis. Atque haec quidem, mi Heinfi, partim in ipso Senatus vestibulo, partim in diversorio, inter rabularum calorumque assiduos discursus atque consuetos clamores, prout male scripta vides, in chartam conieceram, cum domum & ad me [reversus dubitavi valde, mittendane an omittenda potius forent. Misi tamen, ut aliquid mittam, quo meum saltem excussem silentium. Percrebuit interim fama Primicerium *Hidæum*, Ducem Clarentiae creatum, filiam ejus cum Duce marito in S. Jacobi commoratum ire; nepotemque praesente Rege sacro fonte solemniter aspersum. Regis consecratio in iii. Maji diem dilata; caetera impressa mitto. *Vossium* huc cogitare ex *Junio* avunculo lubens intellexi; nondum appulisse miror. Utrique, si ille nondum solvit, S. P. dici cupio; & huic insuper me proxime ei responsurum, nunc aliis occupatum *Philippium* me interim convenisse, & talem, qualem mihi delineaverat, prorsus invenisse. Nova ubi perlegeris, rogo cum iisdem; & si qui praeterea me absentem amicitia sua dignantur, praecipue Celso meo V. Ill. communices, qui in vicinia illic habitat. De discessu tuo, si modo hac hyeme proficisceris, certior fieri cupio, ut saltem abeuntem votis prosequar. Postridie Kal. Nov. Jul. Thamesin una nocte ter aestuasse nescio an observatum. Appulerat tum Regina mater. Ante sex dies navis Regia, xl. tormentis instructa, ad nova Guineae commercia destinata, subitae vi tempestatis, prope Wolwichium (Woelwyck vel Wolwyck Belgice dicas) submersa est. Sed jam plus satis nugarum habes. Vale, Musarum faeclicque decus, & nos amare perge. Dabam modo Londini modo Westmonasterii x. xii. & xiv. Decembris die cio idclx.

Bruno noster & tibi & *Bornio* S. P. D. huic significans *Bellaciorum* hîc etiamnum superesse familiam trium Iridis Florum insigni utentem, quae Lilia vulgus vocat. Nova Gallice, ut solent, impressa non sunt. Magna conspiratio contra Regem Regiosque detecta fertur; & dux rebellium *White* cum iv. sociis deprehensus. Iterum vale.

JANI VLITII
EPISTOLA XLIX.
NIC. HEINSIUS

Jano Vlitio.

Bredam.

NAE nomen tuum, mi Vliti, inter Pyladas & Orestas referri meretur, qui absentis amici tam religiose memoriam conservas? in Britannia degentem compellavi frustra non semel: compellavi postea & ex hac civitate, maximoque litterarum tuarum desiderio me flagrare sum testatus, sed aut muto aut furdo omnia. Ne Panegyricum quidem tuum ad me perferri passus es. Quam atrocissimam noxam non nisi verbosissima epistola expiabis. Jam enim exspecto, ut Regem pro carmine munificentissimum sis expertus, utque eques ex armigero repente factus domum redieris, si horum nihil, at saltem permitte pretium a nobis ingenio tuo poni. Advolet igitur ocius huc panegyricus, aut vapulato trecentis scizontibus; satin' pro imperio? At loquor serius, sed nec Naso missus muneri epistolam extorquere tibi potuit. Dignus profecto, qui Britannos solos versibus tuis plaudentes experiaris. De me quod addam, non habeo. Musas in septentrione meas si frigere dixerō, facile inveniam, opinor, qui hoc mihi credat. Mitto tamen earum specimen, & quidem unicum. Nihil enim toto jam anno carminum praeterea scripsi. Ajunt Gallis non displicuisse epigrammata. Tu vale. Holmiae suecorum Anno CIO DCCLXII. a. d. XXVIII. Januar.

EPISTOLA L.
JANUS VLITIUS

Nic. Heinsio.

Holmiam.

EX quo ex Anglia redii, nulla mihi prorsus ad te scribendi data fuit occasio, Heinsi ἐξοχώτατε, neque impraesentiarum quidquam habeo, quod te dignum sit. Panegyris mea CAROLUS REDUX tanti non est, ut vel eo nomine aut tu mihi succenseas, aut ego ad te mittam; quippe γλαῦκας Ἀθηναζε. Misi tamen Amstelodamum, ut maritimo Rex ille maris scilicet ad te perveniat itinere. Nunc quod addam nihil habeo. Nos enim hic in angulo patriae latemus, ubi nihil novi affertur, quod non tritum obsoletumque ante sit. Scis me vehementer amare exoticas, praecipue septentrionales linguas, ut vernaculae origines inde haurire possim. Hibernas horas hisce impendi, & jam libellum selectorum veterum id genus adagiorum sub praelo habeo. Deest mihi tamen Suedici, ut & Danici Dictionarii copia. Islandicum item si quid praeter Biblia ea in lingua, quae omnium istarum purissi-

rissima remansit, adhuc superest. Oro atque obsecro te, suavissime rerum, ut, si aliquid ejusmodi forsan tibi occurrat, mihi eadem via quantocyus mitas. Biblia etiam Islandica quovis pretio lubens excipiam. Noli credere me *Boxhornium*, aut *Becanum*, aliasve id genus Chimaeras aut Sphyngas velle imitari. Solidiora ex Gothicis Francicisque habemus Euangelis, quae liberaliter mecum communicavit amicissimus & candidissimus *Junius*! Is quidem solus haec optime praestare possit, & totus in illis est, sed tam multa simul agit, ut verear nihil effecturum tam provecta jam aetate. Promisit tamen se jam Gothica editurum Euangelia, & characteras ad id comparaturum. Factus enim compos est litis contra *Straffordium* Comitem. Utinam par tua fuisset fors! Quo statu res illa sit, prorsus nescio. *Rufum*, ne fera facta bestia credatur, animum ad suos revertendi induisse, jamque revertisse, non dubito quin audiveris. *Zulichemium* etiam cum *Ludovico* filio in Galliis adhuc haerere, non bene succedente legatione. Nos hîc sub nova Domina nova discimus imperia pati, Anglicas delicias cum severitate & austeritate Germanica mutant. Hagae quid fiat, tu melius, quam ego hîc, percipis. Vale Nobilissime & Amplissime Vir, & ut facis semper, Vlitium tuum amare perge, ejusque in hoc studia fovere atque promovere ne dedignare. Dabam Bredae vi Kal. Februaris A. S. N. CIO IOCLXII. quem propitium magis tibi voveo.

Princeps noster, consummatis scilicet Leidae studiis, Academiae valedixit, Hagamque rediit: brevi etiam cum Avia huc venturus creditur, ut renascenti Athaenaeo nostro intersit.

EPISTOLA LI.

NIC. HEINSIUS

Jano Vlitio.

Antiquitatis utriusque, tam barbarae quam eruditae peritissimo.

Bredam.

Quid ni enim sic te compellem, amicorum suavissime? postquam Graecas & Latinas litteras edidicisse fatis non habuisti, sed adjunxisti iis Gothicas quoque ac Saxonicas inexhausta & propemodum nimia discendi cupiditate. Mallem equidem, ut libere quod res est apud te depromam, inceptam venationis antiquae semitam decurreres porro, & digno elegantia ingenii tui studio isti te denuo accingeres; sed quando aliter in fatis est, & civicam ambiciose captas, ex juratis imperii Romani hostibus, barbariaeque asserendae sedulus ac prorogandae incumbis, obsequar tibi & haec quoque studia, quantum in me erit, vel invitus ac nolens fovebo. Quanquam speraveram Britannicum istud iter conatibus meis aliqua saltem ex parte profuturum esse, atque adeo fore, ut vetustorum nonnihil Nasonis exemplarium ex priscis illis terrarum Bibliothecis erueres. At tu in Gothicis Saxonisque ita totus fuisti, ut nec

Bbbbb 3

mei,

mei, nec Nasonis sis recordatus. Panegyrim tuam necdum vidi, nec quando visurus sim fat scio. *Elzeviriorum* enim alter, cui *Danieli* nomen, in Gallias profectus est: unde tamen propediem redux a suis exspectatur. Quando augur fore, ut carmen istud cum aliis, quos ille Lutetiae meis usibus collegit, ac utendos ab amicis accepit, huc confestim mittatur. Islandica biblia, si venalia invenero, tibi parabo; sed liber ille perquam difficilis est inventu, ut ex *Scaligeri* τὸ πᾶν epistolis cognosse potuisti. Ejus sermonis alia complura vidi, sed in membranis exarata, dum regiam Bibliothecam nuper hîc perlustrabam, quae ex Dania inter praedam luculentam huc advecta dicebantur; direptis scriniis *Georgii Sefeldii*; sed illa in transcurso festinantibus alio oculis raptim solummodo delibavi, cum avidius me convertissem ad perlustrandas *Meursianas* lucubrationes, quae magno fat numero, necdum editae, illic sese offerebant. Tria praesertim volumina antiquitates trium nobilissimarum insularum complexa, *Cretae* videlicet, *Cypri* ac *Rhodi*: sed haec nihil ad te, qui ad castra *Gothorum* *Saxonumque* jam pridem transisti. Panegyricum tuum ab ingrato Rege non bene exceptum indignor. *Vossius* noster, qui magnos honores sibi in aula illa habendos fore praesagit utinam feliciore fortuna utatur. Reginam, quam nosti, obviam habui in ipso itinere huc adveniens. Excepit illa me curru suo, comiterque ac familiariter mecum est confabulata per horas quatuor continuas, dum vehebamur. Petierat enim in ipso occurso, ut mea relegerem vestigia, seque ad octavum usque miliare comitarer: cui petitioni parendum fuit. Postero die, dum *Helmaestadii* uterque subsistimus, ad prandium me vocavit, mensaeque suae admovit: denique multis & indignis laudibus apud Italos suos cumulatam dimisit, additis promissis, omni opera sese enisuram, ut quod debere se mihi nummorum non sine plurimo rubore meminisset, quam primum solveretur; idque ipsum per litteras iterata pollicitatione nuper confirmavit, sed non ego credulus illi. Haec in aurem tibi. *Bornius* noster ne discipulum suum magno pretio nihil scire doceat, vehementer metuo. Provinciam ejus de *Lucretio* edendo invasit *Tanaquillus Faber*. Nasonem meum illi miseram, sed ille vile munusculum fastidiose excepit. Certe tanti non putaverat, pro quo grates vel tribus verbis ageret. *Phaedri* editionem novam molitur *Ubsaliae Schefferus*. Conjecturas illi complures suggesti, tibi forte non improbandas, quas ille observationibus suis hîc illic inseruit. Si quid ex scriniis tuis ad hanc *Spartam* ornandam potes conferre, nam tersissimum scriptorem praecipuis tibi in deliciis jampridem esse non ignoro, id ut facias, & quidem quam primum rogo. *Rhemensem* codicem, *Rigaltio* laudatum, sed negligenter evolutum, *Marquardus Gudius* se perlegisse plurimo cum fructu, & multas in eo sibi deprehensas lectiones praestantissimas ante annum asseveravit, sed ille in *Italiam* nunc est profectus. Enitar tamen vel sic homini diligentissimo extorquere, quicquid ad *Phaedrum* observavit, ut *Schefferianae* editioni addatur, & ornamentum quaecunque accedat. Vale, *Vliti* jucundissime, & me tui unice studiosum, pari affectu complectere. Exarabam *Holmiae Suecorum*
Anno cto dcc lxxii. a. d. x. April. Gregor.

EPISTOLA LII.

JANUS VLITIUS

Nic. Heinsio.

Viro, uti Latiac Graecaeque antiquitatis indagatori studiosissimo,
ita patrii avitque sermonis incurioso,

Holmiam.

Quid enim minus tibi respondere possum, rerum dulcissime, qui nuperis tuis, etsi etiam sic mihi semper gratissimis, patriam tuam, quam olim rusticam terram nulla impetrata venia cecinisti, nunc etiam barbaram, imo vel ipsam barbariem vocas? An non doctissimus ille Romanorum Varro, ut Graecos Etymologos omittam, quos tamen & Parens olim tuus ὁ μακαρίτης. & tumet ipse (& quis non eruditiorum?) plurimi semper, nec immerito, fecistis, idem studium habuit, ut vernaculae origines indagaret, atque indicaret? Quid de *Vulcanio*, *Vossio*, *Pontano*, *Mylio*, *Scotto*? (nam *Beccanum Schrieckiumque* his accensere nolo) quid de ipso *Scaligero*, ipso *Casaubono*, qui tamen peregrini erant, dicturus sis, expecto, idem studium (quia tamen hisce, quae nunc in manibus habemus, cimeliis destituti erant,) infelicius professis. Nam Anglo-Saxonicae, qualem proavi nostri hîc locuti sunt, & Britannis devictis ante M. annos tradidere, ne γρὺ quidem, Francicae sive veteris Teutonicae parum satis (Germanos omitto, Goldastum, Freherum, aliosque) Gothicae autem linguae vel minimum intellexerunt. Runicam & Cambricam vix fando audiverunt. Islandicam autem quantopere ὁ δῆνα expetierit, ex iisdem, quas mihi allegas, epistolis ejus ipse tumet ignorare non potes, bone Vir. Si haec tibi non satisfaciunt, vel Patriae linguae vindicias, vel apologiam pro meo erga illam studio, quae μέγα κλονὶ tibi dent, aliquando videbis. Quod tamen vel invitum, ut ais, gratificaturum te mihi polliceris, accipio, gratiasque habeo. Utinam ex MSS. illis, veteribusque Runico charactere inscriptis monumentis, vel Historiis, vel statutis, aliquid mihi impetrare possis, digneris. Nam Islandica Biblia ante biduum nactus sum, ex Bibliotheca Leidensi, ubi forte fortuna ea deprehendi, per affinem, qui ea nuper paraverat, mutuo mihi tradita, donec Hafnia, ubi ante xv annos denuo impressa, (quod tu & ego nesciebamus) afferri mihi curem. Sunt tamen vitiose valde excusa. Deficit mihi Dictionarium ejusdem linguae, quod ab *Ingramo Jona* editum fertur. Καὶ ταῦτα δὲ μὲν ταῦτα. *Vossius*, ut hactenus Theologos exercuit, ita nunc Philosophos in se inritavit, edito de Luce libello, acuto & laborioso, sed a receptis vulgo omnium sententiis longe dissentiente. Is nunc cum *Thuano* circum vicinas ditiones pervagatur: quo facto ὁ δῆνα in patriam, invito, ut creditur, animo, per Brabantiam rediturus est, aere etsi alieno, quod plurimum hîc, ad C. usque florenorum M. contraxit, nondum soluto. *Bornius* noster promissis suis de Lucretio, quem circumforaneum sibi semper habet, adhuc inhaeret; succensens omni-

omnibus, qui contra credunt fidem se non liberaturum. Is me permoverat fere, ut in Principis gratiam, *Phaedri*, receptis in textum melioribus lectionibus & conjecturis, novam, brevissimis cum notis, editionem darem. Sed nunc ὑπέχω, donec videro quid *Schefferus* ille praestiturus sit. Atque hîc quidem, uti tecum inceperam, pariter desino. Vale, Musarum, Venerisque, quod nolim, nepos & me tamen tui studiosissimum crede, & sic amare perge. Hagae Comitum, tremula per febriculam manu, IV. Kal. Junias CIO IOC LXII.

EPISTOLA LIII.

NIC. HEINSIUS.

*Jano Vlitio.**Bredam.*

Quantum ex Bibliopola *Elzevirio* intelligebam, proxime erat is in eo, ut supremam manum Claudiano meo editionis secundae imponeret, negabat quippe ad summam operis restare quicquam typis describendum, praeter solam praefationem. Accipias igitur cum hisce litteris, ni augurium me fallit, quicquid est istius libri. Mox poëmatum meis de novo edendis se accinget idem *Elzevirius*, quapropter, me hortatur ut huic libello patiar accedere quicquid carminum a praeclaris ingeniis est datum. Quibus ejus desiderii etsi necdum subscripsi, rogo te tamen obsecroque, mi Vlitii, ut versus omnes, quibus me jam olim compellare es dignatus in fascem conjicias, & aut ad me quamprimum pervenire patiaris, aut *Elzevirio* tradi. Ne quid in te morae sit, si consilium de libro adoptivo poëmatum edendo cepero, quod in arena capietur, si capietur tamen. De novo Testamento Gothico quod luci adornas, jam non semel verba apud me fecit Illustrissimus Regni hujus Cancellarius, cujus desiderio videndi non modico se teneri profitebatur. Vale. Exarabam Holmiae Succorum, manu ex morbo nupero necdum satis confirmata. Anno CIOIOC LXIV. a. d. III. Sept. Gregor.

EPISTOLA LIV.

JANUS VLITIUS

*Nic. Heinsio.**Holmiam.*

Gaudeo magnopere non totum me tibi, Suavissime Heinsi, excidisse, & postliminio per tuas compellatum, A. D. III. Septembris mensis Holmiae datas, mihi autem heri demum cum Claudiani tui nova & nitidissima editione redditas. Pro munere gratias primum habeo maximas: ut & secundo pro eo honore, quod me in iteranda poëmatum tuorum Editione nomen quoque meum in amicorum albo profiteri velis. Tametsi sciam me graculum inter pavones,

nes, vel ut inter strepit anser olores, in pompâ ista compariturum, non detracto tamen, neque deero officio meo. Quae puer juvenisque luseram non ausim seriis apponere. Unicam ergo Elegiam Gratio praefixam pro symbola conferam; sed nonnihil a me dudum elimatam. Eam, puto, illic habes; & cum jam trimestre elapsum sit temporis, ex quo tuas illas dedisti, spatium, ea propter non tibi, sed Typographo mittam. Gothica Euangelia cum Glossario *Junii* meaque opella absoluta sunt. Sed accedent, quae jam quoque finem spectant, Doctiss. V. *Thomae Marshalli*, collationes variarum interpretationum cum Gothica; eruditissimae aedepol Tantisper vale, mi Heinse. Illustriss. Comiti *Magno* (cui praemissa satis longa Elegia opus dedicavi) rogo ut gratia tua me commendes Dabam Brabantum Trinacriae. x. Septembris. CIOIOC LXIV. St. Gregor. *Beuningium* Heroëm hîc indies expecto, in Gallias Legatum. Sed tu haec melius ex publicis intelliges.

EPISTOLA LV.

NIC. HEINSIUS

Jano Vlitio.

CLaudianum meum tibi se stitisse laetor. Quamquam in ipsis observatis nihil omnino singulari illa eruditione tua dignum occurrit, aut quod oculos tam perspicuos pasciat. Multa praeter hoc ab operis typographicis per absentiam meam oscitanter & supine commissa sunt, quantum primâ fronte mihi apparuit, quae ne censores malignos offendant, ac existimationi meae apud illos insidientur, metuendum est. Nam de te, mi Vlitio, tuique similibus, hoc est Viris ingenuis pariter & eruditis, sum omnino securus. Alia nuperime mihi erant prae manu, in Maronem praesertim observationes satis copiosae & luculentae, nisi mihi blandior: sed eas jam propemodum ad finem perducta abruptit bellum Britannicum, quod ut foederatis Belgis vertat feliciter Deum opt. max. veneror, quando tam nulla de causâ tamque perfide ac nefarie ab adversariis nostris est inchoatum. Vapulent igitur per me licet, cum lumbos habeant usque adeo prurientes. Ego quidem adfectam insigni injuriâ patriam¹ versibus non paucis jam sum ultus, quos in poematis meis publico expositos propediem forsân videbis: nisi quod libelli editionem procrastinare pergit me invito *Elzevirius*. Omnia, quae honori meo dedisti, illic comparere omnino velim: sunt enim te tuisque Musis dignissima. Gothica Euangelia Illustrissimus Regni Suedici Cancellarius avide expectat: sermo mihi jam non unus cum illo fuit de tuis praeclaris in rem litterariam meritis, quae me commendatore neutiquam indigebant. Reliquum solummodo est, ut opus ipsum hîc aliquando compareat. Vale, Vlitio jucundissime, & me, quod facis, indefinenter amare posterum perge. Exarabam Holmiae Suecorum CIOIOC LXV. a. d. xiv. Kal. Mart.

¹ Vide lib. iv. Eleg. 9.

ARNOLDI SLICHTENHORSTII

A D

NICOLAUM HEINSIUM

EPISTOLAE.

EPISTOLA I.

ARN. a SLICHTENHORST

*Nil. Heinsio.**Leidam.*

Ecce tibi promissos¹ versus meos, amicissime Heinsi, qui si oscitare tibi ac languere videbuntur, poëtae tui excusationem obtendam, qui exemplo suo nos docuit, quam difficile sit, impeditum luctu ac moerore spiritum, invitis Gratiis ad poëticum furorem impellere. Impetu enim, ut nosti, haec peraguntur, quem a languidis ac sibi displicentibus importune exigas. Adeo ut poëtarum mihi eadem quae navium conditio videatur, quas vento, statove aestu destitutas, vado haerere aut Neptuno nequicquam obniti videmus. Tu vero, quas tam dudum parturis, tandem in lucem protrude, Castigationes Ovidianas. Literarii Senatus intererit, restitutum videre illum scriptorem, in quem tanquam metam aut idaeam omnibus numeris perfectam omnes cultores intuentur. Dum heri apud me esset noster *Wittenius*, qui diuturno ex morbo ad salutem jam eluctatus, hac in urbe Musis mecum operatur, ac forte, ut fit, confabulantibus, se versus ille offerret:

Nil mihi rescribas, attamen ipse veni;
monuit, se ex *CL. Pontani* ore audisse, qui scindendam censebat voculam *attamen*, legendumque separatim; *at tamen*; ut *tamen* sic idem esset, quod (& locos veterum plures adducebat) tandem aut aliquando: quomodo & *Wittenius* intelligebat *virgil. Eclog. 9.*

Sic Moeri canamus, Hic boedos depone tamen veniemus in urbem.
In Epistola Phyllidis;

Thesca devovi, quia te demittere nollet,
demittere pro dimittere obrepfit. Ibidem, ubi de fictis lachrymis:

Hae quoque habent artes, quaeque jubentur eunt.

quum-

¹ Additum erat huic Epistolae carmen in Ovidium cura N. Heinsii editum, quod legitur ante ejus editionem.

quumque jubentur scribi debere puto. Et hoc est, quod 3 de Arte ait: *Quoque volunt plorant tempore, quoque modo.*

In Epistola Briseidis:

Est aliquid solitis collum tetigisse lacertis,

Praesenteisque oculos admonuisse sinu,

Postrema vocula necessario in sui mutanda est. In Epistola Phocdrae versu 8. pro *destitit*, melius *restitit* leg: poterit, ut alibi: *Semper in his apte narrantis verba resistunt.* In Epistola Oenones, ibi: *Ardet amore tui*, & paulo post: *Non profecturis littora bobus aras*, gemina utrobique interrogationis nota, erigendo sensui, deest. In Epistola Didonis:

Et nondum nati funeris auctor erit,

res suadet ut *nato* substituatur. In Epistola Canaces:

Sic mea vibrari pallentia membra videres,

ut & quinto Tristium Eleg. 8.

Nec mala te reddunt mitem placidumque jacenti Nostra &c.

elegantius meo judicio sit, si utroque loco *pallentis* & *jacentis* legatur, quomodo alibi: *Et flesti nostros vidisti flentis ocellos.* In Hypermnestrae Epistola, versu primo & penultimo *Hypermnestre* mallet. Vlitii quoque manifesta illa: *Et subitus dextrae praepedit ossa tremor.* Orsa enim auctoris manus fuit, quod praeter totius orationis contextum ac rem ipsam ex illo sequenti patet: *Erigor & capio tela tremante manu.* Libro quoque Amorum tertio Eleg. 5.

Colle sub aprico celeberrimus ilice lucus Stabat eis

creberrimus commodius rescribi posse existimo. Sed de his ipse melius judicabis. Vale, nobilissime Heinsi, ac salve plurimum, a nostro Wittenio. Illustri parenti ac Clarissimo Boxhornio humillimam salutem nunties rogo, nec non, si jam reversus sit, amicissimo Hofferro, cui brevi scripturus sum. Iterum Vale, ac rescribe. Trajecti ad Rhenum propitius, nisi fallor, Nonas Octobreis. veteri dierum computatione A. C. cio dcc xxxix.

EPISTOLA II.

ARN. SLICHTENHORSTIUS

Nic. Heinsio.

Leidam.

Cum vestram per urbem in Gallias iret doctissimus juvenis ac utrique juxta Camicus, *Rodolphus ab Ommeren*, non potui officio meo deesse. Maturius factum id fuisset, nisi putassem in Academia Oxoniensi te adhuc haerere. *Kinschotius* enim noster in suis novissimis ne verbum quidem de tuo reditu. Quo errore me nuper liberavit *Ommerenus*, a quo ut reversionem tuam, lubens accepi, ita ad morbi tui nuntium vehementer indolui. Faxit summum Numen, ut nobilissimus Parens, ac communes amici de recepta valetudine brevi tibi gratulentur. In Ovidio post priora quaedam notavimus, sed modica, quae per

occasionem (nam tempus nunc non suppetit) transmittemus. Nos Arenaci, amoenissimâ urbe, ob negotia paterna jam sex menses continuos commoramur, paucos post dies domum reversuri. Interim autoritate superiorum ac Typographi precibus immensum opus, ac nihil minus quam invidiosum, suscepimus, Historiam nimirum Gelricam *Pontani*, suâ mole laborantem, contractam *Batavico* habitu donare. Tres priores libros jam absolvimus, reliquos raptim cum deo adornaturi. Gloriam enim omnem usumfructum primus auctor habet, quam illum nec καλὰ πόδας, nec ubique sine censura sequimur. Tum & ad vulgi captum omnia scribenda sunt; cui hic labor potissimum servit. Nuper ad *Hofferum* nostrum, in Galliis adhuc ut puto agentem, literas misimus; ipsius literae ac versiculi post multos errores ac longissimam moram nondiu est, quod accepi. Interim quid tu rerum agas (neque enim studiorum amorem morbus in te extinxit) quando Poemata, quando Ovidium publico daturus, scire desidero. Nos post Lusitaniam liberam nihil praelo subjecimus, fordidis curis nimium districti. Clariss. *Boxhornius*, ut video, semper sui similis, semper in opere est, ac nominis sui splendorem quotidie in majus extendit. Nobilissime ac integerrime juvenis vale. Illustris Parens tuus, Clariss. *Boxhornius*, *Blënius* ac *Kinschotius* plurimum meis verbis sint salutati. Raptim & aliis occupatus Arenaci Gelrorum, Nonis, ni fallor, Quintilibus A.C. CIOIOXLII.

EPISTOLA III.

ARN. SLICHTENHORSTIUS.

Nic. Heinsio.

Leidam.

Vide, mi Heinsi, quantum tuâ unius culpâ famae ac honori meo detractum sit. Nuper ad me Zirizacâ allatae sunt *Hofferi* nostri literae, in quibus fidem meam non ambigue suggillabat, nec simplicis negligentiae insimulabat reum, addito, te ignaviae meae; si diis placet, non minus succensere, ac plane constituisse, veteris amici non amplius meminisse. Quo intellecto ad rei novitatem pene cohorrui, praesertim quod tuam ipse scabiem inusitato exemplo mihi affricare conareris. Quam enim religiosus semper in officio scribendi, ac conservandâ amicitia fuerim, nec ipse ignorare potes, nec opus est ambitiose pluribus hîc referre. Illud me imprimis urit, quod jam integrum fere biennium, non sine superbiae opinione, vanâ expectatione suspensum me tenes, ac responsi omnis exsortem, pristinae humanitatis, ac communium studiorum penitus oblitus: Tantum enim temporis effluxit, quo Rudolfo Ommereno, Arenaco per Hollandiam ac Lugdunum vestrum in Gallias eunti, codicillos satis prolixos ad te commiseram, obnixè inter alia obtestatus, ut quid rerum *Hofferus*, & ubi locorum in Galliis tum ageret, perfunctorie significares. Caeterum furdo omnia; nec preces meae quicquam valere. Neque hîc contentus, etiam exemplum Poëmatum Magni parentis, dudum (scis Proteu, scis ipse) pro-

promissum mittere superfedisti: tum (quod rei caput est) conjunctissimos inter amicos malignis criminationibus diffidium suspicionesque procurare, ac frigidam suffundere non es veritus. Quomodo hæc bonâ cum fide ac amicitiae legibus conveniant, ipse videris. Caeterum ne accusare tantum videar, legibus, fortasse immeritum, scire desidero, eruditissime juvenum, quibus jam studiis animum oblectes, quid hoc biennio rerum novarum dederis in publicum, quid in divini Poëtae Commentatore Servio dehinc præstiteris, quando denique poemata tua, quando elegantissimæ in Ovidium lucubrationes nobis expectandæ sint. Nec enim *Wittenio* quicquam nostro concessurus es, qui, si nescis, Carminum suorum editionem similiter vel molitur, vel adornat. In Ovidio tuo pauca quaedam postliminio hîc illîc observasse mihi visus sum, quæ, si tanti aestimas, ubi commodum erit, communicabo. *Vincentius* quoque *Alsarius*, qui in Epistolam Ciceronis ad Lucejum non ineptos commentarios scripsit, aliud agendo loca quaedam Poëtae minus obvia noviter interpretatus est. Hoc eo dico, quia Scriptorem illum tibi ignotum credo. In Servio, qui pluribus mendis oblitus est, & si quisquam antiquorum, medicas manus desiderat ac meretur, plura fortasse possem præstare, & emendationum sylvam congerere, si veterum Codicum, tum & Criticorum eadem mihi esset, quæ tibi facultas, nec sordidioribus curis indies distinerer, quæ ad hæc amoeniora nisi rarissime ac furtivis horis me non sinunt respicere. *Fulvii* tamen *Ursini* Notæ ex manu scripto antiquo, quæ olim ex officinâ Santandreanâ prodire, multum subsidii ac lucis ad doctissimum Grammaticum sanandum afferre possent. Caeterum alia, ut dixi, negotia intentionem nostram abrumpunt, & præcipue quod sub manibus est opus *Annalium Gelricorum*, quod in nostrum idioma transferre, contrahere, illustrare, ac pluribus locis reformare, auspiciis Ordinum patriæ meæ, jam pridem suscepi. Et quoniam labor ille noster jam ad finem spectat, Camoenas tuas, ut inglorio per se operi famam aliquam concilient, implorare audeo. Hoc & irritato animo thuris loco erit, & redivivæ amicitiae certissimum pignus. Atque audin? ne iterum fallas, aut longâ morâ occidas expectantem, non pulvere (ut olim Romanus Orator dubiæ fidei Regem) sed circulo temporis te circumscribo, nimirum octiduo, intra quod spatium nisi desiderio meo satisfacias, extremum hoc erit quod te alloquar. Amicos enim demereri possum, possum observare, fastus modo & contumelia absint, quæ ut perpeti non possum, ita multo minus invitos procari. Et certe

Tempora si numeres, bene quæ numeramus amantes,

Non venit ante suum nostra querela diem.

Vale, Nobilissime, & nisi a te degeneras, amicissime Heinse; & si quid præter fas & meritum hîc objeci, audacter redargue, mone, objurga. Mitto simul Epithalamium, quod etiam Gallicis Rhythmis, sed minus feliciter, a me inclusum est. Illustres viri, parens tuus ac Boxhornius plurimum salveant, tum & doctissimus Kinschotius si in Academiâ istâ (dudum enim de candidissimo juvene nihil intellexi) adhuc Musis operatur, quem etiam monebis, ut nobis paria

facturis quamprimum scribat, quod officium ipse aliàs occupabo. Scribebam ad Amisii ripam postridie Nonas Februarii A. C. cío ioc XLIV.

EPISTOLA IV.

ARN. SLICHTENHORSTIUS

Nic. Heinsio.

Leidam.

HOc nimirum mihi unice in votis ac mente erat, ut acribus remediis diuturnum utrimque lethargum expellerem, & (quod ante hac per *Hofferum* ac *Kinschotium* internuncios, saepe nullo cum fructu, tentaveram) languorem tuum tandem expugnarem. Eo fine finxeram iras, ac suspicionibus candorem tuum oneraveram, indignatus merito, honestum illum ignem tanto tempore in nobis sopitum fuisse. Quanquam, uti narranti tibi fidem habeo, fortuna potius in nos peccasse dicenda est, quam uterque in fidei ac diligentiae leges. Ne vero iterum ejusmodi nubes & parelia amoris mutuo intercedant, à calamo impetrabimus, quem dehinc (paria modo praestes) magis exercere certum est. Hoc tanquam fidejussore adversus diffidentiam alternam & suspicionum frigus utamur, mi Heinsi. Atque utinam & anni tempus, & rerum mearum status mutuos conspectus amplexusque permetterent! si quidem & tui & urbis istius perpetuum & incredibile desiderium me tenet. Illic vivere ac consensescere, in sinu ac inter alumnos Musarum, si qua Fata sinant, procul curis ac strepitu, non semel votis expetivi. Sed quia quod volumus non licet, proximum est, ut id velimus quod possumus. Ad rem venio. Quas in Ovidium tuum Notas promiseram, hoc tempore (quod illarum longa est series) spatiis exclusus iniquis mittere supersedeo, quam primum tamen cum foenore reliquum nomen exsoluturus. Earum interim loco ¹ Epigramma illud meum, hinc illic leniter castigatum, in antecessum offero; & simul Excerpta quaedam; quanquam dubius, an hoc officio gratiam à te initurus sim. Sed utcunque ea se habeant, fidem tamen nostram ac studium vel in minimis tibi placendi, ut spero, non improbabis. Vale, suavissime Heinsi, ac Slichtenhorstium tuum ama, qui responsum tuum cupide expectat, & jam plus te amat, quam unquam. Amisfurti xiv, aut fallor, Kal Mart. A. C. cío ioc XLIV.

¹ Nec epigramma, nec excerpta illa potui inter schedas repperire.

EPISTOLA V.

ARN. SLICHTENHORSTIUS

*Nic. Heinsio.**Leidam.*

Saepe mecum indignatus sum, cum tot ubique extent, etiam in pro-
 letarios autores, Scriptorum hujus aevi censurac ac castigationes, nul-
 lum haecenus repertum, qui ex professio ac cum judicio delicatissimum poe-
 tam Ovidium sibi sanandum proposuerit. Adeo crassae omnibus fere paginis
 mendae occurrunt, quas facile ex ingenio alicubi aut membranarum tollere erat,
 & haecenus non sublatae valde admiror. Ut jam merito post tot saecula, sae-
 culum nostrum ac tanti poetae manes sibi gratulari debeant, quorum causam
 ac vindicias fero sed serio, soli huic provinciae pares, Heinsii susceperint. Ego
 ut & promissis meis ac petitioni tuae magis fortasse. quam proprio honori sa-
 tisfaciam, non verebor, acuendo ingenio tuo, quae in istum auctorem re-
 cens mihi observata, quasi per Satyram collecta apud te deponere, judicium
 tuum exploraturus.

Epist. Penelopes: *Denique, quisquis erat castris*, ea libentius legerem: *si quis*
erat, ut cum sequentibus cohaereat. [Paulo post ita distinxerim: *Ausus & o-*
nimum, nimumque oblite &c. ut posterior vox sit adverbialis.] Ibid. *quae vestra*
libido est, Esse peregrino captus amore potes. Gemina illa in Epist. Helen. *Quae tua*
nequitia est, non his contenta fuisset. Epist. Phyllidis. nescio an prioris editio-
 nes damnandae, quae repraesentant: *in poenas non satis unus eris.* Epist. Brisei-
 dis, *Praesentis oculos admonuisse sinu*, Jam ante monui sui legendum esse.
 Ovid. in Halieut. princ. *Accipit mundus legem, dedit arma per omnes, Admonuit-*
que sui. Sed & Epist. seq. *prodestitit virilius restitit scribi posse*, monueram.
 Ita & virgil. 4. Aen. *Incipit effari, mediaque in voce resistit.* Ibid. *Et tenuis tel-*
lus audit utrumque mare. fortasse rectius substituere possemus *Claudit* i.e. sepa-
 rat ac dividit. Ipse 6. Metam. *Quaeque urbes aliae bimari clauduntur ab Istmo.*
 Alibi: *Quaeque maris gemini distinet Istmos aquas.* Non longe post illa me tur-
 bant: *Et fas omne facit fratre marita soror.* valde enim licenter *fratre maritam*
 dictum puto pro *fratri*, vel *fratris maritam*, malletque ego, nisi a recepta le-
 ctione hoc nimium abiret, *fratris amica soror.* *amicam* pro conjugae ac concu-
 bina sumi, omnibus notum. Sed & Thais apud Terent. militem *amicum suum*
 vocat, quod non ita crebro invenias. In isto versu: *Depudit profugusque pudor*,
 ea tautologia me offendit, & pro *pudor* melius *rubor*, legi posse, non dubitem.
 Ita Amor. 1. Eleg. 8. utraque vox conjuncta: *Erubuit. Decet alba quidem pudor*
ora. In Epist. Oenones diu me torserunt ista, quae manifeste vitiosa: *Depressa*
est humili cana pruina casa, tentaveramque puto, *Depressa est humilis cana ruina*
casae, ad exemplum illius lib. Amor. 1. Eleg. 8. *Canescant turpi tecta relicta*
fitu. Sed Parrhasium ubi post vidi *defensa* ingeniose substituisse, meam ipse
 conje-

conjecturam tanquam frigidam damnare coepi. Epist. Hypsipyles pro *hoc tamen ipsa*. hoc id est, de hoc, vel hac re. Sed hoc leve. Ibidem pro *devicta serpente* manuscripti non male habent *devicta*, Ita Epist. Deian. *Quaeque redundabat foecundo vulnere serpens*. Epist. Med. *Utque tua serpens victa quiescat ope*. Amor. 2. Eleg. 13. *Pigraque labatur circum donaria serpens* Post: *Do tibi lemos erit, terra ingeniosa colenti*. & ingeniosa minus hic ingeniosum mihi videtur, ac puto poetae manum fuisse invidiosa, uti Epist. proxima: *Moenia finitimis invidiosa locis*, & in Epist. Hermiones, *arma invidiosa*. Tu judicabis. Epist. Didonis ita distinguendum scribendumque credo: *castris militet ille tuis, Aut ego, quae coepi (neque enim dedignor) amare. Materiam &c.* Illo versu: *Usque latet, refugitque tuas obstrusa carinas*, emendaverim vel *obstrueta*, vel *abstrusa*. Sed & pro usque priores editiones utque habent, quod non facile rejiciendum. Mox pro *sceptra sacrata*, libri praeferunt, *sceptraque sacra*. Susplicari lubeat, an poeta scripserit: *Inque loco regnum sceptraque sacra tene*. Paulo post: *Dum freta mitescunt, & amor dum temperat usum*. si divinare liceat, hic legerim: *& amorem temperat usus*, vel potius, *& amor dum temperat usu*. 1. in temporis spatio. Alibi: *Intrat amor mentes usu, dediscitur usu*. 2. de Arte: *Dum novus errat amor, vires sibi colligit usu &c.* Claud. 2. in Rufin. *sensumque mali detraxerat usus*. 1. Amor. 8. *Mox recipe, ut nullum patiendi colligat usum* i.e. habitum vel consuetudinem. Epist. Hermiones, verius ac modestius est quod scripti exhibent, *vacua sedisset in aula*, quemadmodum apud Livium, *compressis manibus sedere*; nam alias repugnante metro *stertuisset* dicendum erat. In Epist. Deianirae post illa, *factis inficianda tuis*. talis distinctio adhibenda, quae moneat, versus sequentis prioribus, cohaerere. Sed illa, quae sequuntur magis vitiosa sunt. *At non ille venis* vix dubium, quin pro *venis*, uti nos conjectamus, *velit* emendandum sit, ac versu subsequente pro *non tanti*, x. libro *non satis*. *At non ille velit*, (nimirum Jupiter) *cui nox, si creditur una Non satis, ut tantus conciperere, fuit* Ne amplius haesitemus, facit carmen praecedens, *Hoc velit Eurystheus, velit hoc germana Tonantis* Versu quoque illo, *Quid nisi notitia est misero quaesita pudori*, manifesta obscuritas ac repugnantia apparet, quam levi mutatione tolli posse existimo, legendumque, *Quid nisi notitia est misero quaesita pudorque*. Notitia, quemadmodum & nobilitas, famosus, ac pudor, ambigua verba sunt, nec raro in deteriorem partem accipiuntur. Versu quoque proximo pro *stupri nota* signantius *turpi* scriberetur. Versu illo, *Omniaque arcana nocte petita movent*, rectius alii cod. *Ominaque* repraesentant, ac fortasse pro *movent* elegantius *monent* legi poterit. *Monere* idem est, quod saepe noster alibi dicit *signa dare*. Virg. *Me patris Anchisae &c.* *Admonet in somnis & turbida terret imago*. in Aeneid. 7. vers. 102. *monitusque silenti Nocte datos*, quos versus respexisse dici posset Ovidius; uti lib. 8. *Carmentis nymphae monita & deus auctor Apollo*. Et *monitus* Deorum ac vatum passim apud poetas & nostrum, de quo videndus Richeletius in Not. ad odas P. Ronsardi. Paulo post: *Teuthrantia turba sorores* de hoc loco videndus Angel. Politian. in Epist. adversus Georg. Merulam. Sequitur inde: *Nec te Moeonia lascivae more puellae Incingi zona dedecuisse pudet*

pudet. longe meo iudicio elegantius ac expeditius sit, si pro *pudet* putas substituat. Nec longe post pro *elisos faucibus scripserim elisis.* Eadem quoque Epistolâ, ut alia praeteream, cum vet. lib. legendum est: *Eurytidosque Iôles atque insani Alcidae Turpia famosus corpora junget Hymen.* Epist. Ariadnes, quam vulgata se satis tueri potest, malim tamen ex membranâ: *Utque erat è somno turbida, rupta coma est.* Ita alibi: *rupi tamen ante capillos.* &c. Epist. Canaces, versus ille, *Quid mihi tunc animi* &c. adumbratus est ex Terent. Act. 5. Sc. 6. *nam quid illi credis animi tum fuisse, ubi vestem vidit illam esse eum indutum pater?* Versu ultimo: *Tu rogo projectae nimium mandata sororis Perfer.* Imo *perfice*; non enim mandata perferenda, sed perficienda cupiebat. Epist. Medae: *Est aliqua ingrato meritum exprobrare voluptas. Hac fruar, haec de te gaudia sola feram.* ita alibi: *Flere licet, flendo certe diffundimus iram.* Nec tempero mihi, quin & Afri fabulatoris verba, uti a me emendata existimo, hîc ascribam, Andr. Act. 4. Sc. 1. *Sed quid agam? adeamne ad eum, & cum eo injuriam hanc expostulem? Ingeram mala multa, atqui aliquis dicat, nihil promoveris multum. Molestus certe ei fuero, atque animo morem gessero.* Eâdem Epist. in vet. legitur: *Nostin? an exciderunt mecum loca? venimus illuc.* Valde bene. Offenderat barbaros vox exciderunt. Patet hoc & alibi & ex Epist. Didonis, ubi similiter male editur: *Nec steterant in te virque paterque meus;* pro eo quod scripti habent *steterunt.* Caeterum corruptissimus ille locus, qui sequitur: *Proditus est genitor: regnum patriamque reliqui: Munus in exilio quodlibet esse, tuli.* Nec vet. libri, qui manus & quod licet habent, litem dirimunt. Ego nullus dubito, quin castissimi scriptoris mens manusque fuerit: *Proditus est genitor: regnum patriamque reliqui Funus: in exilio quidlibet esse tuli.* Ipsa Medea lib. 7. *Metam. prodamne ego regna parentis? Regnum patriamque funus relinquere,* eâdem notione dictum est, quâ Suetonius Augustum dixisse refert, *se Romam, quam lateritiam acceperat, marmoream relinquere.* Ita & Vellejo Varus Quintilius narratur, *provinciam, quam pauper divitem ingressus erat, dives pauperem reliquisse.* Illa autem, *quidlibet esse tuli,* nonne eadem sunt cum illis, quae Didûs Epist. occurrunt? *Dum tua sit Dido, quidlibet esse feret,* & quae in Epist. Oenones: *servo nubere Nympha tuli, i. e. sustinui nec dedignata sum.* Non Apollinis magis verum atque hoc oraculum est. Ibidem non longe a fine nota interrogandi ponenda est isto versu: *Dos ubi sit quaeris?* Epist. Laodam. valde elumbes ac lachrymosi isti versus: *Troadas invideo. quae sic lachrymosa suorum Funera conspicient, nec procul hostis erit. Ipsa suis manibus* &c. Praeterea manifesto in communes regulas impingunt illa *Troadas invideo.* Ego pro *Troadas,* vel *Troadis,* i. e. Troadibus, foeminis Trojanis, vel certe *Troibus* corrigendum credo, totumque locum ita constituendum: *Troadis invideo, quae si lachrymosa suorum Funera conspicient, nec procul hostis erit, Ipsa suis manibus forti nova nupta marito Imponet galeam* &c. Epist. Hypermn. credo legendum, *Exiit insanae pellicis ora bovi. non bovis.* Carmen autem sequens tolerari posse videtur, secus quam magno viro sentire visum, ut dicat; *Quid in senectute ac seriori aetate me futurum est, quae juvenilibus annis tot molestiis premor?* Versus autem

isti praecedentes de Iö, vide, nobiliss. Heinſi, an Amor. 2 Eleg. 2. vel Eleg. 13. vel alibi ſuo loco melius infarciri poſſint. Epist. Sapphûs: *Accedant capiti cornua, Bacchus eris.* Faciem cornutam Baccho tribuunt veteres, vel propter truculentiam ebriorum, vel quod primus omnium boves aratro junxerit. Mihi ſimplicior veriorque ratio viſa, Bacchum cornua ſua nulli magis debere, quam Minois filiae, quam ille à Theſeo prius relictam devirginatamque, optimus deorum ac Vulcano ſimillimus, ſibi conjugio ſociare non erubuit. Ibidem. *Ibimus, ô Nymphae, monſtrataque ſaxa petemus.* Recte in prioribus legebatur: *Ibimus ô Nymphe, caſu ſingulari: praeeſſit enim: Conſtitit ante oculos Naias una meos.* Ita 2 Amor. Eleg. 17. *Nymphe mortalis,* alibi, *Thracia Bacche,* & ſimilia. Paulo poſt, ubi codices variant, diſtinguere libeat: *Ecquid ago? precibus pectusne agreſte movetur, An riget?* Sub fin. *Venus orta mari mare praestat amanti.* Nihilo deterior aliorum lectio: *mare ſternit eunti.* Ire pro navigare frequentiſſimum auctoribus, praefertim poëtis, & huic noſtro. Nec opus loca aſcribere. Atque hic jam deſino, mi Heinſi, reliqua proximâ occaſione per-texturus, ſi haſce primitias tibi gratas fuiſſe animadvertero. Tu in carmine noſtro quae lubet emenda, ac tuum viciffim jam dudum debitum tranſmitte. Scripſi Amisforti xiv. Kal. April. ciciocxlv. Vale, nobiliſſime Heinſi, ac me ama.

Epist. Parid. *Spem facit, hoc recipi me quoque poſſe modo* Levi diſtinctione hic locus adjuvandus videtur in hunc modum: *Spem facit hoc, recipi me quoque poſſe modo.* Verſus ille, *Nam nec triſtis hyems, nec nos huc appulit error,* e Virgilii ſeptimo deſumptus: *Non errore viae, nec tempeſtatibus acti* &c. Pag. ſeq. illa: *Fas vidiffe fuit, fas ſit mihi viſa referre,* duobus circulis includenda ſunt, ne ſenſum ſuſpendant. Ibi autem, *praecordiaque intima ſenſi Attonitus curis intonuiſſe novis;* pro intonuiſſe, vel incaluiſſe, vel intepuiſſe, vel ſimilis vox ſubſtituenda videtur. Non multo poſt vel vulgata retinenda eſt, vel cum ſcriptis legendum: *Da modo te, Paridi quae ſit* &c. Ita mox: *Da modo te facilem.* Terentius Adelph. *Da te hodie mihi, Exporge frontem.* Heaut. *ſed nunc, Clinia, age, da te mihi viciffim.* mox. *Et modo per nutum ſigna tegenda dabam.* Tegenda fortasſe idem eſt quod epist. *proxima ſigna teſta;* vel potius *ſigna legenda* i. e. colligenda vel intelligenda, legendum videtur. Epist, ſeq. pro, *Quis prohibet, raris nomen ineſſe meum,* non male ſcribi poſſet, *quid prohibet?* Sub fin. cum priſcis membranis ſcribendum: *Militia eſt operis altera digna tui,* & ſimiliter 1. Amor. 3. *Proveniant cauſae carmina digna tuae.* notum illud, *magnorum haud unquam indignus arorum.* Epist. Leandri, lectionem manuſcriptorum probo: *Ille meum, dixi, littora numen habent.* Ita Epist. Phyll. *Et quaecunque procul venientia lintea vidi, Protenus illa meos auguror eſſe Deos.* Amor. 2. Eleg. 11. *Primus ego aſpiciam notam de littore puppim, Et dicam, noſtros advehit illa Deos.* Sed iſta magis in morbo cubant. *Quod mihi non eſſet niſi ſic iterare, querebar.* Niſi multum fallor, ita reſtituendum eſt: *Quod mihi non eſſet niſi ſic iter, ante querebar, At nunc per ventos id quoque deeſſe queror.* Et ſi praecedentia videas, ſcrupulum omnem dubitandi depones. Paulo poſt manuſcriptorum fidem ſequor ſcriboque: *Hinc eſt,*

est, exiguum misero contingis amanti. Hinc, i. e. hac de causa, quia coelo digna es. Sub fin. *Desine parte queri.* censeo mutandum in *Desine, parta queri*, Epist. Herus scribo cum vett: *Corripio verbis aequora saepe meis.* Ita Virg. in Georg. *Increpat aestatem feram zephyrosque morantes;* & alibi. Forfan quoque pro *Seducit terras haec brevis unda duas*, legendum *secludit* Epist. Acontii, editur, *Et visa est motâ dicta tulisse comâ* Omnino male. Aliud enim sentit, & aliud dicit. Testem ac subscriptorem sententiae meae habeo Ovidium, cuique noti versus, *Qui mea verba ferunt, vellem tua vela referrent.* Emendandum itaque, *Et visa est motâ signa tulisse comâ*, aut potius *dedisse*. Ita Amor. 3. El. 2. *Annuit, & motu signa secunda dedit.* Paulo post amor & amore majusculis literis scribi velim. Illud, *Sit modo placandae copia parva tui*, typothetis adscribendum esse puto pro *placandi*. Epist. Cydip. *Ante fores sedet haec: quid agamque rogantibus inter.* Scipio Gentilis volebat, *quid agamque rogantibus intus.* mox: *Sicut eram, properans verba imperfecta relinquo.* Rectius meo iudicio foret, si legeremus: *Sicut erant, properans* &c. Sequitur non longe: *Nere mibi creuas in te quoque dicere famam, Facta veneficiis pars putat ista meis.* Imo tuis. *Quam ferus indigna labe perire sinis* Sc. Gentil. *labe librarii meram labem lapsumque putat*, legens *tabe*. Virg. *Et quos durus amor crudeli tabe peredit* Postea emendaverim, *Quam saepe heu tardis feci convitia remis*, non cum vulgatis *ut tardis*. *Ter mibi jam veniens positas Hymenaeus ad aures Fugit.* Turpis error, cui librariorum inscitia ortum dedit, ex occasione versus istius, qui in Epist. Medae supra occurrit: *ut subito nostras Hymen cantatus ad aures Venit.* Sed diversa utrobique ratio. Illic carmen nuptiale, hîc deus ipse nuptiarum intelligitur. Intrepide itaque hîc correxerim: *Ter mibi jam veniens positas Hymenaeus ad aras, Fugit.* Illa quae sequuntur, *Vixque manu pigra toties infusa resurgunt Lumina. Vix moto corripit igne faces*, non capere me ingenue profiteor, nisi posteriora ita leviter immutes: *vir moto corripit igne faces.* Et eam veram esse lectionem, sequentia declarant. Caeterum illa *infusa lumina* nihil minus quam lucernam olere arbitror, dicendum enim fuerat, oleum infusum luminibus, vel quid simile; ut facile appareat, barbarorum commenta esse has posteriores Epistolas. Haec ad Heroidas; caetera suo tempore expectabis.

Lib. 11. de Art. Amand. 353.

Phyllida Demophoon praesens moderatius arsit.

Exarsit velis aurius illa datis.

Penelopen absens solers torquebat Ulysses.

Sensum in postremo versu turbat duorum iste Epithetorum concursus. Si non verius, concinnius certe pro *to solers solam* legere poterimus. Fastor. 1. 549.

Nulla videt quaerens taciti vestigia furti,

Traxerat aversos Cacus in antra ferox.

Nondum prioris conjecturae, *feros vel feras* me poenitet. Praeter ea, quae antea allegavi, ex Varrone aliisque, vix verisimile est, poetas vocem illam *boves* toties repetiisse, licet quidam manuscripti illas habeant. Tum ipse Ovidius ac Virgilius, ubi de hoc ipso furto agit, bis taurorum meminit.

EPISTOLA VI.

ARN. SLICHTENHORSTIUS

*Nic. Heinſio.**Leidam.*

Nesciebam profecto, clarissime Juvenis, te tam felicem in Belgicâ Poëſi, nam carmen istud tuum non solum implevit, sed longe superavit expectationem meam. Plane in Latinis tuis major spiritus ac facundia non elucet, quam in istis. Quia tamen de omnibus judicium meum sollicitas, non dissimulabo, istum versum, *Bemachticht heeft het land met listige practyck*, minus placuisse ob barbarae mixturam vocis, quem facili negotio ita reformari posse existimem, *met listig ongelyck*. Caeterum religio mihi erit, quidquam te inconsulto in illis mutare. In meo carmine nuper transmissio repetitum illud *ingemuit* ex sententia tua ac mea tolli velim, sed ne ter eadem vox, nempe *dolelet & indoluit* occurrat, prius illud distichon ita constitui: *Quisque gemit caecae tristia pila Deae; exemplum illius Ovidiani. Illa gemens patrum crimen, delictaque Martis &c.* Notas meas ad Ovidii Heroidas jam dudum transmissem, nisi iter tuum Dordracenum incidisset. Ut tam libere omnia communicarem, candor tuus impulit, orans obtestansque ne libertas ista mihi fraudi sit, atque censuras tuas, si qua tibi istorum minus placebunt, confestim mihi aperias. Jam mensis est & amplius, cum literas prolixas ac varii argumenti ad *Hoffenrum* nostrum scripsi, tradideramque eas per tabellarium fratri ipsius, qui in scholâ Hieronymiana Trajecti Musis operatur. Caeterum nihil dum haecenus responsi accepi, quod nescio magis mirer an doleam. Amabo te, mi Heinſi, ut ista veteri amico significare velis, ne iterum violatae amicitiae me accuset. Nec defuissem iterum scribere, si priores meas ad eum pervenisse certus forem. Hanc sine me spem ferre tui. Nam crimen istud omni crimine gravius mihi foret. Raptim Amisfordiae propitius Kal. April.

EPISTOLA VII.

ARN. SLICHTENHORSTIUS

*Nic. Heinſio.**Leidam.*

Opido gratae mihi literae tuae fuerunt, nobilissime Heinſi, quibus tam candide conjecturas nostras ad stateram vocas. Magis tamen mirum quod tot inter caeca spicula (manuscriptis quippe omnibus destitutus, nullam praeter parentis tui editionem, si Wecheliam excipias, inspexi) aliquot etiam ad metam pervenerint, ac alibi cum manuscriptis, toties quoque cum ingenio

ac

ac conjecturis tuis, quod fere supra fidem videtur, convenient. Recte autem judicas pro *audit* minus bene a me *claudit* substitutum. Confirmandae sententiae tuae est & alius locus in ipso poëta nostro, nimirum Amor. 3. 11. *Jam mea votiva puppis redimita coronâ Laeta tumescentes aequoris audit aquas.* Epistolâ Hypsipyles, si recte recordor, inter varias lectiones etiam ab interpretibus notatum erat, *devicta serpente*, nec alias vulgarem sollicitassem. Epist. Dejanirae, quod lectio nostra, *At non ille velit*, in manuscriptis tuis patrociniū inveniat, multum gaudeo, mi Heinſi. Nec minus certum est, quod in versu seq. eadem manuscripta repraesentant: *cui nox, si creditur, una Non satis, ut tantus conciperere, fuit.* Ne dubita. Ex Plauti Amphitruone ac Tragicorum fabulis nihil notius, quam Jovem eo ipso tempore, quo cum Alcmene rem habebat, nocte una in amoribus peracta, insequentem etiam diem, cum stupore totius Naturae, in noctem commutasse: quo ita liberius libidini vacare, seque totum fortissimo viro impendere posset. Breviter & argute Seneca de hac ipsa re: *In cujus ortu mundus impendit diem &c.* Redeo ad illum Medae locum: *regnum patriamque reliqui. Munus in exilio quodlibet esse, tuli.* ubi certe quae notas non minus obscura ac intricata videntur, quam quae vulgo legimus: sed quia in manuscriptis quibusdam, invenitur *Et minus exilio*, visus mihi sum leporem tandem excitasse, servatis quantum potest vestigiis istius scripturae legendo: *Et Minyis exul, quidlibet esse tuli*, ut hoc dicat, Et Colchis patriâ e tellure tecum profugiens, Minyisque (unde & Minyae saepius apud poetam pro ipsis Argonautis) ac in Thessaliâ exulans, quidlibet ibi esse sustinui. Quas autem contumelias ibi passa fuerit, paulo post aperit: *Ausus es Aesonidâ, dicere, cede domo*, & quae tam sequuntur, quam praecedunt. In Epistolâ Sapphûs, ut hoc quanquam levidense hîc moneam, legendum ita ac interpungendum puto: *Si tam certus eras hinc ire; modestius isſes, Si modo dixisses, Lesbi puella vale.* Scripti enim pro *ſi mihi*, habent *ſi modo*. Illo Leandri loco, *nisi sic iterare, querebar*, rectum in primis videtur, quod conjeci: *nisi sic iter, ante querebar.* uti non solum Gallicanus codex, sed & subsequens versus satis superque evincunt: *At nunc &c.* Antea querebar, quod mihi non esset iter nisi per fluctus, at nunc quoque queror, illam ipsam viam ventorum ac maris furore mihi ademptam. Adde quod *iterare* pro saepius eandem viam ire rarissime ita simpliciter occurret, plerumque autem cum nomine, ut apud Horat. *Cras ingens iterabimus aequor*: & utcunque haec cessent, comparatio tamen illa, unicum sententiae condimentum, alias perierit. Epist. Herûs lectionem illam, *Corripio verbis aequora saepe meis* à Mycillo in textum receptam ignorabam, quemadmodum & istis locis, *Sicut erant, properans &c.* & *Facta beneficiis pars putat ista tuis.* alias non moniturus. Epistola Cydippes versus iste distinctione tali emendandus: *Quae jurat, mens est: nil conjuravimus illa: Illa fidem dictis &c.* Et ita libri priores, nec aliter citat Grotius in augusto opere de Jure belli & pacis, addens versiculum hunc ex Euripide: *Jurata lingua est, mente juravi nihil.* Sed hîc fortasse typographi peccarunt. Constitueram eadem opera & quae in Amorum libris mihi observata ad te transmittere, sed aliis impeditus

procrastinare cogor. Interim, suavissime Heynsi, ut favente Mercurio Spadanos fontes adeas, ac propitio Apolline quam primum inde expectatus domum redeas, calide precamur. Illustri parenti ac celeberrimo heroi Boxhornio, cujus memoria ac merita nunquam animo meo excident, officiosam meo nomine salutem dicas velim. Scripsi raptim Amisforti XII. Kal. Majas A. C. MDCCXLIV.



VINCENTII FABRICII,

ET

NICOLAI HEINSII

EPISTOLAE

MUTUAE.

EPISTOLA I.

VIN. FABRICIUS

Nic. Heinsio.

VIdi^r epistolam tuam ad Gronovium clarissimum, hesterno die missam, in qua serio utrique nostrum irasceris. Gronovius equidem noster pro facilitate morum tuorum & innocentissima jocandi consuetudine omnia interpretabatur: sed mihi nescio quomodo visus es vero vultu stomachari. Contemni a nobis homines utriusque nostrum amantissimos. Alterum aedes vestras studiose vitare, alterum etiam Urbem. Tota ea lex est, ut puto, horrendi carminis. Sed, hominum optime, si nondum ita noti tibi sumus a candore inculpato, ut audeas etiam impingere scelera, plane parum laborasti cognoscere, quales effemus. Non jam loquar pro *Gronovio*, qui oratore opus non habet: in mea utique causa *Παλινδιδίαν* flagito. Et puto satisfieri tibi posse, si animo non perturbato ad vindicandum accesseris. Sed amotis ambagibus affirmo tibi, mortalium suavissime, ideo me Leidam in itinere non vidisse, quod ob incidens frigus suspicabar commoditatem Hagam commeandi intercipi, quae res valde intricatura fuerat totam itineris rationem. Denique putabam singulis diebus contingere mihi posse, ut Leidam excurrerem, & summum votorum meorum fructum ex honorifica consuetudine vestra caperem. Quod quam sincere dicam, agnosces in posterum, si me culpam emendare permiseris. Dabo enim operam, ne si illic aliquis iracundiae tuae fomes est, vel exiguus cam quidem ob causam scrupulus in animo tuo relinquatur. Paucis dicam, veniam facpius, & efficiam ut jam irasceris irae tuae. Literas summi parentis tui, & Cl. Zuerii, impatienter desidero. Scripsi idcirco Ultrajectum, & puto me eum fasciculum propediem habiturum. Schertlingius noster serius heri huc venit. Itaque non miraberis, quod in hesternis Gronovii literis nulla de tua epistola men-

^r Hanc epistolam non reperies inter editas a nobis, sed vid. Gronov. LXVII. & LXVIII.

mentio. Quae pro incolumitate nostra vota suscepisti, praesente Schertlingio, solemni poculo repetivimus, & ea pro vobis precati sumus, quae pro maximis, & amicissimis mortalibus precari jus fasque est. Felicissime vale φίλων κάρα, & incomparabili Parenti me commenda. Hagae 23. Januarii. 1639.

EPISTOLA II.

NIC. HEINSIUS

*Vin. Fabricio.**Hagam.*

Contubernium, quod ex tuis primum intellexi, cum *Gronovio* nostro tuum gratulor tibi, mi Fabrici. Et quid ni institutum vestrum probem. In votis id mihi semper fuit, ut, quoniam coram non daretur, quam proxime saltem adesses nobis. Singulis nunc septimanis, aut videbitis vos me, aut ego vos: ut & sic felicitatem meam agnoscam. Parentis & *Boxhornii* literas, si nondum accepisti, periisse tibi non est quod dubites. Haesuras hospitio vestro putaveram. Scripsit hesterno die ad me *Cabeljavius Hagmeierum* eas abstulisse secum. Injecta illarum forte mentio apud illum cum esset, nullas accepisse visus est. Quicquid id rei sit, a te expecto. Poëmata tua ad Bodecherum missa nondum sunt, quia non fuit haecenus, qui curaret. Indignatio mea tam justa cur offenderit te, ignoro. Concoxisse illam poteras, sed, ut puto, hesternam illam comessatiuncula stomachum tibi nonnihil debilitarat. Id tamen vitii agnovisse in me videris, quo jure non scio, id scio a mensibus jam aliquot nullum Rhenanum, nulla mihi ostrea gustata. Hoc aut non memineras, aut profecto, cum Horatiano Maevio, tibi ignoveras. In me saltem non erat cur saevires. Condimenta & deliciae nostrae parcius si admissae sunt, non miror. Hoc erat cur paucis istis periodis tam inclementer responderes. Hoc erat cur in tuis crebro occurreret, stomachari, irasci, scelera impingere me vobis, animum praeferre perturbatum. His superius jam respondi, audi nunc rem ipsam. *Gronovius* Leidae fuit, Leidam tu praetergressus es. Neuter hoc negabit. Vacavit ille popularibus suis, id probo. mihi non vacavit. Alloquium saltem, si nihil aliud, ejus merebar. Unum tantum diem Leidae se fuisse respondebit. Atqui Hagae sic soleo, primus tamen fuit semper, quem salutarem. Simile commissum nunquam mihi impinget. Nunc ad te venio. Frigus immensum & subitam glaciei caufaris ingluviem. Aut imponere voluisti mihi, ut puto, aut ingenium tuum exercere. Dic sodes: ignorabas adhuc iter hoc curribus hyberno tempore confici? Vellem itaque aliam practexuisses excusationem, ea quin injusta sit, ne tu quidem negabis. At vero, haerendum Leidae fuisset tibi, ea mora propositum in Gallias iter tuum perturbasset. Vides eam ingeniosam potius esse, quam veram. Nunc videamus an sola ea indignationis

meae

I Vid. Gronov. Epist. LXVII.

mae fuerit causa. Cum Hamburgo ante annos fere duos Coloniam cogitares nec me, qui Dordaci tunc haerebam, nec *Gronovium* convenisti. Postero tamen inde die revertebar. Hagae ille tum morabatur, nec probavit consilium tuum. *Vossius* septimanam aut alteram dabas, nobis ne diem quidem. Multa exinde prece Ultrajecto vix tandem evocatus, per diem aut alterum divertisti apud nos. Haga Leidam reversus hospitium mutasti, qua, quaeso, ratione alia, quam quod aut illud, aut hospes tibi non probaretur: postremo cum *Schertlingius* noster publice disputaret hîc, eadem meridie Hagam tibi eundum esse apud *Boxhornium* & parentem meum praeferebas. Hoc quam falsum fuerit non ignorant illi, qui viderunt, Paulatim adnantes terrae & vix tuta tenentem. Praetermitto nunc quam saepe a parente in prandium aut caenam vocatus, abijtum causatus sis, amicis exinde tuis dies aliquot cum dares. Domi nostrae canis es ad Nilum (ignosce vero comparationi satis incompressitae) semper fugis, apud amicos tuos summus procrastinator. Stultus, hoc si non videam. Vide nunc an justa sit indignatio mea. Talem fuisse deprehendes, si & ipsam causam & candorem meum diligenter pensitaris. Fac interim brevi te videamus. vale.

III. Id. Febr. ciciocxxxix.

EPISTOLA III.

VIN C. FABRICIUS

Nic. Heinsio.

Leidam.

Nobilissime Heinsi, cum nuper καὶ δαίμονα Parentem tuum, virum incomparabilem hîc vidissem, & te quoque una venisse crederem, non potest dici, quam aegre tulerim hac spe decidisse. At tu fortassis me ulcisceris, cuius peccatâ nuper disertissima epistola castigasti: homo nempe atrox, & ἡ μικρὴς προφάσεως δεόμενος ἐς τὸ ὀργίζεσθαι. Sed audi me ὡς τρισμενίστη Εἰσιδάδο κλυτὸν αἶμα, & ne saevi tantopere. Plus satis erat objurgasse, & pro parvulo peccato unum supplicium amico sufficebat: ne tu verbis facta conjungeres. In mea epistola, quam postremo ad te misi, nescio quid fuerit, cui tu tanta severitate obviam eundum putares. Putabam mihi profuturam illam ad placandum animum tuum, qui succensebas nuper mihi, quod Hagam recta potius, quam per ambages ivissem. At an non tanti erat Heinsius, cujus causa paululum deflecteres? Utique tanti erat, ut ad congressum ipsius per Garamantas & Indos pergerem, si tam facile laedi potuisses praesenssem. At ineptam causam comminiscebaris de glacie, de sarcinis, ἔδεν ὕγιες. Video eum locum epistolae meae cum legeris, mortalium suavissime, iram obstitisse tibi praec oculis. An insipidus adeo essem, ut Gallicum iter nostrum hac digressinuncula interrumpi dicere tibi auderem. Imo hoc volui: commodius sarcinulas nostras, quibus varias ob causas adhaerere cogebarur, Harlema Hagam vectas esse, & rectius uno itinere. Cum enim putarem futurum, ut scaphae fri-

gore attinerentur, facile videbam, quam molestum futurum esset, bis cum auribus conflictari, & reculas nostras toties agi ferrique. Vos autem alias videre licebat tam vicinos, ut manu pene contingere liceat. An tibi jam satis rectum videtur, quod tam superbe proxime elevabas? Nimium velim vidisse vul-tum tuum, cum stomachabundus ad concilium vocabas, quot modis adversus te deliquissem, διαβληθεὶς μὲν, ἐκ ἐλεγχθεὶς δέ. Idque ut iracundius acerbiusque facias, quae ante biennium facta sunt, novis peccatis adiicis. Sed audi me; veriora ipse tibi dicam. Cum Coloniam pergerem, id sedulo operam dedi, ut tuto irem. Scis autem varie itinera circa illam urbem infestari. Praecesserat Legatus Regis Daniae, qui eodem tendebat, ut Pacificationis negotium una auspicaretur, quod adhuc nescio quo Deo iniquo trahitur, ac differtur. Cum eo ire si vellemus, non nisi sex dies in Hollandia ponendi erant. Id ipse mihi legatus Groningae praedixerat. Non totum triduum Amstelodami fui, interea dum comes meus urbem lustrabat, & supellex nostra Colonienſi navi imponeretur. Et quaeso te, quis iste fuit subleſta lingua, qui apud te argutatus est, duas me ibi hebdomadas trivisse. Pendere lingua sua debebat, qui tum impudenter verum non dixit. *Vossios* (ipſorum fidem testor) bis tantum vidi. Leidae biduum fui: quod *Gronovium* ibi exspectarem. Sed ille ne veniret, incuria *Fr. Vossii* fuit; qui serius, ac fas erat, adventum meum ipſi indicaverat. Nunc ex te rogo an tam intricato & tempore & rebus meis tibi, Dordraci advenienti, praestolari debuerim. Maxime, cum summus parens tuus de adventu tuo nihil certi haberet dicere. Et meminit is procul dubio, quae tunc ipſi de Legato Danico dixi. Quamvis autem viam corripuerim, Legatum nisi *Vesaliae* adsecuti non sumus. Puto hoc satis jam purgatum tibi esse, quod jam olim oblitum oportuit. Sed tu pergis. Vix biduum in domo vestra haerere volui, hospitium mutavi, denique atrocita multa. Si mitigari potes, dulcissime hominum, recognosce illud tempus, & videbis solidos dies quatuor me vobis molestum fuisse: ita discessisse, quasi iturus *Ultrajectum*: propter comitem meum mutandum consilium fuisse: proximo post reditum die abiisse: denique unam me noctem obtestanti & se sperni clamitanti civi meo negare non potuisse. Haec tu omnia agnoscis esse verissima & tamen irasceris. Apud parentem tuum unquam abitum simulasse, nec discessisse tamen non memini, & sane nego factum. Eo die, quo *Schertlingius* disputabat, omnino discessurus fueram, licet plusculum appotus circa vesperam. Sed commessantium tunc solenni more comitas me attinuit. Vinolentiam eorum cum tamen fugerem, & idcirco clanculum aedibus egrederer, scis quid contigerit.

O scribe, scribe laudo fortunas tuas.

Quae semper servas gloriam aritudinis.

Sed ego tibi idoneus sum visus, quem non videres tantum (id merebar sane) verum cujus calamitatem in crimen vocares etiam, ἐπικρίτως αἰθόμενος ἀγναπτὸν νόον. Scio te amare adeo Fabricium tuum, ut nolis ipsum ad eum modum iterum mentiri. De vita enim periclitabar, ille tuus tibi tam dilectus. τὸ μὴ μαθεῖν σοὶ κρείσσον, ἢ μάθῃν πάλιν. Arbitror te jam placatum esse: Et malle sane non

accu-

accusasse, quam tam prolixam apologiam legere. Postremo, ne te diutius detineam, omnia erunt, nobis liquida primo congressu, quem si tu differs, ego occupabo. Vale felicissime, mea animula, meum mel. Percam, si quicquam te mihi possit esse jucundius, etiamsi millies irascaris. A. CXCXCXXXIX. III. Kal. Februarii.

Jam scripseram ista, cum fasciculus tuus mihi circa vesperam allatus est. Scin autem? nunc ego irascor tibi, qui epistolam tuam combussisti, quam ego tantopere desiderabam. Si peccassem enormiter, quod non puto, tu te summi jam criminis reum fecisti. Scis quam aegre tuis caream, Vale mellitissime Heinfi, & scito me quamvis irato nihil tui esse amantius.

Tu mihi succense, sic ut cogaris amare:

Hoc pretio nondum paenitet esse reum.

EPISTOLA IV.

VIN C. FABRICIUS

Nic. Heinsio.

Leidam.

Non erat fortassis officii mei, nobilissime Heinfi, tacere tam diu: sed nec verecundiae meae fuit otium tuum inanibus literulis, praesertim cum occurrisset nihil, quod scire magnopere velles, interpellare. Adde quod Dionysia hîc fuerunt, liberales feriae, & quae te quoque haud dubie aliquo rore adsperserunt inter sodales & amicos suaviter luxuriantem. Heros maximus de *Thienhooven* dies aliquot decubuit, ut jam timere nonnihil pro ipso inciperent domestici. Heri ad ipsum visimus *Gronovius* & ego; etsi videbatur aliquot molestiis morbi jam levatus. Itaque spero propediem ad pristina munia reversurum. Una ab ipso edentur, quae amici contulerunt ad exequias unice chari Henrici. Expectatio Epigrammatis, quod incomparabilis parens tuus promisit, sola videtur editionem morari: itaque illud avidissime expectat. Verum heus! nunquid vidisti prolixum Epos *Boyi*? Quale tibi visum est id mercimonium? Et tamen ille, ne erres, totam illam farraginem quinque horis effudit. Circa meridiem, cum in Aula obambularemus, indicabat ipsi *Gronovius* summo opere placitum Heroi *Thienhovio* si & ipse symbolam conferret. Postridic vix orto sole accurrit suffarcinatus mole carminis. Miserum, qui tanto molimine vix paucos malos versus facio! Porro, meministi tu me aliquando sive ebrium, sive sobrium coram te effutivisse, collatum esse a me totum Aeschylum, & Ammianum Marcellinum cum MS. Colonienfibus? Ego vero & nego factum, & nego dictum. Et tamen nuper aliquis amicus nescio quid tale ex te audivisse, mihi persuadere conatus. Puto me aliquando dixisse tibi, visum a me Ammianum Marcell. a *Lindenbrogio* multis locis, post primam editionem, meliorem factum: quibus conatibus jam viam interceperit editio Parisiensis nupera. An is sermo meus, vel te, vel amicum in errorem induxerit, arbitrari nequeo.

Eeeee 2

Scd

Sed istae sunt merae quisquiliae, nec quae morari te debuerant. Salve & a Gronovio nostro. Vale felicissime. Hagae Comitum. 12. Martii. 1639.

EPISTOLA V.

VINCENTIUS FABRICIUS

Nic. Heinsio.

Leidam.

PUto te jam rescivisse ex *Schertlingio* nostro, quam acerbè luerim inconsultam illam festinationem meam. Non dubito, quin id supplicii satis sit tibi. Quanquam excusatio insit; quod quoniam comiti meo annexus sum; non semper meo remigio agor. Te nihilominus & totam domum vestram constanter mihi favere dubitare ipse nequivi, & *Gronovius* insuper in Anglia confirmavit, cum ego aliquid offensae contractum esse properatione nimia crederem. Nicolae mellitissime, corculum meum, utinam introspicere animi mei intima posses. Agnosceres impressa illic vestrorum beneficiorum vestigia, quae deleri nulla temporum diuturnitate potuerunt. Fateor inter caetera vitia mea esse simplicitatem nimiam, qua interdum labor. Sed quoniam propius candorem id peccatum est, facilius me mihi excuso, tibi quoque, qui patricias artes pro ingenuitate tua aut addiscere noluisti, aut iis, adversus amicos saltem, non uti. Dicam paucis, unus tu mihi es omnium, a quo sine fūco amari me intelligo, quemque effusissime amare occulto quodam instinctu cogor. Iter ex Anglia hucusque feliciter evenit. De Gallia, ut verum tibi fatear, multa mentitur fama. Pene omnia expectatione mea inferiora fuerunt. Nihil sordidius incolis, nihil oppidis abiectius, aut magis desolatum. Lutetia aliquo pacto expectationi par est. Sed si bibliothecas & eruditos viros excipias, nihil hūc quoque valde memorabile. Eruditorum exquisita est humanitas, ut fingi amabilius nihil possit. Quanta ubique veneratio parentis tui, quantus sit tam illustri nominis cultus, narrare tibi opus non est, quem hoc ignorare consensus totius orbis non fuit. Meministi te rogasse me, si qua re juvari Ovidii tui editio posset, ut omnia studiose conquirerem. Ut sentias non defuisse me tibi, ecce excerptas collationes ex Codice manuscripto vetustissimo. Contulit & annotavit ista manu sua *Christoforus Puteanus* Senator Regis. Filii ipsius, viri optimi & eruditissimi, facile passi sunt collationes illas tibi impetrari. Epistolae tantum sunt & pauca alia: liber enim mutilus est. Non fuit ad manus Ovidius, itaque conferre non licuit. Non dubitant tamen *Puteani*, quin ibi multa futura sint bonae frugis. Ante octiduum cum apud amplissimum Senatorem *Claudium Sarravium*, virum optimum, & amantissimum studiorum fabularer, advenit eo *Franciscus Pithoeus*, itidem Senator Parisiensis, *Petri & Francisci Pithoeorum*, nepos. Is inter caeteros sermones, ut fit, ostendit mihi locum Ovidii a se felicissime emendatum. Is est in fine libri. x. Met ubi de flore Anemone.

Namque male haerentem, & nimia levitate caducum,

Ex-

mores absolverent. Mei: nulla enim in re te laesisse certus eram, immo potius ubique praedicasse, nihil mihi in omni vita obtigisse, quo laetarer magis, quodque mihi gloriosius esse ducerem, quam domus vestrae amorem mihi conciliavisse, eique me illustria & incomparabilia beneficia debere professus sum. Hanc gloriam meam ut volens aliqua offensa corrumpere mihi voluerim nec par est, nec ulli fiet credibile. Sin vero ignorans aliqua in re offendissem (quamvis diu inquirens nihil repererim) ea te ingenuitate animi praeditum sciebam, ut condonare didicisses aliqua errata humanae imbecillitati; nemo enim sine labe notaque vivit. Saltem id sciebam aequitatem ipsam a te exigere; tuaeque esse indolis non condemnare inauditum, indefensum. Atque hoc est, quod de moribus tuis proposui. Quorum perspectus mihi candor etiam id, quod secundo loco jeci, mihi eripuit. Ut enim fortasse essent, qui nos vellent distractos, non te tamen ita mobilem sciebam, adeoque injustum, ut coram te accusatum esse, id tibi sufficeret. Restat itaque postremum, ut me merito meo, nulla re magnopere commendandum, tuoque affectu indignum, amari desissem arbitrarer. Haec cogitatio me eo vehementius afflixit, quo justiore ejus esse rationem videbam. Quid enim? An magnopere quisquam mirabitur negligi ab Heinsio eum, qui quod tam intime amari potuerit, merito omnibus stupendum videbitur. Nuditatem meam norunt mecum alii, quamque parum idonee honesta studia tractem (qua vobis laude conciliari oportet) jam olim fuit cognitum. Qui itaque viderunt me ad tantum favorem provectum, cum omnia perquisivissent, nihil in me te dignum repererunt, nisi fortassis simplicissimam & sine fuco, aut affectatione animi probitatem, innocentissimum ac fallere nescium candorem. His artibus si tibi conciliatus sum (neque sane alias habebam) vide ne atrocem inculpatissimis moribus tuis injuriam facias, si me ab illustri parente tuo primo tanto affectu quasi in sinum receptum, a te tanto opere amatum, tot benemeritis ornatum excultumque subito deprimas, antequam illam probitatem, illumque candorem meum mihi abesse probaveris. Quaecum in me amaveris haecenus potius quam me, nulla re amabilem, vide ne mutata sententia virtutes illas damnasse videaris. Denique, interest existimationis tuae tanto affectu inter nos cultam amicitiam subito non abrumpere: cum nemo bonus unquam fastidire amicum coeperit, nisi id ille meruisset. Quod postremum si in me cadit, saltem titulum inscriptionemque mei criminis scire debui, ut ad formulam accedens statuendum haberem, litine cedere, an contendere deberem. Non amari me cum id non merear, aegerrime quidem, sed tamen utcunque fero. Excidere autem amantibus indignissime fero, si, ut dixi, inaudito, & indefenso id contingat. Vides quam prolixum me fecerit sollicitudo mea: qua nulla mihi molestior unquam accidit. Scire inde debes, quam mihi cordi sit amicitia tua, quam maximi thesauri instar habui. Et fortassis supervacuum tot verba fundere, cum amabilissimi mores tui non permittunt tibi aliquam in me crudelitatem. Sed quoniam nimis inquietum me habuit ille amantium suspicax timor, tandem illo me exonerare volui. In hac urbe tota fortassis hyeme morabor. O si tu hinc esses, quot deliciis circumflueres. Sed ea potius mea felicitas

citas foret, quam tua, qui domi plura habes quam hîc invenias. Incomparabili parenti tuo & Cl. Zuerio me officiosissime commenda. Vale, juventutis nostrae delitiae, mellitissime Heinsi. Tuas anxie exspecto. Lutetiae Parisiorum. Prid. Kal. Januar. A. MDCCXLI. Dies sunt duodecim, quod Gronovius ex hac urbe Andegavum discessit.

EPISTOLA VII.

VINC. FABRICIUS

Nic. Heinsio.

Laidam.

Discesseram jam Lutetia, optime mortalium, cum tuae literae eo allatae sunt. Ceperamus quidem consilium hibernandi in ea Urbe, sed id nobis eripuerunt rationes comitis mei, quem diu haerere in Urbe deliciarum omnium lena, e re non erat. Morati itaque aliquantulum sumus Aureliae, sed cum & ibi sodalitates parum gratae obtigissent, ad Bituriges nostros regressi sumus. Expertus fueram nusquam quietius aut innocentius vitam degi: quanquam non sine maerore summo a summis humanissimisque viris, qui Lutetiae sunt, divellerer. Sed alligatus sum saxo, quod cum volvo, ipse ut distrahar, voluterque necesse est. Poteras tu quidem sine incommodo tuo carere hac rerum mearum historia: sed ratio reddenda fuit, cur serius literis aureis vere, & merum amorem spirantibus respondeam. Petreus enim & Elzevirius non scire potuerunt ubi locorum essem, quod id ipsis indicare noluerim, antequam certam denuo sedem delegissem. De qua tandem certiores facti, tuas extemplo transmiserunt. Habes & causas morae, & rationes, quae efficiunt, ut de Lutetianis & hominibus & rebus nihil scribere possim. Quae ad *Iustellum* pertinebant ea jam & dixisse & effecisse Gronovium memini quasi per transennam. Carmina *Rutgersii* & tua apud Ἰππῶν *Grotium* vidi: qui ea describi curaverat. Et ante hebdomadas tres *Sarravius* Aureliam mihi scripsit, excerpta Ovidiana esse reddita *Puteanis*. Controversias tam acerbis in Academia vestra excitari, ita vivam, ex animo doleo. Eoque magis, quod multum publicis commodis decedere arbitror, dum viri summi digladiantur. Nosti illud: *Heu quantum terrae potuit pelagique parari*, & quae sequuntur. Deum summum obtestor, si vita mea redimi posset concordia inter incomparabilem Parentem tuum, & *Salmasium*, me eam libenter profusurum. Satiram tuam videre valde cupio: quanquam nullum utrinque telum expediri possit, quod non mihi quoque ingenti plaga pectus vulneret, & intimo doloris sensu animum exulceret. Non quidem illo in praelio ullae meae nisi spectandi partes sunt. Ita tamen spectator adsto, ut ad singulos ictus concutiar, & quo major fortitudo utriusque videri, & quibusdam oblectamento esse possit, eo vehementius utrumque aequis manibus, factaque pace ex arena discedere cupiam. Sed omittamus tam tristia, quibus fortasse tempus medebitur. Clarissimum *Boxhornium* tandem amoenitates suas,

Vene-

Veneresque omnes, quibus mille puellarum animos excantaverat, unum in locum contulisse gaudeo & gratulor. Ex animo ipsi felicem & concordem torum opto, & in quo delitiarum conjugalium summa consistit, vegetum ac expeditum ἢ ἔ ἄσκη πρέχοντα πόδα. Notum illud Xenarchi apud Athenaeum.

Φθίνει δέμῳ ἄστυοισι δεσποτῶν κεχρημένῳ

Τύχαις.

De *Bodecheri* reditu, & ingenio, de *Thysii* Professione nescio quid ad me scribitur. Cupio ex te scire quid ejus rei sit. *Dii meliora piis, erroremque hostibus illum.* Oro atque obtestor te, mellitissime *Heinsi*, serva illum animum, illum affectum mihi, quem tot experimentis cognitum habeo, & quem postrema epistola tam luculenter ostendis. Non eo pertinebant querelae meae, quasi diffiderem tibi, sed quod mihi. Sciebam te non deferere mores tuos, sed ego potueram te offendisse meis. Quae suspicio quoniam falsa fuit, pene mihi jam exosa est, & irascor ipsemet mihi, quod tam sinistre non tam de te, quam de me senferim. Unum hoc in ea re video, quod me oblectet, quia intempestiva licet querela incomparabilem a te epistolam elicuit. Incomparabili & illustri parenti tuo me ut commendes, oro. Vale felicissime. Avarici Biturigum. x. Kal. Martias. Anno cīōcxl.

EPISTOLA VIII.

VINC. FABRICIUS

Nic. Heinsio.

Loidam.

CUM ex Gallia in patriam tenderem itineris mei rationes non permiserunt mihi, quanquam id cuperem unice, ut pertransirem Belgium, usuramque summae voluptatis, quamvis fugitivo amplexu rapcrem. Jam praeceperam mecum animo fabulas, sermones nostros, quam multa tu mihi de rebus vestris, quantum ego tibi de Gallicis: praeterea gustum Poëmatum tuorum, quae sub praelo fervere augurabar; denique infinitas delicias meditabar, cum his omnibus frustratum me sensi, quod nullae naves Belgicae in portu reperiebantur. Impositus itaque in aliquam nostratem, quam fortuito ibi offenderam, quatuor diebus, nec integris, ex portu Gratiae in patriam delatus sum, non sine gemitu ac lacrimis ex alto littus vestrum prospiciens, nec sine indignatione, quod nimis festinanter illius adspectus mihi eriperetur. Ex eo tempore multis intricatus districtusque hinc inde negotiis, scribendi ad te nec animum nec otium habere potui. Ne nunc quidem defunctus taediosissimis occupationibus, quibus pro moribus gentis hîc implicantur, qui peregre redeunt, quod tamen ulterius differre scribendi officium nisi flagitiose non possem, itineris mei rationem reddere qualemcumque tibi volui, uberius id diligentiusque facturus, ubi ex illis, quae nunc me sollicitant, emerfero. Interea per Deum testor, constantissimo me affectu cultuque venerari virtutes indolemque tuam, sanctissimamque

que esse apud me beneficiorum incomparabilis parentis tui memoriam, cujus in me animum, favoremque quamvis erga immerentem ut tu mihi conserves alasque, summae illius tuae benevolentiae erit, cujus immortalia jam in amicitia nostra vestigia pressisti. Poëmata tua, si prodire, avide expecto, cum epistola, quales omnes tuae sunt, amantissima, & in qua Heinsum meum, tanquam in elegantissima imagine recognoscam. Amicis omnibus quaeso me commenda, inprimis CLL. VV. *Scrivario* & *Boxhornio*. Felicissime vale. Dabam Hamburgi. vi. Kal. Febr. cldccxli.

EPISTOLA IX.

VIN C. FABRICIUS

Nic. Heinso.

Leidam.

Nisi naturae tuae benignitatem nossem, crederem te negligentiae meae, quam nuper tam sollicitè tibi excusabam, poenam exigere, dum nihil respondes. Tu vero mihi mansuetudinem tuam toties probasti, ut alia omnia potius, quam vindictam tuam pertimescam. Neque sane, si te offensum existimarem, denuo te adirem, antequam deferbuisses, quod celeres exitus iracundia tua habere consueverit. Ut autem tibi fidem faciam, nihil me hujusmodi de te in animum induxisse meum, ecce, pro cumulo confidentiae, nuptiis meis Epithalamium posco: ne impune feras tam prolixum silentium. Poscit hoc mecum venustula mea, quam ob mores potius & ingenii dotes mihi sponsam delegi, quam ob ea, quae alii appetunt, non tam ut utantur, quam ut possideant. Dabis puto veniam mihi, si dixero primum in animo meo locum, quem tibi hactenus religiosissime consecraveram, totum amicae meae cecidisse; te nunc in secundo consistere. Sed nihil hîc peribit tibi. Duos nunc habebis cultores virtutum tuarum, quas cum ego intelligere me putem, facile in admirationem earum pertraham virginem mihi obsequentissimam. Si nosces indolem, non paeniteret te horulae tribus quatuorve versiculis destinandae. Intra hebdomades quatuor nuptiae fient. Exiguum spatium, sed votis meis nimium, & quod Epigrammati scribendo sufficiat. Non enim sum tam inverecondus, ut Elegiam petam in tam sterili materia. Quicquid erit quod mittes, quaeso ut statim mittas. Dies enim nuptiis dictus est xv May juxta Calendarium Gregorianum. Agnoscis honestam ambitionem hominis delicati, qui diem solemnem non vult, nisi optimis carminibus insigniri. Illustrem virum parentem tuum sollicitarem, si essem paullo audacior. Sed impediior reverentia tanti nominis, neque ausim quicquam decerpere publicis commodis. Hoc unice peto, ut versus saltem duos a CLL. VV. *Scrivario* & *Zuerio* mihi impetres. Nullum mihi pignus erit certius perpetuae eorum in me benevolentiae. In omnibus istis ostende te esse Heinsum, i. e. mei amantissimum, quod ob signatis tabulis, si tu negas, faciam manifestum omnibus. Experiar hac in re quantum

Tom. III.

Fffff

mori-

moribus tuis indulseris, quantum denique amicitiae nostrae dederis. Inimicorum enim susurros nihili te facere compertum habeo, quicquid blaterent sycophantae. Parenti incomparabili caeterisque omnibus officiose me commendo. Felicissime vale. 20. Aprilis. 1641. Civi meo, qui has tibi offeret, recte trades quicquid mittetur. Sed festinato opus est.

EPISTOLA. X.

VIN C. FABRICIUS

Nic. Heinſio.

Molmiam.

Veni Hamburgum circa Idus May, poſtridie, quam tu illinc diſceſſeras, parique fato, quo, ut meminſſe potes, ante Sexennium tuus Gedano diſceſſus meum a Thorunienſi itinere ſeu ablegatione reditum die uno antevertit. Detectatus pene ſum illud triduum, quod Lubecae exegeram iners, & neſcio quibus amicorum atque affinium ineptiis obſecundans. Si enim feſtinaviſſem, copia fuiſſet ſaltem per biduum fruendi amico tanto, & jucundum illud os oculosque diſſuaviandi. Perſpexi poſtea ex tuis literis ad praeclariffimum Langermannum (per meſes enim fere duos illic haeſi, quaedam domeſtica extricans) tibi aeque dividiae fuiſſe hunc caſum ac mihi. Decreveram Hamburgo ad te ſcribere, idque fueram pollicitus Langermanno noſtro, ſed varie diſtractus, tum vero convivium pene quotidiana obeundo, ſenſi praeter ſpem mihi effluxiſſe tempus, quod ei ſcriptioni deſtinaveram. Ne enim neſcias, pene me obruerunt, ne dicam occiderunt, conviviali illa benignitate veteres amici. Sane tantum vini bibi hebdomadibus ſeptem, quantum alias toto biennio bibere non ſoleo, homo, ut noſti, non abſtemius. Sed vel Genius dulciſſimae patriae, quam poſt annos octodecim reviſebam, vel eadem illa amicorum obvia hilarisque benignitas effecit, ut nullum inde valetudinis incommodum poſtea ſenſerim. In praedones incidi, cum deinde Hamburgo Lubecam reverterer, qui mihi abſtulerunt Joachimicos pene ducentos; praecipua, quae habebam, quod feſtinarent, ſalva reliquerunt, neque praeterea vis ulla, aut injuria illata eſt. Erat is annus aetatis meae climactericus ſeptimus, quem periculolum Aſtrologorum filii autumant. Et fortassis non minus periculi eſt in praedones, quam in morbum incidere. Perveniffe de illo meo caſu famam in Sueciam ex tuis literis ad *Pelſum* intellexi, quas hodie ad me miſit, teque illi, vero affectu, indoluiſſe. Subito itaque arripui calamum, ut quam jucunda mihi fuerit ſignificatio veteris ſincerique amoris, ſtatim tibi oſtenderem, & ſimul gratias agerem pro donato Ovidio, eruditionis, ingenii, atque induſtriae tuae immortalis monumento, quod ad me & *Pafſorium* recte curarunt *Elzevirii*. Utinam mihi detur copia veris rerum testimoniis demonſtrandi, quantum te amem, quantumque tibi debeam. Salve ac vale feliciter. Gedani. die. 21. Decemb. 1661.

EPI-

EPISTOLA XI.
NIC. HEINSIUS*Vinc. Fabricio**Gedanum.*

Cum ex literis Lucae Langermanni V. Cl. non ita nuper intelligebam, Hamburgum te advenisse paulo post meam ex illa civitate profectionem, indignatus sum, non lentius aliquanto me festinasse, quanquam mandata publica urgebant supremam suscepto itineri manum mature imponi. Nusquam alias sic me fefellit cortina Phoebi, Vir Eximie. Nam si vel tantilla spes congressus tui affulisset, omne ingenium advocassem ad causas cunctationis exco-gitandas, quas apud Proceres nostros praetexerem. Caeterum quemadmodum invitus intellexi conspectu hominis amicissimi me fraudatum esse, ita non minus moleste atque indigne tuli nuncium, qui in latrones te incidisse postea ad tuos contendentem, ac sarcinis exutum esse, subindicabat. Gaudeo tamen & salvum te evasisse tam truculentas manus, & sarcinas tantum fuisse delibatas a properantibus, cum nihil ex iis tibi relictum rumor asseverasset. Male sit ducentis istis Joachimicis, per quos poësi tuae inter latrones locus non fuit. Poteras enim coram illis cantasse, si fuisses vacuus; sed ut in re seria joculari desinam, mihi quoque non minimum ab istis male feriatis furciferis in via periculum fuit, quos tamen feliciter evasi, cum Illustr: *Tottius* Orator a Suecis ad Regem Christianissimum destinatus, quem in Dania habebam obvium, fortunam minus propitiam sit expertus. In tuto jam collocatus ad Scandenaviam emensus, relicta post tergum Helmaestadio civitate, veteri patronae, Christi-nae Heroidi, nec opimus in ipsa via occurri, quae perquam benigniter me excepit: voluitque ut ad quintum usque miliare mea relegerem vestigia ac sese comitarer. Obsecutus sum imperio, unumque ac alterum cum illa Helmae-stadii diem commoratus reliquum itineris perfeci: hoc nomine plurimum ga-visus, quod sub meum in hanc civitatem adventum cognovi Procerum Suecorum consilia Pacem unice spectare. Eo in proposito si persistunt constanter, mo-ram duiturniorem mihi hîc terrarum fore trahendam praevideo, si quid inte-rim aut privatis rebus tuis, aut vestrae civitatis publicis, cui arctissimo hospi-talitatis vinculo devinctum me esse semper profitebor, potest consuli, studia mea experiamini rogo, & animum commodis vestris unice faventem. Naso-nem meum tibi redditum esse laetor, ut qui maxime. Tumultuariæ istae lucu-brationes sunt, & nova hac peregrinatione interruptae, quas per otium fortas-sis elimabo ac detexam. Ad te tamen mittendas duxi, pro tessera luculentæ benevolentiae & fiducia, quam in tuo affectu maximam a me collocari ag-nosceres. Vale, Vir Amplissime, & me quod facis hætenus amare perge.

Holmiae Suecorum Anno cicioclxii. a. d. xxi. Januarii.

EPISTOLA XII.

NIC. HEINSIUS

*Vinc. Fabricio.**Gedanum.*

Cum *Christianus Daniel Findekelder*, domo Germanus Saxo, natus perquam nobili loco, peregrinationis studio excitatus varias Europae nostrae regiones jam obierit partim, partim sit obiturus, atque in his civitatem quoque Gedanensem sibi perlustrandam proponat, adhortatus illum sum, ut tuam prae caeteris consuetudinem apud Borussos ambiat, ac conciliare sibi enitatur. Habet quippe hunc praecipuum peregrinationis scopum, ut viros ubivis locorum celebriores praestantioresque non tantum adeat, sed frequentet etiam, ratus quod res est, uberrimos hinc fructus ad se redundaturos esse. Tu quaeso fac, ut intelligat commendationem meam aliquo apud te fuisse loco, nec apud te solummodo, sed apud tuos quoque. *Pastorium* maxime nostrum ut cognoscat, ejus interesse censeo, ad quem verbose scribebam nuper, nunc multum salveat. Vale Holmiae CIOIOCLXII. XI II. Novembr.

EPISTOLA XIII.

VINC. FABRICIUS

*Nic. Heinsio.**Holmiam.*

Fateor flagitium me admisisse, quod literis tuis ante annum & amplius scriptis haecenus nihil respondi. Sed me miseriae temporum, & molestissima, quibus distringor, negotia non semper officii memorem esse sinunt. Quid si quoque lenitatis tuae atque indulgentiae fiducia securius interdum peccamus, quotquot amicitia tua perfruimur? Sed plane veterum illum excusserunt postremae tuae, scriptae quidem, a. d. XXI II Novemb. anno superiori, sed ante dies sex mihi demum a Nobilissimo *Findekelder* redditae, postquam is per fines Finmarchiae, Russiae, Esthoniae, Livoniae, Curlandiae ac Prussiae magno ambitu itinere peracto salvus huc tandem advenisset. Magnum mihi praestitisti beneficium, quod notitiam viri, multis eximiis dotibus praecellentis mihi conciliasti, cui omnia illa praestare officia cupio, quae a mea tenuitate proficisci poterunt. Sed heus amice. Sunt hic qui suspicentur secretis illum mandatis instructum ex Suecia huc venisse, ut in Aula Polonica quaedam negotia sine strepitu procuret. Ego id non credo, immo plane falsum esse puto, cum & literas tuas, in quibus hominis peregrinandi institutum mihi describis, & illius, quod confecit, itineris rationem ac modum considero. Neque opinor te conjectorem tam horribile hoc arcanum fugere potuisse, aut, si quid rescisses,

me

me id voluisse celatum. Si grave non est, velim mihi sensum tuum super hac nostrorum hominum suspicione, quam tamen ipsis eripere laboro, paucis indicari. De statu Orbis istius Sarmatici ex literis Domini *Pelfii* haut dubie plenius doceberis. Ego enim libenter abstineo a commemoratione earum rerum, quae animum meum non parum excruciant; a quarum cogitatione quoque, quantum licet, studeo me abducere. Quod ut nunc quoque faciam, narro tibi pervenisse nuper ad manus meas manuscriptum volumen satis spissum Poëmatum *Andreae Critii* Archiepiscopi Gnesnensis Regnique Poloniae Primatis, qui vixit sub Rege Sigismundo primo & Anno MDLXXXVII. Cracoviae Sexagenarius decessit, extant ad eum aliquot Erasmi epistolae. Deprehendi in eo volumina non pauca ad historiam illorum temporum pertinentia, reperiuntur quoque amatoria multa, & inter ea quaedam turpicula, ne dicam plane foeda. Non possum quin unum ex elegantioribus epigramma adscribam.

AD LYDIAM PUELLAM.

*Me nive candenti petiit modo Lydia, rebar
 Igne carere nivem, nix tamen ignis erat.
 Quid nive frigidius? nostrum tamen urere pectus
 Haec potuit manibus missa, puella, tuis.
 Quis locus insidiis dabitur mihi tutus amoris,
 Frigore concreta si latet ignis aqua?
 Lydia sola potes nostras extinguere flammam,
 Non nive, non glacie, sed potes igne pari.*

Hos tamen versus tam elegantes dubito an non alibi aliquando legerim, & puto exstare nescio in quo libro, utque verum fatear, reliqua non sunt ad eundem aequae genium comparata, quanquam multa sint, non insulsa, quaedam plane sunt inepta & frigida. Te autem appello, memoriamque tuam omnium elegantiarum promam-condam, ut, quod sine incommodo tuo fiat hoc mihi dubium explices. Liber, quem habeo, descriptus est, ut profitetur titulus A. 1568. in usum Generosi Domini Joannis Konietzki Pretzlaw de Magna Konskie, Illustrissimae Annae, Dei gratia Reginulae Poloniae, Aulici & Thesaurarii. Sed nimis te moror tam levibus ineptiis. Tu ut serio me amare pergas plurimum te rogo, Vir Nobilissime. Salve & vale feliciter. Gedani. a.d. III. Martii A. MDCLXIII. Ignosce lituris.

EPISTOLA XIV.

NIC. HEINSIUS

Vinc. Fabricio.

Gedanum.

Colicis doloribus non ita nuper immane quantum exagitatus ita postmodum vires attenuatas sensi, ut omnis animi cura, omnis meditatio paulo intensior

tior procul fuerit habenda, dum redeo cum valetudine adversa in gratiam, Fabrici Amplissime. Hinc factum esse facile jam colligis, quod ad tuas oppido suaves & jucundas responsum haecenus distuli: quae procrastinatio mihi ipsi accidit perquam molesta. Quid enim gratus optatiusque possit obtingere, aut quod majori sit voluptati, quam tecum confabulari, homine mihi longe amicissimo, & quem in oculis tantum non assiduum sic fero, ut nunquam vel latum unguem absis, ne tunc quidem, cum multo, uti nunc fit, locorum intervallo disiungimur & separamur? Tum intestinae seditiones, quae viciniam vestram indignis modis jam nunc collidere, ut de te cogitem frequentissime, mihi quodammodo injungunt. Nunquam enim flagrantiores aut magis concitatos experiaris adfectus; quam cum sollicitudo stimulos amoris subdit. Spero mox fore, ut sopito hoc motuum internorum incendio, quo nunc miserrime vexamini, securius te amem. Nobilissimum *Findekelderum* sospitem atque incolumem ad vos pervenisse, rebellium ac barbararum gentium manibus feliciter elapsum, gaudeo mehercules, ut qui maxime. Id cum ex ipsis ejus literis, tum ex tuis quoque cognovi libentissime. Et quamquam vix est, ut certo mihi persuadeam, sedem ab illo etiamnum inter vos figi, compellandum nihilominus verbis vel tribus virum praestantem esse duxi, ut, si a vobis necdum discessit, intelligat virtutes suas constanter a me coli atque observari. Domo ac gente Saxonem esse ex ipso didicisse potuisti. Nobis tempore satis multo se indulgit, exactis in hac civitate quinis aut senis, si probe recordor, mensibus, sic tamen ut aulam regiam rarus admodum aut, nunquam accederet, caetera perquam curiosus & industrius in minimis maximisque rituum exterorum rimandis. Quod occasionem dedisse arbitror vestris hominibus suspicandi, illum occultis mandatis instructum a Suecis hanc peregrinationem suscepisse, quod est falsissimum. Cum nec Suecis operam addiderit, nec rebus aulicis multum sese immiscuerit, dum hîc haesit. Potius est, ut opinemur principis sui ac patriae utilitatem ab eo spectari, dum peregrinos mores sibi familiares reddit ac sagaciter explorat. Epigramma istud ad Lydiam puellam elegans omnino est, & quod *Andreas Critius* nullo jure sibi vindicavit. Vetus scriptoris partum facile agnoscis; quod ut magis liqueat certiusque intelligatur, quaeri a te poterit in catalectis Petronianis, sive versibus atque epigrammatis his, quae Petroniano satyrico Petrus Pithocus subtexit, ex vetustis membranis descripta. Illic tamen *Julia* est *puella*, quae Critio *Lydia*: tum versus quartus hoc modo legitur *nostrum tamen urere pectus. Nix potuit manibus, Julia, missa tuis*. Vides fecisse fucum lectori bonum Archiepiscopum, qui furti ignominiam non est subveritus & notam incurrere, dum amatorem scitum & venustum posteris se probare posset homo nugator. Utrum facinus in illo praecipue sit improbandum jure ambigas, furtive, an ineptiarum amatoriarum. Nam amatoria scripsisse potuit, cum ecclesiasticae vitae se haud dum dedisset; furtum admisisse, cum militaret, si militavit unquam. Hîc terrarum satis pacate haecenus procedunt omnia: ante menses hosce tres aut duos delectus militares per hoc regnum multa cum festinatione habebantur, accedebat

debat rumor, in Russos sub aestatem arma fore movenda; sed procures hi alio cogitationem nunc videntur convertisse, & paci denuo studere, ex quo cognoscunt nihil praesidii rebus suis fore in exercitu Polonico, quem in hostem communem armari unice velint, opinati hoc pacto successus prosperos longe procliviores sibi fore, si Russo cum duobus adversariis res sit uno eodem tempore. Sed vestri homines patriam exedere & depopulari malunt, quam solum hostium. Amicos omnes jubeo plurimum salvere. Vale, Amplissime & Amicissime Vir. Holmiae Suecorum Anno cicioclxiii. xv. May mensis.

EPISTOLA XV.

NIC. HEINSIUS.

*Vinc. Fabricio**Gedanum.*

Uavissima compellatione tua nihil accidisse mihi potuit jucundius aut exoptatius, Vir Eximie. Quamquam enim in civitate vestra non desunt aliqui & literis suis identidem me convenire & de rerum suarum statu certiore facere soleant, nescio quomodo tamen fit, ut ex ipso fonte potus se gratissimum praestet. Inest enim alloquiis tuis ἐλκυστικὸν τι & detrimentum venustatis plenissimum, quod quo uberius se diffundit ingeritque sitientibus, eo magis sitim accendit atque exacuit. Valetudo mea quod sollicitum te habet, facis peramanter, est tamen illa nunc loco satis commoda, nisi quod vulnus intempestive sororis unice optimaque excessu ante menses hosce vicanos mihi inflicto cicatricem necdum duxit. Sed est solatii non parum in studiis literaturae humanioris, ad quae frequenter devertō, cum per occupationes publicas licet. Jamque in eo sum, ut urgente typographo novam poematum meorum editionem adornem. Musis res suas habere pridem jusseram, quod alia agenda minime deessent, sed excussit mihi quodammodo veterum princeps maximus, & ad sui commendationem non tam rerum praeclare gestarum magnitudine; etsi hac quoque, quam luculentto studii poetici atque eruditionis amore pellexit. Epigramma illi quod postremum offerebam, hic vides. *Findekelderi* res angustas miseratus sum ex animo; sed quod ipse postmodum *Warsaviam* se cogitare perscripsit, auguror illi cum creditoribus jam convenisse. Conciliavit illum mihi Orator Danicus in hac aula ante hoc triennium, cujus in comitatu huc pervenerat. De natalibus ejus vero majora fortassis persuasa tibi volui, quod illos quoque idem Orator apud me praedicabat. Caetera ni fallor commendationi meae in illo abunde respondent. Est enim & egregia animi dote & multa rerum cognitione instructus. Alium nescio quem domo Parisinum *Pelfio* nostro ad vos contendente paullo post commendabam, obsecutus in eo precibus ac desideris Oratoris Gallici, qui coenaturus ad me adolescentem hunc cum aliis secum adduxit, atque illa occasione ut commendatitiis meis illi adessem.

Geda-

Gedanum cogitanti obsecravit. Sed mox cum literae a parente adolescentis **Lu-** tetia venissent querelarum plenae, super dissolutis ac corruptis filii moribus mo-
nente eadem oratore, *Pelfio* auctor fui ne nimium illi fideret concrederetque:
metuo tamen, ut tempestive satis. Res Polonicas loco nunc esse non inoportuno
fert rumor, quem vobis successum diuturnum propriumque fore confido; praeser-
tim cum & Sueci malum non exiguum Russis minari videantur. Discessit hinc
hesterno die Caesarianus Orator, cui opem adversus Turcas postulanti mille
pedites de novo, equites quadringenti, tam alia muniendis castris aut urbium
oppugnationi promissa. de poematum collectione jam annus est propemodum quod
intellexi nihil. Percunctabor tamen illos, quos cura collectionis proxime spectat,
& ut certiora cognoscas operam dabo. Epicedium quod exequiis dedisti parentis
meae, inter tua praecipuum duco, sive id merito carminis a me datur, sive
argumento, quod non potest non placere multum. Opinor tamen me mihi
hoc iudicio minime blandiri. Vale vir amplissime, cum lectissima uxore libe-
risque ac caeteris amicis. Exarabam Holmiae Suecorum **MDCLXIV. a. d. XI.**
Martii Gregor.

EPISTOLA XVI.

NIC. HEINSIUS

Vinc. Fabricio.

Hagam.

ID demum est *χάλκεα χρυσαίωι*, uti ajebat ille, versus optimos pro male tor-
natis reponi, Vir Amicissime. Jam vero non poenitet tam procaciter me
lasciviisse, ut Elegiam venustissimam tibi extorquerem, ne semper auditor tan-
tum esses. Legi & relegi oculo frequenti praeclara adhortamenta, quibus Lin-
danum tuum in arma concitasti adversum hostes Christiani nominis infandos,
multo verborum pondere, multa sententiarum mole, & id quidem ausus ele-
giaco metro, quod heroi pedis argumentum erat, aemulatus hac in re Tyr-
taeum illum, qui mares animos in Martia bella eodem carminis genere olim,
feliciter, ut scis, exacuebat. Utinam tantum vividi coloris a Lindano caete-
risque pro pia causa militantibus conferatur in praelia, quae parant, quantum
fingeretur impulsu tuo! Auderem equidem jam nunc laurum certissimam spon-
dere nostris partibus. Et quidni spondeam! Cum monitores tam facundi sint
in promptu; quos si miles audiet, desperare palmam non potest, aut de suc-
cessu dubitare. De tuis versibus sic statuo, implevisse te omnibus omnino
numeris, quod nos ancipiti eventu tentabamus. Quia tamen tu tantus auctor
atque auspex stimulos addis, quoties per occupationes publicas licebit atque in-
tegrum erit, in Musarum castra obiter excurram, & quae in scriniis poëticae
venae non pauca mihi adfecta asservantur, proferam in lucem, curis prioribus
incrementi loco accessura. sed otium frustra circumspicio haecenus, quod in-
cepto huic utcumque par sit. neque enim satis est procudi carmen, ni victu-
rum

rum procudatur. Comitia omnium regni Suedici ordinum, quae Calendis Mayis haberi debuissent, hesterno demum die haberi coepta sunt. Nimirum, dum nonnulla praemittuntur, quibus haud confectis ad comitia iri vix poterat, turbarum ac jurgiorum id subortum est, quod ad collidendos proceres ac plebem concitandam haud dubie videbatur spectare, ni Deus adfuisset e machina. Rex Carolus Gustavus ante quadriennium fere fatali necessitate compulsus tabulis supremis fratrem Adolphum Johannem filio suo tutorem una cum Regina Matre procerumque praecipuis, tum utriusque militiae Magistrum destinarat: improbatum tamen regis iudicium in comitiis, quae post excessum ejus proxime habebantur, ac munus imperatorium Laurentio Kaggero, viro rebus bellicis exercitato prae caeteris, est oblatum; sed & ille non diu honorem amplissimum gessit, morte circumventus. Cui dum successor quaeritur, Princeps Adolphus Johannes palam obtestari ordines, nunc singulos, nunc universos, rationem fraternae voluntatis ac supremi haberent mandati: suam esse provinciam illam, nec ab alio administrari posse salvo obsequio, quod Regi deberetur: minaciter etiam cum Vrangelio agere, in quem praecipue studia converti animadvertibat. Cum modus expostulandi non esset, Vrangelio jam voti compote facto, Principi custodes ex praetoriano milite adduntur. Nec facultatem impetravit abeundi quo vellet, nisi obstructa per Chirographon fide, non fore sibi posthac adspirandum ad imperatoriam dignitatem. In Vrangelii locum Archithalassius est electus Gustavus Otho Steenbockius, obniso quanquam ordine equestri, qui hominem affinitatibus ac cognatis nimium polentem averfabantur, ducta videlicet sorore Cancellarii in uxorem, ac germana Archidapifero regni elocata. Locus praeter haec in equestri ordine affigendus nobilitati scaenicae, qui nec primo inter Comites ac Barones admittebantur, & postremum inter homines nobilitatis jure nuper donatos negabant occupari a se posse. Inter has contentiones dies in diem extractus est. Hesternodemum Steno Bielke oratione habita ordines regni edocuit, quas potissimum ob causas a Rege convocati essent; erant quidem Cancellarii hae partes, sed is valetudine adversa subito tentatus, dum orationi se accingit, ex ipso procerum ac plebis conventu aeger digressus est. Haec ominosa adflatis superstitutione ingeniis nec auspicata admodum videntur. Adderem & de nupero incendio nonnulla, nisi nimius jam essem, remque, uti gesta est, exaratis ad Pelsium nostrum litteris hodie magna ex parte enarrassem. Diu est quod Itali jactarunt inventum esse in Dalmatia Petroniani satyrici luculentum fragmentum. id proximis diebus per tabellarios ad me pervenit, Patavinis typis descriptum, sed vix inspectum Ubsalienses amici abstulerunt, ut sententiam accuratam de eo ferre nequaquam possim. Ad Trimalcionis coenam, quantum video, spectant omnia. Multa mendose illic ac depravate scripta exhibentur, frigent plurima, & ad Petronii nervosam elegantiam vix adsurgunt. Nihil igitur pronuncio, sed iterandae lectioni differo iudicium. Amicos ju-beo salvere, *Pastorium* prae ceteris, virum eximium. Vale. Exarabam Holmiae Suecorum. CIOICLXIV. a. d. xv. Junii.

Vinc. Fabricio.

Gedanum.

FACTAM tibi Poematum meorum copiam, Vir Amplissime, non alio magis nomine laetor, quam quod inde manifestum fieri, & comprobari potuit, nonnihil loci beneficiis tuis apud me fuisse. Quae etsi digne satis haudquaquam sum remuneratus, in eo tamen placui, fateor, mihi utcumque, quod animi grati argumento, licet tenui, te virum tantum apud posteros venerari nobis contigit. Benignitatem tuam incredibilem, quam saepe numero sum expertus, nusquam apertam magis obviamque deprehendi, quam in iis laudibus, per quas Musam nostram quotidianam illam, atque immerentem collo beasti. Alibi tamen benevolos lectores me reperturum minime confido: maluisti enim affectui totum te indulgere, qui iudicium ad partes vocasse consummatum illud poteras, & maxime nobis formidandum. *Cossium* & *Santram*, quos ignotos tibi esse video, qui sint, paucis accipe. Alter horum *Cornelius Boyus*, Fiscii apud nos nuper patronus, nunc fato concessit, versificator in multis ridiculus, nisi quod vernaculo sermone carmen conscribebat interdum haud malum: Alter est *Franciscus Planta* a sacris olim Mauricio Principi Nassaviae apud Americanos, cujus gesta posteris parum feliciter oratione vineta tradidit. Is puto Bredae etiamnum verbi divini praeconem se profitetur. *Macrini* nomen sibi vindicat *Petrus Mommorus* professor apud Parisios Graecarum olim litterarum infectus plane ac ineptus; quem *Menagius*, *Saracenus*, *Valesii* fratres, alii certatim scriptis jocosis ac mordacibus involarant. Amicus ille Batavus est *Hadrianus vander Walle*, sive *Vallius*, quem prima inter Italicas compellat Elegia: Is dum curam habet, nescio quas ob causas, nomen suum latere voluit. Idem Eclogae, quam designas, auctor est habendus. *Gronovium* nostrum tanto jam tempore per litteras haud egisse tecum miror, quamquam & me compellat rarissimus. Ultimis suis mense Junio exaratis agebat gratias pro amicâ operâ. Admissus quippe est hoc anno & adscitus a Rege Christianissimo inter illos, quos honorario annuo auctos atque ornatos voluit Princeps munificentissimus. Quod etsi toto jam triennio tempestivius confieri debuit, praeteritus tamen ac insuper est habitus a Regiis Ministris, me per litteras continuas factum apud illos improbante, urisit igitur negotium *Capellanus*, non sine successu. Qui *Gronovio* persuasum voluit, me commendationis rationem hic praecipue habitam fuisse. Eodem honore quoque sunt donati *Thomas Reinesius*, *Octavius Ferranius*, *Carolus Datus*, triga hominum mihi amicissimorum. *Gronovium* apud te spero excusabant senectus & continuae lucubrationes. Haec nunc praepropere inter summas temporis angustias. Salutat te peramanter Vir Illustris *Johannes Isbrandius*, qui nobis hîc adest, propediem ad suos rediturus. Vale Fabrici jucundissime, meque quo solebas studio perge complecti. Exarabantur Holmiae Suecorum MDCLXVI. a. d. v. Octobr. Greger.

EZE-

EZECHIELIS SPANHEMII

ET

NICOLAI HEINSII

EPISTOLAE

MUTUAE.

EPISTOLA I.

EZECH. SPANHEMIUS

*Nic. Heinsio.**Leidam.*

Quum in eo essem, Vir Nobilissime, ut contractae olim in Batavia, & hîc singulari quodam meo fato renovatae tecum, amicitiae memoriam re-fricarem, tuas longe gratissimas accepi. Non levem utique fateor mihi ruborem incussere, dum supervacua gratiarum actione vota solum mea, & flagrantissimam bene merendi cupidinem tanquam collata beneficia compensant. Quantum enim felicitati meae gratulatus fueram, quae tui conspectum & eruditae consuetudinis usum aliquamdiu nobis praebuit, tantum me ussit tenuitatis meae conscientia, quae animum in sui cultum effusum aliter quam verbis significare non passa est. Spero tamen, quod exinde singularis illius, qua verum Heinsianae famae & eruditionis traducem prosequor, observantiae magnitudinem non metieris. Lubens caeterum intellexi quam felici successu, licet aviis & difficillimis itineribus, cruentas rusticorum manus evasistis. Sedati jam omnes illi motus, & concitores barbarum intempestivae rebellionis poenas dedere. Non dubito, quin tu & eruditissimus *Langermannus* noster eadem felicitate in Bataviam sitis delati, gemino successu brevi Holmiam appulsuri. Quod vero mentionem Panegyrici mei injicis, & patrocinium tuum apud Augustam spondes, non possum non id luculentissimum amoris in me tui argumentum interpretari; sed non ita Suffenus sum, ut nesciam tanti non esse, qui post tot exhaustam hac in parte magnorum virorum facundiam stupendae Heroïnae oculos subeat, aut qualemcunque Regiae benevolentiae auram mihi conciliet. Impetum tamen, fateor, cohibere non potui, quin in illa applaudentium undique tam inusitatis, & invidendis virtutibus turbâ, me quoque sisterem, & paterni spiritus reliquias ac Reipublicae nostrae cultum, tenui licet & agresti stylo, in lucem ederem. Magni tamen beneficii

Ggggg 2

loco

loco ducam, si tua opera possim certior fieri, utrum interceptus sit nec ne ille, in quo exemplaria illius Panegyrici erant inclusa, fasciculus. Illustri Parenti tuo ut me unice commendes rogo, ut & Patronis & amicis veteribus *Vorstio*, *Golio*, *Boxhornio*, aliisque Lycei vestri luminibus. Doctissimum *Langermannum* inprimis plurimum salvere jubeo, qui ingenium illius & eruditionem impense colo, & cui felicia omnia ex animo voveo. Eadem tibi illique apprecantur mater mea & sorores, ac eruditi omnes nostrates, ex utroque coetu *Pistetus*, *Colladonius*, *Tronchinus*, *Mestrezatius* alique, qui omnes se strenuos tui nominis cultores venditant. Genevæ iv Kalend. Jul. Anno CIOIOCLIII.

EPISTOLA II.

NIC. HEINSIUS

Ezec. Spanhemio

Heidelbergam.

Nescio quo iniquo fato meo jam bis evenit, ut cum maxime officia probata tibi cuperem & hunc affectum, per molestissimas tamen tricas & occupationes alio sim avocatus, nec aliqua saltem ex parte praestiterim, quod tua merita abunde a me exigebant. Triennium jam est, quod iter hac non tantum faciebas, sed aliquamdiu etiam apud nos morabar. Neque tamen toto illo tempore, partim adversa valetudine impeditus, partim lite importuna ac curis domesticis distractus vel tantillum benevolentiae erga te meae testimonium aut specimen dedi. Nuper quoque dum pulcherrimum tuum propositum mihi significas de Lucano poeta summo in lucem emittendo sub auspiciis Serenissimi Electoris Palatini, ac peramanter me rogas, ut, si quid ad ornandam hanc editionem conferri a me possit, eo ne te tuosque conatus defraudem: non tantum defui haecenus desideriis tuis, nihilque ad institutum tuum promovendum effeci, sed ipsam quoque responsionem in menses tres quatuorve distuli; non sine summo pudore meo, dum indies spero ac confido eluctaturum me ex aestu ingrato negotiorum. Hinc quoque factum, ut virum Clarissimum *Ludovicum Fabricium* vix semel iterumque viderim, ex cujus consuetudine & fructum magnum & magnam alioquin voluptatem cepissem, nunc quoque hinc discessisse illum ac pedem alio transtulisse invitus intelligam. Neque defuissem tamen officio jam diu, si quid penes me extitisset, quod conatibus tuis profuturum indicassem. Contuleram Lucanum olim cum quatuor aut quinque scriptis codicibus, & multa feliciter in eo scriptore castigaram. Petiit autem exemplar istud ante quadriennium a me utendum *Langermannus* noster, cujus copiam dum amico facio, idque post tempus nonnullum ad me remittitur, in via periit. Ejus rei testis luculentus mihi possit esse noster *Gronovius*, qui Hamburgo Daventriam usque exemplar illud secum vexerat, sed Daventria huc postea missum neutiquam comparuit. Fortassis enotvair
inde

inde omnia aut potiora *Langermannus*. quod tamen pro re explorata non auisim affirmare. Hoc scio eundem *Langermannum*, dum mecum peregrinatur, usum exemplaribus Lucani tribus quatuorve satis vetustis: quorum excerpta, facile ab illo impetrabuntur, ut spero. Memini preterea in Hamburgensi bibliotheca Codices me vidisse duos tresve manu exaratos ejusdem Lucani. Totidem apud *Vossium* nostrum. Quos ego tuae in spem gratiae cum vulgatis editionibus libenter committam, si moram mensis unius atque alterius editio a te adornata patitur. Unum ex his certi jam contuli. *Scrivenerius* quoque, si memini, unum alterumque ejusdem poëtae exemplar possidebat, sed eo nuper e vivis sublato usus bibliothecae vix ulli patet, cum filius uterque τὸ μανανίτης literarum sunt plane rudes. Naso meus jam pridem sub praelo fervet. Ipse auctoris contextus jam est absolutus. nunc in Animadversionibus meis operae typographicae occupantur. Utinam hoc meum institutum foveas! Intellexi sane ex *Marquardo Gudio*, juvene literato, se vidisse in Heidelbergensi bibliotheca nonnihil codicum Mss. Ovidii. sed quicquid est, utinam breve ad tempus eorum copiam mihi impetres. & si quid ex vetustis Germaniae bibliothecis praeterea possis eruere. Maximi sane beneficii loco id ducas. Ex paucis enim Basilcae & Argentorati a me inspectis facile deprehendi, codices ejus auctoris & meliores & vetustiores in Germania, quam alibi terrarum inveniri: Spirae se vidisse unum alterumque satis antiquos *Langermannus* mihi significavit. Complures Beronae in bongarsiana bibliotheca.

EPISTOLA III.

E Z E C. SPANHEMIUS

Nic. Heinsio.

Hagam.

Non deprecabor hîc apud te, Vir Amplissime, diuturni silentii culpam, quam negotia varia, & frequens ab hac sede absentia sibi vindicarunt hactenus. Plura enim debeo tui in me affectus constantiae, & prono in rem nostram studio, quam ut lubens ultroque totum illius condam in pectore acerrimum alias sensum. Vel postremae tuae quantum pro meliore Lucani habitu & nitore operis & laboris velis defungi, & petitioni hac in parte nostrae annuere, luculentis certo & manifestis indiciis probarunt. Quod quam laetum mihi, tam serenissimo meo & litterarum Maecenati gratum accidit, cui tuum bene de excitatissimo vate & instituto nostro merendi studium significavi. Quo etiam factum, ut nominis tui & famae studiosissimum jam ante animum tibi ulterius devinxis, & ad referendam gratiam, ubi se obtulerit occasio, prorum reddideris. In cujus etiam rei qualemcunque significationem tibi & *Vossio Gronovioque* harum litterarum Triumviris, & quorum duo postremi aut exaratos Codices, aut suas etiam observationes ad me jam transmissere, aliquam vini Baccaracensis, hoc anno praeter solitum quoque generosi, mensuram deferendam

Ggggg 3

dam

dam iussit. Quod ut leve sui affectus, & praestandae in majoribus benevolentiae pignus accipiatis sperat & expectat serenissimus, idemque eruditorum amantissimus Princeps. Tuum nunc erit, Vir Amplissime, sponte datam hac in parte fidem liberare, & quaecunque ad meliorem Lucani nostri cultum & habitum opportuna videbuntur, larga manu subministrare. In tuo etiam arbitrio positum aut ipsos, quos nancisci poteris, exaratos Codices, ut conferendi molestia libereris, aut excerptas ex iis variantes lectiones suppeditare, certum quaecunque hujus generis ad nos transmieris optima fide tibi restituenda. Ampliss. *Grotio*, res Domini mei Hagae agenti, secure poterunt committi, quae curanda huc tibi videbuntur. Tres missos à *Vossio* Codices jam ex parte conferre licuit. quibus addidi varias lectiones, quas ex antiquissimo Bibliothecae Bodleanae OXON. MS. in mei gratiam cum vulgatis commissio excerptas nuperrime transmisit *Thomas Barlour* illius amplissimae Bibliothecae ProtoBibliothecarius. Contulere etiam suam symbolam aliqui inter Gallos eruditi, & praeter alios Cadomensis Nobilis de *Grentesmenil*, missa eruditissima pro Lucano contra *Scaligeros* Apologia. sed utinam quam à te poscimus operam, eandem etiam in Nasonis tui gratiam praestare licuisset? Non certe haecenus lentum me hoc in passu aut petitionis tuae immemorem esse, expectes, si illius adimplendae aliqua sese obtulisset facultas. sed nequidquam haecenus omnes Bibliothecae nostrae forulos excussi, ut indicata tibi scripta Nasonis exemplaria nanciscerer, eademque reperta, impetrata jam hujus rei à serenissimo Domino facultate, e vestigio ad te curarem. Nulla certe talia se mihi aut Bibliothecario obtulerunt haecenus, nec ullius ferme scriptis id genus Codicibus Bibliotheca instructa, ut delatoris hac in parte fidem mirari subeat. Dolui certe impense ereptam hanc mihi Nasoni tuo & praeclaris tuis in eum conatibus gratificandi opportunitatem, qua & tuum pro Lucano nostro studium redderetur alacrius, nec in ingratum tibi collatum aliqua ratione constaret. Avidi caeteroquin cultissimum hunc vatem nitore suo redditum, & quasi ab exilio suo rursus in lucem protractum exspectamus. si *Faber* in notis tuis vapulat, habet quod sibi imputet, qui proterve nimis & data opera illustres manes sollicitavit, & Criticam suam non usque adeo felicem tanto ambitu venditat. Caeteroquin tuum novum in Sueciam destinatum iter, & obeundam in eam legationem, tibi ex animo gratulamur, Vir Amplissime, & veris ac faventibus de te Procerum vestrorum judiciis lubentes assurgimus. Non dubitamus, quin ex tua & mittentium dignitate illustre & gravissimum onus sis obiturus. Dum vero tu in septentrionalem plagam tendis, ego in meridionalem serenissimi Domini mei autoritate & imperio iter mihi brevi cum Deo suscipiendum intelligo. Non poterat se mihi gratior, qua pridem flagravi lustrandae Italiae, opportunitas offerri, nec felicior ad omnes Italiae aulas, urbes, Bibliothecas & κειμήλια alia introspicienda aditus dari. Quam in rem etiam sedem aliquamdiu in urbe domina figere, & eruditorum ibi alloquiis animum, ut spero, reficere & explere dabitur. Tuum erit, Vir Amplissime, tuis me etiam & mandatis, & ad amicos, quorum magnus tibi in illis oris proventus,

com-

commendatitiis instructum dimittere; & à me omnia exigere, quae tuis commodis inservire videbuntur. Dabam raptim in Arce Heydelbergensi prid. Kal. Nov. cicioclx. Ad Celeberrimum *Vossium*, ne molestus sim interpellator, non scribo; quem de cultu meo & grata ob transmissos Lucani codices mente persuasum cupio, quae optima fide illi redditos iri dubium esse non debet. Ab eo etiam, si quid in Italiam curandum velit, litteras & mendata lubens elicerem. Ad postremas Cl. *Gronovii* nunc respondeo.

EPISTOLA IV.

E Z E C. S P A N H E M I U S

Nic. Heinsio.

Hagam.

Prolixam tuam bene de nobis & Lucano nostro bene merendi voluntatem vel postremae tuae luculenter obsignarunt. Quamvis enim eam à te publico potius, aut serenissimo meo Principi, quam mihi imputari existinare debeam, gaudeo tamen impense me hortatore te ad hanc curam traductum. Mittes itaque, Vir Amplissime, quamprimum id tibi commodum videbitur, quaecunque ad Poëtae nostri illustrationem tanto labore & sedulitate à te sunt annotata. In arbitrio tuo erit positum codices ipsos una transmittere, qui non invitis possessoribus ad nos deferri posse videbuntur. De cautela potiore fide serenissimi Electoris offerre non possum, qui totum hoc beneficium in se transferet, & de restituendo idonee cavebit. Noli vero dubitare longe gratissima esse tanto Principi, quaecunque officia jam à te hanc in rem praestita sunt & in posterum praestabuntur, & quascunque referendi gratiam occasiones acceptissimas fore. Ego vero serio mihi gratulor, quam conceperam pridem de propenso tuo in conferendis id genus subsidiis animo & amplissima facultate, non irritam spem accidisse, immo supra vota etiam nostra adimpletam. A serenissimo *Augusto Brunsvicensi* Duce Codices duos scriptos & editiones aliquot antiquas expecto, qui quamvis difficilem se in talibus praestare soleat, ubi instituti nostri per *Conringium* certior factus, sponte hoc mihi beneficium impegit. Antiquos illos exaratos & optimae notae scribit *Conringius*, qui & alterius, sed recentioris & chartacei, qui in Bibliotheca Julia asservatur, mentionem facit. Duas tamen veteribus illis editionibus, quarum indicem misit, in hujus Universitatis Bibliotheca antiquiores nactus sum, quas omnium principes auguror, unam sine anno & loco, sed tum ex mendis, tum ex characteribus, meo judicio primam, alteram ex eadem expressam Venet. 1477. Utraque saltem antiquior iis, quas *Barthium* video & *Rutgersium* vestrum principes statuisse. Collectionem vero singulorum vix serio adhuc licuit aggredi; ita curae aliae tempus omne praecipiunt. Et quas iisdem horas adimere licuit, inspiciendis & ordinandis Nummis veteribus, quorum ingentem Thesaurum possidet serenissimus Elector, à multo tempore impendi. Vix major alibi copia, aureorum praesertim &

ar-

argent eorum occurret, tum Graecorum tum Romanorum, & multorum vel inprimis, quos *Golzium*, *Urfinum*, *Oconem*, & antiquarios alios latuisse video. Volupe fuit inprimis, oblata tam opportuna occasione, & Domini desiderio & animo simul meo morem gerere, in excolenda & tractanda utilissima hac & gratissima veteris aevi notitia. Quo factum ut multa nos aliis indicta annotasse, suo tempore aliquando cum hoc sereniss. Thesauro evulganda speremus. Plura ad hanc rem subsidia conferet iter Italicum, cujus ingrediendi tempus significabo. Συγκαταξ tuas ad amicos libenter eliciam, quorum scio magnum tibi esse in oris illis proventum. spero etiam non defuturam iter illud feliciter conficiendi opportunitatem, serenissimi Electoris litteris & mandatis ad Italiae Principes & Purpuratos quosdam, Ei non ignotos, instructo. Scio tamen magnum in privatis amicorum officiis momentum positum, quos tua opera lubens mihi conciliabo. Nescio tamen an Bernam aut Basileam adeundi tam proxime se offeret opportunitas, quum Oenipontinam Aulam mihi primum adeundam, atque ita per Tirolim iter suscipiendum intelligam. Sed videbo, Deo ita adjuvante, ut in reditu voti illius compos fiam. Bongarsianam Bibliothecam olim a me inspectam sed in transitu, & vix ad dimidiae horae spatium recorder, scio optimis illam libris tum scriptis tum editis foetam, ex qua & *Gothofredus* noster olim suum Philostorgium elicit. Morosos alias & difficiles custodes nacta est, & quod magis dolendum, parum harum cupidiarum aut avidos aut gnaros. si videre aliquando contigerit, memor ero utriusque poematis a te indicati, quae certe cultiora prodire interest rei litterariae. De Lucano facile tibi assentior, plerosque codices, ex uno, eoque non satis emendato, descriptos. Quinque illos versus lib. 1. *Tritonem* &c. in Vossianis abesse video, ut & in Oxoniensi, ac priscis quas consului editionibus, quo nomine etiam *Grotio* spurii & inserti videbantur. Mihi suspendere iudicium placuit, donec plures eosque bonae notae Codices consuluissem, ex quorum consensu aut fide de iis erit statuendum. Miror *Grotium*, qui Thuaneos inspexit, de illis ad marginem unius adscriptis, nullam iniecisse mentionem. Ovidiana tua avide expecto, & *Fabri* vapulantis, quando ita voluit, non miserebor. *Salmasii* Antimiltoniana prodiisse à te primum rescivi, sed vos ibi traduci nihil tale meritos miror. Vereor etiam ne contumeliae & cavilla praecipuam illius operis partem sibi vindicent. Tua ad sereniss. Principem meum compellatio, quando ita statuis, longe erit gratissima. Vini Rhenani dolia prae aquae insolita in Rheno penuria nondum ad vos deferri potuere, quae parata pridem felicem exitum expectant. Nullum tamen periculum erit in mora. Vale, Vir Amplissime, & me ama. Idib. Dec. Anno MDCLX. In Arce Heydelb. Parentis tui τὸ πᾶν in Juliani Caesares curas fac quaeso ut nanciscar. Vidi quaedam opportuna in satyra Horatiana ab eo notata, quod in calce libri significavi, & de cujus cum iis quae jam annotaveram consensu mihi sum gratulatus. Illud enim opusculum cum aliis quibusdam illius Imp. recensere ac Gr. ac Lat. edere jubeor. A. Cl. *Vossio* Codicis Juliani collationem expecto. Caesarum Juliani translationem Gallicam una cum notis nuper à me serenissimi Domi-

Domini jussu & sumptibus publici juris factam cum duobus pro Vossio Gro-
novioque V.C. exemplaribus accepisse non dubito. Unum & novissime ad Il-
lustrissimum Thuanum transmisi, cum debiti ob promissa Lucani exemplaria
gratiarum actione, quae Hagam delata Grotio una cum tuis secure tradi po-
terunt. Nec enim injectam itineris mei Italici mentionem moram illis injicere
optarem, quum potissimam adhuc hyemis partem hîc transigere, eandemque
illis collationibus imputare decreverim. Tu vale, & me ama, & me profe-
ctionis tuae in Sueciam certiolem facere ne dedigneris.

EPISTOLA V.

E Z E C. S P A N H E M I U S

Nic. Heinsio.

Hagam.

Pridem est, Vir Amplissime, quod molior hoc ad te scribendi officium.
Illud enim & nominis tui reverentia, & eruditionis cultus, & illius, quae
jam olim gratissimis mihi auspiciis inter nos coaluit, amicitiae sensus, a
me saepe efflagitavit. Accessit & novum a Fratris, qui Belgium vestrum non
ita pridem lustravit, reditu momentum, qui me de tui in me amoris con-
stantiâ luculenter certiolem fecit. Opportune itaque ad te scribere gestientem
praestantissimus harum lator *Fabricius* eo magis accendit, quo ipse acri etiam
Tui compellendi desiderio flagrabat. Non poteris non in illo insignem & eru-
ditionem & virtutem exosculari, quarum utraque inclytus in florentissimis Ger-
maniae Galliaeque locis vixit. Scio autem quam pronus & lubens tales in tui
notitam admittas, qui verum illius usum & probe intelligere & serio aestimare
norunt. Ex illo autem & publicum rerum nostrarum, & tum Aulæ, tum Aca-
demaë statum, privatum enim meum tanti non duco, si vacat & lubet intelli-
ges; significabit praeterea quam cupidus non veteris tuae solum benevolentiae,
sed novi adhuc beneficii copiam a te efflagitare contendam. Exprimit id à me
serenissimi Domini & patroni imperium, qui invitum certe & reluctanter ad
illustrandum & ornandum nova editione Lucanum pridem impellere non dubi-
tavit. Nequidquam hætenus, tum ingenii & eruditionis penuria, tum admini-
culorum, quorum beatissima hîc olim seges, inopia, tum muneris jam gravis,
& curarum aliarum ac vitae aulicæ crebris, & ingratissimis saepe avocamen-
tis, hanc a me provinciam amoliri, & in validiores ac opportuniore humeros
transferre sum conatus. Vicit Maximi Principis summum erga hunc Poëtam
sibi pridem familiarem studium, qui novo & splendido cultu ornatum publica
luce donatum cupit. Intelligis autem facile; Vir Amplissime, quam pauca,
vel nulla ad hanc rem praesidia nancisci his oris possim, quae veteribus libris
& scriptis codicibus tam vacuae hodie & destitutæ, quam uberes olim &
beatae censebantur. Unde vel praecipua, certe reliqua mihi in hoc opere fidu-
cia, quam in tuo in me amore, harum litterarum usu, & adminiculorum,

Tom. III.

H h h h h

quo

quae tibi ad manus procul dubio luculenta, copiam continuo reposui. Juva itaque nostrum hoc, vel Augusti potius Principis, studium, & vel scriptos codices, vel excerpta in iis, vel observationes tuas larga & benigna manu subministrare non detrecta. Nemo te melius hoc me beneficio obstringere, nemo procul dubio plura conferre, nemo promptius aut opportunius, de magno Poëta mereri vel poterit, vel non refugiet. Idem à Celeberrimis Viris *Gronovio Vossioque* impetrare annitor, quos ad id praeterea & tuis in me officiis, & magni Principis reverentiâ extimulare non dedignaberis. Amicos Parisienses & Cadomeneses eo etiam nomine compellavi, interque eos *Capellanium* nostrum, quo nemo aut tui observantior, aut bonorum omnium amicitia & cultu dignior. A *Bocharto* nudius tertius litteras accepi, quibus proximam magni operis, eamque doctissimo *Vossio* parario, editionem pollicetur. sed Ovidius tuus quando illo nitore & cultu a te instructus prodibit, qui solum hunc illi splendorem potes foenerari? Salmurienſis Critici nuperas aliquot ad illum emendationes legi, sed quae an omnes probae sint & genuinae, unus omnium optime intelligis. Magna hîc horum studiorum penuria, & proterve aut opportune in Critices sacra irreperere gens Germanorum pridem desiit. Vestrum est, tuum intelligo & *Gronovii Vossique*, quibus solis ferme illa hodie patent, caligantibus nobis de vestra tam copiosa luce mutuatum aliquod lumen impertiri. Fac vel inprimis, Amplissime & Amicissime vir, ne vana sit, quam in tui benevolentia, comitate & benigno in tui cultores animo, unice collocavi, fiducia. Omnes ad hanc rem opportunitates dabunt & proxime Francofurtenses Nundinae, & praestantissimi *Fabricii*, quod mihi totum hac in parte addidit, studium. Bene & feliciter vale, Vir Nobilissime, & me solito tuo amore complectere. Dabam In Arce Heydelbergensi vi. Calend. Februar. A. M. D. CLX.

EPISTOLA VI.

E Z E C. S P A N H E M I U S

Nic. Heinsio.

Hagam.

Nihil mihi litteris tuis gratius, Vir Clarissime, & ea bonarum rerum fruge, quam luculentam ex iis percipere datur. Intermittas ex iis non-nihil tuas pro Lucano nostro curas moleste ferre non possum, dum debitas pridem Nasoni tuo impendis. Nec ille se posthabitu debet indignari, dum datam jam dudum fidem liberas, nec diutius cultissimum vatem premis. Spero perinde te ante profectiorem Suedicam telam illam pertexturum, nec ulterius gaudia nostra aut desideria moraturum. Ubi tum vacabit, Lucanum nostrum ad animum revocabis, & omnem a te praestitam pro eodem operam nobis, sat scio, non invidebis. Nemo te plura conferre in ejus egregium poterit, & singula bona fide & grata mente tibi acceptum feret. Facile tibi assentior de mendis variis, quae

quae optimum vatem etiamnum deturpant, & quas eluere non est nisi subacti in his litteris tum iudicii tum ingenii. Placuisse non dubitabis emendationum, quas misisti, specimen, & quae ad eliciendas plures id genus salivam mihi non leviter moverunt. Lectionem illam *Sithoniae gentes*, quam ab eruditis profectam credis, proferunt etiam aliquot scripti codices, & inter alios unus, quem possideo e Bibliotheca Ducis Augusti Brunsvicensis fatis antiquum. Illud *Asturi aur* pro *Affyrii* jam notaram in ore Codicis mei, quod *Dausquejus* jam olim, & *Barthius* alicubi in Adversariis jam vidit. *Grotium* vero quod censes unicuique Thuanae Bibliothecae Codicem inspexisse, id vero aliter ex Notis ejus sese habere intelligo, ut vel in observatis ad vers. 866. l. r. poteris colligere, ubi diserte duorum meminit. Augustus Brunsvicenfium Dux novissime duos Codices una cum priscis aliquot Lucani editionibus e ditissima Bibliotheca, missis eo nomine celeribus, ad me curavit. Uterque codex in membrana fatis antiquus, & unus praesertim cum vetustis & eruditis scholiis, cum Salustii antiquissimo codice junctus, & quod doleo in lib. vi. desinens. Bongarsianae Bibliothecae, quoad Lucani qua scriptos qua editos codices, modo accepi indiculum, qui unum tantum prioris notae in membrana eumque antiquissimum, ut volunt, recenset. Videbo omni opera, quo ille ad nos possit advolare. Nec animus mihi editos omnes conferre, sed primas tantum & veteres editiones consulere, quod non sine fructu aut exemplo fieri solet ab his, qui has litteras tractant. Immo multas jam in iis lectiones observare licuit melioris notae, quam in postremis, aut quales *Grotius* ex scriptis codicibus aut ingenio etiam primus se eruisse arbitratus est, unde facile illas non visas eidem aut neglectas ab eo licet augurari. Meminit Bongarsianae Bibliothecae indiculus Apologiae cujusdam pro Lucano contra *Scaligerum* Parisiis excusae Anno 1582. quam an videris scire aveo. Luculentam ad nos misit *Grentismenileus* Cadomensis, nisi quod paullo acerbius iniqua *Scaligerorum* de Lucano judicia suggillet, eademque refellat. Monebat nuper *Capellanus* noster relatum sibi quandoque a *Rutgersio* longe aliter de Lucano *Scaligerum* filium sensisse ac Patrem, h. e. benigne admodum & honorifice. Unde tamen id conjecerit ὁ πᾶν Avunculus tuus nescio, quum certe in Epistola ad *Patissonem*, & Prolegomenis ac Notis ad Manilium mirum in modum praestantissimum hunc vatem traducat Vir Illustris, nec eadem eum alibi recantasse videam, aut adducar facile ut credam. Magni Parentis tui ad Juliani Caesaris annotata fac quaeso omni opera ut nanciscar. De illorum editione fiet tuo arbitratu, & ab Affine elicies facile aut extorquebis hunc libellum. *Cunaeum* non ita feliciter, ut Vossio seniori, & plerisque aliis eruditis visum, in vertenda hac satyra versatum, & impigisse in multis in annotatis nostris jam a nobis est observatum. An felicius tamen ubique *Cantoclarus*, cujus viri magna fuit alias eruditio & probitas, id vero affirmare non ausim, quum plurima etiam in elegantissimo & eruditissimo opusculo non assecutum, ut nec postremum editorem *Petavium* annotasse memini. Variantes horum Caesarum & Misopogonis lectiones e Codice suo exscriptas novissime ad nos misit Clariss. *Vossius*, ex quibus de iis omnibus

lentius in posterum statuendi ansa praebebitur. Tuam vero singularem circa rem nummariam peritiam jam dudum exploratam habeo, unde positam a me quoque hac in parte operam tibi venditavi. Optavi saepe ut aliquem tibi geminum consulere mihi in hoc studio liceret, dum nummos omnis generis fereniss. Electoris digero & excutio. Satis magnam illorum copiam ex eo facile colliges, quod eorum numerus prope ad novem millia excurrat, inter quos Dcccc aurei, reliqui maximam partem argentei, aenei prae illorum copia pauciores. Consularium *Urfini* vix una aut altera Familia deest, multi veri adsunt, nec ab eo, nec a *Gorlaeo* annotati, iique bonae notae. Graecorum vero vel imprimis numismatum vix major forte alibi aut selectior copia, tum personarum, tum coloniarum, & quales plurimi apud *Goltzium* non exstant. Adulterinos vero in tanta copia multos etiam observavi, & quales scio Italos vel imprimis isto & superiore seculo magno numero talium avidis & ignaris venditare. Rem vero longe gratissimam serenissimo Electori feceris, si indiculum librorum, qui de hac materia agunt, ad nos transmittere volueris, ut videam quibus careat, utcunque instructa, ejus Bibliotheca. sed de his adhuc alias, qui ex inopino scriptiorem hanc tumultuariam cogor abrumpere. Vale, Vir Clarissime, & me ama. Datum In Arce Heydelbergensi 3. Febr. 1661.

EPISTOLA VII.

E Z E C. S P A N H E M I U S

Nic. Heinsio.

Hagam.

Post novissimas ad te datas, Vir Amplissime, easque, si memini, bene longas, molestus iterum interpellator accedo. Causa scriptionis iter Italicum, ad quod suscipiendum brevi Domini jussa praescribunt. Et quamvis litteris ac mandatis ad omnes Italiae Principes, *Franciscum Barbarinum*, & eruditos aliquot *Holstenium*, *Pricaeum*, aliosque instructum dimittat, non ideo tamen minorem oblatis a te beneficii rationem mihi habendam duxi. Vide itaque ut tua vel mandata, vel συστάσεις etiam ad amicos prima occasione eliciam. Patavii inprimis & Florentiae ad *Petruccios*, *Ferrarium*, *Carolus Dati*, aliosque, & Romae ad *Furstenbergium* aditum mihi tua opera patere optarem. Post lustratas Mantuanam, Parmensem, Mutinensem, & Florentinam, Aulas, Romae aliarum compendio, mihi per tempus aliquod haerendum intelligo. Non poterit se mihi opportunior aut gratior occasio offerri expetitur saepe calidissimis votis iter adimplendi, qualem serenissimus mihi suppeditavit. Videbo ut Oeniponti Gifanianas in Ovidium curas extorqueam. Patieris hic etiam, ut Clariss. Viris ac de me optime meritis *Vossio*, *Gronovioque*, plurimum salutem adscribam, suaeque vel jussa vel litteras impertiri mihi non detrectent. Senecae Tragici munus serenissimo Electori erit gratissimum. Optarem enim ut post *Freinsbemii* fata tantum decus huic Academiae posset inferi, de quo tamen

tamen exiguam spem foveo, illum posse a vobis avelli. Significavi id aliquoties serenissimo, qui & totus in hoc propendet, modo mutationis illius spes aliqua posset affulgere. Tu libere rescribe, quod de hoc negotio sentias, & an deferendi vel promovendi auctor sis, quod & tibi adhuc in aurem dictum velim. Vale, decus nostrum, & me ama. Dabam raptissime In Arce Heydelbergenfi. x. Calend. Mart. cıııııııı. Si ad amicos in Italiam scribis, qualiscunque dignitatis nostrae *Consilarii* sereniss. Electoris memor esse poteris, qui alteram praefecturae Principis Electoralis nunc abdicamus, inter ministros status sereniss. allekti.

EPISTOLA VIII.

EZEC. SPANHEMIUS

Nic. Heinsio.

Hagam.

GEminas tuas uberes adeo & officiosas una cum συγκατάλας ad amicos in Italiam tuos lubens lactusque accepi, Vir Amplissime. Non poteras luculentiori aut gratiori beneficio me obstringere, nec proluxi illius tui in me affectus, & paratae comitatis praesentius exemplum suppeditare. Italicum itineris cum fructu juxta ac delectu instituendi viam mihi aperuisti, quam tuo exemplo & monitis instructus calcare confidentior aggrediar. Amicos tuos Florentiae, Romae, alibique diligenter conveniam, & tui nominis fiduciâ propitium illorum usum facile impetraturum spero. *Holstenium* ad plures abiisse doleo, in cujus tum comitate tum eruditione non levem jam spem repositueram, & quem litteris etiam suis in mei gratiam serenissimus Elector conventum volebat. A *Petrucius*, *Schoppii* Thesaurum quovis thesauro elici posse unice optarem. Peritia certe hujus artis, Latine nimirum scribendi, omnia hujus & superiorum seculorum ingenia provocasse videtur. Romam vix credo ante autumnum proximum me visurum, quum adeundae mihi sint primo aliae Principum Aulæ, & in illa Urbe Dominâ moram per annum forte & ultra fingere sit praescriptum. Biennii spatium ad peregrinationem illam Italicam concessum, quo penitus noscendi singula, & usum aliquem rerum acquirendi facultas detur. Ita non tralatitiam spero voluptatem fore, quam ex peregrinatione illa mihi auguror, & quae, si pateris, mutuas has compellationes nostras non interrumpet, sed firmabit ulterius. *Grotio* Hagae Domini mei res agenti litteras tuas & mandata secure poteris committere. Illustrissimo *Thuano* me & mea qualiâcunque probari unice gratulor. Virum non dignatione solum aut adscitica famâ, sed ingentibus meritis & solida virtute illustrem, inter paucos colo & observo. Laudes ejus prolixè mihi ante dies paucos decantavit serenissima Electoris soror, cui praefixam ante Caesares nostros Epistolam placuisse summo Viro scribis. Libraria tua, quae nummos spectat, suppellectilis indicem sereniss. lubens accepit. Ex quo non omnes solum te

H h h h h 3

possi-

possidere video, quos hanc rem illustrasse noveram, sed quosdam etiam, qui mihi haecenus erant ignoti. Optimos & praecipuos habet serenissimi Bibliotheca, unde de reliquis etiam conquirendis sollicitum se ostendit. Plane tibi assentior praeter *Augustinum*, *Goltzium*, & *Ursinum*, studiose a me & accurate jam aliquotiens tritos, eosque tamen deficientes in multis, imparem longe esse hac in parte aliorum laudem & conatum. *Oconis* magna fuit diligentia, ut & *Tristani*, quem aliquotiens in annotatis meis ad Caesares Juliani, sed modeste & ita exigente materia, perstrinxi. *Savotus* Gallus utilia & indicta aliis suppeditat, reliqui ferme in parte tantum aliqua hujus antiquitatis excolenda & illustranda versantur. Graecorum vel inprimis nummos, qui & rariores & elegantiores ut plurimum cacteris, nemo haecenus ex professo praeter *Goltzium* tractavit, & quorum an major in uno loco copia ac delectus quam apud sereniss. meum occurrat vix credam. Habes hinc Indicem Consularium, quibus caret, in quibus data occasione conquirendis, operam tuam illi & studium non illibenter, ut spero, addices. Tuae illi longe gratissimae fuerunt, nec verbis meis opus fuit, quo gratiam illis majorem & blandum apud optimum Maecenatem aditum conciliarem. Vinum tandem post illas ambages ad vos delatum, nec ingrati saporis visum laetus accepit, ut & Epigramma elegantissimum, quo munusculum illud prosequi tibi visum est. *Gronovium* nostrum τὸ πᾶν Heidelbergensem spartam, de qua mihi cum sereniss. nostro sermo fuerat, non omnino rejicere ex tuis ὡς μάλα ἀσμένως intellexi. Facile in animum induco vincula illa & compedes, quibus in oris vestris irretitus est vir summus, & de quibus obiter injecta ab eodem in suis ad me litteris mentio. Possent & vicissim alia momenta accedere, quae patriae suae decus illud restituendi possent ansam forte praebere, & Academiam hanc nostram tanto beneficio mactare. Nihil mihi certe jucundius esset, quam spem illam fovere, quam non omnino abjiciendam innuis, & de qua ulterius alias & certius quidquam ad te scribendi erit locus. Adventus enim sereniss. Ducis Luneburgensis, sororis Domini mei, post tuas novissime acceptas uberiores de his cum sereniss. agendi occasionem mihi intervertit. Officia mea interim & cultum Magno & amicissimo Viro offeres, & Senecam ejus Tragicum gratissimum fore Domino munus significabis. Optarem serio ut ante iter Italicum, ad quod jam sarcinas colligere jubeor, intra dies forte non multos incipiendum, inspicendi ejusdem & assumendi itineris comitem mihi facultas daretur. Bongarsianae Bibliothecae missus ad me indiculus nihil praeter Lucani scriptos aut editos codices continebat. Nasonis tui memor ero, ubi Augustae, aut alibi in Germania in scriptos ejus libros incidero. Habes hinc pagellas duas, quae in transmissio ad te Caesarum Juliani libello deerant. Tuae ad *Fabricium* nostrum recte curatae sunt. Amplissimo & de me optime merito *Vossio* salutem hinc officiosissimam a me adscribi non detrectabis. Vale, noster ac litterarum amor. Dabam ὡς τάχιστα inter occupationes varias ix Mart. A. cicciclxvi. In Arce Heydelbergensi. Rescribit tibi hodie & Cl. *Vossio* sereniss. Elector, & pro communicatis Lucani Codicibus ac oblata a te opera gratias utrique agit.

EPI-

EPISTOLA IX.

E Z E C. S P A N H E M I U S

*Nic. Heinsio.**Hagm.*

Postremis tuis, Vir Amplissime, jam praeterita hebdomade satisfactum a me fuisset, ni interversa id praestandi fuisset occasio. Spero tamen has te adhuc in Belgio nacturum, quamvis de festinando in Sueciam itinere certiore feceris. Opto ex animo, ut tibi ex dignitate publica juxta & privata succedat, quod utrumque votum egregia tua merita facile adimplebunt. Habeo jam in Suecia sororem Genevæ a te visam, & Nobili Sueco à *Falkenberg*, Magni Regni Thesaurarii *Bond* ex sorore Nepoti, & praeclaris aliis *Oxenstiern* & aliorum id genus Procerum affinitatibus innixo, nuptam. Gaudebo si te offendat, & si eisdem cura tua non indignos censeam. De Lucano statues ipse pro arbitrio, & in quos incidet Codices, eos, prout negotia tua patientur, a tuis oculis non submovebis. Idem serio me in Nasone tuo facturum polliceor, ubi ejus rei aliqua se offeret opportunitas. *Emerici Bigotii* nomen & eruditio mihi jam aliunde constabat, & credo eum visum a me ante triennium in bibliopolio Francofurtensi, tempore Comitiorum praeteritorum. Lubenter quam poscis operam illi addicam, ubi Augustam venero, & si ejus rei facultas adhuc detur. Gaudebo quoque unice, si illum Venetiis offendero, & de Italicis rebus luculentam ab eo notitiam possim haurire. Mediolanum enim in reditu me demum visurum credo, quum ante Parmensis, Mantuana, Mutinensis, Florentina, Aulæ mihi sint adeundae, & deinde Romam migrandum. In reditu Genuam, Mediolanum, Turinum lustrabo, si Deus felicem exitum largiatur. Adventum sereniss. Ducis Luneburgensis aliquam itineri meo moram iniecit, sed quod prima jam die me aggressurum confido, compositis jam ad illud iter reculis meis. Mitto Consularium, qui desunt sereniss. Electori, nummorum Catalogum a me nuper omissum. Rem illi gratissimam feceris, si operam tuam hac in re possis illi praestare. Plura jam non addam, nisi ut me amore tuo, quo me beasti, complecti in posterum constanter pergās. Vale, Vir Amplissime, & feliciter rem gere. Dabam In Arce Heydelbergenfi vi Kalend. April. Anno MDCLXI.

EPISTOLA X.

NIC. HEINSIUS

*Ezec. Spanhemio.**Heydelbergam.*

Salvum te sospitemque in Italiam pervenisse unice spero. Nec nuncio ac-
 Sceptiore conveniri possum, quam qui confecti a te itineris certio rem me
 facturum est. Auguror enim ac certe persuasum habeo fore, ut plus emolu-
 menti ex hac peregrinatione ad te redundet, plus etiam voluptatis, quam
 aut ipse speraras, aut nos amici tibi eramus polliciti. In *Holstenii* tamen mor-
 te magnam jacturam fecisti, nec minorem in digressu *Furstenbergii* ab aeterna
 urbe, inque ejus ad suos reditu: quem Principibus Germaniae adscriptum, ac
 luculento Paterbornensium Episcopatu auctum esse jamdudum, credo, intellexisti.
 Invenies tamen ejus loco alios complures Romae viros insignes. Imprimis
 conveniendus est tibi *Carolus Antonius Puteus*, celeberrimi illius *Cassiani* ger-
 manus frater, in quo fraternae comitatis ac suadae multum reliquum est, ge-
 ner quoque ejus *Nicolaus Rondininius*, *Natalis* viri elegantissimi frater, cum
 quo arcta mihi necessitudo intercessit, dum in vivis esset. Conveniendus quo-
 que Illustrissimus Vir *Octavius Falconerius*, mei amantissimus, & *Alexander Pol-
 linus*, & *Leo Allatius*, & *Augustinus Favoritus*, quos omnes notos jam pridem
 habeo. Quorum agmen ducit eminentissimus Princeps *Franciscus Barberinus*,
 cujus eximiae comitati me devinctum semper profitebor. *Bigotium* suavissimae
 indolis Virum utinam in itinere obvium habeas! utinam & *Marquardum Gu-
 dium*, non enim dubito, quin horum consilia in multis instituto tuo praelucere
 possint. Illud vero scire vehementer exopto, an Oeniponti incideris in filium
Oberti Giphanii, tum quid de Nasone cum priscis membranis collato sit speran-
 dum. Romam ubi perveneris, fac, quaeso, ex te discam, quando novum ve-
 terum inscriptionum volumen visuri simus, quod *Carolus Moronus* jussu Emi-
 nentissimi *Barberini* jam pridem luci parat? flagro enim ardentissima siti per-
 volvendi tam desiderati operis, fac etiam cognoscam, an *Famiani Nardini* Ro-
 ma antiqua jam praelo commissa sit. Plurimum enim delector lectione scrip-
 torum rem Antiquariam Illustrantium. si quid praeterea hujus argumenti apud
 Italos luci adornetur, intellectu erit mihi per quam gratum. A *Carolo Dato*,
 Viro Amicissimo, nullas literas multo jam tempore accepi, quae res sollicitum
 me reddidit, ne valetudo male illi procedat. Illustrissimus *Thuanus*, cum in
 procinctu starem, se literarum nonnihil ad te velle dare, quo gratias tibi actu-
 rus esset pro *Juliani Caesaribus*, promittebat. Spero promissi memorem fu-
 isse. Praefationem tuam miris laudibus extollebat. Nam opus integrum nec
 dum perlegerat, ut est gravissimis negotiis plerumque obnoxius. Graecos
 nummos complures possidet *Franciscus Gothofredus*, eques Romanus. Nec
 scio an alibi selectiores inventurus sis. Gemmas antiquas *Franciscus Gualdus* mag-
 na

na copia: sed quas Regi Christianissimo supremis jam tabulis legavit, quod mihi significare non es gravatus, quid in serie consularium nummorum serenissimo Electori desit, rem gratissimam fecisti. Perspiciam brevi meos omnes, & si quid augmenti inde maximi Principis suppellectili antiquariae possit accedere, felicem me arbitrabor. Vinum, quod munificentia ejus ad me pervenit, optimi mercuris saporis est, nunquam id labris admoveo, quin vota concipiam pro incolumitate Herois incomparabilis. *Gronovius* postremis suis significabat Senecae suo! necdum colophonem a Typographis impositum esse, quod satis mirari non possum. Praefationem longe elegantissimam huic operi praefixit. In Nobilissimam Matronam sororem tuam diligenter inquisivi, inquiram adhuc diligentius, sed intelligo ruri illam cum Marito morari. Gratulor interim tibi tam splendidam affinitatem, nec deero salutationis officio, ubi cognovero illam in civitate esse. Lucanum in ipso itinere trivi non incuriosa manu, jamque cum xx. & pluribus scriptis codicibus contuli: sed quorum omnium instar sit unus Vossianus. Adeo nullum praestantis notae praeter hunc unum offendi. Naso meus lucem jam videt. Ejus exemplar ut meo nomine ad serenissimum Electorem mitterent, typographis jussi. Hodierno die literas ad ipsum Principem mitto, quibus operam in hac aula meam Celsitudini ejus offero. Vale, Vir Amplissime. Dabam Holmiae Suecorum. A. MDCLXI. XXVII. Augusti. Ad Silium Italicum non pauca notavi: sed desunt multa exemplaria, quae aut nulla aut perpauca inveniuntur antiqua. Recentiora nonnulla vidi in Vaticana & Medicea Bibliothecis, quae omnia ex uno eodemque descripta esse opinor, nec certus tamen scio, si quod a vetustis membranis subsidium affulgeret: auderem fortassis aliquando hunc scriptorem serenissimo Electori inscribere a me recensitum ac castigatum.

EPISTOLA XI.

E Z E C. SPANHEMIUS

Nic. Heinsio.

Holmiam.

EX non unis tuis ad *Falconerium* nostrum litteris intellexi, succensere te mihi non leviter ob praeteriti silentii culpam. Id vero eo molestius accidisse non diffiteor, quod vix ullam veniae spem mihi apud te relictam viderem. Ea enim adferebas, quae & suboffensum animum tuum arguebant, & amicorum me non minus ac litterarum desertorem non obscure traducebant, ἔπος δὲ ποῖον φύγεν ἔρκος ὀδόντων, Mi Heinsi? neque tamen credas velim, a me turpem hanc notam ita velle amoliri, ut si tecum componar, utramque jure mihi inustam non diffitear, sed non par hîc sumus bene compositum. Ego forte uno litterarum amore & cultu sustentare me possum & efferre, tu vero juvandi easdem & illustrandi frui meritissima laude. In colendis vero amicitiiis, ea soles versari sedulitate, ut negligentes merito dicendi veniant, qui tecum iis-

Tom. III.

Iiiii

dem

dem officiis sperent contendere. Ego vero ut non unum expertus sum minus hac in parte sedulum, ita hanc veniam illis haud illibenter indulgere soleo, & alii cuivis obtentui, quam violati amicitiae crimini, intermissa id genus officia continuo imputare. Idemque eo libentius facio, ubi experimentis aliis perspecta mihi eorum voluntas & fides, & vel locorum intervalla, vel alia rerum momenta, aliquem veniae locum relinquunt. Sed haec forte prolixius, ne gravissimae tuae accusationis nullam mihi rationem habitam putes. Illud vero statuas, velim, defuisse me quidem huic litterarum officio, nulli autem erga te studio & fidei, qui utrumque & privatim apud amicos, & publice etiam constanter sum professus. Dum enim herili mandato statio mea in his oris producitur; dum tui e Suedia discessus incertus pendeo; dum *Falconerius* noster eorum, quae te scire intererat, certiore facit, omissa mihi ad te scribendi occasio. Neque vero plenius aut certius, quam ab amico nostro cupiditatem tuam expleri posse existimabam, & supervacuam fore apud te in eadem sublevanda sollicitudinem meam, haud vane mihi videbar augurare. Rerum autem mearum statum, quem a te non alienum putas, eadem opera constare tibi quodammodo arbitrabar, protracta nempe mihi praeter expectationem mora in hac terrarum parte, cui proximus mensis finem, ut auguror, imponet. Confecto itinere Neapolitano, Siculo, & Meliteni, in urbe aeterna praecipua mihi fuit haecenus sedes. Parva vero accessio mihi ex illo itinere obligit, praeter illam voluptatem, quam inspecti celebrium locorum situs, & residua adhuc vestigia suppeditarunt. In exitu vero hujus Italicae peregrinationis, Genevam, Mediolanum, Taurinum & Helvetiam lustrandam dabit instituti itineris ratio. Fructum vero, si quaeras, quem collegerim ex diuturna illa in his oris mora, perexiguum illum oppido fatear, non locorum culpa, aut opportunitatum penuria, sed mei vel ignavia vel inscitia. Vestrum est, & tui similium, *Bigotii*, *Gudii*, singula temporum momenta in litterarum compendium vertere. Ne tamen abjecisse me plane illas vere existimes. Lucano, Juliano, aliisque quibusdam luculentis scriptoribus operam aliquam addixi. Lucani quidem Codices varios Vaticana, Farnesiana, & novissime Augustae Christinae Bibliothecae suppeditarunt, paucos tamen bonae frugis, & Vossiano Codice aetate ac bonitate inferiores. Neque tamen periisse plane censeo operam a me positam in iis conferendis, qui illam a me exigere videbantur. Juliani Caesares & Misopogonem haud perfunctorie a me recensitos & illustratos, cum accessione Epistolarum aliquot ἀνecdότων, proxima foetura dabimus. Meum vero circa rem nummariam studium, non levia hinc vel incrementa vel subsidia nactum est. Aliquod ejus specimen expresserunt hinc mihi cum amicorum desideria, tum iussa serenissimae Reginae, quibus factum ut Dissertationem prolixam & verbosam de *Praestantia & usu Numismatum antiquorum* evulgarem. Acquievi eo libentius huic instituto, ut aliqua otii mei in his oris ratio mihi aliisque constaret. Exemplar illius operis ad te curavi per *Datum* nostrum, de quo ita statues, ut veniam festinato labori haud difficulter sis largiturus. Neque enim mihi blandior, ob benigna lectorum, quos hinc

hîc passim experitur, judicia. Plura & meliora alias dabimus, qui & locupletem Thesaurum Numismatum ἀνεκδότων adornavimus & ad ornandum ac illustrandum hoc studium plurima nova nec ingrata videmur nobis annotasse. Multos hîc video hujus mercis avidos, sed paucos, qui in ea aestimanda verum pretium ponant, aut ultra valorem & τὸ ἀκρίβδηλον nummorum declarandum assurgant. Graecos Reginae nummos aureos & argenteos praeterita hyeme in suas classes digessimus, ut ea parte *Gottfredum* talium minus peritum subleveremus. Valet adhuc optimus senex, & Reginae Antiquarii partibus ac officio fungitur, postquam omnis ejus supellex nummariae gazae ejusdem Augustae accessit. *Chiffletius* junior eidem Reginae a sacris, parat illustrationem aliquot Nummorum, & retractationem sententiae suae olim vulgatae de nummis aereis Othonis, dum aereum & Graecum Caesaris illius nummum ex *Gottfredi* & aliorum antiquariorum fide genuinum asserit, qui Gazam ejusdem Reginae exornat. Adiunget alia, quae nomine meo voluit inscribere. De rebus aliis litterariis plura & meliora te docebit *Falconerius* noster, πολλῶν ἀντ' ἑξὶ ἀλλων. Fervet opus *Allatii* contra *Chreygthonum*, editorem Concilii Florentini, ubi in vertendis Graecis ejus vel audaciam vel incitiam traducere aggreditur. *Pallavicini* Cardinalis Historia Concilii Tridentini vernaculo idiomate conscripta novissime prodiit, ex secundis ejusdem curis. Latine eadem prodibit, in qua recensenda bonas horas perdere cogitur amicus noster. *Pachymerius Possini* cura & Cardinalis *Barberini* munificentia brevi hîc typis committetur. Spes aliqua adfulget Stephanum *Holstenii* aliquando proditum, qui ejusdem Cardinalis cura, Graeco amanuensi ad describendum ante paucos dies datus est. Non exiguos stimulos addidi *Benedicto Mellino* custodi Bibliothecae serenissimae Reginae, ut praeclarum illud opus eidem Augustae creditum, non ulterius moraretur eruditorum desideria. Versatur nunc vir optimus in disponenda Bibliotheca suae curae credita, quae hactenus cum tincis & blattis luctabatur, & quam publico usu destinavit Regina. Petronianum fragmentum varia hîc experitur hominum judicia, in quo certe πολλά μὲν ἐσθλά, πολλά δὲ λυγρά. *Schefferi* *Tactica* & alia opuscula avide exspecto, qui litterarum dignitatem egregie tuetur in illis oris; ubi regnabat olim barbaries. Hoc de me iudicium, licet infra viri eruditionem & diligentiam, eidem per te cupio innotescere, qui & propiorem amicitiae illius usum oblatum mihi iri non despero. Profectionis illius in Sueciam meae, cujus in novissimis tuis ad *Falconerium* meministi, injecta mihi mentio, a cujus nutu pendeo. Quae futura mihi tamen sit sedes post reditum meum in Aulam optimi Principis, nondum certo possum definire, quamvis vix stabilem illam videar mihi augurari, in hac negotiorum, quae hodie ingruunt, mole. Illud credas velim, tuo complexu nihil mihi gratius aut jucundius fore. Placandum enim te mihi haud difficulter spero, & frigus illud, si quod tibi in illis oris adversum me obrepfit, aestu cultus & amoris in te mei omnino discussurum. Vale, Vir Amplissime, & prolixae confabulationi ignosce. Dabam Romae xv Augusti cicioclx. *Falconerius* noster mittet ad te fragmentum Gr. ex Vaticana depromptum. Illud una cum litteris

meis commode & secure ad te per *Grotium* curari posse censui. Expectatio hujus fasciculi in causâ fuit, ut recentiores a Falconerio litteras sis habiturus meis jam septimana praeterita exaratis. Si rescribere non dedignaris, tuae optime per *Grotium*, res Hagae agentem serenissimi Electoris, in Aulam nostram curabuntur, quae me ubicunque sim terrarum, offendent. Has ad sortorem litteras tuae fidei commendo.

EPISTOLA XII.

E Z E C. S P A N H E M I U S

Nic. Heinso.

Holmiam.

DIci non potest, quam jucundae mihi fuerint tuae, quas curante *Fabricio* nostro ante dies paucos accepi. Id unum me sollicitum habuit, me in eo a te officio praeventum, cujus mihi primae erant partes occupandae. Id enim non affectus solum in me tui merebatur constantia, & beneficiorum magnitudo, sed loci vel inprimis illius, quo per menses aliquot avidissime fruor, genius. Aequum enim erat, ut quem blandum ac jucundum fueras pollicitus, quem commendatitiis ac monitis tuis conciliaisti propitium, eum gratum erga te & memorem tibi quodammodo praestarem. Vides jam ex iis, Vir Amicissime, quam optimum ego te vatem praedicem, qui tot mihi Italici itineris commoda & delicias, non inani spe aut fallacibus verbis es auguratus. Utinam ea singula possim tibi recensere, & confectae ad hunc diem peregrinationis jucundissimam apud te historiam plene retexere? Augustinam Bibliothecam, quantum properanti licuit, in diligentissimi *Bigotii* commodum, χρυσόπρεμος ornamentum, te monente, inspexi. Neque tamen operae illius fructum retuli, ut Divi illius operum expetiturum Judicem assequerem, quem accuratiori indagine investigandum Bibliothecae illius custodi commisi. Oenipontinam Aulam, Iherili mandato instructus, conveni, per plures etiam dies in angusto alias loco singulari Principis comitate detentus. Quae de propenso tuo in serenissimum Electorem studio & cultu nunciaisti, eidem & longe accepta. Totidem verbis retuli, quamvis luculentius tua ad eundem Epistola id praestiterit. Inclusa, ad affinem & sortorem tibi committere audeo, & quae vel tu vel illi rescribetis ad D. *Grotium* Hagam poterunt transmitti, qui eadem suis ad seren. Electorem litteris includat, ita secure & citra ambages deferentur. *Carolus Antonium Puteum* aliquoties, sed frustra conveni, litteris a Dato. nostro ad eum instructus. De *Oberti Gifanii* filio, sedula mihi fuit inquisitio, in eo tamen infelix, quod Domini mandata hominem, paucis ante adventum meum diebus, ad peragendum aliquid in districtus illius praefectura officium ablegaverant. Commisi tamen homini noto, & in illis partibus gratiofo, expetiti Ovidiani Codicis curam, quam explere in se receperat. Conveni eum non ita pridem, ut datam fidem liberaret, & proximis litteris praestitae a me aut ab eodem operae certior

tior tibi nuntius constabit. Venetiis per dies non ita multos commoratus Proceres aliquot, eruditos ferme, nullos salutavi. *Franciscus Loredanus* ab urbe aberat, & *Nicolaus Grassus* pridem rebus humanis exemptus est. Patavii *Octavio Ferrario* tuas obtuli, & prolixa ab eo, tum comitatis, tum benevolentiae officia intra dies paucos expertus sum. Eadem mihi voluit absenti constare, & contractae alicujus inter nos necessitudinis mihi gratissimam fidem praestare. *Petrucium* avarum Thesauri Schoppiani custodem adire, sed non emungere in publicos usus licuit, qui illum, ut Pici aurum suum, defossum tenet, nonnisi grandi aere ab intento & vigili custode eliciendum. Mantuae, Parmae & Mutinae nulla mihi litterarii profectus, multa Principum & Aulicorum comitatis argumenta contigerunt. Nisi quod in primam illam classē lubet revocare, probatam mihi Mutinae, singularem Comitatus *Girolami Gratiani*, Poëtarum hodie Italicorum Principis, & a discessu meo saepius mihi obsignatam benevolentiam. Florentiae potissimam aestatis, & autumnī partem exegi, idque, quod vel me tacente intelliges, incredibili cum voluptate. Nec tam illam mihi nuptiarum solemnīa, & aetatum omnium ad ea visenda confluxus, quam urbis ipsius illecebrae, loci genius, incolarum suavitas, Bibliothecarum usus, eruditorum denique & elegantiorum hominum consuetudo conciliarunt. Quid tibi jam singulos commemorem, quos omnes notos jam pridem habes & unice tibi addictos, *Carolus Dati*, *Valerium Chimentelli*, *Ferdinandum del Maestro*, *Carolus Strozzi*, *Capponi*, *Marucelli*, *Erminii*, *Cavalcanti*, *Coltellini*, *Leffini*, *Ruccellai*, *Borelli*. Ut praeteream alios, *Franciscum Redi* Magni Etruriae Ducis Medicum, Graecis & Latinis litteris eruditissimum, *Luigi Strozzi*, *Laurentium Magelotti*, *Antonium Magliabechi*, & plures alios, qui a tuo, ex Italia discessu ingenio & eruditione, ac insigni vel inprimis comitate, florentissimae urbis secessum gratiorem adhuc effecerunt. Taceo effusam Principum humanitatem, serenissimi inprimis *Leopoldi*, quam mihi immerenti luculentis voluit documentis constare. Laurentianam & reliquas Urbis Bibliothecas, quantum per occupationes alias licuit, excussi, scriptis illam eximiis & Graecis vel inprimis codicibus facile licuit vel primo obtutu augurari. Juliani Caesaris quaedam contuli, & scriptoris veteris Christiani eruditum contra Manichaeos ineditum opusculum exscripsi. Lucanum cum scriptis aliquot libris commisi, sed non admodum a vetustate aut bona in iis fruge meo iudicio commendandis. Plura ad eum, ut spero, conferet diuturnior in hac urbe & reliqua Italiae mora, quam, Deo dante, ad minimum ultra annum adhuc producere dabitur. Meum vero circa nummos veterum studium plurimum jam ad hanc diem juvit Italica profectio. Patavii plures lustravi; Mutinae Graecos & Romanos magna copia mihi dedit inspiciendos serenissimus Princeps horum studiosissimus, vetus Ferrariae Ducum peculium. Florentiae praeter *Gaddianos* & *Marchionis Nicollini* non contemnendos nummos, totam eorum Magni Ducis gazam singulari Principis *Leopoldi* comitate inspicere & excutere propius licuit. Immo majori adhuc felicitate praeter Graecos complures, ultra mille & quingentos ineditos Imperatorum nummos in schedas meas mihi

referre contigit. Adeo ut copia ac delectu ineditorum & rariorum aereorum vel inprimis nummorum anteferendum hoc reliquis omnibus Europae Musaeis facile credam. Farnesianum etiam Thesaurum obiter his diebus inspexi, ad quem alias reconditum serenissimi Ducis Parmae litterae mihi aditum fecere. Pescennii in eo Nigri Medaglionem, ut vocant, aeneum magnum & in Europa, ut fertur, unicum, ac spintriarum & libidinum Tiberii in sex aut septem aereis vestigia deprehendi. Ottonem aeneum genuinum Ducis Mutinae Musaeum jactat, sed de quo, utut alias eximio, sententiam adhuc suspendo. Alias Romanorum thecas hoc peculio insignes, *Barbarini* Cardinalis, *Gottfredi* & plures brevi cum Deo avidis oculis lustrabo. Ex quo enim ante septimanas aliquot in aeternam Urbem appuli, plura, ut auguraris facile, novum & curiosum advenam detinuerunt. Insignem Purpuratorum aliquot Patrum, & Cardinalis vel inprimis *Barbarini* comitatem, ac eruditorum aliquot, *Alexandri Pollini*, *Leonis Allatii*, Abbatis *Gradi*, Patris *Athanasii Kircheri*, & *Vicarii* generalis Societatis Paduae olim sum expertus; sed omnium instar mihi *Octavius Falconerius*, genere, ingenio, & eruditione & ingentibus erga me meritis omnem meam praedicationem jam supergressus. Contractam cum illo felicibus auspiciis ante menses aliquot Florentiae necessitudinem, ferme individuam constringere indies meo commodo non cessat. Tibi vero & *Cappellano* nostro primam virtutis illius notitiam adscriptam grato animo fero. Ille etiam in te colendo assiduus Ovidium tuum avidissime exspectat. *Datus* noster Florentiae vivus & sospes exemplaria illius aliquot se nuperrime accepisse significavit. Vale, Vir Nobilissime, & me ama. Romae *xxiii. Decembris cicioclxii*. Ab Illustrissimo *Thuano* nihil litterarum accepi, abunde mihi satisfactum, affectum ejus & favoris de meis in Julianum curis judicium a te rescire. De libris, quos postulas, de iis se scripturum recipit *Falconerius* noster. *Octavius Ferrarius* meditatur philologicas in Plinium seniore curas, & historiam rerum hoc seculo in Italia gestarum. *Val. Chimentellius* parat opus affectum de *re donaria veterum*. *Leo Allatius* Historiam Concilii Florentini e *Vossii* Musaeo depromptam falsi convincere aggreditur. Silii tui Italici si aliquid occurrit probae notae memor ero duplici nomine tui, & Patroni, quem vis illi adsciscere. Festinationi ignosces & de rebus tuis fac nos certiores.

EPISTOLA XIII.

NIC. HEINSIUS

Ezec. Spanhemio.

Romam.

VIduari tanto tempore suavissimis alloquiis, Vir eximie, equidem impatienter atque indigne fero. Scripsisse tamen te, ex quo Alpes transgressus es, & *Ludovicus Fabricius* & *Carolus Datus* mihi persuasum cupiunt. At ego sancte affirmo, nec tuas me vidisse ullas, ex quo Aprili mense anni proxime clapsi

elapsi ex patria emigravi, nec de te intellexisse quicquam, nisi quod amici duo illi nostri nuper admodum significabant & valere te, & in aeterna urbe aetatem nunc agere. Vide igitur, quarum opera utaris in curandis tuis, quas impofterum ad me dabis: nam quicumque tandem sunt, ad quos haecenus a te itum est, nae illi parum sese sedulos in hoc negotio praestitere! Lucani tui me meminisse, quem cum pluribus vetustis exemplaribus jam contulerim, ex ultimis meis credo cognovisti; cujus antiquum codicem ex Galliis postea sum nactus a *Menagio* mihi donatum. Nasonem meum vicissim tibi commendo; Giphanianum exemplar an Oeniponti etiamnum exstet, uti sperare jussus eram, cupio doceri. Curae priores in scriptorem illum jam pridem luci commissae sunt. Earum exemplar si a *Carolo Dato*, Viro Clarissimo, non feres, ego tibi servabo. Nunc Claudianum curis secundis recenseo. Postea aut Silio Italico, aut Valerio Flacco manus admovebo. Scriptor uterque etiamnum mendosissimus est, & dignus tamen meliori fato. Alterutrum serenissimi Electoris nomini inscriptum ac dedicatum velim, si vetustum aliunde codicem indagare possum, cujus opera aut hic aut ille emendatiores prodeant. Valerii exemplaria Vaticana *Langermannus* meae in spem gratiae excussit, quorum unum valde antiquum, nec magnae tamen id rei. Silii vetusta nusquam inveniuntur, quod sciam, ut ad recentiora sit confugiendum, quae non parvo numero in Medicaea ac Vaticana Bibliothecis servantur. Si propositum hoc pro spe atque expectatione haud cesserit; de L. Apulejo a me cogitabitur, scriptore ut perquam eleganti ac erudito, sic a librariis pessime affecto. Veterimum ejus exemplar in Vaticana exstare *Jacobi Sirmundi*, Viri doctissimi, ad Sidonium Apollinarem observationes me docuerunt. Utinam fit, qui ejus evolvendi & cum vulgatis libris conferendi molestiam non subterfugiat, sed minimas etiam lectionum discrepantias, atque adeo ipsos vitiosae scripturae naevos accurate enotari necesse est. Plurima ex conjecturis in illo castigavi: quibus si vetusti codicis subsidium accesserit, auguror fore, ut dicar non male meritis esse de tanto scriptore. Lutetia scribitur *Guidonis Patini* filium cogitare de nova editione adornanda Familiarum *Fulvii Ursini*, quibus luculentum veterum numismatum auctuarium sit additurus. Vale, Vir Eximie, & me ut, haecenus, constanter perge amare. Holmiae Suecorum A. MDCLXII. a. d. IV. Febr. Gregor.

EPISTOLA XIV.

NIC. HEINSIUS

Ezec. Spanhemio.

Romam.

IRascebar, fateor, tibi, sed quantum amantes solent, quod cum in ipso itineris Italici procinctu, si meministi, frequenter te mihi scripturum esse, pollicitus, vix tamen scriberes, ex quo in Italiam sedem fixisses. Nam qui assidua com-

compellatione ex Germania me dignatus eras etiam tunc, cum nullum scriptio-
nis argumentum occurrebat, videbaris equidem multum a te ipso degenerasse,
ac mutatus esse, qui Harpocrati litabas, illic locorum positus atque constitu-
tus, ubi, quod scribas, nuncquam desit. Quippe ut jam demus, nihil egisse,
nihil molitos esse homines per Italiam tot litteratos tanto tempore, quo illic
haesisti; at ipse regionis longe amantissimae Genius, ipsa oblectamenta tua, vo-
luptas ipsa numquid suppeditare abunde poterant, quo ad pristinum necessitu-
dinis usum excitareris? Videbas non deesse illic Viros eruditione & natalium
splendore praestantes, qui post tanta temporis ac locorum intervalla mei
etiamnum frequenter meminissent, idque studium suum per litteras haud raro
testarentur. Id exemplum tibi imitandum erat, si te ipsum imitari nolebas.
sed mecum facile in gratiam rediisti, suavissime Spanhemi. Utinam & foro-
rem tuam, matronam lectissimam tam placatam experiaris! miratur illa &
concoquere non potest, toto biennio, ne quid plus dicam, se alloquiis tuis
fraudatam fuisse: idque silentium tam pertinax multo cum sui contemptu con-
iunctum esse quiritatur: suscepi quidem causam qualemcumque agendam, sed
nullo cum successu. Ad tuam igitur facundiam tuumque patrocinium tibi
confugiendum est, si absolvi cupis. Mihi, ne actum agam, aliud in posterum
erit agendum. Commentarios tuos de usu & praestantia vetustorum numisma-
tum nec vidi haecenus, nec quando sim visurus, exploratum satis habeo. Ne-
gabat quippe *Datus* noster nuperrime fuisse haecenus praesto opportunitatem,
qua libellus ad me tuto perferretur. Gaudeo interim satis fecisse te hoc
scripto Viris in urbe praestantibus, cum gloriae tuae inter praecipuos egregie
studeam. Ex Italia si jam in aulam serenissimi Electoris rediisti, quid de pro-
fectione ad nos tua sperandum sit, cupio doceri: eam enim ni maturabis, vix
complexus tuos & jucundissimum adspectum hinc terrarum, quo frui unice
tamen velim, dabitur mihi praestolari. In Sicilia locupletes Bibliothecas ex-
stare saepe numero audivi probeque codicibus, tam Graecis, quam Latinis
manu exaratis instructas: nam mihi insulae illius perlustrandae facultas non est
data. Quapropter aveo ex te cognoscere, an famae res ipsa respondeat. Nam
apud Melitenses nihil tale adservari opinor, aut in Neopolitano regno. Si ur-
bem Principem excipimus, in qua moram trimestrem traxi, excussis omnibus
propemodum vetustorum codicum scriniis, quotquot illic commendantur. De
Juliani satyris edendis si cogitare pergis, auctor tibi sum orationes nonnullas
scriptoris ejusdem ineditas, quae in Britannia asservantur, & quorum copia
per *Patricium Junium*, *Dionysio Petavio*, post Juliani editionem ab illo cura-
tam, fuerat facta, nancisci contendas. Christinam Augustam de promovenda
re litteraria etiamnum cogitare vehementer laetor; quod rumor publicus spar-
gebat negligi & contemni ab illa eruditionis nomen, quamquam ultimo con-
gressu talem omnino sese mihi sistebat, qualis a te describitur. *Scheffero* jam te
conciliavi. Edidit Vir optimus nuper praeter commentarium de Pythagorico
Italorum dogmate, auctores duos Graecos ineditos, rem militarem spectan-
tes Arrianum nempe & Mauricium tacticos, haecenus ineditos. Nunc sub
praelo

praelo habet libellum de stylo, cui subjuncturus est Petronii fragmentum illud nuper inventum, una cum animadversis suis. Nihil praeterea ex his regionibus nunciare possum. Illud anxie, atque unice te rogo, ut serenissimo Electori persuadeas, nihil me in rerum naturâ esse ejus virtutibus addictius. Vale, mi Spanhemi. Exarabam Holmiae Suecorum cicioclxv. a. d. xviii. Kal. Februarii.

EPISTOLA XV.

NIC. HEINSIUS

*Ezec. Spanhemio.**Holmiam.*

Non hic ego operose diluam, Vir Amplissime, longi & pertinacis quidem silentii culpam. Illud unum haud sublestae vel incompetae fidei dicam; ea nempe ex Italia reducem excepisse tempora, quae a colendis necessitudinibus meis vel invitum plane avocarunt. Nosti aliunde procul dubio, qui apud nos aestus animorum repente exorti, & quam proterve ab aliquo tempore in nos grassata sit male fausta Insulorum e vicinia societas. Hinc crebra mihi locorum mutatio, dum optimo Principi placuit interioribus consiliis suis admotum, aut componendis, si fieri potuisset, ingratis litibus, aut apud externos causae nostrae adferendae incubare. Unde mihi cum Musis nostris non solum, sed cum suavissimis praestantissimisque earum vel cultoribus vel alumni, continua ferme divortia, nec ea animorum, sed locorum aut temporum avocamentis. Illud enim unice velim fixum tibi immotumque, nihil unquam animo meo decessisse, aut decessurum in posterum de pristinae consuetudinis tuae jucunda semper ac duratura recordatione. Ejus ego rei testes advoco quotquot in Italia, Gallia, aliisque cultioribus terrarum locis singularis tua virtus, eruditio, & in colendis amicitii sedulitas tibi passim conciliarunt. Quod itaque semel inter nos transactum cupio, patere ut ego constantem debitumque tui cultum tibi etiam possim approbare, quamvis minus frequenter, quam decuit, scriptis ad te litteris testatum consignatumque. Id enim & sanctissimae amicitiae leges postulant, & avita necessitudinum jura, litterariis hisce officiis firmiora longe & sanctiora. Sed de his haecenus. Quid ab aliquot annis Musae tuae parturiant, cupio imprimis a te ipso edoceri. An praeterea diuturnus adhuc hospes futurus sis in ultimo illo septentrione, cui Romanae omnis elegantiae ac eruditionis domicilium vel solus multos jam annos praebuisti. Quid agit *Schefferus* vester, aliique, quos patrocínio ibi tuo & exemplo ad meliorum litterarum cultum excitasti. De Italiae, & maxime aeternae urbis elegantioribus viris supersedeo ad te scribere, qui sciam nostros *Falconerium* ac *Dati* abunde & sollicitè haec omnia ad te perferre. *Nardini* Romam a priore vulgatam nondum nactus sum; longae enim ambages, antequam sedulitatis illorum fructus ad nos perveniant incolumes. *Chiffletius* junior, Romanus hospes

Tom. III.

K k k k k

&

& Christinae Augustae a sacris, novissime aliquot Epistolas ad me transmisit, quibus novem aut decem selectorum Numismatum explicationem complexus est: quam vellet appendicis loco Dissertationi meae annecti. Vix enim ex Italia reversum compellavit Typographus nostras, ut recudendae ejusdem copiam illi facerem. Neque illibenter sum adensus, qui auctiorem eandem, & ipsis rarissimorum aliquot Numismatum iconibus ornatam, prodire denuo in publicum cupiebam. Aliud enim ferme agentii, & inter alia meditamenta exciderat mihi prior editio Romana, vel in ea tenuitate benignos & plaudentes praeter spem omnem lectores nacta. Inde mihi orta quoque fiducia, secundas demum curas nostras eruditis tuis oculis subjiciendi; quod jam pridem adimpletum foret, si per continua temporum & negotiorum nostrorum avocamenta licuisset. Spero moram illam mihi omnium maxime ingratam, varietate rerum & argumenti, ac inprimis contemplatione praestantissimorum id genus monumentorum, iri compensatam. Neque enim defuerunt aut desunt Proceres & amici Galli Italique, ex reconditis suis Cimeliis ea subministrare, quae identidem ab iis ad ornamentum & commendationem hujus memoriae soleo etiam efflagitare. In quo censu Christinam Augustam, Mediceos Proceres, aliosque id genus cum meritissimae laudis praefatione recenseo. Novissime etiam mea ad Christianissimum Regem ablegatio, mihi acceptissimam opportunitatem praebuit, excutiendi quidquid in hoc genere monumentorum, Regium, Colberti, Sevii, Seguini, Patini, aliaque Cimelia recondunt. Adeo ut vix credam hodie exstare, qui aut plura hujus notae inspexerit, aut ad illustrandum aliquando omne litterarum genus in usus suos reposuerit. Inde nata mihi etiam de Consecratione Veterum Commentatio, quam ex interiori juxta Gentilium & Christianorum antiquitate eruere & illustrare sum adgressus. Multa enim, immo longe potissima indicta haecenus, quae ob nobilissimi argumenti dignitatem & praestantiam omnino expendi merebantur. Adfecta etiam quaedam alia habemus inter schedas nostras de *Primatu Urbium*, & *Philologicas ad Leges aliquot veterum Jurisconsultorum* observationes. Vides ut praefiscine otii mei qualiscunque rationem constare tibi cupiam, ne me litterarum omnem amorem & curam, quod videbaris mihi aliquando ominari, plane credas abjecisse. Patinus noster, quid monere antea debueram, Caesareos nummos e Lominiano Thesauro, cujus hodie possessor est, depromptos & perpetuis Commentariis illustratos brevi in lucem emittet. Multus mihi de te cum illo, & praestantissimis amicis nostris Capellano, Menagio, Bigotio, aliisque sermo, intra exigui illius temporis moram, quod in principe illa litterarum urbe novissime transégi. Vale, Amplissime & amicissime Vir, ac vel silentem ama. Dabam In Arce Heydelbergensi xx. Augusti MDCLXVI.

EPISTOLA XVI.

E Z E C. S P A N H E M I U S

*Nic. Heinsio.**Holmiam.*

Ubi terrarum mihi quaerendus esses diu est, quod ignoravi, Vir Amplissime. Nec satis exploratum id habebam nuper, cum Poëmatum meorum recens editio munus a me mitteretur serenissimo Electori. Misissem enim & ad te sub nundinas Francofurtenses libelli exemplar per *Elsevrios*: nunc quidem id ipsum praestare jussi sunt, nescio tamen an satis tempestive. Poteram fortasse non nihil rescivisse de te ac rebus tuis ex Cl. *Blumio*, qui serenissimi Electoris res in hac aula nuper agebat. Verum is consuetudinem meam quodammodo subterfugit, sive partibus Britannicis plus aequo studens, sive vitae civilis parum hac in parte intelligens. Nam cum moris per aulas sit recepti, ut qui ex publicis Principum exterorum ministris recentes eo adventent, adventus sui certiores alios ejusdem ordinis ibidem locorum degentes per suorum non neminem faciant, nec aliter a Cl. *Blumio* factum didicissem apud Britannicum & Brandenburgicum ministros, quos etiam ultro prior convenit, apud me nihil horum ille praestitisset; nec ignorarem ego quid quantumque observantiae a me serenissimo Electori deberetur, nisi ex meis non neminem, qui & adventum illi gratularetur, & officia mea operamque in omnibus offerret, tum significaret simul cum morbo mihi negotium esse, atque hac de causa fieri, quod ipse salutatione haudquaquam defungi possem: per mensem enim solidum sub illam tempestatem lecto haerebam adfixus, cum morbo diuturno luctatus graviter. Expectavi, fateor, ut ad aegrum ventitaret ipse, quem amicum mihi veterem credebam, uti Orator Gallicus caeterique publicis negotiis admoti faciebant haud infrequenter, praeter internuntium Britannicum, eumque solum: aut si id nollet, paribus saltem officiis certaret mecum, ac valetudo mihi quo loco esset per suos curaret inquiri. In utroque mea me frustrata est expectatio; hinc subortum inter nos frigus & consuetudo omnis interrupta. Verbosius paullo rem haud magni momenti sum narrando prosecutus, ut esset apud vos, qui causam meam ageret, si neglecti officii fortassis apud serenissimum Electorem insimularer, cujus summa aequitas abunde mihi est perspecta. Similem ferè controversiam memini fuisse agitatam apud nos jam ante septennium *Johannem Friquetum* inter & *Petrum Grotium*, quibus utebar satis familiariter. *Friquetus* cum significasset mihi, se conciliari velle per me *Grotio*, quas ego partes in me recipiebam, conquestus est *Grotius*, negligentius se habitum a *Friquetis*, qui sub adventum in Haganam aulam suam, clam habuisset rem omnem, nec sibi significari curasset, nec opinor quicquam consuetudinis cum altero intercessisse, etsi serenissimo Electori cum Caesare sic satis conveniebat. Nunc ad privata reveniendum. Quae tu de utilitate veterum numismatum es

commentatus laudari scio a plurimis. Ipsum hunc commentarium tuum non vidi, quem curae secundae ornatiorē propediem, sic fama fert, dabunt. Ego post Claudianum a me in lucem datum, quem munus accepisse debuisti meo nomine, in Nasonem curas alteras fere paratas habeo. Tum in Maronem, Silium, Valerium Flaccum, Prudentium observata, sed difficultati horum temporum nimis convenientia, per quam fit, ne suprema iis manus a me imponatur. Nam ad Lucanum quae annotavi haud pauca, in ordinem justum nondum sunt digesta. Tibi tranquilliorē, quam obtigit mihi, vitam exopto, & in commodum posteris cessuram. *Schefferus* post missos in publicum commentarios de Upsaliā antiqua, deque secta Pythagorica, ac fragmento Petronii Dalmatico, nunc rem veterem navalem, ac fabellas Phaedri curis secundis illustrat. Plura nuntianda nunc non succurrunt. Vale, Vir Amplissime, & summi Principis favorem conciliare, ut solebas, mihi perge. Exarabantur Holmiae Suecorum VII. Octob. CIOIOCLXVI.

EPISTOLA XVII.

EZEC. SPANHEMIUS

Nic. Heinsio.

Hagam.

Dici non potest, Vir Amplissime, quam sincero me gaudio perfuderit ea, qua me beasti exeunte Autumno anni modo elapsi, Epistola. Inde enim nihil amoris erga me tuo, quod subverebar, decessisse, & contractum, si quod fuit, ex praeterito meo silentio frigusculum, etiam glaciali sub ur̄sa discussum omne ac depulsum facile intellexi. Quo certe nihil mihi jucundius potuit contingere, qui veterem necessitudinem nostram in hac terrarum, quae nos disjungunt, intercapedine sartam tectamque unice semper optavi, & si non litterarum frequentia, saltem grata tui memoria, & crebro de te cum amicis communi sermone, candem haud perfunctorie colui. Ea scilicet ab annis aliquot fuerunt mea tempora, quae tum perpetuis ferme peregrinationibus, tum alienis quam maxime ab omni Musarum consuetudine avocamentis, exemptum districumque habuere. Hinc, ut ad novissima veniam, exacta mihi Heilbrunae hyems praeterita, ubi plenipotentarii, quas vocant partes, nomine clementissimi Heri sustinui, in causa, quae illi ab annis aliquot cum vicinis vertitur, & quae duorum, quod non ignoras, Regum arbitrio veniebat decidenda. Eum vero huic negotio successum benigne indulsit ὁ ἐπὶ πᾶσι, ut & potior causa victrix evaserit, & cum avitis serenissimae Domus juribus, tum universo huic tractui, lux & salus restituta videantur. Venies tu quoque, sat scio, Vir Amplissime, & si id etiamnum pateris, amicissime, in partem hujus voluptatis, qui insitum rerum nostrarum studium, & serium maximi ejusdemque tui amantissimi Principis cultum nondum deposuisti. Illud enim fixum tibi ac persuasum cupit, nihil detractum de propenso illo, quo in te fertur, animo, & ingenii ac monumentorum,

torum, quae subinde illi communicas, candidissimo aestimatore. Quae de Cl. *Blumio*, & neglectis tecum officiis amice querebaris, serenissimo Electori non reticenda credidi, missa ad eum, (quum alibi tum agerem) quam ad me eo nomine dederas, Epistola. Unde quum tenor ejusdem Cl. *Blumio* innotuisset, longa ille data ad me Epistola, omnem hujus & rei culpam a se amovendam, & in te nescio quibus argumentis transferendam sategit. Neque tamen ita vel mihi vel aliis hac in re satisfecit. Novi enim te in colendis amicitiiis inter paucos sedulum ac officiosum, & eorum, quae vitae civilis usum & consuetudinem spectant, gnarum inprimis ac peritum. Neque etiam tibi reticebo, (quod nec longius adhuc vellem emanare) cum, de quo querebaris, amicum nostrum, herili gratia, a tempore non ita multo excidisse, & de transferendis alio fortunis ac rebus suis cogitare. Agnosces saltem non defuisse me causae tuae, etiam cum eorum, quos arguebat, neque male alias de me meritorum, offensione suscipiendae. *Καὶ ταῦτα μὲν δὴ ταῦτα.* Poëmata tua, nova & luculenta accessione locupletata, & nuper ad serenissimum Electorem tuo nomine transmissa, non sine magna voluptate tractavi. Illa vero & te in bicipitis jugi fastigio, & cum ambigua inter te & Nasonem tuum palma, nobis non solum, sed post futuris etiam aetatibus ostendent. Beatum te illis felicissimi ingenii opibus, quas ad amicorum laudes in remotissima saecula transfundendas copiose adeo profers ac libenter. Eorum vero Poëmatum simul & Claudiani tui, quae spondes exemplaria, gratâ manu, uti voles, excipiam. Quae ad reliquos, quos memoras, Poetas commentatus es, vellem per tua tempora brevi liceret in lucem & manus elegantiorum hominum devenire. Ubi meas Lucano dabitur admove, quas ab annis aliquot habui, tum exactor veniam eorum, quae ad praestantissimi vatis ornamentum solus mihi videris conferre posse, & quorum pridem fidem tuam obstrinxisti. Commentaria mea de Nummis antiquis priori copiosior longe & ornatior, non tam absentiae & temporum nostrorum fatis, quam sculptorum, quibus ducenta circiter aera cudenda tradidi, ignavia moras trahit. Quod si jam requiescere aliquantum ab aliis curis, aut stabilem aliquamdiu sedem hîc dabitur figere, videbo ut negotium illud brevi confectum reddam. Spero certe ea commentatione, me aliquid lumen litteris nostris & venerandae antiquitatis monumentis adlaturum. Sequuntur postea, de quibus nuper ad te scribere memini, non unius argumenti Tractatus quidam singulares, quos profanae juxta & Christianae, quam ab annis aliquot excolui, antiquitati illustrandae destinavi. Sed nimis magnifice videbor tibi de studiis aut conatibus meis sentire, qui alias tenuitatis meae ac in litteris infantiae mihi omnium optime sum conscius. Quid illi novi in Italia aut Gallia parturiant, non reticere tibi procul dubio amici communes. Accepi praeteritis diebus ab optimo & eruditissimo Principe Etruriae *Leopoldo* gratissimum munus, *Valerii* nempe *Chimentellii* de Honore Bisellii commentationem. Instituta illa ad explicationem Marmoris cujusdam Pisani, in quo mentio occurrit illius *ἐπιγραφῆς*, & eadem occasione insertum de Veterum sellis Parergon, advocatis Lapidum Nummorumque veterum subsidiis. Magnam diligentiae & variae eruditionis

laudem in tractatione illius argumenti consequutus est, & majorem meo judicio obtinuisset, si in recentiorum, non usque adeo celebrium, nominibus & libris etiam ignobilioribus commendandis parcior paullo ac temperatior fuisset. Eodem ferme tempore, quo ille primus & solus credit se honorem cum Bisellii eruisse, video *Thomam Reinesium* in Scholiis suis ad Dalmaticum Petronii Fragmentum nonnulla ejusdem argumenti adnotasse. Accepi illa non ita pridem ab eruditissimo sene, pro *ἀντιδωρον* quinquaginta circiter Inscriptionum ineditarum, quas maximam partem e *Ligorii* schedis Romae descripseram. Neque adhuc certi quidquam scribit, quando Gruteriani operis supplementum, in quo tot jam annos versatur, & cujus desiderium mihi crescit in horas, publica luce donabitur. Novissimae *Falconerii* nostri datae 19 Februarii nuntiabant, ab eo prodiisse de nummo quodam Phillippi, Romae haud ita pridem reperto, & de quo suam ad me sententiam vir utrique nostrum amicissimus jam ante annum, & quod excurrit, perscripserat. Auctore & impulsore *Seguinio*, in Italia, quod non ignoras, a mensibus aliquot agente, ad eandem evulgandam se pertractum refert. Non dubito ingenio & solertiae Auctoris scriptionem illam responsuram. *Possinus* Jesuita versatur adhuc in secunda parte Pachimerii evulganda. Romam *Nardini* pridem ad me transmissam non licuit adhuc, per incuriam eorum, quibus id negotii injunctum, avidis oculis lustrare. Et haec haecenus. Otium enim scribendi nactus, non tam leviter illud mihi abjiciendum credidi. Vale, Vir Amplissime, & me vel silentem, vel scribentem ama. Dabam In Arce Heydelbergensi IV. Martis CIOIOCLXVII. Eni aliquot Epigrammata in successum Causae Palatinae, quorum prius mihi ferme aliud agenti excidit. Tuum esset, felicem illius exitum Gratiis Musisque plaudentibus celebrare. Cl. *Schefferum* meo nomine salutes velim. Iterum vale, decus nostrum. Vidisti opinor quae cum *Tanaquil Faber*, tum *Frisius* quidam juvenis *Isaacus Scepperus*, ad Nasonem & praecipue Metamorphoses non ita pridem adnotarunt, & quae in altera parte Epistolarum ejusdem Fabri leguntur cum crebra tui mentione.

EPISTOLA XVIII.

E Z E C. S P A N H E M I U S

*Nic. Heinio.**Holmiam.*

Multa mihi in limine hîc essent adferenda, Vir Amplissime, quibus praeteriti silentii culpam diluerem. Sed malo supervacuum apud te omnem hanc operam statuere, neque de mutua utriusque nostrum voluntate inde judicium ferri. Sit constans illa inter nos ac immota, etiamsi aut longa nos terrarum spatia disjungant, aut negotiorum vel itinerum momenta a mutuis alloquiis avocent. Equidem dum ego te, post nuperum meum e Batavia reditum, in ultimum septentrionem profectum credidi, mihi autem novum in Gal-

Galliam iter fuit suscipiendum, injecta huic officio mora, quo defungi apud te debueram. Dici enim non potest, quam jucunda mihi fuerit recordatio temporis vobiscum in Batavia superiori anno exacti, & quod tu integrum in conferendis in me beneficiis, ego in suscipiendis iisdem collocabamus. Utinam & has mihi vices prosperior aliqua fortuna largiretur, quibus mihi liceret eadem tibi, etsi non ἀντὶ τῶν μέτρων, rependere. Caeterum quid jam parturiant tuae Musae, & an diuturniorem hospitem te habitura sit plaga Arctica scire inprimis aveo. Prudentium tuum apud nostrates Bibliopolas natus, magna eundem voluptate nec minori fructu evolvi. Ovidium tuum audio rursus sub praelo sudare, in quem dubito an potueris nova beneficia conferre, post immensa illa, quibus tibi devinctus est. An principem vatum proxima foetura jam a te expectabimus, dignum utique, qui curis tuis ornatior lectorum oculos in se denuo convertat! De me aut rebus meis, si quid vicissim rescire cupis, scias ea esse nostra tempora, quae omne ferme cum Musis commercium tollunt. Reversum e Gallica Legatione nomine Collegii Electoralis suscepta, cui semestre impendi, exortae rursus in vicinia cum Lotharingis turbae ad alia cogunt animum & studia deflectere. Jucundum illud fuit, communes amicos nostros Parisienses, occasione praeteriti itineris salutasse, & novos subinde dignitate aut meritis insignes sibi conciliasse. Referre possem in hunc censum *Montauserii* Ducem, qui ultro me omni comitatus genere prosequi non est dedignatus, & qui unus ferme mihi visus inter Gallorum Proceres litterarum amorem simul ac peritiam conjunxisse. Rescivisti procul dubio, idque lubentissime, novam dignitatem, quam in eum inter tot ambientium vota, Rex Christianissimus contulit. Divione salutavi viros tibi amicissimos mihiq; de facie haecenus ignotos, *Lantinium*, *de la Mare*, cum quo postremo crebro litteras olim commutaveram. Juvit etiam vidisse ibidem loci luculentam *Bobirii* supellectilem libris ac nummis antiquis egregie instructam. Unus mihi Parisiis defuit *Bigotius*, qui illud tempus, quo ibi vixi, in Neustria sua transegit. Ab *Huetio* praeteritis diebus accepi Origenis Commentaria, utraque lingua nunc primum edita, magnum & praeclarum opus. Magna est hodie illius ingenii in Gallia laus & existimatio, & quam certe jure optimo videtur consequutus. Ne quid vero te rerum nostrarum lateat, scias opus nostrum de Nummis antiquis tandem sub praelo *Elzeviriano* sudare. Exfurget illud fatis in magnam molem, dum ex mora huic editioni per alias curas suborta, novae semper & luculentae, ut spero, accessionis occasio & argumentum occurrit. Hinc pro una dissertatione plures conscriptae, in quas divisum opus pro materiae & argumenti varietate. Illud certe possum praefiscine jactare, multa nova in hoc genere a me primum eruta & observata, ac ni fallor aliquod lumen his studiis nostris adtulisse. Hinc variae etiam utriusque linguae auctorum explicationes aut emendationes nobis tentatae, & per omne antiquitatis genus diffusa tractatio. Sed haec apud te nimis magnifice, & praeter tenuitatis meae conscientiam. Quid agat *Gudius* noster, an secessum Vorburgianum adhuc colat, aut quo terrarum se contulerit, juxta cum ignarissimis scio:

Vale,

Vale, Vir Amplissime, & me vel immerentem ama. Dabam Heydelbergae Kal. Novembris CIOIOCLXVIII. Illud ferme praeterieram, non mea certe culpa sed aliorum opera effigiem nostram aere celatam, quo operi meo de Nummis comes adjungatur. Versus pro more efflagitant, qui eandem exornent. Hoc vero beneficium a te exposcere, vix permittit tenuitatis meae sensus. Si hoc vero non meritis, sed amoris in me tuo velis indulgere, novum quendam & eximium in me honorem collocatum putabo.

EPISTOLA XIX.

E Z E C. S P A N H E M I U S

Nic. Heinso.

Holmiam.

Spero recte ad te curatas, Vir Amplissime, quas ante septimanas haud ita Smultas, constantis mei erga te cultus interpretes literas transmisi. Quod jam occupo denuo scribendi officium, herili mandato mihi praescriptum scias. Quum enim hoc muneris mihi inter alia sit injunctum, rerum nostrarum statum, ad varios Regum Ordinumve Ministros in exteris aulis degentes, hebdomadatim, quod ajunt, perscribere. Tu in eam quoque classem, juxta Illustrissimum *Grotium* adscriptus es. Si inde quid molestiae tibi accidat, eam diluet spero fiducia, quam serenissimus Elector de tuo erga se ac res suas studio concepit. Non exspectas vero, ut ab alto hinc repetam dissidii causas & momenta, quod nobis cum Lotharingiae Duce vertitur. Erupit denuo illud, quod non ignoras, a mensibus aliquot in apertam contentionem. Eo vero eventu utrinque res gesta, ut hinc Arces aliquot Imperii, praeter fas a Lotharingo detentas, sicut Landstull & Hohenrick, ac novissime Castrum Falkenstein, copiae nostrae feliciter oppugnarint; illinc hostilis exercitus Palatinum infestare voluerit, sed qui re infecta & citra laureas sit domum regressus. Interim nova mandata Caesarea, quae vulgo vocant Inhibitoria & Avocatoria, utrique parti, ante dies haud ita multos, indicta; quibus vetatur ulterior hostilium continuatio, abductio autem & exauctoratio militum praescribitur. Delata illa in Aulam nostram per ablegatos Marchionum Badensis & Durlacensis, qui Commissarii Caesarei ad componendam hanc litem erant jam ante designati. Datum iis responsum nomine serenissimi Electoris, sub dato 4. hujus mensis, quo se in inducias ex reverentia erga Caesarem consentire profitetur. Hinc altera etiam die publicae eadem factae, juxta solita solemnia. Ea spe scilicet, iturum in easdem conditiones Lotharingum, aut alias solutum fore vicissim ea lege serenissimum Electorem, quam sibi sub intuitu boni publici, indixit. Ea vero nota adversarii, & semper infesta tranquillitati publicae, indoles, ut omnia tuta etiam ab eo timenda sint, & in excubiis vigilandum. Quae secutura sit rerum facies, proxime suo loco perscribetur. Alterius generis quae jam addam non occurrunt; amoeniora nempe, & quae animum aliquam-

quamdiu ad jucunda utriusque nostrum studia revocent. Neque si occurrerent, liceret jam per alia negotia, & litterarum, quae scribendae mihi restant, multitudinem, in eadem me diffundere. Vale, decus nostrum & me ama. Dabam Heydelbergae XII. Decembris Anno MDCLXVIII. Excusabis si aliena manu ad te, & ea, qua ad Proceres aliosque de rebus nostris, scribo. Neque enim mea sufficeret tot exarandis litteris.

EPISTOLA XX.

E Z E C. SPANHEMIUS

Nic. Heinsio.

Holmiam.

EN me tibi denuo sisto, Vir Amplissime, ut partes eas ulterius peragam, quas mihi in posterum suscipiendas prioribus significavi. Tu vero boni consule, & impositam officii legem, & in eadem adimplenda jucundam & prolixam voluntatem. Ille vero jam est rerum nostrarum status. Prodiit a Lotaringo novissima Declaratio data Nanciae 15. Decembris, quam Commissariis Caesareis, occasione postremi mandati, ut vocant, Inhibitorii, consignavit. Tota in eo est, ut a se praeteritorum culpam amoliat, quam in nos derivet, suum pacifici animi & concordiae cum vicinis tuendae studium extollat; Imperatoris & Imperii contra nos opem imploret; condiciones pacis nobiscum ineundae aut iniquas aut insidiosas proponat; ac tandem, in quo rei cardo versabatur, sex septimanarum inducias offerat, praevia tamen ea lege, ut quae a revocatis copiis sint a parte nostra admissa, in priorem statum restituantur. Haec autem postrema satis aliena ab illo obsequio, quod alias erga Caesarem & Imperium eodem scripto contestatur; dum Inducias illas, in quas serenissimus Elector indefinitas & citra condiciones annexas consenserat, ipse ad exiguum tempus restringit non solum, sed clausulis id genus adjunctis irritas reddit. Adeo ut exigua spes adfulgeret sedandorum horum motuum, ni intercedant Potentiorum officia, qui hortari non solum possunt, sed coërcere novaturientem, & vicinorum saluti semper infestum. Neque leve, ut opinor, hac in re momentum habitura est Illustrimi Comitis a *Königsmarck* in aulam nostram legatio, nomine Coronae Suecicae suscepta, & quae vergit in eundem scopum, ne latius serpat hoc incendium. Et haec sunt, quae jam occurrebant de rebus nostris. Tu vero bene & feliciter vale, nostrum ac Musarum decus. Dabam Heydelberga 26. Decembris 1668.

EPISTOLA XXI.

NIC. HEINSIUS

*Ezec. Spanhemio.**Heydelbergam.*

Am pridem, verbis etsi paucissimis, causatus sum per litteras valetudinem graviter adfectam, quae me ab exarandis ad amicos Epistolis, non avocaret solum, sed omni quoque negotio, qua publico, qua privato mensum jam quartum excluderet prohiberetque, cubiculo assidue plerumque & lecto affixum. Causa morbi ex hepate ac liene, vehementer obstructis, originem trahit: cui malo etsi post diligentem curam a medicis nonnihil est prospectum, debellari tamen fons ac radix valetudinis omnino vix potest, hinc praesertim, tam incommoda anni tempestate. Nos enim in hoc septemtrione adhuc hibernamus, nec remisit frigus, mense tantum non quarto continuatum. In veris adventum meliora jubeor sperare a nostris Aesculapiis: sin minus, ad acidulas Germanas aestate proxima erit confugiendum: sed vires penitus dejectas attritasque jam recolligo paullatim, & hic fundus, bono medicorum augurio, nescio quam certus. Interim plurima cum voluptate didici similitates serenissimum inter Electorem Palatinum & Lotaringiae ducem esse aut compositas plane, aut certe sopitas. Faxit deus Opt. Max. Ut Princeps, vita tranquilla omnique rerum prosperarum successu dignissimus, hoc otio diuturnus perfruatur. Ad quem diu est, quod litterarum nil omnino dedi, subveritus partim, ne superfluum atque inopportunos accederem, cum scirem ministrum illi esse in hac aula rerum suarum satagentem: partim post paullo evocatus ipse in patriam, ubi, ut scis, per annum integrum, & quod excurrit temporis, sum commoratus. Huc revertentem valetudo dubia excepit, quae in apertum gravissimumque morbum erupit tandem, ut jam audivisti. Quod si mora ulterior in hoc terrarum tractu, ut mandatis partibus defungar, requiretur, revertar ad intermissum officium propediem. Holmiam simul atque adveni, perculit me nuntius de sororis tuae, matronae lectissimae, intempestiva morte. Sed cicatricem jam obductam praestat non rescindere. Versus imagini tuae subscriptos, quos flagitasti, hinc habes, sed quales ab aegrotantibus scribuntur, ne tu magnifici splendidique quid exspectes. Editionem operis tui opinor vix promoveri, quod in Gallias profectus *Elzevirius* Typographus urgere non possit. *Gudium* scribendis Epistolis nostri rarum atque infrequentem vacare. Ego certe nullas ab eo accepi, ex quo Haga sum digressus. Prudentius vix tanti mihi visus, qui ad te mitteretur. Misissem tamen, si scivissem, ubi locorum quaerendus esses. Gratificatus sum opera illa tumultuaria non mihi met ipsi, sed Praefuli, litterarum amantissimo callentissimoque. Ex illo adeo per valetudinem non licuit mihi de musis cogitare, ut etiam coactus sim a me amoliri demandatam provinciam super pace Suecos inter & Moschos instauranda. De te exspecto

speculo nuntios optatos. vale. Holmiae Suecorum Prid. Non April 1669.

Viva pollicitus sub imagine reddere pictor

Quod priscae veneris Roma, quod Atthis habet.

Promissam nec dextra fidem miranda fefellit:

Hic qui Spanhemium cernis, utramque vides.

EPISTOLA XXII.

EZEC. SPANHEMIUS

Nic. Heinsio.

Holmiam.

Nescio quo fato factum sit, ut eodem ferme tempore haud dissimili, quantum ex novissimis tuis colligo, morbi genere uterque nostrum sit confectus. Quartus enim mensis excurrit, ex quo molesta & pertinaci angina infestor, cui ab obstructionibus & hypocondriacis adfectibus causam & alimenta praebere augurantur Medicorum filii. Hinc mihi ab eo tempore, & a studiis, & ab iis, quae muneris ratio exigebat, officiis imposita requies, quae & tecum aliisque institutum litterarum commercium importune abruptit. Praescriptus ibidem mihi Acidularum Schwalbacensium usus, quas hinc habemus in vicinia, & ad quas intra dies haud ita multos proficisci constitutum sedet. Utinam vero ea mihi felicitas obtingeret, quae te compotatorem nobis daret. Nulla equidem lubentius maectari vellem; neque praeteriti doloris sensum salubriori aliquo remedio expelli posse arbitrarer. Quum enim mutua inter amicos consuetudine nihil in vita jucundius dari posse semper existimarim, tum certe id locum habet potissimum, quo arctiora sunt illa necessitudinis vincula, morum puta & studiorum communionem, aliisque probatae pridem fidei ac in retinendis colendisve amicitii constantiae argumentis. Qua in re quam tua sit omnibus perspecta, & mihi dudum explorata, sedulitas & religio quaedam singularis, ita illud statuas velim, nihil mihi gratius posse obtingere, quam ut ea laude, non ita longo a te intervallo superari, tibi aliisque videar. De Epigrammate ad me transmissio imagini nostrae subscribendo, quas gratias tibi referam, haud facile explicatu. Nimis tu quidem officiosus, Vir Amicissime, qui petitionis haud ita verecundae eam tibi rationem habendam censuisti, ut & eidem continuo annueres, & amicum longe elegantissimis neque alio dignis Apolline versibus aeternitati consecrares. Erexisti utique animum, ut quam a tenuitate ingenii sperare non poteram, eam ab Heinsianae Musae fama ac veneratione spondere mihi ausim, & aliquo apud posteros in pretio haberi, qui se illis tam luculento ornatus a te elogio in posterum sistet. Insidebit vero mihi aeterna tanti beneficii memoria, & qui in te colendo nulli videbar mihi palmam concedere, eam certe novis hisce nominibus tibi obstricto neminem mihi ambiguum facturum reor. Opus meum de Numismatibus antiquis, ut vere auguratus es, per *Elzevirii* in Galliis absentiam jacuit ab operis typogra-

pertus, nolo jam pluribus commemorare. Ergo liberaſti nos eo metu, quo ſuſpenſos ac ſollicitos tenuit tua apud inficetos illos Ruthenos habitatio, & perlati de tua invaletudine nuntii, oppido iniucundi & moleſti. Quid tibi animi fuit & ſolatii elegantiarum omnium promo condo, in illis ſordibus locorum & colluvie hominum verſanti? & quam mite tibi procul dubio, quam invidendum videbatur Naſonis tui apud Graecorum traduces & colonos exilium? Tu quidem patriae ac Suecis navabas operam, in qua haud leve rerum ſuarum & communium temporum momentum vertebatur, quam ille in inerti otio aut ſolis querelis nobilitate conſumpſit. Quamquam haud dubitem in illa barbariae Regia, iisque gravioribus curis, genio te amoribusque tuis indulſiſſe, neque venuſtos minus aut ignobiles Muſarum partus edidiſſe. Ardeo certe haud mediocri cupiditate de iis aliisque praeclaris cogitationibus tuis, ſed vel potiſſimum de proſpero tuae valetudinis ſtatu, quando tibi per otium licebit, edoceri. Me quod attinet, (abſit enim ut me animo tuo excidiſſe metuum) annum ferme hîc ago herili juſſu, quo rerum ſuarum hîc loci obeundarum procurationem mihi demandavit. Neque pauca ſunt, quae in hac ſtatione me delectant; ſeu urbis celebritatem & frequentiam; ſeu temperiem coeli; ſeu opportunitatem ſitus; ſeu viciniae, in quam facilis excuſus, anno-nae, aliorumque id genus commodorum rationem reputem. Frater meus Heydelbergensem ſeceſſum cum Lugdunenſi commutavit, repetitis eo & ſollicitis Procerum hortatibus, quamquam diu reſiſtens, traductus. Iterum ſub incudem revocat Hiftoriam Jobi, jam ante annum & quod excurrit editam, in qua Herois illius patriam, natales, inſtitutum aliaque, quae de eo tradi poſſunt aut erui, haud indiligenter eſt perſequutus. In Italia aut Gallia quid parturiant litterae ſeu potius communes amici, vix equidem novi; niſi quod *Capellanus* alteram poëmaſis ſui partem, in eo etiam ſenio plenam, ut ajunt, vi ignea, edere cogitat; *Falconerius* autem, ut poſtremis ſuis referebat, ad illuſtrandas antiquitates Eccleſiaſticas animum & curas convertit. Earum etiam ſpecimen parat, editionem nempe aliquot ſcriptorum veterum, qui adverſus Manichaeos ſcripſere, & quibus novam Haereſeos illius hiftoriam praemittere molitur. Unum ex iis & *Mani* ferme coaevum, *Alexandrum Lycopolitam* deſcripſeram olim Florentiae ex antiquiſſimo Codice Mediceo, in lucem aliquando cum aliis quibuſdam id genus lucubrationibus emittendum. Sed hanc lampadem lubenter ei trado, ea indole in iisque locis verſanti, ubi omnia ad hanc provinciam obeundam ei adfatim ſuppetunt. Illud vero tibi forte haud ingratum ſignificabo, Vir Amiciſſime, prodiſſe tandem in lucem opus de nummis noſtrum, non mea certe, ſed temporum aut typographi culpa aliis diſtracti preſſum ſatis diu. Scripſi continuo ad eundem, ut duo Exemplaria majoris, quam vocant, chartae ad te curaret; quorum alterum tibi ſervabis; alterum per unum e tuis familiaribus Magni Suediae Cancellarii filio, ſummae indolis & harum lautitiarum cupidiffimo, tradi haud gravatim recipies. Caeteroquin an aliquod lumen antiquitatibus litteriſque noſtris iſta mea lucubratio adtulerit, tu unus omnium optime decernes. Haud levi ſaltem nec poenitenda, ut ſpero, acceſ-

sione priorem operam a me adauctam agnosces. Aliud opus in hoc genere, illudque luculentum exit itidem in lucem a *Carolo Patino*, in quo longa Numismatum Caesarianorum, antea Lomeniani, jam Regii Musei, series cusa, & ab eodem enarrata occurret. Neque certe leviter apud eum, qui amicitiae nostrae aliquid tribuit, & apud nos sedem aliquamdiu rerum suarum habuit, hoc egi, ut curis aliis depositis in eam totus incumberet. Nummi a me inspecti procul dubio egregii sunt & selecti, & ad quorum illustrationem plura conferre poterunt alii, quibus uberior paratus eruditionis contigit. Operis illius exemplar Argentinae, ubi auctor jam haeret, editi indies exspecto. Mihi neque ea ad manus subsidia fuere, & alia omnino consilii ratio insedit, ubi scriptioni illi manus admovi. Elegantiam & diligentiam in cudendis nummis, quos subinde exhibet opus nostrum, majorem praestare potuissent nostri homines, maxime quum me absente ac aliis distracto tota haec res sit procurata. Tu de singulis statues, ignosces erroribus, & me, quod fecisti haftenus, amare perges. Vale, decus nostrum. Coloniae Agrippinae x. Kalend. Mai. CIOIOCLXXI.

EPISTOLA XXIV.

NIC. HEINSIUS

*Ezec. Spanhemio**Coloniae.*

Nisi subveritus fuisset, ne adflareris contagione foedissimae Barbariae, in qua mihi nupero anni propemodum totius decursu, Vir Ampl: vivendum fuit, non defuisset tui compellandi officio, etiam illic terrarum, quarum ne nunc quidem recordari possum sine trepidatione, & offundente sese sensibus meis profunda quadam caligine. Reverfus exinde Holmiam debui, fateor, itineris confecti certiore te facere, sed ferebat rumor, nescio unde exortus, propediem fore, ut ultro nobis ipse isthic adesses. Molienti jam abitum ex aula Suecana tuas mihi litteras Illustrissimus Regni Cancellarius in manum tradidit, ubi multo post praestantissimum opus tuum, quod nummis veteribus illustrandum dedisti, ad me perlatum est, cujus exemplar alterum, sic ut jusseras, filio Cancellarii oblatum ivi, atque adeo confido promissae illum, debitaque gratiarum actioni non defuisse. De ipso Opere quid sentiam quaeris? persuasus sum omnino, ut existimem, neminem rei antiquariae haftenus studiosum tot exquisita numismata, tot exquisitas numismatum interpretationes in unum corpus congesisse: tum a nullo similis argumenti scriptore plura me esse edoctum. Quanquam omni lectione libri tanta rerum fruge abundantis necdum sum defunctus, quem quo frequentius curatiusque evolvo, eo majores a me profectus fieri non sine praesentissima voluptate experior. Atque hinc fit, ut reliquas dissertationes, quas non dissimilis argumenti habere te paratas non ita nuper significabas, avidissimus videre gestiam. Ut autem plenius cognoscas indul-

indulgenter me non loqui. En tibi, unde colligi detur me anxie indagasse, si quid carpendum in tuo illó super re nummaria commentario occurreret, nec invenisse nisi unicum fortassis ex Tragoedia veteri, quae sub Octaviae nomine circumfertur, locum, vers. 248. quem ego ex vestigiis codicum antiquorum sic castigandum esse censeo.

Utinam suorum facinorum poenas luat

Nero insitivus, Domitio genitus lare.

Domitio lare hoc est, gente Domitia, non *Domitio patre*, conjecturae nostrae est, etsi non multum refert. *Nero insitivus* scriptis exemplaribus debetur, nec aliud quaerendum, quanquam in diversa ire homines eruditos neutiquam me fugit. Tota ista Tragoedia Octaviam meritissimum Neronis odium spirare agnoscas, ut *Divum* Domitium Neronis patrem, praeter morem antiquitatis, hominem scilicet a Caesarea familia alienum, nec ad culmen reipubl. evectum, nuncupare haudquaquam potuerit. Vocatur tamen Trajani pater in nummis *Divus*, fateor, sed ne ea propter evincas idem à Nerone factitatum, & si maxime factitatum esset, tamen Octaviae partes in hac tragoedia sustinentem id neutiquam deceret. Claudiam gentem patriciam, Domitiam plebejam fuisse haud ignoras. Hinc contemtim de Nerone loquendi occasio captata Octaviae hoc loco. sic alibi ipsa de eodem, *Odit genitos Sanguine claro*. sed haec, & si quae plura sunt ejusdem notae, tu per te facile indagabis. Caeterum, Vir Amplissime, ea in civitate sedem nunc fixisti, in qua, si quid famae credendum, egregia antiquitatis monumenta quotidie eruuntur, marmora praesertim, quorum si nobis interdum copiam fieri permiseris, beaveris profecto hominem tui studiosissimum. de nummis etiam addunt, ea frequentiora a fossoribus erui; quibus rumoribus quantum sit tribuendum, tu omnium optime nos docebis. Nec dubito Bibliothecas veteres, quae in civitate amplissima deesse non possunt, a te per otium multa cum cura evolvi, atque exemplaria manu exarata pro caetera tua curiositate abs te studiose conquiri. Vides uberrimam argumenti Epistolaris messem tibi propositam, ut ego, si enarrare nunc tibi intuitum, quantum molestiarum taedique devorandum mihi fuerit, dum ex caeno barbarico eluctor atque emergo, jam te obtundam, certus scio, atque enecem, tantum fastidii frigorisque tibi sit suboriturum, ex insulissimis narrationibus. Vellem nihilominus confabulationis pomoeria latius extendere, nisi quod morbus in itinere me oppressit, a quo nunc aegre respiro. Adest hac tempestate nobis *Pantiaticus* Abbas, elegantissimi vir ingenii, & Italici nominis elegantia dignissimus. *Patinum* in Britannias excursum paravisse audio; sed propediem inde rediturum ad nos: *Gudium* dux Holsatiae nobis abstulit, quem sibi a consiliis & Bibliotheca esse voluit. Vale. Hagae Comit. xxvi. Aug. 1671.

*Ezec. Spanhemio.**Coloniam.*

DUm immanis publicae calamitatis moles patriam infelicem premit, quaesiturus ego dolori justissimo solatium & medelam valetudini adflictae qualemcunque, in vicinam me Germaniam proripui, delituique per binos ferme jam menses in sinu Celsissimi *Ferdinandi*, adhibitis medicatis agri Paderani fontibus: qui quod ob imbres continuos, & intempestos Autumnii vergentis dies, multum soliti vigoris amisisse videbantur, thermarum quoque, in agro Moguntino celebrium satis, explorandam mihi opem, si summam pedum debilitatem horum beneficio profligare possem, proposui: eaque propter *Francofurtum* me contuli: sed ecce praeter opinionem meam cum maxime evenit, ut & hîc bella eadem, tam invisa, tam funesta, & ad quorum cogitationem totus horreo, me sint secuta, per quae vix liceat propositum tenere, nisi alio propediem se convertant armatae manus. Interim te Musarum ocellum e vicinia salutandum duxi: tuumque consulendum oraculum, si opineris tutos dari per Brabantiam ad larem paternum mihi Colonienfi via egressus. Quod equidem velim, tum ut coram complectar, tuaque praesentia longe desideratissima pascam oculos atque oblectem, tum ne per ingratas itinerum ambages relegenda mihi sint mea vestigia per Bremensem ac Mindanum, quo huc delatus, tractum. Rogaveram *Langermannum*, *Gudium*, *Elzevirium*, ut aditum pararent hîc mihi ad homines eruditione praestantes potissimum, sed nescio quo fato maligno illi haecenus me frustrantur, ad preces meas quasi ex compacto nil respondentes. Quid quod turbarum tantum excitatur hac in civitate per inconditam militis male feriati, & de nostro unguenta olentis manum, ut alio in viciniam libenter me sim translaturus, measque sarcinas, si aut Bibliothecas in propinquo insigniores, aut hominum litteratorum consuetudines haberem exploratas, per quas fallendi temporis spes adfulgeret non vana. Interim ex tanta patriae calamitate hunc fero fructum, ne omni ex parte sim infelicissimus, quod Amicorum consanguineorumque praecipui clandestinis factionibus jam pridem exagitati, nunc emergant denuo; & multae in republica sint auctoritatis. Sed de hisce coram melius, si dabitur fortassis. Opus tuum de praestantia veterum numismatum singulare prorsus consummatumque adeo me cepit, ut ad intermissa jam pridem studia rei nummariae nunc postliminio sim reversus, ac diligenter conquiram, si quid monetae veteris hinc inde erui e latebris possit. Etsi desideriis meis eventus parum respondet. Obtigisse tibi matrimonium plane fortunatum audio & laetor. Nec esse, quod ad formam Virginis, aut ad mores desideretur: vixque dubito, Divam monetam, de qua tam bene meruisti, propitiam nuptiis tuis arrisisse. Hoc unum est, quod toto anno de rebus tuis cognosse nobis contigit. Pro munere operis praeclari & gra-

gratias diu est quod egi, & ago nunc iterum. Vale, Spanhemi elegantissime. Exarabantur Francofurti ad Moenum ciciocLXXII. a. d. XIX. Octob. Gregor. Ecce versiculos, quos Princeps litteratissimus luce publica donandos censuit.

EPISTOLA XXVI.

E Z E C. SPANHEMIUS

Nic. Heinsio.

Francofurtum.

Quamquam scribendis hodie litteris praeter solitum etiam obrutus, quas officii mei ac temporum ratio, neque unica heri mandata omnino exigunt, non potui tamen dissimulare tibi diutius intimum illum gaudii sensum, quo me Tuae hesternae die ad nos delatae nihil tale exspectantem perfuderunt. Ea vis scilicet amoris illius & cultus, qui de te rebusque tuis in hac patriae tuae calamitate pridem sollicitum tenuere, nunc tam optato viciniae tuae nuntio haud mediocriter exultant. Sed de his alias, ubi plus otii dabitur, & forte etiam coram. Neque enim adeo de iniquitate aut infelicitate temporum mihi querendum aut tibi metuendum reor, quin hac tuum ad patrios lares reditum, citra tam longas Bremensis viae ambages, possis omnino instituere, idque vel tuto per Brabantiam aditu, vel salvi etiam conductus litteris a vicinis Gallorum Praefectis haud difficulter, ut opinor, impetrandis. Qua in re operam meam qualemcumque, immo totum me tibi addictum devotumque nosti; neque adeo ut praesentissimo Musarum numini, quam ut amicorum principi. Thermarum usum propitium interea ac salutarem, si iis uti per haec tempora liceat, animitus voveo; quae te, si non *πόδας ὠκέα* cum Achille, certe valentem reddant. Qui caeteroquin homines eruditionis ac ingenii fama celebres iis in oris, in quibus versaris, consulendi tibi veniant, vix equidem novi; nisi Heydelbergam ad notum tibi litterarum Numen, tuaque praesentia, ut opinor omnino, recreandum excurrere cogites. *Tanaquillus Faber* ad docendas ibi humaniores litteras lauto sic satis, pro loci ratione, fuerat evocatus stipendio. Sed dum colligit sarcinas & abitum parat, longiorem viam emensus est, unde negant redire quemquam. Quum vero ad me itum esset, quem eo loco & statione dignum crederem, & *Graevium* nostrum indicassem, iussus sum continuo viri ea in re sensum sciscitari. Quod a me factum novissime, & responsum adhuc exspectatur. Existimabam enim hoc rerum & urbis suae statu fieri haud difficulter posse, ut alio sedem suam transferre haud gravatim reciperet. Neque alius sane dignior occurrebat, qui illam spartam obire felicius posset. Quod si ille vota nostra frustretur, & alium noris parem aut supparem huic obeundae provinciae, eum quaeso indica. Unum ferme excidebat, consulendum tibi ante alios in illo terrarum tractu *Baronem Boineburgium* Moguntii commorantem, virum praeter alia decora,

quod procul dubio haud ighoras, Germanicae nobilitatis decus, & omnium praestantium ingeniorum fautorem & aestimatorem summum. Nae ille vero in magnae felicitatis parte reputet, tuo beari conspectu. Ego certe has quamquam occupatissimus effudi, quas ei, si visum est, trades, & quo nomine gratiam ejus insigniter demereri sum certus. Vale, nostrum & Musarum decus. Colon. Ubior. xxiii. Octob. ccccclxi. Pro elegantissimis, teque ac Ferdinando, primis Musarum Antistibus, dignissimis versibus gratias ago immortales. Illud adhuc dissimulare non possum, nescire me quidem quae nobis impendunt, quamdiu sub ictum quasi vicini militis sumus constituti, sperare tamen meliora, & brevi tota de re liquidius constiturum.

EPISTOLA XXVII.

NIC. HEINSIUS

*Ezec. Spanhemio.**Coloniā.*

MEas tibi redditas esse, tum spem adfulgere de itinere per Coloniensem agrum tuto instituendo laetor, me hercules ut qui maxime. Ingruens enim tempestas hiberna quodammodo requirit, ut viarum compendia captentur, ne diuturnis incommodis ac coelo intempesto exponar temere, & si ratio alia non esset in promptu, quae institutum hoc meum foveret, te videre in via, te complecti longis itinerum ambagibus pensandum medius fidius foret, cum Bremensis atque Embdanus tractus nihil tibi aequandum praestare jam nobis possit. Tibi igitur me permittam totum, te auctore dubium iter sum suscepturus, sed post usum Thermarum Wisbadensium, quibus dies ad minimum xiv erunt dandi. Haec enim ne adhibuerim eas, miles populator vicini ruris est in causa, qui nihil agendo mirifice pertinacem se praebet, nostri aerarii non minimo cum damno. Credis illum publicis foederati Belgii impensis ferias sibi, magno nobis constituras, indixisse. Igitur, dum ad thermas aditus haudquaquam patet, Moguntia brevem excursus sum molitus Heydelbergam versus, ut Principalis fastigii singulare ornamentum, Electorem serenissimum, coram venerer. Et quanquam ea incidebat hoc iter nostrum in tempora, quae parum opportuna videbantur ob expectatum in ipso Palatinatu militem hunc, quem dicebam modo de hibernis, ut ferebat rumor, sibimet illic prospecturum, non sine ingenti aulae totius trepidatione, votis sum tamen usque ad invidiam potitus felicibus. Et haec quidem haecenus. Nam quanquam sunt in promptu complura, de quibus tecum nunc actum cupiam, e re tamen erit communi in congressum nostrum ea differri, ne desit confabulationis argumentum, aut longe quaeratur, cum ad partes vocandum erit utrimque. Tu interim si demereri plenius me cupis, excogita, quaeso, viam quamcumque, qua me meis illaesum atque incolumen sistas. Ego de discessu hinc meo ante ipsam profectionem certior ut fias, operam dabo. Si quid vicissim interea ad me voles

les, Moguntiam id mittas erit necesse ad diverforium, quod pro insigni anchoram praefert: ita enim fiet, ut quantumvis absenti tradantur tuae. De *Graevio* Heydelbergam evocando cogitare serenissimum Electorem est cur gaudeam, qui hominem ob suavissimos mores & eruditionem perpolitam amo tenerrime, sed cum laute satis habeatur ab *Ultrajectinis*, ac stipendio fruatur largo, amplectendam ab illo fore conditionem oblatam dubitari possit, ni publicae fortassis calamitati hoc dandum existimet vir quietis amantissimus. D. *Boineburgium* semel iterumque *Francofurti* jam sum allocutus. Vale, Vir Amplissime, & inter meos haberi patere in posterum. Moguntiae iv Novemb. cxcxcclxxii. Etsi *Caesarianus* miles ac *Brandenburgicus* bona tandem fide abituri videntur, postquam agrum hunc omnem exederunt, subverendum tamen est, ne *Gallus* illis mox succedat, micaeque ac reliquias omnes, pridiana coena ab illis projectas, frugaliter cum pulvisculo converrat, quod si fit, de *Thermis Wisbadensibus* cogitatio omnis erit abrumpenda mihi. Iterum vale.

EPISTOLA XXVIII.

E Z E C. S P A N H E M I U S

Nic. Heinsio.

Moguntiam.

HAud mediocri me gaudio perfuderunt tuae postreinae, quae proximi tui ad nos adventus spem haud indubiam faciunt. Felicem eum, immo felicissimum animitus voveo; quo splendidissima haec *Domus Augustae Colonia* mirifice exultet, cui veram ac unicam propemodum *Augustae aevi* spirantem imaginem, intra moenium suorum ambitum, intueri & agnoscere quasi postliminio dabitur. Dum vero ego me blandae illius voluptatis contemplatione oblecto, en tibi a *Graevio* nostro litteras, ante dies circiter octo traditas, quarum expectatione frustrari te diutius nolui. Neque enim easdem transmittere citius licuit, dum incertus pendeo, an priores meae recte ad te curatae; aut an abjecto omni tuae ad nos profectionis consilio ad patrios lares reditum per alios terrarum tractus parasses. Salubrem tibi interea thermarum usum, ejusque datam tibi tandem *Germanici Exercitus* abitu facultatem haud vane jam licet augurari. *Auriacus* interim valido equitatu stipatus signa sua ex *Eburonibus* in vicinum hunc agrum transjecit, mutatis rerum vicibus, *Gallum* inde profugum militem subsequitur, cui hinc *Turenus*, illinc *Luxemburgicus* suppetias laturo feruntur. Sed de his, totoque tui reditus consilio coram. Neque enim jam, quod unice tamen vellem, confabulari tecum diutius licet. Dabam raptim *Coloniae Ubiorum* xxiv Novemb. cxcxcclxxii. Aedes meae, ne hinc in quaerendo stabulo longius oberres, in loco dicto *Kinckenpoël* sitae, quae praesentis tui numinis conspectu beari, medius fidius, exoptant.

EPISTOLA XXIX.

EZECH. SPANHEMIUS

*Nic. Heinſio.**Coloniā.*

Cum in procinctu jam sint exercitus foederati uterque, tandem aliquando licebit mihi, ut opinor, adire thermas in vicinia hujus civitatis, quibus crure tenus immergar, parce enim utendas eas praescribunt nobis Medicorum filii. Litteras salvi conductus, ut vocant, Gallicanas unde sim impetraturus, haud sane habeo compertum. Nam & mihi causae sunt justissimae, cur eas flagitare nolim ab amicis, quos fortasse nonnullos privatim numerare possem in ea gente, quam foederati Belgae nunc infensissimam experiuntur, & desunt hîc terrarum mihi, per quos precario id beneficium obtineam. Eaque propter ne post usum thermarum, quibus reliquum mensis hujus dabitur, mea mihi vestigia in patriam abituro per Cassellā ac Bremensem tractum sint relegenda, itinere perquam incommodo, videtur prorsus metuendum. Illustrem *Boineborgium* sub adventum hâc in regiones meum Francofurti bis compellare mihi contigit. In hac civitate tentato non semel aditu ad eundem dictus est in aliis occupari. Ego autem & rarus omnino in publicum procedo, ob molestam pedis utriusque debilitatem, & salutationes meas tanti vendito haudquaquam, ut homines negotiosos, & curis publicis assidue vacantes, a rebus seriis per eas avocandos ausim mihi proponere. Tuae tamen litterae ad illum probe sunt curatae, ob quas plurimum te amo. Sed & postremas tuas una cum Graevianis, ad quas respondi hîc nonnihil vides, illius beneficio jam nunc sum consecutus, dum itineri accingor. Nolui tamen hoc ex oppido moliri pedem, non actis tibi gratiis ob singularem diligentiam, qui hominis amicissimi epistolam tam gnaviter ad me perferendam curaris. Jam opinor me significasse, esse mihi hospitium Moguntiae, quod insigne anchorae auratae praeferat. Illuc quicquid perlatum erit me absente, ut in manus perferatur meas opera dabitur. Tu vale, Vir Nobilissime, & perfunctoriam hanc ac prope ratam scriptionem aequi bonique consule. Moguntiae xvii. Novemb. **MDCLXXII.**

EPISTOLA XXX.

NIC. HEINSIUS

*Ezec. Spanhemio.**Coloniam.*

SPargi rumorem late de *Octavio Falconerio* Bruxellas propediem adventuro Roma, ex publicis nostratum nuntiis sum edoctus. Quae res cum plurima, uti debet, me perfuderit voluptate, nec tamen an plenam mereatur fidem, mihi sit compertum penitus, sufflaminandum laetitiae singularis impetum utcunque duxi; dum, consulto tuo oraculo, omnia habeantur, quam nunc apud me exploratoria. Neque enim praeterire me potest, iis te ac *Octavium* mutuae necessitudinis vinculis adstrictos teneri, ut profectionis ab urbe hac suae, si non imponit nobis rumor, te haudquaquam ignarum esse sit passurus. Effectum igitur da, quaeso, vel tribus verbis, ut aut solide ego gauderam voluptatis tantae securus, aut certe, ut abrumpam tempestive, quicquid ex rumore lubrico inconsultae spei conceperam. Audio *Boineburgium* e vivis excessisse, cum valetudine luctatum aliquamdiu minus prospera. Difficiliorem aliquanto ejus aditum Moguntiae eram nuper expertus, uti per postremas meas tibi a me significatum recorder. Rejecit ipse cautus hujusce rei in eam, quae jam tum nutabat, valetudinem. Ego autem quod alios salutantes minus difficulter is admitteret, suspicabar, fateor, nec frustra id fortasse, Gallicanis hoc ab illo partibus dari, quibus obnoxium plane fuisse, apud plerosque constans est opinio. Et haec quidem haecenus. Thermis Wisbadensibus non ea animi tranquillitate me dedi haecenus, quam ex praescripto medicorum adhiberi oportuit, interpellante nos frequentius militari assultu, & timorem incolis oppiduli hujus tantum non continuum incuriente. Emigravit jam miles ex hoc terrarum tractu quidem non infausta, si rumori credendum, ave. Feruntur & laetiora de Batavis nostris, quos redituros tandem ad bonam frugem, ac relecturos vestigia avorum, confido. De meo ad vos excursu jam fere cogitationem cunctam seposui, quod iter illud discriminis plenum perhibeatur a nonnullis; nec diplomate ullo sim munitus, quo me tuear ab hoste. Quas ego proxime mittebam tibi, ad *Graevium* nostrum curandas litteras, eas recte curatas esse a caetera tua diligentia mihi promitto. Sub Nonas Januarias Jul. Moguntiam hinc cogito, de profectione ad paternum larem instituenda, deque via, quam insisti oporteat, in arena consilium capturus. Urgetur enim acrius meus in patriam recursus per assiduas Amicorum litteras, rebus ad haec meis privatis non ferentibus, ut diutius domo absim. Vale, Vir Eximie, & me tuis annumerare perge. Wisbadae in agro Moguntino. CIOIOCLXXII. XX. Decembr.

EPISTOLA XXXI.

E Z E C. S P A N H E M I U S

*Nic. Heinsio.**Wisbadam.*

IN summa temporis angustia hoc unum mihi non praetermittendum duxi, ut certior continuo fieres ante duos demum dies redditus mihi, quas xx Decembris Wisbadi ad me exarasti. Sepositum ferme de tuo ad nos excursu consilium valde illibenter ex iis percepi. Quamquam si res adhuc integra, longe majori, ut mihi videtur, temporis & viae compendio, & minori etiam, quam non auguraris, discrimine tuum ad patrios lares reditum potuisses per hunc terrarum tractum instituere. De diplomate etiam eum in finem impetrando jam cum hîc loci compellaveram, qui res Gallorum Regis hîc procurat, tuique nominis & famae juxta alios elegantiores gentiles suos studiosissimus vivit, *Verjus* nomine, & cujus fratri, Doctori Sorbonico, olim parentasti. Ut mitam patere hinc tibi, per Brabantiam haud intutam, prout ferunt tempora, ad tuos Batavos profectiorem. De his omnibus statues quidem pro arbitrio; ita tamen ne omissem a me omnem rerum tuam cogitationem putes, aut inconsultum illud omnino, quo mirifice flagrabam, te hîc in transitu compellandi consilium. Plura addere jam non finit praestanda haud unis herilibus mandatis diligentia ac fides. *Falconerius* noster, de quo te sollicitum ostendis, designatus in Brabantiam Pontificius Internuntius, res suas ad eam profectiorem adornare, & vasa colligere ferebatur. Gratulatus sum ei & nobis per litteras illam provinciam, & ut cunctationem omnem, in qua versari antea dicebatur, omnino abrumperet, serio hortatus. Responsum adhuc exspecto. Tu vale, Musarum decus, & me ama. Coloniae Ubior. xxvi. Decemb. 1672. v. Jan. 1673.

EPISTOLA XXXII.

N I C. H E I N S I U S

*Ezec. Spanhemio.**Coloniae.*

SI ad ostentationem ingenio comparatus essem, non sine multa verborum sambage exaggerari deberet, quamquam ne sic quidem sat posset, immensus & minime fucatus dolor ille, quem in animo meo excitavit nuper nuntius perquam funestus de sublati e vita sub idem fere tempus binis tibi liberis, hoc est spe patris omni. Sancte interim profiteor, & ut paucis, sic vere, hanc tuam orbitatem inflixisse mihi vulnus altissimum, & quod ipsa penetrarit vitalia. Citius, fateor, ad haec solatia praestanda debui accurrere, sed fretus tua singulari sapientia, summaque animi moderatione, quas ego deesse mihi virtutes pulchre

chre intelligo, subvirebar, ne rem ambitiosam ac intempestivam aggrederer, si solator adesset serus, atque eas, de expugnando luctu, in te desiderarem virtutes, quae a memet praestari haudquaquam possent. Nunc spero obductam vulnere cicatricem quodammodo, quae ne fomentis tam tarde adhibitis rescindatur unice est cavendum mihi. Cum illustrissimo Marchione *de Grana* quin necessitudo tibi literaria etiamnum intercedat nullus dubito. Mirae, ut quod res est dicam, voluptati mihi fuit nuntius de adversario ejus, suis artibus eluso captoque, post ludificationes indignas, quae in auctoris caput probrose nunc resultant. Potes enim meminisse illius histrionicae, quam boni fratres exercebant, cum ego vobis adesset. Gratulatus jam essem ipsi Marchioni pulcherri-
mos successus, nisi cum aliunde, tum ex *Laurentio Magelotto* nostro cognovissem plene nullum vindictae vestigium in generoso viri illustrissimi pectore potuisse deprehendi, post rem feliciter laudabiliterque gestam. Vere heroicum mihi visum est in causa tam justa affectus omnes sic potuisse cohiberi, sic redactos in ordinem ad nutum imperantis. Si occasio feret, rogo etiam atque etiam, ne graveris Heroi illustrissimo significare quantam sui venerationem apud me excitavit hoc facinus, quantoque nexu obligatum me teneat prorsus singulari illa benignitate, quam praesenti praesens omnibus absolutam numeris exhibebat in Ubiis. *Johannem Capelanum* amisit nuper, amicum sane incomparabilem. De *Thevenoto* addunt nonnulli, sed dubiis rumoribus. Vale, vir nobilissime, & mihi favere, ut solebas, perge. Hagae Com. MDCCCLXXIV. xxvi. Martii.

EPISTOLA XXXIII.

EZEC. SPANHEMIUS.

Nic. Heinsio.

Hagae.

Quum pridem aliquam occasionem, Vir Nobilissime, tacitus circumspicerem, qua fretus culpam silentii nimis equidem diuturni si non diluere omnino, lenire tamen possem utcumque, en jam commode mihi obtulit hominis mihiq[ue] tibiq[ue] etiam jam familiaris, opportunus ad vos discessus. Is est Abbas *Pacichellus*, mutuis jam inter vos contractae literariae necessitudinis officiis, quod impense illi gratulor, carus tibi & acceptus. Unde quum ille, qua flagrabat pridem Britanniae ac Bataviae inprimis vestrae lustrandae cupiditate, comitem se Britannicis Oratoribus adjunxerit, nihil consultius rebus meis futurum censui, quam si illius conspectu & collo-
cutione, te mihi, si forte subiratus, ut merebar, fuisses, placatum propitiumque facilius redderem. Quamquam illud fixum semel immotumque inter nos velim optemque quam maxime, ut de meo ergo te cultu antiquo illo & plane singulari, omnique ea, qua tibi tot nominibus devinctus teneor, necessitudine, non ex litterarum mearum frequentia iudicium feras; sintque alii
etiam

etiam me silente perpetuae huiusve meae voluntatis obsides ac internuntii. Quid enim mihi vel ad laudem praeclarius vel ad voluptatem gratius, vel ad fidem opportunius, quam ut tuam mihi benevolentiam ac in me resque meas propensionem longo usu ac illustribus documentis probatam testatamque, non amittere mea culpa, sed tueri & augere indies potius liceat? Equidem ea fuit haecenus a tuo a nobis discessu temporum meorum ratio, ut quamquam sedandorum publicorum motuum aut fundandae pacis onus his certe humeris meis non incumberet, iis tamen obruerer ut plurimum curis, quae a colendis necessitudinibus meis mutuisque reddendis officiis me haud parum avocarent. Accessit luctus domesticus, isque intra dies haud ita multos geminatus, qui mihi utrumque gaudiorum nostrorum pignus fato immiti & acerbo abstulit, ac tristem infelicibus parentibus orbitatem reliquit. Quod tam amice vero, tam blande mei doloris non conscius solum ac testis, sed socius quodammodo esse volueris, in eo utique & vim amoris erga me tui singularem & humanitatem mirificam complecti mihi abunde licuit. Quamquam in his angustiis temporum, ac fatali quadam rerum omnium conversione, non deesse aliunde solatia haud omnino diffitear, quae huiusce jacturae sensum si non tollere funditus, minuere tamen plurimum, & ad fortiora consilia sedatioreque cogitationes animum convertere haud mediocriter valeant. Quae spes caeteroquin de claudendo Jani templo ac pace hîc loci fundanda stabiliendave plane decollavit, ubi locorum obsequentem fortunam reperiet, una augurari amplius licet. Erupit quoque ad nostratam Nicrum Rhenumque ex inopino ea, qua propemodum estis ambusti, belli flamma, infausto illorum studio, qui gentis Germanicae libertatem procerumque dignitatem & jura proculcare, suaeque libidini ancillari unice cupiunt ac tentant. Fecit tamen generosus fortissimi Principis animus, ut jugum illud cervicibus suis imminens subire non solum detrectarit, sed ut exemplo etiam suo simul & periculo gentiles suos ad heroicum hoc & salutare consilium amplectendum fovendumque novissime excitaret. Sed quando redibunt ea tempora, ubi non alia, nisi de praeclaris litterarum studiis & laboriosis doctorum virorum curis & lucubrationibus, inter nos differendi occurret materia? Aveo tamen scire, quando Maronem aut Flaccum tua singulari industria ac doctrina cultiores nitidioresque haud illotis manibus versare nobis tandem licebit. Josephus in Anglia ad editionem paratus, cui ornandae subsidia undequaque quaerunt & conferunt eruditi illi Oxonienses, qui hoc onus in se receperunt. Qua de re etiam illorum rogatu ad *Andream Bosium* in eandem curam strenue, ut dicunt, incumbentem haud ita pridem scripsi. An vero nundinae istae Francofurtenses aliquos bonae frugis ac mentis foetus, in hac temporum calamitate, sint nobis adlaturae haud equidem scio. Sed de his alias. Vale, Vir Nobilissime, & amorem erga me tuum etiam silenti ac immerenti factum ac inviolatum serva. Dabam Coloniae apud Ubios VII Kal. Mai. MDCLXXIV. Pro transmissio elegantissimo carmine immortales ago gratias. Tuas postremas mecum Bonnam post diem unum vel alterum ad Illustrissimum Marchionem de Grana feram.

HADRI-

HADRIANI WALLII

ET

NICOLAI HEINSII

EPISTOLAE

MUTUAE.

EPISTOLA I.

HADR. VANDER WALLIUS

*Nic. Heinsio.**Aquas Grani.*

Quamquam mihi praefagiret animus, inclyte Heinsi, has ad te vix perventuras, malui tamen verborum aliquot facere periculum, quam naufragium benevolae tuae de me opinionis, si omnino non fuisset conatus tibi respondere. Conatus, inquam: non enim amplius possunt meae vires, utcumque demum tu sentias, & nuperis istis totus effundaris in amici tui (alio nomine ne mihi fas sit me appellare, gratissimam jam olim imposuisti necessitatem) laudes. Eas etiam ipsas cur non exosculer, quae non debentur meritis meis ullis, sed sanctissimo amoris tuo. Nimirum, ut, quorum regius morbus aurigine oculos suffudit, lutea vident cuncta, ita quicumque animus efficacis hujus affectus veneno haud semper noxio imbutus, omnia, in quae intuetur, aut invenit pulchra, aut facit. Ne exspecta, ut nunc vicem reddam ego, qui, quoties te, quoties amplissimum virum parentem tuum circumspicio, cogor, quod solent, quorum mentes ingens admiratio occupavit, aliquandiu silere. Illas, quas ad *Kinschotium* nostrum volebas, postridie ejus diei, quo tuae ad me fuerunt delatae, curavi. Speraveram hisce aliquid iterum novi me tibi de Heroe isto nunciaturum: ea spes induxit, ut scriptionem differrem, sed fefellit. Aliud tamen est, operae pretium quod narrem, ac rideas forsitan omnibus cachinnis tu.

Et quantum est hominum venustiorum.

Non ignoras ut, te monitore, emendationem choliambi alicujus apud Martialem e notis suis ad Gratium eraserit¹ amicus noster. De ea re nunc ipse plurimum dolet, docere paratus admitti in secunda scazontis sede spondaeum.

Ita-

¹ Janus Vlisius.

Tom. III.

Nnnnn

Itaque in notis ad Nemesianum obiter emendationem suam repetet haud sine sale, quo asperfurus est contra sentientes, homines procul dubio infusos. Jurisconsultus *Boys* libellum vulgavit, cui titulus est, *Theantropologia*. Sunt aliquot de servatore nostro elegiae, sacrae, magnificae, characteris ante hac inusitati. Nam neque liberas, in quibus frequentes Graeci, inventiones, hisque proprios numeros adhibet (quales felicissime Catullus expressit, ac incomparabilis, ut ubique, in monobiblo pater tuus) & vix unquam sensum disticho absolvit; verum in sequentem hexametrum producit, ubi fere semper in penthemimeri Claudianaea conquiescit. Heroi *Zuitichemio*, quem in inscriptione illustrissimum vocat, dedicavit. Eum, postquam se *umbrosus vatem* dixit, sic alloquitur.

Illustra me luce tua illustrissime.

Ex ungue leonem. Plures elegantias ejuscemodi haec charta non capit. Cura ut valeas, ô decus nostrum; &, nisi intra paucos dies huc cogites, quid agas, sciamus. dabam Delphis nostris. Prid. Non. Sextil. CIOIOCLV.

EPISTOLA II.

H A D R. V A N D E R W A L L I U S

Nic. Heinſio.

Parifios.

FRigus hoc tam diutinum & acre non modo summam mihi strinxisse cutem, sed altius quoque in ipsas, tencerrimorum affectuum sedem, medullas penetrasse vereor, ne coegerim isto literarum, ita liceat loqui, justitio te tibi persuadere, nobilissime Heinſi. Ab eo tamen metu securum esse jubent nuperae tuae elegantiarum plenae & humanitatis, quibus adeo praeclare de me sentis, ut nonnunquam deesse officio impune mihi fore confidam. Ingenue fatebor; quo tempore tuas accepi, teque in procinctu stare, ut Lutetia moveres, docebar, apud animum meum constitueram non antea respondere, quam de itinere tuo aliquid certi sciremus, gnarus quam saepe litterae pereant in via, quamquam earum facilis sit jactura. Nunc autem tanto alacrius animum appuli ad scribendum, quod eo loci sis reversus, quo cogitatione retrogredi multo mihi jucundissimum accidit. Quae enim aliis in urbibus frequens vagatio taedium parit, ea ibi saepe me abripuit invitum, & fere semper otioso etiam nihil agendi imposuit necessitatem. Et profecto quem non utcunque occupatum eliciant nunc delitiae fontium & honorum, nunc palatiorum splendor & varietas templorum, nunc amoenissimus propter Sequanam subter fluentem prospectus ab illo ponte.

Ubi perenni Magnus Erricus suis

In aere restans civibus,

Acris caballi rector emirantibus.

Occurrit advenis eques,

Et

*Et quantus instar Martis imperterriti
 Tercentum obivit praelia.
 Et qualis urbem intravit augustam, hostibus
 Caesis, fugatis inclytus,*

Quomodo olim scripsisse memini in carmine ad *Kinschotium* nostrum, vicinae insulae tunc forte habitatorem; cujus peractae rei memoria, quamquam dulcis, aliquam tamen tristitiam creat; quod nobis tam felicibus esse jam non licet, ut herois illius praesentia fruamur. Utinam aliquando vos reduces ambos detur amplecti, & audire diversa memorantes! ita dii viales, ita sospitales velint, quod ego volo, mi Heinsi, quod vos vultis. Dabam die 26 Februarii *MDCCXLVI*. Hagae raptim, cum Delphis redeuns visissem ad *Vlitium* nostrum, quem suis scribendis occupatum oppressi: proximis plura, postquam contigerit tua videre, quae avide exspectamus, ô magnum patris incrementum.

EPISTOLA III.

NIC. HEINSIUS

*Hadr. Wallio**Hagam.*

Cogitationibus ac votis adsum tibi frequentissimus sane: quo magis cupiam minus alienum te esse ab epistolari officio. Per me quidem non stabit, quominus identidem colloquamur. Enitendum nempe est omni utrimque contentione, ne locorum intervallis, quibus distinemur, aliquid in nos videatur licuisse. *Weymannum* ad plures abiisse intelligo. De Bibliotheca sua quid supremis tabulis statuerit, tu me docebis. Literas hodierno die ad *Gervartium* ac *Wallium Jacobum* dedi, utrumque in vivis etiamnum esse auguror. De Negotio Neoburgico ad litem meam pertinente, quod discedens tibi commendaram, quid factum sit, scire desidero. Nasonem meum si necdum tradidere *Elzevirii*, exemplar ab iis postules ipse par esto. sed *Kinschotianas* Musas quando videbimus? Noli, quacis, injurius esse in existimationem hominis ingeniosissimi, qui, dum vivebat, in oculis te tulit assiduum. Da hoc ejus meritis, da nostris precibus, da tuae gloriae. Commentarios Caesaris ex editione *Jungermann* Francofurtana, quibus cum notae diversorum, tum Maximi Planudis versio graeca accedunt, furto nescio quis mihi abstulit. Aliud exemplar apud vos si venale mihi inveneris, pretium fide optima restituetur. Vale. Exarabam Holmiae Suecorum *MDCCXLII*. xxviii. Januarii.

EPISTOLA IV.

HADR. VANDER WALLIUS

*Nic. Heinſio.**Holmiam.*

TU quoque non modo in cogitatione admodum mihi creber es, sed etiam in ore, praesertim apud eos, quos ego, cum se tibi amicos dicant, mallem ut essent. De affectu quidem meo nihil deteret aut temporis aut loci intervallum: tamen Epistolare, quod postulas, officium exhibere, licet maxime velim, vereor ut possim, ita infrequens Hagae & in vicinia proximam per aestatem sum futurus, sicuti & magnam elapsae hyemis partem egi in Hollandia Borea. *Weymannus* sine testatis ullis tabulis decessit, ventrem haercedem linquens; neque dum de uxoris partu quidquam inaudivi. Bibliothecae ejus describitur catalogus, typis excudendus, nescio sub auctione, an aliter vendendae. Dicitur repertus licitator, qui offerat imperialium tria millia nummum. *Kinschotii* immemorem ne me putes; eccum effigiem, quam me absente sculptor effinxit pro veteri, quam dederam reformandam: an feliciter, tuum esto censere, cui pectore infixum credo amicissimi capitis vultum. Musae illius bene se habent: quod eas prodire necdum finam, hoc ipsum est, quia nolo injurius esse in existimationem hominis unice cari: fuisset maturo, ut abunde mihi postea compertum, quare haud poenitet morarum, animoque sedet non ponere rumores ante salutem. Si autem vel minimo indicio rescivissem, ambivisse te, ut Naso tuus in publico appareret phaleratus, nihil obstitisset propositum meum, quo minus potuissem e *Kinschotianis* depromsisse carmen unum aut alterum pretii non vilioris ac sunt ea, quae vidi praefixa, cum *Elzeviriorum* cura politissimum munus accepi; pro quo tibi gratias ago. Ovidius, qui, te hinc profecturo, Lugduni nostrae sub praelo erat, dudum editus est, & Holmiae procul dubio jam visus, cum pulcro, scilicet, epigrammate, subscripto imagini poetae, quae est in limine libri, *tractent fabrilis fabri*. Et ille *Faber*, tam laute a te exceptus, pridem dictus obiisse, revixit; quod tibi latere haud putem; uti neque eum emisisse in lucem Bibliothecam Apollodori; parare Lucretium, quem sic fortasse servabit Apollo. Commentariorum Caesaris exemplar, quale petis, curabo ut ematur, prima, quae dabitur, occasione. Quas ad *Gevartium* & *Jacobum Wallium* literas dedisti, te non frustra dedisse autumo, quamquam diu sit quod Antwerpia nihil ego acceperim literarum. Super Neoburgico negotio, ad res tuas spectante, conveni *Hessingium*, qui mihi retulit, illa a te ipsi commissi *ὑπομνήματα* Dusseldorpium esse missa; & inde Dortmundam, sed hinc nihil apparuisse responsi; igitur ut denuo ea mitteret rogavi, & spopondit se facturum. Vale. Scribebam Hagae Batavor. *ciōiōclxii*. Martii vii.

EPI-

EPISTOLA V.

HADR. VANDER WALLIUS

*Nic. Heinsio.**Holmiam.*

THomae a Kempis libellum de imitatione Christi *Theod. Graſwinckelius* carmine a ſe redditum mihi commiſerat ad te mittendum, quem ego admodum feſtinus tradideram heri *Pluymero*, ut ille porro curaret, mandaramque una ut breviter ſignificaret, unde veniret, cum mihi non ſuppeteret otium ſcribendi; ſed, ubi me vidi fruſtatum occasione abeundi, placuit hac in urbe pernoctare. Eſt mecum hîc eodem in diverſorio Clariff. *Voffius*, cui expoſui, quae tu ultimis tuis (quae mihi Hagae reddebantur nudius tertius ſimul ac re- verſus co forem, iterumque abirem) petieras, de codicibus Ruſi Feſti Avieni, & Virgilii, quem unicum, (ut noſti) poëtam, unice commendo diligentiae tuae, neque ipſi minus bene eſſe velis, quam Ovidio, quem præclare a faſtidio quorundam delicatulorum vindicaſti. Labori tuo & tibi propitium gratulor *Tanaquill. Fabrum*, cujus brevi prodibit Lucretius, dum moratur alter. Gaudeo etiam de curis ſecundis tuis in Naſonem, quae ſi in juſtum commentarium excreverint, paratum ſe *Blaeuviuſ* ſaepe mihi dixit, opus illud excudere auguſtiori forma, communi approbatione haud cariturum, niſi, eorum, qui communi ſenſu plane carent, certe prioribus jam curis meae exſpectationi non modo ſatis feciſti; ſed eam longe ſuperaviſti. Exemplar non habuiſſe ſe *Graſwinckelius* conquerebatur, cui ego meum ultro conceſſi, tuo tamen nomine, quem ita voluiſſe ajebam, eſſe in culpa, quo minus id ante fuerit factum, *Elzevirioſ*, a quibus ego aliud eſſem petiturus pro occasione, qua nunc (reor te non invito) utar. De *Furſtenburgio* audiveram jam, nescio an tu de editione quorundam poëmatum ejus, Antwerpiae ſcilicet; titulus libelli eſt, ſeptem (ni fallor) illuſtrium virorum poëmata, ſunt etiam inter ea, quaedam *Natalis Rondinini*; ut ex praefationibus conjicio, editor eſt *Jacobuſ Walliuſ*, qui Iperis degit, ſaeculumque eſt quod de ipſo nihil ſciam per ipſum. De cariffimae tuae ſororis fato indolui tua cauſſa; ſed in poſterum amici erunt tibi & ſoror & fratres. Vale & ſalve, mi Heinſi. Scribebam raptim Amſtelodami; die **xxi r r Junii c i d i o c l x i i**. Nescio cur literas mihi inſcribas, I. V. D. falleris nescio quomodo in titulis ſemper, nec enim iſtum quidem ego unquam aut emi aut ſumpſi. Saepe ſubmonui; ſimplicitate nihil peccabis.

*Hadr. Wallio**Amstelodamum.*

GRafwinkelianum de imitatione Christi Poëma recte curatum est jam pridem, mi Walli. Ἀντίδωρον quod reposuisti Nafonem meum, nihil praeter ordinem a te factum est. Jamque *Elzevirio Danieli* in mandatis dedi, ut aliud Nafonis exemplar ad te perferendum curaret, si negligit officium pro imperio postula, quod tibi debetur jure optimo. Virgilium plurimis locis castigatum jam ad typographos edendum hinc ablegavi. De animadversionibus tamen res paulo lentior videtur fore: quas ne una miserim fecerunt amicorum pollicitationes, spem facientium de majore veterum membranarum copia mox suppeditanda. Tres ex Gallia Maronis Codices jam accepi, praeter eos, quos possideo ipse, Duos Monasterio a *Rottendorphio*, totidem a *Langermanno* jubeor expectare Hamburgo. Quinque *Moretus* apud *Elzevirium* deposuit, quos sub hanc anni tempestatem maris periculo exponi consultum non videtur. Alii aliunde mox aderunt. Solus *Vossius* noster inter haec auxilia auxiliantium undique amicorum suos codices huc perferri non patitur; sed fruatur ingenio suo, quando se solum praelucere omnibus caecutientibus arbitratur. Interim detexam proximis feriis, quae ad Valer. Flaccum non pauca observavi. Silius & Lucanus postea sequentur. Quamquam de Lucano nihildum statui, quod illa provincia *Spanhemio*, ut scis, jam pridem destinata sit. *A. Furstenbergio* literas non ita pridem habui, addito Poëmatum munere. Vir ille dignissimus est tanto fortunae fastigio, quem inter amicorum potissimos semper numeravi, ex quo Romae contubernalem habui. Sorori unicae a me parentatum est, & eadem quoque opera amicissimo *Schelio*. Versus funebres, si tanti eos putabis esse, apud *Gronovium* nostrum licet videas, ad quem missi sunt. Familiae Romanae *Fulvii Ursini* additis de novo plurimis numismatis per *Carolus Patinum* Lutetiae prodierunt. Exemplar necdum nactus sum, quod is, qui id ad me laturus est, negotiator Gallus, dicitur in morbum Amstelaedami incidisse. Vale, mi Walli, & me, quod facis, ama constanter. Prodibunt hîc brevi fabellae Phaedri commentariis illustratae per *Johannem Schefferum*. Holmiae Suecorum MDCLXII. a. d. v. Decemb.

EPISTOLA VII.

H A D R. V A N D E R W A L L I U S

*Nic. Heinsio.**Holmiam.*

NAE ego te constanter amo, mi Heinsi, cui tuae tum ingenii tum animi virtutes admodum sunt perspectae, iisque faveo tantum, quantum plures (quos illud quoque deceret) favere opto, qui nescio in quos rumusculos intenti multa de te non amice sciscitabantur. Hagae cum essem, litterasque tuas ibi forte aperirem redux, intelligeremque una latam super tuo negotio & pronuntiatam sententiam, quam & talem & festinatam aegre inaudivi. Laetabar tamen postea quam hîc Amstelodami a *Plumero* rescivi rumusculos istos vanos esse, & manere tibi mentem, quam discedens mihi indicabas, firmam contra haec adversa, cauturumque, ne cogare ad quidpiam te indignum. Unde & est quod gratuler tibi prospectum de potentibus amicis, & in his, quem commendas, *Furstenbergium*, qui praesidio esse possint, si quid forte iniquius inimici moliantur favente (quod abominor) Fortuna. Ego iterum maximam aestatis partem Hagae me abfuturum credo; Uti & *Christianus Hugenius*, qui (ni fallor) Lutetiam Parisiorum jam abivit, non nisi sub autumnum rediturus, ego tamen multo antea, & per intervalla crebrius; itaque si quid officii praestitum tibi velis, non errabunt litterae tuae illuc destinatae, nisi forsan longius me detinuerit Brabantia, quam cogito. Laetum habui nuncium de curis tuis in tot veteres Poëtas; sed Lucretium omissum nolim, quem, a *Fabro* promissum & Gallia nondum contigit videre. Illud enim rogo, ut commatum distinctionis & interpunctionum rationem accuratorem habere jubeas, quam vulgo fiat, praesertim quando iis sensus verborum illustrior evadit: sicut illud Lucretii in tertio, sic interpungunt:

*Sponte sua leto caput obtulit obvius ipse.**Ipse Epicurus obit, &c.*

At quanto melius foret; ita, uti jam monui nostratem editorem:

*Sponte sua leto caput obvius obtulit. ipse,**Ipse Epicurus obit. &c.*

Apud Virgilium ecloga Prima, sic distinguitur in vulgatis:

*Impius haec tam culta novalia miles habebit?**Barbarus has segetes; en queis consevimus agros!*

malim ego,

*Impius haec tam culta novalia miles habebit**Barbarus? has segetes? en queis &c.*

Et si quae talia plura occurrent alibi, quae equidem iudicii tui sunt. Aliud Nasonis tui exemplar nondum ab *Elzevirio* accepi, sed quando iterum hac transibo, aut Hagae illud mihi reddetur, tibi pro munere gratias ago, idem

idem jam bis debiturus. Cum primo oblatum fuit, raptim pervolvi totum, & etiam mei mentionem (quod minime fuerat opus in re tantilla) amice factam notavi; aliaque nonnulla postmodum majori otio, quae mitterem, si chartulae eae in promptu forent, quamvis exigui momenti. Carmen, quo unciae forori & amicissimo *Schelio* parentasti, apud *Gronovium* non vidi, qui illud missum narrabat ad *Graevium*, ab eo una cum pluribus edendum cum parentalibus ἔμακαρίτη. Petebat etiam a nobis aliquid; sed post abitum tuum nondum videmur cum Musis in gratiam rediisse. Interim addixi poema ¹ *Kinschotii*, *Schelio* olim inscriptum, de Virgilii Maronis natali, in quo & tui honorifice meminit, nescio an tempori adfuturum; jam enim fere mensis elapsus, cum promisi. Sriveriana Bibliotheca hîc sub auctione vendita est, at non licuit mihi auctioni interesse: Weimannianae me adfuturum saltem ex parte non diffido, cras enim aut perendie Hagam revertar, ibidem paucis diebus moraturus. Catalogos utriusque vidisti puto. Weimannianos certe haeredes & *Leffenium* praesidem auctoris futurae monueram, catalogum tibi mittendum ut curarent, & per absentiam meam aut *Bisdommero* Hagae, aut *Plumero* traderent Amstelodami; quid fuerit praestitum ex ipso non quaesivi ante has obsignatas. Salve & Vale, mi Heinſi. Dabam Amstelodami, die XXI Aprilis, Anni MDCLXIII.

¹ Legitur lib. I. Poëmat. Kinschotii pag. 31.

EPISTOLA VIII.

NIC. HEINSIUS

Hadr. Wallio.

Amstelodamum.

Tardius paullo, quam oportebat fieri, tuae mihi sunt redditae, ut mirari non debeas, mi *Walli*, si lentius procedit responsionis officium. Quid quod aestatem hanc domo abfore te minabaris? ut frustra viderer scripturus, si scriberem. Nunc quoque vix promitto mihi sperandum esse, ut hae in manus tuas perveniant. Jacienda tamen fuit alea, ne mihi ipsi inviderem voluptatem longe maximam, quam ex tua consuetudine cepi hactenus. Ad Lucretium & Maronem, quae in tuis illis observas, habui, ut tua omnia, perquam accepta. In Marone castigando, quantum licet per occupationes publicas, sum assiduus, codices divini poëtae jam evolvi aut evolvendos teneo vicenos circiter, quarum major pars e manibus jam pridem dimissa. Mense unico opus est etiamnum, ut hac opera defungar penitus, sed & hoc ago, ut quicquid a vetustis scriptoribus, praesertim Grammaticis, ex Marone profertur locorum, cum vulgatis editionibus committam. Unde membranarum discrepantiis plurimum subinde auctoritatis & praesidii accedit, sed paucorum dierum non est hoc negotium. Auguror tamen praelo typographico ante hyemem proximam parari omnia posse. Ad Silium Italicum & Valerium Flaccum castiga-

stigationes jam descriptae sunt. Sed exspecto ex Germania Belgioque nostro nonnihil etiamnum subsidii, quo uterque scriptor ornamenti quid capiat. Leviori manu has lucubrationes detexui. Interim & poematum meorum editionem novam flagitant Bibliopolae *Elzevirii*. Cui curae vacare etiam post alias jam coepi. Suadent nonnulli ex amicis, ut praestantium hac tempestate virorum ad me scripta carmina; in libellos duos adoptivos divisa, meis versibus addam, quorum prior exterorum musas, alter Belgarum nostrorum fœtus complectatur. Et sunt sane in illis non pauca, quae legi publice mereantur, sed non est frontis meae meas laudes lectori obtrudere & palam venditare. Tu quid censeas hîc, doceri & commonefieri opto. Claudianus meus secundae editionis jam, ni fallor, est sub praelo. Pluribus tecum agam, cum docebis me, ubi locorum sis compellendus. De *Jacobo Wallio* deque *Caspere Gevartio* diu est, quod nihil prorsus intelligo. Antwerpianam si perlustrasti hac aestate, non potes ignorare, quid de postremis *Rubonii* opusculis sit expectandum. Vale, Vir Amicissime. Scribebam Holmiae Suecorum ciciciclxiii. a. d. xlix. Sextilis Gregoriani.

EPISTOLA IX.

HADR. VANDER WALLIUS

Nic. Heinsio.

Holmiam.

Nihil mihi gratius potuit reddi tuis litteris, nobilissime Heinsi, quae me Haegae jam reducem invenerunt, non tamen ex Brabantia; quam visere hac aestate (ut bene conjicis) non nisi minatus fui, comite, quocum ire statueram, aliorum viam ingressio. De postumis autem *Rubonii* opusculis jam antea dudum ad me perscriptum erat, ea apud *Moretum* sub praelo esse; scilicet, de re vestiaria libellum, & gemmarum explicationes. Quae ad Maronem & Lucretium monueram observanda, monueram tantum: scio enim ut plura, ita & minuta haec per temet ipsum te sapere, testimonioque esse vel secundum versiculum Ovidii e tua editione.

Nil mihi rescribas attamen: ipse veni.

Qui recte sic interpunctus, contra quam in vulgatis. Neque nunc, dum in eo es, ut Maronis loca, a vetustis scriptoribus, Grammaticis praesertim, prolata, cum vulgatis committis, necessarium puto monere de delectu in diversis apud Virgilium lectionibus adhibendo: qua de re scediafma *Henricus Stephanus* conscripsit, qui quam sit feliciter versatus in iis expendendis jam tuum erit expendere. Minus auspicate exordiri hanc telam potest videri, qui primum specimen suae industriae exhibiturus; in hoc versu, qui est sub finem secundi Aeneidos.

Collectam exilio pubem, miserabile vulgus.

Servii quam Donati lectionem judicat potiore. Donatus, meliores (ut

Tom. III.

Ooooo

reor)

reor) codices secutus, legit, *ex Illo*. Servius obloquitur, quasi contra metrum peccaretur. Suffragatur *Henricus Stephanus* acumine plus quam Grammatico eandem ob causam, &, quasi aequè commodus foret sensus; quod certe verum non est, nec dum enim.

Diversa exilia, atque alienis quaerere terras

Divûm auguriis agebantur. Lucretium *Tanaquillicae Fabri* vidisti, credo, & una, vix quidquam factum esse ejus opera, quo minus eandem quoque provinciam tu tibi existimes capeffendam. Quantumvis nitida editio, & doctum opus, exspectationi meae, quoad restitutionem textus, satisfacit parum. Intellexeris procul dubio in adornando Plauto *Gronovium* esse, in cujus Livio lente typographi procedunt. Alteram tuam Claudiani editionem videbo lubens; uti & poematum, quibus, ad te scripta carmina, in libellos duos adoptivos divisa, ut adjicias, nihil impedire arbitror, quam scribis, rationem, quasi tuas laudes palam ipse venditaturus; & obtrufurus lectori: ea enim invidia facile leniri queat modesta praefatiuncula, occasionemque patefaciente quae te moverit, quare ad hoc faciendum hoc tempore animum appuleris tuum: neque vane persuadeor, nullas in illis tantas laudes futuras, quin majores oppido merearis. Unicam tantum cautionem suaserim adhibendam, nihil quidpiam ulterius edere, auctore non probante. *Lipsi* querelas in hoc negotio tibi haud ignotas puto, qui ipse, hinc doctior, deinde in aliorum epistolis edendis parcius fuit, neque id postea, scriptoribus inconsultis, fecit. Ubi, quid constitueris certi de adoptivis libellis, cognovero, atque, num aliqua *Kinschotii*, meaque, & quatenus, apud te quae servas carmina, in istis velis comparere, ego de meis & *Kinschotianis* sententiam feram, & quomodo cum ipsis agi optem, rescribam. Magno meo gaudio inaudivi, illis te ingeniis annumeratum, quae suam experiri liberalitatem rex Christianissimus digna judicavit; audiam majore, te gaudere; & bene rem gerere. Salve, mi Heinse, & Vale. Dabam. Hagae Batavor. die XVI Septembr. MDCLXIII.

EPISTOLA X.

N I C. H E I N S I U S

Hadr. Wallio.

Hagae.

Invitus intellexi turbatum esse in *Vlitanis* aedibus, quas sibi funestas hospes. Iam non unus expertus est. Miratus etiam sum frontem Philosophi nostri ferream, qui toties praemonitus de hospitio alibi quaerendo, ejici foras maluit quam abire, quod per hospitem illi licebat. Quia tamen turbatum est me nolente, & uterque fabula jam per civitatem facti sunt, haud invitus exitum histrioniae hujus videbo: & si quid praeterea scriptis est descriptum hospitalis hujus rixae, id ut quamprimum ad me perferri cures, unice te rogo obsecroque. Virgilium typis minimis descriptum ex recensione nostra jam accepi. Multa

Multa mihi post has curas subnata sunt, quae secundae editioni eadem proditura forma, qua Nasonem *Elzevirii* dederunt, reservantur. Notas tertia editio sibi vindicabit. Claudiani specimen jam vidi: typi arrident, nitidi. plane, ut optime mecum hîc agi sim arbitraturus, si emendate omnia in lucem proferrentur. *Henrici Stephani* ad Maronem annotata inspexi quidem, sed non perlegi, quod tamen a me fiet, ubi mea in ordinem jam redegero. De Silio, Valerio Flacco, poematis meis lentum est negotium, quod publicae occupationes frequenter inde me avertant, spero tamen ante proximam aestatem & illa praelo fore committenda. Petronii in Dalmatia inventum codicem vetustum libris vulgatis multo auctiorem an intellexeris haud scio: Romae nunc exemplar illud asservatur, & spem faciunt amici fore, ut publici juris mox id fiat. Nunciatur ex Galliis *Cardani* opera denis voluminibus apud Lugdunenses prodiiſſe. Phaedrum *Schefferi* commentariis illustratum hîc terrarum publico datum vidisti credo. De libello carminum adoptivorum poematis meis subtexendo consilium necdum cepi; ipsis poematis accedent fortasse nonnulla ex Saturnalium libello excerpta, quem tamen mutilum possideo, cum ejus, quod penes me est, exemplaris in fine nonnullae paginae mihi nescio quo fato perierint. Tu vide an damnum istud ex tuis schedis possit refarciri. Commentaria Caesaris ex editione *Jungermanni* cum venalia occurrent in auctione quavis, mei rationem uti habeas enixe peto: Nummi, quos expendes, ab *Elzevirio* tibi restituentur. Ipse *Elzevirius* negat venalem apud se proſtare hanc editionem, qua tamen mihi nunc est opus, consulta. Quid *Vossius*, pergitne de Britannico itinere cogitare? De Livio ac Plauto *Gronovii* plurimum mihi promitto; solus propemodum vir ille Majestatem literarum ab interitu vindicat ac tuetur hac tempeſtate. Habes hîc nonnihil lusus poëtici. Erant plura, sed metui ne odiosus essem, si omnia tibi apponerem. Vale, mi Walli. Exarabam Holmiae Suecorum MDCLXIII. a. d. XVII. Octobr. Ajunt *Plantam* versibus insulis ausum nuper insultare *Vossio* in gratiam. Professoris nescio cujus Brédani, unius videlicet ex antagoniſtis Voſſianis, si ita res se habet, nihil obſtat opinor, quò minus nugator in meis poematis mox vapulet. Cum *Ludovicum Hugenum* forte convenies, percunctare illum, quaelo, quosnam Nasonis codices, & cujus notae in Eſcuriali Bibliotheca invenerit. Audio enim offendiſſe illum inter alios poëtae noſtri codices vetuſtiſſimum *Metamorphoſeôn* exemplar.

I Antonii Hulſii.

EPISTOLA XI.

HADR. VANDER WALLIUS

*Nic. Heinsio.**Holmiam.*

PER absentiam meam (post ultimas enim meas iterum in Nort-Hollandiam abieram, ubi huc usque haesi) rescire non licuit, an novi aliquid de hospitali rixa typis descriptum exierit foras. indagabo tamen, & si operae pretium fuerit, curabo ad te perferri. Virgilium tuum Amstelodami promiserat mihi *Elzevirius* tradendum in reditu meo, sed tunc, cum festinarem, non inveni paratum, neque tantisper morari permittebatur, dum folia colligerentur; itaque mihi expectandum erit, usque dum huc Hagam mittatur. De tuis in Lucretium curis nihil addis, de quibus equidem quid sit futurum, aveo scire. De auctiore Petronii codice in Dalmatia invento audieram pridem, & modo eum nunc Romae brevi lucem visurum. Phaedrum *Schefferi* commentariis illustratum, & *Cardani* opera denis voluminibus noviter typis excusa vidi, inque illis plurima haecenus *avēdota*. Commentaria Caesaris ex editione *Jungermanni* frustra adhuc quaesivi, neque inter Libros Weimannianae Bibliothecae reperiēbantur. Nesciebam adeo illis tibi opus esse; alioquin dudum tibi misissem meum exemplar, quod jam ad *Elzevirium* est perlatum, una cum Saturnalium libello, ut ad te deferri curret; de pretio ne sollicitus sis; plura debeo liberalitati tuae. De itinere Britannico pergit *Vossius* cogitare, illudque inceptabit, quam primum prodierit libellus, quo respondit suis adversariis, (qui de auctoritate Lxx. interpretum illi negotium facefferunt, inter quos est professor ille Bredanus, in cuius gratiam versibus insulsis *Planta* longum post temporis intervallum iram Musarum denuo provocavit. *Ludovicus Hugenius* abest Haga. cum redierit, monebo ut ipse ad te scribat de istis codicibus Nasonis, quos in Hispania vidit. frater ejus *Christianus* e Britannii in Gallias iterum est reversus, & illic, ut audio, hibernabit. Lusus tui poëtici digni, qui tanti regis munificentiam iterum experiantur. in quo omine finio, mi Heinsi, & jubeo te multum valere. Scribebam Hagae in Batavis die xx. Novembris CIOICLXIII.

EPISTOLA XII.

NIC. HEINSIUS

*Hadr. Wallio.**Hagam.*

DE commentariis Caesaris, quae tandem ad nos perlata sunt, pudorem meum plane onerasti, mi Walli. Imploraveram ego diligentiam tuam, qua mihi opus erat, in conquirenda editionis Jungermannianae farragine; tu vero munificentiam ad partes vocasti, & domum ad me pervenire voluisti, quod ego aere meo redemptum unice cupiebam. Unde fit, ne ausim in posterum parem tibi molestiam exhibere, deterritus ab hoc proposito prodiga illa tua comitate & nimium obvia. Hospitalis ista rixa ne in Lapitharum pugnam vertat aliquando videtur metuendum, sed quid agas? spectemus igitur nos, & faveamus vapulantibus, quando id utrique litigantium est ingenium, ii mores, ut jam pridem nihil tranquilli ac pacati praeseferant. De *Vossio* ex quo in Britanniam emigravit nihil audio, ne hoc quidem an salvus eo pervenerit. Narrant amici Parisini, a *Petito* vindicias in illum parari. *Schefferus* Mauricii & Arriani *Tactica* haecenus inedita commisit praelo typographico, quod jam alias significasse me vobis opinor. *Virgilius* meus parum ex animi sententia in lucem protractus est, editionem ejus longe magis accuratam cum annotatis uberibus aestate proxima, ut auguror, habebo paratam cum poematis meis, *Valerio Flacco* ac *Silio Italico*, ad haec *Nasone* curis iteratis illustrato. Nam *Claudianus* operas typographicas jam nunc experitur. Comititia habebuntur sub Kalendas Majas in hac civitate, & in mensem tertium aut quartum fortassis extendentur. quod ego tempus cum a publicis negotiis vacuum sim habiturus, supremam interea manum, ni fallor, potero imponere iis lucubrationibus, quas propemodum adfectas in scriniis jam nunc servo; *Petronii Satyricon* auctius praelo Patavino jam prodierit autumno; prodierunt & alia Romae, sed rem Theologicam potissimum spectantia, in his acta passionis *B. Perpetuae* & *Felicitatis*, insigne antiquitatis monumentum. Habes hîc epigramma, quod postremum Regi Galliarum inscripsi. *Ludovicus Hugenus* utinam mei juris faciat, quae *Nasonia* collegit in Hispaniis, utinam & *Gudius* quae conquisivit per Italiam, sed uterque cunctantur, & moram lentissimi trahunt. Vale, mi Walli. Exarabam propere Holmiae Suecorum Anno *MDCLXIV.* a. d. xi. Martii Gregoriani.

EPISTOLA XIII.

HADR. VANDER WALLIUS

Nic. Heinsio.

Holmiam.

A Nte tres, & quod excurrit, menses ad ultimas tuas litteras respondi, addideramque quicquid praeterea hospitalis rixae postea typis excusum esset, & meas istas *Bisdommero* tradidi curandas porro Holmiam: iisdemque indicabam eodem me tempore institori *Elzeviriano* exemplar meum (quoniam aliud non reperiēbam) Caesaris commentariorum ex editione *Jungermanni* commisisse deferendum *Elzevirio*, ut ad te mitteret prima occasione oblata, quod factum antequam Amstelodamo discederet; redux ille idem mihi affirmavit, nescio tamen, an recte acceperis, quia praeter morem tuum files; nisi forte me nondum huc rediisse arbitreris. Libro commentariorum Caesaris addideram *Therianthropologiam* cum suis appendicibus, ut postulasti: Pullus iste Musarum, in quem scripta est, magno earum dolore, credo, jam dudum in morbo cubat, qui nunc quidem aliquantulum remisit, periculo tamen aeger nondum est liberatus; si moriatur, epicedium para, & Apollini Paean. Meliori auspicio convaluit *Ludovicus Hugenus*, quem monueram, ut de codibus Nasonianis in Escuriali Bibliotheca visis ad te perscriberet, an fecerit, nescio, nec enim postea eum sum allocutus. *Christianus* frater in Galliis etiamnum haeret, uti *Vossius* in Britannia Londini, ut ex ipso sciveris, reor. *Gronovii* Plautus lucem vidit. At Virgilius tuus, quando? quando Claudianus? De Lucretio scripseram, an non cogitaris. certe meretur tuam curam, nam de sponsore ejus, quid dicam? quid sentiam nosti. cohortatus sum nuperrime (cum mihi textum jam paratum narraret, de commentario multa causaretur) ut saltem textum ederet, emendatum uti in commentario exponere cogitaret, hinc noscendum, velut leonem ex ungue. Exemplo esse Ovidium tuum primae editionis. respondit: magis curandum esse de ipsis rebus & argumento, quod hactenus nemo digne praestitisset quam de criticis minutiis, quae multae satis in istum poetam jam prodiissent. Vale, o politiorum literarum decus, & Caesaris commentarios missos an acceperis si nondum rescripsisti, rescribe: ego, ut minimum ad medium usque Aprilem, hinc, aut in vicinia affuturus. Dabam Hagae, IV. Non. Martias. CIOIOCLXIV.

I Bornio. vid. *Vlirii* Ep. LI. & LII.

EPISTOLA XIV.

NIC. HEINSIUS

*Hadr. Wallio.**Hagam.*

Mense Martio, si recordor probe, postremum te compellabam, mi *Walli*, gratiasque pro commentariis Caesaris agebam. Ex illo ad me perlatae sunt tuae IV. Nonas Martias exaratae. *Ludovicus Hugenus* de Nasonis exemplaribus Hispanis omnia ignorare me patitur, fratrem ejus *Constantium* si quando obviam habebis, mone quaeso, ut paret, si quid in duabus Elegiis mihi jam olim inscriptis mutatum cupit. pergit enim *Elzevirius* urgere non poemata solummodo mea, sed libellos quoque adoptivos, quos poematis addi velit. Ego etsi ea de re necdum deliberavi satis, tamen rem gratam feceris, si quae tu, quae *Kinschotius* noster ὁ μακαρίτης honori meo quondam elucubrasti, in promptu habeas, aut ad me mittas, ne quid morae hinc injiciatur festinanti typographo. Hoc igitur age. Nunc Claudianum meum iteratae editionis accipies: quem si vacabit tibi evolvere, invenies de novo additam Lactantii de Phoenice elegiam, & in eam animadversiones nostras tuo nomini inscriptas. Virgiliani de novo Codices nonnulli notae praestantis ad me pervenere. Observationes meae in molem excresecunt magnam, quas hyeme proxima, si Deus vitam concesserit, detexam. In Therianthropologos quae olim lusi juvenilibus meis inserta cuperem, sed metuo ne hominibus nostris maledicus videar, qui & *Alastorem*, & alios illic exagitandos mihi proponam. Vale, *Walli* suavissime, & brevitati harum ignosce, necdum enim ex morbo nupero satis convalui. Holmiae Suecorum CIOICLXIV. a. d. III. Septembr. Gregor.

EPISTOLA XV.

HADR. VANDER WALLIUS

*Nic. Heinsio.**Holmiam.*

ET priores tuas, mense Martio exaratas, & Septembri ultimas accepi admodum nuper, mi *Heinsi*, cum tuo Claudiano iteratae editionis, inscriptoque mihi commentario ad Lactantii elegiam de Phoenice. Novo itaque & beneficio & munere mactus, quid expositulationi tuae super misso a me tibi Julio Caesare *Jungermann*i respondeam, nisi quod jam olim feci, plurium me debitorem esse, & felicem futurum, si aliquando queam reddere, non dico, paria, sed testimonium saltem animi grati. Quare si quid sit, quod ego in his oris tuae voluntati praestare possim, indicio tantum est opus, faciam lubenter.

Judi-

Judicium meum de novis lucubrationibus tuis ad elegantissimum poëtam non magnopere requiris, puto; tale certe, ut perscribere erubescam, ne tibi videar adulari, etiam cum promserim minus iusto. Utinam & Nasonem curis secundis, & quae caetera habes parata, brevi videamus! De *Alastore* & Therianthropologis exagitatis quid sollicitus sis; magna nomina, quae in similibus, ut nosti, praeiverunt sequeris, neque versus tantum, sed & ille prosa oratione scriptus lusus Saturnalius, ornamento fuerit juvenilibus tuis. Ad libellos tuos adoptivos ego & mea & ἡ παραπληρῶ *Kinschotii* in promptu habebo, aut mitam, si velis. Monere item ne negligas, an *Kinschotianis* cupias additam Cygneam cantionem ad *Schelium*, in qua & tui mentio amica, & viri maximi parentis tui admodum honorifica, pluribus versibus decurrens, neque commode ab orationis filo eximi potest, & seorsum dari, ut mihi quidem videtur. Ante annum, & quod excedit, petierat illam a me *Gronovius*, cum mea in eam ad *Schelium* praefatione excudendam, & *Schelianis* elogiis, tunc, ut aiebat, praelo paratis, inferendam, quae dudum speravimus: sed ea spes fefellit; ab ipso repetere parvi erit laboris, & forsan etiam hoc *Schelio*tribuendum non abs re fore putabis, ut & ipse tibi junctus inter tuos conspiciatur. *Constantinum* item *Hugenium* de suis monebo; bis enim aut ter jam frustra eum quaesivi, eadem opera *Ludovicum* moniturus, ne diutius te quidquam de Nasonis exemplaribus Hispanis ignorare patiatur: *Christianus* dudum redux Ordinibus Bataviae in comitiis obtulit ante paucos dies longitudinum terrestrium & marinarum a se inventam apodixin, positumque illi reperto praemium postulavit, quo successu brevi audiemus. Memini eadem de re aliquando ad te e Dania scripsisse *Langium*, tanquam a se quoque ad optatum exitum perducenda: opto scire, postea intellexeris quid ibi fuerit effectum. Ad *Rottendorcium* cum scribes, inquire quid de *Malincrotii* scriptis actum aut agetur, & an spes sit ut in lucem protrahatur operosa apologia pro *Erasmo* nostro pertexta ab illo viro, quae operae pretium foret ut praemitteretur novae operum Erasmi editioni, quam in Gallia Lugdunenses typographi moliri dicuntur, dum Roterodamenses cessant, acternum, ut videtur, cessaturi. *Vossius* in Galliis haeret, tamen propediem exspectatur, nisi eum detenturus Ampliss. *Beuningius*, eodem Reipublicae causa nuper profectus. cura ut valeas, amicissime Heinse, huncque & mox initurum annum, uti & ordine caeteros secuturos, auspiratum tibi precor. Hagae die XXI. Decembr. Anno MDCLXIV. De novo cometa varii hic sermones; nos utcunque valemus.

EPISTOLA XVI.

NIC. HEINSIUS

*Hadr. Wallio.**Hagam.*

Claudiani mei iteratam editionem non improbari a te, mi *Walli*, homine charum rerum egregie perito, plurimum laetor. Invitus tamen & indignabundus agnosco ex paucis pagellis, quas oculo festinante & alibi occupato percensere haecenus est datum, mendas hîc illic irrepsisse, cum plures, tum majores, quam par erat. Adeo vix tutum est, absentibus nobis operas typographicas exercere. In meis ad Maronem animadversis pauca detexenda restant, eaque librum Aeneidos postremum spectantia, sed cum in diversis ac variantibus scripturis veterum exemplarium examinandis hae lucubrationes defudent potissimum, Grammaticorumque priscorum auctoritas super dubiis lectionibus frequenter ad partes sit vocanda, quorum partem potissimam hac de causa jam perspexi, cum solis fore Maronianis interpretibus, Servio, Donato, Probo, Philargyrio superest mihi negotium ad quos propendendos opportunitas nunc non datur, alio conversis cogitationibus, ob bellum Britannicum, quod maxima, ut scis, mole patriae nostrae nunc incumbit. De poëmatis meis vix ausim quicquam polliceri, cum ea praelo sese subjecturum de die in diem polliceatur *Elzevirius*, nec subiciat tamen. Ajunt oratorem ex patria in hanc aulam propediem esse venturum. Quod si sit, aut mihi excursus ad vos diu captatus concedetur, aut certe in publicis negotiis minus occupabor. Nugas Saturnalitias an poëmatis reliquis sim additurus nec dum satis deliberatum est. Tua & *Kinschotiana*, quae honori meo dedistis, in penu tua habeantur velim, dum suprema poëmatis meis a typographo imponatur manus, tunc enim omnium optime arbitrari potero, quid addi, quidve demi versibus adoptivis debeat, ne in compagem modica majorem liber excrescat, neve nimis exilem selectori sistat. Quem successum apodixis illa, quam narrabas proxime, *Christiani Hugenii* habuerit aveo doceri. Jussus est jam pridem *Elzevirius*, Claudianum meum illi mittere; quem mandato paruisse confido. Cometa ille, qui sese Europae universae, ni fallor, ostendat, postquam noctes latuisset plusculas, denuo nuper apparuit. Quamquam ex Mathematicis non desunt, qui diversum hunc a priore statuunt. Sunt & qui argutentur tertium Cometam incepisse apparere. De *Langio* non satis memini. Nisi quod illum a me per Daniam iter faciente, cum huc contendebam, salutatum recorder monuisse, impensas privatis fortunis majores requiri ad periculum rei istius faciendum. De Apologia pro *Erasmo* Malincrotiana si paullo tempestivius rem in memoriam mihi revocasses, jam scires, quid de illa spei supersit. Litteras enim ad *Rottendorphium* non ita nuper dedi. Compellaturus illum denuo, ubi responsi nonnihil comparuerit. Vale, *Walli* jucundissime, & amicos commu-

Tom. III.

Ppppp

nes,

nes, ni molestum est, salvere plurimum meis verbis jube. Exarabam Holmiae Suecorum. CIOIOCLXV. a. d. XXIV. Febr: Graegor.

EPISTOLA XVII.

HADR. VANDER WALLIUS

*Nic. Heinsio.**Holmiam.*

A Liquid funestum accidisse mihi cerae istius indicio cognoscere te puto, mi Heinsi. Obiit ante mensem aut paullo amplius optima mater mea, quae Alckmariae voluit suum corpus humari, quo & funus deduximus. Inde mihi reduci aliud non laetum occurrit Hagae. Audiebam enim nuptiarum veterum denuntiationem sive (ut vocant) proclamationem primam publice factam fuisse, ex ambone in duabus aedibus sacris, Lutheranorum altera idque ob sponsae religionem: & altera Monasteriensi, uti hîc dicitur, quae olim Dominicanorum fuit. Id tuo jussu, & absentis nomine fieri per hominem fiduciarium, intellexisse primo videbar; quae mihi ut res mira, ita nec credenda putabatur: sed errore detecto mirari desinebam. De hac enim molitione jam antea inaudiveram. Nempe egregiam illam scilicet speratam tuam, egisse apud judices, & petiisse, ut, quod tu damnatus nolles exsequi per contumaciam; id auctoritate judicum fieret ab alio, qui in hac re partes tuas referret; eumque jam esse Curiae, quem appellant, apparitorem: unde cum hic homo in aede Monasteriensi praesens adesset, festive a non nemine quaerebatur; etiamne hoc solatii sponsae indulgeretur, ut in lecto tuas esset partes acturus. Rem ridiculam operae pretium visum ut scias. Nudius tertius secundo denunciatum. Ipsa matrimonii solemnitas non in aliqua aedium sacrarum: non in judicialium curiarum aliqua, sed in curia oppidi Hagensis, dicitur patranda. Post quam peractam nupta nova vetus munita literis commendatitiis creditur Holmiam navigatura, & ibi tuas in aedes irruptura, uti olim Amstelodami. Itaque nisi prius caveris tibi & tuis rebus, multum molestiarum exhibebit. Si tibi animus, qui fuit, manet, & memor sis multorum, quae te monui aliquando, omnibus facile obviam ibis, ut puto. Res seria agitur, quare etiam atque etiam vide, ut te & tua colloques in tuto, ac amicos veros a fictis discernere operam uti des velim. Illud maxime mihi aegre est, quod huc te venire non erit tutum, quocum tamen speraveram hac aestate praesens sermonem commutare, occasione quam in tuis perscripsisti: quibus jam antea dudum respondiissem, nisi jam antea etiam meae matris causa haesissem diutius in Nort-Hollandia, & tempus trivissem visendo plus vice simplici classem nostram in anchoris stantem; & exspectans itidem dum in altum illa solveret; quae tamen spem meam fefellit, cum enim aliquoties ventos secundos habuisset, non nisi post meum abitum illa exiit malo alite. Amstelodami poemata tua excudi coepta vidi. sed lentum negotium ajebat *Elzevirius*, quia tibi singula folia mittenda ut corrigas. In
ele-

elegiam, quam olim mihi inscribere tibi placuit, incidebam. Emendationis curam adverti. Faxo ut similem in *Kinschotianis* & meis non desideres, si quid eorum inter adoptiva tua visum exhibere. Quare ne quid his inferas illorum, ut apud te jam extant, peto; *Kinschotianorum* praesertim; haec enim semel male evulgata; post ego pene frustra melius evulgem. Neque scio an Eclogam Thyrsin habeas a secunda ejus manu, ut eam, valde tamen obiter emendavit. Id scies, si in ea se ipsum *Corydonem* vocet an *Jolam*. *Corydon* enim est a prima manu, quem demum mutavit in *Jolam*. Hendecasyllabon, & elegias duas, non aliter habere potes quam a prima manu, quas ego tales, si meae forent, nollem vulgari. In poematum libellis, quae editioni pararat, e quibus tamen multa tollenda monuit, non comparet nisi ecloga; ego eis derelictis assumpsi hendecasyllabon, & elegiam, qua ut tua poemata edas, hortatur. Si plura velis, in quibus vel tui mentio, vel patris tui, colligam prout ipse voles, & mittam petenti, aut parata servabo. Virgilium tuum minori forma excusum, viae comitem abducebam. Placuit interim dum adornas meliorem, uti memini a te scriptum antehac. Hunc tamen dum pervolvo incidi in notissimum locum Georg. Primo. 218. *Et adverso cedens canis occidit astro*. Video tibi placuisse lectionem quae ponit, *averso*; quam tolerabilem puto, si quoque legas, *incedens*, uti puto eosdem codd. habere. Aliter omnino retinendum *adverso*; neque tamen in interpretatione *Salmasii* acquiesco, qui solum se hinc oculos habere putat; quare etiam ob hoc alibi a *Petavio* vapulat; quam juste non bene recordor, neque jam libros inspicere vacat. Alias, si tanti hoc putaveris, latius de hoc agam. Vale, meum decus, & salve. Scribebam, ut vides, praesestine, unde nec de successu negotii Hugeniani & ceteris amicis quicquam addo, in quibus fuisse spero, qui te de rebus tuis jam ante me monuerit diligentius, neque enim ego potui, aut etiamnum possum spatiis exclusus iniquis tam temporis quam loci. Die IV. Augusti CIOIOCLXV.

EPISTOLA XVIII.

H A D R. V A N D E R W A L L I U S

*Nic. Heinsio.**Holmiam.*

Am ante aliquot dies ad tuas respondere avebam, sed omnia sese mihi incerta offerebant. Inaudiveram enim causae tuae cognitores datos ab Ordinibus Hollandiae Syndicos Leidensem, Amstelodamensem, & Roterodamensem, ab illisque nihil dum fuisse relatum de ea re ad Ordinum confesum, cum iste ultimo ante mensem Septembrem desineret haberi; itaque sufflammatam rem credebam certo, neque quidquam peragendum antequam aliquid redintegratis Ordinum comitiis ad eos relatum foret. Sed etiam Lugduni Batavorum trinas denuntiationes sive proclamationes, quas vocant, fuisse factas quidam narrabat, & Amstelodami; hincque ultimum fabulae actum absolutum; ubi in camera,

Ppppp 2

quae

quae dicitur Scabinorum post tertiam denuntiationem, tua illa nec virgo, nec bona, nec bono alite nupsit. Haec qui narrabat, adfuisse dicebat, cum ipsa redux Hagae veniret ad Senatorem aliquem gratias actura pro officiis praestitis, & togatus iste vicissim novae nuptiae congratularetur. Alius tamen referebat praesentem se astitisse ante aliquot hebdomadas forte in aedibus coci cujusdam cum tua adversaria, quae de nuptialibus obsoniis parandis agebat, incerta prandione an caenae illius diei: unde conjiciebat potius Hagae solemnia peracta esse, uti etiam ab aliis nunc sum edoctus, & plura tu fortasse ac certiora: si tamen certiora. Nam quem scribis scortatorem notissimum, moechum cum cano capite histrioniae isti personam commodasse, jam dudum obiit diem suum & Proserpinae, credo, delicias facit. Filius ejusdem fuit bellatulus iste sponsus, qui patri in munere successit. Ex hoc ipso ut gesta res omnis anquireretur jussi, sed cui hanc provinciam dederam, nondum me convenit. *Salmasium* quo jure quave injuria corripuerit *Petavius*, reperies ejusdem *Petavii* dissertationum Vranologio subjunctarum libro 7. cap. 3. *Salmasium* ipsum consulere queas in Solinianis pag. 433. quem in editione Virgilii Commeliniana *Screvelius* more suo mutilavit. Codicum manuscriptorum si vel tantus sit consensus, vel auctoritas, ut omnino judices legendum esse, *averso astro*, alia & commodior interpretatio quaerenda est huic loco, quam dederint illi, qui haec tenus mihi noti in eum commentati sunt, & *Tò averso* approbarunt. Interpretationes enim istae ad trutinam expensae, aut secum ipsis pugnare inveniuntur, aut a poëtae mente palam alienae, longeque petitae; a quibus ne illam quidem exceperim, quae *Tò averso* jungeret *Tò incedens*; quae in eodem codice juncta reperit *Pierius*, & sensum quidem constituunt aptum lectioni, sed non menti Poëtae & procul nimis petitum. Omnium sententias singulatim excutere & ostendere incommoda nimis longum foret, etiam eorum, qui retinent *Tò adverso*, sed explicant perverse. Ego, quam rectam puto, indicabo paucis. Cum in eo omnes conveniant, & ita intelligi pene sit necessarium, agi hinc de occasu heliaco fideris, quod Canem vocant, convenientissime *adversum astrum* erit ipse sol, obvio motu Cani appropinquans, eundemque illustriori lumine obrutum intra suos radios absorbens; cui proinde obvianti & adversum eunti, ut majori minor, cedit Canis, postea non amplius spectabilis, quod est occidere heliace: de quo occasu locus intelligi commode non potest, si legas, *averso*; neque (hoc de occasu cum intelligis) locus commode explicari, nisi dicamus *adversum astrum* esse solem adverso motu obviam euntem Cani, qui & ipse tum contra solem ore obverso consistit. Haec mihi interpretatio optima videtur ac plana, omnes ineptias, quibus reliquae laborant, arcens a sublimitate Maronis, praesertim si meminerimus, uti frequenter *fidus*, pariter quoque *astrum* de sole *ἀπλῶς* posse dici. Manu ducere ad hanc nos videtur Macrobius Saturnaliorum lib. 1. cap. 18. Nescio an ab illo hauserint, qui ita locum interpretati sunt, aliquot astronomiae consulti. Inter quos primus (ut eos recenscam ordine quos eorum scripta prodierunt in lucem) *Georgius Henischius* commentario pag. 238. in sphacram Procli: *Joannes Keplerus* in epi-

epitome pag. 391. astronomiae Copernicanae: *Josephus Blancunus* in sphaera mundi, lib. 17. cap. 10. seu cosmographia. *Joannes Baptista Ricciolus* in Almagesto pag. 471. & 472. novo. Plures forte & vetustiores, quos ego ignoro. De adoptivis poematum tuorum libellis mone quae lubet: ego omnia parata habeo, & jam correcta. De morte *Boji*, dudum est credo quod certior sis factus; & de *Brunonis*, ipse, ni fallor, aliquando scripsi; effigies ejus aeri insculpta hîc prostare iussa; & carmen epicedium satis prolixum ab *Hornano* poeta scriptum servo; si cupias videre, indica mittendi modum, & desiderio tuo ut satisfiat curabo. Vale, nostrum decus. Hagae x. Kalend. Octobr. A. CIOICLXV.

EPISTOLA XIX.

NIC. HEINSIUS

Hadr. Wallio.

Hagam.

DUbius haerebam & incertus animi, quid de libellis adoptivis tandem statuendum esset, cum nec versus illos meis laudibus datos ut in publicum proferrem, etsi meritos legi, a pudore meo impetrare possem, nec sine injuria aliqua supprimendi fere videbantur. Jam tamen verecundiae manum dederam, cum ab eximio viro *Johanne Capellano* litteras accipio, quibus ille non tantum, qua est facundia, persuadet, ut publico permittam, quicquam carminum a praestantibus ingeniis meo nomine inscriptum penes me servabatur. Sed addit quoque preci huic efficacissimae epigramma, quod *Montozerus* Heros, quem de fama nosti, ni fallor, ad me jam olim scripserat, quodque meis in scriniis frustra quaerebam. Tandem igitur jacta alea est; nunc in schedis meis excutiendis sim totus, unde sparsa carmina colligantur. Etsi nonnulla ex his feliciter satis exarata haud compareant me nolente; nonnulla vix tanti sint, ut lucem videant, etsi a viris magni nominis conscripta. Libelli erunt adoptivi duo, quorum prior Gallorum, Italorum, Germanorum; Alter Belgarum nostrorum complectetur carmina. Ex Gallis *Montozerii* Ducis, Comitis *Brienni*, *Balzaci* *Menagii*, *Colleteti*, *Mori*, Italorum & Germanorum complura sunt. Teneo elegiam Praefulis Paderbornensis luculentam, quam tamen ignaro auctore non ausim publico dare. Scripsi quidem ad *Rottendorphium* jam dudum super ea re, sed nihil is rescripsit, quod me de viri Principis assensu securum possit reddere. Tua & *Kinschotiana* velim in promptu habeas, & si parata sunt, ad *Elzevirium* mittas. Scripserat non pauca ad me *Henricus Bruno*, quorum tamen nihil apparet haecenus in scriniis meis, praeter jambum *Christiano Hugenio* inscriptum, qui de me agit. Nec scio unde cetera conquiri possint. Sunt etiam in *Petri Strateni* & *Laurentii Nyendalii* Poëmatis epigrammata meo honori data, quae ad manum non sunt. Sed de his alias fortasse. *Paganini Gaudentii* inveni Epigrammata plurima tam Etrusca, quam Latina, quae etsi non

PPPPP 3

sunt

sunt magnae rei, facit tamen celeberrimum auctoris nomen, ut nonnulla ex iis sim prompturus, & haec quidem haecenus. Caeterum cum intelligam longae procrastinationis rem fore, si pagellae omnes carminum adoptivorum ad me corrigendae mittantur, nec satis fidam operarum *Elzevirianarum* correctori, obsecratum te volo, ut hanc operam mihi praestare ne graveris; qui te vicissim occasione quavis sum demeriturus: ita enim fiet, ut editio voluminis egregie maturetur, utque omnia quam emendatissime publico donentur. Si non detrectas molestiam, fac *Elzevirium* ejus rei gnarum, quaeso, quam primum: per proximum enim tabellarium, quae mittenda restant, is a me accipiet. *Adverso astro* non placet in Virgilio mutari. & hoc bene vidit *Salmasius*. Sed de Tauro interpretationem ejus non fero. *Aversum astrum* canis ipse, qui heliacè tunc occidit. Plura his nos ad ipsum locum. Si mihi sub aestatem excursus dabitur in patriam feram mecum, quae ad illum Poetam ac alios complures observavi typis describenda. Vale, mi *Walli*, & properae scriptioni ignosce. Exarabam Holmiae Suecorum ciōiōclxvi. vi Januar. qui annus uti tibi tuisque fortunatus decurrat Deum veneror.

EPISTOLA XX.

HADR. VANDER WALLIUS

*Nic. Heinsio.**Holmiam.*

Literas tuas nudius tertius accepi, & illico ad *Elzevirium* scripsi, me opellam, quam postulas, non detrectare. *Niendalii* & *Strateni* poemata penes me non sunt, sed credo illa etiamnum repperiri in tabernis Bibliopolarum, & ab *Elzevirio* haberi posse, si quid inde excerptum velis, indicio tantum opus erit. Si me contingat Alcmariam ire, dum libelli adoptivi sub praelo sunt, expiscabor de carminibus *Henrici Brunonis* quid comparari queat. Illic enim loci habitat soror ejus, & fratrem habet in vicino pago Egmunda patrii muneris successor. A praefule Paderbornensi nihil si inaudias, quo de assensu ejus sis securus, vide an hanc ego tibi sollicitudinem demere possim, ¹ praefatiuncula ad illam elegiam, in qua mentio fiat tuae circa eam rem religionis, & culpa editionis in me transferatur, cui indignum visum etiam hoc *Germanici* coeli decus non comparere inter tot sidera haud quaquam postremi honoris. *Aversum astrum* quoniam retinendum putas, non potest aliter, quam de ipso Cane intelligi, & qui aliter fecerunt, meras ineptias moliti sunt: omnis in eo labor erit ut cum heliaco occasu convenire facias interpretationem, quod cum alii praestare nequirent, in salebras compulsi sunt. Utinam sub aestatem excurrere in patriam detur, modo provideas, ut id tuto tibi liceat per adversariam tuam, & caveas

¹ Vid praefat. ad paralipomena carminum adoptivorum *N. Heinsii* pag. 87. quae est nostri *Wallii*: Et Amici Batavi elegia & reliqua carmina quae pag. 129. & seqq. leguntur, eundem auctorem habent, nam pleraque *Wallii* manu scripta inter Schedas *Heinsianas* repperi.

veas a dolis: in quo felici voto, mi Heinſi, finio, & taliter vertens tibi finiatur annus, precor. Dabam Hagae Anno cicioclxvi. die xxvi. Januar. raptim.

EPISTOLA XXI.

NIC. HEINSIUS

*Hadr. Wallio**Hagae.*

QUod cauturum te polliceris, nequid gravius peccetur ab operis typographicis, dum reliqua poëmatum meorum praelo committentur, exosculor & amplector ambabus ulnis tam obviam, mi *Walli*, facilitatem. De *Niendalii* & *Strateni* versibus omitte curam: jam enim illos a me accepit *Elzevirius*, etsi procul haberi poterant. *Brunonis* tria aut quatuor epigrammata in schedis meis fortuito inveni, & adoptivis jam addidi, plura fuisse scio, quae tu per otium ab heredibus aliquando impetrabis: nam nunc propter haec pusilla procrastinari poëmatum editionem nolim. *Furstenbergium* conveniam in itinere, si mihi per patres integrum erit hac aestate in patriam excurrere. Operamque tunc dabo, ut Elegiam ab illo castigatorem paullo nanciscar: etsi enim eleganter pleraque illic ac nitide dicuntur, sunt tamen nonnulla, quae limam qualemcumque videantur requirere. Poterunt tunc illa per te cum praefatiuncula latius in publicum proferri. Nunc, quaeso, telam inchoatam properanter detexamus. Vale Holmiae Suecorum Anno cicioclxvi. a. d. xxvi. Febr. Gregor.

EPISTOLA XXII.

HADR. VANDER WALLIUS

*Nic. Heinſio.**Holmiam.*

ANte mensem ad penultimas tuas festine satis rescripsi, & monui ut infidias caveres, si tibi mens esset in Bataviam venire; nisi forte cogi ames, ut rata habeas quae hîc contra te acta sunt; adversus quae potius, (si tibi animus, qui fuit, manet) protestandum (ut vocant) a te jam dudum fuerat. Tuo nomine id quidem fecisse *Goesium* Senatorem audiui; sed id factum a te probari singulariter oportuit, & etiamnum oportet; atque ad eundem ut denuo formulam protestationis mittas, consultum immo fere necessarium putant, qui tibi bene volunt; & postea dispiciendum, quo tutiore modo hîc aliquando sistere praesentem te queas. Ultimae tuae itidem bene mihi redditae sunt; & praefationem tuam ad *Capellanium* *Elzevirius* dum exspectat, adoptivorum libellos cum tuis poëmatibus recentis editionis ad me, qui hoc petieram, ut inspicerem, misit; quod bene vertit. Sic enim orthographiae rationem, quam es-

secutus, licuit mihi certo cognoscere, ne quid in hoc temere operis imputarem, & in reliquis, quid fueris sectatus, vidi; ita ut cum viderem inseruisse te etiam adoptivis quaedam de tuo patre, viro summo, & matre; crediderim mihi quoque licere in *Kinschotii* elegiis ad te duabus, Ecloga, & hendecasyllabo: carmen ejusdem non poenitendum, quod inscribitur votum pro salute *Dan: Heinssii*, & sermonem ad *Schelium* super natali Maronis, de quo memini aliquando scripsisse, ut sit multus in tui patris laudibus, nec oblitus tuarum: sicut etiam in quadam ad me scripta Ecloga, sed ea est longiuscula, & quia tantum versu uno aut altero tui mentio fit, fortassis ea nimium aliena videri queat, ut & similis mea ad *Kinschotium*. Sed de meis quid dicam? postea quam felicem tuam diligentiam in expoliendo vidi, mallet certe, de alienis securus, mea inter Camaenas tam cultas non apparere, comparata futura deformiora. Ode; (quia tibi probatur) & ecloga Thyrsis tolerabiles videri queant; elegiae non item; quia tamen & eas poscis, videbo an honestam eis faciem dare possim. Oblectare te vellem potius lectione eclogae cujusdam, quam scripsi anno superiore ad *Christianum Hugenum*, occasione tunc conspicui Cometae, in qua mythologiam astricam sum complexus facientem ad sidera, quae nomen habent a rusticis & nauticis rebus, ipsiusque *Hugenii* inventa celebravi. Sed quia prolixior est, quales Theocriti nonnullae, & piget exscribere, neque satis commode tabellariis committenda. Frater ejus *Ludovicus* certiorum te de Laurentianis in Hispania manuscriptis Ovidianis si non fecerit, faciet propediem, uti nuper mihi addixit. *Constantinum* monui, ut curam itidem haberet elegiae alterius ante annos xx. ad te conscriptae, sed id ipse videtur neglecturus. Jussi etiam conquiri *Niendalii* & *Strateni* poemata ab *Elzevirio*; item ut scriberet ad fratrem *Brunonis*, si quid ipse forte subministrare queat addendum adoptivis, quae ante duas hebdomadas, altero, quo acceperam, die remissi festinanter inspecta, ne quid a me morarum injiceretur, & nihildum mihi responsum est; credo praefationem ad *Capellanium*, quae exspectabatur, nondum advenisse. Si cum ea simul non miseris elegiam *Furstenbergii*, potest ea etiamnum mitti, saltem uti appendix ad primum adoptivorum subjungenda ad operis calcem, & ei, ut appendicem libri secundi, tunc postponenda reservabo *Kinschotiana* & mea, loci parum ambitiosus, jamque hoc indicavi *Elzevirio*, ne quid & illud ipsum moraretur. In carmine Graeco primi adoptivorum ultimo Britanni cujusdam, *Odoardi*, puto, *Persii*, memini vocem ultimam cum litura exaratam, vixque legi posse; eam in responforiis ad has denuo perscribere, si forte in tempore advenerint, sin minus, aut diligentius inspectam assequemur, aut parum errabimus convenientem substituendo. *Vlitii* Gothica, reor, jam in Sueciam appulerint; ipse tandem publice divortium cum uxore fecit; ut audio; nam saeculum est ex quo hominem non conspexi. ¹ Prosaicam metaphrasin Ixeuticorum Oppiani nihil de aucupii istius genere, cujus apud Propertium mentio, proderet *Vossius* arbitratur, a quo *Vlitius* habuit exemplar, ut curaret edendum, unicumque est tantum. Si quid ad me velis per *Elzevirium* id cura.

Ille

¹ Vide ad *Vossii* Epist. LXXXI.

Ille enim sciet ubi ego degam, hinc an in vicina ipsi Nort-Hollandia. Salve & Vale, mi Heinſi. Scribebam Hagae die 11. Martii C1C1DCLXVI.

EPISTOLA XXIII.

NIC. HEINSIUS

*Hadr. Wallio**Hagam.*

DE insidiis quod monebas nuper, unice eas mihi cavendas esse tecum sentio, mi Walli, nec ad eos sum excursurus, nisi munitus probe adversus omnem adversariorum insultum. Quia jam dudum praevidi hanc, quam nosti, rem me absente urgendam omni conatu, aut potius praecipitem dandam fore ab inimicis hominibus. Annus jam est, & quod excurrit, cum me tempestive satis in eventum quemcunque armavi, misso ad procuratorem libello per *Goefios*, patrem filiumque, qualem consulti juris nostrates non judici tantum exhiberi, si res forte trahi non posset ultra, sed actis etiam publicis inseri oportere censebant. Id si factum non est, culpa penes *Goefios* stetit, & procuratorem, a quibus etiam monendi fuerunt, si quid restaret per me faciendum. Noverunt enim illi per Procuratorem meum, utcumque laute haecenus & munifice a me habitum, rem totam supine tractari, sed in eo patrisſat quod per litteras me compellat rarissimas. Age cum ipso, quaeso, si fortassis obvium habebis, & sciscitare, si quid jam actis restet superaddendum. Id enim si ex re mea est, mitti ad me oportet formulam verbis solemnibus conceptam, quae judici exhibeatur de novo. Venio nunc ad poëmata mea, quibus supremam ab *Elzevirio* manum jam pridem esse impositam rebar. Quia tamen cunctari illum video, mittendam duxi *Furstenbergii* Elegiam, quam non semel petiisti, si addendam forte caeteris adoptivis judicas. Quod sine praefatione tua fieri haud oportet, ne facti invidia in me redundet, si vir Illustrissimus hoc institutum non probarit. Ex illo enim in scribendis versibus non parum profecit, uti vel ex epigrammate brevi, quod eam in rem mitto, poteris judicare. *Furstenbergianae* elegiae & *Keckianam* addo, quae aut aliis ejus versibus subjungatur, aut in libelli fine appareat. Si id serum jam est, utramque Elegiam remittas peto, occasione magis opportuna servandam. Venere id genus complura non ita nuper mihi in manum, Italorum praesertim: sed quia poëtice magis, quam Latine videbantur loqui, in censum non admisi. Tuis & *Kinschotianis* quis locus esset assignandus docui jam pridem *Elzevirium*. *Constantinus Hugenus* nimium ingenii sui severus ac morosus exactor est. Versus enim, qui ab illo damnantur, sunt concinni satis, dummodo ab adolescente conscriptos esse lectorem ne lateat. Litem hanc nostram tui facio arbitrii, ac proinde versus ipsos ad te mitto, ut te cenfore aut stent aut cadant. In meis praeter mentem meam nonnihil hinc illic per operas typographicas est peccatum. Errores praecipuas vix corrigi posse, nisi duae aut

Tom. III.

Qqqqq

tres

tres pagellae recudantur, sum opinatus; idque faciendum in se recepit *Elzevirius*. Gothica *Vlitii* prodisse in publicum, ac horum exemplar magno Regni hujus cancellario jam esse traditum intellexi. Prodierant hic terrarum, & in vicina Danica nuper duo aut tres libelli historici, veteri Islandica conscripti lingua, additis & observationibus haud inscitis, sed ego Barbara ejuscemodi vix moror. Magis sum laetatus, cum didici Budanam Bibliothecam *Matthiae Corvini*, in qua scriptores antiqui non pauci haecenus inediti lateant, partem potissimam Graeci, Caesari dono datam a Turcis: utinam non imponat nobis hic rumor, sed jam nimius sum. Vale, *Walli* jucundissime, Holmiae Suecorum a. d. xxiv. Martii Gregor. Anno cicioclxvi. De aucupii illo genere alias agam.

EPISTOLA XXIV.

HADR. VANDER WALLIUS

*Nic. Heinsio.**Holmiam.*

AD plures tuas jam dudum oportuerat responsum esse, mi Heinsi, sed differebam, sperans una cum absolutis adoptivorum libellis, id commode fieri potuisse, quae res ut perfiat, apud typographum instabo, neque sinam, ut occasionem differendi longius captet, vel ex perlatis huc ad me heri Illustrissimi *Furstenbergii* litteris: adurgeboque ut secundum adoptivorum libellum aggrediatur, primo jam ante mensem ad finem perducto, neque aliud caussatur, quam citius nequissime expediri praela: cum itaque Amstelodami in transitu jam ante dies octo viderem necdum aliquid secundi libri inchoatum, suasi, ut elegias duas virorum Germanorum primum potius libellum sequi faceret, eumque in finem postridie hinc misi praefatiunculam tumultuario satis opere, (ne quid ego in mora essem) si forte ita fieri placuisset; nam ipse videbatur malle appendicem post totius opusculi finem. Quid fecerit nescio; neque quidquam indicat iis in litteris, quibus inclusae *Furstenbergii*, heri ad me perlatis. Hodie ad Illustrissimum Principem rescribo, rem integram esse; jubeat ut volet, vel elegiam emendatam exspectari posse, vel totam omitti; neque enim quod inscio ipso nobis liberum videbatur, aequum esset ut faceremus invito. *Elzevirium* tamen rogavi, ut excusatiunculam meam sive jam formis expressam, sive manu exaratam (ego enim apographum non servavi) ad Illustriss. mittat, una cum tua praefatione, quae est ad *Capellanium*; unde patere queat, quid potissimum simus secuti, & captaveram occasionem, qua commendatum epigramma super restitutis Arminii trophaeis praemitteretur elegiae. Ego hic in vicinia *Brunonis* fratrem conveniam, & petam, si quid nobis deest. Libros ejus duos farraginis vernaculorum & Latinorum sine ullo delectu ediderunt Lugduni Batavor. in quibus nihil quod nos juvet, quaedam etiam tam fordida, ut pigeat meminisse; multa interfuerat nesciri; conqueritur frater clam se factum.

Vlitii

Vlitii & Gevartii obitum jam fueris edoctus, credo; uti & quod *Goefios* monu-
 nucram, de tuis rebus quid fieri opus foret ad te perscriberent. Certe esset
 mihi aegre, si inimicis hominibus esset, quare tibi insultare possent. *Christianus*
Hugenius ante ferias Paschales in Galliam abivit; fratres eum Bruxellas usque
 sunt comitati: *Constantinus* versus suos damnare pergebat; sed ad *Elzevirium*
 jam missos ajebam, & quae vellet, mutaret, suasi; quod audio eum fe-
 cisse. Si *Elzevirius Furstenbergii & Keckii* elegias esse velit pro appendice li-
 belli primi; ego *Casparis Kinschotii* & mea servabo pro appendice libri secun-
 di, & his etiam non meum nomen, sed amici Batavi praescripti, sublatum
 eodem consilio ex praefatione ad *Capelanum*. Ausus sum etiam ex *Montoseriano*
 auferre copulativam & ubi est, *Censuram & doctae rigidam &c.* quia minus
 concinnum videbatur efficere versum; & sensum etiam obscuriorem propter
 adhibitas copulativas disticho sequenti. In *Balthas. Bonifacii* epigrammate
 scriptum erat, *Cassa vetustatem*, manifesto errore; rescripsi *Casta*, &c. facili
 conjectura. Graecum epigramma multum ridebat *Vossius*, plurima non feren-
 da dicebat; praesertim $\rho\acute{o}\sigma\sigma\iota$ pro $\rho\acute{o}\alpha\sigma\iota$ vel (variata dilecto) $\rho\acute{o}\eta\sigma\iota$, & hoc usi-
 tatus ajebat, quare unum mutari passus sum, reliqua ad apographi tui fidem
 exhiberi volui. Operae alioquin satis diligenter in sua arte versati visi sunt,
 neque opus plus unica mea correctione, & me securum esse jubebat *Elze-
 virius*, etiamsi non inspicerem, secundo formas jam praelo committendas.
 Vale, mi Heinsi, scribebam Alkmariae apud Frisiabones, praefestine die v.
 Maji CIOIOCLXVI.

1. *Eduardi Persii*, in *Adoptivis* pag. 47.

EPISTOLA XXV.

NIC. HEINSIUS

Hadr. Wallio.

Alcmariam.

DE *Vlitii & Gevartii* excessu, quae significabas proxime nova omnino atque
 Dinaudita haecenus aures meas contigerunt, sed nec de *Christiani Hugenii*
 profectioe Gallica quicquam compertum habebam. Adeo apud vos vix quis-
 quam est, qui de rebus privatis vel tantillum ad me perscribat. Ipse *Vlitius*,
 qui solebat hoc in officio satis sedulum se praestare, nescio, quomodo tardior
 factus est, ex quo antiquitatem Barbaram sectari coepit. Itaque non nunc
 primum is mihi periit. De poematis meis doleo, & indignor tam lentum esse
 negotium: praesertim cum jam mense Februario per litteras apud ducem *Mon-
 toserium* professus sim, supremam libello manum esse impositam: qui me men-
 dacem nunc aliena culpa deprehendit. Nomen tuum cur in hac farrigine u-
 nus inter tam multos cupias latere, causam comminisci non possum, nisi quod
 de rebus divinis non eadem fortassis omnia sentimus. Sunt tamen illic plures
 hoc genus alii, & nemo invitus, sponte omnes sybolam istuc contulerunt.

Qqqqq 2

Persii

Persii Britannici carmen Graecum jure reprehendit *Vossius*, & omitti potuit, imo debuit. Malo tamen Britannum hominem ridiculum se praebuisse, quam aut nostratem, aut alium cujuscumque gentis. Hunc quod mireris, ut Graecae litteraturae peritum apud me laudarunt olim *Lucas Holstenius* & *Leo Allatius*. Nec meum fuit errores ejus emendare. Mitto αὐτόγραφον carmen, ut videas, si manus fortasse mea inter summam festinationem alicubi aberravit, quod tamen vix opinor. Si majore cum cura id perlegissem damnari potuit. Postea ad manum venere *Matthaei Brustoni* epigrammata tria aut quatuor, si non bona, *Persianis* saltem meliora. Erat enim is natione ac domo Graecus. In *Furstenbergio* nolui moram esse. Elegiam *Hugenii* emendatam operi accessuram esse nequaquam invitus audio, metuo tamen, ne alteram sive ipsius *Hugenii*, sive patris *Constantini* tollat ac premat *Elzevirius*, nam & hanc a patre conscriptam *Elzevirius* videtur opinari. Vale, *Walli* amicissime, Holmiae Suecorum CIOIOCLXVI. XXVI. Maii. In autographo *Bonifacii Casca*, non *Cassa* legatur.

EPISTOLA XXVI.

HADR. VANDER WALLIUS

Nic. Heinsio.

Holmiam.

IN *Furstenbergio* mora nulla fuit; ante enim finitum ab operis typographicis librum adoptivorum secundum, elegiam ex animi sui sententia emendatam remisit, cum epigrammatis aliquot nuperis suis, quae quia mei ipse faciebāt juris, ego publici facienda duxi, librique primi adoptivorum paralipomenis praemisi, & verbulo mentionem ejus rei feci in praefatiuncula, quae mansit, & in ea excusatio, quasi inscio *Furstenbergio* editio fiat, nec enim aliam substitui *Elzevirii* festinatio sinebat. Querimoniam de mora tuam causabatur: ita ei ego reus mendacii fui factus. Dum in secundo libro moratur *Elzevirius*, suasi, ut, quoniam unicum *Francii* epigramma post *Brunonia* sequeretur, hoc istis praeponeret potius, ut ordinatius subjicerentur, si quae *Brunonianis* accederent a fratre promissa, quae impetravi paucula, & quae forte jam videris ab *Elzevirio* missa; uti quoque Elegiam *Hugenii* non emendatam, in quo me fefellit *Elzevirius*, nisi jam excusam, sed nondum praelo subjectam miserit auctori inspiciendam, uti jusseram ego. *Persii* Britanni autographon remitto, in eo video exaratum ῥόοις, quomodo si fuisset in apographo, potuisset non mutari fortassis, nunc ex ῥόοις factum est ῥόησι (quoniam ita malebat *Vossius*) potius quam ῥόαισι. Quoad caetera nihil commemorare possum, nec apographum nec ullum exemplar penes me est. De nomine meo in ista farragine dissimulato causam comminisci quod nequeas facile credo: illam enim esse, quam es commentus, fuge suspicari. Si elegia, olim libello Hesiano ascripta, non fecerit te jam diu istius securum, ne feras aegre
uti

ut nunc id faciam tribus verbis. De rebus divinis qui recte volumus sentire, sentiamus oportet, Deum esse, Optimum Maximumque, ita neque ejus beneficiis, neque potentiae ponitur limes, quem ponunt perverse homines quidam novi, antiquos malos male imitati. Hinc liquido apparere reor, quinam in his dissidiis sint sequendi, quos etiam sibi sequendos tandem duxerat ¹ *Kinschotius* ὁ μακαρίτης. De nominis tamen mei ista dissimulatione ne omnia te celem (nam rationes sunt plures) scito, multum me ambigere, an nominis mentionem ullam mei faciendam sim passurus, quando *Kinschotii* poemata in lucem sunt proditura, & an aequum est hanc tanto ante mihi eripi libertatem? adde quod, cum de perfectione sui poematii leviter emendati nuper *Furstenbergius* conquereretur, scriberetque, malle se hac in re gloriae suae deesse, quam amicorum voluntati; & suo in illos officio; rescripserim ego, parum me sollicitum de gloria, non acquirenda homini, qui optimum putaret bene vivere & latere; reperisse tamen, quo nec meae nec amicorum voluntati deessem; scilicet curando ut mei versus, non nomen, palam exstarent. In meis autem publico dandis quam non fuerim parvus videbis, quando extra adoptiva cernes additam *Daphnin* eclogam, sive *Sidera*, ad *Christianum Hugenum*, de qua pridem scripsi; quamquam enim nihil haberet, cur adoptivis accenseretur, monui esse Heinsiani amici ad Heinsii amicum; & praecoccupandum putavi *Hugenum*, ne eam cum meo nomine faciat prodire, uti quondam *Thyrsin* meam fecerunt *Hamburgi*. Reperies etiam inter *Kinschotiana* Eclogam *Jolam* in obitum *Kinschotii*, in qua tamen mentio tui sub *Thyrsidis* persona. Nescio an memineris eam olim tibi praelectam, & ad te, *Schelius*ve, an *Gevartium* destinatam, nunc paululum refectam, reginae *Christianae Alexandrae* inscripsi, & de hoc instituto aliquid in praefatiuncula *Kinschotianorum* leges. Nescio an ultimis meis te fecerim certior, de jam in lucem emisso *Rubenii* libello super re vestiaria, & ad me *Delphos* curato, sed quem nondum vidi, dum in his locis haereo. Hodie penultimum appendicis folium ad *Elzevirium* remitto; non nisi unicum aut dimidium restat, quod cras aut perendie ad me deferetur. Ita paucos post dies poematum tuorum negotium tandem fuerit finitum, nisi forte titulus aeneae laminae incidendus, aut generalis aliqua praefatio restet. Litteras, si quas in posterum mittes, commodissime *Elzevirio* mandabis, si forte
spa-

¹ Hinc colligere liceret *Kinschotium*, a *Wallio* persuasum, sacra Romanensis Ecclesiae probasse, quod apertius Epist. xxxir. scribit *Heinsio*. Ex epistola tamen, quam mortis *Kinschotii* nuntiam *Jacobus Gronovius* praemisit poematibus ejus, apparet illum Hagae in domo Patris obiisse, sano judicio & Christiana fide usque ad extremum vitae spiritum, praesentibus amicis omnibus & concionatore *Stormontio*, cui in omnibus satisfecit, ut *Heinsio* scripsit *R. Kinschotius* ejus cognatus. Quare, si jam a *Wallio* corruptus fuerit, aut nimis hic credulus ex amici non satis cauti sermonibus spem aliquam de ejus ad Romanenses transitu conceperit, credendum est, poenituisse, & errore agnito in prioris disciplinae professione vitasse excessisse. Quis enim aliter *Stormontio* satisfacere potuisset, non video. *Heinsium* etiam sollicitat hic *Wallius*, quod & *Jacobum Wallium*, & alios ex eorum literis deprehendo fecisse, irritum conatu. Hinc vero discere licet, quam caute uti diversa sentientibus amicis deceat, & quam illi infamiam saepe memoriae mortuorum inurant.

Spadam sim abiturus, aut in Brabantiam saltem. Vale, Amicissime Heinſi & ſalve. Dabam Alkmariae, ix die Junii Anno cxcxcclxvi. cum vidi paucos ante dies ſolutam exiſſe Batavam claſſem meliori alite, ſpero, quam idem fere ſub tempus anno proxime elapſo.

EPISTOLA XXVII.
NIC. HEINSIUS

Hadr. Wallio.

Alcmariam.

POëmatum meorum volūmen tandem ad finem productum eſſe gaudeo, idque tua ſollerti ac fida opera, mi *Walli*. Horum copiam ut tibi faciat quamprimum Bibliopola, jam in mandatis habet. Si unum tantum exemplar accipies ab illo, & plura voles inter tuos fortaſſe circumferri, meo nomine ab illo petas, auferasque licet. Sum enim in aere tuo, cum multas alias ob cauſas, tum ob curatam libelli hujus editionem. Quae tuae venae addidiſti, ea mirum in modum mihi placuerunt omnia, uti & *Kinſchotiana*. In quibus tamen Elegiam de obſidione Leidenſi omiſſam video, tum pleraque alia ſic immutata, & ſic diſcrepantia ab iis, quae penes me ſunt, quantum aliud agenti in tranſcurſu licuit animadvertere, ut prorſus alia videantur. In *Hugenii* junioris elegia peccatur, ni fallor, in leges metricas, dum producit priorem ſyllabam in *idem*, *idem fatum*. Tua ad *Chriſtianum* ecloga, inſigni & erudita *Aether* habet, poſteriore in *Aether* correpta, me nescio an auctoritatem & exemplum ejus rei habeas in promptu. Nam apud Graecos per ἦτα, ut ſcis, effertur αἰθρη. *Brunonis* pleraque ſatis frigida ſunt, quae per fratrem acceſſerunt. Ut de *Ge-vartii*, & *Vlitii* morte ex tuis primum cognovi, ſic tibi nunc debeo, quod de *Rubenii* re veſtiaria in lucem emiſſa me docuiſti ignarum. Nos Reginam *Chriſtinam* hîc exſpectamus: qua praefente licebit nonnunquam de Muſis deque litteris ſermones inſtituere, praefertim cum & adſit nobis *Arnoldus Pomponius* Orator Gallicanus, vir ingenii mire elegantis. Nec expers eruditionis eſt noſter *Isbrandius*. Caeteroquin nullus hîc terrarum, cum quo dabatur agere de litteris: paucis Suecorum hac cognitione inſtructis, & illis etiam, qui inde cenſeri poterant, ſaſtidentibus quodammodo, ne mali politici videantur, credo, litteras humaniores, quas ſub primam adoleſcentiam hauſere. Vale, mi *Walli*, & me ama. Holmiae Suecorum cxcxcclxvi. a. d. 111. Quinctilis Gregoriani. Quae in ultimis tuis ominariſ de claſſe noſtra, rata fore auguror. Certe ipſa pugnae navalis initia ſucceſſus optatos habuere, de quibus rumor late eſt diditus, parem eventum par eſt ſperare, de quo nuntios impatienter exſpectamus.

EPI-

EPISTOLA XXVIII.

HADR. VANDER WALLIUS

*Nic. Heinsio.**Holmiam.*

A Pud fontes Spadanos aestatem exegi, mi Heinsi; quemadmodum ultimis meis, ut puto, te feceram certiore, eo me cogitare: & tandem e Brabantia reversus, editorum poematum tuorum exemplar jam Delphos reperi delatum, &, quoniam huc rursus properandum erat, in via obiter pervolvi; dum enim diligentiori lectioni me pararem, abstulit a me illud *Brunonis* frater, qui nullum sibi ab *Elzevirio* missum ajebat, quod tamen oportuerat factum, & petenti ego hinc abiturus promiseram pro sua opera, seque curaturum *Elzevirius* receperat, quem & moniturus sum, ut alterum *Graswinckelio* dari mandet, qui nondum se vidisse ullum ajebat, quando Bruxellis aliquamdiu cum ipso essem: neque dubito, quin tu id aut volucris jam, aut saltem velis: auferre plura nescio an ausim, & abuti tua liberalitate; novi tamen nonnullos, apud quos nomen tuum admodum optem in pretio esse; sique munusculo tali id commode fieri queat, non deero pro occasione partibus proxenetae. Elegia de obsidione Leidensi non erat in promptu emendata pro animi mei sententia, & ut digna videretur *Kinschotio*, estque in derelictorum numero, neque vacabat nunc eandem illi operam impendere, quam aliis quibusdam impendi. In poematis amici nostri ingenium nusquam desideres, alibi tamen curam & limam, praesertim in iis, quae habuit pro derelictis; in quibus advertas quandam tautologiam epithetorum, & phrasium; quae res in iis eliminandis negotium mihi faceffere solita, occasionem dedit immutandi quandoque multa, auctoris tamen mente & scopo servatis: quemadmodum in elegia super editione tuorum poematum factum vides, quae si operae pretium foret, singula enarrarem, & quae etiam eadem alibi in scriptis illius iterate reperiantur; & in eadem ipse, qualis penes te exstat, videbis. Illud tamen unum precor, ut compares; & me libere moneas, quid de successu hujus audaciae meae judices: si enim minus felicem in ea re me arbitreris, omit- tam potius omnia derelicta, neque edam unquam, aut hoc jure parcius utar, quemadmodum in Ecloga feci, ubi licebat: neque enim in ea tam frequens reperi illud, quod modo dixi inconcinnum: sublato tamen aliquando versu, aliquando substituto sententiam juvare visum. De posteriore in *Aether* quod mones, recte mones, & gratias habeo; neque auctoritas occurrit, nisi al- cujus recentioris pariter decepti ratione terminationis, credo, & incrementi. Utinam monuisses in erratis & emendandis; substituisseque quod placitum foret; velut *Aethra tenet*. &c. Mallem tamen legi, *Fert radians aether, vultus, formasque natantum*. & ita, si quandoque recudenda sit, edi velim, ejusque rei *Hugenium* quandoque non inscium esse finam, quem hac occasione praevenire bonum factum judicavi, ne ederet cum nomine meo factum, qui haud aliunde, quam

quam a tua approbatione, plausum merere dignus haberi debet. In eadem ecloga video excusum *In thalamos sic ut illa tuos* &c. ubi tamen memini operarum negligentiam emendasse, & annotasse, *sit*, imo & *Elzevirium* rogasse, ut ad talia juberet vigilantes esse; cum interpunctionum, & orthographiae, praesertim dubiae, ipse forsan negligentior essem: ut in mea Thyrsi excusum, *Nec reperistis apes consueti* &c. cum interpungendum foret, *Nec reperistis, apes, consueti* &c. In orthographia peccatum reperies saepe: nempe *fraenum*, *caetera*, *auxilio*, *exutae*, *zephyri*, *austro*, *Thyrrenus*, *lachrymas*, & talia plura, aut non magni aestimanda, aut ab lectore aequo facile condonanda. Optarem tamen non praeteriisse, *Idumei*, pro *Idumaei*, in ecloga Jola, ad Reginam *Christinam Alexandram*; quacum seu praesente de litteris, seu absente per litteras tibi sermo instituitur, o te beatum ter quaterque, quia notus & cum bona gratia id facis; ego ausus aliquid ignotus, nesciusque an temeritati sit veniae locus; quem tu, (si id forte commodum) Majestati ejus indicabis a clementiae titulo me sperare. De solitudine litterarum quod conquereris, idem ego conqueri merito possum, per sex totos menses, quibus abfui Haga; illud item moleste ferens, quod per absentiam hanc nihil poterim rescire de molitione adversariae tuae, quam audio interim in Sueciam ivisse. Spero aliunde ad te ejusce rei nuntium pervenisse, ita ut non improvise oppresserit, nil forsan ab illa metuentem. Paucos post dies iterum aut Hagae aut Delphis sum futurus, & tu quaeso de te tuisque rebus per *Elzevirium* me doceto. Vale, mi Heinssi, & salve. Scribebam Alcmariae admodum festine, a. d. xii. Octobris. Gregor. cxcclxvi. Ignosce quaeso lituris ex characteribus male exaratis, immo semi-barbarae Epistolae in loco, ubi de litteris, non dicam loqui, sed vix cogitare tutum.

EPISTOLA XXIX.

NIC. HEINSIUS

*Hadr. Wallio.**Alcmariam.*

GAudeo equidem, ut qui maxime, a fontibus Spadanis fospitem te rediisse. Poëmatum meorum bina exemplaria jussus per me est tibi suppeditare *Elzevirius* hodierno die, quorum alterum tibi habebis, alterum, cui libebit, amicorum, trades. Nam de *Grafwinkelio*, quem virum fata jam subduxerant, nequicquam cogitabam. Plura tibi cuperem oblata: sed in hac editione minus mihi satisfacio, quam alia castigatior propediem excipiet. Si lectores liber & emtores inventurus est, sin minus probabitur, & plausu carebit, non est quod mea nimis officiosa opera nolentibus obtrudatur. Certe cum viginti & plura exemplaria jam dividenda inter Batavos Amicos curarim, vix tres quatuorve levi gratiarum actione haecenus sunt defuncti, reliquis testari gravatis librum in manus suas devenisse. Gratos se praestiterunt *Petrus Grotius*,

tius, *Jobanne Georgius Graevius*, *Isaacus Gruterus*, Officium insuper hactenus habent tres *Hugenii*, *Ommerenus*, *Witfius*, *Slinglandius*, *Goessii* pater & filius, *Vossius*, *Gronovius*, *Gudius*, duo *Junii*, *Colinius*, *Piso*, alii. Tum, quod miror maxime, *Blyenburgius*, & *Beuningius*, cactera officiosissimi homines. At gratias agere non est dedignata Regina *Alexandra*. Amici etiam, qua *Hamburgenses*, qua *Dantiscani*. Nam ex Gallia Italiaque necdum constat, eo librum devenisse: significabat *Bigotius* duodeviginti libri hujus exemplaria ad se perlata esse, quae *Lutetiam* mittenda, ac amicis communibus offerenda quamprimum esset curaturus. De *Goessis* nil miror: qui toto anno vix semel scribunt. Filio tribus litteris continuis nuper res meas commendabam, ne quid mihi detrimenti pareretur ab illa, quam scis. Magnos enim strepitus per hanc aulam excitavit, nec minores, puto, excitabit apud *Proceres* nostros, nimio rerum suarum successu elata, & repulsae, quam apud me experitur, impatiens. Ut hac molestia me expediam, denuo fieri flagitabo potestatem mihi ad meos excurrendi sub hybernâ tempestatem. Quod si impetro, *Bibliothecam* & supellectilis pretiosiora deponam apud illos, qui *Reginae* res in hac civitate agunt. Id enim hi in mandatis ab *Augusta* principe jam habent, quam *Hamburgi* in transitu mulier putidissima salutare voluit. Excursum in patriam vel eo magis urgeo, quod rebus infectis hinc propediem sit discessurus *Illustrissimus Isbrandius*, post quem *Roscium* frustra in hac scena saltavero. *Bremenenses* turbae nisi mature componuntur, mea opera rei publicae nostrae hîc terrarum omnino erit inutilis. Unde tamen id emolumenti ad me fortassis redundabit (nam nil pro certo adfirmare possum, quamdiu facultas profectionis haud datur) ut te coram complectar, utque de studiis communibus operose colloquamur. Vale; *Walli* jucundissime, & me ut hactenus ama. Exarabam *Holmiae* Succorum
CICICLXVI. a. d. xv. Novembr.

EPISTOLA XXX.

HADR. VANDER WALLIUS

*Nic. Heinsio.**Holmiam.*

EGO certe gratum animum testari usque non desinam pro insigni tua munificentia, qua jam antea fui usus, ut duobus prostremis exemplaribus non sit opus, quae denuo offers, nisi forte non cogitaris de *Joanne Baptista Steenbergio*, cujus inter adoptiva carmen comparet, si idem est, quem ego *Parlamenti Methliniensis* assessorem audio esse, virum humanitate insigni, & qui nuper, illic cum forem, summopere familiaritatem mecum inire optaverat, nisi temporis illius fortuna invidisset. *Blyenburgius* ante paucos dies *Haghae* mihi fuit conquestus litteras suas rarissime ad te perferri; auctor ipsi cram, ut eas in posterum committeret *Bisdommero*; itaque vix dubito, quin de grato quoque animo ipsius jam testem epistolam acceperis; uti & plurimorum

Tom. III.

Rrrrr

rum

rum aliorum, quibus aut occasio defuerit, aut forte ad quos tuum munus nondum devenerit; de *Furstenbergio* miror, quod fileas, neque enim ego hunc etiam crediderim numerari inter inofficiosos. Ego hîc etiamnum hæreo fere in media Barbarie procul a libellis, & forte diutius moraturus sum, interim tuas ad *Elzevirium* semper tuto curare poteris. De adventu tuo admodum lætarer, accideretque ille mihi gratissimus, modo absque tuo periculo foret; in has enim terras pedem vix intuleris, quin tui sit potitura illa, quam novimus, & cogeris facere invitus, quod sponte noles; qua de re puto jam antea facpissime monui, & videris aut non meminisse, aut negligere; cum minimè sit negligenda. Ego circumspicere coeperam an non alibi in Brabantia quiete & jucunde aetatem degere posthac possem: sed instantium bellorum metus & tricae novae hereditatis cuiusdam adeundae, nescio an repudiandae, quae mihi hîc nectuntur, vetant de secessu isto ulterius cogitare. Poëmatis tuis & emtores & lectores & plausum opto; in meis omnem, quae melior videbitur, mutationem pro libitu ut adhibeas non tantum concedo, sed etiam precor, ut facias. *Duo* tamen pro *duas*, alibi extare videor meminisse. De caeteris alias. Interim salve & vale, mi Heinse, tibi que sit, qui instat, annus admodum auspiciatus. Alkmariae Idibus Decembribus stylo Gregor. c1010CLXVI.

EPISTOLA XXXI.

HADR. VANDER WALLIUS

*Nic. Heinse.**Holmiam.*

AD ultimas meas responsum expectaveram, sed credo te distulisse ob professionem tuam in has oras, quam aliunde inaudivi, ubi praesentia tua frui opto quidem tantum quantum quis alius, modo illud, quemadmodum monui semper, tuto fieri queat, quod ad te quidem attinet. Nam nupere Hagam reversus, quid in ordinum comitiis de causa tua actum esset intelligens, non omnino te securum, & fidere litteris in eam rem ad te datis, judicavi; unde officii mei putavi esse hoc saltem monere & suadere, ut in proximo subsistas iis in locis, in quibus sententiae Senatus Batavi non solent executioni mandari; quod in Gelriae solo commodissime fiet; nec enim aut Trajectensis provincia aut Frisia te tutum praestent ab insidiis adversariae tuae aut eorum, quibus ipsa curae est. Ubi autem citra periculum eris, facile despiciemus quomodo aliter impetrari securitas possit. Haec admodum festine, & ignosce si rationes non addam, quae plures & longioris epistolae forent. Scribebam Hagae raptim die xxvii Martii c1010CLXVI.

EPI-

EPISTOLA XXXII.

HADR. VANDER WALLIUS

*Nic. Heinsio.**Hagam.*

K Alendis Martiis, amicissime Heinsi, ad me cum tuis litteris fuit perlatus Prudentius tuus. Officii mei fuerat illico rescribere, sed ipse venire moliebar & molientem mala febris oppressit, ita ut nunc ego hîc in morbo cubem: qui si hinc abeundo vitari potuisset, utinam jam dudum (prout animus fuit) Haghâ properassem, studio videndi reducem Tuscum Principem hereditarium, patronum Musarum, quarum nomine gratulatoriam conceperam oden, inserta honorifica tui mentione. Quid enim minus tibi pro tot beneficiis rependam, aliunde non solvendo, quam tui toties meminisse, quoties occasio offertur? De aucto stipendio tuo inaudieram aliquid, & *Bornius* narrarat, qui hîc fuit, quasi non fuisset: quod si maneat saluum, de cetero nihil est, puto, quod conqueraris, & tuo voto servit aemulatio minus benevolentium, ipsis aut nescientibus aut invitis. Gratissimum prae reliquis habeo munus tuum Prudentium, vel sola (ut aliae deforent) causa egregiae erga Deum & religionem pietatis: in eo quam multa advertas, quae erudire queant hominem, quisquis audire vult & esse Christianus? nunquid autem & nobis, mi Heinsi, ad hoc aetatis jam provectis, minime negligenter habenda praefatio, quam scribis non ad Cathemerina oportere referri peculiariter, sed ad universum Prudentii opus poëticum? perplacent quae observas ad illius praefationis versum 22; subdubito tamen, an non eo loci aptius retinendum sit vulgatum *Τὸ volans*. Praefationem vero, quae nunc ante librum *περὶ σεφάνων* legitur, (in qua jambos & suos trochaeos tantum recenset poëta) arbitror illic recte collocatam, nisi mallet post finem libri ejusdem legi, aut potius *καθ' ἡμερίων*, quod ego magis probem, quoniam in ea martyrum nulla mentio, multa autem comparatio e rebus quotidianis petita. Quod ad Hymni quarti Cathemerinôn versum 59. in addendis notas, posse colligi non usum Clementem sacrae Scripturae Latina illa, quam nunc habemus, versione, vide an conciliari queat cum Hymni tertii versu 127. & seqq. item 147. & seqq. lib. cod. ubi disertissime expressum habes famigeratum illud, *ipsa conteret caput tuum*; aut fuerit existimandum (ut quidam existimant) etiam ita olim habuisse Graecam (nam ex Hebraeo nihil certi colligas) *τῶν LXX* versionem, quandoquidem & Gracorum Patrum nonnulli sic explicent istum locum, mutuis hodie dissentientium inimicitiis vexatum tantis, quantae sunt positae inter Serpentem & Mulierem, quas ex omnium piorum animis exesse precor; ut curis tuis in Prudentium secundis omnia fausta, mi Heinsi, & ut non verborum tantum ac syllabarum, sed inprimis rationem habeas rerum; monitisque utare, quae sunt in D. Hippolyti hymno versu 30. & seqq. ut fruire voto tui vatis, quod in hymno

Rrrrr 2

Se-

Sancti Romani penultimo & ultimo versu. Sed haec tibi in aurem, haesique diu, an eam tibi vellerem, velli tamen, quamquam praeter morem meum, qui sciam hanc non esse rem mei aut optantis aut volentis, sed Dei miserantis, qui hoc indulsit amicissimo utrique nostrum ¹ *Kinschotio*, tibi extremis verbis etiam optima quaeque apprecanti, cum eximie commendaret sincerum animi tui candorem, & singularem indolis bonitatem, cui quam nequiter saepe ego audivi illudentes homines improbos, infortunioque & malis tuis gaudentes; sed adversus horum insultus, eaque ipsa mala, utilissimum fuerit attente pervolvissse Sancti Prosperi sententias Aldinae Prudentii editioni (ejus tibi si copia est) adjunctas ex D. Augustino, cujus Confessionum aureolum libellum itidem operae pretium fuerit in eundem finem bene ruminari, a *Francisco Petrarcha* jam sene alibi admodum laudatum verbis, quae utinam ita meminisssem, ut tibi referre possim. Sed desino, ne nimius videar. Salve, mi Heinssi, & vale melius, quam ego. Alckmariae. CIOCLXVIII. VI. Martii.

¹ Vid. ad Epist. xxvii.

EPISTOLA XXXIII.

HADR. VANDER WALLIUS

Nic. Heinssio.

Hagam.

EPISTOLA tua, quae die nono hujus mensis ad me scripta, heri demum mihi reddita fuit; mi Heinssi. Valetudo quidem mea meliori loco esse, nondum tamen omnino restituta videtur, ita ut aperto frigidoque aëri non me credere audeam. Oden meam, prout petis, prima occasione ut habeas, faxo. Oblitus fueram monere de hymno D. Laurentii vers. 567, ubi notas in omnibus tuis libb. Altinio excepto, esse, *jocantur*, & noluisse te contra ire, non satis me capere, quid illic istud verbi sit; viderique potius e vestigiis cod. Altini in quo, *letantur*, formandum, *levantur*. De Aldina editione secunda, cujus meminit *Giselinus*, est item quod dicam, me putare illum habuisse pro secunda, vetustam quandam ¹ editionem sine loco & nomine typographi, cui praefixa Aldi praefatio ad *Danielem Clarium*, habetque praeter carmina Prosperi etiam adjuncta quaedam Joannis Damasceni, Cosmi Hierosolymitani, Marci episcopi Idrontis, & Theophanis e Graeco versa: est penes me ea editio, & si quid e typorum formis conjecturae dandum, Basileensem credam. Orthographiae quoque rationem, quam potissimum fueris secutus, optem scire, codicumne saeculi Prudentiani exprimentium morem, an vetustioris, recentiorisve, aut ex omnibus mixtam, quemadmodum mihi appa-

¹ Hanc editionem esse unicam puto, & nullam esse Basileensem tam antiquam, sed hanc esse partem Poetarum Christianorum, quos *Aldus* Anno 1501. vel ut alii 1502. edidit. vide *Fabric. Bibl. Graec. t. x. pag. 332.* & *Mettair. Annal. Typog. t. ii. part. i. p. 148.* nam post Prudentii carmina *Aldi* nomen legitur, & Venetiis Anno 1501. edita dicitur, quod forte latuit *Wallio*.

apparet. De operarum mendis in altera editione cavendis superfluum fuerit addere, quamvis aliquas insigniores notassem, sed scedula non est in promptu. Vale, Heinsi amicissime. Alckmariae die 15. Martii CIOIOCLXVIII.

EPISTOLA XXXIV.

HADR. VANDER WALLIUS

Nic. Heinsio.

Hagam.

NUdius tertius tuas Amstelaedamo accepi; avebam quidem illico respondere, mi Heinsi, sed dum essem in eo, nescio, quod taedium scribendi me capiebat, ita ut vix par essem effingendo exemplari nitidiuscule descripto meae odes, quod tamen, ut petieras, hîc habes, cum praefixa excusatione ad Serenissimum principem Cosmum. In tuos usus alterum hîc subjeci. Vale, mi Heinsi, & bene rem gere. Alckmariae die XVII. Martii CIOIOCLXVIII.

ODE

Super Serenissimi Etruriae Principis

COSMI

in Batavos adventu, bello Britannico secundo finito.

DIro fugata cum comitum grege
 Nostris Enyo finibus, impii
 Ostenta belli post cometas
 Auspicio meliore fulget
 Terrae benignum sidus Etruriae,
 Princeps juvandis Aonisin gerens
 Fatale nomen, nil vetusto
 Progenies minor ipse Cosmo;
 Tot derelictis urbibus Italiam,
 Arni querelas neve morans sui,
 Dignatus extremos Batarvos
 Visere magnificus viator.
 Utcunque parvam grandibus insolens
 Aptare rebus, Melpomene, chelyn,
 Assurge; dic heroa tantum
 Oceanoque patrique Rheno

Venisse gratum, praecipue tibi;
 Rursum jacebis quae citharam tenens
 Fago sub alta populove
 Absque metu: neque dehinc repente
 Unquam, minaci territa classico,
 Voces, tumultu non sine civium,
 Ad arma, clamantes, ad arma
 Aure bibes pavida per atras
 Noctis tenebras, pulsaque densius
 Rauci sonoris tympana, tum cavo
 Ex aere displosum tonitru
 Indomitumque ratis fragorem
 Flamma crematae, quo simul ardua
 Ictu domorum tecta gravi, simul
 Concussa fundamenta late
 Imma solo tremuere circum.
 Rrrrr 3

Non

Non jam in remotis nubibus aetheris
Caliginosi, mentis imaginum
Lymphata spectro, praeliantium
Agmina vi super irruentem,
Saevis recenti tabe fluentia
Calcanda dantem membra jugalibus,
Vidisse Bellonam putabis,
Sanguineo horribilem flagello;
Quam pone totis emineat rotis
Thorace Mars indutus abeneo;
Iramque dein Discordiamque
Ac pariter Rabiem volantes.

Cessere nimbi. laetitiae jubar
Tuscis ab undis sol tuus advehit.
Plectro sonaturas resumo
Arte nova bene temperatas
Intende chordas. materies lyrâ
Cosmus minori, sin tamen altior,
Et celsa virtus Heinsianum
Poscat epos potius tubamque,
Impar voluntas non quoque gratia
Vilis carebit. carmina nobilis,
Vecti peregrinas ad oras,
Hospitis haec monumenta sunt.



ERRATA In Tom. III.

Pag. 4. lin. 22. MDLXIX. *lege* MDLXIX.

9. l. 26. tuis *leg.* tuus
 21. l. 11. senis *leg.* sentis
 35. l. 25. graviter *leg.* gnaviter
 37. l. 25. observant *leg.* observanter
 48. l. 21. essem *leg.* essent
 70. l. 23. verus *leg.* versus
 71. l. 2. Frabricii libro Jansenius *leg.* Fabricii l. Jan-
 sonius
 73. l. autep. Fratrem *leg.* Fratres
 81. l. 25. Moroni *leg.* Morioni
 84. l. penul. Crispinis *leg.* Crispini
 101. l. 13. Dalogitum *leg.* Dialogistam, & mox Dia-
 logista
 102. l. 6. occupationem *leg.* occupationum
 107. l. 6. M. Lino *leg.* M. Livio
 113. l. 33. lectionem *leg.* lectione
 131. l. 25. Hyacanthinis *leg.* Hyacinthinus
 164. l. 9. Gemblacensis *leg.* Gemblacensi
 207. l. 15. Janigio *leg.* Jarrigio
 209. l. 16. Janigios *leg.* Jarrigios
 224. l. 4. Daventriam *leg.* Leidam
 230. l. 5. ille *leg.* illa
 239. l. 7. Kal. Jan. *leg.* Kal. Jun.
 246. l. 7. profici *leg.* proficisci
 206. l. 32. omnes l. delendum
 270. l. pen. scribat *leg.* scribax
 279. l. 12. illum *leg.* illa
 l. 21. nostro *leg.* nostros
 292. l. 35. ter *leg.* per
 294. l. 10. ab *leg.* ab
 311. l. 27. Borharti *leg.* Bocharti
 317. l. 25. Rosentagio *leg.* Rosenhagio
 l. 28. cognitus *leg.* cognatus
 339. l. 6. illum *leg.* illam
 345. l. 7. Piseae *leg.* Pifae
 347. l. 13. sui *leg.* suis
 375. l. penul. sibi *leg.* tibi
 376. l. 15. Superfunt *leg.* Superfunt
 415. l. 6. tum nobilem &c. *leg.* tam. n. u. venam
 471. l. 23. deferendum *leg.* deferendam
 472. l. 1. visu *leg.* risu
 493. l. 33. profectum *leg.* profectam
 508. l. 16. anguis *leg.* angues
 510. l. 11. patrum *leg.* patrem
 513. l. 17. vocamus *leg.* vacamus
 l. 27. cam *leg.* ca

Pag. 516. l. 23. mecum *leg.* meum

557. l. 17. Plinium *leg.* Plinio
 558. l. 18. Isaac. Vossius *leg.* Is. Vossio
 576. l. pen. fuerit *leg.* fueris
 629. l. 14. Leidam *leg.* Parisios
 630. l. 4. Leidam *leg.* Parisios
 633. l. 18. N. Heinsius J. Vossio. *leg.* Jsaac. Vossius Nic.
 Heinsio.
 661. l. in notis. Paraphrasis Prosaica *leg.* Para-
 phrasin Prosaicam
 667. l. 4. Venetias *leg.* Amstelædammum
 706. not. l. 1. sparsum *leg.* spurium
 710. l. 21. benerte *leg.* bene te
 715. l. 24. quae pluribus *leg.* quod
 727. l. 12. nec aream ista in stantibus *leg.* ne carcæm
 ista instantibus
 729. l. 34. Plana *leg.* Planta
 732. l. 36. ἐπὶ τοῖς αὐτοῖς *leg.* ἐπὶ τοῖς αὐτοῖς
 739. l. 28. inum *leg.* in um
 740. l. 23. Principali *leg.* Principalis
 745. l. 26. ergo *leg.* erga
 753. l. 16. Lycei *leg.* Lycei
 762. l. 19. angusto *leg.* augusto
 l. 21. poteris *leg.* potueris
 789. l. 25. μὴ ποῖς *leg.* μὴ ποῖς & mox Τριπύλης
 790. l. 39. videres *leg.* rideres
 799. l. 23. opimus *leg.* opinus
 805. l. 19. obstrueta *leg.* obstricta
 806. l. 11. collo *leg.* coelo
 l. 33. me *leg.* meae
 809. l. 8. certi *leg.* certe
 810. l. 13. Barlour *leg.* Barlouw
 813. l. 3. debiti *leg.* debita
 817. l. 37. libraria tua *leg.* librariae tuae
 822. l. 3. violari *leg.* violatae
 829. l. 8. Nic. Heinsius. *leg.* Ez. Sphanhemius Nic. Heinsio.
 831. l. 2. Ezec. Spanhemius. *leg.* Nic. Heinsius Ez. Span-
 hemio. Haidelbergam
 841. l. 5. Typographicorum *leg.* Typographicarum
 851. l. 17. cautus *leg.* causas
 804. l. 5. alienis *leg.* alienas
 867. l. 7. domum *leg.* donum
 871. l. 15. propendendas *leg.* perpendendos
 874. l. 3. Hagae *leg.* Haga
 l. penul. quos *leg.* quo
 876. l. 9. adverso *leg.* averso
 883. l. 24. Christianae *leg.* Christinae

